


To Ngü Mürü ka Me
bete Gina Ngü (S
Sudan)



Mündü: To Ngü Mürü ka Me bete Gina Ngü (S Sudan) New
Testament+

To Ngü Mürü ka Me bete Gina Ngü (S Sudan)
Mündü: To Ngü Mürü ka Me bete Gina Ngü (S Sudan) New
Testament+

copyright © 2005 Wycliffe Bible Translators, Inc.

Language: (Mündü)

Contributor: Wycliffe Bible Translators, Inc.

All rights reserved.

2020-11-19

PDF generated using Haiola and XeLaTeX on 21 Feb 2024 from source files dated 29 Jan 2022
9787304f-bc80-5421-9b63-c767eb819b6f

Contents

Gina Ngü	1
Matayo	66
Marako	120
Luka	153
Yüwane	206
Wü Mürü Tima ka Yesu	243
Rüma	295
1 Korinito	319
2 Korinito	341
Galatiya	356
Efeso	364
Filipoyi	371
Kolosayï	377
1 Tesalonika	383
2 Tesalonika	388
1 Timoteyo	391
2 Timoteyo	398
Tito	403
Filemüna	406
Ebere	408
Yakobo	427
1 Petero	434
2 Petero	441
1 Yüwane	445
2 Yüwane	451
3 Yüwane	452
Yudi	453
Ngü te sere te-ye	456

Gina Ngü

Masere si-ngü

Gina Ngü de gina buku esüka wü buku gbü *Ngari Me 'buru. Fingangü ka mere bi wü kpara gü ba, "Müse ba buku ka Gina Ngü ne me-ye."

Gina Ngü ngbü esere nga wü ngü, te Me mere ta gügü te enga gina ne. Ah ngbü esere ngü ka kotö ake kpí, te Me mere, de wü e gbü wü 'buru. Ah ngbü kphah esere ngü ka gina wü kpara, ta te Me o ewü, wü kundu nih, Adama ake Awa ne. (Gina Ngü 1-5)

Gina Ngü ngbü kphah esere nga mere ngu ta te si, fü ah amörö mere bi wü kpara füh kotö ne 'buru, fü Me ayia aküwa bü nzö wü Nüwa de wü di ye ne. (Gina Ngü 6-10)

Gina Ngü ngbü kphah esere nga ngü ka Abarayama, te di de kundu ye wü di enga *Yisaraye, wü kpara te Me fe ewü, fü ah ayia anzö *ngüte de ewü ne. (Gina Ngü 12-25)

Gina Ngü ngbü kphah esere nga ngü ka Yisaka, ye Abarayama (Gina Ngü 21-27), abe kphah te ye Yisaka de iri ye *Yakobo, ta te Me du fü iri na tine *Yisaraye ne. (Gina Ngü 25-35)

Gina Ngü ngbü kphah emala nga ngü ka *Yüsefa, ye Yakobo, de wü di enga ni ye. (Gina Ngü 37-50)

Dene ngü ta te Me mere te enga gina

¹ Ta gügü, te enga gina, Me o tö ake kpi me-ye. ² Ta gbü sikipi la, ngu ngbü ka-ye füh kotö ne bü faaa. Fü sü angbü 'duwa mbirri. Fü *Nzila Wazi Me akoro angbü endoro füh ngu la, da emere tima.

³ Fü Me ayia amala ngü, gü ba dene, "Sü lofo elofo." Fü sü ayia alofo 'duwa raaa! ⁴⁻⁵ Fü Me aceka sü te elofo la. Fü ngü la areke gbü jijia na afa sü. Fü ah aye süka malofu sü ake mbiri sü. Fü ah agü iri sü malofu la, gü ba, "ra-sü". Fü ah agü iri mbiri sü la, gü ba, "biti". Dela tima ta te Me mere gbü gina sikipi.

⁶ Gbü e'ba'basu sikipi, fü Me ayia amala ngü, gü ba dene, "Kpi koro ekoro etü ngu la, de ah ye süsüka na, de gara ngbü kpa tikpi, de gara ngbü kötö." ⁷ Te di bala, fü kpi ayia akoro esüka ngu la, ae gara kpa tikpi, fü gara angbü nda-ye kötö, kphah baka te Me mala la. ⁸ Fü Me ayia agü iri e la, gü ba, "kokpi". Dela tima ta te Me mere gbü e'ba'basu sikipi.

⁹ Gbü ehabata sikipi, fü Me ayia amala ngü, gü ba, "Ah le de ngu, te ngbü faaa ne, biti te-ye ebiti, 'buru gbü sü biringbö, de ngu ngbü gbü sü ka-ye kpi kpi ye, de tö ngbü nda-ye kphah gbü sü ka-ye kphah

kpi kpi ye." Fü e la ayia amere te-ye kphah bala. ¹⁰ Fü Me agü iri ngu, te biti te-ye la, gü ba, "*mere yi-ngu". Fü ah agü iri sü, de te ngu irü tete na, gü ba, "tö". Fü Me aceka ngü de te engu mere ne. Fü ngü la areke gbü jijia na afa sü.

¹¹⁻¹² Fü Me ayia amala ngü, gü ba, "Wü jürü e, baka wü gü, wü rü de wü kpü, kö ekö füh kotö ne, de wüh ga, wüh ri, de nguwa ewü di ekö, da eri fi bala füh kotö sene." Fü wü e la akpo kphah da ekö, da eri te nga ewü bala, baka te Me mala. Fü Me aceka ngü de te engu mere la. Fü ngü la areke gbü jijia na afa sü. ¹³ Dela 'buru tima ta te Me mere gbü ehabata sikipi.

¹⁴ Gbü ehabata sikipi, fü Me ayia amala ngü, gü ba dene, "Wü ra de wü fe, de wü küfara, wüh koro ekoro, angbü eküte kokpi, de wüh ye süka biti ake ra. Fü ewü adi kphah egü tamu wü sikipi, de wü re, de wü laki ka wü e 'buru. ¹⁵⁻¹⁶ Fü ewü adi kphah elofo sü füh kotö 'buru." Te di bala, fü Me ayia ao ra ake fe, de wü küfara. Fü ra angbü nda-ye miri ka ra-sü. Fü fe angbü nda-ye miri ka biti. ¹⁷ Me o wü e la 'buru kpa tikpi, de wüh di elofo sü füh kotö kpakine, ¹⁸ adi eye süka biti ake ra. Fü Me aceka ngü de te engu mere la. Fü ngü la areke gbü jijia na afa sü. ¹⁹ Dela tima ta te Me mere gbü ehabata sikipi.

²⁰⁻²¹ Gbü e'bu'buruve sikipi, fü Me ayia amala ngü, gü ba dene, "Wü si, wü angbe cögbörö nü ngu, de wü gara jürü e, te ewü endoro gbü ngu 'buru, koro ekoro, de wüh sibi esibi gbü ngu la." Fü ngü la amere te-ye kphah bala. Fü Me adu kphah amala ngü, gü ba dene, "Wü lu, de wü gara e, te ewü endoro tikpi 'buru, koro ekoro." Fü ngü la amere te-ye kphah bala. Fü Me aceka wü ngü de te engu mere la. Fü ngü la areke gbü jijia na afa sü. ²² Fü ah adu ato wazi fü wü si, gü ba dene, "Wü di ezu azu, de wü sibi asibi gbü wü ngu le 'buru." Fü ah adu kphah amala ngü fü wü lu, gü ba, "Wü sibi kphah esibi füh kotö ne." ²³ Dela 'buru tima ta te Me mere gbü e'bu'buruve sikipi.

²⁴⁻²⁵ Gbü sikipi ma'diya, fü Me ayia amala ngü, gü ba dene, "Wü nü ka gü, de wü nü ka koti, bete wü gara jürü wü e te ewü endoro andoro füh kotö ne, koro ekoro te nga nzö nguwa ewü 'buru." Fü e la ayia amere te-ye kphah bala. Fü Me aceka ngü, de te engu mere la. Fü ngü la areke gbü jijia na afa sü.

²⁶ Fütanga ngü la, fü Me ayia amala ngü, gü ba dene, "Ani mere la kpara, de ah ngbü gegege baka ani. Fü ani ato wazi fefe, teka de ah ngbü miri gbü nzö wü gara wü e, de te ani mere, baka wü nü de wü lu, de wü si ne 'buru." ²⁷ Fü ah adu amere

wü kpara la kpaḥ bala. Ah mere ewü komoko ake wüüruse. ²⁸ Fū ah ato wazi fū ewü, gü ba, “Yi ngbü da ebī wü ye, de wü nguwa yi sibi asibi fūḥ kotō ne 'buru. Fū yi angbü gbü nzō gara wü e, de te ma mere ewü, baka wü nü, de wü lu, de wü si, fūḥ kotō ne 'buru.” ²⁹ Fū ah adu amala gara ngü fū ewü, gü ba dene, “E-mazü ka-wü ena adi de wü rī zü, bete wü rī-rü 'buru.” ³⁰ Fū ah adu amala ngü fū wü nü, de wü lu, de wü gara wü e te ewü endoro andoro fūḥ kotō ne 'buru, gü ba, “Nda-wü e-mazü ena adi de wü kpa gü, de wü gara kpa wü e 'buru.” ³¹ Fū Me ayia aceka ngü de te engu mere la 'buru, gü ba, “Ah reke 'duwa bahene-la.” Dela 'buru tima ta te Me mere gbü sīkpī ma'diya.

2

¹ Dela ngü te Me mere, te engu o tō ake kpi, de wü e gbü wü 'buru. ² Me nza tima la gbü wü sīkpī ma'diya. Fū ah adu afe te ye gbü sīkpī lorozi. ³ Fū ah ayia afe sīkpī la, ao 'duwa sīkpī ka-ye tete na. Fū ah amala ngü, gü ba, “Wü kpara te ni mere ewü ne, wüḥ ena angbü efe te-wü gbü sīkpī lorozi, kpaḥ baka ni, te ni fe te-ni, fütanga mere bi tima, ta te ni mere ne, teka fū ewü amaka wazi gbü ngü la.” ⁴ Dela wü ngü ta te Me mere te engu gina.

Dene ngü ka Adama ake wara ye

Ta gügü, te Me o tō ake kpi tete na, ⁵⁻⁶ wü siti wü e, baka wü ti, de wü siti gü, kö ta nda-wü la de, angü Me o agō fūḥ kotō sene, ta nda la de. Ndo kpaḥ ma, angü kpara, te ena adi esō e, nda kpaḥ ma. Amba ngu ngbü edü ka-ye bü esa tō. Fū wü e angbü ega di. ⁷ Fū Me ayia acō tō, afa komoko gbügbü na. Fū ah ayia auru wazi ye gbü tō, de te engu fa la. Fū e la ayia awo wazi, akoro kpara tete.

⁸ Fū Me amala ngü, gü ba dene, “Ni ena ao yi ka-ni to kpa fūgō, agbü sü de iri ye Edene, teka fū komoko la anü angbü gbügbü na.” ⁹ Fū ah adu amala ngü, teka de nguwa wü rü, de wü züka nguwa rirü ka mazü, kö agbü yi la. Fū wü e la akō, aga, angbü eri agbü yi la. Fū gara wü rirü 'basu angbü kpa etü yi la. Gara biringbö la, Me gü ba, riri na ena aküwa wü kpara, de wüḥ kpi de. Fū gara la angbü nda-ye eto talara ngü fū wü kpara, de wüḥ wu da eye süka siti ngü ake züka ngü.

¹⁰ Gara mere nzō ngu ta ladü gbü Edene sela, te wü e ngbü ega di. Fū ngu la anü aye süka ye, kpa ekere Edene kpala, akoro wü ngu bala. ¹¹ İri gina ngu la de Pisona. Ah ngbü ego nda-ye ekere nga nzō köti ka

wü Avila. ¹² Wüḥ ngbü emaka züka *diki-se gbü sü la, de wü züka wü teme te ngbü eci aci. ¹³ İri e'ba'basu ngu la de Giyona. Ah ngbü ego nda-ye ekere nga nzō köti ka wü Kusi. ¹⁴ Ebabata ngu de Idekele,* te ngbü ego nda-ye to kpa fūgō, ekere nga nzō köti ka wü Asura.† Ebabala ngu de Efürata.

¹⁵ Fū Me adu aza komoko, de te engu mere la, ao engu agbü yi ka-ye la, de ah di eceka kpi fütanganga na. ¹⁶ Fū ah agü iri komoko la gü ba, Adama. Fū ah ato riri fefe na, gü ba dene, “Wü rī-rü de gbü yi ne, mü ena azü azü 'buru. ¹⁷ Amba 'duwa mene engu de biringbö ka talara ngu ne, mü mere e azü de, angü mü ena akpi.”

¹⁸ Fū Me adu afi nga ngü, gü ba dene, “Te komoko ne ngbü kpikpi ye bala, ah reke de. Ni ena amere gara kpara fū ewü angbü 'basu ake di.” Fū Me ayia ato fīngangü gbü nzōnzō. ¹⁹⁻²⁰ Fū Me ayia aza wü nü, de wü lu, ta te engu mere ne, anü di fū Adama, de engu gü iri ewü. Fū Adama agü iri gbü nzō wü nü la biri biri 'buru. Fū iri la angbü 'duwa bala. Fū Adama angbü egiri kiri ye, kpara te ani ena angbü ake di. Ah gü ba dene, “Esüka wü nü ne 'buru, ni maka kiri ni nda-ni de.” ²¹⁻²² Fū Me ayia ato mere ra gbü jia Adama. Te Adama ngbü era tete na, fū Me akoro aü babaga na, aza gara biki sasajikara na biringbö, amere wüüruse gbügbü na. Fū ah adu ani sü, te engu ü la, alügü yere te nga ye. Fū ah ayia aza wüüruse la, ato fū Adama, amala ngü fefe, gü ba, “Wara mü dene.” ²³ Te Adama wu wüüruse la, fū wüüruse la areke gbü jijia na afa sü. Fū Adama akpo da ebī ci ka tadu, gü ba dene,

“Züka ngü! Kiri ra koro eyi dene!

Me to züka wüüruse eyi fere dene!

Biki wüüruse ne, ah de biki ra.

Ngüte wüüruse ne, ah de ngüte ra.

Wüḥ ena adi eī engu, gü ba, wüüruse,

Angü engu koro gbü komoko.”

²⁴ Dela si-ngü te komoko ngbü eyia ece wü ye ake ni ye, aza wara ye, alala tete na. Fū ewü adu angbü ake di fine ba kpara biringbö ne. ²⁵ Wü Adama ake wara ye, ta te ewü ngbü ka-wü agbü yi la, wüḥ ka-wü 'basu mini ngirimu. Lümü mere ewü gbü ngü la nda kpaḥ de.

3

Dene ngü te kpürü fti wü Adama di, ake wara ye

¹ Kpürü ta de mere siti mürü mani, te mani kaka fa nda wü gara nü 'buru.* Gbü gara ra, fū kpürü ayia akoro amaka wara

* 2:14 2:14 Idekele de Tigire gbü ngü Giriiki. † 2:14 2:14 Gbü wü gara buku, Asura de Asiriya. * 3:1 3:1 Kpürü la, ah de Satana. Mü ena amaka ngü la gbü Ngü te sere te-ye 12:9.

Adama. Fū ah amala ngü fū wūrüse la, gü ba dene, "Me gü fū yi neh fe? Me gü ba dene, mere bi wü rirü de gbü yi ne 'buru, yi mere e azü ri ewü de? Ngü la fanü?"² Wūrüse la gü ba dene, "A'a! Ah bala de. Me gü ba dene, 'Ani di ezü wü rü wü rü la 'buru."³ Amba 'duwa mene rü de kpa etü yi de kpala, ani mere e azü riri na de. Ani to kpa ani tete na kpah de, angü ani ena akpi.' "⁴ Kpürü gü ba dene, "Me fiti yi ka-ye nda afiti! Yi kpi nda-yi de."⁵ Ah tiri yi teka te yi ena azü ri-rü la, jia yi ena aü, fū yi awu da aye süka züka ngü ake siti ngü. Fū yi afü te-yi mürrü talara, kpah baka ni, Me."⁶ Wūrüse, fū mü ayia aceka kpi. Fū ri-rü la areke gbü jia mü. Fū mü afi, gü ba, "Te ah bala la, ah de züka riri te türü atürü. Te ani zü la, ah ena afü ani baka mürrü talara fanü." Fū wūrüse la ayia akolo ri-rü la, azü, aza adu di, ato fū watı ye. Fū watı ye na adu kpah azü.⁷ Wüh kpah bü te ezü ri-rü la de, fū jia ewü ayia aü. Fū ewü awu te-wü, te ewü ngbü ka-wü tıne ngirımu. Fū ewü ayia akolo kpa rü, azi eküte wü.

⁸ Etamura go la, fū Me ayia anü agbü yi ka-ye la. Fū wü Adama ake wara ye aje giri Me, te ngbü ekoro la. Fū cürü ayia ari te ewü. Fū ewü akpe awo te-wü gbü zukpa rü.⁹⁻¹⁰ Fū Me ai i, gü ba, "Adama! Adama! Mü neh kaye?" Adama gü ba, "Ani je bü giri ye te ye ngbü ekoro ne. Fū ani akpe awo te-ani teka vi-jia, angü ani akine ngirımu."¹¹ Me gü ba dene, "Mü wu neh baye, gü ba, ani ngbü ngirımu? E-mala ngü la fū mü neh da? Te di bala, mü zü ri-rü ka talara ngü, ta te ma mala nganga fū mü ne eyi? Ngü ta te ma mala fū mü teka riri la, mü je de, neh teka ne? Angü ma mala ta eyi fū yi, gü ba, yi mere e azü ri-rü la de."¹² Adama gü ba dene, "Ngü ka-ni ma. Ah bü de wūrüse, de te ye to fi ni ne, ah to ri-rü la fū ni me-ye, fū ni azü."¹³ Fū Me adu amala ngü fū wūrüse la, gü ba, "Ye mere ngü la bala, teka ne?" Wūrüse la gü ba dene, "Ngü ka-ni nda ma, angü kpürü fiti ni ka-ye nda me-ye. Fū ni ayia aza ri-rü la, azü."

¹⁴ Fū Me adu amala ngü fū kpürü, gü ba dene, "Kpürü deyı, ma ena ato mere kuru te mü, teka ngü te mü mere la, te ena afa nda wü bu mü 'buru. Titine, mü ena adi egbeke te-mü füh bu mü gbü zu-tö. Fū butungu adi ego gbü nzö mü, fi mere badi."¹⁵ Ma ena ao gü esüka yi ake wūrüse ne, kpah esüka wü nguwa mü, de nguwa wü di enga wūrüse ne. Fū yi adi engbü de gü esüka yi. Te engu maka mü la, engu ena adi edütü nzö mü. Te mü maka engu la, fū mü adi kpah ede tambu lölö na."

¹⁶ Fū Me adu amala ngü fū wūrüse la, gü ba dene, "Ma ena ato mere kuru te mü, teka *siti ngü te mü mere la. Mü ena adi ebı ye gbü mere cinga. Gbü ra te mü ena ayaka tete na, mü ena angbü ekeke akeke, fū mü adu ayaka gbü mere cinga. Gümü watı mü ena adi eke mü. Fū mü angbü fi esakaka na, adi eje ngü kaka-na."

¹⁷⁻¹⁸ Fū Me adu amala ngü fū Adama, gü ba dene, "Baka te mü je ri wara mü, fū mü ayia azü ri-rü la, ta te ma mala nganga fū mü, gü ba, mü mere e azü de ne, te di bala, ma ena ato mere kuru te mü. Ma kına tö eyi teka ngü ka-mü. Ma ena ao nguwa siti wü rü, baka wü ti, de wü siti gü, 'buru gbügbü. Fū ewü adi ekö faaa bala. Fū mü adi emere tima gbü tö la tıne de kpa mü, teka fū wü rü zü adi ekoro gbü tima ka-mü la."¹⁹ Mü ena amere tima de mere siti wütüsü, te ena angbü ego te mü trii! Fū mü adi ezü kümü gbü wütüsü ka-mü la, zalü akoro di gbü ra te mü ena akpi tete na. Fū ewü ati mü agbü tö. Fū kö mü afere te-ye tö, angü ma fa mü ta gbü tö."

Dela ngü ta te Me mala fū wü kpürü, bete Adama ake wara ye, teka siti ngü ta te ewü mere.

²⁰ Fū Adama ayia agü iri wara ye la, gü ba, Awa, angü ah de ni ye wü kpara füh kotö ne 'buru.

²¹ Fütanga ngü la, fū Me ayia amörö nü, aza konü nü la, areke, ato fū wü Adama ake wara ye, gü ba, "Wü za, wü to te-wü."

²² Fütanga ngü la, fū Me ayia afi nga ngü, gü ba dene, "Wü Adama koro eyi kpah baka ani. Wüh wu da aye süka siti ngü ake züka ngü eyi. Te ani ce ewü o fi kpa gbü yi kpala la, ah esiti. Angü rü ka *küküwa ne ladü kpa etü yi la. Te di bala, te wü Adama du za ri-rü ka küküwa la, fū ewü azü la, wüh ena angbü bala fi mere badi. Te ah bala la, ah reke de."²³ Te di bala, ni ena aza ewü gbü yi la asidi. Fū ewü adi esö e, emaka e-mazü gbü tö, de ta te ni fa ewü gbügbü na ne."²⁴ Fū Me ayia aliki ewü agbü yi ka-ye la asidi. Fū ah atima gara wü mere *malayıka ka-ye,† gü ba, "Wü nü, wü ngbü gbamari era yi ka Edene sela, to kpa fügö. Fū wü adi etiri kaje ka yi la." Fū Me aza mere maguruma, te ngbü embele sü embele ba te-wa la, ato esaka wü malayıka ka-ye la, gü ba, "Wü di eci sü ekere yi la, angü wü kpara ena anü kpala, aza ri-rü ka küküwa la, azü, fū ewü angbü fi mere badi." Fū wü malayıka la angbü kpala, atiri kaje la fi bala.

4

Dene ngü ka Kayına ake Abele

† 3:24 3:24 İri nguwa wü malayıka la de Keruba.

¹ Fütanga ngü la, fū wara Adama ayia abí gina engaye, komoko. Fū ah agü iiri na gü ba, Kayina, angü Me to ye komoko la fū ni me-ye. ² Fū ah adu abí kpah gara ye komoko, fütanga Kayina, agü iiri na, gü ba, Abele. Fū wü jaji la ayia aga 'basu mini. Kayina, mü ta nda-mü de kpara, te mü ngbü esö yí. Abele, mü nda-mü ta de mürü wü kambiliki.

³ Gbü gara ra, fū Kayina ayia aza tari-e gbü yí ka-ye, ato fū Mere Me. ⁴⁻⁵ Fū Abele ayia aza kpah nda-ye züka engaye kambiliki, te zege fa sü. Fū ah amörö, awete soso na, ato 'buru fū Mere Me. Nda Kayina, tari-e, de te engu to ne, Me le nda de. Me le ka-ye 'duwa nda Abele. Fū ngü la ayia asiti te Kayina afa 'duwa sü. Fū Kayina angbü da endunduru gbüra ye teka ngü la.

⁶ Fū Me ayia amala ngü fū Kayina, gü ba dene, "Kayina deyi, ye ngbü endunduru gbüra ye, neh teka ne? Ngü te siti te-ye, ah de ne ngü ne? ⁷ Ah teka ngü, de te ni ce tari-e ka-ye ne? Te ye ena angbü ta emere züka ngü la, de bane, ni ena ale ngü ka-ye de? Amba, te ye ngbü emere *siti ngü la, siti ngü ena angbü kpah efa nga ye, fū ye angbü fi bü emere siti ngü. Te di bala, ah le de ye rü kpekpeke, fū ye aza esaka siti ngü." Dela ngü te Me mala fū Kayina. Amba Kayina le ngü la nda de.

⁸ Fū Kayina adu akoro amaka engaye ni ye. Fū ah ayia afiti engaye ni ye, gü ba dene, "Abele deyi, ani nü ka-ani la, andoro agbü gü." Fū ewü ayia anü andoro agbü gü. Te wüh koro kpala, fū Kayina ayia atí te engaye ni ye, azoro engu, amörö ka. Fū Abele ayia akpi. Fū Kayina ayia alügü te-ye adu ka-ye kpa eköti kpkipi ye.

⁹ Fū Me akoro ayi-ta Kayina, gü ba dene, "Kayina deyi, engaye ni mü neh kaye?" Kayina gü ba dene, "Ho! Ma de kpara te ma ngbü eceka kpi fütanga engaye wüna me-ra?" ¹⁰ Me gü ba, "Ma wu ngü la eyi 'buru. Mü mere mere siti ngü la bala, neh teka ne? Mü ceka la ngüte Abele, de te mü tökö kötö faaa ne. Ah ba e te ngüte engaye ni mü la ngbü eyi eku gba engagira ra, de wüh mörö na kö ni. ¹¹⁻¹² Tekan ngü la, ma kina mü eyi. Te mü ena adi eru wü e ka-mü gbü tö la, ah ti akö de. Mü ena aru e ma, e-mazü ti akoro fū mü gbü tö tüne kpo de, angü ah de tö de te nzörö ngüte engaye ni mü, de te mü mörö ne. Mü ti ao köti kpah de. Mü ena angbü fi bü endoro füh kotö ne tikpi tikpi."

¹³⁻¹⁴ Kayina gü ba dene, "Apa! Ye liki ni tüne agba ani kpah eyi! Kina ka-ye ne, ah fa wazi ni tüne eyi ka. Te ni yia eküte ye asidi, fū ni adi ekpe ye fi badi la, ni

ena aküwa? De te ni ena angbü endoro la, te kpara maka ni la, ah ena amörö ni de?" ¹⁵ Fū Me amala ngü, gü ba dene, "Wüh ti amörö ye de. Ni ena aceka kpi fütanga ye me-ni. Kpara de te ena amörö ye la, ni ena ato mere kuru tete, du lorozi." Fū Me aba tere, ao eküte Kayina, angü wü kpara ena amörö engu. ¹⁶ Fū Kayina ayia engagira Me, akpe ka-ye, angbü ejiji fi bü tikpi tikpi,* kpa ekere Edene, to kpa fügö.

Dene ngü ka wü kundu ye Kayina

¹⁷ Fütanga ngü la, fū Kayina ayia abí ye komoko, agü iiri na, Enoka. Fū Enoka ayia aga, aji mere köti. Fū ah agü iiri ye te köti la. ¹⁸ Ye Enoka de Irada. Ye Irada de Meyujaye. Ye Meyujaye de Metusaye. Ye Metusaye de Lemeke.

¹⁹ Fū Lemeke aza wü wü rüse 'basu. Iri ewü de Ada ake Zila. ²⁰ Fū Ada abí ye, agü iiri na Yabala. Wü Yabala de wü kundu ye, ta de wü mürü nü. Wüh jogo ta mere bi wü nü ka köti. Wüh ngbü endoro de wü nü ka-wü la, da era gbü wü gugu. ²¹ Fū Ada adu abí gara ye de iiri ye Yubala. Wü Yubala, de wü kundu ye, ta de wü kpara te ewü wu da emi ku'du, da eu wü ga 'duwa ba-neh-ene-la. ²² Zila bi kpah nda-ye ye komoko, agü iiri na Tubala-Kayina. Engu de mürü boro, te ngbü emi nga nzö wü e zalü 'buru. Fū Zila abí gara ye, wü rüse, agü iiri na Nama.

Dene ci ka Lemeke

²³ Gbü gara ra, fū Lemeke ayia amala ngü fū wü wara ye, gü ba dene, "Ni le abí ci, teka acu ngü ni di gbü jia wü. Wü nga la anga, de wü je la ci ka-ni ne." Fū ah angbü ebí ci ka-ye la bane,

"Ma mörö komoko la teka te engu siya ka te ra,

ba e te kpara mörö kpara gbü gü!

Ma mörö jaji komoko la teka te engu mü ra,

ba e te ma mörö kpara gbü gü!"

²⁴ Fū Lemeke ayia amala ngü, gü ba dene, "Ta gügü, Me gü ba, 'Te kpara mi Kayina la, ni ena ato mere kuru tete du lorozi.' Titine, ni emala nda-ni, gü ba, 'Nda Me ka-ye mba cükü'daye. Amba nda-ni, te kpara mi ni la, ni ena ato kuru tete me-ni, afa nda Me ka!'"

Dene ngü ka Sete ake Enosa

²⁵ Fütanga kpi ka Abele, fū Awa ayia abí gara ye, agü iiri na Sete. Fū ah ayia amala, gü ba dene, "Me to gara ye eyi fū ni da Abele, ta te Kayina mörö engu ne." ²⁶ Fū Sete ayia aga, abí ye, agü iiri na Enosa.

* **4:16** 4:16 Ndoro ka Kayina la, gbü gara buku, wüh ngbü ei, gü ba, Nodo. Amba si-ngü Nodo, gbü ngü Ebere, ah de ndoro tikpi tikpi.

Gbü re la, fü ewü akpo da eku gba fü Mere Me, da egbo nga iiri na.

5

Dene iri wü kundu ye Adama

¹ Ta te Me mere wü kpara tete na, ah mere ewü gegege baka ye la. ² Ah mere ewü ta 'basu, komoko ake würise. Fü Me ato wazi ye fü ewü, agü iri ewü "kpara".

³ Te Adama mere tete baka wü re kama biri teke 'basu de füh ye nzükpa (130), fü ah ayia abi ye, ye komoko, gegege baka ye la. Fü ah agü iiri na Sete. ⁴ Fü ah mere fütanga ngü la wü re kama 'bajena (800), fi da ebi bi wü gara jaji. ⁵ Te wü re kaka koro tete 'buru kama menewa teke biri de füh ye nzükpa (930), fü ah ayia akpi.

⁶ Fü Sete ayia aga, amere wü re kama biri de füh ye 'buruve (105). Fü Sete ayia abi Enosa. ⁷ Fü ah amere fütanga ngü la wü re kama 'bajena de füh ye lorozi (807), fi da ebi bi wü gara jaji. ⁸ Te wü re kaka koro tete 'buru baka kama menewa nzükpa de füh ye 'basu (912), fü ah ayia akpi.

⁹ Fü Enosa ayia aga, amere wü re teke bala de füh ye nzükpa (90). Fü Enosa ayia abi Kenana. ¹⁰ Fü ah mere fütanga ngü la wü re kama 'bajena nzükpa de füh ye 'buruve (815), fi da ebi bi wü gara jaji. ¹¹ Te wü re kaka koro tete 'buru kama menewa de füh ye 'buruve (905), fü ah ayia akpi.

¹² Fü Kenana ayia aga, amere wü re teke bata de füh ye nzükpa (70). Fü Kenana ayia abi Malalele. ¹³ Fü ah mere fütanga ngü la wü re kama 'bajena de füh ye teke 'basu (840), fi da ebi bi wü gara jaji. ¹⁴ Te wü re kaka koro tete 'buru kama menewa de füh ye nzükpa (910), fü ah ayia akpi.

¹⁵ Fü Malalele ayia aga, amere wü re teke bata de füh ye 'buruve (65). Fü Malalele ayia abi Yerede. ¹⁶ Fü ah mere fütanga ngü la wü re kama 'bajena teke biri de füh ye nzükpa (830), fi da ebi bi wü gara jaji. ¹⁷ Te wü re kaka koro tete 'buru kama 'bajena teke bala nzükpa de füh ye 'buruve (895), fü ah ayia akpi.

¹⁸ Fü Yerede ayia aga, amere wü re kama biri teke bata de füh ye 'basu (162). Fü Yerede ayia abi Enoka. ¹⁹ Fü ah mere fütanga ngü la wü re kama 'bajena (800), fi da ebi bi wü gara jaji. ²⁰ Te wü re kaka koro tete 'buru kama menewa teke bata de füh ye 'basu (962), fü ah ayia akpi.

²¹ Enoka ta de kpara te ngbü elala gbü nga Me. Fü Enoka ayia aga, amere wü re teke bata de füh ye 'buruve (65). Fü ah ayia abi Metusela. ²² Fü ah mere fütanga ngü la wü re kama bata (300), fi da ebi bi wü gara jaji. ²³⁻²⁴ Fü ah angbü fi bü elala

gbü nga Me. Te wü re kaka koro tete 'buru kama bata teke bata de füh ye 'buruve (365), fü Me ayia aza engu cu ezükü, anü sü di agbü kpi.

²⁵ Fü Metusela ayia aga, amere wü re kama biri teke bala de füh ye lorozi (187). Fü Metusela ayia abi Lemeke. ²⁶ Fü ah mere fütanga ngü la wü re kama lorozi teke bala de füh ye 'basu (782), fi da ebi bi wü gara jaji. ²⁷ Te wü re kaka koro tete 'buru kama menewa teke bata de füh ye menewa 969, fü ah ayia akpi.

²⁸ Fü Lemeke ayia aga, amere wü re kama biri teke bala de füh ye 'basu (182). Fü Lemeke ayia abi ye komoko. ²⁹ Fü ah agü iri ye ye la Nüwa. Ah gü ba, "Titine dene, cinga fa te ani sü, teka tö ta te Me kina ne. Ngü ka mbarase de te ni bi ne, engu ena ale ta-ngü te ani gbü cinga la."

³⁰ Fü Lemeke amere fütanga ngü la re kama 'buruve teke bala nzükpa de füh ye 'buruve (595), fi da ebi bi wü gara jaji. ³¹ Te wü re kaka koro tete 'buru kama lorozi teke bata nzükpa de füh ye lorozi (777), fü ah ayia akpi.

³² Fü Nüwa ayia aga, amere wü re kama 'buruve (500). Fü Nüwa akpo da ebi wü jaji. Wü di Nüwa te engu bi ewü, wüh de wü jaji komoko bata. Iri ewü de Seme, Ama, bete Yapete.

6

Dene ngü ka wü di engu me de wü jaji würise

¹⁻² Ta gügü, o wü kpara kpo da esibi tete füh kotö ne, wü gara wü *di engu me ta ladü. Fü wü di engu me la ayia awu wü jaji würise de füh kotö ne. Fü wü jaji würise la areke gbü jia wü di engu me la afa sü. Fü ewü akpo adi eza wü jaji würise la wara wü tete na. Fü ewü angbü ebi ye de ewü.

³ Fü Mere Me ayia awu ngü la. Fü ngü la ayia asiti gbü jijia 'duwa ba-neh-ene-la. Fü ah amala ngü, gü ba, "Siti wü kpara de füh kotö ne ngbü efi nda-wü, gü ba, 'Ani ena angbü fi mere bad?' Ni le bala de. Angü küte ewü ka-ye de kungba so, te ena azi azi. Te di bala, re ka-ewü ena angbü ngbee kama biri de füh ye teke biri (120), fü ewü akpi."

⁴ Fü wü jaji würise la angbü ebi wü ye fü wü di engu me la. Wü jaji de te ewü bi ewü la, 'buru wü angbe cögbörö wü kpara, te ewü ga aga, de mere wazi esaka ewü. Fü ewü angbü ei wü jaji la, gü ba, wü Nefilimi, te gü ba, wü di engu mürü wazi. Fü iri ewü angbü ewü gbü nga nzö wü sü 'buru.

Dene ngü ka siti ngü ka wü kpara füh kotö ne

⁵ Ta gbü wü re la, wü kpara ngbü emere *siti ngü, te nga wü sikipi 'buru, efa sü le. Fü fingangü ka-ewü la angbü esiti gbü jia Me 'duwa ba-neh-ene-la. Te Me wu ngü la bala, ⁶ fü ngü la ake tete 'duwa ba-neh-ene-la. Fü ah angbü de mere cinga, teka wü kpara, ta te ni mere, o füh kotö ne. ⁷ Fü ah adu afi, gü ba, "Te ah bala la, ni ena amörö ewü amörö 'buru asidi, de wü lu, de wü nü, de wü e ta te ni mere ne 'buru. Ni ena aürü nga ewü aürü 'buru 'buru asidi!"

⁸ Amba kpara ta ladü biringbö, te ngü kaka reke gbü jia Me. Ah de Nüwa.

⁹ Dene ngü ka Nüwa.

Nüwa ta de kpara esüka wü bu ye füh kotö ne, te ngbü emere züka ngü gbü jia Me, de maguma ye biringbö. Fü Nüwa angbü elala gbü nga Me fi mere badi. ¹⁰ Wü di Nüwa, iri ewü de Seme, Ama, bete Yapete.

¹¹⁻¹² Ta gbü wü re la, wü kpara füh kotö ne ngbü ta ememere *siti ngü fi bü efa sü. Wüh ce züka kaje ka Me ne ka. Fü ewü angbü ele ka-wü 'duwa siti kaje ka-wü ne engu. Fü ewü angbü fi bü de wü gü esüka wü, da emömörö te-wü. Fü Me awu ngü la. Fü ngü la ayia asiti tete na afa sü.

¹³ Fü Me ayia amala ngü fü Nüwa, gü ba dene, "Ma wu eyi, gü ba, wü kpara füh kotö ne ngbü emere fi bü siti ngü. Wüh le ngü ka-ra de. Wüh ngbü emere 'duwa siti ngü ka-wü, de te ewü ngbü ele ne. Wüh siti sü eyi 'buru de siti ngü ka-wü la. Te di bala, ma ena atima mere siti ngu, te ena amörö ewü, anza tanguwa ewü, de wü e füh kotö ne 'buru. ¹⁴ 'Duwa de-mü Nüwa, te ma ena aküwa mü aküwa, angü mü de züka kpara gbü jia ra. Te di bala, mü goro *zabu, teka fü mü aküwa gbügbü. Mü goro zabu la gbü züka rü, akolo wü guguvu na ba guvu kambü la. De mü gbo ze zabu la, mü ni de gara e baka bikü'da la 'buru. ¹⁵ Mü mere zabu la bane. Mamo na di baka süka lö kama biri teke 'basu de füh ye nzükpa (150), de dedebu na di baka e teke biri de füh ye 'buruve (25), maga na to kpa tikpi di baka süka lö nzükpa de füh ye 'buruve (15). ¹⁶ De mü to nzö zabu la kpa tikpi, de mü ce zeze na mba ce. De mü o möngiti guvu zabu la. Fü mü aye süka zabu la bata, gara kpa tikpi, gara etüngba, gara to kpa kötö. ¹⁷ Angü ma ena atima mere siti ngu, fü ah akoro asi füh kotö ne le 'buru. Fü wü kpara akpi 'buru, kphah de wü nü, de wü gara wü e de te ewü endoro andoro füh kotö ne. Wüh ena akpi, anza tanguwa wü 'buru. ¹⁸ Amba 'duwa de-mü, Nüwa, ma ena aküwa mü nda-ra aküwa, angü mü de kpara te nguwa yi ena asibi füh

kotö ne 'buru, baka ngü ta te ma mala fü Adama ne. Wü bu mü la ena akpi 'buru. Te di bala, ah le de yi li agbü zabu, de wü wara mü, de wü di mü, de wü wara wü di mü kphah 'buru, teka fü yi aküwa esaka mere ngu la. ¹⁹⁻²⁰ Ma ena atima kphah nguwa wü nü de wü lu, de wü gara e te ewü endoro andoro füh kotö ne kphaka mü. Te di bala, ah le de mü za nga nzö nguwa ewü 'basu 'basu 'buru, momoko na bete caca na, teka fü yi aküwa de ewü agbü zabu kpala. ²¹ Fü mü akö mere bi zü-e, te ewü ena adi ezü. Mü kö kphah nda-yi, ao 'buru agbü zabu, teka fü yi adi ezü."

²² Te Nüwa je ngü la bala, fü ah ayia akpo de tima la. Fü ah amere zabu la, akpo da ekö e-mazü, kphah baka e te Me mala fefe na ne.

7

Dene ngü ka mere ngu te si füh kotö ne

¹ Te Nüwa mere tima la nza tete 'buru, fü Me adu amala ngü fefe na, gü ba dene, "Nüwa deyü, ni wu eyi, gü ba, ye de kpara te ye ngbü ele ngü ka-ni de maguma ye biringbö, esüka wü kpara, te ewü ngbü emere *siti ngü de füh kotö ne. Te di bala, ni ena aküwa ye, de wü kpara ka-ye 'buru aküwa. Ah le de wü reke te-wü, fü wü ali agbü *zabu, teka fü wü aküwa esaka mere ngu, te ena asi ne. ² Ye ro wü züka nü, aza kphaka ye agbü zabu kpala. Ye ro ewü te nga nzö ewü biri biri 'buru, momoko na lorozi, ni ye na kphah lorozi. Amba, teka siti wü nü, te wü kpara zü de, ye ro ewü ngbee 'basu 'basu, momoko na bete ni ye na. ³ De ye ro kphah nga nzö nguwa wü lu 'buru, momoko na lorozi, de caca na kphah lorozi. Ye mere bala, teka fü ewü adu adi esibi füh kotö ne, sisi nga ngu te ena anzürü tete na, angü tanguwa ewü ena adürü. ⁴ Kükürü de, angü du sikipi eyi ngbee lorozi, fü ni atima mere siti agö, te ena ali füh kotö ne 'buru. Ah ena ali biti de ra mini, teka wü sikipi teke 'basu (40). Te di bala, du wü e, de ta te ni o ewü, te ewü endoro andoro füh kotö ne, wüh ena akpi 'buru anza anza, fü nga ewü aürü aürü." ⁵ Dela wü ngü ta te Me mala fü Nüwa. Fü Nüwa ayia amere ngü la, kphah baka e te Me mala fü ye ne.

⁶ Gbü re engu ta te mere ngu si tete na ne, re ka Nüwa koro ta eyi kama ma'diya (600). ⁷ Fü Nüwa ayia ake wara ye, de wü di ye, de wü wara wü di ye, areke te-wü, teka ali agbü zabu, angü mere siti ngu ena asi füh kotö ne 'buru. ⁸⁻⁹ Wü nü de wü lu, ta te Me mala nga ewü fü Nüwa ne, fü ewü ayia akoro kphah 'buru kphakaka na. Fü züka ewü bete siti ewü, cögbörö ewü bete jürü ewü, ayia ali 'buru agbü zabu. Wüh li

ta 'buru 'basu 'basu, momoko na bete caca na, kpah baka ngü ta te Me mala fü Nüwa ne.

¹⁰⁻¹¹ Baka te wü Nüwa reke te-wü nza tete, fütanga sikipi lorozi, fü ewü ayia ali angbü zabu. Ngü la mere te-ye gbü fe ka 'basu, gbü sikipi kaka nzükpa de füh-ye lorozi. Fü mere siti agö ayia akoro ali curru! baka e te wüh ü kpi au. Fü wü angbe cögbörö yi-ngu akpo kpah da edü gbü tö kpulu! kpulu! Fü mere siti ngu akpo esi. ¹² Agö la li ta biti de ra mini, teka wü sikipi teke 'basu.

¹³ Te agö kpo ngbü eli tete na, o wü Nüwa di eyi angbü zabu, ake wara ye, de wü di ye bata ne, Seme, Ama, bete Yapete, bete wü wara ewü 'buru. ¹⁴ Wü nü ta te Me mala nga ewü fü Nüwa ne, wüh kpah eyi 'buru kpala, wü nü ka köti, abe kpah te wü nü ka gü, de wü lu, bete wü e te ewü endoro andoro füh kotö ne 'buru. ¹⁵⁻¹⁶ Wüh yia ta kphar te nga nguwa wü la 'basu 'basu, momoko na ake caca na, li kpah 'buru angbü zabu la, kpah baka ngü ta te Me mala fü Nüwa ne. Baka te wü Nüwa di tüne eyi 'buru angbü zabu la, fü Me ayia ani mö nga zabu la gbü nga ewü, gbuuu! atümü gö gö gö!

¹⁷⁻¹⁸ Fü agö la ayia ali teka sikipi teke 'basu. Dela agö nda tüne de! Fü ngu akpo da esi ki ki ki! anü maka te-ye yere! Fü ngu asi 'duwa asi 'ba 'ba 'ba! Fü ah akpo ee zabu etikpi. Fü zabu ayia angbü füh ngu la. ¹⁹⁻²⁰ Fü ngu la ayia asi, ata wü angbe cögbörö wü da, de wü rü 'buru kpa esa ye. ²¹ Fü wü kpara ayia akpi, de wü nü, de wü lu 'buru gbü mere ngu la. ²²⁻²³ Fü wü e, de te ewü ndoro andoro füh kotö ne, baka wü angbe cögbörö wü nü, wü zaza, wü kpürü, de wü gara wü jürü wü e, ayia akpi kpah 'buru. Wü e kpi nza tanguwa wü 'buru 'buru. Angü Me le de tanguwa wü e füh kotö ne nza anza 'buru 'buru asidi.

Fü wü Nüwa ayia aküwa 'duwa me-wü, de wü e te ewü di de ewü, kpa gbü zabu de kpala. ²⁴ Fü mere siti ngu la asi angbü fi bala, teka wü fe 'buruve.

8

Dene ngü te ngu kpo ngbü enzürü tete

¹ Te mere ngu la ngbü esi tete na teka mere bi sikipi, fü Me angbü efi nga wü Nüwa, de wü kpara ka-ye, de wü gara wü e 'buru, te ewü di de ewü, angbü *zabu la. Fü Me ayia atima mere wege, de ah koro, ah fe füh kotö ne. Fü wege akpo angbü efe. ² Fü mere agö la ayia akolo. Fü ngu te ngbü edü esa tö ne, adu arü. ³ Fü mere ngu la akpo da enzürü ce ce ce, teka mere bi wü fe.

⁴ Gbü fe ka lorozi, ah te egoro gbü sikipi kaka-na nzükpa de füh ye lorozi, fü zabu la anü angbü enzö gara mere da, de iri ye Ararata, angü ngu la ngbü fi bü da enzürü ce ce ce. ⁵ Fütanga ngu la, fü ngu la angbü fi bü da enzürü cükü'daye cükü'daye, teka mere bi wü sikipi. Ah te egoro gbü fe ka nzükpa, gbü gina sikipi kaka-na, fü nzö wü da akpo angbü egoro etanü mba cükü'daye cükü'daye. ⁶ Fü wü Nüwa angbü fi gbü zabu enzö da sela teka wü sikipi teke 'basu.

Fütanga sikipi teke 'basu, fü Nüwa ayia aü görö zabu la, ⁷ ayia atima gara lu, te di baka elangba la, de ah nü, ah ceka ngu. Fü lu la anü angbü endoro ka-ye fi bü andoro, zalü te ngu nzürü tete na 'buru. Ah du koro kpaka Nüwa nda tüne de.

⁸ Fü Nüwa aci nga lu la ma. Fü ah afi nga ngü, gü ba dene, "Ngu ne nzürü dene 'ba eyi fanü fanü na?" Fü ah adu aza mö, atima kpah kpala. ⁹ Fü mö anü akoro kpala, amaka ngu te si ka-ye la fi asi gbü wü sü 'buru. Fü mö la angbü endoro tikpi tikpi, angü e te engu ena ati fefeh na nda ma. Fü ah ayia alügü nga eyi, adu kpaka wü Nüwa. Fü Nüwa, ayia aü görö zabu la, ato kpa ye, aza mö la di, alügü kpaka ye angbü zabu la.

¹⁰ Fütanga sikipi kpah lorozi, fü Nüwa adu kpah atima mö la, de engu du kpah aceka la ngu. Fü mö la ayia anü kpah andondoro kpala. ¹¹ Ah te egoro etamurago, fü mö la alügü nga ye, angbü edu kpaka wü Nüwa. Nüwa te eceka kpi bane de, gbo! te kpa rü te komö mö la. Fü Nüwa awu teke, gü ba, ngu te enzürü fanü. ¹² Fü Nüwa adu kpah angbü cükü'daye. Fütanga sikipi kpah lorozi, fü ah adu kpah atima mö la. Fü mö la adu anü ka-ye tüne kpala 'duwa fi. Ah du koro kpaka Nüwa nda tüne de. Te Nüwa wu ngü la bala, fü ah awu, gü ba, "Ngu la nzürü nza eyi."

¹³ Te ngu la nzürü nza tete na, dela o re ka Nüwa koro eyi kama ma'diya de füh ye biri (601). Gbü re la, gbü gina fe, gbü sikipi kaka-na biri, fü Nüwa ayia asoko nzö zabu la asidi, teka de ni ceka ngü ka ngu la cu de jia ni. Fü ah ayia aceka kpi kpa kötö. Fü ah awu teke, gü ba, ngu nzürü nza eyi 'buru. Fü ah amala, gü ba, "Ah le aci nga tö te ena aürü feke." Fü ah adu angbü teka fe 'basu. ¹⁴ Ah te egoro gbü fe ka 'basu, gbü sikipi kaka-na teke biri de füh-ye lorozi, tö ürü nza eyi kege.

¹⁵ Te tö ürü nza tete na, fü Me ayia amala ngü fü Nüwa, ¹⁶ gü ba dene, "Mü kö ekö gbü zabu la kötö, de wü wara mü, de wü di mü, de wü wara wü di mü 'buru, ¹⁷ abe kpah te wü nü, de wü e de te mü za ewü kpaka mü la 'buru. Wü e la kö ekö 'buru kötö, de wüh baya, teka fü ewü adi ezu, da

esibi füh kotö ne 'buru." ¹⁸ Fū wū Nūwa ayia akò kòtò, de wū wara ye, de wū di ye, kpah de wū wara wū di ye 'buru. ¹⁹ Fū wū nū, de wū lu, de wū jürü wū e, te ewü di agbü zabu la, akpo angbü ekoro te nga wū 'basu 'basu 'buru.

²⁰ Fütanga ngü la, fū Nūwa ayia aza wū teme, areke gara sū baka *cangali, teka adi egbo nga iri Me tete na. Fū ah aza zūka nga nzò wū nū biri biri, kpah de wū zūka wū lu, akoro di, awete. Fū ah aza so ewü, acuru baka takpa fū Mere Me. ²¹ Te Nūwa curu so la tete, fū se e la adu afu akoro kpaka Me. Fū se so la areke gbü gü Me 'duwa ba-neh-ene-la. Fū Me adu afi nga ngü emagama ye, gü ba dene, "Ma le tūne adu ato mere kuru te wū kpara füh kotö ne nda-ra de. Angü ma wu eyi, gü ba, wū kpara füh kotö ne kawü 'buru esiti. Fingangü ka-ewü ka-ye kü esiti gügü gbü jaji te-wü. Ngü ma, te wüh di bü siti wū kpara la, ma du amörö ewü, anza tanguwa ewü, de wū nū, nda-ra tūne de. ²² Te di bala, wū laki ka wū e füh kotö ne, ena afüfū te-wü akoro 'buru, ba e te ni ngbü ele. Bigü ena akoro anü anza, fū karanga akoro kpah, anü anza. Sü gagaga ena adi ladü, zü ena adi kpah ladü. Ra ena adi ladü, biti ena adi kpah ladü. Wü e la 'buru ena angbü efüfū te-wü, zalü akoro di gbü *adu sikipi, te ni ena agara kotö ne tete na." Dela ngü te Me mala.

9

Dene ngü ka vüngüte ka wü Me ake Nüwa

¹ Fū Me ayia ato wazi fū wū Nūwa de wū di ye, gü ba dene, "Wü di mü ena abí ye, fū ewü asibi asibi füh kotö ne afa sū, teka fū ewü abaya te nga wü sū 'buru. ² Ma o yi eyi baka mere miri gbü nzò wū nū, de wū lu, kpah de wū si agbü ngu 'buru. Yi ena angbü de mere wazi gbü nzò ewü, fū ewü adi ekpe yi akpe. ³ Baka ta te ma to wü ri zü bete kpa wuru fū wü Adama, de wüh di ezü ne, tütine ma to kpah so wü nū la eyi 'buru fū yi, de yi di ezü. ⁴ 'Duwa ngüte, yi mere e adi ezü de. Yi zü so de ngüte gbü ye kpah de. Te yi le amörö nū la, ah le de yi wa awa, fū ngüngüte ayuru feke, fū yi adu azü so la.

⁵⁻⁶ Te kpara mörö kiri ye la, ngü kaka ena adi esiti. Angü ah mörö dela kpara, ta te ma mere engu gegege ba ra ne. Tek a ngü la, ma ena ato mere kuru te kpara la. Te ah di de nū te mörö kpara me-ye la, ah kpah esiti, wüh ena amörö engu kpah amörö. Anga te ah di de kpara te mörö kiri ye la, wū miri ena amörö engu kpah amörö, da kiri ye la.

⁷ Nūwa, ma ngbü emala ngü fū mü, de wü di mü, gü ba, yi di ebi ye, fū yi asibi gbe gbe gbe, teka de wüh baya, gbü wü sū füh kotö ne 'buru."

⁸ Fū Me adu amala kpah gara ngü fū wü Nūwa de wü di ye la 'buru, gü ba dene, ⁹ "Tütine ma le de nih nzò ngüte de nih ma. Fū ra angbü mere *vüngüte ka-yi, kpah de wü kundu yi, te ewü ena akoro sidi nga yi 'buru. ¹⁰ Ma ena adi kpah vüngüte ka wü nū de wü gara wü e, ta te wü di de yi agbü *zabu ne 'buru. ¹¹ Ma le anzò ngüte de yi bala, angü ma le amörö wü kpara, anza tanguwa ewü de wü e 'buru, nda-ra tūne de. Ma du tūne, atima mere siti ngu, te ena asi füh kotö ne sene, ba e ta te ma mere ne, kpah de.

¹²⁻¹³ Amba dene ngü te ma ena amere, teka asere kuru ngü ka vüngüte la fū yi. Angü, te agö yia eyi ekoro la, tere ena amü akoro, akolo tü kpi kpa tikpi. Te di bala, te yi wu tere la eyi kpa tikpi la, yi ena adi efi nga kina ka-ra la. Angü ma mala ta, gü ba, 'Ma ti adu amörö yi de ngu, baka ta te ma mere ne, tūne de.' Ma kina kina la teka fū yi, de wü kundu yi sidi nga yi, kpah de wü gara wü e te ewü endoro andoro füh kotö ne 'buru. Kina ka-ra la ena angbü bala fi mere badi. ¹⁴ Te agö te ebiri la, tere ena angbü ekoro, da ekolo tü agö la. ¹⁵ Te ma wu tere la eyi la, ma ena adu afi nga kina ta te ma kina fū yi, de wü kpara, de wü nū 'buru, gü ba dene, 'Ma ti adu atima agö te ena asi füh kotö ne, amörö wü kpara 'buru ne tūne de,' ne. ¹⁶ Fanü te tere la koro eyi, ma ena angbü efi nga kina, ta te ma kina te-ra di fū yi, de wü gara e füh kotö ne 'buru. Angü kina ka-ra la ena angbü bala, fi mere badi."

¹⁷ Dela ta ngü te Me mala fū wü Nūwa, gü ba dene, "Ni o tere eyi kpa tikpi, baka kuru ngü te ena angbü esere nga kina kani, te ni o esüka ani, de wü kpara, abe te wü gara e te ewü di füh kotö ne 'buru."

Dene ngü ka Nüwa de wü di ye

¹⁸ Wü di Nūwa, de ta te ewü ngbü de ewü agbü zabu ne, ah de wü Seme, Yapete, bete Ama. Ye Ama ta de Kanana. ¹⁹ Wü di Nūwa ta ngbee bata. Mere bi nguwa wü kpara füh kotö ne, koro 'buru guvu wü di Nūwa de bata la.

²⁰ Nūwa ta de kpara te ngbü esö yi. Ah kpah de gina kpara ta te mere fi. Angü ah ru ta gara rirü agbü yi ka-ye, de iri ye *vinü. Ah ngbü ta emere fi gbü ri vinü la. ²¹ Ta gbü gara ra, fū Nūwa ayia anzò fi ne nda bü anzò 'duwa ba-neh-ene-la. Fū fi ayia agbo engu kpa esa gugu ka-ye. Te engu ngbü era tete, de fi gbü jia ye la, fū bongo kaka-na ayia agbi eküküte na asidi,

* 9:22 9:22 Ama de wö ye Kanana.

ace engu ngirimu. ²² Fū yeye na de iringi ye Ama ne,* ayia akoro, amaka wō ye, te ra ngbü ngirimu. Fū ah ayia anü amala nga wō ye fū wü di engani ye de 'basu ne. ²³ Te wü Seme ake Yapete je ngü la bala, fū ewü ayia aza bongo, abu enzō-kpīrī wü, angbü enü di de kürüfe wü, teka angü ani ena awu ngirimu eküte wō ani la wu. Fū ewü ayia anü akoro kpaka wō wü la. Fū ewü aza bongo la, ayia abuka eküte wō wü eta kuru jia wü, areke bongo la eküküte na.

²⁴ Nüwa, fū fi ayia alofo gbü jia mü. Fū mü adu azükü, aje ngü la, gü ba dene, "Angü ye ni, jaji, ngbü tīne emü ni." ²⁵ Fū Nüwa ayia akina nguwa wü Ama de wü di ye, gü ba dene, "Me to mere kuru te wü Ama de wü Kanana teka ngü la. Wüh ena angbü labi ka wü bu wü." ²⁶ Fū Nüwa adu agbo nga iringi Me teka Seme, gü ba, "Me di de Seme, da eto wazi ye fefe na. Fū wü Kanana angbü ba labi kaka-na." ²⁷ Fū Nüwa adu kpah amala ngü teka Yapete, gü ba, "Me di kpah de Yapete, de ah di eto zūka ngü fefe na 'duwa ba-neh-ene-la. Wüh ena angbü ka-wü ake Seme gbü sü biringbö. Fū Kanana angbü ba labi esaka ewü 'basu mini."

Dela ta ngü ka Nüwa, fütanga mere ngu, te si fūh kotō ne.

²⁸ Fū Nüwa adu amere fütanga mere yi-ngu la, baka wü re kama bata teke 'basu de fūh ye nzükpa (350). ²⁹ Fū re ka Nüwa akoro 'buru kama menewa teke 'basu de fūh ye nzükpa (950). Fū Nüwa ayia akpi.

10

¹ Dene iringi wü kundu ye Nüwa, te ewü di de wü di wü Seme, Ama, bete Yapete, te wüh bi ewü fütanga mere ngu te si ne.

² Dene iringi wü di Yapete. Ah de wü Gomere, Magoga, Madayi, Yavana, Tubala, Meseke, bete Tīrasa. ³ Dene iringi wü di Gomere. Ah de wü Asekenaza, Rifata, bete Togarama. ⁴ Dene iringi wü di Yavana. Ah de wü Elisa, Tarasisi, Kiti, bete Dodana. ⁵ Wüh de wü kpapa te ewü ngbü nda-wü era mere yi-ngu. Dela nguwa wü di Yapete. Nguwa ewü la ngbü gbü nga nzō kōti ka-wü kpikpi wü. Mō ka-ewü kpah 'dō kpikpi ye kpikpi ye.

⁶ Dene iringi wü di Ama. Ah de wü Kusi, Masiri, Puta, bete Kanana. ⁷ Dene iringi wü di Kusi. Ah de wü Seba, Avila, Sabete, Rama, bete Sabetaka. Dene iringi wü di Rama. Ah de wü Seba ake Dedana.

⁸ Fū Kusi abi kpah gara ye, de iringi ye Nimeroda. Nimeroda ta de gina kpapa, te di de mere miri, de mere wazi esaka ye fa sü. ⁹ Nimeroda kpah de kpapa te ngbü

emere wü nü. Fū ah angbü emörō wü nü 'duwa ba-neh-ene-la. Tekani ngü la, te mü de kpapa te ngbü emörō wü nü efa sü la, wü bu mü ena agü iringi Nimeroda te mü, gü ba dene, "Mü de kpeke kpapa, te ngbü emörō wü nü kpah baka Nimeroda."

¹⁰ Ta te engani gina, sü ka Nimeroda kaye angbü Sinara. Ah ngbü ta kpapa gbü nzō wü kpapa ka wü kōti bata, *Babilona,* Ereke, bete Akada. ¹¹ Fū Nimeroda ayia angbü Sinara, anü akoro, azoro sü ka wü Asura. Fū ah aji wü mere kōti kpapa, ba e bala. Gara de iringi ye Nineve, gara de iringi ye Robotā-İra, gara de iringi ye Kala, ¹² gara de iringi ye Resene, te di eze ngba wü Nineve ake Kala. Wü kōti bata la 'buru ba mere kōti biringbö.

¹³ Dene iringi wü di Masiri. Ah de wü Ludu, Animo, Labo, Nefetu, ¹⁴ Patarusu, Kasalu, bete Kafatoro. Kafatoro de mere kundu wü Feleseto. ¹⁵ Dene iringi wü di Kanana. iringi gina ye Kanana de Sidona. iringi wü gara ewü de wü Ete, ¹⁶ wü Yebusa, wü Amora, wü Girigasa, ¹⁷ wü Ivo, wü Arako, wü Sino, ¹⁸ wü Aravado, wü Cemaro, de wü Amato. Fütanga ngü la, fū wü nguwa Kanana ayia asibi, abaya gbü mere bi wü sü. ¹⁹ Fū nga nzō kōti ka wü Kanana akpo gbü Sidona, anü to kpa gbü Gerara, akoro di zalü angbü Gaza. Fū ah anü to kpa gbü *Sodomo, Gomora, Adema, be kpah te Zeboyima, akoro di zalü angbü Lasa.

²⁰ Dela 'buru iringi wü di Ama, de nguwa wü kundu ye, kpah de wü mō te ewü ngbü emala.

²¹ Dene iringi wü di Seme, te di de engani ye Yapete ne. Seme ta de mere kundu ye wü di engani *Ebere. ²² Wü di Seme ta de wü Elama, Asura, Arafakasada, Ludu, bete Arama. ²³ Wü di Arama ta de wü Uca, Ula, Getere, bete Masa. ²⁴ Fū Arafakasada abi ye, de iringi ye Sela. Fū Sela abi ye, de iringi ye Ebere. ²⁵ Fū Ebere abi wü ye 'basu. iringi gina ewü de Pelege. Wüh gü iringi na bala, angü ta gbü wü re kaka-na, Me baya wü kpapa fūh kotō ne 'buru. iringi e'ba'basu mbarase la de Yoketana.

²⁶ Dene iringi wü di Yoketana. Ah de wü Alemodada, Selefe, Acaramaveta, Yera, ²⁷ Adorama, Uzala, Dikala, ²⁸ Obala, Abimaye, Seba, ²⁹ Ofiri, Avila, Yobaba. Dela 'buru de wü di Yoketana. ³⁰ Nga nzō kōti ka nguwa wü di Yoketana kpo angbü Masa, anü to kpa fūgō enzō mere gümba, zalü akoro angbü Sefara.

³¹ Dela 'buru iringi wü di Seme, de nguwa wü kundu ye, de wü nga nzō kōti ka-

* 10:10 10:10 Babilona kpah de Babela.

ewü, kpah de wü mö ka-ewü, te ewü ngbü emala.

³² Dela 'buru nguwa wü di Nüwa, de wü kundu ewü, de nga nzö köti ka-ewü, te di de wü kpara, te ewü sibi füh kotö ne, fütanga mere ngu te si. Te di bala, nih kpah 'buru de wü kundu ye Nüwa.

11

Dene ngü ta te mere te-ye agbü Babilona

¹ Ta gügü, fütanga mere ngu te si ne, mö ka wü kpara ta 'buru biringbö, te wüh ngbü eje ngü gbügbü na esüka wü. ² Fū gara wü kpara angbü ejiji gbü sū la to kpa fūgö, da egiri sū ka köti.

Gbü gara ra, fū ewü anü akoro gbü gara zūka sū de fūh ye kpini baka kpara la. Fū ewü agü iri sū la, gū ba, Sīnara. Fū ewü ayia ao köti ka-wü kpala. ³ Fū ewü ayia afi ngü, gū ba dene, "Wayi, dene zūka sū. Ani ngbü ka-ani sene. Te di bala, ah le de ani kü'da tö, amere biriki di, azö azö kpo kpo kpo, de ah di kpekepe baka da. Fū ani aji zūka köti ka-ani sene." Fū ewü ayia amere biriki ka-wü, teka afa kambü la di, angü rüvü gbü sū la, te wüh ena afa kambü di ne, nda ma. Fū ewü aza mü te di baka bikü'da la, a'būra fūh biriki la, teka de biriki la zoro te-wü, fū ewü angbü kpekepe. ⁴ Fū ewü adu afi nga gara ngü, gū ba dene, "Ani ji mere kambü, te ena akoro kpa etongo kpī. Ah le de ani mere bala, teka fū iri ani awü gbü wü sū 'buru. Angü te ani baya faaa fūh kotö ne la, ah esiti."

⁵ Fū Me ayia awu ngü te wü kpara la ngbü emere ne. Fū ah ayia akoro aceka köti ka wü kpara la, bete mere siti kambü, te wüh ngbü eji ne. ⁶ Me gū ba, "Titine wü kpara ne, nguwa ewü ngbee biringbö. Mö ka-ewü kpah biringbö. Te wüh kpo eyi emere gina ngü bane, te ni tata ewü de la, wüh ena anü de ngü ka-wü la kpa engagira nü. Ngü te ena afa ewü tine ma. ⁷ Amba ni le ngü la bala de. Te di bala, ani nü enü, abaya ewü, de ani o mö ka-ewü kpi kpi ye kpi kpi ye, teka de wüh mere e aje ngü ka wü bu wü tine de." ⁸ Fū Me akoro, abaya ewü kpah bala. Fū ngü ka köti ka-ewü, de mere kambü la asiti 'buru. Fū ewü abaya tine faaa! ago angbü gbü nga nzö wü sū fūh kotö ne 'buru.

⁹ Dela si-ngü te wüh gū iri sū la tete na, gū ba, *Babilona* ne. Angü gbü sū la, Me fūfū mö ka wü kpara, te ewü ngbü ta emala biringbö ne. Fū ah ayia abaya ewü fūh kotö ne 'buru.

¹⁰ Dene iri wü kundu ye Seme.

Sidi nga wü re 'basu fütanga mere ngu te si ne, fū re ka Seme ayia akoro kama biri (100). Fū Seme ayia abī ye komoko, agü iri na Arafakasada. ¹¹ Fū ah amere fütanga ngü la, wü re kama 'buruve (500), fi da ebī gara wü jaji. Fū Seme ayia akpi.

¹² Fū Arafakasada ayia aga, amere wü re teke biri nzūkpa de fūh ye 'buruve (35). Fū ah ayia abī Sela. ¹³ Fū ah amere fütanga ngü la wü re kama bala de fūh ye bata (403), fi da ebī gara wü jaji. Fū Arafakasada ayia akpi.

¹⁴ Fū Sela ayia aga, amere wü re teke biri de fūh ye nzūkpa (30). Fū ah ayia abī *Ebere. ¹⁵ Fū ah amere fütanga ngü la wü re kama bala de fūh ye bata (403), fi da ebī gara wü jaji. Fū Sela ayia akpi.

¹⁶ Fū Ebere ayia aga, amere wü re teke biri nzūkpa de fūh ye bala (34). Fū ah ayia abī Pelege. ¹⁷ Fū ah amere fütanga ngü la wü re kama bala teke biri de fūh ye nzūkpa (430), fi da ebī gara wü jaji. Fū Ebere ayia akpi.

¹⁸ Fū Pelege ayia aga, amere wü re teke biri de fūh ye nzūkpa (30). Fū ah ayia abī Ruu. ¹⁹ Fū ah amere fütanga ngü la wü re kama 'basu de fūh ye menewa (209), fi da ebī gara wü jaji. Fū Pelege ayia akpi.

²⁰ Fū Ruu ayia aga, amere wü re teke biri nzūkpa de fūh ye 'basu (32). Fū ah ayia abī Seruga. ²¹ Fū ah amere fütanga ngü la wü re kama 'basu de fūh ye lotozi (207), fi da ebī gara wü jaji. Fū Ruu ayia akpi.

²² Fū Seruga ayia aga, amere wü re teke biri de fūh ye nzūkpa (30). Fū ah ayia abī Nayora. ²³ Fū ah amere fütanga ngü la wü re kama 'basu (200), fi da ebī gara wü jaji. Fū Seruga ayia akpi.

²⁴ Fū Nayora ayia aga, amere wü re teke biri de fūh ye menewa (29). Fū ah ayia abī Tera. ²⁵ Fū ah amere fütanga ngü la wü re kama biri nzūkpa de fūh ye menewa (119), fi da ebī gara wü jaji. Fū Nayora ayia akpi.

²⁶ Fū Tera ayia aga, amere wü re teke bata de fūh ye nzūkpa (70). Fū ah akpo ebī ye. Ah bī wü jaji bata, de iri wü Abarama, bete Nayora, bete Arana.

Dela iri wü kundu kundu ye Seme, te wüh bī ewü fütanga mere ngu ta te si ne.

²⁷⁻²⁸ Dene ngü ka wü di Tera.

Wü di Tera ta bata, de iri wü Abarama, Nayora, bete Arana. Wü Tera ngbü ta de wü di ye la agbü gara sū de iri ye Ura.† Fū Arana ayia abī ye, agü iri na Loto. Fütanga ngü la, fū Arana ayia akpi, ciki gbü sū de te wüh bī engu gbügbü, agbü Ura la, o wö ye na di la ladü de jia ye. ²⁹ Fū wü Abarama ake Nayora aga, akoro cögbörö wü komoko.

* 11:9 11:9 Babilona kpah de Babela. † 11:27-28 11:27-28 Ura ta de 'baranga, te di gbü nga nzö köti ka wü Kasado.

Fü ewü ayia aza wü würüse. İri wara Abarama ta de Sarayî. İri wara Nayora nda de Mileka.‡ ³⁰ Amba Sarayî bi ye ta nda de.

³¹ Gbü gara ra, fü Tera ayia aza wü Abarama ake wara ye, bete Loto, te di de kundu ye ne, ace Ura, teka anü agbü tó ka wü *Kanana. Fü ewü anü, anü, akoro gbü gara sü etüingba, de iri ye Arana. Fü ewü angbü sela. ³² Fü Tera ayia agbe, angbü re kaka koro eyi wü re kama 'basu de füh ye 'buruve (205). Fü ah ayia akpi sela.

12

Dene ngü te Me i Abarama tete

¹ Gbü gara síkpî, te re ka Abarama koro tete 'buru baka re teke bata nzükpa de füh ye 'buruve (75), fü Me ayia amala ngü fü Abarama, gü ba dene, "Abarama, mü yia eyia, de mü ce gba mü, de wü müürü mü, de mü go ngbü agbü gara ganzi sü, te ma ena agü tatamu fü mü. ² Te mü le ngü kara la eyi la, ma ena ato wazi fü mü. Fü wü kundu mü abî ye, asibi, afa sü. Fü nguwa yi asibi, akoro ba mere bi nguwa wü kpara. Ma ena ato wazi fü mü, fü iri mü adi ewü awü gbü wü sü 'buru. Fü ra adu angbü eto züka ngü fü mere bi wü kpara teka ngü ka-mü. ³ Mene kpara te ena amere züka ngü fü mü, ma ena amere kpah züka ngü fefe na. Amba mene kpara te ena asiri mü, ma ena akîna engu. Ma ena aküwa nguwa wü kpara füh kotó ne 'buru teka ngü ka-mü."

⁴⁻⁵ Te Abarama je ngü la bala, fü engu amere wü ngü la kpah ce 'buru bala.

Fü Abarama ayia agbü Arana sela, aza wara ye, ake Loto, te di de ye engu ni ye ne. Fü ewü akó kpah wü labî ka-wü, te ewü maka de sela ne, de wü nü ka-wü, de wü e ka-wü 'buru, anü di kpa gbü tó ka wü *Kanana. Te wü Abarama nü koro tete agbü tó ka wü Kanana, ⁶ fü ewü ayia aguru sü, anü akoro kpa gbü gara sü kpala de iri ye Sekeme, esa mere rü ka More. Ta gbü wü re la, wü Kanana ngbü ta la fi era kotî gbü sü la.

⁷ Fü Me ayia agü tamu ye fü Abarama, gü ba dene, "Te gara, ni ena ato tó ne 'buru fü wü, de wü kundu ye, teka fü ewü angbü gbügbü fi mere badi." Te Abarama je ngü la tete, fü engu adu areke sü baka *cangali, teka agbo nga iri Me tete na, angbü Me gü tamu ye fefe na gbü sü engu la.

⁸ Fütanga ngü la, fü Abarama ayia anü to gbü kpa ye ka kokpa, anü akoro kpa enzó gümba, te di to kpa fügö ka Betele. Fü ah ayia ade mba gugu sela, ezengba Betele ake Ayî. Fü engu ayia areke sü teka adi egbo

nga iri Mere Me, da ecu ngü Mere Me sela. ⁹ Fü Abarama angbü fi bü eka te-ye ce ce ce bala, enü kpa edebu sü to gbü kokpa.

Dela ngü ta te Abarama mere, te Me i engu tete, fü ah ayia ace Arana ne.

Dene ngü ta te mere te-ye fü Abarama agbü Ezepeto

¹⁰ Fütanga wü ngü la, fü tala ayia atî gbü sü ka wü Kanana 'buru. Te di bala, fü wü Abarama ayia akpe anü angbü la takü agbü *Ezepeto, teka ngü ka mere siti tala la.

¹¹⁻¹² Baka te ewü yia ngbü enü tete, fü ewü anü akoro gbamari ede Ezepeto. Fü Abarama ayia amala ngü fü wara ye, gü ba dene, "Sarayî deyi, ani koro eyi gbamari ede Ezepeto dene. Te ani ena akoro kpala la, wü kpara ka Ezepeto ena agü jia wü te ye, awu ye, de te ye su afa sü ne. Gümü ye ena ake ewü. Te di bala, te wüh ena awu, gü ba, ni de watî ye la, wüh ena amörö ni teka ngü ka-ye. ¹³ Amba dene mba gara mani, te ani ena amere, teka fü wü kpara ka Ezepeto amere ni areke areke, angbü wüh ena amörö ni. Te wüh yi-ta ye la, ye mere e amala fü ewü, gü ba, 'Ni de watî ye,' ne de. Ye mala fü ewü, gü ba, 'Ni ka-ni de engu ni ye.' " Abarama mere ta mani la bala, angbü Sarayî su fa sü.

¹⁴ Fü ewü ayia anü akoro kpa gbü Ezepeto. Baka te wü kpara ka Ezepeto wu Sarayî, fü Sarayî ayia asu gbü jia ewü afa sü. ¹⁵ Fü wü angbü cögbörö kpara ka miri ayia kpah awu Sarayî. Fü ewü anü de ngü la, amala fü miri, gü ba, "Ani maka gara ye würüse kpane, te su fa sü!" Fü ewü adu aza Sarayî, anü de engu kpa gba miri. Fü Sarayî ayia angbü kpala.

¹⁶ Fü miri angbü emere ngü Abarama ereke 'duwa ba-neh-ene-la. Fü ah amala, gü ba, "Ni le ase Sarayî wara ni tete na." Fü engu ato mere bi wü e fü Abarama, baka wü labî, wü kambiliki, wü yiti, kpah de wü nü, te wüh nü fefeh, ba wü dongî bete kamele, teka ngü ka Sarayî.

¹⁷ Fü Me ayia atima mere siti keke agba miri la, de wü kpara ka-ye 'buru, teka ngü ka Sarayî, angbü ah ka-ye de wara Abarama. ¹⁸ Te miri wu bala, fü mamaguma ayia anzu. Fü engu adu aî Abarama, amala ngü fefe, gü ba dene, "Mene ngü de te ye mere de ni de bane, ah de ne ngü ne? Te mala ta fü ni, gü ba dene, 'Würüse ne de engu ni ni.' Ye su wu fü ni bala teka ne? Te ye ena amala ta fü ni, gü ba, 'Sarayî ka-ye de wara ni la,' ah ena areke ta afa sü. ¹⁹ Ye fiti ni, gü ba, 'Sarayî ka-ye nda de engu ni ni.' Fü ye ayia ale, gü ba, 'Ni za engu eza wara ni tete.' Dela 'ba

‡ 11:29 11:29 Wö ye Mileka ta de Arana. Engu ni ye Mileka, tangbase, ta kpah ladü de iri ye Yiseke.

zūka ngü na? Te di bala, wara ye eyi dene! Ye za engu eza, de wü nü ka-wü!"²⁰ Fū miri adu atima wü kpara ka-ye, de wüh gī nga Abarama, ce te kaje. Fū Abarama aza wara ye, de wü e ka-ye 'buru, ayia adu ka-wü agbü Kanana.

13

¹ Dela mene ngü ta te mere te-ye fū wü Abarama ake Sarayī agbü *Ezepeto. Wüh yia du ka-wü ta agbü *Kanana, kphah de wü Loto.

Dene ngü ka wü Abarama ake Loto

² Fütanga ngü la, fū wü e ka Abarama ayia asibi tīne afa sü, ah de wü se, kphah de wü nü, ba wü yiti, wü kambiliki, de wü meme. ³ Baka te wü Abarama du koro tete agbü Kanana sela, fū ewü angbü endondoro te nga nzö wü sü sela, zalü anü akoro agbü Betele, gbü sü ta te ewü mere gugu ka-wü tete na te enga gina, ezungba Betele ake Ayī ne. ⁴ Sü engu la, ah ta kphah de sü, te Abarama gbo nga irī Me tete na, te enga gina ne. Fū Abarama adu angbü egbo nga irī Me kphah sela.

⁵ Wü Abarama ngbü ta ejiji te nga wü ndoro la kphah fi bü ake Loto, te di de ye enga ni ye ne. Loto ta kphah de mere bi wü kpara gbü nga ye, kphah de wü nü, ba wü yiti, wü kambiliki, de wü meme esaka ye. ⁶ Baka ta te wü nü sibi esaka ewü, ake afudu ye fa sü ne, sü du be, fū ewü angbü tete 'buru gbü sü biringbö, ne nda tīne de. ⁷ Angü wü kpara ta te ewü ngbü eceka kpī fütanga wü nü ka Abarama, bete nda Loto ne, du ngbü ewü nga esuka wü, teka ngü ka sü te be de ne. Da ewü ta te ewü ena anü to kpa ekati ne nda ma, angü wü kpara ka Kanana ngbü ta gbü sü la. Wü Pereze ngbü ta nda-wü kphah edebu sü gbü sü la.

⁸ Te di bala, fū Abarama ayia amala ngü fū Loto, agü ba, "Ye ni deyi, ni le fū nga adi engbü esuka ani de. Ngü de te wü kpara ka-ani ngbü ewü nga di esuka wü la, ah de siti ngü. Angü ani ka-ani mürü." ⁹ Te di bala ne, te sü de sene be nda de la, ye ceka la mere siti nga nzö sü, de to kpa fügö ne. Dela 'buru sü, te ani ena angbü gbügbü na. Te ah bala la, ani ye süka ani eye tītīne. Ye ceka nda-ye sü eceka. Te ye ngbü ele nda-ye angbü ciki sene la, ni ena aza nda-ni tīne mene sü, te di to kpa fügö ne. Te ye le di mene sü, te di to kpa fügö ne la, ni ena angbü nda-ni tīne ciki sene. Angü ngü ka nga esuka wü kpara esiti."

¹⁰ Fū Loto ayia aceka kpī, awu sü ede ngu Yürüdene, te nü koro zalü kpa gbü

Sügara ne. Fū sü engu la ayia atī te nga jijia 'duwa kpini, angü ah ta de zūka sü, te ngu ngbü gbügbü na fi bü cakö. Ah ta kphah baka sü ka yī, te Me o agbü Edene ne. Ah ngbü kphah baka tö ka wü Ezepeto, te ngu fa gbügbü na sü ne. Angü ngü la mere te-ye ta gügü, o Me siti *Sodomo ake Gomora la de. ¹¹ Te Loto wu bala ne, fū ah ayia afe nda-ye mene sü, te di ede ngu Yürüdene to kpa fügö ne. Fū ewü ayia aye süka wü ake afudu ye. Fū Loto ago angbü nda-ye kpala.

Dela ta ngü te wü Abarama ake Loto ye süka wü tete na. ¹² Abarama ngbü nda-ye ta fi gbü sü ka wü Kanana sela. Fū Loto anü angbü nda-ye ede wü mere köti te di era ngu. Fū ah ade gugu ka-ye ghamari ede gara mere köti, de iri ye Sodomo. ¹³ Wü kpara ka Sodomo ka-wü ta siti wü kpara, te ewü ngbü ememere fi bü *siti ngü gbü jia Me.

¹⁴ Ta te Loto go tete gbü nda-ye sü, fū Me ayia akoro kpaka Abarama, amala ngü fefe na, gü ba, "Mü e la jia mü, de mü ceka nga nzö wü sü ne 'buru. Mü ceka la kpī to kpa fügö, to kpa ekati, kphah to gbü kokpa bete kamisü." ¹⁵ Wü sü de te mü ngbü eceka la, te gara, ma ena ato ato 'buru fū yī, de wü kundu mü, teka fū ewü angbü gbügbü fi mere badi. ¹⁶ De-ra Me, ma ena ato wazi fū wü kundu mü la, teka fū ewü angbü ebī wü ye, da esibi efa sü, ba zutö la. Angü kpara te ena atanga ewü anza ne nda ma. ¹⁷ Te di bala, ah le de mü yia eyia, mü kpo, mü ndoro te nga nzö wü sü la 'buru. Mü ceka reke areke, angü dela eyi sü te ma ena ato fū yī." ¹⁸ Te Abarama je ngü de te Me mala fū ye de bala ne, fū ah ayia ago agbü Eberone, ade gugu ka-ye angbü kpala, esa mere rü ka kpara de iri ye Mamare. Fū Abarama adu areke sü baka *cangali kpala, teka adi egbo nga iri Me tete na.

14

Dene ngü ka Abarama ake miri ka Sodomo

¹⁻⁵ Ta gbü wü re la, gara mere miri ta ladü de iri ye Kedora-Lawomera. Ah ngbü ka-ye ta to kpa fügö, gbü tö ka wü Elama. Ah de mere kpeke miri, de mere bi wü kpara esa lö ye. Fū Kedora-Lawomera aza wü marajümüya ka-ye, anü de ewü, atī gü gbü nzö mere bi nguwa wü kpara, baka wü kpara ka *Sodomo,* Gomora,† Adema,‡ Zeboyima,§ bete wü Bela.* Fū Kedora-Lawomera ayia afa wü kpara la, adu angbü gbü nzö ewü 'buru de wazi. Fū

* 14:1-5 14:1-5 Irī miri ka Sodomo ta de Bera. † 14:1-5 14:1-5 Irī miri ka Gomora ta de Birasa. ‡ 14:1-5 14:1-5 Irī miri ka wü Adema ta de Sinaba. § 14:1-5 14:1-5 Irī miri ka wü Zeboyima ta de Semebere. * 14:1-5 14:1-5 Wüh du ngbü ta ei Bela kphah Sügara.

ah ato riri fū ewü, de wüh di eto mere bi jiasse fū ni, te nga wü re 'buru. Fū wü kpara la ale, akpo angbü eto jiasse la, teka wü re nzükpa de fūh-ye 'basu. Fütanga re nzükpa de fūh ye 'basu, fū nguwa wü miri de 'buruve, te Kedora-Lawomera ngbü gbü nzö ewü ne, adu ace ka-wü kpo da eto jiasse fū Kedora-Lawomera. Fū re afü biringbö.

Fütanga re biringbö la, fū Kedora-Lawomera ayia amala ngü, agü ba, "Te di bala, ni ena ato kuru te wü kpara te ewü gü ba, 'Ani le ngü ka-ni tīne de,' ne." Fū wü Kedora-Lawomera ayia abiti te-wü de wü gara wü miri bata, teka de wüh le ta-ngü te ni. Wü miri la ta miri ka wü Sınara[†] de nda wü Elasara,[‡] bete nda wü Goyi.[§] Fū ewü adu amaka wazi, teka wü mene wü miri, de te ewü gü ba, "Ani le tīne aje riri ka Miri Kedora-Lawomera de," ne. Fū ewü ayia de wü marajümiya ka-wü la, anü atı de gü gbü nzö nguwa wü Refe,^{*} de wü Zuza,[†] de wü Eme,[‡] ayia aza esaka ewü. ⁶ Fū ewü adu kphah, atı de gü gbü nzö wü Oro, kpa fūh da.[§] Fū ewü aliki wü Oro zalü akoro di kpa gbü ndu, agbü Eleparana. Fū ewü afa wü Oro. ⁷ Fū ewü adu kphah anü agbü Ene-Misapata,^{*} afa wü Amaleke, de wü Amora[†] kphah bala.

⁸⁻⁹ Ta te miri ka Sodomo, de wü gara wü miri gbü nga nzö sü la, je ngü la bala, fū ewü ayia abiti wü marajümiya ka-wü, anü akoro gbü mere sü tele tele de ıri ye Sidimi.[‡] Fū ewü areke te-wü sela, teka atı de gü gbü nzö wü Kedora-Lawomera.

¹⁰ Fū wü Kedora-Lawomera ayia asö gü, afa wü miri ka Sodomo de wü bu ye la 'buru. Fū wü miri ka Sodomo ayia de wü bu ye, auru de woro. Fū miri ka Sodomo ake miri ka Gomora akpe atı gbü wü cudu, te ewü cu fa sü, angü angbe cögbörö wü cudu fa ta gbü sü la sü. Fū wü gara wü bu wü ayia akpe nda-wü to kpa enzö mere gümba, aküwa ka-wü.

¹¹ Fū wü marajümiya ka Kedora-Lawomera ayia ari gbü wü mere köti ka Sodomo ake Gomora, akö wü e ka-ewü, de wü gara kpara gbü nga ewü 'buru. ¹² Fū ewü ayia azoro kphah Loto, te di de ye enga ni ye Abarama, de wü e ka-ye 'buru, angü engu ra köti ta gbmari ede Sodomo. Fū ewü ayia anü sü de engu, de wü e kaka-na la 'buru.

¹³ Ta gbü wü laki la, Abarama ngbü ta la fi esa mere rü ka Mamare ne. Wü Mamare ngbü ta kphah gbü sü la, de wü di enga ni ye 'basu. Ah de wü Esokole ake Anera. Nguwa wü Mamare ta de Amora. Nguwa Abarama nda de *Ebere. Nguwa wü Mamare nzö ta ngüte de wü Abarama.

Fū gara kpara ta te kpe küwa gbü gü la, ayia akoro amala ngü fū Abarama, gü ba dene, ¹⁴ "Wü Kedora-Lawomera koro de gü, siti wü sü ka-ani eyi 'buru. Wüh zoro Loto, nü sü di kphah eyi." Te Abarama je ngü la, fū engu ayia 'duwa, abiti wü komoko ka-ye, te ewü wu ngü ka gü kphah kpo. Fū ah adu kphah abiti wü vüngüte ka-ye 'buru. Fū ewü ayia, baka wü kpara kama bata nzükpa de fūh ye 'bajena la (318), anü afa nga wü Kedora-Lawomera, zalü akoro di kpa gbü Dana. ¹⁵ Te wü Abarama nü koro tete kpala, fū ah ayia afi nga gara mani. Fū ah ayia aye süka wü kpara ka-ye la, gü ba, "Wü gara fū nda-wü bane, de wü gara fū nda-wü to bane." Fū ewü ayia gbü biti, anü atı de gü gbü nzö wü Kedora-Lawomera, agüka ewü gbü ıri-to. Fū wü Abarama ayia asö gü, afa ewü ka. Fū ewü ayia aliki ewü, anü akoro de ewü nengete kpa gbü Oba.[§] ¹⁶ Fū wü Abarama akö wü e de esaka wü Kedora-Lawomera, de ta te ewü kö gbü gü ne 'buru. Fū Abarama adu kphah aza Loto, de wü gara kpara, ta te wüh zoro ewü, de wü würüse ne 'buru, adu di.

¹⁷ Te Abarama ngbü edu tete, fū miri ka Sodomo ayia anü amaka Abarama kpa te kaje, ede Yerüsalema.^{*} ¹⁸ Miri ka Salema ta ladü de ıri ye Meleke-Sadiki. Engu ta de *mürü gele ka Mere Me. Fū Meleke-Sadiki ayia aza e-mazü bete fi *vinü, akoro di, ato fū wü Abarama. Fū ewü ayia azü. ¹⁹ Fū Meleke-Sadiki ayia asü ngüsü gbü nzö Abarama, amala ngü fefe, gü ba dene, "Ma ngbü eku gba fū Mere Me, te o tō ake kpı ne, de ah to wazi fū mü. ²⁰ Ma gbo nga ıri Me, angü ah to wazi eyi fū mü, fū mü afa wü vügü ka-mü di." Fū Abarama ayia aza mere bi wü e, de te engu kö gbü nga wü Kedora-Lawomera ne, aye süsüka ba e nzükpa. Fū ah ayia aza bibiri na, esüka wü nzükpa la, ato fū Meleke-Sadiki te ıri Me, baka tari-e, teka agbo nga ıri Me di.

²¹ Fū miri ka Sodomo ayia amala ngü fū Abarama, gü ba dene, "Ye za du wü e, ta

[†] 14:1-5 14:1-5 ıri miri ka wü Sınara ta de Amurafera.

[§] 14:1-5 14:1-5 ıri miri ka wü Goyi ta de Tıdala.

^{*} 14:1-5 14:1-5 Wüh mere gü de wü Zuza ta kpa gbü Ama. [‡] 14:1-5 14:1-5 Wüh mere gü de wü Eme ta kpa gbü Save-Kıratema. [§] 14:6 14:6 ıri da ka wü Oro ta de Seyira. ^{*} 14:7 14:7 Wüh du ngbü ta eı Ene-Misapata kphah Kadesa. [†] 14:7 14:7 Wü Amora ngbü ta agbü Acacona-Tamara. [‡] 14:8-9 14:8-9 Mere yı-ngu du gbala sü tıtine eyi fūh mere sü tele tele la. [§] 14:15 14:15 Oba ta gara 'baranga ede Damaseke edebu sü kpala. ^{*} 14:17 14:17 Sü la ka-ye kpa gbü mere kparuwa ka Save.

te wü vügü ka-ni kö esaka ani la, eza fü ye. Ni ele nda-ni bü wü kpara ka-ni, de ye lügü ewü fü ni.”²² Fū Abarama alügü ngü fefe, gü ba dene, “Ye za wü kpara ka-ye eza, de wü e la 'buru. Ni le aza wü e la nda-ni de, angü ni kina kina eyi, de یری Mere Me, te o tó ake kpī ne,²³ gü ba, ni tī aza e 'duwa kpo de. Te ah ena adi kphah mene engu, te di mba cükü'daye la, ni za nda-ni kphah de. Angü ye ena agü ba, 'Ni to wazi fü ni, Abarama, me-ni.’²⁴ Ni za nda-ni eyi bü wü e-mazü, de te wü kpara ka-ni la zü te kaje. Wü vüngüte ka-ni, de te ani di de ewü ne, wüh za nda-wü e eza.”

Dela ngü ta te Abarama mere, te engu küwa Loto esaka wü Kedora-Lawomera, te wüh zoro engu tete gbü gü ne.

15

Dene ngü ka vüngüte ka Me ake Abarama

¹ Gbü gara sīkpī, fü Me ayia akoro kpaka Abarama gbü bitī, amala ngü fefe, gü ba dene, “Abarama, mü kpe cürü de. Ma ena adi fü mü ba *vüngüte ka-mü. Fū ra angbü eceka kpī fütanga mü me-ra. Fū ra angbü fü mü baka mere ngisi ka-mü. Fū ra ato mere bi wü züka e fü mü, angü mü to maguma mü eyi fere.”²⁻³ Fū Abarama amala ngü, gü ba, “Wayi bala, Mere Miri ka-ra, amba e te mü ena ato fere ne, ah baka neh ene? Angü wü di ra kphah ma ne. Amba, te ma ena akpi la, kpara te ena afi nga ra, areke mbükü ra, neh da? Te wü di engu wüna di 'buru nengete agbü Arana kpala ne? Kpara te ena aza e-nga-kpa ra, te gara, ena adi kphah bü engu cörö ka-ra, te ma ga engu, de یری ye Eliyezere ne.”⁴ Me gü ba dene, “Fanü fanü, engu cörö ka-mü la, ah ti aza wü e-nga-kpa mü, fütanga kö mü me-ye nda de. Kpara ladü te ena aza wü e-nga-kpa mü la sidi nga kö mü. Ah ena adi zu ye mü, te mü ena abī engu cu me-mü.”

⁵ Fū Me amala ngü fü Abarama, gü ba, “Mü koro la kpa etanü, de mü ceka wü küfara de kpa tikpi ne. Mü tī eyi atanga ewü? Ma ena ato wazi fü mü. Fū wü kundu mü asibi, akoro kphah coboro, baka wü küfara, de te mü eceka ewü etongo kpī ne.”⁶ Fū Abarama ato maguma ye fü Me. Fū Me adu aceka engu baka züka kpara ka-ye teka ngü la.

⁷ Fū Me amala ngü fü Abarama, gü ba dene, “Abarama, mü wu kpo, ga, ma de kpara te ma i mü, te mü ngbü ta agbü Ura kpala. Fū ra amala ngü fü mü, de mü ce sü te wüh bi mü gbügbü na ne, teka fü mü akoro angbü gbü *Kanana sene. Fū

ra aceka kpī fütanga yi te kaje la, akoro de yi sene, teka fü ra ato tó ne fü yi, fü yi angbü tīne gbügbü na.”⁸ Abarama gü ba dene, “Wayi bala, Miri ka-ra, ma ena awu neh baye, ga, mü ena ato tó ne fere, fanü fanü?”⁹ Me gü ba, “Mü ena awu ngü la enatikine, angü nih ena anzö ngüte ake nih ma. Mü nü, mü za ca yiti, de re ka-ye bata. Fū mü aza kphah ca meme, de re ka-ye kphah bata. Fū mü aza kphah moko kambiliki, de re ka-ye kphah bata. Fū mü aza kphah mö ka köti, bete nda gü. Fū mü akö ewü, akoro di, awa fere.”

¹⁰ Kpurutokokpi la, fü Abarama ayia anü aza wü e la 'buru, akoro de ewü, teka amere gele vüngüte ka-wü la di. Fū ah awete ewü, de wü lu 'buru. Fū ah awete so wü nü la 'buru, aye esüsüka 'basu 'basu, ace 'duwa so wü lu. Fū ah adu aza wü so la, ado ewü kphah 'basu 'basu de ze ye, angü gele ka manzö ngüte ka wü kpara la, ah ka-ye ta bala. Fū Abarama adu angbü kötö.¹¹ Fū wü nügünü akpo angbü ekoro, teka adoro wü so la. Fū Abarama angbü eliki ewü asidi, zalü anü akoro etamurago.

¹² Te ra ngbü etī tete, fü mere ra ayia azoro jia Abarama. Fū sü atī gbü jijia 'duwa mbirri. Fū Abarama angbü eyi ayi, riririri, de mere cürü.¹³ Fū Me akpo angbü emala ngü fü Abarama, gü ba, “Abarama, mü kpe cürü de. Ma ena angbü baka mere vüngüte ka-mü, fi mere badi. Fū ra ao jia ra eküte mü. Ngü te ma emala fü mü ne, ah de zu ngü, te ena amere te-ye fü wü kundu mü sidi nga mü. Angü te gara, wü kundu mü ena ayia sene, anü akoro agbü gara tó nengete, angbü kpala baka wü ganzi kpara. Wü kpara gbü tó la ena afü ewü ba wü labi ka-wü, ato cinga te ewü, teka mere bi wü re, baka re kama bala (400).¹⁴⁻¹⁶ Fütanga re kama bala la (400), ma ena adu aküwa wü kundu mü la esaka wü kpara, te ewü ena ato cinga te ewü la, angü ma ena adu ato kuru te nguwa siti wü kpara la, na cinga te ewü ena ato te wü kundu mü la. Fū wü kundu mü ayia ace tó la de mere tadu. Fū ewü akö mere bi wü e esaka wü vügü ka-wü la. Fū ewü ayia adu akoro gbü tó ka wü Kanana sene. Gbü re engu la, ma ena ato tó ne fü wü kundu mü. Amba ma to tītīne de, angü ma ngbü ecī nga wü kpara ka Kanana. Angü wüh ngbü emere *siti ngü efa sü. Ma gü ba, ma ena angbü la mba cükü'daye feke, anga wüh ena afü maguma wü ya? Te gara, te ewü fü maguma wü de la, ma ena adu aliki ewü sene asidi. Fū ra aza tó ka-ewü ne, adu ato fü wü kundu mü. De-mü, Abarama, mü ena ara füh kotó ne, ayiri ayiri. Te mü gbe

* 15:2-3 15:2-3 Eliyezere la, wüh bi engu ta gbü gara ganzi sü de یری ye Damaseke.

eyi la, fü wü kundu mü aceka kpi fütanga mü me-wü. Fü mü amaka kpah wü züka ngü. Fü mü adu akpi tîne ferrre.”

¹⁷ Baka te sü ti nza tete 'buru 'buru, fü Abarama adu azükü. Engu ga, ni ceka kpi bane de, gbo! te sila de wa gbü ye, te ngbü ecü aci ba ke la. Fü wa la angbü endoro esüka wü so nü, de te Abarama wete ewü, do ne.

¹⁸ Fü Me amala ngü fü Abarama, gü ba, “Ni ena ato tö ne fü wü kundu kundu ye. Fü tö ne angbü ba tö ka-ewü, akpo kü bü era ngu ka wü *Ezepeto, zalü akoro di era mere ngu de iri ye Efürata ne. ¹⁹ Amba enatikine, tö la, ah ka-ye la esaka nguwa wü gara kpara, de iri ewü wü Kena, wü Keneza, kpah bete wü Kadamona. ²⁰ Nguwa wü Ete, de wü Pereze, bete wü Refe go ngbü eyi kpah 'buru sela. ²¹ Wü gara nguwa wü kpara, baka wü Amora, wü Kanana, wü Grigasa, bete wü Yebusa kpah 'buru ladü gbü tö la. De-ni, Me, ni ena aliki nguwa wü kpara la, te gara, gbü tö la 'buru asidi. Fü ni adu ato tö engu la tîne fü wü kundu ye de nguwa wü. Fü wü angbü sela fi mere badi.”

Dela ngü ta te mere te-ye gbü sikipi te Me za Abarama ba vüngüte ka-ye tete na ne.

16

Dene ngü ka Abarama ake Agara

¹⁻³ Baka ta te wü Abarama ngbü gbü tö ka wü *Kanana kpala teka wü re nzükpa ne, wara Abarama, de iri ye Sarayî ne, bi ye fefe nda de. Te di bala, fü Sarayî ayia afi nga gara labi ka-ye de iri ye Agara, te di de egba *Ezepeto ne. Fü Sarayî ayia amala ngü fü watî ye, gü ba dene, “Watî ni deyî, ye ceka la, Me le de ani bi ye ake ye de. Te di eyi bala ne, ye za labi ka-ni, de iri ye Agara ne, eza wara ye tete. Fü wü angbü ake di. E-wu neh da? Me ena ato ye fü ani guguvu na.” Fü Abarama ayia ale. ⁴ Fü Sarayî adu aza Agara, ato fü Abarama, de ah ngbü ba wara ka tete. Fü Abarama angbü ake Agara, awu engu wü rüse tete. Fü Agara ayia amaka bu.

Te Agara wu tîne, ga, ni eyi de bu ni ne, fü engu adu angbü efala Sarayî. ⁵ Fü ngü la adu asiti te Sarayî 'duwa ba-neh-ene-la. Fü Sarayî adu amala ngü fü Abarama, gü ba, “De bane neh ene ngü ne? Dela ngü ka-ye! Angü Agara ngbü efala ni enatikine ne, teka ngü ka-ye. E-to ta wü rüse la fü ye neh da? Ah de ni de? Ah du fü te-ye tîne eyi gbuu! angbü emü ni, teka te engu du maka ye tîne eyi ne. Dela ngbü rü zu ngü fanü fanü na? Ah ba ngü de. Me ladü, te ena awu ngü ka-ye la!” ⁶ Abarama gü ba

dene, “Ah ba ngü de. Angü Agara de labi ka-ye. Ye za kpah bü Agara, de ye mere engu, ba e te ye ye ngbü ele, teka de ah je ngü ka-ye.”

Fü Sarayî adu angbü emere Agara tîne 'duwa sisiti. Fü ngü la adu asiti te Agara afa cu sü. Fü Agara adu akpe kpa etü gü, to te kaje te enü angbü Ezepeto.

⁷ Baka te Agara kpe nü kpa etü gü, fü anü akoro kpa füh du-kpa-ngu, kpa te kaje ka Sura. Fü *Malayîka ka Me akoro amaka engu kpala. ⁸ Fü Malayîka la ayi-tata na, gü ba dene, “Agara deyî, ye koro neh kaye? Ye de labi ka Sarayî de? Ye enü neh kaye?” Agara gü ba, “Ni ngbü ekpe akpe esaka Sarayî.” ⁹ Malayîka gü ba, “Mü mere e afi nga ngü, te Sarayî mere mü di, la de, angbü Me wu ngü te mere mü la eyi. Mü yia eyia, de mü du kpa ka Sarayî, fü mü adi eje ngü kaka-na. ¹⁰⁻¹¹ Angü mü ena abi ye, fü mü agü iri na de İsimayile.* Fü Me ato wazi fü yi, de wü di enga mü la. Fü ewü abi ye, asibi asibi. Kpara te ena atanga wü ata mü anza, nda ma. Angü Me je gba kamü, teka ngü de te ngbü emere mü ne eyi. ¹² Mbarase ka-mü la ena aga, akoro ba siti nü ka gü de gü te-ye. Mbarase la ti ale ngü ka wü bu ye te gara nda de. Wü bu ye ti ale ngü kaka-na kpah de. Engu ena angbü emere gü bü faaa! de wü kpara 'buru. Wü kpara ena angbü ekpü engu 'buru akpü. Engu ena ao kôti ka-ye kpikpi ye. Ah ra kôti te gara de wü di enga ni ye nda de.”

¹³ Fü komö Agara ayia agu. Fü ah afi, gü ba dene, “De bane ne ngü ne? Ma ena aküwa aküwa? Ma wu dene eyi cu Me de? Me wu cinga ra eyi fanü fanü.” ¹⁴ Fütanga ngü la, fü ewü adu angbü ei du-kpa-ngu, te Agara kpe edede la, gü ba, Biri-Laroyi. Ah baka e te Agara gü ba, “Biri te Me wu cinga ni gbügbü na.” Enatikine du-kpa-ngu la fi ladü ezengba Kadesa ake Berede.

¹⁵ Fütanga ngü la, fü Agara ayia afere nga ye, adu kpa gba Abarama. Fü engu ayia ayaka enga ye la. Fü Abarama agü iri mbarase la, İsimayile, kpah ba e te Me mala fü Agara.

¹⁶ Dela ngü ta te wüh yaka İsimayile tete na. Wüh yaka engu ta, o re ka Abarama koro eyi 'buru teke bala de füh ye ma'diya (86).

17

Dene si-ngü ka matî esa basa, te Me mala fü Abarama

¹ Fütanga ngü la, fü re afü ba re nzükpa de füh ye bata, o re ka Abarama koro eyi 'buru ba re teke bala nzükpa de füh ye menewa (99). Fü Me adu akoro agü tamu

* 16:10-11 16:10-11 İsimayile ba e te wüh ena aga, Me wu cinga ra.

ye fù Abarama, amala ngü fefe, agü ba, "Abarama, mü wu kpo, gü ba, ma de Me, te ma di de mere wazi. Mü lala gbü nga ra, fù mü angbü emere fi bü züka ngü gbü jia ra. ² Ma ena angbü emere fù mü kpah fi bü züka ngü, baka ta te ma mala fù mü te enga gina ne, angü mü tîne eyi de *vüngüte ka-ra. Ma ena ato wazi fù mü, de wü kundu mü, fù ewü abi ye, asibi asibi füh kotö ne afa sü."

³ Te Abarama je ngü la, fù ah abuka gbüra ye kötö, agbo nga iri Me. ⁴⁻⁵ Fù Me arü amala gara ngü fù Abarama, gü ba dene, "Dene kpeke ngü, de te ma ena amere fù mü, angü ma eyi de vüngüte ka-mü. Ma ena afü iri mü de Abarama ne, fù ewü angbü ei mü tîne Abarayama, angü ma ena ato wazi fù mü, fù wü kundu mü asibi te gara, akoro mere bi nguwa wü kpara. ⁶ Wü kundu mü la ena abi ye, fù ewü asibi asibi afa sü. Fù mere bi nguwa wü miri akoro gbü ewü. ⁷ Baka te nih nzö ngüte eyi ake nih ma, wü kundu mü ena angbü kpah de vüngüte ka-ra fütanga kö mü. Fù ngü la angbü bala, fi mere badi. Fù yi alala, angbü emere fi bü ngü ka-ra. Fù ra angbü eceka kpi fütanga yi. ⁸ Tö ka wü *Kanana, de te mü ngbü gbügbü na la mba takü ne, ma ena ato te gara 'buru fù yi, de wü kundu mü, teka fù ewü angbü gbügbü fi mere badi. Fù ra angbü eceka kpi fütanga yi me-ra."

⁹ Fù Me adu kpah, amala gara ngü fù Abarayama, gü ba, "De-mü Abarayama, ah le de mü lala fi te ngü ka-ra, de wü kundu mü sidi nga mü 'buru, fi mere badi. ¹⁰ Dene eyi gele, te ma to fù yi, teka fù yi adi emere, de wü kundu mü la 'buru. Ah le de wü komoko 'buru di eti esa *basa. ¹¹ Te yi mere bala la, ngü la ena agü tamu ngü fù wü kpara, gü ba, yi de wü vüngüte ka-ra fanü. ¹² Wü kpara gbü nguwa mü 'buru di eti kpa esa *basa, be kpah te wü labi kamü 'buru. Ngü la, ah kpo enatikine, de ah nü kpa engagira nü. Wü jaji komoko 'buru, de te wüh ena ayaka ewü, te ewü ra koro eyi sikipi 'hajena la, wüh di eza ewü, egü gbü basa. ¹³⁻¹⁴ Mene kpara te le atí esa basa de, ah mere e adu angbü ba mürü mü tîne de. Angü ah ce da eje riri ka-ra eyi kpo. Te yi ngbü eyi da eti esa basa la, ngü la ena agü tamu ngü fù wü kpara 'buru, gü ba, yi de wü vüngüte ka-ra fanü. Fù ngü la angbü bala fi mere badi."

¹⁵ Fù Me adu amala ngü fù Abarayama, gü ba, "Teká wara mü de Sarayi ne, ma ena afü kpah iri na, de wüh di ei engu tîne Sara. ¹⁶ De-ra Me, ma ena ato wazi fefe na, fù ah bi ye komoko fù mü. Fù ra to mere wazi fefe na afa sü, fù ah angbü ata

ye mere bi nguwa wü kpara. Fù wü miri akoro kpah 'buru guguvu na."

¹⁷ Fù Abarayama angbü fi bü de gbüra ye kötö, da egbo nga iri Me. Fù Abarayama angbü efi ngü la. Fù ah angbü emü to emagama ye, gü ba, "Ngü la ena amere te-ye, neh baye baye? Ani gbe ka-ani eyi 'basu mini ake Sara ne. Ni ena adu abi ye tîne sidi sidi, o re ka-ni koro tîne eyi kama biri ne (100), fanü fanü? Te re ka Sara koro kpah eyi teke bala de füh ye nzükpa ne (90), engu ena adu abi ye tîne, neh mbi mbi baye baye?"

¹⁸ Fù Abarayama adu afi nga gara ye ye, te Agara, egba Ezepeto, bi fù ye ne. Fù ah ayi-ta Me, gü ba, "Anga Ísimayile? Ye to wazi fefe na nda-ye de?" ¹⁹ Fù Me amala, gü ba, "Ngü te ma mala fù mü ne, mü je mbi mbi de? Gina wara mü, Sara ne, ena abi ye komoko fù mü. Fù mü agü iri na Yisaka. * Yisaka ena adi emere ngü ka vüngüte ka-nih de esuka nih de nih ma ne, duu me-ye. Ma ena ato wazi fù wü kundu ye Yisaka fi mere badi. ²⁰ Amba teka Ísimayile, ma je gba ka-mü, te mü ku tekaka ne kpah eyi. Ma ena ato kpah wazi fefe na. Ísimayile ena abi wü jaji komoko, baka e nzükpa de füh ye 'basu. Fù ewü angbü 'buru wü miri. Fù wü kundu ye na abi ye, asibi kpah afa sü. Fù nguwa ewü akoro ba mere kpeke nguwa wü kpara füh kotö ne. ²¹ Te di bala, kpara te ena adi de vüngüte ka-ra, ah de Yisaka, te Sara ena abi engu ne. Ah de Ísimayile nda de. Ma ngbü emala fù mü kpekpeke, gü ba, Sara ena abi Yisaka engu ne, fütanga re ngbee biringbö." ²² Dela ngü ta te Me mala fù Abarayama, gü ba, "Yisaka ena adi de vüngüte ka-ni." Te Me mala ngü la nza tete, fù ah ayia anü sü ka-ye.

²³⁻²⁷ Fù Abarayama adu amere wü ngü de te Me mala fù ye la, kpah nde 'duwa gbü ra la. Fù ewü ayia anü atí esa *basa, de wü ye ye Ísimayile, de wü komoko ka-ye, bete wü labi ka-ye 'buru, ewü te wüh bi ewü kpa gba ka, bete ewü te engu se esaka wü ganzi kpara ne.

Dela ngü ka Abarayama, ta te ti esa basa, o re kaka-na koro eyi ba re teke bala nzükpa de füh ye menewa (99). Re ka Ísimayile ta nda-ye ngbee nzükpa de füh ye bata. Wüh ti ake Abarayama esa basa 'buru gbü ra biringbö. Wü komoko ka Abarayama ti kpah 'buru gbü biri ra la.

18

Dene ngü te Me mala fù Abarayama, gü ba, Sara ena abi ye

* 17:19 17:19 Si-ngü gbu iri de Yisaka ne, gü ba, ah mü zo.

¹ Gbü gara ra, fü Me adu kphah agü tamu ye fü Abarayama. Dela o Abarayama ngbü ta la fi engbü ede mere rü ka Mamare ne. Etü ra engu la, Abarayama ngbü ta efe te-ye esa mbula gugu ka-ye. ² Engu ga, ni ceka kpi bane de, gbo! te wü komoko bata, te ewü ngbü ekoro kpakaka na. Wü kpara la, ah ka-ye ta de wü Me, bete wü malayika ka-ye 'basu. Amba Abarayama wu bala nda-ye de. Fü Abarayama ayia kürrü, akpe anü amaka ewü kpa te kaje, agü mandí fü ewü, ³ gü ba, "Mandí fü ye, mere kpara. Wü mere e anye sü gba ni sene bü bala de! Wü ngbü la mba cükü'daye feke. ⁴ Wü nü, wü ngbü la mba kötö, de wüh koro de engu ngu fü wü, teka fü wü azürü lö wü di. De wü du, wü ngbü, wü efe mba te-wü esa rü sene, ⁵ teka fü ewü akoro mba de engu e-mazü fü wü, fü wü amaka la mba wazi feke. Fü wü adu anü sü ka-wü, angü wü koro maka labi ka-wü eyi dene." Fü ewü ayia ale ngü la, gü ba, "Wayi, ah de züka ngü."

⁶ Fü Abarayama ayia akpe de woro agbü gugu, kpara Sara, gü ba, "Ye yia eyia kere, de ye za züka zu, de ye mere kümü fü wü mere kpara de bata ne." ⁷ Fü Abarayama adu kphah, akpe de woro kpa gbü 'baranga ka wü nü ne, aza engu yiti kpala te zege azege de so ye vürü vürü, anü di, ato fü labi ka-ye, de engu mörö kere, ah zü fü wü ngba ka-ni la. ⁸ Te wüh zi wuru la nza tete, fü Abarayama adu aza e-mazü la, kphah bete gara wuru te wüh mere de ngu-ka nü, anü di, areke, ao cu me-ye engagira wü ngba la. Fü Abarayama ayia tine, adu angbü kpa esa rü ede ewü sela, emere ngü ewü.

⁹ Fü wü ngba la adu ayi-ta Abarayama, gü ba, "Wara ye, Sara, ladü sela?" Fü Abarayama alügü ngü, gü ba, "Sara ladü kpa esa gugu kpane." ¹⁰ Fü mere ewü la ayia amala ngü fü Abarayama, gü ba, "Mere züka ngü ladü, te ma le amala fü mü. Sara ena amaka bu, fü ah abi ye komoko. Ma wu eyi, gü ba, te ma ena adu akoro sene, gbü mene re te ena akoro ne, Sara ena adi de mbarase la eküte ye."

Amba Sara, te mü ngbü ka-mü kpa esa gugu de kpala, mü ngü la eyi. ¹¹⁻¹² Te Sara je ngü la tete, fü ah ayia atü de zo. Kükürü de, angü wü Abarayama ake Sara gbe ka-wü ta nda-wü eyi fa sü. Re ka Sara, ta te ena abi ye, guru sü ka-ye nda kphah eyi. Fü Sara afi nga ngü, agü ba dene, "Ni gbe tine eyi bane, watü ni, Abarayama, gbe kphah eyi ne. Ni ena amaka ye la neh mbi mbi baye baye?"

¹³⁻¹⁴ Fü Me amala ngü fü Abarayama, gü ba, "Ah mere baye te Sara ngbü emü zo, gü ba, 'Ni ena abi ye neh mbi mbi baye?' ne. Ah fi nda-ye, gü ba, baka te ni gbe tine eyi,

ngü la ena afa Me? Wazi Me fa ka-ye sü! Angü ngü biringbö te ena afa Me nda ma! Ni ngbü emala fü ye fanü fanü, gü ba, gbü mene re te ena akoro ne, Sara ena abi ye komoko." ¹⁵ Fü Sara acere nga ye, agü ba, "Ni mü zo nda-ni de." Fü Me amala fefe, gü ba, "Ye mü zo di bü eyi." Dela ngü ta te Me mala fü Sara.

Dene ngü te Abarayama nda'ba te-ye di teka Sodomo

¹⁶ Fütanga ngü la, fü wü ngba de bata la ayia angbü enü to kpa gbü Sodomo. Fü Abarayama ayia agü nga wü ngba la, anü di kpa te kaje la. Fü Me ayia aceka kpi bane, awu Sodomo nengete. ¹⁷ Fü ah angbü efi nga ngü kpa emaguma ye, gü ba, "Ni ena angbü ewo ngü, te ni le amere ne, eküte Abarayama, neh teka ne?" ¹⁸ Ah le de ni mala nga ngü la fefe na, angü engu de züka kpara ka-ni, te ni kina kina fefe na, gü ba, 'Wü kundu ye na ena asibi afa sü, fü ewü angbü kphah de mere wazi esaka ewü ne. Kphah bala, ni ena aküwa nguwa wü kpara füh kotö ne nde 'buru te ngü kaka-na,' ne. ¹⁹ Engu kphah de kpara te ni fe engu, o, teka de ah ri wü jaji ka-ye, bete wü kpara ka-ye nde 'buru, teka fü ewü angbü eje riri ka-ni. Te di tine eyi bala ne, ni ena amere wü ngü 'buru fü Abarayama, kphah baka ngü ta te ni mala fefe na."

²⁰ Fü Me arü amala ngü fü Abarayama, agü ba, "Ni je nga wü lara bi wü *siti ngü ka wü kpara ka Sodomo ake Gomora, te ewü le ngü ka-ni nda-wü 'buru 'buru de, ne eyi. ²¹ Te di bala, ni ena anü kpala, teka aceka ngü la cu me-ni de jia ni. Te ngü la ngbü rü bala fanü fanü la, ni ena acuru sü ka-ewü la, amörö ewü 'buru nde asidi." ²² Fü Me ayia atima wü *malayika ka-ye de 'basu ne, de wüh nü kpa gbü Sodomo. Fü wü Me adu angbü ka-wü 'basu wü 'basu ake Abarayama ciki sela.

²³ Fü Abarayama ayia amala ngü fü Me, gü ba, "Mere kpara, mba engu yitangü ka-ra ladü, te ma ele ayi-ta mü di. Te züka wü kpara ladü agbü Sodomo kpala, te ewü mere siti ngü nda-wü de la, mü ena amörö ewü, adünda de wü siti kpara la, kphah 'buru nde asidi?" ²⁴ Mere kpara, ma enda'ba te-ra fü mü, gü ba, te mü maka züka wü kpara kpala, te ewü di baka e teke 'basu de füh ye nzükpa la, mü ena acuru Sodomo kphah acuru? Mü ti ace da ecuru sü la, teka ngü ka züka wü kpara la, de? ²⁵ Angü ah ti te mü ena amörö züka wü kpara la, adünda de wü siti ewü de. Ah ena angbü tine kphah ba e, te ewü di de siti wü kpara la. Wayi Me, mü ngbü erü wü kpara füh kotö ne 'buru me-mü, de wüh di emere züka ngü. Te di bala, ma wu eyi, gü ba, mü ti amere siti ngü

la bala de.”²⁶ Me gü ba, “Ah mbi. Te ma maka züka wü kpara kpala, ba e teke 'basu de füh ye nzükpa la, ma ti acuru sü la tîne de.”

²⁷ Fü Abarayama adu kphah afüwa te-ye, ayi-ta Me, gü ba, “Mere kpara, ma de kükürü e gbü jia mü ba tö. Ma ena angbü embü mü de bala, neh teka ne? Mba gara enga yitangü ka-ra kphah ladü, te ma ele ayi-ta mü di.”²⁸ Anga te mü maka züka wü kpara bü ngbee teke 'basu de füh ye 'buruve, gara 'buruve tîne eyi ma la. Mü ena acuru sü la fi bü acuru, teka wü kpara ngbee 'buruve, de te ewü di ma la?” Me gü ba, “Ah mbi. Te ma maka züka wü kpara baka e teke 'basu de füh ye 'buruve la, ma curu sü la tîne de.”

²⁹ Fü Abarayama adu kphah anda'ba te-ye, aku gba fü Me, gü ba, “Anga te ye maka ewü bü ngbee teke 'basu la?” Me gü ba, “Te ni maka züka wü kpara bü ngbee teke 'basu la, ni ti acuru sü la de.”

³⁰ Abarayama gü ba, “Mere kpara, te ni mala kphah mba gara ngü la, ah mere e asiti te ye de. Anga te ye maka bü ngbee teke biri de füh ye nzükpa la?” Me gü ba, “Te ni maka züka wü kpara kphah bü ngbee ba e teke biri de füh ye nzükpa la, ni ti acuru sü la tîne de.”

³¹ Fü Abarayama adu kphah ayi-ta Me, gü ba, “Mere kpara, ni de tündö kpara, ni ena agü fü ye, dene tîne neh fe? Anga te ye maka züka wü kpara bü ngbee baka e teke biri la?” Me gü ba, “Te ni maka züka wü kpara baka e teke biri la, ni ti acuru sü la tîne de.”

³² Fü Abarayama adu kphah, ayi-ta ngü, gü ba, “Mere kpara, ye mere e aza ngü ne baka siti ngü de. Du ngü ka-ni ngbee biringbö, te ni ena amala fü ye. Anga te ye maka ewü bü ngbee ba e nzükpa la?” Me gü ba, “Ni ena awu ngü la. Te ni maka züka wü kpara baka e nzükpa la, ni ti te ni ena acuru sü la de. Ni ena ace da ecuru sü la, teka züka wü kpara la. 'Duwa te ewü koro te nzükpa nda-wü de la, ni ena acuru sü la acuru.”

³³ Dela ngü ta te Me mala ake Abarayama, teka ngü ka Sodomo. Te wüh mala ngü la nza tete, fü Me ayia anü sü ka-ye. Fü Abarayama ayia adu kpa eköti.

19

Dene ngü ta te Me mere agbü Sodomo

¹ Etamurago la, fü wü *malayika de 'basu, ta te Me tima ewü ne, anü akoro agbü *Sodomo. Fü ewü amaka Loto, te ngbü ka-ye emöngiti 'baranga ka mere köti la. Te Loto wu ewü tete, fü ah awu, gü ba, wüh ka-wü de wü ganzi kpara.² Fü ah agü mandí fü ewü, amala ngü fü

ewü, gü ba, “Wü mere kpara, ah ti eyi fü wü alügü nga wü, adu ara kpa gba ni, teka de wüh to mba ngu, fü wü atökö te-wü? De wü ra agba ni sene, teka fü wü ayia gügü kpurutokokpi, anü sü ka-wü.” Wüh gü ba, “A'a. Ngü ma. Ani ena ara ka-ani bü te ngambasu sene.”³ Fü Loto amala ngü fü ewü kpekpeke, agü ba, “Te ah bala la, ah ena adi esiti. Wü koro, de wü ra kpa gba ni.” Fü ewü adu tîne ale. Fü ewü ayia anü de wü Loto agba ka. Fü wü kpara ka Loto amere kümü fü ewü. Fü ewü ayia azü.

⁴ Fütanga ngü la cükü'daye, o wüh go ra kötö la de, fü wü komoko de gbü Sodomo la aze, afü kere ewü, kerekere gbaa. Wüh koro te nga wü gbü Sodomo sela 'buru, wü ka döro de wü cögböro kpara.⁵ Fü ewü akpo da eï i, gü ba, “Loto! Loto! Wü komoko, de te ewü koro tîne kpaka ye ne, wüh mbi mbi neh kaye? Ye za ewü, de ye koro de ewü kpaka ani kpakine, de ani o ewü ekürüfe ani ba würüse tete.”⁶ Te Loto je ngü la tete, fü ngü la asiti tete 'duwa ba-neh-ene-la. Fü engu ayia kürrü, aü möngiti, akoro kpa etanü, adu ani möngiti de kürüfe ye.⁷ Fü engu amala ngü fü ewü, gü ba, “Wü di enga ni ni, wü kpara la, wüh de wü ngba ka-ni. Wü mere e amere mene siti ngü de bala eküte ewü de.”⁸ Wü di ni, wü jaji würüse, ladü sene 'basu, te watí ewü di ma. Te ni ena ato wü jaji würüse la fü wü, fü wü ao ewü ekürüfe wü la, ah reke de? Wü mere e akpülü wü ngba ka-ni de 'basu ne de, angü dela wü kpara ka-ni, te ewü koro kpaka ni.”⁹ Fü wü komoko ka Sodomo la, alügü ngü, gü ba, “Ye ngbü emala dela mene ngü de baye? Ye koro sene ba ganzi kpara. Ye ena angbü kphah da eto riri fü ani? Ye ka te-ye emöngiti asidi, angü ani ena amere ye enatikine, afa nda wü kpara la!” Fü ewü akpo enzi Loto emöngiti asidi, da ededere engu eküte möngiti, ba e te ewü ena akuru möngiti la akuru.

¹⁰ Fü wü malayika la ayia aü möngiti, agbeke Loto, adu di kpaka wü, kpa esambü la, adu ani möngiti.¹¹ Fü wü malayika la ayia ani jia siti wü kpara ka Sodomo la 'buru, 'duwa ndunga! Wüh ceka kpí nda-wü tîne de. Fü ewü angbü egiri möngiti tîne agiri. Fü ewü ace ngü la, ayia adu agba wü.

¹² Fü wü malayika la ayia ayi-ta Loto, gü ba, “Wü gara wü mürü ye kphah ladü gbü Sodomo sene? Te wüh ladü la, de ye nü enü, de ye biti ewü, de wü jaji ka-ye, de wü giri ye 'buru. De ye za ewü, ye kpe de ewü gbü Sodomo sene asidi.”¹³ Angü Me tima ani teka acuru sü ne, teka mere bi siti ngü ka wü kpara de sene, te ewü ngbü

emere ne. Ani ena acuru sü ka Sodomo ne acuru enatikine, asiti 'buru nde."

¹⁴ Te Loto je ngü la tete, fü engu ayia anü amala ngü la fü wü jaji komoko de 'basu, ta te ewü dara wü di ye ne. Fü Loto akoro amala ngü fü ewü, gü ba, "Wü yia eyia kere kere, de wü kpe go ka-wü kpa gbü gara sü, angü Me ena acuru sü ne enatikine." Amba wügiri ye Loto de 'basu la le aje ngü la nda-wü de. Ngü la du ngbü ka-ye gbü jia ewü, ba e te Loto ngbü egbo kala la. Fü Loto ayia adu ka-ye. Fü kpi ayia aseke.

¹⁵ Fü wü malayika la angbü fi bü emala ngü fü Loto kpekepeke, gü ba, "Kere kere! Mü yia eyia! Mü za wü wara mü, de wü di mü 'basu la, fü mü akpe de ewü, angü yi ena akpi de wü siti wü kpara ka Sodomo, te Me ena ato mere kuru te ewü enatikine ne." ¹⁶ Fü Loto adu angbü ka-ye nda la kpah fi bü ejiji. Amba gbü wü ngü la 'buru, Me le ta fi bü eyi, teka ale ta-ngü te Loto. Fü wü malayika ka Me de 'basu la ayia ale kpa Loto, ake wara ka, bete wü jaji kakan- de 'basu ne, aba esa kpiri wü, afaka gö! Fü ewü ayia akpe de ewü.

¹⁷ Fü wü malayika la amala ngü fü ewü, agü ba, "Yi le woro kere kere, angü yi ena akpi! Yi mere e arü ghamari sene de! Yi mere e aceka kpi sidi nga yi kpah de! Yi le fi bü woro, zalü te yi ena akoro tete, kpa füh wü angbe cögbörö da de kpane, teka fü yi aküwa." ¹⁸ Fü Loto alügü ngü fü ewü, gü ba dene, "Mere kpara, ¹⁹ te wü da de kpala di bü nengete ne, ani ena akoro akoro kpala? Siti ngü ne ena amaka ani etungba, fü ani akpi de? Wü de züka kpara, te wü küwa ani eyi. Te di bala ne, de wü du kpah, wü le mba ta-ngü te ani. ²⁰ Wü wu enga 'baranga 'dongoni de kpane eyi? Wü ti ale de ani kpe, nü ngbü kpala? Angü ah mba ghamari, ani ti eyi akpe akoro kpala mba kere, fü ani aküwa. Wü ti ace 'baranga la de? Angü ah ka-ye mba 'dongoni." ²¹ Wü malayika la gü ba, "Wayi, ani le eyi. Ani ena ace 'baranga la ace, ani curu de. ²² Te di tine eyi bala ne, ye kpe ekpe kpala kere kere, angü ani ti amere gara ngü la de, zalü te wü ena akpe akoro kpala feke." Fü wü Loto ayia akpe.

Dela si-ngü te wüh gü iri 'baranga la tete, Sügara, angü Loto mala ta, gü ba dene, "Dela kpah mba enga 'baranga 'dongoni."

²³ Fü Loto akpe akoro kpa gbü Sügara. Ah kpe koro kpala kpurutokokpi, o ra te ekoro. ²⁴ Fü Me atima wa kpa gbü kpi, te ngbü ekolo etiti kötö 'duwa mbii mbii! Fü wa la angbü etiti kpa gbü Sodomo ake Gomora, angbü ecuru sü, enü di 'duwa hawuu! ²⁵ Fü wa la anza wü kpara de wü e, kpah de mene wü e, te wüh ru kpa gbü yi ne, 'duwa 'buti 'buti! Fü

tanguwa wü kpara, de wü e gbü Sodomo ake Gomora, anza 'duwa anza 'buru 'buru!

²⁶ Wü malayika la mala ta ngü eyi fü wü Loto, gü ba, "Te wü te ekpe la, wü mere e arü, aceka kpi kpa fütanga wü de." Amba wara Loto, ta te mü ngbü ekpe sidi nga wü watü mü ne, fü mü ayia ka-mü, aceka kpi kpa sidi. Fü würüse la afere te-ye 'duwa ciki sela, akoro ba mere teme, bubu ba ngütü avutura la.

²⁷ Fü Abarayama ayia kpurutokokpi la, anü kpa te sü ta te engu yi-ta Me, teka Sodomo tete na ne. ²⁸ Fü Abarayama arü aceka kpi to kpa gbü Sodomo. Fü ah ayia awu mere siti nguwa kpala sa'di! te gbala sü 'duwa yere! baka nguwa ndi la!

²⁹ Dela ngü ta te Me curu sü ka Sodomo ake Gomora tete, de mere wa ne. Me küwa ta bü duu Loto, angü ah fi ta nga ngü mürü ka-wü ake Abarayama ne.

Dene ngü ka Loto de wü di ye

³⁰ Fütanga ngü la, fü mere cürü akpo angbü emere Loto. Fü engu adu afi, gü ba dene, "Te ni ngbü gbü Sügara sene, ni ena akpi akpi." Fü engu ayia aza wü di ye, wü jaji würüse de 'basu ne, anü de ewü kpa füh wü da. Fü ewü ayia angbü ka-wü kpa gbü wü gö kpala.

³¹ Gbü gara sikipi, fü gina ye Loto ayia amala ngü fü enga ni ye, gü ba dene, "Ye ceka la, wö ani te egbe enza dene. Ani ena amere neh baye, te biri komoko di gbü sü ne, te ena aza ani, teka fü ani abi ye, baka wü bu ani ne, ma ne? ³² Te di bala ne, ah le de ani kpürü fi, ato fü wö ani, de ah nzö, ah küya di. Te ah küya eyi la, fü ani ara ekükürufe, teka fü ani amaka ye. Angü tanguwa ani ena anza nza."

³³ Etamura go la, fü ewü aza fi, ato fü wö wü. Fü ah anzö fi 'duwa ba-neh-ene-la. Fü fi azoro engu. Fü gina yeye na, ayia anü ara ekükürufe na. Fü ewü angbü ake di. Amba Loto, mü wu ta, gü ba, dene ye ni ne, nda-mü de, ka fi te mü.

³⁴ Kpurutokokpi la, fü gina ye Loto la adu kpah amala ngü fü enga ni ye, gü ba dene, "Enga ni ni deyi, ani ngbü esikine eyi ake wö ni. Enatikine, ah le de ani to kpah mere fi fü wö ani, teka fü ye anü ara ekükürufe na me-ye, kpah baka nda-ni de esikine ne. Fü ani abi ye de wü wö ani, angü tanguwa ani ena anza." ³⁵ Fü ewü adu kpah, aza mere fi, ato fü wö wü. Te fi zoro engu tete, fü yeye na, jaji ne, anü kpah, ara ekükürufe na. Amba Loto, mü wu ngü la nda-mü kpah fi de, ka fi te mü.

³⁶ Fü wü jaji würüse la ayia amaka bu 'basu mini. ³⁷ Fü laki ka-ewü ka yayaka ayia akoro. Fü gina jaji würüse la ayia ayaka enga ye, jaji komoko. Fü ewü agü iri na Müwaba. Müwaba de mere

gina kundu ye nguwa wü kpara, te wüh ngbü eí ewü Müwaba ne. ³⁸ Fü engu ni ye na de sidi ne, ayia abí nda-ye ye, kpah ye komoko, agü iiri na Benami. Benami de mere gina kundu ye nguwa wü kpara te wüh ngbü eí Amona ne.

Dela ngü ta te Loto bí wü ye di, eküte wü di ye, wü jaji wü rüse de 'basu ne.

20

Dene ngü ka wü Abarayama ake Abi-Meleke

¹ Fütanga ngü la, fü Abarayama ayia ace sü ka Mamare, adu angbü enü edebu sü, to gbü kokpa, ade gugu ka-ye esüka wü Kadesa ake Sura, angbü sela. Fütanga ngü la, fü ah ayia anü angbü agbü Gerara. ² Fü Abarayama ayia afti wü kpara gbü Gerara sela, gü ba dene, "Angü Sara ka-ye nda de engu ni ni." Miri ka Gerara ta ladü de iri ye Abi-Meleke. Fü Abi-Meleke ayia aje nga Sara. Fü engu atima wü kpara ka-ye, de wüh nü, wüh za Sara, koro di fü ni.

³⁻⁴ O Abi-Meleke ngbü ake Sara la de, fü Me ayia akoro kpakaka na gbü roto, amala ngü fefe, gü ba, "De-mü, Abi-Meleke, mü kpi ka-mü ne eyi akpi dene, teka ngü ka wü rüse de te mü za ne. Ah de *siti ngü, angü wü rüse la, ah de kükürü wü rüse nda de. Ah ka-ye da wara Abarayama. Te di bala, ngü la siti gbü jia ra eyi fa sü! Ma kina yi eyi, de wü kpara kamü 'buru, gü ba, yi tí abí ye tîne de!" Abi-Meleke gü ba, "Mere kpara, ye ena amörö tanguwa ani, anza, neh teka ne? Ni ngbü ake wü rüse la nda-ni la de! ⁵ Amba Abarayama fiti ni me-ye, gü ba, 'Sara ka-ye nda de engu ni ni.' Fü Sara amala kpah bala, ga, 'Abarayama ka-ye de engu ni ni.' Te di bala, ni ena awu ngü la ta, mbi mbi neh baye baye, gü ba, engu de wara Abarayama? Ni ka-ni de züka kpara, angü wü Abarayama fiti ni me-wü. Amba ni mere siti ngü ake di nda-ni la kpah de."

⁶ Me gü ba dene, "Mü mala zu ngü. Ma wu kpo, ga, mü wu ta, gü ba, wü rüse la de wara Abarayama, ne de. Kpah bala, mü ngbü ake wü rüse la de, angü ma tiri kaje fü mü me-ra. ⁷ Te di bala ne, ah le de mü za wü rüse la, mü lügü engu fü Abarayama. De mü yi-ta Abarayama, de ah ku gba fere teka mü. Angü ah ka-ye de *mürü dofo ka-ra. Te mü lügü wara ka eyi fefe na la, ah ena angbü de tadu. Fü ah aku gba fere, teka fü ra aküwa mü. Amba, te mü lügü Sara enatikine fü watí ye na de la, mü ena akpi, de wü kpara kamü nde 'buru." Dela ta ngü te Me mala fü Abi-Meleke gbü roto.

⁸ Kpurutokokpi la, fü Abi-Meleke ayia abiti wü cögbörö kpara ka-ye, amala nga

roto la fü ewü. Fü mere cürü ayia ari te ewü. ⁹ Fü Abi-Meleke ayia atima ngü gbü nga Abarayama. Te Abarayama koro tete, fü Abi-Meleke ayia amala ngü fefe, gü ba, "Abarayama deyí, ye fiti ni, gü ba, wü rüse ne de engu ni ni, neh baye baye? Ye mere de ni de bala, neh ene ngü ne? Ye za mere kuru ne, koro di fü ani bane, neh teka ne? Ni mere ta fü ye mbi mbi ne ngü ne? Kpara emere ngü bala 'ba amere na? ¹⁰ Ye mere mene ngü la bala, neh teka ne?"

¹¹ Abarayama gü ba, "Ni cere nga wara ni bala kükürü de, angü ni ngbü efi, gü ba, wü kpara de gbü sü ne, wüh fi nga ngü ka Me nda-wü de. Ni fi, ga, wüh ena amörö ni, teka aza wara ni ne. ¹² Ah nda ngbü rü fanü, Sara ka-ye nda de engu ni ni, te wö ani bí engu guvu gara wü rüse. Fü ni adu aza engu wara ni tete. ¹³ Angü, ta gü gü, Me mala ngü fü ni, de ni ce gba wö ni, de ni nü, ni ngbü agbü ganzi tö. Teku ngü la fü ni angbü ejiji tikpi tikpi, ba e dene. Te di bala, fü ni amala fü wara ni, gü ba, 'Gbü wü sü 'buru, te ani ena akoro tete, ye mere e amala, gü ba, "Ni de watí ni," ne de. Ye cere nga ni acere, gü ba, "Ni ka-ni nda-ni de engu ni ni." Angü dela mba ngü, te ena ale ta-ngü te ni, fü ni küwa."

¹⁴ Fü Abi-Meleke aza wü kambiliki, wü yiti, bete wü labí, ayia ato fü Abarayama. Fü ah ayia kpah aza Sara, alügü fefe na. ¹⁵ Fü Abi-Meleke amala ngü fü Abarayama, gü ba, "Nzö sü de te ye ngbü eeka dene 'buru, ah esaka ni. Te ye maka mene sü, te ereke gbü jia ye la, de ye o gba ye gbügbü na."

¹⁶ Fü Abi-Meleke adu amala ngü fü Sara, agü ba, "Ye ceka la mere bi wü e, de te ni to fü engu ni ye la, ah ena akoro akoro 'buru ba jiasa kutu biri (1000). Ni to wü e la 'buru, teka fü wü kpara awu, gü ba, dü rü ngü, ta te ni dü rü eküte ye ne, ah nza eyi. Angü ah ta de dü rü ngü ka-ye nda de. Ah ta de dü rü ngü ka-ni."

¹⁷⁻¹⁸ Fü Abarayama adu aku gba fü Me teka wü Abi-Meleke, de Me küwa ewü. Angü Me kina ta wü Abi-Meleke, de wü wara ye eyi 'buru, gü ba, wüh tí abí ye tîne de. Amba, baka te Abi-Meleke lügü Sara tete na, fü Abarayama ayia aku gba fü Me, fü ewü adu abí ye.

21

Dene ngü teka yayaka ka Yisaka

¹ Fü Me ayia ato wazi fü Sara, kpah baka e, ta te engu mala fü Abarayama te engu gina ne. ²⁻⁵ Fü Sara ayia amaka bu. Fü laki kaka-na teka ayaka, ayia akoro, kpah baka ngü ta te Me mala fü ewü ne. Sara bí ye la fü Abarayama tîne gbü gbe ye, o re ka Abarayama koro eyi 'buru kama biri (100).

Fü mbarase la ara akoro sikpi 'bajena. Fü Abarayama ayia aza engu, agü esa *basa, angü dela gele ka-ewü, baka e ta te Me mala fü ewü ne. Fü Abarayama ayia agü iri mbarase la, Yisaka.*

⁶⁻⁷ Fü Sara adu angbü de mere tadu, teka ye, de te engu bi ne. Fü engu angbü emü zo, gü ba, "Me de mere e! E-wu ta, gü ba, ma ena abi ye bane, neh da? De te ma gbe tine eyi ne! Ceka la eceka! Ngü te Me mala ne koro eyi ngbü rü bala! A bi ye eyi ake Abarayama tine gbü gbe a dene!" Fü Sara ayia abi ci, gü ba,

"Me to mere tadu eyi fere!

Ma bi ye komoko eyi fanü fanü dene!

Te yi ena aje ngü ne, yi koro 'buru,

de nih mü zo ka tadu de nih ma!"

Dene ngü te Sara liki wü Agara ake İsimayile

⁸ Fü Yisaka ayia aga. Fü ni ye na ayia atiri ka tete. Gbü sikpi te Yisaka ce ka tete na la, fü wö ye na ayia amere mere karama, teka ngü la. Angü dela ta gele ka-ewü. ⁹ Fü Sara aceka kpi bane, awu İsimayile, enga Agara,† te du ngbü efala Yisaka afala. ¹⁰ Fü Sara asü 'duwa asü kpaaa! de gü eküte İsimayile. Fü ah amala ngü fü Abarayama, gü ba, "Ape! Ni mbü tine eyi, esaka labi ne ake engu ye! Ye liki ewü eliki. Kükürü de, angü Yisaka ena aza e-nga-kpa ye, te gara me-ye, fütanga kö ye. İsimayile ti aza e-nga-kpa ye nda 'buru 'buru de! Ye liki engu eliki!" ¹¹ Fü ngü la asiti te Abarayama 'duwa ba-neh-ene-la, angü İsimayile kpah de yeye na.

¹²⁻¹³ Fü Me akoro amala ngü fü Abarayama, gü ba, "Abarayama deyi, ye mere e afi nga ngü, teka Agara ake İsimayile de, angü ni ena aceka kpi fütanga ewü me-ni. Ye mere kpah baka e te Sara ngbü ele la. İsimayile ena ago angbü nengete, kpa gbü gara sü. Fü ni ato wazi fefe na, teka ngü ka-ye. Fü ah abi wü ye, asibi asibi. Fü ni afü wü di İsimayile ba mere nguwa wü kpapa, gbü nzö wü kpikpi wü. Amba mene wü kundu kundu ye, te ni mala nga ewü fü ye ne, wüh ena abi ewü gbü nguwa *Yisaka. Angü ni fe ka-ni Yisaka."

¹⁴ Fü Abarayama ayia gügü kpuru-tokokpi, aza wü e-mazü, bete mere kölökö, de ngu gbü ye, ayia ato fü Agara. Fü engu ayia ato kaje fü wü Agara ake İsimayile, gü ba, "Wü yia eyia, wü go, wü ngbü kpa te gara sü nengete." Fü wü Agara ayia ago ka-wü kpa gbü gü, to anga Biri-Saba. Fü ewü angbü ejiji gbü sü la.

¹⁵ Fü ngu de te Abarayama to fü ewü gbü kölökö ne ayia anza. Fü gümü ngu ayia akpo angbü emere ewü. Mbarase yia ekpi akpi ka gümü ngu. Fü ngü la ayia ake te ni ye na. Fü ah ayia ace İsimayile esa rü sela. ¹⁶ Fü ah ayia anü angbü ka-ye mba canza kpa engagira nü. Fü ah akpo angbü enda'ba te-ye, gü ba, "Ööö, engu ni te ekpi! Ni ena amere dene baye? Ni le aceka jia engu ni, te ena akpi ka gümü ngu, ne de." Fü engu ati 'duwa eku mere gba.

¹⁷ Fü Me ayia aje gba, te İsimayile ngbü eku kpa esa rü la. Fü ah ayia atima *malayika ka-ye kpaka Agara, de ah mala ngü fefe na, gü ba, "Agara deyi, ah de ne ngü ne? Ye mere e akpe cürü de, angü Me je gba ka engu ye, de te ngbü eku kpa esa rü de kpala, ne eyi. ¹⁸ Engu ye ti akpi nda de. Me ena ato wazi fefe na, fü ah abi mere bi nguwa wü kpapa. Te di bala, ye mere e akpe cürü de. Ye yia eyia, de ye du, ye e engu tikpi, angü ah ena küwa." ¹⁹ Fü Me ayia agü tamu gara du-kpa-ngu, te di kpala fü Agara. Fü Agara ayia aceka kpi bane, awu du-kpa-ngu la. Fü ah ayia aza mere kölökö la, anü ase ngu la gbügbü cere! Fü ah adu di, ato fü İsimayile. Fü İsimayile ayia anzö ngu la, fü ah ayia tine aküwa.

²⁰⁻²¹ Fü Me angbü fi ele ta-ngü te İsimayile. Fü İsimayile ayia aga, akoro mere komoko. Engu ta de kpapa te ngbü emörö wü nü de diri 'duwa ba-neh-ene-la. Fü ni ye na ayia ase wü rüse fefe na, kpah egba Ezepeto. Angü Agara ta kpah de egba Ezepeto. Fü ewü ao köti ka-wü kpa etü gü, agbü Parana.

Dene ngü te wü Abarayama reke eze ngba wü ake Abi-Meleke

²² Abi-Meleke ta de miri ka wü Feleseto. Gbü gara sikpi, fü Abi-Meleke aza gara mere kpapa ka wü marajümiya ka-ye, de iri ye Fikola. Fü ewü ayia ake di, anü amaka Abarayama kpa gbü Biri-Saba. Fü Abi-Meleke amala ngü fü Abarayama, gü ba, "Mere kpapa, ma wu kpo, ga, Me ladü ake mü. Ah ngbü eto wazi fü mü, gbü wü ngü 'buru, de te mü ngbü emere ne. ²³ Te di bala, ma ngbü ele de mü kina kina te iri Me, ga, mü ti te gara, adu afiti ra tine de. Mü ti afiti wü di ra, de wü kundu ra tine kpah 'buru nde de. Ah le de mü kina kina te iri Me bala. Angü ma mere züka ngü eyi fü mü. Te di bala, de mü mere kpah züka ngü fere, de wü kpapa kara, gbü sü ne 'buru." ²⁴ Abarayama gü ba, "Wayi, ni le ngü la eyi."

* **21:2-5** 21:2-5 Yisaka baka e te ewü ga, ah mü zo. † **21:9** 21:9 Agara de egba Ezepeto. İsimayile de enga Agara, te ewü bi ta ake Abarayama.

²⁵ Fū Abarayama ayia amala gara ngü fū Abi-Meleke, gü ba, "Gara engu ngü kpah ladü, te ngbü eke te ni, angü wü kpara ka-ye za du-kpa-ngu ka-ni, de te wü kpara ka-ni jī ne eyi." ²⁶ Miri Abi-Meleke gü ba, "Amba ni wu mene kpapa, de te mere ngü la, nda-ni de. Ni je ngü la kpah bü eyi gömō ye dela. Angü ye ce ta da emala ngü la fū ni gügü, teka ne? Te ah bala, ani ena areke ngü la enatikine." ²⁷ Fū Abarayama ayia aza wü kambiliki, bete wü yiti, ato fū Abi-Meleke. Fū ewü ayia anzō ngüte ake di.

²⁸ Fū Abarayama adu kpah aza gara wü kambiliki ba e lorozi, areke ewü, ao kpikpi wü. ²⁹ Te Abi-Meleke wu ngü la bala, fū ah amala ngü fū Abarayama, gü ba, "Ngü teka wü kambiliki de lorozi de kpane, neh mbi mbi baye?" ³⁰ Abarayama gü ba, "Ma to wü kambiliki la eyi fū mü. Mü za ewü eza, teka fū wü kpapa awu, gü ba, ma jī ta du-kpa-ngu la me-ra." Fū Abi-Meleke ayia ale ngü la. ³¹⁻³² Fū wü Abi-Meleke ayia alügü nga wü, adu de wü mere kpapa ka wü marajümiya ka-ye, agba wü.

Dela si-ngü, de te wüh gü iri sü la tete, gü ba, Biri-Saba. Angü dela sü ta te wü Abarayama nzō ngüte tete ake Abi-Meleke.

³³ Fütanga wü ngü la, fū Abarayama ayia aza gara züka rü, aru gbü Biri-Saba sela. Fū engu ayia agbo nga iri Mere Me, te ngbü engbü fi mere badi ne. ³⁴ Fū Abarayama ara kötö gbü sü ka wü Feleseto sela teka mere bi wü re.

22

Dene ngü te Me re maguma Abarayama di

¹ Fütanga ngü la, te Yisaka ga koro tete mba memere, fū Me ayia are maguma Abarayama. Fū Me akoro ai Abarayama, gü ba, "Abarayama! Abarayama!" Fū Abarayama ayia ale ngü, gü ba, "Waye!" ² Fū Me amala ngü fefe, gü ba, "Mü za ye mü de Yisaka, te mü le engu fa sü ne, fū mü anü di agbü tō ka wü Moriya, teka fū mü awa engu amörö, acuru fere baka la'bi. Sü de te ma le de mü mere ngü la tete, ma ena agü tatamu na fū mü. Sü engu la ena adi kpa füh mere da de kpala." Fū Abarayama ayia ale ngü la. Fū kpī ayia aseke.

³ Kpurutokokpī la, fū Abarayama ayia anü da egrī ci-wa, teka acuru Yisaka fefe na fū Me, de mere fingangü emaguma ye. Fū ah ayia aza ci-wa la, ai ao füh dongi ka-ye. Fū Abarayama ayia ake Yisaka, bete wü labi ka-ye 'basu, abe

kpah te dongi la, anü agbü sü, de te Me mala ngangana na fefe na ne.

⁴ Fū ewü anü, anü, anü, ara te kaje 'basu. Fū Abarayama ayia aceka kpī, awu sü de te Me mala ngangana na ne, nengete kpa engagira ye kpala. ⁵ Fū Abarayama ayia amala ngü fū wü labi ka-ye de 'basu ne, gü ba, "Wü ngbü nda-wü sene, de wü dongi ka-ni ne. Ani enü me-ani ake ye ni, kpa füh da de kpala, teka aku gba fū Me. Fū ani adu akoro."

⁶ Fū Abarayama ayia aza ci-wa, de te engu ena acuru kö Yisaka fefe na ne, ao gbü nzō Yisaka, de ah bi. Fū Abarayama aza nda-ye nye-wa bete mere maguruma. Fū ewü ayia anü sü ake ye ye. ⁷ Te wüh ngbü enü tete, fū Yisaka ayia ayi-ta wō ye, gü ba, "Wüba," Fū Abarayama ale ngü, agü ba, "Waye, ye ra, ah mere baye?" Yisaka gü ba, "Wüba, ma bi ci-wa eyi dene. Nye-wa kpah eyi ladü ne. Anga kambiliki de te nih ena awa, amörö fū Me ne, di nda neh kaye?" ⁸ Fū Abarayama alügü ngü fū ye ye, gü ba, "Enga ra, Me ladü. Ah ena ato kambiliki fū nih me-ye." Fū ewü angbü fi bü enü ka-wü.

⁹ Te wüh nü koro tete kpa gbü sü, de te Me mala ngangana fū Abarayama ne, fū Abarayama ayia abiti teme, afa e ba *cangali la. Fū ah ayia andrü ci-wa la ezeze na. Fū ah adu azoro Yisaka, ai gö gö! Fū ah abi engu, ao kpa füh ci-wa la. ¹⁰ Fū ah ayia ato kpa ye, aza mere maguruma ka-ye, de ni wa Yisaka, amörö di. ¹¹ Te Abarayama yia za maguruma tete, de ni wa Yisaka, fū Me ayia ai engu kpa gbü kpī, gü ba, "Abarayama! Abarayama!" Fū Abarayama ayia ale ngü. ¹² Fū Me amala ngü fefe, agü ba, "Mü mere e amörö ye mü de. Ma wu eyi kpo, gü ba, mü le eyi ato ye mü, te di de kporo maguma mü ne, fere. Ma wu kpah eyi kpo, gü ba, mü le ngü ka-ra eyi fanü fanü de maguma mü 'buru."

¹³ Fū Abarayama ayia, de ni ceka kpī bane de, gbo! te mere moko kambiliki, te didi ngili angili. Didi lala eyi gbü wü rü. Fū Abarayama ayia anü agbi di kambiliki la, gbü rü la asidi. Fū ah adu aza kambiliki la, anü amörö, acuru fū Me da ye ye la. ¹⁴ Dela si-ngü de te Abarayama gü iri sü la tete, gü ba, Yakova Yire. Ah ba e te wüh gü ba, "Me ena ato e fere me-ye." Akoro enatikine, wü kpapa ngbü emala, gü ba, "Mere Me ena ato e fū ani gbü sü la kpah bala."

¹⁵ Te Abarayama curu kambiliki la nza tete, fū Me adu kpah ai engu, ¹⁶ gü ba, "Abarayama, mü je la ngü ka-ra, te ma emala fū mü ne. Ma wu eyi kpo, gü ba, mü ngbü eje ngü ka-ra aje. Angü mü le tīne eyi ato ye mü fere, te di fū mü ba

kporo maguma mü ne. Te di eyi bala ne, de-ra Me, ma kina kina eyi te iri ra, ¹⁷ gü ba, ma ena ato wazi fü mü afa sü, teka de wü kundu mü sibi asibi fa sü, akoro ba wü küfara, anga zu-tö. Fü ewü adi ba kpeke wü kpara, adi eza sü esaka wü vügü ka-wü. ¹⁸ Ma ena aküwa nguwa wü kpara füh kotö ne 'buru, teka ngü ka wü kundu mü la. Dela ngü te ma ena amere fü yi, angü mü le ngü ka-ra eyi."

¹⁹ Te Me mala ngü la nza tete, fü wü Abarayama ayia ake Yisaka, adu kpa esangü da, kpaka wü labi ka-wü, te ewü ngbü eci nga ewü la. Fü ewü ayia alügü nga wü, adu agbü Biri-Saba, angbü kpala.

Dene iri wüjaji ka enga ni ye Abarayama

²⁰ Fütanga ngü la, fü Abarayama aje ngü, gü ba, "Gara enga ni ni de iri ye Nayora ne, gina wara ka de iri ye Mileka ne, bi wü jaji eyi fefe." ²¹ Iri wü jaji, de te Mileka bi ewü ne, iri gina de Uca, iri wü gara de wü Buza, Kemule,* ²² Kesede, Azo, Piledasa, bete Yidirafa, ²³ be kpah te Betuwele. Betuwele engu la ta de wö ye Rebeka. Dela iri wü jaji, de te Mileka bi fü Nayora, enga ni ye Abarayama. Wü jaji la ta 'buru 'bajena.

²⁴ Fü Nayora abi kpah gara wü jaji bala, ake gara wara ye, de iri ye Ruma ne. Iri wü jaji la ta de Teba, Gama, Tasa, bete Maka. Dela 'buru iri wü jaji ka Nayora, enga ni ye Abarayama.

23

Dene ngü teka mbükü Sara, wara Abarayama

¹ Fü Sara ayia agbe, o re kaka koro tine eyi 'buru kama biri teke biri de füh ye lorozi (127). Fü engu ayia akpi. ² Ah kpi kpa gbü Eberone,* gbü tö ka wü *Kanana. Fü Abarayama aku gba kö wara ye sela 'duwa ba-neh-ene-la.

³ Fü Abarayama ayia afi nga ngü teka sü te ni ena ati wara ni gbügbü, angü ta gbü wü re la, wüh ngbü ta eti kpara duu gbü gö da. Fü Abarayama ayia gbü gba sela, anü kpaka wü di enga Ete, amala ngü fü ewü, gü ba, ⁴ "Wü ceka eceka, titine wara ni kpi eyi. Ni gbü sü ka-wü sene ba ganzi kpara, te ni ngbü engü sene mba takü. Te di bala ne, ni ena anü ati wara ni, neh to kaye? Wü ti eyi ato mba enga sü fü ni, fü ni ati engu gbügbü na?" ⁵ Fü wü di enga Ete la alügü ngü fefe na, gü ba, ⁶ "Mere kpara, ye gbü jia ani ba mere kpara ka Me. Te di bala ne, ye ceka kpah bü mene sü de te ena ati te nga jia ye, fü

ye ati wara ye gbügbü na. Kpara te ena atiri sü te ye nda ma." ⁷ Fü Abarayama ayia akö ca-e engagira wü di enga Ete la asidi, adu amala ngü fü ewü, gü ba, ⁸ "Te wü le ngbüri eyi de ni ti wara ni sene la, wü yi-ta Efürona, ye Cowara, ⁹ de engu to sü ka-ye kpa füh mere da, te wüh ngbü ei, ga Makepela, de gö ye ne, fere. Mere da engu la, ah ladü to kpa enzö yi kaka-na la. De wü yi-ta Efürona, de engu mala ngü la cu de komö ye, gbü jia wü 'buru. Fü ni adu tine, ato jiase fefe na, kpah baka e te engu ngbü ele. Fü ni anü ati wara ni kpala."

¹⁰ Baka te Abarayama ngbü emala ngü la tete, amba Efürona ta kpah ladü esüka wü bu ye, wü di enga Ete, gbü sü ka mabiti ka-wü, emö 'baranga sela. Fü Efürona ayia amala ngü fü Abarayama, gbü jia wü bu ye la kpah 'buru, gü ba, ¹¹ "Wayi, mere kpara, ah nda ngbüri bala, ni ena ato da ka-ni la, de wü gö ye la, nde 'buru fü ye kükürü. Ni to eyi fü ye, de ye ti wara ye gbügbü na, kpah gbü jia wü mürü ni dene 'buru." ¹² Fü Abarayama adu kpah, akö ca-e engagira wü di enga Ete la. ¹³ Fü Abarayama adu alügü ngü fü Efürona kpah 'duwa gbü jia wü kpara la, gü ba, "Ah bala de. Ni ena ato jiase, ase sü la di, fü ah angbü tine sü ka-ani tete. Ye za jiase ne eza." ¹⁴ Fü Efürona alügü ngü fefe, gü ba, ¹⁵ "Te ah bala la, ah mbi. Ah le de ani reke ngü la, teka de ani o fingangü ka-ani 'buru biringbö. Te ye le eyi ato jiase fü ni la, ah le de ye to mbürükü se kama bala (400). Ngü ka jiase la, ah de mere ngü nda kpah de. Ye eza nda-ye bü sü la, de ye ti wara ye gbügbü na." ¹⁶ Fü Abarayama ayia ale ngü ka Efürona la. Abarayama ngbü etanga jiase la, ba e ta te wüh ngbü etanga jiase, gbü mene wü re engu ta de kpala. Fü engu ato ngbürikü se kama bala (400) fü Efürona, kpah 'duwa ce baka e, ta te Efürona mala ngangü gbü jia wü kpara ne.

¹⁷⁻²⁰ Fü Abarayama ayia ati wara ye, gbü tö ka wü Kanana sela, gbü sü te wüh ngbü ei, ga, Makepela ne. Ah ti engu gbü gö da, angü gele ta gbü mene wü re la ka-ye bala.

Dela ngü ka sü ta te Abarayama se esaka wü di enga Ete, te wüh ngbü ei, ga, Makepela, te di ede Mamare to kpa fügö ne. Abarayama se ta sü la de wü gö da, de wü rü de gbü sü la 'buru. Ah se ta sü la esaka Efürona, de mere bi jiase, gbü jia wü di enga Ete, de wü angbe cögbörö kpara ka-wü nde 'buru. Fü sü la adu angbü tine fi badi, sü ka Abarayama, te engu ngbü eti wü mürü ye gbügbü na.

* 22:21 22:21 Kemule bi ta gara ye de iri ye Arama. * Kiriyota-Aruba.

* 23:2 23:2 Ta gbü wü re la, wüh ngbü ei Eberone, gü ba,

24

Dene ngü teka Rebeka, wara Yisaka

¹ Me ngbü ta eto wazi fü Abarayama, fü ah angbü emere wü ngü di, gbü wü re kaka 'buru, te engu mere füh kötö ne.

Fütanga ngü la, fü Abarayama adu tîne agbe afa sü. Fü Abarayama akpo angbü efi ngü teka ye ye, Yisaka, te ga koro eyi mere komoko ne. Ah le ta eyi de Yisaka za wüüruse. Amba Abarayama le de Yisaka za egba ganzi kpara nda de, angü gele ka wü kpara, ta gbü wü re la, ka-ye nda da eza te-wü esüka wü de wü mürü wü. Wüh za ta te-wü de wü ganzi kpara kpo de. Fü Abarayama angbü efi nga ngü, ga, ni ena amere dene, neh baye, teka fü ani amaka züka wüüruse fü ye ni, te ni ce tö ka-ani ta eyi gügü, go ra kötö eyi nengete kpa gbü tö ka wü *Kanana de kpakine ne.

²⁻⁴ Fü Abarayama ayia ai mere kpara ka tima ka-ye, te ngbü gbü nzö wü bu ye 'buru. Engu ta de diri kpara ka tima ka Abarayama, teka mere bi wü re fa sü, angü ah ngbü tîne eceka kpi fütanga mere bi wü e ka Abarayama 'buru me-ye. Fü Abarayama ayia amala ngü fü mürü tima ka-ye la, gü ba, "Ma le amala ngü fü mü, teka wüüruse te ma le ase fü Yisaka. Ma le de Yisaka za egba ganzi kpara de. Te di bala, ma ele de mü yia, mü nü kpa gbü sü ka-a, te wü di engu wüna ngbü tete. Fü mü aceka wüüruse kpala, te di gbü nguwa a. Fü mü ase, adu akoro de engu fü Yisaka. Amba ah le de mü kina kina de iri Mere Me, te ngbü gbü nzö wü kpara 'buru ne. Mü kina te mü, gü ba, 'Ni ena amere wü ngü, de te ma mala fü ni ne.' Kpah bala, mü kina lö ra, gü ba, 'Ni ti aza wüüruse fefe gbü nguwa ganzi kpara de.'

⁵ Fü mürü tima la alügü ngü fefe, gü ba, "Anga te wüüruse engu le ago agbü Kanana kpakine de, teka sü te mo amo la? Te ah bala la, ni ena amere baye? Ni ena adu aza Yisaka, ago di kpala, teka fü ah aza wüüruse engu la?" ⁶ Fü Abarayama agü ba, "A'a, ah bala fi de! Mü mere e aza ye ra, adu di kpala fi de. ⁷ Angü Mere Me mala ta me-ye, gü ba, 'Ma yia, de ma ce gba a, gbü sü te wüh bi ra tete, de ma go kpakine.' Fü Me akina kina, gü ba, 'Ni ena ato tö ka wü Kanana ne fü wü kundu ra.' Te di bala, te ye ra ena ace sü ne, adu angbü nengete kpala la, ah esiti. Mü ena amaka züka wüüruse fefe na, angü Me ena atima *malayika ka-ye, fü ah ati fü mü engagira nü. Fü ah ale ta-ngü te mü. Fü mü amaka züka wüüruse, ase, adu di fü Yisaka. ⁸ Amba, te wüüruse engu le teka adu ake mü agbü Kanana akine nda de la, de mü ce engu, fü mü adu ka-mü kpakine. Ngü ti amere mü gbü kina, de te mü kina te-mü

di la de. Te ngü engu kpala kpa baye la, mü mere e aza Yisaka, adu de engu kpala kpo fi de." ⁹ Fü mere mürü tima la ayia akina lö Abarayama, gü ba, "Ni ena amere wü ngü, de te ye mala fü ni ne, kpa 'buru bala."

¹⁰ Fütanga ngü la, fü mere mürü tima la adu areke te-ye, aza wü kamele ka Abarayama nzükpa. Fü ah aza kpa gara bi wü e esaka Abarayama, ayia ao füh wü nü la, teka anü ase wüüruse la di. Fü ewü ayia anü, anü, akoro nengete, agbü tö ka Padanarama, gbü gara 'baranga de iri ye Arana, ta te enga ni ye Abarayama, de iri ye Nayora, ra ta kötö gbugbü na ne.

¹¹ Te mere mürü tima ka Abarayama nü koro tete gbü 'baranga la, nga tamurago, gbü lö-ra te wü wüüruse ngbü ekoro ese ngu tete, fü ah anü de wü kamele ka-ye la, kpa ede du-kpa-ngu la. Fü ah amala ngü fü wü kamele la, de wü ra kötö. ¹² Fü mürü tima ka Abarayama la ayia aku gba fü Me, gü ba, "Wayi, Me, te mü di de *vüngüte ka Abarayama, mü ü kaje fere enatikine, de ngü de te ma koro tüngüngü na ne mere te-ye fere, baka e te mere kpara ka-ra ngbü ele ne. Mü mere ngü fü mere kpara ka-ra ba mürü, angü mü de vüngüte kaka-na. ¹³⁻¹⁴ Mü gara tamu wüüruse, de te mü fe engu, o eyi ba wara Yisaka tete ne. Angü ma rü eyi de füh du-kpa-ngu ne. Wü wüüruse, de te ewü ngbü ekoro ese ngu gbü du-kpa-ngu ne, mene wüüruse te ma ena ayo ngu tete na, te ah to ngu eyi fere, bete mere bi wü kamele ka-ra ne la, amba dela eyi wüüruse, te mü fe engu, o eyi wara Yisaka tete na. Te mü mere ngü la fere bala la, amba mü zu de vüngüte ka mere kpara ka-ra."

¹⁵ Te mürü tima la ngbü la bü emala ngü la bala de, ah gü ba, ni ceka kpi bane de, gbangbara! te gara jaji wüüruse, te ngbü ekoro de bütü-ngu gbü nzö ye, ase ngu. İri jaji wüüruse engu la de Rebeka. Ah de ye Betuwele, enga ni ye Abarayama. ¹⁶ Rebeka ta de züka jaji wüüruse, te reke gbü jia wü kpara fa sü. Ah za komoko ta nda la de. Fü Rebeka ayia akoro ase ngu gbü bütü-ngu ka-ye, ayia angbü edu.

¹⁷ Te mürü tima la wu Rebeka te ngbü edu bala, fü engu ayia akpe de woro, akoro kpakaka na, amala ngü fefe na, gü ba, "Ye to la mba ngu gbü bütü-ngu ka-ye la, de ni nzö." ¹⁸ Fü Rebeka alügü ngü fefe, gü ba, "Ye nzö enzö, mere kpara." Fü Rebeka ayia bü wö! ae bütü-ngu la, azoro esaka ye. Fü mürü tima la ayia anzö ngu la. ¹⁹ Sidi nga ngu, de te engu nzö la, fü Rebeka ayia amala ngü fefe, gü ba, "Ni ena ato ngu fü wü kamele ka-ye la, de wüh nzö te nga wü 'buru.'" ²⁰ Fü Rebeka ayia atökö ngu la

gbü bütü-ngu ka-ye 'buru gbü mere gada, te wüh ngbü eto ngu fū wū nū gbügbü. Fū Rebeka akpe adu kpa fūh du-kpa-ngu, ase gara ngu. Fū ah angbü enda nga ye, da ese ngu fi bala. Fū wū kamele anzō ngu te nga wū la 'buru. ²¹ Fū komō mürü tima la ayia agu ka ngü la. Fū engu angbü eceka Rebeka, da efi nga ngü, gü ba, "E-ena adi dela würüse te Me fe engu fū Yisaka, teka gba ka-ni ne, de?"

²² Te wū kamele nzō ngu tī tete, fū mürü tima la ayia aza mere zūka mafe,* te wüh mere gbü *diki-se, ato fū Rebeka, de ah to gbü gü ye. Fū engu adu aza wū kengbe, te wüh mere kphah gbü diki-se, ato te kpkapa na. ²³ Fū engu ayi-ta Rebeka, gü ba, "Ye neh mbi mbi de ye da? Te ani nū de wū kpara ka-ni, bete wū nū ka-ni ne, kpa gba wū la, ani tī eyi amaka mba sū ara tete?"

²⁴ Rebeka gü ba, "İri wō ni de Betuwele, ye Nayora. ²⁵ Wū koro ekoro de wū nū ka-wū la 'buru, de ani nū kpa ekōti. Wū ena amaka sū ka rara kpa gba ani kpala, te ena atī de wū kpara la, de wū nū 'buru. Wüh ena ato kphah zū-e fū wū nū la. Wū koro ekoro." ²⁶⁻²⁷ Fū mürü tima la adu angbü de mere tadu te ye, angü würüse la de kundu ye engu ni ye Abarayama. Fū engu agü ba, "Gbo nga e ngbü te İri Me, te di de vüngüte ka mere kpara kara ne! Angü ah ngbü emere zūka ngü ka vüngüte fū Abarayama, baka ngü ta te engu mala feke na gügü ne. Amba Me ce ngü la nda de. Teka ra, Me za ra, gü tamu kaje fere teke teke! Fū ra anū akoro eyi kphah te gba wū di engu eyi mere kpara kara."

²⁸ Fū Rebeka akpe adu kpa ekōti, amala nga ngü la fū ni ye. ²⁹⁻³⁰ Gara engu ni ye Rebeka ta ladü kpala, de İri ye Labana. Fū Labana ayia aje kphah ngü, de te Rebeka mala la. Fū ah awu kphah wū zūka mafe, bete wū zūka kengbe, te mürü tima ka Abarayama la to gbü kpa Rebeka ne. Fū ah aje kphah wū ngü, te mürü tima la mala fū Rebeka ne. Te Labana ye ngü la bala, fū ah ayia amū 'duwa de woro, anū kpa fūh du-kpa-ngu la, teka awu komoko la cu de jia ye. ³¹ Te Labana koro kpara wū mürü tima la, fū engu amala ngü fū ewü, gü ba, "Mere kpara, ye kpakine baka kpara te Me le ye fa sū. Ye rü te kaje neh teka ne? Wū koro ekoro, ani nū kpa ekōti, angü ni reke sū teka wū eyi. Mba engu sū kphah ladü teka wū nū ka-ye, fū ewü ara tete." ³² Fū mürü tima ka Abarayama la ayia, de wū kpara gbü nga ye, anū de wū Labana kpa ekōti.

Te wüh koro kpa ekōti, fū Labana ayia amala ngü fū wū labī ka-ye, gü ba, "Wū furu wū e fūh gü wū kamele la asidi,

de wū za zūka gü, wū to fū wū kamele la, de wüh zū. De wū za kphah ngu, ato fū wū kpara la, de wū zürü küte wū di."

³³ Fütanga ngü la, fū ewü adu aza e-mazü, akoro di, ato fū wū ngba la. Fū mürü tima la amala ngü fū Labana, gü ba, "A'a, ani tī azü kümü nda-ani la de. Ni le amala la si-ngü, te wüh tima ni tete, koro di gba wū ne, fū wū feke." Fū Labana alügü ngü feke na, gü ba, "Ye mala ngü engu la emala."

³⁴ Fū mürü tima la ayia areke te-ye, akpo emala ngü fū wū Labana, gü ba, "Ni de kpara ka tima ka Abarayama, te di de afudu wō ye ne. ³⁵ Angü Me to wazi fū Abarayama eyi fa sū. Abarayama koro tīne eyi mere kpara, de mere bi wū e esaka ye. Me to mere bi se, wū labi, wū nū, ba wū kambiliki, de wū yiti, abe kphah te wū dongi, de wū kamele eyi feke na fa sū. ³⁶ Kphah bala, Sara bi ye komoko kphah eyi fū Abarayama, tīne gbü gbe ye dene. Fū Abarayama ayia ato mere bi wū e ka-ye la kphah eyi, ace ao 'buru fū ye ye la. ³⁷ Fū Abarayama ayia atima ni, gü ba, 'Ni koro, ni se würüse fū ye ni la kpakine. Ni mere e, ase würüse la fū ye ni esūka egba wū Kanana, te ani ngbü gbü sū ka-ewü ne, de. ³⁸ Ni nū kpa gbü sū ka nguwa wō ani kpakine, de ni ceka jaji würüse la gbü nguwa wō ani.' Fū ni, mürü tima, ayia akina kina, ga, ni ena amere ngü la 'buru kphah bala, baka e te mere ka-ni mala la. ³⁹ Ni yi-tata ta kphah eyi, ga, 'Anga te würüse la le teka adu agbü tō ka wū Kanana nda de, angü sū mo amo la?' ⁴⁰ Fū Abarayama amala fū ni, gü ba, 'Me, de te ni, Abarayama, le ngü kaka-na ne, engu ena atima malayika ka-ye engagira nū, de ah ü kaje fū ni, fū ni afe zūka würüse fū ye ni gbü nguwa ani. ⁴¹ Amba te wū mürü ni le, gü ba, 'Jaji würüse engu mere e adu ake ni kpa gbü Kanana de la,' ngü ma, kina engu de te ni kina te-ni di ne, tī ari gbü nga ni nda de.'

⁴² Baka te ni nū koro fūh du-kpa-ngu mari ede 'baranga de kpane ne. Fū ni arü, aku gba fū Me, gü ba, 'Wayi bala Me, ye de vüngüte ka mere kpara ka-ni, Abarayama! Ah le de ye ü kaje fū ni, de ni maka würüse fū ye mere kpara ka-ni. ⁴³ Angü ni rü eyi de fūh du-kpa-ngu ne, teka amala ngü fū gara jaji würüse te ena akoro, ase ngu. Ni ena ayi-tata, de ah to ngu fū ni, de ni nzō. ⁴⁴ Te jaji würüse engu la le eyi ato ngu fū ni, de wū kamele ka-ni 'buru la, dela eyi jaji würüse, te ye fe, de ah di wara Yisaka, ye mere kpara ka-ni ne.' Dela gba ka-ni tīne, te ni ku fū Me.

⁴⁵ Kphah bü baka te ni ngbü la eku gba

* 24:22 24:22 Mafe de e te wū würüse ngbü eto gbü gü wū.

fü Me bala, fü ni awu Rebeka, te ngbü egoro de bütü-ngu gbü nzö ye. Fü ah akoro kürrrü! anü kpa füh du-kpa-ngu, akpo angbü ese ngu. Fü ni ayia amala ngü fefe na, gü ba, 'Ye to ngu fü ni, de ni nzö.' ⁴⁶ Fü engu ayia kere, ae bütü-ngu la, azoro esaka ye. Fü ah ayia ato ngu la, fü ni anzö. Fü ah adu kpah, ase ngu, ato fü wü kamele ka-ni 'buru. ⁴⁷ Fü ni ayia ayi-tata, gü ba, 'Ye neh ye da?' Engu gü ba, 'Ni de ye Betuwele, te di de ye Nayora, enga ni ye Abarayama,' ne. Te ni je ngü la bala, fü ni ayia aza mafe ne, ato fefe, teka de engu to gbü gü ye. Fü ni aza kpah wü kengbe, de engu to gbü kpa ye. ⁴⁸ Fü ni adu agbo nga iri Me afa sü, angü engu zu de vüngüte ka mere kpara ka-ni. Tekane de, angü Me gü tamu kaje la me-ye fü ni, fü ni akoro amaka tangbase ne, de wüh za te-wü ake Yisaka, angü engu de mürü ye Abarayama fanü fanü."

⁴⁹ Fü mürü tima la adu ayi-ta ewü, gü ba, "Wü je ngü, de te ni mala la eyi? Te di bala, wü ena alügü ngü fü mere kpara ka-ni, agü neh fe? Wü ti amere ngü la fefe, baka e te engu ngbü ele? Ah le de wü mala züka ngü emala fü mere kpara ka-ni, te wü le eyi ato jaji würüse ne, fü ye mere kpara ka-ni aza engu wara ye tete la. Amba te wü le de la, de wü mala emala fü ni mbölö, teka de ni wü mene ngü, te ni ena amere." ⁵⁰ Fü wü Labana ake Betuwele alügü ngü, gü ba, "Gara ngü gömö a, te a ena amala nda ma, angü ngü la koro ka-ye kpaka Me. ⁵¹ A ena ato Rebeka ato fü yi. Mü ena aza engu aza, anü di, ato fü ye Abarayama wara ka tete, baka e te Me mala."

⁵² Te mürü tima la je ngü la bala, fü engu ayia abu nzökuta ye kötö, agbo nga iri Me. ⁵³ Fü engu ayia aza mere bi wü züka e, ato fü Rebeka, baka wü tüngü, wü 'biri, wü kengbe, de wü bongo. Fü ah adu kpah aza mere bi wü se, ato fü wü di enga ni ye Rebeka, bete ni ye na. ⁵⁴ Te ngü la nza tete, fü mürü tima la adu tüne, azü e de wü kpara ka-ye. Fü ewü ayia ara sela.

Te kpi seke tete, fü mürü tima la ayia ayi-ta wü di enga ni ye Rebeka, gü ba, "Wü ce kaje fü ani, de ani lügü nga ani, du kpaka mere kpara ka-ni, enatikine." ⁵⁵ Fü ewü amala ngü fefe, gü ba, "Te enga ni ani ena angbü la mba de wü ani sene, teka sikpi nzükpa feke, fü wü ayia tüne, ago de ewü la, ah ena adi esiti?" ⁵⁶ Mürü tima la gü ba, "Yi mere e atiri kaje fere enatikine de, angü Me le ta-ngü te ra eyi me-ye, fü ra ayia amere ngü, de te wüh tima ra tüngüngü ne. Te di bala ne, yi ce kaje fere, de ma yia enatikine, de ma du kpaka mere kpara ka-ra." ⁵⁷ Wüh gü

ba, "Te ah bala la, ani ena ai Rebeka, ayi-tata teka ngü la feke. Fü ani aje ngü la gögömö."

⁵⁸ Fü ewü ayia ai Rebeka, ayi-tata, ga, "Rebeka, enga ni ani deyi, ye le eyi ayia enatikine, ago de wü komoko ne agbü Kanana, teka fü ye mere kpara ka-ewü aza ye wara ye tete?" Rebeka gü ba, "Wayi, ni le eyi ago de ewü kpala enatikine." ⁵⁹ Te wüh je ngü la cu gömö Rebeka bala, fü ewü aci 'buru ale, gü ba, "Rebeka go ka-ye ego de ewü." Fü ewü ayia eto kpah gara mere würüse, kpara ka tima ka ni ye Rebeka, de ah nü, ah di emere tima fü Rebeka.

⁶⁰ Fü wü mürü ye Rebeka amala ngü fefe, agü ba, "Tangbase ka-a, Me to mere wazi fü mü, 'duwa ba-neh-ene-la.

Fü mü abi wü ye ba ca e kötö ne.

Fü wü di enga mü la amere kpeke, adi egü gü da efa wü vügü ka-wü.

Me to wazi la fü mü bala."

⁶¹ Fü wü Rebeka ayia de wü würüse ka tima ka-ye, te Labana to, ali füh wü kamele. Fü ewü ayia go, de wü kpara ka tima ka Abarayama, agbü Kanana.

⁶² Gbü wü sikpi la, Yisaka go ngbü ka-ye gbü gara sü, gbü tö ka wü Kanana sela, te wüh ngbü ei, gü ba, Negebe ne, ede dukpa-ngu de iri ye Biri-Laroyi ne. ⁶³ Gbü gara ra bane, fü Yisaka ayia etamurago, anü da endoro egbere lö ye. Engu ga, ni ceka kpi bane de, gbo! te wü kpara te ewü ngbü egboko egoro füh mere bi wü kamele. Fü ah ayia anü, teka de ani maka te-ani de wü kpara la.

⁶⁴ Wü Rebeka ngbü ta egoro dela me-wü. Fü Rebeka ayia aceka kpi bane, awu Yisaka nengete. Fü Rebeka ayia akö füh kamele ka-ye ne kötö. ⁶⁵ Fü ah ayia ayi-ta mürü tima ka Abarayama, gü ba, "Kpara de te ngbü egoro de kpala, da enü mbi de ani de kpakine, ah de neh da?" Mürü tima la gü ba, "Dela Yisaka, wati ye ne." Fü Rebeka ayia aza mere kpa bongo, abuka gbüra ye, ani di. ⁶⁶ Fü mürü tima la ayia anü kpaka Yisaka kpala. Fü ah ati te nga ngü te mere te-ye de kpala, amala 'buru fü Yisaka, gü ba, "Ni koro de wara ye eyi dene." ⁶⁷ Fü Yisaka ayia angbü de mere tadu. Fü ah ayia aza Rebeka, adu di, ao gbü gugu, ta te ni ye na, Sara, ngbü gbügbü na ne, wara ye tete. Fü Yisaka ale Rebeka 'duwa cu afa sü. Te di bala, fü jia Yisaka adu alofo, fütanga kö ni ye la, teka ngü ka Rebeka.

25

Dene ngü teka wü kundu ye Abarayama

¹ Gara wara Abarayama ta kphah ladü de iri ye Ketura. ² Ah bi ta bi wü jaji komoko fü Abarayama. İri wü jaji la de Zimerana, Medana, Midiyana Yisibaka, Süwa bete Yokosana. ³ Fü Yokosana ayia abi nda-ye wü Seba ake Dedana. Fü Dedana abi nda-ye nguwa wü kpara, de te wüh ngbü eï ewü, wü Asura, wü Letusima, bete wü Lumina ne. ⁴ Fü Midiyana, ye Abarayama ne, ayia abi nda-ye wü Efa, Efere, Anoka, Abida, bete Eleda. Dela 'buru iri wü jaji guvu Ketura, de wü ata ye na, te di de gara wara Abarayama ne.

⁵⁻⁶ Ye Abarayama di ta la de jia ye ne, engu to ta kphah mere bi wü e eyi fü wü di ye, de te engu bi ewü ake Ketura bete Agara ne. Fü Abarayama ayia amala ngü fü ewü, gü ba, "Ah reke pe, te wü ena akö wü e ka-wü la, ayia ago di to kpa fügö. Te wü ngbü ghamari ede Yisaka sene la, ah ti de, angü sü 'be de." Fütanga kö Abarayama, Yisaka za wü e-nga-kpa wö ye la 'buru me-ye.

⁷⁻⁸ Abarayama kpi ta, o re kaka koro eyi 'buru kama biri teke bata nzükpa de füh ye 'buruve (175), o engu gbe tîne eyi fa sü. ⁹⁻¹⁰ Fü Yisaka ake İsimayile ayia ati engu gbü gö da kpa gbü Makepela.* Dela ta gö da, te Abarayama ti wara ye, Sara, gbügbü na ne. Wüh ti engu kphah ede biki Sara sela.

¹¹ Fütanga kö Abarayama, fü Me adu ato mere wazi fü Yisaka, kphah ba e ta te engu to fü Abarayama ne. Gbü wü re la, Yisaka ngbü ta ka-ye fi bü ede du-kpa-ngu, de iri ye Biri-Laroyi ne.

¹² Dene iri wü di İsimayile, mbarase ta te Abarayama bi ake gara wara ye, de iri ye Agara† ne. ¹³ İri gina ye İsimayile ta de Nebayota. Fü İsimayile adu kphah abi wü Kedara, Adabele, Mibisama, ¹⁴ Misima, Duma, Masa, ¹⁵ Adada, Tema, Yeturu, Nafisa, bete Kedema. ¹⁶ Dela 'buru iri wü di İsimayile. Wüh 'buru wü jaji komoko nzükpa de füh ye 'basu. Fü ewü aga akoro 'buru baka nga nzö nguwa wü kpara, nzükpa de füh ye 'basu. Fü ewü adi egü iri wü köti ka-wü, kphah 'buru te gina nguwa wü la. ¹⁷⁻¹⁸ Wü di İsimayile la ra köti ka-wü ta ezengba wü Avila ake Sura, ede kaje ka Asura, mari ede *Ezepeto to kpa fügö. Fü ewü angbü da ememere wü gü esüka wü, de wü gara wü kundu ye Abarayama ne. Fü re ka İsimayile ayia

akoro 'buru kama biri teke biri nzükpa de füh ye lerozi (137), fü engu ayia akpi.

¹⁹ Dene ngü teka wü di Yisaka, ye Abarayama, te ewü bi ake Sara.

²⁰ Yisaka za ta wara ye, de iri ye Rebeka ne,‡ o re kaka koro eyi ba re teke 'basu (40). ²¹ Fü Yisaka ara akoro ake Rebeka baka wü re teke biri, wüh bi ye fi de. Fü Yisaka angbü eku gba fü Me kpekpeke, de Me to ye fü ani ake wara ni. Fü Me ayia aje gba ka Yisaka la. Fü Rebeka ayia amaka bu. Fü ewü angbü de mere tadu ake watı ye teka ngü la.

²² Fütanga ngü la, fü wü ye de guvu Rebeka la akpo angbü eto mere kuru tete na, angü ah wu de, gü ba, ah de wü dadase. Fü Rebeka ayia amala ngü, gü ba, "Si-ngü gbü ngü ne, neh mbi mbi baye?" Fü Rebeka ayia ayi-ta Me, teka de Me sere si-ngü la. ²³ Fü Me amala ngü fefe, gü ba, "Si-ngü la, ah bane. Ye de guvu mü la, ka-ye wü dadase, 'basu mini wü jaji komoko. Wüh ena akoro ba nguwa wü kpara 'basu. Fü ewü angbü emere gü esüka wü ake enga ni ye. Fü wazi gara na afa kiri ye ka. Mene engu, te ena akoro te enga gina ne, ena angbü eje ngü gömö mene de sisi ne." Dela ngü ta te Me mala fü Rebeka, teka wü dadase, te engu ena abi ne.

²⁴ Fü bu Rebeka ayia andri. Fü Rebeka ayia ayaka wü jaji la 'basu mini, 'buru wü jaji komoko. ²⁵⁻²⁶ Gina ye la, ah ta de mbe kpara, küküte na ngbü de su te ye rurrur, baka su eküte na la. Fü mene te koro sisi ne azoro lö engu ni ye, gina ne, gö! Wüh gü iri gina ye la, Esawu. § Fü ewü agü iri sisi ye la, *Yakobo.* Yisaka bi ta wü jaji la, o re kaka koro eyi teke bata (60).

²⁷ Fü wü jaji la agere, akoro wü komoko. Esawu ta de kpara te ngbü emörö wü nü 'duwa ba-neh-ene-la. Yakobo nda-ye de kpara te ngbü engbü ka-ye bü eköti, da emere wü tima ka köti. ²⁸ Fü Yisaka ale ngü ka ye ye, de Esawu ne, cu afa sü, teka so, ta te engu ngbü ezü esakaka na ne. Fü Rebeka ale nda-ye di ngü ka enga ye, de Yakobo ne, kphah afa sü.

²⁹ Gbü gara sikipi, Yakobo ngbü ta ega firinda ka-ye. Fü Esawu adu akoro kpa da endoro ka-ye agbü gü ne, de mere tala te ye. ³⁰ Te Esawu je se firinda, te enga ni ye ngbü ega la, fü engu ayia ayo firinda la eküte enga ni ye, gü ba, "Enga wüna, mü tökö la mba firinda ka-mü la akine, ma la,

* 25:9-10 25:9-10 Makepela la, ah ghamari ede Mamare. Dela ta sü te Abarayama se ta gügü esaka Efürona, ye Cowara, enga wü Ete. † 25:12 25:12 Agara ta de egba Ezepeto. ‡ 25:20 25:20 Rebeka ta de ye Betuwele, gbü nguwa wü Aramiya, te ewü ra köti kpa gbü Padanarama ne. Labana ta de enga ni ye Rebeka. § 25:25-26 25:25-26 Ngü te wüh gü iri gina ye la tete Esawu, angü ah de mbe kpara. * 25:25-26 25:25-26 Ngü te wüh gü iri sisi ye la tete, Yakobo ne, angü engu zoro lö gina.

angü ma kpi ka-ra tîne akine ka tala eyi.”[†]
³¹ Fû Yakobo ayia alügü ngü fû engä ni ye, gü ba, “Mü efi nda-mü, gü ba, ma ena ato firinda ka-ra fû ni bü kükürü bala? Te mü le de ma to firinda ka-ra ne fû ni la, mü ena amere gara ngü fere feke. Ah le de mü mala emala, gü ba, ma ena adi tîne de gina me-ra fû ni, teka fû ra amaka wazi, ta te mü ena amaka ne. Angü mü ka-mü de gina fere. Ma wu eyi, gü ba, sidi nga kö wö nih, mü ena angbü me-mü de mere kpara. Fû Me ato mere wazi fû mü, baka te engu to fû wü wö nih, de wü kundu nih gügü ne.”³² Esawu gü ba, “Ma ena angbü ba mere kpara la, neh elaye, te ma eyia eyi ekpi akpi ka tala ne?”³³ Fû Yakobo amala ngü fefe, gü ba, “Te mü le eyi la, de mü kina te-mü ekîna tîtine, teka fû ra agü firinda ka-ra ne fû mü.” Fû Esawu ayia akîna te-ye, gü ba, “De-mü Yakobo, mü fere tîne eyi ba gina. Fütanga kö wö nih, mü ena angbü mere kpara me-mü.”³⁴ Fû Yakobo ayia aza kûmü de firinda, ato fû Esawu. Fû Esawu ayia azü. Fû ah ayia anzö ngu, ayia anü sü ka-ye. Ah fi nga ngü la kphä de. Dela ngü ta te Esawu fala ngü ka mere wazi ka Me, te Me le ato fefe na ne.

26

Dene ngü ka Yisaka ake Abi-Meleke

¹ Gbü gara re, fû mere kpirî tala* adu kphä atî gbü *Kanana, fû Yisaka ayia anü kpara Miri Abi-Meleke, te di de miri ka wü Feleseto gbü Gerara sela. ² Fû Yisaka ayia afi nga ngü, gü ba, ni le anü agbü *Ezepeto, angü e-mazü ladü kpala. Fû Me akoro amala ngü fû Yisaka, gü ba, “Mü mere e akpe ago ka cürü agbü Ezepeto la de. Mü ngbü fi bü sela, angü ma ena agü tatamu züka sü fû mü me-ra. ³ Ah le de mü ngbü sela, angü te mü mere bala la, ma ena angbü ake mü, da eto wazi fû mü. Ma ena ato mere tö ka wü Kanana ne fû mü, de wü kundu mü. Fû yi angbü sela fi mere badi. Ma ena amere mere züka ngü fû yi 'buru, kphä baka e ta te ma kîna kîna di fû Abarayama ne. ⁴ Ma ena ato wazi fû wü kundu mü, fû ewü abî wü jajî, asibi asibi afa sü, ba wü küfara. Fû ra ato sü ne 'buru fû ewü. Ma ena aküwa nguwa wü kpara füh kotö ne 'buru, teka ngü ka wü kundu mü la. ⁵ Ma ena angbü de wü yi, fû ra amere wü züka ngü fû yi 'buru teka ngü ka wö mü, Abarayama. Tekä ne de, angü Abarayama ta de kpara te ngbü eje riri ka-ra, da emere wü ngü de te ma ngbü emala fefe na ne 'buru kpini kpini.”⁶ Te

Yisaka je wü ngü, te Me mala fefe na la, fû engu angbü fi agbü Gerara kpala.

⁷ Gbü gara sikpi, fû wü kpara ka Gerara angbü eyi-ta Yisaka teka wara ka, Rebeka ne, angü Rebeka su ta fa sü. Fû cürü ayia amere Yisaka. Ah gü ba, “Te ni mala, gü ba, 'Rebeka de wara ni' la, e-wu neh da, wü kpara la ena amörö ni, fû ewü adu aza Rebeka.” Fû Yisaka ayia alügü ngü fû ewü, gü ba, “Rebeka ka-ye de engä ni ni.”

⁸ Fû Yisaka ayia ayiri gbü Gerara sela teka mere bi wü sîkpi.

Gbü gara sîkpi, fû Miri Abi-Meleke ayia aceka kpi te görö kambü ka-ye bane, gbo! te wü Yisaka, te ewü ngbü etanü, emere wutu ka-wü ake Rebeka. ⁹ Fû Abi-Meleke ayia atima ngü fû wü Yisaka, de ah koro kere. Fû Yisaka ayia akoro. Fû Abi-Meleke amala ngü fû Yisaka, gü ba, “Ni wu eyi, gü ba, Rebeka ka-ye de wara ye. Amba si-ngü de te ye cere nga Rebeka di te ani, gü ba, 'Angü Rebeka ka-ye de engä ni ni ne,' neh mbi mbi baye? Ye fiti ani bala, neh kü teka ne?” Yisaka gü ba, “Ni mala ngü la bala ka cürü. Angü, te ni mala, gü ba, 'Rebeka de wara ni la,' e-wu neh da? Wüh ena amörö ni teka ngü kaka-na.”¹⁰ Fû Abi-Meleke amala ngü fû Yisaka, gü ba, “Ye mere ngü la bala fû ani, neh teka ne? Anga ta te gara kpara esüka ani ena anü ta, agiri Rebeka würüse tete na la ya? Ngü la ena adi ta de *siti ngü ka da? Angü ngü la de siti ngü gbü jia Me. De bane Me ena ato ta kuru te ani teka ngü la.”¹¹ Fû Abi-Meleke ayia awu, gü ba, cürü ngbü emere Yisaka me-ye. Fû ah adu amala ngü fû wü kpara ka-ye 'buru, gü ba, “Wü mere e amere siti ngü fû wü Yisaka de. Mene kpara te ena akpülü ewü ake wara ye la, wüh ena amörö engu 'duwa amörö.”

¹² Gbü re ka mere tala la, fû Yisaka ayia asö yi ka-ye gbü tö ka Gerara la. Fû engu aru wü e gbügbü na. Fû Me ato mere wazi gbü yi kaka-na la. Fû wü e kaka la arî afa sü. Fû engu ayia amaka mere langba ndo afa sü le. Amba nda wü bu ye na ri mü mbi de. ¹³ Fû Me angbü fi bü eto wazi fû Yisaka efa sü. Fû wü e kaka-na, ba e-mazü, angbü esibi tîne fi bü efa sü. Fû Yisaka adu akoro tîne kpeke kpara, de mere bi wü e esaka ye, ¹⁴ ba wü kambiliki, wü yiti, bete wü labî. Fû wü kambiliki, de wü yiti kaka-na la, angbü ezu 'duwa efa sü. Te wü kpara ka Feleseto du wu, gü ba, Yisaka maka mere bi wü e eyi ne, fû ewü ayia angbü ekpü engu, teka wü e de esakaka la. ¹⁵ Fû ewü afi nga wü du-kpa-ngu, ta te Abarayama, wö ye

[†] 25:30 25:30 Si-ngü de ta te ewü fû iri Esawu tete, ga, iri na tîne de Edomo, teka ngü la. Angü ah yi firinda de te diki adiki esaka engä eyi. Ngü gbü Edomo ka-ye nda baka e te wüh ena agü, ga, Diki-e. * 26:1 26:1 Tala la, ah kphä baka engu de ta te ti o Abarayama di la ladü de jia ye.

Yisaka ji, o engu di la de jia ye ne. Fū ewü akpo asiti wü du-kpa-ngu la, ani ewü 'buru asidi, teka wü nü ka Yisaka ena adi enzö.

¹⁶ Baka te züka ngü la ngbü emere te-ye tete fū Yisaka bala, fū Miri Abi-Meleke ayia gbü gara sikpi, amala ngü fū Yisaka, gü ba, "Wazi ye fa nda-ani tñe eyi, angü ye tñe eyi de mere bi wü e esaka ye. Te di bala ne, sü ka-ani be tñe de. Ah reke areke te ye ena ayia akö wü e ka-ye, ago angbü di kpa gbü gara sü." ¹⁷ Fū Yisaka ayia akö wü e ka-ye, ago angbü ka-ye to kpa fügö, te nga ze ka Gerara kpala.

¹⁸ Fū Yisaka adu afi nga wü du-kpa-ngu, ta te wü kpara ka Abarayama ngbü ji gügü, fū wü kpara ka Feleseto ayia ani ne. Fū wü kpara ka Yisaka adu aoro wü du-kpa-ngu la, areke te nga wü 'buru. Fū Yisaka agü iri wü du-kpa-ngu la kphah 'buru, gegege baka e ta te wö ye na gü te enga gina ne. ¹⁹ Fū wü kpara ka Yisaka ayia aji gara du-kpa-ngu, ede ze ta te ewü ra köti te ngangana ne. Fū ewü ayia amaka ngu, te ngbü edü 'duwa kpulu kpulu bane. ²⁰ Te wü kpara, de te ewü ngbü ta eceka kpi fütanga wü nü ka wü kpara ka Gerara ne, wu ngu te ngbü edü de bala, fū ewü akpo angbü ewü nga de wü kpara ka Yisaka, gü ba, "Ngu la ka-ye ngu ka-ani." Dela si-ngü te Yisaka gü iri du-kpa-ngu la tete, gü ba, Eseke, te gü ba, "Mawü Nga".

²¹ Fū wü kpara ka Yisaka adu kphah aji gara du-kpa-ngu. Fū wü kpara ka Gerara adu kphah akpo de nga, da eyi-ta komö wü kpara ka Yisaka. Fū Yisaka ayia agü iri du-kpa-ngu la, gü ba, Sitena, te gü ba, "Makpü".

²² Fū Yisaka ayia ace sü la, ago angbü ka-ye kpa gbü gara sü. Fū ah adu kphah aji gara du-kpa-ngu kpala. Fū wü kpara ka sü la angbü emala, gü ba, "Ngu la ka-ye ngu ka Yisaka." Wüh mala siti ngü fefe na nda-wü de. Fū Yisaka ayia agü iri du-kpa-ngu la, gü ba, Robotu, te gü ba, "Zö-ngbüngbü". Yisaka gü ba, "Me to mere züka gu sü eyi fū ani, teka fū ani ago ara köti gbügbü na, da emaka wü züka ngü." Fū wü Yisaka ayia angbü sela.

²³ Gbü gara re, fū wü Yisaka ayia adu angbü ka-wü agbü Biri-Saba, gbü sü ta te wö ye na o köti tete na gügü ne. ²⁴ Te wü Yisaka koro kpala, fū Me ayia akoro agü tamu ye fefe gbü biti la, gü ba, "Mü mere e akpe cürü wü kpara ka sü ne nda-mü de. Angü de-ra, Me, te ma di de *vüngüte ka wö mü ne, ma ena angbü fi bü ake mü. Ma ti ace mü nda-ra de. Ma ena ato wazi fū mü, de wü kundu mü, teka

ngü ka wö mü, Abarayama. Fū ewü abi ye, asibi asibi, baka ngü ta te ma mala fefe na ne." ²⁵ Fū Yisaka ayia areke sü kpala, teka angbü egbo nga iri Me gbügbü na. Fū engu ayia kphah, ao köti ede sü la. Fū wü kpara kaka-na akpo kphah egiri sü teka aji du-kpa-ngu ka-wü tete na.

Dene ngü te wü Yisaka nzö ngüte di ake Miri Abi-Meleke

²⁶ Gbü gara sikpi, fū Miri Abi-Meleke ayia akoro kpaka Yisaka, agbü Biri-Saba sela. Wüh koro ta de wü mere kpara ka-ye, wü Azata, mere kpara te ngbü eto fingängü fefe na, bete Fikola, mere kpara ka wü marajümiya kaka.

²⁷ Fū Yisaka ayia amala ngü fū ewü, gü ba, "De-wü deyi, mere bi fe ni wu wü tñe de. Wü koro afa nga ni kpakine neh teka ne? Wüh koro teka aliki ani gbü sü ne, baka engu de tane?" ²⁸ Wüh gü ba, "Ah bala de. Ani mere ta ngü la bala, angü sü be teka ani de wü ye 'buru ne nda de. Amba enatikine ani koro bü mba aceka ye. Ani wu eyi titine, gü ba, Me to wazi fū ye eyi cu fa sü. Te di bala ne, ani ele de ani nzö ngüte de wü ye. Amba ani le de ye kina kina, ²⁹ gü ba, 'Ni ti amere siti ngü fū ani de.' Angü ani mere ta siti ngü fū ye nda-ani kphah de. Ani mala ta fū ye, de ye ce sü ka-ani gbü züka ngü. Te di bala, ah le de ye kina te-ye ekina, angü ani wu eyi kpo, gü ba, Me le ye fa sü." ³⁰ Fū Yisaka ayia angbü de tadu. Fū ah amala ngü fū wü kpara ka-ye, de wüh mere wü e-mazü fū ewü. Fū ewü ayia azü wü e la, kphah da enzö wü e de ewü 'buru gbü sü biringbö.

³¹ Te kpi seke tete, kpurutokokpi la, fū ewü ayia anzö *ngüte esüka wü, kphah baka e te ewü mala esikine ne. Fū Yisaka ayia agü nga ewü, ace kpa te kaje. Fū ewü ayia ago agba wü, gbü züka ngü mürü.

³² Gbü ra engu la, fū wü kpara ka Yisaka adu akoro amala ngü fefe, gü ba dene, "Ani maka ngu gbü du-kpa-ngu, de te ani ngbü eji ne eyi." Fū ngü ayia areke te Yisaka afa sü. ³³ Fū Yisaka ayia agü iri du-kpa-ngu la, Saba, baka e te wüh gü ba, "Kina". Ah gegege ba iri ta te Abarayama gü te du-kpa-ngu, te engu ji gbü sü la. Dela si-ngü de te wüh ngbü ei sü la tete enatikine, gü ba, Biri-Saba ne.

Dene ngü teka wü egba ganzi kpara, te Esawu za ewü wara ye tete

³⁴ Te re ka Esawu koro tete ba e teke 'basu, fū engu ayia ase wü würüse 'basu, 'buru wü egba ganzi kpara gbü nguwa wü Ete. Iri gina wara ka ta de Yudita.† Iri e'ba 'basu würüse nda ta de Basemata.‡ ³⁵ Fū ngü la asiti ta gbü jia wü wö ye na,

† 26:34 26:34 Iri wö ye Yudita de Beri. ‡ 26:34 26:34 Iri wö ye Basemata de Elono.

Yisaka ake ni ye na, Rebeka afa cu sü. Angü gbü gele ka-ewü, wüh ti aza te-wü de wü ganzi kpapa de.

27

Dene mani te Yakobo maka wazi di esaka wö ye

¹Fütanga wü ngü la, fü Yisaka agbe tîne afa sü. Jijia na du ceka kpí mbi mbi nda tîne de. Gbü gara ra, fü Yisaka ayia ai gina ye ye, de Esawu ne, de ah koro kpaka ni. Fü Esawu ayia ale ngü, akoro kpaka wö ye. ²Yisaka gü ba dene, "Wayi, Esawu, enga ra, ma gbe nza ka-ra tîne eyi dene. Sikpi ka kpi ka-ra kpah eyi gbamari. ³⁻⁴Te di bala, ah le de ma ce wazi ka-ra, te Me to fere ne, fü mü, angü mü de gina ye ra, teka fü mü angbü mere mürü köti fütanga kö ra. Te di bala, de mü za diri ka-mü, mü nü, mü giri la nü, de mü mörö, fü ra azü ka fele. Te mü mörö nü engu eyi la, de mü fe züka wü so la, de mü zi reke areke. Te ma zü nza eyi la, ma ena ato wazi ka-ra 'buru fü mü. Fü ra asü ngüsü esatikpa mü, teka fü mü amere kpeke." Fü Esawu ayia anü sü kpa gbü gü, teka agiri wü nü la, amörö.

⁵Amba de, Rebeka, mü je ngü de te Yisaka ngbü emala fü Esawu ne, nda-mü eyi. Te Rebeka wu, gü ba, Esawu nü sü eyi agbü gü ne, ⁶fü ah ayia kere, akpe anü, agiri *Yakobo, amala ngü fefe, gü ba dene, ⁷"Enga ni, ni ngbü titîne dene, fü ni aje ri wö ye, te engu ngbü emala ngü fü Esawu, gü ba, 'Ni ele ato wazi ka-ni, te Me to fü ni, fefe, de ah ngbü ba mere mürü köti fütanga ni, angü ah de gina ye ni.' Ah atima Esawu, de ah nü agbü gü, ah giri so fü ni feke, teka fü ni ato wazi la fefe na. ⁸Te di eyi bala ne, enga ni, dene mani te ye ena amere, afiti wö ye di, teka fü engu ato wazi la fü ye, fü ye angbü ba mere mürü köti me-ye. ⁹Ye nü enü kpa gbü sü te wü meme ngbü ezü e tete na, de ye za wü di enga meme kpala 'basu. Fü ye amörö ewü, akoro de so ewü fü ni, teka fü ni azi züka wuru gbügbü fü wö ye. Wuru engu la, ah ena adi de wuru te wö ye ngbü ele ngüngü na efa sü, de te engu mala nganga na fü Esawu ne. ¹⁰Amba ye ena aza wuru engu me-ye, anü di fü wö ye, de engu zü, angü wö ye ena afi nda-ye, gü ba, dela eyi wuru de te Esawu zi koro di fü ni ne, angü jijia tîne eyi ma. Fü engu ato wazi ka-ye la tîne 'buru fü ye."

¹¹⁻¹²Yakobo gü ba dene, "Anga te wö ni ena ao kpa ye eküte kpa ni, atala la, ni ena amere baye? Angü su de eküte kpa Esawu ne, fa ka-ye nda-ni ne ka. Te di bala, wö ni ena awu teke, gü ba, dela ka-ye kpa ni, ah de kpa Esawu nda de. Fü ngü ka-ni, Yakobo, asiti gbü jia wö ni 'duwa afa sü.

Ah ena aza ni ba mürü wu, fü mamagama asiti tîne eküte ni afa sü. Fü engu ao komö ye gbü nga ni. Dela ena adi züka ngü?"

¹³Rebeka gü ba, "Ye mere e akpe cürü de. Te ngü la du fü te-ye, mere te-ye bala la, komö wö ye ti ari gbü nga ye nda de. Ngü la ena angbü gbü nzö ni. Ye nü enü, ye zoro nda bü wü di enga wü meme la, de ye du di, fü ye amere ngü engu la, ba e te ni mala fü ye la."

¹⁴Fü Yakobo ayia anü azoro wü di enga meme 'basu, amörö ewü, akoro de so ewü, ato fü ni ye. Fü Rebeka ayia azi 'duwa züka wuru, te di 'duwa mene ngütü de te wati ye ngbü ele efa sü ne. ¹⁵Fü Rebeka ayia aza züka bongo gbü nga Esawu, te di ta kpa esambü la, ato fü Yakobo, de engu to te ye, teka fü sese angbü kpah ba se Esawu. ¹⁶Fü Rebeka adu aza kpah konü wü meme la, agbala, ai, ao eküte kpa Yakobo, be kpah te ngüngürü na, angü su ta eküküte baka nda Esawu nda ma. ¹⁷Fü Rebeka ayia aza kümmü, bete züka wuru engu, de te engu zi la, ato fü Yakobo, de engu nü di fü wö ye.

¹⁸Fü Yakobo aza e-mazü la, anü di fü wö ye, ai wö ye. Fü Yisaka ayia ale ngü, gü ba, "Wayi enga ra, mü de neh da?" ¹⁹Yakobo gü ba, "Ah de-ni, Esawu, gina ye ye ne. Ni mere ngü tîne, te ye mala nganga fü ni ne eyi. So de te ye mala nganga na ne eyi dene. Ye yia eyia tikpi, de ye zü. Fü ye adu tîne ato wazi ka-ye la fü ni." ²⁰Fü wö ye na alügü ngü, gü ba, "Enga ni, ye mere ngü ye, amaka so la, akoro di kpah bü kere de bala, neh fe ya?" Yakobo gü ba, "Amba Me, te di de *vüngüte ka-ye ne, le ta-ngü te ni me-ye. Fü ni ayia amörö nü la mba kere dene tungü la."

²¹Yisaka gü ba, "Ye koro la mari kpa ede ni akine, de ni tala küte ye. Fü ni awu tete, gü ba, ye ngbü de ye ni, Esawu, fanü fanü." ²²Fü Yakobo ayia aka te-ye, akoro gbamari ede wö ye. Fü wö ye na atala küküte, aceka, fü ah amala fefe, gü ba, "A! Dene bane ne ngü ne? Angü ri mü akine baka ri Yakobo. Amba kpa mü nda di ba nda Esawu la." ²³Yisaka ti ta awu, gü ba, dela Yakobo ne de, angü jijia na ni ka-ye ta eyi. Te engu tala kpa Yakobo, maka su tete, ba su te kpa Esawu ne, fü ah afi nda-ye, gü ba, "Wayi, dela eyi de Esawu fanü. Ni ena ato wazi ka-ni la ato fefe."

²⁴Fü Yisaka adu kpah ayi-ta ngü, gü ba, "Mü mala la ngü fere fanü fanü. Mü ngbü de Esawu fanü?" Yakobo gü ba, "Wayi, wüba, ma ngbü de Esawu fanü." ²⁵Yisaka gü ba, "Ah mbi. Mü to e-mazü la eto, de ma zü. Fü ra adu ato wazi ka-ra, te Me to fere, fü mü." Fü Yakobo ayia ato e-mazü la fü wö ye. Fü wö ye na azü. Fü Yakobo aza kpah fi, ato fü wö ye, anzö.

²⁶ Te Yisaka zü e la nza tete, engu gü ba, “Enga ra, mü ka te-mü, ghamari kpakine, de ma faka mü.” ²⁷ Fü Yakobo ayia aka te-ye, akoro ghamari kpaka wö ye. Fü wö ye na ayia afaka engu, ayia aje se bongo de eküküte na ne. Fü ah ayia awu, gü ba, dela ngbüürü eyi ye ni, Esawu ne. Fü Yisaka ayia ato wazi ka-ye fü Yakobo, gü ba, “Enga ra, se mü akine ghoou, gegege ba se züka fu-ndo kpa gbü yí, te Me to wazi ye eyi gbügbü na. ²⁸ Ma eyi-ta Mere Me, de ah to wazi fü mü fi bü bala. Me to wazi teka de agö di elí füh wü e ka-mü, de wüh ga reke areke. Me to wazi, de ndo de gbü yí ka-mü la rí arí, de jia ye jete jete bala. Me to wazi, de wü rirü ka-mü la rí arí rudu rudu. ²⁹ Me to wazi, fü mü angbü ba mere mürü köti, kpa baka miri gbü nzö wü di enga ni mü 'buru. Fü ewü angbü eje ngü ka-mü. Me to wazi fü mü, teka fü mü angbü gbü nzö nguwa wü kpara 'buru. Fü nda-mü wazi afa nda-ewü le 'buru. Fü ewü angbü nda-wü esatilö mü. Mene kpara te ena afala mü, Me ena akina engu. Mene kpara te ah ena angbü egbo nga irí mü, da eyi-ta Me tungü mü la, Me ena angbü kpa ake di.” Dela ngü de te Yisaka ku gba di fü Me, de ah mere fü Yakobo.

³⁰ Te Yisaka ku gba de wü ngü la teka Yakobo nza tete, fü Yakobo ayia anü sü kaye. Yakobo kpa bü te enü sü bane, Esawu du koro kpa eyi. ³¹ Fü Esawu ayia aza so, de te engu du koro di ne, azi areke areke. Fü ah aza akoro di fü wö ye. Te engu koro de e la kpaka wö ye, ah gü ba, “Wüba, ma koro eyi. Mü yia eyia tikpi, de mü zü so ka-mü, de te ma zi, koro di fü mü ne, teka fü mü ato wazi ka-mü fere.” ³² Wö ye na gü ba, “Mü neh da?” Esawu gü ba, “Ah de-ni Esawu, gina ye ye ne.” ³³ Fü Yisaka akpo angbü eyi, gbi gbi gbi, teka ngü la. Fü ah ayi-ta ngü, gü ba, “Te ah bala la, anga mene kpara, te koro tine de so fere ne, ah nda de neh da? Angü ma zü so kaka-na la tine kpa eyi. Ma to wazi ka-ra kpa eyi fefe na. Me ena adi ka-ye tine eyi ake di, fü ah angbü ba mere mürü köti me-ye. Titine mba gara kaje, te wüh ena adu afü ngü la gbügbü na, nda tine eyi ma.”

³⁴ Te Esawu je ngü de te wö ye mala la, fü engu aba rere 'duwa kpa tikpi, “Wuuwu! Wuuwu! Wüba! Anga de-ra! Mü to ndara wazi kpa eyi!” ³⁵ Yisaka gü ba, “Ye ni, gara kaje kpala, te ni ena ato nda-ye gbügbü na ne, nda tine eyi ma. Angü enga ni ye koro fiti ni bü titine dene, fü ni ato wazi ka-ni ne eyi fefe na. Titine ah ena angbü baka mere mürü köti fütanga kö ni, tine me-ye. Da ngü la adu afü nda tine eyi ma.” ³⁶ Esawu gü ba, “Amba

wüh gü iiri Yakobo nda-wü kü mbi, angü engu de mürü wu. Engu fiti ta ra kpa te enga gina, za wazi ka-ra, ka gina ye ne ka! Mü ceka la! Engu du fiti mü kpa eyi, fü mü ayia ato wazi ka Me, ta te mü yia eto fere ne, tine fefe!”* Fü Esawu adu kpa anda'ba te-ye fü wö ye, gü ba, “Wö ni deyí, gara mba du wazi ladü, te ye ena ato fü ni, anga ah nda ma?” ³⁷ Yisaka gü ba dene, “Ye ni deyí, ni mala eyi, gü ba, Yakobo ena angbü tine me-ye ba miri ka-wü, de wü kundu ye fi mere badi. Fü wü e gbü yí kaka-na 'buru adi eri efa sü. Gara ngü kpala te lakí mba, te ni ena adu amere tungü ye ne tine eyi ma.” ³⁸ Esawu gü ba, “Wüna! Amba wüba, wazi esaka mü, te mü ena ato fü kpara nda bü ngbee biringbö? Ma le de mü to nda-ra wazi kpa eyi.” Fü Esawu akpo angbü eku tine fi bü mere siti gba, enü di.

³⁹ Fü Yisaka adu amala ngü fü Esawu, gü ba dene, “Amba ngü ka-mü ena adi bane. Mü ena ao gba mü gbü sü, te wü e tí aga tete de. Agö lí te sü la mbi mbi kpa de. ⁴⁰ Mü ena adi mürü gü. Fü mü angbü efa te-mü esaka wü vügü ka-mü de te-dü ka-mü. Enga ni mü ena angbü gbü nzö mü. Te di bala, gara sikpi ladü, te yi ena agü gü ake di. Fü mü ayia ka-mü, ace engu.” Dela ngü ta te Yisaka mala fü Esawu.

Dene ngü ka Yakobo, te kpe ngbü agbü Padanarama

⁴¹ Fütanga ngü la, fü Esawu adu angbü ekpü Yakobo tine afa sü, teka ngü ta te wö ewü to wazi ka-ye fü Yakobo ne. Fü Esawu angbü efi ngü, teka de ni mörö Yakobo, amba ah ngbü ekpe cürü teka wö ye. Fü ah angbü efi ngü emaguma ye, gü ba, “Ah mbi! Angü wö ani gbe nza ne eyi dene de. Te engu kpi eyi la, ni ena amörö enga ni ni, Yakobo, asidi.”

⁴² Te Rebeka je ngü, te Esawu ngbü efi de bala, fü ah ayia ai Yakobo, amala ngü fefe, gü ba, “Enga ni deyí, ngü de te ye mere fü enga ni ye ne, ah ti ngü la eyi guvu ye. Ah ngbü eo jia ye teka sikpi, te wö ye ena akpi tete na, de ni mörö ye asidi. ⁴³ Enga ni, te di bala ne, ye yia eyia, ye nü agbü Padanarama, kpa gba loko ye, de iri ye Labana ne, teka aküwa te-ye. ⁴⁴ Ye go, ye ngbü ka-ye kpala, zalü te maguma enga ni ye ena agu. ⁴⁵ Te mamaguma gu eyi la, toto na ena adu airi teka ngü, ta te ye mere engu di la. Te ni wu eyi bala la, ni ena atima ngü fü ye, fü ye adu akoro kpakine. Dela ngü te ni ngbü emala fü ye, enga ni, angü, te Esawu mörö ye la, wüh ena adu kpa amörö engu. Te di bala, ngü la ena ato mere cinga. Angü ah ena adi de mere

* **27:36** 27:36 Si-ngü gbü iri de Yakobo ne gü ba, “Kpara te zoro lö kiri ye.” Dela ngü mani teka kpara te ngbü efiti fiti.

siti ngü, te wü di enga ni ena akpi anza 'duwa 'basu mini, gbü ra biringbö."

⁴⁶ Fü Rebeka ayia anü kpaka Yisaka, afti engu, gü ba, "Ni mbü ka-ni tîne gbü ngü ka wü wara Esawu, wü egba ganzi kpara ne eyi. Wüh je ngü nda-wü de. Te Yakobo ena aza würüse kpah gbü egba ganzi kpara, baka Esawu la, ah ena adi esiti! Ni ena akpi ka-ni akpi, teka ngü ka wü egba ganzi kpara la! Te di bala, ani ena amere dene mbi mbi baye?"

28

¹ Te Yisaka je ngü la tete, fü ngü la atü gbü jijia na 'duwa kürü. Angü ta gbü wü sikpi la, wü kpara za te-wü de wü ganzi kpara nda-wü de. Wüh ngbü eza te-wü ka-wü gbü mürü. Fü Yisaka ayia ai *Yakobo, amala ngü fefe na, gü ba, "Enga ra, ma le teka de mü za würüse esüka wü egba ganzi kpara gbü *Kanana sene kpo fi de. ² Ma ele de mü yia eyia, de mü nü kpa gbü nguwa wü ni mü agbü Padanarama, de mü za würüse kpala esüka nguwa wü ni mü la. ³ Me di de mü kpala, de ah to bi wü jaji fü mü. De wü jaji la bi wü ye, sibi asibi. Fü ewü aga akoro mere bi nguwa wü kpara. ⁴ Me di de yi, de wü kundu mü la, fi mere badi, kpah baka e te engu di de a ake wüba ta gügü ne. Tö ka wü Kanana, te nih ngbü gbügbü na enatikine ba wü ganzi kpara ne, te gara Me ena ato tö engu fü yi, de wü kundu mü. Angü Me mala ta ngü la fü Abarayama gügü, gü ba, 'Ni ena ato tö ne fü wü kundu ye.'" ⁵ Fü Yakobo ayia anü sü kpala. Dela ta ngü te Yisaka tima Yakobo tete agbü Padanarama, kpaka loko ye, de iri ye Labana ne.*

⁶⁻⁷ Fütanga ngü la, fü Esawu ayia aje ngü la, gü ba, "Wö ni tima Yakobo eyi, de ah nü, ah za würüse agba wü loko ani agbü Padanarama. Angü ah le de Yakobo za egba ganzi kpara de. Yakobo le ngü la kpah eyi. Ngü la areke kpah eyi te wö ni ake ni ni. Wö ni ku gba kpah eyi fü Me, de ah di de Yakobo, da eto wazi fefe na." ⁸ Teka ngü la, fü Esawu ayia awu, gü ba, te ah bala la, amba wü wö ni ake ni ni le ngü ka wü wara ni, wü egba ganzi kpara ne, nda-wü de. ⁹ Te di bala, fü Esawu ayia anü kpaka afudu ye, de iri ye İsimayile ne, teka aza gara würüse kpala, teka de ngü la reke gbü jia wü wö ni. Fü İsimayile ayia ato ye ye de iri ye Malata[†] ne, de Esawu za engu. Malata ta de ebatata wara Esawu.

Dene roto te Yakobo roto agbü Betele

* **28:5** 28:5 Labana ta de kpara gbü nguwa wü Aramiya, ye Betuwele. Engu ta de engu ni ye Rebeka, te di de ni ye Yakobo ake Esawu ne. † **28:9** 28:9 Malata ta de engu ni ye Nebayota. ‡ **28:19** 28:19 Wüh gü iri sü la ta gügü de Luza.

¹⁰ Baka te Yakobo ayia tete agba wö ye, gbü Biri-Saba, enü agbü Padanarama ne, fü ah anü, anü, ara te kaje. ¹¹ Fütanga sikpi 'basu, fü ah akoro agbü gara sü kpala. Fü ra ayia ati. Yakobo gü ba, "Wayi, te ah bala la, ni ena ara sene." Fü ah aza mere ngbürukü teme, ayia ao esa nzö ye, ati ara.

¹² Te engu ngbü era tete, fü ah aroto mere siti 'be'be, te yia kü kpa tikpi, ngbüüü kötö. Gbü roto la, fü ah awu wü *malayika ka Me, te ewü ngbü enü füh 'be'be la, ekoro da edu. ¹³ Fü Me arü nda-ye tikpi, te adu mö 'be'be la, da emala ngü fü Yakobo, gü ba, "Ma de Me, te ma di de *vüngüte ka wü wö mü, wü Abarayama ake Yisaka. Ma ena ato züka ngü fü mü, angü tö de te mü era fefeh na ne, te gara, ma ena ato fü yi, de wü kundu mü fütanga mü, teka fü yi angbü gbügbü fi mere badi. ¹⁴ Fü wü kundu mü abi wü jaji, asibi asibi baka zu-tö. Fü ewü ao gba wü gbü nzö wü sü 'buru, zalü akoro to kpa fügö, kpa kati, de wü debu-sü 'buru. Fü wü kpara awu züka ngü, te ma ena amere fü mü la. Fü wü kpara la akpo angbü eku gba fere, teka de ma to wazi fü ani, kpah baka e te ma to fü yi, de wü kundu mü la. ¹⁵ Ma ena to jia ra eküte mü, angü siti ngü ena amere mü. Ma ena adi eo jia ra te mü, gbü wü sü te mü ena angbü enü gbügbü na 'buru. Fü ra aza mü te gara, adu akoro di kpah gbü sü ka wö mü sene. Ma ti ace mü de. Wü ngü de te ma mala fü mü la, ma ena amere amere 'buru." Dela ngü te Me mala fü Yakobo gbü roto.

¹⁶⁻¹⁷ Fü Yakobo ayia azükü gbü roto kaye la. Fü cürü angbü emere engu 'duwa ba-neh-ene-la. Ah gü ba, "Ata! Dene sü te wüh ekpe akpe, angü Me ladü gbü sü ne fanü fanü. Ni wu ta bala nda-ni de. Sü ne ena adi de gba mere Me, amba ah ena adi de kaje te enü agbü kpi."

¹⁸ Te kpi seke tete, kpurutokokpi la, fü Yakobo ayia abiti wü teme, afa, ao nzüüü bala. Fü ah adu aza teme, de te engu o nzö ye fefeh na ne, ao ga füh mene ewü de te engu fa la, ba *cangali fü Mere Me. Fü ah adu aza mü, atökö füh teme la, gü ba, te gara, te ni ena adu akoro tete na, ni ena awu, gü ba, dene sü te Me gü tamu ye tete fü ni. ¹⁹ Fü Yakobo ayia agü iri sü la, ga Betele,[‡] ba e te wüh gü ba, "Gba Mere Me". ²⁰ Fü Yakobo ayia akina kina fü Me, gü ba, "Wayi bala, Me, mü mala eyi, gü ba, 'Ni ena angbü eceka kpi fütanga ra, gbü sü 'buru te ma ena angbü endoro gbügbü. Ni ena ato kpah e-mazü fere. Fü ni ato kpah bongo, fü ra adi eto te ra. ²¹ Fütanga

wü ngü la, ni ena aza ra, alügü gbü sü ka wü wö ra zözö.' Te di bala, ma ena angbü egbo nga iri mü fi mere badi, angü mü de *vüngüte ka-ra fanü fanü. ²² Gbü wü e te mü ngbü eto fere 'buru, ma ena adi eza tari-e la, elügü fü mü. Te mü to fere baka e nzükpa la, ma ena aza nda-mü biri, alügü fü mü. Dela kina te ma kina fü mü enatikine. Teka ngü la, fü ra aza wü teme, afa baka e dene, teka fü ra angbü efi nga ngü la fi mere badi."

29

Dene ngü ka kokoro ka Yakobo agbü Padanarama

¹ Fütanga ngü la, fü *Yakobo ayia anü, anü teka mere bi wü sikpi. Fü ah anü akoro gbü tö ka Padanarama, ² kpa füh du-kpa-ngu te di ede Arana, te di mba ce edere sü gbü gü. Bi wü kambiliki ta ladü, te ewü ra kötö gbü wü da-sü bata, ede du-kpa-ngu la. Angü dela ta du-kpa-ngu, de te wü nü ka wü kpara ka Arana ngbü enzö ngu 'buru gbügbü na sela. ³ Wüh ngbü ta eni mö du-kpa-ngu la de mere siti teme, angü wü nü ka gü ena adoto jijia na, asiti. Fü wü kpara, de te ewü ngbü eceka kpi fütanga wü nü ka-wü la, adi ekoro ebiti te-wü 'buru feke, teka fü ewü adi awara mere siti teme engu la emö du-kpa-ngu la asidi. Fü ewü adu ato ngu fü wü nü ka-wü. Te wü nü nzö ngu eyi la, fü ewü adu kpah, awara teme la, alügü te nga ye, ani emö du-kpa-ngu la, angü biri kpara ti awara teme engu la kpikpi ye ne nda de.

⁴ Te Yakobo koro tete kpa füh du-kpa-ngu la, fü engu amala ngü fü wü kpara, te ewü ngbü eci wü nü ka-wü la, gü ba, "Wü di engu ni ni deyü, iri sü ka-wü ne, neh baye?" Fü ewü alügü ngü, gü ba, "Íri sü ka-ani ne de Arana." ⁵ Yakobo gü ba, "Te di bala ne, wüh wu Labana ye Nayora ne kpo?" Wüh gü ba, "Ani wu engu kpo." ⁶⁻⁹ Fü Yakobo ayia angbü de tadu. Fü ah amala ngü, gü ba, "Engu ladü mbi?" Wüh gü ba, "Engu ladü mbi. Gara e tete na 'buru ma." Fü Yakobo aceka kpi, awu mere bi wü kambiliki la, te ewü ra ngbü kötö ede du-kpa-ngu la. Fü ah ayia ayi-ta wü kpara la, gü ba, "Si-ngü de te wüh biti wü kambiliki ne tete sene, etü ra ne, neh ene? Te wüh ena ato ngu fü ewü, fü ewü anzö, fü ewü adu alügü ewü, teka fü ewü adu azü e la, ah mere baye?" Wü kpara la gü ba, "Ani ngbü la eci nga wü bu ani, angü wüh ena akoro 'buru feke, teka fü ani awara mere teme de emö du-kpa-ngu la."

Te Yakobo ngbü la bü emala ngü la fü ewü bala, wüh te eceka de, gara jaji würüse te ekoro de wü kambiliki ka-ye. Fü wü kpara la amala ngü fü Yakobo, gü ba,

"Ye ceka la jaji würüse te ngbü ekoro la, ah de mbarase ka Labana. Íri na de Rayele. Ah ngbü ekoro de wü kambiliki ka wö ye, angü ah ngbü eceka kpi fütanga ewü me-ye." ¹⁰⁻¹² Te Yakobo wu, gü ba, dela müka ni, te ngbü ekoro de wü kambiliki ka loko ni ne, fü engu ayia amala ngü fü Rayele, gü ba, "Angü ni de engu akara ye, de iri ye Rebeka ne." Fü Yakobo ayia ati te Rayele, afaka engu. Fü ah angbü eku gba tete 'duwa ba-neh-ene-la. Fü Yakobo ayia kürrrü, anü awara teme emö du-kpa-ngu la, teka de wü kambiliki ka loko ni la nzö ngu.

Fü Rayele ayia amü de woro, adu kpa eköti, amala nga ngü la fü wö ye, gü ba, "Gara jaji komoko koro eyi, de iri ye Yakobo, gü ba, ni de engu engu ni ye."

¹³ Te Labana je ngü la, gü ba, loko ni koro eyi, fü engu ayia de woro, anü amaka Yakobo, ati tete, afaka engu, adu de engu kpa eköti. Fü Yakobo ayia ati te nga-ngü de te engu koro di ne, amala 'buru fü loko ye. ¹⁴ Fü Labana ayia amala ngü fü Yakobo, gü ba, "Ye zu de loko ni, te ye koro guvu ni." Fü Yakobo ayia angbü gba loko ye sela teka fe biringbö.

Dene ngü te Yakobo za wü di Labana 'basu mini wara ye tete

¹⁵ Fütanga fe biringbö la, fü Labana awu, gü ba, Yakobo de kpeke kpara, te ngbü emere tima mbi mbi mbi. Fü Labana amala ngü fü Yakobo, gü ba, "Yakobo deyü, angü tima, de te ye ngbü emere fü ni sene ne, ngbü ele ta-ngü te ni 'duwa ba-neh-ene-la. Te di eyi bala ne, ni ele ato e fü ye da tima la. Ni wu ngbü kpo, gü ba, ye zu de loko ni ne, amba kpara ti amere tima bü kükürü bala de. Te di bala, ah le de ye mala nga mene e, te ye ngbü ele, de ni to fü ye, da tima te ye ngbü emere fü ni ne."

¹⁶ Labana, mü ta de wü di mü, wü jaji würüse 'basu. Íri gina de Leya, iri jaji engu nda de Rayele. ¹⁷ Jia Leya ka-ye ta mba fi fi fi bane. Gbüra Rayele reke nda-ye areke ngüra ngüra bala. ¹⁸ Yakobo ngbü ta ele Rayele ka-ye nda cu efa sü. Baka te Labana mala ngü fefe, gü ba, "E te ni ena ato fü ye da tima neh ene?" ne, fü Yakobo ayia amala ngü fü Labana, gü ba, "Loko ni, ni ngbü ele de ye to ye ye Rayele ne fü ni, wara ni tete. Ni ena amere tima fü ye teka wü re lrozi." ¹⁹ Labana gü ba, "Ah de züka ngü, te ni ena ato ye ni fü ye, angü ni le ato ye ni fü ganzi kpara nda-ni de. Te di bala, ye ngbü angbü gba ni sene, de ye mere tima la." ²⁰ Fü Yakobo ayia angbü gba Labana sela, da emere tima la teka wü re lrozi. Wü re de lrozi la, ga gbü jia Yakobo nda kpo de, angü engu le ta Rayele cu fa sü.

²¹ Te wü re de lorozi la nza tete, fü Yakobo amala ngü fü Labana, gü ba dene, "Loko ni deyi, ye to wara ni eto, de ni ngbü ake di. Angü tima te ye to fü ni ne nza eyi." ²² Fü Labana ayia ale ngü la. Fü engu ayia amere mere siti karama, ai mere bi wü kpara, de wüh koro gbü karama la. ²³ Te ra ti tete, gbü sikipi ka karama la, fü Labana ayia amere mani, aza gina ye ye de Leya ne, anü de engu, ato fü Yakobo da Rayele. Amba Yakobo, mü wu bala ndamü de. Fü Yakobo ayia angbü ake Leya. ²⁴ (Fü Labana ayia ato gara labi ka-ye, jaji würüse, de iri ye Zerifa fü Leya, da ah di ele ta-ngü tete.)

²⁵ Te kpi seke tete, Yakobo ga, ni ceka kpi bane de, gbo! te Leya! Ah de Rayele nda de! Fü maguma Yakobo ayia anzu 'duwa ba-neh-ene-la. Fü ah anü amaka Labana, amala ngü fefe, gü ba dene, "Ye mere de ni de bane neh ene ngü ne? Ye mere mani fü ni bala teka ne? Ni mere ta tima teka wü re de lorozi ne, nda-ni teka Rayele. Ni mere ta tima la teka Leya?" ²⁶ Fü Labana alügü ngü fü Yakobo, gü ba, "Ni ena aza jaji, ato fü komoko, ace gina, ao neh mbi mbi baye baye? Dela gele kani nda de. ²⁷ Ah ba ngü de, te ye le eyi la, de ye ci nga karama ka Leya, te ena anza feke. Angü wüh ena amere karama la teka mere bi sikipi ba e lorozi. Te karama la nza eyi la, fü ni adu aza Rayele, ato kphah fü ye, wara ye tete. Fü ye adu kphah amere gara tima fü ni teka wü re lorozi." ²⁸ Fü Yakobo ale ngü la.

Te karama ka Leya nza tete, fü Labana adu kphah aza Rayele, ato engu fü Yakobo, wara ka tete. ²⁹ (Fü Labana ayia kphah ato gara labi ka-ye, jaji würüse, de iri ye Bila ne, fü Rayele, de ah di ele ta-ngü tete.) ³⁰ Fü Yakobo ayia kphah, angbü ake Rayele. Fü Yakobo ale Rayele nda tine 'duwa, afa Leya ka. Fü Yakobo adu kphah amere tima teka Rayele, teka wü re lorozi.

Dene ngü teka wü di Yakobo

³¹ Fütanga ngü la, fü Yakobo adu aza wü wara ye la, angbü de ewü. Engu ngbü ta ele Rayele efa Leya di ka. Te Me wu, gü ba, Yakobo le ta Leya mbi mbi de ne, fü Me ato wazi fü Leya de ah di ebi ye. Fü Rayele angbü nda-ye bala, ah bi ye nda de. ³² Fü Leya ayia abi gina engu ye, jaji komoko. Fü ah amala ngü, gü ba, "Me wu cinga ni eyi, fü engu ayia ato wazi fü ni, abi ye dene. Angü wati ni ena adu ale ni, teka ye de te ni bi fefe na ne." Fü ah ayia agü iri mbarase la Rübena teka ngü la.

³³ Fütanga gina ye la, fü Leya abi kphah gara ye, jaji komoko. Fü ah amala ngü, gü ba, "Me wu eyi, gü ba, wati ni le ni de, fü engu ayia ato gara ye komoko, fü ni dene."

Fü ah ayia agü iri mbarase la Simiyona, teka ngü la.

³⁴ Fütanga engu la, fü Leya adu kphah abi gara ye komoko. Fü ah amala ngü, gü ba, "Wati ni ena adu tine, ale ni, angü ni bi wü jaji komoko fefe na eyi bata dene." Fü ah agü iri mbarase la *Levi teka ngü la.

³⁵ Fü Leya adu kphah abi gara ye komoko. Ah gü ba, "Ni gbo nga iri Me fa sü, angü engu to gara ye komoko kphah eyi fü ni." Fü ah ayia agü iri mbarase la *Yuda teka ngü la.

30

¹ Baka te Rayele wu, gü ba, ni bi ye de ne, fü engu adu angbü ekspü tiba ye de Leya ne tine efa sü. Fü Rayele ayia amala ngü fü Yakobo, gü ba, "Wati ni deyi, ye to ye eto fü ni. Te ah bala de la, ni ena akpi ka cinga." ² Fü maguma Yakobo ayia anzu eküte Rayele. Engu gü ba, "Ho! Ni ena ato ye fü ye, ne mbi mbi baye baye, te ni di de Me kphah de ne? Ah ka-ye de ngü ka Me, te le, ga, ye mere e abi ye de ne." ³ Rayele gü ba, "Te ah bala, ah le de ye za labi ka-ni, de iri ye Bila ne, te ni ku fü Me ne, Me je eyi. Engu mere ngü, de te ni ngbü enda'ba te-ni di fefe, ne eyi. Fü engu ayia ato ye komoko fü ni ne." Fü ah agü iri mbarase la Dana, teka ngü la.

⁴ Fü Rayele aza labi ka-ye la, ato fü Yakobo würüse tete. Fü Yakobo ayia angbü ake Bila. ⁵ Fü Bila ayia abi ye komoko fü Yakobo. ⁶ Fü Rayele ayia amala ngü, gü ba, "Gba ka-ni, te ni ku fü Me ne, Me je eyi. Engu mere ngü, de te ni ngbü enda'ba te-ni di fefe, ne eyi. Fü engu ayia ato ye komoko fü ni ne." Fü ah agü iri mbarase la Dana, teka ngü la.

⁷ Fütanga gina ngü la, fü Bila adu kphah abi gara ye komoko fü Yakobo. ⁸ Fü Rayele amala ngü, gü ba, "Ni ngbü ta eo siti maguma eküte engu ni ni, teka te ni bi ye de ne. Amba titine labi ka-ni, Bila, bi wü ye kphah eyi, fü ni adi ega ewü fü wati ni." Fü ah ayia agü iri mbarase la Nafatali, teka ngü la.

⁹ Te Leya wu ngü de te Rayele mere la, fü ah afi, gü ba, "Dela züka ngü. Ni ena amere kphah bala, angü ni du bi gara ye nda-ni tine de." Fü engu adu aza labi ka-ye de iri ye Zerifa ne, ato kphah fü wati ye. ¹⁰ Fü Zerifa ayia abi ye komoko fü Yakobo. ¹¹ Fü Leya ayia agü iri mbarase la Gada, baka e te wüh gü ba, "Me ngbü de ra zözö."

¹² Fütanga engu dela, fü labi ka Leya adu kphah abi gara jaji komoko fü Yakobo. ¹³ Leya gü ba, "Ni ngbü de mere tadu emaguma ni. Angü wü bu ni ena amala 'buru, gü ba, ni tine eyi gbü mere tadu." Fü ah agü iri mbarase la Asera, teka ngü la.

¹⁴ Te kpíri zü koro tete, fú gina mbarase ka Leya de írì ye Rübena ne, ayia anü kpa gbü gü. Fú engu anü amaka gara rínga kpala, ah de rínga te di baka cagbürara.* Fú Rübena ayia aza rínga la, akoro di, ato fú ni ye. Te Rayele wu rínga ne tete, fú engu ayia amala ngü fú Leya, gü ba, “Rínga de te Rübena koro di fú ye ne, ye to kpah nda-ni.” ¹⁵ Leya gü ba, “Ape! Ye gbene komoko esaka ni kpah eyi. Watí ni du le ni tìne de, teka ngü ka-ye. Ye le dene kpah agbene rínga ka-ni?” Fú Rayele amala ngü fú Leya, gü ba, “Te ye le eyi teka ato rínga ka-ye la fú ni la, ni ena ale, teka de watí ni nù ra enatikine gbü bití ne, kpaka ye.” Fú Leya ayia aza rínga la, ato fú Rayele.

¹⁶ Etamurago la, fú Yakobo ayia kpa gbü yí ka-ye la, edu kpa ekóti. Fú Leya ayia anü amaka watí ye kpa te kaje la, amala ngü fefe na, gü ba, “Watí ni deyi, enatikine ye ena ago ara gbü nga ni, angü Rayele le kpah eyi bala, angü rínga ka-ni, de te enga ni maka kpa gbü gü ne, ni to kpah eyi fefe.” Fú wü Yakobo ayia adu ake Leya, ayia ara tìne gbü bití la kpakaka na kpala.

¹⁷ Fú Leya ayia aku gba fú Me, de ah to gara ye fú ni. Fú Me ayia aje gba ka Leya. Fú ah ato wazi fefe na. Fú Leya ayia abí kpah gara mbarase, jaji komoko. Fú wü di enga Leya akoro 'buruve, 'buru wü jaji komoko. ¹⁸ Leya gü ba “Ngü te ni mere, ta te ni za labi ka-ni, to fú watí ni ne, reke gbü jia Me eyi. Fú Me ayia ato zúka ngü fú ni ne, teka ngü la.” Fú ah ayia agü írì mbarase ka-ye la Yisakara, teka ngü la.

¹⁹ Fütanga engu dela, fú Leya adu kpah abí gara ye komoko, fú Yakobo. ²⁰ Fú ah amala ngü, gü ba, “Me to zúka takpa eyi fú ni. Akpo enatikine, anü kpa engagira nü, watí ni ena angbü egbo nga írì ni, angü ni bí bí wü jaji komoko fefe na eyi 'buru ma'diya dene.” Fú ah ayia agü írì mbarase ka-ye la Zebulona, teka ngü la.

²¹ Fütanga engu la, fú Leya adu kpah abí gara mbarase, tìne jaji würüse. Fú engu agü írì na Dina.

²² Rayele, mü ngbü ta fí eku gba fú Me, teka de ah to ye fú ni. Fú Me ayia afí nga Rayele, aje gba kaka-na la. Fú Me ayia ato wazi fú Rayele. ²³⁻²⁴ Fú Rayele ayia abí ye komoko. Fú ah amala ngü, gü ba, “Ah de zúka ngü. Me za lümü gbü jia ni eyi. Ni ena aku gba fú Me, de ah to kpah gara jaji komoko fú ni.” Fú ah ayia agü írì mbarase ka-ye la *Yüsefa, teka ngü la.

Dene mani te Yakobo maka mere bi wü nü di esaka Labana

²⁵⁻²⁶ Fütanga ngü te Rayele bí Yüsefa tete, fú Yakobo ayia afí nga ngü, gü ba, “Títìne tima de te ni mere teka wü re nzükpa de füh ye bala, teka wü wara ni de 'basu ne, ah nza eyi. Te di bala, ni le eyi aza ewü, adu de ewü kpa gba ani.” Fú ah ayia amala ngü fú Labana, gü ba, “Wügiri ni deyi, ni yia eyi elügü nga ni, adu agba ani. Ye ce wü wara ni, de wü jaji ka-ni, teka de ni go de ewü agba ani, angü ye wu bü kpo, gü ba, tima, ta te ye to fú ni ne, ni mere nza eyi. Te di bala, lakí tì eyi dene, teka fú ni aza wü wara ni, de wü di ni, ago di agba ani.”

²⁷ Fú Labana alügü ngu fefe, gü ba, “Enga ni, ye mere e ace ni bala de. Timá ka-ye reke fú ni fa sü, angü ngü la, ni gírì cu agírì de kuwa, gü ba, Me to wazi fú ni de bane ne, teka ngü ka-ye. ²⁸ Te di bala ne, ah reke fa sü te ye ena angbü la fí bü sene, da emere tima fú ni. De ye mala ngü mene wü e, te ye ngbü ele de ni to fú ye da tima la.”

²⁹⁻³⁰ Yakobo gü ba, “Ye mala zu ngü! Angü Me to wazi fú ye teka ngü ka-ni fanü. Ye wu kpah bü kpo, gü ba, ni mere tima eyi fú ye reke fa sü. Wü nü ka-ye sibi tìne kpah eyi fa sü, angü ta te ni koro la de ne, wü nü ka-ye sibi bala nda-wü de. Amba títìne dene, ni eyi de mere bí wü jaji esaka ni. Te ni ena angbü fí bü emere tima fú ye kükürü bala la, ni ena ato fú wü jaji ka-ni neh ene e ne?”

³¹ Labana gü ba, “Ah mbi. Te ah bala la, mene e te ye ngbü ele, de ni to fú ye, teka tima la, ah de neh ene?” Yakobo gü ba, “Enga ngü mba ladü, te ni ngbü ele de ye mere fú ni. Te ye mere ngü engu la eyi fú ni la, fú ni adu angbü emere tima, da eceka kpi fütanga wü nü ka-ye, baka e ta te enga gina ne. ³² Ngü te ni ngbü ele de ye mere fú ni ne, ah ba e dene. Te wü nü ka-ye la te ebí wü ye la, de ye di eto gara wü di enga nü ka-ye la fú ni. Te ah di de wü di enga meme la, de ye to mene ewü te ewü ena adi de tere te wü ne. Te ah di de wü kambiliki la, de ye to mene ewü de kúte wü 'buru bíbirí bíbirí ne, teka fú ewü adi 'buru nda-ni. Dela ngü de te ni le de ye mere fú ni, teka tima te ni mere fú ye ne. ³³ Te ani mere bala la, ah ena adi de zúka ngü. Ni tì afti ye gbü ngü la de, angü te ye koro maka mene wü meme te tere di te wü ma, anga engu kambiliki de kúte wü bíbirí de la, ah le de ye wu, gü ba, ni zi ewü eyi azi.” ³⁴ Labana gü ba, “Ah mbi. Ngü la ngbü ba e te ye mala la.”

³⁵ Fú Labana afí nga gara mani. Fú ah ayia kere de woro, anü kpa te sü te wü nü

* **30:14** 30:14 Írì rínga engu de mandraka. Ta gügü, gbü mene wü re la, wü kpara ngbü emala, ga, ah de rü te würüse kóti ena amere, teka fú watí ye na angbü ele engu efa sü. Wü gara wü kpara emala, ga, ah de rínga ka bí ye.

kaka ngbü ezü e tete ne. Fü ah ayia aye süka wü meme ka-ye, akö ewü de tere te wü ne 'buru. Fü ah ayia amere kpah bala teka wü kambiliki, akö ewü de bîbîrî ne kpah 'buru. Fü engu akö wü nü de te engu fe ewü la, ato ewü fü wü di ye, wü jaji komoko. ³⁶ Fü ah amala ngü fü ewü, de wüh nü de wü nü la nengete, angü ni le de wü nü la bi küte ewü de wü bu wü ne tîne de. Angü te wüh bi küte wü la sene la, ah ena adi 'buru nda Yakobo. Fü wü jaji ka Labana ayia akö wü nü la, anü de ewü teka wü sikpi bata, teka de süka ewü ngbü nengete. Fü Yakobo angbü nda-ye fi bü eceka kpi fütanga du wü nü la sela.

³⁷ Te Yakobo wu mani de te Labana mere la, fü engu ayia afi nga gara mani, te fa nda Labana la ka. Fü ah ayia anü kpa gbü gü, ade wü yi rü. Fü engu aza wü rü la, asoko ko ewü asidi, ace wü gara, de ah ngbü la 'bu la 'bu, teka de wü nü la di eceka. ³⁸ Fü Yakobo ayia akö wü rü la, anü de ewü, ao mari, ede sü te wü meme ka Labana ngbü ekoro enzö ngu tete na, angü wü meme la ngbü elüwa sela. ³⁹ Angü, te wüh ngbü elüwa bala, da eceka tere wü rü la, wüh ena angbü ebî wü ye ka-wü 'buru de tere te wü baka e la. ⁴⁰ Fü Yakobo adu akö wü kambiliki ka-ye, ao ewü mari ede meme ka Labana, te ewü di 'buru nde bîbîrî ne, teka wü kambiliki la di ebî wü di enga wü kpah 'buru bîbîrî. Fü Yakobo adu amaka mere bi wü meme, de wü kambiliki, teka ngü la. Fü engu akö wü nü ka-ye la, ao kpi kpi ye, teka wüh ena angbü endoro de nda Labana.

⁴¹ Fü Yakobo angbü emere ngü la kpah fi bü bala. Te Yakobo wu mene wü meme, te ewü zege azege la, fü engu adi eza wü rü de tere te wü la, eo kpa ede ngu la, teka de wü meme la di ewu. ⁴² Te ah de mene wü meme, te kürü akürü la, ah o wü rü la kpala nda de. Tekan ngü la, fü wü di enga meme, te ewü di kpekpeke, de wazi ewü ne, angbü 'buru nda Yakobo. Amba mene ewü te wazi ewü di ma ne, 'buru nda Labana. ⁴³ Tekan ngü la, fü wü nü ka Yakobo azu, afa tîne cu sü. Fü Yakobo akoro tîne kpeke kpara, de mere bi wü e esaka ye. Wü e la, ah de wü kambiliki, wü meme, kpah de wü gara wü e, ba wü kamele, wü dongi, abe kpah te wü labi.

31

Dene ngü teka Yakobo ake Labana

¹⁻² Fütanga ngü la, fü *Yakobo ayia awu kpo, gü ba, ngü ka-ni du reke gbü jia wü giri ni, Labana ne, baka ta te enga gina ne, nda tîne de. Fü Yakobo adu kpah aje ngü te wü jaji ka Labana ngbü emala, gü

ba, "Wü mere bi wü nü, de wü e 'buru te di esaka Yakobo ne, ah 'buru de wü e ka wü ani. Angü wü ani du ce wü e la esaka Yakobo bala, neh teka ne? Ani wu eyi, gü ba, Yakobo ngbü fi bü efiti wü ani, da ekö wü e kaka la."

³ Baka te Yakobo ngbü efi nga ngü la bala, fü Me ayia akoro amala ngü fü Yakobo, gbü roto, gü ba "De-mü Yakobo, ma ele de mü yia eyia, tîtine, mü lügü nga mü, mü du kpa gba wü mü, agbü tö ka wü *Kanana. Ma ena adi ake mü."

⁴ Te ngü la mere te-ye bala, fü Yakobo ayia ai wü wara ye de 'basu ne, Rayele ake Leya, de wüh koro kpaka ni, gbü sü te ni ngbü eceka kpi fütanga wü nü ka-ni tete na. ⁵ Fü ah amala ngü fü wü wara ye la, gü ba, "Ma wu eyi, gü ba, wö yi le ra, ba e ta te enga gina ne, nda tîne de. Te di eyi bala ne, ah ba ngü kpah de, angü Me, te di de *vüngüte ka wü wüba ne, ladü. Engu ngbü ele ta-ngü te ra ne me-ye. ⁶ Yi wu kpah kpo, gü ba, tima de te ma ngbü emere fü wü yi ne, ma ngbü emere cu de wazi ra 'buru. ⁷ Fü wö yi angbü emere mani de ra, adu angbü emala ngü fere 'basu 'basu bala? Fü ah angbü kpah efüfü ngü ka wü e, de te engu mala nganga, gü ba, 'Ni ena ato fere ne,' fi bü afüfü. Ngü ma! Me ka-ye ladü! Amba züka ngü te Me tiri engu, ah mere siti ngü de ra de. ⁸ Angü wö yi mala eyi, gü ba dene, 'Ni ena ato mene wü di enga wü meme de tere wü ne, 'buru fere.' Fü Me ato wazi fü wü meme, fü ewü angbü ebî wü di enga wü kpah 'buru de tere te wü. Te wö yi wu bala, fü ah adu afü ngü la, gü ba, 'Ni ena adi eto fere mene wü di enga meme de küte ewü lambe lambe.' Baka te engu fü ngü la bala, fü wü meme adu angbü ebî wü di enga wü kpah 'buru de küte ewü lambe lambe. ⁹ Dela si-ngü te Me za mere bi wü meme ka wö yi la, to ewü 'buru fere ne.

¹⁰ Ta gbü gara biti, gbü lakî te wü meme ngbü elüwa tete, fü ra ayia aroto roto. Fü ra awu wü meme, te ewü ngbü elüwa. Wü moko meme la, wüh 'buru ewü de tere te wü. ¹¹ Fü Me amala ngü fere gbü roto la, gü ba, ¹² 'Ma ceka eceka! Wü moko meme 'buru, de te ewü ngbü elüwa la, wüh ka-wü 'buru de tere te wü. Wü mene la ena azu wü di enga wü kpah 'buru de tere te wü. Dela ngü te ni, Me, mere me-ni. Kükürü de, angü ni wu mani de te Labana ngbü emere de ra la eyi.'

¹³ Gbü roto la, fü Me amala kpah gara ngü fere, gü ba, 'De-ra Yakobo, ni de Me, ta te ni sere te-ni fere agbü Betele, gbü sü te ma za teme, fü ra afa *cangali, fü ra adu kpah akina kina fü ni, Me, gü ba, "Ma ena adi ecu ngü ni, Me, fi mere badi." Te di bala, ah le de ma yia eyia, de ma ce gba

Labana, fū ra adu agbū sū ka-a, kpa gbū Kanana.' Me mala ta ngü fere gbū roto la bala."

Dela ngü ta te Yakobo mala fū wū wara ye, teka wū roto ka-ye la.

¹⁴ Fū wū Rayele ake Leya ayia alügü ngü, gü ba, "Ah mbi, dela ka-ye zūka ngü. Ani go ka-ani ego agbū Kanana. Tekā ne de, angü gara e-nga-kpa kpala, te wō ani ena ato fū ani nda ma. ¹⁵ Ani ka-ani gbū jia wō ni tīne eyi ba ganzi kpara la. Ah se ani ka-ye nda eyi asidi, kō jiase ka-ye, zūfa nza eyi 'buru. ¹⁶ Mere bi wū nū, bete wū mene wū e, te Me za esaka wō ani, to fū ye ne, wū e la tīne kpah eyi 'buru nda-ani, de wū di engā ani. Te di bala, ani yia eyia, de ani go agbū Kanana, ba e te Me mala fū ye la."

¹⁷⁻¹⁸ De te Yakobo je ngü la bala, fū engu ayia kürrrü, angbū ereke te-ye gbū zi. Fū ah ayia abiti wū e ka-ye 'buru, te engu ena ago di agbū Kanana ne. Fū ah adu kpah, abiti wū yiti, de wū kambiliki ka-ye, te engu maka de sela ne, atima ewü 'buru kpa engagira nū. Fū ah ao wū wara ye, de wū di ye 'buru fūh wū kamele, de wūh nū di.

¹⁹⁻²⁰ Wū Yakobo ngbū reke te-wū 'buru esalakumu, angü Labana ena atiri ani. Fū ewü angbū eci nga sikpi te Labana ena anü tete agbū gü, awete kala wū kambiliki ka-ye. Te Labana nū sū tete kpala, fū wū Yakobo ayia akpe ka-wū sidi nganga na la. Fū Rayele ayia kpah amere mani, azi faranda ka wō ye, te wūh mī gbū se ne, akpe di mini. Wū Yakobo de wū wara ye fiti ta Labana baka e dela. ²¹ Fū ewü ayia akolo sū, anü akō ngu de iri ye Efürata ne. Fū ewü anü akoro kpa gbū gara sū, te di kpa eze da, to angā Gilada. Fū ewü ayia ade gugu, angbū sela.

²² Fütanga sikpi 'basu, fū Labana adu aje nga wū Yakobo, gü ba, "Wūh kpe eyi!" ²³ Fū Labana ayia akō wū di engā ni ye, anü afa nga wū Yakobo. Fū ewü afa nga Yakobo baaala, fū ewü anü amaka ewü gbū sikpi lorozi. ²⁴ Amba Me mala ta ngü fū Labana gbū roto, gbū bitī engu de te kpi seke la, gü ba, "Labana deyi, te ye fa nga Yakobo, maka eyi la, ye mere e awü nga ake di de, angü engu de vüngüte ka-ni. Te ye mere engu esiti la, ye ena awu ngü."

²⁵ Baka te wū Labana nū maka wū Yakobo tete agbū Gilada, fū ewü anü ade nda-wū gugu kpah mba gbmari ede nda wū Yakobo sela.

²⁶ Te wū Labana maka wū Yakobo tete, fū ah ayia amala ngü fū Yakobo, gü ba, "Ye mere mani de ni bala, neh kü teka ne? Ye kö wū di ni, kpe de ewü bü baka

wū kpara, te wūh zoro ewü gbū gü, neh teka ne? Dela ngbürü zu ngü fanü fanü na? ²⁷ Ye ce ta emala nga ye fū ni de, neh teka ne? Wū zi te-wū bü zirri, akpe, anü sū, neh teka ne? Te ni ena awu ta kpo, gü ba, wū yia eyi, ego ago la, de bane ni ena amere mere siti karama, fū wū kpara, teka fū wū ago gbū zūka ngü. ²⁸ Ye ceka la, baka te wū yia kpe ka-wū bü bala, ni sū de, gba ngüsü emaguma wū kundū ni, de wū di ni ne. De bala ne töndö ngü ne? ²⁹ Te ni ena aroto ta gbū bitī ne de la, de bane ni ena amere ye ta 'duwa asiti, teka ngü ka-ye la. Amba Me, te di de *vüngüte ka wō ye ne, koro, mala ngü fū ni, gü ba, 'Te ni maka ye la, ni mere e awü nga ake ye de.' ³⁰ Ah mbi! Baka te ye yia ka-ye nda eyi, edu kpa gba wū wō ye, teka gümü ewü ne, angā si-ngü de te ye zi faranda ka-ni tīne tete ne, ah de neh ene ya?"

³¹ Fū Yakobo ayia alügü ngü fefe na, gü ba, "Ngü te ni ce da emala ngü ni fū ye tete ne, kükürü de, angü ni kpe cürü, gü ba, ye ena aza wū di ye, atiri ewü de wazi. Dela si-ngü de te ni mala nga ani tete na fū ye de ne. ³² Amba teka faranda ka-ye la, de-ni Yakobo, ni zi faranda ka-ye nda-ni de. Te wūh maka faranda ka-ye la ngbürü eyi esaka biri kpara esūka wū kpara ka-ni sene la, de wūh za kpara la, wūh mörö engu asidi. Te di bala ne, ye giri kpi egiri kpo kpo kpo kpah gbū jia wū kpara ka-ye la, gbū wū gugu ka-ani ne biri biri 'buru. Mene e te ye ena amaka, te di de e ka-ye la, de ye za 'duwa aza, ye koro di gbū jia wū di engā ni ani, de te ye koro de ewü ne." Amba Yakobo, mü wu ta, gü ba, Rayele zi faranda la me-ye ne, nda-mü de.

³³ Fū Labana ayia akpo angbū egiri faranda ka-ye ne. Fū ah ari kpa gbū gugu ka Yakobo, agiri kpi kpala ma. Fū ah adu kpah, ari agiri kpi gbū gugu ka Leya, de nda wū labi 'basu ne, wū Bila ake Zerifa kpah bi ma. Ah maka faranda ka-ye nda kpah de. Fū ah anü kpah agiri agbū gugu ka Rayele. ³⁴⁻³⁵ Amba Rayele za ta faranda engu la, wo ka-ye esa gara mere bongo.* Fū ah ayia angbū ka-ye gaa fefeh na, da eci nga wō ye. Te wō ye na ri kpa gbū nganga na la, fū engu ayia agü mandī fū wō ye ciki da ye. Fū ah amala ngü fū wō ye, gü ba, "Wō ni deyi, maguma ye mere e anzu eküte ni de. Si-ngü te ni yia tikpi, agu mandī fū ye de ne, angü ni ngbū ei ku." Fū Labana agiri kpi sela, ayiri ayiri, ah maka faranda ka-ye nda kpah de.

³⁶ Fū maguma Yakobo ayia anzu eküte Labana. Fū ah akpo angbū ewü nga ake di, gü ba, "Angü de bala neh ene ngü ne?"

* 31:34-35 31:34-35 Dene bongo te ewü ngbū ei fūh gü kamele.

Mene *siti ngü de te ni mere fü ye ne, ah mbi mbi de ne ngü ne? Te ye fa nga ani, koro di zalü de kpakine, ba e te ani di tñe wü müürü zi ne? ³⁷ Baka te ye giri kpi gbü wü e ka-ani sene 'buru ne, ye maka biri e ka-ye eyi gbügbü na? Te ye maka e engu eyi la, de ye za eza, ye koro di, ye o engagira wü di engu ni ye, de wü nda-ni wü kpara sene, teka de wüh ye süka ngü de esüka ani ne kere. ³⁸⁻³⁹ De-ni Yakobo, ni mere ta tima fü ye, mbü di ambü teka wü re teke biri. Fü wü nü ka-ye ayia ta asibi afa sü ne, 'buru teka ngü ka-ni. Wü tima ta te ye to fü ni, teka wü nü ka-ye ne, ni mere eyi 'buru mbi. Siti ngü te ni mere gbü tima la, ah de neh ene? Ni mörö ta süka gara wü nü ka-ye, zü eyi? Baka te siti wü nü ngbü ta ezoro süka wü nü ka-ye ne, ni ngbü ta eza nda-ni nü, eo dada na. Te müürü zi koro, zi süka wü nü ka-ye la, fü ni adi kpah eza nda-ni eo dada na. Ni mere ta dela siti ngü? ⁴⁰ Ni mbü ta ka tima ka-ye la cu fa sü! Ra ngbü ta ecucuru ni, fü zü angbü kpah emere ni gbü biti! Ra gbü jia ni gbü biti kpah ma, teka tima la! ⁴¹ Bi wü re ta te ni mere gba ye, baka wü re teke biri ne (20), fi bü gbü wü cinga bala! Ni mere ta tima fü ye, teka wü wara ni de 'basu la, teka wü re nzükpa de füh ye bala (14). Fütanga ngü la, fü ni adu kpah amere tima fü ye, teka ngü ka wü nü, teka wü re ma'diya. Fü ye angbü ta kpah fi bü da efiti ni, enda nganga, da efüfü ri ye fü ni 'basu 'basu. ⁴² Amba gbü mere bi wü ngü la 'buru, Me ngbü ta fi bü ake ni, angü engu de *vüngüte ka-ni, kpah baka wü wö ni, Abarayama ake Yisaka ne. Te Me ena di ta ake ni de la, de bane ye liki ni eyi gügü, de kpa ni kükürü. Me wu cinga de te ye to ta eküte ni ne eyi 'buru nde. Engu wu züka tima, ta te ni mere fü ye, ne kpah eyi. Dela si-ngü de te Me koro kpaka ye tete esikine gbü biti, gbü roto, amala ngü fü ye kpekpeke ne."

⁴³ Fü Labana ayia alügü ngü fü Yakobo, gü ba, "Enga ni, ani mere e awü nga de, angü ni ena amere tñe dene neh baye ya? Angü wü jaji würüse 'basu, de esaka ye la 'buru wü di ni, abe kpah te wü jaji, de te ewü bi ewü fü ye la, wüh kpah 'buru de wü kundu ni ne. Wü nü bete wü gara wü e de esaka ye la, ka-wü kpah 'buru wü e ka-ni. Gara ngü te ni ena amere nda ma! Angü wazi ni, te ni ena aza wü e la, adu di kpah ma! ⁴⁴ Te di bala, ah le de ani mörö kambiliki emörö esüka ani, fü ani azü ake ye, teka areke ngü de ezezgba ani ne di. Ani za kpah mere teme de ani rükü, o, de ah gü tamu kina de esüka ani ne fü

wü kpara."

⁴⁵ Fü Yakobo ayia ale ngü engu la. Fü ah aza mere nghürükü teme, arükü, ao, teka de ani di efi nga ngü, de te ani reke esüka ani la tete. ⁴⁶ Fü ah adu amala ngü fü wü kpara ka-ye, de wüh biti wü teme, wüh fa, wüh o gbü sü biringbö nzüüü. Fü ewü angbü ezü e de wü kpara ka Labana la, ede wü teme bala la. ⁴⁷ Fü Yakobo ayia agü iri mere teme, te wüh rükü la, gü ba, Galede.† Fü Labana ayia agü iri wü teme te wüh fa biti la, Yegara-Saduta,‡ ⁴⁸ gü ba, "Mere bi teme te ani fa ne, ena agü tamu ngü fü wü kpara, gü ba, ani reke ngü ezezgba ani eyi." ⁴⁹⁻⁵⁰ Fü Labana amala gara ngü fü Yakobo, gü ba dene, "Me ladü, te ena adi ewu mene wü ngü de te ye ena angbü emere eta kuru jia ni ne. Te ye ngbü emere wü di ni la esiti, anga te ye nü za kpah gara wü würüse ka-ye la, ye wu, gü ba, Me ladü te ngbü eceka ye de wü ngü la." Fü ah adu kpah, agü iri sü la Mizipa, teka ngü la.

⁵¹ Fü Labana adu kpah amala gara ngü fü Yakobo, gü ba, "Dene ngü te ani ena areke ezezgba ani enatikine. Angü wü teme te wüh fa ewü dene ne, bete mere teme, te wüh rükü o dene, ⁵² wüh ena aye zengba tö ka-mü ake nda-ra, fi mere badi. Mü ti aguru sü, anü ati de gü gbü nzö ra, gbü nda-ra sü de. Ma ti kpah aguru sü, anü ati de gü gbü nzö mü, gbü nda-mü sü de. ⁵³ Me ladü, ah ena aceka ngü ka-ani la me-ye. Angü engu de vüngüte ka wü wö nih, wü Abarayama ake Nayora." Fü Yakobo ayia akina kina kpah baka e la, te iri Me te di de vüngüte ka wö ye na, Yisaka ne.

⁵⁴ Fü Yakobo ayia aza nü, awa amörö fü Me. Fü engu ayia ai wü kpara ka-ye. Fü ewü ayia akoro azü e la de wü kpara ka Labana gbü sü la. Fü ewü ara sela zalü akoro kpurutokokpi.

⁵⁵ Gügü kpurutokokpi la, fü Labana ayia afaka wü Leya ake Rayele, de wü kundu ye, ayia asü ngüsü emagama ewü 'buru. Fü ah ayia alügü nga ye, adu kpa gba ye.

32

Dene ngü teka Yakobo ake Me

¹ Fütanga wü ngü la, fü wü *Yakobo ayia de wü kpara ka-ye, ati te kaje, edu agbü *Kanana. Fütanga bi sikipi, fü ewü anü akoro agbü tö ka wü Kanana. Fü ewü akoro ede gara ngu kpala. Fü ewü ayia ade gugu ka-wü, angbü sela. Yakobo gü ba, ni ceka kpi bane de, gbangbara! te mere bi wü *malayika ka Me, te ewü di ka-wü

† 31:47 31:47 Galede, gbü mö ka wü Yakobo, ah ba e te wüh gü ba, "Teme te gü tamu ngü fü wü kpara." ‡ 31:47 31:47 Yegara-Saduta, gbü mö ka wü Labana, ah baka e te wüh gü ba, "Teme te gü tamu ngü fü wü kpara."

kpah sela. ² Te Yakobo wu wü malayika la, fü ah angbü de mere tadu, gü ba, "Me tima wü malayika ka-ye la, teka ale ta-ngü te ani." Fü ah ayia agü iri sü engu la Manayima,* teka ngü ka wü malayika la.

³ Fw wü Yakobo ayia angbü la mba takü gbü Manayima sela. Fw Yakobo ayia afi nga engu ni ye, Esawu, de tane, ta te sü gü, teka mani, ta te ni mere fefe. Fw engu ayia atima süka wü kpara ka-ye kpa engagira nü, kpara Esawu, ede da de iri ye Seyira, gbü tö ka Edomo ne, ⁴ gü ba dene, "Te wü nü maka Esawu la, de wü mala fefe, gü ba, 'Mere kpara deyü, de-ni Yakobo, engu ni ye, ni tima ngü fü ye me-ni. Mere bi wü re te nye sü ne, ni ngbü ta la fi kpa gba loko ani, Labana. ⁵ Titine ni du koro eyi dene, de mere bi wü kpara, bete wü nü fütanga ni. Ni tima ngü ne fü ye, teka de ye ce wü *siti ngü, ta te ni mere fü ye ne, 'buru asidi. Fw ye aza ni ba engu ni ye.' "

⁶ Fw wü kpara ka Yakobo ayia anü amaka Esawu. Fw ewü atü te ngari Yakobo la, amala 'buru fefe. Fw ewü adu amala ngü la 'buru fü Yakobo, gü ba, "Ani nü maka Esawu eyi. Fw ani amala ngü la 'buru fefe. Te engu je ngü la, fü ah ayia angbü ereke te-ye teka akoro kpakine. Engu kpala eyi te kaje enü kpaka ye, de mere bi wü komoko gbü nga ye, baka e kama bala (400)." ⁷ Te Yakobo je ngü la tete bala, fü mamaguma ayia agürü. Fw ah aza wü kpara de gbü nga ye ne, kpah de wü nü 'buru, aye süka ewü 'basu, aza gara ewü, atima kpa engagira nü, aza gara ewü, ao kpa sidi. ⁸ Ah ngbü efi, gü ba, te Esawu koro teka amörö ani la, de engu mörö gara ewü, de gara ewü la küwa.

⁹ Fw Yakobo ayia aku gba fü Me, gü ba "Wayi bala Me, mü de *vüngüte ka wü wüba, Abarayama ake Yisaka. Mü je gba ka-ra. Mere kpara, mü je gba ka-ra, angü mü mala ta cu me-mü, teka de ma ce gba Labana, ma du kpa gbü tö te wüh bi ra gbügbü, kpaka wü mürü ra. Fw mü amala kpah, gü ba, 'Ni ena angbü fi tundu ake ra,' ne. ¹⁰ Te di bala, Me, ma de siti kpara. Ma ti ta amaka züka ngü, baka te mü mere fere, ato mere bi wü e enatikine fere, ne de. Kükürü de, angü baka ta te ma koro kö Yürüdene ne, e ta te di esaka ra bü duu ngbangba te ma ngbü endoro di. Titine dene, ma ngbü tine eyi edu de mere bi wü kpara, abe kpah te wü nü, fütanga ra, baka e te ma ye süka ewü eyi de 'basu ne. ¹¹ Ako Me, ma koro engagira mü dene, ayi-ta mü, teka de mü le-ta ngü te ra, de ma küwa esaka engu wüna. Cücürü na ngbü eyi emere ra amere, angü engu ena akoro,

amörö a anza, de wü jaji, de wü ni ewü 'buru. ¹² Wayi, Me, mü tata engu eküte ra atata. Mü fi la nga kina, ta te mü kina tungü ra, gü ba, 'Ni ena angbü fi ake ra ne, fü ni ato wazi fere, teka de wü kundu ra bi wü ye, sibi asibi baka zu-tö, te ewü ti atanga de,' ne." Dela ta gba te Yakobo ku fü Me, kpa gbü Manayima kpala, teka cürü engu ni ye.

¹³ Fw Yakobo ayia ara ciki era ngu sela. Fw ah ayia afi nga gara ngü, gü ba, ah le de ni fe mba gara wü nü ka-ni, teka atima ewü engagira nü fü Esawu, baka takpa fefe na. Wü nü ta te engu tima ewü ne, wüh bane. ¹⁴ Wü ca meme kama 'basu (200), wü moko meme teke biri, wü ca kambiliki kama 'basu (200), wü moko kambiliki teke biri, ¹⁵ wü yi kamele, bete wü di engu wü teke biri de füh ye nzükpa, wü ca yiti teke 'basu, wü moko yiti nzükpa, wü ca dongi teke biri, wü moko dongi nzükpa. ¹⁶ Fw Yakobo adu aza wü nü la, aye süka ewü, te nga nguwa wü nü la. Fw ah aza wü labi ka-ye, ao gbü nguwa wü nü la biri biri 'buru, atima ewü kpa engagira nü. Fw ah amala ngü fü wü labi la, de wüh di enü biri biri de zengba wü. Wüh mere e anü 'buru te sü biringbö de.

¹⁷ Fw Yakobo adu amala gara ngü fü mene labi, te ti engagira nü de gina wü nü la, gü ba, "Te Esawu maka ye, fü ah ayi-ta ye, gü ba, 'Ye neh de kpara ka da? Ye ngbü enü neh kaye? Mürü mere bi wü nü ne, neh da?' la, ¹⁸ de ye lügü ngü fefe na, gü ba dene, 'Mere kpara deyü, ni de labi ka Yakobo, engu ni ye. Wü mere bi wü nü ne 'buru kaka, te engu tima ewü fü ye. Ah to ewü eyi fü ye ba takpa, angü ye de mere engu ni ni. Amba Yakobo engu ladü kpa sidi kpala ekoro.'" ¹⁹ Fw Yakobo amala ngü la fü wü labi la, te nga wü biri biri kpah 'buru bala, gü ba, "Dela ngü te wü ena amala fefe na, te wü maka tewü la. ²⁰ Wü mala ngü fefe, gü ba, 'De-ni, Yakobo, labi ka-ye, ni ladü sidi kpala ekoro.'" Yakobo to ta mere bi wü züka wü e de bala, teka de sü reke mba eküte Esawu, de engu boro wü siti ngü, ta te ni mere engu di ne. ²¹ Te Yakobo tima mere bi wü nü la tete bala fü Esawu, fü Yakobo ayia ara ka-ye ciki kpa gbü Manayima sela.

²² Fw Yakobo ayia gbü biti la, aza wü wara ye de bala ne, bete wü di ye de nzükpa de füh ye biri ne, atima ewü kpa eta ngu.† ²³ Fw ah adu kpah aza wü gara e ka-ye 'buru, atima kpa eta ngu. ²⁴ Fw Yakobo ace te-ye, angbü nda-ye ciki sela kpikpi ye, ah kö ngu nda de.

* 32:2 32:2 Manayima ba e te ewü gü ba, wü da-sü ka wü kpara te ewü biti te-wü, angbü ka-wü sela. † 32:22 32:22 İri ngu la de Yaboka.

Te Yakobo ngbü ta tete kpala, fü gara komoko ayia akoro, atí te Yakobo, akama de gü. Fú ewü akama te-wü, da efüfü te-wü fi bü bala, zalü te kpí kpo ngbü esekte tete. ²⁵ Te komoko la wu tete, gü ba, ni tí agbo Yakobo kötö nda-ni de ne, fü engu ayia amí nzö-ku Yakobo kpööö, afu ka! ²⁶ Fú Yakobo azoro komoko la kphah fi, gö gö gö! Fú komoko la amala ngü fü Yakobo, gü ba, "Ye ce kpa te ni! Kpí seke eyi!" Yakobo gü ba, "Te ye le de ni ce kpa te ye la, de ye sü ngüsü emaguma ni. Ni tí ace kpa te ye de. 'Duwa te ye ena asü ngüsü ye emaguma ni feke, fü ni adu ace kpa te ye, fü ye anü.'" ²⁷ Komoko la gü ba, "Írri ye neh da?" Yakobo gü ba, "Írri ni de Yakobo." ²⁸ Komoko la gü ba, "Ni fü írri ye tîne eyi, *Yisaraye. Kükürü de, angü ye de kpeke kpara, ye mere wü kpara füh kotö ne, fa eyi. Ye mere ni, Me, fa kphah eyi!" ²⁹ Yakobo gü ba, "Mere kpara deyi, ye gü la kphah nda-ye írri ye fü ni." Fú komoko la amala ngü, gü ba, "Ye le aje írri ni neh teka ne? Ni tí agü írri ni fü ye nda-ni de, angü wü kpara tí aje írri ni nda-wü de." Fú kpara la adu tîne, asü ngüsü emaguma Yakobo. Fú ah ayia anü sü ka-ye. ³⁰ Fú Yakobo adu awu, gü ba, amba kpara te ani kama te-ani ake di ne, ah ka-ye de Me. Fú ah ayia agü írri sü la tîne Penuwele, angü ni wu Me eyi de cu jia ni, amba ni kpí nda-ni de. ³¹ Fú kpí ayia aseke. Fú Yakobo ayia ace Penuwele sela, anü sü. Ah ngbü enü tîne jigbi jigbi, teka nzö-ku ye te fu la.

³² Dela si-ngü gbü gele ka wü di engu Yisaraye, te ewü le azü nzö-ku de gbü ku nü di de ne, angü komoko la mi ta nzö-ku Yakobo.

33

Dene ngü te Yakobo ake Esawu reke zengba wü di

¹ Kpurutokokpi la, fü *Yakobo ayia akö ngu, anü amaka wü wara ye, de wü di ye kpa eta ngu kpala. Fú ewü ale kaje, angbü enü tîne gbü sü biringbö. Fú Yakobo aceka kpí bane de, gbangbara! te wü Esawu, te ewü ngbü ekoro, de mere bi wü komoko fütanga ye, baka e kama bala (400). Te engu wu bala, fü cürü akpo angbü emere engu. Fú ah amala ngü fü wü di ye, de wüh ngbü la de wü ni ewü sela feke. ² Fú ah adu amala ngü fü wü Bila ake Zerifa, de wü di engu wü, de wüh tí nda-wü fütanga ni. De Leya tí nda-ye, de wü di engu ye fütanga ewü. Fú wü Rayele adu atí nda-ye duu sidi ake *Yüsefa. ³ Fú Yakobo atí nda-ye engagira nü, fü ewü anü maka te-wü ake Esawu. Fú Yakobo ayia atí abuka gbüra ye kötö du lorozi, da efüwa te-ye fü Esawu 'duwa ba-neh-ene-la.

⁴ Fú Esawu ayia amü de mere woro, akpe atí te engu ni ye, afaka, akpo angbü eku gba eküküte. Fú Yakobo ayia kphah de gba. ⁵ Fú Esawu aceka kpí, awu wü würüse, de wü jaji. Fú ah adu ayi-ta Yakobo, gü ba dene, "Mere bi wü kpara, te ewü ngbü efa nga ye, wü würüse de wü jaji ne, wüh de wü da?" Yakobo gü ba, "Mere kpara deyi, dela wü wara ni, bete wü jaji ka-ni, te Me to fü ni." ⁶ Fú wü Bila ake Zerifa ayia akoro, de wü jaji ka-wü, agü mandí fü Esawu, kphah da efüwa te-wü fefe na. ⁷ Fú wü Leya akoro kphah de nda-ye wü di engu ye, amere kphah bala. Fú wü Rayele adu akoro nda-ye ake Yüsefa tîne sidi, amere kphah bala.

⁸ Fú Esawu ayi-ta Yakobo, gü ba dene, "Enga ni ni deyi, ani maka te-ani te kaje de wü kpara, de mere bi wü nü esaka wü. Ngü engu la neh baye?" Fú Yakobo alügü ngü fefe, gü ba, "Ni tima wü nü la kü me-ni fü ye ba takpa, teka de maguma ye gu eküte ni, teka fü ye adu ale ni." ⁹ Esawu gü ba, "Enga ni ni deyi, ni tí aza wü nü la de, angü mere bi wü nü kphah ladü esaka ni. Wü nda-ani la ti eyi. Wü nda-ye la ngbü fü ye." ¹⁰ Fú Yakobo adu kphah anda'ba te-ye fefe, gü ba, "Mere kpara, te ye le ni eyi la, de ye za mba takpa la eza. Baka te ni wu ye enatikine ne, ni ngbü eyi de mere siti tadu emaguma ni, baka e te ni wu Me la. Tekane de, angü ni wu kpo, gü ba, ye le ni eyi de maguma ye 'buru. ¹¹ Te di bala ne, ni ngbü enda'ba te-ni fü ye, de ye za mba wü nü, de te ni to fü ye la, angü Me le tangü te ni de wü e la me-ye." Fú Yakobo angbü eso Esawu kphah fi bü bala, zalü fü Esawu ayia ale ngü ka wü nü la.

¹² Fú Esawu amala ngü fü engu ni ye, gü ba, "Te ah bala la, de ani nü enü kpa eköti. Angü ni ena agü nga wü." ¹³⁻¹⁴ Fú Yakobo alügü ngü fefe, gü ba, "Mere kpara deyi, ah mbi. Amba ye nü nda-ye enü kpa engagira nü. Ani ena afa nga ye ferrre, angü wazi wü jürü wü jaji, de wü di engu nü ne, tí te ewü ena anü kere kere de. Te di bala, ani ena anü nda-ani ferrre, angü wü nü ena akpi. Ni ena afa nga ye zalü akoro di agba ye, agbü Seyira la." ¹⁵ Esawu gü ba dene, "Te ah bala la, ni ce gara wü komoko ka-ani fü ye, de wü nü de ewü." Fú Yakobo alügü ngü fefe na, gü ba, "Ye nü enü de wü komoko ka-ye la 'buru engagira nü, angü gara e te ena emere ani nda ma. Ani ena afa nga wü."

¹⁶ Fú Esawu ayia ale ngü la. Fú ah ayia anü sü kphah 'duwa gbü ra engu la, edu agbü Seyira.

¹⁷ Fú Yakobo adu ayia nda-ye, de wü wara ye, de wü jaji ka-ye sidi. Fú ewü anü akoro kpa gbü gara sü kpala, te wüh ngbü eí, gü ba, Sukota. Fú ah ayia ade

wü gugu, angbü ka-ye takü gbü sü la.* Fü ewü angbü sela mba cükü'daye. ¹⁸⁻²⁰ FÜ ewü ayia ace Sukota, akö Yürüdene kpa eta ngu, anü akoro gbü gara 'baranga de iri ye Sekeme, te di gbü tö ka wü *Kanana kpala. FÜ ah ayia ao köti to kpa gbü gü, kpa ede 'baranga la. FÜ sü la areke te Yakobo 'duwa ba-neh-ene-la. FÜ ah ayia anü kpaka wü di enga Amüra, wü kpapa ka Sekeme, ase sü la esaka ewü de mere bi jiase. FÜ Yakobo ayia areke sü sela, teka angbü egbo nga iri Mere Me gbügbü na. FÜ ah ayia agü iri sü la Ele-Loyi-Yisarayeale, baka e te wüh gü ba, Me de *vüngüte ka wü *Yisarayeale.

Dela ngü ta te wü Yakobo yia ce Pada-narama, ayia ago angbü ka-wü gbü tö ka-wü, agbü Kanana ne.

34

Dene ngü teka Dina, mbarase ka Yakobo

¹ FÜ wü *Yakobo ayia angbü gbü Sekeme sela, teka mere bi wü re. FÜ wü jaji kaka ayia agegere sela.

Gbü gara silkpä, fü ye Yakobo, jaji würüse de iri ye Dina ne, ayia anü aceka wü bu ye jaji würüse gbü sü la, wü egba Sekeme. ² Gara engä Sekeme ta la kpala, jaji komoko de iri ye kpah Sekeme, te di ta ye miri ka sü de sela, gbü nguwa wü Ivo. FÜ Sekeme ayia awu Dina. FÜ Dina ayia asu gbü jijja na efa sü. FÜ engu ayia atü te Dina, agbene engu, angbü ake di de wazi. ³ FÜ gümü Dina adu angbü emere engu tñe 'duwa ba-neh-ene-la. FÜ ah ayia afti Dina. FÜ Dina ago angbü agba ka na kpala, angü ah ale Dina cu fa sü.

⁴⁻⁵ FÜ Yakobo ayia aje, gü ba, Sekeme gbene ye ni, Dina ne eyi. FÜ engu ayia anga ka-ye tñi, ah mala ngü 'duwa kpo de. Angü engu ngbü ta eci ngeka wü di ye, te ewü ngbü ta endoro, eceka kpi fütanga wü kambiliki agbü gü ne.

FÜ Sekeme ayia anü kpaka wö ye, te di de miri ka sü la, amala ngü fefe na, gü ba, "Wö ni deyi, jaji würüse de iri ye Dina ne su gbü jia ni fa sü. Ni ngbü ele de ye nü kpaka wö ye na, ayi-tata fü ni, teka de ni se engu." ⁶ FÜ wö ye Sekeme ayia anü akoro kpaka Yakobo, teka ayi-ta Dina fü ye ye. ⁷ Te wüh ngbü emala ngü engu la tete, fü wü di Yakobo ayia adu akoro amaka ewü. FÜ ewü ayia aje, gü ba, angü Sekeme gbene engu ni ani, Dina, eyi. FÜ ngü la ayia ake te ewü 'duwa ba-neh-ene-la. FÜ ewü amala ngü, gü ba, "De bala ne töndö ngü ne? Sekeme to lümü gbü nzö ani, de wö ani 'buru. Dela eyi siti soko eküte ani, wü di engä *Yisarayeale!"

⁸ FÜ wö ye Sekeme angbü efüwa te-ye fü wü Yakobo fi bü bala, gü ba, "Yakobo deyi, ye ni le ase mbarase ka-ye, Dina ne, wara ye tete na, angü ah ngbü ele engu cu efa sü. Te di bala la, ah le de wü le ngü la ale, ⁹ angü te ani za te-ani esüka ani de wü la, ah ena adi de züka ngü. Te wü le de ani za egba wü la, ani ena ace kpah egba ani, fü wü kpapa gbü nga wü angbü eza. FÜ za-te de esüka ani de bala, areke ngü mürü ka-ani 'duwa ba-neh-ene-la. ¹⁰ Wü ena angbü gbü sü ka-ani, gbü Sekeme sene gbü gu sü. FÜ ani ato wü sü de sela kpah 'buru fü wü. FÜ wü angbü endondoro de wü nü ka-wü gbügbü na, ba e te wü ngbü ele. FÜ wü angbü kpah emaka mere bi wü züka wü ngü gbü sü ka-ani ne." ¹¹ FÜ Sekeme ayia amala ngü fü wügiri ye, Yakobo, gü ba, "Ni ngbü ele tangbase ka-wü ne efa sü. Wü le fü ni, de ni za te-ani ake di. Ni ena ato wü e te wü ngbü ele ne nde 'buru fü wü. ¹² Te wü ngbü ele di kpah bü mere bi jiase la, ngü ma. Ni ena ato ka-wü ato, angü ni ngbü ele Dina efa sü."

¹³ FÜ ngü la asiti ka-ye ta eküte wü di Yakobo cu afa sü, angü Sekeme to mere lümü eyi eküte engu ni ani. FÜ ewü ayia afti nga gara mani, afti Sekeme di, ¹⁴ gü ba, "Ani ti ato engu ni ani fü ye nda-ani de, angü wü ti esa *basa nda-wü de. Te ani le ngü la bala la, ah ena ato mere lümü fü nguwa ani. ¹⁵ Amba, te wü le eyi de ani di eza te-ani esüka ani la, de wü komoko gbü nguwa wü 'buru di eti esa basa, baka e te di gbü gele ka-ani ne. ¹⁶ Te wü le eyi amere ngü la bala la, amba ani ti eyi ato wü egba ani, fü wü adi eza. FÜ wü di ani, wü jaji komoko, adi kpah eza egba wü. Te ani mere eyi bala la, fü ani adu angbü tñe de wü gbü mürü. ¹⁷ Te wü le de la, ngü ma. Ani ena aza tangbase ka-ani, fü ani anü sü ka-ani." Amba wüh mala ngü la bala nda-wü de mani.

¹⁸ FÜ ngü ka-ewü la ayia areke eküte wü Sekeme ake wö ye 'duwa ba-neh-ene-la. ¹⁹⁻²⁰ FÜ Sekeme ayia kpah 'duwa bü kere, amere ngü la, ba e te ewü mala la, teka ne de, angü ah le ta Dina cu fa sü. FÜ wü Sekeme ayia anü kpa te sü te wü kpapa ngbü ebite te-wü tete, ayia amala ngü fü wü kpapa gbü nguwa wü 'buru, de wüh koro, teka aro mö gbü ngü engu la. FÜ wü cögbörö wü kpapa ka-ewü akoro, anga angbü tñi, da eje ngü gömö Sekeme. Wüh ngbü eo lümü tete, angü engu ta de mere kpapa esüka ewü.

²¹ FÜ Sekeme amala ngü fü wü kpapa la, gü ba, "Wü di engu ni ni deyi, wü kpapa ne, wüh de züka wü kpapa. Ah le de ani le fü ewü, teka de wüh ngbü gbü sü ka-ani

* 33:17 33:17 Dela si-ngü de te wüh gü iri sü la tete Sukota. Ah ba e te ewü ga, wü gugu.

sene. Fū ewü angbü kphah endoro de wü nü ka-wü, ba e te ewü ngbü ele. Angü tō ka-ani memere. Ah tī eyi aza ani de ewü 'buru. Te ani ena angbü kphah eza te-ani ezengba ani de ewü la, ah ena areke ta kphah afa sū. ²² Enga ngü te ni ena amala fütanga ngü la fū wü, ah dene, te wü kpara la ngbü ele de ani mere, teka fū ani angbü tīne de ewü, ba wü kpara biringbō, gbü mürü ne. Ah de ngü teka fū wü komoko ka-ani 'buru adi eti esa *basa. ²³ Te di eyi bala ne, ah le de ani mere ngü engu la, kphah baka e te ewü mala la, teka fū wü mere bi wü nü ka-ewü, de wü mere bi wü e ka-ewü la, adu angbü tīne kphah 'buru ba nda-ani." ²⁴ Fū wü kpara ka sū la ayia 'buru, ale ngü la. Fū wü komoko gbü sū la ayia 'buru, anü atī esa basa gbü ra biringbō.

²⁵⁻²⁶ Fütanga sīkpī 'basu, o wüh di la fi bü etökō wangü te ka te wü, fū gara wü di Yakobo 'basu de iri wü Simiyona ake *Levi ayia akō wü dü ka-wü, de wü mere maguruma ka-wü, ayia azi te-wü, anü atī de gü gbü nzō wü kpara la gbü iri-to. Fū ewü amörō wü Sekeme ake wō ye, bete wü komoko gbü sū la le 'buru. Da ewü te ewü ena amere gü nda ma, angü wüh 'buru de ka te wü. Fū ewü aza engu ni wü, Dina, agba wü Sekeme la, adu de engu kpa ekötī.

²⁷ Fū wü gara wü di Yakobo ayia anü kphah kpa gbü 'baranga la, atī te wü e ka wü kpara te ewü mörō ewü la, akō le 'buru, teka lümü te Sekeme to gbü nzō engu ni ewü ne. Kpara te ena atiri kaje, atata ewü nda ma, angü wü komoko gbü sū la kpi nza eyi 'buru. ²⁸⁻²⁹ Fū ewü ayia akō wü nü ka-ewü, ba wü yiti, wü kambiliki bete wü dongi, abe kphah te wü würise, de wü jaji, de wü e ka-ewü nde 'buru, ayia anü sū di.

³⁰ Te Yakobo je ngü la tete, fū ngü la ayia asiti tete 'duwa ba-neh-ene-la. Fū ah amala ngü fū wü Simiyona ake Levi, gü ba dene, "De-wü deyi, wü mere de bane neh ene ngü ne? Wü za mere siti liya, koro di eyi gbü nzō ani dene. Wü kpara ka *Kanana de wü kpara ka Pereze ena akpü ani tīne 'duwa sürü sürü. Wü ceka la eceka! Baka te ani be kphah de ne, te wü kpara ka wü sū la ena adünda te-wü, atī de gü gbü nzō ani la, ani ena amere neh mbi mbi baye?" ³¹ Wü Simiyona ake Levi gü ba, "Wō ani deyi, ye ngbü efi ta de ani mere baye? Ye ceka mere siti lümü te jaji komoko la to gbü nzō engu ni ani ne! Ani ena ace ngü la fefe na ta bü bala, neh baye baye?"

35

Dene ngü te Me mala fū Yakobo,

te engu go koro tete agbü Betele

¹ Fütanga ngü la, fū Me ayia agü tamu ye fū *Yakobo agbü Sekeme kpala. Fū ah amala ngü fefe, gü ba, "Yakobo deyi, ma le de mü ce sū ne, fū mü ayia ago angbü agbü Betele, gbü sū ta te ma sere te-ra fū mü, o mü ngbü ekpe esaka engu ni mü, Esawu ne. Te mü koro kpala, ah le de mü reke sū, teka fū mü angbü egbo nga iri ra tete na."

²⁻³ Te Yakobo je ngü la tete bala, fū engu adu amala ngü la fū wü wara ye, de wü di ye, be kphah te wü kpara gbü nga ye, gü ba, "Ani le eyi ayia ago angbü agbü Betele. Fū ni areke sū teka angbü egbo nga iri Mere Me gbügbü na kpala, angü Me de kpara te ngbü ele ta-ngü te ni me-ye, kü gügü, o ni ngbü ta ekpe cürü engu ni ni tete, zalü akoro di dene. Engu ngbü kphah eceka kpi fütanga ni, gbü wü sū te ni ngbü endoro tete ne 'buru. Te di bala, ah le de wü kö wü e ka wü faranda, te ewü ngbü emere fū wü me ka wü kundu wü ne, de wü sötō 'buru asidi. Te wü mere eyi bala, de wü du wü zürü se wü di engu me la eküte wü 'buru asidi. Fū wü adu ato to bongo, areke te-wü, teka anü agbü Betele, angbü egbo nga iri Mere Me kpala."

⁴ Te wü kpara ka Yakobo je ngü la bala, fū ewü ayia akō wü faranda ka wü di engu me ka-wü la, ato 'buru fū Yakobo. Fū ewü agbigbi kphah wü gara wü e ba di, te ewü to gbü güje wü, ato 'buru fū Yakobo. Fū Yakobo ayia aji mere du kpa esa rü agbü Sekeme la, abu ewü, de wü faranda, 'buru gbügbü. Fū ah ayia ani nga ewü gö gö gö!

⁵ Fū wü Yakobo ayia ace Sekeme, akpo angbü enü agbü Betele. Fū Me ato mere cürü guvu wü kpara ka Sekeme, fū ewü ace kaje fū wü Yakobo anü sū ka-wü. Wüh liki nga ewü nda-wü de.

⁶ Fū wü Yakobo anü, anü akoro kpa gbü Betele,* te di ta kphah gbü tō ka wü *Kanana sela. ⁷ Fū Yakobo ayia areke sū, teka angbü egbo nga iri Me gbügbü sela. Angü dela ta sū te Me gü tamu ye fefe na tete, o engu ngbü ta ekpe esaka engu ni ye ne.

⁸ Baka te wü Yakobo go ngbü tīne eyi sela, gara würise de iri ye Debora ayia akpi. Ah ta de mürü tima ka Rebeka, ni ye Yakobo. Rebeka koro ta de engu kü gügü agbü Padanarama. Fū ewü ayia ati würise la esa gara rü gbü Betele sela. Fū ewü agü iri rü engu la Alünü-Bakuta, baka te wüh gü ba, "Rü ka cinga."

⁹ Baka te Yakobo yia tete agbü Padanarama, du ngbü gbü Betele ne, fū Me

* 35:6 35:6 Wü kpara ka Kanana ngbü ta ei sū engu la, gü ba, Luza.

adu kphah agü tamu ye fefe na sela toto, ayia ato wazi fefe na kphah baka engu tane. ¹⁰⁻¹¹ Fü Me amala ngü fefe, gü ba, “Yakobo deyi, ma de Me, te ngbü gbü nzö wü e füh kotö ne 'buru. Wüh ngbü ta ei mü Yakobo, amba enatikine wüh ena adi ei mü tîne *Yisaraye. Ma to wazi eyi fü mü, de mü bi wü ye füh kotö, sibi asibi. De wü kundu mü bi wü jaji sibi kphah asibi, teka de nguwa yi ga koro mere bi nguwa wü kpara, de wü angbe cögbörö miri esüka wü. ¹² Tö ta te ma gü ba, ma ena ato fü wü wö mü, wü Abarayama ake Yisaka ne, ma to kphah eyi fü yi, de wü kundu mü, te wüh ena abi ewü ne.” ¹³ Te Me mala ngü la nza tete bala, fü engu ayia 'duwa, anü sü ka-ye.

¹⁴ Fü Yakobo ayia aza mere teme, arükü, ao mbi gbü sü, te Me gü tamu ye tete fefe na la. Fü ah adu kphah aza fi, bete mü, ayia atökö füh teme la, acu ngü Mere Me di.

¹⁵ Dela si-ngü te Yakobo gü ta iri sü engu la tete, ga, Betele, angü Me gü ta tamu ye fefe na gbü sü la eyi du 'basu.

Dene ngü teka kpi ka Rayele.

¹⁶ Fü wü Yakobo ayia ace Betele, angbü enü agbü Beteleme,[†] o Rayele di ta de bu ye. Baka te ewü di la bü te kaje, enü ne, fü lakü ka Rayele ayia akoro teka ayaka. Fü bu Rayele angbü ekeke 'duwa ba-nehene-la. ¹⁷ Te bu Rayele ngbü fi da emere engu bala ne, fü würüse de te ngbü eyaka wü jaji ne, ayia amala ngü fefe na, gü ba, “Ye mere e akpe cürü de, angü ye ena ayaka ye komoko.” Fü Rayele ayia ayaka ye komoko kphah baka ngü la, fü wawazi akpo angbü enza. ¹⁸ Baka te Rayele yia ekpi tete, fü ah ayia agü iri mbarase ka-ye la Benoni, te gü ba, “Mere siti kuru.” Amba Yakobo du gü nda-ye, gü ba, Benzamina, te gü ba, “Mbarase te ni o maguma ni tete.” ¹⁹ Fü Rayele ayia akpi. Fü ewü ayia ati engu ciki sela, edere kaje te ngbü enü agbü Beteleme ne. ²⁰ Fü Yakobo ayia aza mere siti teme, ao füh mbükü Rayele. Fü teme la ayia angbü fi füh mbükü sela.

²¹ Fütanga ngü la, fü Yakobo ayia sela, anü akoro agbü gara sü de iri ye Migidale-Edere. Fü engu ayia ade gugu, angbü sela.

²² Fütanga ngü la, fü Rübena, te di de gina ye Yakobo ne, ayia anü ara ake Bila, wara wö ye ne. Fü Yakobo ayia aje ngü la. Fü maguma Yakobo ayia anzu teka ngü la cu afa sü.

Dene iri wü di Yakobo

[†] **35:16** 35:16 Ta gbü wü re la, wüh ngbü ta ei Beteleme de Efarata. ^{*} **36:2** 36:2 İri wö ye Ada ta de Elono, gbü nguwa wü Ete. [†] **36:2** 36:2 İri wö ye Olibama ta de Ana gbü nguwa wü Ivo. İri wö ye Ana ta de Zibeyona.

[‡] **36:3** 36:3 Basemata ta de enga ni ye Nebayota.

Wü di Yakobo ta te wüh bi ewü agbü Padanarama ne, wüh ta nzükpa de füh ye biri. Fü ewü ayia akoro 'buru nzükpa de füh ye 'basu de wü Benzamina. ²³ Leya bi ta wü di enga ye 'buru ma'diya. Gina ye Yakobo ta de Rübena. Fütanganga na tîne wü Simiyona ake *Levi, *Yuda, Yisakara, bete Zebulona. ²⁴ Dene iri wü di enga Rayele, wüh ta ngbee 'basu, wü *Yüsefa ake Benzamina. ²⁵ Bila bi ta nda-ye wü ye kphah ngbee 'basu, wü Dana ake Nafatali. ²⁶ Zerifa bi nda-ye wü ye ta kphah ngbee 'basu, wü Gada ake Asera. Dela 'buru iri wü di Yakobo.

Dene ngü teka kpi ka Yisaka

²⁷ Fütanga ngü la, fü Yakobo ayia aje ngü, gü ba, wö ni, Yisaka, gbe tîne eyi fa sü. Fü Yakobo ayia anü akoro kpkakaka kpa gbü Mamare, gbü ndama ga Abarayama ta gügü ne. ²⁸⁻²⁹ Fü Yisaka ayia akpi. Ah kpi ta gbü gbe ye, o re kaka koro eyi 'buru kama biri teke bala (180). Fü wü didi, wü Yakobo ake Esawu, ayia ati engu ciki gbü Mamare sela, gbü gö da ta te wüh ti wü wö ye na, Abarayama, gbügbü na ne.

36

¹ Dene si-ngü teka wü di Esawu, de wü kundu ye, te wüh ei ewü, gü ba, wü Edomo ne.

² Wü wara Esawu ta 'buru bata. Ewü de 'basu ne ta de wü egba ganzi kpara, te engu za ewü agbü *Kanana. İri gara ta de Ada,^{*} iri gara nda ta Olibama.[†] ³ İri ebatata wara Esawu ta de Basemata,[‡] te wö ye na di ta de İsimayile, afudu ye Esawu ne.

⁴ Wü wara Esawu la bata mini bi ta ye eyi fefe na. Enga Ada ta de Elifaza. Enga Basemata nda de Rülewe. ⁵ Wü di enga Olibama nda-wü de Yewusu, Yalama, bete Kora. Dela ta 'buru iri wü di Esawu, te wüh bi agbü Kanana.

⁶ Fütanga wü ngü la, fü Esawu ayia akö wü wara ye, de wü di ye, de wü kpara gbü nga ye, abe kphah te wü nü ka-ye, de wü e ka-ye 'buru, ayia ace Kanana, anü sü ka-ye kpa gbü gara sü te di nengete ede wü *Yakobo. ⁷ Kükürü de, angü sü, de ta te ewü ra köti tete sela ake Yakobo ne, be ta fü ewü, teka wü mere bi wü nü ka-ewü la, nda tîne de. ⁸ Dela si-ngü ta te Esawu yia ce Kanana tete, ago angbü ka-ye kpa füh wü rüvü, kpa te nga nzö köti ka Seyira, te wüh ngbü kphah ei, gü ba, Edomo ne.

⁹ Dene iri wü kundu ye Esawu, te engu di de mere kundu ye nguwa wü kpara ka Edomo ne, te ewü go ngbü kpa füh wü rüvü, te nga nzö köti ka Seyira ne. ¹⁰⁻¹³ Enga Ada, de iri ye ta Elifaza ne, bi wü ye ta 'buru buruve. Iri wü jaji la ta de Temana, Omara, Zefo, Gatama, bete Kenaza. E'ba'basu wara Elifaza de iri ye Timina ne, bi nda-ye engu ye ngbee biringbö, de iri ye Amaleke. Enga Basemata, de iri ye Rüwele ne, bi nda-ye wü di ye bala. Iri wü jaji la ta de Nata, Zera, Sama bete Miza. ¹⁴ Olibama bi ta nda-ye wü jaji bata. Iri wü jaji la ta de Yewusu, Yalama, bete Kora. Olibama ta de ye Ana, ye Zibeyona.

¹⁵⁻¹⁶ Dene iri wü di Esawu, te ewü du koro cögbörö nga nzö nguwa wü kpara. Gina ye Esawu ta de iri ye Elifaza ne, ah ta de wö ye nga nzö nguwa wü kpara lorozi, te ewü ngbü gbü Edomo. Wüh ta de wü Temana, wü Omara, wü Zefo, wü Kenaza, wü Kora, wü Gatama, bete wü Amaleke. Dela ta 'buru wü nga nzö nguwa wü kpara de ta te Elifaza bi ewü me-ye. Wüh ngbü ta eï ewü, gü ba, wü Edomo, angü wüh ra ta köti agbü tö ka Edomo. Elifaza ta de engu Ada, wara Esawu.

¹⁷ Rüwele ta nda-ye de wö ye nguwa wü kpara bala. Wü de wü Nata, wü Zera, wü Sama, bete wü Miza. Dela ta 'buru nga nzö nguwa wü kpara ta te Rüwele bi ewü. Rüwele ta de engu Basemata, wara Esawu.

¹⁸ Gara wara Esawu, ta de iri ye Olibama ne, bi ta nda-ye nguwa wü kpara bata. Wüh ta de wü Yewusu, wü Yalama, bete wü Kora. Dela ta 'buru iri nguwa wü kpara te Olibama, engu Ana, bi koro di.

¹⁹ Dela, 'buru iri wü kundu ye Esawu, te ewü di de nga nzö nguwa wü kpara, te wüh ngbü eï ewü, gü ba, wü Edomo. Wüh ta 'buru wü angbe cögbörö wü miri gbü nzö nguwa wü la.

Dene iri wü kundu ye Seyira

²⁰⁻²² Seyira§ ta de mere kundu ye nguwa wü kpara, ta te ewü ngbü gügü gbü Edomo, o wü Esawu de wü kpara gbü nga ye go koro, o köti kpala la de ne. Seyira ta de kpara gbü nguwa wü Ori. Ah ta de wü di ye 'bajena. Iri wü jaji la ta de Lotana, Sübala, Zibeyona, Ana, Disono, Ezere, Disana, abe kphah te tangbase kawü, de iri ye Timina. Ye Seyira, de iri ye Lotana ne, ta de wü di ye 'basu, wü Ori ake Emana.

²³ Ye Seyira, de iri ye Sübala ne, ta de wü di ye 'buruve. Iri wü jaji la ta de Alavana, Manata, Ebalala, Sefo bete Onama.

²⁴ Gara ye Seyira, de iri ye Zibeyona ne, ta de wü di ye 'basu, wü Aya ake Ana. Ana ta de mbarase te nü maka gara ngu, te di wangü, o engu ngbü ta eceka kpi fütanga wü nü ka wö ye kpa gbü gü.

²⁵ Mene ye Seyira, de iri ye Ana ne, bi ta wü jaji ngbee 'basu. Gara de ye komoko, de iri ye Disono, bete jaji würüse de iri ye Olibama.

²⁶ Mene ye Seyira, de iri ye Disono ne, bi ta wü jaji komoko bala, de iri wü Emadana, Esebana, Yitarana, bete Kerana.

²⁷ Mene ye Seyira, de iri ye Ezere ne, bi ta wü jaji komoko bata, de iri wü Bilana, Zavana, bete Akana.

²⁸ Mene ye Seyira, de iri ye Disana ne, bi ta wü jaji komoko ngbee 'basu, de iri wü Uca ake Arana.

²⁹⁻³⁰ Dela 'buru iri wü kundu ye Seyira, te di ta gbü nguwa wü Ori ne. Wü di Seyira ta de lorozi la, wüh ta de wü miri gbü nga nzö nguwa wü, gbü tö ka Seyira sela.

Dene wü miri ka Edomo

³¹ Dene iri wü angbe cögbörö miri, te ewü ngbü zoro sü gbü nzö nguwa wü kpara ka Edomo ta 'buru. Wü kpara ka Edomo la o ta nda-wü mere miri kü gügü, o wü kpara ka *Yisarayele o nda-wü mere miri la de. ³² Gina mere miri ka Edomo ta de Bela, ye Beyora, kpara ka Dinaba. ³³ Fü Bela ayia akpi. Fü ewü adu kphah afe gara mere miri, ao dada na. Iiri ta de Yobaba, ye Zera, kpara ka Büzara. ³⁴ Fü Yobaba ayia kphah akpi. Fü ewü adu kphah afe gara mere miri, ao dada na, de iri ye Üsama, kpara ka Temana. ³⁵ Fü Üsama akoro kphah akpi. Fü ewü adu kphah afe gara mere miri, ao dada na, de iri ye Adada, ye Bedada, kpara ka Avita. Adada sö ta gü ezengba wü de wü nguwa wü kpara ka Midiyana, agbü tö ka wü Müwaba. Fü engu ayia afa wü kpara ka Midiyana la ka. ³⁶ Fü Adada adu kphah akpi. Fü ewü adu kphah aza gara mere miri, ao dada na, de iri ye Samala, kpara ka Masareka. ³⁷ Fü Samala ayia kphah akpi. Fü ewü aza kphah gara mere miri, ao dada na, de iri ye Sawüla, kpara ka Robota.* ³⁸ Fü Sawüla ayia kphah akpi. Fü ewü adu kphah aza gara mere miri, ao dada na, de iri ye Balanana, ye Akabora. ³⁹ Fü Balanana ayia kphah akpi. Fü ewü adu kphah aza gara mere miri, ao dada na, de iri ye Adara, kpara ka Pawu. Iri wara Adara ta de Metabele, engu Matarede te iri ni

§ 36:20-22 36:20-22 Seyira de iri kpara, ah kphah de iri sü.

* 36:37 36:37 Robota ta ede mere ngu.

ye na di de Mezaba ne. Dela iri wü angbe cögbörö wü miri ta te ewü zoro sü gbü Edomo ne.

⁴⁰ Dene iri nguwa wü kpara te Esawu bi ewü. Ah de wü Timina, wü Alava, wü Yetete, ⁴¹ wü Olibama, wü Ela, wü Pinona, ⁴² wü Kenaza, wü Temana, wü Mibizara, ⁴³ wü Magadiyele, de wü Yirama. Dela 'buru iri nga nzö nguwa wü kpara, te ewü di ta mere nguwa wü kpara gbü Edomo ne. Wüh 'buru de wü kpara guvu Esawu, angü engu ta me-ye de gina kpara, gbü nguwa wü kpara ka Edomo. Fü ewü angbü egü iri wü sü, te ewü go ngbü gbügbü na ne, te iri nguwa ewü la.

37

Dene ngü ka roto ka Yüsefa

¹ Wü Yakobo ngbü ta ejiji de wü di ye, gbü tö ka wü *Kanana, kpah baka wü kundu wü tane. ²⁻³ Ambadu ye Yakobo ta ladü de iri ye *Yüsefa, te Yakobo ngbü ele ngü kaka, efa nda wü gara wü di engu ni ye la 'buru. Angü ah bi engu tüne gbü gbe ye. Te re ka Yüsefa koro tete baka e nzükpa de füh ye lorozi, fü Yakobo ayia aza züka bongo de züka tere te ye, ato fü Yüsefa.

Wü gara wü di engu eyi Yüsefa, wü di engu Bila ake Zerifa, wüh ngbü ta eceka kpü fütanga wü kambiliki ka wö wü. Fü Yüsefa angbü de ewü tüne ba mbarase fütanga ewü. Fü wü di engu ni ye Yüsefa la angbü emere siti ngü. Fü Yüsefa adu angbü emala nga siti ngü ka wü di engu ni ye la 'buru fü wö ye.

⁴ Fü wü di engu ni ye Yüsefa awu, gü ba dene, wö ani le Yüsefa ka-ye fa sü ne. Fü ngü la ayia asiti te ewü afa sü. Fü ewü akpo angbü ekpü Yüsefa 'duwa sürü sürü. Wüh le amala züka ngü fefe nda-wü tine de.

⁵⁻⁷ Ta gbü gara biti biringbö, fü Yüsefa ayia aroto. Fü ah akoro amala nga roto la fü wü di engu ni ye, gü ba dene, "Wü di engu ni ni deyi, ni roto roto gbü biti ne, te ani ngbü ewa ndo. Fü ani adi ezi wü ndo la, da ei ewü baka i-ndo. Fü nda-ni i-ndo ne ayia ae te-ye arü mbiii tikpi. Fü nda-wü i-ndo la akoro 'buru, angbü ezuru engagira nda-ni la, baka kpara te ecu ngü mere miri la." Te wü di engu ni ye na je nga roto kaka-na la bala, fü ngü la ayia asiti te ewü afa sü. ⁸ Fü ewü akpo emala ngü, gü ba, "Ho! Ye ngbü ele afü te-ye, angbü mere miri gbü nzö ani, fü ani adi nda-ani 'buru esa lö ye? Ye ngbü emala te komö ye de bala neh ene ngü ne?" Teku ngü la, fü wü di engu ni ye na adu akpü engu tüne 'duwa afa sü, teka ngü te engu

mala. Wüh gü ba, "Ah ngbü ecu ngü ye de bala ne, neh teka roto ka-ye la?"

⁹ Fütanga ngü la, fü Yüsefa adu kpah aroto gara roto. Gbü roto la, fü ah awu wü ra ake fe, bete wü küfara nzükpa de füh ye biri, te ewü yia koro 'buru engangagira, angbü ecu ngüngü. ¹⁰ Fü ah adu kpah amala nga roto la fü wö ye, de wü di engu ni ye 'buru. Te wö ye na je ngü la bala, fü mamagama ayia asiti eküte Yüsefa, gü ba, "De-ye deyi, dela bala neh ene roto ne? Ye efi nda-ye, gü ba, ni ena ayia cu me-ni, de wü ni ye, de wü di engu ni ye 'buru, acu ngü ye fanü fanü?" ¹¹ Fü wü di engu ni ye na ayia ati ngü la fi emagama wü. Fü wö ye na angbü fi bü da efi ngü la emagama ye.

Dene ngü te wü di engu ni ye Yüsefa cünzi engu di

¹² Gbü gara ra, fü wü di engu ni ye Yüsefa ayia agbü sü ka-wü, de iri ye Eberone ne, aza wü kambiliki ka wö wü, anü di agbü gara sü de iri ye Sekeme.

¹³ Fütanga ngü la, fü Yakobo ayia ai Yüsefa kpaka ye, amala ngü fefe, gü ba dene, "Yüsefa deyi, ni ele atima ye kpaka wü di engu ni ye kpa gbü Sekeme." Yüsefa gü ba, "Wayi, ni le eyi." ¹⁴ Yakobo gü ba, "Ye nü enü, ye ceke wü di engu ni ye, de ye du, ye mala mene ngü te ngbü emere ewü de kpala, de wü kambiliki ne, fü ni, teka fü ni aje gömö ye." Fü Yüsefa ayia sela, anü aceka wü di engu ni ye agbü Sekeme.

¹⁵ Te engu koro tete agbü Sekeme kpala, ah maka wü di engu ni ye de. Fü ah angbü endondoro da egiri ewü. Fü gara komoko akoro amaka engu kpala, ayi-tata, gü ba dene, "De-ye deyi, ah mere baye te ye ngbü endoro de bane? Ye ngbü egiri neh ene?"

¹⁶ Yüsefa gü ba dene, "Ni ngbü egiri wü di engu ni ni. Wüh ngbü de wü kambiliki ka wö ani neh to kaye?" ¹⁷ Fü komoko la alügü ngü fefe, gü ba dene, "Ni je ngü te ewü ngbü emala, gü ba, 'Ani le anü agbü Dotana.' Ah ba e te ewü nü sü eyi kpala la." Fü Yüsefa ayia kpah bü 'duwa ayia, anü afa nga ewü, amaka agbü Dotana kpala.

¹⁸⁻²⁰ Fü wü di engu ni ye Yüsefa ayia aceka kpü, awu engu nengete te ngbü ekoro. Fü ewü akpo angbü emere e, nzürürrü! da emala, gü ba, "Yi ceke la! Mürü roto la kpah te ekoro de kpala. Te ah koro eyi la, ah le de nih mörö engu amörö, aza kökö na, asö agbü diri du-kpa-ngu. Fü nih adu amala fü wö ye na, gü ba dene, 'Siti nü zoro engu eyi, züfa 'buru.' Fü nih awu la ngü gbü roto kaka-na la!"

²¹ Fü Rübena, te di de gina engu ni ewü ne, ayia aje ngü la. Fü ngü la ayia asiti tete afa sü. Fü ah adu afi nga kaje te ni

ena aküwa Yüsefa tete na. ²² Fū ah ayia amala ngü fū ewü, gū ba dene, "De-wü deyī, ah tī fū ani amörö engu amörö de, angü engu de enga ni ani. Te ah bala la, ani za bü engu, ani gū agbü diri du-kpa-ngu. Fū engu akpi ka-ye kpala de tete-ye." Amba Rübena ngbü emala ngü la ka-ye nda de mani, angü fīngangü kaka gū ba, te ani gū engu eyi kpala la, fū ni adu aza engu, alügü kpaka wö ni.

²³ Te Yüsefa koro tete kpaka ewü la, fū ewü ayia bü riini, afi tete, azoro engu gö! Fū ewü ayia agbi zūka bongo kaka-na, de tere te ye la, asidi. ²⁴ Fū ewü ayia aza engu, anü di, agü agbü diri du-kpa-ngu, te ngu di ta gbügbü na ma.

²⁵ Fū ewü adu angbü ezü kümü kawü. Wüh te eceka kpi bane de, gbangbara! te wü Arabi te ewü ngbü ekoro to kpa fūgö, agbü Gilada, de wü e ka-wü, baka wü *rü de zūka se wü, de wü gara wü zūka wü e ka-wü, te ewü enü di, acinzi agbü *Ezepeto. Wüh ngbü bi wü e la ta 'buru fūh wü kamele kawü.

²⁶ Fū *Yuda, gara enga ni ye Yüsefa ne, ayia awu wü Arabi la. Fū ah amala ngü fū wü di enga ni ye, gū ba dene, "Te ani mörö enga ni ani ne amörö, fū ani acere nga kökö na eküte wö ani la, ani ena amaka gbügbü na neh ene? ²⁷ Te ah nda bü fīngangü ka-ni la, ah le de ani nü enü, za engu, acinzi asidi fū wü kpapa te ewü ekoro ne. Fū ani aza jīase ka-ani la. Angü engu de enga ni ani. Te ani mörö engu la, ah ena adi esiti." Fū ewü ale ngü la te nga wü 'buru.

²⁸ Te wü Arabi koro tete kpaka ewü sela, fū ewü ayia kere, anü agbeke Yüsefa kpa gbü du la, adu di, ato fū wü Arabi la. Fū wü Arabi la ayia ato mere bi jīase fū ewü, baka teke biri. Fū ewü aza Yüsefa yo! atafa di agbü Ezepeto.

²⁹ Fütanga ngü la, fū Rübena adu anü akoro fūh du-kpa-ngu la, aceka kpi bane, yiri! Yüsefa nda ma! Fū ngü la asiti tete 'duwa ba-neh-ene-la. Fū ah ayia agbü bongo te ye, asörö traai! de mere siti gba. ³⁰ Fū ah ayia alügü nga ye, adu kpaka wü di enga ni ye, ayi-ta ewü, gū ba dene, "Anga mbarase agbü du la nda tine eyi ma! Ni ena amere baye?" Wü di enga ni ye la le ngü nda-wü de.

³¹ Fütanga ngü la, fū ewü ayia aza meme, amörö. Fū ewü aza bongo ka Yüsefa, ayili gbü ngüte meme la, ³² aza, adu di, agü tatamu fū wö wü, gū ba, "Wö ani deyī, ani maka bongo ne kötö to kpāne de ngüte te ye. Ye ceka la bongo engu mbi mbi mbi. Ah ena adi neh bongo ka da? Ah de bongo ka ye ye de?" ³³ Fū Yakobo ayia

awu bongo ka Yüsefa teke. Fū ah ati 'duwa de gba, gū ba, "Wuuwu! Ye ra, Yüsefa, edene bü bongo ka-mü fanü fanü na? Siti nü zoro mü, sösörö mü eyi luru luru, du zūfa mü eyi fere dene na? Ma ena amere baye?" ³⁴ Fū ah ayia asösörö bongo te ye 'buru 'buru. Fū ah adu aza kala bongo ka cinga, ato te ye. Fū ah aku gba kö ye ye la bala, teka mere bi sikipi.

³⁵ Fütanga mere bi sikipi la, fū wü didi, wü jaji komoko de wü jaji wü rüse, ayia akoro 'buru kpakaka na, teka agu mamaguma, de engu ce ngü ka cinga la tine asidi. Fū Yakobo alügü ngü fū ewü, gū ba dene, "Ni le ngü ka-wü la de. Ni ena aku gba ye ni la bala, zalü te ni ena akpi, ago agbü tö." Fū wö ye Yüsefa angbü fi bü eku gba kökö na bala.

³⁶ Baka te wü Arabi la za Yüsefa, nü di agbü Ezepeto, fū ewü anü acinzi engu fū gara mere kpapa ka wü marajümiya kpala de iri ye Potifara.

38

Dene ngü ka Yuda ake Tamara

¹ Gbü gara sikipi, fū *Yuda ayia ace wü wö ye de wü di enga ni ye, anü angbü agbü gara sü de iri ye Adulama. Fū ah aji gba ye ta ede gba gara komoko de iri ye İra. ² Te Yuda ngbü kpala, fū engu ayia awu gara jaji wü rüse kpala, egba *Kanana. Fū Yuda ayia ase engu wara ye tete na. ³ Fū wara ka la ayia abi ye komoko. Fū Yuda agü İri na Ere. ⁴ Fū wara ka-na adu kpah abi gara ye komoko. Fū ah agü İri na Onana. ⁵ Fū ewü adu ayia sela, anü angbü agbü gara sü de iri ye Keziba. Fū wara kana adu abi kpah gara ye komoko. Fū ah agü İri na Sela.

⁶ Fū Ere ayia aga, akoro mere komoko. Fū Yuda ayia ase zūka jaji wü rüse fefe na, de iri ye Tamara. ⁷ Amba Ere, mü ka-mü ta de siti kpapa gbü jia Me fa sü. Fū Me ayia amörö mü asidi, teka *siti ngü ka-mü la.

⁸ Fū Yuda ayia ai Onana, amala ngü fefe na, gū ba dene, "Ye ni deyī, ye za bende ye ne eza, fū ye abi ye eküküte na, de ah ngbü da enga ni ye te kpi ne." ⁹ Te Onana je ngü la, gū ba, "Ye de te ani ena amaka ake bende ni ne, ah ena adi ka-ye ye gina enga ni ni te kpi ne," fū ngü la ayia asiti tete na afa sü. Tekā ngü la, te Onana dūnda sü rara ake Tamara, engu le ato ye guvu Tamara nda de. Fū ah angbü etökö ngu ye la kötö. ¹⁰ Fū ngü la asiti gbü jia Me 'duwa ba-neh-ene-la. Fū Me ayia amörö Onana kpah asidi.

¹¹ Fū mere siti cürü ayia ari te Yuda teka ngü la. Fū Yuda afi nga ngü, gū

* 38:2 38:2 İri wö ye wü rüse la de Suwa.

ba dene, "Ngü ladü gbü nga wüüruse la, angü wü di ni de 'basu ne kpi eyi 'buru esa ngüngü. Titine adu ye ni komoko eyi ngbee biringbö dene. Te ni za wüüruse la, to kpah fefe na, wara ka tete la, ye ni ne ena akpi ka-ye kpah akpi, ba wü di enga ni ye, te ewü kpi ne." Angü ah wu, gü ba dene, Me mörö wü di ni me-ye, teka siti ngü ka-ewü, te ewü ngbü emere ne, nda de.

Te di bala, fü Yuda ayia amala ngü fü Tamara gbü mani, gü ba dene, "Ye ni, Sela ne, ah ka-ye nda la mba jaji. Ah ti fü ah aza wüüruse nda la de. Ye ci la ngangana na feke, zalü te engu ena aga, akoro memere. Te di bala, ye du la edu, ye ngbü agba wö ye, baka wüüruse wökö ka-ani, zalü te ye ni la ena aga tete." Fü Tamara, fü mü ayia adu angbü agba yi kpaka wö mü.

¹² Fütanga wü re la, fü wara Yuda ayia akpi. Fü Yuda aku gbagba na, teke mere bi sikipi. Fütanga ngü la, fü Yuda ayia amala ngü fü awuba ka-ye, İra, gü ba dene, "Ani nü enü agbü Timena, teka awete kala wü kambiliki ka-ani." Fü ewü ayia areke te-wü teka anü ka-wü kpala.

¹³ Tamara, mü ka-mü ta gbü lakü la, fi agba wü wö mü ba wüüruse wökö. Fü mü aje ngü, gü ba dene, "Wügbi ni yia eyi teka anü agbü Timena, awete kala wü kambiliki ka-ye kpala." ¹⁴ Fü Tamara ayia afi nga ngü, gü ba dene, "Wügbi ni fiti ni ka-ye afiti. Ah mala ngü fü ni de mani. Titine yeye na ga koro eyi mere komoko. Ah le ato ni fefe na, wara ka tete fi de. Ah ce ni ka-ye eyi ace. Te di bala ne, ni ena abi ye ake da? Te ah bala, nda-ni mani kpah ladü, te ni ena amere. Ni ena anü, afete engu te kaje. Fü ani amaka ye ake di."

Fü Tamara ayia 'duwa, agbi bongo ka giri eküte ye ne asidi, adu aza züka bongo ka-ye, abu eküte ye, abuka nzö ye de gbüra ye di 'buru. Fü ah ayia anü kpa te kaje ka Timena, angbü te di kaje, te enü agbü Enayima. Fü ah angbü efete Yuda kpala.

¹⁵ Te Yuda koro tete na, fü ah ayia aceka kpi, awu gara wüüruse te ngbü te kaje. Fü ah afi, gü ba, wüüruse la ngbü egiri wü komoko, angü ah ngbü ewo gbüra ye esa bongo. ¹⁶ Te di bala, fü Yuda ayia anü akoro kpaka wüüruse la, amala ngü fefe, gü ba dene, "De-ye deyi, ni ngbü ele de ani ngbü ake ye." Yuda, mü wu, gü ba dene, dela Tamara, wara ye ni ne, nda-mü de.

Te Tamara ye ngü te Yuda mala fefe na de bala, fü ah ayi-ta Yuda, gü ba dene, "Te di bala, ye ena ato fü ni neh ene?" ¹⁷ Yuda gü ba dene, "Te ye le eyi fü ani angbü ake ye la, te ni koro eyi kpa gbü Timena la, ni ena atima enga meme fü ye." Tamara gü

ba, "Züka ngü. Te di bala ne, amba mene e te ye ena ace fü ni, fü ah angbü esaka ni, fü ni awu, gü ba, ye mala ngü la eyi fanü fanü ne, ah de neh ene?" ¹⁸ Yuda gü ba, "Te di bala, ye ngbü ele de ni to fü ye neh ene?" Tamara gü ba, "Ye za e gbü kpa ye, ba tüngü, de ye za kpah ku nyari ka-ye, te ye gü gbü ngürü ye la, de ye to fü ni, bete ngbangba ka-ye la, teka fü ni aza ao kpaka ni sene. Te ye tima enga meme la eyi fü ni fanü fanü la, ni ena alügü wü e ka-ye la." Fü Yuda aza wü e la, ato fefe na. Fütanga ngü la, fü Tamara ayia anü ake Yuda, fü Yuda awu engu wüüruse tete na.

¹⁹ Fü Tamara ayia alügü nga ye, adu kpa eköti. Fü ah ayia agbi züka bongo te ye ne, ao, adu aza bongo ka giri, ato alügü eküte ye. Fü ah adu angbü kpah ba wüüruse wökö. Amba gbü ngü la, Tamara maka bu ka-ye nda-ye eyi.

²⁰ Fü Yuda adu anü akoro agbü Timena. Fü ah aza enga meme la, ayia atima esaka İra, de engu du di fü wüüruse la. Fü ah amala ngü fü İra, gü ba dene, "Ye to enga meme fü wüüruse la, de ah lügü wü e ka-ni, ta te ni ce o kpakaka na ne." Te İra nü koro agbü Enayima kpala, ah maka wüüruse la nda de. ²¹ Fü ah ayi-ta wü kpapa, gü ba dene, "Wüüruse de terane, te ngbü eto te-ye fü wü komoko te kaje ne, ah neh kaye?" Wüh gü ba, "Ani wu wüüruse, te ye mala ngangana na la, nda-ani de." ²² Te İra du maka Yuda tete, fü ah amala ngü fefe, gü ba dene, "Ni maka wüüruse la nda-ni de. Ni yi-ta wü kpapa kpala 'buru. Wüh gü ba, 'Ani wu wüüruse, te ngbü eto te-ye fü wü komoko ne, nda-ani de.'" ²³ Yuda gü ba, "Ngü ma. Dene ngü ka-ani nda de, angü ni tima meme eyi fefe, ye maka engu nda de. Te di bala, wü e ka-ni la ngbü kpah angbü 'buru kpakaka na kpala, angü wü kpapa ena amü ani."

²⁴ Fütanga fe bata, fü Yuda ayia aje ngü, gü ba dene, "Tamara mere siti ngü eyi! Ah eyi de bu ye. Angü ah du fü te-ye eyi baka wüüruse mürü küla, adi eto te-ye fü wü komoko." Te Yuda je ngü bala, fü ah ayia atima ngü kpala, gü ba dene, "Te ah eyi bala fanü fanü la, ah le de wüh za Tamara, wüh gü agbü wa, de engu curu, akpi de wü ye la asidi." ²⁵ Baka te ewü je ngü te Yuda tima la, fü ewü ayia aza Tamara, anü di, de ani gü agbü wa. Fü Tamara ayia amala ngü fü ewü, gü ba dene, "Kpara te to ye guvu ni ne, wü e kaka-na dene. Wü za la wü e la, wü nü di, agü tatamu na fü wügbi ni, Yuda, de ah ceka la." Fü ewü ayia ace kpa te Tamara. Fü ewü ayia aza wü e la, anü di kpaka Yuda. ²⁶ Yuda ga, ni ceka kpi bané de, gbo! te wü e ka-ye! Te Yuda wu ngü la,

fü ah ayia kürrrü, amala ngü fü ewü, gü ba, "A'a! Tamara mere siti ngü nda de! Ah de-ni, Yuda, ni dürrü ngü la eyi me-ni, angü ni le ato Tamara fü ye ni, Sela, de." Fütanga ngü la, Yuda du ngbü ake Tamara ba würrüse tete nda tîne de.

²⁷ Fütanga ngü la, fü laki ka Tamara ayia atî teka ayaka. Amba wü ye de guvu Tamara ne ka-wü nda wü dadase. ²⁸ Fü gara mbarase ayia ato kpa ye etanü. Fü würrüse te ngbü eyaka wü jaji ne, ayia kere, ai diki ku te kpakpa na, gü ba, "Dela eyi gina." ²⁹ Fü mbarase ayia alügü kpa ye asidi. Fü gara mbarase ayia aluru sü, akoro. Fü würrüse la ayia agüka, gü ba dene, "Ah du luru sü, koro fi me-ye neh baye baye?" Fü ewü agü iri mbarase la Pereze, baka e te wüh gü ba, "E-luru-sü". ³⁰ Fütanganga na, fü engu de diki ku te kpa ye ne, adu tîne, amü akoro. Fü ewü agü iri na Zera. Ah ba e te wüh gü ba, "Diki-e".

Dela ngü ta te mere Yuda ake wara wü di ye, ta te ewü kpi ne. Angü Yuda bi wü Pereze ake Zera eküte Tamara.

39

Dene ngü ta te mere Yüsefa agbü Ezepe

¹ Baka ta te wü di engä ni ye *Yüsefa cînzi engu fü wü Arabi ne, fü wü Arabi la aza engu anü di agbü *Ezepe. Fü ewü anü kphä acînzi engu fü Potifara, te di de mere kpara ka wü marajümiya ka mere miri ka Ezepe. Fü Potifara ayia aza Yüsefa, adu di agba ye.

² Fü Yüsefa angbü agba Potifara, kphä baka labi kaka-na. Amba Me ce Yüsefa kpikpi ye nda de. Me ngbü fi bü da ele tangü te Yüsefa, da eto wazi fefe. Teka ngü la, fü tima ka Yüsefa, te engu ngbü emere de kpala ne, angbü enü ka-ye 'buru mbi. ³ Te Potifara wu, gü ba, Me ngbü eto wazi gbü tima te Yüsefa ngbü emere ne 'buru me-ye, ⁴ fü ngü ka Yüsefa angbü ereke gbü jia Potifara 'duwa ba-neh-ene-la. Fü Potifara afe Yüsefa, ao ba züka kpara ka tima ka-ye, gbü nzö wü gara kpara ka tima ka-ye eköti la 'buru. Fü ah ace ngü ka wü e ka-ye kphä 'buru nde esaka Yüsefa. ⁵ Baka te Potifara o Yüsefa baka mere kpara teka wü ngü ka-ye bala ne, fü Me ato wazi gbü wü e ka Potifara eköti la 'buru, teka ngü ka Yüsefa. ⁶ Te di bala, Potifara du fi nga ngü teka wü e ka-ye la tîne de, angü ah wu eyi, gü ba, Yüsefa ladü. Fü Potifara angbü tîne de mere tadu, da ezü tîne bü nzia e.

Yüsefa ka-ye ta de züka jaji komoko, te su asu. Ngü kaka-na reke gbü jia wü kpara fa sü. ⁷ Fü ngü Yüsefa ayia areke kphä gbü jia wara Potifara. Fü wara Potifara

angbü eceka Yüsefa 'duwa de gügümü na te ye. Gbü gara ra, fü wara Potifara afti Yüsefa, gü ba dene, "Yüsefa deyî, ni ngbü ele de ani nü ngbü la mba ake ye." ⁸ Amba ngü la ti ta gbü jia Yüsefa nda de. Fü Yüsefa alügü ngü fefe, gü ba dene, "A'a, bala de. Ye ceka la, titîne mürü köti ne fi nga wü ngü de gba ye ne nda tîne de, angü ni ladü sene. Engu ce wü ngü ka-ye eyi 'buru esaka ni. ⁹ Wazi wü e kaka de eköti ne, tîne 'buru esaka ni. Gara e biringbö te engu tiri te ni nda ma. Nzö de-ye, angü ye de wara ka. Te engu ngbü emere züka ngü fü ni bala la, ah ena areke neh baye, te ni ena amere siti ngü, de bala fü mere kpara ka-ni? Te ni mere ngü la bala, ah ena adi de mere *siti ngü gbü jia Me." Amba würrüse la le ngü te Yüsefa mala la nda de. ¹⁰ Gbü wü sikipi 'buru, fü würrüse la angbü fi da ekpülü Yüsefa de biri ngü ka-ye la, gü ba, "Yüsefa deyî, ani ngbü ake ye." Fü ah afti Yüsefa bala ma. Yüsefa le ngü kaka la nda de. Fü Yüsefa ace ka-ye fi bü kpo da engbü ake di.

¹¹ Gbü gara ra, fü Yüsefa arî angbü ka-ye kpa esambü, da emere tima ka-ye. Gbü sikipi la, gara wü bu ye, wü kpara ka tima sela 'buru ma. Ah ngbü ka-ye bü kpikpi ye. Fü würrüse la akoro amaka engu kpikpi ye bala. ¹² Te würrüse la wu bala, fü ah ayia 'duwa, atî eküte Yüsefa, azoro bongo kaka-na gö! gü ba dene, "Ani ngbü engbü ake ye titîne sene." Baka te Yüsefa wu bala, fü ah ayia agbürrü te-ye kpüla! amü akoro kpa etanü, ace bongo ka-ye ciki esaka würrüse la sela.

¹³ Te würrüse la wu, gü ba dene, Yüsefa kpe eyi kpa etanü, ce bongo ka-ye, o eyi esaka ni ne, fü ah afi nga gara mani ka-ye kere. ¹⁴⁻¹⁵ Fü ah ayia aba rere, de mere gba kpa tikpi, ai gara wü mürü tima ka watî ye 'buru kpaka ye, amala ngü fü ewü, gü ba dene, "Yi ceka la ngü ka engä *Ebere ne! Engu koro sene titîne dene, agbene ra, gü ba dene, 'Ni le awu ra würrüse tete.' Ma le nda-ra de! Fü ra ayia 'duwa, aba rere kpa tikpi. Te engu wu bala, fü ah ayia amü akoro kpüla kpa etanü, ace bongo ka-ye, ao de esaka ra ne. Ako! Mbarase la! Watî ra za engu, koro di sene, neh teka ne? Teka ato lümü gbü jia ra?" ¹⁶ Fü würrüse la ayia aza bongo ka Yüsefa la, ao, gü ba dene, "Te watî ni du koro eyi la, ah ena aceka ngü gbü ngü la me-ye."

¹⁷ Fütanga ngü la, fü mürü köti adu akoro. Fü wara ka la ayia kphä bü kere, anü amala nga ngü la fefe, gü ba dene, "Watî ni deyî, ye ceka la bü ngü ka labi, engä Ebere ne, ta te ye se engu, de ah mere tima sene ne. Ah koro fütanga ye ne, avi jia ni 'duwa ba-neh-ene-la! ¹⁸ Fü ni ayia

aku gba, da eba rere. Fū cürü ari tete na. Fū ah ayia de woro, amü akoro kpa etanü, ce bongo ka-ye ciki ede ni kötö sela. Bongo engu, ah dene!”

¹⁹ Te mürü köti je ngü la bala gömö wara ye, fū mamaguma ayia asiti. ²⁰ Fū ah ayia anü azoro Yüsefa, ai engu, agü agbü ku, gba mere miri sela. Fū Yüsefa angbü agbü ku kpala. ²¹ Te di bala, fū Me angbü ele ta-ngü te Yüsefa, angü Me ngbü ele engu de maguma ye 'buru. Fū Me angbü engbü ake Yüsefa, da eto wazi fefe na agbü ku kpala. Fū ngü ka Yüsefa ayia areke gbü jia mere kpara ka ku la afa sü. ²² Fū mere kpara la ayia kpah, aza Yüsefa, ao gbü nzö wü kpara ka ku la 'buru. Fū Yüsefa angbü eceka kpi fütanga wü tima gbü ku sela tine 'buru me-ye ereke areke. ²³ Wü e ka ku 'buru, te Yüsefa ngbü eceka kpi fütanga ewü ne, mere kpara ka ku la du fi nga ewü nda tine de. Angü engu wu eyi, gü ba, Me ladü ake Yüsefa, da eto wazi fefe, gbü wü ngü de te engu ngbü emere ne 'buru.

40

Dene ngü te mere te-ye fū Yüsefa agbü ku

¹ Ta gbü wü laki la, wü gara mere kpara ka tima ka mere miri ka wü *Ezepeto ta ladü 'basu. Gara biringbö, tima kaka-na ta teka adi eza ndü'ba ka miri, anü di fefe na de e-manzö gbü ye. Nda gara nda teka adi eza ambata de züka türü-e, enü di fū miri.

Gbü biri sikpi, fū wü kpara de 'basu la ayia amere *siti ngü gbü jia miri ka Ezepeto la. ² Fū ngü la ayia asiti gbü jia miri la 'duwa ba-neh-ene-la. Fū mamaguma ayia asiti eküte wü kpara ka-ye la. ³ Fū miri ayia aza ewü, agü agbü ku, kpah gbü sü te wüh gü *Yüsefa gbügbü na ne. ⁴ Fū mere kpara ka wü marajümiya la ayia amala ngü fū Yüsefa, gü ba dene, “Yüsefa deyí, ye di eceka kpi fütanga wü mere kpara ka miri la.” Fū wü kpara la ara agbü ku kpala bala teka mere bi sikpi.

⁵ Gbü gara biti, fū wü kpara ka miri de 'basu la ayia aroto. Si-ngü ta gbü wü roto ka-ewü la 'buru kpi kpi ye kpi kpi ye.

⁶ Kpurutokopi la, fū Yüsefa ayia anü kpaka wü kpara la. Fū ah akoro amaka ewü da efi nga ngü 'duwa ba-neh-ene-la. ⁷ Fū Yüsefa ayia amala ngü fū ewü, gü ba dene, “Ah mere neh baye te wü ngbü bü tii, de mere siti fingangü de bane? E-mere wü neh ene?” ⁸ Wüh gü ba, “Ani ngbü bala kükürü de, angü ani roto roto gbü biti ne. Ani ngbü efi, gü ba, ngü ladü gbü wü roto la. Amba kpara te ena amala nga si roto la fū ani nda ma.” Yüsefa gü

ba, “Te di bala, wü mala nga roto ka-wü la amala fū ni. Ni ena ayi-ta Mere Me, fū engu asere si roto ka-wü la fū ni. Angü Me de kpara te ngbü esere ngü fū wü kpara 'buru.”

⁹ Dela 'duwa, fū mene te ngbü eto e-manzö fū miri ne, ayia amala nga nda-ye roto fū Yüsefa, gü ba dene, “Ni roto gbü biti ne, te ni wu mere siti rürü. ¹⁰ Rürü engu la, yakpakpa na bata. Fū rü la ayia ayi. Ni te eceka de, gbo! te riri na te mbe, ngbü ngbaaa bane. ¹¹ Te ni wu e la bala, fū ni awu ndü'ba ka mere miri ne esaka ni. Fū ni ayia akolo ri-rü la, angbü da efi ngungu na. Fū ni ayia atökö gbü ndü'ba la, aza, anü di, ato fū mere miri, kpah fi baka tima ka-ni, ta te ni ngbü emere ne. Dela roto ka-ni te ni roto ne, ah bala.”

¹² Fū Yüsefa ayia amala si-ngü gbü roto kaka la fefe na, gü ba dene, “De-ye deyí, roto ka-ye la, ngü gbügbü na bane. Yakpa rü de te ya bata la, wüh baka sikpi bata. ¹³ Angü fütanga sikpi bata, miri ena ayia ai ye engagira ye, amala ngbanga ka-ye. Fū ah ace siti ngü ka-ye la 'buru. Fū ah adu alügü ye gbü tima ka-ye, ta te ye ngbü emere ne. Fū ye adu kpah adi eto e-manzö fefe na.”

¹⁴ Fū Yüsefa adu arü amala gara ngü fū komoko la, gü ba dene, “De-ye deyí, te ye du koro eyi kpa gba mere miri kpala, te ngü la mere te-ye eyi fanü la, ye di efi nga ni. To ye mere e airi te ni de. Te ye ena anü amaka miri la, ye mala nga ni fefe, de engu ce kpa te ni, gbü ku sene asidi. ¹⁵ Teka ne de, angü wüh gü ni gbü ku sene bü kükürü bala. Ni mere siti ngü nda-ni de. Siti wü kpara zoro ni ka-wü nda-wü me-wü, ta te ni ngbü agbü sü ka-ani to kpa fügö ne. Fū ewü ayia akoro de ni gbü Ezepeto sene, acinzi ni asidi. Baka te ni ngbü sene, fū ewü ayia aza ni, agü gbü ku bü kükürü dene. Te di bala, si-ngü te ni ngbü di gbü ku sene, ah de neh ene? De ye mala nga ngü la fū mere miri, de ah fi nga ngü teka ni.”

¹⁶ Fū mene kpara te ngbü emere ambata fū mere miri, ayia aje ngü de te Yüsefa mala fū kiri ye, gü ba, roto kaka-na la de züka ngü gbü ye ne. Fū ah ayia amala nga nda-ye roto fū Yüsefa, gü ba dene, “Ni roto nda-ni te ni bi wü kuwu bata gbü nzö ni, de ambata gbü ye, ¹⁷ kpah de mere bi wü türü-e. Fū ni angbü enü de wü e la fū mere miri. Baka te ni ngbü enü tete, fū mere bi wü lu akoro, adoro wü e de gbü nzö ni la, anza 'buru.”

¹⁸ Fū Yüsefa ayia amala nga nda-ka roto la, gü ba dene, “De-ye deyí, nda-ye roto la, ngü gbügbü bane. Wü kuwu de bata, te ye bi gbü nzö ye la, ah de wü sikpi bata. ¹⁹ Fütanga sikpi bata, mere miri ena ai ye

engagira ye, amala ngbanga ka-ye. Fū ah amörö ye, agi kö ye te rü etikpi. Fū wü lu akoro angbü edoro kö ye la. Dela ngü gbü roto ka-ye la.”

²⁰ Kpah bala, fütanga sikipi bata, fū sikipi ka mere miri, ta te wüh yaka engu gbügbü ayia kpaḥ atī. Fū miri ayia amere karama teka sikipi la. Fū ah ayia ai wü angbe cögbörö wü kpara ka-ye 'buru. Fū ewü ayia akoro gbü karama la. Fū miri ayia atima wü kpara agbü ku, aza wü kpara ka-ye de 'basu ne, akoro di engagira ye, de wü angbe cögbörö kpara ka-ye la. ²¹ Fū mere miri ayia alügü mene kpara ka-ye, te ngbü eto e-manzö fū ye ne, gbü tima ka-ye, kpaḥ baka e te Yüsefa mala ne. ²² Fū mere miri ayia aza mene kpara ka ambata ne, amörö engu, aza kökö, agi te rü, kpaḥ gegege baka ngü te Yüsefa mala fū ewü la. ²³ Amba kpara te to e-manzö fū miri ne, du fi nga Yüsefa nda de. Ah mala ngari Yüsefa fū mere miri kpaḥ de, angü toto iri ka-ye teka ngü la eyi.

41

Dene ngü te Yüsefa mala nga roto ka mere miri ka Ezepe to di

¹ Fütanga re 'basu, fū mere miri ka *Ezepe to ayia aroto te engu rü ngbü kpa era mere ngu, de iri ye Nile ne. ² Fū ah aceka kpi, awu züka wü yiti lorozi, te ewü 'bo gegere 'duwa ba-neh-ene-la. Fū ewü akoro era ngu la, angbü da ezü e ka-wü. ³ Fū gara wü yiti kpaḥ lorozi, te ewü kürü akürü, jogo jogo bala, ayia akoro kpaḥ, efa nga wü bu wü era ngu sela. ⁴ Fū ewü de jogo jogo ne, ayia atī te wü züka ewü la, azüfa, anza 'buru. Fütanga ngü la, fū mere miri la ayia azükü gbü roto la.

⁵ Fū mere miri la adu kpaḥ, atī ara. Fū gara roto adu kpaḥ akoro gbü nzönzö. Fū ah aroto nzö-ndo lorozi, 'buru eküte lö-ndo biringbö. Fū nzö-ndo la azi jia ye areke afa sü 'buru mudu. ⁶ Fū wü gara lö-ndo lorozi adu kpaḥ adu, ao nzö ye kpaḥ lorozi. Amba mene nzö-ndo lorozi de sidi la, yavü ka-wü ayavü, ce bü caca na. ⁷ Fū wü ca-ndo la adu atī te züka nzö-ndo la, azüfa ewü, anza 'buru.

Dela wü roto ka mere miri te roto. Fū ah ayia azükü gbü roto ka-ye la.

⁸ Te kpi seke tete na, fū mere miri la adu angbü efi ngü 'duwa efa sü. Fū ah ayia ai wü mü rü landri de wü mü rü talara 'buru. Fū ah ayia amala nga wü roto la 'buru fū ewü. Fū ah adu ayi-ta ewü, de wüh sere nga si wü roto ka wü yiti, de wü ndo la, fū ni. Fū wü kpara la agiri si wü roto la ma, wüh maka sisi nda-wü de. Fū ngü ka roto la angbü fi bü esiti fingangü ka miri la, angü roto la fa wü kpara la eyi 'buru.

⁹ Fū kpara te ngbü eto e-manzö fū miri ne ayia aje ngü la. Fū ngü ka *Yüsefa ayia atī emamaguma, teka ngü ta te wüh gü ewü tete agbü ku ne. Fū ah ayia anü amala ngü fū mere miri, gü ba, "Wayi, mere miri ka-ani, ni de siti kpara. Angü ni mere siti ngü ta eyi fū ye. ¹⁰ Mere miri deyī, baka te ye kö ani, ake kpara ka ambata, gü agbü ku ne, ¹¹ roto koro ta gbü nzö ani 'basu mini kpala. Kpara ka ambata, roto nda-ye roto kpaḥ kpikpi ye, nda-ni kpaḥ kpikpi ye. ¹² Te ani roto roto la, gara engu *Ebere ta ladü agbü ku kpala, te ti de mü rü tima ka mere kpara ka wü marajümiya ka-ye la. Fū engu Ebere la ayia amala nga si wü roto ka-ani la 'buru fū ani. ¹³ Fū wü ngü te ta engu sere fū ani la, ayia amere te-wü fū ani kpaḥ 'buru bala. Angü ye za ni, alügü da tima ka-ni, baka ta te engu gina. Fū ye aza kpara ka ambata, agi engu, emörö te rü. Wü ngü la mere te-wü kpaḥ 'buru fanü baka ta te engu Ebere la mala fū ani. Dela ta ngü te mere te-ye, te ani roto tete agbü ku kpala.”

¹⁴ Te mere miri je ngü la bala, fū ah adu afi nga ngü, gü ba, te engu Ebere sere nga si roto ka kpara ka-ni reke areke bala la, ah ti asere nga si nda-ni roto ne de? Fū ah ayia 'duwa, atima wü kpara ka-ye kpa gbü ku la, ai Yüsefa. Fū ewü akpe de woro, anü amaka Yüsefa agbü ku la. Fū ewü aza engu, adürü nzönzö areke areke. Fū ewü aza züka bongo, ato tete, akoro de engu kpaka mere miri ka Ezepe to la.

¹⁵ Fū mere miri la ayia amala ngü fū Yüsefa, gü ba dene, "Ni roto gbü biti ne. Gbü fingangü ka-ni, roto la de ngü gbü ye. Amba gara kpara, de te ena asere si roto la fū ni, nda ma. Fū ewü ayia amala nga ye fū ni, gü ba, 'Ye ti eyi asere si-ngü gbü roto.' Fū ni ayia ai ye dene teka ngü la.” ¹⁶ Yüsefa gü ba dene, "Wayi bala, miri ka-ni, te Me le eyi la, ah ena asere si roto ka-ye la fū ni, angü ni ti asere si roto la fū ye, de tete-ni, de. Amba ni wu, gü ba, Me tima züka ngü eyi fū ye gbü roto ka-ye la, te ena agu maguma ye.”

¹⁷ Fū miri ayia amala nga roto la fū Yüsefa, gü ba dene, "Ni roto bala, te ni rü ngbü era mere ngu Nile ne. ¹⁸ Fū wü yiti lorozi, te ewü 'bo, gegere agegere 'duwa ba-neh-ene-la, fū ewü ayia akoro da ezü e ka-wü füh gümba, era mere ngu la. ¹⁹ Ni te edu awu kpala de, fū wü gara ewü, te ewü kürü akürü, kpaḥ lorozi, koro kpaḥ eyi. Ni wu wü yiti, te ewü kürü siti bala, gügü la fi de. ²⁰ Fū siti wü yiti la ayia atī te züka wü bu wü la, azüfa ewü 'buru. ²¹ Te wü siti yiti la züfa wü bu wü la nza tete na, wüh 'bo koro memere kpaḥ de. Wüh kürü ka-wü fi bü akürü, jogo jogo te nga wü la. Fütanga ngü la, fū ni ayia azükü.

²² Fū ni adu aroto kpaḥ te biri lö-ndo yaba nzö ye lorozi. Fū ah azi jia ye 'buru mudu tete. ²³ Fū ni adu kpaḥ awu gara lö-ndo, de nzö ye kpaḥ lorozi. Amba mene nzö-ndo la yavü ayavü, ce bü caca. ²⁴ Fū ca-ndo la ayia azüfa wü züka ndo la 'buru, anza ka.

Dela roto te ni roto. Fū ni amala nga roto la fū wü mürü talara 'buru. Fū roto la afa ewü 'buru. Kpara esüka ewü te ena asere si roto la fū ni nda ma."

²⁵ Fū Yüsefa ayia amala ngü fū mere miri la, gü ba, "Mere kpara deyi, wü roto de te ye roto 'basu la, si-ngü gbü ewü ka-ye ngbee biringbö. Me wu eyi, gü ba, gara ngü ladü kpa engagira nü, te ni, Me, ena amere. Fū ah akoro amala nga ngü la 'buru gbü roto ka-ye la, teka fū ye areke te-ye, angbü nzo. ²⁶ Wü züka yiti de lorozi, de wü züka nzö-ndo la, wüh ka-wü de wü züka wü re lorozi, te ena akpo enatikine. Si-ngü ka-ewü 'buru biringbö. ²⁷ Teka siti wü yiti, de siti wü nzö-ndo la, wüh de siti wü re ka kpiri tala, kpaḥ lorozi, te ena akoro fütanga züka wü re la. ²⁸ Si-ngü gbü ewü kpaḥ 'buru biringbö, baka te ni mala fū ye la.

Dela ngü te Me sere fū ye, teka ngü de te Me ena amere kpa engagira nü. ²⁹ Mene wü re de te ewü ena akpo enatikine baka wü re lorozi ne, ah ena adi 'buru de züka wü re, te wü kpara ena angbü de mere bi wü zü-e esaka wü afa sü, gbü Ezepeto sene. ³⁰⁻³¹ Fütanga ngü la, fū mere siti kpiri tala ayia ati gbü nzö wü kpara ka Ezepeto sene kpaḥ 'buru. Siti tala la ena amere wü kpara kpaḥ de wü re lorozi. Fū wü kpara angbü de mere cinga. Fū ewü angbü efi nga züka wü e, ta te ewü ngbü emere gbü züka wü re la ma. Wüh fi nganga, maka de, angü zü esaka ewü tine ma. Fū mere siti cinga la ayia afü kere wü kpara kerekere gbaa. ³² Ngü de te ye roto roto la tete dü 'basu ne, ah kükürü de, angü Me ngbü emala ngü la kpekpeke, gü ba, 'Ngü te ni ena amere la, ah ti ayiri nda tine de.' "

Dela ngü te Yüsefa mala fū mere miri ka Ezepeto la, teka roto kaka-na.

³³ Fū Yüsefa adu, anda'ba te-ye, ato fingangü fū mere miri la, gü ba dene, "Mere kpara deyi, ah ena areke afa sü, te ye ena areke te-ye mbi mbi mbi, gbü züka wü re de lorozi ne, teka mere kpiri tala te ena akoro ne. Te di bala, ah le de ye giri züka kpara ka-ye, te jijia mba amba, teka fū ye afe engu, ao gbü nzö wü kpara ka-ye 'buru. Fū kpara la angbü mere kpara fütanga ye. ³⁴ Ah ena adi bü nzö engu kpikpi ye ne de. Ah le de ye fe kpaḥ wü gara kpara, ao ewü fütanganga na, gbü nzö wü gara köti ka-ye biri biri

'buru, de wüh di ele ta-ngü te mere kpara la. Fū wü kpara la angbü ebiti wü e, eo gbü kafa ka-ye, ace ao bala, teka siti tala te ena akoro. Te ah de laki ka ndo, anga laki gara zü koro me-ye la, ah le de kpara ye süka e ka-ye la gbü wü 'buru, de ah za süsüka na biringbö, ah to fū ye. Fū ye aza ao, teka aküwa wü kpara gbü mere kpiri tala te ena akoro. ³⁵ Ah le de wü kpara di ebiti mere bi wü zü gbü kafa ka-ye bala, gbü wü re de lorozi ne 'buru. Fū ewü adi eceka kpü fütanga wü zü la aceka mbi mbi mbi ereke areke. Fū ah angbü kpara, ³⁶ angü mene gara re lorozi, de te ena akoro sidi nga engu la, ah ena adi tine siti wü re. Te ye mere bala la, wü kpara ena angbü ekoro, adi emaka wü e 'buru kpara ye. Fū ewü aküwa esaka mere kpiri tala la. Dela ngü te ni fi, gü ba, ah ti ati de ye mere bala."

Dela ta fingangü te Yüsefa to fū mere miri ka Ezepeto, teka kpiri tala te ena ati gbü nzö wü kpara ne.

Dene ngü te mere miri o Yüsefa tete, mere kpara gbü Ezepeto

³⁷ Fütanga ngü te Yüsefa mala fū mere miri la, fū ngü la ayia ati gbü jia miri 'duwa kpini. Fū wü angbe cögbörö kpara kaka-na ale kpaḥ ngü la bala. ³⁸ Fū miri adu amala ngü fū wü angbe cögbörö kpara ka-ye la, gü ba dene, "Züka ngü! Wü ceka la komoko la! Engu de kpeke kpara, te Me to wazi fefe na me-ye. Ni ena aza engu, ao kpara te ena adi ebiti wü e la me-ye gbü Ezepeto sene. Angü ani ti amaka kpeke kpara bakaka la nda-ani de."

³⁹ Fū mere miri la adu amala ngü fū Yüsefa, gü ba dene, "Yüsefa deyi, ni wu eyi, gü ba, ye de kpeke kpara, te ye wu ngü eyi fa sü, angü Me gü tamu ngü, de te ena amere te-ye kpa engagira nü, ne eyi fū ye. ⁴⁰ Te di bala, ni ele ao ye fütanga ni, teka fū ye angbü gbü nzö wü sü ka-ni ne 'buru, de wü kpara ka-ni ngbü 'buru esaka ye."

⁴¹⁻⁴² Fütanga ngü la, fū mere miri la ayia 'duwa, aza tungü ka miri ka-ye, ato te jikpa Yüsefa. Fū ah amala ngü fefe na, gü ba, "Titine, ni o ye eyi mere kpara gbü sü ka-ni ne 'buru." Fū ah adu kpaḥ aza mere bi züka wü bongo ka-ye, ato fū Yüsefa. Fū ah aza züka mangba'da gbü diki-se, agü gbü ngüngürü na. ⁴³ Fū ah aza arabiya, te wü nü ngbü egbeke, ato kpaḥ fū Yüsefa. Te wü kpara wu Yüsefa da enü de arabiya la, fū ewü angbü 'buru da emi koko, de wü karayi, da egbo nga iri Yüsefa di.

⁴⁴ Fū miri la adu amala ngü fū Yüsefa, gü ba dene, "Yüsefa deyi, ni o ye eyi fütanga ni. Kpara gbü Ezepeto sene, te ena amere ngü eta kuru jia ye, ena adi ma. Ni to wazi eyi fū ye, teka amere tala la di 'buru. Gara

kpara te ena ayi-ta ye, gü ba, 'Ye mere ngü bala, neh teka ne?' ne, ah ena adi kpara ma. Te kpara le amere ngü sene la, ah ena ayi-ta ye feke. Dela ngü te ni, mere miri, mala me-ni bala."

⁴⁵ Fū mere miri la adu agü iri Yüsefa tīne Zafenata-Paneya, te di de iri ka wü Ezepeto. Fū ah adu aza gara jaji wūrüse de iri ye Asenata, ato fū Yüsefa, de ah ngbü wara ka tete. Asenata ta de ye gara mere kpara, de iri ye Potifera.*

⁴⁶ Dela ngü ta te mere miri ka Ezepeto fe Yüsefa tete, ao engu gbü nzö wü sü ka-ye 'buru, o re ka Yüsefa di ta la bü ngbee teke biri de fūh ye nzükpa. Fū Yüsefa angbü endoro te nga nzö wü köti ka Ezepeto la 'buru, da eceka tima ka ndo, te wüh ngbü ebiti gbü wü sü la tīne 'buru me-ye.

⁴⁷⁻⁴⁸ Fū wü Yüsefa akpo de tima ka-wü la, angbü da endoro, da ebiti wü zü la, angü wü kpara mere zü ta gbü wü re la 'duwa ba-neh-ene-la. Fū wü e ari tīne 'duwa ba sirimbi la. Fū e angbü köto 'duwa faaa! Fū wü kpara angbü eto wü e la, fū wü Yüsefa angbü ebiti gbü wü kafa ka mere miri, te wüh ji te nga wü nzö köti la 'buru. Fū wü Yüsefa angbü emere tima la kpini kpini bala, teka wü re lorozi la 'buru. ⁴⁹ Fū wü kafa la asi 'buru de wü e gbü wü gbe gbe gbe, dada te wüh ena atanga nda tīne ma.

⁵⁰⁻⁵² Gbü züka wü re lorozi la, fū Yüsefa ayia abī wü jaji komoko 'basu ake wara ye, Asenata ne. Fū Yüsefa agü iri gina ye ye la Manase, gü ba, "Siti ngü ta te wü di engu ni ni mere ni di ne, ni ce eyi fū ewü 'buru." Fū engu adu agü iri e'ba'basu na la Efürayīma, gü ba, "Me to wazi eyi fū ni. Ni sibi eyi gbü sü, ta te ni maka mere cinga tete na ne."

⁵³ Fū mene züka wü re de lorozi la ayia anza. ⁵⁴⁻⁵⁵ Fütanga ngü la, fū mere siti kpiri tala ayia ati gbü nzö wü kpara, kpara baka ngü ta te Yüsefa mala ne. Fū tala la angbü eyükü sü gbü sü ka wü Ezepeto 'duwa ayükü. Fū ah ati kpara gbü nzö wü kpara te nga wü gara sü fūh kotö la nde 'buru. Fū wü kpara ka Ezepeto aci 'buru de gba. Fū ewü akpo angbü enü kpaka miri, angbü eku gba fefe na teka e-mazü. Angü e-mazü ka-ye duu gbü kafa ka mere miri ka Ezepeto la. Fū miri la angbü etima ewü kpaka Yüsefa, gü ba, "Wü nü, wü se e esaka Yüsefa la, teka fū wü aküwa." ⁵⁶ Te Yüsefa wü bala, fū ah ayia aü mö wü kafa, akpo da ecinzi wü e la fū wü kpara. ⁵⁷ Fū gara wü kpara angbü wü gara sü angbü kpara ekoro da ese wü e kpaka Yüsefa gbü Ezepeto sela, angü tala ti ta te nga wü sü fūh kotö ne 'buru.

42

Dene ngü ka wü Yüsefa de wü di engu ni ye

agbü Ezepeto

¹ Ta gbü wü re ka mere kpiri tala la, wü *Yakobo, wö ye *Yüsefa, ngbü ka-wü ta fi agbü tö ka wü *Kanana kpala. Baka te mere kpiri tala la ti tete, fū tala la azoro sü, akoro agbü tö ka Kanana kpara 'buru. Fū tala la angbü emere wü Yakobo agbü Kanana kpala 'duwa ba-neh-ene-la. Fū Yakobo ayia aje ngü, gü ba, "Ndo ladü agbü *Ezepeto." Fū ah ayia amala ngü fū wü di ye, gü ba dene, "Wü di ni deyi, ah mere neh baye, te wü ngbü bü eceka kpi, da ekpi tala de bane ne? ² Wü yia eyia, wü nü agbü Ezepeto, wü se mba ndo, adu di, fū ani ezü ka tala te ani ke. Angü ni je eyi, gü ba, ndo ladü agbü Ezepeto kpala."

³ Fū wü didi ayia ale ngü la. Fū ewü ayia baka wü kpara nzükpa, anü agbü Ezepeto, teka ase ndo. ⁴ Amba Yakobo le de Benzamina, te di de zu engu ni ye Yüsefa ne, mere e anü gbü nga wü di engu ni ye la nda de, angü gara siti ngü ena amere engu te kaje. ⁵ Fū wü di Yakobo la anü amaka te-wü de wü gara wü bu wü, te ewü ngbü kpara enü ase nda-wü jia ndo agbü Ezepeto la. Angü mere tala la ti gbü tö ka Kanana kpara 'buru.

⁶ Amba Yüsefa, mü ka-mü ta mere kpara fütanga mere miri ka Ezepeto la. Mü kpara me-mü de kpara te ngbü ecinzi wü ndo la. Wü kpara 'buru, te ewü ngbü enü ese ndo ne, ngbü ekoro kpaka Yüsefa feke. Te di bala, fū wü di engu ni ye na ayia akoro kpara kpara kaka na, teka ase ndo ka-wü. Fū ewü ayia abu nzökuta wü engagira Yüsefa, angbü ecu ngüngü. Amba wüh wu ta, gü ba, Yüsefa de engu ni ani, ne nda-wü de.

⁷⁻⁹ Fū Yüsefa ayia awu wü di engu ni ye teke. Fū ah angbü eceka ewü, te ewü ngbü ebuka gbüra wü, da ecu ngü ye ne. Fū ah afi nga roto ka-ye, ta te engu roto ne, amaka. Fū ah ayia amere mani, afü te-ye fū ewü baka ganzi kpara, da emala ngü fū ewü gbü mö ka wü Ezepeto. Fū gara kpara angbü efü ngü la, gbü mö ka wü *Ebere. Fū Yüsefa angbü emala ngü fū ewü 'duwa kuwa kuwa bala, gü ba dene, "Yi koro neh kaye?"

Fū ewü alügü ngü, gü ba dene, "Ani koro ka-ani agbü Kanana, agiri mba engu ndo, ase." Yüsefa gü ba dene, "Yi ngbü esu kayi wu! Yi de wü mürü mani! Yi koro sene de mani, awu tö ka-a ne, teka adu amala ngangana fū wü vügü!"

* 41:45 41:45 Potifera ta de kpara te di de mürü gele ka Ono.

¹⁰ Wüh gü ba dene, “Mere kpara, ah bala de. Ani koro ka-ani bü nzò teka ase ndo. Ani de wü mürü mani nda-ani de. ¹¹ Ani ka-ani 'buru de wü di kpara biringbö. Ani de züka wü kpara. Fanü fanü, ani su wu de.”

¹² Yüsefa gü ba dene, “Wü ngbü esu ka-wü dela wu! Wü ka-wü nda-wü wü mürü mani fanü! Wü ena adu amala nga tò ka-ani ne fū wü vügü ka-ani!”

¹³ Wüh gü ba dene, “Mere kpara deyī, ani enda'ba te-ani fū ye. Ani su wu nda-ani de. Ani ka-ani 'buru de wü di kpara biringbö. Wö ani bi ani ta baka wü kpara nzükpa de fūh ye 'basu. Fū gara engu ni ani biringbö ayia adürü. Ambadu ka-ani ladü kpa eköti, kpaka wö ani, agbü Kanana kpala.”

¹⁴ Yüsefa gü ba dene, “Wü ngbü fi bü esu wu, neh teka ne? Ni wu eyi, gü ba, wü de wü mürü mani! ¹⁵⁻¹⁶ Te ah bala, ni ele awu ngü ka-wü la mbi mbi mbi. Ni ena aza wü, agü 'buru agbü ku. Fū ni awu la ngü ka-wü la. Angü wü mala eyi fū ni, gü ba dene, ‘Gara engu ni ani kpah ladü kpaka wö ani kpala.’ Te di bala, ni ele awu engu ni wü la cu de jia ni feke. Gara süka wü biringbö nü za engu, koro di fū ni. Te ah koro de engu eyi la, fū ni awu, gü ba, wü mala eyi zu ngü fanü fanü. Fū ni ace kpa te wü. Te ah du koro de la, amba wü ka-wü de wü mürü mani.” Fū Yüsefa akina lö mere miri ka wü Ezepeto la, gü ba, “Te yi koro de engu de la, yi du agbü Kanana kpah de. Yi ena angbü gbü ku sene, zalü te ma ena awu engu ni yi la cu de jia ra.” ¹⁷ Fū Yüsefa ayia aza ewü, agü agbü ku. Fū ewü ara kpala sikpi bata.

¹⁸ Fütanga sikpi bata la, fū Yüsefa atima kpara de wüh za ewü, koro de ewü engagira ni. Fū ah arü amala ngü fū ewü, gü ba dene, “De-wü deyī, ni ele aküwa wü, angü ni ka-ni de kpara ka Me. Te di bala, ni ele ngü biringbö de wü mere, fū ni ace kpa ni te wü. ¹⁹ Ni le de gara süka wü biringbö ngbü ciki gbü ku sene. Fū gara wü la ayia ago de ndo fū wü kpara ka-wü de kpa eköti la, de wüh zü ka tala. ²⁰ Te wü du koro eyi kpa eköti la, de wü za engu ni wü engu la, du di fū ni kpakine. Te ni wu mbarase la eyi cu de jia ni la, ni ena awu, gü ba, ngü ka-wü eyi fanü, fū ni ace kpa te wü.” Te wüh je ngü la, fū ewü ayia 'buru ale ngü la.

²¹ Fütanga ngü la, fū ewü akpo da ero mö esüka wü sela, gü ba dene, “Yi ceka la! Mere kuru koro kpah eyi eküte nih dene! Maguma Me siti eyi eküte nih, teka mere *siti ngü, ta te nih mere eküte Yüsefa ne. Angü ah ku gba ta te-ye eyi fū nih ma, nih le ngü tete na de. Nih wu cicinga na

kpah de. Dela eyi mere siti dürü ngü kanih, te nih mere.” ²² Fū Rübena ayia amala ngü fū wü di engu ni ye la, gü ba dene, “Ni mala ta fū wü eyi, gü ba dene, ‘Ani mere e amere siti ngü fū mbarase la de.’ Wü le aje ngü, de ta te ni mala fū wü ne, 'buru 'dö de. Enatikine ani maka mere siti kuru eyi gbü ngü la.”

²³ Yüsefa, mü ngbü eje ngü, de te wü di engu ni mü ngbü emala esüka wü, la nde 'buru. Amba wüh wu bala nda-wü de, angü Yüsefa ngbü emala ngü fū ewü 'buru gbü ganzi mö. Fū gara kpara angbü efü ngü la fū ewü. ²⁴ Te Yüsefa je ngü de te ewü ngbü emala la, fū ziki'di gba ayia amo engu. Fū ah ayia afü kpa ekere e, angbü eku gba kpala, angü wüh ena awu ngura gbü jia ni wu. Fū ah aku gba kpala baaala, ayia atüka te-ye, adu kpaka wü di engu ni ye. Fū ah adu aza gara süka ewü de iri ye Simiyona ne, ai engu gbü jia ewü sela, agü agbü ku. Fū ah ace kpa te wü bu ye na.

Dene ngü teka dudu ka wü di engu ni ye Yüsefa agbü Kanana

²⁵ Fütanga ngü la, fū Yüsefa ayia amala ngü fū wü mürü tima ka-ye, gü ba dene, “Wü nü enü, wü cö ndo gbü wü kombo ka wü kpara ne, de wü to kpah gara emazü fū ewü teka kaje.” Amba Yüsefa le aza jiase esaka wü di engu ni ye la nda de. Fū ah afi nga mani, amala fū wü kpara ka-ye la, gü ba, “Wü kpara ka-ni deyī, te wü za jiase ka wü kpara la eyi la, de wü za jiase la, lügü fū ewü zirri, gbü mani, gbü kombo, gbü jia ndo ka-ewü la.” Fū wü kpara ka Yüsefa la adu amere kpah bala.

²⁶ Fū wü di engu ni ye Yüsefa ayia abī jia ndo ka-wü gbü wü kombo la, ao füh wü dongi ka-wü, angbü ego di kpa eköti.

²⁷ Te wüh ngbü ego tete na, fū sü atī te ewü te kaje. Fū gara süka ewü ayia afuru mö kombo ka-ye, teka acö jia ndo, ato fū dongi ka-ye. Ah ga, ni ceka kpi de, gbo! te jiase ka-ye gbü jia ndo la. ²⁸ Fū ah adu amala ngü fū wü di engu ni ye, gü ba dene, “Wü di engu ni ni deyī, wü ceka la! Nda-ni jiase, de te ni se ndo di ne, ka-ye ladü dene!” Fū ewü aci 'buru angbü eyi ayi ka cürü. Maguma ewü tine kpo ma. Fū ewü agü ba dene, “Ata! Me mere fū ani de bane neh ene ngü ne?”

²⁹ Fū ewü ayia ago akoro kpa eköti, kpaka wö wü, agbü *Kanana. Fū ewü ayia amala nga ngü la 'buru fū wö wü, gü ba dene, ³⁰ “Wö ani deyī, ngü mere ani agbü Ezepeto kpala fa sü. Komoko de kpala, te di de mere kpara ka wü Ezepeto, te ngbü ecinzi ndo ne, ngbü emala ngü fū ani 'duwa kuwa kuwa bala. Ah gü ba, 'Ani de siti wü kpara. Ani koro gbü mani, awu

sü ka-ani.' ³¹ Ani gü ba, 'Ah bala de. Ani de müürü mani nda-ani de. Ani de züka wü kpara, te ani yia cu agba wö ani. ³² Ani 'buru wü di kpara biringbö, angü wüh bi ani 'buru nzüka de fuh ye 'basu. Fü gara enga ni ani ayia adürü. Amba gara na ladü kpa eköti akine.' ³³ Mere kpara la gü ba dene, 'Ni ele awu ngü te ani mala ne cu de jia ni. Te ah bala la, ni ele fü Simiyona angbü ciki kpala, de du ani ne lügü nga wü, du de jia ndo fü wü kpara ka-ani kpa eköti, teka tala.' ³⁴ Ah gü ba dene, 'Te ani du koro eyi kpa eköti kpakine la, de ani za enga ni ani, Benzamina ne, du koro di, teka fü ni awu engu cu de jia ni. Te ni wu engu eyi la, fü ni ale, gü ba, ngü ka-ani, ka-ye fanü. Fü ni adu ace kpa te Simiyona, teka fü ani adu tîne, angbü ese wü e-mazü ka-ani ba e te ani ngbü ele.' Dela ngü de te mere kpara ka wü Ezepeto la mala fü ani kpala. Fü ani ayia alügü nga ani, adu akoro dene.' Dela ngü te wü di enga ni ye Yüsefa mala fü wö wü.

³⁵ Baka te ewü kpo ngbü eü wü kombo ka-wü, teka afü jia ndo la gbü wü gara e ne, wüh te eceka de, gbo! te jiase ka-ewü, ta te ewü se ndo di ne, ka-wü 'buru ladü te nga wü biri biri 'buru. Te wüh wu jiase la, fü ewü angbü de mere cürü te wü, de wü wö wü 'buru.

³⁶ Fü wö ewü, Yakobo, ayia amala ngü fü ewü, gü ba dene, 'Yi ceka la bü mere siti cinga de eküte ra ne! Yüsefa dürü kphah eyi! Simiyona dürü kphah eyi! Yi yia kphah eza Benzamina esaka ra asidi! Ma ena amere ngü ra tîne neh fe? Yi ena aza engu, adu di kpala, amere de engu neh ene? Öö! Wüh le amörö wü di ra ne anza fere le 'buru?'

³⁷ Fü Rübena ayia amala ngü fü wö ye, gü ba dene, 'Wö ni deyï, ah bala de. Ye to Benzamina esaka ni, de ni ceka kpi fütanganga na me-ni. Ye fi nga ngü de. Angü engu ti akpi de. Ni ena adu de engu, akoro di kpaka ye akine. Te ni du koro de engu de la, de ye za wü di ni de 'basu ne, ye mörö ewü asidi dada na.' ³⁸ Yakobo gü ba dene, 'A'a! Ni le bala de! Ye ni Benzamina nü de! Angü ni ewü bi ewü ngbee 'basu ake Yüsefa. Yüsefa kpi kphah eyi. Dudu esaka ni ngbee biringbö dene. Te siti ngü mere engu esaka wü kpa te kaje la, ni ena amere dela tîne neh baye? Engu dela, ni ena akpi tîne ka mere cinga de? Ye ni, Benzamina, ti anü de wü kpala de! Ni mala eyi dela!'

43

Dene ngü ka Yüsefa ake Benzamina

¹⁻² Fütanga ngü la, fü wü *Yakobo ayia angbü ezü ndo, ta te wüh koro di agbü

*Ezepeto ne, anza. Amba mere kpäri tala la ka-ye fi ladü. Fü Yakobo ayia amala ngü fü wü di ye, gü ba dene, 'Wü di ni deyï, wü du la kphah edu agbü Ezepeto, teka ase gara jia ndo, adu di fü ani.'

³ Fü *Yuda ayia amala ngü fü wö ye, gü ba dene, 'Ani ena amere neh baye? Angü mere kpara de ka wü Ezepeto la mala ta ngü fü ani eyi kpekpeke, gü ba dene, 'Te ani le adu kpaka ni kpala la, ah le de ani za enga ni ani, Benzamina, du di kpo. Te engu ma la, de ani mere e adu akoro kpala tîne de.' ⁴ Te di bala la, te ye le eyi de ani du kphah, ase gara ndo kpala la, ah le de ani nü tîne de wü Benzamina. ⁵ Te ye le de la, ani ti te ani ena anü kpala kpi kpi ani nda-ani kphah de, angü komoko la mala ta ngü fü ani eyi 'duwa kpekpeke, gü ba dene, 'Te ani du kpala kpi kpi ani la, ah ena adi esiti.'

⁶ Yakobo gü ba dene, 'Anga yi mala nga enga ni yi fefe na, neh teka ne? Te engu di ka-ye ta kpa eköti akine ne. Dela siti ngü! Yi to mere cinga te ra bala, neh teka ne?' ⁷ Wüh gü ba dene, 'Wö ani deyï, komoko la ngbü ta eyi-ta ani 'duwa kpini kpini, teka wü ngü de kpa gba ani kpakine ne 'buru, gü ba dene, 'Wö ani ladü de jia ye? Anga gara enga ni ani kphah ladü?' Te mere kpara yi-ta ngü bala la, de ani nga tîne bü anga? Ani wu ta neh kpo, gü ba, engu ena ayi-ta ani teka Benzamina, de ani du koro de engu? Ani wu bala de. Dela singü te ani mala ngangana na tete na.'

⁸ Fü Yuda ayia amala ngü fü wö ye, agü ba dene, 'Wö ani deyï, ye ce kaje fü Benzamina, de ani nü de ewü, ase ndo, angü ani ena akpi anza de wü jaji ka tala. ⁹ Ni ena adi eceka kpi fütanga Benzamina me-ni, zalü te ani ena adu akoro de ewü kpaka ye akine. Te ni du koro de engu de la, de liya engu la ngbü tîne gbü nzö ni fi mere badi. ¹⁰ Te di bala, ah le de ani nü 'duwa anü enatikine, angü ani du ra eyi fa sü dene. Te ye ena angbü ta etiri engu de la, de ani nda nga ani agbü Ezepeto dene eyi du 'basu.'

¹¹ Yakobo gü ba dene, 'Te ah bala la, ah le de wü mere wü ngü bane. Wü za wü züka wü e, te di kpa gbü sü de sene ne, ba *se-mü, bete züka wü ri-rü, de wü gara rü ka wuru de se ye, bete kölökö ka wü. Dela wü e te ewü ena aza, anü di, ato fü mere kpara la, baka takpa ka-wü fefe na. ¹² Wü za kphah mere bi jiase, teka ase ndo di. Fü wü aza kphah gara jiase, da engu ta te wüh lügü gbü kombo ka-wü ne. E-wu neh da, wü kpara la mere ngü la gbü iri-to. ¹³ Kphah bala, ah le de wü za enga ni wü, Benzamina, eza gbü nga wü. De wü yia 'duwa enatikine, anü agbü Ezepeto, kpaka komoko la. ¹⁴ Mere

Me di de wü, de gbüra wü reke gbü jia komoko la areke, de mamagama gu eküte wü agu. Fü ah alügü engä ni wü, de te engu zoro, tirí o de kpala ne. Kpah bala, Me gu mamagama, de engu mere e ato kpa ye te Benzamina kpahe de. Wü nü enü, Me ladü. Te wü kpara le amörö Benzamina la, wüh mörö emörö.”

¹⁵ Fü wü di Yakobo ayia 'duwa kere, aza wü takpa la, areke 'buru, aza kpahe jia, ta te wüh lügü fü ewü gbü kombo ne, bete gara jia, te ewü ena ase ndo di. Fü ewü ayia tüne de wü Benzamina, anü agbü Ezepeto.

Te wüh koro kpala, fü ewü anü kürrü, asere te-wü kpaka *Yüsefa. ¹⁶ Te Yüsefa wu Benzamina esüka wü di engä ni ye la, fü ah ayia amala ngü fü mere müri tima ka-ye la, gü ba dene, “Ye wu eyi, wü komoko ne, wüh de wü ngba ka-ani. Ye za ewü, ye du de ewü kpa eköti. De ye nü, ye za mere siti yiti, ye wa, de wüh mere fü ani. Angü ani ena azü e ka türa enatikine de ewü.” Amba wü di engä ni ye Yüsefa wu engu nda-wü la fi de. Ah gbü jia ewü ka-ye ba ganzi kpara la. ¹⁷ Fü müri tima ka Yüsefa la ayia aza ewü, anü de ewü kpa gba Yüsefa, kpahe baka ngü te engu mala fefe na la.

¹⁸ Te wüh koro te möngiti 'baranga ka Yüsefa, fü mere cürü akpo ari te wü, angü wüh ngbü efi, gü ba dene, “Wüh ngbü efiti ani, ari de ani kpala, teka azoro ani gbü iri-to, akö wü nü ka-ani 'buru, adu afü ani, ao labi ka-wü te. Ani wu de, anga maguma ewü ngbü esiti te ani ne, teka jia ka-ewü, ta te ewü lügü fü ani gbü jia ndo ne?” ¹⁹ Fü ewü ayia ace te-wü, arü ka-wü ciki emöngiti 'baranga la, gü ba, te ani ri kpala la, wüh ena azoro ani.

Fü ewü amala ngü fü komoko ka Yüsefa la, gü ba dene, ²⁰ “Mere kpara, mba engä ngü ladü kpaka ani cükü'daye, te ani le amala fü ye. Ani koro ta sene, ase ndo. Te ani se ndo la, fü ani alügü nga ani, angbü ego, ²¹ fü sü atí te ani, fü ani ara te kaje. Gbü bití la, fü ani ayia afuru mö kombo ka-ani ciki gbü sü la, teka ato ndo fü wü nü ka-ani. Fü ani ayia amaka jia, ta te ani se ndo di, ne 'buru da ye, gbü kombo ka-ani. Jia se la, ani za du koro di kpahe eyi esaka ani sene. ²² Ani du koro dene kpahe de gara jia, ase gara ndo di, angü ani wu mene kpara, de ta te o jia se la gbü kombo ka-ani, ne nda-ani de.”

²³ Fü komoko la alügü ngü fü ewü, gü ba dene, “Ngü ma. Wü kpe cürü de. Angü jia se de ta te wü se ndo di de sene ne, ah ka-ye nda ladü esaka ni. E-wu neh da, ah

ena adi dela Mere Me, te za jia se la me-ye, lügü gbü kombo ka-wü la.” Te wüh je ngü la bala, fü ewü ayia ari anü kpa eköti la. Fü komoko la ayia anü aza Simiyona, akoro di fü ewü.

²⁴ Fü wü müri tima la ase ngu, ato fü ewü, fü ewü azürü lö wü di. Fü ewü ato kpahe e fü wü nü ka-ewü, azü. ²⁵ Fü wü di engä ni ye Yüsefa ayia aza wü takpa ka-wü, te ewü koro di fü mere kpara la, ao nzo, angü wüh wu eyi, gü ba, “Ani ena azü e enatikine gbü ra ne, de wü mere kpara la.” ²⁶ Etü ra la, fü Yüsefa adu akoro agba ye. Fü wü di engä ni ye na ayia akoro kpakaka na la, afüwa te-wü, abuka gbüra wü köto, acu ngüngü na. Fü ewü aza wü takpa la, ato fefe na. ²⁷ Fü Yüsefa agü mandí fü ewü, ayi-ta ewü, gü ba dene, “Yi 'buru mbi? Wö yi, ta te yi mala nganga, gü ba, ah gbe eyi ne, ah kpahe ladü mbi?” ²⁸ Fü ewü alügü ngü, gü ba dene, “Wayi, mere kpara, engu ladü mbi.” Fü ewü adu kpahe abuka gbüra wü, acu ngüngü na.

²⁹ Fü Yüsefa ayia aceka kpi, awu Benzamina, te di de zu engä ni ye guvu ni ye ne. Fü engu ayi-ta ewü, gü ba dene, “Dela engä ni yi, de ta te yi mala nganga na ne?” Fü ah ayia amala ngü fü Benzamina, gü ba dene, “Enga ra, Me di de mü.” ³⁰ Fü cinga Benzamina ayia ari tete 'duwa ba-neh-ene-la. Fü ngura akpo angbü ekoro gbü jia. Fü ah ayia sela bü ferrre, ari kpa esambü ka-ye ka rara, angbü eku gba kpala. ³¹ Nganga yiri kpahe de, fü ah adu atüka te-ye, aza ngu, azürü gbüra ye di, adu kpahe akoro angbü kpaka ewü kpala. Fü ah adu amala ngü fü wü müri tima ka-ye, gü ba dene, “Wüh koro de e-mazü ekoro fü ani.”

³²⁻³³ Fü wü kpara kaka-na akö dangbüngbü, ado areke teka e-mazü la. Fü ewü aza mere züka da-ngbüngbü la, agü fi fü gina ewü. Fü ewü adu agü nda wü gara la fi bala, te nga re ka-ewü, zalü akoro di te ambadu. Fü ngü la ayia aga gbü jia ewü 'duwa ba-neh-ene-la, wüh gü ba, “Komoko ne wu ani te nga re ka-ani, neh baye baye?”

Fü wü müri tima ka Yüsefa akoro de e-mazü la. Fü ewü ato nda Yüsefa kpahe kpikpi ye. Fü ewü adu ato nda wü di engä ni ye kpahe kpikpi ye. Fü ewü ato nda wü gara wü kpara ka Ezepeto la kpahe kpikpi ye. Angü wü kpara ka Ezepeto zü e te sü biringbö de wü *Ebere nda-wü de, angü gele ka wü Ebere gbü jia ewü esiti.

³⁴ Fü Yüsefa adu aza kpahe nda-ye züka so, de te engu ngbü ezü ne, ato fü wü di engä ni ye la, te nga ewü 'buru. Ah to

* **43:34** 43:34 Wüh gü ba, Yüsefa to ta so fü Benzamina, fa nda wü di engä ni ye na la, du 'buruve.

nda Benzamina 'duwa gbe,* fa nda wü di engu ni ye la ka. Fü ewü azü e la, asika di 'duwa ba-neh-ene-la. Fü ewü ato kpah fi, fü ewü anzö. Fü ewü ayia angbü tîne de mere tadu ka fi gbü jia wü la.

44

Dene ngü te Yüsefa re maguma wü di engu ni ye di

¹ Fütanga ngü la, fü *Yüsefa ayia afi nga gara mani. Fü ah amala ngü fü müürü tima ka-ye la, gü ba dene, "Ani ena amere gara mani fü wü kpapa la. Ye nü enü, ye kö kombo ka ewü la 'buru, de ye nü di, ye cö ndo gbügbü na 'buru gbe gbe gbe. Te wüh to jiasse eyi fü ye la, de ye za, ye o lügü gbü wü kombo ka-ewü, te nga ye biri biri 'buru. ² De ye nü, ye za kpah mere züka ndü'ba ka-ni, de ye wo gbü ndo gbü kombo ka jia ndo ka ambadu ewü la." Fü müürü tima ka Yüsefa la ayia amere wü ngü, de te engu mala fefe na la, kpah 'buru bala. Fü kpí ayia aseke.

³ Kpurutokokpi la, fü wü di engu ni ye Yüsefa ayia areke te-wü, akö wü kombo ka-wü, ao füh wü nü ka-wü. Fü ewü ayia agü mandí fü wü Yüsefa, ayia ace ewü, atí te kaje, ego.

⁴ Kpah baka nga ngü ne, fü Yüsefa ayia ai müürü tima ka-ye la, amala ngü fefe na, gü ba dene, "De-ye deyí, ye kpe ekpe, ye fa nga wü kpapa la. Te ye maka ewü eyi la, de ye mala ngü, to cürü guvu ewü, gü ba dene, 'Wü mere dela bala neh ene ngü ne? Baka te ani mere fü wü züka ngü, wü du mere nda-wü siti ngü fü ani, neh baye baye? ⁵ Wü nü zi ndü'ba ka mere kpapa ka-ni, neh teka ne? Te ndü'ba la di ka-ye nda kü ndü'ba kaka, te engu ngbü enzö e ka-ye gbügbü, da ewu wü ngü gbügbü na ne? Wü mere dela eyi 'duwa *siti ngü, te tí de!' " Dela ngü te Yüsefa mala fü müürü tima ka-ye la.

⁶ Fü komoko la ayia ale woro fütanga ewü, anü amaka ewü kpa te kaje la. Fü ah ayia amala ngü fü ewü, gü ba dene, "De-wü deyí, ah mere neh baye te wü zi e ka mere kpapa ka-ni, akpe anü sü di ne?"

⁷ Te wüh je ngü la bala, fü ewü ace te-wü, arü, alügü ngü fefe na, gü ba dene, "Apa! Mere kpapa! Mü mala de bala mene ngü de baye? A de müürü zi nda-a de. A zi e ka-ye nda-a kpah de. ⁸ Mü ceka la, jiasse ta te a maka gbü kombo ka-a ne, a du koro di sene. A mala ngangá fü mü de? Te di bala ne, a ena adu azi kpah e ka mere kpapa baka e la, neh baye baye? ⁹ Te ah bala la, mü koro ekoro, agírí kpí gbü wü kombo ka-a ne. Te mü maka ndü'ba la eyi gbü kombo ka gara kpapa esüka a la, engu me-ye de müürü zi, de ye mörö engu

asidi! Fü wü du a ne adu angbü tîne 'buru labí ka-yi." ¹⁰ Müürü tima la gü ba dene, "Wayi, yi mala eyi mbi! Ma ena agírí kpí gbü wü kombo la agírí. Amba ma ena aza bü nzö müürü zi, te ma ena amaka ndü'ba la gbü kombo kaka-na ne, te ma ena adu de engu kpikpi ye, ao labí ka-a tete. Wü bu ye na ago ka-wü fi ago agba wü."

¹¹ Fü ewü ayia 'duwa, abi wü kombo ka-wü, ao kótö. Fü ewü atí te mö ewü, afufuru 'buru asidi, de müürü tima la koro gírí kpí gbügbü na. ¹² Fü müürü tima ka Yüsefa la akpo angbü egírí kpí gbü wü kombo ka-ewü la, biri biri 'buru. Ah kpo te gina ewü, zalü koro di te Benzamina, te di de ambadu ewü ne. Ah te ekoro te nda Benzamina, fü ah ayia aceka kpí bane, gbo! te ndü'ba gbü kombo kaka-na. ¹³ Te wü di engu ni ye na wu ndü'ba ka mere kpapa la gbü e ka Benzamina, fü ewü aci 'buru de gba, atí te bongo ka-wü eküte ewü ne, angbü esösörö. Fü ewü adu akö wü kombo ka-wü la 'buru, ao alügü kpah füh wü nü ka-wü, alügü nga wü, adu 'buru agba Yüsefa.

¹⁴ Te wüh du koro kpala, wüh maka Yüsefa, te ngbü ka-ye fi ekóti sela. Fü ewü ayia 'buru, atí kótö, da efüwa te-wü fü Yüsefa. ¹⁵ Fü Yüsefa ayia amala ngü fü ewü, gü ba dene, "De-wü deyí, wü mere de bala neh ene ngü ne? Ngü la gbü jia wü kpala baka züka ngü? Ni ka-ni de müürü talara. Me gü tamu ngü la eyi, fü ni awu akine." ¹⁶ Fü *Yuda ayia amala ngü fü Yüsefa, gü ba dene, "Mere kpapa, ngü gömö ani, te ani ena amala fü ye ne, ah tîne ma. Ye wu la mba cinga ani. Ani de siti wü kpapa. Ani fi, gü ba, Me to kuru fü ani, teka siti ngü te ani mere gügü ne. Te di bala, gara ngü te ani ena amala nda ma. Ye gu la maguma ye agu. Ani ena angbü 'buru sene ba wü labí ka-ye. Angü ani kpah 'buru baka mbarase te wüh maka e la gbü kombo kaka-na ne." ¹⁷ Yüsefa gü ba dene, "A'a, ngü la tí gbü jia ni nda de. Ni ele aza ka-ni nzö kpapa, de te zi e ka-ni ne, ao sene. Te di bala, wü bu ye na ena ayia ka-wü 'buru, ago kpa ekóti kpaka wö wü. Angü dela ngü ka-ewü nda de."

¹⁸ Fü Yuda ayia aka te-ye gbamari engagira Yüsefa, amala ngü fefe, gü ba dene, "Mere kpapa deyí, gara engu ngü mba ladü sene gömö ni, te ni le amala fü ye. Te di bala, maguma ye mere e asiti eküte ni de. Tekane, angü ye ka-ye cu baka mere miri. ¹⁹⁻²⁰ Ngü te ni le amala fü ye ne, ah dene. Mere kpapa, baka ta te ani koro sene te engu gina ne, ye yi-ta ta ani, gü ba, 'Wö ani ladü?' Ani gü ba, 'Wayi engu ladü. Engu gbe tîne eyi fa sü.' Ye gü ba dene, 'Anga gara engu ni ani ladü?' Ani gü ba, 'Wayi, gara engu ni ani kpah ladü kpaka

wö ani kpala. Ni ewü bi ewü ta ngbee 'basu. Fū ah ayia akpi ka-ye. Amba gara engu ni ye na la kpi ka-ye kpah eyi ne. Wö ani du o maguma ye tñe bü duu te engu de biringbö la. Ah le engu kpah fa ani 'buru, angü ah bi engu tñe gbü gbe ye.' ²¹ Ye gü ba, "Te ah bala la, de ani nü, ani za engu, du koro di, de ni wu engu cu de jia ni." ²² Ani gü ba, 'Mere kpara deyí, mbarase la tñ ace wö ani de. Te ah ce engu bü eyi la, wö ani ena akpi 'duwa akpi. Angü wö ani ngbü eo maguma ye 'buru tete.' ²³ Ye gü ba dene, 'Te ani le akoro de engu ni ani la de la, ani mere e adu akoro kpakine de.' ²⁴ Fū ani ayia alügü nga ani, adu akoro kpaka wö ani kpa ekötí. Fū ani amala ngari ye la kpah 'buru fefe na. Amba wö ani le ta de mbarase la nü kpakine nda de.

²⁵ Amba baka te jia ndo ka-ani la nza tete, fū wö ani ayia amala ngü fū ani, gü ba dene, 'Ani lügü nga ani elügü, adu kpakine, ase mba gara e-mazü fū ani.' ²⁶ Fū ani amala ngü fefe na, gü ba dene, 'Ani tñ adu kpi ani nda-ani de, 'duwa te engu le eyi de ani nü de wü Benzamina, ta te ye mala nganga na ne, angü ye mala ta ngü fū ani kpekpeke, gü ba dene, "Te ani za engu, du koro di de la, de ani mere e adu akoro kpaka ni sene kpah de." ' ²⁷ Wö ani gü ba dene, "Te ani za engu eyi, anü di kpakine, gbü *Ezepeto sene la, de ani ceka kpi fütanganga na mbi mbi mbi. Angü wara ni, Rayele, bi ewü ta fū ni ngbee 'basu. ²⁸ Gara dürü ta kpah eyi. Anga siti nü zoro engu me-ye ya? Ni wu de. ²⁹ Baka te engu dene lakí tñe eyi bü me-ye ne, ani le kpah eyi, eza engu esaka ni asidi, neh teka ne? Ngü la ena ato mere cinga te ni efa sü, angü ni gbe ka-ni nza eyi dene. Fanü te siti ngü nü mere engu kpah eyi la, ni ena akpi ka-ni tñe bü akpi ka cinga.' Dela ngü te wö ani mala fū ani, teka ngü ka engu ni ani ne.

³⁰⁻³¹ Te di bala, te ani du koro bü kpi ani kpaka wö ani la, ah ena adi de züka ngü? Te wö ani wu engu esüka ani de la, engu ena akpi ka-ye ka cinga. Angü mamagama le mbarase la fa sü. Amba te wö ani kpi la, siti ngü la ena angbü gbü nzó ni, Yuda. ³² Angü ni mala ta fū wö ani, gü ba dene, 'Ah le de engu ce kpa te mbarase la, de ah nü de wü ani, angü de-ni Yuda, ni ena adi eceka kpi fütanganga na me-ni. Te ni du koro de engu de la, de siti ngü la ngbü gbü nzó ni, fi badi.'

³³ Te ngü la mere te-ye eyi kpah bala la, ni le adu awu mere cinga ka wö ni nda-ni de. Te di bala, ni efüwa te-ni fū ye, te ah tñ eyi la, de ye ce la mba kpa te mbarase ne, de engu du de wü di engu ni ye kpaka wö ani. Ye za tñe bü ni, ye o dada na

sene, teka de ni ngbü tñe me-ani labí ka-ye. ³⁴ Angü, te ah bala de la, ni tñ adu kpala, angbü eceka cinga, te wö ani ena akpi di ne, nda-ani de!

Mere kpara, dela ngü te ni, Yuda, ngbü enda'ba te-ni di fū ye."

45

¹ Te *Yüsefa je ngü te *Yuda mala la, fū ngü la ayia ato mere cinga tete afa sü. Dada na, te engu ena atüka te-ye ma. Fū ah adu amala ngü fū wü kpara ka *Ezepeto, de te ewü ngbü de ewü kpa esambü la 'buru, gü ba, "Wü koro kpa etanü. Wü ce ani de wü kpara ne kpi ani," angü ah le eyi agü tamu ye fū wü di engu ni ye. Fū wü kpara ka Ezepeto la ayia akoro kawü 'buru kpa etanü, anü sü kawü, ace wü Yüsefa, ao de wü di engu ni ye sela kpi wü. ² Fū Yüsefa ayia aku mere gba de ri ye kpa tikpi. Fū wü kpara ka Ezepeto, te ewü di ta de kpa etanü la, ayia aje riri na la. Fū ewü akpe amala ngü la fū mere miri.

³ Fū Yüsefa ayia tñe amala ngü fū wü di engu ni ye, gbü mö kawü, gü ba dene, "Wü di engu wüna, dene de-ra Yüsefa!" Fū ah ayi-ta ewü kpekpeke, gü ba, "Wö ni zu ladü ezükü fanü fanü na? Engu kpala mbi? E te mere wö ni kpala, neh ene?" Te wü wu, gü ba, engu de Yüsefa, fū maguma ewü ayia akolo 'duwa tuu! Fū ewü anga 'duwa tñi. Da ngü te ewü ena alügü fefe na tñe ma, ka cürü, bete lümü.

⁴ Te Yüsefa wu, gü ba, maguma wü di engu ni ni kolo eyi, fū ah adu amala gara ngü fū ewü, gü ba dene, "Wü ka te-wü gbamari kpa ede ni akine." Fū ewü ayia, aka te-wü gbamari. Fū engu adu amala ngü fū ewü, gü ba dene, "Ma dene zu engu ni yi fanü fanü, ta de te yi cínzi ra fū wü ganzi kpara ne. Fū wü kpara la aza ra, akoro di, de kpa gbü Ezepeto de kpakine. Fanü fanü, dene de-ra. ⁵ Yi mere e, afi nga ngü la tñe de. Lümü mere e amere yi kpah de. Angü dela ngü te Me mere e ka-ye me-ye, eküte ra. Ah tima ra engagira nü agbü Ezepeto kpakine, teka de ma küwa mere bi wü kpara gbü kpirí tala ne. ⁶ Yi wu eyi, gü ba, tala ne mere wü kpara eyi, de re 'basu dene. Amba du wü siti re ka tala la ladü, 'buruve, kpa engagira nü. Gbü wü re de 'buruve la, wü kpara tñ asó e, anga aru gara e kpo de. ⁷ Te di bala, Me tima ra sene, de ma mere mere kpeke ngü, aküwa nih, de mere bi wü kpara, gbü mere siti tala la, angü nguwa nih ena akpi anza ka tala la. ⁸ Amba si-ngü te ma koro di sene, ah teka siti ngü, ta te yi mere ra di ne, nda de. Me tima ra ka-ye nda me-ye kpakine. Me to kpah mere wazi eyi fere, du o ra kpah eyi mere kpara ka miri, te

miri ngbü eje riri na, da ece wü ngü ka-ye 'buru esasaka na. Angü Me o ra mere kpara gbü nzö wü kpara ka Ezepeto sene 'buru."

⁹Fü Yüsefa ayia amala ngü fü wü di engu ni ye, gü ba, "Wü yia eyia kere, wü du kpaka wö ani. De wü mala fü wö ani, gü ba dene, 'De-ni Yüsefa, ni tima ri ni dene me-ni. Ni ka-ni ladü kpakine. Me za ni, o eyi baka mere kpara, gbü nzö wü kpara ka Ezepeto 'buru. Te di bala, ah le de engu yia kpala eyia kere, de ah go kpaka ni, agbü Ezepeto kpakine. ¹⁰Ah kö wü kpara ka-ye, wü di ye, de wü kundu ye, de wü nü ka-wü, de wü gara wü e te di esaka ewü kpala 'buru, koro di kpakine, teka fü ewü angbü gbmari ede ni sene. Ah koro kere, ah mere e amere kuru de, angü züka sü ladü ede ni kpakine, de iri ye Gosene, te ewü ena ago angbü gbügbü na. ¹¹Te wü go ngbü eyi gbü Gosene la, ni ena angbü eceka kpi fütanga wü me-ni, gbü mere kpiri tala ne. Angü du re ka kpiri tala la ladü kpa engagira nü baka wü re 'buruve. Ah le de wü go de wü wö ani, ngbü gbmari sene, angü wü ena akpi anza ka tala. Dela ri ni, Yüsefa, te ni tima fefe na.' "

¹²Fü Yüsefa adu amala ngü fü Benzamina, de wü gara wü di engu ni ye la 'buru, gü ba dene, "Yi ceka la ra zalü kpo kpo kpo, teka fü kuru ra ati gbü jia yi. Kuru ra ti gbü jia yi kpala, baka kuru Yüsefa, la fi de? ¹³Te di bala, yi du kpala, yi mala nga ngü, te yi wu de sene, 'buru fü wö nih, gü ba, 'Ma ladü agbü Ezepeto kpakine, ba mere kpara de mere bi wü e esaka ra.' Amba ah le de yi za engu, du koro di kpakine kere."

¹⁴Fü Yüsefa ayia afaka Benzamina de gba. Benzamina, fü mü ati afaka engu ni mü kpah de gba. ¹⁵Fü Yüsefa akpo afaka wü di engu ni ye la, te nga ewü biri biri 'buru, fi de gba. Fü ewü adu tine, angbü ero mö esüka wü de tadu.

¹⁶Fü mere miri ka Ezepeto aje ngü la, gü ba dene, "Wü di engu ni ye Yüsefa koro eyi kpaka Yüsefa sela." Fü mere miri la ayia angbü de mere tadu te ye, de wü angbe cögbörö kpara ka-ye 'buru. ¹⁷Fü mere miri la ayia ai Yüsefa, amala ngü fefe, gü ba dene, "Yüsefa deyü, züka ngü, te wü di engu ni ye koro eyi kpaka ye sene. Ye mala ngü fü ewü, de wüh lügü nga wü agbü *Kanana. ¹⁸De wüh za wö wü, de wü kpara ka-wü kpala, du koro de ewü 'buru kpaka ani, agbü Ezepeto sene. Angü ni ena ato züka sü fü ewü, gbü Ezepeto sene. Fü ewü angbü amaka mere bi e-mazü gbü sü la. Fü ewü angbü engbü de mere tadu. ¹⁹Ye mala kpah fü ewü, gü ba, wü mere arabiya, te wü nü ngbü egbeke agbeke ne, ladü esaka ni. Wüh ena aza wü arabiya

la, adu di kpala, akö wü wö wü, de wü wü rüse, de wü jaji 'buru gbügbü na, teka adu de ewü kpakine. ²⁰Wüh mere e afi nga wü e de kpa gbü Kanana la de. Wüh ena akoro amaka züka wü e agbü Ezepeto kpakine afa sü. Angü ni me-ni de mere miri ka wü kpara ka Ezepeto." Dela ngü te mere miri la mala fü Yüsefa, de ah mala fü wü di engu ni ye.

²¹Fü Yüsefa ayia amere ngü la, kpah baka e de te mere miri mala la. Fü Yüsefa aza wü arabiya, ato fü wü di engu ni ye. Ah to kpah wü e-mazü teka fü ewü azü te kaje. ²²Fü Yüsefa aza kpah züka bongo, ato fü ewü. Fü ah ayia aza nda Benzamina, ato 'buruve. Fü ah aza kpah mere bi jase ato kpah fefe na. ²³Fü ah akö mere bi züka wü e, atima fü wö ye. Fü engu aza ndo, de wü gara e-mazü, ato, de wü wö ni di ezü te kaje. Fü ah aza wü e la, ao 'buru füh wü nü. Ah ta de mere bi wü nü baka teke biri. ²⁴Fü Yüsefa ayia atima wü di engu ni ye la, gü ba dene, "Wü nü enü mbi, de wü du koro kere. Amba wü mere e awü nga te kaje de."

²⁵Fü wü di engu ni ye Yüsefa ayia gbü Ezepeto sela, alügü nga wü, adu. Fü ewü anü bala, zalü akoro eköti agbü Kanana, kpaka wö wü. ²⁶Fü ewü ayia amala nga ngü de kpala 'buru fü wö wü, gü ba dene, "Wö ani deyü, engu ni ani, Yüsefa, ka-ye ladü. Ah kpi nda de. Engu ka-ye ladü agbü Ezepeto kpala. Wüh o engu tine eyi, mere kpara fütanga mere miri ka Ezepeto. Engu ngbü eyi gbü nzö wü kpara ka Ezepeto 'buru." Te *Yakobo je ngü la bala, fü mamagama ayia agürü 'duwa wöö! Fü ah afi ngü, gü ba, "Wüh ngbü esu ka-wü nda-wü wu! Wüh ngbü efiti ni dela afiti!" ²⁷Fü ewü ati te ngari Yüsefa, amala 'buru fü wö wü. Baka te Yakobo du wu wü arabiya de te Yüsefa tima, abi wü ne, fü magama mü adu agu. Fü ah adu afi, gü ba, ngü la eyi fanü. ²⁸Fü ah ayia amala ngü, gü ba dene, "Wayi, ma wu eyi, gü ba, ngü la ena adi fanü. Ye ra, Yüsefa kpi nda de. Te ah bala, ma ena anü ani agbü Ezepeto, awu ye ra la cu de jia ra, o ra kpi la de dene."

46

Dene ngü ka wü Yakobo, te ewü go agbü Ezepeto

¹Fütanga ngü la, fü wü *Yakobo ayia areke te-wü, de wü di ye, aza wü e ka-wü, ao 'buru gbü wü arabiya, ta te mere miri ka wü *Ezepeto tima ne. Fü ewü ayia aza wü wara wü, de wü jaji, ao kpah 'buru gbü wü arabiya, ayia ati te kaje, ego agbü Ezepeto, kpah de wü nü ka-wü 'buru. Fü ewü anü bala, akoro agbü gara sü kpala,

de iri ye Biri-Saba. Fū ewü ayia ara sela. Fū Yakobo ayia amörö nü sela teka agbo nga iri Mere Me di, kpah baka e ta te wö ye na mere de sela.

² Fū Me ayia amala ngü fū Yakobo gbü roto, gü ba dene, "Yakobo deyī, ³⁻⁴ Mü je la ngü ka-ra, te ma emala fū mü ne, angü ma de Mere Me, te di de *vüngüte ka wö mü. Mü mere e akpe cürü, teka ago angbü agbü Ezepeto, ne de. Angü ma ena afete yi te kaje, zalü akoro di kpala. Ma ena angbü kpah fi de wü yi agbü Ezepeto kpala. Fū ra ato wazi fū wü di mü kpala, fū ewü abí ye, asibi afa sü 'duwa ba-neh-ene-la. Fū ewü akoro mere nguwa wü kpara. Fū ra adu alügü ewü te gara, adu akoro di kpah gbü *Kanana sene. Amba teka mü Yakobo, mü ena akpi ciki agbü Ezepeto kpala, esaka *Yüsefa. Fū ah areke da mü me-ye." Dela ngü ta te Me mala fū Yakobo gbü roto agbü Biri-Saba. ⁵⁻⁶ Fū wü Yakobo adu ayia gbü Biri-Saba sela. Wü didi na za ta engu, de wü jaji, de wü würüse ka-wü, o 'buru gbü wü arabiya, de te miri ka Ezepeto tima ne. Fū ewü ayia akö wü nü ka-wü, angbü enü agbü Ezepeto. ⁷ Wü kpara ta te ewü go de wü Yakobo agbü Ezepeto ne, ah de wü didi, de wü wara wü didi, wü kundu ye wü jaji komoko, de wü jaji würüse.

⁸ Dene iri wü di *Yakobo Yisaraye, de wü kundu ye, ta te engu go ngbü de ewü agbü Ezepeto. ⁹ Mene wü jaji guvu Leya, wüh dene. Rübena, te di de gina ye Yakobo, de wü di ye bala, wü Anoka, Palu, Ezerone, bete Karumi. ¹⁰ Simiyona, de wü di ye ma'diya, wü Yemüwele, Yamina, Üwada, Yakina, Zowara, be kpah te Sawüla, ta te engu bi ake egba Kanana ne. ¹¹ *Levi, de wü di ye bata, Gerusona, Kowata, bete Merari. ¹² *Yuda, de wü di ye bata, wü Sela, Pereze, bete Zera. Amba wü Ere ake Onana kpi ka-wü ta eyi 'basu mini ciki agbü Kanana. Baka te wüh ngbü agbü Ezepeto kpala, fū Pereze ayia aga akoro mere komoko. Fū ah ayia abi wü di ye 'basu, wü Ezerone ake Amula. ¹³ Yisakara, de wü di ye bala, wü Tola, Puva, Yobo, bete Simerona. ¹⁴ Zebulona, de wü di ye bata, wü Serede, Elonno, bete Yelele. ¹⁵ Dela 'buru wü di Yakobo ta te engu bi agbü Padanarama ake mene wara ye, Leya ne. Gara engu Leya ta kpah ladü, jaji würüse de iri ye Dina. Wü di Yakobo, ta te engu bi ake Leya, wü de wü jaji guvu wü 'buru teke biri nzükpa de füh ye bata (33).

¹⁶ Dene iri wü di engu Zerifa. Gada, de wü di ye lorozi, wü Zifeyona, Agi, Suni, Ezebone, Eri, Arodi, bete Areli. ¹⁷ Asera, de wü di ye 'buruve, wü Yimena, Yiseva, Yisevi, Beriya, be kpah te jaji würüse de iri ye Sera. Beriya bi kpah nda-ye wü jaji 'basu, wü Ebere ake Malekiyele. ¹⁸ Wü di Yakobo, ta te engu bi ake Zerifa,* de wü ye guvu wü ta 'buru nzükpa de füh ye ma'diya (16).

¹⁹ Dene iri wü di engu Rayele, mene wara Yakobo, ta te Yakobo le engu fa sü ne. Rayele bi ye fefe na ngbee 'basu, wü Yüsefa ake Benzamina. ²⁰ Baka ta te Yüsefa ngbü agbü Ezepeto kpala ne, ah za ta egba kpara ka Ezepeto, de iri ye Asenata.† Fū ewü ayia abi ye ake di kpah 'basu, wü Manase ake Efürayima. ²¹ Benzamina, mü bi nda-mü wü jaji ta nzükpa, wü Bela, Bekere, Asebele, Gera, Namana, Eyi, Rosi, Mupima, Upima bete Arada. ²² Dela 'buru wü di ye Yakobo, ta te engu bi ake Rayele ne. Wü di engu Rayele, de wü jaji guvu wü 'buru nzükpa de füh ye bala (14).

²³ Dene iri wü di engu Bila,‡ Dana ake ye ye de Usima. ²⁴ Nafatali, de wü di ye bala, wü Yasele, Guni, Yezere, bete Silema. ²⁵ Dela 'buru wü di Yakobo ta te engu bi ake Bila. Wü di engu Bila, de wü jaji guvu wü ta 'buru lorozi (7).

²⁶ Wü di Yakobo, de wü kundu ye na, ta te ewü go de ewü agbü Ezepeto ne, wüh 'buru teke bata de füh ye ma'diya (66). Ah du koro tine teke bata de füh ye lorozi ne (67) de Yakobo engu na. ²⁷ Baka te ewü koro, dunda te-wü de wü Yüsefa agbü Ezepeto ne, fū ewü ayia akoro 'buru baka wü kpara teke bata de füh ye nzükpa (70). Angü Yüsefa za ta gara egba kpara ka Ezepeto sela. Fū ewü ayia abi ye ake di 'basu.§

Dene ngü ka wü Yakobo, de wü di ye, agbü Ezepeto

²⁸ Ta te wü Yakobo nü koro tine gbamari ede Ezepeto ne, fū Yakobo ayia atima Yuda kpa engagira nü kpaka Yüsefa, teka amala ngü ani fefe, teka de ani nü maka te-ani agbü Gosene. ²⁹ Te Yüsefa je ngü la, fū ah ayia 'duwa, ali gbü arabiya ka-ye, anü de woro, akoro agbü Gosene, amaka wö ye. Fū Yüsefa atí te wö ye, afaka, da eku gba eküküte na 'duwa ba-neh-ene-la. ³⁰ Fū wö ye na amala ngü fefe, gü ba dene, "Ye ra, Yüsefa, ma wu mü eyi cu de jia ra dene. Ah de mere züka ngü. Ma fi ta, gü ba,

* **46:18** 46:18 Zerifa ka-ye ta kpara ka tima ka Leya, te wö ye na, Labana, to me-ye fefe na. † **46:20** 46:20 Asenata ta de ye Potifera, ta te di de mürü gele ka Ono ne. ‡ **46:23** 46:23 Bila ka-ye ta mürü tima ka Rayele te wö ye na Labana to fefe na. § **46:27** 46:27 Wü kpara ta te wü Yakobo go de ewü agbü Ezepeto ne, wüh tanga wü labi de wü kpara ka tima, nda-wü de.

mü kpi ka-mü ta eyi gügü. Ma wu mü eyi dene. Ngü ma, te ma kpi ka-ra titine la, ma ti afi ngü tine de."

³¹ Fü Yüsefa ayia amala ngü fü wü di engu ni ye, de wü kpara gbü nga wö ye la 'buru, gü ba dene, "Wü di engu ni ni deyi, ni yia eyi, teka anü amala nga wü fü mere miri, gü ba dene, 'Wü wö ni, de wü kpara gbü nga ye koro eyi sene. ³² Wüh koro eyi de wü e ka-wü ta de kpa gbü Kanana ne 'buru, baka wü kambiliki, wü meme, de wü yiti fa sü, angü wüh ka-wü de wü mürü wü nü.' Dela ngü de te ni ena anü amala fü mere miri titine." ³³ Fü Yüsefa amala kpah gara ngü fü wü di engu ni ye, gü ba, "Te miri i wü kpaka ye, yi-ta wü, gü ba dene, 'Tima ka-wü neh ene la?' ³⁴ De wü mala kpah fefe na la, gü ba dene, 'Ani de wü mürü wü nü, angü dela tima ka wü kundu ani ta gügü.' Te wü mala eyi bala la, miri ena ale ale fü wü angbü gbü Gosene sene, angü wü kpara ka Ezepeto le wü mürü nü adi engbü ede mere köti ka-wü nda-wü kpo de."

47

¹⁻² Fütanga ngü la, fü *Yüsefa ayia aza süka wü di engu ni ye 'buruve, anü de ewü kpaka miri, teka amala nga wü wö ye, te ewü koro ne. Te wüh koro kpaka miri la, fü Yüsefa amala ngü fefe na, gü ba dene, "Wayi, mere miri, wü di engu ni ni, de wü wö ni, de ta te ewü di agbü *Kanana ne, wüh koro eyi 'buru sene. Wü wara wü, de wü jürü jaji, de wü nü ka-wü, abe kpah te wü e ka-wü 'buru, wüh eyi 'buru ladü agbü Gosene." ³⁻⁴ Miri gü ba, "Wayi, ah reke 'duwa ba-neh-ene-la, te wü wö ye, de wü di engu ni ye go koro eyi sene."

Fü miri ayia ayi-ta wü di engu ni ye Yüsefa, gü ba dene, "Tima ka-wü neh ene?" Wüh gü ba, "Ani de wü kpara, te ani eceka kpi fütanga wü nü, angü dela tima ka wü kundu ani kü ta gügü. Ani ele la mba engu sü gbü *Ezepeto sene, teka angbü gbügbü, de wü nü ka-ani mba takü, angü mere siti tala ti eyi agbü Kanana. Sü te wü nü ka-ani ena adi ezü e tete na, nda tine kpah ma. Ani ele ta angbü la mba gbü Gosene sene. Ah ena atü atü fü ye?"

⁵⁻⁶ Fü mere miri la amala ngü fü Yüsefa, gü ba dene, "Ah mbi. Baka te wü wö ye, de wü di engu ni ye, go koro eyi sene ne, ni to sü fü ewü eyi gbü Gosene sene, de wüh o köti ka-wü gbügbü na. Te di bala, ah le de ye ceka züka sü te reke areke, ao ewü gbügbü na. Ni ele kpah de ye fe gara ewü, te jia ewü mba amba, fü ewü adi eceka kpi fütanga wü nü ka-ni."

⁷ Fütanga ngü la, fü Yüsefa adu aza wö ye, anü ake di kpaka miri. Te wüh koro kpala, fü *Yakobo ayia agü mandü fü miri,

gü ba dene, "Me di de ye, de ah to wazi fü ye." ⁸ Fü miri ayi-tata na, gü ba, "Mere kpapa deyi, re ka-ye neh eyi fe?" ⁹ Yakobo gü ba dene, "Re ka-ni koro eyi baka e kama biri teke biri de füh ye nzükpa (130). Amba re la ka-ye bü de bi wü ngü gbü ye, tadu gbügbü nda ma. Ah koro baka re ka wü kundu ani tane kpah de." ¹⁰ Te Yakobo yia, ngbü ego tete, fü ah adu kpah amala ngü fü mere miri, gü ba, "Me di de ye, de ah to wazi fü ye. Ye ngbü ka-ye engbü, ani tadu eyi." Fü wü Yüsefa adu ake wö ye, akoro kpa eköti. ¹¹ Fü Yüsefa adu anü aceka züka sü, ato fü wü wö ye, de wü di engu ni ye, gbü Gosene sela, kpah baka ngü te mere miri mala fefe na ne.

Dela ngü ta te Yüsefa mere, te wü wö ye, de wü di engu ni ye go koro maka engu tete agbü Ezepeto. ¹² Fü Yüsefa angbü eto emazü fü wü wö ye, de wü di engu ni ye, de wü kpara gbü nga ewü la 'buru.

Dene ngü te Yüsefa mere gbü mere kpiri tala,

ta te ti agbü Ezepeto ne

¹³ Fütanga ngü la, fü siti tala la adu angbü emere wü kpara ka Ezepeto, de wü kpara ka Kanana tine 'duwa ba-neh-ene-la. Fü tala angbü euru ewü tine 'duwa efa sü. E te mü ena awu ba e-mazü, gbü sü la tine kpo ma. ¹⁴ Fü wü kpara aci 'buru, angbü enü kpaka Yüsefa, adi ese ndo. Fü Yüsefa angbü ebiti jiase ka ndo la 'buru, eo ao. Fü ah angbü enü di, eto fü miri. ¹⁵ Fü jiase ayia anza esaka wü kpara ka Ezepeto, bete wü kpara ka Kanana 'buru.

Baka te jiase nza esaka wü kpara la 'buru, fü ewü ayia anü kpaka Yüsefa, akpo angbü enda'ba te-wü fefe na, gü ba dene, "Ani ena amere baye? Jiase nza esaka ani eyi! Ye ceka la cinga te ani! Ah le de ye le la mba ta-ngü te ani de e-mazü, angü ani ena akpi ka tala." ¹⁶ Fü Yüsefa alügü ngü fü ewü, gü ba dene, "Te jiase nza esaka wü eyi la, de wü nü, wü koro de wü nü ka-wü, adi ese e-mazü di." ¹⁷ Fü ewü ayia adu kpa eköti, angbü eza wü nü ka-wü, baka wü kambiliki, wü meme, wü yiti, kpah de wü dongi, de wü gara wü nü, ekoro di, adi ese ndo di kpaka Yüsefa.

¹⁸ Fütanga re biringbö, fü ewü adu kpah akoro kpaka Yüsefa, ayi-tata, gü ba dene, "Mere kpapa deyi, ani ena amere tine eyi baye? Te jiase nza esaka ani, de wü nü ka-ani kpah eyi 'buru de bane? E te ani ena ato fü ye, teka ndo titine nda tine ma! Ani ena amere baye? Angü tala la ngbü fi bü emere ani dene! Du e te laki esaka ani tine bü ngiri ani kükürü, bete tö ka-ani. Amba gara e gbü tö la nda tine kpah ma. ¹⁹ Ye mere e ace ani akpi ka tala de! Ye to la mba engu ndo fü ani, de ani zü. Te gara

kaje tîne 'buru 'buru ma la, de ye za tîne ani, de wü tö ka-ani 'buru. Fü ani angbü tîne wü labi ka miri, teka e-mazü, angü ani ena akpi, anza ka tala. Wü yi ka-ani fere te-wü tîne 'buru zugu dene. Te ah bala, ye to mba enga nguwa ndo fü ani, teka fü ani anü aru gbü wü yi ka-ani." ²⁰ Fü Yüsefa ayia ale. Fü ah ayia ase wü yi esaka wü kpara ka Ezepeto 'buru fü mere miri.

Dela ngü ta te Yüsefa mere, gbü wü re ka mere kpiri tala, ta te ngbü emere wü kpara agbü Ezepeto ne. ²¹ Fü ah aza wü kpara la, te nga wü sü gbü Ezepeto sela, ao 'buru baka wü labi ka mere miri. ²² 'Duwa yi ka wü mene wü mürü gele, te Yüsefa se nda de. Angü miri ngbü ta eto e-mazü fü ewü me-ye kükürü. Tekä ngü la, wü mürü gele la cinsi wü yi ka-wü, teka e-mazü nda-wü de.

²³ Fü Yüsefa ayia aza ndo, ato fü wü kpara ka Ezepeto, gü ba dene, "De-wü deyü, ni se wü, de wü yi ka-wü, tîne eyi 'buru. Titine dene, ni o wü tîne eyi 'buru wü labi ka mere miri. Wü yi ka-wü la 'buru, ah tîne nda mere miri. Te di bala, nguwa ndo dene, wü du di, wü ru gbü yi ka mere miri la. ²⁴ Te ndo la ri eyi la, de wü za bebete na, akoro di, ato fü mere miri. Fü wü aza gara na, ao nguwa tete. Amba dudu na la, wü zü azü. Wü je ngü la eyi?" ²⁵ Wüh gü ba, "Wayi, mere kpara, ye mere züka ngü eyi fü ani 'duwa ba-neh-ene-la. Te di bala, ani ena angbü tîne wü labi ka mere miri, fi mere badi."

²⁶ Fü Yüsefa ayia ao ngü la baka riri, gbü nzö wü kpara ka Ezepeto 'buru. Dela si-ngü te ngü la ngbü enatikine tete gbü Ezepeto baka riri, te gü ba, "Te mü maka ngulu ka ndo 'buruve la, mü ena ato ngulu biri fü miri, ace du nda-mü bala la fü mü." Amba riri la, ah teka wü kükürü kpara, ah teka wü mürü gele nda de, angü Yüsefa se ta yi ka wü mürü gele nda de. Ah za ewü, o baka wü labi kphah de.

Dene ngü te Yakobo mala teka kpi ka-ye

²⁷ Fütanga mere kpiri tala la, wü *Yakobo Yisarayele ngbü ka-wü ta fi agbü *Ezepeto, gbü sü de iri ye Gosene ne. Fü ewü amaka mere bi züka wü gara e kpala afa sü. Fü ewü abi kphah wü jaji kpala, fü ewü asibi afa sü. ²⁸ Fü Yakobo amere agbü Ezepeto kpala, 'buru baka wü re nzükpa de füh ye lorozi, zalü fü re kaka-na anü akoro 'buru baka kama biri teke 'basu de füh ye lorozi (147).

²⁹⁻³⁰ Te Yakobo Yisarayele wu, gü ba, re ka-ni eyi mari fü ni akpi, fü ah ayia atima ngü fü ye ye, Yüsefa, de ah koro kpaka ni. Fü Yüsefa ayia akoro kpaka wö

ye. Fü Yakobo amala ngü fefe na, gü ba dene, "Yüsefa deyü, ni eyi mari teka akpi. Te ye le ngü ka-ni eyi fanü fanü la, de ye mere e ati kö ni gbü Ezepeto sene de. Ye za kö ni, du di, ti agbü Kanana, kpa gbü sü, ta te wüh ti wü wö ani tete na ne. Ni ele de ye kina lö ni, gü ba, 'Ni ena amere ngü la bala.' " Yüsefa gü ba, "Wayi, ni le eyi amere ngü ka-ye, de te ye mala la." ³¹ Yakobo gü ba, "De ye kina lö ni ekina!" Fü Yüsefa ayia akina lö wö ye kphah bala. Fü Yakobo ayia ari te-ye, agbo nga iri Me ciki füh ngbaga ka-ye, te engu ngbü era fefeh na ne. Fü Yüsefa ayia adu kpa gba ye.

48

Dene ngü te Yakobo yi-ta Me di, teka wü Efürayima ake Manase

¹ Fütanga ngü la, fü Yüsefa aje ngü, gü ba dene, "Wö ni eyi de keke." Fü *Yüsefa ayia de wü di ye, wü Manase ake Efürayima, anü aceka wö ye.

² Te wü Yüsefa koro tete kpala, *Yakobo, mü ngbü era ka-mü ara köto ka keke la. Fü ewü anü amala ngü fefe, gü ba dene, "Wü Yüsefa koro eyi aceka ye." Fü Yakobo atüka te-ye, ayia angbü tikpi. ³ Fü ah amala ngü fü Yüsefa, gü ba dene, "Ta gügü, o ra di gbü sü de iri ye Betele, * gbü *Kanana ne, fü Me, te di de mere mürü wazi ne, ayia agü tamu ye fere, gü ba, 'De-ni Me, ni ena adi fi ake ra. ⁴ Fü ni ato wazi fere, teka fü ra abi bi wü jaji. Fü wü di ra asibi afa sü, akoro baka mere bi nguwa wü kpara. Te gara, ni ena ato tö ka wü Kanana 'buru fü wü kundu ra, teka fü ewü angbü gbügbü fi mere badi.' Dela ngü ta te Me mala fere agbü Betele.†

⁵ Titine sikipi ka-ra eyi mari fü ra akpi. Te ma kpi eyi la, wüh ena aza wü e-nga-kpa ra, aye süsüka, ato 'buru fü wü di ra. Wüh ti ato fü wü kundu ra nda-wü de, angü ah de gele ka nguwa nih. Te di bala, Yüsefa, ye ra, ma ngbü efi ngü teka wü di mü de 'basu ne, wü Efürayima ake Manase, te yi bi ewü o ra koro gbü *Ezepeto sene la de ne. Titine dene, ma ele fü ewü angbü tîne kphah baka wü di ra, teka fü ewü aza kphah e-nga-kpa ra gbü nga ra, baka wü gara wü di ra ne. ⁶ Wü gara wü di mü te wüh ena abi ewü sidi ne, wüh ti aza e-nga-kpa ra nda-wü de. Wüh ena aza nda-wü e-nga-kpa, gbü nga wü Efürayima ake Manase. Dela ngü te ena amere te-ye, teka wü Efürayima ake Manase.

⁷ Si-ngü te ma mere ngü la tete na bala, ah teka ngü ka ni mü, Rayele, angü ma

* 48:3 48:3 Wüh gü iri sü la ta gügü de Luza. † 48:4 48:4 Ta gügü wüh ngbü ei Betele, Luza.

le engu fa sü. Ah kpi ta eyi gügü, agbü Kanana. Dela o nih yia tete agbü Padanarama, teka anü agbü Beteleme.[‡] Te engu kpi tete ne, ma ngbü de mere cinga fa sü, fü ra ayia ati engu ciki te kaje.”

8-10 FÜ Yakobo ayia aceka kpi, awu wü di Yüsefa de 'basu ne, wü Efürayima ake Manase, te ewü rü mba canza bane. Amba ah wu ewü reke mbi mbi nda de, angü engu gbe ka-ye tîne eyi fa sü. Jijia na ti aceka kpi mbi mbi kpah de. FÜ ah adu ayi-ta Yüsefa, gü ba dene “E-rü ngbü nda-wü de kpala, neh wü da?” Yüsefa gü ba, “Dela wü di ni, de te Me to fü ni agbü Ezepeto sene ne.” Yakobo gü ba dene, “Ye za ewü, ye koro de ewü gbamari fü ni, teka de ni sü ngüsü emagama ewü.” FÜ Yüsefa ayia aza ewü, akoro de ewü gbamari kpaka wö ye. FÜ wö ye na ayia afaka ewü, aza ewü, ao eri lö ye. ¹¹ FÜ ah amala ngü fü Yüsefa, gü ba dene, “Yüsefa deyü, ta te ye dürrü tete na ne, ni ngbü efi nda-ni, gü ba dene, ye dürrü eyi fi badi. Ni ti adu wu ye tîne kpo de. Amba Me mere fü ni nda bü züka ngü. Enatikine dene, ni du wu ye tîne eyi, kpah de wü di ye mini, baka e dene.” ¹² FÜ Yüsefa ayia amala ngü fü wü di ye la, de wüh yia tîne eri lö kundu wü sela asidi. FÜ engu ayia ati abuka gbüra ye kötö, acu ngü wö ye.

¹³ FÜ Yüsefa adu aza wü di ye la, aka de ewü, alügü kpah kpaka wö ye, teka de ah sü ngüsü emagama ewü. Ah za Manase o gbü kokpa ka wö ye, angü engu de gina. FÜ ah aza Efürayima, ao gbü kamisü, angü engu de jaji. ¹⁴ FÜ Yakobo ayia ayingi kpa ye, adu aza nda kokpa, ao gbü nzö Efürayima, jaji ne. FÜ ah adu aza nda kamisü, ao gbü nzö Manase. ¹⁵ FÜ Yakobo aku gba fü Me, teka wü Yüsefa de wü di ye la, gü ba dene, “Me, mü de *vüngüte ka wü wüba, Yisaka, ake *Abarayama. Mü kpo ngbü eceka kpi fütanga ra kü gügü, gbü ra ta te wüh bi ra tete na, zalü akoro di dene. ¹⁶ Mü ngbü eküwa ra gbü wü siti ngü 'buru. Titine ma ngbü eyi-ta mü teka wü jaji ne, wü Efürayima ake Manase, de mü to wazi fü ewü, de wüh bi wü ye, de nguwa a sibi asibi, anü kpa engagira nü fi mere badi. Tekä de iri wü wö a, wü Abarayama ake Yisaka, mere e adürü de.”

¹⁷⁻¹⁸ Baka te Yüsefa wu wö ye, te o kpa ye ka kokpa gbü nzö jaji ne, ngü la ti gbü jijia na nda de. FÜ ah amala ngü, gü ba, “Wö ni deyü, ah bala de. Ah le de ye o kpa ye ka kokpa ne gbü nzö Manase, angü Manase me-ye de gina fü Efürayima.” FÜ Yüsefa ayia ta, de ni za kpa wö ni ka kokpa ne, de ni o gbü nzö Manase. ¹⁹ FÜ wö

ye na ayia atiri kpa ye ka-ye gbere! ao kpa ye la fi gbü nzö Efürayima, gü ba, “Ye ni, ni wu kpo! Manase nda ngbü rü de gina me-ye fanü. Wü jaji la 'basu mini ena angbü ba wü mere kpara, de mere bi wü di wü, te ewü ena asibi afa sü. Amba ngü ka Efürayima ena afa nda Manase afa, fü wü kundu ye na akoro mere bi nguwa wü kpara.”

²⁰ Dela ngü ta te Yakobo to wazi di fü wü Efürayima ake Manase, te engu o Efürayima tete engagira nü fü gina enga ni ye ne. FÜ ah mala ngü, gü ba, “Te wü bu wü ena awu züka ngü, de te Me to fü wü ne, wüh ena angbü eku gba fü Me, gü ba dene, ‘Me di eto kpah züka ngü fü ani, baka e ta te engu to fü wü Efürayima ake Manase ne.’ ”

²¹ FÜ Yakobo amala ngü fü Yüsefa, gü ba dene, “Ni wu eyi, silkpi ka kpi ka-ni koro eyi mari. Ni wu kpah eyi, gü ba, fütanga ni, Me ena adi fi bü de wü. FÜ engu aza wü te gara, alügü 'buru agbü Kanana, angü dela sü ka wü kundu ani ta gügü, te Me to fü ani ne. ²² Te di bala ne, ni ena aza gara mere züka sü, agbü Kanana la, ato fü ye, Yüsefa. Sü la, ni za ta esaka wü di enga Amora gbü gü, de te-dü, bete keze. Ni ena ato sü la fü ye, Yüsefa, angü ye eyi de mere kpara gbü nzö wü di enga ni ye la 'buru. De sü la ngbü esaka ye, de wü di ye, de wü kundu ye, fi mere badi.”

49

Dene adu ngü te Yakobo mala teka wü di ye

¹ FÜ *Yakobo ayia ai wü di ye la 'buru kpaka ye, gü ba dene, “Wü koro la 'buru, wü biti te-wü kpakine, de ni mala wü ngü de te ena amere te-ye fü wü te gara, te Me ena alügü wü tete agbü *Kanana ne.”

² Te wü di *Yakobo Yisaraye koro tete 'buru, fü ah akpo angbü ebi ci ka-ye, gü ba dene,

“Wü di Yakobo, yi biti te-yi gbü sü biringbö sene,

teka aje ngü ka-ra, ka wö yi.

³ Rübena, mü de gina ye ra.

Mü ta baka wazi ra.

Ma bi mü ta o ra di la kpah kpekpeke. Mü ngbü ta gbü nzö wü di enga ni mü 'buru.

Wazi mü fa ta nda-wü kpah afa.

⁴ Rübena, mü de gina ye ra.

Wazi mü ta baka mere ngu te ngbü ego ago.

Titine mü mere *siti ngü eyi.

Wazi mü nza eyi enatikine!

Rübena, mü mere siti ngü eyi.

‡ 48:7 48:7 Ta gügü wüh ngbü ei Beteleme, Efarata.

- Wazi mü ti afa nda wü di engä ni mü tîne de.
 Angü mü ngbü eyi ake wara wö mü.
 Mü to lümü eyi gbü jia wö mü!
 5 Simiyona ake *Levi, yi de mürü gü!
 Yi za maguruma ka-yi mere gü di!
 Simiyona ake Levi, yi de mürü gü!
 6 Simiyona, ma ti arí gbü ngü ka-yi la nda-ra de!
 Yi ngbü emörö wü kpara, angü maguma yi esiti!
 Levi, ngü ka-yi la, de ngü ka-ra nda de.
 Yi ngbü esiya ka te wü kpara bü kükürü!
 7 Simiyona, ma le ngü ka-yi la nda-ra de.
 Nguwa yi ena abaya gbü wü sü ka-nih 'buru.
 Levi, Me ena ato kuru te yi ka ngü la.
 Nguwa yi ena aye süka ye jürü jürü.
 8 *Yuda, mü de kpeke kpara.
 Wü di engä ni mü ena adi 'buru agbo nga iri mü.
 Wü di engä ni mü ena ecu ngü mü.
 Wü vügü ka-mü ena angbü 'buru esa lö mü.
 9 Yuda, mü de kpeke kpara.
 Yuda, mü ka-mü baka kami.
 Kami te nü mörö nü ka-ye, te za so ka-ye, go di.
 Fú ah ra kötö eme so ka-ye.
 Kpara te ena akpülü engu nda ma.
 Yuda, mü de kpeke kpara.
 Kpara te ena akpülü mü kphah ma.
 10 Yuda, mü de kpeke kpara.
 Wü di mü ena angbü miri fi badi.
 Wü di mü ena aza ngbangba ka miri esaka wü fi badi.
 Angü Mere Miri te Me ena atima fü nih,
 ah ena adi de kundu kundu mü.
 Mere Miri te ena angbü gbü nzö wü kpara 'buru.
 Nga nzö nguwa wü kpara 'buru ena aje riri kaka-na.
 11 Wü kpara 'buru ena angbü de tadu, teka ngü ka Miri la,
 Mere Miri, Mere Miri ena akoro.
 Sü ena areke de mere bi zü gbü ye.
 Wü e ena arí rudu rudu,
 fü ewü asibi afa sü.
 12 Mere Miri, Mere Miri ena akoro.
 Wü kpara ena azü e asika nde.
 Fú ewü angbü fi bü de mere tadu!
 Wü nü ena asibi, fü wü kpara adi ezü fi bü so.
 13 Zebulona, mü ena angbü era mere ngu.
 Mere bi *zabu ena adi ekoro kpaka mü.
 Sü ka-mü ena akpo era ngu la,
 akoro zalü agbü sü ka wü Sidona.
 14 Yisakara, mü baka gbí.
 Sü ka-mü reke te mü fa sü.
- Mü baka gbí te ngbü ebite wü e gbü nze ye.
 Angü mü fe te-mü nda-mü de.
 15 Yisakara, sü ka-mü reke te mü fa sü.
 Mü fü te-mü labí gbü sü ka-mü.
 Mü ngbü emere tima efa sü.
 Mü fe te-mü kphah de.
 16 Dana, mü de kpeke kpara.
 Wü kundu mü ena asibi, akoro mere nguwa wü kpara.
 Miri te ena angbü gbü nzö nguwa mü.
 Ah ena aye süka ngü ka wü kpara mbi mbi mbi.
 17 Dana, mü baka engä kpürü te ngbü edere kaje,
 da eci nü te ngbü ebi kpara te kaje.
 Kpürü ena ade tambu lö nü la.
 Fú kpara de te di fefeh na, ayere atí kötö.
 18 Me, ma ngbü eo jia ra kpaka mü.
 Mü ena aküwa a esaka *siti ngü ka-a.
 Mü ena akoro areke wü sü 'buru.
 19 Gada, wü mürü gü ena akoro,
 atí de gü gbü nzö mü.
 Amba mü ena adu amí ewü 'buru.
 Fú mü aliki nga ewü, anü di.
 20 Asera, mü ena adi emaka mere bi zü.
 Fú ndo ka-mü adi eri 'buru ba mudu.
 Zü ena afa esaka mü sü,
 de züka wü türü e, baka e ka wü miri.
 21 Nafatalí, ngü ka-mü reke fa sü.
 Mü ka-mü baka mügara.
 Mü ena ale mere woro da eviti kpa etikpi.
 Nafatalí, mü ena abí wü jaji, te ewü ena asu kphah baka mü.
 22 Yüsefa, mü de kpeke kpara.
 Mü baka züka rü te eri efa sü.
 Rirü te wüh ru era ngu.
 Rirü te ngbü eri gbeee, rudu rudu.
 23 Yüsefa, mü de kpeke kpara.
 Wü vügü ka-mü koro, ti gü gbü nzö mü.
 Fú ewü alofo mü de wü keze ka-wü.
 Yüsefa, amba mü kpe cürü nda-mü de.
 24 Yüsefa, mü de kpeke kpara.
 Mü i maguma mü gö gö gö!
 Yüsefa, mü zoro diri ka-mü gö!
 Mü fa wü vügü ka-mü eyi.
 Yüsefa, mü de kpeke kpara.
 Me to wazi la me-ye fü mü.
 Me ka-ye de mere wazi.
 Me ngbü eceka kpí fütanga nguwa nih 'buru,
 Baka kpara te eceka kpí fütanga kam-biliki ka-ye.
 Yüsefa, Me di de mü.
 Me to wazi ka-ye fü mü.
 Me ka-ye de mürü wazi.
 Me ngbü ekuwa wü kpara,

te ewü ngbü eto te-wü fefe na.

25 Yüsefa, Me di de mü.

Me ka-ye de *vüingüte ka-nih.

Me to agö fū mü de ah li.

Me to ngu fū mü, te ti anzürü gbü karanga de.

Yüsefa, Me di de mü.

Me to wazi fū wü wara yi.

Wü wara yi ena abi wü jaji gbe gbe gbe.

Wü di yi la ena aga 'buru kpeke wü kpara.

26 Yüsefa Me di de mü.

Me to wazi fū wü di mü.

Me to wazi gbü yi ka-mü, de wü e ka-mü di erī efa sū!

Yüsefa, Me di de mü.

Me to züka wü e ka-ye fū mü.

Züka ngü ka Me ngbü fū mü fi badi, baka da.

Yüsefa, Me o mü eyi gbü nzö wü di enga ni mü 'buru.

27 Benzamina, mü de kpeke komoko.

Mü ngbü emere ngü baka siti nü.

Benzamina, mü ena angbü ezü so, biti de ra mini!

Kpara te ena amofe e ka-mü nda ma."

28 Dela ci ka Yakobo, te engu bi, da esara wü di ye di. Ah bi ci la teka ewü biri biri 'buru, kpah te nga ngü ka-ewü. Wü di Yakobo nzükpa de füh ye 'basu la, wüh 'buru wü kundu ye nguwa wü kpara nzükpa de füh ye 'basu.

Dene ngü ka kpi ka Yakobo

29-30 Fütanga ngü la, fū Yakobo adu amala ngü fū wü di ye, gü ba dene, "Titine, ni gbe nza eyi. Ni eyi gbamari teka akpi. Te ni kpi eyi la, de wü bi kö ni, du di gbü sū ka-ani, agbü Kanana. Fū wü ati ni gbü mbükü, kpa gbü sū ka wü kundu ani kpala, gbü gö da de iri ye Makepela,* te wüh ngbü eti wü kundu ani gbügbü na ne. Angü sū de kpala, Abarayama, ta te di de kundu ani ne, se me-ye esaka Efirona, enga Ete. Engu se sū la ta me-ye, de wüh di eti wü kpara ka-ani gbügbü na. 31 Angü wüh ti kundu ani Abarayama ake wara ye, Sara, ta gbü sū la. Wüh ti wö ni, Yisaka, ake wara ye, Rebeka, kpah sela. De-ni Yakobo, ni ti mene wara ni, de iri ye Leya ne, kpah sela. 32 Tek a ngü la, ah le de wü za kö ni, nü di, ti kpah kpala, angü dela sū ka kundu ani, ta te engu se esaka wü Ete ne." 33 Yakobo mala ngü la ta bala fū wü di ye. Fū ah adu ara kötö, ace kpa te ye, akpi.

50

1 Te *Yüsefa wu, gü ba, wö ni kpi eyi, fū ah ayia ati afaka kö wö ye esangü ye

de mere gba. 2 Fütanga gba te engu ku la, fū ah anü aī wü kpara, te ewü ngbü ereke kövö, amala ngü fū ewü, de wüh koro de rü, teka areke kö wö ni di, angü ah ena azi. Fū wü kpara la ayia akoro de rü la. Fū ewü angbü efuru rü la te kö *Yakobo baaala, 3 zalü teka fe biri de tü ye, angü gele ka rü engu la, ah ka-ye bala. Fū kö Yakobo angbü baaala, ah zi nda de. Fū wü kpara ka *Ezepeto akoro, aku gba kö *Yakobo Yisarayele, teka fe 'basu de tü ye, da ecu ngüngü ba mere miri la. Wüh le ati kökö kere de, angü gele ka wü Ezepeto ka-ye bala.

4-5 Te wüh ku gba Yakobo nza tete na, fū Yüsefa ayia anü kpaka wü kovo ka miri, gü ba dene, "Ani ku gba wö ni nza eyi. Ni ele ati kökö na. Gbü ra te wö ni yia akpi tete na, engu mala ngü fū ni, de ni kina te-ni, gü ba dene, 'Te ni kpi eyi la, de-ni Yüsefa, ni za kö ni, adu di, ati agbü *Kanana, gbü sū ta te ni, Yakobo, reke kpala.' Fū ni ayia akina lölö na eyi, teka amere ngü la bala. Te di bala, dene ngü te ni ele amala fū miri, de miri le fū ni, teka fū ni aza kö wö ni, anü di, ati agbü Kanana. Fū ni adu kpakine."

6 Fū wü kpara la ayia anü kpaka miri, amala ngari Yüsefa la kpah bala 'buru fefe na. Fū miri ayia ale ngü la, gü ba dene, "Ni le eyi fū Yüsefa, de engu za kö wö ye, ah du di agbü Kanana, kpah baka kina kaka, te engu kina la."

7-9 Fū Yüsefa ayia areke te-ye, aza kö wö ye, anü di agbü Kanana. Fū mere bi wü kpara ayia agü nga kö Yakobo, anü di agbü Kanana kpala. Ah ta de wü cögbörö wü kpara ka Ezepeto 'buru, bete wü marajümiya, te ewü li füh wü nü, de wü arabüya ka-wü. Wü kpara ka Yüsefa, de wü di enga ni ye na, bete wü kpara gbü nga wö ye na nü kpah eyi 'buru, ce bü wü jürü wü jaji, de wü nü ka kötö ka-ewü, agbü Gosene sela. Dela ta 'buru wü kpara, te ewü nü gī nga kö Yakobo agbü Kanana.

10 Fū ewü ayia ati te kaje, anü, anü, anü zalü akoro gbamari kpa ede ngu de iri ye Yürüdene. Fū ewü akoro füh gara da de iri ye Atada. Fū ewü ara sela sikpi lorenzo, da eku gba kö Yakobo 'duwa ba-neh-ene-la. 11 Fū wü kpara de gbü sū la ayia awu wü Ezepeto, te ewü ngbü eku gba 'duwa ba-neh-ene-la. Fū ewü, ayia afü iri sū la, gü ba, "Abele-Masiriyima," te gü ba, gba ka wü Ezepeto. Sū engu la gbamari ede Yürüdene.

12-14 Fū wü di Yakobo aza kö wö wü, abi anü di, ati agbü Makepela, gbü sū, ta te engu mala ngangana fū ewü ne.

* 49:29-30 49:29-30 Makepela ka-ye to kpa fügö ede Mamare.

Sü la ka-ye gbamari to kpa fügö, ede Mamare. Angü Abarayama, te di de kundu ye Yakobo ne, se ta sü la me-ye esaka Efüröna, teka fū ewü adi eti ani gbügbü na. Fū ewü ayia ati Yakobo kpala.

Te wüh ti Yakobo tete na, fū wü Yüsefa ayia de wü di engä ni ye, de wü kpära de te ewü gī nganga na, koro di agbü Kanana ne 'buru, ayia alügü nga wü, adu agbü Ezepeto.

Dela ngü ta te mere te-ye teka kö Yakobo, te wü di ye na bī kökö na, du di, ti agbü Kanana, gbü sü, ta te wüh ngbü eti wü kundu wü gbügbü na ne.

Dene ngü ka Yüsefa de wü di engä ni ye

¹⁵ Fütanga ngü la, fū wü di engä ni ye Yüsefa adu angbü de mere siti fingangü emaguma wü, gü ba, "E-wu neh da, Yüsefa ti ngü, ta te ani mere engu di esiti ne, eyi emaguma ye. Baka te wö ani kpi eyi ne, engu ena adu afü te-ye, amere ani esiti."

Fü cürü akpo angbü emere ewü 'duwa ba-neh-ene-la. ¹⁶ Fū ewü ayia atima tima kpaka Yüsefa, gü ba, "Dene ngari wö ani, ta te engu mala, ce o fū ye, te engu yia akpi tete na ne. Ah gü ba, ¹⁷ 'Yüsefa deyī, ye mere e ao ngü, ta te ani mere ye di ne, emaguma ye eküte ani, teka adu amere ani fütanga ni esiti de.' Te di eyi bala ne, ani ngbü enda'ba te-ani fū ye teka ngü la, de ye wu cinga ani, angü ani 'buru wü kpära ka Me, kpah baka wö ani tane." Te Yüsefa je ngü la bala, fū engu ayia ati 'duwa de gba.

¹⁸ Fū wü di engä ni ye Yüsefa ayia akoro kpakaka na la, ati abuka gbüra wü 'buru kötö, anda'ba te-wü, gü ba, "Mere kpära, ani titine dene eyi 'buru wü kpära, te ani di esaka ye." ¹⁹ Fū Yüsefa adu arü amala ngü fū ewü, gü ba dene, "Yi mere e akpe cürü de. Ma ti ato kuru te yi, teka *siti ngü ka-yi, ta te yi mere fere ne de. Angü dela tima ka Me. ²⁰ Yi mere ta siti ngü ngbüri eyi fere ne, amba Me du fū ngü la eyi, o ba züka ngü tete fū nih 'buru, de ma koro kpakine, teka aküwa mere bi wü kpära. ²¹ Yi mere e akpe cürü de. Ma ena adi kpah fi eceka kpi fütanga yi, de wü kpära ka-yi 'buru."

Dela wü ngü ta te Yüsefa mala fū wü di engä ni ye de züka maguma ye, kpah de züka ri ye. Te wü di engä ni ye na je ngü la bala, fū maguma ewü adu agu.

Dene ngü ka kpi ka Yüsefa

²² Fütanga ngü la, fū Yüsefa angbü agbü Ezepeto kpala, de wü mürü ye la 'buru. Fū re ka Yüsefa ayia akoro 'buru kama biri de füh ye nzükpa (110). ²³ Fū Yüsefa ayia awu wü di Efürayima, de wü kundu ye Efürayima, cu de jia ye. Kpah bala ye Manase, de iri ye Makira ne, bi kpah

nda-ye wü jaji 'buru, o Yüsefa di la ladü de jia ye. Fū Yüsefa agü iri te wü jaji la kpah 'buru me-ye. Fū ah angbü eceka kpi fütanga ewü.

²⁴ Fū Yüsefa ayia agbe. Fū sikipi kaka-na ayia akoro gbmari teka akpi. Fū Yüsefa ayia amala ngü fū wü di ye, de wü di engä ni ye, gü ba dene, "Sikpi ka-ni koro kpah eyi, teka fū ni akpi. Amba, ni wu eyi, gü ba, Me ena adi de wü. Te gara kpala, Me ena adu kpah alügü wü agbü tö ka-ani, agbü Kanana. Angü Me kina kina ta eyi bala, fū wü kundu ani, wü *Abarayama, Yisaka, bete Yakobo, gü ba, 'Ni, Me, ni ena ato tö ka wü Kanana la fū wü, de wü kundu wü.' " ²⁵ Fū Yüsefa amala ngü la fū wü di ye la, gü ba dene, "Wü kina te-wü ekina titine, gü ba, 'Te gara, te Me ena alügü ani agbü Kanana la, ani ena aza biki ni, adu di, ati kpala.' " Fū ewü ayia ale ngü la, akina te-wü fefe na kpah bala.

²⁶ Fütanga ngü la, fū Yüsefa ayia ace kpa te ye, akpi, o re kaka koro eyi 'buru kama biri de füh ye nzükpa (110).

Fū wü kpära te ewü ereke kövö ayia aza rü ka-wü, akoro di, afuru eküte kö Yüsefa, angü ah ena azi zi. Fū ewü aza kökö, ao gbü sanduku, ayia ani mömö na ani. Amba wüh ti engu la de. Fū kö Yüsefa angbü agbü Ezepeto sela, eci nga re, de te Me ena alügü wü di engä Yisaraye le tete na, agbü Kanana ne.

Adu ngü ka Yüsefa ta bala.

Dene ngü ta te Matayo ba teka Yesu Kurisito

Masere si-ngü

Kpara te ba buku ka Matayo ne, ena adi de Matayo, te wüh ngbü eí engu *Levi ne. Matayo de süka wü *kpara ka Yesu, nzükpa de füh ye 'basu ne. Ah kphah de Matayo, ta te ngbü ero *jiase, da eto fü miri ka wü Rüma ne.

Wü ngü de te Matayo ba ne, sere fü nih mbölö, gü ba, Yesu de Miri, ta te Me tima, teka aküwa wü kpara füh kotö ne. Angü Me mala ta eyi fü wü *di engu Yisarayelegügü, gü ba, "Ni ena atima Miri fü wü, teka aküwa wü, baka mere miri ka-wü, *Davidi, tane." Mere bi wü kpara te Matayo ba ngü ne fü ewü, ah de wü di engu ni ye na, wü di engu Yisarayelegü. Te di bala, ah mala fü ewü, gü ba, "Wü *mürü dofo mala ta nga Yesu, de mere bi wü ngü te Yesu ena amere, o wüh bi Yesu la de." Matayo mala kphah fü ewü, gü ba, "Yesu de kundu ye Miri Davidi." Te di bala, ah le de wü di engu Yisarayelegü wu awu, gü ba, Yesu de kpara te Me tima me-ye fanü. Amba Yesu koro teka aküwa bü nzö wü di engu Yisarayelegü nda de. Ah koro kphah teka aküwa wü kpara 'buru.

Matayo sere kphah, gü ba, Yesu de kpeke kpara, te wu da eri wü kpara ka-ye, de ngü ka Me, ereke areke. Wü riri ka Yesu baka nda wü gara kpara nda de. Ah ka-ye de to riri.

Wü ngü te mü ena amaka gbü buku ka Matayo, wüh dene.

Sapita 1:1-2:23 İri wü kundu ye Yesu, bete ngü ka mabi Yesu

Sapita 3:1-12 Ngü ka Yüwane Mürü Babatiza

Sapita 3:13-4:11 Ngü ka babatiza ka Yesu, bete ngü te Satana re engu di Sapita 4:12-18:25 Ngü te Yesu mere agbü Galilaya

Sapita 19:1-20:34 Ngü te Yesu mere, te engu yia tete agbü Galilaya, enü agbü Yerüsalema ne

Sapita 21:1-27:66 Adu ngü ka Yesu, bete ngü ka kpi kaka

Sapita 28:1-20 Ngü ka züzükü ka Yesu gbü kpi

Dene ngü teka Yesu Kurisito E-küwa-nih

¹ Yesu *Kurisito de kpara te Me tima engu kpa füh kotö kpakine, teka aküwa wü kpara. Angü Me reke ta ngü la me-ye

bala, gü ba, ni ena atima engu, de wüh bi engu gbü nguwa *Davidi, fü engu angbü kphah Mere Miri gbü nzö wü kpara ba Miri Davidi. Yesu Kurisito engu ne, ah kphah de kundu ye *Abarayama, ta te Me mala ngü fefe, gü ba, ni ena aküwa wü kpara füh kotö ne 'buru teka ngü kaka ne. Dene iri wü mere kundu kundu ye Yesu Kurisito.

² Abarayama ta de wö ye *Yisaka, fü Yisaka abi *Yakobo.

Fü Yakobo abi *Yuda de wü di engu ni ye nzükpa de füh ye biri ne.

³ Fü Yuda abi Perezee.*

Fü Perezee ayia abi Ezerone.

Fü Ezerone abi Rama.

⁴ Fü Rama abi nda-ye ye ye, de iri ye Aminadaba.

Fü Aminadaba abi Nasona.

Fü Nasona abi Salamona.

⁵ Fü Salamona abi Büwaza, iri ni ye na de Rakaba.

Fü Büwaza abi Obede, iri ni ye na de Ruta. Fü Obede abi Yese.

⁶ Fü Yese adu abi Davidi, te di ta de mere miri ka wü *Yisarayelegü ne.

Fü Davidi abi *Solomona, iri ni ye na de Beteseba, te di ta wara Uriya ne.

⁷ Fü Solomona abi Robama.

Fü Robama abi Abiya.

Fü Abiya abi nda-ye Asa.

⁸ Fü Asa adu abi nda-ye Yosafata.

Fü Yosafata abi Yorama.

Fü Yorama abi Uziya.

⁹ Fü Uziya abi Yütama.

Fü Yütama abi Aza.

Fü Aza abi Izikiya.

¹⁰ Fü Izikiya abi nda-ye Manase.

Fü Manase abi Amona.

Fü Amona abi Yüsiya.

¹¹ Fü Yüsiya abi Yekoniya de wü di engu ni ye.

Gbü re te Yekoniya ngbü miri gbü *Yudaya tete, fü wü kpara ka *Babilona akoro de gü, azoro engu, de wü kpara ka-ye 'buru, ago di agba wü, labi tete.

¹² Fü Yekoniya abi Salatiyele tine kpara.

Fü Salatiyele abi Zerubabela.

¹³ Fü Zerubabela adu abi Abiyuda tine agbü Yudaya, o wüh du eyi agbü tö ka-wü.

Fü Abiyuda abi Eliyakima.

Fü Eliyakima abi Azora.

¹⁴ Fü Azora abi Zadoka.

Fü Zadoka abi Akimi.

Fü Akimi abi Eliyuda.

¹⁵ Fü Eliyuda abi Elazara.

Fü Elazara abi Matana.

Fü Matana abi Yakobo.

* 1:3 1:3 Engu ni ye Perezee de Zera, iri ni ewü de Tamara.

16 Fū Yakobo ayia abī *Yūsefa. Ah de Yūsefa ta te za *Mariya, te wū kpara ngbū efi, gū ba, engu de wō Yesu ne. Amba Yesu ka-ye de Ye Me.

17 Te di bala, te kpo te *Abarayama, akoro te Miri *Davidi, wūh baka wū kpara nzūkpa de fūh ye bala. Akpo gbū re ka Miri Davidi, akoro gbū re te wūh zoro wū kpara ka Yudaya labi tete agbū Babilona, wūh baka wū kpara nzūkpa de fūh ye bala. Kpah bala, akpo gbū re, te ewū di labi tete agbū Babilona, akoro te Yesu *Kurisito, wūh kpah nzūkpa de fūh ye bala.

Dene ngū ka yayaka ka Yesu

Luka 2:1-7

18 Ngū ka yayaka ka Yesu kpo ta bane. *Mariya ta de gara jaji wūrūse, ta te wūh dara engu fū gara komoko de iri ye *Yūsefa. Te wūh dara engu, wūh wu engu wūrūse tete nda-wū la de. Fū Mariya ayia amaka bu, gbū wazi ka *Nzila Wazi Me. 19 Te Yūsefa wu, gū ba, wara ni, Mariya, maka bu eyi, fū ngū la ato fingangū fefe afa sū. Ah gū ba, "Te di bala, ah tī fū ni aza engu wara ni tete tīne de. Amba ni le aī engu engagira wū mere kpara, aye sūka ngū kaka la, nda-ni kpah de. Te ah bala, ah le fū ni agiri kaje, ace engu bū zirri bala." Angū Yūsefa ka-ye ta de zūka kpara, te le ato mere lūmū te Mariya de.

20 O Yūsefa ngbū efi ngū la bala, fū Me ayia atima *malayika ka-ye kpakaka na gbū roto, agū ba, "Yūsefa,† mū mere e akpe cūrū, teka aza Mariya wara mū tete, ne de, angū bu de te engu maka la, ah maka gbū siti kaje de, ah maka bu dela gbū wazi ka Nzila Wazi Me. 21 Ye de te Mariya ena abī la, ah ena adi ye komoko, fū mū agū iiri na Yesu, angū engu ena akūwa wū kpara ka-ye gbū *siti ngū ka-ewū 'buru me-ye." Si-ngū gbū iiri de Yesu la, gū ba, *E-kūwa-nih.

22-25 Fūtanga roto la, fū Yūsefa azūkū. Fū ah adu amere wū ngū, de te malayika mala fe ye ne 'buru. Fū ah adu aza Mariya wara ye tete. Amba wūh ngbū ake di baka wūrūse ake komoko de, zalū gbū sīkpī te Mariya nū yaka gina enga ye tete. Fū Yūsefa agū iiri na Yesu, baka te malayika mala fefe.

Wū ngū dela mere te-wū bala kūkūrū de, angū ah tī kpini de ngū, ta te gara *mūrū dofo ba gbū *Ngari Me, gū ba, "Gara jaji wūrūse, te ngbū ake komoko la de, ena amaka bu. Fū ah abī ye komoko.

Fū ewū agū iiri na Imanūwele."‡ Ah ba e te wūh gū ba, "Me eyi tundu de wū nih."

2

Dene ngū ka wū e-wu-ngū, te ewū koro aceka vūrū Yesu

1-2 Wūh bī ta Yesu agbū Beteleme, gbū tō ka *Yudaya, gbū re ta te gina *Erode ngbū di mere miri gbū Yudaya ne. Ta gbū re la, gara wū e-wu-ngū ta ladū kpa gbū gara sū nengete, to kpa fūgō, te ewū wu si-ngū teka wū kūfara fa sū. Gbū gara sīkpī bane, fū ewū awu to kūfara. Fū ewū ayia awu teke, gū ba, wūh bī mere miri eyi fanū gbū tō ka Yudaya. Fū wū e-wu-ngū la ayia anū akoro agbū Yerūsalema. Fū ewū amala ngū, gū ba, "Ani koro dene teka acu ngū vūrū mbarase, de te wūh bī engu, te ena angbū Mere Miri ka wū *Yisarayeale te gara ne. Angū ani wu kūfara, de te gū tamu ngū ka yayaka kaka fū ani ne eyi. Te di bala, wūh yaka engu neh to kaye?"

3 Te Miri Erode je ngū la bala, fū mamaguma ayia anzu. Fū wū kpara ka Yerūsalema angbū 'buru de mere cūrū, da efi nga ngū, teka ngū la. 4 Fū Miri Erode ayia abiti wū mere *mūrū gele, de wū *mūrū riri 'buru, ayi-ta ewū, gū ba, "Angū Mere Miri de te Me gū ba, 'Ni ena atima engu teka akūwa ani ne,' wūh ena abī engu neh to kaye?" 5 Fū wū kpara la alūgū ngū fefe, gū ba, "Wūh ena abī miri la agbū Beteleme, gbū tō ka Yudaya sene. Angū gara *mūrū dofo ba ngū la ta eyi gbū *Ngari Me, gū ba, 6 'Wū ceka la Beteleme, te di de enga kōtī cūkū'daye, esūka wū bu ye gbū tō ka Yudaya ne, mere zūka ngū ena akoro gbūgbū. Angū wūh ena abī Mere Miri gbū sū la, te ena angbū eceka kpī fūtanga wū kpara ka-ni, wū di enga Yisarayeale.' "†

7 Te Miri Erode je ngū la bala, fū ah ayia aī wū e-wu-ngū, te ewū koro kpa fūgō ne, kpaka ye kpīkpī wū, aro mō de ewū esalakumu. Fū ah ayi-ta ewū, gū ba, "Angū wū wu kūfara la neh elaye?" Fū ewū asere ngū la fefe. 8 Fū Miri Erode adu amala fū ewū, gū ba, "Wūh ba ta eyi gbū Ngari Me, gū ba, wūh ena abī Mere Miri la agbū Beteleme. Te di bala, wū nū enū kpala, wū giri sū de te wūh bī engu tete la. Te wū maka engu eyi la, de wū du mala nganga na fū ni. Angū ni le kpah anū kpala acu ngūngū na." Amba ah mala ngū la de mani. Engu ngbū efiti ewū teka de ni nū, ni mōrō mbarase la.

† 1:20 1:20 Malayika i Yūsefa, gū ba, Kundu ye *Davidi. Ah mala bala kūkūrū de, angū ah le ato wazi fū Yūsefa, teka de engu wu awu, gū ba, te ni za Mariya la, ye de te engu ena abī la ena adi gbū nguwa Miri Davidi. ‡ 1:22-25

1:22-25 Mū ena amaka ngū la gbū buku ka Yisaya 7:14.

* 2:6 2:6 Mū ena amaka ngū la gbū buku ka Miika 5:2.

⁹⁻¹⁰ Te wü e-wu-ngü la je ri miri bala, fū ewü ayia ale kaje ka-wü, anü sü. Wüh te eceka de, gho! te küfara de te ewü ngbü efa nganga na ne. Te wüh wu küfara la bala, fū ewü angbü de mere tadu. Fū küfara la ati fi bü engagira ewü, enü. Fū ah anü arü mbii füh kambü, te wüh ngbü de vürü Yesu gbügbü na ne. ¹¹ Fū ewü ayia ari kpa esambü la, amaka vürü Yesu ake *Mariya, te di de ni ye na ne. Fū ewü ayia abu nzökuta wü kötö, teka acu ngü Yesu. Fū ewü ayia afuru wü e ka-wü, te ewü koro di ne. Ah de züka *diki-se, ake züka *se-wü, bete *rü te wüh ecuru acuru de züka se ye. Fū ewü aza wü e la ato, teka acu ngü Yesu di.

¹² Fütanga ngü la, baka te wü e-wu-ngü la yia edu tete agba wü, fū Me atima *malayika ka-ye, amala ngü fū ewü gbü roto, gü ba, "Wü mere e adu akoro tñe kpaka Miri Erode de. Wü du ka-wü te gara kaje." Fū wü kpapa la ayia adu agbü tö ka-wü te gara kaje, baka ngü te Me mala fū ewü la.

Dene ngü te wü Yüsefa kpe de Yesu di agbü tö ka Ezepeto

¹³ Fütanga wü e-wu-ngü la, fū Me atima malayika ka-ye kpaka *Yüsefa, amala ngü fefe gbü roto, gü ba, "Yüsefa deyi, ye yia eyia kere, ye za vürü mbarase ne, ake ni ye, de ye kpe de ewü nengete agbü *Ezepeto, angü Miri *Erode ena agiri vürü mbarase ne, teka amörö. Wü ngbü kpala zalü akoro gbü sikipi te ni ena adu amala ngü fū wü me-ni." ¹⁴ Te Yüsefa je ngü la bala, fū ah aza vürü mbarase la, ake ni ye, bü 'duwa gbü biti la, akpe de ewü agbü Ezepeto. ¹⁵ Fū ewü angbü kpala, teka mba re cükü'daye, zalü koro gbü re te Miri Erode kpi tete. Ngü la mere te-ye bala kükürü de, angü ah ti kpini de ngü ta te gara *mürü dofo ba gbü *Ngari Me, gü ba, "Ni, Me, ni ena atima ye ni agbü Ezepeto, fū ni adu ai engu, alügü gbü tö ka-wü."†

Dene ngü te Miri Erode mörö wü jaji di agbü Beteleme

¹⁶ Fū Miri *Erode angbü aci nga wü e-wu-ngü la ma. Wüh fū go kpakaka nda-wü de. Fū mamaguma ayia asiti afa sü teka ngü la. Fū engu awu, gü ba, "Wüh fiti ni ka-wü nda-wü afiti!" Fū engu ayia atima wü marajümiya ka-ye agbü Beteleme, agü ba, "Wü nü kpala, wü giri wü jaji komoko gbü nga nzö sü la 'buru, de wü mörö ewü

amörö 'buru asidi. Wüh kpo te wü jaji komoko, te wüh bi ewü gbü re ne, akoro te mene ewü te re ka-wü koro eyi 'basu." Ah mala ngü la bala teka ngü te wü e-wu-ngü mala fefe, teka sikipi te ewü wu küfara la tete. Fū wü marajümiya ayia anü agbü Beteleme, amörö wü jaji, baka te Miri Erode mala fū ewü.

¹⁷ Ngü la ti kpini de ngü ta te Me mala, gömö gara *mürü dofo de iri ye Yeremaya gügü, gü ba, ¹⁸ "Mere bi wü würüse ngbü eku yiyi, da eku gba de mere ngura, teka ngü ka wü di engu wü, te ewü kpi nza. Wüh le de wüh le ta-ngü te ani, agu maguma ani kpah de. Gba ka-ewü la, ah ba e te Rayele, te di de ata ani, wü di engu *Yisarayeleye ne, ngbü eku gba la me-ye, angü wü di enganga nza eyi 'buru."‡

Dene ngü te wü Yüsefa ake Mariya du de Yesu agbü Nazareta

¹⁹ Fütanga kpi ka *Erode, fū Me adu atima *malayika ka-ye kpaka *Yüsefa agbü *Ezepeto kpala, amala ngü fefe gbü roto, gü ba, ²⁰ "Yüsefa deyi, ye yia eyia, ye za mbarase la ake ni ye, ye du de ewü agbü tö ka-wü, wü *Yisarayeleye. Angü wü kpapa ta te ewü ngbü egiri engu teka amörö ne, wüh kpi ka-wü eyi." ²¹ Fū Yüsefa ayia 'duwa, aza Yesu ake ni ye, adu de ewü agbü tö ka wü Yisarayeleye.

²² Te wüh ngbü edu tete, fū Yüsefa ayia aje ngü, gü ba, "Wüh o gara ye Erode, de iri ye Arukilayo ne, eyi miri da wö ye, agbü *Yudaya kpala." Te di bala, fū Yüsefa ayia akpe cürü, ah le adu angbü agbü Yudaya nda-ye tñe de. Fū Me adu amala ngü fefe kpah gbü roto, gü ba, "Ye nü, ye ngbü gbü nzö köti ka *Galilaya." ²³ Fū wü Yüsefa ayia anü angbü agbü Galilaya kpala. Fū ewü ao gba wü gbü gara köti, de iri ye Nazareta.

Ngü ka ngbüngbü ka wü Yesu agbü Nazareta la, ah ti kpini te ri Me, de te engu mala ta gömö wü *mürü dofo, gü ba, "Wüh ena angbü ei Miri la, 'kpapa ka Nazareta'."

3

Dene ngü ka Yüwane Mürü Babatiza Marako 1:2-8; Luka 3:1-18; Yüwane 1:19-28

¹ Sidi nga mere bi wü re, fū gara komoko de iri ye *Yüwane Mürü Babatiza anü angbü kpa etü gü, gbü tö ka *Yudaya sela. Fū ah akpo da eri dofo, de ngü ka Me

† 2:15 2:15 Mü ena amaka ngü la gbü buku ka Oseya 11:1.

‡ 2:18 2:18 Mü ena amaka ngü la gbü buku ka Yeremaya 31:15. Rayele ta de wara Yakobo. Ah de Yakobo te wüh fū iri, gü ba, Yisarayeleye ne. Yeremaya gü ba, Rayele ngbü eku gba agbü Rama, angü Rama de sü ta te wüh mörö mere bi wü di engu Yisarayeleye gbügbü, gbü lakü ka mürü dofo Yeremaya. Ngü la mere ta te-ye, o Rayele kpi ka-ye eyi gügü. Amba wüh gü ba, ah ba e te Rayele ngbü eku gba me-ye, angü te engu ena awu ngü la ta me-ye, de bane ah ena aku gba la ta me-ye bala, angü dela 'buru wü ata ye na.

fü wü kpara de kpala, ² gü ba, "Wü fü maguma wü, angü Mere Miri, te Me ena atima aküwa ani ne, koro eyi."

³ Yüwane Mürü Babatiza de kpara, ta te *mürü dofo Yisaya mala nganga na gbü *Ngari Me, gü ba, "Gara kpara ena akoro, angbü emala ngü de mere ri ye kpa etü gü, gü ba, 'Mere Miri, te ena aküwa ani ne, ah te ekoro! Ah le de wü reke kaje fefe! Wü ni wü cudu, wü o kpini, teka fü engu anü tete na.' "*

⁴ Yüwane ngbü ta eto bongo ka-ye, te ewü gbü gbü su nü de iri ye kamele, sisiti gbulukusu bane. Ah ngbü ta ei ku konü etadu ye. Zü-e kaka te engu ngbü ezü, ah ka-ye ta bü mbira te di baka eci, bete wü, de te engu ngbü emaka agbü gü kpala.

⁵ Fü mere bi wü kpara ayia akoro kpaka Yüwane, teka aje ngü ka Me gögömö na. Gara ewü koro gbü wü köti ede ngu de iri ye Yürüdene. Gara ewü koro gbü wü gara nga nzö köti ka Yudaya. Gara ewü koro nengete agbü Yerüsalema. ⁶ Te wü kpara la je ngü ka Me gömö Yüwane de bala, fü maguma ewü ayia agürü. Fü ewü akpo da emala nga wü *siti ngü ka-wü fü Me de cinga. Fü Yüwane angbü eto *babatiza fü ewü gbü ngu Yürüdene.

⁷ Fü mere bi wü *mürü riri ka wü *Yisarayele ayia kpa akoro kpaka Yüwane, teka de engu to babatiza fü ani. Gara ewü de wü *Farusi, gara ewü de wü *Saduke. Te Yüwane wu ewü te ewü ngbü ekoro, fü ah awu teke, gü ba, maguma ewü ka-ye 'basu 'basu. Fü ah adu amala ngü fü ewü, gü ba, "De-yi, wü siti kpara! Mani ka-yi baka nda kpürü! Yi efi nda-yi, gü ba, 'Ani ena aküwa gbü kuru, te Me ena ato fü wü siti kpara te gara ne,' bü teka ngü te yi ngbü emala de komö yi, kükürü kükürü de bala? E-mala ngü la fü yi bala neh da? ⁸ Te yi le aküwa fanü la, ah le de yi fü maguma yi, adi emere wü ngü te ena areke gbü jia Me. ⁹ Yi fi nda-yi, gü ba, 'Me ena aküwa ani, angü ani de wü kundu ye *Abarayama ne?' Ah bala de! Ma emala fü yi dene zu ngü. Te Me le la, ah ti eyi afü wü teme ne 'buru, akoro di wü di Abarayama tete, te ngü ka-ewü ena areke gbü jija, afa nda-yi ka! ¹⁰ Yi ceka la, Me eyi nzo teka ato kuru fü yi, baka kpara te di de gifü esaka ye, teka agiri mene rü te ri de, fü engu ade, agü agbü wa.

¹¹ Amba Me tima gara kpara eyi, te ena akoro ari yi sidi nga ra, wawazi na fa ndara ka. Ma nda-ra bü baka labi kaka-na, angü engu me-ye de mere kpara fere. Nda-ra, ma ngbü eto babatiza fü yi de ngu kükürü. Amba nda-ka, ah ena akoro ato

babatiza fü yi de wazi ka *Nzila Wazi Me, te di baka wa, te ena afü yi, fü yi amere ngü ka Me areke areke. ¹² Ah ena akoro de körö ka-ye esaka ye, teka afeke jia ndo ka-ye di. Te engu feke ndo ka-ye eyi la, fü ah aza nzinzila la, ao agbü kafa. Fü engu akö caca na la, abu agbü mene wa, te ünü nda kü de."

Dela kpeke ngü ka Me ta te Yüwane Mürü Babatiza ngbü eri wü kpara di.

*Dene ngü ka babatiza ka Yesu
Marako 1:9-11; Luka 3:21-22*

¹³ Fütanga ngü la, fü Yesu ayia agbü *Galilaya, anü akoro kpaka *Yüwane agbü ngu Yürüdene, teka aza *babatiza. ¹⁴ Te Yüwane wu ngü la bala, fü ah angbü de fingangü teka ngü ka Yesu la, angü ngü la ti gbü jija de. Fü ah amala fü Yesu, gü ba, "Mere kpara, ah ti fere ato babatiza fü mü me-ra de. Ah le ta fü ra aza babatiza ngbü esaka mü, angü mü de mere kpara fere." ¹⁵ Fü Yesu alügü ngü fefe, gü ba, "Bala de. Ye to babatiza eto fü ni. Ah le fü ngü la amere te-ye enatikine, angü Me le ngü la me-ye bala." Te Yüwane je ngü la bala, fü ah adu ale. Fü ewü ari agbü ngu, fü Yüwane ato babatiza fü Yesu.

¹⁶ Te Yesu koro tete gbü ngu, enü kpa füh gumba, fü ah aceka kpü bane de, gbo! te kpü te ü te-ye. Fü *Nzila Wazi Me akoro agbü kpü baka mö, arü gbü nzönzö. ¹⁷ Fü ri Me ayia awü agbü kpü, gü ba, "Dene zu Ye ra, te ma o maguma ra eküküte. Ngü kaka reke gbü jia ra 'duwa ba-neh-ene-la."

Dela ngü te mere te-ye, te Yesu za babatiza tete esaka Yüwane.

4

*Dene ngü te Satana re Yesu di
Marako 1:12-13; Luka 4:1-13*

¹ Fütanga ngü te *Yüwane to *babatiza fü Yesu nza tete, fü *Nzila Wazi Me ayia aza Yesu, anü di kpa etü gü, teka de *Satana re engu kpala. ² Fü Yesu ara kpa etü gü kpala sikipi teke 'basu, ah zü e nda de. Fü tala ayia amere engu kpala afa sü.

³ Fü Satana ayia akoro kpaka Yesu, amala ngü fefe, gü ba, "Te mü zu de Ye Me fanü fanü la, mü fü la wü teme ne, de wüh koro zü-e, fü mü azü." ⁴ Yesu gü ba, "Mü fi, gü ba, ngü te ena aküwa kpara, ah bü duu de zü-e? *Ngari Me gü neh fe? E te ena aküwa kpara fanü fanü, ah ka-ye de ngü ka Me."*

⁵ Fü Satana adu afi nga gara mani. Fü ah adu aza Yesu, anü di agbü Yerüsalema, ali ake di kpa enzö *Mere Kambü ka Me kpa tikpi, ⁶ agü ba, "Te mü zu de Ye Me

* 3:3 3:3 Mü ena amaka ngü la gbü buku ka Yisaya 40:3. nga Riri 8:3.

* 4:4 4:4 Mü ena amaka ngü la gbü buku ka Manda

fanü la, mü ce la te-mü, mü ti kpa kötö. Gara ngü ti amere mü de, angü wüh ba ta gbü Ngari Me, gü ba, 'Me ena atima wü *malayika ka-ye, teka ale ta-ngü te mü. Wüh ena akoro abi mü esaka wü, mü ti amo lö mü eküte teme de.' "† 7 Fü Yesu alügü ngü fefe, gü ba, "Bala de. Wüh ba ta gbü Ngari Me kpah eyi, gü ba, 'Mü mere e are maguma Mere Me de.' "‡

8 Fütanga ngü la, fü Satana adu kpah aza Yesu, anü di kpa füh mere rüvü kpa tikpi, asere nga nzö wü sü füh kotö ne, de züka wü ngü ka kotö ne 'buru fefe na, 9 agü ba, "Te ye ti kötö, acu ngü ni ba me ka-ye la, ni ena ato wü e la 'buru fü ye." 10 Te Yesu je ngü la bala, fü ah amala ngü fefe, gü ba, "Satana, mü ce ra ace! Angü Ngari Me mala eyi, gü ba, 'Mü di ecu nzö ngü Mere Me kpiki ye, de mü di emere duu riri kaka.' "§

11 Te Satana je ngü la bala, fü ah ayia ace la mba Yesu. Fü wü *malayika ka Me akoro teka ale ta-ngü te Yesu.

Dene ngü te Yesu kpo de tima ka-ye tete agbü Galilaya

Marako 1:14-15; Luka 4:14-15

12 Fütanga ngü la, fü Miri Anitipa *Erode azoro *Yüwane, agü agbü ku. Te Yesu yia agbü gü la du koro tete, fü ah aje nga Yüwane bala, fü ah ayia ace sü la, adu ka-ye agbü *Galilaya. 13 Ah du ngbü agbü Nazareta nda-ye tine de. Ah go ngbü ka-ye agbü Kaparanama, te di era mere ngu de iri ye Galilaya. Tö la, ah ta de sü, te nguwa wü Nafatali, bete nguwa wü Zebulona ngbü tete. Fü Yesu angbü endoro gbü wü sü la, da emala to ngü ka Me fü wü kpara de kpala.

14 Ngü la ti kpini de ngü ta te *mürü dofo Yisaya ba gbü *Ngari Me gügü, gü ba, 15 "Me ena amere züka ngü fü wü kpara gbü tö ka Zebulona bete nda Nafatali, te ewü ngbü engbü eta ngu Yürüdene, era mere ngu, agbü tö ka Galilaya, esüka wü *ganzi kpara ne. 16 Angü, teka mere bi re, wü kpara la ngbü ka-wü ta gbü mere cinga ka *siti ngü, gbü siti ngbami* ka kpi, angü wüh wu ngü ka Me ta nda-wü de. Amba titine wüh küwa eyi, angü Mere Miri koro eyi kpaka ewü, teka aü fingangü ka-ewü."† Dela ngü ta te Yisaya ba teka tö ka Galilaya.

17 Te Yesu ngbü endoro agbü Galilaya kpala, ah ngbü da emala to ngü ka Me fü wü kpara, gü ba, "Ah le de wü fü maguma

wü, angü Miri te Me tima, teka aküwa wü, koro eyi."

Dene ngü ka gina wü kpara, ta te Yesu i ewü

Marako 1:16-20

18 Gbü gara ra, fü Yesu ayia anü andoro edere mere ngu de iri ye Galilaya. Fü engu awu wü gara komoko 'basu, te ewü ngbü egü yimba ka-wü gbü ngu teka azoro si, angü ah de tima ka-ewü. Ah de Simüna Petero ake enga ni ye, de iri ye Anderiya. 19 Fü Yesu arü amala ngü fü ewü, gü ba, "Yi nü kpakine, yi lala gbü nga ra. Ma ena ao yi, teka angbü efü wü kpara, de wüh le ngü ka Me, da tima ka si te yi ngbü emere ne." 20 Te wüh je ngü la bala, fü ewü ayia ace tima ka si ka-wü la, te wüh ngbü emere la, adu alala gbü nga Yesu.

21 Fü wü Yesu ayia sela, anü kpa engagira nü mba cükü'daye. Fü ewü anü amaka kpah wü gara kpara 'basu. Ah de wü *Yakobo ake *Yüwane, wü di Zebedayo. Wüh ngbü ta de wü wö wü gbü *zabu, da ekpoko jia yimba ka-wü. Fü Yesu adu ai ewü kpah bala. 22 Fü ewü ayia ace wö wü, de wü zabu ka-wü la sela, anü ka-wü, alala gbü nga Yesu.

Dene ngü ka wü tima te Yesu ngbü mere

23 Gbü wü sikipi la, Yesu ngbü ta endoro gbü nzö kötö ka *Galilaya 'buru, da erü wü kpara de to ngü ka Me, kpa *esambü ka biti-te ka-ewü. Ah ngbü ta emala ngü ka *küküwa te Me tima fü ewü ne, kpah da eküwa wü kpara gbü wü keke ka-wü 'buru. 24 Tekä ngü la, fü nga Yesu awü gbü sü la 'buru, akoro zalü agbü tö ka Siriya. Te di bala, fü wü kpara angbü eza wü kpara de wü keke ka-wü kpiki ye kpiki ye, enü ekoro di kpaka Yesu. Gara ewü de *siti wü di enga me guwu wü, gara ewü te kö-nürü ngbü emere ewü, de mene ewü te küte ewü kpi akpi, ngbü walawala, kpah bete mene ewü te küte ewü ngbü eke efa sü. Wüh ngbü koro de wü kpara la 'buru kpaka Yesu, fü engu angbü eküwa ewü. 25 Tekä ngü la, fü mere bi wü kpara ka Galilaya ayia ale ngü ka Yesu, akpo angbü efa nganga. Gara wü kpara koro nda-wü nengete agbü Dekapoli,‡ gara ewü koro agbü Yerüsalema, de wü gara wü kötö ka *Yudaya 'buru, gara ewü koro nda-wü kpa eta ngu Yürüdene. Wü kpara la koro 'buru teka aje de gömö Yesu la.

5

Dene ngü te Yesu ri wü kpara di,

† 4:6 4:6 Mü ena amaka ngü la gbü buku ka Ci ka wü Davidi 91:11-12. ‡ 4:7 4:7 Mü ena amaka ngü la gbü buku ka Manda nga Riri 6:16. § 4:10 4:10 Mü ena amaka ngü la gbü buku ka Manda nga Riri 6:13. * 4:16 4:16 Ngbami de mbiri sü baka biti. † 4:16 4:16 Mü ena amaka ngü la gbü Yisaya 9:1-2. ‡ 4:25 4:25 Si-ngü gbü iri de Dekapoli ne, gü ba, wü kötö nzüka.

*teka zūka ngü te ewü ena amaka te gara
Luka 6:20-23*

¹ Te Yesu wu mere bi wü kpara, te ewü koro kpaka ye de bala, fü engu ayia alí kpa füh rüvü adu angbü kötö. Fü wü kpara kaka-na ayia akoro angbü edede na kpala.

² Fü Yesu akpo da erí ewü, gü ba dene,

³ “Wü kpara, te ewü ngbü enda'ba te-wü engagira Me,
ba wü mürü cinga,
wüh ena amaka zūka ngü me-wü,
angü Me ena aküwa ewü agbü sü ka-ye, agbü kpí.

⁴ Wü kpara, te ewü ngbü eku gba teka *siti ngü ka-wü,
wüh ena amaka zūka ngü me-wü,
angü Me ena agu maguma ewü me-ye.

⁵ Wü kpara te ewü o te-wü ba mere kpara de,
wüh ena amaka zūka ngü me-wü,
angü Me ena ato zūka sü fü ewü.

⁶ Wü kpara, te ewü o maguma wü 'buru teka amere ngü te ena areke gbü jia Me,
wüh ena amaka zūka ngü me-wü,
angü Me ena ato wazi ye fü ewü, teka amere ngü la di.

⁷ Mene wü kpara, te ewü ngbü eboro siti ngü ka wü bu ewü,
wüh ena amaka zūka ngü me-wü,
angü Me ena aboro kpah siti ngü ka-ewü.

⁸ Wü kpara, te ewü ngbü emere ngü ka Me de maguma wü biringbö,
wüh ena amaka zūka ngü me-wü,
angü wüh ena awu Me cu de jia wü.

⁹ Mene wü kpara, te ewü ngbü ereke ngü esüka wü bu wü,
wüh ena amaka zūka ngü me-wü,
angü Me ena i ewü, wü di ye.

¹⁰ Wü kpara, te wü bu wü ngbü ekpülü ewü,
da eto cinga te ewü,
teka te wüh ngbü fi bü da elala gbü ngü ka Me ne,
wüh ena amaka zūka ngü me-wü,
angü Me ena aküwa ewü agbü sü ka-ye, agbü kpí.

¹¹ Wayi, nda-yí, ah le de yi ngbü fi bü da elala gbü nga ra. Angü, te wü kpara ngbü esoko yi, da ekpülü yi, eto mere cinga te yi, kpah da emala mere bi wü siti ngü eküte yi de wu, teka ngü ka-ra la, ngü ma, yi ena amaka zūka ngü te gara. ¹² Te wüh mere yi bala, ah le de yi ngbü de zo, kpah de mere tadu! Me ena ato mere bi wü zūka ngü fü yi te gara agbü kpí, baka nda wü *mürü dofo ka Me ta gügü ne, angü wüh ngbü ta etüka te-wü kpah bala.”

*Dene wü mani te Yesu mala fü
wü kpara ka-ye,*

teka ngbüngbü ka-ewü füh kotö ne

¹³ Fü Yesu adu kpah amala gara ngü fü ewü, gü ba, “De-yi, wü kpara ka-ra, ah le de yi di emere zūka ngü esüka wü kpara füh kotö sene, teka fü yi ato wazi fü ewü, baka ngütü te ngbü ereke wü e. Amba te yi mere wü ngü te ngbü ereke areke gbü jia Me nda-yi de la, yi ena adi baka cambiri ngütü, te mi de. Wüh ena amere de cambiri ngütü la neh ene? Wüh ena aza, abu kpa füh ka, angü tima kaka tinea ma.

¹⁴ Ah le de yi di kpah baka ze-wa, te ena angbü elofu sü fü wü kpara füh kotö sene, teka fü wü kpara 'buru adi ewu wü zūka ngü te yi ngbü emere ne, baka mere kambü te wüh jì ga füh rüvü, te tì awo te-ye de, angü wü kpara 'buru tì eyi awu mbi mbi mbi. ¹⁵ Te mü siya wa gbü biti la, mü ena amere di ne? Mü ena ao esa kuwu? Ah bala de! Mü ena ao mba füh gara e kpa tikpi, teka alofo sü fü wü kpara esambü 'buru. ¹⁶ Te di bala, ah le fü yi angbü emere wü zūka ngü esüka wü kpara füh kotö sene, baka ze-wa te ngbü elofu sü esambü 'buru. Te yi mere bala, wü kpara 'buru ena agbo nga iri Wö yi, Me agbü kpí, teka zūka ngü ka-yi, te yi ngbü emere la.”

*Dene ngü te Yesu ri wü kpara di, teka
Riri ka Me*

¹⁷ Fü Yesu adu kpah amala gara ngü fü wü kpara ka-ye, gü ba, “Wü gara yi ngbü efi nda-wü, gü ba, ma koro dene teka asiti wü *Riri te di gbü *Ngari Me ne? Ah bala de. Ma koro teka asiti wü Riri la ndara de. Amba ma koro ka-ra teka asere si-ngü gbü wü Riri la fü yi, teka fü yi aje mbi mbi mbi. ¹⁸ Ngü te ma ngbü emala fü yi dene, ah de zu ngü. Ah ele fü yi adi fi bü da emere wü ngü baka te Riri ka Me ngbü ele, zalü akoro di gbü *adu sikpi. Angü ngü ka Me ena angbü fi mere badi, gara ngü te ena afü te-ye gbüngbü na, nda ma. ¹⁹ Teka ngü la, te mü ce gara enga ngü cükü'daye gbü Riri ka Me eyi asidi, mü ga, ni le engu la de, fü mü angbü kpah erí wü bu mü de ngü la bala, Me tì ale ngü ka-mü agbü sü ka-ye agbü kpí de. Amba, te mü ngbü emere wü Riri ka Me 'buru ereke areke, da erí wü bu mü de wüh mere kpah bala la, ngü ka-mü ena areke kpah areke gbü jia Me, fü ah ao mü agbü sü ka-ye agbü kpí. ²⁰ Dene ngü te ma le amala fü yi, te yi le angbü kpara ka Me la, ah le de yi di emere wü ngü, te ena angbü ereke gbü jia Me, afa nda wü *Farusi de wü *mürü riri ka. Angü wü Farusi de wü mürü riri ngbü efi nda-wü, gü ba, ani de zūka wü kpara ka Me me-ani. Amba wüh ngbü emala ngü la bü de komö wü kükürü. Nda-yi, ah le de yi

di emere ngü ka Me de maguma yi 'buru, afa nda wü Farusi di ka."

Dene ngü te Yesu mala teka siti maguma

²¹ Fü Yesu adu kphah amala gara ngü fü ewü, gü ba, "Riri ka Me ta te *Müse mala nganga fü wü kundu nih ne, yi je nda-yi de? Engu gü ba, 'Mü mere e amörö kpara de, angü ngü la esiti gbü jia Me.*' Fü wü kundu nih adu amala, gü ba, 'Mene kpara te ena amörö kiri ye, wüh ena ato kuru tete.' ²² Nda-ra, ngü te ma le amala fü yi, ah bü duu ngü ka mamörö kpara de. Amba te mü ngbü ekpü enga ni mü la, ngü la kphah esiti gbü jia Me. Wüh ena ato kphah kuru te mü. Baka te mü ena asoko kiri mü, gü ba, 'Ye de töndö kpara,' la, wüh ena akolo ngü ka-mü. Anga te mü ena afala kiri mü, gü ba, 'Ye röfö aröfö,' la, wüh ena agü mü agbü du ka wa!

²³ Mü mere e ato takpa fü Me de siti fingängü emaguma mü de! Te mü ngbü enü kpa esambü ka Me teka ato takpa fü mere Me, fü mü adu afi nga gara ngü amaka, te di ezengba yi ake kiri mü la, ²⁴ te di bala, ah le fü mü ace takpa ka-mü la ciki ede *cangali kpala, de mü yia kere, mü nü kpaka kiri mü la, areke ngü la esüka yi feke, fü mü adu ato takpa ka-mü la fü Me.

²⁵⁻²⁶ Te ngü ladü esüka yi ake kiri mü füh kotö sene, ah le de yi reke ngü esüka yi kere, angü Me wu ngü la kpo! Angü te mü kpi eyi la, Me ena adu akolo ngü la tñe me-ye! Ma emala fü yi dene zu ngü! Me ena ato mü esaka wü *malayika ka-ye, fü ewü agü mü agbü du ka wa fi mere badi."

Dene ngü te Yesu mala teka ngü ka waza

²⁷ Fü Yesu adu kphah amala gara ngü fü ewü, gü ba, "Riri ka Me, ta te *Müse mala nganga fü wü kundu nih, gü ba, 'Mü mere e amere waza de, angü ngü la, ah esiti gbü jia Me ne,'† yi je ngü la nda-yi de? ²⁸ Amba nda-ra, ngü te ma le amala fü yi, baka to ngü füh ngü la, ah dene. Te mü ngbü efi nga würiuse, da ekpi gügümü emaguma mü la, ah kphah esiti gbü jia Me, angü ah ba e te mü mere waza eyi ake di emaguma mü.

²⁹ Yi di ekpe *siti ngü akpe! Te jia mü ngbü efiti mü me-ye, teka fü mü atí gbü siti ngü la, ah le fü mü agbi jia mü engu la, agü kötö. Angü ah ena areke pe, te gara e biringbö eküte mü kpi me-ye la, ka mene ngü de te wüh ena aza mü de küte mü 'buru, agü agbü mere du ka wa ne. ³⁰ Te kpa mü ngbü efiti mü me-ye, teka fü mü atí gbü siti ngü la, ah le de mü wa kpa

mü engu la awa, mü gü kötö. Angü ah ena areke pe, te gara e biringbö eküte mü kpi me-ye la, ka mene ngü te wüh ena aza mü de küte mü 'buru, agü agbü mere du ka wa ne."

Dene ngü te Yesu mala teka ngü ka mace würiuse

Matayo 19:7-9; Marako 10:11-12; Luka 16:18

³¹ Fü Yesu adu kphah amala gara ngü fü ewü, gü ba, "Riri ka wü kundu nih, gü ba, 'Te komoko le ace waza ye la, ah le de engu ba köcökpa, ato fü waza ye feke, fü waza ka na ayia ago ka-ye agba wü.'‡ ³² Nda-ra, ngü te ma le amala fü yi dene, ah de to ngü. Te kpara ce waza ye bü kükürü bala, ah teka ngü ka waza de la, ah mere *siti ngü eyi gbü jia Me. Angü te würiuse la ena anü aza gara komoko te gara la, ngü la ena adi gbü jia Me baka waza, angü mü to engu dela me-mü, de ah mere waza. Kpah bala, komoko te za würiuse, te watí ye na ce engu la, ah mere waza kphah eyi gbü jia Me."

Dene ngü te Yesu mala teka ngü ka kina

³³ Fü Yesu adu kphah amala gara ngü fü ewü, gü ba, "Riri ka wü kundu nih, gü ba, 'Te mü kina te-mü te iri Me la, mü mere e ace ngü la de. Mü mere ngü la amere, gegege baka kina te mü kina te-mü di la, angü mü mala ngü la eyi gbü jia Me.' Yi wu ngü la bala de? ³⁴⁻³⁷ Amba nda-ra, ngü te ma le amala fü yi dene, ah de to ngü, gü ba, yi mere e akina te-yi 'buru 'buru de. Mü mere e akina te-mü te iri kpi kphah de, angü kpi ka-ye de sü ka Me. Mü mere e akina te-mü te iri kotö ne kphah de, angü kotö ne ka-ye de e ka Me, te engu mere o me-ye. Mü mere e akina te-mü te iri Yerüsalema kphah de, angü Yerüsalema de mere koti ka Mere Miri Me. Mü mere e akina ngürü mü, anga lö mü kphah de, angü küte mü 'buru de e ka-mü nda de, ah de e ka Me, te engu mere me-ye. Ah le de mü mala ngü bü mbölö. Te mü le ngü la eyi, mü mala, gü ba, 'Wayi, ni ena amere bala.' Te mü le de, mü mala kphah mbölö, gü ba, 'Ni ti amere bala de.' Angü, te mü mala mere bi wü ngü ngili di angili, teka afiti kiri mü di la, dela ka-ye ngü te koro esaka *Satana. Ngü 'buru te mü mala, gü ba, ni ena amere, mü mere e ace ngü la de, angü Me wu ngü la eyi. Ah le de mü mere ngü la amere bala."

Dene ngü te Yesu mala teka maligü nangü fü kpara

Luka 6:29-30

* 5:21 5:21 Mü ena amaka ngü la gbü buku ka Gogo ka wü Yisaraye 20:13. † 5:27 5:27 Mü ena amaka ngü la gbü buku ka Gogo ka wü Yisaraye 20:14. ‡ 5:31 5:31 Mü ena amaka ngü la gbü buku ka Manda nga Riri 24:1.

³⁸ Fū Yesu adu kpah amala gara ngü fū ewü, gü ba, “Riri ka wü kundu nih, gü ba, ‘Te kpara sö jia mü mbürü la, ah le de mü za engu, nü di kpaka wü *kovo de wüh sö kpah jijia. Anga te kpara m̄ te mü, kürü la, wüh ena akürü kpah nda-ka.’ § Yi wu ngü la bala gügü de? ³⁹ Nda-ra, ngü te ma le amala fū yi dene, ah de to ngü, gü ba, yi mere e alügü siti ngü fū wü bu yi de. Yi mere e amere gü kpaka kpara, anga vügü te mere mü esiti ne, kpah de. Te kpara be gbüra mü la, mü mere e asü gü* fefe de. Mü ce gbüra mü fefe, de ah du, ah be kpah toto. ⁴⁰ Te kpara i mü engagira miri, gü ba, mü to bongo ka-mü biringbö, na jiase ka-ni esaka mü la, mü mere e asü gü fefe de. Mü za gara bongo ka-mü, be kpah te gara la, mü to fefe. ⁴¹ Te marajümiya za mü de wazi, teka anü abi e ka-ye baka kilometere biringbö la, mü mere e asü gü fefe de. De mü gi ngangga de e kaka la kilometere ‘basu. ⁴² Te kpara yo e eküte mü la, de mü to e la fefe. Te kpara le aza matiti esaka mü, mü mere e afi nga ngü de. Mü to matiti la eto fefe.”

Dene ngü te Yesu mala teka wü vügü ka-nih

Luka 6:27-28, 32-36

⁴³ Fū Yesu adu kpah amala gara ngü fū wü kpara ka-ye, gü ba, “Riri ka wü kundu nih, gü ba, ‘Ah le de mü le wü mürü mü, fū mü adu akpü wü vügü ka-mü.’ Yi wu ngü la bala gügü de? ⁴⁴ Nda-ra, ngü te ma le emala fū yi dene, ah de to ngü, gü ba, ah le de yi le kpah vügü ka-yi ale. Kpah bala, te gara kpara ngbü emere mü esiti la, de mü di kpah eyi-ta Me tekaka, de Me boro *siti ngü kaka. ⁴⁵ Kükürü de, angü te yi mere bala, wü kpara ena awu, gü ba, yi de wü di Me fanü fanü, angü mü ngbü emere züka ngü kpah baka nda Me. Angü Me ngbü eto agö, de ah di eli agbü yi ka züka wü kpara, be kpah te nda siti wü kpara. Me to kpah ra, de ah di esü fū züka wü kpara, kpah fū siti wü kpara ‘buru. ⁴⁶ Anga te yi ngbü ele bü nzö mene wü kpara te ewü ngbü ele ngü ka-yi ne, yi efi, gü ba, Me ena ato züka ngü fū ani teka ngü la? A’a, ah bala de. Angü wü siti kpara, te ewü le ngü ka Me de ne, wüh ngbü emere ngü de bala me-wü. ⁴⁷ Te yi ngbü emere züka ngü bü nzö fū wü di enga ni yi la, yi efi, gü ba, Me ena agbo nga iri ani teka ngü la? A’a, ah bala de. Angü siti wü kpara, te ewü le ngü ka Me de ne, wüh ngbü emere züka ngü bü nzö fū wü bu wü bala me-wü. ⁴⁸ Dela ngü te ma le amala fū yi, gü ba, ah le de yi di ele wü kpara ‘buru, da emere züka ngü fū

ewü de züka maguma yi, kpah baka te Wö yi, Me agbü kp̄i, ngbü emere fū yi ne.”

6

Dene ngü te Yesu mala teka mato e fū wü mürü cinga

¹ Fū Yesu adu amala gara ngü fū wü kpara ka-ye, gü ba dene, “Wü di enga wüna, yi ceka te-yi ‘be! Te yi le amere züka ngü te iri Me la, yi mere e adi emere ngü la gbü jia wü kpara de. Angü, te mü mere ngü la gbü jia wü kpara, teka fū ewü agbo nga iri ni di la, ngü ka-mü la ti areke gbü jia Me nda de. Te di bala, Me ti agbo nga mü, ato takpa fū mü gbü ngü la, nda de.

² Te di bala, te mü le ale ta-ngü te wü mürü cinga la, mü mere e amere ngü la gbü jia wü kpara de. Angü wü kpara ladü te ewü le, de wü bu ani di eceka ani ba züka wü kpara ka Me. Teka ngü la, te ewü le ato e fū wü mürü cinga la, wüh ngbü emere ngü la te wü kaje, anga kpa *esambü ka biti-te, fū ewü angbü eba wü rere de ngü ka-wü la, teka fū wü kpara ‘buru awu ani, adi egbo nga iri ani tete. Fanü fanü, ma emala fū yi dene zu ngü, gü ba, te wü kpara gbo nga iri ewü eyi teka ngü la, Me ti agbo nga ewü nda tine de, angü wüh maka takpa ka-wü eyi kpaka wü kpara. ³ Amba nda-yi, wü kpara ka-ra, te yi ele ato e ka-yi fū wü mürü cinga la, yi mere e amala nga ngü la fū gara kpara de, anga te ah zu de enga ni mü la, mü mala fefe kpah de. ⁴ Mü to e la esalakumu, angü Me wu wü ngü ‘buru. Te di bala, Me wu e te mü to fū wü mürü cinga la eyi. Engu ena adu ato züka ngü fū mü te gara me-ye.”

Dene ngü te Yesu mala teka maku gba fū Me

Luka 11:2-4

⁵ Fū Yesu adu kpah amala gara ngü fū ewü, gü ba, “Wü di enga wüna, ma emala fū yi, gü ba, te mü ele aku gba fū Me la, mü mere e amere ngü la gbü jia wü kpara de. Angü wü gara kpara ladü te ewü le, de wü bu ani ceka ani ba züka kpara ka Me. Te di bala, wüh ngbü nda-wü erü tikpi, adi eku gba fū Me gbü jia mere bi wü kpara kpa *esambü ka biti-te, anga te nga wü kaje, teka fū wü kpara angbü eceka ani. Ma ngbü emala fū yi dene zu ngü. Wü kpara ena agbo nga iri ewü teka ngü la, amba Me ti agbo nga ewü teka ngü la nda de. ⁶ Amba nda-mü, te mü ele ayi-ta Me la, ah le de mü ku gba fū Me esalakumu. De mü ri ka-mü kpa esambü kp̄iki mü, ni mö nga mü ani, anga de mü nü, mü gir̄i sü, te mü

§ 5:38 5:38 Mü ena amaka ngü la gbü buku ka Gogo ka wü Yisarayele 21:24, buku Riri ka Gele ka wü Levi 24:20, bete buku ka Manda nga Riri 19:21. * 5:39 5:39 Asü gü, ah de zizinga.

ena ayi-ta Me tete kpikpi mü, angü engu de Wö nih. Te mü ku gba fü Me esalakumu bala, Me ena agbo nga mü me-ye, angü engu wu ngü te di emaguma mü la kpo.

⁷ Kpah bala, te yi ngbü eku gba fü Me la, yi mere e adi emala bi wü ngü de. Wü kpara te ewü ngbü eku gba fü wü di enga me, wüh ngbü esama mere bi wü töndö ngü gömö wü de bala me-wü, angü wüh efi nda-wü, gü ba, 'Me ngbü eje gba ka-ani, teka mere bi wü ngü ka-ani la.' ⁸ Yi mere e adi emere ngü baka nda-ewü la de, angü Me de Wö yi. Engu wu wü ngü te yi ngbü ele kpakaka na ne eyi gügü, o yi mala nganga fefe la de. ⁹ Te di bala, dene kaje te yi ena aku gba fü Me tete na.

Wayi bala Wö a Me.

Mü de mere Me te mü di agbü kpî.

Ah le de wü kpara 'buru gbo nga iri mü, angü mü de Me biringbö.

¹⁰ Mü koro angbü gbü nzö wü kpara füh kotö ne 'buru.

De wü kpara 'buru di eje riri ka-mü.

De wüh di emere wü ngü te mü ele füh kotö ne 'buru,

kpah baka e te ewü emere agbü kpî.

¹¹ De mü to zü-e fü a enatikine de a zü.

¹² De mü boro *siti ngü ka-a emaguma mü asidi,

angü angbü kpah eboro siti ngü ka wü bu a fü ewü.

¹³ Mü to wazi fü a, fü a arü di kpekpeke gbü re-ngü ka *Satana, angü a ena adürü.

De mü küwa a aküwa esaka Satana.

A yi-ta mü de wü ngü la, teka ne de, angü mü de mere Miri ka-a.

Mü de mere wazi fa wü kpara 'buru.

Mü de mere kpara te ewü egbo nga iri mü fi mere badi.

Ah di bala.

¹⁴ Wü di enga wüna, ah le de yi di eboro siti ngü ka wü bu yi aboro, angü te yi boro siti ngü ka wü bu yi la, Wö yi, Me agbü kpî, ena aboro kpah siti ngü ka-yi. ¹⁵ Amba te yi boro siti ngü ka wü bu yi de, Wö yi, Me agbü kpî ne, ti aboro siti ngü ka-yi kpah de."

Dene ngü te Yesu mala teka ma'bi-te

¹⁶ Fü Yesu adu kpah amala gara ngü fü ewü, gü ba, "Wü di enga wüna, te yi le *a'bi te-yi, teka aku gba fü Me la, yi mere e asere te-yi gbü jia wü kpara, gü ba, ani ngbü e'bi te-ani ne de. Angü wü gara kpara ladü, te ewü le, de wü bu ani di eceka ani ba züka wü kpara ka Me. Te di bala, te ewü ngbü e'bi te-wü la, wüh ngbü engbü de mere cinga, teka fü wü kpara awu ngü la, fü ewü agbo nga iri ani tete.

Yi mere e amere ngü baka nda-ewü la de! Angü, te yi le de wü kpara di egbo nga iri ani la, ngü la gbü jia Me ka-ye esiti! Ma ngbü emala fü yi dene zü ngü. Te wü kpara gbo nga iri yi teka ngü la, Me ti agbo nga yi nda tîne de! ¹⁷ Amba nda-yi, te yi le a'bi te-yi, teka aku gba fü Me la, ah le de yi zürü gbüra yi azürü, de yi gü mü eküte yi. ¹⁸ Yi reke te-yi areke, ba kpara te ngbü de tadu, angü wü kpara ena awu, gü ba, yi ngbü e'bi te-yi. Te yi mere ngü la esalakumu bala la, Me ena awu ngü te di emaguma yi la me-ye, fü engu agbo nga yi."

Dene ngü te Yesu mala teka wü e füh kotö ne

Luka 12:33-34; 16:13

¹⁹ Fü Yesu adu kpah amala gara ngü fü ewü, gü ba, "Yi mere e ao maguma yi teka wü e füh kotö ne de, angü wü e füh kotö ne ena anza ka-wü anza. Wü gara ena agörö, wü ka ena alafa wü gara, wü gara ena akü, wü gara ena azi, wü mürü zi ena azi wü gara. ²⁰⁻²¹ Amba ah le fü yi ato maguma yi teka adi emere ngü ka Me, fü yi ao fingangü ka-yi 'buru teka züka ngü te yi ena amaka agbü kpî, angü ngü ka Me ti anza nda de.

²² Jia nih ka-ye baka ze-wa te ngbü elofö sü fü nih. Te mü o fingangü ka-mü 'buru teka ngü ka Me la, Me ena asere züka kaje fü mü, fü mü amaka züka ngü. Angü mü ena angbü baka kpara te ngbü endoro gbü ra-sü. ²³ Amba, te mü ngbü de siti fingangü emaguma mü, da edürü te kaje ka Me asidi, teka wü e de füh kotö ne la, mü baka kpara te jijia ni ani, te ngbü endoro gbü mbiri sü. Mü ceka te mü 'be, angü te mü le ngü ka Me de maguma mü 'basu 'basu la, ah ena adi gegege ba e te jia mü ni ani la. Mü ena adürü te kaje ka Me asidi, mü ti awu ngü ka Me 'buru 'buru de, angü mü ngbü endoro gbü ngbami!*

²⁴ Yi ce ngü ka maguma 'basu 'basu asidi, angü kpara biringbö ti ara fü wü miri 'basu nda kü de. Angü mü ena ale ngü ka gara, fü mü ace nda gara. Te mü ngbü eje riri ka gara ereke areke, mü ena angbü efala gara la afala. Te di bala, ah le de yi o maguma yi 'buru, teka adi emere ngü ka Me. Amba yi mere e ao maguma yi teka wü e füh kotö ne de."

Dene ngü te Yesu mala fü wü kpara ka-ye,

gü ba, wü mere e afi nga wü e de

Luka 12:22-31

²⁵ Fü Yesu adu kpah amala gara ngü fü wü kpara ka-ye, gü ba, "Dene ngü te ma le amala fü yi, wü di enga wüna. Yi mere e

* 6:23 6:23 Ngami de mbiri sü baka biti.

asiti fingangü ka-yi, teka ngü ka e-mazü, anga e-manzö nda-yi de. Angü Me le yi fa sü. Anga yi mere e angbü de mere fingangü teka bongo te yi ena amaka, adi eto eküte yi ne, kpah de. Ngü ka küte yi fa ngü ka bongo ka. Te di bala, Wö nih Me, te o nih ne, ah ti ato wü e la fü nih de? Ah ti eyi ato wü e la fü nih, angü engu le nih fa sü. Kpah bala, ngü ka *küküwa fa ngü ka zü-e ka. Me te ngbü eküwa nih ne, ah ena adi kpah eto zü-e fü nih me-ye.

²⁶ Yi ceka la bü wü lu, te wüh ru e kpah de, wüh biti wü e fü wü kpah de, kafa ka-ewü kpah ma. Amba Me ce ewü nda de! Ah ngbü fi bü eto zü-e fü ewü! Yi efi nda-yi, gü ba, ngü ka-ani fa ngü ka wü lu la de? Me ti ace yi, fü yi akpi ka tala de. ²⁷ Te sikipi ka kpi ka-mü koro eyi la, wazi mü ladü teka afa te-mü esaka kpi la, fü mü adu angbü aci nga gara sikipi? A'a, wazi mü nda ma! ²⁸ Fingangü ka-yi mere e asiti teka ngü ka bongo de. Yi ceka la wü yi-rü, wüh ngbü eko neh baye baye? Baka te wüh mere tima 'buru de, wüh reke bongo tungü wü kpah de ne. ²⁹ Ma emala fü yi dene zu ngü. Miri *Solomona, ta te di de mere bi wü e esaka ye ne, bongo kaka-na su baka yi-rü agbü gü ne, kpah de. ³⁰ Yi wu eyi, gü ba, Me ngbü ereke wü yi-rü eküte wü rü, baka züka bongo te su asu fa sü. Fingangü ka-yi gü ba, ngü ka-ani fa ngü ka wü yi-rü la de? Yi wu awu, gü ba, Me ti eyi ato züka bongo fü ani. Te di bala, ah le de yi to maguma yi 'buru fü Me.

³¹ Yi mere e angbü esiti fingangü ka-yi, teka wü e te yi ena azü, anga e te yi ena anzö, anga bongo te yi ena ato eküte yi ne, nda-yi de. Ah le de yi to maguma yi 'buru fü Me. Yi mere e angbü de maguma yi 'basu 'basu de. ³² Wü kpara te ewü wu ngü ka Me de ne, wüh ngbü eo to wü teka wü e füh kotö ne bala me-wü. Amba nda-yi, yi mere e adi emere ngü bala de, angü Wö yi, Me, ladü. Ah ena ato wü e la fü yi me-ye, angü ah wu kpo, gü ba, cinga wü e la ngbü emere yi. ³³ Te di bala, yi to maguma yi fü Me feke, da emere tima kaka, angü wü e de te yi ngbü efi nga ewü la, Me ena adu ato fü yi.

³⁴ Wü di engu wüna, te yi te engbü la, yi mere e asiti fingangü ka-yi, teka ngü te ena adi egambi ne de. Angü ngü te ena akoro de egambi la, ah ena amere te-ye ka-ye bü teka sikipi engu la. Yi ce ngü ka gambi la esaka Me, angü gbü wü sikipi 'buru cinga ka-ye fi bü ladü."

7

Dene ngü te Yesu mala teka makolo ngü

ka kpara

Luka 6:37-41

¹⁻² Fü Yesu adu kpah amala gara ngü fü wü kpara ka-ye, gü ba, "Wü di engu wüna, yi mere e adi esiti iri wü bu yi, da ekolo ngü ka-ewü, de. Angü Me ena akolo ngü ka-yi te gara, kpah ba e te yi ngbü emere fü wü bu yi la.

³⁻⁴ Wü di engu wüna, yi ngbü emala nga wü *siti ngü ka wü bu yi, da ekolo ngü ka-ewü neh teka ne? Ah le de yi fi nga siti ngü ka-yi te engu gina. Angü te mü le aza engu ca-gü gbü jia engu ni mü, o mere ndugu rü di ladü gbü jia mü la, ah de züka ngü? ⁵ Mü dela mürü mani! Angü te engu gina, ah le fü mü agbi la mere ndugu rü, te di gbü jia mü ne, feke, teka fü jia mü alofo raaa! Fü mü adu tina, aza engu ca-gü, te di gbü jia engu ni mü ne sidi.

Dene ngü te Yesu mala teka wü kpara,

te ewü ngbü efala ngü ka Me

⁶ Te yi to jiasa ka-yi fü wü bürü anga wü mba la, wüh ena ale? A'a, wüh ti ale nda-wü de. Wüh ena aceka jiasa la gbü jia wü baka töndö e, angü tima ka e la fü ewü nda ma. Wü bürü ena adu anyüma yi, fü wü mba adu adoto wü e la, asiti ka. Kpah bala, te yi ngbü erü wü bu yi de *Ngari Me, fü ewü angbü efala ngü la afala la, yi ce ewü ace. Yi mere e adi fi bü da emala Ngari Me fü ewü de. Angü wüh ka-wü baka wü bürü, de wü mba la."

Dene ngü te Yesu mala, gü ba, nih di fi bü eyo e kpaka Me

Luka 11:9-13

⁷ Fü Yesu adu kpah amala gara ngü fü wü kpara ka-ye, gü ba, "Yi efi nda-yi, gü ba, Me le ato züka ngü fü ani de? Ah bala de. Te cinga e ngbü emere mü la, mü ngbü fi bü da eyo eküte Me, Me ena ato e la ato fü mü. Mü ngbü fi bü da eyi-tata gbü wü sikipi 'buru. Mü mere e ace da ei engu de, ah ena amere ngü la fü mü. ⁸ Angü wü kpara 'buru, te ewü ngbü eyo e te Me ne, Me ngbü eto e la fü ewü ato. Wü kpara 'buru, te ewü ngbü egiri e kpaka Me, wüh ngbü emaka amaka. Me ngbü kpah eü möngiti fü mene wü kpara, de te wüh ngbü ei engu ne.

⁹ Gara süka yi ladü sene, te di de wö ye wü jaji, te yeye na yo kümü tete la, ah ena aza teme, ato fefe? ¹⁰ Anga te yeye na yo si tete la, ah ena aza kpürü, ato fefe? ¹¹ Anga de-yi, te yi di de siti wü kpara ne, yi wu da eto wü züka e fü wü jaji ka-yi ereke areke. Yi fi nda-yi, gü ba, Me, te di de Wö nih agbü kpi ne, ah ti ato züka wü e fü yi afa sü de?

¹² Te di bala, wü ngü 'buru te yi ngbü ele de wü kpara di emere fü ani, ah le de yi di kpah emere wü ngü engu la fü wü kpara

bala. Angü dela si-ngü gbü wü *Riri, te *Müse, de wü gara wü *mürü dofo, ba gbü *Ngari Me."

Dene ngü te Yesu mala teka wü kaje 'basu

¹³⁻¹⁴ Fü Yesu adu kpah amala gara ngü fü wü kpara ka-ye, gü ba, "Te yi ele aküwa la, ah le de yi le ngü ka Me de maguma yi ngbee biringbö, angü wü kaje ladü 'basu. Te di bala, ah le de yi fe kaje ngbee biringbö. Angü gara la, ah de mere kaje, te mere bi wü kpara ngbü enü 'buru tete na. Amba mere kaje la, ah de kaje ka *küküwa nda de. Ah ka-ye de kaje, te ena ato kpi fü kpara fi mere badi. Gara kaje engu ne, ah de suzu kaje, te mere bi wü kpara wu mbi mbi de. Ah le de yi o to yi teka amaka suzu kaje la, angü dela mene kaje, te yi ena amaka küküwa gbügbü, fi mere badi."

Dene ngü te Yesu mala teka riri ka wü mürü mani

¹⁵ Fü Yesu adu kpah amala gara ngü fü wü kpara ka-ye, gü ba, "Yi ceka te-yi mbi, angü wü mürü mani ladü, te ewü ena akoro, asiti fingangü ka-yi gbü ngü ka Me. Angü wüh ena angbü esu wu fü yi, gü ba, ani ngbü eri yi dela de ngari Me. Amba ngü ka-ewü la, ah de ngari Me nda de, angü maguma ewü ka-ye sisiti baka nda siya. ¹⁶ Yi ena angbü ewu ewü bü teka *siti ngü te ewü ngbü emere, kpah ba e te yi ngbü ewu wü rü 'buru teka ri ewü. Mü ti eyi amaka ri manga eküte patra? Anga mü ti eyi amaka ri güwawa eküte rü ngenee? ¹⁷ Ah bala de! Rü manga ena ari 'duwa ri manga. Rü ngenee ena ari 'duwa ri ngenee. Wü züka rü 'buru ngbü eri fi bü wü züka ri-rü, te ereke areke ba-neh-ene-la. Nda wü siti rü kpah bala, wüh ngbü eri fi bü siti ri wü eküte wü. ¹⁸ Züka rü ti ari siti ri-rü eküte ye de. Siti rü ti ari züka ri-rü te ye de. Kpah bala, wü züka kpara ngbü emere züka ngü me-wü. Wü siti kpara ngbü emere nda-wü fi bü siti ngü. ¹⁹⁻²⁰ Te di bala, yi ena awu wü siti mürü wu la teka wü siti ngü ka-ewü, te ewü ngbü emere. Wü rü 'buru te ewü ri züka ri wü de, wüh ena ade ewü ade, agü agbü wa. Ngü ka wü mürü wu la ena adi kpah bala."

Dene ngü te Yesu mala teka züka wü kpara ka-ye

Luka 6:46-49

²¹ Fü Yesu adu kpah amala gara ngü fü wü kpara ka-ye, gü ba, "E-ena aküwa agbü sü ka Me agbü kpi neh wü da? Angü mere bi wü kpara ladü te ewü ngbü ei ra, gü ba, 'Ma de Miri ka-ani,' bü kükürü bala. Wüh ti aküwa nda-wü de, angü maguma ewü ka-ye 'basu 'basu. 'Duwa wü mene

kpara te ewü ngbü emere züka ngü, te reke gbü jia Wüba Me, wüh ena aküwa me-wü. ²² Kpah bala, gbü *adu sikipi, te ma ena akolo ngü ka wü kpara tete, mere bi wü kpara ena anda ba te-wü fere, gü ba, 'Mere kpara, ani de wü kpara ka-ra, angü ani ngbü ta eto ngari ra fü wü kpara. Ani ngbü kpah eliki *siti wü di enga me guvu wü kpara te iri ra. Ani ngbü ta emere bi wü kpeke ngü te iri ra.' ²³ Amba, de-ra Yesu, ma ena adu amala fü ewü mbölö, gü ba, 'De-wü deyü, ma le ngü ka-wü de, angü wü le ngü ka-ra nda-wü de! Wü yia sela eyia de töndö ngü ka-wü la! Angü wü de siti wü kpara.'

²⁴ Mene kpara te ngbü eje ngü ka-ra, fü ah angbü kpah elala tete, engu ena adi baka kpeke kpara, te maka züka sü füh ndu-ta. Fü ah aji kambü ka-ye fefeh. ²⁵ Fütanga ngü la, fü mere agö ayia ali de mere wege, fü ngu ayia asi. Amba kambü la mürü nda de, angü wüh ji kambü la te züka sü. ²⁶ Amba te mü le aje ngü ka-ra, te ma ngbü eri mü di ne, de la, mü ena adi baka töndö kpara, te ji kambü ka-ye bü gbü sikki, riri na ri gbü tö nda de. ²⁷ Te di bala, te mere agö ena ali de mere wege, fü ngu ayia asi la, kambü ka-mü la ena amürü 'duwa amürü, 'büwaa! asidi."

²⁸ Dela ngü te Yesu mala fü mere bi wü kpara kpa füh rüvü. Fü ngü kaka la aga gbü jia wü kpara afa sü. Angü kpara te ena ari wü kpara baka nda Yesu la, ah nda ma. ²⁹ Yesu mala ngü la fü ewü de mere wazi ka Me. Ah mala baka nda wü *mürü riri, te ewü ngbü emala diri nga ngü ne, nda de.

8

Dene ngü te Yesu küwa gara mürü jia kö di

Marako 1:40-45; Luka 5:12-16

¹ Fütanga ngü la, fü wü Yesu ayia akö kpa füh rüvü la kötö, angbü enü. Fü mere bi wü kpara ayia afa nganga na. ² Te wü Yesu ngbü enü tete, fü gara komoko, de *jiakö eküte ye, ayia akoro kpaka Yesu. Fü engu ayia abu nzökuta ye kötö engagira Yesu, anda'ba te-ye, gü ba, "Akooro, mere kpara! Ye de mere mürü wazi! Ni ngbü eyi-ta ye, te ah gbü jia ye 'be la, de ye küwa ni gbü keke ne." ³ Fü Yesu ayia ao kpa ye eküte komoko la, gü ba, "Wayi, ma le eyi. Küte mü reke ereke!" Baka te Yesu mala ngü la tete, 'duwa fü küküte ayia areke, adu da ye.

⁴ Fü Yesu adu amala ngü fefe, gü ba, "Ye mere e amala nga ngü la fü wü gara kpara de, ye je ngü la eyi? Amba ah le de ye nü enü, ye mere ngü, ta te *Müse ba gbü *Riri ka Me ne. Ye za nü, ye nü di

kpaka *mürü gele ka Mere Me, de ah wa, ah to fü Me teka ngü la. Tekä fü wü kpara 'buru awu, gü ba, küte ye reke eyi fanü."*

Dene ngü ka mere kpara ka wü marajümiya ka wü Rüma,

*te to maguma ye fü Yesu
Luka 7:1-10*

⁵ Fütanga ngü la, fü wü Yesu ayia anü akoro agbü Kapananama. Fü gara mere kpara ka wü marajümiya ka wü *Rüma ayia akoro kpaka Yesu, anda'ba te-ye fefe, ⁶ agü ba, "Mere kpara, ni koro ayi-ta ye teka de ye küwa gara labi ka-ni, angü keke ngbü emere engu efa sü. Ah ladü kpala, era ara kpa esambü. Wawazi nza eyi 'buru." ⁷ Fü Yesu alügü ngü fefe, gü ba, "Ni ena anü kpala, aküwa engu." ⁸ Fü mere wü marajümiya la adu amala ngü fü Yesu, gü ba, "Akooo, mere kpara, ni ka-ni de *ganzi kpara. Ah ti fü ye ari kpa esambü ka-ni nda de, angü riri ka gele ka-wü, wü di engä *Yisaraye, le bala de. Ni wu eyi, gü ba, wazi ye ladü. Te ye mala bü ngü de komö ye la, labi ka-ni la ena aküwa aküwa. ⁹ Ni ti kpa eyi awu ngü la bala, angü ni ngbü kpa esa riri ka wü mere kpara ka-ni. Kpa bala, wü gara marajümiya ladü, te ewü di esa riri ka-ni. Te ni mala ngü fü gara, gü ba, ye nü enü la, ah ena anü kere, baka te ni mala fefe. Anga te ni mala fü gara, gü ba, ye koro ekoro akine la, ah ena akoro kpa kere. Anga te ni mala ngü fü labi ka-ni, gü ba, ye mere ngü ne bane, ah ngbü kpa emere ngü la kere bala, baka te ni mala fefe."

¹⁰ Te Yesu je ngü gömö komoko la bala, fü ngü la ayia areke tete afa sü. Fü engu ayia afü te-ye, amala ngü fü mere bi wü kpara, te ewü ngbü efa nga ye ne, agü ba, "Ceka la! Kpara te to maguma ye fere baka komoko la, ma maka füh kotö ne nda-ra la kü de! Ngü te ma ngbü emala fü yi ne, ah de zu ngü. Gbü nguwa nih, wü Yisaraye, kpara te to maguma ye bala, ah nda ma. Amba ah ka-ye 'duwa de komoko la, te di de ganzi kpara ne! ¹¹ Te di bala, ma emala fü yi dene zu ngü. Mere bi wü ganzi kpara ena ayia agbü gara wü sü nengete nengete füh kotö ne, akoro angbü tundu agbü sü ka Me, de wü *Abarayama, *Yisaka bete *Yakobo, wü kundu nih ta gügü ne, me-wü, angü wü ganzi kpara la to maguma wü eyi fere. ¹² Amba mere bi wü di engä Yisaraye, te ewü ngbü efi, ga, ani de wü kpara ka Me me-ani ne, wüh ena aliki ewü, ato agbü mbiri sü kpa etanü kpala, fü ewü angbü

eku gba, da enyüma gbü te wü de mere cinga, angü wüh le ngü ka-ra de."

¹³ Fü Yesu adu amala ngü fü mere kpara ka wü marajümiya la, gü ba, "Ah mbi. Mü go ka-mü ego. Labi ka-mü küwa eyi, angü mü to maguma mü eyi fere." Bü ciki gbü lö-ra engu la, fü labi ka mere marajümiya la ayia aküwa gbü keke la.

Dene ngü te Yesu küwa mere bi wü mürü keke di

Marako 1:29-34; Luka 4:38-41

¹⁴ Gbü gara ra, fü wü Yesu anü akoro kpa gba Simüna Petero, fü ewü amaka ni ye wara Petero, te ra kötö ka keke, angü küküte na ri ngbü wüwütü bala. ¹⁵ Fü Yesu ayia azoro kpa würüse la, fü keke la ayia anza. Fü würüse la ayia anü amere kümü, ato fü ewü.

¹⁶ Ah te ekoro etamura go la, fü mere bi wü kpara ayia aza wü mürü keke, bete mene ewü te *siti wü di engä me ngbü emere ewü, akoro de ewü kpaka Yesu. Fü Yesu aliki wü siti wü di engä me la guwu wü kpara la 'buru asidi. Fü ah aküwa kpa mere bi wü gara mürü keke la 'buru.

¹⁷ Ngü te Yesu küwa mere bi wü mürü keke la, ti kpini de ngü ta te *mürü dofo Yisaya ba gbü *Ngari Me ta gügü, gü ba, "Miri te Me ena atima ne, ah ena aküwa nih gbü wü keke ka-nih 'buru."†

Dene ngü te Yesu mala, gü ba, te kpara le afa nga ni la,

ah tüka te-ye atüka

Luka 9:57-60

¹⁸ Fütanga ngü la, fü mere bi wü kpara aci akoro, abiti te-wü, angbü ede Yesu. Te Yesu wu bala, fü ah ayia amala ngü fü wü kpara ka-ye, gü ba, "Ani li eli gbü *zabu, anü kpa etangu." Ah mala bala, angü ah le anü ari ewü kpala. ¹⁹ Wüh la bü ereke te-wü, fü gara *mürü riri biri ayia akoro kpaka Yesu, amala ngü fefe, gü ba, "Mere kpara, ni ele afa nga ye, gbü wü sü 'buru, te ye ena angbü enü tete. Ni ena alala fi gbü nga ye, ni ti ace nga ye de." ²⁰ Fü Yesu alügü ngü fü komoko la, gü ba, "Ah le de mü wu awu, gü ba, te mü le afa nga ra la, züka ngü te mü ena amaka füh kotö ne nda ma. Angü de-ra, *Ye Kpara ka Kpi, sü fere füh kotö sene, teka ara, afe tera tete, nda ma. Angü wü zaza ngbü era nda-wü gbü wü gö ka-wü. Wü lu ngbü era nda-wü kpa gbü wü suta ka-wü. Amba nda-ra sü fere bala nda ma." Te komoko la je ngü la bala, fü ah adu ace da efa nga Yesu.

²¹ Fütanga ngü la, fü gara *kpara ka Yesu biringbö, ayia amala ngü fefe, gü ba,

* 8:4 8:4 Mü ena amaka ngü la gbü buku ka Riri ka Gele ka wü Levi 14:1-32. † 8:17 8:17 Mü ena amaka ngü la gbü buku ka Yisaya 53:4.

“Mere kpara, wö ni gbe eyi. Ni le adu aci nganga. Te ah kpi eyi la, fü ni ati engu feke, fü ni adu akoro afa nga ye sidi.” ²² Fü Yesu amala ngü fefe, gü ba, “Mü ce wü di enga ni mü, te ewü le ngü ka-ra de ne, de wüh ti wö mü me-wü, angü wüh ka-wü eyi baka wü kövö. Amba nda-mü, mü koro, mü lala gbü nga ra.”

*Dene ngü te Yesu tata mere wege di
Marako 4:35-41; Luka 8:22-25*

²³ Fütanga ngü la, fü Yesu ayia de wü kpara ka-ye, ali gbü *zabu, teka anü kpa etangu mere ngu *Galilaya. ²⁴ Baka te ewü yia, nü la mba ce bane, wüh te eje kpala de, gbu gbu gbu! mere wege te ekoro, da efe jia ngu la de wazi. Fü zabu akpo da eyiki, efüfü te-ye, da ekolo ngu gbü ye efa sü. Zabu la yia ta ebu ewü abu agbü ngu. Amba Yesu, mü ngbü ka-mü era ara.

²⁵ Fü wü kpara ka Yesu ayia akoro azükü engu, amala ngü fefe, gü ba, “Mere kpara, mere kpara! Ani te ekpi! Ani te ekpi! Ye zükü la ezükü, de ye küwa ani!” ²⁶ Fü Yesu ayia azükü, amala ngü fü ewü, gü ba, “Yi ekpe neh cürü ne? Yi to maguma yi fere mbi mbi la fi de?” Fü engu ayia arü, atata wege ake mere ngu la, gü ba, “Wüh nga anga.” Fü sü ayia anga 'duwa, ngbüü!

²⁷ Fü ngü la aga gbü jia wü kpara ka Yesu la afa sü, fü ewü angbü emala ngü esüka wü, gü ba, “Apa! De bane neh ene ngü ne? Mene komoko ne, neh baye baye, te engu ngbü emala ngü bü de komö ye, fü wege ake ngu angbü eje riri na ne?”

Dela ngü ta te Yesu mere, te engu to riri fü mere wege tete.

*Dene ngü te Yesu küwa wü komoko
'basu,*

*de wü siti wü di enga me guvu wü
Marako 5:1-20; Luka 8:26-39*

²⁸ Te wü Yesu kö mere ngu la tete de wü kpara ka-ye, fü ewü anü akoro agbü gara sü de iri ye Gadara. Baka te ewü ngbü la enü tete, fü ewü amaka te-wü de wü mürü maröfö 'basu, te *siti wü di enga me ngbü emere ewü kpekpeke efa sü, eküte ewü dela gü tine de! Wüh ngbü ta engbü ka-wü etü wü mbükü. Te di bala, wü kpara ti aguru sü te kaje engu la tine de, teka ngü ka-ewü. ²⁹ Te wü mürü maröfö la wu Yesu te ngbü ekoro, fü ewü ayia akpo eba rere, da emala ngü fü Yesu, de mere ri wü kpa tikpi, gü ba, “De-ye, Ye Mere Me, ye ele amere de ani ne ngü ne? Ye le ato kuru te ani bü gügü, o *adu sikipi koro la de, neh teka ne?”

³⁰ Amba mere bi wü mba ka köti ta ladü gbamari gbü sü la, da ezü e ka-wü. ³¹ Fü wü di enga me la afüwa te-wü fü Yesu, gü ba, “Te ye le aliki ani guvu wü kpara ne

asidi la, de ye tima ani, fü ani anü ari guvu wü mba la.” ³² Fü Yesu ayia ale ngü ka-ewü la, amala ngü fü ewü, gü ba, “Wayi, wü nü enü, wü rü aguvu wü mba la.” Fü wü di enga me la akoro guvu wü kpara 'basu ne, anü ari aguvu wü mba la. Te di bala, fü wü mba la aci 'buru de mere woro, yurrrru! ago kpa esa gö, agürü agbü mere ngu. Fü ewü anzö ngu, akpi 'buru kpala.

³³ Te wü kpara, de te ewü ngbü eceka kpi fütanga wü mba la, wu ngü la bala, fü ewü ayia ale woro, anü agbü mere köti, amala nga ngü, te Yesu mere la, fü wü kpara kpala, gü ba, “Yesu liki wü di enga me guvu wü mürü maröfö de 'basu ne eyi asidi.”

³⁴ Te wü kpara agbü mere köti je nga ngü la bala, fü ewü amala, gü ba, “Dela sirimbi!” Fü ewü ayia akö te-wü 'buru, anü kpaka Yesu, anda'ba te-wü fefe, de ah ce sü ka-ani la ace. Fü wü Yesu ayia ali gbü *zabu, anü sü ka-wü.

9

*Dene ngü te Yesu küwa gara kpara te
küküte kpi akpi 'buru*

Marako 2:1-12; Luka 5:17-26

¹ Te wü Yesu kö mere ngu de wü kpara ka-ye la tete, fü ewü anü akoro agbü Kaparanama, gbü sü te engu ngbü engbü gbügbü.

² Fütanga ngü la, fü wü gara kpara abi gara komoko füh ka'da, te küküte kpi akpi 'buru, akoro di kpaka Yesu. Fü Yesu awu, gü ba, “Wü kpara la to maguma wü eyi fü ni fanü fanü.” Fü Yesu ayia amala ngü fü mürü keke la, gü ba, “Enga ra, mü gu maguma mü, angü wü *siti ngü ka-mü, ta te mü mere gbü jia Me ne, ma boro eyi 'buru asidi.”

³ Te wü gara *mürü riri je ngü te Yesu mala fü komoko la de bala ne, fü ngü la ayia ake te ewü. Fü ewü angbü efi ngü emagama wü, gü ba, “Apa! Dene ne töndö ngü ne? Komoko la le ao te-ye da Me? Ah ngbü ka-ye dela efala Me!”

⁴ Amba Yesu wu fingangü ka-ewü la kpo. Fü ah adu afü te-ye, amala ngü fü ewü, gü ba, “Yi ngbü de siti fingangü emagama yi, neh teka ne?” ⁵⁻⁶ Yi wu de, gü ba, ma de *Ye Kpara ka Kpi? Te di bala, wazi ra ladü, teka adi eza siti ngü ka wü kpara füh kotö ne, gbü nzö ewü di asidi. Yi fi nda-yi, gü ba, ngü te ma mala fü mürü keke, gü ba, ma boro siti ngü ka-ye eyi ne, ah de töndö ngü kükürü? Yi ena awu ngü la enatikine!”

Fü Yesu adu afü te-ye, amala ngü fü mürü keke la, gü ba dene, “De-ye deyü, ye yia eyia tikpi, de ye za darara ka-ye, ye go kpa eköti.” ⁷ Te di bala, fü komoko la ayia

arü tikpi, aza darara ka-ye, ale kaje, ago agba ye.

⁸ Fū ngü la aga gbü jia wü kpara la afa sü. Fū ewü akpo da egbo nga iri Me, teka wazi de te Me to fū Yesu ne.

Dela ngü te Yesu gü tamu wazi, de te Me to fū ye ne tete, fū wü mürü riri.

*Dene ngü ka Matayo te Yesu i engu
Marako 2:13-17; Luka 5:27-32*

⁹ Fütanga ngü la, fū wü Yesu ayia gbü sü la, anü sü ka-wü. Te wü Yesu ngbü eguru sü tete, fū ah awu gara komoko de iri ye Matayo *Levi,* te ngbü gbü sü ka tima kaye, da ero *jiase ka wü e, eto fū miri ka wü Rūma. Fū Yesu arü amala ngü fefe, gü ba, "Matayo, ma ele de mü fa nga ra, baka *mürü tima ka-ra." Fū Matayo ayia 'duwa, alala gbü nga Yesu.

¹⁰ Fütanga ngü la, fū Matayo ayia areke zü-e agba ye. Fū ah ayia ai wü Yesu, de mere bi wü bu ye, ta te ewü ngbü ero jiase de ewü ne, kpah de mere bi wü kpara, te wü *Farusi le ewü kpah de. Angü wü Farusi la ngbü efi, gü ba, wüh de siti wü kpara. Fū wü kpara la angbü ezü e de wü Yesu kpala. ¹¹ Fū gara wü Farusi ayia aje ngü la. Fū ewü ayia akoro kpaka wü *kpara ka Yesu, ayi-ta ewü, gü ba, "Ah mere baye, te mere kpara ka-wü ngbü ezü e, de wü siti kpara de bala ne?"

¹² Te Yesu je ngü la bala, fū ah ayia amala ngü fū wü Farusi la, gü ba, "Te keke te mü ma la, mü ena anü anü kpaka mürü kuwa? Mü ti anü de. 'Duwa te keke ladü te mü, fū mü anü kpaka mürü kuwa, de ah küwa ni. ¹³ Ngü ka-ra kpah bala. Ma koro füh kotö ne teka züka wü kpara de. Ma koro ka-ra teka ai siti wü kpara, de wüh fū maguma wü, fū ewü aküwa. Amba nda-yi, wü Farusi, te yi gü ba, ani de züka kpara me-ani ne, ah le de yi je la si-ngü gbü ngü te Me mala gbü *Ngari ye, gü ba, 'De-ni, Me, dene ngü te ni le, de wü mere. Ni le de wü ceka cinga wü bu wü, ale ewü de züka maguma wü. Angü te wü mere bala de la, mere bi wü nü, de te wü ngbü ewa, eto fū ni baka la'bi ne, ni Me, ni ti ale nda-ni de!'"† Dela ngü ta te *mürü dofo Oseyä ba gbü Ngari Me, teka yi."

Dene ngü ta te wüh yi-ta Yesu di, teka to riri kaka

Marako 2:18-22; Luka 5:33-38

¹⁴ Fütanga ngü la, fū wü gara kpara ka *Yüwane Mürü Babatiza akoro kpaka Yesu, ayi-tata, agü ba, "Nda-ani, wü kpara ka Yüwane, gara wü sikipi ladü te ani zü e de, da *e'bi te-ani, teka adi eku gba fū Me. Nda wü Farusi kpah bala. Anga

ah mere neh baye, te nda-ye wü kpara ne, le ngü ka gele ka-ani mbi mbi de, fū ewü angbü ezü e gbü wü sikipi 'buru ne?"

¹⁵ Fū Yesu alügü ngü fū ewü gbü mani, gü ba, "Yi ngbü efi nda-yi, gü ba, te wüh i wü kpara gbü karama la,‡ wüh ti azü e te ewü i ewü tungüngü gbü karama la de? Wüh ena azü e azü, angü mürü karama la ladü tundu de ewü. Amba te gara, te wü wügü ena aza mürü karama la, esüka wü awuba ye asidi la, wüh ti azü e de, ka cinga emaguma wü."

¹⁶ Fū Yesu adu kpah amala gara ngü mani fū ewü, teka to riri ka Me te engu ngbü eri wü kpara di ne, gü ba, "Te diri bongo ka-mü sörö asörö la, mü ti eyi aza to bongo teka atükü te didiri na la? Mü ti amere bala de, angü didiri na la ena adu kpah asörö ka-ye asörö. ¹⁷ Kpah bala, te mü le akü'da fi ka-mü la, de mü mere e akü'da gbü diri bütü körö körö ne de. Angü diri bütü la ena adü, aöfö ka-ye, fū fi ka-mü la atökö ka-ye 'buru akötö. Ah le fū mü akü'da fi ka-mü gbü to bütü, teka fū fi ka-mü angbü 'be. Kpah bala, te mü le to riri ka-ra la, mü ti alala fi bü eküte diri gele ka wü kundu mü nda-mü de."

Dene ngü te Yesu küwa ye Yayiri,

bete gara würüse

Marako 5:21-43; Luka 8:40-56

¹⁸ Baka te Yesu ngbü la emala ngü la tete fū wü kpara sela, fū gara mere kpara ayia akoro, ati eri lö Yesu, anda'ba te-ye fefe, gü ba, "Mere kpara, ye ra jaji würüse, kpi eyi titine. Ma enda'ba te-ra fū mü, de mü koro, mü zükü engu." ¹⁹ Fū Yesu ayia de wü kpara ka-ye, afa ngangana.

²⁰ Te wüh ngbü enü tete, fū gara würüse ayia azi te-ye 'bili! amofö mö bongo ka Yesu, to kpa ekükürüfe. Angü ngüte ngbü ta ego eküküte teka wü re nzüka de füh ye 'basu. ²¹ Würüse la fi ta emaguma ye, gü ba, "Te ni mofö bü nzö mö bongo kaka-na la, ni ena aküwa gbü keke ka-ni la aküwa."

²² Fū Yesu afü te-ye, awu würüse la, amala ngü fefe, gü ba, "Enga ra, mü gu maguma mü. Mü küwa eyi, angü mü to maguma mö eyi 'buru fere." Yesu bü te emala ngü la bala, 'duwa fū keke ka würüse la ayia anza.

²³ Fū wü Yesu anü akoro agba mere kpara la. Te wüh koro tete kpala, fū ewü amaka mere bi wü kpara, te ewü ngbü eku gba de yiyi, da ebi ci gba, füh kö mbarase la. ²⁴ Fū Yesu amala ngü fū ewü, gü ba, "Wü yia eyia, wü koro ekoro kpa etanü, angü jaji würüse ne kpi nda de, ah ngbü

* 9:9 9:9 Matayo Levi de kpara te ba buku ne me-ye.

‡ 9:15 9:15 Karama la, ah de karama ka za würüse.

† 9:13 9:13 Mü ena amaka ngü la gbü buku ka Oseyä 6:6.

ka-ye era ara." Fū wū kpara la akpo da emū Yesu, da efala ngū kaka la, angū wūh wu eyi fanū, gū ba, mbarase la kpi ka-ye eyi. ²⁵ Te wū kpara la koro tete 'buru kpa etanū, fū Yesu ari kpa esambū, azoro kpa jaji wūrūse la. Fū jaji wūrūse la azūkū gbū kpi cukuru! ayia arū tikpi.

²⁶ Dela ngū ta te Yesu zūkū jaji wūrūse la tete gbū kpi. Fū nga-ngū la ayia awū, abaya esūka wū kpara gbū nga nzō sū la 'buru.

Dene ngū te Yesu kūwa wū kpara 'basu te jia ewū ni ani

²⁷ Gbū gara ra, o wū Yesu ngbū enū andoro, fū wū gara kpara 'basu, te jia ewū ni ani, ayia akpo da efa nga Yesu, da eku gba, enda'ba te-wū fū Yesu, gū ba, "Ako Yesu, Mere Miri te Me tima ye teka akūwa ani ne, ye ceka la cinga te ani ne, baaa!" ²⁸ Fū Yesu ayia ari kpa esambū, gbū sū te ewū ngbū engbū tete. Fū wū kpara 'basu la ayia akoro kpakaka na, angū wūh le ace nganga de. Fū Yesu ayi-ta ewū, gū ba, "Wū wu eyi, gū ba, ni tī eyi aū jia wū fanū?" Wū kpara la gū ba, "Wayi, mere kpara, ani wu eyi bala!" ²⁹ Fū Yesu amofu jia ewū, agū ba, "Ah mbi. Baka te yi to maguma yi eyi fere fanū ne, ah le de jia yi ū eū." ³⁰ Fū jia wū kpara la ayia aū te-ye. Fū Yesu adu amala ngū fū ewū kpekpeke, gū ba, "Wū mere e amala nga ngū la fū kpara biringbō kpo de." ³¹ Amba wū kpara la le amere ngū, te Yesu mala fū ewū ne, nda-wū de. Fū ewū akpo da emala nga Yesu fū wū kpara, gbū nga nzō wū sū la 'buru.

Dene ngū te Yesu kūwa kpara te ro mō de

³² Baka te wū Yesu yia enū tete, fū ewū akoro kpah de gara kpara te ro mō de, angū *siti wū di engā me ngbū emere engu me-wū bala. ³³ Te Yesu liki siti wū di engā me guvu komoko la tete, 'duwa fū engu akpo da ero mō. Fū ngū la aga gbū jia mere bi wū kpara la afa sū. Fū ewū angbū da emala ngū esūka ewū, gū ba, "Ani wu mene ngū de bane gūgū gbū tō ka *Yisaraye le sene la de."

³⁴ Amba wū *Farusi kpo da emala nda-wū, gū ba, "Yesu maka wazi, teka aliki *siti wū di engā me la di, esaka *Satana, te di de miri ka wū di engā me ne!"

Dene ngū te cinga mere bi wū kpara ri di te Yesu

³⁵ Fūtanga ngū la, fū Yesu angbū endoro gbū wū kōtī ka sū la 'buru, da eri wū kpara de to ngū ka Me, kpa *esambū ka biti-te ka-ewū. Fū ah angbū kpah da

emala fū ewū, gū ba, "Me ngbū eī wū, de wū koro kpaka ni, fū ni afū wū, akoro di zūka wū kpara ka-ni." Kpah bala, engu ngbū da ekūwa wū kpara gbū wū keke ka-ewū 'buru. Fū mere bi wū kpara angbū efa nganga na.

³⁶ Gbū gara sīkpī, fū Yesu ae jia ye, aceka mere bi wū kpara te ewū ngbū efa nga ye ne. Fū ngū ka wū kpara la ato mere cinga emamagama, angū wū kpara la ngbū de mere fingangū, angū maguma ewū 'basu 'basu. Wūh ngbū ka-wū baka wū kambiliki, te kpara di fūtanga ewū ma. ³⁷ Tekā ngū la, fū Yesu ayia amala gara mani fū wū kpara ka-ye, gū ba, "Ah le de yi le ta-ngū te wū kpara la, angū wūh le ta eyi ato maguma wū fū Me ne, amba kpara te ena ari ewū de to *ngari Me nda ma. Wūh baka ndo te ndri eyi agbū yī, amba kpara teka awa ndo la, ao gbū kafa nda ma. ³⁸ Yi ena amere de ngū la neh baye? Ah le de yi ku gba fū Me kpekpeke, teka de engu tima wū gara kpara, ale ta-ngū te yi, amala ngari Me fū ewū, angū engu me-ye de mūrū yī la."

10

Dene ngū te Yesu tima wū kpara ka-ye, nzūkpa de fūh ye 'basu, teka amala ngari ye

Marako 3:13-19; 6:7-11; Luka 6:12-16; 9:1-5

¹ Fūtanga ngū la, fū Yesu ayia afe wū *mūrū tima ka-ye nzūkpa de fūh ye 'basu ne, ato wazi fū ewū, teka de wūh nū, wūh di eliki *siti wū di engā me, da ekūwa wū kpara gbū keke ka-wū. ² Dene iri wū kpara nzūkpa de fūh ye 'basu ne. Ah de Simūna, te Yesu gū gara iri tete, gū ba, Petero,* ake engā ni ye, de iri ye Anderiya. *Yakobo, ake engā ni ye, de iri ye *Yūwane, wū di Zebedayo. ³ Filipo ake Batūlūmayo.† Toma ake Matayo,‡ kpara ta te ngbū ero *jiase fū miri ka Rūma ne, bete *Yakobo ye Alofaya, ake Tadayo,§ ⁴ bete gara Simūna, ta te ngbū emere gū teka tō ka-a, ake *Yuda Keriyota ta te to Yesu fū wū vūgū ne.

⁵⁻⁶ Fū Yesu ayia amala ngū fū wū kpara ka-ye nzūkpa de fūh ye 'basu ne, gū ba, "Ma ngbū etima yi dene, teka anū amala ngari ra fū wū kpara. Yi nū la bū nzō kpaka wū di engā *Yisaraye feke, angū wūh dūrū te kaje ka Me eyi asidi, baka wū kambiliki, te ewū dūrū adūrū agbū gū. Amba yi mere e anū kpaka wū *ganzi kpara, de wū kpara ka *Samariya, la de. ⁷ Te yi te endoro gbū wū kōtī ka-nih,

* 10:2 10:2 Si-ngū gbū iri Petero gū ba, baka da. † 10:3 10:3 Gara iri Batūlūmayo de Nataniyele. ‡ 10:3 10:3 Gara iri Matayo de Levi. § 10:3 10:3 Gara iri Tadayo de Yuda, ye Yakobo.

wü Yisaraye le la, yi di emala ngari ra fü ewü, gü ba, 'Miri, te Me tima teka aküwa ani ne, koro eyi. Ah le de wü fü maguma wü afü.' ⁸ Ah le de yi ngbü kphah da eküwa wü mürü keke, da ezükü wü kpara gbü kpi, kphah da eküwa wü mürü *jiakö. De yi di kphah eliki *siti wü di enga me guvu wü kpara asidi. Ma to wazi ne fü yi, teka amere ngü la di kükürü. Ah le de yi mere wü ngü la fü wü kpara, kphah kükürü. Yi mere e ayo jiase te wü kpara de!

⁹ Te yi te enü la, yi mere e aza wü e esaka yi de. Yi mere e aza jiase esaka yi 'buru' buru de. ¹⁰ Yi za kombo kphah de, yi za bongo 'basu' basu de, yi za gara kamaka kphah de, yi za ngbangba esaka yi kphah de. Wü kpara te yi ena amala ngari ra fü ewü la, wüh ena ale ta-ngü te yi de wü e la 'buru me-wü, angü ah le de kpara te ngbü emere tima ne, maka na tima ka-ye.

¹¹ Gbü wü sü te yi ena anü akoro gbügbü na, ah le de yi gürü mene kpara te di de züka maguma ye, fü yi angbü kpa gba ka, zalü gbü sikpi te yi ena ayia tete gbü sü engu la. ¹² Gbü köti te yi ena akoro gbügbü na la, gina ngü te yi ena amala fü ewü, ah dene. Yi to mandí fü ewü, gü ba, 'Me di de yi, gbü köti ne.' ¹³ Te wü kpara ka köti la de züka wü kpara, de lele ka Me emagama wü la, mandí ka-yi, de te yi to de gu ngü ka Me gbü ye ne, ah ena angbü fü ewü. Amba te ewü le ngü ka-ra gömö yi de, züka gu ngü ka Me, te yi to fü ewü ne, tí angbü gbü köti la nda de.

¹⁴ Te wü kpara gbü wü sü engu la le ngü ka-yi nda-wü de la, yi yia sela asidi, de yi bunda zu-tö ka gba ewü la esatilo yi asidi, ciki sela, teka agü tamu ngü la fü ewü, gü ba, 'Me le ngü ka-wü de, angü wü le ngü ka wü kpara ka Me, kphah de.' ¹⁵ Ma ngbü emala fü yi dene zu ngü. Gbü sikpi te Me ena akolo liya ka wü kpara tete, ah ena ato siti kuru gbü nzö wü kpara la, afa nda siti wü kpara ka *Sodomo bete Gomora* ta gügü ne ka.

¹⁶ Yi ceka 'be, angü ma tima yi dene baka wü kambiliki esüka wü siti kpara, te ewü di baka siti wü nü. Te di bala, ah le fü yi amba jia yi amba baka kpürü, amba yi mere siti ngü fü wü kpara de. Yi di kphah emere wü ngü 'buru ferre baka wü mö.' Dela ngü te Yesu mala fü wü kpara ka-ye, te engu tima ewü ne.

Dene ngü te Yesu mala fü wü kpara ka-ye,

teka cinga te ena amere ewü te gara

¹⁷⁻¹⁸ Fü Yesu adu amala gara ngü fü wü kpara ka-ye, gü ba, "Yi ceka te-yi 'be, angü te gara wü vügü ka-ra ena akoro

azoro yi, anü di engagira wü miri, fü ewü asüma yi de juru gbü jia wü kpara 'buru. Te di bala, yi ena amala ngari ra fü ewü. Kphah bala, wüh ena azoro yi, akoro di engagira wü mere miri ka wü *ganzi kpara, fü yi amala ngari ra kphah fü wü ganzi kpara la. ¹⁹ Gbü ra te wüh ena azoro yi, akoro di tete engagira wü miri la, fingangü ka-yi mere e asiti, teka ngü de te yi ena amala fü ewü, ne de. Angü *Nzila Wazi Me ena ato züka fingangü fü yi me-ye, teka amala mere kpeke ngü di fü ewü. ²⁰ Angü, wü ngü de te yi ena adi emala ne, ah ena adi de ngü ka-yi nda de, ah ena adi de ngü te Nzila Wazi Me ena adi eto fü yi me-ye.

²¹ Yi ceka te-yi 'be, angü wü di enga ni yi, de wü wö yi, ena ato yi cu me-wü fü wü vügü, fü ewü amörö wü gara yi, teka te yi le ngü ka-ra. Wü jaji ena afü te-wü, agü gü kpara wü wü wü, ato ewü fü kpi teka ngü ka-ra. ²² Wü kpara 'buru ena angbü ekpü yi akpü, teka te yi le ngü ka-ra. Ngü ma, yi rü kpekpeke gbü wü cinga la 'buru, angü Me ena aküwa yi te gara angbü sü ka-ye angbü kpi. ²³ Te wüh ngbü emere yi esiti gbü gara köti, teka te yi le ngü ka-ra la, de yi kpe, yi nü, yi ngbü kpa gbü gara köti, amala ngari ra fü wü kpara kpala. Ma ngbü emala fü yi dene zu ngü. De-ra, *Ye Kpara ka Kpi, ma ena adu akoro de wazi ka Wüba, o yi nza tima ka-yi gbü wü sü 'buru te di gbü tö ka-nih, wü *Yisaraye ne, la de.

²⁴ Ngü ka mbarase tí afa ngü ka mere kpara ka-ye de. ²⁵ Te di bala, ngü ka-yi ena adi gbü jia wü kpara kphah baka nda-ra, angü yi de wü kpara ka-ra. Ma mala ngü la kükürü de, angü te wüh ngbü egü siti iri eküte ra, gü ba, ma de miri ka wü muruyi la, wüh tí afala yi bala de? Wüh ena adu asoko yi, wü kpara ka-ra, kphah bala. Tekan ngü la, ah le di yi rü kpekpeke, kphah baka ra.

²⁶ Te di bala, yi mere e akpe cürü wü vügü ka-yi de. Ah le de yi mala ngari ra fü ewü mbölo. ²⁷ Angü wü ngü te ma ngbü emala fü yi esalakumu ne, ah le de yi mala wü ngü la de mere ri yi fü wü kpara 'buru, baka kpara te ngbü eri dofo. ²⁸ Yi mere e akpe cürü wü vügü ka-yi de, angü wüh tí eyi amörö bü küte yi kükürü, amba wüh tí amfofo *küküwa ka-yi nda-wü kü de. Te di bala, ah le fü yi akpe 'duwa Me kpikpi ye, angü, te yi ce ngü ka-ra la, engu de wazi teka amörö küte yi, aza kphah küküwa ka-yi, agü angbü wa. ²⁹⁻³¹ Yi mere e akpe cürü de, angü Me ngbü eceka kpi fütanga yi me-ye. Yi ceka la wü lu, te ewü sibi fa sü ne, Me ngbü

* **10:15** 10:15 Mü ena amaka ngü ka Sodomo bete Gomora gbü Gina Ngü 19.

eceka kpí fütanga ewü biri biri 'buru. Toto iri teka biri süka ewü de. Amba ah kpah bala teka ngü ka-yi, angü Me le yi fa nda mere bi wü lu la ka. Ah tanga wü su-nzö yi biri biri kpah eyi 'buru. Te di bala, to Me ti airi te yi tüne de.

³² Mene kpapa te kpe cürü de, fü ah amala nga ye gbü jia wü kpapa ngbaa ngbaa ngbaa, gü ba, 'Ni de kpapa ka-ra la,' gbü *adu sikipi, ma ena amala nganga kpah engagira Wüba Me, ngbaa ngbaa ngbaa, gü ba, 'Engu de kpapa ka-ra fanü.' ³³ Amba te mü cere nga mü, gü ba, 'Ni wu ra de la,' gbü adu sikipi, ma ena amala tüngü mü kpah bala, engagira Wüba, Me, gü ba, 'Ma wu mü kpah de.'

³⁴ Yi efi nda-yi, gü ba, ma koro teka fü yi amaka gu ngü esüka wü kpapa füh kotö sene? A'a, ah bala de! Kokoro ka-ra füh kotö ne ena ato makpü, fü wü kpapa angbü ekpü yi akpü, angü yi de wü kpapa ka-ra. ³⁵ Angü teka ngü ka-ra, wü jaji komoko ena akpü te-wü de wü wü wü. Wü jaji würüse ena akpü te-wü de wü ni wü. Wü würüse ena akpü kpah te-wü de wü wara wü di enga wü. ³⁶ Te di bala, wü vügü ka-yi ena adi kpah bü ciki esüka wü mürü yi.

³⁷ Te mü le afa nga ra la, ah le de mü ce ngü ka maguma 'basu' basu. Te mü le ngü ka wö mü, anga ni mü, fa ngü ka-ra di ka la, mü ti angbü kpapa ka-ra nda-mü de. Te mü le ngü ka wü di mü, anga wü di enga mü, fa ngü ka-ra di ka la, mü ti angbü kpapa ka-ra nda-mü kpah de. ³⁸ Wayi, te mü le alala gbü nga ra, ah le de mü reke te-mü fü kpi, baka kpapa te ngbü ebü rü gbegete ka-ye, te wüh ena amörö engu fefeh na. Angü, te mü mere bala de la, mü de kpapa ka-ra de. ³⁹ Amba, te mü le aküwa te-mü de tete-mü la, mü ti aküwa te-mü nda-mü de. Angü, te mü ce te-mü, o fü kpi teka ngü ka-ra la, Me ena aküwa mü me-ye, fi mere badi.

⁴⁰ Ma emala fü yi dene zu ngü. Mene kpapa te ena ale yi de züka maguma ye, aza yi gbü mürü la, kpapa engu la ngbü dela kpah ele ra. Kpah bala, mene kpapa te ele ra de züka maguma ye la, ah ngbü dela kpah ele Wüba Me, te tima ra ne. ⁴¹ Mene kpapa te ena ale yi, baka wü *mürü dofo ka Me, de züka maguma ye, teka te yi ngbü emala ngari Me fü ani ne, Me ena ato kpah mere züka ngü fefe, te gara agbü kpi kpala, kpah baka e te engu ena ato fü yi. Kpah bala, mene kpapa te ena aza yi gbü mürü, angü yi de züka wü kpapa ka Me la, Me ena ato kpah mere züka ngü fefe, te gara agbü kpi kpala, kpah baka e te engu ena ato fü yi. ⁴² Ma ngbü emala fü yi dene zu

ngü. Mene kpapa te ena ale ta-ngü te yi, ato mba e fü yi ba gu ngu, teka te yi di de kpapa ka-ra ne, Me ena ato mere züka ngü fefe, te gara agbü kpi kpala."

11

¹ Dela ngü te Yesu mala fü wü kpapa ka-ye nzükpa de füh ye 'basu ne. Fü engu ayia atima ewü, teka anü amala ngari Me fü wü kpapa gbü nga nzö sü ka *Galilaya la 'buru, kpah da eküwa wü mürü keke.

Fütanga wü ngü la, fü Yesu ayia anü andoro gbü wü köti ka Galilaya 'buru, teka ari wü kpapa de to ngari Me.

Dene ngü te Yesu mala teka Yüwane Mürü Babatiza

Luka 7:18-35

² Gbü wü sikipi la, *Yüwane Mürü Babatiza ka-ye fi la bü agbü ku. Fü ah ayia aje nga wü ngü te Yesu ngbü emere la. Yüwane, fü mü ayia atima wü gara kpapa ka-mü kpaka Yesu.

³ Fü wü kpapa ka Yüwane la anü akoro kpaka Yesu, ayi-tata, gü ba, "Mere kpapa ka-ani tima ani me-ye, teka ayi-ta ye, gü ba, 'Ye ngbü rü de Ye Me, ta te Me mala nganga, gü ba, ni ena atima füh kotö ne? Anga ah le de ani di la fi bü eci nganga?'" ⁴ Fü Yesu amala ngü fü ewü, gü ba,

"Yi du edu, yi mala nga wü ngü, de te ma ngbü emere gbü jia yi ne, 'buru fü Yüwane, gü ba, ⁵ 'Wü kpapa te jia ewü ni ani, wüh kpo eyi eceka kpí. Wü kpapa de lö wü walawala, wüh kpo eyi enü nü. Küte wü mürü *jiakö reke kpah eyi. Wü kpapa te güje ewü do ado, wüh kpo eyi eje ngü. Wü kövö kpo eyi ezükü gbü kpi. Wü mürü cinga kpo eyi eje ngari Me. Wü ngü la 'buru ngbü eyi emere te-wü, ba e ta te wü *mürü dofo ba gbü Ngari Me ne.*"

⁶ Te di bala, yi mala fü Yüwane, gü ba, 'Mene kpapa te ena alala fi bü eküte ra, Me ena aceka engu ba züka kpapa ka-ye, fü ah angbü de mere tadu te gara.' ⁷ Fü wü kpapa la ayia adu kpaka Yüwane, mere kpapa ka-wü.

Fü Yesu adu afü te-ye, akpo angbü emala nga Yüwane fü mere bi wü kpapa la, gü ba, "Yi ngbü efi teka Yüwane, egü neh fe? Ta te yi ngbü enu kpa etü gü, da eje ngü gömö Yüwane ne, yi nü kpala neh teka ne? Yi ngbü ta efi ngü teka Yüwane, gü ba, engu de tondö kpapa, de maguma ye 'basu' basu, te ngbü emere ngü baka gala, te wege ngbü efe me-ye ne? A'a, ah bala de! ⁸ Anga fingängü ka-yi gü ba, engu de mere miri, te to züka bongo eküte ye? A'a, ah bala kpah de, angü wü kpapa te ewü ngbü eto züka bongo eküte wü, wüh ngbü etü gü

* 11:5 11:5 Mü ena amaka ngü la gbü buku ka Yisaya 35:5-6.

nda-wü de! Wüh engbü ka-wü gbü mere köti, anga gba wü miri. ⁹ Amba ma wu eyi, gü ba, yi nü ta kpaka Yüwane kükürü de, angü engu de müürü dofo ka Me fanü. Te di bala, ah le de yi wu awu, gü ba, ngü ka Yüwane fa nda wü gara wü müürü dofo ka Me 'buru ka. ¹⁰ Angü Yüwane me-ye de kpapa, ta te wüh ba ngü kaka-na gbü *Ngari Me, gü ba dene, 'Me mala ngü fü Ye ye, gü ba, "Ni ena atima müürü tima ka-ni kpa engagira nü, teka areke kaje fü ye." '†

¹¹ Fü Yesu adu kpah amala gara ngü fü ewü, gü ba, "Ma ngbü emala fü yi dene zu ngü. Esüka wü müürü dofo, de wü diri wü kpapa ka Me ta gügü ne 'buru, gbü jia Me, kpapa te ngü kaka fa nda *Yüwane Müürü Babatiza, nda ma. Amba mene kpapa te to maguma ye fere 'buru, ngü kaka ena afa nda Yüwane ka, angü *Nzila Wazi Me ngbü eto wazi fefe me-ye.

¹² Ah kpo gbü sikipi ta te Yüwane kpo de tima ka-ye, zalü akoro di dene, ngü ka Me ngbü eyi ega esüka wü kpapa, angü mere bi wü kpapa ngbü eyi eto te-wü, da elala gbü ngü ka Me. Amba siti wü kpapa, te ewü di vügü ka ngü ka Me ne, ngbü kpah eyi egiri kaje, teka atiri tima ka Me la de wazi. ¹³ *Müse de wü gara wü müürü dofo ka Me ta gügü ne, wüh ngbü 'buru emala nga ngü, de te ngbü emere te-ye gbü wü sikipi ne. Gina müürü dofo la de Müse, adudu na de Yüwane Müürü Babatiza, te mala nga kokoro ka-ra ne. ¹⁴ Ma emala fü yi dene zu ngü, gü ba, Me tima Yüwane Müürü Babatiza me-ye, teka amala ngari ye fü wü kpapa, kpah baka e te engu tima müürü dofo *Iliya ta gügü ne. ¹⁵ Te güje yi ladü la, ah le de yi da güje yi, aje ngü ka-ra la areke areke."

¹⁶ Fü Yesu adu kpah amala gara ngü fü wü kpapa la, gü ba, "Wü kpapa te ewü le ngü ka-ra de ne, ma ena amala teka ewü, agü neh fe? Wüh neh baka wü da? Angü ma reke ewü eyi ma! Wüh le züka ngü nda-wü de. Wüh baka wü jaji te ewü ngbü ega yiki de wü bu wü. Angü gara wü bu ewü ngbü ta emala ngü fü ewü, gü ba, ¹⁷ 'Ani reke wü ma! Wü le züka ngü nda-wü de! Angü ani ngbü emi ku'du fü wü, wü le alo bi de. Ani ngbü ebi ci gba fü wü, wü le aku gba kpah de!'

¹⁸ Wü di enga wüna, yi ceka la! Baka ta te *Yüwane Müürü Babatiza koro ngbü esüka yi sene ne, ah zü e fa sü de, ah nzö fi kpah de. Te di bala, wü gara kpapa ngbü ta efala engu, gü ba, 'Engu de *siti wü di enga me guvu ye!' ¹⁹ Amba de-ra, te ma koro esüka yi sene, ma ngbü ezü e,

kpah da enzö e, fü wü kpapa angbü kpah efala ra, gü ba, 'Ma de müürü kü. Ma ngbü kpah eküya. Ma kpah de awuba ka siti wü kpapa.' Wü kpapa te ewü ngbü efala ngü ka-ra ne, ngbü efi nda-wü, gü ba, ani wu ngü fa sü. Amba wüh wu ngü nda-wü kü de. Ah ena adi bü nzö mene wü kpapa te ewü le ngü ka-ra eyi ne, wüh ena angbü ewu si-ngü la me-wü."

Dela ngü ta te Yesu mala fü wü kpapa, teka ngü ka Yüwane Müürü Babatiza.

Dene ngü ka wü kpapa, te ewü le ngü ka Yesu de

Luka 10:13-15

²⁰ Fütanga wü ngü la, fü Yesu akpo da emala ngü fü wü kpapa gbü wü köti, te engu ngbü endoro gbügü na ne. Angü engu mere bi wü kpeke lara ngü gbü jia wü kpapa gbü wü köti engu la ma, amba wüh le afü maguma wü nda-wü de. Teka ngü la, fü Yesu amala ngü fü wü kpapa la kpekepeke, gü ba, ²¹ "De-yi wü kpapa ka Korazina, bete wü kpapa ka Betesayida, Me ena ato mere kuru te yi te gara, angü yi le ngü ka-ra de. Kükürü de, angü wü mere kpeke ngü, de te ma ngbü emere gbü wü sü ka-yi ne, te ma ena angbü emere ta bala fü wü *ganzi kpapa, baka wü kpapa ka Tera ake Sidona la, de bane wüh ngbü ta eyi de mere cinga te wü, teka *siti ngü ka-wü. Wüh ena angbü ta kpah eto kala bongo eküte wü, eza kpah mbi ebu gbü nzö wü, da enda'ba te-wü fü Me, gü ba, 'Ani le eyi afü maguma ani!' ²² Teka ngü la, gbü *adu sikipi te Me ena akolo ngü ka wü kpapa tete, ah ena ato mere kuru te yi, wü kpapa ka Korazina ake Betesayida, afa nda wü kpapa ka Tera bete Sidona ka.

²³ Kpah bala, de-yi, wü kpapa ka Kapanama, yi fi nda-yi, gü ba, ngü ka-ani ena areke gbü jia Me, fü ani akoro angbü kpi? A'a! Ah bala de! Ngü ka-yi ena asiti gbü jia Me asiti, fü yi anü angbü du ka wa, angü yi le ngü ka-ra de. Kükürü de, angü wü mere kpeke ngü, de te ma ngbü emere gbü wü sü ka-yi ne, te ma ena angbü emere ta bala fü wü siti kpapa ka *Sodomo la, de bane wüh fü ta maguma wü eyi. Me ti ta acuru ewü de.† ²⁴ Ma emala fü yi dene zu ngü. Gbü *adu sikipi te Me ena akolo ngü ka wü kpapa tete, Me ena ato mere siti kuru gbü nzö yi, afa nda wü kpapa ka Sodomo ka, angü yi le ngü ka-ra de."

Dene gba ka Yesu fü Me

Luka 10:21

²⁵ Sidi nga ngü la, fü Yesu ayia agbo nga iri Me, gü ba, "Wayi, Wüba Me, mü de Miri angbü kpi, mü kpah de Miri gbü

† **11:10** 11:10 Mü ena amaka ngü la gbü buku ka Malaki 3:1. ‡ **11:23** 11:23 Mü ena amaka ngü ka Sodomo gbü Gina Ngü 19:24.

nzó wü kpara füh kotó ne 'buru. Ma ngbü egbo nga írì mü, angü mü to wazi eyi fū wü kpara ka-ra, teka aje to ngari mü ne. Kükürü de, angü wüh o fingangü ka-wü eyi 'buru, teka adi eje ngü la ba wü vürü jaji. Amba teka wü cögbörö kpara, te ewü le aje ngü ka-mü de ne, wüh tí awu si-ngü ka-mü de, angü wüh gü ba, ani wu ngü fa sü. ²⁶ Wayi bala Wüba, ngü la reke cu te mü, angü mü le me-mü, de wü kpara ka-ra je si-ngü ka-mü."

Dene ngü te Yesu mala fū wü kpara ka-ye

Luka 10:22

²⁷ Fū Yesu adu amala ngü fū wü kpara ka-ye, gü ba, "Wüba Me to wazi ka wü ngü eyi 'buru esaka ra, teka de ma koro, ma sere ngü ka-ni la fū yi. Kpara biringbö te wu ngü ka-ra mbi mbi mbi nda ma, 'duwa Wüba Me, te engu wu ngü ka-ra me-ye. Kpah bala, kpara biringbö, te wu ngü ka Wüba Me, nda ma. Ma wu ngü kaka duu me-ra, be kpah te wü kpara te ma gü tamu ngü ka Me fū ewü ne.

²⁸ De-yi wü kpara, te yi ndirí eyi, ka wü tiri ngü ka-yi ne, yi le ngü ka-ra, de yi nū kpaka ra kpakine. Ma ena aza wü tiri ngü la gbü nzó yi asidi, fū yi afe te-yi. ²⁹ Yi to maguma yi fere, de yi ce te-yi 'buru, adi eje riri ka-ra. Angü ma de mürü *züka maguma, te ma ngbü ewu cinga wü kpara. Te yi le ngü ka-ra la, ma ena agu maguma yi kpina, fū yi afe te-yi. ³⁰ Angü riri te ma ena ato fū yi ne, ah kpekpeke nda de. Riri la ena ato kpah wazi fū yi, fū ah ale ta-ngü te yi."

Dela ngü ta te Yesu mala fū wü kpara ka-ye.

12

Dene ngü te Yesu mala teka sikipi ka Me Marako 2:23-28; Luka 6:1-5

¹ Fütanga ngü la, gbü gara *sikipi ka Me, fū wü Yesu angbü enü de wü kpara ka-ye. Fū ewü afü kpuru gbü gara yi ka ndo, akpo da esösörö fi ndo la, etitiri, ezü, ka tala te ewü. ² Fū wü gara *Farusi awu ngü la. Fū ngü la asiti gbü jia ewü, angü wüh ngbü efi, gü ba, "Masörö fi ndo la, ah de tima." Angü *Riri te Müse to fū wü *Yisarayeala mala, gü ba, "Gbü sikipi ka Me, wüh mere e amere tima 'buru 'buru de." Teka ngü la, fū wü Farusi la ayia amala ngü fū Yesu, gü ba, "Ye teka la! Wü kpara ka-ye ne ngbü emere tima gbü sikipi ka Me, neh teka ne? Wü je riri ka-ani ne nda-wü de? Wü le asiti gele ka-ani, neh teka ne, te ewü ngbü

esösörö fi ndo la gbü sikipi ka Me de bala ne?"

³ Te Yesu je ngü la, fū ah alügü ngü fū ewü, gü ba, "Yi tanga *Ngari Me nda-yi neh de? Ngü ta te wüh ba teka mere Miri *Davidi ne, ah gü neh fe? Ta gbü gara ra, tala mere Davidi de wü kpara gbü nga ye. ⁴ Fū Davidi ayia akoro kpaka *mürü gele ka Mere Me, ayi-tata teka e-mazü. Fū mürü gele la ayia aza ambata, de te wüh ngbü eto fū Mere Me ne, ato fū Davidi. Amba *Riri ta te *Müse to fū wü mürü gele, gü ba, ambata la teka wü kükürü kpara fa fa nda de. 'Duwa wü mürü gele ka Mere Me ngbü ezü me-wü. Fū Davidi aza ambata la, azü, ato kpah fū wü kpara gbü nga ye la 'buru.* Te di bala, wüh mala ta eyi fefe, gü ba, 'Ye ngbü esiti gele?' Wüh mala bala de!

⁵ Kpah bala, gbü Riri ta te Me to fū Müse, wüh ba, gü ba, 'Wü mürü gele, te ewü emere tima gbü *Mere Kambü ka Me ne, ah le de wüh mere tima ka-wü la kpah gbü sikipi ka Me.† Yi wu bala de? Te wü mürü gele la ngbü eyi emere tima gbü sikipi ka Me bala la, yi ena amala fū ewü, gü ba, 'Wü ngbü esiti gele ka-ani?' Yi ti amala bala de, angü yi wu kpo, gü ba, ngü ka gele ka Kambü ka Me la fa ngü ka gele ka sikipi ka Me afa. ⁶ Ma emala fū yi dene zu ngü. De-ra *Ye Kpara ka Kpi, Me to wazi eyi fere fa ngü ka gele ka Kambü ka Me bete nda sikipi ka Me 'buru ka.

⁷ Wüh ba kpah gara ngü gbü Ngari Me, gü ba, 'De-ni, Me, dene ngü te ni le, de wü mere. Ni le de wü ceka cinga wü bu wü, ale ewü de züka maguma wü. Angü te wü mere bala de la, mere bi wü nü, te wü ngbü ewa, eto fū ni baka la'bi ne, ni ti ale nda-ni de!‡ Ta te yi ena awu si-ngü la awu mbi mbi mbi, gü ba, ngü ka züka maguma fa ngü ka gele afa la, de bane yi ti amala siti ngü eküte wü kpara ka-ra de. Angü ngü te ewü mere la, ah siti gbü jia Me nda de. ⁸ De-ra, Ye Kpara ka Kpi, Me to wazi eyi fere, fa ngü ka gele la ka. Ma de mürü sikipi ka Me la me-ra. Ma ngbü eto to Riri ka Me fū wü kpara ka-ra me-ra."

Dene ngü ka komoko te Yesu reke kpakpa na gbü sikipi ka Me

Marako 3:1-6; Luka 6:6-11

⁹ Fütanga ngü la, fū Yesu ayia gbü sü la, anü arí kpa *esambü ka biti-te. ¹⁰ Gara komoko ta ladü kpa esambü ka biti-te la, te kpakpa na ze aze. Wü *Farusi ta kpah ladü kpala. Fū ewü angbü efete Yesu, da egiri kaje te ani ena amaka siti ngü kaka, fū ani amala nganga fū wü *kovo. Teka ngü

* 12:4 12:4 Mü ena amaka ngü la gbü 1 Samuwele 21:1-6.

† 12:5 12:5 Mü ena amaka ngü la gbü buku ka Namba

28:9-10bete buku ka Riri ka Gele ka wü Levi 24:8.

‡ 12:7 12:7 Mü ena amaka ngü la gbü Oseyia 6:6.

la, fū ewū ayi-tata teka komoko te kpakpa ze aze la, gū ba, "Gbū jia ye, ah de zūka ngū teka akūwa kpara gbū *sīkpī ka Me bane? *Rīrī te Me to fū Mūse gū neh fe?"

¹¹ Fū Yesu alūgū ngū fū ewū, gū ba, "Te kpara ladū esūka yi sene, de kambiliki ka-ye ngbee biringbō la, te kambiliki kaka la tī gbū mere du gbū sīkpī ka Me la, engu ena amere baye? Ah ena ace kambiliki ka-ye la kpala, angū ah de sīkpī ka Me? ¹² Ngū ka kpara fa ngū ka kambiliki la de? Te di bala, ah de zūka ngū teka ale ta-ngū te kpara gbū sīkpī ka Me. Angū Rīrī ka Me mala, gū ba, ah le de nih di emere zūka ngū."

¹³ Fū Yesu adu amala ngū fū komoko la, gū ba, "Mū gberē kpa mū egberē." Fū komoko la ayia agberē kpa ye. Fū kpakpa na areke te-ye, adu zūrrrū te nga ye, kpaḥ baka gara na la.

¹⁴ Te wū Farusi wu ngū la bala, fū ngū la ake te ewū, angū Yesu reke kpa komoko la gbū sīkpī ka Me. Fū ewū ayia anū, akpo da egīrī kaje, de ani mōrō Yesu asidi.

Dene ngū te Me mala fū mūrū dofo Yīsaya teka Yesu

¹⁵ Te Yesu wu, gū ba, wū *Farusi ngbū eyi egīrī kaje teka amōrō ni asidi, fū ah ayia ka-ye, ace sū la. Fū mere bi wū kpara aci anū, afa nganga na. Fū Yesu akūwa wū mūrū keke, esūka wū kpara la 'buru. ¹⁶ Te di bala, fū Yesu amala ngū fū wū kpara, de te engu kūwa ewū ne kpekpeke, de wūh mere e, amala nga ni fū wū kpara de, angū Yesu le acu ngū ye de.

¹⁷ Tekā wū ngū te Yesu ngbū ele ta-ngū te wū kpara de gu maguma de bala ne, fū wū kpara adu awu, gū ba, Me fe engu tima me-ye fanū. Angū ngū la tī kpini de ngū, ta te Me mala gōmō *mūrū dofo Yīsaya, gū ba, ¹⁸ "Ceka la! Dene kpara te ni, Me, fe teka amere tima ka-ni, angū ni le engu de maguma ni 'buru, da engbū de tadu teka ngū kaka-na. Ni ena ato *Nzila Wazi ni emamaguma. Ah ena amala nga ni fū wū kpara fūh kotō ne 'buru, gū ba, ni, Me, ena akūwa ewū. ¹⁹ Kpara ka-ni la tī adi ewū nga, da ega yikī de wū kpara nda de. Ah tī adi emala ngū de mere ri ye, adi ecu ngū ye, kpaḥ de. ²⁰ Wū kpara te wazi ewū di ma, baka gala te lōlō di walawala, anga baka wa te ngbū nuuu ne, engu tī adi emere ewū esiti de. Engu ena adi ele ta-ngū te ewū, da erī ewū ferrre, de zūka maguma ye. Ah ena amere tima ka-ye la bala, zalū te wū kpara 'buru ena aje rīrī ka-ni, Me, mbi mbi mbi. ²¹ Te di bala, wū nguwa wū kpara fūh kotō ne 'buru ena ao maguma wū ekūkūte."§

Dela ngū te Me mala gōmō mūrū dofo Yīsaya ta gūgū, teka ngū ka Yesu, o wūh bī engu la de.

Dene ngū te Yesu lūgū fū wū Farusi,

teka ngū te ewū mala ekūkūte

Marako 3:20-30; Luka 6:43-45; 11:14-23

²² Fūtanga ngū la, fū wū gara kpara akoro de gara komoko kpara Yesu, te jijia ni ani. Ah ro mō nda kpaḥ de, teka *siti wū di engu me te di guguvu. Fū Yesu ayia akūwa komoko la. Fū komoko la akpo da ero mō, kpaḥ da eceka kpa. ²³ Fū ngū la aga gbū jia wū kpara 'buru afa sū. Fū ewū akpo da emala ngū esūka wū, gū ba, "Yesu ena adi de kundū ye Miri *Davidi, te Me le atima teka akūwa ani ne, de?"

²⁴ Baka te wū *Farusi je ngū te wū kpara ngbū emala gōmō wū de bala ne, fū ngū la ake te ewū efa sū. Fū ewū amala, gū ba, "Me to wazi la fū Yesu me-ye nda de. Yesu maka wazi, teka adi eliki wū di engu me di la, esaka *Satana,* miri ka *siti wū di engu me ne."

²⁵ Te Yesu wu fingangū ka wū Farusi la bala, fū ah ayia amala ngū fū ewū, gū ba, "Te nguwa wū kpara biringbō kpo ngbū emere gū esūka wū la, ngū la ena adi mbi? Ah reke nda de! Nguwa ewū ena akpī, anza ka! Kpaḥ bala, te wū kpara gbū kōtī biringbō kpo eyi da emōmōrō te-wū la, ah ena atī atī? Ah tī kpaḥ de! Kōtī la ena asiti, fū ewū abaya asidi! ²⁶ Angū, te Satana du ngbū tūne eyi cu egū gū de wū kpara ka-ye la, ah ena ayiri gbū miri ka-ye la ayiri? Engu tī ayiri de, ngū kaka ena anza."

²⁷ Fū Yesu adu ayi-ta wū Farusi la, gū ba, "Te yi gū ba, ma ngbū eliki wū di engu me de wazi ka Satana la, amba e-ngbū eto wazi fū wū kpara ka-yi, teka adi eliki wū di engu me di, neh da? Tekā ngū la, wū kpara ka-yi, ena adi emala nga yi zu me-wū fū wū kpara, gū ba, ngū te yi mala la, ah de tōndō ngū. ²⁸ Ma emala fū yi fanū fanū, gū ba, ma ngbū eliki wū di engu me ne gbū wazi ka *Nzila Wazi Me. Te di bala, ah le de yi wu, gū ba, ma de kpara te Me tima teka akūwa ani ne!

²⁹ Yi fi la nga ngū ne mbi mbi mbi! Te kpeke kpara ladū, te di de wazi ye fa sū, e-ena arī kpa esambū kaka, agberē wū e kaka, neh da? Angū ah ngbū eceka kpī fūtanga kambū ka-ye 'be 'be 'be. Amba, te gara kpeke kpara koro, te wawazi fa nda gina kpara la, ah ena azoro engu, ai gō! agberē wū e kaka 'buru, anū sū di. Te di bala, ah le de yi wu, gū ba, wazi ra fa nda Satana, te ngbū embū yi de fūh kotō ne ka.

§ 12:21 12:21 Mū ena amaka ngū la gbū buku ka Yīsaya 42:1-4.

* 12:24 12:24 Gara iri Satana de Belezebuba.

³⁰ Mene kpara te le ngü ka-ra de, engu de vüügü ka-ra. Te kpara le ta-ngü te ra gbü tima ka-ra kpah de la, engu ngbü dela egiri kaje teka asiti tima ka-ra la.

³¹ Ma emala fü yi dene zu ngü. Wü *siti ngü 'buru, de te wü kpara ngbü emere, te kpara fü maguma ye la, Me ena aboro wü ngü kaka la 'buru. Kpah bala, wü ngü te wü kpara ngbü emala esiti te iri Me ne, Me ena aboro kpah asidi. Amba 'duwa kpara te ngbü efala Nzila Wazi Me, Me ti aboro siti ngü kaka la kpo fi de. ³² Wayi, te mü mala bü siti ngü, da efala ra di la, ngü ma! Me ena aboro siti ngü la, te mü fü maguma mü eyi la. Amba 'duwa te mü ngbü emala siti ngü, da efala Nzila Wazi Me la, Me ti aboro siti ngü ka-mü la nda de. Liya ka-mü la ena angbü gbü nzó mü bala fi mere badi.

³³ Ngü ka-yi kpah baka ngü ka rü te ngbü eri, fü wü kpara angbü ewu riri na. Züka rü ngbü eri kpah bü züka ri-rü, fü wü kpara angbü ezü. Siti rü ngbü eri nda-ye kpah siti ri-rü, te wü kpara ti azü de. Ah bala de? Angü züka ri-rü ti ari eküte siti rü ne, nda de. Anga siti ri-rü ti ari eküte züka rü ne, kpah de. Te di bala, yi ti awu rü teka ngü ka riri na. Kpah bala, wü kpara ti eyi awu maguma yi, teka wü ngü te yi ngbü emere.

³⁴ De-yi wü *Farusi, yi de siti wü kpara! Yi de wü mü rü mani baka kpürü! Te di bala, yi ti amala züka ngü nda-yi de. Angü wü ngü de te kpara ngbü emala te komö ye ne, ah de wü ngü te ngbü ekoro emamaguma. ³⁵ Te di bala, züka kpara ngbü emere züka wü ngü ka-ye duu me-ye, angü züka wü ngü ladü emamaguma. Kpah bala, siti kpara ngbü emere nda-ye kpah fi bü siti wü ngü, te di emamaguma.

³⁶ Ma emala fü yi dene zu ngü. Gbü sikipi te Me ena akolo ngü ka wü kpara tete, ah ena ato kuru te yi, teka siti wü ngü te yi ngbü emala ne. ³⁷ Angü wüh ena aye süka ngü ka-mü, te nga wü ngü de te ngbü ekoro gömö mü ne. Te mü ngü ta emala züka ngü la, ngü ka-mü ena adi mbi, angü mü ena amaka tadu gbü ngü la. Amba te mü ngbü ta emala siti ngü la, ngü ka-mü ena adi kpah esiti, angü mü ena amaka cinga gbü ngü la."

Dene ngü te Yesu mala, teka ngü te ena asere fü wü kpara,

gü ba, Me tima ni me-ye

Luka 11:29-32

³⁸ Fütanga ngü la, fü wü gara *mürü riri de wü *Farusi ayia amala ngü fü Yesu, gü ba, "Mere kpara, ani ena awu baye baye, gü ba, Me tima ye me-ye fanü? Ah le de ye mere la gara talara ngü, fü ani awu." ³⁹ Fü Yesu alüügü ngü fü ewü, gü ba, "De-yi, yi

ka-yi de siti wü kpara, te yi le ngü ka Me nda-yi de. Te ma ena amere wü talara ngü gbü jia yi la, yi ena ale ngü ka-ra fanü? Yi ti ale nda-yi de! Te di bala, Me ti agü tamu talara ngü biringbö fü yi nda de. Amba ah ena adi bü mene talara ngü, te ena amere te-ye baka nda *Yona tane. ⁴⁰ Fanü fanü, ngü ka-ra ena adi kpah baka nda Yona. Angü Yona ti ta gbü mere *yi-ngu, fü mere si ayia ami engu. Fü Yona ara guvu mere si la sikipi bata. Gbü eabata sikipi la, fü si la ayia azi Yona kpa edere ngolo, füh siki. Fü Yona ayia anü agbü Nineve, ba e ta te Me mala fefe, de ah nü mala ngari ni, Me, fü wü kpara de kpala ne. Fü ngü ka Yona la agü tamu wazi ka Me fü wü kpara ka Nineve. Fü ewü ayia afü maguma wü. Kpah bala, de-ra *Ye Kpara ka Kpi, kö ra ena ara gbü tö sikipi bata. Gbü *eabata sikipi la, fü ra adu azükü.

⁴¹ Te di bala, gbü *adu sikipi te Me ena akolo ngü ka wü kpara füh kotö ne 'buru tete, ah ena ato mere kuru te yi, angü yi le ngü ka-ra de. Wü kpara ka Nineve ena ayia gbü sikipi la, amala nga *siti ngü ka-yi, angü wüh je ta ri Yona, fü ewü afü maguma wü, adu ale ngü ka Me. Amba ngü ka-ra, te fa nda Yona ka ne, yi le aje nda-yi de. ⁴² Kpah bala, mere würüse ta te engu di de miri ka Seba, ena ayia kpah amala nga siti ngü ka-yi. Angü würüse la yia ta agbü tö ka-ye nengete, fü ah akoro teka aje kpeke riri gömö Miri *Solomona. Angü Me to ta mere wazi fü Solomona, teka adi ewu wü ngü di. Amba wazi riri ka-ra, te fa nda Miri Solomona ka ne, yi le nda-yi kpah de! Dela si-ngü te Me ena ato mere kuru te yi tete ne, angü engu tima ra teka aküwa yi, amba yi le ngü ka-ra nda-yi de!"

Dela ngü te Yesu lüügü fü wü Farusi, te ewü yi-tata teka talara ngü.

Dene ngü te Yesu mala teka wü di engame,

te ewü koro eyi guvu kpara asidi

Luka 11:24-26

⁴³ Fü Yesu adu amala kpah gara ngü fü ewü, gü ba dene, "Te Me liki wü *di engame eyi guvu kpara asidi la, wü di engame la ena amere baye? Wüh ena anü, angbü endoro gbü wü siti sü te ürü aürü, agiri sü te ewü ena angbü tete. Amba, te ewü maka sü de la, ⁴⁴ wüh ena adu afi nga ngü, gü ba, 'Ani du la edu agbü sü ka-ani, ta te ani ngbü gbügbü na ne.' Te wüh du kpaka kpara la, fü ewü amaka sü emaguma kpara la fi bü kükürü, baka kambü te kpara di gbügbü na ma la, ⁴⁵ wüh ena anü agiri gara wü bu wü, de ani ngbü de ewü. Fü ewü anü amaka wü gara wü bu wü lorozi, te wazi ewü fa nda gina ewü la ka. Fü ewü

adu ari, angbü de ewü guvu kpara la. Te di bala, adu ngü ka kpara la ena angbü baye? Ah ena angbü emere wü *siti ngü tîne, efa mene wü ngü, de ta te engu ngbü emere te enga gina ne ka. Te di bala, ah le de ye ceka te-yi mbi, angü dela ngü te ena amere yi, wü siti kpara, angü yi le ngü ka-ra nda-ye de.”

Dene ngü te Yesu mala teka wü ni ye, de wü di enga ni ye

Marako 3:31-35; Luka 8:19-21

⁴⁶ Baka te Yesu ngbü la fi bü eri mere bi wü kpara bala, fü wü ni ye Yesu de wü di enga ni Yesu akoro, angbü kpa etanü, angü da ewü, te ewü ena ari, akoro kpaka Yesu, aro mö de ewü, ma, teka ngü ka mere bi wü kpara la. ⁴⁷ Fü gara kpara ayia amala ngü fü Yesu, gü ba, “Mere kpara deyî, wü ni ye, de wü di enga ni ye, koro eyi, ngbü kpa etanü kpane. Wüh ngbü ta ele aro mö de wü ye.” ⁴⁸⁻⁴⁹ Te Yesu je ngü la bala, fü ah ayia amala ngü fü kpara la, gü ba, “Ah mbi, amba de-yi, wü kpara te yi biti te-yi sene, teka aje ngü ka-ra ne, yi kpah de wü di enga wüna, de wü wüna. ⁵⁰ Angü te kpara ngbü emere züka ngü, te reke gbü jia Wüba Me agbü kpî la, kpara la kpah de enga wüna, anga wüna.”

Dela ngü ta te Yesu mala fü mere bi wü kpara la.

13

Dene mani ta te Yesu mala teka nguwa te wüh moko

Marako 4:1-20; Luka 8:4-15

¹ Bü gbü sîkpi engu la, fü Yesu ayia sela, anü akoro era mere ngu *Galilaya. Fü ah ayia angbü ka-ye kötö kpala, akpo da eri wü kpara ka-ye de ngari Me. ² Fü mere bi wü kpara aci akoro gbe kpakaka na la. Te engu wu bala, fü ah ayia ali ka-ye agbü *zabu, aka te-ye mba canza, anü angbü ka-ye kpala füh ngu, angü wü kpara ena adere ni. Fü mere bi wü kpara la areke te-wü, angbü nda-wü edere ngu sela, da eje ngü gögömö na.

³ Fü Yesu angbü eri ewü de mere bi wü ngü 'buru gbü mani, gü ba dene, “Gara komoko ta ladü, te za nguwa ndo ka-ye, anü di, amoko kpa agbü yî. ⁴ Te engu kpo ngbü emoko nguwa ka-ye la, fü wü gara jia ndo la, atî te kaje. Fü wü lu awu, akoro adoro. ⁵ Fü wü gara jia ndo la atî füh sida, te tö di sela mbi mbi ma. Fü nguwa la ayia akö kere, angü tö sela sere sere. ⁶ Te ra kpo ngbü esü tete, fü wü fu-ndo la aürü ka-wü 'buru, angü sî ewü ri gbü tö mbi mbi nda de. ⁷ Fü wü gara nguwa ndo

la atî ka-wü esüka wü ti. Fü wü nguwa la akö, aga de wü fu-ti la 'buru. Fü wü ti awündü züka fu-ndo la. Fü ndo la afü te-ye 'buru yi-andüla tete, angü wü fu-ti la ta ewü eyi 'buru. ⁸ Fü wü gara nguwa ndo la, atî nda-wü gbü züka sî. Fü ewü ayia akö, aga agere, ari gbrri! Gara zî jia ye mbi, gara zî jia ye fa sü, gara zî jia ye reke 'duwa ba-neh-ene-la,* angü wüh ti gbü züka tö.” ⁹ Fü Yesu adu amala fü ewü, gü ba, “Te güje mü ladü la, de mü da güje mü te ngü ka-ra la mbi mbi mbi.”

Dela ngü te Yesu mala teka nguwa te wüh moko gbü tö.

¹⁰ Fütanga ngü la mba cükü'daye, fü wü *kpara ka Yesu ayia akoro kpakaka, ayi-tata, gü ba, “Mere kpara, ah mere neh baye, te mü ngbü emala ngü fü wü kpara ne, gbü mani de bane ne?” ¹¹ Fü Yesu alügü ngü fü ewü, gü ba, “Wü kpara ta gügü ne, wüh je si-ngü ka Me nda-wü de. Ngü ka Me ngbü gbü jia ewü 'daaa, ah wo te-ye awo. Amba nda-yi, wü kpara ka-ra, yi ti eyi aje si-ngü la, angü ma ngbü esere ngü la fü yi me-ra, gü ba, Me le de wü kpara 'buru to maguma wü fü ni. Amba wü gara kpara la ti aje si-ngü la nda-wü de, angü wüh le aje ngü ka-ra de. ¹² Kükürü de, angü te mü le ngü ka-ra ne eyi la, Me ena adu agü tamu gara wü ngü fü mü gbe. Amba te mü le aje ngü ka-ra nda-mü de la, mba enga ngü cükü'daye, te di gbü nzö mü ne, ah ena adürü ka-ye adürü asidi.

¹³ Dela si-ngü te ma ngbü emala ngü fü wü kpara tete gbü mani, angü mere bi wü kpara le ngü ka-ra de. Wüh ngbü eceka ngü ka-ra, amba wüh ti awu sisi nda-wü de. Wüh ngbü kpah bü eje ngü ka-ra, te ma ngbü emala ne, amba sisi na ri gbü nzö ewü mbi mbi nda kpah de. ¹⁴ Wü kpara te ewü ngbü emere ngü de bala ne, wüh ena adi baka wü kpara, ta te Me mala ngü ka-ewü gömö *mürü dofo Yisaya, gü ba dene, 'De-wü deyî, wü ena aceka ngü ka-ni, Me, ma, wü ti awu si-ngü la nda-wü de. Wü ena aje ngari ni, Me, ma, ngü la ti ari gbü nzö wü kpah de. ¹⁵ Angü nzö wü koro eyi kpekpeke teka ngü ka-ni. Wü ni güje wü ka-wü ani, angü wü le aje ngü ka-ni de. Wü ni jia wü kpah ani, angü wü le awu si-ngü ka-ni kpah de. Angü te wü ena aje ta si-ngü ka-ni, Me, mbi mbi la, de bane wü ena ace *siti ngü ka-wü, adu ale ngü ka-ni. Fü ni, Me, aküwa wü.’† Dela ngü ta te Me mala gügü teka wü kpara, te ewü le ngü ka-ra de ne.

¹⁶ Amba nda-yi, ah le de ye ngbü de mere tadu, angü yi ngbü eceka wü ngü, de te

* 13:8 13:8 Gara zî jia ye teke biri de füh ye nzükpa, gara teke bata, gara teke 'buruwe. † 13:15 13:15 Mü ena amaka ngü la gbü buku ka Yisaya 6:9-10.

ma ngbü emere ne, cu de jia yi! Yi ngbü kphah eje wü ngü te ma ngbü emala ne, cu de güje yi ereke areke! ¹⁷ Ma ngbü emala fü yi dene zu ngü. Ta gügü wü *mürü dofo, de wü gara kpara ka Me 'buru, ngbü ta de gümü ngü ka-ra te wü, teka awu ra cu de jia wü, teka de ani di eje ngü, baka te ma ngbü emala fü yi dene, cu de güje ani. Amba wüh je nda-wü de, angü wüh kpi ka-wü eyi gügü."

¹⁸ Fü Yesu adu amala fü ewü mbölö, gü ba, "Dene si-ngü gbü mani ka kpara te moko nguwa ne. Ah le de yi da güje yi reke areke, teka aje ngü gbügbü. ¹⁹ Si mani ka nguwa te ti te kaje, ah baka ngü ka mene wü kpara, te wüh mala ngari Me fü ewü, amba ngü la ri gbü nzö ewü de, angü wüh le aje de. Fü *Satana awu bala, ayia kere, akoro aza ngü la emagama ewü asidi. ²⁰ Mene nguwa te ti füh si-da, ah baka mene wü kpara, te wüh mala ngari Me fü ewü. Fü ewü ale ngü la kere, de mere tadu. ²¹ Amba wüh rü kpekpeke gbü ngü ka Me de, angü maguma ewü ka-ye 'basu 'basu. Tekane de, angü wüh to maguma wü fü Me mbi mbi de. Sidi nga sikipi mba cükü'daye, baka te cinga koro maka ewü teka ngü ka Me, fü ewü ayia ace ngü ka Me ka. ²² Mene nguwa te ti esüka wü ti ne, ah baka wü gara kpara te ewü je ngari Me mbi, amba fingangü ka-ewü ka-ye teka wü ngü de füh kotö ne. Fü gümü wü e ka kotö ne adürü fingangü ka-ewü, teka ngü ka Me asidi. Tekane ngü la, wüh mere tima ka Me mbi mbi de. Wüh ka-wü baka ndo te koro eyi yi-andüla tete. ²³ Mene wü nguwa te ewü ti nda-wü gbü züka sü ne, ah baka mene wü kpara, te ewü je ngari Me, fü ewü ale de maguma wü biringbö, azoro ngü la de kpa wü 'basu, ao to wü, angbü emere. Te di bala, wü kpara la baka ndo te ri reke areke gbrri. Gara zi jia ye mbi, gara zi jia ye fa sü, gara zi jia ye reke 'duwa ba-neh-ene-la.

Dela si-ngü gbü mani teka nguwa ndo la."

Dene gara wü mani te Yesu mala fü mere bi wü kpara

Marako 4:30-34; Luka 13:18-21

²⁴ Gbü gara sikipi fü Yesu adu amala kphah gara mani fü mere bi wü kpara la, gü ba, "Tima ka Me, ah kphah baka ngü ka gara kpara te nü ru ndo ka-ye agbü yi. ²⁵ Gbü biti, o wü kpara ngbü 'buru era ara, fü gara vügu kaka-na akoro, amoko nguwa siti gü gbü ndo kaka la, ayia anü sü ka-ye. ²⁶ Te ndo la kpo ngbü ekö, wü nguwa siti gü la akpo kphah ekö. Fü fu-ndo angbü ega tundu de wü siti gü la. ²⁷ Fü wü kpara

ka tima ka mürü ndo la, akoro amala ngü fefe, gü ba, 'Apa, mere kpara! Nguwa ta te ye ru ne, ah ka-ye bü de ndo kpi kpi ye de? Amba titine siti gü du kö koro gbügbü, neh baye baye?' ²⁸ Fü engu alügu ngü fü ewü, gü ba, 'Gara vügu ka-ni nü mere ngü la bala me-ye.' Fü wü kpara ka tima kaka ayi-tata, gü ba, 'Ye ele de ani nü gbürü wü siti gü gbü ndo la asidi?' ²⁹ Amba mürü ndo la le bala de. Fü ah amala ngü fü ewü, gü ba, 'Wü mere bala la de. Angü te wü nü gbürü wü siti gü la titine la, wü ena agbü wü fu-ndo ekuru wü siti gü la. ³⁰ Wü ce wü siti fu-gü la bala. Te ndo la ndri eyi 'buru la, ni ena amala fü wü kpara ka tima, gü ba, "Wü gbürü la wü siti gü de gbü ndo la te enga gina. Fü wü ai, abiti nzö nzö nzö. Fü wü agü ewü agbü wa. Fü wü adu awa ndo ka-ni la, abiti ewü 'buru agbü kafa." ' "

³¹⁻³² Fütanga wü ngü la, fü Yesu adu amala kphah gara mani fü ewü, gü ba, "Ma le amala gara ngü mani, teka agü tamu ngü ka Me di fü yi. Angü, ngü ka Me ka-ye baka jia gara rü de iri ye müsitada, te di de jia ye baka jia li'ba, jürrü bane. Te mü ru jia rü la, ah ena aga, akoro mere rü, te wü lu ena angbü efe te-wü gbügbü. Kphah bala, ngü ka Me ena aga te gara, akoro memere, baka ngü ka rü la."

³³ Fütanga ngü la, fü Yesu adu kphah amala gara mani fü ewü, gü ba, "Ngü ka Me ka-ye kphah baka *kö, te würüse ngbü ekü'da zu ambata di. Fü kö la angbü emere tima ka-ye gbü ambata la ferrre. Fü ah akpo da eu, eu, zalü akoro memere."

Dela wü mani 'basu te Yesu mala fü wü kpara, teka ngü ka Me, te kpo mba 'dongoni, amba te gara, ah ena aga akoro memere.

³⁴ Yesu ngbü ta emala bi wü ngü ka-ye fü wü kpara la, 'buru gbü mani. Ah mala si wü ngü la fü ewü mbölö mbölö nda de.

³⁵ Ngü te Yesu ngbü mere la, Me sere fefe me-ye, de ah di egü tamu ngü fü wü kpara di. Ngü la ti kphah kpini de ngü, ta te Me mala gömö gara *mürü dofo, gü ba, "Ni ena angbü eri wü kpara 'buru gbü mani. Engu ena amala kphah nga wü ngü te wo te-ye awo fü ewü."[‡]

Dene si mani ka siti gü

³⁶ Fütanga wü ngü la, fü Yesu ace bi wü kpara la, ayia ari ka-ye kpa esambü. Fü wü kpara kaka-na ayia akoro kpakaka na, ayi-tata, gü ba, "Mere kpara, ye gü la tamu si mani ka siti gü, te ye mala ngang, fü ani ne." ³⁷ Fü Yesu alügu ngü fü ewü, gü ba, "Ah mbi. Mene kpara te moko züka nguwa ndo gbü yi ne, ah ka-ye de-ra, *Ye Kpara ka Kpi. ³⁸ Yi engu ne, ah ka-ye

‡ 13:35 13:35 Mü ena amaka ngü la gbü Ci ka wü Davidi 78:2.

de kotò ne. Zúka nguwa ndo, te ewü ru la, ah de yi, wü kpara te yi le ngü ka-ra, fü yi ato maguma yi fere. Siti nguwa gü la, ah de wü kpara ka *Satana. ³⁹ Vügü te nü moko siti nguwa gü la, ah ka-ye de Satana. Kpírí ndo, ah de *adu síkpí, te Me ena akolo ngü ka wü kpara 'buru tete. Wü kpara ka tima, te ewü ena awa ndo la, ah de wü *malayíka ka Me.

⁴⁰⁻⁴² Angü gbü adu síkpí, de-ra Ye Kpara ka Kpí, ma ena atima wü malayíka ka-ra, fü ewü anü aro la fi wü kpara, te ewü ngbü efiti wü bu wü, de wü siti kpara 'buru, agü ewü agbü mere du ka wa, kpah ba e te wü kpara ka tima ro siti gü agbü yí, fü ewü agü agbü wa ne. Wü siti kpara la ena angbü kpala da eku gba de mere cinga, da enyüma gbü te wü. ⁴³ Amba wü kpara ka Me ena angbü agbü sü ka Me, fü ewü angbü eci aci baka ra te ngbü eci agbü kpí. Fü wü kpara 'buru angbü egbo nga írí ewü. Te güje yi ladü, ah le de yi da güje yi te ngü ka-ra ne mbi mbi mbi."

Dene gara wü mani 'basu, te Yesu mala

⁴⁴ Fü Yesu adu amala kpah gara ngü fü ewü, gü ba, "Ngü ka kpara te je ngü ka-ra, fü ah afü maguma ye, ara fü Me, ah kpah baka ngü ka gara komoko ta te nü ngbü emere tima gbü yí. Fü ah ayia amaka mere bi jiase ta te gara kpara wo, o gbü tò sela gügü. Fü ah adu aza jiase la, awo kpah, ao te nga jia ye, gbü yí sela. Fü ah ayia adu agba ye, aza wü e ka-ye, acínzì 'buru asidi. Fü ah amaka bi jiase, adu anü ase yí engu la, teka de jiase, ta te wüh wo o gbü tò la, ngbü tìne fü ni.

⁴⁵ Ngü ka kpara te je ngü ka-ra, fü ah afü maguma ye, ara fü Me, ah kpah baka ngü ka mere kpara te ngbü egírí zúka 'biri, te wüh ngbü ese de mere bi jiase, teka de ni se fü ni. ⁴⁶ Fü kpara la anü amaka gara memere na, te su fa sü, de mere bi jiase gbü ye. Fü engu adu anü acínzì wü gara e ka-ye 'buru. Fü ah aza jiase la, anü ase 'biri engu la di. Fanü fanü, ngü ka Me fa wü gara ngü füh kotò ne 'buru."

Dene mani teka mazoro si de yimba

⁴⁷ Fü Yesu adu amala kpah gara mani fü ewü, gü ba dene, "Me ena ato kuru te wü kpara te ewü le ngü ka-ra de, te gara. Ngü la, ah kpah baka ngü ka yimba, te ewü egü gbü ngu, teka azoro wü si di. Te wüh gü yimba la eyi gbü ngu la, bi wü si, gbü nguwa wü kpikpi ye kpikpi ye, ena aba 'buru gbü yimba la. ⁴⁸ Te yimba la diri tìne eyi ka bi wü si gbü ye la, fü wü mürü yimba la agbeke yimba ka-wü la kpa füh gümba, teka afe zúka wü si gbügbü na la. Fü ewü aza zúka wü si ka-wü la 'buru, ao gbü kuwu. Fü ewü adu amörö wü sisiti na la 'buru, abu kö ewü agbü gü. ⁴⁹ Ngü ka Me

ena amere te-ye te gara, gbü *adu síkpí, kpah bala. Angü wü *malayíka ka Me ena akoro, teka aye süka zúka wü kpara de siti wü kpara. ⁵⁰ Wüh ena aza siti wü kpara la 'buru agü agbü mere du ka wa. Fü ewü angbü eku gba kpala de mere cinga, da enyüma gbü te wü."

⁵¹ Fü Yesu adu ayi-ta wü kpara ka-ye la, gü ba, "Wü ngü de te ni ngbü emala fü wü ne, wü je sisi na eyi mbi mbi mbi?" Fü ewü alügü ngü, gü ba, "Wayi, mere kpara, ani je eyi mbi." ⁵² Fü engu amala fü ewü, gü ba, "Te di bala, de-yi, wü kpara ka-ra, yi ena adi baka mürü kóti, te rí gbü kafa ka-ye, teka agírí wü e, te engu ena agafa fü wü kpara, wü didiri na be kpah te wü toto na. Ma mala ngü la kükürü de, angü yi wu da erí wü kpara de gina *Rírí ka Me, be kpah te to ngü ka-ra, te ma ngbü emala fü yi ne, kpo."

⁵³ Te Yesu mala ngü la fü wü kpara ka-ye nza tete, fü ewü ayia ace sü la, anü sü ka-wü.

*Dene ngü ka Yesu agbü Nazareta
Marako 6:1-6*

⁵⁴ Fü wü Yesu adu anü ka-wü agbü Nazareta, gbü kóti ka-wü, ta te engu ga gbügbü na ne. Fü engu akpo da erí wü kpara kpa *esambü ka bití-te ka-wü kpala. Fü ngü ka Yesu, te engu ngbü erí wü kpara di ne, aga gbü jia wü kpara la afa sü. Fü ewü angbü da emala ngü esüka ewü, gü ba, "Apa! Angü komoko ne maka de mere kpeke rírí de bane neh kaye? Wü mere kpeke ngü ka talara, te engu ngbü emere kpa te wü gara sü ne, e-to wazi la fefe na neh da? ⁵⁵ Komoko ne, de ye kpara, ta te ngbü eforo rü de sene ne de? *Mariya kpah bü de ni ye na. Wü di engu ni ye na bü de wü *Yakobo, *Yüsefa, Simüna, bete Yudi, ⁵⁶ be kpah te wü tangbase kaka, te ani wu ewü 'buru kpo ne! Wüh 'buru de wü kpara de sene ne! Te di bala, Yesu nü maka nda-ye mere wazi, angbü emere wü lara ngü di, de bane, neh ka-ye?" ⁵⁷ Teká ngü la, wü kpara ka Nazareta le ngü ka Yesu nda-wü de, angü Yesu ga nza kpah bü esüka ewü sela.

Fü Yesu adu amala ngü fü ewü, gü ba, "Te mü de *mürü dofo la, wü kpara ena angbü ecu ngü mü acu gbü wü sü 'buru. Amba 'duwa gbü sü te ewü bi mü tete, wüh tí acu ngü mü nda-wü de. Dela si-ngü te yi le acu ngü ra tete na nda-yi de ne."

⁵⁸ Teká ngü la, Yesu tí amere wü ngü ka talara gbü Nazareta fa sü nda de, angü wüh le ngü kaka nda-wü de.

14

Dene ngü ka kpi ka Yüwane Mürü Babatiza

Marako 6:14-29; Luka 3:19-20; 9:7-9

¹ Gbü wü re engu la, Anitipa *Erode ta de mere miri ka wü *Galilaya. Gbü gara sikkpi, fü miri la ayia aje nga Yesu. Angü iri Yesu wü eyi gbü wü sü la 'buru. ² Te engu je nga Yesu bala, fü ah angbü de cürü. Fü ah amala ngü fü wü kpara ka-ye, gü ba, "Wayi, komoko la, ah ena adi de *Yüwane Mürü Babatiza, ta te ni mörö engu ne. Ah ena azükü gbü kpi dela eyi me-ye! Dela si-ngü te engu ngbü emere bi wü ngü ka talara de bala."

³⁻⁴ Yüwane kpi ta kükürü nda de. Ngü ladü gbügü na. Angü Miri Anitipa Erode mörö Yüwane ta me-ye, teka ngü ka wara ye, de iri ye Erodiya ne. Angü miri la fa ta wüürse la esaka gara enga ni ye, de iri ye *Filipo. Fü ah adu aza engu wara ye tete. Tekan ngü la, fü Yüwane ayia amala ngü fü miri la, gü ba, "De-ye deyi, ngü te ye mere la, ah de *siti ngü. Ye fiti wara enga ni ye baye? Ah ti ta fü ye amere bala de. Angü dela siti ngü gbü jia Me!" Tekan ngü la, fü ngü ake te Miri Anitipa Erode. Fü ah ayia azoro Yüwane, agü agbü ku. ⁵ Miri la ngbü ta egiri kaje de ni mörö Yüwane tete na, amba cürü ngbü kpah emere engu amere, angü wü kpara 'buru ngbü ta eceka Yüwane, baka *mürü dofo ka Me.

⁶ Gbü gara sikkpi, fü Miri Anitipa Erode ayia amere mere karama ka-ye, teka afi nga sikkpi, te wüh yaka engu tete na. Enga wara miri la ta ladü, ye wüürse. Fü jaji wüürse la ayia akpo da elo bi engagira wü kpara, te ewü koro gbü karama la. Fü bi ka jaji wüürse la areke gbü jia ewü afa sü. ⁷ Fü miri la ayia amala ngü fü jaji wüürse la, akina te-ye gbü jia wü kpara 'buru, gü ba dene, "Enga ni, bi ka-ye la reke gbü jia ani fa sü. Mene e te ye ngbü ele, de ye yi-ta ni tüngüngü, ni ena ato ato fü ye. Ni ti atiri de."

⁸ Fü jaji wüürse la ayia akpe kpaka ni ye, ayi-tata, gü ba, "Ni ni deyi, mene e te ye ele de ni yo te miri, ah de neh ene?" Fü ni ye na amala fefe, gü ba, "Ye mala fü miri, de wüh nü, wüh mörö Yüwane, de wüh wa nzönzö na, wüh o gbü gada, wüh koro di fü ye, teka fü ani awu, gü ba, Yüwane kpi eyi fanü." Fü jaji wüürse la akpe adu kpaka miri la, amala kpah bala.

⁹⁻¹⁰ Fü ngü la ato mere fingangü fü Miri Anitipa Erode. Amba teka ngü ka kina, de te engu kina te-ye di, gbü jia wü ngba ka-ye ne, ah le ace kina ka-ye la tine de, ka vi-jia. Te di bala, fü ah ayia amala ngü fü wü marajümiya ka-ye, teka de wüh nü

agbü ku, awa nzö Yüwane, akoro di, ato fü jaji wüürse la. ¹¹ Fü ewü anü ade ngürü Yüwane, aza nzönzö, akoro di gbü gada, ato fü jaji wüürse la. Fü jaji wüürse la ayia aza e la, anü di, ato fü ni ye. Dela ta kaje te *Yüwane Mürü Babatiza kpi tete.

¹² Te wü kpara ka Yüwane Mürü Babatiza je ngü la, fü ewü akoro, abi kökö na, anü di, ati. Fü ewü adu anü amala nga ngü la fü Yesu.

Dene ngü te Yesu to zü-e di fü mere bi wü kpara

Marako 6:31-44; Luka 9:10-17; Yüwane 6:1-13

¹³ Te Yesu je, gü ba, wüh mörö *Yüwane Mürü Babatiza eyi ne, fü engu ayia de wü kpara ka-ye, ali gbü *zabu, anü sü ka-wü kpa etangu, gbü sü te köti di tete ma. Amba mere bi wü kpara je eyi, gü ba, wü Yesu nü sü eyi kpala. Fü wü kpara la aci 'buru, ayia afa nga wü Yesu to füh gümba de lö wü. ¹⁴ Te wü Yesu nü koro tete gbü sü la, fü ewü amaka mere bi wü kpara kpala kpah gbe. Fü engu angbü de mere cinga teka ngü ka-ewü. Fü engu akpo da eküwa wü mürü keke, te wü kpara la za ewü koro di ne.

¹⁵ Ah te ekoro etamurago, fü wü *kpara ka Yesu ayia akoro kpakaka na, amala ngü fefe, gü ba, "Mere kpara, ye ceke la ra te eti. Ani ena amere de mere bi wü kpara ne, neh baye? Tala mere ewü de? Ah le ta fü ye amala ngü fü ewü, de wüh nü kpa gbü wü gara köti, agirí e, ase, azü. Angü sü kpakine edere sü, köti tete nda ma." ¹⁶ Fü Yesu alügü ngü fü ewü, gü ba, "Dela neh ene ngü ne? Yi mere e ace wü kpara la, fü ewü ago de. Ah le de yi to zü-e me-yi fü ewü." ¹⁷ Wüh gü ba, "Akoo, mere kpara! Ambata esaka ani sene ngee 'buruve bete si 'basu. Wü e la ena ati de mere bi wü kpara la ati fanü?" ¹⁸ Yesu gü ba, "Yi za wü e la, yi koro di kpaka ra akine." ¹⁹ Te wüh koro de ambata bete si la kpaka Yesu, fü engu amala ngü fü bi wü kpara la, de wüh ngbü kötö, füh wü fu-gü sela. Fü engu ayia aza ambata 'buruve bete wü si 'basu la, aceka kpi kpa tikpi, agbo nga iri Me tekaka. Fü ah akukuru tü wü e la, ato esaka wü kpara ka-ye, de wüh gafa fü wü kpara la. ²⁰ Fü wü kpara 'buru azü e la, asika di, ace dudu. Fü wü kpara ka Yesu ayia aro du wü e la, asi gbü wü kuwu nzükpa de füh ye 'basu.

²¹ Dela ngü ta te Yesu mere, te engu to zü-e di fü mere bi wü kpara. Wü kpara te ewü zü wü e la, wüh ta baka wü komoko kutu 'buruve (5,000). Amba wüh tanga wü jaji de wü wüürse nda-wü de.

Dene ngü ka Yesu, te engu nü nü füh ngu Marako 6:45-56; Yüwane 6:14-21

²² Fütanga zü-e la, fü Yesu amala ngü fü wü *kpara ka-ye, gü ba dene, "Wü li elí gbü *zabu, fü wü anü sü nda-wü kpa engagira nü, kpa etangu. Nda-ni, ni ena ato la kaje fü wü kpara ne feke, de wüh go agba wü. Fü ni adu afa nga wü." Fü wü kpara ka Yesu ayia ali gbü zabu anü sü. ²³ Fü Yesu ato kaje fü mere bí wü kpara la. Fü ewü abaya, teka ago agba wü. Fü engu adu ayia ka-ye sela, anü kpa füh mere rüvü kpikpi ye, teka aku gba fü Me. Fü engu angbü kpala, da eku gba fü Me, zalü koro di gbü bití, ²⁴ o wü kpara kaka di nda-wü eyi nengete kpa etü ngu gbü zabu. Fü wege akpo angbü efe jia ngu kpekpeke, da enzi ewü, elügü kpa sidi. Fü ngu angbü ekada de ewü.

²⁵ Ah te ekoro emözepki, fü Yesu ayia akoro, angbü enü kpaka ewü de lo ye füh ngu. ²⁶ Te wü kpara ka Yesu wu Yesu, te ngbü enü füh ngu kpaka wü de bala, wüh wu, gü ba, ah de Yesu ne, nda-wü de. Fü ngü la ato mere cürü fü ewü afa sü. Fü ewü akpo da eba rere, angü wüh fi nda-wü, gü ba, "Ah ka-ye de kuru kpara te ngbü ekoro kpaka ani! Dela sirimbi!" ²⁷ Fü Yesu ayia kere, amala ngü fü ewü, gü ba, "Yi mere e akpe cürü de. Ah ka-ye de-ra."

²⁸ Te Petero wu, gü ba, ah de Yesu, fü Petero amala ngü fefe, gü ba, "Mere kpara, te ah ngbürü de mü fanü la, de mü mala ngü fere, de ma kó füh ngu, ma nü kpaka mü la." ²⁹ Fü Yesu amala ngü fefe, gü ba, "Wayi, mü koro ekoro." Fü Petero ayia akó gbü *zabu, akpo angbü enü kpaka Yesu füh ngu. ³⁰ Baka te Petero wu wege te ngbü efe kpekpeke, fü ah akpo eri gbü ngu ne, fü cürü ari tete. Fü ah aku gba te iri Yesu, gü ba, "Akooo, mere kpara, mü küwa ra eküwa!" ³¹ Fü Yesu ayia ato kpa ye kere, azoro engu, amala ngü fefe, gü ba, "Apa Petero! Amba mü to maguma mü fere fanü fanü, nda-mü neh la de? Mü le awu wazi ka-ra fi de, neh teka ne?" ³² Fü wü Yesu ake Petero adu ali angbü zabu kpaka wü bu wü. Fü wege la adu anga. ³³ Tekan ngü la, fü wü wü kpara ka Yesu, te ewü di gbü zabu la, akpo angbü egbo nga iri Yesu, gü ba, "Ye zu de Ye Me fanü fanü."

³⁴ Fütanga ngü la, fü wü Yesu ayia akó ngu kpa etangu, akoro gbü gara sü de iri ye Genezaretá. ³⁵ Te wü kpara ka Genezaretá wu, gü ba, ah de Yesu, fü ewü akpo da amala ngangá fü wü kpara gbü sü la 'buru, teka de wüh za wü mürü keke ka-wü, akoro di 'buru kpaka Yesu, de ah küwa

ewü. ³⁶ Fü wü kpara la ayia anda'ba te-wü fü Yesu, de Yesu le fü wü mürü keke, de wüh di emofo bü mö bongo kaka la, teka fü ewü aküwa. Fü Yesu ayia ale ngü la. Te di bala, mene wü kpara, ta te ewü ngbü mofó mö bongo ka Yesu ne, wüh ngbü küwa gbü keke ka-wü la eyi 'buru.

15

Dene ngü te Yesu mala teka gele ka wü Yisarayeale

Marako 7:1-13

¹ Fütanga ngü la, fü wü gara wü *mürü riri de wü *Farusi ayia angbü Yerüsalema, anü akoro kpaka Yesu. Fü ewü ayi-ta Yesu, gü ba, ² "Ah mere neh baye, te wü kpara ka-ye ce da emere riri ka gele ka wü kundu ani ne? Angü ani ngbü ewu ewü, te wüh le azü e la, wüh le adi ezürü kpa wü te nga riri ka gele ka-ani de." Wüh mala bala kükürü de, angü riri ka gele ka wü *Yisarayeale gü ba, te mü le azü e, mü ena azürü kpa mü gbü gara kaje kpikpi ye. Anga te mü ena amere gara ngü, mü ena azürü kpa mü, kpah gbü gara kaje kpikpi ye.

³ Fü Yesu alügü ngü fü ewü, gü ba, "Amba de-yi, yi le aje *Riri ka Me de, neh teka ne? Yi ele nda-yi fi bü adi emere wü riri ka gele ka wü kundu yi? Dela züka ngü?" ⁴ Angü Me to ta Riri eyi fü nih, gü ba dene, 'Ah le fü mü adi ecu ngü wü mü ake ni mü, da eje riri ka-ewü.*' 'Mere kpara te ngbü efala wö ye ake ni ye, ah le de wüh mörö engu amörö asidi.'† ⁵ Amba nda-yi, yi gü ba, te kpara kina te-ye, gü ba dene, 'Ni le ato e fü wö ni ake ni ni tine de, angü ni le ato wü e ka-ni la fü Me takpa tete la,' ngü la ngbü ereke gbü jia yi efa sü. ⁶ Amba te kpara la du ngbü cükü'daye, fü ah adu afü fingangü ka-ye, fü ah ayia akoro kpaka yi, wü mürü riri, agü ba, 'Ni le areke kina ta te ni kina te-ni di ne la,' yi le nda-yi de. Yi gü ba, 'Kpara la mere e ace kina ka-ye la de de de.' Fü kpara la ayia ace wö ye ake ni ye gbü cinga teka ngü ka-yi la. Dela züka ngü? Yi le adi ecu ngü ka riri ka gele ka-yi, afa Riri te Me to ne? ⁷ Yi de wü mürü mani! Fanü fanü, *mürü dofo Yisaya wu mani ka-yi la eyi gügü. Angü Me mala ta ngü la gögömö na, gü ba dene, ⁸ 'Ni le ngü ka wü mürü mani la de. Angü wüh ngbü egbo nga iri ni nda-wü bü de komó wü kükürü, amba maguma ewü le ni nda de. ⁹ Wüh ngbü egbo nga iri ni, da eri wü kpara, gü ba, "Ani ngbü eto Riri ka-ni, Me, fü wü kpara." Amba dela Riri ka-ni nda de. Ah ka-ye de kükürü gele ka

* 15:4 15:4 Mü ena amaka ngü la gbü buku ka Gogo ka wü Yisarayeale 20:12. † 15:4 15:4 Mü ena amaka ngü la gbü buku ka Gogo ka wü Yisarayeale 21:17. ‡ 15:9 15:9 Mü ena amaka ngü la gbü buku ka Yisaya 29:13.

wü kundu wü.[†] Dela ngü ta te Me mala gömō Yisaya teka yi.”

Dene ngü te Yesu mala teka wü ngü te ngbü esiti kpara

Marako 7:14-23

¹⁰ Fütanga ngü la, fü Yesu adu ai bi wü kpara, de te ewü ngbü efa nga ye la, amala ngü fü ewü, gü ba, “Yi da la güje yi, fü yi aje si-ngü te ma le amala fü yi ne mbi mbi mbi. ¹¹ Fingangü ka-yi gü ba, e te ena asiti yi gbü jia Me, ah de e-mazü? A'a, ah bala de. Ngü te ena asiti yi gbü jia Me, ah 'duwa de siti fingangü te yi ngbü efi emagama yi, da emala ne.”

¹² Fütanga ngü la, o wü Yesu du ngbü kpikpi wü de wü kpara ka-ye, fü wü kpara kaka ayia aka te-wü gbamari edede na, amala ngü fefe, gü ba, “Mere kpara, ngü te mü mala la, ah ke te wü *Farusi eyi fa sü. Mü wu bala de?” ¹³ Fü Yesu alügü ngü fü ewü, gü ba, “Yi mere e afi nga ngü ka wü Farusi la baka mere kpeke ngü ne nda-yi de. Angü wüh ka-wü baka siti gü, gbü yi ka Wüba Me. Te di bala, Wüba Me ena agbüürü ewü asidi, angü ah ru ewü me-ye nda de. ¹⁴ Yi ce ewü ace. Wüh ngbü efi, gü ba, ani wu ngü fa sü, amba wüh wu ngü 'buru 'buru nda-wü de. Wüh ka-wü baka kpara, te jijia ni ani, te ele agbeke kiri ye, agü tamu kaje fefe. Te di bala, ngü te ena amere te-ye fü ewü, ah de ne ngü ne? Wüh ena ati ka-wü 'basu mini agbü mere du!”

¹⁵ Te Yesu mala ngü la bala, fü Petero ayi-ta Yesu, gü ba, “Mere kpara, ah le de mü gü tamu si-ngü gbü ngü mani, teka ngü te ena asiti kpara gbü jia Me, te mü mala tine fü wü Farusi ne, fü a.” ¹⁶ Yesu gü ba, “Yi kpah bala? Yi je si-ngü la nda-yi kpah de? ¹⁷ Zü-e te mü ezü, ah ena asiti mü gbü jia Me neh baye baye? Angü zü-e, te mü ngbü ezü ne, ah nü kpa emagama mü nda de. Ah enü ka-ye agbü nza mü, anü sü ka-ye agbü gü. Te di bala, zü-e ti asiti mü gbü jia Me nda de! ¹⁸ Amba ngü te ena asiti mü gbü jia Me, ah de *siti ngü, te mü ngbü efi emagama mü, fü mü adu angbü emala te komó mü. ¹⁹ Angü te kpara ngbü de siti fingangü emagama ye la, wü ngü te engu ena angbü emere ne, ah ena adi kpah 'buru de siti wü ngü. Engu ena amörö kpara. Gara, ah ena amere waza, anga yala. Gara, ah ena azi e ka wü kpara. Gara, ah ena asu wu, amala ambala'ba eküte kpara, de wü soko. ²⁰ Dela 'buru wü siti ngü, te ewü ena asiti mü gbü jia Me. Amba te mü zü e de libiti te kpa mü la, ngü la ti asiti mü gbü jia Me nda de!”

Dene ngü ka egba ganzi kpara, te wu, gü ba, wazi Yesu fa sü

Marako 7:24-30

²¹ Fütanga wü ngü la, fü wü Yesu ayia ace sü la. Fü ewü anü de wü kpara ka-ye agbü wü gara nzö köti, gbü tö ka wü Kanana, te di gbamari ede mere köti ka Tera ake Sidona. ²² Fü gara wüüruse sela akoro, afüwa te-ye kpaka Yesu, agü ba, “Akooo mere kpara, kundu ye *Davidi, te Me tima ye aküwa ani ne, ye ceka la bü cinga te ni ne. Mbarase ka-ni ladü, jaji wüüruse, te *siti wü di engu me ngbü emere engu esiti.” ²³ Yesu, mü lügü ngü fü wüüruse la nda-mü de. Fü wü kpara kaka-na aka te-wü gbamari edede, amala ngü fefe na kpekpeke, gü ba, “Mere kpara, ye mala ngü fü wüüruse la, de ah ce da afa nga ani de rere ka-ye la, angü engu ka-ye de egba *ganzi kpara.” ²⁴ Yesu gü ba, “Wayi, ah ngbüürü bala. Angü Me tima ra fi teka aküwa wü di engu *Yisaraye, de te wüh düürü te kaje ka Me asidi ne. Ah tima ra kpaka wü ganzi kpara nda de.” ²⁵ Amba wüüruse la le ace ngü la nda de. Fü ah aka te-ye akoro, abu nzökuta ye engagira Yesu, afüwa te-ye kpakaka na, gü ba, “Akooo! Mere kpara, mü le ta-ngü te ra baaa!” ²⁶ Fü Yesu alügü ngü fefe gbü mani, gü ba, “Te zü-e ladü la, ah le de wüh to la fü wü jaji feke. Angü te wüh za kümü, te wüh le ato fü wü jaji, asötö fi fü wü büürü la, ah de siti ngü.” Yesu mala ngü la bala, angü wüüruse la ka-ye ganzi kpara fefe. ²⁷ Fü wüüruse la alügü ngü, gü ba, “Wayi, mere kpara, mü mala ngbüürü zu ngü. Amba ma kpah baka büürü, te ngbü ero kporo e, te ngbü egüürü kötö ne.” ²⁸ Fü ngü ka wüüruse la ayia areke te Yesu afa sü. Fü Yesu amala ngü fefe, gü ba, “Ngü de te mü ngbü ele ne, ah ena amere te-ye fü mü baka e te mü le la, angü mü to maguma mü eyi fere fanü.” Kpah bü 'duwa gbü lö-ra engu la, fü yïanga na la ayia aküwa.

Dene e'ba'basu ngü, te Yesu to kpah zü-e di fü mere bi wü kpara

Marako 8:1-10

²⁹ Fütanga ngü la, fü wü Yesu ayia adu ka-wü kpa eküte mere ngu *Galilaya. Fü ewü anü angbü ka-wü kpa gbü gü, kpa etü wü rüvü kpala. ³⁰ Fü mere bi wü kpara ayia aza wü müürü keke ka-wü, akoro di kpaka Yesu. Wü mene ewü te lö ewü di walawala, wü mene ewü te jia ewü di ma, de wü mene ewü te ewü ro mö de, kpah de mere bi wü gara müürü keke. Fü Yesu ayia aküwa ewü 'buru. ³¹ Fü mere bi wü kpara la awu, gü ba, “Wü müürü keke la küwa eyi 'buru. Wü gara ta te ewü ro mö de, wüh du eyi ero mö. Wü kpara ta de lö wü walawala, wüh du eyi enü nü. Wü kpara ta te jia ewü di ma, wüh du eyi eceka kpä.” Fü ngü la aga gbü jia ewü afa sü. Teku ngü la, fü ewü akpo da

egbo nga iri Mere Me, te di de *vüngüte ka wü *Yisaraye ne.

³² Fütanga ngü la, fü Yesu ai wü kpara ka-ye, amala ngü fü ewü, gü ba, "Cinga wü kpara ne ngbü eri te ra efa sü, angü wüh ra eyi sikipi bata dene, zü-e nza esaka ewü eyi. Te ma ce ewü, ago bala la, ah ti de. Wüh ena andiri te kaje ka tala." ³³ Fü wü kpara kaka-na alügü ngü fefe, gü ba, "Ööö, mere kpara, ani ena amaka de mere bi zü-e, te ena ati de mere bi wü kpara baka e la, neh kaye? Te ani di kpakine kpa etü gü, koti kphah ma ne." ³⁴ Fü Yesu adu ayi-ta ewü, gü ba, "Ambata esaka wü sela neh fe?" Wüh gü ba, "Ambata esaka ani ngbee lorozi bete wü jürü si mba 'dongoni. E-di dela e, te ena ati de mere bi wü kpara de bala?"

³⁵ Fü Yesu adu afü te-ye, amala ngü fü mere bi wü kpara la, de wüh ngbü 'buru köto. ³⁶ Fü engu aza wü ambata lorozi de wü jürü si la, agbo nga iri Me tekaka. Fü ah adu akukuru tü wü ambata la, ato esaka wü kpara ka-ye. Fü ewü ayia agafa fü mere bi wü kpara la. ³⁷ Fü mere bi wü kpara la, azü e la, asika di, ati te nga wü kpini, ace dudu. Fü wü *kpara ka Yesu aro du e la, asi gbü wü kuwu lorozi. ³⁸ Wü kpara ta te wüh zü e la, wüh baka wü komoko kutu bala (4,000). Amba wüh tanga wü jaji de wü würüse nda-wü de.

³⁹ Fütanga ngü la, fü Yesu ayia ali gbü *zabu de wü kpara ka-ye, akö ngu, anü sü ka-wü agbü tö ka Magadana.

16

Dene ngü ka wü Farusi de wü Saduke, te ewü le afti Yesu

Marako 8:11-13

¹ Fütanga ngü la, fü gara wü *Farusi ayia de gara wü *Saduke, akoro kpaka Yesu. Amba wüh koro ka-wü nda-wü de mani, egiri nga siti ngü, te Yesu ena adürü gbügbü. Fü ewü ayi-tata, gü ba, "Mere kpara deyí, ye mere la mere lara ngü ka talara fü ani, teka fü ani awu, gü ba, Me tima ye me-ye fanü fanü." ² Yesu, fü mü ayia alügü ngü fü wü kpara la, gü ba, "Yi ceka la, te gbüra kpi ngbü ngila ngila etamurago la, yi ti eyi awu, gü ba, 'Agö ti ali egambi de.' Ah bala de?" ³ Anga kpurutokokpi, te jia kpi esiti la, yi ti kphah eyi awu, gü ba, 'Enatikine, agö ena ali ali.' Te yi ti eyi awu si-ngü teka wü ngü, te ewü ngbü egü tamu wü ngü, de wü lakü füh kotö ne, 'buru areke areke la, ah le ta de yi wu kphah awu, gü ba, Me tima ra me-ye. Yi wu bala de, neh teka ne? Yi de wü mürü kögö-nzö!' ⁴ Yi ka-yi de siti wü kpara! Yi le ngü ka Me nda-yi de! Yi ngbü eyi-ta ra, de ma mere kpeke ngü ka talara gbü jia

ani, teka fü ani awu, gü ba, Me tima ra me-ye fanü. Te di bala, Me ti agü tamu lara ngü biringbö fü yi nda de, teka kögö-nzö ka-yi la! Amba ah ena adi bü mene lara ngü, te ena amere te-ye, kphah baka nda *Yona tane. Angü Me ena aküwa ra gbü kpi, kphah ba e ta te engu küwa Yona guvu mere si ne."

Fü Yesu ayia ace ewü sela, anü sü ka-ye kpa te gara sü.

Dene ngü te Yesu mala teka siti fingangü ka wü Farusi,

*de wü Saduke
Marako 8:13-21*

⁵ Fütanga ngü la, fü wü Yesu ali ka-wü gbü *zabu, akö ngu de wü kpara ka-ye la, kpa etangu. Amba to wü kpara kaka-na la iri ta airi, teka aza ambata fü wü. ⁶ Fü Yesu akpo angbü emala ngü fü ewü de mani, gü ba, "Wü ceka te-wü mbi, teka ngü ka ambata ka wü *Farusi bete nda wü *Saduke, te wüh ngbü emere de *kö gbü ye ne." ⁷ Amba ngü te Yesu mala la, wü kpara kaka je sisi na nda-wü de. Angü fingangü ka-ewü lala ka-ye fi bü teka ngü ka zü-e. Fü ewü akpo da emala ngü esüka wü, gü ba, "Yesu ngbü emala ngü ka kö gbü ambata ne, angü ah wu eyi, gü ba, ambata esaka ani ma?"

⁸ Amba Yesu wu ngü de te ewü ngbü emala esüka wü ne kpo. Tekä ngü la, fü ah afü te-ye, amala ngü fü ewü, gü ba, "De-yi, yi to maguma yi fere de, neh teka ne? Yi fi nda-yi, gü ba, ma ngbü emala ngü ne, teka te ani za ambata de? Fingangü ka-yi la fi bü teka ngü ka zü-e?" ⁹ Wü ngü te ma ngbü mere, te yi wu cu de jia yi ne, ngü la ri gbü nzö yi la fi de? Yi fi la nga ambata 'buruve terane, te ma za, kukuru to fü bi wü kpara kutu 'buruve (5,000) ne. Yi du ro dudu na, biti gbü wü kuwu neh fe? ¹⁰ Anga gara na, te ma za ambata lorozi, ato fü bi wü kpara kutu bala (4,000) ne. Yi du ro biti gbü wü kuwu neh fe? ¹¹ Yi fi nga ngü la nda-yi de, neh teka ne? Ah le de yi wu awu, gü ba, ma ti kphah eyi ato gara zü-e fü yi. Amba ngü ka kö gbü ambata, te ma mala ngangä fü yi ne, yi wu sisi na de, neh teka ne? Yi fi nda-yi, gü ba, 'Ma ngbü emala nga ambata fanü?' Ah bala nda de. Amba ma ngbü emala fü yi, gü ba, 'Yi ceka te-yi mbi, teka siti fingangü ka wü Farusi, de wü Saduke.' "

¹² Te di bala, fü wü *kpara ka Yesu, adu aje tine si-ngü la, gü ba, ngü te Yesu ngbü emala fü ani ne, ah mala ngü la teka mene kö, te wüh ngbü ekü da ambata di ne, nda de. Amba ah ngbü emala ngü la ka-ye, teka siti fingangü ka wü Farusi, de wü Saduke ne.

Dene kpeke ngü te Petero mala teka Yesu

Marako 8:27-30; Luka 9:18-21

¹³ Fütanga wü ngü la, fü wü Yesu ayia anü de wü kpara ka-ye, agbü gara sü, te di ede mere köti de iri ye Kayisariya Filipoyi. Te wüh koro kpala, fü Yesu ayi-ta wü kpara ka-ye, gü ba, "Angü wü kpara ngbü efi tüngü ni, *Ye Kpara ka Kpi, egü neh fe? Wüh ngbü emala, gü ba, ni de neh da?" ¹⁴ Fü ewü alügü ngü fefe, gü ba, "Wü kpara ngbü efi, gü ba, ye de kpeke kpara. Angü wü gara kpara ngbü emala nda-wü, gü ba, ye de *Yüwane Mürü Babatiza, te zükü me-ye gbü kpi. Wü gara gü ba, ye de mürü dofo *Iliya. Wü gara emala nda-wü, gü ba, ye de mürü dofo Yeremaya, anga gara kpara esüka wü *mürü dofo ka Me ta gügü ne."

¹⁵ Fü Yesu adu ayi-ta ewü, gü ba, "Anga cu de-wü, wü ngbü efi nda-wü, gü ba, ni de neh da?" ¹⁶ Simüna Petero, fü mü ayia arü amala ngü fefe, gü ba, "Mü de Mere Miri, te Me tima teka aküwa a ne! Mü de Ye Mere Me!"

¹⁷ Fü Yesu adu afü te-ye, amala ngü fefe, gü ba, "Wayi, Simüna ye *Yona, Me to wazi eyi fü mü, fanü fanü. Angü ngü de te mü mala teka ra ne, mü wu ngü la de tete-mü nda-mü de. Ah ka-ye de Wüba, Me, te di agbü kpi ne, ah sere ngü la fü mü me-ye. ¹⁸ Te di bala, dene ngü te ma le amala fü mü. Enatikine, iri mü ena adi tîne de Petero.* Angü fanü fanü, mü titîne de kpeke kpara baka da. Te di bala, ma ena aji mere kambü ka-ra füh da engu la. Kambü ka-ra la, ah de wü kpara ka-ra, te ewü ena ato maguma wü fere kpah baka mü. Angü ngü ka-ra ena ato wazi fü ewü, fü ewü arü kpekpeke. Te di bala, wazi ka kpi ti afa ewü de, angü ma ena aküwa ewü me-ra. ¹⁹ Te di bala, ma ena ato wazi fü mü, teka fü mü adi emala ngari ra di, fü wü kpara füh kotö ne 'buru. Ah ena adi ba e te ma to mafüta fü mü, te ena aü möngiti ka *küküwa fü wü kpara. Angü mene ngü te mü ena akolo kpa füh kotö kpakine, Me ena ale ngü la kpah bala." Dela ngü te Yesu mala fü Petero.

²⁰ Fütanga ngü la, fü Yesu adu afü te-ye, amala ngü fü wü kpara ka-ye 'buru kpekpeke, gü ba, "Wü mere e amala la nga ni fü wü kpara, gü ba, 'Ni de Miri te Me tima ne,' nda-wü de."

Dene ngü te Yesu mala teka ngü ka kpi ka-ye

Marako 8:31-9:1; Luka 9:22-27

²¹ Ah kpo bü gbü wü sikpi engu la, fü Yesu akpo tîne emala nga ye fü wü kpara

ka-ye mbölö mbölö, gü ba, "Ah le fü ani anü agbü Yerüsalema, angü mere cinga ladü te ena amaka ni kpala. Wü *mere kovo de wü *mürü riri ena ato mere kuru te ni, fü ewü amörö ni asidi. Amba gbü *ebabata sikpi, Me ena azükü ni gbü kpi la."

²² Petero, te mü je ngü la, fü mü aza Yesu, anü di mba edere sü, akpo emala ngü fefe kpekpeke, gü ba, "Ata, mere kpara! Ah ti fü ngü la, amere mü baka e la kpo de!" ²³ Te Yesu je ngü la bala, fü ah afü te-ye, amala ngü fü Petero, gü ba, "Mü ce ra de ngü ka-mü, ka *Satana la. Mü le de ma mere riri ka Me de, neh teka ne? Fingangü ka-mü la, ah de ngü ka Me nda de. Dela ka-ye siti fingangü ka wü kpara de füh kotö ne."

²⁴ Sidi nga ngü la, fü Yesu afü te-ye, amala ngü fü wü kpara ka-ye la 'buru, gü ba, "Te mü ele angbü zu kpara ka-ra la, mü lala fi bü gbü nga ra. Mü mere e afi nga wü e ka-mü 'buru 'dö de. Mü reke te-mü teka kpi ka-mü, baka kpara te ngbü ebi mere rü gbegete, te wüh ena abere engu tete na, amörö. ²⁵ Angü te mü le aküwa te-mü de tete-mü la, mü ti aküwa te-mü nda-mü de. Amba te mü ce te-mü o fü kpi teka ngü ka-ra la, Me ena aküwa mü me-ye. ²⁶ Mü fi la nga kuru mü! Angü, te mü ce ngü ka Me, fü mü adu ato te-mü 'buru teka ngü ka kotö ne, teka adi emaka mere bi jase, de mere bi wü züka e de füh kotö ne 'buru la, wü e la ena aküwa mü fanü? Wüh ti aküwa mü nda-wü de, angü mü ce ngü ka Me eyi! Te di bala, gara e te mü ena ato fü Me, teka afa kuru mü di, ah de neh ene? E nda ma! ²⁷ Mü fi nga *adu sikpi, te gara, te ma ena adu akoro tete na! Angü de-ra, *Ye Kpara ka Kpi, ma ena adu akoro füh kotö ne, de wazi ka Wüba, de wü *malayika kaka mini. Fü ra akolo ngü ka wü kpara 'buru, ato takpa fü ewü, te nga wü ngü te wüh ngbü mere.

²⁸ Ma ngbü emala fü yi dene zu ngü fanü fanü. Wü gara kpara ladü esüka yi sene, wüh ti akpi la de, zalü te wüh ena awu mere wazi te Me to fere, Ye Kpara ka Kpi, te ma ena aküwa wü kpara di ne feke."

Dela ngü ta te Yesu mala fü wü kpara, te ewü le afa nga ye.

17

Dene ngü ka küte Yesu te fü te-ye

Marako 9:2-13; Luka 9:28-36

¹ Sidi nga sikpi ma'diya, fü Yesu ayia aza wü Petero, *Yakobo bete *Yüwane,* anü de ewü kpa enzö mere rüvü. Fü ewü angbü de ewü kpala kpikpi wü. ² Fü küte

* 16:18 16:18 Si-ngü gbü iri Petero gü ba, baka da. *

17:1 17:1 Yüwane de engu ni ye Yakobo.

Yesu akpo da efü te-ye, gbü jia wü kpara ka-ye la. Fü gbügbüra na akpo angbü eci baka ra. Fü bongo kaka-na avi 'duwa kpilili, ba ra-sü la. ³ Wü *kpara ka Yesu de bata ne, te eceka kpi bane de, gbo! te wü kpara 'basu, te ewü koro ngbü ero mö de wü Yesu. Amba wü kpara la, wüh ka-wü de diri wü kpara ka Me ta gügü, wü *Müse ake *Iliya.

⁴ Petero, te mü wu ngü la bala, fü mü ayia nda-mü bü kere, amala ngü fü Yesu, gü ba, "Ako, mere kpara, ah reke ta ngbüürü pe te nih ena angbü ka-nih bü sene, angü sü de sene reke gbü jia ra fa sü. Te di bala, te mü le la, ma ena aji wü gugü bata, nda-mü biringbö, nda Müse biringbö, nda Iliya kpah biringbö."

⁵ Petero bü te emala ngü la bala de, 'duwa fü sangu te vi avi kpilili bane, ayia akoro agba ewü 'buru. Fü ri Me ayia awü gbü sangu la, gü ba, "Dene zu Ye ra, te maguma ra le fa sü. Yi di eje 'duwa riri kaka-na."

⁶ Te wü kpara ka Yesu de bata ne wu ngü la bala, fü cürü ari te ewü afa sü. Fü ewü atü abuka gbüra wü 'buru kötö. ⁷ Fü Yesu ayia akoro kpaka ewü, amofu ewü, gü ba, "Yi kpe cürü de, yi yia eyia tikpi." ⁸ Fü ewü ayia ae gbüra wü tikpi bane, yirri! Wü Müse ake Iliya nda-wü tñe ma, ka-ye bü Yesu kpikpi ye, te rü ede ewü sela!

Dela ngü te wü kpara ka Yesu de bata ne wu wazi Me di eküte Yesu. Fü ewü ayia ace sü la, adu kpa esa gö, kpaka wü bu wü.

⁹ Baka te Yesu yia tete kpa füh rüvü kpala, edu de wü kpara ka-ye de bata ne, kpaka wü bu wü, fü engu amala ngü fü ewü kpekepeke, gü ba, "Yi mere e amala nga ngü la fü wü kpara de, zalü te gara, te Me ena azükü ra, *Ye Kpara ka Kpi, tete gbü kpi." ¹⁰ Fü wü kpara kaka-na de bata ne adu kpah ayi-tata na, gü ba, "Mere kpara, anga wü *mürü riri ngbü emala ngü, gü ba, 'Mürü dofo *Iliya ena adu akoro feke, teka areke kaje fü Miri, de te Me ena atima ne'. Te di bala, ngü la ena adi neh baye?" ¹¹ Fü Yesu alügü ngü fü ewü, gü ba dene, "Wayi, *Ngari Me mala ngbüürü bala fanü, gü ba, Iliya ena akoro feke, teka areke maguma wü kpara." ¹² Ma emala fü yi dene zu ngü. Iliya koro ka-ye ta nda-ye eyi. Amba wü mere *kovo le engu nda-wü de. Fü ewü amere engu esiti, baka te wüh ngbü ele. Teku ngü ka-ra, Ye Kpara ka Kpi, wüh ena ato mere cinga te ra, kpah bala." ¹³ Te di bala, fü wü kpara kaka-na la adu awu teke, gü ba, Yesu ngbü emala nga *Yüwane Mürü Babatiza.

Dene ngü te Yesu küwa gara mbarase

*de siti wü di engu me guvu ye
Marako 9:14-29; Luka 9:37-43*

¹⁴ Te wü Yesu du tete kpa esa gö, fü ewü amaka bi wü kpara kpala, fi bü da eci ngang. Fü gara komoko ayia akoro kpaka Yesu, abu nzökuta ye engangagira, afüwa te-ye fefe, ¹⁵ gü ba, "Ako, mere kpara, mü ceka la bü cinga te mbarase ka-ra ne baaa! *Siti wü di engu me ngbü emere engu esiti, da eto mere cinga tete. Wüh ngbü egbofo engu, egü gbü wa. Wü gara ne, egü gbü ngu. ¹⁶ Ma za ta engu, koro di kpaka wü kpara ka-mü ne, amba wüh ti aküwa engu nda-wü de."

¹⁷ Te Yesu je ngü la bala, fü ah ayia amala ngü fü wü *kpara ka-ye, gü ba, "De-yi, wü kpara ka re ne, amba yi ka-yi neh siti wü kpara bane? Yi le ato maguma yi fere de, neh teka ne? Yi ngbü efi, gü ba, ma ena angbü de wü ani sene teka re neh fe, teka fü yi ato maguma yi fere?" Fü ah adu afü te-ye, amala ngü fü wö ye mbarase la, gü ba, "Ye koro de mbarase la kpakine!"

¹⁸ Fü Yesu adu amala ngü kpekepeke fü siti wü di engu me, te ewü ngbü emere mbarase la, gü ba, "Wü ce engu ace!" Fü wü di engu me la akoro guvu mbarase la, 'duwa bü gbü lö-ra engu la. Fü mbarase la ayia aküwa.

¹⁹ Te wü gara kpara la baya tete, fü wü kpara ka Yesu aka te-wü gbmari edede, ayi-tata na, gü ba dene, "Mere kpara dey, ani ti aliki siti wü di engu me la de, neh teka ne?" ²⁰⁻²¹ Yesu gü ba, "Ngü la mere te-ye kükürü de, angü yi to maguma yi fü Me, mbi mbi la de. Ma ngbü emala fü yi dene zu ngü. Te yi ena ato ta maguma yi mba eyi cükü 'daye fü Me, baka jia ri bongo la, de bane ngü ti afa yi nda de. Yi ti ta kpah bü eyi amala ngü fü mere rüvü ne, gü ba, 'Ye yia sela eyia asidi, de ye nü kpa gbü gara sü la,' de bane, ah ti kpah bü eyi anü."

Dene e'ba'basu ngü te Yesu mala teka kpi ka-ye

Marako 9:30-32; Luka 9:43-45

²² Fütanga ngü la, fü wü Yesu ayia ace sü la, anü akoro gbü nga nzö kötö ka wü *Galilaya. Te wüh koro biti te-wü kpala de mere bi wü kpara te ewü ngbü efa ngang na, fü ah amala ngü fü ewü, gü ba, "Fanü fanü, ah ti ayiri de, wü vügü ka-ra ena azoro ra, *Ye Kpara ka Kpi, fü ewü ato ra fü siti wü kpara. ²³ Fü ewü amörö ra asidi. Amba gbü *ebabata sikipi, Me ena adu azükü ra gbü kpi la." Te wü *kpara ka Yesu je ngü la bala, fü ewü angbü 'buru de mere cinga emaguma ewü afa sü.

Dene ngü ka jiase, teka areke Mere Kambü ka Me agbü Yerüsalema di

²⁴ Ta gbü wü re la, wü *mürü gele ka wü *Yisarayeleye ngbü ta ero jiase esaka wü di enga Yisarayeleye te nga wü re 'buru, teka adi ereke *Mere Kambü ka Me agbü Yerüsalemala di. Gbü gara siki, o Yesu du koro de wü kpara ka-ye agbü Kaparanama, fü wü kpara te ewü ngbü ero jiase la, akoro kpaka Petero, ayi-tata, gü ba, "Mere kpara ka-wü ngbü eto jiase teka areke Mere Kambü ka Me di, ato?" ²⁵ Fü Petero alügü ngü fü ewü, gü ba, "Wayi, ah ngbü eto ato."

Te Petero du tete kpa eköti, 'duwa fü Yesu akpo da emala ngü fefe fi me-ye, gü ba, "Petero deyï, ye ngbü efi nda-ye neh baye? Wü kpara, te ewü ena ase ngürü wü fü wü miri ka kotö ne, neh wü da? Ah de wü jaji ka-ewü, anga ah ena adi de wü kükürü kpara?" ²⁶ Fü Petero alügü ngü fefe, gü ba, "Ah de wü kükürü kpara." Yesu gü ba, "Te ah bala, wü jaji ka miri se ngürü wü nda-wü de." ²⁷ Amba ma le de ngü ka-nih siti gbü jia wü kpara la de. Te di bala, mü za ngüli ka-mü, mü nü agbü ngu, teka agü si. Mene si te mü ena azoro te engä gina la, mü ü gögömö na, mü ena amaka jiase, te ena atü tüngü nih 'basu mini. De mü za jiase engu la, mü du di, mü to fü wü kpara la."

18

Dene yitangü ka wü kpara ka Yesu teka kpara

te ena angbü memere

Marako 9:33-37; Luka 9:46-48

¹ Fütanga ngü la, fü wü *kpara ka Yesu ayia akoro kpakaka na, ayi-tata, gü ba, "Mere kpara, mene kpara te ye ena afe, fü ah angbü memere fütanga ye te gara, te ye ena angbü tete Miri füh kotö ne, neh da?" ² Fü Yesu ayia aza gara mbarase cükü'daye, ao esüka ewü. ³ Fü ah amala ngü fü ewü, gü ba, "Ma ngbü emala fü yi dene zu ngü. Ah le de yi fü fingangü ka-yi, fü yi angbü eo ngü ka-yi kotö, baka nda wü jaji, te ewü o ngü ka-wü memere nda-wü de ne. Angü te ah bala de la, yi ti ari agbü sü ka Me kpo de." ⁴ Te mü le de ngü ka-ni ngbü memere gbü jia Me la, ah ele de mü ngbü esüka wü bu mü baka jaji. Mü mere e ao ngü ka-mü memere de. ⁵ Mene kpara te ena aza mbarase cükü'daye baka engu ne gbü mürü, teka ngü ka-ra la, ah le ka-ye dela cu ra."

Dene ngü te Yesu mala teka ngü ka fiti

Marako 9:42-47; Luka 17:1-2

⁶ Fü Yesu adu amala gara ngü fü wü *kpara ka-ye, gü ba dene, "Ah ena adi de mere siti ngü fü mene kpara, te fiti kpara ka-ra, anga ah de mere kpara, anga

mbarase cükü'daye. Angü te kpara ka-ra la dürü, du ngbü emere *siti ngü la, Me ena ato mere kuru te mene kpara te fiti engu la! Ah reke ta pe, te wüh ena aza mere siti wö, ai gbü ngürü mürü fiti la, fü ewü agü engu di, agbü mere *yi-ngu. Fanü, ah le ta de mürü fiti la kpi kpala, o engu fiti kpara ka-ra la, la de. Angü kuru de te Me ena ato ta fü mürü fiti la, teka fiti kaka la, ah ena afa mene kpi te wüh gü engu di gbü ngu ne ka. ⁷ Me ena ato mere kuru te wü kpara füh kotö ne, teka ngü ka siti ngü ka-ewü, te wüh ngbü emere. Angü füh kotö ne, te nga wü siki 'buru, re-ngü ti alaki de. Amba mene kpara te ngbü efiti wü bu ye, de wüh mere siti ngü ne, Me ena ato mere kuru tete, afa nda wü bu ye, de te engu ngbü efiti ewü la ka.

⁸ Yi di ekpe siti ngü akpe! Te kpa mü, anga lö mü, ngbü efiti mü me-ye, teka de mü mere siti ngü la, ah le de mü wa kpa mü, anga lö mü la, awa, mü gü akötö. Angü, ah ena areke pe te gara e biringbö eküte mü ena akpi me-ye, fü mü aküwa, ka engu te wüh ena aza mü, de küte mü 'buru, agü gbü mere du ka wa. ⁹ Anga te ah de jia mü, te ngbü efiti mü me-ye, teka fü mü atü gbü siti ngü la, ah le de mü gbi jia mü la agbi, mü gü akötö. Angü, ah reke pe, te mü ena aküwa de jia mü ngbee biringbö, ka engu de te wüh ena agü mü, de jia mü 'basu mini, agbü du ka wa."

Dela ngü ta te Yesu mala fü wü kpara ka-ye, teka kuru te Me ena ato fü wü mürü fiti te gara.

Dene mani te Yesu mala teka kambiliki te dürü

Luka 15:3-7

¹⁰ Fü Yesu adu amala gara ngü fü wü kpara ka-ye, gü ba dene, "Yi mere e adi efala wü kükürü kpara de. Angü Wüba, Me, ngbü efi nga ewü kpekepe. Ah le de süka ewü biringbö dürü te kaje kani ne de. Tekä ngü la, fü engu afe gara wü *malayika ka-ye, teka adi eceka kpi fütanga ewü. ¹¹ Angü de-ra, *Ye Kpara ka Kpi, Me tima ra füh kotö ne, agiri wü kpara de bala, teka aküwa ewü.

¹² Yi ngbü efi nda-yi neh baye? Te gara kpara ladü de wü kambiliki esaka ye kama biri (100), fü gara na biringbö esüka ewü ayia adürü la, engu ena amere baye? Ah ena ace engu adürü fi bala? A'a! Ah ena ace du wü kambiliki ka-ye la, gbü sü te ewü ngbü ezü e tete sela. Fü engu ayia anü agiri mene engu biringbö te dürü ne. Ah bala de? ¹³ Ma ngbü emala fü yi dene zu ngü. Te engu nü maka kambiliki ka-ye biringbö, de te dürü ne eyi la, ah ena angbü de mere siti tadu tekaka, afa nda mere bi ewü, de te ewü dürü nda-wü de

ne. ¹⁴ Ah kpah bala teka ngü ka wü kpara, te ewü ngbü edürü te kaje ka Me asidi ne. Angü Wö yi, Me, le de kpara dürü fi ne nda de.”

Dene ngü te Yesu mala teka maboro ngü

¹⁵ Fü Yesu adu amala gara ngü fü wü kpara ka-ye la, gü ba dene, “Te gara enga ni mü gbü ngü ka Me mere *siti ngü fü mü la, ah le de mü nü kpakaka, de yi ro mö teka ngü la ake di, 'basu yi 'basu. Te engu le ngü la eyi, fü ah adu ace siti ngü la, ah de züka ngü, angü süka yi du reke ake di eyi. Kpah bala, engu küwa gbü siti ngü la eyi. ¹⁶ Amba te engu le ace siti ngü ka-ye la de la, de mü za gara kpara ka Me biringbö, anga 'basu, yi nü de ewü kpakaka na. Angü wüh ena ale ta-ngü te mü, arí engu, de ah ce siti ngü la. ¹⁷ Te engu je ri wü kpara la kpah de, de mü mala ngü la fü wü kpara ka Me 'buru, de wüh ye süka ngü kaka. Te engu je ri yi 'buru kpah de la, de yi liki engu esüka yi gbü tima ka Me asidi. Yi du, yi ceka engu baka siti kpara, te le ngü ka Me nda de.

¹⁸ Ma ngbü emala fü yi dene zu ngü. Ma ena ato wazi fü yi, wü kpara ka-ra, teka aye süka ngü ka wü kpara füh kotö ne. Angü ngü te yi ena akolo füh kotö sene, Me ena ale kpah bala.

¹⁹ Dene kpah gara ngü te ma ena amala fü yi. Te wü kpara 'basu esüka yi sene, ngbü de fingangü biringbö, teka ayo e kpaka Me la, Me ena ato e la ato fü ewü, baka te ewü ngbü ele. ²⁰ Te wü kpara 'basu, anga bata, biti te-wü teka amere ngü te iri ra la, ma ena adi kpah ladü esüka ewü.”

Dene ngü te Yesu mala, teka kpara te le ace ngü fü kiri ye de

²¹ Fütanga ngü la, fü Petero ayia aka te-ye gbamari ede Yesu, ayi-tata, gü ba, “Mere kpara, te enga ni ni ngbü fi bü da emere *siti ngü fü ni la, ni ena aboro siti ngü kaka-na, anda nangana, adu neh fe? Ni ena aboro du lorozi?” ²² Fü Yesu alügü ngü fefe, gü ba, “E-mala fü mü, gü ba, ah ena adi du lorozi, neh da? Mü ena adi fi bü eboru wü siti ngü kaka te nga wü sikipi 'buru!”

²³ Fü Yesu adu amala ngü fü wü kpara ka-ye 'buru, gü ba dene, “Ah le de wü kpara te ewü ra fü Me, di eboru siti ngü ka wü bu wü, kpah baka te Me ngbü eboru siti ngü ka-ewü. Angü ngü la ena adi ge baka ngü ka gara miri, ta te i wü kpara ka tima ka-ye, de wüh koro, wüh to jiase te ewü ngbü ero, ebiti ne. ²⁴ Ah te eceka de, wüh koro de gara kpara ka tima kaka, te zü mere bi jiase, de te engu ngbü ro teka mere bi re ne eyi. ²⁵ Kpara engu la ti ato

mba enga jiase bane nda de. Angü engu siti wü jiase la eyi 'buru. Tek a ngü la, fü miri la amala ngü fü mere kpara ka tima ka-ye, agü ba, ‘Te komoko la to jiase ka-ni de, ah le de wü za engu, wü cinzi, de wü jaji ka-ye, de wü wara ye 'buru asidi, na jiase ka-ni la.’ ²⁶ Te kpara ka tima kaka la je ngü la bala, fü ah ayia ati, abu nzökuta ye kötö engangagira, afüwa te-ye kpakaka na, gü ba, ‘Akooo Miri, ye o la züka maguma kpaka ni, de ye ce ngü fü ni. Ni ena alügü na jiase ka-ye la te gara 'buru.’ ²⁷ Te miri je ngü la bala, fü cicinga ayia ari tete, angü ah wu eyi, gü ba, jiase ka-ni la fa ta sü. Kpara la ti te engu ena alügü fü ni kere nda de. Fü engu ace ngü la fefe bala, ato kaje fefe na, de ah ago kpa gba ye.

²⁸ Fü komoko la ayia ale kaje ego kpa gba ye. Fü ah anü amaka te-ye ake gara kiri ye, ta te ewü ngbü emere tima de ewü. Kiri ye na la za ta mba enga jiase esasaka, gü ba, ‘Ni ena alügü kere.’ Fü komoko la ayia ati 'duwa eküte kiri ye la, azoro ngüngürü gö gö gö! amala ngü fefe kpekpeke, gü ba, ‘De-ye deyi, ye lügü jiase ka-ni kere, titine sene!’ ²⁹ Fü kiri ye na la ayia ati eri lölö, afüwa te-ye fefe na, gü ba, ‘Akooo, ye o la mba züka maguma kpaka ni, ni ena alügü jiase ka-ye la baaa!’ ³⁰ Komoko la le nda-ye kpo de. Fü ah ayia aza kiri ye la, anü di, agü agbü ku, zalü te engu ena alügü na jiase ka-ni la 'buru.

³¹ Te wü bu ye na, wü kpara ka tima, wu ngü la bala, fü ewü angbü de mere cinga afa sü. Fü ewü anü amala nga ngü la 'buru fü miri.

³² Te miri la je ngü la bala, fü engu ayia ai kpara ka tima ka-ye la, amala ngü fefe, gü ba, ‘Ah mere baye? Amba ye ka-ye de siti kpara bala? Ye füwa ta te-ye kpaka ni, fü ni ayia ace ngü ka mere jiase ka-ni ne fü ye bü bala. ³³ Ah mere baye, te ye le ace siti ngü ka kiri ye ne, nda-ye de ne?’ ³⁴ Fü maguma miri ayia asiti te kpara ka tima ka-ye la afa sü. Fü ah aza engu, agü agbü ku, de engu ngbü gbü mere cinga kpala, zalü te engu ena alügü na jiase ka-ni la 'buru feke.”

³⁵ Te Yesu mala nga ngü la fü wü kpara ka-ye, nza tete, fü ah adu amala gara ngü fü ewü, gü ba, “Ngü ka Wüba, Me, kpah baka ngü ka miri la. Ah le fü yi aboro ngü fü wü bu yi de züka maguma yi fanü fanü, angü, te yi boro ngü ka wü bu yi de, Me boro siti ngü ka-yi nda kpah de.”

Dela ngü ta te Yesu ri wü kpara ka-ye di, gbü gara nzö köti ka *Galilaya.

19

Dene ngü te Yesu mala, teka mene kpara

te le ace wara ye

Marako 10:1-12

¹ Fütanga ngü te Yesu ri wü kpara la nza tete, fü engu ayia de wü kpara ka-ye gbü *Galilaya sela, anü ka-wü kpa etangu Yürüdena, gbü nga nzö köti ka *Yudaya.

² Fü mere bi wü kpara gbü sü la ayia akoro kpah kpakaka. Fü engu ayia aküwa wü mürü keke esüka ewü.

³ Fü wü gara *Farusi ayia akoro kpaka Yesu, teka are mamaguma. Fü ewü ayi-tata na, gü ba dene, "Gbü fingangü ka-ye, *Riri ka Me, gü neh fe? Kpara ti eyi ace wara ye, teka gara siti ngü te engu mere?" ⁴ Fü Yesu alügü ngü fü wü Farusi la, gü ba, "Yi tanga ngü ta te *Müse ba gbü *Ngari Me ne, ndayi de? Müse ba, gü ba, 'Ta te enga gina, Me mere komoko ake würüse.'" ⁵ Fü Me amala ngü fü ewü, gü ba, "Dela si-ngü te komoko ngbü eyia, ece wö ye ake ni ye, aza wara ye, alala tete na. Fü ewü adu angbü ake di tüne baka kpara biringbö ne." [†] ⁶ Yi wu, gü ba, Me o yi ta eyi me-ye, de yi za te-yi, fü yi akoro baka e biringbö, ne de? Te Me o yi eyi biringbö la, yi mere e aye süka yi tüne de!"

⁷ Fü wü Farusi la adu ayi-ta Yesu, gü ba, "Te ah bala la, anga ngü ta te *Müse ba gbü gara buku, gü ba, 'Te komoko le ace wara ye la, ah le de engu ba köcökpa, ato fü wara ye feke, fü wara ka na ayia ago ka-ye agba wü.'" [‡] Si-ngü gbü ngü la gü neh fe?"

⁸ Fü Yesu alügü ngü fü ewü, gü ba, "Müse ba ta ngü la bala teka ne de, angü nzö wü kundu yi kpekpeke, kpah baka nda-yi! Amba te Me o gina wü kpara tete, ngü la bala nda ma. ⁹ Dene ngü te ma emala fü yi. Te wara mü mere waza nda de, fü mü ayia ace engu, adu aza gara würüse la, mü mere *siti ngü eyi, angü mü mere dela waza."

¹⁰ Fütanga ngü la, fü wü *kpara ka Yesu ayia amala ngü fefe, gü ba, "Apa, mere kpara! Te ngü ka maza würüse tüne eyi cu bala la, ah reke pe, te wü kpara ena angbü ka-wü ta bala, wüh za würüse nda-wü de!" ¹¹ Fü Yesu amala fü ewü, gü ba, "Bi wü kpara ti aje riri la nda-wü de, 'duwa wü kpara de te Me to wazi eyi fü ewü, teka amere ngü la. ¹² Amba ngü te ngbü etiri wü gara kpara, te ewü za würüse di de ne, ah ka-ye kpikpi ye kpikpi ye. Wü gara kpara za würüse de, angü wüh bi ewü kü bala. Wü gara za würüse de, angü wü gara kpara siti ewü me-wü. Amba wü gara kpara le aza würüse de, kü me-wü, teka tima ka Me, de ani di eo to ani 'buru tete. Te wazi mü

ladü teka amere ngü la bala la, de mü mere emere baka nda-ewü la."

Dela ngü te Yesu mala fü wü kpara ka-ye, teka ngü ka komoko ake würüse.

Dene ngü ka Yesu de wü jürü jaji

Marako 10:13-16; Luka 18:15-17

¹³ Fütanga ngü la, fü wü gara kpara aza wü jaji ka-wü, akoro di kpaka Yesu, de engu o kpa ye gbü nzö ewü, aku gba fü Me, teka de Me to wazi fü ewü. Te wü *kpara ka Yesu wü ngü la bala, fü ngü la asiti te ewü. Fü ewü akpo da eliki wü jaji la. ¹⁴ Te Yesu wu ngü la bala, fü ah amala ngü fü wü kpara ka-ye la kpekpeke, gü ba, "Yi ce wü jaji la, de wüh koro kpaka ra. Yi mere e atiri ewü de, angü wü kpara te ewü ena akoro agbü sü ka Me agbü kpä, ah de wü kpara, te ewü fü ngü ka-wü, koro baka nda wü jürü jaji de bala. Angü wü jürü jaji cu ngü wü de, wüh mere mani kpah de." ¹⁵ Fü Yesu abiti wü jaji la, ao kpa ye gbü nzö ewü.

Dela ngü ta te Yesu mere fü wü jürü jaji. Sidi nga ngü la, fü engu ayia anü sü ka-ye agbü gara sü.

Dene ngü te Yesu mala teka wü kpara de mere bi e esaka wü

Marako 10:17-31; Luka 18:18-30

¹⁶ Fütanga ngü la, fü gara jaji komoko, te di de mere bi wü e esaka ye, ayia akoro kpaka Yesu. Fü ah ayi-tata, gü ba, "Mere kpara, ni ena amere ne züka ngü ne, teka fü ni aküwa agbü sü ka Me fi mere badi?"

¹⁷ Fü Yesu alügü ngü fefe, gü ba, "Mü ngbü eyi-ta ra teka züka ngü neh teka ne? Züka kpara biringbö nda ma, 'duwa Me kpikpi ye. Mü wu bala de? Amba te mü le aküwa fi mere badi la, ah le de mü mere wü *Riri ka Me 'buru mbi mbi mbi.'" ¹⁸ Fü komoko la ayi-ta Yesu, gü ba, "Neh mene wü riri deyi?" Yesu gü ba, "Wü riri engu, wüh dene.

'Mü mere e amörö kpara de.

Mü mere e amere waza de.

Mü mere e azi e de.

Mü mere e adi esutu wu te wü bu mü de.

¹⁹ Mü je riri ka wö mü ake ni mü,

de mü le wü bu mü, kpah baka e te mü ngbü ele küte mü.'" [§]

²⁰ Fü ye komoko la alügü ngü fü Yesu, gü ba, "Wayi, mere kpara, gara ngü te ma ena adu amere, ah kpah ladü? Angü wü ngü de te mü tanga ewü la, ma ngbü eyi emere ewü 'buru.'" ²¹ Yesu gü ba, "Te mü ele de ngü ka-ni reke areke gbü jia Me la, mü nü, mü cinzi wü e ka-mü 'buru. Fü mü aza jiase la, ato 'buru fü wü mürü cinga,

* 19:4 19:4 Mü ena amaka ngü la gbü Gina Ngü 1:27.

† 19:5 19:5 Mü ena amaka ngü la gbü Gina Ngü 2:24.

‡ 19:7 19:7 Mü ena amaka ngü la gbü buku ka Manda nga Riri 24:1. § 19:19 19:19 Mü ena amaka ngü la gbü buku ka Gogo ka wü di enga Yisaraye 20:12-16.

de mü du, mü lala gbü nga ra. Angü te mü mere bala, mü ena amaka *kükürü te gara agbü sü ka Me agbü kpî.”

²² Te ye komoko la je ngü la gömö Yesu bala, fü engu ayia ace Yesu, anü sü ka-ye agba ye, de mere cinga emagama ye. Angü engu ta de mere bi wü e esaka ye fa sü.

²³ Tekä ngü la, fü Yesu afü te-ye, amala ngü fü wü kpara ka-ye, gü ba, “Ma ngbü emala fü yi dene zu ngü. Mene wü kpara, te ewü di de mere bi wü e esaka wü ne, ah kpekpeke teka fü ewü ato maguma wü fü Me.” ²⁴ Ma ngbü enda nga ngü ne fü yi, gü ba, ah kpekpeke fü mene wü kpara de mere bi wü e esaka wü, teka fü ewü afü maguma wü, ara fü Me. Angü ah baka ya,* te le arî gbü engä gö sögbé.† Ah ti eyi arî fanü? Ah ti arî nda de! Amba ngü ka mene kpara de mere bi wü e esaka ye, ah kphah bala. Ah ena adi kpekpeke fefe, teka afü maguma ye, ara fü Me.” ²⁵ Te wü *kpara ka Yesu je ngü la bala, fü maguma ewü ayia akolo ka ngü la. Fü ewü akpo da eyi-ta tete-wü, gü ba dene, “Te ngü la tîne bala la, kpara biringbö te ena aküwa neh da?” ²⁶ Fü Yesu aceka ewü, adu amala ngü fü ewü, gü ba dene, “Kpara te ena aküwa te-ye de tete-ye nda ma. Angü ngü la fa wü kpara eyi 'buru. 'Duwa Me te ena aküwa mü me-ye. Angü ngü te ena afa Me nda ma.”

²⁷ Petero, fü mü ayia amala ngü fü Yesu, gü ba dene, “Mere kpara deyî, ye ceka la, ani ce wü e ka-ani eyi 'buru, teka alala gbü nga ye. Te di bala, ngü ka-ani ena adi baye?” ²⁸ Fü Yesu alügü ngü, gü ba, “Wayi, yi ena amaka züka ngü amaka, angü yi lala eyi gbü nga ra. Ma ngbü emala fü yi dene zu ngü. Gbü sîkpî te ma ena angbü te gara baka mere Miri de mere wazi, de-yi, wü kpara ka-ra nzükpa de füh ye 'basu ne, yi ena angbü kphah wü cögbörö kpara ede ra, teka akolo ngü ka nguwa wü di engä *Yisaraye, nzükpa de füh ye 'basu ne.” ²⁹ Kphah bala, te mü ce wü e ka-mü teka ngü ka-ra, Me ena ato mere bi züka ngü fü mü, afa nda-mü te mü ce la. Anga te mü ce neh ene. Te ah de gba mü, wü di engä ni mü, wü wö mü ake ni mü, wü di mü, anga wü yi ka-mü, te mü ce ewü teka ngü ka-ra la, Me ena ato mere bi züka ngü fü mü füh kotö sene, da wü e te mü ce la. Kphah bala, Me ena aküwa mü te gara agbü sü ka-ye agbü kpî, fi mere badi. ³⁰ Amba yi mere e acu ngü yi nda-yi de, angü bi wü kpara, te ewü mere te-wü baka wü cögbörö kpara füh kotö ne, te gara Me ena afü ewü baka kükürü wü kpara. Kphah bala, mene ewü,

de te ewü di ba kükürü wü kpara füh kotö ne, te gara Me ena afü ewü, ao angbe cögbörö wü kpara fü wü bu wü agbü sü ka-ye, agbü kpî.”

Dela ngü te Yesu mala, teka wü kpara de mere bi wü e esaka wü.

20

Dene mani te Yesu mala teka wü kpara te ewü mere tima gbü yi

¹ Fütanga ngü la, fü Yesu adu kphah amala gara mani fü ewü, gü ba, “Gara ngü ladü, te ma ele amala fü yi, teka züka ngü te yi ena amaka kpaka Me. Gara komoko ta ladü, te di de mere yi ka rürü ka-ye. Fü wü rî-rü kaka la ayia andri. Gbü gara sîkpî, fü komoko la ayia kpurutokokpî, anü agîrî wü kpara teka amere tima gbü yi ka-ye la. ² Fü ah amaka wü gara kpara, aro mö de ewü areke areke teka tima la, gü ba, ‘Ni ena ato jiasé fü wü baka kama biri (100), teka tima ka sîkpî biringbö.’ Fü wü kpara la ale. Fü komoko la ayia atima ewü agbü yi ka-ye.

³ Ah te ekoro gbü lö-ra menewa, fü engu adu kphah kpa te kaje. Fü ah awu wü gara kpara, te ewü ngbü ka-wü erürü te kaje bü kükürü bala. ⁴ Fü engu amala ngü fü ewü, gü ba, ‘Wü nü enü amere tima agbü yi ka-ni kpala. Ni ena ato jiasé fü wü areke areke, teka tima la.’ ⁵ Fü wü kpara la ale, ayia anü fütanga wü bu wü.

Sidi nga ewü la, etü ra, fü mürü yi la ayia kphah, anü agîrî gara wü kpara teka tima ka-ye. Fü ah amala ngü fü ewü kphah bala. Fü ah adu kphah anda nga ye gbü lö-ra bata ka tamurago. Fü ah amaka kphah gara wü kpara, atima ewü agbü yi ka-ye la.

⁶ Gbü wü ngü la 'buru, tima kaka agbü yi ne nza nda la fi de. Ah te ena akoro kphah gbü lö-ra 'buruve ka tamurago, fü engu adu kphah anü amaka wü gara kpara, te ewü rü ngbü ka-wü bü kükürü te kaje. Fü komoko la ayi-ta ewü, gü ba, ‘Ah mere baye, te wü ngbü erürü te kaje sene, bü kükürü kükürü gbü ra ne gbuuu, de bane? Wü le amere tima de?’ ⁷ Fü wü kpara la alügü ngü fefe, gü ba, ‘Anga kpara te ena aza ani gbü tima nda kphah ma ne, ani ena amere baye?’ Komoko la gü ba, ‘Ah mbi, te ah bala, wü nü enü sidi nga wü bu wü, amere tima agbü yi ka-ni kpala.’

⁸ Te wü kpara la mere tima tete te nga wü 'buru, koro di etamurago, fü komoko la ayia ai mere kpara ka tima ka-ye, amala ngü fefe, gü ba, ‘Ye nü enü, ye i wü kpara ka tima la biri biri 'buru, de ye to jiasé fü ewü 'buru yoo, na tima te ewü mere la. Ye

* 19:24 19:24 Ya te wüh mala nganga de sene, gbü ngü Giriki, wüh mala ka-wü nga kamele. † 19:24 19:24 Sögbé de libira anga sindani.

kpo de mene wü kpara, te ewü koro sidi ne, akoro te mene ewü, te ewü kpo de tima kü kpurutokokpí ne.'

⁹ Fū wü kpara ta te ewü koro gbü tima, gbü lö-ra 'buruve ka tamurago ne, akoro aza jiasé ka-wü biri biri 'buru, baka kama biri, kama biri, kpah baka e te engu le ato fū mené wü kpara, te ewü koro kü kpurutokokpí ne. ¹⁰ Wü kpara ta te ewü kpo de tima kü kpurutokokpí ne, fū ewü awu wü bu wü, te ewü ngbü emaka jiasé de bala ne, fū ewü angbü de tadu, efi ngü emaguma wü, gü ba, 'Wayi, te ah bala la, ani ena amaka nda-ani jiasé tīne afa sü!' Amba de, wüh ena ato jiasé la fū ewü 'buru kpah bü ngbee kama biri, kama biri, baka nda wü bu wü la.

¹¹ Fū maguma wü kpara, ta te ewü kpo de tima kü kpurutokokpí ne, ayia asiti. Fū ewü akpo da emala ngü eküte mere kpara la, teka jiasé de te wüh to fū ani kpah baka nda wü bu ani, te ewü koro sidi ne.

¹² Fū ewü akoro, awü nga fū müri yī la, gü ba, 'Ye ceka la! Ani ngbü mere tima gbü mere ra ne gbuuu! Ye nü to jiasé fū ani kpah baka nda wü kpara, te ewü koro mba tītīne, mere tima bü teka lö-ra ngbee biringbö, neh teka ne? Nda-ani, ra ngbü curu ani ne bü kükürü bala?' ¹³ Te müri yī la je ngü la bala, fū ah alügü ngü fū ewü, gü ba, 'Wü di engu ni ni, ni fiti wü nda-ni de. Angü wü le tīne me-wü, teka amere tima gbü ra biringbö, teka jiasé kama biri. Ah bala de?' ¹⁴ Ngü la du siti gbü jia wü neh teka ne? Wü za jiasé ka-wü eza, de wü du agba wü. Ni le me-ni ato jiasé fū wü kpara, te ewü koro sidi ne, 'buru bala. ¹⁵ Wü ngbü engbü de kanga, teka te ni di de züka kpara ne? Ni tī amere ngü de jiasé ka-ni, baka ngü te ni ngbü ele ne, de? De bala ne tōndö ngü nel! "

¹⁶ Te Yesu mala mani la nza tete, fū ah adu amala ngü fū wü kpara ka-ye, gü ba, "Si-ngü ka mani la, ah teka ngü ka-yi wü kpara ka-ra. Angü züka ngü te wü kpara ka-ra ena amaka kpaka Me ne, ah de *küküwa fi mere badi, te nga ewü biri biri 'buru. Mene wü kpara te ewü o ngü ka-wü kötö, Me ena adu afü ewü, ao kpa engagira nü. Amba mene wü kpara te wüh ngbü eo ngü ka-wü memere, baka wü angbe cōgbörö wü kpara ne, Me ena adu afü ewü, ao kpa sidi."

Dene ebabata ngü te Yesu mala, teka kpi ka-ye

Marako 10:32-34; Luka 18:31-33

¹⁷ Fütanga ngü la, fū wü Yesu ayia de wü kpara ka-ye, teka anü agbü Yerüsalema. Te wüh ngbü enü tete te kaje kpa etungba kpala, fū engu ayia ace te-ye arü, ai wü *kpara ka-ye nzükpa de füh ye 'basu

ne, esüka bi wü kpara la, anü de ewü cükü'daye edere sü. ¹⁸ Fū ah amala ngü fū ewü, gü ba, "Wü di engu wüna, yi wu eyi, gü ba, nih ngbü enü dene agbü Yerüsalema. Te nih ena akoro kpala, wüh ena azoro ra, *Ye Kpara ka Kpí ne, anü di engagira wü *mere kovo bete wü *mürü riri, te ewü le ngü ka-ra de. Wü mere kovo la ena akolo ngü ka-ra, gü ba, 'Ah le de wüh mörö ra asidi.' ¹⁹ Fū ewü ayia ato ra fū wü *ganzi kpara. Fū wü ganzi kpara la akpo emü ra, da efala ra, kpah da esüma ra de juru. Fū ewü adu abere ra, amörö füh rü gbegete. Amba Me ena adu azükü ra gbü *ebabata sikipi."

Dela ngü ta te Yesu mala fū wü kpara ka-ye, o wüh ngbü enü tete agbü Yerüsalema.

Dene yitangü ka ni ye wü Yakobo ake Yüwane

Marako 10:35-45

²⁰ Fütanga ngü la, fū wara Zebedayo ayia de wü di engu ye 'basu, *Yakobo ake *Yüwane, akoro kpaka Yesu kpiki wü. Fū engu abu nzökuta ye engagira Yesu, anda'ba te-ye fefe. ²¹ Te Yesu wu bala, fū ah ayi-tata, gü ba, "Ye ngbü ele ne ngü ne?" Würüse la gü ba, "Mere kpara, ngü biringbö te ma ele kpaka mü, ah dene. Gbü sikipi te mü ena angbü mere miri tete, ah le de mü za wü jaji ka-ra de 'basu ne, mü o gara gbü kokpa, de gara ngbü nda-ye gbü kamisü ede mü. Fū yi angbü de ewü gbü miri la."

²² Fū Yesu adu amala ngü fū wü Yakobo ake Yüwane, gü ba, "Ngü te yi yi-ta ra di la, yi wu sisi na mbi mbi de. Te yi le amaka wazi baka nda-ra la, ah le de yi zü kpah mere cinga baka nda-ra, de te ma ena azü ne. Yi tī eyi azü mere cinga, baka nda-ra la? Ngü la tī afa yi de?" Fū ewü ale ngü, gü ba, "Wayi, ani le eyi amere ngü la." ²³ Yesu gü ba, "Ah mbi. Yi ena azü mere cinga baka nda-ra fanü fanü. Amba ma tī ao yi baka mere kpara fütanga ra nda-ra de. Ngü la, ah ka-ye de ngü ka Wüba, Me, angü ah reke sü la eyi teka wü kpara ka-ye, te engu fe ewü ne."

²⁴ Fū du wü *kpara ka Yesu nzükpa ne ayia aje ngü la. Fū maguma ewü ayia asiti eküte wü Yakobo ake Yüwane, da efi ngü emaguma wü, gü ba, "Wüh ele ao te-wü ba mere kpara gbü nzö ani?"

²⁵ Te Yesu wu ngü la bala, fū ah adu ai wü kpara ka-ye la 'buru kpaka ye, amala ngü fū ewü, gü ba, "De-yi, yi wu kpah bü kpo, gü ba, wü miri füh kotö ne ngbü engbü gbü nzö wü kpara de mere wazi. Fū ewü angbü emere wü kpara esa lö wü la, ba e te ewü ngbü ele. ²⁶⁻²⁷ Yi le amere kpah bala? Ah bala de. Te mü le angbü ba mere kpara esüka wü bu mü la,

mü fü te-mü ba jaji, te ngbü emere tima fü wü bu ye. ²⁸ Te di bala, ah le de yi fü fingangü ka-yi baka nda-ra. Angü de-ra, *Ye Kpara ka Kpi, ma koro füh kotö ne, neh teka ne? Yi efi nda-yi, gü ba, ma koro ta teka angbü ba mere miri, teka fü wü bu ra angbü emere tima fere? Ah bala nda de. Ma koro teka amere tima fü wü kpara, da ele ta-ngü te ewü. Angü ma ena ato te-ra fü kpi, teka afa wü kpara gbü *siti ngü kawü, fü ewü aküwa."

Dela ngü te Yesu mala fü wü kpara ka-ye, teka mene kpara te ena angbü memere gbü jia Me.

Dene ngü ka Yesu de wü kpara te jia ewü ni ani

Marako 10:46-52; Luka 18:35-43

²⁹ Fütanga ngü la, o wü Yesu ngbü fi bü enü te kaje ka Yerüsalema, fü ewü anü akoro agbü Yeriko. Fü ewü ayia sela de mere bi wü kpara gbü nga wü, teka anü agbü Yerüsalema. ³⁰ Fü ewü anü amaka gara wü komoko 'basu te jia ewü ni eyi ani, te ewü koro ngbü edere kaje. Te wü komoko de 'basu la je ngü, gü ba, "Wü Yesu ngbü enü sü dela me-wü ne," fü ewü ayia akpo da eba rere te iri Yesu, gü ba, "Yesu! Kundu ye Miri *Davidi! Ani wu eyi, gü ba, Me tima ye teka aküwa ani ne! Ye ceka la bü cinga te ani ne baa!"

³¹ Fü wü kpara aci 'buru, amala ngü fü ewü, gü ba dene, "Wü nga anga!" Amba wü kpara de 'basu la le ngü ka-ewü la nda-wü de. Fü ewü angbü fi bü eba rere kpa tikpi, gü ba, "Mere kpara! Miri ka-ani! Ye ceka la bü cinga te ani ne baa!"

³² Te Yesu je ri wü kpara la, fü ah ace te-ye, arü. Fü ah adu ai ewü kpaka ye, ayita ewü, gü ba, "De-wü deyi, wü ele de ni mere fü wü ne ngü ne?" ³³ Wüh gü ba, "Akoo, mere kpara, a le ta de mü ü jia a, teka de a di eceka kpi!" ³⁴ Fü Yesu aceka wü kpara la de mere cinga emaguma ye, fü ah ayia amofu jia ewü. Fü jia ewü ayia aü te-ye 'duwa raaa! Fü ewü atü kpah bü 'duwa gbü nga wü Yesu, angbü enü de ewü.

Dela ngü ta te Yesu ü jia wü kpara de 'basu la tete.

21

Dene ngü ta te Yesu ngbü eri tete agbü Yerüsalema

Marako 11:1-10; Luka 19:29-38; Yüwane 12:12-15

¹ Fütanga ngü la, fü wü Yesu anü baaala, anü akoro ghamari ede Yerüsalema. Fü ewü ale kaje ka Betefage, te fü esa mere

da de iri ye Olive. Fü Yesu ayia atima gara wü kpara ka-ye 'basu kpa engagira nü, ² gü ba, "Wü nü enü agbü köti de kpa engakara wü la. Te wü koro kpala, wü ena amaka yi dongi, te wüh i, o kpala, ake enga ye. Wü furu wü dongi la, de wü za ewü, wü koro di fü ni akine. ³ Amba te gara kpara yi-ta wü, gü ba, 'Wü ngbü efuru wü nü la teka ne la?' de wü lügü ngü fefe, gü ba, 'Mere kpara ka-ani ngbü ele me-ye. Ani ena alügü fü wü enatikine.' Te wü mala bala la, wüh ena ace wü nü la fü wü."

⁴ Ngü la mere te-ye bala kükürü de, angü ngü la ti kpini de ngü ta te *mürü dofo Zakariya, ba gbü *Ngari Me, gü ba, ⁵ "Me mala ngü fü wü kpara ka Yerüsalema," gü ba, 'Wü ceka la! Miri, te ni le atima fü wü ne, ah ena koro kpaka wü, füh enga dongi. Ah ka-ye de züka kpara, de gu maguma ye, te ngbü emere ngü 'buru ferre.'"[†]

⁶ Fü wü *kpara ka Yesu de 'basu la ayia anü amere ngü la, kpah 'buru baka te Yesu mala fü ewü ne. ⁷ Fü ewü afuru dongi la ake enga ye, aza adu di fü Yesu. Fü ewü ayia aza wü bongo ka-wü, agbala, agü füh gü enga dongi la. Fü Yesu adu ali, angbü fefeh. Fü ewü ale kaje angbü enü agbü Yerüsalema.

⁸ Fü mere bi wü kpara akpo da efufuru wü bongo ka-wü, angbü egbala te kaje. Wü gara ngbü nda-wü edoro wü zukpa rü, eo ereke areke te kaje, teka agbo nga iri Yesu di. ⁹ Fü mere bi wü kpara, ta te wüh ngbü enü de wü Yesu ne, angbü 'buru egbo nga iri Yesu. Gara nda-wü kpa engagira nü, wü gara nda-wü kpa sisi, da eba rere de tadu, emi koko, da ebi ci, gü ba, "Nih gbo nga iri Me!

Me to wazi fü mü, angü ah tima mü fü a me-ye!

Mü za wazi ka kundu nih *Davidi!

Mü koro eyi angbü gbü nzö a, baka mere Miri Davidi engu!

Me di de mü!

Nih gbo nga iri Me kpa gbü kpi!"

¹⁰ Te Yesu ngbü eri tete enü agbü Yerüsalema, fü sü angbü eyiki 'duwa ayiki teka wü kpara. Fü wü gara kpara angbü 'buru de mere fingangü, da eyi-ta ngü esüka wü, gü ba, "Apa! Mere kpara te wüh ngbü egbo nganga na de bane, neh da?"

¹¹ Fü mere bi wü kpara, de te ewü ngbü efa nganga na ne, fü ewü angbü elügü ngü fü wü kpara ka Yerüsalema, gü ba, "Ah de Yesu, *mürü dofo ka Me, te koro agbü *Galilaya ne."[‡]

* 21:5 21:5 Gara iri Yerüsalema de Siyona. † 21:5 21:5 Mü ena amaka ngü la gbü buku ka Zakariya 9:9. ‡ 21:11 21:11 Yesu de kpara ka Nazareta, te di gbü tö ka Galilaya.

Dene ngü ta te Yesu liki wü kpara di,

etambasü Mere Kambü ka Me

Marako 11:15-19; Luka 19:45-46

¹² Te wü Yesu du koro tete agbü Yerüsalema, fü ewü anü akoro etambasü *Mere Kambü ka Me. Fü ewü amaka mere bi wü kpara kpala, te wüh ngbü ecinzi wü nü de wü lu,[§] teka fü wü kpara adi ese, eto la'bi tete fü mere Me. Wü gara ngbü nda-wü da ekura jiase. Fü ngü la ayia asiti gbü jia Yesu afa sü. Fü engu ayia aliki ewü 'buru asidi, anzini wü cangali de wü gba'da ka wü kpara la, agbogbofo 'buru kötö. ¹³ Fü ah amala ngü fü ewü kpekepeke, gü ba, "Me mala ta teka Kambü ka-ye, gü neh fe? Me gü ba, 'Kambü ka-ni, ah de sü te wü kpara ena angbü egbo nga iri ni gbügbü.' Yi wu bala de? Amba nda-yi, yi du fü tambasü Kambü ka Me eyi, ba sü ka wü mürü zi!"

¹⁴ Fütanga ngü la, fü wü kpara te jia ewü ni ani, de wü mene te lö ewü di walawala, agbeke te-wü, akoro kpaka Yesu kpa etambasü Mere Kambü ka Me kpala. Fü engu ayia aküwa ewü 'buru.

¹⁵ Te wü mere *kovo, de wü *mürü riri wu wü mere kpeke ngü, te Yesu mere ne, fü ngü la ayia asiti te ewü, angü wü jaji ngbü fi bü da egbo nga Yesu kpa etambasü Mere Kambü ka Me kpala, gü ba, "Gbo nga e ngbü te iri Me! Nih gbo nga iri Yesu, kundu ye Miri *Davidi!" ¹⁶ Fü wü mere kovo la ayi-ta Yesu, gü ba, "Ceka la! Wü jaji ne ngbü egbo nga iri ye, gü ba, ye de Mere Miri, te Me tima teka aküwa ani ne. Ye le atiri ewü de, neh teka ne?" Fü Yesu alügü ngü fü ewü, gü ba, "Ma ti atiri ewü nda-ra de! Angü Me mala eyi, gü ba, 'De-ni Me, ni to wazi eyi fü wü jürü jaji, de wüh di egbo nga iri ni di ereke areke.*' Yi wu bala de?"

¹⁷ Fü Yesu ayia de wü kpara ka-ye, ace wü angbe cögbörö kpara la sela. Etamurago la, fü ewü anü ara ka-wü agbü Betaniya.

Dene ngü te Yesu kina rü figi di

Marako 11:12-14, 20-24

¹⁸ Gügü kpurutokokpi, fü wü Yesu ayia agbü Betaniya, edu kphah agbü Yerüsalema. O wüh ngbü enü tete, fü tala ayia amere Yesu. ¹⁹ Fü engu afü jia ye, awu rü figi. Fü ah afü akoro kpuru esa rü la, de ni maka ta riri na, teka azü ka tala. Amba te engu nü koro kpa esa rü la, riri na nda ma, ka-ye bü kpakpa na kükürü. Fü Yesu ayia akina rü la, gü ba, "Mü ti ari tüne kpo fi de!" Bü gbü lö-ra la, fü rü la ayia akpi.

²⁰ Te wü *kpara ka Yesu wu ngü la bala, fü ngü la aga gbü jia ewü afa sü. Fü ewü ayi-ta Yesu, gü ba, "Dene neh ene ngü ne? Rü la ürü bü kere de bala teka ne?" ²¹ Fü Yesu alügü ngü fü ewü, gü ba, "Ma ngbü emala fü yi dene zu ngü. Te yi ena ato ta maguma yi fü Me fanü fanü, maguma yi ngbü 'basu 'basu de la, de bane Me ena ato wazi fü yi, teka fü yi amere wü mere kpeke ngü di kphah bala. Yi ti ta eyi amala ngü fü mere da la, gü ba dene, 'Ye yia eyia sela, ye nü, ye ti agbü mere ngu.' Ngü la ti ta kphah eyi amere te-ye, ba e te yi mala la. Amba te maguma yi ngbü engbü 'basu 'basu la, yi ti amere ngü bala ne nda-yi de. ²² Te di bala, te mü to maguma mü fü Me fanü fanü la, mene ngü te mü ena ayi-tata kpaka Me, Me ena ato fü mü."

Dela ngü te Yesu mala fü wü kpara ka-ye.

Dene ngü te wü angbe cögbörö kpara ka wü Yisarayeleyi ta Yesu di

Marako 11:27-33; Luka 20:1-8

²³ Fütanga ngü la, fü wü Yesu ayia sela, anü akoro agbü Yerüsalema. Fü Yesu ayia ari kpa etambasü *Mere Kambü ka Me, akpo angbü eri wü kpara. Fü wü angbe cögbörö *kovo ayia akoro kpaka Yesu, ayi-tata, gü ba, "De-ye deyi, ye ngbü emere wü ngü de bala ne, neh gbü wazi ka da? Kpara te tima ye, aliki wü kpara etambasü Mere Kambü ka Me ne, neh da?" ²⁴ Fü Yesu alügü ngü fü ewü, gü ba, "Ni ele kphah ayi-ta wü de ngü biringbö, de wü lügü fü ni feke, fü ni adu amala nga kpara te to wazi fü ni ne, sidi. ²⁵ Yitangü ka-ni la, ah teka *Yüwane Mürü Babatiza. E-tima engu teka ato babatiza fü wü kpara neh da? Ah de Me de? Anga ah mere ngü la de tete-ye?"

Fü ewü akpo da ega yiki esüka wü, gü ba, "Ani ena alügü ngü la fefe, agü neh fe? Angü te ani mala, gü ba, 'Me to wazi fü Yüwane me-ye la,' Yesu ena adu kphah ayi-ta ani, gü ba, 'Te ah bala la, ani le ngü kaka de, neh teka ne?' ²⁶ Amba te ani mala, gü ba, 'Yüwane ngbü mere ngü la de tete-ye' la, ah kphah esiti, angü mere bi wü kpara ne ena afala ani, anga amere ani esiti, angü wüh le ngü ka Yüwane fa sü, gü ba, engu de *mürü dofo ka Me."

²⁷ Te di bala, fü wü angbe cögbörö kpara la alügü ngü fü Yesu, gü ba, "Ani wu kpara te to wazi fü Yüwane ne, nda-ani de." Kphah bala, fü Yesu adu alügü ngü fü ewü, gü ba, "Wayi, ah mbi! Baka te yi le amala nga Yüwane de ne, ma ti amala nga kpara, te to wazi fere ne, fü yi kphah de."

§ 21:12 21:12 Wü lu te ewü ngbü ecinzi la, wüh de wü mö ka köti. * 21:16 21:16 Mü ena amaka ngü la gbü Ci ka wü Davidi 8:2.

Dene mani te Yesu mala teka wü jaji komoko 'basu

²⁸ Fütanga ngü la, fü Yesu adu amala gara ngü fü wü cögbörö kpara la gbü mani, gü ba, "Ah le de ye fi nga ngü ne mbi mbi mbi. Gara komoko ta ladü de wü di ye 'basu. Gbü gara ra, fü engu anü amala fü gina ye ye, gü ba, 'Ye ni deyi, ye nü la mba enatikine ale ta-ngü te ni agbü yi ka-ni ke.' ²⁹⁻³⁰ Fü gina yeye la alügü ngü fefe, gü ba, 'A'a! Ni le nda-ni de!' Te komoko la wu, gü ba, ye ni le anü de ne, fü ah ayia anü kpaka gara ye ye, amala ngü fefe, gü ba, 'Ye ni deyi, ye nü la mba enatikine, ale ta-ngü te ni, agbü yi ka-ni.' Fü yeye la ale ngü la 'duwa ale, gü ba, 'Wayi, wö ni, ni ena anü.' Amba, ah du nü nda de. Sidi nga ngü la, fü gina mbarase la adu afü fingangü ka-ye. Fü ah adu anü, amere tima la."

³¹ Fü Yesu adu ayi-ta wü cögbörö kpara la, gü ba, "Esüka wü jaji de 'basu ne, kpara te mere ngü de te wö ye ngbü ele ne, ah de neh da?" Wüh gü ba, "Ah de gina mbarase." Yesu gü ba, "Wayi, ah ngbü rü bala. Amba dene kpeke ngü te ma le amala fü yi. Ah le de ye wu, gü ba, wü siti wü kpara baka wü kpara de te ewü ngbü ero *jiase fü miri, de wü würüse mü rü waza, te wüh fü maguma wü, ale ngü kara la, wüh ena aküwa me-wü agbü sü ka Me agbü kpi. Amba nda-yi, te ye gü ba, ani de züka wü kpara ka Me me-ani ne, ye ti aküwa nda-yi de, angü yi le ngü kara de. ³² Angü Yüwane koro ta, gü tamu züka kaje ka Me fü yi, gü ba, ah le de ye fü maguma yi, ye le ngü ka Me, amba ye le ngü ka Yüwane la nda-yi de. Amba wü siti kpara le ngü kaka ka-wü ta bü me-wü, fü ewü ayia ace *siti ngü ka-wü, adu ale ngü ka Me. Baka te ye wü siti wü kpara la, te ewü fü maguma wü de bala ne, ye le afü maguma ye nda-yi kphah de."

Dela ngü te Yesu lügü fü wü cögbörö kpara ka wü Yisaraye le la.

Dene mani te Yesu mala teka wü kpara,

te ewü ngbü eceka kpi fütanga rirü
Marako 12:1-12; Luka 20:9-19

³³ Fütanga ngü la, fü Yesu adu kphah amala gara mani fü wü cögbörö kpara la, gü ba, "Yi je la gara ngü te ma le amala fü yi dene. Gara komoko ta ladü, te maka züka sü, fü ah ayia aru mere bi rü *vinü ka-ye gbü sü la. Fü ah adu aji 'baranga ekekere na kerekere gbaa. Fü ah areke kphah sü, teka adi efi rü-rü la gbügbü na. Fü ah aji kphah kambü teka fü wü kpara adi engbü gbügbü, da efete yi la. Fü engü aza wü kpara ka tima, ao kpara, aro mö de ewü areke areke, de wüh di eceka kpi

fütanga yi ka-ni la mbi mbi mbi, angü ni ena anü andoro agbü gara sü nengete.

³⁴ Te kpi rü ka makolo rü-rü la koro tete, fü komoko la ayia atima wü labi ka-ye, kpaka wü kpara ka tima ka-ye la, teka aza rü-rü la fü ye. ³⁵ Fü wü kpara de te ewü ngbü emere tima agbü yi la, ayia azoro wü labi la. Fü ewü amiki gara, amörö gara, asötö gara de teme. Fü ngü la ato mere fingangü fü mü rü rirü la. ³⁶ Tek a ngü la, fü ah ayia atima kphah mere bi wü gara labi ka-ye, afa mene ewü te enga gina ne ka. Fü wü siti kpara la ayia amemere ewü kphah bala. ³⁷ Fütanga ngü la, fü engu adu afi nga ngü, gü ba, "Te ni tima tine ka ye ni kpaka wü kpara la, wüh ena akpe cürü mbarase la akpe." Fü ah ayia atima ye ye la kpaka ewü kpara.

³⁸ Te wü kpara la wu ye mü rü rirü la te ngbü eko ro, fü ewü akpo da emala ngü esüka wü, gü ba, 'Ceka la! Ye mü rü rirü ne te eko ro! Engu ena aza e-nga-kpa wö ye, te gara me-ye. Te di bala, ah le de ani mö rü engu asidi, teka fü yi ka-ewü ne angbü te gara fü ani.' ³⁹ Fü ewü ayia azoro ye mü rü rirü la, anü di agbü gü, amiki engu kpö kpö kpö! amörö ka."

⁴⁰ Fü Yesu adu ayi-ta wü cögbörö kpara la, gü ba, "Gbü fingangü ka-yi, te mü rü rirü la du koro kpaka siti wü kpara la, ah ena amere de ewü neh baye?" ⁴¹ Wüh gü ba, "Ah ena amörö siti wü kpara la 'buru, adu aza wü gara kpara, ao ewü teka adi eceka kpi fütanga wü rirü ka-ye la, teka fü ewü angbü eto rü-rü kaka la fefe gbü kpi rü ka-ye."

⁴² Fü Yesu amala ngü fü wü cögbörö kpara la, gü ba, "Ngü ta te wüh ba gbü *Ngari Me, teka ngü la, gü neh fe? Ngü la gü ba, 'Wü gara kpara ngbü ta eji *Mere Kambü ka Me. Fü ewü amaka gara mere rü, te ewü le nda-wü de. Fü ewü ace rü la asidi. Titine rü ta te ewü ce la, Me du o tine eyi mere kpeke rü de wazi ye, te wü bu ye na ngbü engbü 'buru eküküte. Nih gbo nga iri Me, angü engu mere mere züka ngü eyi fü nih!†' ⁴³ Te di bala, ma ngbü emala fü ye kpekepeke, gü ba, Me ti ale ye ba wü kpara ka-ye tine kpo fi de! Ah ena adu ale ka-ye 'duwa wü *ganzi kpara, te ewü ngbü ele ngü kaka. ⁴⁴ Ma ngbü emala fü ye dene zu ngü, angü te kpara ti füh rü engu la, ah ena akukuru akukuru, coro coro! Kphah bala, te rü la ti füh kpara la, rü la ena akpa'da engu akpa'da."

⁴⁵ Te wü angbe cögbörö wü *kovo la je mani te Yesu mala la, fü ewü awu teke, gü ba, Yesu ngbü emala mani la eküte ani, teka te ani le ngü kaka nda-ani de ne. Fü ngü la ake te ewü afa sü. ⁴⁶ Tek a ngü

† 21:42 21:42 Mü ena amaka ngü la gbü Ci ka wü Davidi 118:22-23.

la, wüh le ta de ani zoro Yesu gbü lö-ra la, amba dada ma, angü wüh ngbü ekpe cürü mere bi wü kpara la. Angü mere bi wü kpara la le ta ngü ka Yesu fa sü, gü ba, engu de *mürü dofo ka Me.

Dela mani te Yesu mala teka wü cögbörö kpara, te ewü le ngü kaka de ne.

22

Dene mani te Yesu mala teka mene wü kpara,

te ewü ena aküwa te gara, gbü sü ka Me Luka 14:15-24

¹ Fütanga ngü la, fü Yesu adu kpah amala gara ngü fü wü kpara la gbü mani, gü ba, ² "Ma le asere la fü yi, kaje te Me ngbü ele, de wü kpara 'buru koro tete wü kpara ka-ni. Kaje la, ah baka e dene. Gara miri ta ladü, te reke mere karama teka ye ye, te ele aza würüse. Fü miri la atima ngü fü mere bi wü kpara, teka de wüh koro, wüh zü karama la. ³ Te sikipi ka karama la ti tete, fü miri la ayia atima wü kpara ka tima ka-ye, de wüh nü, wüh i wü kpara, de te ni tima ngü fü ewü terane ne, gü ba, 'Titine sikipi ka karama ti eyi. Wüh koro ekoro 'buru enatikine, azü e.' Amba wü kpara, de te wüh i ewü ne, wüh le akoro nda-wü de.

⁴ Fü engu adu kpah atima wü gara kpara ka tima ka-ye, gü ba, 'Wü nü, wü mala ngü fü wü kpara, de te ni i ewü ne, kpekpeke, gü ba, "Titine ni mörö mere bi wü yiti kani eyi. Wüh zi wü e la kpah eyi 'buru, ce o nzo. Ah le de wü koro kere, teka azü wü e la, angü wü e la ena asiti!"

⁵ Amba wü kpara la, yi fi ngü teka karama la nda-yi de! Fü yi ayia anü ka-yi, teka amere wü ngü ka-yi, ba e te yi ngbü ele. Fü gara anü ka-ye, amere tima agbü yi ka-ye. Fü gara anü nda-ye, ase wü e ka-ye. ⁶ Fü wü gara azoro wü kpara ka tima ka miri la, amemere lara ewü, adu amömörö ewü 'buru.

⁷ Fü ngü la ayia ake te miri la afa sü. Fü engu ayia atima wü marajümiya ka-ye, amömörö wü kpara la, acuru köti ka-ewü 'buru asidi.

⁸ Fütanga ngü la, fü engu adu amala ngü fü wü kpara ka tima ka-ye, gü ba, 'Titine, wüh reke wü e teka karama ne 'buru eyi nzo. Amba wü kpara, ta te ni i ewü teka azü karama ne, wüh le akoro nda-wü de. Te di bala, ni ena amere ngü wü e kani ne, neh baye? ⁹ Te ah bala, de wü nü te enga wü köti biri biri 'buru, de wü giri bü mene wü kpara te wü ena amaka, wü i ewü, de wüh koro, wüh zü wü e ne.' ¹⁰ Fü wü kpara ka tima la ayia abaya te enga wü köti. Fü ewü ayia abiti wü kpara te ewü maka ne, wü siti wü kpara, abe kpah

te wü züka wü kpara mini. Fü wü kpara asi gbü kambü, de te wüh ngbü ezü e ka karama gbügbü na ne, 'duwa gbe!

¹¹ Fü miri la ayia arı kpa esambü, teka aceka wü ngba ka-ye ne. Fü jijia ayia atı eküte gara kpara biringbö, te to züka bongo te-ye nda de. ¹² Fü engu ai kpara la, amala fefe, gü ba, 'Awuba ni deyi, ah mere baye, te ye le ato züka bongo, te ni to fü ye ne, nda-ye de ne?' Fü jia kpara la ayia avi. Dada te engu ena alügü ngü nda ma. ¹³ Fü miri la amala ngü fü wü kpara ka tima ka-ye, gü ba, 'Wü zoro engu, de wü i lölö na, de wü kpa kpa na 'buru. Wü za engu, wü gü gbü mbiri sü kpa etanü kpala, de ah ngbü, ah ku gba da enyüma gbü te-ye kpala."

¹⁴ Tekan ngü la, fü Yesu adu kpah amala ngü fü wü kpara la, gü ba, "Me ngbü ei wü kpara 'buru de wüh küwa, amba wü kpara te ewü ena akoro kpa kpa Me, wüh ena adi biri biri. Wüh ena adi 'duwa mene wü kpara, te ewü ena afü maguma wü, ale ngü ka Me de maguma wü biringbö."

Dene ngü ta te wüh yi-ta Yesu di, teka mase ngürü

Marako 12:13-17; Luka 20:20-26

¹⁵ Fütanga ngü la, fü wü *Farusi ayia abiti te-wü, angbü efi ngü, gü ba, "Ani ena afti Yesu, de engu mala siti ngü, teka fü ani azoro engu tete, neh baye baye?" ¹⁶ Fü ewü atima wü gara kpara ka-wü, bete wü gara kovo ka Miri Anıtıpa *Erode, kpa kpa Yesu.

Fü ewü akoro amaka Yesu, amala ngü fefe na, gü ba, "Mere kpara, ani wu eyi, gü ba, ye de kpeke kpara, te ye ngbü emala zu ngü ka Me fü ani fanü fanü. Angü ye kpe cürü wü kpara nda-ye 'buru 'dö de, ye ngbü ele ka-ye 'duwa ngü ka Me. ¹⁷ Te di bala, gara ngü ladü te ani le ayi-ta ye di. Ah ti atı fü ani angbü fi bü da ese ngürü ani fü *Kayısara, miri ka wü *Rüma, te ngbü gbü nzo ani ne? Anga ah ti de? *Riri ka Müse gü neh fe?"

¹⁸ Amba Yesu, mü wu fingangü ka-ewü la nda-mü eyi kpo. Fü mü ayia amala fü ewü, gü ba, "Wü de wü mürü mani! Wü le afti ni bala neh teka ne? ¹⁹ Wü za la biri jiase sela, wü sere fü ani." Fü ewü aza gara jiase biringbö, ato fefe. ²⁰ Fü Yesu adu ayi-ta ewü, gü ba, "Kuru kpara, bete iri kpara, de eküte jiase ne, ah de nda da?" ²¹ Fü ewü alügü ngü fü Yesu, gü ba, "Ah de kuru Miri Kayısara." Yesu gü ba, "Wayi, ah mbi! Te ah de kuru miri la, de yi lügü e ka miri fü miri. De yi lügü nda Me kpah fü Me."

²² Te wü mürü mani la je ngü, de te Yesu lügü fü ewü de bala ne, fü ewü ayia anga.

Fü ewü ayia ace Yesu de wü kpara ka-ye sela, anü sü ka-wü.

Dene ngü ta te wüh yi-ta Yesu di,

teka züzükü gbü kpi

Marako 12:18-27; Luka 20:27-40

²³ Wü gara wü kpara ta ladü esüka wü di enga *Yisaraye, te wüh ngbü ei ewü, gü ba, wü *Saduke. Wü kpara la, wüh ngbü efi nda-wü, gü ba, te kpara kpi eyi la, ah kpi eyi fi badi, ah du azükü gbü kpi la nda tñe de.

Gbü sikipi la, fü wü gara Saduke la ayia akoro kpaka Yesu, ayi-tata gbü mani, gü ba dene, ²⁴ "Mere kpara, gara ngü ladü te ani le ayi-ta ye di. *Müse ba ta ngü fü ani gbü *Riri ka Me, gü ba, 'Te kpara kpi, ce wara ye, o wüh bi ye ake di la de la, ah le de enga ni ye na za würüse gbü ngangana la, teka abi ye dada na, angü iiri ena adürü.'" ²⁵ Amba, te wü kpara ena azükü gbü kpi azükü fanü fanü la, ngü la ena adi baye? Angü gara wü komoko ta ladü, wüh guvu ni wü lorozi. Fü gigena aza würüse, fü ah akpi ace würüse la, o wüh bi ye ake di la de. Fü gara enga ni ye na ayia aza würüse la. ²⁶ Fü ah ayia kpah akpi, o wüh bi ye la de. Fü ebabata enga ni ye na ayia aza würüse la. Fü ngü la amere te-ye bala, te nga ewü lorozi la 'buru, wüh bi ye te würüse la nda-wü de. ²⁷ Fü würüse la adu akpi nda-ye tñe sidi nga ewü 'buru. ²⁸ Te wü kpara ena azükü azükü gbü kpi fanü la, würüse la ena adi neh wara da? Kükürü de, angü wü kpara de lorozi la 'buru, za ta würüse la eyi wara ewü tete!"

²⁹ Fü Yesu adu amala ngü fü wü Saduke la, gü ba, "Yi fi nda-yi, gü ba, Me ti azükü wü kpara gbü kpi nda de? Yi dürü bala, neh teka ne? Yi le aje si-ngü gbü *Ngari Me de, neh teka ne? Yi le awu wazi ka Me kpah de, neh teka ne?" ³⁰ Gbü sikipi te Me ena azükü wü kpara tete gbü kpi, ngü ka za-te ena adi nda ma. Angü, te Me zükü wü kpara eyi gbü kpi la, Me ena adu afü ewü baka wü *malayika ka-ye, fü ewü angbü fi mere badi agbü kpi.

³¹ Amba, Me mala gbü *Ngari ye, teka ngü ka züzükü ka wü kpara gbü kpi, gü neh fe? ³² Me mala ta ngü fü *Müse, gü ba, 'De-ni Me, ni de *vüngüte ka *Abarayama, ake *Yisaka bete *Yakobo.'† Amba gbü ra ta te Me mala ngü la tete, o wü Abarayama kpi ka-wü eyi gügü. Fingangü ka-yi gü ba, Me ena amala ngü teka wü kövö, gü ba, 'Wüh de wü vüngüte ka-ni?' Ah bala de.

Me mala ngü la, angü wü Abarayama ka-wü eyi ladü ezükü, agbü sü ka Me fi mere badi."

³³ Dela ngü ta te Yesu mala fü wü Saduke, gü ba, Me ena azükü wü kpara ka-ye, fü ewü angbü fi mere badi agbü sü ka-ye agbü kpi kpala. Ta te mere bi wü kpara gbü sü la je ngü la bala, fü ngü la aga gbü jia ewü 'buru afa sü, angü Yesu za ngü gömö wü Saduke eyi.

Dene ngü te Yesu mala teka kpeke Riri ka Me

Marako 12:28-34

³⁴ Te wü *Farusi wu, gü ba, Yesu za ngü gömö wü *Saduke eyi ne, fü ewü aci akoro kpaka Yesu. ³⁵ Fü gara mere kpara esüka ewü, te di de *mürü riri, adu afi nga gara yitangü, teka are maguma Yesu di. Fü Farusi la ayi-ta Yesu, gü ba, ³⁶ "Mere kpara deyi, nda-ni yitangü kpah ladü. Esüka wü *Riri ka Me 'buru, kpeke riri, te fa wü bu ye 'buru, neh engu deyi?" ³⁷ Yesu gü ba, "Kpeke riri te Me to fü ani, gü ba dene, 'Mü le Mere Me de maguma mü 'buru. Mü o fingangü ka-mü kpah 'buru eküküte.

Mü to te-mü kpah 'buru fefe.'‡

³⁸ Dela kpeke Riri te Me to fü ani, te fa wü bu ye 'buru. ³⁹ Gara Riri engu na, gü ba dene, 'Mü le wü bu mü kpah baka e te mü ngbü ele küte mü.'§ Dela gina wü kpeke Riri ta te Me to fü ani. ⁴⁰ Wü ngü de 'basu la biti wü si-ngü ta te *Müse, de wü gara wü *mürü dofo ka Me, ba gbü *Ngari Me ne eyi 'buru, gbü ewü."

Dela ngü ta te Yesu mala fü wü Farusi, teka kpeke Riri ka Me.

Dene ngü ta te Yesu mala, teka Kurisito te Me ena atima füh kotö ne

Marako 12:35-37; Luka 20:41-44

⁴¹ O wü *Farusi ngbü 'buru tete ede Yesu, fü Yesu adu ayi-ta ewü, gü ba, ⁴² "Yi ngbü eo jia yi da eci nga *Kurisito, Miri te Me ena atima teka aküwa yi ne. Ah mbi. Fingangü ka-ye gü ba, wüh ena abi engu neh gbü nguwa da?" Wüh gü ba, "Miri la ena adi kundu kundu ye *Mere Miri Davidi, te ena angbü gbü nzö ani kpah baka Davidi." ⁴³ Yesu gü ba, "Miri la ena adi baka Davidi fanü? Angü Davidi ba ta ngü cu me-ye, gbü wazi ka *Nzila Wazi Me, gü ba dene,

⁴⁴ 'Me mala ngü fü Miri ka-ni, gü ba dene, 'Ye ngbü gbü kokpa ka-ni sene!

Angü ni fe ye, o eyi Mere Miri!

* 22:24 22:24 Mü ena amaka ngü la gbü buku ka Manda nga Riri 25:5-6. † 22:32 22:32 Mü ena amaka ngü la gbü buku ka Gogo ka wü Yisaraye 3:6, 15. ‡ 22:37 22:37 Mü ena amaka ngü la gbü buku ka Manda nga Riri 6:5.

§ 22:39 22:39 Mü ena amaka ngü la gbü buku ka Riri ka Gele ka wü Levi 19:18.

Te di bala, ye ena angbü gbü nzö wü kpara 'buru!

Angü ni ena ao wü vügü ka-ye 'buru esa lö ye!" *⁴⁵

⁴⁵ Te Davidi mala, gü ba, 'Engu de Miri ka-ni la,' te di bala, wawazi na fa nda Davidi de? Ma ngbü emala fü yi, gü ba, ngü kaka ena afa nda Davidi ka!"

⁴⁶ Dela ngü ta te Yesu mala, teka Mere Miri, te Me ena atima teka akuwa wü kpara. Fü koma wü *Farusi la agu 'buru agu, wüh du mala gara ngü tüne de. Fütanga ngü la, gara kpara te du le aga yiki ake di nda tüne ma.

23

Dene ngü te Yesu mala, teka wü mürü riri

Marako 12:38-39; Luka 11:46-51; 13:34-35; 20:45-47

¹ Fütanga ngü la, fü Yesu arü amala ngü fü wü kpara ka-ye, de mere bi wü kpara la 'buru, ²⁻³ gü ba, "Mene wü *Farusi, te ewü gü ba, ani de wü *mürü riri ne, wüh ngbü nda-wü bü eri wü kpara de *Riri te Me to fü Müse ne, kükürü kükürü bala. Wüh wu Riri di bü kpo, amba wüh mere wü ngü, te ewü ngbü eri yi di la, nda-wü de. Te di bala, ah le fü yi adi eje wü ngü, te ewü ngbü eri yi di la, fü yi angbü emere ereke areke. Amba yi mere e angbü emere mani baka nda-wü la de. Angü wüh ngbü emala fü yi, de yi di emere Riri ka Me, amba nda-wü, wüh le adi emere Riri ka Me de maguma wü 'buru nda-wü de. ⁴ Wüh ngbü eza wü gara mere bi riri ka-wü, eo kpekepeke füh Riri ka Me, baka mere tiri e, te ewü ngbü eo gbü nzö wü kpara. Amba cu de-ewü bane, wüh mere Riri engu la nda-wü de!

⁵ Wü mürü riri la, wüh ngbü emere mere bi wü riri ka gele ka-wü la, teka de wü kpara wu ani baka züka wü kpara ka Me. Teka ngü la, fü ewü angbü eba wü *Ngar Me eküte wü e, angbü ei eraku wü, wü gara gbü wü kpa wü. Fü ewü angbü fi bü eto bongo, te wüh ngbü emere tima ka Me di ne, eküte wü, teka fü wü kpara adi eceka ani ba wü züka kpara ka Me. ⁶ Kpah bala, wüh ngbü ele, de wü kpara 'buru di ecu ngü ani. Teka ngü la, te ewü koro gbü sü ka karama, anga te ewü ri kpa *esambü ka biti-te la, wüh le 'duwa adi angbü füh züka kpökpö, kpa engagira nü. ⁷ Kpah bala, te ewü maka te-wü de wü kpara te kaje la, wüh le de wüh di egü

mandi fü ani, da ecu ngü ani acu, kpah da ei ani, 'Mere kpara.'

⁸⁻¹⁰ Amba de-yi, wü kpara ka-ra, yi mere e ao te-yi, de wü kpara di ecu ngü yi ne de. Yi mere e ale de wüh di ei yi, mere kpara ne, kpah de, angü ma de mere kpara ka-yi 'duwa me-ra. Te di bala, yi 'buru de wü di engu ni. Kpah bala, yi cu 'duwa ngü Me. Yi mere e acu ngü wü kpara füh kotö sene, ao ewü memere baka Wö yi, Me ne, kpah de. Angü Me, te di agbü kpi ne, de Wö yi 'duwa me-ye kpikpi ye. ¹¹ Te mü le angbü mere kpara esüka wü bu mü la, ah le de mü fü te-mü baka labi, te ngbü emere tima fü wü bu ye. ¹² Te mü le ao te-mü memere la, Me ena adu ao mü baka labi. Amba te mü o te-mü baka labi la, Me ena adu ao mü mere kpara me-ye."

¹³ Fü Yesu adu afü te-ye, akpo da emala ngü fü wü *mürü riri la, gü ba, "De-yi wü Farusi, te yi gü ba, ani de wü *mürü riri ne, Me ena ato mere kuru te yi te gara, angü yi de wü mürü mani. Yi gü ba, ani de züka wü kpara ka Me me-ani, amba yi le to ngari Me, de te ma ngbü emala ne, nda-yi de. Gara *siti ngü ka-yi te fa sü, angü yi ngbü kpah etiri kaje fü wü gara kpara, de wüh mere e, ale to ngü ka Me la kpah de. Te di bala, yi de wü mürü mani!

¹⁴ De-yi wü mürü riri, Me ena ato mere kuru te yi te gara, angü yi de wü mürü mani. Yi ngbü ezi e ka wü würüse wökö gbü mani, ece ewü, eo gbü cinga. Yi ngbü kpah eyi-ta Me, teka mere bi lö-ra, de wü kpara di ecu ngü ani, kpah teka fü ewü adi eceka ani ba kpeke wü kpara. Te di bala, yi ena amaka mere siti kuru te gara afa sü!"

¹⁵ De-yi wü mürü riri, Me ena ato mere kuru te yi te gara, angü yi de wü mürü mani. Yi ngbü endoro gbü wü sü füh kotö ne 'buru, teka agiri kpara te yi ena afü, de ah le ngü ka-ani la, gü ba, ah de zu ngü ka Me. Amba te kpara la du le ngü ka-yi eyi la, fü yi adu angbü eri engu, de mere bi wü siti ngü ka-yi, te yi ngbü emere ne. Te di bala, Me ena adu ato mere siti kuru te yi afa sü, angü yi ri engu de siti ngü ka-yi la me-yi!

¹⁶⁻¹⁹ De-yi wü mürü riri, Me ena ato mere kuru te yi te gara. Angü yi ngbü eri wü kpara de ngü ka Me de mani, amba ngü de te yi ngbü eri ewü di la, ah de ngü ka Me nda de. Yi ngbü emala, gü ba, 'Te kpara kina te-ye te iri *Mere Kambü ka Me la, kina kaka la, ti amere engu esiti de.† Kpah bala, te kpara kina te-ye

* **22:44** 22:44 Mü ena amaka ngü la gbü buku ka Ci ka wü Davidi 110:1.

* **23:14** 23:14 Veresi 14 ne, gbü wü gara buku, wüh ba nda-wü de. † **23:16-19** 23:16-19 Yesu mala kpah gara ngü, gü ba, "Wü mürü riri ngbü emala ngü, gü ba, 'Amba te kpara kina te-ye te iri diki-se, de te ewü o kpa esambü ka Me la, ah mere e ace ngü la de, angü kina kaka la ena amere engu esiti.' "

te iri *cangali, te wüh ngbü ecuru la'bi fefeh fü Me ne la, kina la mere engu esiti kphah de.[‡] De bala ne tondö ngü ne? Te kpara kina te-ye bala, fü ah adu ace kina ka-ye la, Me ena ato kuru tete ato! Angü wü e la 'buru de kpeke e gbü jia Me. Te ah de Kambü ka Me, bete *diki-se de gbügbü la, anga cangali, te wüh ngbü eto la'bi fü Me fefeh, bete la'bi la, wüh 'buru de kpeke ngü gbü jia Me. ²⁰⁻²¹ Te di bala, te mü kina te-mü te iri Kambü ka Me la, mü ngbü dela ekina te-mü kphah te iri Me. Kphah bala, te mü kina te-mü te iri cangali, te wüh ngbü eto takpa fefeh fü Me ne la, mü ngbü dela kphah ekina te-mü te iri Me. ²² Te mü ngbü ekina te-mü te iri kpi la, mü ngbü dela kphah ekina te-mü te iri Me, angü kpi de kpökpö ka Me.

²³ De-yi wü *mürü riri, Me ena ato mere kuru te yi te gara, angü yi de wü mürü mani. Angü yi ngbü eo fingangü ka-yi kpekepe teka riri ka gele ka-yi. Baka te yi ngbü eto tari wü e ka-yi 'buru fü Mere Me ereke areke ne, ah esiti de. Amba yi le ato maguma yi fü Me de, teka ne? Yi le ale ta-ngü te wü mürü cinga kphah de. Kphah bala, yi ngbü ekolo ngü ka wü kpara de mani. Yi ngbü emere ngü bala, teka ne? Dela ngü te siti gbü jia Me fa sü. ²⁴ Yi gü ba, 'Ani ngbü erü wü bu ani,' amba yi wu ngü 'buru 'buru de! Yi ngbü eo fingangü ka-yi mba teka enga ngü cükü'daye, fü yi adu ace memere na ne ka. Yi ngbü baka kpara te gü jia ye bü te enga bükümü cükü'daye gbü ngu te engu le anzö, fü ah ayia aza bükümü asidi. Amba mere siti nzeke ladü gbü ngu la. Fü kpara la adu aza nzeke la, anzö, ami aguvu ye!

²⁵ De-yi wü mürü riri, Me ena ato mere kuru te yi te gara, angü yi de wü mürü mani. Angü maguma yi baka ndü'ba anga sila, de te yi ngbü ezürü bü küküte ereke areke ne, amba yi zürü gbügbü na nda-yi de. Siti fingangü, de ngü ka zi, bete gümü e sibi emagama yi fa sü! ²⁶ De-mü, te mü gü ba, ni de *Farusi ne, jia mü ni eyi ani! Ah le fü mü areke maguma mü, teka de wü kpara 'buru wu mü, gü ba, mü zu de kpara ka Me fanü.

²⁷ De-yi wü mürü riri, Me ena ato mere kuru te yi te gara, angü yi de wü mürü mani. Yi baka wü mbükü te wüh fa de ründü reke areke, amba kpa gbügbü kpala, bü wü biki kpara, te zi eyi azi, te sese ngbü efu afu. ²⁸ Ah teka ngü ka-yi kphah bala. Wü kpara ngbü eceka yi baka züka wü kpara nda-wü bü kükürü, amba

kpa emagama yi, wü mani de wü *siti ngü sibi fa sü!

²⁹ De-yi wü mürü riri, Me ena ato mere kuru te yi te gara, angü yi de wü mürü mani. Yi ngbü esu wu te-yi, da ereke mbükü wü *mürü dofo ka Me ta gügü ne, gü ba, ani ngbü dela ecu ngü ewü. ³⁰ Amba wü kundu yi ngbü mömörö wü mürü dofo la me-wü! Yi ngbü esu wu, gü ba, 'Te ani ena adi ta ladü gbü wü re ka wü kundu ani de kpala la, de bane ani ti ale ngü ka-ewü, te ewü ngbü mömörö wü mürü dofo la, nda-ani de.' ³¹ Amba ngü ka-yi de te yi ngbü emere la, ah kphah baka nda wü kundu yi, angü yi le amörö ra, kphah baka te wü kundu yi mörö wü mürü dofo la. Tekka ne de, angü yi le aje ngü ka-ra, te ma ngbü erü yi di ne, nda-yi kphah de. ³² Ngü ma! Ah le de yi mere siti ngü la emere bala eküte ra, angü maguma yi ngbü fi bü enzu, baka nda wü kundu yi!

³³ Yi de siti wü kpara baka wü kpürü! Yi ngbü fi bü da emömörö wü kpara! Yi ena aküwa neh baye baye? Te di bala, Me ena ato mere siti kuru te yi, te gara. ³⁴ Amba fanü fanü, Me le ta eyi fü yi aküwa. Te di bala, fü Me amala, gü ba, ni ena atima wü mürü dofo kpaka yi, kphah de wü kpeke kpara, te ewü ena arü yi de ngari ni, Me, teka fü yi afü maguma yi, adu kpaka ni. Amba wüh ena arü yi de ngü la bala ma! Yi ti ale ngü ka-ewü la nda-yi de! Yi ena abere gara ewü, amörö füh *rü ghegbete. Fü yi asüma gara ewü gbü jia wü kpara 'buru. Yi ena aliki kphah gara ewü gbü wü mere köti ka-yi asidi. ³⁵⁻³⁶ Te di bala, Me ena ato mere kuru te yi teka ngü la. Ma ngbü emala fü yi dene zu ngü, ah le de yi ceka 'be! Ah kpo te kpi ka Abele, gina kpara ta te wüh mörö füh kotö ne,[§] akoro te kpi ka Zakariya, ta te wüh mörö etambasü *Mere Kambü ka Me ne,* liya ka ngüte wü kpara ka Me la 'buru ena adi gbü nzö yi, angü yi le ngü ka-ra de."

³⁷ Fü Yesu adu angbü de mere cinga, gü ba, "Ööö! Yi ceka la mere cinga te ena amaka wü kpara ka Yerüsalema ne te gara! Angü wüh ngbü emömörö wü mürü dofo, te Me ngbü etima fü ewü ne 'buru amörö asidi. Ma ngbü ta ele abiti wü di enga *Yisaraye le 'buru, teka aküwa ewü, baka yi-ngü te ngbü ebiti wü di enga ye, esa mbula ye, amba wüh le nda-wü de! ³⁸ Te di bala, Me ti ale ngü ka-ewü kphah de! Ah ena ayia ka-ye ace mere Kambü ka-ewü, ka Me, agbü

‡ 23:16-19 23:16-19 Yesu mala kphah gara ngü, gü ba, "Wü mürü riri ngbü emala ngü, gü ba, 'Amba te kpara kina te-ye te iri la'bi, de te wüh ngbü ecuru fü Me füh cangali la, engu mere e ace ngü la kpo de, angü kina kaka la ena amere engu esiti.' " § 23:35-36 23:35-36 Mü ena amaka ngü ka kpi ka Abele gbü Gina Ngü 4:8. * 23:35-36 23:35-36 Mü ena amaka ngü ka kpi ka Zakariya gbü buku ka 2 Ngangü 24:20-22.

Yerüsalema de kpala. Fù wü vügü akoro, amümürü mere Kambü la, de mere kōti ka-ewü 'buru, te gara. ³⁹ Ma emala fù yi dene zu ngü. Wüh tī awu ra tīne de, zalü te ewü ena afü maguma wü, adu ale ngü ka-ra, gü ba, Me tima ra me-ye fanü."

Dela ngü ta te Yesu mala teka mere kuru, te Me ena ato te wü di enga *Yisaraye le ne.

24

Dene ngü ta te Yesu mala teka ngü te ena amere te-ye te gara

Marako 13:1-13; Luka 21:5-19

¹ Fütanga ngü la, fù wü Yesu ayia ace tambasü *Mere Kambü ka Me, akpo angbü enü ka-wü. Fù wü *kpara kaka arü amala ngü fefe na, gü ba dene, "Mere kpara deyī, ye ceka la, zūka Kambü ka Me ne. Wüh jī engu kpekpeke, reke areke!" ² Yesu gü ba, "Yi mere e afi, gü ba, Mere Kambü ka Me la ka-ye kpekpeke ne, de. Angü, ma mala fù yi dene zu ngü, te gara, wüh ena amürü kambü la amürü 'buru kōtō. Da biringbö, te wüh ena ace ao füh kiri ye sela, ena adi ma." ³ Fù wü Yesu ayia ace sü la, anü alī angbü ka-wü kpa füh da de iri ye Olive ne.

Te wüh koro kpala, fù wü kpara kaka ayia akoro kpakaka, ayi-tata, gü ba, "Mere kpara, mba ngü ladü te ani le ayi-ta ye di. Ye gü ba, 'Wüh ena amürü mere Kambü ka Me la asidi.' Ngü la ena amere te-ye neh elaye? Ah ena adi gbü *adu sīkpī, te ye ena adu akoro, angbü ba mere miri füh kōtō ne? Anga ngü, te ena agü tamu ngü la fù ani, gü ba, sīkpī la koro eyi gbamari, ah de ne ngü ne?"

⁴ Fù Yesu alügü ngü fù wü kpara ka-ye la, gü ba, "Yi ceka te-yi mbi teka wü mürü fiti, angü wüh ena afti yi. ⁵ Kükürü de, angü mere bi wü kpara ena akoro, amere mani te iri ra, afti wü bu wü, gü ba, 'Ani me-ani de mere miri, te Me tima teka aküwa wü kpara.' Te di bala, mere bi wü kpara ena ale ngü ka-ewü la. Amba nda-yi, yi mere e ale ngü ka-ewü la de. ⁶⁻⁸ Angü mere bi wü ngü ladü, te wüh ena amere te-wü feke, o adu sīkpī la koro la de. Nguwa wü kpara ena ayia atü de gü, gbü nzō nguwa wü gara kpara. Yiki-tō ena amere te-ye gbü mere bi wü sü füh kōtō ne. Kpah bala, gbü wü gara sü, mere siti kpīri tala ena atü gbü nzō wü kpara. Dela 'buru wü ngü te wüh ena amere te-wü füh kōtō ne, o adu sīkpī koro la de. Wü ngü la 'buru ena adi baka gina keke, te kpo da emere würüse te ele ayaka. Te di bala, yi mere e akpe cürü de, angü Me ladü, te ena areke wü ngü la 'buru, ba e te engu le.

⁹ Amba nda-yi, yi ceka te-yi mbi, de yi rü kpekpeke, angü wü kpara füh kōtō ne 'buru ena angbü ekpü yi akpü teka ngü ka-ra. Wüh ena azoro wü gara yi, ato fù wü miri, ato cinga te ewü. Fù ewü amömörō kphah wü gara yi. ¹⁰ Gbü wü sīkpī engu la, mere bi wü kpara ka-ra ena ace ngü ka-ra. Gara ewü ena akpo da ekpü yi. Kpah bala, wü gara ena angbü da egü tamu yi fù wü vügü. ¹¹ Mere bi wü mürü wu ena akoro teka afti wü kpara ka Me, gü ba, 'Ani de wü *mürü dofo ka Me.' Fù mere bi wü kpara ale ngü ka-ewü. ¹² Wü kpara ena akpo kphah angbü emere bi wü *siti ngü, gbü wü sü füh kōtō ne 'buru. Tekä ngü la, mere bi wü kpara ena ace ngü ka-ra. ¹³ Amba te mü tūka temü, alala gbü ngü ka-ra, akoro di gbü *adu sīkpī la, Me ena aküwa mü aküwa fi mere badi.

¹⁴ Amba ah le de yi mala ngari ra fù nguwa wü kpara füh kōtō ne 'buru feke, de wüh fù maguma wü, o ra du koro la de."

Dene ngü te Yesu mala teka mere cinga, te ena amere wü kpara ka Yerüsalema te gara

Marako 13:14-20; Luka 21:20-23

¹⁵ Fù Yesu adu amala ngü fù ewü, teka *Mere Kambü ka Me, te wüh ena amürü la, gü ba, "Fanü fanü sirimbi ladü, te ena agü tamu sīkpī la fù yi. Angü gara vügü ka Me ladü, te ena akoro, asiti sü, da emere wü gara lara ngü kpa esa Mere Kambü ka Me la, gegege ba e te *mürü dofo de iri ye Danye le ba ta gügü gbü *Ngari Me ne."* Dela ngü te Yesu lügü fù wü kpara ka-ye, teka sirimbi, te ena akoro agü tamu sīkpī, te ewü ena amürü Mere Kambü ka Me agbü Yerüsalema tete na ne. De-mü, te mü ngbü etanga ngü ne, ah le fù mü ao fīngangü ka-mü, teka aje si-ngü la mbi mbi mbi.

¹⁶ Fù Yesu adu amala ngü fù ewü, gü ba dene, "Te yi wu sirimbi la eyi la, yi mere e angbü gbü *Yudaya de! Yi kpe 'duwa kpa enzō mere gümba, agbü gü! ¹⁷ Kpah bala, te siti ngü la koro maka mü, te mü ngbü efe te-mü kpa esa e la, mü mere e adu arī kpa esambü, akō wü e ka-mü tīne de. Mü kpe 'duwa akpe, angü siti ngü la ena amaka mü. ¹⁸ Te siti ngü la koro maka mü, da esō e ka-mü kpa gbü yi la, mü mere e adu kpa ekōti, ato zūka bongu te mü kphah de. Mü kpe 'duwa akpe.

¹⁹ Gbü wü sīkpī la, mere siti cinga ena amere wü würüse, te ewü ena adi de bu wü, kphah bete mene ewü, de te ewü ena adi de wü vürü jaji eküte wü ne. Dela ne

* 24:15 24:15 Mü ena amaka ngü la gbü buku ka Danye le 9:27; 11:31; 12:11.

cinga ne! Cinga la ena afa wü gara cinga füh kotö ne 'buru. ²⁰ Ah le fü yi adi eku gba fü Me, teka de siti ngü la mere e akoro gbü *silkpi ka Me de, angü wüh ena ani wü möngiti 'baranga 'buru ani. Anga ngü la mere e amere te-ye gbü bigü kpah de, angü agö bete zü ena amere yi esiti, te yi ena akpe la. ²¹ Kü baka te Me mere kotö ne, mere cinga baka e la mere te-ye nda la de. Gara cinga te ena akoro baka engu la fütanganga na, ah ena adi kpah ma. ²² Fü Me adu afi nga wü kpara ka-ye, te engu fe ewü ne, gü ba, 'Te di bala, ni ena akolo silkpi la mba cogbo, teka ngü ka wü kpara ka-ni la, angü wüh ena akpi.' Te Me ena amere ta bala de la, de bane kpara biringbö, te ena aküwa te gara, esaka siti ngü la, ena adi kpo ma."

Dene ngü teka dudu ka Yesu füh kotö ne Marako 13:21-27; Luka 21:25-28

²³⁻²⁴ Fü Yesu adu kpah amala gara ngü fü wü kpara ka-ye, gü ba, "Gbü wü silkpi la, wü mürü wu ena akoro, adi efiti wü bu wü. Gara ena agü ba, 'Ni de miri, te Me tima ni teka aküwa wü.' Gara ena agü ba, 'Ni nda-ni de *mürü dofo, te ni ngbü emala ngari Me fü wü kpara.' Wüh ena akpo angbü emere bi wü ngü ka talara, te ena afiti wü kpara 'buru. Wüh ena agiri kpah kaje teka afiti cu yi, wü kpara ka-ra. Te di bala, yi ceka te-yi 'be, yi mere e aje ngü ka wu ka-ewü la nda-yi de! Te gara kpara mala ngü fü yi, gü ba, 'Miri te Me tima ne koro eyi! Ah ladü kpakine,' anga 'Ah ladü kpane,' yi mere e ale ngü kaka la nda-yi kpah de. ²⁵ Yi ceka te-yi mbi, angü ma ngbü eyi emala ngü ne fü yi te enga gina dene, o ngü la koro la de, teka fü yi amba jia yi amba, angü wü mürü wu la ena afiti yi. ²⁶ Te di bala, te wüh mala fü yi, gü ba, 'Yi ceka la! Miri te Me tima ne koro eyi! Engu ladü agbü gü kpala,' yi mere e anü kpala nda-yi de. Kpah bala, te wüh gü ba, 'Miri la wo te-ye eyi kpakine la,' yi mere e ale ngü la nda-yi kpah de. ²⁷ Kükürü de, angü dudu ka-ra, *Ye kpara ka Kpi, wü kpara gbü nga nzö sü füh kotö ne, ena aci awu ngü la te nga wü 'buru. Angü ah ena adi baka ülele te ngbü eü, da elofu sü. Dudu ka-ra ena adi bala, ah ti awo te-ye de! ²⁸ Angü wü kpara 'buru ena awu ngü la. Ah ena adi baka sü te kö nü di ladü tete, fü wü nügünü, de wü gara wü lu, abiti te-wü 'buru füh kö nü la.

²⁹ Fütanga ngü la, gara wü ngü ena ayia kpah amere te-wü kere, baka ngü ta te wüh ba gbü *Ngari Me, gü ba dene, 'Wü lara ngü ena akpo da emere te-wü kpa gbü kpi.

Angü kokpi, de wü e kpa tikpi 'buru, ena akpo da eyiki.

Wü küfara ena akpo kpah da egügürü.

Ra ena afü te-ye baka biti.

Fe ti adu asü kpah de.[†]

³⁰ Fütanga ngü la, de-ra Ye Kpara ka Kpi, fü ra adu tine akoro. Wü kpara 'buru ena aci da eku gba ka cürü, angü wüh ena awu ra agbü kpi kpala, te ma ngbü ekoro de mere wazi, baka Mere Miri. Fü ewü aci 'buru acu ngü ra. ³¹ Kono ena awü, fü wü kpara aje 'buru. Fü ra ayia atima wü *malayika ka-ra, teka abiti wü kpara ka-ra, te ma fe ewü ne. Wüh ena abiti ewü edebu wü sü bala ne 'buru, akoro di fere. Fü a angbü tundu de ewü fi mere badi."

Dene mani ta te Yesu mala teka dudu ka-ye

Marako 13:28-31; Luka 21:29-33

³² Fü Yesu adu amala gara ngü fü ewü gbü mani, gü ba, "Ngü ka dudu ka-ra ena adi baka ngü ka wü rü. Angü te yi wu wü rü, te ngbü eyi ayi, da eto to kpa wü la, yi ngbü egü neh fe? Yi ti eyi awu, gü ba, bigü koro eyi. Ah bala de? ³³ Kpah bala, te yi wu wü sirimbi, te ma mala nganga fü yi ne eyi la, de yi wu awu, gü ba, silkpi ka dudu ka-ra la koro eyi gbamari.

³⁴ Ma ngbü emala fü yi dene zu ngü. Siti cinga la ena amaka yi fanü, amba ngü la ti anza ngü ka-yi, wü kpara ka-ra nda de. ³⁵ Ngü te ma ngbü emala fü yi dene, ah de kpeke ngü, te ena angbü fi mere badi. Angü Me ena agara kotö ne ake kpi, fü ngü ka-ewü anza 'buru. Amba ngü ka-ra ti anza nda de."

Dene ngü te Yesu mala, gü ba,

nih reke te-nih nzo, teka dudu ka-ni

Marako 13:32-37; Luka 12:41-48; 17:26-30, 34-36; 21:34-37

³⁶ Fü Yesu adu kpah, amala fü wü kpara ka-ye, gü ba, "Te yi le ayi-ta ra, gü ba, silkpi, te ma ena adu akoro tete na, ena adi elaye la, ma ena alügü ngü fü yi, gü ba, silkpi la, kpara biringbö, te wü ngü kaka, nda ma. Wü *malayika agbü kpi, wüh wu kpah de. De-ra, te ma di de Ye Me ne, ma wu kpah de. 'Duwa Wüba Me wu ngü teka silkpi la duu me-ye. ³⁷ Te di bala, ah le de yi reke te-yi ngbü nzo, angü silkpi ka dudu ka-ra ena adi baka ngü, ta te mere te-ye gbü re ka mere kundu nih *Nüwa ne. ³⁸⁻³⁹ Angü wü kpara ena angbü ezüfa wü e, da enzönzö wü fi ka-wü, kpah da eza te-wü, wüh ti afi ngü ka Me nda-wü kpah de. Ma ena adu akoro, agüka ewü gbü ngü ka-ewü la, kpah ba e ta te mere agö güka wü kpara gbü silkpi, te Nüwa ri

† 24:29 24:29 Mü ena amaka ngü la gbü buku ka Yisaya 13:10; 34:4.

tete gbü *zabu, fū mere ngu la amörö ewü 'buru ne.

⁴⁰ Ma ngbü emala fū yi dene zu ngü. Gbü sīkpī te ma ena adu akoro tete, te wü kpara 'basu ngbü emere tima agbü yi la, ma ena aküwa mene kpara te le ngü ka-ra eyi. Fū ra ace mene kpara te le ngü ka-ra de ne. ⁴¹ Te wü wūrüse 'basu ngbü eyö zu ka-wü tundu gbü sü biringbö la, ma ena aküwa mene te le ngü ka-ra eyi. Fū ra ace kpah mene te le ngü ka-ra de ne. ⁴² Te di bala, de yi reke te-yi, yi ngbü nzo, angü yi wu sīkpī, de te Mīri ka-yi ena adu akoro tete na ne, nda-yi de.

⁴³ Ah le de yi fi nga ngü la mbi mbi mbi. Angü te mürü köti ena awu ta kpo, gü ba, 'Mürü zi ena akoro gbü bitī ne, teka azi wü e ka-ni la,' de bane, ah ti ara nda de. Ah ena angbü ta eci sü, teka afete mürü zi la, aliki, angü mürü zi la ena arī kpa esambü, azi wü e ka-ni. ⁴⁴ Tekā ngü la, ma ngbü emala ngü ne fū yi kpekepe, gü ba, ah le fū yi adi eci sü, angbü kpah nzo, angü sīkpī ka-ra, *Ye Kpara ka Kpī, te ma ena adu akoro tete ne, yi wu nda-yi de."

⁴⁵ Fū Yesu adu kpah amala gara mani fū ewü, gü ba, "Te mü ena adi de mere kpara ka tima gbü nzö wü bu mü la, ah le fū mü amere tima ka-mü mbi mbi mbi. Te mere kpara ka-mü yia nü agbü gara sü nengete la, ah le de mü mere wü ngü 'buru te engu ce, o esaka mü, da egafa zü-e fū wü bu mü, kpah ba e te engu mala fū mü ne, reke areke. ⁴⁶ Angü te mere kpara ka-mü du maka mü, da emere wü ngü la 'buru mbi mbi mbi la, ngü la ena ato mere tadu fū mü. ⁴⁷ Ma ngbü emala fū mü dene zu ngü. Mere kpara ka-mü ena ace wü ngü ka-ye 'buru esaka mü. Fū ah ao mü ba mere kpara, te ena angbü eceka kpī fütanga wü e ka-ye 'buru. ⁴⁸ Anga te mü fi emagama mü, gü ba, 'Mere kpara ka-ni ti adu akoro kere nda de,' ⁴⁹ fū mü angbü ka-mü bü tündü, da emimiki wü bu mü, efi ka-mü bü nzö nga mü, fū mü angbü ka-mü bü da ezüfa wü e, da enzö wü fi, eküküya di la, ⁵⁰ de-ra mere kpara ka-mü, ma ena adu akoro gbü sīkpī te mü wu de, fū ra amaka mü gbü iri-to. ⁵¹ Te di bala, ma ena aza mü, ato esüka siti wü kpara, de wü mürü mani. Fū ra ato mere siti kuru te yi. Fū yi angbü da enyüma gbü te yi de ewü, de mere cinga kpala!"

25

Dene kpah gara mani te Yesu mala, teka ngü ka dudu ka-ye

¹ Fütanga ngü la, fū Yesu adu kpah amala gara mani fū ewü, gü ba, "Sīkpī ka dudu ka-ra, *Ye Kpara ka Kpī, ena adi baka ngü te mere te-ye fū wü jaji wūrüse

nzükpa, ta te ewü reke te-wü, eci nga komoko, te le akoro aza kiri wü. Fū ewü ayia aza wü lamba ka-wü, asiya. Fū ewü ayia anü gbü bitī la, kpa gba kiri wü, te komoko le aza ne. Fū ewü angbü kpala da eci nga komoko la. ²⁻⁴ Wü gara jaji wūrüse de 'buruve ne, wüh de kpeke wü kpara. Fū ewü aza kpah gara mü-wa ka-wü gbü kölökö, anü di mini. Amba wü gara ewü de 'buruve ne, wüh ka-wü de tondö wü kpara, wüh za gara mü-wa nda-wü de. ⁵ Amba komoko ne, mü koro nda-mü kere de. Tekā ngü la, fū wü jaji wūrüse nzükpa ne, ayia andirī, atī 'buru de ra.

⁶ Ah te enü akoro etü bitī la, fū komoko la ayia akoro, agüka wü kpara 'buru agüka. Fū ewü ayia aje ri wü kpara da emi koko, de wü rere kpa tikpi, gü ba, 'Wayi! Komoko te le akoro aza tangbase ka-ani ne, koro eyi! Wü za lamba ka-wü eza, de wü koro kere! Tekā de ani nü, maka te-ani de ewü, kpa te kaje kpala!' ⁷ Fū wü jaji wūrüse de nzükpa ne ayia atitī, azükü gbü ra, amaka wü lamba ka-wü 'buru nuuu! Fū ewü ayia sela, akpo da ee ku lamba ka-wü, amba mü-wa nza eyi! ⁸ Fū mene tondö ewü de 'buruve ne, amala ngü fū wü bu wü, gü ba, 'Akooo, wü di enga ni ani, wü le mba ta-ngü te ani de mü-wa, angü nda-ani nza eyi!' ⁹ Fū mene wü jaji wūrüse de 'buruve, te jia ewü mba amba ne, ayia alügü ngü fū wü bu wü la, gü ba, 'Du mü-wa ka-ani mba cükü'daye. Ah ti atü tüngü ani 'buru nda de. Wü kpe kere, wü se nda-wü.' ¹⁰ Fū tondö wü jaji wūrüse la akpe anü teka ase mü-wa. Fū watī ye kiri ewü ne ayia akoro fütanga ewü la. Fū wü mene kpeke ewü, te ewü di nzo ne, ayia anü, amaka te-wü de wü komoko la. Fū ewü ayia atī de lamba ka-wü engagira nü, anü de wü komoko la agba ka. Fū komoko la aza ewü, arī di kpa esambü, de te wüh reke teka karama la, ani mö nga wü gö gö gö!

¹¹ Fütanga ngü la mba cükü'daye, fū mene tondö ewü ne adu akoro, arü emöngitī, da ei i, gü ba, 'Mere kpara! Mere kpara! Ye ü möngitī fū ani ke!' ¹² Fū komoko la alügü ngü fū ewü, gü ba, 'Wü neh wü da? Ni wu wü nda-ni de! Ni ti adu aü möngitī ka-ni kpah de!'"

¹³ Fū Yesu adu amala ngü fū wü kpara ka-ye kpekepe, gü ba, "Yi ceka te-yi 'be, de yi reke te-yi, ngbü nzo! Angü yi ti awu sīkpī, anga lö-ra, de te ma ena adu akoro tete na ne, nda-yi de."

Dene mani te Yesu mala, teka wü kpara ka tima bata

¹⁴ Fütanga ngü la, fū Yesu adu kpah amala gara mani fū wü kpara ka-ye, gü ba,

“Sikpi ka dudu ka-ra, *Ye Kpara ka Kpi, ena adi kphah baka ngü, te mere te-ye fü wü kpara ka tima ka gara komoko, te yia nü nengete, agbü gara sü. Te komoko la yia enü tete, fü ah ai wü kpara ka tima ka-ye, ato jiase esaka ewü biri biri 'buru, de wüh mere tima di, teka fü jiase la aga. ¹⁵ Fü engu ato jiase fü gina kpara baka kama 'buruve. Fü ah ato jiase fü e'ba'basu kpara, baka kama 'basu. Fü ah ato nda ehabata kpara, kama biri. Ah ngbü ye süka jiase la fü ewü bala, te nga wazi ewü gbü tima. Fü ah ayia anü sü ka-ye agbü gara sü.

¹⁶ Fü mene kpara te maka jiase kama 'buruve ne, fü ah anü amere tima de jiase la. Fü ah ayia amaka gara fefeh na kphah kama 'buruve. ¹⁷ Fü e'ba'basu kpara, te maka nda-ye kama 'basu ne, anü, amere kphah bala. Fü ah ayia amaka kphah gara fefeh na kama 'basu. ¹⁸ Fü kiri ewü, de te maka nda-ye jiase ngbee kama biri ne, ayia anü, aji du, aza jiase, de te mere kpara to fefe la, ati gbügbü.

¹⁹ Fü mere kpara ka-ewü la ayia ayiri kpala baaala. Fü engu alügü nga ye adu akoro agba ye. Fü ah ayia ai wü kpara ka tima ka-ye, teka aceka jiase ka-ye, de te engu to esaka ewü ne. ²⁰ Fü mene kpara, ta te maka jiase kama 'buruve ne, ayia akoro engagira mere kpara ka-ye la, agü ba, 'Mere kpara deyü, ye to ta jiase fü ni kama 'buruve. Ye ceka la, titine ni maka gara kphah eyi fefeh na, kama 'buruve. Te di bala, wü jiase ka-ye eyi 'buru kutu biri dene.' ²¹ Fü mere kpara kaka-na, angbü de tadu. Fü ah agbo nga iiri na, agü ba, 'Wayi! Dela züka ngü! Ye de kpeke kpara! Ni to ta engu tima fü ye, ye mere eyi 'duwa reke areke. Te di bala, ni ena ace mere bi wü ngü ka-ni esaka ye, fü ni ao ye mere kpara gbü tima ka-ni. Ye koro ekoro, de ani ngbü te sü biringbö tundu ake ye, de mere tadu.'

²² Fütanga ngü la, fü e'ba'basu kpara ayia kphah, akoro, agü ba, 'Mere kpara, ye to ta jiase fü ni, kama 'basu. Ye ceka la, titine ni maka gara kphah eyi fefeh na, kama 'basu. Te di bala, wü jiase ka-ye eyi 'buru kama bala dene.' ²³ Fü mere kpara kaka angbü kphah de tadu. Fü ah agbo kphah nga iiri na, agü ba, 'Wayi! Dela züka ngü! Ye kphah de kpeke kpara! Ni to ta engu tima fü ye, ye mere eyi 'duwa reke areke. Te di bala, ni ena ace mere bi wü ngü ka-ni esaka ye. Fü ni ao ye mere kpara gbü tima ka-ni. Ye koro ekoro, de ani ngbü te sü biringbö tundu ake ye, de mere tadu.'

²⁴⁻²⁵ Fü mene kpara, ta te nda-ka jiase di ngbee kama biri ne, adu akoro sidi nga wü bu ye la, amala fü mere kpara ka-ye la, gü ba, 'Wayi, mere kpara, ye ceka la,

jiase ka-ye ta te ye to fü ni ne, ah dene. Ni kpe cürü ye, angü ni wu eyi, gü ba, ye de kpeke kpara. Te ye ru e de la, ye ngbü ka-ye fi bü emaka e. Tekka ngü la, fü ni aza jiase ka-ye la, awo gbü tó. Ah dene.' ²⁶⁻²⁷ Fü ngü la asiti te mere kpara kaka la. Fü ah amala ngü fefe, gü ba, 'Ye de siti kpara! Ye kphah de mürü tóndó! Te ye ena awu ta kpo, gü ba, ni de kpeke kpara, te ni ngbü emaka wü e gbü wazi ka-ni la, ye za ta jiase ka-ni la, ao kpaka wü kpara, te ewü ngbü eceka kpi fütanga jiase ne, de, neh teka ne? Baka te ni du ne, de bane ni ena amaka jiase ka-ni la, de gara na füh ye.'

²⁸ Fü mere kpara la adu afü te-ye, amala ngü fü wü gara kpara ka tima ka-ye, gü ba, 'Wü za jiase de kama biri la esasaka asidi, de wü to fü mene kpara, te nda-ka di kutu biri ne. ²⁹ Angü mene kpara te mere tima kpekepeke, fü ah amaka mere bi e, wüh ena aza kphah gara wü e, ato fefe. Amba mene kpara te mere tima mbi mbi de, mba engu e te di esasaka, wüh ena aza esasaka asidi. ³⁰ Amba teka ngü ka komoko ne, engu de tóndó kpara! Wü za engu, wü gü agbü mbiri sü, de ah ngbü, ah ku gba, da enyüma gbü te ye de mere cinga kpala.' "

Dela ngü te Yesu mala teka wü kpara ka-ye, de wüh ngbü kpekepeke, da eo to wü, teka tima te ni to fü ewü ne, de wüh di emere de wazi wü 'buru, zalü koro gbü sikpi, te ni ena adu akoro tete.

Dene ngü te Yesu mala teka ngü ka wü kpara,

te engu ena akolo gbü adu sikpi

³¹ Fü Yesu adu kphah amala gara ngü fü wü kpara ka-ye la, gü ba, "Gbü *adu sikpi, de-ra, *Ye Kpara ka Kpi, ma ena adu akoro de mere wazi, de wü *malayika ka-ra mini. Fü ra angbü füh kpókpó ka-ra, teka akolo liya ka wü kpara füh kotó ne 'buru. ³² Fü wü malayika la abiti wü kpara füh kotó ne 'buru engagira ra. Fü ra adu aye süka ngü ka-ewü, baka e te kpara ngbü eye süka wü kambiliki ka-ye de wü meme. ³³ Mene züka wü kpara, te ewü di ba wü kambiliki ne, ma ena aza ewü, ao gbü kokpa ka-ra. Amba mene siti ewü, te ewü di baka wü meme ne, ma ena ao ewü gbü kamisü ka-ra.

³⁴ Fü ra adu amala fü züka wü kpara, te ewü di gbü kokpa ka-ra ne, gü ba, 'De-wü, wü de wü kpara te Wüba, Me, küwa wü eyi. Wü koro ekoro akine, de a ngbü de mere tadu gbü züka sü ka Me, ta te engu reke e o fü wü gügü, o engu mere kotó ne la de ne. ³⁵ Angü wü ngbü ta ele ta-ngü te ra, o ra ngbü de wü füh kotó ne. Wü to ta e-mazü fere, o tala ngbü emere ra. Wü to ta ngu fere, o gümü ngu ngbü emere

ra. Ma ngbũ ta ekolo sũ te kaje ba ganzi kpara, fũ wũ aza ra ngba tete agba wũ. ³⁶ Ma ngbũ ta ngĩrimu, fũ wũ ato bongo fere. Ta te ma ngbũ eke tete, fũ wũ akoro ta aceka ra, ale ta-ngũ te ra. Ta te ma ngbũ agbũ ku, fũ wũ akoro aceka ra, ale kpah ta-ngũ te ra.'

³⁷ Te zũka wũ kpara la ena aje ngũ la bala, wũh ena alũgũ ngũ fere, gũ ba, 'Apa! Mere kpara! Ngũ la mere te-ye bala, neh elaye? Ani maka ye te tala ngbũ emere ye, fũ ani ato zũ-e fũ ye, neh elaye? Gũmũ ngu ngbũ ta emere ye, fũ ani ato ngu fũ ye anzõ, neh elaye?' ³⁸ Ye koro ta baka ganzi kpara, fũ ani aza ye ngba tete agba ani, neh elaye? Ye ngbũ ngĩrimu, fũ ani ato bongo fũ ye, neh elaye? ³⁹ Ye ngbũ ta eke, anga wũh zoro ta ye gbũ ku, fũ ani anũ aceka ye, ale ta-ngũ te-ye, dela neh elaye? Ani wu ngũ la nda-ani de.' ⁴⁰ Ma ena alũgũ ngũ fũ ewũ, gũ ba, 'Ma ngbũ emala fũ wũ dene zu ngũ. Wũ ngũ ta 'buru, te wũ ngbũ mere fũ wũ mürũ cinga de kpakine ne, wũ ngbũ mere dela 'buru fere. Angũ wũ mürũ cinga la de wũ di enga wũna!'

⁴¹ Fũtanga ngũ la, ma ena adu afũ te-ra, amala ngũ fũ siti wũ kpara, de te ewũ di gbũ kamisũ ka-ra ne, agũ ba, 'De-wũ deyi, wũ de siti wũ kpara! Ma le ngũ ka-wũ de! Wũ yia gbũ jia ra sela asidi! Wũh ena aza wũ, asõ agbũ mere wa, te wũh deke teka *Satana de wũ kpara ka-ye. Wũ ena angbũ kpala fi mere badi! ⁴² Kũkürũ de, angũ wũ le ta-ngũ te ra ta de. Tala ngbũ ta emere ra, wũ le ato zũ-e fere de. Ma ngbũ ta ekpi gũmũ ngu, wũ le ato ngu fere kpah de. ⁴³ Ma koro ta agba wũ baka ganzi kpara, wũ le aza ra ngba gba wũ de. Ma ngbũ ta engbũ ngĩrimu, wũ le ato bongo fere de. Ma ngbũ ta eke ake, wũ le ale ta-ngũ ekũte ra kpah de. Wũh zoro ra ta, gũ agbũ ku, wũ le anũ aceka ra kpah de.'

⁴⁴ Wũh ena alũgũ ngũ fere, gũ ba, 'Apa! Mere kpara! Ngũ la mere te-ye bala, neh elaye? Ani maka ta ye de tala te ye neh elaye? Ta te gũmũ ngu ngbũ emere ye ne, ani wu ye nda-ani ta de. Ye ngbũ ta enũ te kaje, neh elaye? Ye ngbũ ta ngĩrimu, anga eke ake, neh elaye? Wũh zoro ye gbũ ku ta elaye, fũ ani ace ta kpo da ele ta-ngũ te ye ne?' ⁴⁵ Ma ena alũgũ ngũ fũ ewũ, gũ ba, 'Ma ngbũ emala fũ wũ dene zu ngũ! Gbũ wũ sũkpĩ ta te wũ ngbũ engbũ de wũ bu wũ kpa fũh kotõ kpakine ne, wũ le adi ele ta-ngũ te wũ mürũ cinga de. Te di bala, wũ ngũ de te wũ le amere fũ wũ bu wũ de

ne, wũ ce dela da emere cu fere. Angũ wũ mürũ cinga la de wũ di enga wũna!'

⁴⁶ Teka ngũ la, wũh ena aza siti wũ kpara la, agũ ewũ agbũ mere du ka wa, fi mere badi. Amba teka zũka wũ kpara ne, wũh ena akũwa ka-wũ agbũ sũ ka Me fi mere badi."

Dela wũ ngũ te Yesu mala fũ wũ kpara ka-ye teka adu sũkpĩ, te engu ena adu akoro tete ba Mere Miri.

26

Dene ngũ ta te wũ mere kpara ka wũ Yisaraye

ngbũ egĩri kaje te ani ena amõrõ Yesu tete

Marako 14:1-2; Luka 22:1-2

¹ Te Yesu rĩ wũ kpara ka-ye de ngũ la nza tete, fũ engu adu amala gara ngũ ka cinga fũ ewũ, gũ ba, ² "Yi wu eyi, gũ ba, *Karama ka Pasika ena atĩ fũtanga sũkpĩ 'basu?*' Gbũ sũkpĩ ka karama la, wũ wũgũ ka-ra ena azoro ra, *Ye Kpara ka Kpĩ, ato fũ wũ miri ka *Rũma, teka fũ ewũ abere ra, amõrõ fũh *rũ gbegete."

³ Gbũ wũ sũkpĩ la, baka te Yesu ngbũ erĩ wũ kpara ka-ye, fũ mere kpara fũh kpõkpõ ka wũ mere *kovo, de irĩ ye Kayafa ne, ayia kpah aĩ wũ angbe cõgbõrõ kpara ka wũ *Yisaraye 'buru, abiti agba ye. ⁴ Fũ ewũ akpo angbũ egĩri kaje, te ani ena azoro Yesu tete gbũ zi, amõrõ. ⁵ Wũh gũ ba, "Ani ceka 'be, angũ mere bi wũ kpara biti te-wũ eyi gbũ Yerũsalema sene, teka amere mere karama ka Pasika ne. Te ani zoro Yesu gbũ jia ewũ la, wũh ena aci 'buru de gũ ekũte ani! Te di bala, ani gĩrĩ kaje, de ani zoro engu gbũ zi."

Dene ngũ te gara wũrũse tõkõ zũka se-mũ di gbũ nzõ Yesu

Marako 14:3-9; Yũwane 12:1-8

⁶ Ta gbũ wũ sũkpĩ la, wũ Yesu ngbũ ta engbũ ka-wũ agbũ Betaniya, agba gara komoko de irĩ ye Simũna, ta te di de *jiakõ te ye ne. ⁷ Fũ gara wũrũse akoro amaka ewũ, te ewũ ngbũ da ezũ e kpala. Wũrũse la koro de zũka *se-mũ gbũ enga kõlõkõ, te ewũ ngbũ ese de mere bi jiasẽ.† Fũ wũrũse la ayia atõkõ se-mũ la 'buru gbũ nzõ Yesu.

⁸ Te wũ *kpara ka Yesu wu ngũ te wũrũse la mere bala ne, fũ ngũ la asiti ekũte ewũ. Fũ ewũ angbũ emala ngũ esũka wũ, gũ ba, "Arape! Wũh ngbũ esiti mere bi jiasẽ de bala, neh kũ teka ne? Ah za zũka e la, etõkõ kõtõ bũ kũkürũ kũkürũ bala! Dela zũka ngũ? ⁹ Ah le ta de wũh za

* **26:2** 26:2 Mũ ena amaka si-ngũ ka Pasika la gbũ buku ka Gogo ka wũ Yisaraye 12. Mũ tĩ kpah amaka si-ngũ la gbũ "Si wũ gara kpeke ngũ te di gbũ Ngari Me ne." † **26:7** 26:7 Wũh o ta se-mũ la gbũ enga kõlõkõ, te wũ mere gbũ gara e de irĩ ye alabasita.

zūka se-mū la, cīnzī de mere bi jiase, teka ale ta-ngū di ekūte wū mūrū cīnga.”

¹⁰ Amba Yesu wu fīngāngū ka wū kpara ka-ye la eyi. Tekā ngū la, fū ah ayia amala ngū fū ewū, gū ba, “Yi ngbū ekpūlū wūrūse ne, teka ne? Yi ce engu ace! Ngū de te engu mere, te engu tōkō se-mū di gbū nzō ra ne, ah de mere zūka ngū gbū jia ra. ¹¹ Angū te yi le ale ta-ngū te wū mūrū cīnga la, yi tū eyi amere ngū la gbū wū gara sīkpī, angū mere bi wū mūrū cīnga ladū fūh kotō ne. Amba nda-ra, du sīkpī ka-ra fūh kotō ne mba cūkū'daye. ¹² Wūrūse ne tōkō se-mū ne gbū nzō ra, baka e te wūh ngbū emoko se-mū ekūte kōvō. Kūkūrū de, angū sīkpī ka kpi kara koro eyi gbamari. ¹³ Ma ngbū emala fū yi dene zu ngū. Gbū wū sū 'buru, te wūh ena angbū emala ngari ra tete, fū wū kpara fūh kotō ne, wūh ena angbū efi nga wūrūse ne, kpah da emala nga ngū de te engu mere ne.”

Dene ngū te Yuda Keriyota reke, teka ato Yesu di fū wū vūgū

Marako 14:10-11; Luka 22:3-6

¹⁴ Fūtanga ngū la, fū *Yuda Keriyota, te di de biri kpara esūka wū *kpara ka Yesu nzūkpa de fūh ye 'basu ne, ayia anū akoro kpaka wū mere *kovo ka wū Yisarayeale, ¹⁵ amala ngū fū ewū, gū ba, “Ni le eyi ato Yesu fū wū. Te di bala, wū ena ato fū ni neh ene?” Te wū mere kpara la je ngū la bala, fū ngū la areke te ewū. Fū ewū ayia 'duwa atanga jiase teke biri de fūh ye nzūkpa, ato fū Keriyota. ¹⁶ Te di bala, ah kpo bū gbū lō-ra engu la, fū Keriyota akpo angbū egiri kaje, te ni ena agū tamu Yesu tete fū wū kpara la.

Dene ngū ka Yesu te zū Karama ka Pasika de wū kpara ka-ye

Marako 14:12-26; Luka 22:7-23

¹⁷ Te sīkpī ka *Karama ka Pasika[‡] koro tete na, fū wū *kpara ka Yesu ayia amala ngū fefe na, gū ba dene, “Mere kpara deyi, ani ena azū nda-ani karama ne, neh kaye? Ye mala emala fū ani, de ani nū teka areke sū engu na.” ¹⁸ Fū Yesu alūgū ngū fū ewū, gū ba, “Wū nū enū agbū Yerūsalema, kpa gba gara kpara kpala, de wū mala ngū fefe, gū ba, ‘Mere kpara ka-ani tima ani kpaka ye, amala ngū fū ye, de ye to sū fū ni, teka fū ani akoro, azū karama ka Pasika de wū kpara ka-ni gbūgbū, angū sīkpī ka-ni koro eyi gbamari.’”

¹⁹ Fū wū kpara la ayia anū, amere wū ngū la kpah 'buru, baka te Yesu mala fū

ewū ne. Fū ewū ayia areke zū-e ka Karama ka Pasika la 'buru kpa gba komoko la.

²⁰ Etamurago la, fū wū Yesu ayia akoro, angbū kōtō, akpo da ezū karama la de wū kpara ka-ye nzūkpa de fūh ye 'basu ne. ²¹ Te wūh ngbū ezū e la tete, fū Yesu ayia amala ngū fū ewū, gū ba, “Ma ngbū emala fū yi dene zu ngū. Gara kpara ladū esūka yi sene, te ena ato ra fū wū vūgū.” ²² Te wūh je ngū la bala, fū ngū la ato mere cīnga emaguma ewū. Fū ewū akpo da eyi-ta Yesu te nga wū biri biri, gū ba dene, “Mere kpara, ah de ni? Ni ena ato ye me-ni?” ²³ Fū Yesu alūgū ngū fū ewū, gū ba, “Ah de mene kpara, te a ngbū ezū e ake di tundu gbū gada biringbō ne. Ah ena ato ra fū wū vūgū me-ye. ²⁴ De-ra, *Ye Kpara ka Kpi, ngū ka kpi ka-ra tū ka-ye kpini, de ngū ta te wūh ba gbū *Ngari Me ne. Amba mere cīnga ena adi fū mene kpara, te ena ato ra fū wū vūgū ne, angū Me ena ato mere kuru tete. Ah reke ta pe, te wūh ena abī engu nda-wū de.”

²⁵ Te Yesu mala ngū la bala, fū *Yuda Keriyota, kpara te to Yesu fū wū vūgū ne, adu ayi-ta Yesu, gū ba, “Mere kpara, ah ena adi de-ra?” Fū Yesu alūgū ngū fefe, gū ba, “Ah ngbūrū bala, mū mala eyi dela!”

²⁶ Fūtanga ngū te Yesu mala la, fū ewū adu angbū fī da ezū e ka-wū. Baka te ewū du ngbū ezū e ka-wū la, fū Yesu ayia akpo da emere gara ngū. Fū ah ayia aza ambata, agbo nga iri Me tekaka na, akukuru tūtū. Fū ah ayia agafa fū wū kpara ka-ye la, gū ba, “Dene kūte ra. Yi za eza, de yi zū.”

²⁷ Fūtanga ambata la, fū engu adu aza ndū'ba de ngu *vinū gbū ye. Fū ah adu agbo nga iri Me fefeh na, ayia ato fū ewū, gū ba, “Yi za ngu vinū ne, yi nzō te nga yi 'buru, ²⁸ angū ah de *ngūte ra. Yi nzō ba e, te yi ngbū enzō *ngūte de wū Me. Angū ngūte ra engu ne, ah ena atōkō, teka areke ngū eze ngba wū kpara de wū Me, teka fū Me aboro wū *siti ngū ka-ewū. ²⁹ Ngū te ma emala fū yi dene, ah de zu ngū. Akpo enatikine, ma ti anzō ngu vinū tīne kpo de, zalū akoro di gbū sīkpī te Me ena ao ra Mere Miri tete na.”

³⁰ Te wūh zū karama la nza tete, fū ewū ayia abī ci ka Me. § Fū ewū ayia ace sū la, anū sū ka-wū agbū sū te ewū ngbū eī, gū ba, Getesemane, te di esangū da de iri ye Olive ne.

Dene ngū te Yesu mala fū Petero

Marako 14:27-31; Luka 22:31-34; Yūwane 13:36-38

‡ **26:17** 26:17 Gbū Karama ka Pasika la, wū ngbū ezū ambata de kō gbū ye de. Mū ena amaka si-ngū ka Pasika la gbū buku ka Gogo ka wū Yisarayeale 12. Mū tī kpah amaka si-ngū la gbū “Si wū gara kpeke ngū te di gbū Ngari Me ne.” § **26:30** 26:30 Ci ka Me te ewū bī la, ah de ci te wū di engu Yisarayeale ngbū ebi te nga re 'buru, teka karama ka Pasika la.

³¹ Fütanga ngü la, o wü Yesu ngbü enü tete agbü Getesemane, fū ah adu amala ngü fū wü kpara ka-ye, gū ba, "Enatikine, gbü bitü ne, yi ena akpe abaya 'buru ka cürü, ace ra kpikpi ra, baka e ta te wüh ba gbü *Ngari Me, gū ba, 'Wüh ena amörö kpara, de te ngbü eceka kpī fütanga wü kambiliki ne, fū wü kambiliki la adu abaya ka-wü 'buru.*" ³² Ngü ma! Te ma zükü gbü kpi eyi la, ma ena anü sü agbü *Galilaya fi me-ra. Fū yi adu anü amaka ra kpala."

³³ Fū Petero ayia amala ngü fū Yesu, gū ba, "Ni ti akpe nda-ni kü de!" Ngü ma, te wü bu ni kpe 'buru la, ni ti ace nga ye nda-ni kü de." ³⁴ Yesu gū ba, "Ö'öö, Petero enga wüna, mü mala ngbü rü mbi ne, amba ngü te ma ngbü emala dene, ah de zu ngü. Enatikine, gbü bitü ne, o moko-ngü mü koko la de, mü ena acere nga mü du bata, gū ba, 'Ni wu ra de.'" ³⁵ Fū Petero adu kpah amala ngü la kpekpeke, gū ba, "Ma ti acere nga ra kü de! Ngü ma, te ah kpah bü de kpi la, nih ena akpi ake nih ma! Ma kpe cürü de!" Fū gara wü *kpara ka Yesu ayia amala kpah 'buru bala.

Dene ngü ka Yesu agbü Getesemane
Marako 14:32-42; Luka 22:39-46

³⁶ Fütanga ngü la, fū wü Yesu anü akoro agbü Getesemane. Te wüh koro kpala, fū engu amala ngü fū wü kpara ka-ye, gū ba, "De-wü deyü, wü ngbü la sene. Ni ena anü nda-ni kpa edere sü, teka aku gba fū Me." ³⁷ Fū engu aza bü nzö Petero ake *Yakobo bete *Yüwane,† anü de ewü cükü'daye kpa edere sü. Fū mere cinga bete fingangü akpo da emere Yesu, fū mamagama akpo da egürü. ³⁸ Fū engu ayia amala ngü fū wü Petero, gū ba, "Maguma ra ngbü eyi egürü de mere cinga efa sü, teka ngü ka kpi, te ma ena akpi ne. Te di bala, yi ngbü ghamari ede ra sene, fū nih adi eci sü tundu de nih ma."

³⁹ Fū Yesu ayia ace wü Petero, anü mba canza edere sü. Fū engu atü, abuka gbüra ye kötö, aku gba fū Me, agü ba, "Wüba, sīkpi ka-ra koro eyi dene! Te ah gbü jia mü mbi la, de mü za cinga la eküte ra asidi. Amba ngü la, ma ce o eyi esaka mü. Ah le fū mü amere ba e te mü ngbü ele. Ah di ba e te ma le me-ra de."

⁴⁰ Fū engu ayia adu kpaka wü Petero, amaka ewü 'buru da era ara. Fū ah amala ngü fū wü Petero, gū ba, "Ah mere baye? Yi ti ngbü ezükü, fū nih aci sü de nih ma mba cükü'daye, nda-yi de?" ⁴¹ Ah le de yi di eci sü, da eku gba fū Me, angü *Satana ena

afiti yi! Wayi, ah fanü, maguma yi ngbü ele ngü ka-ra, amba wazi yi, te yi ena amere ngü la di, nda ma."

⁴² Fū Yesu ayia ace ewü, adu anü kpah kpa edere sü, aku gba fū Me, gū ba, "Wüba, te mü le aza cinga la eküte ra asidi de la, de ah ngbü bala, de mü mere emere baka e te mü ngbü ele, angü ma ce ngü la eyi esaka mü!" ⁴³ Fū engu adu kpah amaka wü kpara ka-ye la, wüh ti ra ka-wü kpah eyi, angü ra zoro jia ewü eyi fa sü. ⁴⁴ Fū Yesu adu kpah ace ewü, anü teka aku ebabata gba fū Me, emala fi bü ngü biringbö, baka mene te enga gina ne.

⁴⁵⁻⁴⁶ Fütanga ngü la, fū Yesu adu akoro kpaka wü kpara ka-ye de bata ne, amala ngü fū ewü, gū ba, "Yi la fi bü era ara, da efe te-yi? Ah ti eyi! Yi zükü ezükü! Yi yia eyia, nih nü, angü sīkpi ka-ra, *Ye Kpara ka Kpi, ti eyi enatikine! Titine wüh te ekoro teka azoro ra, ato fū wü vügu. Yi ceka la! Kpara te ena agü tamu ra ne, ah eyi te ekoro de kpane!"

Dene ngü te wüh zoro Yesu tete

Marako 14:43-50; Luka 22:47-53;
Yüwane 18:3-12

⁴⁷ Baka te Yesu ngbü la fi bü emala ngü la fū wü kpara ka-ye, fū *Yuda Keriyota, te di biri kpara esüka wü *kpara ka Yesu nzükpa de füh ye 'basu ne, ayia akoro de mere bi wü kpara gbü nga ye, te wü angbe cögbörö *kovo tima ewü, azoro Yesu. Wüh koro ta de wü mere maguruma, bete wü ngbondo esaka wü. ⁴⁸⁻⁴⁹ Fū Keriyota akoro 'duwa afaka Yesu, da egü mandü fefe, gū ba dene, "Mere kpara, mü ladü!" Ah mere ngü la bala, kükürü de, angü ah mala ta fū ewü, gū ba, "Mene kpara te ni ena afaka, agü mandü fefe, dela eyi engu. De wü zoro engu azoro!" ⁵⁰ Fū Yesu alügü ngü fefe, gū ba, "Enga wüna, mene ngü, de te mü koro sene teka amere ne, de mü mere emere." Fū wü kpara la ayia 'duwa, aka te-wü, azoro Yesu.

⁵¹ Fū gara kpara, esüka wü kpara ka Yesu, ayia agbi mere maguruma ka-ye, ade güje gara kpara ka tima ka mere kpara füh kpökpö, akolo gbö! ⁵² Fū Yesu amala ngü fū kpara ka-ye la, gū ba, "Mü ce ngü la ace! Mü lügü maguruma ka-mü kpa da ye! Angü mene kpara te ngbü egü gü de maguruma, wüh ena amörö engu kpah de maguruma. ⁵³ Fingangü ka-mü gū ba, ah le de ma mere gü? Te ma ena ale ta agü gū la, de bane ma ena ayi-ta Wüba, Me, de engu tima mere bi wü *malayika[‡] fere, teka ale ta-ngü te ra. Mü wu bala de?"

* 26:31 26:31 Mü ena amaka ngü la gbü buku ka Zakariya 13:7. † 26:37 26:37 Wü Yakobo ake Yüwane de wü di Zebedayo. ‡ 26:53 26:53 Mere bi wü malayika baka kutu teke bata nzükpa de füh ye 'basu (72,000).

⁵⁴ Amba te ma ena amere ngü la ta bala la, ngü ta te wü *mürü dofo ba gbü *Ngari Me, gü ba, 'Ma ena azü cinga bala ne,' ngü la ena mere te-ye baye baye?"

⁵⁵ Fü Yesu adu afü te-ye amala ngü fü wü kpara, te ewü koro azoro ye ne, gü ba, "Ah mere neh baye, te yi koro de wü mere maguruma, bete wü ngbondo esaka yi ne? Ma de siti kpara? Ma ngbü ta engbü etambasü *Mere Kambü ka Me ka-yi, da eri wü kpara de ngü ka Me gbü wü sikpi 'buru ne, yi wu bala de? Yi le ta azoro ra kpala de, neh teka ne?" ⁵⁶ Wayi, ngü ma! Yi ti eyi azoro ra. Angü wü ngü la ngbü emere te-ye bala, teka ngü ta te wü mürü dofo ba gbü Ngari Me, teka ra ne, de ah ti kpini." Te wü kpara ka Yesu wu ngü la bala, fü ewü akpe ka-wü, abaya 'buru, ace Yesu bü kpikpi ye.

Dene ngü ka Yesu engagira mere kpara füh kpökpö

Marako 14:53-65; Luka 22:54-55, 63-71

⁵⁷ Fü wü kpara, te ewü zoro Yesu ne, aza engu anü di kpa gba Kayafa, te di mere kpara füh kpökpö ka wü *Yisaraye. Angü wü mere *kovo ka wü Yisarayele biti te-wü eyi kpala, teka akolo ngü ka Yesu.

⁵⁸ Amba Petero, mü ngbü fi bü efa nga wü Yesu mba kpa sisi gbü zi, zalü koro di etambasü ka mere kpara füh kpökpö la. Fü mü anü ari angbü kötö esüka wü kpara ka tima ka mere kpara la, teka awu ngü te wüh ena amere de Yesu.

⁵⁹ Fü wü angbe cögbörö kpara la abiti te-wü, akpo da egiri mene wü kpara, te ena amala ngü eküte Yesu de wu, gü ba, "Engu mere *siti ngü eyi fanü," teka de ani mörö engu tete na. ⁶⁰ Wüh giri ngü la ma, wüh maka nda-wü de! Angü mere bi wü kpara, te ewü koro mala siti ngü eküte Yesu ne, ngü ka-ewü ka-ye 'buru kpikpi ye kpikpi ye, angü ah ka-ye 'buru de wu. Fü wü gara kpara 'basu ayia arü, amala ngü eküte Yesu de wu, ⁶¹ gü ba, "Komoko ne mala ta siti ngü, gü ba, 'Ni ena amürü Mere Kambü ka-ani, ka Me, te wü kundu ani ji ne, 'buru asidi, fü ni adu aji alügü gbü sikpi ngbee bata kükürü.' "

⁶² Te mere kpara füh kpökpö la je ngü la bala, fü ah ayia arü tikpi, amala ngü fü Yesu, gü ba, "De-mü, mü je la bi wü ngü, te wü kpara ngbü emala eküte mü ne! Mü ti alügü ngü de?" ⁶³ Fü Yesu anga ka-ye tüü, ah lügü ngü nda de. Fü mere kpara füh kpökpö la adu amala ngü fü Yesu, gü ba, "Ma ngbü ekina mü te iri Me! Mü mala la zu ngü fü a! Mü ngbü de Ye Me, te engu tima füh kotö ne, teka aküwa a?" ⁶⁴ Fü

Yesu alügü ngü fefe, gü ba, "Ah ngbü bala, mü mala eyi dela. Amba ngü te ma ngbü emala fü yi dene, ah de kpeke ngü. Te gara, yi ena awu ra, *Ye Kpara ka Kpi, te ma ena angbü gbü kokpa ka Me, baka Mere Miri! Fü ra adu kphak akoro sene, de mere wazi ka Me, baka agö te biti te-ye teka ali!"

⁶⁵ Te mere kpara füh kpökpö je ngü te Yesu mala la, fü ah ayia asörö bongo de eküte ye ne 'duwa traa! Fü engu amala ngü, gü ba, "Apa! Komoko ne le afü te-ye ba Me! Yi wu eyi? Ngü nza eyi dela! Nih edu kphak agiri kpara, te ena amala nga siti ngü kaka, neh teka ne? Ah mala siti ngü ka-ye tine cu eyi de komö ye dela!" ⁶⁶ Yi ngbü efi nda-yi neh baye?" Fü wü kpara la angö te nga wü 'buru woo, gü ba, "Engu de siti kpara! Wüh mörö engu amörö!"

⁶⁷ Fütanga ngü la, fü ewü ayia akpo da esü ngüsü gbügbüra na, da emi engu, kphak da ebebe engu. ⁶⁸ Fü ewü angbü emala ngü fefe, gü ba, "Te ye de Ye Me la, de ye gü la iri kpara, te ngbü emi ye ne, fü ani!"

Dene ngü te Petero cere nga ye di

Marako 14:66-72; Luka 22:56-62; Yüwane 18:15-18, 25-27

⁶⁹ Baka te Petero ngbü ka-ye fi etambasü ka mere kpara la, fü gara jaji würüse, kpara ka tima ka mere kpara la, ayia akoro aceka jia Petero, ayi-tata na, gü ba, "Ye de neh da? Ye de süka wü kpara te ngbü endoro gbü nga Yesu \$ ne de?" ⁷⁰ Fü cürü ayia ari te Petero. Fü ah ayia acere nga ye, gbü jia ewü ghere, gü ba, "Ngü te ye ngbü emala la, ni wu nda-ni de! Ye gü neh fe?"

⁷¹ Fü Petero ayia ka-ye sela, anü angbü kpa emöngiti ka 'baranga. Fü gara jaji würüse ka mere kpara la adu kphak awu engu, anü amala nganga fü wü kpara, te ewü ngbü de sela ne, gü ba "Wü ceka la! Komoko la, ah ka-ye de *kpara ka Yesu!*" ⁷² Fü Petero adu kphak acere nga ye, ghere! Fü ah ayia akina te-ye, gü ba, "Fanü fanü, ni wu kpara ka-wü la nda-ni kü de!"

⁷³ Fütanga ngü la mba cükü'daye, fü wü gara kpara, de te ewü ngbü gbü 'baranga la, akoro kpaka Petero, amala ngü fefe, gü ba, "Ye zu de kpara ka Yesu, angü ye kphak de kpara ka *Galilaya. Ani ti eyi awu ngü la, teka ri ye." ⁷⁴ Fü Petero ayia akina te-ye kpo kpo kpo, gü ba, "Ma emala fü yi dene zu ngü te iri Me! Ma wu ngü ka komoko la nda-ra kü de! Ma su wu de!" Petero bü te emala ngü la bala, fü moko-ngü ayia ami koko. ⁷⁵ Fü Petero adu afi nga ri Yesu, de ta te engu mala fü ye,

gü ba, "O moko-ngü mī koko la de, ye ena acere nga ye, du bata, gü ba, 'Ni wu ni de,' ne." Fū Petero ayia akoro kpa etanü, akpo da eku gba, de mere cinga emagama ye 'duwa ba-neh-ene-la.

27

Dene ngü ka kpi ka Yuda Keriyota

¹ Bū gügü kpurutokokpi, fū wū mere *kovo ka wū Yisaraye abiti te-wū, aro mō esüka wū, teka ngü ka Yesu, gü ba, "Ah le de wüh mörö engu asidi." ² Fū ewü aza Yesu, anü de engu engagira Miri *Pilatü, te mere miri ka wū *Rüma o engu gbü nzö wū kpara ka *Yudaya ne. Amba wüh i kpakpa na fi bü ai.

³ Fū *Yuda Keriyota, kpara te to Yesu fū wū vügü ne, awu, gü ba, wüh kolo ngü ka Yesu eyi esiti, wüh za engu nü di eyi engagira Miri Pilatü, teka amörö engu asidi. Fū mamagama ayia akolo teka ngü la. Fū engu ayia aza jiasse teke biri de füh ye nzükpa, te wüh to fū ye ne, anü di, alügü kpaka wū mere wū kovo la, ⁴ amala ngü fū ewü, gü ba, "Ma mere *siti ngü eyi! Ma to züka kpara eyi fū kpi!" Fū wū mere kpara la alügü ngü fū Keriyota, gü ba, "Ah de ngü ka-ani de! Ah de ngü ka-ye!" ⁵ Fū Keriyota ayia aza jiasse la, amoko esaka ye kötö, kpa esa *Mere Kambü ka Me la. Fū ah ayia anü agi te-ye, amörö.

⁶ Fū wū mere kovo ka wū Yisaraye ayia, aro jiasse la. Fū ewü amala ngü, gü ba, "Jiasse dela, ah de jiasse ka ngüte kpara. Ani ti aza, ao gbü kombo, amere tima ka Me di de, angü riri ka-ani gü ba, jiasse te wüh to teka ngüte kpara la, wüh ti amere tima ka Me di de." ⁷ Fū ewü adu amaka fingangü, gü ba, "Ah le de ani za jiasse la, anü ase sü di, teka fū ani angbü eti wū ganzi kpara gbügbü na." Fū ewü anü, ase sü la esaka wū kpara, te ewü ngbü efo sila. Angü sü la, ah ta de sü te wüh ngbü ecö tö ka sila ka-wü tete. ⁸ Si-ngü te wüh du gü iri sü la tete, gü ba, "Sü ka ngüte" ne, angü wüh se sü la de jiasse, te wū kovo to fū Keriyota teka Yesu ne.

⁹⁻¹⁰ Ngü ka jiasse te mere te-ye bala, ah baka ngü ta te *mürü dofo Yeremaya, ba ta gügü gbü *Ngari Me ne, gü ba, "Jiasse de te wüh za teka ase sü ka kpara te ngbü efo sila ne, ah de jiasse teke biri de füh ye nzükpa, te di baka jiasse ta te wü di enga Yisaraye ngbü ese labi di."

Dene ngü ka Yesu engagira Miri Pilatü

Marako 15:1-15; Luka 23:1-5, 13-25; Yüwane 18:28-40; 19:4-16

¹¹ Te wüh koro de Yesu engagira Miri *Pilatü, fū miri arü ayi-ta Yesu, gü ba dene, "De-mü, wüh gü ba, mü de Miri ka

wü *Yisaraye ne, ngü la fanü?" Yesu gü ba, "Ah bü de te mü mala la."

¹² Fū wū mere *kovo ka wū Yisaraye akpo da emala bi wū kpeke ngü eküte Yesu de wu. Amba Yesu lügü ngü fū ewü nda de. ¹³ Fū Miri Pilatü adu amala ngü fū Yesu, gü ba, "Bi wü ngü de te wü kpara ne ngbü emala eküte mü ne, mü je nda-mü de? Te mü nga bü tii de bane?" ¹⁴ Fū Yesu anga ka-ye tii. Ah lügü ngü fefe na nda-ye kphah de. Fū ngü la aga gbü jia Miri Pilatü 'duwa ba-neh-ene-la.

¹⁵ Ta gbü wü re la, gbü mere sikpi ka *Pasika 'buru, Miri Pilatü ngbü ta ece kpa te gara kpara ka ku biringbö, baka e te wü di enga Yisaraye ngbü ele. ¹⁶ Amba gbü wü sikpi la, gara kpara ta ladü agbü ku kpala, de iri ye Baraba, * te wü kpara wu ngü kaka 'buru kpo, angü ah ngbü ta emere gü teka tö ka-wü. ¹⁷⁻¹⁸ Fū mere bi wü kpara aci, abiti te-wü kpaka Miri Pilatü, teka ayi-tata, de ah ce kpa te kpara biringbö ka ku fū ani. Amba Miri Pilatü wu eyi, gü ba, maguma wü kovo la siti eküte Yesu eyi, fū ewü aza engu, akoro di engagira ni ne, de ni mörö engu asidi. Teku ngü la, fū Pilatü angbü egiri kaje, de ni küwa Yesu esaka ewü. Fū Pilatü arü amala ngü fū mere bi wü kpara la, gü ba dene, "Wü le, de ni lügü fū wü neh da? Ni ena alügü Baraba? Anga ni ena ace kpa te Yesu, te wü ngbü ei engu, gü ba, *Kurisito ne?"

¹⁹ O Miri Pilatü ngbü tete füh kpökpö teka akolo ngü ka Yesu, fū wara ka atima ngü fefe, gü ba, "Wati ni deyi, ye ceka 'be! Ye mere e ato kpa ye eküte züka kpara la nda-ye de! Angü gbü biti ne, ni roto engu, fū ngü la ato mere cinga fū ni."

²⁰ Gbü ngü la, fū wū mere *kovo ka wū Yisaraye akpo da efiti mere bi wü kpara la, da emala ngü fū ewü, teka de wüh yi-ta miri, de ah ce kpa ye te Baraba, de ah mörö Yesu asidi. ²¹ Te di bala, fū Miri Pilatü ayi-ta ewü, gü ba, "Wü le de ni ce neh kpa te da?" Wüh gü ba, "Ani le nda-ani Baraba!" ²² Fū Miri Pilatü adu ayi-ta wü kpara la, gü ba, "Amba Yesu, te yi ngbü ei engu, gü ba, ah de Miri ka wü Yisaraye ne, yi le de ma mere de engu baye?" Fū wü kpara la aci 'buru, alügü ngü de mere ri wü kpa tikpi, gü ba dene, "Wüh mörö engu amörö! Wüh bere engu eküte *rü gbegete!" ²³ Fū Miri Pilatü adu ayi-ta ewü, gü ba, "Wü le de ni mörö engu, neh teka ne? Ah mere ne siti ngü ne?" Fū wü kpara la adu akpo da eba rere, afa engu time ne di ka, gü ba dene, "Wüh mörö engu amörö! Wüh bere engu eküte rü gbegete!"

* 27:16 27:16 Gara iri Baraba kphah de Yesu.

²⁴ Te Miri Pilatü wu, gü ba, ni ti amere gara ngü tîne de, angü mere bi wü kpara la zoro fi bü ngü la gömö wü kpekpeke ne, fü engu ayia aza ngu, azürü kpa ye di, gbü jia wü kpara la 'buru. Fü ah adu amala ngü fü ewü, gü ba, "Ngüte Yesu, mere e angbü gbü nzö ni de! Angü ah de ngü ka-wü, te wü le eyi amere bala!"
²⁵ Te wü kpara la je ngü la bala, fü ewü aci 'buru, amala ngü, gü ba, "Ah le de ngüte komoko la ngbü gbü nzö a, de wü kundu a, fi mere badi."

²⁶ Fü Miri Pilatü ayia ace kpa te Baraba, alügü fü ewü, ba e te ewü le. Fü ah adu amala ngü fü wü marajümiya, de wüh süma Yesu de juru.† Fü ewü asüma Yesu de ka. Fü Miri Pilatü adu aza Yesu, ato fü wü marajümiya ka-ye, de wüh nü, wüh bere engu eküte rü gbegete.

Dene ngü ka wü marajümiya, te ewü ngbü efala Yesu

Marako 15:16-20; Yüwane 19:1-3

²⁷ Fütanga ngü la, fü wü marajümiya ayia aza Yesu, anü di agbü 'baranga, gbü sü ka Miri Pilatü, te wüh ngbü ei, gü ba, Peretoriyama ne. Fü ewü adu ai wü bu wü 'buru, abiti ede Yesu. ²⁸ Fü ewü akpo da emü Yesu, gü ba, "Baka te engu di de mere miri ne, ah le de ani cu ngüngü na." Fü ewü ayia agbi bongu ka Yesu 'buru asidi, adu aza diri ngboro bongu ka-ewü, nzenze baka nda miri la, ato eküküte. ²⁹ Fü ewü agara bibi gbü ti, ato gbü nzö Yesu, baka *madudu ka wü miri. Fü ewü ade e baka gbaraka, ato esasaka baka ngbangba ka miri. Fü ewü akpo angbü ebu nzökuta wü kötö, ba wü kpara te ewü ngbü ecu ngü miri la, gü ba, "Wayi! Mandi fü ye, mere miri ka wü *Yisaraye!" ³⁰ Fü ewü angbü esü ngüsü gbügbüra na, adu aza ngbangba esasaka la, akpo da emi nzönzö na di. ³¹ Te wü marajümiya la fala Yesu nza tete, fü ewü adu agbi nze bongu ka-wü la eküküte asidi, adu ato bongu kaka-na, alügü tete. Fü ewü aza engu, anü di teka abere füh rü gbegete.

Dene ngü ka Yesu, te wüh bere füh rü gbegete

Marako 15:21-32; Luka 23:26-43; Yüwane 19:17-27

³² Te wü marajümiya za Yesu tete, teka anü amörö ne, fü ewü anü amaka te-wü de wü gara komoko de iri ye Simüna, te di de kpara ka Kurene. Fü wü marajümiya azoro engu, ato esa *rü gbegete, te ewü ena abere Yesu fefeh na ne, angü Yesu ngbü ta enü, da eti, da eti, teka tiri rü la. ³³ Fü Simüna abi mere rü la, anü zalü akoro di agbü Gologota, sü te ewü ena

amörö Yesu tete na la. Gologota la, ah baka e te wüh gü ba, "Sü ka biki-nzö," angü ah de sü te wüh ngbü emörö siti wü kpara tete.

³⁴ Fü wü gara kpara awu cinga Yesu. Fü ewü aza ngu *vinü, te wüh mere de rü gbü ye, süsü bala, ato fü Yesu, de ah nzö. Amba, te Yesu re vinü la, ah le anzö nda de.

³⁵ Fü wü marajümiya la aza Yesu, agbi bongu kaka-na asidi, aza engu, abere eküte rü gbegete, gö gö gö! adu ae rü gbegete la tikpi. Fü ewü aza bongu ka Yesu, akpo da esö gümare teka wü bongu kaka la. ³⁶⁻³⁸ Fü ewü aza ngü te wüh ba teka Yesu, abere eküte rü gbegete la, to tikpi, te gü ba, "Dene Yesu, Mere Miri ka wü *Yisaraye." Fü ewü ayia aza wü mürü zi 'basu, abere ewü eküte wü rü gbegete ka-ewü ede nda Yesu, gara gbü kokpa, gara gbü kamisi. Fütanga ngü la, fü ewü adu angbü kötö, da efete Yesu, angü wü kpara kaka ena akoro aküwa engu.

³⁹ Fü wü gara kpara, te ewü ngbü enü te kaje la, awu Yesu. Fü ewü angbü egü nzö wü de tadu, da esoko engu, ⁴⁰ gü ba dene, "Ata! De-ye deyü, ye gü ta, ga, 'Ni de mere mürü wazi. Ni ti eyi amürü *Mere Kambü ka Me, adu afa gara gbü sikipi ngbee bata!' Te ye de Ye Me fanü fanü la, de ye küwa te-ye, ye kö kötö!" ⁴¹ Wü mere *kovo ka wü Yisaraye ngbü ta kpah efala engu, gü ba, ⁴² "Komoko la ngbü ta eküwa wü gara kpara. Ah mere neh baye, te engu ti aküwa te-ye de ne? Te engu ena adi ta de Mere Miri, te Me tima fü ani fanü la, ah le ta de engu küwa te-ye, kö kötö, teka fü ani awu mere wazi kaka, adu ale ngü kaka. ⁴³ Angü ah ngbü ta emala ngü, gü ba, 'Ni de Ye Me, Me ena aküwa ni.' Te ah bala la, ah mbi! Ani ena awu ngü la. Te Me ngbü ele ngü kaka fanü la, de ah küwa engu!" ⁴⁴ Fü wü mürü zi de 'basu, ta te wüh bere edede na ne, angbü kpah esoko engu bala.

Dene ngü ka kpi ka Yesu

Marako 15:33-41; Luka 23:44-49; Yüwane 19:28-30

⁴⁵ Fütanga ngü la, ah te enü akoro etü ra, fü sü ayia ati 'duwa mbirri, baka biti la. Fü e la ayiri bala, zalü akoro gbü lö-ra bata ka tamurago.

⁴⁶ Gbü lö-ra engu la, fü Yesu ayia aku gba de mere ri ye kpa tikpi, gü ba dene, "Eli, Eli, lama sabakatani?" Ah baka e te wüh gü ba dene, "Me, Mere Miri ka-ra, mü ce ra kpi kpi ra, neh teka ne?"

⁴⁷ Wü gara kpara, ta te wüh rü gbü sü la, wüh je ngü, te Yesu mala la, mbi mbi

† 27:26 27:26 Juru te wüh süma Yesu di, ah de juru konü de biki gbü ye.

nda-wü de. Fù gara ewü afi, gü ba dene, "Ah ngbü dela neh ei *İliya, de ah koro, ah küwa ni?"⁴⁸ Fù biri kpara esüka ewü, ayia bü kere de woro, anü aza e ba lifa, fö'dö fö'dö bala, agü gbü fi, ato te nzö e baka gbaraka la, ae, ato te komö Yesu, de ah 'bü.⁴⁹ Fù gara ewü amala ngü fefe, gü ba, "Ye ce la engu ace, ani ceka la. E-wu neh da, anga İliya ena akoro aküwa engu ya?"

⁵⁰ Fütanga ngü la, fù Yesu adu kpah, aku gba de mere ri ye kpa tikpi. Fù ah ayia ace maguma ye, akpi.

⁵¹ Gbü lö-ra te Yesu kpi tete na la, fù mere bongo, ta te wüh i, kolo tü *Mere Kambü ka Me agbü Yerüsalema di, baka ngisi ne, ayia asörö tü ye de tete-ye mbaaa, kü kpa tikpi, ngbüüü kötö! Fù tö ayia ayiki te-ye, fù wü da angbengbe te-wü. Fù ngü la angbü gbü jia wü kpara ba sirimbi.⁵² Fù wü mbükü ayia aü te-wü. Fù mere bi wü kpara ka Me, ta te ewü kpi ne, fù Me azükü ewü 'buru gbü kpi la.⁵³ Fütanga ngü te Yesu zükü tete gbü kpi ne, fù wü kpara ka Me, te wüh zükü la, akoro anü arı 'buru agbü Yerüsalema. Fù mere bi wü kpara awu ewü cu de jia wü.

Dela ta ngü te Yesu kpi tete na.

⁵⁴ Mere kpara ka wü marajümiya, de wü marajümiya ka-ye, te ewü ngbü efete Yesu ne, fù ewü awu yiki-tö, bete ra te ünü teka lö-ra bata ne, fù wü ngü la angbü gbü jia ewü baka sirimbi. Fù ewü akpe cürü ka ngü la, gü ba, "Apa! Te ah bala la, komoko ne, ah ka-ye de Ye Me fanü fanü!"

⁵⁵⁻⁵⁶ Bi wü wüürse, ta te ewü ngbü efa nga Yesu ne, kpah ladü gbü sü te Yesu kpi tete na la. Wüh de wü *Mariya Egba-Magadala, bete *Mariya ni ye Yakobo ake Yüsa, bete wara Zebedayo, te di de ni ye wü *Yüwane ake *Yakobo, kpah de mere bi wü bu wü, ta te ewü nü koro agbü Yerüsalema de wü Yesu ne. Angü te wü Yesu ngbü ta la da endoro agbü *Galilaya ne, wü wüürse la ngbü ta efa nganga na, da ele ta-ngü tete. Gbü lö-ra te Yesu kpi tete na, wü wüürse la ngbü nda-wü kpala, mba canza edere sü, da eceka kpi. Fù ewü awu ngü ka kpi kaka-na la 'buru.

Dene ngü teka kö Yesu

Marako 15:42-47; Luka 23:50-56; Yüwane 19:38-42

⁵⁷ Gara *kpara ka Yesu ta ladü gbü sü la, de iri ye *Yüsefa, kpara ka Arimatayo,[‡] te di de mere bi wü e esaka ye.⁵⁸ Te Yesu kpi tete, fù engu anü kpaka Miri *Pilatü etamurago la, anda'ba te-ye fefe na, gü ba dene, "Mere kpara, ni le ayi-ta ye de gara ngü biringbö. Te ah ti gbü jia ye la, ni ele

de ye to kö Yesu fù ni, ni ti." Fù Miri Pilatü ayia ale de wüh to kö Yesu fefe, de ah nü di, ah ti.

⁵⁹ Fù wü Yüsefa ayia anü, aza kö Yesu eküte rü gbegete asidi, anü di, agaga de züka bu bongo, te engu se toto.⁶⁰ Fù ewü aza kö Yesu, anü di, ati gbü to mbükü, ta te engu jı fi ye gbü da, angü gele ka wü *Yisaraye ta bala. Fù ewü awara gara mere siti ngbüükü da, ao emö mbükü la, ani di. Fù ewü adu anü sü ka-wü.

⁶¹ Fù *Mariya Egba-Magadala ake iri ye, *Mariya ni ye wü Yüsa ne, fù ewü angbü ka-wü mba canza kötö, da eceka kpi mbiü to kpaka mbükü la. Fù ewü awu sü te ewü ti Yesu tete na ne.

Dela ngü ta te wüh ti Yesu tete na.

Dene ngü ka wü marajümiya, te ewü ngbü efete mbükü Yesu

⁶² Baka egambi la, te di de *sikpi ka Me ka wü *Yisaraye ne, fù wü *mere kovo ka wü Yisaraye, de wü *Farusi ayia abiti te-wü 'buru, anü akoro kpaka Miri *Pilatü.

⁶³ Fù ewü amala ngü fefe, gü ba, "Mere kpara, ani ngbü efi nga gara ngü, ta te müür wu la ngbü emala, o engu di ta la ladü de jia ye ne. Angü ah ngbü ta emala, gü ba, 'Te ni ena kpi la, gbü *ebabata sikpi, ni ena adu azükü.'⁶⁴ Te di bala, ani ngbü efi, gü ba, ah ena adi mbi, te ye ena atima wü marajümiya, teka anü aceka kpi fütanga mbümbükü la mbi mbi mbi, zalü akoro di gbü ebabata sikpi la. Angü wü kpara kaka-na ena adu akoro, azi kökö na, atafa di. Fù ewü adu afü ngü, angbü esu wu fù wü kpara, gü ba, 'Yesu, mere kpara ka-ani, zükü ka-ye eyi gbü kpi!' Te di bala, mene wu, de te wüh ena adu asu sidi ne, ah ena afa gigina na ne tine ka!"⁶⁵ Fù Miri Pilatü alügü ngü fù ewü, agü ba, "Wayi, ah mbi, yi za wü marajümiya la, yi nü de ewü o kpala, teka de wüh ceka kpi fütanga mbümbükü la. De yi mere ngü la ba e te yi le."

⁶⁶ Fù wü mere kpara la ayia de wü marajümiya la, anü kpa füh mbükü Yesu, adete dere mbükü la gö gö gö! Fù ewü amala ngü fù wü marajümiya la, de wüh ngbü kpala, adi efete mö mbükü la kpekepeke, angü wüh ena azi kö Yesu.

28

Dene ngü ka Yesu te zükü gbü kpi

Marako 16:1-10; Luka 24:1-12; Yüwane 20:1-10

¹ Gügü kpurutokopki, gbü sikpi ka biri ka wü *Yisaraye, te di de sikpi ka Me kanih ne, fù *Mariya Egba-Magadala ayia ake

‡ 27:57 27:57 Arimatayo de sü ka wü Yüsefa, te wüh bi engu tete.

gara kiri ye, *Mariya ne, anü teka aceka mbükü Yesu. ²⁻⁴ Baka te wü wüürüse la yia ngbü enü tete, fü yiki-tö ayia amere te-ye kpa füh mbükü Yesu kpala. Fü wü marajümiya, ta te ewü ngbü eceka kpi fütanga mbükü Yesu ne, ayia awu *malayika ka Me. Fü ewü akpo angbü eyi ayi de mere cürü. Fü ewü atiti 'buru kötö, angbü baka wü kövo la. Fü malayika la ayia anzi mere da de emö mbükü la asidi.

Te wü wüürüse la nü koro kpa füh mbükü kpala, fü ewü aceka kpi bane, gbo! te malayika ka Me, te ngbü ka-ye ga füh mere da, ta te wüh o emö mbükü ne! Gbügbüra na ngbü eci aci lelele bala! Bongo kaka vi kpah avi kpilili! ⁵ Fü malayika la arü amala ngü fü wü wüürüse la, gü ba, "Yi kpe cürü de! Ma wu eyi, gü ba, yi ngbü egiri Yesu, ta te wüh bere engu füh rü ghegbete ne. ⁶ Engu sene nda ma, angü ah zükü ka-ye gbü kpi eyi, baka ta te engu mala fü yi ne. Yi ceka la sanga, ta te ewü o kökö gbügbü na ne. Ah eyi kükürü! ⁷ Te di bala, yi nü enü kere kere, yi mala nganga na fü wü kpapa kaka, gü ba dene, "Yesu zükü eyi! Ah tafa ka-ye eyi kpa engagira nü agbü *Galilaya. Wü nü enü, wü ena amaka engu kpala!" Dela ngü te ma le amala fü yi, ah dela."

⁸ Te wü wüürüse la je ngü gömö malayika bala, fü ewü ayia kpa füh mbükü la 'duwa kere, de mere cürü te wü, kpah de mere tadu emagama wü teka ngü la. Fü ewü anü de woro, teka amala nga ngü la fü du wü *kpapa ka Yesu la.

⁹ O wüh ngbü la bü enü tete, fü ewü aceka kpi, gbo! te Yesu, te rü te kaje. Fü ah agü mandí fü ewü, gü ba, "Me di de yi!" Fü wü wüürüse la akoro kpakaka na, ati, abu nzökuta wü kötö, azoro lölö na, da ecu ngüngü na. ¹⁰ Fü Yesu amala ngü fü ewü, gü ba. "Yi kpe cürü de! Yi nü enü, yi mala fü wü di enga wüna, de wüh nü agbü Galilaya, angü wüh ena amaka ra kpala." Fü wü wüürüse la ayia anü amala ngü la, ba e te Yesu mala fü ewü la.

Dene ngü ka wü marajümiya, te ewü ngbü efete mbükü Yesu

¹¹ Amba, o wü wüürüse la nü koro kpa füh mbükü Yesu la de, fü wü marajümiya, ta te ewü ngbü eceka kpi fütanga mbükü Yesu ne, fü wazi ewü ayia adu akoro. Fü ewü ayia sela 'duwa, anü akoro agbü Yerüsalema, amala nga wü ngü, de te ngbü mere te-ye kpa füh mbükü Yesu ne, 'buru fü wü mere *kovo ka wü Yisaraye, gü ba dene, "O ani ngbü efete mbükü, fü yiki-tö ayia amere te-ye. Fü *malayika ka Me akoro, anzi mere da de emö mbükü la asidi. Titine kö Yesu gbü mbükü la nda ma!"

¹² Fü wü mere kovo la ayia ai wü gara wü bu wü, abiti, teka aro mö de ewü, agiri mani, te ani ena amere teka ngü la. Fü ewü afi nga gara mani, amaka. Fü ewü ayia aza mere bi jase, ato fü wü marajümiya la, ¹³ amala ngü fü ewü kpekpe, gü ba, "Ah le fü yi amala ngü la fü wü kpapa, gü ba, 'Wü *kpapa ka Yesu koro gbü biti ne, o ani ngbü era ara, azi kökö na, anü sü di.' ¹⁴ Te di bala, yi mere e akpe cürü de. Angü a wu eyi, gü ba, te Miri *Pilatü je, gü ba, wüh zi kö Yesu eyi, o yi ngbü era ara la, ah ena azinga, fü ah ato kuru te yi. Amba, ngü ma, a ena anü, agu mamagama me-a." ¹⁵ Fü wü marajümiya la aje riri ka wü mere kovo la, aza jase la. Fü ewü akpo da esu wu la fü wü kpapa, gü ba, "Wü kpapa ka Yesu koro zi kö Yesu eyi." Fü ngü la awü, abaya esüka wü di enga *Yisaraye 'buru, zalü akoro di enatikine dene.

Dene ngü te Yesu gü tamu ye di fü wü kpapa ka-ye

Marako 16:14-18; Luka 24:36-39; Yüwane 20:19-23; Mürü Tima 1:6-8

¹⁶ Fütanga ngü la, fü du wü *kpapa ka Yesu, nzükpa de füh ye biri ne, ayia anü agbü *Galilaya. Fü ewü anü ali kpa füh gümba, ta te Yesu mala nganga na fü ewü ne. ¹⁷ Fü ewü akoro amaka Yesu kpala. Baka te ewü wu Yesu, fü ngü la aga gbü jia ewü afa sü. Fü ewü abu nzökuta wü kötö, agbo nga iri na. Amba maguma gara ewü fi bü 'basu 'basu, angü ngü la ngbü gbü jia ewü baka sirimbi.

¹⁸ Gbü gara sikipi, fü Yesu akoro kpah, amala ngü fü ewü, gü ba, "Wüba Me to mere wazi eyi fere, mene wazi agbü kpi, de mene füh kotö ne 'buru esaka ra. ¹⁹ Te di bala, yi baya, yi nü te nga sü füh kotö ne 'buru, de yi mala ngari ra fü nguwa wü kpapa 'buru nde. Te wüh le ngü ka-ra eyi la, de yi to *babatiza fü ewü te iri Wüba Me, de iri ra Ye Me, kpah de iri *Nzila Wazi Me. ²⁰ Yi mala nga wü riri, ta te ma mala fü yi ne, 'buru fü ewü, de wüh di emere kpah bala. Ah le fü yi awu awu, gü ba, gbü wü sikipi 'buru, ma ena angbü de wü yi tundu, zalü akoro di gbü *adu sikipi, te ma ena adu akoro tete füh kotö ne."

Dela ngü ta te Miri Yesu mala fü wü kpapa ka-ye, te engu zükü tete gbü kpi.

Dene ngü ta te Marako ba teka Yesu Kurisito

Masere si-ngü

Kpara te ba buku ne ena adi de Marako, te di de mürü ye Baranaba ne (Kolosayí 4:5). Ah ngbü ta kpah endoro de wü Pawülü ake Baranaba, teka mba wü laķi cükü'daye (Mürü Tima 12:25; 13:5). İri ni ye na de *Mariya. Gba wü ta agbü Yerüsalema, gbü sü te mere bi wü *kpara ka Yesu ngbü ta ebite te-wü tete na ne (Mürü Tima 12:12).

Fütanga ngü la, fü Marako adu akoro tıne kpara, te ngbü ele ta-ngü te Petero, gbü tima ka Yesu (1 Petero 5:13). Gbü wü laķi ta te Yesu ngbü endoro tete na, da emala ngari Me ne, Marako ka-ye ta la jaji, ah ndoro de wü Yesu fa sü de. Te di bala, wüh gü ba, mere bi wü ngü te Marako ba teka Yesu ne, ah je wü ngü la gömö Petero.

Marako ba wü ngü ne, o engu di ka-ye ta agbü *Rüma. Ah ba ngü ne fü wü kpara ka Rüma, te ewü di de wü di engä *Yisarayeleye nda-wü de ne. Dela si-ngü te engu le amala mere bi ngü, ta te wü *mürü dofo mala teka Yesu ne, nda de ne. Ah mala kpah wü gara si-ngü teka gele ka wü di engä Yisarayeleye, angü wü Rüma wa si-ngü teka gele la nda-wü de.

Marako gü ba, "Yesu de Ye Me (Sapıta 1:1), ah kpah de *Ye Kpara ka Kpı, te engu koro füh kotó ne, fü ah ato te-ye akpı, teka afa wü kpara gbü *siti ngü ka-ewü, teka de wüh maka *küküwa ka badi (Sapıta 10:45)." Marako mala mere bi ngü, ta te Yesu ngbü ri wü kpara di ne, 'buru nda de. Amba Marako ngbü sere ngü teka Yesu, gü ba, "Yesu ka-ye de mere mürü wazi, te ngbü mere bi wü talara ngü, baka te engu ngbü küwa wü mürü keke. Ah ngbü liki kpah *siti wü di engä me guvu wü gara kpara. Engu ngbü boro kpah siti ngü ka wü kpara."

Marako ba ngü ne ta gbü ngü *Giriki. Mene köcökpa ta te Marako ba za me-ye ne, tıtıne ah esaka nih nda ma. Mene köcökpa te di esaka nih ne, ah ka-ye bü mene ewü, ta te wü gara kpara ba, te nga wü ngü ta te Marako ba ne. Ah ge baka te adu ngü ta te Marako ba, teka züzükü ka Yesu gbü kpi ne, düürü ka-ye eyi. Angü ngü la nü rü bü etungba gbü sapıta 16:8. Sidi nga ngü la, ah baka te gara kpara du ba ngü teka züzükü ka Yesu ne me-ye, füh du ngü ka Marako la (Sapıta 16:9-20). Wü kpara te ewü giri ngü gbü *Ngari Me fa

sü ne, gü ba, wü ngü de gbü Sapıta 16:9-20 ne, Marako ba me-ye nda de. Amba wü ngü de te gara wü kpara la ba ne, ah ka-ye de zu ngü, angü ah tı kpini de wü ngü te wü Matayo ake Luka ba ne. Te di bala ne, wü ngü la ena angbü ka-wü da wü bala.

Wü ngü te mü ena amaka gbü buku ka Marako, wüh dene.

Sapıta 1:1-13 Makpo ngü teka ngü ka Yesu,

Sapıta 1:14-9:50 Wü ngü ta te Yesu mere agbü Galılaya,

Sapıta 10:1-52 Wü ngü ta te Yesu mere, o engu yia tete agbü Galılaya, da enü agbü Yerüsalema ne

Sapıta 11:1-15:47 Adu ngü ka Yesu, bete ngü ka kpi kaka-na

Sapıta 16:1-8 Ngü ka züzükü ka Yesu gbü kpi

Sapıta 16:9-20 Adu ngü, te wüh ba füh ngü te Marako ba ne

¹ Dene züka tofo ngü ka Me teka Yesu *Kurisito, te di de Ye Me.

Matayo 3:1-12; Luka 3:1-18; Yüwane 1:26-28

² Ngü la kpo ba e ta te wü Yısaya, ba gbü *Ngari Me ta gügü, o wü bi Yesu la de, gü ba, "Me mala ngü fü Ye ye, gü ba, 'Ni ena atima mürü tima ka-ni kpa engagira nü, teka areke kaje fü ye.' ³ *Mürü dofo Yısaya gü ba, "Gara kpara ena akoro, angbü emala ngü de mere ri ye kpa etü gü, gü ba dene, 'Mere Miri, te ena aküwa ani ne, ah te ekoro! Ah le de wü reke kaje fefe! Wü ni wü cudu, wü o kpini, teka fü engu anü tete na.' [†]

⁴ Mürü tima engu la, ah de *Yüwane Mürü Babatıza. Fü engu akoro fütanga mere bi wü re, angbü kpa etü gü, da emala ngari Me fü wü kpara kpala. Fü mere bi wü kpara angbü ekoro kpakaka na, adi eje ngari Me gögömö na. Fü ah angbü emala ngü fü ewü, gü ba dene, "Wü ce *siti ngü ka-wü 'buru asidi, wü fü maguma wü, teka fü wü aza *babatıza, fü Me aboro siti ngü ka-wü 'buru." Dela ngü ta te Yüwane mala fü wü kpara la, te engu ngbü eto babatıza fü ewü. ⁵ Fü mere bi wü kpara ayia anü kpakaka na, teka aje ngari Me gögömö na. Wü gara ewü koro agbü Yerüsalema, de wü gara nga nzó köti ka *Yudaya 'buru. Te wü kpara la je ngü ka Me gömö Yüwane de bala, fü maguma ewü ayia agürü. Fü ewü akpo da emala nga wü siti ngü ka-wü fü Me de cınga. Fü Yüwane angbü eto babatıza fü ewü gbü ngu Yürüdene.

⁶ Yüwane ngbü ta eto bongo ka-ye te ewü gbü gbü su nü de iri ye kamele, sisiti

* 1:2 1:2 Mü ena amaka ngü la gbü buku ka Malakı 3:1.

† 1:3 1:3 Mü ena amaka ngü la gbü buku ka Yısaya 40:3.

gbulukusu bane. Fū ah ngbū ei ku konū etadu ye. Zū-e kaka-na ta nda-ra de, angū mbira te di baka eci, bete wū, te engu ngbū emaka agbū gū la.

⁷ Fū Yūwane amala ngū ka Me fū wū kpara, gū ba dene, “Me tima gara kpara eyi, te ena akoro arī yi sidi nga ra, wawazi na fa nda-ra ka. Ma nda-ra bū baka labi kaka, te ena areke kaje fefe. Ma be teka tima la nda-ra de, angū engu me-ye de mere kpara fere. ⁸ Nda-ra, ma ngbū eto babatiza fū yi de ngu kükürü. Amba nda-ka, ah ena ato babatiza fū yi de wazi ka *Nzila Wazi Me, teka fū yi angbū emere ngū ka Me ereke areke.”

Dene ngū ka babatiza ka Yesu

Matayo 3:13-17; 4:1-17; Luka 3:21-23;

4:1-15

⁹ Baka ta te Yūwane ngbū emala ngari Me kpa etū gū ne, Yesu ngbū ka-ye gbū gara kötī de irī ye Nazareta.[‡] Gbū gara ra, fū Yesu ayia anū kpaka Yūwane kpa etū gū la. Fū Yūwane ayia ato *babatiza fefe gbū ngu Yürüdene. ¹⁰ Te engu to babatiza nza tete, fū Yesu ayia akoro kpa fūh gūmba. Ah te eceka kpī de, gbo! te kpī te ū te-ye. Fū *Nzila Wazi Me akoro kpa gbū kpī baka mö, arū gbū nzō Yesu. ¹¹ Fū ri Me awū kpa gbū kpī la, gū ba dene, “Mū zu de Ye ra, te maguma ra ngbū tete. Ngū ka-mū reke gbū jia ra 'duwa ba-neh-ene-la.”

¹² Fütanga ngū la, fū Nzila Wazi Me aza Yesu, anū di kpa etū gū, ¹³ kpa gbū sū ka siti wū nū. Fū ah ara kpala sīkpī teke 'basu. Fū *Satan akoro afiti Yesu kpala ma. Fū wū *malayika ka Me angbū ta ele ta-ngū te Yesu kpala.

¹⁴ Fütanga ngū la, fū ewū azoro Yūwane, anū di agū agbū ku. Te Yesu ye ngū la, fū ah ayia ace sū la, adu ka-ye agbū *Galilaya. Fū ah angbū endoro da emala ngari Me fū wū kpara kpala, ¹⁵ gū ba dene, “Mere sīkpī koro eyi gbamari. Miri te Me tima teka akūwa wū ne, koro eyi. Te di bala, wū ce *siti ngū ka-wū, de wū le to ngū ka Me de maguma wū biringbö.”

Dene ngū ka gina wū kpara ta te Yesu i ewū

Matayo 4:18-22

¹⁶ Gbū gara ra, fū Yesu ayia anū andoro era mere ngu de irī ye *Galilaya. Fū engu akoro amaka wū gara komoko 'basu, te ewū ngbū egū yimba ka-wū gbū ngu teka azoro si, angū ah de tima ka-ewū. Ah de Simūna Petero ake enga ni ye, de irī ye Anderiya. ¹⁷ Fū Yesu arū amala ngū fū ewū, gū ba dene, “Yi nū kpakine, yi lala gbū nga ra. Ma ena ao yi, teka angbū efū wū kpara, de wūh le ngū ka Me, da tima

ka si te yi ngbū emere ne.” ¹⁸ Te wūh je ngū la, fū ewū ayia kere, ace tima ka si ka-wū la, te ewū ngbū emere la, adu alala gbū nga Yesu.

¹⁹ Fū wū Yesu ayia sela, anū kpa engagira nū mba cükü'daye. Fū ewū anū amaka wū gara wū kpara 'basu. Ah de wū *Yakobo ake *Yūwane, wū di Zebedayo. Wūh ngbū ka-wū gbū *zabu, da ekpokpo jia yimba ka-wū. ²⁰ Fū Yesu ayia ai ewū kphah bala. Fū ewū ayia ace wō wū, Zebedayo, agbū zabu kpala, de wū kpara ka tima ka-ye. Fū ewū ayia anū alala gbū nga Yesu.

Dene ngū ka Yesu de wū siti wū di enga me

Luka 4:31-37

²¹ Gbū gara ra, fū wū Yesu ayia anū akoro agbū Kaparanama. Fū *sīkpī ka Me amaka ewū kpala. Fū ewū ayia anū arī kpa *esambū ka biti-te. Fū Yesu akpo da erī wū kpara kpala. ²² Fū riri kaka-na la ayia aga gbū jia wū kpara la afa sū. Wūh gū ba, “Riri ka komoko ne ka-ye kpikpi ye. Angū ah ngbū emala mere kpeke ngū, baka kpara te Me tima engu me-ye. Wū kpara ka-ani, te ewū ngbū eri ani de sene ne, wūh ri ani bala nda-wū de.”

²³ Gara komoko ta ladū kpa esambū ka biti-te la, de *siti wū di enga me guvu ye. Fū komoko la ayia akpo da eba rere kpa tikpi, gū ba, ²⁴ “Yesu\$ deyi, tima ka-ani gbū ngū ka-ye nda ma. Ye koro sene teka ne? Tekā amörö ani asidi? Ani wu ye kpo. Ye de zūka kpara te Me tima ye me-ye fūh kotō ne.” ²⁵ Fū Yesu ayia amala ngū fū siti wū di enga me la, gū ba dene, “Yi nga anga, de yi koro guvu komoko la asidi!” ²⁶ Fū siti wū di enga me la ayia agbūrū komoko la, agbo kötō, da eba rere. Fū ewū ayia ace komoko la, akpe, atafa ka-wū.

²⁷ Dela ngū ta te Yesu mere, te engu liki siti wū di enga me di, guvu gara komoko asidi. Fū ngū la aga gbū jia wū kpara 'buru, baka mere ngū cucu. Fū ewū akpo da eyi-ta tete-wū, gū ba dene, “Apa! De bane ne ngū ne? Amba riri ka Yesu ne, ah ka-ye de kpeke riri fanū fanū. Angū ah ngbū eto riri fū siti wū di enga me, fū ewū angbū eje ngū kaka!” ²⁸ Tekā ngū la, fū iri Yesu ayia awū gbū nga nzō wū sū ka *Galilaya 'buru.

Dene ngū ka Yesu te kūwa mere bi wū mürü keke

Matayo 8:14-17; Luka 4:38-41

²⁹ Fütanga ngū la, fū wū Yesu ayia ace *kambū ka biti-te. Fū ewū anū de wū *Yakobo ake *Yūwane, kpa gba

‡ 1:9 1:9 Nazareta ka-ye gbū nga nzō kötī ka Galilaya.

§ 1:24 1:24 Komoko la gū ba, “Yesu de kpara ka Nazareta.”

wü Simüna Petero ake Anderiya. ³⁰ Te wüh koro kpala, fū ewü amaka wügeri ye Simüna, würüse, te keke ngbü emere engu efa sü, te ra ngbü kötö. Küküte 'buru wütü awütü. Fū ewü amala nga würüse la fū Yesu. ³¹ Fū Yesu ayia anü akoro kpaka würüse la, azoro kpakpa na, ae engu tikpi. Fū soko würüse la ayia alofo. Fū würüse la ayia anü amere kümü, ato fū ewü.

³² Etamurago la, te ra ti tete na, fū mere bi wü kpara ayia aza wü mürü keke kawü, bete wü kpara te *siti wü di engu me ngbü emere ewü ne, akoro de ewü kpaka Yesu. ³³ Fū wü kpara gbü sü la aci abiti te-wü gbe gbe gbe kpa emöngiti ka kambü te Yesu di gbügbü na. ³⁴ Fū Yesu ayia aküwa mere bi wü kpara de wü keke eküte wü la 'buru. Fū ah aliki *siti wü di engu me guvu gara ewü asidi. Fū siti wü di engu me la angbü eku gba. Fū Yesu ayia atiri ewü. Kükürü de, angü wüh wu ta eyi, gü ba, Yesu ka-ye de kpara te Me tima engu me-ye füh kotö ne.

Dene ngü ka Yesu, te ndoro da eto ngari Me,

*gbü wü sü ka Galilaya
Luka 4:42-44*

³⁵ Gügü emözepi, o sü lofo la de, fū Yesu ayia kpikpi ye, ace Kapanama, anü akoro kpa gbü gara sü, kpa gbü gü, teka aku gba fū Me. ³⁶ Te wü Simüna Petero zükü tete, Yesu nda ma! Fū ewü ayia anü agiri engu. ³⁷ Fū ewü anü amaka Yesu angbü gü kpala, amala ngü fefe, gü ba dene, "Mere kpara deyü, ani du edu kpa eköti, angü wü kpara 'buru ngbü egiri ye, teka de ye küwa ani." ³⁸ Yesu gü ba, "Ani nü la kpa gbü gara sü, teka fū ni amala ngari Me fū mene wü kpara de kpala. Angü dela tima ka-ni, te Me tima ni tungüngü."

³⁹ Fütanga ngü la, fū Yesu akpo da endoro gbü wü kötö ka *Galilaya 'buru nde, da eri wü kpara de to ngü ka Me, kpa *esambü ka biti-te ka-ewü, kpah da eliki *siti wü di engu me guvu wü gara kpara, te ngbü emere ewü ne, asidi.

Dene ngü te Yesu küwa gara mürü jia kö di

Matayo 8:2-4; Luka 5:12-16

⁴⁰ Gbü gara ra, fū gara komoko ayia akoro kpaka Yesu, de *jia kö te ye. Fū komoko la abu nzökuta ye kötö, anda 'ba te-ye, gü ba, "Ni wu eyi, gü ba, ye de mere mürü wazi fa sü. Te ah 'be gbü jia ye la, de ye reke la mba küte ni ne." ⁴¹ Fū ngü komoko la ake te Yesu afa sü. Fū ah ayia ao kpa ye eküte komoko la, gü ba, "Wayi, ma le eyi. Küte mü reke ereke." ⁴² Fū

jia kö ayia agürü eküte komoko la asidi. Fū küküte adu akoro te nga ye. ⁴³ Fū Yesu amala ngü fū komoko la kpekpeke, ⁴⁴ gü ba, "De-ye deyü, ye mere e amala nga ngü la fū wü gara kpara de. Ye nü enü, ye mere ngü, ta te *Müse ba gbü *Riri ka Me ne. Ye za nü, ye nü di kpaka *mürü gele ka Mere Me, de ah wa, ah to fū Me teka ngü la. Teka fū wü kpara 'buru awu, gü ba, küte ye reke eyi fanü." ⁴⁵ Amba ngü te Yesu mala fū komoko la, ah je nda de. Fū ah ayia anü, akpo da emala nga ngü la fū wü kpara bü faaa. Fū nga ngü la awü, abaya gbü wü sü 'buru. Teka ngü la, da Yesu te engu ena angbü agbü mere koti ngbaangba gbü jia wü kpara ne tine ma. Fū ah angbü ka-ye ewo te-ye agbü gü. Te wüh je nga Yesu bala, fū mere bi wü kpara ayia te nga nzö wü koti 'buru, angbü egoro kpakaka na agbü gü la.

2

Dene ngü te Yesu küwa gara komoko te küküte kpi akpi 'buru

Matayo 9:1-8; Luka 5:17-26

¹ Gbü gara sikipi, fū wü Yesu ayia adu kpa eköti, agbü Kapanama. Te wü kpara je nganga na, gü ba, Yesu du koro eyi kpa eköti ne, ² fū mere bi wü kpara aci akoro abiti te-wü gbe, kpa esambü te Yesu ngbü gbügbü na ne. Fū sü ani kpa esambü 'buru yere. Fū gara wü kpara angbü nda-wü kpa etanü, ede möngiti. Fū Yesu angbü emala to ngari Me fū ewü.

³ Baka te Yesu ngbü la emala to ngari Me fū wü kpara la, fū ewü ayia akoro de gara komoko, te küküte kpi akpi 'buru. Wü kpara te ewü bi engu, wüh baka wü kpara bala. Fū ewü abi engu füh ka'da, de ani koro di kpaka Yesu, de ah küwa engu. ⁴ Te wüh koro kpala, fū ewü amaka mere bi wü kpara, te ewü ni sü emöngiti 'buru yere. Da ewü, te ewü ena ari kpa esambü de mürü keke la, akoro di kpaka Yesu ne, nda ma. Te di bala, fū ewü ayia afi nga gara mani. Fū ewü ayia ali kpa tikpi, enzö kambü, afuru nzö kambü na mbii te sü, te Yesu ngbü ero mö tete na ne. Fū ewü ai ku te ka'da ka mürü keke la, abi engu di, ato te görö te ewü furu la ferrre, ao kötö engagira Yesu.

⁵ Te Yesu wu ngü la bala, fū ah awu, gü ba, wü kpara la to maguma wü eyi fū ni fanü fanü. Fū ngü la areke gbü jijia na afa sü. Fū ah ayia amala ngü fū mürü keke la, gü ba dene, "Enga ra, *siti ngü ka-mü ta te mü mere gbü jia Me ne, ma za gbü nzö mü eyi asidi."

* 1:44 1:44 Mü ena amaka ngü la gbü buku ka Riri ka Gele ka wü Levi 14:1-32.

⁶ Gara wü *mürü riri ta kphah ladü kpala. Te wüh je ngü te Yesu mala fü komoko la bala, fü ewü angbü efi nga ngü emaguma wü, ⁷ gü ba dene, "Dene ne töndö ngü ne? Yesu yia efü te-ye ba Me? Angü kpara füh kotö ne, te ti aza siti ngü gbü nzö wü kpara, ah ngbüürü ladü? Ah nda ma! 'Duwa Me te ngbü eza siti ngü ka wü kpara me-ye."

⁸ Amba Yesu wu fingangü ka-ewü la eyi. Fü ah ayia ayi-ta ewü, gü ba dene, "Yi ngbü efi nga ngü la emaguma yi bala, neh teka ne? ⁹⁻¹⁰ Yi wu de, gü ba, ma de *Ye Kpara ka Kpi? Te di bala, wazi ra ladü, teka adi eza siti ngü ka wü kpara füh kotö ne, gbü nzö ewü di asidi. Yi fi nda-yi, gü ba, ma mala töndö ngü kükürü? Yi ena awu ngü la enatikine." Fü Yesu adu afü te-ye, amala ngü fü mürü keke la, gü ba dene, ¹¹ "De-ye deyí, ye yia eyia, ye za darara ka-ye, ye go kpa eköti." ¹² Fü mürü keke la ayia 'duwa cukuru, gbü jia wü kpara 'buru, arü atikpi. Fü ah aza darara ka-ye, ayia ago di agba ye.

Dela ngü ta te Yesu mere, te engu küwa komoko, te küküte na kpi akpi ne. Fü ngü la aga gbü jia wü kpara la afa 'duwa sü. Fü ewü aci 'buru, agbo nga iri Me, gü ba, "Ani wu ngü de bala gügü la de!"

¹³ Fü wü Yesu ayia anü andoro kpa era mere ngu. Fü mere bi wü kpara angbü egoro kpakaka na la, teka aje ngü gögömö na. Fü Yesu angbü eri ewü de to ngari Me kpala.

Dene ngü ka Levi, te Yesu i engu

Matayo 9:9-13; Luka 5:27-32

¹⁴ Gbü gara ra, fü Yesu ayia anü andoro. Fü ah amaka gara komoko de iri ye *Levi Matayo, ye Alofaya, te ngbü ka-ye ero *jiase ka wü e esaka wü kpara, adi eto fü Miri ka wü Ruma. Fü Yesu arü amala ngü fü Levi, gü ba dene, "Levi deyí, mü yia eyia, mü lala gbü nga ra." Fü Levi ayia ace tima ka-ye la, alala gbü nga Yesu.

¹⁵ Fütanga ngü la, fü Levi ayia ai wü Yesu de wü kpara ka-ye agba ye. Fü ah ai kphah mere bi wü bu ye, de te ewü ngbü ero jiase de ewü ne, abe kphah te gara wü kpara, te wü *mürü riri gü ba, wüh de siti wü kpara ne. Fü wü kpara la akoro 'buru, angbü ezü e tundu de wü Yesu kpala. Angü wü kpara la ngbü ta 'buru efa nga Yesu.

¹⁶ Wü gara mürü riri ta ladü, te ewü ei ewü, gü ba, wü *Farusi. Wü Farusi la, wüh de wü kpara te ewü le adi emere gele ka-wü mbi mbi mbi. Fü wü Farusi aje ngü, gü ba, "Yesu ngbü ezü e de wü siti wü kpara." Fü ewü ayia akoro amaka wü *kpara ka Yesu, ayi-ta ewü, gü ba, "Ah mere baye, te Yesu ngbü ezü e de wü siti

wü kpara ne?" ¹⁷ Te Yesu je ngü te ewü mala la, fü ah amala ngü, gü ba dene, "Te keke te mü ma la, mü ena anü anü kpara mürü kuwa? Mü ti anü de. 'Duwa te mü de keke te mü la, mü ena anü anü kpara mürü kuwa, de ah küwa ni. Ngü ka-ra kphah bala. Angü ma koro füh kotö ne, neh teka wü da? Tekka aküwa züka wü kpara? Ah bala de. Ma koro teka aküwa siti wü kpara, de wüh ce *siti ngü ka-wü asidi."

Dene ngü ta te ewü yi-ta Yesu di, teka to riri kaka

Matayo 9:14-17; Luka 5:33-38

¹⁸ Gbü wü gara sikipi, wü *Farusi zü e de. Wüh ngbü *e'bi te-wü, teka adi eku gba fü Me. Wü kpara ka *Yüwane Mürü Babatiza ngbü emere kphah bala. Gbü ngü la, fü wü kpara ayia akoro kpara Yesu, ayi-tata, gü ba dene, "De-ye deyí, wü kpara ka Yüwane, de wü Farusi 'buru, wüh zü e enatikine de, teka aku gba fü Me. Anga ah mere baye, te nda-ye wü kpara ne, ngbü nda-wü ezü e ne? Wüh fi nga gele ka-ani mbi mbi mbi nda-wü de?" ¹⁹ Fü Yesu ayia alügü ngü fü ewü gbü mani, gü ba dene, "Te wü ngba nü agbü karama la, * wüh ti azü e de? Wüh ti eyi azü e, angü mürü karama la ladü tundu de ewü. ²⁰ Amba te gara, te wü vügü ena aza mürü karama la, esüka wü awuba ye asidi la, wüh ti azü e de, ka cinga emaguma wü."

²¹ Fü Yesu adu amala gara wü mani fü ewü, teka to riri ka Me, te engu ngbü eri wü kpara di ne, gü ba dene, "Te diri bongo ka-mü söró asörö la, mü ti eyi aza to bongo, teka atükü te didiri na la? Mü ti amere bala de, angü didiri na la ena adu kphah asörö ka-ye asörö. ²² Kphah bala, te mü le akü'da fi ka-mü la, de mü mere e akü'da gbü diri bütü körö körö ne de. Angü diri bütü la ena adü, aöfö ka-ye, fü fi ka-mü la atökö ka-ye 'buru akötö. Ah le fü mü akü'da fi ka-mü gbü to bütü, angü fi ka-mü la ena asiti siti. Kphah bala, te mü ngbü ele to riri ka-ra la, mü ti alala fi bü eküte diri gele ka wü kundu mü nda-mü de."

Dene ngü te Yesu mala teka sikipi ka Me

Matayo 12:1-8; Luka 6:1-5

²³ Gbü gara *sikipi ka Me, fü wü Yesu angbü enü de wü kpara ka-ye. Fü ewü afü kpuru gbü yi ka ndo. Te wüh ngbü enü tete, fü wü *kpara ka Yesu la akpo da esösörö fi ndo, da etitiri koko na, ezü ka tala.

²⁴ Fü wü gara *Farusi awu ngü la bala. Fü ngü la asiti gbü jia ewü, angü wüh ngbü efi, gü ba, "Masörö fi ndo la, ah de tima." Ah Angü *Riri ta te Müse to fü wü *Yisarayele

* 2:19 2:19 Dene karama te wüh mere teka ase würüse.

ne, gü ba, “Wüh mere e adi emere tima gbü sikipi ka Me 'buru 'buru de.” Fü wü Farusi la akoro amala ngü fü Yesu, gü ba dene, “De-ye deyi, wü kpapa ka-ye ne, ngbü emere tima gbü sikipi ka Me, neh teka ne? Ngü la siti gbü jia Me fa sü!”

²⁵ Yesu gü ba dene, “De-wü deyi, wü tanga *Ngari Me nda-wü neh de? Ngü ta te wüh ba teka *Mere Miri Davidi ne, ah gü neh fe? Ta gbü gara ra, fü tala ayia amere wü Davidi, de wü kpapa gbü nga ye. ²⁶ Fö Davidi ayia akoro kpaka *mürü gele ka Mere Me, ayi-tata teka e-mazü. Fö mürü gele la ayia aza ambata, de te wüh ngbü eto fü Mere Me ne, ato fü Davidi. Fö Davidi azü, ato kpah fü wü kpapa gbü nga ye 'buru. Wüh mala ta eyi fefe, gü ba, ‘Ye ngbü esiti gele?’ Wüh mala bala de! Amba gbü *Riri ta te Müse to fü wü mürü gele ne, ambata la, ah teka wü kükürü kpapa fa fa fa nda de. ‘Duwa wü mürü gele ka Mere Me ngbü ezü me-wü. Dela ngü ta te Davidi mere, ta gügü, o Abiyatara di de mere kpapa füh kpökpö ka wü mürü gele.’†

²⁷ Fö Yesu adu amala kpah gara ngü fü ewü, gü ba dene, “Me o wü kpapa füh kotö ne, neh teka ne? Tekka amere gele ka sikipi ka-ye? Ah bala de. Me o sikipi ka-ye teka fü wü kpapa adi efe te-wü gbügbü na. ²⁸ Dera, *Ye Kpapa ka Kpi, Me to wazi eyi fere, fa ngü ka gele la di ka. Ma de mürü *sikipi ka Me la me-ra. Ma ngbü kpah eto to *riri ka Me fü wü kpapa ka-ra me-ra.”

3

Dene ngü ka komoko te Yesu reke kpapa na gbü sikipi ka Me

Matayo 12:9-14; Luka 6:6-11

¹ Gbü gara *sikipi ka Me, fü Yesu anü arü kpa *esambü ka biti-te. Gara komoko ta ladü kpala te kpapa na ze aze. ² Wü gara *Farusi ta kpah ladü kpala. Fö ewü angbü efete Yesu, da egiri kaje te ani ena amaka siti ngü kaka tete, fü ani amala ngangä fü wü *kovo. Fö ewü angbü eceka Yesu, da efete engu kpekepeke, anga engu ena aküwa komoko la gbü sikipi ka Me ya? Angü wüh ngbü efi nda-wü, gü ba, maküwa kpapa, ah de tima. ³ Fö Yesu ayia ai komoko te kpapa na ze aze la, gü ba dene, “De-ye deyi, ye koro la kpa engagira nü akine.” Fö komoko la ayia akoro. ⁴ Fö Yesu ayi-ta wü Farusi la, gü ba dene, “Gbü jia yi, ah le fü kpapa amere ne ngü ne, gbü sikipi ka Me? Wüh di emere züka ngü? Anga *siti ngü reke me-ye? Ah le de nih küwa kpapa? Anga ah le de nih ce kpapa fü kpi? *Riri ka Me, te *Müse mala fü nih ne, gü neh fe?” Fö ewü anga ka-wü ti. Wüh le

ngü nda-wü de. ⁵ Fö Yesu ayia aceka kpi füh ewü ngberrre 'buru. Fö mamagama ayia asiti teka ngü ka-ewü la, angü nzö ewü kpekepeke. Fö ah adu arü amala ngü fü komoko la, gü ba dene, “Mü gbere kpa mü gbere.” Fö komoko ayia agbere kpa ye. Fö kpakpa na ayia areke, adu zürrrü te nga ye.

⁶ Te wü Farusi wu ngü la, fü ngü la ake te ewü, angü Yesu reke kpa komoko la gbü sikipi ka Me. Fö ewü ayia akoro kpa etanü, anü abiti te-wü de wü kovo ka Miri Anitipa *Erode. Fö ewü akpo da egiri kaje, te ani ena amörö Yesu tete na.

Dene ngü ka Yesu, de mere bi wü kpapa, ede mere ngu

⁷⁻⁸ Fütanga ngü la, fü wü Yesu ayia de wü kpapa ka-ye, anü andoro kpa era mere ngu. Fö mere bi wü kpapa ayia rurrru! anü afa ngangä na, angü wüh je nga wü mere kpeke ngü, te engu ngbü emere ne. Wü kpapa la koro te nga mere bi wü sü. Gara ewü koro angbü nga nzö köti ka wü *Galilaya. Gara ewü koro nengete, angbü Yerüsalema, de wü gara nga nzö köti ka *Yudaya. Gara ewü koro gbü nga nzö köti ka wü Edomaya, gara gbü nga nzö köti kpa etangu Yürüdene, gara angbü wü mere köti de iri wü Tera bete Sidona de wü sü ede ewü.

⁹ Te Yesu wu mere bi wü kpapa la, fü ah ayia amala ngü fü wü kpapa ka-ye, gü ba dene, “Wü nü la enü, wü koro de *zabu, de ni li gbügbü, angü wü kpapa ne ena adere ni.” ¹⁰ Yesu mala ngü la bala kükürü de, angü mere bi wü mürü keke koro eyi sela. Fö ewü angbü egbene sü agbene, gü ba dene, “Wayi, ah le de ani zoro küte Yesu, teka fü ani aküwa.” Angü wüh wu eyi, gü ba, Yesu ngbü eyi eküwa mere bi wü kpapa. ¹¹ Gara wü kpapa te *siti wü di engä me ngbü emere ewü, te ewü wu Yesu tete, fü ewü ati kötö, aba rere, gü ba, “Yesu, mü de Ye Me.” ¹² Fö Yesu amala ngü fü siti wü di engä me la kpekepeke, gü ba, “Wü mere e agü tamu ni de.”

Dela ngü ta te Yesu küwa mere bi wü kpapa tete.

Dene ngü ka wü kpapa nzükpa de füh ye 'basu, te Yesu fe ewü

Matayo 10:1-4; Luka 6:12-16

¹³ Gbü gara ra, fü wü Yesu ayia anü kpa enzö mere rüvü. Fö ah ayia ai wü *kpapa ka-ye la kpaka ye kpala. ¹⁴ Fö ah ayia afe süka ewü nzükpa de füh ye 'basu, ao ewü, wü *mürü tima ka-ye. Fö ah amala ngü fü ewü, gü ba, “Ma fe yi teka fü nih angbü endoro de nih ma. Te gara, ma ena

† 2:26 2:26 Mü ena amaka ngü la gbü 1 Samüwele 21:1-6.

atima yi, teka fū yi adi emala ngari ra fū wū kpara. ¹⁵ Ma ena ato wazi fū yi teka fū yi adi eliki *siti wū di enga me di."

¹⁶ Dene iringi wū kpara te Yesu fe ewū ne. Simūna, te Yesu gū gara iringi tete na, gū ba, Petero,* ¹⁷ wū *Yakobo ake *Yūwane, wū di Zebedayo, te Yesu gū iringi te ewū, gū ba, wū Būwanerage, gū ba, wūh baka mūgbara. ¹⁸ Wū Anderiya, bete *Filipo, bete Batūlūmayo,† bete Matayo,‡ bete Toma, bete *Yakobo ye Alofaya, bete Tadayo,§ bete Simūna ta te di kpara te mere gū teka tō ka-wū. ¹⁹ Abe kpah te *Yuda Keriyota, ta te gū tamu Yesu fū wū vūgū ne.

Dela ta ngū ka wū kpara te Yesu fe ewū.

*Dene ngū ka Yesu de wū di enga ni ye
Matayo 12:22-32, 46-50; Luka 8:19-21;
11:14-22; 12:10*

²⁰ Fūtanga ngū la, fū mere bi wū kpara adu abiti te-wū kpaka Yesu gbe. Da wū Yesu, te ewū ena azū e de wū kpara kaye, nda ma. ²¹ Fū wū di enga ni ye Yesu, te ewū di kpa gbū gara sū, ayia aje ngū la. Fū ewū afi nda-wū, gū ba dene, "Nzō Yesu siti eyi." Fū ewū ayia anū kpakaka na, de ani zoro engu, adu di kpa ekōti.

²² Fū nga wū ngū, te Yesu ngbū emere la, adu kpah awū akoro zalū agbū Yerūsalema. Fū gara wū *mürü riri ayia agbū Yerūsalema kpala, anū akoro kpaka Yesu teka awu ngū la cu de jia wū. Te wūh wu wū kpeke ngū, te Yesu ngbū emere ne, fū ewū akpo da emala siti ngū, gū ba, "Yesu maka wazi teka aliki *siti wū di enga me di ne, neh kaye? *Satana* to wazi la fefe meye, angū engu de miri ka wū di enga me!"

²³ Te Yesu je ngū la, fū ah ayia aī wū mürü riri la kpaka ye, adu arū amala ngū fū ewū de mani, gū ba dene, "Satana ena aliki teye de tete-ye, neh baye baye?" ²⁴ Te nguwa wū kpara biringbō kpo eyi emere gū esūka wū la, zūka ngū ena adī ladū? Ngū la reke nda de, angū nguwa wū kpara la ena anza. ²⁵ Kpah bala, te wū kpara gbū kōti biringbō kpo eyi da emōmōrō te-wū la, ah ena atī atī? Ah tī nda de. Kōti la ena asiti, fū ewū abaya asidi. ²⁶ Angū te Satana ena angbū eto wazi fere me-ye, teka aliki wū kpara ka-ye di la, ah ena adi ba e te engu siti tima ka-ye me-ye. De bane, ngū ka Satana ena anza ka!"

²⁷ Tekā ngū la, fū Yesu adu arū amala gara mani fū ewū, gū ba dene, "Te kpeke kpara ladū, te di de wazi ye fa sū, e-ena arī kpa esambū kaka, agbene wū e kaka, neh da? Angū, ah ngbū eceka kpī fūtanga

kambū ka-ye 'be 'be 'be. Amba, te gara kpeke kpara koro, te wawazi fa nda gina kpara la, ah ena azoro engu, ai gō! agbene wū e kaka 'buru, anū sū di. Te di bala, ah le de yi wu, gū ba, wazi ra fa nda Satana, te ngbū embū yi de fūh kotō ne ka."

²⁸ Fū Yesu adu amala gara ngū fū ewū, gū ba dene, "Ngū te ma emala fū yi dene, ah de kpeke ngū. Wū *siti ngū 'buru te wū kpara ngbū emere ne, te kpara fū maguma ye la, Me ena aboro ngū kaka la 'buru. Kpah bala, wū ngū te wū kpara ngbū emala esiti te iringi Me ne, Me ena aboro kpah asidi. ²⁹ 'Duwa kpara te ngbū esoko *Nzila Wazi Me, Me boro ngū kaka-na la kpo fi de. Liya kaka-na la ena angbū fi gbū nzōnzō na fi mere badi." ³⁰ Yesu mala ngū la bala, teka te wū mürü riri la soko Nzila Wazi Me, gū ba, "Yesu maka wazi la esaka *siti wū di enga me," ne.

³¹⁻³² Fūtanga ngū la, fū wū di enga ni ye Yesu ayia akoro de wū ni ye na. Te wūh koro tete, fū ewū amaka bi wū kpara te ewū biti te-wū, ngbū ede Yesu. Da ewū te ewū ena arī akoro kpaka Yesu kpa esambū la, ah nda ma. Fū ewū arū kpa etanū, atima kpara kpakaka na, gū ba, "Ye nū, ye i Yesu fū ani." Fū kpara la akoro amala ngū fū Yesu, gū ba dene, "Mere kpara deyī, wū ni ye, de wū di enga ni ye, ladū kpa etanū kpane. Wūh ngbū ta ele awu ye." ³³⁻³⁴ Yesu gū ba dene, "Ah mbi." Fū ah adu aceka kpī fūh wū kpara la ngberrre 'buru, gū ba, "Amba de-yi, wū kpara te yi biti te-yi sene, teka aje ngū ka-ra ne, yi kpah de wū di enga wūna, de wū wūna. ³⁵ Angū te mū ngbū ele ngū ka Me da emere la, mū ena adī fere baka wūna, anga engu wūna."

Dela ngū ta te Yesu mala fū mere bi wū kpara la.

4

*Dene mani ta te Yesu mala teka nguwa
te wūh moko*

Matayo 13:1-23; Luka 8:4-15

¹ Gbū gara ra, fū Yesu adu anū andoro era mere ngu *Galilaya, adu kpah angbū erī wū kpara kpala. Fū mere bi wū kpara aci kpah, akoro kpakaka na la gbe. Te engu wu bala, fū ah ayia alī ka-ye gbū *zabu, angbū kpala fūh ngu, angū wū kpara ena adere ye. Fū bi wū kpara la angbū nda-wū kpa fūh gūmba, da eje ngū gōgōmō na. ² Fū Yesu angbū erī ewū de mere bi wū ngū 'buru gbū mani, gū ba, ³ "Yi da la gūje yi, de yi je ngū ka-ra ne. Gara komoko ta ladū, te le amoko ndo ka-ye. Fū ah ayia aza nguwa ndo, anū di agbū yi, amoko.

* 3:16 3:16 Si-ngū gbū iringi Petero, gū ba, baka da. † 3:18 3:18 Gara iringi Batūlūmayo de Nataniyele. ‡ 3:18 3:18 Gara iringi Matayo de Levi. § 3:18 3:18 Gara iringi Tadayo de Yuda. Ah de ye Yakobo. * 3:22 3:22 Gara iringi Satana de Belezebuba.

⁴ Te engu ngbü emoko ndo la, fū wū gara jia ndo atī te kaje. Fū wū lu awu jia ndo la. Fū ewū ayia kere, akoro adoro nguwa la, ami ka. ⁵ Fū gara nguwa atī fūh wū si-da, te tō di sela mbi mbi ma. Fū nguwa la ayia akō kere, teka ne de, angū tō sela sere sere. ⁶ Fū ra ayia asū. Fū fu-ndo la ayia aürü ka-ye 'buru, angū sisī na rī gbū tō mbi mbi de. ⁷ Fū gara nguwa atī esūka wū ti. Fū nguwa la akō aga de wū fu-ti la 'buru. Fū wū ti awündü zūka fu-ndo la. Fū ah adu afū te-ye yi-andūla tete. Ah zī jia de. ⁸ Fū gara nguwa atī gbū zūka sū. Fū ah ayia akō, agere, arī gbrri! Gara zī jia ye mbi, gara zī jia ye fa sū, gara zī jia ye reke 'duwa ba-neh-ene-la,* angū ah tī gbū zūka tō."

⁹ Fū Yesu adu amala fū ewū, gū ba, "Te güje mü ladü la, de mü da güje mü te ngü ka-ra la mbi mbi mbi."

Dela ngü te Yesu mala teka nguwa te wüh moko gbü tō.

¹⁰ Fütanga ngü la, te Yesu di kpikpi ye, fū wū kpara te engu fe ewū, nzūkpa de fūh ye 'basu ne, ayia de wū gara wū kpara kaka-na, anū kpakaka na. Fū ewū ayi-tata teka si mani te engu mala la. ¹¹ Yesu gū ba, "Ta gügü, wū kpara je si-ngü ka Me nda-wü de. Ngü ka Me ngbü gbü jia ewū 'daaa, ah wo te-ye awo. Nda-yi, wū kpara ka-ra, ma ngbü eyi esere ngü la fū yi 'buru mbölö mbölö, gū ba, Me le de wū kpara 'buru to maguma wū fū ni. Amba wū gara kpara la tī aje si-ngü la nda-wü de, angü wüh le ngü ka-ra de. Tekā ngü la, ma ngbü emala ngü la fū ewū 'buru de mani. ¹² Ah kphā baka ngü ta te Me mala teka wū kpara la, gōmō *mürü dofo Yisaya, gū ba dene, 'De-wü deyī, wū ena aceka ngü ka-ni ma, wū tī awu si-ngü la nda-wü de. Wū ena aje ngari ni, Me, ma, ngü la tī arī gbü nzō wū kphā de. Angü, te wū ena aje ta si-ngü ka-ni, Me, mbi mbi la, de bane wū ena ace *siti ngü ka-wü, adu ale ngü ka-ni, teka fū ni aboro siti ngü ka-wü.[†] Dela ngü ta te Me mala gügü teka wū kpara, te ewū le ngü ka-ra de ne."

¹³ Fū Yesu adu amala ngü fū ewū, gū ba dene, "Yi tī awu si mani ka nguwa la nda-yi kphā de? Te di bala, yi ena awu si wū ngü gbü wū gara mani 'buru, neh baye baye? ¹⁴ Ma ena amala si-ngü la fū yi. Kpara te moko nguwa la, ah baka kpara te emala ngari Me. ¹⁵ Nguwa te tī te kaje, ah baka mene wū kpara, te wüh mala ngari Me fū ewū, amba ngü la rī gbü nzō ewū nda de. Fū *Satana awu ngü la, ayia kere, akoro aza ngü la emaguma

ewū asidi. ¹⁶ Nguwa te tī fūh wū si-da, ah baka mene wū kpara, te wüh mala ngari Me fū ewū. Fū ewū ayia aje ngü la, ale de zūka tadu. ¹⁷ Amba wüh rü kpekpeke gbü ngü ka Me de, angü maguma ewū ka-ye 'basu 'basu. Tekā ne de, angü wüh to maguma wū fū Me mbi mbi de. Nga ngü la yiri kphā de, fū cinga ayia akoro teka ngü ka Me la. Tekā wū ngü la, fū wū kpara la ayia ace ngü ka Me kere, teka ngü ka cinga la. Fū ewū adu angbü emere gara wū ngü ka-wü. ¹⁸ Nguwa te tī esūka wū ti, ah baka mene wū kpara, te ewū le ngari Me eyi, ¹⁹ amba fingangü ka-ewū ka-ye 'basu 'basu. Wüh ngbü efi nga wū e ka fūh kotō ne. Fū gümü jiase ayia amere ewū, bete gümü wū gara wū e fa sū. Tekā ngü la, wüh tī amere tima ka Me mbi mbi de, fū ngü ka Me ayia afū te-ye emaguma ewū baka yi-andūla. ²⁰ Nguwa de te tī gbü zūka sū, ah baka mene wū kpara, te wüh mala ngari Me fū ewū. Fū ewū aje ngü la, ayia ale de maguma wū 'buru. Fū ngü ka Me la aga kpa emaguma ewū baka ndo te zī jia ye mbi, gara zī jia ye fa sū, gara zī jia ye reke 'duwa ba-neh-ene-la.‡

Dela si-ngü gbü mani teka nguwa ndo la."

Dene gara mani te Yesu mala teka ngü ka Me

Luka 8:16-18

²¹ Fū Yesu adu amala gara mani fū mere bi wū kpara la, gū ba dene, "Te mü siya wa ka-mü gbü bitī, akoro di, ao kpa esambü la, mü ena amere di baye? Mü ena abuka sila fefeh? Anga mü ena ao esa ngbaga? Ah bala de. Mü ena ao wa ka-mü kpa tikpi fūh e, teka fū ah alofo sū mbi. ²² Kphā bala, ngü ka-ra te wū kpara je mbi mbi de, te wo te-ye awo fū ewū ne, wüh ena awu ngü la te gara, angü Me ena agü tamu ngü la fū ewū me-ye. ²³ Te güje mü ladü la, de mü da güje mü teka aje ngü ka-ra la mbi mbi mbi."

²⁴ Fū Yesu adu amala gara ngü fū ewū, gū ba dene, "Ngü te ma ngbü emala fū yi ne, yi o fingangü ka-yi 'buru tete na. Tekā ne de, angü, te mü fi nga ngü ka-ra mbi mbi la, sisi na ena arī gbü nzō mü. Fū Me adu agü tamu gara wū ngü fū mü gbe. ²⁵ Angü te mü le ngü ka-ra ne eyi, Me ena adu agü tamu gara wū ngü fū mü gbe. Amba, te mü le aje ngü ka-ra nda-mü de la, mba enga ngü cükü'daye, te di gbü nzō mü ne, ah ena adürü ka-ye adürü asidi."

Dene mani ta te Yesu mala, teka nguwa te ngbü ega de tete-ye

* 4:8 4:8 Gara zī jia ye teke biri de fūh ye nzūkpa, gara teke bata, gara kama biri. † 4:12 4:12 Mü ena amaka ngü la gbü buku ka Yisaya 6:9-10. ‡ 4:20 4:20 Gara zī jia ye teke biri de fūh ye nzūkpa, gara teke bata, gara kama biri.

²⁶ Fū Yesu adu amala kpah gara ngü fū mere bi wü kpara la de mani, gü ba dene, "Ngari Me ngbü efü maguma kpara, fū ah akoro kpara ka Me, neh baye baye? Ngü la, ah baka nguwa ndo, te gara kpara moko gbü yi ka-ye. ²⁷ Kpara la tī aga ndo ka-ye la me-ye nda de, amba wü e la ena angbü ega ka-wü de tete-wü. Te di bala, nguwa la ena ato si ye, fū ah akö, ²⁸ angü nguwa la ngbü emaka wazi ka-ye gbü tö. Fū ah ato fu ye. Fū ah akpo angbü ega, adu ao gba ye. Fū ah akpo ezi jia ye, akoro ndo. ²⁹ Te kpīri ndo la koro eyi la, fū mürü ndo la awu, gü ba, 'Wayi, ndo ka-ni ndri eyi. Fū ah aza maguruma ka-ye, anü agbü yi, awa ndo ka-ye la di.' "

Dene mani ta te Yesu mala, teka nguwa müsitada

Matayo 13:31-32; Luka 13:18-19

³⁰ Fū Yesu adu amala gara ngü fū ewü, gü ba dene, "Ma ena amala gara mani fū yi teka agü tamu ngü ka Me di fū yi. ³¹ Angü ngü ka Me, ah baka jia gara rü de iri ye müsitada, te di de jia ye baka li'ba, jürrü bane. ³² Te mü ru nguwa la, ah ena akö, aga, akoro mere rü, da eto sa-e, te wü lu ena angbü efe te-wü gbügbü. Kpah bala, ngü ka Me ena aga te gara, akoro memere, baka ngü ka rü la."

³³ Dela ngü ka Me, ta te Yesu mala fū bi wü kpara la gbü mani. Ah ngbü mala bi wü gara ngü fū ewü, gbü mani kpah bala. Ah ngbü emala wü ngü la fū ewü ferrre, de wüh je mbi. ³⁴ Amba ah mala si wü ngü la fū ewü mbölö mbölö nda de. Ah ngbü emala wü ngü la fū ewü 'buru gbü mani. 'Duwa te ewü du ngbü kpikpi wü, de wü kpara ka-ye la, fū ah angbü esere si-ngü la fū ewü tīne mbölö mbölö.

Dene ngü te Yesu tata mere wege di

Matayo 8:23-27; Luka 8:22-25

³⁵ Gbü ra la, etamurago, fū Yesu ayia amala ngü fū wü kpara ka-ye, gü ba dene, "Ani nü enü kpa etangu." ³⁶ Fū wü *kpara ka Yesu ayia ali gbü *zabu, te engu di gbügbü na. Fū ewü anü sū ka-wü, yo! ace mere bi wü kpara la kpa füh gümba kpala. Wü gara zabu ngbü ta kpah enü kpala. ³⁷ Wüh te egoro kpa etü mere ngu *Galilaya la, fū mere wege ayia akpo angbü efe jia ngu la de wazi. Fū zabu angbü eyiki, da efüfü te-ye, ekolo ngu gbü ye. Fū ngu angbü esi gbü zabu la. Zabu la yia ta ebu ewü abu agbü ngu.

³⁸ Yesu, mü ngbü ka-mü gbü zabu to kpa sisi kpala, era ka-mü ara, o nzö mü ga füh bongo. Fū wü kpara kaka akoro azükü engu, gü ba dene, "Mere kpara! Mere kpara! Ani te ekpi! Ani te ekpi! Te ani kpi la, ngü ena asiti te-ye de?" ³⁹ Fū Yesu ayia azükü. Fū ah adu arü amala ngü fū

wege, gü ba, "Wege, mü nga enga! Ngu, mü ngbü ziii." Fū wege ayia anga. Fū ngu ayia angbü ziii. Fū sū ayia anga 'duwa ngbüii.

⁴⁰ Fū Yesu adu arü amala ngü fū wü kpara ka-ye, gü ba dene, "Yi ekpe neh cürü ne? Yi to maguma yi fere mbi mbi la de? Ah le de yi to maguma yi fere."

⁴¹ Fū cürü ari te ewü afa sū, teka ngü ka wazi ka Yesu la. Fū ewü angbü da eyi-ta tete-wü, gü ba dene, "Apa! De bane neh ene ngü ne? Kpara ladü füh kotö ne, te tī amala ngü fū wege bete mere ngu, fū ewü aje riri kaka-na baka e la?"

Dela ngü ta te Yesu mere, te engu to riri fū mere wege tete.

5

Dene ngü te Yesu küwa gara komoko

de mere bi siti wü di enga me guvu ye
Matayo 8:28-34; Luka 8:26-39

¹⁻² Fütanga ngü la, fū wü Yesu ayia anü de *zabu la, anü akoro kpa etangu mere ngu *Galilaya. Fū ewü ayia akö, akoro kpa füh gümba, gbü tö ka wü Garasa. Fū ewü amaka gara komoko kpala, de *siti wü di enga me guvu ye, te ewü mere engu, o ba mürü maröfö. Komoko la koro ka-ye kpa esüka wü mbükü, ³⁻⁴ angü ah ngbü era ka-ye etü wü mbükü. Wüh ngbü ta ei engu ai de ku-se, edü wü kengbe gbü lölö na 'buru. Fū engu akolo ku-se la, akukuru wü kengbe la kpah 'buru asidi. Teka ne de, angü nda-ka wazi fa nda wü kpara 'buru. Kpara te tī ai engu nda tīne ma. ⁵ Komoko la ngbü ta endoro kpa füh wü da, enzö wü gümba, da endoro etü wü mbükü, eku gba biti de ra, da edütü te-ye de teme.

⁶ Fū komoko la ayia awu Yesu nengete. Fū ah ayia ale woro, akpe akoro kpaka Yesu, abu nzökuta ye kötö engangagira, anda'ba te-ye fefe. ⁷⁻⁸ Fū Yesu arü amala ngü fū wü *siti wü di enga me, te ewü ngbü emere komoko la, gü ba dene, "Wü ce engu ace!" Fū komoko la aba rere kpa tikpi, de mere ri ye, gü ba, "Yesu, Ye Mere Me, ye ce ni ace! Tima ka-ni gbü ngü ka-ye nda ma. Ni kina ye eyi te iri Me, gü ba, ye mere e ato cinga te ni de!" ⁹ Fū Yesu ayi-ta komoko la, gü ba, "Iri ye neh da?" Komoko la ga, "Iri ni de Bi-nzö-gü." Ah gü iri ye bala, angü wü di enga me la sibi guguvu fa sū. ¹⁰ Fū wü di enga me la afüwa te-wü fū Yesu, gü ba dene, "Ye mere e aliki ani te sū ne asidi de."

¹¹ Gara wü mba ka köti ta ladü sela, mere bi ewü baka kutu 'basu (2,000). Wüh ngbü ka-wü füh mere gümba da ezü e ka-wü. ¹² Fū wü di enga me la afüwa te-wü

fü Yesu, gü ba, “Ye tima ani kpaka wü mba la, de ani nü rî guvu ewü.” ¹³ Fü Yesu ayia ale ngü ka-ewü la. Fü wü di engä me la ayia akoro guvu komoko la asidi, ace engu, akpe arî aguvu wü mba la. Fü wü mba la ayia ka-wü, yurru! de mere woro, ago kpa esa gö. Fü ewü agürü agbü mere ngu, anzö ngu, akpi 'buru.

¹⁴ Te wü kpara, de te ewü ngbü eceka kpi fütanga wü mba la, wu ngü la bala, fü cürü amere ewü. Fü gara ewü akpe de woro, anü amala nga ngü, te Yesu mere la fü wü kpara agbü mere köti, bete wü sü edede la 'buru. Te wü kpara la je ngü la bala, fü ewü ayia anü akoro gbü sü la, teka aceka ngü la cu de jia wü. ¹⁵ Te wüh koro kpala, fü ewü amaka komoko, ta te di de mere bi wü di engä me guvu ye ne, nzönzö na fü te-ye tîne, koro eyi mbi. Ah to bongo kpah eyi te-ye. Fü ah adu angbü ka-ye kötö ede wü Yesu. Fü wü kpara angbü de mere cürü, gü ba, “Dela sirimbi!”

¹⁶ Fü wü kpara te ewü wu ngü la cu de jia wü ne, fü ewü ayia amala nga ngü la fü wü bu wü, gü ba, “Yesu liki wü di engä me guvu komoko ne eyi asidi. Fü wü di engä me la ayia arî aguvu wü mba ka köti. Fü wü mba la akpe atî 'buru agbü ngu, akpi kpala.” ¹⁷ Fü wü kpara la aci 'buru, amala ngü fü Yesu, gü ba, “Ye yia sene eyia, ye ce sü ka-ani, de ye nü kpa gbü gara sü.”

¹⁸ Fü wü Yesu ayia alî gbü *zabu, de ani nü. Fü komoko, de te *siti wü di engä me koro guguvu na ne, ayia ayi-ta Yesu, gü ba dene, “Ni ele de ani nü ka-ani ake ye.” ¹⁹ Yesu le nda de, gü ba, “A'a. Ye du edu kpa gba wü, kpaka wü müri ye, de ye mala nga züka ngü te Me mere fü ye ne, angü Me wu cinga ka-ye eyi fanü.” ²⁰ Fü komoko la ayia adu ka-ye, angbü endoro gbü nga nzö köti de iri ye Dekapoli,* adi emala nga ngü te Yesu mere fü ye ne. Fü ngü la aga gbü jia wü kpara de kpala afa sü.

Dene ngü te Yesu küwa ye Yayirü,

bete gara würiše

Matayo 9:18-26; Luka 8:40-56

²¹ Fütanga ngü la, fü wü Yesu adu alügü nga wü kpa etangu mere ngu *Galilaya. Fü mere bi wü kpara aci akoro, abiti te-wü kpaka Yesu era ngu kpala. ²² Gara komoko ta ladü kpala de iri ye Yayirü. Engu ta de mere kpara te ngbü emere tima kpa *esambü ka biti-te. Te Yayirü wu Yesu tete, fü engu ayia akoro, atî eri lö Yesu, ²³ anda'ba te-ye fefe, gü ba dene, “Mere

kpara deyî, ye koro, ye küwa ye ni, mba jaji würiše, angü keke ngbü emere engu efa sü. Ah yia eyi ekpi akpi. Ye koro la, de ye o kpa ye eküküte na, de ah küwa.”

²⁴ Te Yesu je ngü la, fü ewü ayia anü de wü Yayirü. Fü mere bi wü kpara aci anü kpah gbü nga ewü, enzinzi te-wü, da ededere Yesu.

²⁵ Amba gara müri keke ta kpah ladü sela. Ah de gara würiše, te ngüte ngbü ego tete gbü wü sikipî 'buru. Ah mere engu eyi bala teka wü re nzükpa de füh ye 'basu. ²⁶ Ngü la ngbü ta eto mere cinga fü würiše la efa sü. Ah ngbü ta enü kpaka mere bi wü müri kuwa, eto mere bi jiasse fü ewü, de wüh küwa ni. Wüh to rü fefe ma. Wüh küwa engu nda-wü kpah de. Fü keke la angbü fi ega ngü, enü kpa engagira nü. Fü jiasse anza esasaka na 'buru, teka keke la. ²⁷ Te würiše la je nga Yesu, gü ba, “Engu koro eyi sela ne,” fü ah ayia anü kpala. Te engu koro kpala, fü ah ayia azi te-ye 'bilî, esüka mere bi wü kpara la, anü amofö mö bongo ka Yesu to kpa ekükürüfe. ²⁸ Angü ah fi, gü ba, “Te ni mofö bü mö bongo ka Yesu la, ni ena aküwa.” ²⁹ Würiše la bü te emofö bongo ka Yesu bane, 'duwa fü ngüte la ayia akolo. Fü würiše la adu awu, gü ba, keke ka-ni nza eyi.

³⁰ Yesu, fü mü awu emaguma mü, gü ba, gara kpara mofö bongo ka-ni eyi, angü wazi ka-ni, de te Me to fü ni ne, mere tima eyi. Fü ah arü, afü te-ye, gü ba, “E-mofö bongo ka-ni neh da?” ³¹ Fü wü kpara kaka amala ngü fefe, gü ba dene, “Mere kpara, ye ena angbü eyi-ta ngü bala ne, ye wu mere bi wü kpara, te ewü ngbü egbene sü agbene, ne de? Fü ye adu ayi-ta ngü, gü ba, 'E-zoro bongo ka-ni neh da?’” ³² Fü Yesu angbü fi bü da eceka kpi ede ye, egiri kpara te mofö bongo ka-ye ne. ³³ Te würiše la wu, gü ba, keke ka-ni nza eyi ne, fü ah ayia akoro de mere lümü, atî eri lö Yesu, da eyi ayi de cürü, afüwa te-ye fü Yesu, gü ba dene, “Ah de ni, ni mofö bongo ka-ye me-ni, fü keke ka-ni anza dene.” ³⁴ Yesu gü ba dene, “Enga ra, mü küwa eyi fi badi, teka te mü to maguma mü eyi fere. Mü nü enü de gu maguma.”

³⁵ Baka te Yesu ngbü emala ngü fü würiše la, fü wü kpara gba Yayirü, te mbarase kaka ngbü eke ake ne, akpe akoro. Fü ewü amala ngü fü Yayirü, gü ba dene, “Yayirü deyî, ah nza eyi. Ye mere e ambü mere kpara la tîne de, angü mbarase ka-ye ne kpi eyi.” ³⁶ Amba Yesu, mü le ngü ka-ewü la nda-mü de. Fü mü adu amala ngü fü Yayirü, gü ba

* 5:20 5:20 Si-ngü gbü iri de Dekapoli ne, gü ba, wü köti nzükpa. † 5:37 5:37 Yüwane de engä ni ye Yakobo.

dene, "Yayirü deyi, ye kpe cürü de. Ye to maguma ye fü ni."

³⁷ Fü wü Yesu ayia de wü Petero, *Yakobo bete *Yüwane,[†] anü kpa gba Yayirü. Fü ewü ace mere bi wü kpara la sidü nga wü, angü Yesu le de bi wü kpara la nü fa nga ni kpala tîne de. ³⁸ Te wüh nü koro agba Yayirü, fü ewü amaka mere bi wü kpara kpala, da eku mere siti gba, de wü yiyi. Dela gba nda tîne de! ³⁹ Fü Yesu adu arü amala ngü fü wü kpara la, gü ba dene, "Wü ngbü eku gba neh teka ne? Mbarase la kpi akpi nda de. Ah ngbü era ka-ye ara." ⁴⁰ Fü ewü aci 'buru angbü emü engu, gü ba, "Dene ne töndö ngü ne?" Fü Yesu ayia aliki ewü 'buru etanü, aza 'duwa wö ye mbarase, ake ni ye na, bete wü Petero de wü bu ye, te ewü koro de ewü ne. Fü ewü ayia ari te sü, te wüh o kö mbarase la tete. ⁴¹ Te wüh koro kpa esambü la, fü ewü ayia awu kö mbarase. Fü Yesu ato kpa ye, azoro kpa mbarase di, ai mbarase la, amala ngü fefe gbü ngü mündü ka-wü, gü ba, "Talita gum!" Ah ba e te ewü gü ba dene, "Jaji würüse deyi, ye yia eyia tikpi." ⁴²⁻⁴³ Fü jaji würüse la azükü, ayia cukuru atikpi da endoro. Angü mbarase la, re kaka-na koro eyi nzükpa de füh ye 'basu. Fü Yesu amala ngü fü ewü, gü ba dene, "Wü mere e amala nga ngü la fü wü bu wü fa fa fa de." Fü ah adu amala ngü fü wü wö ye mbarase la, ake ni ye na, gü ba, "Wü mere kümü, wü to fü mbarase la."

Dela ngü ta te Yesu küwa ye Yayirü di. Fü ngü la aga gbü jia wü kpara afa sü.

6

*Dene ngü ka Yesu agbü Nazareta
Matayo 13:54-58*

¹ Gbü gara ra, fü Yesu ayia de wü kpara ka-ye, ace sü era mere ngu *Galilaya, adu anü agbü köti ka-wü, ta te engu ga gbügbü na ne. ² Fü *sükpä ka Me amaka ewü kpala. Fü Yesu ayia anü ari kpa *esambü ka biti-te, akpo da ari wü kpara kpala. Fü bi wü kpara angbü da eje ngü gögömö na. Fü ngü la aga gbü jia ewü afa sü. Fü ewü angbü da emala ngü esüka wü, gü ba dene, "Angü komoko ne maka de mere kpeke riri de bane neh kaye? Mere kpeke ngü ka talara, te engu ngbü emere kpa te gara sü ne, e-to wazi la fefe na neh da?" ³ Te engu di kpah bü de kpara, te ngbü eforo rü de sene ne? Te ni ye na di kpah bü de *Mariya ne. Ani wu wü di enga ni ye na kpah kpo ne, wü *Yakobo, *Yüsefa, Yudi, bete Simüna, abe kpah te wü jaji würüse, te ewü di 'buru wü kpara de sene ne. Te di bala, Yesu maka de nda-ye wazi de bala

neh kaye?" Teka ngü la, wüh le ngü kaka nda-wü 'buru 'buru de. ⁴ Fü Yesu adu arü alügü ngü fü ewü, gü ba dene, "Te mü de *mürü dofo la, wü kpara gba yi ti acu ngü mü nda-wü de. Amba 'duwa agbü gara wü sü fü wü kpara angbü ecu ngü mü. Dela si-ngü te yi le acu ngü ra tete na nda-yi de ne."

⁵ Teka ngü la, ah ti fü Yesu amere kpeke wü ngü ka talara kpa gbü sü ka-wü la nda de, angü wü kpara de kpala, de wü mürü ye na, wüh le ngü kaka-na nda-wü de. 'Duwa mba wü mürü keke biri biri, te engu ngbü eko pa ye gbü nzö ewü, fü keke ka-ewü angbü enza.

⁶ Dela ngü ta te mere Yesu, gbü sü ta te engu ga gbügbü na. Fü ngü la aga gbü jia Yesu afa cu sü, angü wü kpara kpa gba ewü la le ngü kaka nda-wü de.

Fütanga ngü la, fü Yesu angbü endoro gbü wü köti kpala 'buru nde, da eri wü kpara de to ngü ka Me.

*Dene ngü te Yesu tima wü kpara ka-ye,
nzükpa de füh ye 'basu, teka amala ngari
Me*

Matayo 10:5-14; Luka 9:1-6

⁷ Gbü gara ra, fü Yesu ai wü kpara ka-ye, nzükpa de füh ye 'basu ne kpaka ye, angü ah le atima ewü, teka anü amala to ngari Me agbü wü gara sü. Fü engu ato wazi fü ewü, teka fü ewü adi eliki *siti wü di enga me di, de wü muruyi. Fü ah ayia atima ewü 'basu 'basu, ⁸ gü ba dene, "Yi nü enü, yi mala ngari ra fü wü kpara. Te yi te enü la, yi mere e aza mere bi wü e esaka yi de. Yi za ambata kpah de. Yi za kombo kpah de. Yi za jiase kpah de. Yi za 'duwa ngbangba esaka yi, fü yi anü di. ⁹ Yi mere e ato bongo eküte yi 'basu 'basu kpah de. Yi to hü mba kamaka gbü lö yi. ¹⁰ Mene sü te yi ena anü akoro gbügbü na, te wü kpara la za yi eyi gbü mürü, de yi ngbü nzö gba kpara biringbö la, zalü gbü sükpi te yi ena ayia anü sü tete. ¹¹ Mene sü te ewü le ngü ka-yi gbügbü de, yi mere e angbü sela de. Yi yia sela, de yi bunda zu-tö ka köti ka-ewü la, te lö yi asidi, ciki sela, de wüh wu ngü la, teka agü tamu ngü la fü ewü, gü ba dene, 'Me le ngü ka-wü de, angü wü le ngü wü kpara ka-ni, Me, kpah de.' " Dela ngü te Yesu mala fü wü kpara ka-ye, te engu tima ewü ne.

¹² Fü wü *kpara ka Yesu la ayia anü sü, abaya, angbü da emala ngari Me fü wü kpara, gü ba, "Wü ce *siti ngü ka-wü asidi. Wü fü maguma wü, adu ale ngü ka Me." ¹³ Fü ewü amaka mere bi wü kpara, de siti wü di enga me guwu ewü. Fü ewü aliki siti wü di enga me la guwu ewü asidi. Fü ewü amaka kpah mere bi wü mürü

keke. Fū ewū afuru mü gbü nzö ewü. Fū ewü ayia aküwa.

Dene ngü ka kpi ka Yüwane Mürü Babatiza

Matayo 14:1-12; Luka 3:19-20; 9:7-9

14 Gbü wü re engu la, Anitipa *Erode ta de mere miri ka wü *Galilaya. Gbü gara ra fū miri la aje nga Yesu. Angü iri Yesu wü ka-ye eyi gbü wü sü la 'buru. Fū wü kpara angbü eyi-ta tete-wü, gü ba, "Apa! Yesu mbi mbi neh da?" Wü gara ga, "Engu de *Yüwane Mürü Babatiza, ta te wüh mörö engu ne. Ah zükü me-ye gbü kpi. Teka ngü la, fū engu angbü emere wü kpeke ngü ka talara." 15 Gara kpara gü ba, "Engu de gara *mürü dofo, baka wü mürü dofo ta te ewü ngbü emala ngari Me gügü ne." Gara gü ba dene, "Wayi! Engu de mürü dofo *İliya."

16 Te Miri Anitipa Erode je nga Yesu, fū ah akpe cürü, angbü de mere fingangü, gü ba, "Wayi, komoko la, ah de Yüwane, ta te ni mörö engu ne. Ah zükü me-ye gbü kpi." 17-19 Angü Yüwane kpi ta kükürü nda de. Ngü ladü gbügbü na. Miri Anitipa Erode mörö Yüwane ta me-ye, teka ngü ka wara ye, de iri ye Erodiya ne. Angü miri la fa ta würüse la esaka gara enga ni ye, de iri ye *Filipo. Fū ah adu aza engu wara ye tete. Teka ngü la, fū Yüwane ayia amala ngü fū miri la, gü ba, "De-ye deyi, ngü te ye mere la, ah de siti ngü. Ye fiti wara enga ni ye baye? Ah tü ta fū ye amere bala de. Angü dela siti ngü gbü jia Me!" Teka ngü la, fū miri la ayia azoro Yüwane, agü gbü ku. Erodiya, fū mü aje kpah ngü la, ati ngü la guvu mü. Fū mü akpo da egiri kaje de ni mörö Yüwane asidi. Mü maka de, angü watı mü le de. 20 Miri la ngbü ekpe cürü, angü ah wu eyi, gü ba, Yüwane de züka kpara ka Me. Te di bala, fū ah angbü egiri kaje teka aküwa Yüwane esaka wara ye. Ah le ta de ni di eje ngari Me gömō Yüwane, angü ngü la reke tete na areke. Amba gara mamaguma le nda de, angü ngü la ngbü kpah esiti fingangü kaka asiti.

21 Amba, Erodiya, mü ngbü fi bü egiri kaje, amörö Yüwane tete na. Gbü gara ra, fū mü ayia amaka kaje engu ne. Angü watı mü mere mere karama ka-ye, teka afi nga sikipi te wüh yaka engu tete na. Fū ah ayia ai cögbörö wü kpara ka-ye, de wü nzö-gü ka-ye, de wü mere kpara ka Galilaya 'buru. 22 Fū Erodiya ayia atima enga ye, jaji würüse, de ah nü, ah lo bi engagira miri, de wü ngba ka-ye. Fū jaji würüse la akpo da elo bi, elo bi 'duwa ba-neh-ene-la. Fū bi kaka ayia areke gbü jia miri de wü ngba ka-ye afa sü. Fū miri ayia amala ngü fū jaji würüse la, gü ba dene, "Enga ni, ngü ka-ye reke gbü jia ani fa sü. Te di bala,

ni ena ato fū ye neh ene?" 23 Fū miri la ayia akina te-ye gbü jia wü kpara 'buru, gü ba, "Mene e te ye ngbü ele, de ye yi-ta ni tüngüngü, ni ena ato ato fū ye. Ni tü atiri de. Te ye le kpah de ni ye süka sü ka-ni fū ye la, ni ena aye aye."

24 Fū jaji würüse la ayia akpe kpaka ni ye, ayi-tata, gü ba dene, "Ni ni deyi, mene e te ye le de ni yi-ta miri tekaka, de ah to fū ni, neh ene?" Ni ye na gü ba, "Enga ni deyi, ye mala fū miri de ah tima kpara, ah nü, ah mörö Yüwane Mürü Babatiza. De ah wa nzönzö na, ah koro di fū ye, teka fū ani awu, gü ba dene, Yüwane kpi eyi fanü."

25 Fū jaji würüse la ayia akpe adu kpaka miri, amala ngü fefe, gü ba dene, "Wayi, mere kpara, ngü te ni le, ah dene. Ni ele de wüh mörö Yüwane asidi. Fū ewü awa nzönzö na, ao gbü gada, akoro di, ato fū ni enatikine." 26 Fū ngü la asiti gbü jia Miri Anitipa Erode afa sü. Amba teka ngü ka kina, de te engu kina te-ye di, gbü jia wü ngba ka-ye ne, ah le ace kina ka-ye la tine de, ka vi-jia. 27 Te di bala, fū ah ayia atima marajümiya ka-ye, gü ba, "Ye nü, ye koro de nzö Yüwane." Fū marajümiya la ayia anü angbü ku, ade ngürü Yüwane, akolo gbö! 28 aza nzönzö na, ao gbü gada, akoro di, ato fū jaji würüse la. Fū jaji würüse la aza nzö Yüwane, ayia anü di, ato fū ni ye.

29 Dela ta ngü te Yüwane Mürü Babatiza kpi tete. Te wü kpara kaka-na je ngü la, fū ewü akoro, abi kökö na, anü di, ati.

Dela si-ngü te Miri Anitipa Erode kpe cürü Yesu tete, gü ba, engu de Yüwane Mürü Babatiza, te zükü me-ye gbü kpi.

Dene ngü te Yesu to zü-e di fū mere bi wü kpara

Matayo 14:13-21; Luka 9:10-17; Yüwane 6:1-13

30 Fütanga ngü la, fū wü *mürü tima ka Yesu, ta te engu tima ewü ne, adu akoro kpaka Yesu. Fū ewü akpo amala nga ngü 'buru, te ewü ngbü mere kpala, kpah de ngü te ewü ngbü ri wü kpara di. 31 Fū mere bi wü kpara aci abiti te-wü kpaka ewü la, wü gara da ekoro, wü gara da ego. Da sü te wü Yesu ena azü e tete ma, da fe te-wü kpah ma. Te di bala, fū Yesu adu arü amala ngü fū wü mürü tima ka-ye ne, gü ba dene, "Ani nü la mba efe te-ani kpa te gara sü, te wü kpara di tete ma." 32 Fū ewü ayia ali gbü *zabu, anü kpa te gara sü te köti di tete ma.

33 Te wü mere bi wü kpara la wu, gü ba, wü Yesu nü sü eyi kpala, fū ewü aci 'buru, anü de woro, afa nga Yesu. Amba wüh le nda-wü kaje de lö wü to kpa füh gümbe. Fū ewü akpe akoro angbü sü, te wü Yesu

enü tete na ne, fi me-wü. ³⁴ Te wü Yesu nü koro gbü sü la, fü ewü amaka mere bi wü kpara kpala kpah gbe. Fü cinga ewü ari te Yesu, angü wüh ngbü gbü jijia baka wü kambiliki, te kpara di gbü nga ewü ma. Fü ah ayia akpo eri ewü de mere bi wü ngü, zalü koro di etamuražo.

³⁵ Etamuražo la, fü wü kpara ka Yesu ayia akoro amala ngü fefe, gü ba dene, "Mere kpara deyí, ye ceka la, ra te eti dene! Ani ena amere baye, teka wü mere bi wü kpara ne? Tala mere ewü de? Te sü di kpakine edere sü, köti kpah ma ne. ³⁶ Ah le ta de ye mala ngü fü ewü, de wüh nü kpa gbü gara köti, agiri e, ase, azü." ³⁷ Yesu gü ba dene, "Yi ena ato zü-e fü wü kpara la me-yi." Wüh gü ba, "Apa! Wü kpara la sibi fa sü! Ani ena amaka mere bi zü-e, tungü wü kpara la, neh kaye? Anga ani ena ase e la neh de jiase fe? Ah ba e te mü ena amere tima teka re biringbö, fü mü amaka jiase la."* ³⁸ Yesu gü ba, "Ambata esaka wü sela neh fe? Wü nü la, wü ceka." Fü ewü ayia anü aceka, amaka ambata ngbee 'buruve, bete si 'basu. Fü ewü adu amala nganga na fü Yesu.

³⁹ Ta gbü sü la, züka fu-gü ladü fula fula, bane. Fü Yesu adu arü, amala ngü fü wü kpara ka-ye, gü ba dene, "Wü biti wü kpara la tundu tundu, de wüh ngbü la köfö, füh gü sene." ⁴⁰ Fü ewü ayia abiti te-wü gbü wü da-sü ka-wü, gara ewü kama biri (100), wü gara ewü teke 'basu de füh wü nzükpa. ⁴¹ Fü Yesu aza ambata 'buruve bete si 'basu la, ayia aceka kpi kpa tikpi, agbo nga iri Me teka zü-e la. Fü ah ayia akukuru tü wü ambata la, aza ato esaka wü kpara ka-ye, de wüh gafa fü wü kpara 'buru. Fü ewü adu agafa wü si kpah bala. ⁴² Fü wü kpara aci 'buru, azü e la, asika nde. ⁴³ Fü wü *kpara ka Yesu ayia aro du zü-e la, asi gbü wü kuwu nzükpa de füh ye 'basu.

⁴⁴ Dela ngü ta te Yesu mere, te engu to zü-e di fü mere bi wü kpara. Wü kpara te ewü zü e la, wüh baka wü komoko kutu 'buruve (5,000).

Dene ngü ka Yesu te engu nü nü füh ngu Matayo 14:22-36; Yüwane 6:14-21

⁴⁵ Fütanga ngü la, fü Yesu ayia amala ngü fü wü kpara ka-ye, gü ba dene, "Wü za *zabu eza, anü nda-wü kpa engagira nü, kpa etangu, kpa gbü Betesayida. Nda-ni, ni la ece kpa te bi wü kpara ne, de wüh go agba wü feke. Fü ni adu afa nga wü." Fü wü *kpara ka Yesu ayia ali gbü zabu, anü sü. ⁴⁶ Fü Yesu ato mandí fü mere bi wü kpara la. Fü ewü abaya, ago agba

wü. Fü Yesu ayia anü kpa enzö mere rüvü kpikpi ye, angbü kpala, da eku gba fü Me. ⁴⁷ Fü du ra la ati te Yesu, kpa enzö rüvü la kpikpi ye, o wü kpara kaka di nda-wü nengete, kpa etü ngu gbü zabu.

⁴⁸ Ah te ekoro emözekpi, o kpi seke nza la de, fü Yesu ayia aceka kpi, awu wü kpara ka-ye, te ewü ngbü embü ambü ka mere wege. Angü wege la ngbü enzi ewü, elügü kpa sisi. Fü Yesu ayia, de ni nü kpaka ewü la. Amba wüh ka-wü nengete etü ngu. Fü ah ayia angbü enü de lö ye füh ngu. Fü ah anü, anü akoro ghamari ede zabu la. ⁴⁹⁻⁵⁰ Fü ewü ayia awu engu da enü füh ngu de bala, wüh gü ba, "Dela sirimbi!" Fü mere cürü ayia ari te ewü. Fü ewü afi nda-wü, gü ba, "Dela kuru kpara, te koro gbü mbükü!" Fü ewü ayia abarere ka cürü kpa tikpi, angü wüh wu, gü ba, ah de Yesu ne, nda-wü de. Fü Yesu akoro amala ngü fü ewü, gü ba dene, "Yi gu maguma yi agu. Yi kpe cürü de, ah kaye de-ra." ⁵¹ Fü ah ayia ali kpaka ewü agbü zabu. Fü mere wege, te ngbü emere ewü la, ayia anga.

Dela ngü ta te Yesu mere te engu nü tete na de lö ye füh ngu. Fü ngü la aga gbü jia wü kpara kaka-na 'duwa ba-neh-ene-la. ⁵² Angü wüh wu si-ngü gbü ngü ta te engu mere, te engu to zü-e fü wü mere bi wü kpara la, nda-wü de. Nzö ewü kpekpeke, angü wüh to maguma wü fü Yesu mbi mbi la de.

⁵³ Fü wü Yesu ayia akö ngu kpa etangu, akoro gbü gara sü de iri ye Genezareta. Fü ewü ai zabu ka-wü, ace edere ngolo sela. ⁵⁴ Wüh te ekoro kpala, fü wü kpara aci 'buru awu, gü ba, Yesu koro eyi. ⁵⁵ Fü ewü ayia abaya, akpe de woro kpa gbü wü gara köti kpala 'buru nde, amala nga ngü la fü wü kpara 'buru. Fü ewü akpo da ebi wü mürü keke de darara ka-wü, enü de ewü kpa te sü te ewü je, gü ba, Yesu ladü tete na. ⁵⁶ Gbü wü sü 'buru te Yesu ngbü ekoro tete na, agbü wü mere köti, bete wü jürü köti edere sü ne, wü kpara ngbü ebi wü mürü keke ka-wü, ekoro di, eo gbü ngambasü. Fü ewü angbü da efüwa te-wü fü Yesu, gü ba, "Ani ele amfofo bü mba mö bongo ka-ye, de ani küwa." Wü kpara ta te ewü ngbü emfofo mö bongo ka Yesu ne, fü ewü angbü eküwa, gbü keke ka-wü la 'buru.

7

Dene ngü te Yesu mala, teka gele ka wü Yisaraye
Matayo 15:1-20

* 6:37 6:37 Ngü te wüh ba gbü ngü Giriki gü ba "Denariya 200." Ta gbü sikpi la, te mü mere tima teka ra biringbö, wüh ena ato denariya biringbö fü mü.

¹ Gbù gara ra, fù wù Yesu amaka te-wù de wù *Farusi, de wù gara wù *mürü riri, te ewü koro kpa gbü Yerüsalema. ²⁻⁵ Wù Farusi le riri ka gele ka-wù fa sü. Angü gele ka-ewü teka azürü e, ah fa sü. Te mü le azü e, mü ena azürü kpa mü gbü gara kaje kpikpi ye. Te mü koro da ese e, mü ena azürü kpa mü kpaah gbü gara kaje kpikpi ye. Gele teka azürü ndü'ba ka-ye kpikpi ye. Gele teka azürü sila kpaah kpikpi ye. Gele teka azürü e, te wüh mī gbü se kpaah kpikpi ye. Dela gele ka wù kundu kundu wù *Yisaraye, ta te wù Farusi le fa sü. Te mü mere bala de, wüh gü ba, "Ah esiti gbü jia Me."

Te wù Farusi la koro kpaka Yesu, fù ewü awu kaje te wù *kpara ka Yesu ngbü ezürü kpa wü di, teka azü e ne, ah baka riri ka gele ka-ewü, ka wù Yisaraye, nda de. Fù ewü adu ayi-ta Yesu, gü ba dene, "Ah mere baye te wù kpara ka-ye ne ngbü ezü e de libiti te kpa wü de bala? Wüh ce gele ka wù kundu ani, neh teka ne?" ⁶ Yesu gü ba dene, "De-yi deyi, yi ngbü ele gele ka wù kundu nih efa sü bala, neh teka ne? Yi de wü mürü mani! Fanü fanü, *mürü dofo Yisaya wu mani ka-yi la eyi gügü. Angü Me mala ta ngü la gögömö na, gü ba dene, 'Ni le ngü ka wù mürü mani la de. Angü wüh ngbü egbo nga iri ni nda-wü bü de komö wü kükürü, amba maguma ewü le ni nda de. ⁷ Wüh ngbü egbo nga iri ni, da eri wü kpara, gü ba, "Ani ngbü eto *Riri ka-ni, Me, fù wü kpara." Amba dela Riri ka-ni nda de. Ah ka-ye de kükürü gele ka wù kundu wü.* Dela ngü ta te Me mala gömö Yisaya teka yi."

⁸⁻⁹ Fù Yesu adu amala gara ngü fù ewü, gü ba dene, "Riri ka Me, ta te engu to fù yi ne, yi le aje de, neh teka ne? Yi ngbü ele 'duwa riri ka gele ka wù kundu yi. Dela neh züka ngü? ¹⁰ Angü *Müse to ta *Riri ka Me fù yi, gü ba dene, 'Ah le fù mü adi ecu ngü wü mü ake ni mü, da eje riri ka-ewü.'† 'Mene kpara te ngbü efala wö ye ake ni ye, ah le de wüh mörö engu amörö asidi.‡ Dela eyi Riri ka Me. ¹¹ Nda-yi, wü *mürü riri, yi ce ngü ka Me la teka gara gele ka-yi de iri ye korobana ne. Korobana la, ah baka e te kpara kina te-ye, gü ba dene, 'Ni le ato e fù wü wö ni ake ni ni tüne de. Ni ena ato e la fù Me.' Dela e te ewü gü ba, korobana. ¹² Te kpara la du ngbü cükü'daye, fù mamaguma ayia agu, fù ah akoro kpaka yi, wü mürü riri, gü ba, 'Ni le areke kina te ni kina te-ni di la asidi,' yi le nda-yi de. Yi gü ba, 'Kpara la mere e ace kina ka-ye la de.' Fù kpara la ayia

ace wü wö ye de wü ni ye 'buru gbü cinga teka ngü ka-yi la. ¹³ Gbü ngü la, yi ngbü ece *Riri ka Me asidi, ao gele ka wù kundu nih kpa engagira nü. Angü fanü fanü mere hi wü ngü ladü te yi ngbü emere kpaah ba e la." Dela ngü ta te Yesu mala fù wü mürü riri la.

¹⁴ Fù Yesu adu arü amala ngü fù wü kpara 'buru, gü ba dene, "Yi je la ngü te ma ngbü emala fù yi ne mbi mbi. ¹⁵ Ngü te ena asiti mü gbü jia Me, ah de ne ngü ne? Ah ena adi de zü-e te mü ngbü ezü? Ah bala de. Ah ena adi 'duwa *siti ngü te mü ngbü efi emaguma mü, ah ena asiti mü gbü jia Me me-ye. ¹⁶ Te güje mü ladü, de mü da güje mü te ngü te ma mala la."

¹⁷ Fù wü Yesu ayia ace wü kpara la, ari kpa esambü. Fù wü *kpara ka Yesu akoro ayi-tata na teka ngü te engu mala la, gü ba dene, "Si-ngü la, ah gü neh fe?" ¹⁸ Yesu gü ba dene, "Yi kpaah bala? Yi je si-ngü la nda-yi kpaah de? Zü-e te mü ezü, ah ena asiti mü gbü jia Me, neh baye baye? ¹⁹ Angü zü-e nü kpa emaguma mü nda de. Ah enü ka-ye kpa gbü nza mü, anü sü ka-ye agbü gü." Ngü te Yesu mala la, ah baka e te engu gü ba, zü-e te kpara ezü, ah 'buru mbi gbü jia Me. ²⁰ Fù Yesu agü ba, "Ngü te ena asiti mü gbü jia Me, ah de siti ngü, te mü ngbü efi emaguma mü. ²¹⁻²² Angü te kpara ngbü de siti fingangü emaguma ye la, wü ngü te engu ena angbü emere ne, ah ena adi kpaah 'buru de siti wü ngü. Ah ena amere yala, ah ena afiti wara kiri ye, ah ena amere waza. Gara ena ati ngü guvu ye, asoko kpara, amörö kpara. Gara ena akpi gümmü e, amere zü, azi e ka kiri ye. Gara ena acu ngü ye, afiti kiri ye de mani, emere wü gara töndö ngü, te Me le de. ²³ Wü kpara 'buru ngbü emere wü ngü de bala, ah teka siti ngü te di emaguma ewü. Dela wü ngü te ena asiti mü gbü jia Me me-ye."

Dene ngü ka egba Sarüfanisiya, te wu, gü ba, wazi Yesu fa sü
Matayo 15:21-28

²⁴ Fütanga ngü la, fù wü Yesu ace sü la, ayia anü kpa gbü nga nzö köti ka Tera. Fù ewü anü akoro agba gara kpara kpala. Yesu le ta de wü kpara wu ni nda-wü de. Amba dada na te engu ena awo te-ye nda ma. ²⁵ Gara würüse ta la kpala, te *siti wü di engu me ngbü emere yïanga, jaji würüse, efa sü. Fù würüse la aje ngü, gü ba, "Yesu koro eyl." Fù ah ayia anü akoro kpaka Yesu, abuka gbüra ye kötö, ²⁶ anda'ba te-ye fù Yesu, gü ba, "Mere kpara, ye koro, ye küwa engu ni,

* 7:7 7:7 Mü ena amaka ngü la gbü buku ka Yisaya 29:13. † 7:10 7:10 Mü ena amaka ngü la gbü buku ka Gogo ka wü Yisaraye 20:12. ‡ 7:10 7:10 Mü ena amaka ngü la gbü buku ka Gogo ka wü Yisaraye 21:17.

aliki siti wü di enga me guguvu asidi." Amba würise la de egba Sarüfanisiya, ah de egba *Yisarayeles nda de. ²⁷ Fü Yesu adu arü amala ngü fü würise la de mani, gü ba dene, "Te zü-e ladü la, ah le de wüh to la fü wü jaji feke. Angü te wüh za kümü, te wüh le ato fü wü jaji, asötö fi fü wü bürü la, ah de siti ngü." Yesu mala bala, angü würise la ka-ye de *ganzi kpara fefe. ²⁸ Fü würise la alügü ngü, gü ba, "Wayi, mere kpara, ah ngbürü bala fanü. Anga te wü jaji ngbü da ezü e la, wü bürü ngbü nda-wü fi bü ezü kpokporo na, te ngbü egürü kötö, la de?" ²⁹ Fü ngü la ayia areke te Yesu afa sü. Fü ah alügü ngü fefe, gü ba, "Wayi, mü lügü ngü la eyi mbi. Siti wü di enga me la ce enga mü eyi. Mü go ego agba mü." ³⁰ Fü würise la ayia ago agba ye, amaka enga ye kpala te ra ka-ye kötö. Siti wü di enga me la ce engu eyi fanü.

Dene ngü te Yesu küwa gara komoko, te gügüje di ma

³¹ Fütanga ngü la, fü wü Yesu ayia agbü nga nzö kötö ka Tera, fü ewü ale kaje ka Sidona. Fü ewü adu ale kaje ka Dekapoli, anü akoro era mere ngu *Galilaya. ³² Te wü Yesu koro kpala, fü ewü aza gara komoko te gügüje na di ma, te ro mö mbölö mbölö kpah de, akoro di kpaka Yesu. Fü ewü anda'ba te-wü fü Yesu, gü ba, "Mere kpara deyü, ye o kpa ye gbü nzö enga ni ani ne, aküwa engu." ³³ Fü Yesu ayia aza komoko ne esüka mere bi wü kpara la, anü di kpa edere sü. Fü ah ayia aza jikpa ye ato gbü güje komoko la, adu asü ngüsü te jikpa ye, ato te mimi na. ³⁴ Fü ah arü ae jia ye kpa tikpi, awo wazi, gü ba dene, "Afata," baka ngü te ewü gü ba, "Gügüje ü te-ye eü." ³⁵ Fü güje komoko la ayia aü. Fü mimi na ayia afuru te-ye. Fü komoko la akpo da emala ngü mbölö mbölö. ³⁶ Fü Yesu adu amala ngü fü wü kpara la kpekpeke, gü ba dene, "De-wü deyü, wü mere e amala nga ngü la fü wü bu wü de." Amba wü kpara la le aje ngü ka Yesu la nda-wü de. Fü ewü ayia akpo da emala nga ngü la fü wü kpara 'buru. ³⁷ Fü ngü la aga gbü jia wü kpara 'duwa ba-neh-ene-la. Wüh gü ba, "Yesu ngbü emere wü ngü 'buru 'dö mbi. Angü ah ngbü ereke wü kpara 'buru. Yi ceka la, wü kpara ta te güje ewü di ma, wüh kpo tine eyi eje ngü! Wü kpara ta te ewü ro mö de ne, wüh kpo tine eyi ero mö!"

8

Dene e'ba'basu ngü ta te Yesu to kphah zü-e di

fü mere bi wü kpara

Matayo 15:32-39

¹ Gbü gara ra, fü mere bi wü kpara adu akoro, abiti te-wü kpaka Yesu gbe. Fü Yesu akpo angbü eri ewü. Fü ewü ara kpala sikpi bata. Fü zü-e ayia anza esaka ewü. Fü Yesu ayia ai wü kpara ka-ye kpaka ye, amala ngü fü ewü, gü ba dene, ² "Titine cinga wü kpara ne ngbü eri te ra ari, angü nih ra eyi de ewü sene sikpi bata dene. Zü-e esaka ewü tine eyi ma. ³ Te ma mala ngü fü ewü de wüh go agba wü la, wüh ena andiri ka-wü andiri te kaje ka tala, angü gara ewü koro nengete." ⁴ Fü wü kpara kaka-na alügü ngü fefe, gü ba, "Öö mere kpara, ani ena amaka mere bi zü-e, tüngü wü kpara la, neh kaye? Te ani di kpakine kpa edere sü, kötö sene kphah ma ne." ⁵ Yesu gü ba dene, "Ambata esaka wü sela neh fe?" Wüh gü ba, "Ambata ngbee lorenzo." ⁶ Fü Yesu adu amala ngü fü wü kpara la 'buru, de wüh ngbü kötö. Fü ah ayia aza ambata la, agbo nga iri Me tekaka. Fü ah adu akukuru tü ambata la 'buru, aza ato fü wü kpara ka-ye, de wüh gafa fü wü kpara la 'buru. Fü ewü ayia aza ambata la, agafa fü wü kpara la 'buru. ⁷ Wü jürü si ta kphah ladü esaka ewü mba rooo. Fü Yesu akö wü si la, agbo nga iri Me, ato fü wü kpara ka-ye, gü ba, "Wü gafa kphah egafa fü ewü." ⁸ Fü wü kpara la aci 'buru azü e la, asika di. Fü wü *kpara ka Yesu aro dudu na gbü wü kuwu lorenzo. ⁹ Wü kpara ta te ewü zü e la, wüh baka wü kpara kutu bala (4,000). Fü Yesu ayia ato kaje fü wü kpara la 'buru, de wüh go agba wü. ¹⁰ Fü wü Yesu ayia ali agbü *zabu de wü kpara ka-ye, anü ka-wü kpa etangu, agbü nga nzö kötö ka Dalamanuta.

Dene ngü ka Yesu de wü Farusi

Matayo 16:1-4

¹¹ Fütanga ngü la, fü gara wü *Farusi ayia akoro kpaka Yesu de mani, akpo da ekpülü engu de yiki ka-wü, gü ba dene, "Mere kpara deyü, ye mere la mere lara ngü ka talara fü ani, teka fü ani awu, gü ba, Me tima ye me-ye fanü fanü." ¹² Fü ngü ka-ewü la ake te Yesu afa sü. Fü ah ayia awo wazi, agü ba, "De-yi, siti wü kpara de gbü wü re ne, yi le de ma mere mere ngü ka talara gbü jia ani, neh teka ne? Ngü te ma emala dene, ah de zu ngü. Ma ti amere ngü ka talara gbü jia yi nda-ra de." ¹³ Fü ah ayia ace wü Farusi la, adu ali gbü *zabu de wü kpara ka-ye, anü sü ka-wü.

Dene ngü te Yesu mala teka siti fingangü ka wü Farusi

Matayo 16:5-12

¹⁴⁻¹⁵ Te wü Yesu ngbü ekö mere ngu la tete de *zabu, fü Yesu adu amala gara ngü fü ewü de mani, gü ba dene, "De-wü deyü,

wü di eceka te-wü mbi teka ambata ka wü *Farusi bete nda Miri Anitipa *Erode, te wüh ngbü emere de *kö ne, angü kö ka-ewü la, ah esiti." Amba wü *kpara ka Yesu, te yi li gbü zabu la, to yi iri teka aza zü-e fü yi eyi. Yi za bü enga ambata ngbee biringbö. ¹⁶ Te di bala, wüh je si mani te Yesu mala la nda-wü de, angü fingangü ka-ewü lala fi bü teka ngü ka zü-e. Fü ewü angbü da eyi-ta tete-wü, gü ba dene, "Si-ngü la neh baye? Ah mala ngü la fü ani bala ne, teka te ambata di esaka ani ma ne?" ¹⁷ Te Yesu wu fingangü ka-ewü bala, fü ah amala fü ewü, gü ba dene, "De-yi, yi ngbü efi ngü bala, neh teka ne? Fingangü ka-yi la fi bü teka ngü ka zü-e? Ngü te ma mala ne, ah ri gbü nzö yi la fi de? Nzö yi kpekepe! ¹⁸ Wü ngü te ma ngbü emere, te yi ngbü ewu cu de jia yi ne, ngü la ri gbü nzö yi la fi de? ¹⁹ Yi fi la nga ambata 'buruve terane, te ma za, kukuru to fü bi wü kpara kutu 'buruve (5,000) ne. Yi du ro dudu na, biti gbü wü kuwu neh fe?" Wüh gü ba, "Nzükpa de füh ye 'basu." ²⁰ Yesu gü ba, "Anga gara na, te ma za ambata lorozi, ato fü bi wü kpara kutu bala (4,000) ne. Yi du ro biti gbü wü kuwu neh fe?" Wüh gü ba, "Kuwu si lorozi." ²¹ Yesu gü ba dene, "Te di bala, ngü te ma mala fü yi ne, yi je sisi la de, neh teka ne? Ah le de yi wu awu, gü ba, ma ti kphah eyi ato gara zü-e fü yi. Amba ngü ka kö gbü ambata, te ma mala ngangua fü yi ne, yi wu sisi na de, neh teka ne?"

Dene ngü ka gara komoko te Yesu ü jijia

²² Fü wü Yesu anü de *zabu, anü akoro agbü Betesayida. Te wüh koro kpala, fü wü kpara akoro de gara komoko te jijia na di ma, kpaka Yesu. Fü ewü anda'ba te-wü fü Yesu, gü ba, "Mere kpara, ye reke la jia enga ni ani ne." ²³ Fü Yesu ayia azoro kpa komoko la, aza engu, anü di canza kpa edere sü. Fü ah asü ngüsü te jikpa ye, ao gbü jia komoko la. Fü ah ao kpa ye gbü nzö komoko la, gü ba, "De-ye deyi, ye ceka la kpi eceka. Ye te ewu e?" ²⁴ Komoko ne, jia mü ceka kpi mba cükü'daye, fü mü agü ba dene, "Ni ngbü ewu sü akine mba sawu sawu bala. Wü kpara ngbü gbü jia ni baka wü ndugu rü la." ²⁵ Fü Yesu adu kphah ao kpa ye gbü jia komoko la. Fü jia komoko la ayia alofo, raaa! Fü komoko la akpo da ewu wü kpara, de wü e, 'buru mbi mbi mbi. ²⁶ Fü Yesu amala ngü fefe, agü ba dene, "De-ye deyi, ye go ego agba wü. Ye mere e adi endoro agbü mere köti, anga agba wü kpara 'da 'da 'da de." Dela ngü te Yesu mere, ta te engu reke jia gara komoko agbü Betesayida.

Dene kpeke ngü te Petero mala teka Yesu

Matayo 16:13-20; Luka 9:18-21

²⁷ Fütanga ngü la, fü Yesu ayia de wü kpara ka-ye, anü gbü wü jürü köti te di ede Kayisariya Filipoyi. Te wüh ngbü enü tete te kaje, fü Yesu ayia ayi-ta ewü, gü ba dene, "Wü kpara ngbü efi, gü ba, ni de neh da?" ²⁸ Wüh gü ba dene, "Wü kpara ngbü efi, gü ba, ye de kpeke kpara. Angü wü gara kpara ngbü emala nda-wü, gü ba, 'Ye de *Yüwane Mürü Babatiza, te zükü gbü kpi.' Wü gara gü ba dene, 'Ye de mürü dofo *Iliya.' Wü gara gü ba dene, 'Ye de gara *mürü dofo, baka wü mürü dofo ka Me ta gügü ne.' " ²⁹ Yesu gü ba dene, "Anga cu de-wü, wü ngbü efi nda-wü, gü ba, ni de neh da?" Petero, fü mü ayia arü, alügü ngü fü Yesu, gü ba dene, "Mü de *Kurisito, Mere Miri, te Me tima teka aküwa a ne!" ³⁰ Fü Yesu amala ngü fü ewü 'buru kpekepe, gü ba dene, "De-wü deyi, wü mere e amala fü wü kpara, gü ba, ni de Kurisito ne, la de."

Dene ngü te Yesu mala teka ngü ka kpi ka-ye

Matayo 16:21-28; Luka 9:22-27

³¹ Fütanga ngü la, fü Yesu ayia akpo emala ngü fü wü kpara ka-ye, teka kpi ka-ye, gü ba dene, "Mere cinga ladü, te ena amere ra. Dela cinga nda de. Angü ah le de cinga mere *Ye Kpara ka Kpi bala. Wü *kovo, de wü *mürü gele, de wü *mürü riri, wüh le ngü ka-ra nda-wü de. Wüh ena amörö ra, amba gbü *ebabata sikpi, Me ena adu azükü ra." ³² Yesu mala ngü ka kpi ka-ye la 'buru mbölo mbölo. Te Petero je ngü la, fü ah ayia aza Yesu esüka wü bu ye edere sü, amala ngü fefe, gü ba dene, "Ngü la mere e adi bala de." ³³ Fü Yesu afü te-ye, aceka wü gara kpara ka-ye. Fü ah adu amala ngü fü Petero kpekepe, gü ba dene, "Mü ce ra de ngü ka-mü ka *Satana la! Angü fingangü ka-mü la, ah de ngü ka Me nda de. Dela kpi ye siti fingangü ka wü kpara de füh kotö ne."

³⁴ Fü Yesu ayia abiti wü kpara ka-ye, de mere bi wü kpara, 'buru te sü biringbö. Fü ah akpo da eri ewü, gü ba dene, "Te mü ele angbü baka zu kpara ka-ra la, mü mere e afi nga wü e ka-mü 'buru 'dö de. Mü reke te-mü teka kpi ka-mü, baka kpara te ngbü ebi mere *rü gbegete, te wüh ena abere engu fefeh na, amörö. Fü mü ayia alala gbü nga ra. ³⁵ Te mü le aküwa te-mü de tete-mü, mü ti aküwa te-mü nda-mü de. Amba te mü ce te-mü, o fü kpi teka ngü ka-ra la, Me ena aküwa mü me-ye. ³⁶ Mü fi la nga kuru mü! Te mü ce ngü ka Me, fü mü adu ato te-mü 'buru teka ngü ka kotö ne, da emaka mere bi

jiase, de mere bi wü züka e de füh kotö ne 'buru la, wü e la ena aküwa mü fanü? Wüh ti aküwa mü nda-wü de, angü mü ce ngü ka Me eyi. ³⁷ Te di bala, gara e te mü ena ato fü Me, teka afa kuru mü di, ah de neh ene? E nda ma! ³⁸ Mü fi nga *adu silkpî, te gara, te ma ena adu akoro tete na. Angü de-ra, *Ye Kpara ka Kpî, ma ena adu akoro füh kotö ne, de wazi ka Wüba, de wü *malayika kaka mini. Te di bala, mü mere e akpe cürü siti wü kpara, de füh kotö ne, nda-mü de. Angü te mü ce ngü kara, teka cürü ewü la, ma ena ace mü kpah ace gbü silkpî, te ma ena adu akoro tete."

9

¹ Fū Yesu adu amala gara ngü fū ewü, gü ba dene, "Ma ngbü emala fū yi dene zu ngü fanü fanü. Wü gara kpara ladü esüka yi sene, wüh ti akpi la de, zalü te wüh ena awu mere wazi, te Me to fere, *Ye Kpara ka Kpî, te ma ena aküwa wü kpara di, ne feke." Dela ngü ta te Yesu mala fū wü kpara, te ewü le afa nga ye.

*Dene ngü ka küte Yesu te fū te-ye
Matayo 17:1-13; Luka 9:28-36*

² Fütanga silkpî ma'diya, fū Yesu ayia aza wü Petero, *Yakobo, bete *Yüwane. Fū ewü anü akoro kpa enzö mere rüvü. Te wüh koro kpala, fū küte Yesu akpo da efü te-ye, da eci aci gbü jia ewü. ³ Fū bongo kaka-na avi kpah avi kpililî, angbü da eci aci baka ra. Kpara te ena azürü bongo, avi akoro di bala, ah nda ma. ⁴ Wüh te eceka kpî bane de, gbo! te wü kpara 'basu. Ah de wü *İliya ake *Müse, diri wü kpara ka Me ta gügü ne. Fū Yesu angbü da ero mö de ewü. ⁵⁻⁶ Fū mere cürü ayia arî te wü Petero. Fū fingangü ka-wü akpo da endoro 'daa. Fū Petero ayia amala ngü fū Yesu, gü ba dene, "Mere kpara, sü de sene, ah reke gbü jia ni fa sü. Ah ti ta fū ani angbü sene. Te di bala, ani ena aji wü gugu bata, nda-ye biringbö, nda Müse biringbö, nda İliya kpah biringbö." Ah mala ngü la bala, angü ah wu züka ngü, te engu ena amala ne, nda de. ⁷ Petero bü te emala ngü la, fū sangu ayia akoro, agba ewü 'buru. Fū ri Me awü gbü sangu la, gü ba dene, "Dene zu Ye ra, te maguma ra le engu fa sü. Yi di eje 'duwa riri kaka-na." ⁸ Wüh te eceka kpî bane de, yirri! Wü Müse ake İliya nda-wü tine ma! Yesu kaye bü eyi kpikpi ye.

⁹ Fū wü Yesu ayia kpa füh rüvü kpala, alügü te-wü, adu kpa esa gö. Te wüh ngbü edu tete, fū Yesu ayia amala ngü fū wü Petero, gü ba dene, "De-wü deyi, wü mere e amala nga ngü la fū

wü kpara de, zalü te gara, te ni, Ye Kpara ka Kpî, ena azükü tete na gbü kpî." ¹⁰ Fū ewü angbü da efi nga ngü la emagama wü, da eyi-ta tete-wü, gü ba dene, "De bala neh ene ngü ne, te Yesu mala, gü ba, 'Ni ena azükü gbü kpî ne.' " ¹¹ Fū ewü adu ayi-ta Yesu, gü ba dene, "Mere kpara deyi, wü *mürü riri gü ba, *İliya ena akoro feke, teka areke kaje fū Miri te Me ena atima la.' Te di bala, ngü la ena adi neh baye?" ¹²⁻¹³ Yesu gü ba dene, "Wayi, *Ngari Me mala ngbü bala fanü, gü ba, İliya ena akoro feke, teka areke maguma wü kpara. Amba İliya koro ka-ye ta eyi." Fū siti wü kpara ayia amere engu, de mere siti ngü ka-wü, kpah baka e ta te wü *mürü dofo ba gbü *Ngari Me tekaka ne. Kpah bala, wü mürü dofo ba ta teka ni, *Ye Kpara ka Kpî, gü neh fe? Wüh gü ba, 'Wü kpara ena ato kpah mere cinga te ni, da efala ni.' " Dela ngü ta te Yesu mala fū wü Petero teka İliya, o wüh ngbü edu tete kpa esa gö.

Dene ngü te Yesu küwa gara mbarase

*de siti wü di engu me guvu ye
Matayo 17:14-20; Luka 9:37-43*

¹⁴ Fütanga ngü la, fū wü Yesu adu akoro kpa esa gö. Fū wü Yesu amaka bi wü kpara kpala gbe, kpah de gara wü *mürü riri, te ewü ngbü da ega yiki de wü kpara kaka, te ewü ce ewü de kpala. ¹⁵ Te wü kpara la wu Yesu, fū ngü la aga gbü jia ewü 'duwa ba-neh-ene-la. Fū ewü aci 'buru, anü de woro, akoro kpakaka, agü mandî fefe na. ¹⁶ Fū Yesu arü amala ngü fū wü mürü riri la, gü ba dene, "Wü ngbü ega yiki de wü kpara ka-ni, egü neh fe?" ¹⁷ Fū gara komoko esüka ewü ayia amala ngü fū Yesu, gü ba dene, "Mere kpara deyi, ni koro de mbarase ka-ni, de ye liki *siti wü di engu me guvu na asidi. Angü wü di engu me la ngbü emere mbarase la esiti, ah ti amala ngü de. ¹⁸ Gbü wü gara silkpî, e la ngbü egbürü engu, egbogbofo kötö. Fū mbarase angbü da enyüma gbü te ye. Fū durufu angbü egoro gögömö na, tuku tuku bala! Fū küküte na aürü, angbü jökötö. Ni koro sidi nga ye sene. Fū ni amaka bü wü kpara ka-ye. Fū ni ayi-ta ewü, de wüh liki wü di engu me la, amba wüh ti aliki nda-wü de."

¹⁹ Te Yesu ye ngü la, fū ah adu arü amala ngü fū wü kpara ka-ye, gü ba dene, "De-wü, wü kpara ka re ne, wü ena ato maguma wü fū ni mbi mbi neh elaye? Ni ena angbü de wü sene teka re neh fe, teka fū ngü ka-ni arî gbü nzö wü? Te di bala, wü za mbarase la, koro di kpakine."

* 9:12-13 9:12-13 Yesu mala ngü la, gü ba, "İliya koro eyi," teka ngü ka Yüwane Mürü Babatiza.

²⁰ Baka te wüh ngbü ekoro de mbarase la, fū siti wū di engu me la ayia awu Yesu. Fū ewū ayia agbüürü mbarase la, agbo kötö. Fū mbarase la angbü da eyili te-ye kötö, fū durufu angbü ekoro gögömö.

²¹ Fū Yesu ayi-ta wö ye mbarase la, gü ba dene, "Siti wū di engu me la kpo da emere engu neh elaye?" Wö ye mbarase ga, "Ah kpo de engu gügü, o engu di la gbü jaji te-ye. ²² Ah ngbü fi da emere engu bala. Gara ne, ah ngbü egbüürü engu, egbo agbü wa, gara ne gbü ngu, ta de ni mörö engu asidi. Wayi, mere kpara, ye ceka cinga ni, ale ta-ngü te ni. Te wazi ye ladü la, de ye küwa ye ni la." ²³ Yesu gü ba dene, "Ngü la ena afa ni? Ah fa ni nda de. Ah de ngü ka-ye. Te ye le ngü ka-ni de maguma ye biringbö la, ngü te ena afa ye nda ma."

²⁴ Fū wö ye mbarase la ayia anda'ba te-ye fū Yesu, gü ba dene, "Ni le ngü ka-ye ngbüürü eyi ne, amba maguma ni kpakine 'basu' basu. Ni ena amere baye? Ye to wazi fū ni, teka de maguma ni ngbü biringbö."

²⁵ Fū Yesu ae jia ye, awu mere bi wū kpara te ewū koro. Fū ah adu arū amala ngü fū siti wū di engu me la, gü ba dene, "De-wü, de te wū ngbü emere mbarase ne, de engu je ngü de, ah ro mö kpah de ne, wū ce engu ece. Wū mere e amere engu tine de."

²⁶ Fū siti wū di engu me la aba rere kpa tikpi, ayia agbüürü mbarase la, agbo kötö. Fū mbarase la aboto 'duwa aboto baka kövö. Fū ewū ayia akoro guguvu na asidi. Fū wū kpara afi, gü ba, "Mbarase la kpi eyi." ²⁷ Fū Yesu ayia azoro kpa mbarase la, ae engu tikpi. Fū mbarase la ayia arū tikpi. Siti wū di engu me la ce engu tine eyi!

²⁸ Fū wū Yesu ayia adu kpa eköti. Te wüh du ngbü kpiki wü, fū wū kpara kaka-na ayi-tata na, gü ba dene, "Ani tū aliki siti wū di engu me la de, neh teka ne?" ²⁹ Yesu gü ba, "Mene *siti wū di engu me ne, wüh koro guvu kpara kükürü kükürü bala nda-wü de. Ah le aku gba fū Me feke, fū Me ato wazi, teka aliki siti wū di engu me la di."

Dene e'ba'basu ngü te Yesu mala teka kpi ka-ye

Matayo 17:22-23; Luka 9:43-45

³⁰ Fütanga ngü la, fū wū Yesu ayia ace sü la, anū akoro gbü nga nzö köti ka wū *Galilaya. Yesu le ta de wū kpara wu ani nda-wü de. ³¹ Angü ah ngbü da erü wū kpara ka-ye de kpeke ngü, gü ba dene, "Te gara, wū vügü ka-ra ena azoro ra, *Ye Kpara ka Kpi, fū ewū ato ra fū siti wū kpara. Fū ewū amörö ra asidi. Amba gbü *ebabata sikipi, Me ena adu azükü ra gbü kpi la." ³² Ngü te Yesu mala la, wū kpara kaka-na, wüh je sisi na mbi mbi nda-wü de. Wüh le ta de ani yi-tata na

teka si-ngü la. Wüh du yi-tata na nda-wü de, ka lümü.

Dene yiki te wū kpara ka Yesu ga, teka kpara esüka wü,

te ena angbü ba mere kpara Matayo 18:1-5; Luka 9:46-48

³³ Fütanga ngü la, fū wū Yesu adu akoro kpa eköti, agbü Kaparanama. Baka te ewū du koro tete, fū Yesu ayi-ta wū kpara ka-ye, gü ba dene, "Te ani di tine te kaje, da edu ne, wū ngbü emala esüka wü ne ngü ne?"

³⁴ Fū ewū anga ka-wü ti ka lümü. Angü wüh ngbü tine da ega yiki, gü ba dene, "Kpara te ena angbü mere kpara esüka ani, fütanga Yesu, neh da?" ³⁵ Amba Yesu wu fingangü ka-ewū la kpo. Fū Yesu ayia angbü kötö, amala ngü fū wū kpara ka-ye la, gü ba dene, "Te mü ele angbü mere kpara gbü nzö wü bu mü la, ah le de mü o ngü ka-mü kötö, ba mbarase te ngbü emere tima fū wū kpara, teka fū ngü ka-mü areke gbü jia Me."

³⁶ Fū Yesu ayia aza gara mbarase cükü'daye, ao esüka ewü. Fū ah adu abü mbarase la esaka ye, gü ba dene, ³⁷ "Mene kpara te ena aza mbarase, baka engu ne, gbü müürü teka ngü ka-ra la, ah le ra eyi. Kpah bala, te mü le ra eyi la, mü le Wüba Me, te tima ra ne kpah eyi."

Dene ngü ka kpara te ngbü eliki siti wü di engu me te iri Yesu

Luka 9:49-50

³⁸ Fütanga ngü la, fū *Yüwane adu amala ngü fū Yesu, gü ba dene, "Mere kpara deyü, ani maka gara kpara, te ngbü eliki *siti wü di engu me guvu wü kpara, te iri ye. Teku ngü la, fū ani ayia atata engu, angü ah de kpara esüka ani nda de."

³⁹ Yesu gü ba dene, "Yi mere e atata engu de. Kpara la ngbü emere mere kpeke ngü la de wazi ka-ra. Te di bala, ah ena adu afü te-ye, amala siti ngü te iri ra, neh baye baye?" ⁴⁰ Kpara te di de vügü ka-nih de, dela eyi kpara ka-nih.

⁴¹ Ngü te ma emala dene, ah de zu ngü. Mene kpara te ena ale ta-ngü te yi, ato mba e fū yi ba gu ngu, teka te yi di de wū kpara ka-ra ne, Me ena ato mere züka ngü fefe, te gara agbü kpi."

Dene ngü te Yesu mala teka ngü ka fiti Matayo 18:6-9; Luka 17:1-2

⁴² Fū Yesu adu amala gara ngü fū wū kpara ka-ye, gü ba dene, "Kpara te fiti kpara ka-ra, anga ah de mere kpara, anga mbarase cükü'daye, fū engu adürü te kaje ka Me asidi la, Me ena ato mere kuru tete. Ah ena adi ta mbi, te wüh ena aza mere siti wö, ai gbü ngürü müürü fiti la, fū ewū aza engu di, agü agbü mere yi-ngu feke, o engu fiti wū kpara la, la de. Angü kuru

de te Me ena ato ta te mürü fiti la, teka fiti kaka la, ah ena afa mene kpi, te wüh gü engu di gbü ngu, ne ka.

⁴³⁻⁴⁴ Yi di ekpe *siti ngü akpe! Te kpa mü ngbü efiti mü me-ye, teka de mü mere siti ngü la, ah le de mü wa kpa mü la awa, mü gü akötö. Angü ah ena areke pe, te gara e biringbö eküte mü ena akpi me-ye, fü mü aküwa, ka engu te wüh ena aza mü, de küte mü 'buru, agü gbü mere du ka wa. Angü wa te ngbü ecuru kpara kpala, ah ünü nda de. ⁴⁵⁻⁴⁶ Kpah bala, te lö mü ngbü efiti mü me-ye, teka de mü mere siti ngü la, ah le de mü wa lö mü la awa, mü gü akötö. Angü, ah ena areke pe, te gara e biringbö eküte mü ena akpi me-ye, fü mü aküwa, ka engu te wüh ena aza mü, de küte mü 'buru, agü gbü mere du ka wa. ⁴⁷ Anga te ah de jia mü, te ngbü efiti mü me-ye, teka fü mü amere siti ngü la, ah le de mü gbi jia mü la agbi, mü gü akötö. Angü ah reke pe, te mü ena aküwa de jia mü ngbee biringbö, ka engu te wüh ena agü mü de jia mü 'basu mini, agbü du ka wa. ⁴⁸ Angü kpa gbü wa la, cinga fa sü. Wa ngbü ecuru wü kpara kpala. Wü ru kpah ladü kpala, te ewü ngbü ezü kpara. Cinga la nza nda de, fi mere badi!

⁴⁹ Wü kpara 'buru te ewü le adi de kpara ka-ra, ah le de Me reke ewü, baka se te wüh ngbü eto gbü wa, teka fü ewü angbü *nzila. ⁵⁰ Yi nda-yi baka ngütü, angü ngütü reke fa sü. Amba te ngütü mi tine de la, wüh ena amere di neh baye? Wüh ena abu agbü gü. Ah le de yi ngbü ba züka ngütü, te mi ami. Yi ce ngü ka yiki, fü yi adi ele te-yi esüka yi ale."

Dela wü ngü ta te Yesu mala fü wü kpara ka-ye.

10

Dene ngü te Yesu mala, teka mene kpara te le ace wara ye

Matayo 19:1-9

¹ Fütanga ngü la, fü wü Yesu ayia ace sü la, anü agbü nga nzö köti ka *Yudaya, anü akö Yürüdene kpa eta ngu. Te wüh koro kpala, fü mere bi wü kpara aci abiti te-wü kpaka Yesu. Fü engu adu akpo da eri ewü, baka te engu ngbü emere giügü ne.

² Fü wü gara *Farusi ayia akoro kpaka Yesu, teka are mamagama. Fü ewü ayi-tata na, gü ba dene, "Yesu deyí, te kpara ce wara ye la, ngü la ena adi esiti gbü jia Me?" ³ Fü Yesu adu ayi-ta ewü, gü ba dene, "*Müse ba ta ngü fü ani, gbü *Riri ka Me teka ngü la, gü neh fe?" ⁴ Wüh ga, "Müse le ta eyi, gü ba dene, "Te komoko ele ace

wara ye la, ah le de engu ba köcökpa, ato fü wara ye feke, fü wara ka la ayia ago ka-ye agba wü." ⁵ Yesu gü ba dene, "Müse ba ta ngü la bala teka ne de, angü nzö wü kundu yi ta kpekpeke, kpah baka nda-yi! ⁶ Mü nü, mü ceka ngü ta te Müse ba, teka gina wü kpara, te Me o füh kotö ne. Müse gü ba, 'Me mere komoko ake würiuse.' ⁷ Fü Me amala ngü fü ewü, gü ba, 'Dela si-ngü te komoko ngbü eyia, ece wö ye ake ni ye, aza wara ye, alala tete na. ⁸ Fü ewü adu angbü ake di tine baka kpara biringbö ne." ⁹ Yi wu, gü ba, Me o yi ta eyi me-ye, de yi za te-yi, fü yi akoro baka e biringbö, ne de? ⁹ Te Me o yi eyi biringbö la, yi mere e aye süka yi tine de!"

¹⁰ Fü wü Yesu ayia de wü kpara ka-ye, adu ka-wü kpa ekötí. Fü wü kpara kaka-na ayia ayi-tata na teka ngü la. ¹¹ Fü Yesu alügü ngü fü ewü, gü ba dene, "Te mü ce wara mü, fü mü ayia aza gara würiuse la, mü mere *siti ngü eyi, angü mü mere dela waza. ¹² Kpah bala, teka würiuse te yia esaka watí ye, anü aza gara komoko. Ah mere waza kpah eyi."

Dela ta ngü te Yesu mala teka komoko ake wara ye.

Dene ngü ka Yesu de wü jürü jaji

Matayo 19:13-15; Luka 18:15-17

¹³ Gbü gara ra, fü wü gara kpara ayia akoro de wü jaji ka-wü kpaka Yesu, de engu o kpa ye gbü nzö ewü, teka de Me to wazi fü ewü. Te wü *kpara ka Yesu wu ngü la bala, fü ngü la asiti te ewü. Fü ewü akpo da eliki wü jaji la. ¹⁴ Te Yesu wu ngü la bala, fü mamagama ayia anzu. Fü ah amala ngü fü wü kpara ka-ye la kpekpeke, gü ba dene, "Yi ce wü jaji la, de wüh koro kpaka ra. Yi mere e atiri ewü de, angü wü kpara te maguma ewü di ba nda wü jürü jaji de bala, wüh ka-wü de wü kpara ka Me. Angü wü jürü jaji cu ngü wü de, wüh mere mani kpah de. ¹⁵ Ngü te ma emala dene, ah de kpeke ngü. Te mü ele ara fü Me, ah le de mü fü maguma mü, ba nda wü jürü jaji. Te maguma mü ngbü ba nda wü jaji de la, mü tí ari gbü sü ka Me agbü kpi kpah de." ¹⁶ Fü Yesu ayia abi wü jaji la esaka ye, ao kpa ye gbü nzö ewü. Fü ah ayia aku gba fü Me teka ewü, de Me to wazi fü ewü. Dela ngü ta te Yesu mere fü wü jürü jaji.

Dene ngü te Yesu mala, teka wü kpara de mere bi e esaka wü

Matayo 19:16-30; Luka 18:18-30

¹⁷ Fütanga ngü la, fü wü Yesu ayia de ani ce sü la. Baka te ewü ngbü eyia tete, fü gara komoko akpe akoro, abu nzökuta

* **10:4** 10:4 Mü ena amaka ngü la gbü buku ka Manda nga Riri 24:1. † **10:6** 10:6 Mü ena amaka ngü la gbü Gina Ngü 1:27. ‡ **10:8** 10:8 Mü ena amaka ngü la gbü Gina Ngü 2:24.

ye engagira Yesu, ayi-tata, gü ba dene, "Züka mere kpara, ni ena amere baye, teka fü ni aküwa agbü sü ka Me fi mere badi?"¹⁸ Yesu gü ba, "Mü ga, 'Ma de züka kpara,' neh teka ne? Züka kpara ladü füh kotö ne? Züka kpara füh kotö ne biringbö nda ma, 'duwa Me kpikpi ye, mü wu bala de?'¹⁹ Te mü le aküwa la, ah le de mü mere wü *Riri ka Me 'buru, mbi mbi mbi. Mü wu Riri la de? Riri la gü ba, 'Mü mere e amörö kpara de. Mü mere e amere waza de. Mü mere e azi e de. Mü mere e adi esutu wu te wü bu mü de. Mü mere e afiti kiri mü de mani de. Mü je riri ka wö mü ake ni mü.' "§

²⁰ Komoko ne gü ba, "Mere kpara, ni kpo da emere wü ngü la eyi kü gügü, o ni di la jaji, zalü akoro dene, ni ngbü fi bü emere wü riri la."²¹ Fü Yesu aceka jia komoko la. Fü ngü ka komoko la areke tete na afa sü. Fü Yesu amala ngü fefe, gü ba, "Ah de züka ngü. Amba gara ngü ladü biringbö, te mü mere la de. Mü du edu, mü cünzi wü e ka-mü 'buru asidi. Fü mü aza jiasa la, ato 'buru fü wü mürü cinga. Fü mü adu alala gbü nga ra. Te di bala, mü ena amaka *küküwa te gara, agbü sü ka Me agbü kpä."²² Te komoko la je ngü la, fü ah akpo da endunduru gbüra ye, de mere cinga emaguma ye. Fü ah ayia alügü nga ye, adu kpa gba ye, de mere fingangü gbü nzö ye, angü wü e fa ta esasaka sü.

²³ Fü Yesu afü te-ye, amala ngü fü wü kpara ka-ye, gü ba, "Ati! Te mü de kpara de mere bi wü e esaka mü la, mü ena afü te-mü, ato maguma mü fü Me, neh baye baye?"²⁴ Fü ngü la aga gbü jia wü *kpara ka Yesu afa sü. Fü Yesu adu anda nga ngü la, gü ba, "Ah de kpeke ngü teka fü kpara ato maguma ye fü Me."²⁵ Ah baka ya,* te le arí gbü enga gö sögbe.† Ah ti eyi arí kpala fanü? Ah ti arí nda de! Amba ngü ka mene kpara de mere bi wü e esaka ye, ah kparh bala. Ah ena adi kpekpeke fefe, teka afü maguma ye, ara fü Me."²⁶ Fü ngü anza gömō wü kpara ka Yesu 'buru. Fü ewü akpo da eyi-ta tete-wü, gü ba dene, "Te ngü la tñe bala la, biri kpara ladü te ena aküwa?"²⁷ Fü Yesu aceka jia ewü, gü ba dene, "Kpara te ena aküwa te-ye de tete-ye nda ma. Angü ngü la fa wü kpara eyi 'buru. 'Duwa te Me ena aküwa mü me-ye. Angü ngü te ena afa Me nda ma."

²⁸ Petero, fü mü arü amala ngü fü Yesu, gü ba dene, "Mere kpara deyi, ye ceka la, ani ce wü e ka-ani eyi 'buru, teka alala

gbü nga ye. Te ah di bala ne, ngü ka-ani ena adi baye?"²⁹⁻³⁰ Yesu gü ba, "Wayi, yi ena amaka züka ngü. Ngü te ma emala dene, ah de zu ngü. Te mü ce wü e ka-mü teka ra, teka amala ngari ra fü wü kpara la, Me ena ale ta-ngü te mü fanü. Mü ena amaka kparh cinga füh kotö ne, angü wü vügü ka-nih ladü. Amba Me ena ato mere bi züka ngü fü mü, afa nda-mü te mü ce la. Anga mü ce neh ene? Te ah de gba mü, wü di enga ni mü, wü wö mü ake ni mü, anga wü di mü, te mü ce ewü teka ra la, Me ena ato kparh mere bi züka ngü fü mü füh kotö sene, da wü e te mü ce la. Kparh bala, Me ena aküwa mü gbü sü ka-ye agbü kpä, fi mere badi."³¹ Amba yi mere e acu ngü yi nda-yi de, angü bi wü kpara, te ewü mere te-wü baka wü cögbörö kpara füh kotö ne, te gara, Me ena afü ewü baka kükürü wü kpara. Kparh bala, mene ewü, de te ewü di ba kükürü wü kpara füh kotö ne, te gara Me ena afü ewü, ao ange cögbörö wü kpara fü wü bu wü agbü sü ka-ye, agbü kpä."

Dela ngü te Yesu mala, teka wü kpara de mere bi wü e esaka wü.

Dene ebabata ngü te Yesu mala, teka kpi ka-ye

Matayo 20:17-19; Luka 18:31-34

³² Fütanga ngü la, fü wü Yesu ayia angbü enü agbü Yerüsalema. Te wüh ngbü enü tete, fü Yesu ayia ati nda-ye kpa engagira nü. Fü wü kpara kaka-na angbü efa nganga na de mere fingangü gbü nzö wü. Fü mere bi wü kpara angbü kparh enü fütanga ewü de mere cürü te wü. Fü Yesu adu kparh aza wü kpara ka-ye nzükpa de füh ye 'basu ne mba canza edere sü. Fü ah akpo da emala ngü fü ewü, teka ngü te ena amere ye agbü Yerüsalema kpala,³³ gü ba dene, "Te nih ena akoro agbü Yerüsalema la, wüh ena azoro ra, *Ye Kpara ka Kpä, anü di engagira wü *mere kovo bete wü *mürü riri, te ewü le ngü kara de ne. Wü mere kpara la ena akolo ngü ka-ra, gü ba, 'Ah le de wüh mörö ra asidi.' Fü ewü ayia ato ra fü wü *ganzi kpara."³⁴ Fü wü ganzi kpara la akpo angbü emü ra, da efala ra, da esü ngüsü gbüra ra, da esüma ra de juru. Fü ewü amörö ra asidi. Gbü *ebabata sikipi, Me ena adu azükü ra gbü kpi la." Dela ngü ta te Yesu mala fü wü kpara ka-ye teka kpi ka-ye.

Dene yitangü ka Yakobo ake Yüwane

Matayo 20:20-28

³⁵ Fütanga ngü la, fü wü *Yakobo ake *Yüwane, wü di Zebedayo ayia arü amala ngü fü Yesu, gü ba dene, "Mere kpara deyi,

§ 10:19 10:19 Mü ena amaka ngü la gbü buku ka Gogo ka wü di enga Yisaraye 20:12-16. * 10:25 10:25 Ya te wüh mala nganga de sene, gbü ngü Giriki, wüh mala ka-wü nga kamele. † 10:25 10:25 Sögbe de libira anga sindani.

gara engu ngü ladü gömö ani, te ani ele ayi-ta ye di.”³⁶ Yesu gü ba dene, “Wü mala emala.”³⁷ Wüh gü ba, “Gbü sikipi te ye ena angbü mere miri tete na, ani ele angbü ede ye, baka wü cögbörö kpara ka-ye, gara gbü kokpa, gara gbü kamisü.”³⁸ Yesu gü ba, “Ngü te yi mala la, yi wu sisi na mbi mbi de. Te yi le amaka wazi baka nda-ra la, ah le de yi zü kpah mere cinga baka nda-ra, de te ma ena azü ne. Yi ti eyi azü mere cinga, baka nda-ra la? Ngü la ti afa yi de?”³⁹ Wüh gü ba dene, “Wayi, ani le eyi amere ngü la.” Yesu gü ba, “Ah mbi. Yi ena azü mere cinga baka nda-ra fanü fanü.”⁴⁰ Amba ma ti ao yi baka mere kpara, fütanga ra, nda-ra de. Ngü la ka-ye de ngü ka Wüba Me, angü ah reke sü la eyi teka wü kpara ka-ye, te engu fe ewü.”

⁴¹ Fü du wü *kpara ka Yesu nzükpa ne ayia aje ngü la. Fü maguma ewü ayia asiti eküte wü *Yakobo ake *Yüwane. Fü ewü angbü da efi ngü emaguma wü, gü ba, “Wüh ele ao te-wü ba mere kpara gbü nzö ani?”⁴² Te Yesu wu ngü la bala, fü ah adu ai wü kpara ka-ye la 'buru kpaka ye, amala ngü fü ewü, gü ba dene, “De-yi, yi wu eyi, gü ba, wü miri füh kotö ne ngbü engbü gbü nzö wü bu wü de mere wazi, fü ewü angbü emere wü kpara esa lö wü ne, baka e te ewü ele.”⁴³⁻⁴⁴ Yi le amere kpah bala? Ah bala de. Te mü ele angbü ba mere kpara esüka wü bu mü la, mü fü temü baka jaji, te ngbü emere tima fü wü bu ye.⁴⁵ Te di bala, ah le de yi fü fingangü kayi baka nda-ra. Angü de-ra, *Ye Kpara ka Kpi, ma koro füh kotö ne, neh teka ne? Yi efi nda-yi, gü ba, ma koro ta teka angbü ba mere miri, teka fü wü bu ra angbü emere tima fere? Ah bala nda de. Ma koro teka amere tima fü wü kpara, da ele ta-ngü te ewü. Angü ma ena ato te-ra fü kpi, teka afa wü kpara gbü *siti ngü ka-ewü, fü ewü aküwa.”

Dela ngü te Yesu mala fü wü kpara ka-ye, teka mene kpara te Me ena ao memere.

Dene ngü ka Yesu ake Batimaya
Matayo 20:29-34; Luka 18:35-43

⁴⁶ Baka te wü Yesu ngbü fi bü enü te kaje ka Yerüsalema, fü ewü anü akoro agbü Yeriko. Fü ewü ayia sela de mere bi wü kpara gbü nga wü, teka anü agbü Yerüsalema. Fü ewü amaka gara komoko de iri ye Batimaya,[‡] te ngbü edere kaje, da eyo e te wü kpara, angü jijia na nda ma.

⁴⁷ Fü Batimaya aje ngü, gü ba dene, “Yesu§ koro eyi.” Fü ah ayia aba rere kpa tikpi, gü ba dene, “Yesu! Kundu ye *Davidi! Ni wu eyi, gü ba, Me tima ye teka aküwa ani ne! Ye ceka la bü cinga te ni baaa!”⁴⁸ Fü

wü kpara aci 'buru, amala ngü fefe, gü ba dene, “Ye nga engal!” Batimaya le ngü ka-ewü la nda de. Ah ngbü fi eba rere kpa tikpi bala, gü ba, “Yesu! Kundu ye Davidi! Ye ceka la bü cinga te ni baaa!”

⁴⁹ Fü Yesu arü amala ngü, gü ba, “Wü i engu akine.” Fü ewü ayia ai Batimaya kpaka Yesu, gü ba dene, “Yesu te ei ye. Ye gu maguma ye, de ye yia eyia, ye nü kpakaka na la.”⁵⁰ Fü Batimaya ayia agbi mere bongo ka-ye asidi, ace kötö. Fü ah ayia akpe anü kpaka Yesu.⁵¹ Fü Yesu ayi-ta Batimaya, gü ba dene, “De-ye deyü, ye ele de ni mere fü ye ne ngü ne?” Batimaya gü ba, “Akoo, mere kpara, ma ele de mü ü jia ra, teka de ma di eceka kpi!”⁵² Yesu gü ba, “Ah mbi. Mü küwa eyi, teka te mü to maguma mü eyi fü Me. Mü go ego.” Fü jia Batimaya ayia ai raaa! Fü Batimaya ayia akpo da efa nga wü Yesu.

11

Dene ngü ta te Yesu ngbü eri tete agbü Yerüsalema

Matayo 21:1-11; Luka 19:29-38; Yüwane 12:12-15

¹ Fütanga ngü la, wü Yesu ngbü fi enü agbü Yerüsalema. Fü ewü anü, anü akoro ghamari ede Yerüsalema, angü wüh le kaje ka Betefage ake Betaniya, te di esa mere da de iri ye Olive. Te wüh nü koro ghamari kpala, fü Yesu ayia atima gara wü kpara ka-ye 'basu kpa engagira nü,² gü ba, “Wü nü enü agbü koti de kpa engakara wü la. Te wü koro kpala, wü ena amaka dongi, te wüh i, o kpala, enganga na, te wüh li fefeh na la de. Wü furu dongi la, wü du di fü ni akine.”³ Te wüh yi-ta wü, gü ba, “Wü ngbü efuru engu na la teka ne?” la, de wü lügü ngü fü ewü, gü ba dene, “Mere kpara ka-ani ngbü ele me-ye. Ani ena alügü fü wü enatikine.”

⁴ Te wüh je ngü la, fü wü kpara 'basu la ayia anü agbü Betaniya. Fü ewü amaka engu dongi, te wüh i o etanü, ede möngiti. Fü ewü ayia afuru dongi la, ba e te Yesu mala fü ewü.⁵ Fü wü gara kpara ayi-ta ewü, gü ba, “Ah mere baye, te wü ngbü efuru engu dongi ne?”⁶ Fü ewü ayia alügü ngü fü ewü, gü ba dene, “Mere kpara ka-ani ngbü ele me-ye. Ani ena alügü enatikine.” Fü wü kpara la ale. Fü ewü ayia aza dongi la, adu di kpaka Yesu.

⁷ Te wüh koro de dongi la kpaka Yesu, fü ewü agü wü bongo ka-wü füh gügü na. Fü Yesu ayia ali fefeh na, anü di agbü Yerüsalema.⁸ Fü mere bi wü kpara ayia akoro, teka agbo nga iri Yesu. Fü gara ewü agbala bongo ka-wü kötö te kaje. Wü gara

‡ 10:46 10:46 İri wö ye Batimaya de Timaya. § 10:47 10:47 Yesu de kpara ka Nazareta.

ngbü nda-wü edoro wü zukpa rü, da egü te kaje, teka agbo nga iri Yesu di. ⁹Fü gara wü kpara atı kpa engagira nü fefe na, gara ewü nda-wü kpa sidi. Fü ewü angbü 'buru egbo nga iri Yesu, da ebı ci, da emı koko, gü ba,

"Nih gbo nga iri Me!

Me to wazi fü mü, angü ah tima mü fü a me-ye!

¹⁰ Mü za wazi ka kundu kundu nih *Davidi!

Mü koro eyi angbü gbü nzō a, baka mere Miri Davidi engu!

Me di de mü!

Nih gbo nga iri Me kpa gbü kpı!"

¹¹ Baka te Yesu nü koro agbü Yerüsalema, fü ah anü arı kpa etambasü *Mere Kambü ka Me. Fü ah aceka kpı, aceka wü ngü de kpala 'buru. Fü ewü ayia de wü kpara ka-ye, nzükpa de füh ye 'basu ne, adu kpa gbü Betaniya, ara kpala, angü sü yia etı atı.

Dene ngü te Yesu kına rü figi di

Matayo 21:18-19

¹² Kpurutokokpı la, fü wü Yesu ayia ace Betaniya, edu agbü Yerüsalema. O wüh ngbü enü tete, fü tala ayia amere Yesu.

¹³ Fü Yesu aceka kpı, awu nzō rü figi, te kpakpa na bi abi. Fü ah afü kpuru akoro kpala, de ni maka riri na. Te wüh nü koro kpa esa rü la, riri na nda ma, ka-ye bü kpakpa na kükürü. Angü ah de fe kaka, te ngbü erı tete na, nda de. ¹⁴ Fü Yesu ayia akına rü engu la, gü ba dene, "Mü ngbü fi bala. Wü kpara ti azü ri mü tine fi de, fi mere badi." Fü wü *kpara ka Yesu ayia aje ngü de te engu mala la.

Dene ngü ta te Yesu liki wü kpara di,

etambasü Mere Kambü ka Me

Matayo 21:12-13; Luka 19:45-48

¹⁵ Te wü Yesu du koro tete agbü Yerüsalema, fü ewü ayia anü akoro etambasü *Mere Kambü ka Me. Fü ewü amaka mere bi wü kpara kpala, te ewü ngbü ecinzi wü nü de wü lu,* teka fü wü kpara adi ese, eto la bi tete fü Me. Wü gara ngbü nda-wü da ekura jiase. Fü ngü la ayia asiti gbü jia Yesu afa sü. Fü engu ayia aliki ewü 'buru asidi, anzinzi wü cangali de wü gba'da ka wü kpara la, agbogbofo 'buru kötö.

¹⁶ Fü ah amaka kpah wü gara kpara te ewü ngbü da ebı e ka-wü, ekolo sü di kpuru etambasü Kambü ka Me la. Fü Yesu ayia atiri kaje la te ewü, gber. ¹⁷ Fü ah akpo da erı wü kpara, gü ba dene, "Me mala ta teka Kambü ka-ye, gü neh fe? Me gü ba, 'Kambü ka-ni, ah de sü te wü kpara

füh kotö ne 'buru ena akoro angbü egbo nga iri ni gbügü.† Yi wu bala de? Amba nda-yi, yi du fü tambasü Kambü ka Me eyi, ba sü ka wü mürü zi!"

¹⁸ Fü wü mere *mürü gele bete wü *mürü riri ayia aje ngü la. Fü ngü la asiti te ewü afa sü. Fü ewü akpo da egiri kaje de ani mörö Yesu tete na. Wüh maka kaje kere de, angü cürü ngbü emere ewü, teka mere bi wü kpara te ewü le ka-wü ngü ka Yesu, gü ba, "Engu ngbü erı ani de mere kpeke riri."

¹⁹ Etamurago la, fü wü Yesu ayia ace Yerüsalema, ayia adu agbü Betaniya.

Dene ngü ta te Yesu mala, teka maku gba fü Me

Matayo 21:20-22

²⁰ Kpurutokokpı la, fü wü Yesu alügü te-wü, edu agbü Yerüsalema. Te wüh ngbü edu te kaje la, fü ewü adu amaka rü de esikine, te Yesu kına ne. Rü la ürü ka-ye eyi, de si ye 'buru. ²¹ Petero, fü mü adu afı nga kına, te Yesu kına rü la di ne. Fü mü amala ngü fü Yesu, gü ba dene, "Mere kpara, ye ceka la! Rü de esikine te ye kına ne, ah ürü ka-ye eyi!" ²² Yesu gü ba, "Ah de wazi ka Me. Te yi to maguma yi fü Me, Me ena ato wazi fü yi kpah bala. ²³ Ngü te ma emala dene, ah de zu ngü. Te mü ena ato ta maguma mü fü Me 'buru 'buru la, Me ena ato wazi fü mü, teka fü mü amere wü mere kpeke ngü di kpah bala. Mü ti eyi amala ngü fü mere siti da la, gü ba dene, 'Mere da la yia eyia, ah ti agbü mere ngu.' Ah ena amere te-ye kpah bala. Amba te maguma mü ngbü 'basu 'basu la, Me to wazi fü mü nda de. ²⁴ Kpah bala, mene ngü te mü ena ayi-ta Me tete na, ah le de mü o maguma mü 'buru te Me, gü ba, 'Fanü fanü, Me ti eyi amere ngü la fü ni.' Te maguma mü ngbü 'basu 'basu de la, Me ena amere ngü la fü mü amere fanü. ²⁵⁻²⁶ Te mü ngbü eku gba fü Me, mü mere e ati ngü te kiri mü emaguma mü de. Mü boro *siti ngü ka kiri mü emaguma mü asidi feke, teka fü Me, te di de Wö nih agbü kpı ne, aboro kpah wü siti ngü ka-mü." Dela ngü te Yesu mala, teka kpara te le aku gba fü Me.

Dene ngü te wü mere kovo ka wü Yisarayeleyi ta Yesu di

Matayo 21:23-27; Luka 20:1-8

²⁷ Fütanga ngü la, fü wü Yesu adu anü akoro agbü Yerüsalema. Fü Yesu angbü endoro ka-ye etambasü ka *Mere Kambü ka Me. Fü wü mere *kovo ayia de wü *mürü riri, akoro kpaka Yesu, ayi-tata, ²⁸ gü ba dene, "De ye deyı, ngü te ye mere

* **11:15** 11:15 Wü lu te ewü ngbü ecinzi la, wüh de wü mö ka kötı. † **11:17** 11:17 Mü ena amaka ngü la gbü buku ka Yisaya 56:7.

esikine de sene ne, ye mere ngü la neh de wazi ka da? Kpara te tima ye, aliki wü kpara etambasü Mere Kambü ka Me ne, neh da?" ²⁹ Yesu gü ba, "Gara ngü ladü biringbö, te ni ele ayi-ta wü di feke. Te wü lügü ngü la eyi, fü ni adu amala nga kpara, de te to wazi la fü ni ne. ³⁰ Yitangü ka-ni, ah teka *Yüwane Mürü Babatiza. Kpara te to wazi fü Yüwane, de ah to babatiza fü wü kpara, neh da? Me to wazi fefe me-ye de? Anga ah mere ngü la de tete-ye?" ³¹ Fü ewü akpo da emala ngü esüka wü, gü ba dene, "Ani ena alügü ngü la fefe, agü neh fe? Te ani gü ba, 'Me to wazi fü Yüwane me-ye la,' ah esiti, angü Yesu ena adu kpaah ayi-ta ani, agü ba dene, 'Te di bala ne, ah mere baye, te ani le ngü ka Yüwane de ne?' ³² Te ani mala fefe, gü ba, 'Yüwane mere ngü la de tete-ye la,' ah ti kpaah de, angü maguma wü kpara 'buru ena asiti te ani.'" Wüh ngbü ekpe cürü teka mere bi wü kpara, angü wü kpara ngbü ele ngü ka Yüwane, gü ba, "Engu ka-ye zu de *mürü dofo ka Me." ³³ Te di bala, fü wü angbe cögbörö kpara la adu alügü ngü fü Yesu, gü ba dene, "Ani wü kpara te to wazi fü Yüwane ne, nda-ani de." Yesu gü ba, "Wayi, ah mbi! Te ah bala la, ni ti amala nga kpara, te to wazi fü ni ne, kpaah de."

12

Dene mani te Yesu mala teka wü kpara,

te ewü ngbü eceka kpi fütanga rirü

Matayo 21:33-46; Luka 20:9-19

¹ Fütanga ngü la, fü Yesu adu kpaah amala ngü fü wü cögbörö kpara la de mani, gü ba dene, "Gara komoko ta ladü, te nü maka züka sü, fü ah ayia aru rü *vinü ka-ye gbügbü. Fü ah adu aji 'baranga ekekere na kerekere gbaa. Fü ah areke kpaah sü, teka adi efi ri-rü la gbügbü na. Fü ah aji kpaah kambü teka fü wü kpara adi engbü gbügbü, da efete yi la. Fü engu aza wü kpara ka tima, ao kpala, aro mö de ewü areke areke, de wüh di eceka kpi fütanga yi ka-ni la mbi mbi mbi, angü ni ena anü andoro agbü gara sü nengete. ² Te kpiri ka makolo ri-rü la koro tete na, fü komoko la ayia atima gara labi ka-ye kpaka wü kpara ka tima ka-ye la, gü ba, 'Wü to ri-rü ka-ni la fü ni.' ³ Fü labi la ayia anü akoro kpaka wü kpara ka tima la. Fü ewü ayia azoro labi la, amü engu, alügü kpaka mere kpara ka-ye, de kpa ye kükürü. ⁴ Fü mürü rirü la adu kpaah atima gara labi ka-ye. Fü labi la anü akoro kpaka ewü. Fü ewü amü nzönzö na, amemere lalara. Fü labi la akpe adu kpaka

mere kpara ka-ye kpaah de kpa ye kükürü. ⁵ Fü mürü rirü la adu kpaah atima gara labi ka-ye. Fü ewü amiki labi la, amörö ka. Fü ewü angbü ememere wü labi ka mürü rirü la fi bü bala, emimiki gara ewü, emömörö gara ewü. ⁶ Gara labi te mürü rirü la ena adu atima nda tine ma. Tine bü eyi duu kporo yeye na, te mamagama ngbü tete na ne. Fü ah afi, gü ba dene, 'Te ni tima ye ni la, wüh ena akpe cücürü na akpe.' Fü ah ayia atima ye ye la kpaka ewü. ⁷ Te wü kpara la wu ye mürü rirü la te ngbü egoro, fü ewü amala ngü esüka wü, gü ba dene, 'Ceka la! Ye mürü rirü ne te egoro! Engu ena aza e-nga-kpa wö ye, te gara me-ye. Te di bala, ah le de ani mörö engu asidi, teka fü yi ka-ewü ne angbü te gara fü ani.' ⁸ Fü ewü ayia azoro ye mürü rirü la, amü, amörö, aza kökö na, asö agbü gü."

⁹ Fü Yesu adu ayi-ta wü cögbörö kpara la, gü ba, "Gbü fingangü ka-yi, mürü rirü la ena amere de wü siti kpara la, neh baye? Ah ena ayia akoro kpaka ewü de mere wazi, amömörö ewü 'buru. Fü ah aza to wü kpara, ao eme rirü ka-ye la." Dela mani te Yesu mala fü wü cögbörö kpara ka wü *Yisaraye.

¹⁰ Fü ah adu ayi-ta wü cögbörö kpara la, gü ba dene, "Ngari Me mala teka ngü la, gü neh fe? Ah gü ba, 'Wü gara kpara ngbü ta eji *Mere Kambü ka Me. Fü ewü amaka gara mere rü, te ewü le nda-wü de. Fü ewü ace rü la asidi. Titine rü ta te ewü ce la, Me du o tine eyi mere kpeke rü de wazi ye, te wü bu ye na ngbü engbü 'buru eküküte. ¹¹ Nih gbo nga iri Me, angü engu mere mere züka ngü eyi fü nih!'"

¹² Fü wü cögbörö kpara la awu, gü ba, Yesu mala mani la eküte ani, teka te ani le ngü kaka nda-ani de ne. Fü ngü la ake te ewü afa sü. Fü ewü angbü egiri kaje teka de ani zoro Yesu. Wüh le azoro engu gü jia wü kpara nda-wü de, angü maguma wü kpara ena asiti eküte ani. Te di bala, fü ewü ayia ace engu, ago ka-wü.

Dene ngü ta te wüh yi-ta Yesu di, teka mase ngürü

Matayo 22:15-22; Luka 20:20-26

¹³ Fütanga ngü la, fü wü cögbörö kpara atima gara wü *Farusi kpaka Yesu, bete gara wü kovo ka Miri Anitipa *Erode, gü ba dene, "Wü fiti Yesu, de engu mala siti ngü eküte miri ka wü *Rüma, teka de ani zoro engu gbü riri na la."

¹⁴ Fü ewü anü akoro amaka Yesu, amala ngü fefe, gü ba dene, "Mere kpara, ani wu eyi, gü ba, ye de kpeke kpara, te ye ngbü emala zu ngü ka Me fü ani fanü

* 12:11 12:11 Mü ena amaka ngü la gbü Ci ka wü Davidi 118:22-23.

fanü. Angü ye kpe cürü kpara nda-ye 'buru 'dò de. Ye ngbü ele ka-ye 'duwa ngü ka Me. Te di bala, gara ngü ladü te ani le ayi-ta ye di. Ah ti atü fü ani ase ngürü ani fü *Kayisara, Miri ka wü Rüma, te ngbü gbü nzò ani ne? ¹⁵ Anga ah ti de? *Riri ka Müse gü neh fe?"

Amba Yesu, mü wu mani ka-ewü la nda-mü eyi kpo. Fü mü ayia alügü ngü fü ewü, gü ba, "Wü ngbü ere maguma ni de ngü bala, neh teka ne? Wü za la biri jiasa sela, wü sere fü ani." ¹⁶ Fü ewü aza gara jiasa biringbö, ato fefe na. Fü ah aceka jiasa la, agü ba dene, "E-gbü jiasa ne, neh kuru da? Wüh ba eküküte na ne, neh iri da?" Wüh ga, "Ah de kuru Kayisara, te di de Miri ka wü Rüma ne." ¹⁷ Yesu gü ba, "Ah mbi! Te ah de nda miri la, de yi lügü fü miri. De yi lügü nda Me kpah fü Me."

Dela ngü ta te Yesu mala fü wü kpara la, teka mase ngürü. Fü ngü kaka la aga gbü jia wü kpara la afa sü.

Dene ngü ta te wüh yi-ta Yesu di, teka züzükü gbü kpi

Matayo 22:23-33; Luka 20:27-38

¹⁸ Wü gara kpara ta ladü esüka wü di enga *Yisaraye, te wüh ei ewü, gü ba, wü *Saduke. Wüh fi nda-wü, gü ba, "Te kpara kpi eyi la, ah kpi eyi fi mere badi. Ah du azükü gbü kpi tñe de."

Te di bala, fü gara wü Saduke akoro kpaka Yesu, ayi-tata gbü mani, gü ba dene, ¹⁹ "Mere kpara, gara ngü ladü te ani le ayi-ta ye di. *Müse ba ta ngü fü ani gbü *Riri ka Me, gü ba, 'Te kpara kpi, ce wara ye, o wüh bi ye ake di la de la, ah le de enga ni ye na za würüse gbü nganga na la, teka abi ye dada na, angü iiri na ena adürü.'" ²⁰ Amba, te wü kpara ena azükü gbü kpi azükü fanü fanü la, ngü la ena adi baye? Angü gara wü komoko ta ladü, wüh guvu ni wü lorozi. Fü gina ewü ayia aza würüse. Fü ah ayia akpi, o wüh bi ye ake di la de. ²¹ Fü e'ba'basu adu aza würüse nga kpa enga ni ye la. Fü ah ayia akpi. Wüh bi ye ake di kpah de. Fü ebabata na adu kpah aza würüse la. Fü ah ayia kpah akpi, ace engu fi kükürü. ²² Wü jaji komoko de lorozi la, wüh za würüse la te nga wü 'buru. Fü ewü akpi 'buru, wüh bi ye te würüse la nda-wü de. Fütanga ewü la 'buru, fü würüse la adu kpah akpi. ²³ Te wü kpara ena azükü azükü gbü kpi fanü la, würüse la ena adi neh wara da? Kükürü de, angü engu ta eyi wara ewü 'buru."

²⁴ Yesu gü ba, "Yi fi nda-yi, gü ba, Me ti azükü wü kpara gbü kpi nda de? Yi dürü bala, neh teka ne? Yi wu si-ngü de te wüh ba gbü *Ngari Me ne de, neh teka ne? Yi le awu wazi ka Me kpah de, neh teka ne? ²⁵ Gbü sü ka Me agbü kpi kpala, wü kpara za te-wü nda-wü de. Angü te wü kpara zükü eyi gbü kpi la, Me ena afü ewü baka wü *malayika ka-ye.

²⁶ Wüh ba ngü gbü *Ngari Me teka ngü ka züzükü gbü kpi, gü neh fe? Gbü ra ta te Me gü tamu ye tete fü *Müse, Me mala ta fefe, gü neh fe? Ah gü ba dene, 'De-ni Me, ni de *vüngüte ka *Abarayama, ake *Yisaka bete *Yakobo.'

²⁷ Amba, gbü ra ta te Me mala ngü la tete, o wü Abarayama kpi ka-wü eyi gügü. Me ena amala ngü teka wü kövö, gü ba, 'Wüh de wü vüngüte ka-ni?' Ah bala de. Me mala ngü la, angü wü Abarayama ka-wü eyi ladü ezükü, agbü sü ka Me fi mere badi. Te di bala, fingängü ka-yi te gü ba, wü kpara ti azükü gbü kpi nda-wü de ne, ngü la de mere siti wu!"

Dela ngü ta te Yesu mala fü wü Saduke, gü ba, "Me ena azükü wü kpara ka-ye, fü ewü angbü fi mere badi agbü sü ka-ye agbü kpi kpala."

Dene ngü ta te Yesu mala teka kpeke Riri ka Me

Matayo 22:34-40

²⁸ Gara *mürü riri ngbü ta eje yiki te wü *Saduke ngbü ega de wü Yesu ne. Te engu je ngü te Yesu lügü fü ewü la, fü ngü la areke gbü jijia na afa sü. Fü mürü riri la adu ayi-ta Yesu, gü ba dene, "Mere kpara deyi, nda-ni yitangü kpah ladü. Esüka wü *Riri ka Me 'buru, kpeke riri, te fa wü bu ye 'buru, neh engu deyi?" ²⁹ Yesu gü ba, "Kpeke Riri te Me to fü nih, wü di enga *Yisaraye, gü ba dene, 'Me ka-ye ngbee biringbö.

Ah de miri ka-nih me-ye.

Kpara te fa engu nda ma.

³⁰ Mü le Me de maguma mü 'buru.

Mü o fingängü ka-mü kpah 'buru tete.

Mü le ngü kaka de wazi mü kpah 'buru.

Mü to te-mü kpah 'buru fefe.'§

Dela kpeke Riri te Me to fü nih, te fa wü bu ye 'buru. ³¹ E'ba'basu na gü ba dene, 'Mü le wü bu mü, baka e te mü ngbü ele küte mü.'* Dela gina wü kpeke *Riri ta te Me to fü nih. Gara riri te fa ewü dela nda ma."

³² Te mürü riri la je ngü te Yesu mala la, fü ngü la areke tete afa sü. Fü ah

† **12:19** 12:19 Mü ena amaka ngü la gbü buku ka Manda nga Riri 25:5-6. ‡ **12:26** 12:26 Me gü tamu ye fü Müse gbü gara rü, te ngbü eci aci baka wa. Mü ena amaka ngü la gbü buku ka Gogo ka wü di enga Yisaraye 3:1-15.

§ **12:30** 12:30 Mü ena amaka ngü la gbü buku ka Manda nga Riri 6:4-5. * **12:31** 12:31 Mü ena amaka ngü la gbü buku ka Riri ka Gele ka wü Levi 19:18.

alügü ngü fū Yesu, gü ba dene, “Wayi, mere kpara, mü mala zu ngü fanü fanü. Me ka-ye kü biringbö. Gara kpara te fa engu kpo fi ma. ³³ Te mü le Me de maguma mü 'buru, o fingangü ka-mü 'buru tete, fū mü ale ngü kaka de wazi mü kpah 'buru, fū mü adu ale wü bu mü, baka e te mü ngbü ele küte mü la, ngü ka-mü ena areke gbü jia Me afa sü. Gele ka wü kundu nih gü ba, te mü le de ngü ka-ni reke gbü jia Me la, ah le de mü za nü, awa fefe. Amba ngü ka lele fa ngü ka gele la ka.”

³⁴ Fū ngü ka mürü riri la adu areke gbü jia Yesu afa sü. Fū Yesu adu amala ngü fefe, gü ba dene, “Wayi, fingangü ka-mü mbi. Mü eyi gbmari akoro zu kpara ka Me.”

Dela ngü ta te Yesu mala, teka kpeke Riri ka Me. Fütanga ngü la, gara kpara, te du le aga yiki ake di, nda tñe ma.

Dene ngü ta te Yesu mala, teka Miri te Me ena atima füh kotö ne

Matayo 22:41-45; Luka 20:41-44

³⁵ Fütanga ngü la, fū Yesu angbü da eri wü kpara etambasü ka *Mere Kambü ka Me, gü ba dene, “Wü *mürü riri mala teka *Kurisito, Miri te Me ena atima füh kotö ne, teka aküwa wü kpara, gü neh fe? Wüh gü ba, ‘Miri la ena adi de kundu ye Mere Miri *Davidi, te ena angbü gbü nzö ani kpah baka Davidi,’ ah bala de? Amba Miri la ena angbü baka Davidi fanü? ³⁶ Angü Davidi ba ta ngü cu me-ye, gbü wazi ka *Nzila Wazi Me, gü ba dene,

‘Me mala ngü fū Miri ka-ni, gü ba dene,

“Ye ngbü gbü kokpa ka-ni sene.

Angü ni fe ye, o eyi Mere Miri.

Te di bala, ye ena angbü gbü nzö wü kpara 'buru!

Angü ni ena ao wü vügü ka-ye 'buru esa lö ye!” †

³⁷ Dela ngü ta te Davidi ba teka Miri la, gü ba, ‘Engu de miri ka-ni.’ Te di bala, wawazi na fa nda Davidi de? Ma emala fū yi, gü ba, ngü kaka ena afa nda Davidi afa.”

Dela ngü ta te Yesu mala teka Mere Miri, te Me ena atima teka aküwa wü kpara. Fū mere bi wü kpara angbü eje ngü kaka-na la de mere tadu.

Dene ngü ta te Yesu mala teka wü mürü riri

Matayo 23:1-7; Luka 20:45-47

³⁸ Fū Yesu adu ari wü kpara la, gü ba, “Yi ceka la Yesu ngü ka wü *mürü riri. Yi mere e angbü baka ewü de. Angü wüh le de wü kpara 'buru di ecu ngü ani. Te di bala, fū ewü angbü eto ngboro bongo eküte wü, endondoro di esüka wu kpara. Wüh ngbü ele de wü kpara 'buru ngbü egü

mandi fū ani baka wü mere kpara. ³⁹ Te wüh koro kpa *esambü ka biti-te la, wüh ngbü ele adi angbü füh züka da-ngbüngbü te reke areke. Gbü wü sü ka karama, wüh ngbü emere kpah bala. Wüh ele ka-wü bü adi angbü gbü wü sü ka wü cögbörö kpara. ⁴⁰ Wüh le de wü kpara 'buru wu ani baka züka wü kpara ka Me. Te di bala, wüh ngbü emere dela züka ngü te ena reke gbü jia Me? Ah bala de! Te wüh ngbü eku gba fū Me la, wüh ngbü eza mere bi wü ngü te komö wü gbe! Amba ngü ka Me emagama ewü nda ma. Wüh ngbü kpah da ezi wü e ka wü würüse wökö de mani. Te di bala, Me ena ato mere siti kuru te wü mürü riri la te gara afa sü.” Dela ngü te Yesu mala, teka wü mürü riri la.

Dene ngü ka takpa ka würüse wökö

Luka 21:1-4

⁴¹ Fütanga ngü la, fū Yesu adu angbü kötö ede kuwu, te wü kpara ngbü eto takpa fū Me gbügbü na. Fū ah angbü eceka wü kpara, te ewü ngbü eto takpa ka-wü la. Wü gara kpara te ewü di de mere bi wü e esaka wü, wüh ngbü eto nda-wü mere bi jase. ⁴² Fū gara würüse wökö, mürü cinga, ayia akoro ato nda-ye mba 'duwa enga jase ngbee 'basu, baka e te wüh ena ase ambata biringbö di. ⁴³ Fū Yesu adu amala ngü fū wü kpara ka-ye, gü ba dene, “De-yi, yi ceka la ngü ka würüse la. Ngü te ma emala dene, ah de zu ngü. Jiase te würüse wökö la to ne, ah reke gbü jia Me, fa nda wü bu ye la 'buru. ⁴⁴ Angü wü kpara de mere bi e esaka wü ne, e te ewü to fū Me, ngüngü gbü jia ewü nda ma, angü dudu ladü esaka ewü. Amba würüse la to nda-ye jiase eyi 'buru. Dudu na esasaka, te engu ena ase mba enga zü-e di, nda tñe ma.” Dela ngü te Yesu mala teka takpa, te wüh ngbü eto fū Me.

13

Dene ngü ta te Yesu mala teka ngü te ena amere te-ye te gara

Matayo 24:1-14; Luka 21:5-19

¹ Fütanga ngü la, fū wü Yesu ayia ace tambasü *Mere Kambü ka Me. Fū gara *kpara ka Yesu arü amala ngü fefe na, gü ba dene, “Mere kpara deyi, ye ceka la, züka Kambü ka Me ne, te wüh fa de angbe cögbörö da ne!” ² Yesu gü ba dene, “Mü ceka la bü mere züka Kambü ka Me ne? Te gara, wüh ena amürü kambü la amürü 'buru asidi. Da biringbö, te wüh ena ace ao füh kiri ye, ena adi ma.”

³ Fū ewü ayia ace sü la, adu anü ali kpa füh da de iri ye Olive, adu angbü eceka

† 12:36 12:36 Mü ena amaka ngü la gbü Ci ka wü Davidi 110:1.

Mere Kambü ka Me, te di kpa eta ngu de kpala. Fū Petero ayia ake *Yakobo, *Yüwane bete Anderiya, anü ayi-ta Yesu, ⁴ gü ba, "Mere kpara, gara ngü ladü te ani le ayi-ta ye di. Ye gü ba, 'Wüh ena amürü mere Kambü ka Me la asidi.' Ngü la ena amere te-ye neh elaye? Anga ngü, te ena agü tamu ngü la fū ani, gü ba, sikipi la koro eyi gbamari, ah de ne ngü ne?"

⁵ Fū Yesu alügü ngü fū wü kpara ka-ye, gü ba, "Yi ceka te-yi mbi teka wü mürü fiti, angü wüh ena afti yi. ⁶ Angü mere bi wü kpara ena akoro, amere mani te iri ra, afti wü bu wü, gü ba, 'Ani de Miri, te Me tima ani me-ye.' Te di bala, mere bi wü kpara ena ale ngü ka-ewü la. Amba nda-yi, yi mere e ale ngü ka-ewü la de. ⁷⁻⁸ Angü mere bi wü ngü ladü, te wüh ena amere te-wü feke, o *adu sikipi la koro la de. Nguwa wü kpara ena ayia ati de gü gbü nzö nguwa wü gara kpara. Yiki-tö ena amere te-ye gbü mere bi wü sū füh kotö ne. Kpah bala, gbü wü gara sū, mere siti kpiri tala ena ati gbü nzö wü kpara. Dela 'buru wü ngü te ena amere te-wü füh kotö ne, o adu sikipi koro la de. Wü ngü la 'buru ena adi baka gina keke, te kpo da emere würüse te ele ayaka. Te di bala, yi mere e akpe cürü de, angü Me ladü, te ena areke wü ngü la 'buru, ba e te engu le.

⁹ Amba nda-yi, yi ceka te-yi mbi, de yi rü kpekpeke, angü wü vügü ka-ra ena azoro gara yi, anü di ato fū wü cögbörö kpara, de wü miri. Fū ewü amü yi teka ngü ka-ra. Te di bala, yi ena amala ngari ra fū wü mere kpara la. ¹⁰ Angü, ah le de wüh mala ngari ra fū nguwa wü kpara füh kotö ne 'buru feke, o adu sikipi koro la de. ¹¹ Gbü ra te yi ena arü engagira wü mere kpara la, yi mere e angbü de mere fingangü gbü nzö yi de. Yi mala bü mene ngü te *Nzila Wazi Me ena ato te komö yi. Angü, ngü te yi ena adi emala la, ah ena adi de ngü kaka, ah de ngü ka-yi nda de. ¹²⁻¹³ Yi ngbü 'be 'be 'be, angü wü kpara 'buru ena angbü ekpü yi teka ngü ka-ra. Wü di enga ni yi ena afü te-wü ba wü vügü ka-yi, agü tamu yi fū wü vügü, amörö yi. Wü wö yi ena amere kpah bala, fū wü di yi amere kpah bala. Amba ah le de mü i maguma mü, zalü koro di gbü ra te cinga la ena anza, fū mü aküwa."

Dene ngü te Yesu mala, teka mere cinga,

te ena amere wü kpara ka Yerüsalema te gara

Matayo 24:15-22; Luka 21:20-23

¹⁴ Fū Yesu adu amala gara ngü fū ewü, teka *Mere Kambü ka Me, te wüh ena amürü la, gü ba, "Fanü fanü sirimbi ladü

te ena agü tamu sikipi la fū yi. Angü gara vügü ka Me ladü, te ena akoro, asiti sū kpa esa Mere Kambü ka Me." Dela ngü te Yesu mala fū wü kpara ka-ye, teka sirimbi, te ena akoro agü tamu sikipi, te wüh ena amürü Mere Kambü ka Me agbü Yerüsalema tete na. (De-mü, te mü ngbü etanga ngü ne, ah le fū mü ao fingangü ka-mü teka aje si-ngü la mbi mbi mbi.)

Fū Yesu adu kpah amala fū ewü, gü ba dene, "Te yi wu sirimbi la, yi mere e angbü agbü *Yudaya de. Yi kpe 'duwa kpa enzö mere gümba, agbü gü! ¹⁵ Te siti ngü la koro maka mü, te mü ngbü efe te-mü kpa esa e la, mü mere e adu ari kpa esambü, akö wü e ka-mü, tñe de. Mü kpe 'duwa akpe, angü siti ngü la ena amaka mü. ¹⁶ Te siti ngü la koro maka mü da esö e ka-mü kpa gbü yi la, mü mere e adu kpa eköti, ato züka bongo te mü, kpah de. Mü kpe 'duwa akpe. ¹⁷ Angü sirimbi la ena agü tamu mere siti cinga, te ena akoro eküte yi, te fa wü gara cinga füh kotö ne 'buru. Yi ceka la, mere cinga ka wü würüse, te ewü di de bu wü, kpah bete mene ewü, de te ewü di de vürü wü jaji eküte wü ne. Dela ne cinga ne! ¹⁸ Ah le fū yi adi eku gba fū Me, de siti ngü la mere e akoro gbü bigü de. Angü agö bete zü ena amere wü kpara, te ewü ena akpe la. ¹⁹ Kü baka te Me mere kotö ne, mere cinga baka e la mere te-ye nda la de. Gara cinga te ena akoro fütanganga na, baka engu la, ah ena adi kpah ma. ²⁰ Fū Me adu afi nga wü kpara ka-ye, te engu fe ewü ne, gü ba, 'Te di bala, ni ena akolo sikipi la mba cogbo, teka ngü ka wü kpara ka-ni la, angü wüh ena akpi.' Te Me ena amere ta bala de la, de bane kpara biringbö, te ena aküwa esaka siti ngü la, ena adi kpo ma."

Dene ngü teka dudu ka Yesu füh kotö ne Matayo 24:23-31; Luka 21:25-27

²¹⁻²² Fū Yesu adu kpah, amala gara ngü fū wü kpara ka-ye, gü ba, "Gbü wü sikipi la, wü mürü wu ena akoro, adi efiti wü bu wü. Gara ena agü ba, 'Ni de miri, te Me tima ni teka aküwa wü.' Gara ena agü ba, 'Ni nda-ni de *mürü dofo, te ni ngbü emala ngari Me fū wü kpara.' Wüh ena akpo angbü emere bi wü ngü ka talara, te ena afti wü kpara 'buru. Wüh ena agiri kpah kaje teka afti cu yi, wü kpara ka-ra. Te di bala, yi ceka te-yi mbi, yi mere e aje ngü ka wu ka-ewü la nda-yi de! Te gara kpara mala ngü fū yi, gü ba, 'Miri te Me tima ne koro eyi! Ah ladü kpakine,' anga 'Ah ladü kpane,' yi mere e ale ngü kaka la nda-yi kpah de. ²³ Yi ceka te-yi mbi, angü ma ngbü eyi emala ngü ne fū yi te enga gina dene, o ngü la koro la de, teka fū yi

amba jia yi amba, angü wü mürü wu la ena afti yi.

²⁴ Fütanga ngü la, gara wü ngü ena ayia kpah amere te-wü, baka e ta te wüh ba gbü *Ngari Me, gü ba dene, 'Wü lara ngü ena akpo da emere te-wü kpa gbü kpä.

Angü kokpï de wü e kpa tikpi 'buru ena akpo da eyiki

²⁵ Wü küfara ena akpo kpah da egügürü. Ra ena afü te-ye baka biti.

Fe ti adu asü kpah de.*

²⁶ Fütanga ngü la, de-ra *Ye Kpara ka Kpï, fü ra adu tîne akoro. Wü kpara 'buru ena aci awu ra kpa gbü kpï, te ma ngbü ekoro de mere wazi, baka Mere Miri. Fü ewü aci 'buru acu ngü ra. ²⁷ Fü ra ayia atima wü *malayika ka-ra, teka abiti wü kpara ka-ra, te ma fe ewü. Wüh ena abiti ewü edebu sü bala ne 'buru, akoro di fere. Fü a angbü tundu de ewü fi mere badi."

Dene mani ta te Yesu mala teka dudu ka-ye

Matayo 24:32-35; Luka 21:29-33

²⁸ Fü Yesu adu amala gara ngü fü ewü gbü mani, gü ba, "Ngü ka dudu ka-ra, ah baka ngü ka wü rü. Angü te yi wu wü rü te ngbü eyi ayi, da eto to kpa wü la, yi ngbü egü neh fe? Yi ti eyi awu, gü ba, bigü koro eyi. Ah bala de? ²⁹ Kpah bala, te yi wu wü sirimbi, te ma mala ngangä fü yi ne eyi la, de yi wu awu, gü ba, sikipï ka dudu ka-ra la koro eyi ghamari.

³⁰ Ngü te ma emala dene, ah de zu ngü. Siti cinga la ena amaka yi fanü, amba ngü la ti anza ngü ka-yi, wü kpara ka-ra nda de. ³¹ Ngü te ma ngbü emala fü yi, ah de kpeke ngü, te ena angbü fi mere badi. Angü Me ena agara kotö ne ake kpï, fü ngü ka-ewü anza 'buru. Amba ngü ka-ra ti anza nda de."

Dene ngü te Yesu mala, gü ba, nih reke te-nih nzo,

teka dudu ka-ni

Matayo 24:36-51; Luka 21:34-36

³² Fü Yesu adu kpah, amala fü wü kpara ka-ye, gü ba, "Te yi le ayi-ta ra, gü ba, sikipï te ma ena adu akoro tete na, ena adi elaye la, ma ena alügü ngü fü yi, gü ba, kpara biringbö, te wu ngü la, nda ma. Wü *malayika agbü kpï, wüh wu kpah de. De-ra, te ma di de Ye Me, ma wu kpah de. 'Duwa Wüba Me, ah wu sikipï la duu me-ye. ³³ Te di bala, yi ceka te-yi mbi, da ecü sü, angü yi wu sikipï la nda-yi de. ³⁴ Ngü la

ena adi baka mere kpara te yia, ce gba ye, anü kpa gbü gara sü. Fü ah ai wü kpara ka tima ka-ye, agafa tima fü ewü, te ewü ena adi emere sidi nga ni. Fü ah amala ngü fü kpara te ecü möngiti, gü ba, 'Ye ci sü mbi mbi mbi, da ecü nga dudu ka-ni.' ³⁵ Kpah bala, ma emala ngü fü yi, gü ba, yi ceka te-yi mbi, da ecü nga dudu ka-ra, angü yi wu sikipï ka dudu ka-ra la nda-yi de. Anga ma ena adu akoro neh etamura, etü biti, te gina gba moko-ngü, anga kpurutokokpï? Yi wu kpah de. ³⁶ Yi ceka te-yi mbi, angü te ma du koro maka yi gbü iri-to, anga da era ra la, ah ena adi esiti."

³⁷ Dela wü ngü ta te Yesu mala fü wü kpara ka-ye, teka ngü te ena amere te-ye te gara. Yesu mala ngü la kpah fü nih 'buru, gü ba, "Nih ceka te-nih mbi mbi mbi, da ecü sü."

14

Dene ngü ta te wü mere kovo ka wü Yisaraye

ngbü egüri kaje, te ani ena amöro Yesu tete

Matayo 26:1-5; Luka 22:1-2

¹ Ngü ne ngbü emere te-ye ta gbü mere sikipï ka wü *Yisaraye, te ewü ei, gü ba, *Pasika ne.* Ah de *sikipï te wüh zü ambata de kö gbü ye de. Te du sikipï ka Pasika la laki tîne ngbee sikipï 'basu ne, fü wü mere *kovo ka wü Yisaraye ayia abiti te-wü, de wü *mürü riri, de wü mere *mürü gele. Fü ewü akpo angbü egüri kaje, te ani ena azoro Yesu tete na gbü zi, amöro. ² Fü ewü angbü ero mö esüka wü teka ngü la, gü ba dene, "Ani ceka 'be, angü mere bi wü kpara biti te-wü eyi sene, teka mere sikipï te di ghamari ne. Te ani zoro Yesu gbü jia ewü la, wüh ena aci de gü eküte ani! Te di bala, ani giri kaje, de ani zoro engu gbü zi."

Dene ngü te gara wü rüse tökö züka se-mü di gbü nzö Yesu

Matayo 26:6-13; Yüwane 12:2-8

³ Ta gbü wü sikipï la, wü Yesu ngbü ta engbü ka-wü agbü Betaniya, agba gara komoko de iri ye Simüna, ta te di de *jiakö te ye ne. Fü gara wü rüse akoro amaka ewü, te ewü ngbü da ezü e kpala. Wü rüse la koro de *züka se-mü esaka ye, te wüh se de mere bi jiasé.† Fü wü rüse la aza enga kölökö de se-mü la gbü ye, ayia ami mö kölökö la, akuru mbürrü! Fü ayia atökö se-mü la 'buru gbü nzö Yesu.

* 13:25 13:25 Mü ena amaka ngü la gbü Yisaya 13:10; 34:4, bete Yüwele 2:10. * 14:1 14:1 Gbü Karama ka Pasika la, wü ngbü ezü ambata de kö gbü ye de. Mü ena amaka si-ngü ka Pasika la gbü "Si wü gara kpeke ngü te di gbü Ngari Me ne." † 14:3 14:3 İri se-mü la de nada, wüh o ta gbü enga kölökö, te wüh mere gbü gara e, de iri ye alabasita.

4 Te wü gara kpara wu ngü te würise la mere bala ne, fü ngü la asiti eküte ewü 'duwa ba-neh-ene-la. Fü ewü akpo da emala ngü esüka wü, gü ba, "Würise la mere ngü la bala, neh teka ne? Ah za züka e ne, etökö kötö bü kükürü kükürü bala! Dela züka ngü?" 5 Ah le ta de wüh za züka se-mü la, cínzi de mere bi jiase,‡ teka ale ta-ngü di eküte wü mürü cinga." Fü ewü aci 'buru ekpülü würise la. 6 Fü Yesu adu arü amala ngü fü ewü, gü ba dene, "Yi ekpülü engu neh teka ne? Yi ce engu ace. Ngü de te engu mere, te engu tökö se-mü gbü nzö ra ne, ah de mere züka ngü gbü jia ra. 7 Angü du sikipi ka-ra füh kotö ne mba cükü'daye. Te yi le ale ta-ngü te wü mürü cinga, yi ti eyi amere ngü la sidi ngü ra, baka e te yi le, angü mere bi wü mürü cinga ladü füh kotö ne. 8 Amba würise ne tökö se-mü gbü nzö ra, baka e te wüh ngbü emoko se-mü eküte kövö. Kükürü de, angü sikipi ka kpi ka-ra koro eyi gbamari. 9 Ngü te ma emala dene, ah de zu ngü. Gbü wü sü 'buru te wüh ena amala ngari ra tete fü wü kpara füh kotö ne, wüh ena angbü efi nga würise ne, kpah da emala nga ngü de te engu mere ne."

Dene ngü te Yuda Keriyota reke, teka ato Yesu di fü wü vügü

Matayo 26:14-16; Luka 22:3-6

10 Fütanga ngü la, fü *Yuda Keriyota, te di biri kpara esüka wü *kpara ka Yesu nzükpa de füh ye 'basu ne, ayia anü kpaka wü mere *kovo ka wü Yisaraye. Fü ah amala ngü fü ewü, gü ba, "Ni ena agiri kaje, te ni ena ato Yesu di fü wü." 11 Te wü mere kpara la je ngü te Keriyota mala fü ewü de bala ne, fü ngü la areke gbü jia ewü 'duwa ba-neh-ene-la. Fü ewü alügü ngü fefe na, gü ba dene, "Te ye to Yesu fü ani fanü fanü la, ani ena ato jiase fü ye." Te di bala, fü Keriyota akpo da egiri züka kaje, te ni ena agü tamu Yesu tete fü ewü.

Dene ngü ka Yesu te zü Karama ka Pasika de wü kpara ka-ye

Matayo 26:17-30; Luka 22:7-23

12 Dene gele ta te wü di enga *Yisaraye ngbü emere teka *Karama ka Pasika. Gbü gina sikipi ka Pasika la, wüh mürü köti 'buru ngbü eza togo kambiliki, anü di kpaka wü *mürü gele ka Mere Me, de wüh wa, ato fü Me. Te mürü gele wa eyi, fü wü mürü köti aza so kambiliki la, anü di, azü de wü kpara agba wü 'buru. §

‡ 14:5 14:5 Jiase, te wüh mala ngangana de sene, gbü ngü Giriki, ah de denariya kama bata (300). Ah baka mere bi jiase te mü ena amaka, te mü mere tima teka re biringbö. § 14:12 14:12 Wüh ngbü ezü so kambiliki la de ambata de kö gbü ye de. Mü ena amaka si-ngü la gbü buku ka Gogo ka wü di enga Yisaraye. 12. Mü ti kpah amaka si-ngü la gbü "Si wü gara kpeke ngü te di gbü Ngari Me ne."

Te di bala, te sikipi ka Pasika la koro tete na, fü wü *kpara ka Yesu arü amala ngü fefe na, gü ba dene, "Mere kpara deyi, ani ena azü nda-ani karama ka Pasika ne, neh kaye? Ye mala emala fü ani, de ani nü, teka areke sü engu na." 13 Fü Yesu ayia atima wü kpara ka-ye 'basu, gü ba, "Wü nü kpa gbü Yerüsalema kpala. Wü ena amaka gara komoko kpala, te se ngu kaye, ego di. Wü fa nga komoko la, zalü koro di gbü köti, te engu ena arü gbügbü. 14 De wü mala ngü fü mürü köti la, gü ba, 'Mere kpara ka-ani gü ba dene, "Ye to kambü ka ngba fü ani, teka fü ani azü karama ka Pasika ne gbügbü, de wü kpara ka-ni." ' 15 Mürü köti ena agü tamu mere guvu kambü, te di kpa tikpi füh kiri ye, de wü e gbü ye 'buru nzo. Te di bala, de wü reke zü-e fü ani kpala."

16 Fü wü kpara 'basu la ayia anü agbü Yerüsalema. Fü ewü amaka wü e 'buru, kpah baka e te Yesu mala fü ewü. Fü ewü areke sü kpala teka azü Pasika ka-wü la.

17 Etamurago la, fü wü Yesu ayia de wü *mürü tima ka-ye, anü akoro agbü Yerüsalema. Fü ewü anü akoro agbü sü, te wüh reke de kpala. 18 Fü ewü akpo da ezü karama ka-wü.

Te wüh ngbü ezü e tete, fü Yesu ayia amala ngü fü wü kpara ka-ye la, gü ba dene, "Ngü te ma emala fü yi dene, ah de zu ngü. Gara kpara ladü esüka yi sene, te ena ato ra fü wü vügü. A ngbü ezü e ne cu ake di!" 19 Te wüh je ngü la bala, fü ngü la ato mere cinga fü ewü. Fü ewü akpo da eyi-ta Yesu, te nga wü biri biri, gü ba dene, "Ah de ni? Ni ena ato ye me-ni?" 20 Yesu gü ba dene, "Ah de kpara esüka yi, nzükpa de füh ye 'basu ne. Kpara te a ngbü ezü e ake di tundu gbü gada biringbö ne. 21 De-ra, *Ye Kpara ka Kpi, ma ena amaka cinga, fü ra akpi, baka e ta te wüh ba gbü *Ngari Me teka ra ne. Amba ah ena adi de mere cinga fü mene kpara, te ena ato ra fü wü vügü ne. Dela cinga nda de! Ah reke ta pe, te wüh ena abi engu nda-wü ta de."

22 Baka te ewü du ngbü kpah ezü e ka-wü la, fü Yesu ayia akpo da emere gara ngü. Fü ah ayia aza ambata, agbo nga iri Me tekaka na, adu akukuru, ayia agafa fü ewü, gü ba dene, "Dene küte ra. Yi za eza, de yi zü." 23 Fü engu adu aza ndü'ba de ngu *vinü gbü ye, agbo nga iri Me tekaka, ayia ato fü ewü. Fü ewü anzö te nga ewü 'buru. 24 Fü ah adu amala ngü fü ewü, gü ba dene, "Dene *ngüte ra. Yi nzö enzö,

ba e te yi enzó *ngüte de wü Me. Angü ngüte ra engu ne, ah ena atökö, teka areke ngü ezengba wü kpara de wü Me. ²⁵ Ngü te ma emala dene, ah de zu ngü. Akpo enatikine, ma ti anzó ngu vinü tine kpo de, zalü akoro di gbü sîkpi te Me ena ao ra Mere Miri tete na."

²⁶ Te wü Yesu zü karama la nza tete, fü ewü ayia abî ci ka Me.* Fü ewü ayia ace sü la, anü kpa füh da de irî ye Olive.

Dene ngü te Yesu mala fü Petero

Matayo 26:31-35; Luka 22:31-34; Yüwane 13:36-38

²⁷ Fütanga ngü la, o wü Yesu ngbü enü agbü Getesemane, fü ah adu amala ngü fü wü kpara ka-ye, gü ba dene, "Yi ena akpe abaya 'buru ka cürü, ace ra kpikpi ra, baka e ta te wüh ba gbü *Ngari Me, gü ba, 'Wüh ena amörö kpara de te ngbü eceka kpi fütanga wü kambiliki ne, fü wü kambiliki la adu abaya ka-wü 'buru.'† ²⁸ Ngü ma! Te ma zükü gbü kpi eyi la, ma ena anü sü engagira nü agbü *Galilaya. Fü yi adu anü amaka ra kpala."

²⁹ Fü Petero ayia amala ngü fü Yesu, gü ba dene, "Ni kpe de! Te wü bu ni kpe akpe 'buru la, nda-ni, ni ti ace ye de." ³⁰ Yesu gü ba dene, "Petero enga wüna, ngü te ma emala dene, ah de zu ngü. Enatikine, gbü biti ne, o moko-ngü mî e'ba'basu koko la de, mü ena acere nga mü du bata, gü ba, 'Ni wu ra de.'" ³¹ Fü Petero adu kpa amala ngü la kpekpeke, gü ba, "Ma ce mü de. Te ah kpa bü de kpi la, nih ena akpi ake nih ma! Ma kpe cürü de!" Fü gara wü *kpara ka Yesu, fü ewü aci 'buru, amala nda-wü kpa bala.

Dene ngü ka Yesu agbü Getesemane

Matayo 26:36-46; Luka 22:39-46

³² Fü wü Yesu anü akoro agbü Getesemane. Fü Yesu amala ngü fü wü kpara ka-ye, gü ba dene, "De-wü deyî, wü ngbü la sene. Ni ena anü nda-ni kpa edere sü cükü'daye, teka aku gba fü Me." ³³ Fü engu ayia aza Petero, ake *Yakobo bete *Yüwane, anü de ewü cükü'daye kpa edere sü. Fü mere cinga bete fingangü akpo da emere Yesu, fü mamagama akpo da egürü. ³⁴ Fü ah amala ngü fü wü Petero, gü ba, "Maguma ra te egürü ka mere cinga, baka e te ma ena akpi akpi la. Yi ngbü ede ra sene, adi eci sü."

³⁵ Fü engu ayia anü cükü'daye edere sü. Fü ah abuka gbüra ye kötö, aku gba fü Me, gü ba, "Wüba, te ah reke te mü la, kpi kara te ekoro ne, de mü nzi ngü la eküte ra asidi. ³⁶ Wayi, Wüba, ngü te ena afa mü, ah nda ma. Te ah gbü jia mü mbi la, ma ale

de mü nzi siti ngü la eküte ra asidi. Ngü la, ma ce o eyi esaka mü, de ah ngbü ba e te mü ngbü ele. Ah di ba e, te ma le me-ra ne, de."

³⁷ Fü engu ayia adu kpa wü Petero, amaka ewü da era ara. Fü ah amala ngü fü Petero, gü ba dene, "Ah mere baye? Mü ngbü era ka-mü ara? Mü ti angbü ezükü, fü nih aci sü de nih ma mba cükü'daye, nda-mü de? ³⁸ Ah le de yi di eci sü, da eku gba fü Me, angü *Satana ena afiti yi! Wayi, ah fanü, maguma yi ngbü ele ngü ka-ra, amba wazi yi, te yi ena amere ngü la di, nda ma."

³⁹ Fü Yesu adu kpa anü agbü sü, te engu ngbü eku gba fü Me tete na ne. Fü ah aku gba fü Me, amala ngü kpa baka engu de tine ne. ⁴⁰ Fütanga ngü la, fü ah adu kpa amaka wü Petero fi da era ara, angü ra ngbü emere ewü efa sü. Fü ngü anza gömö ewü 'buru, ka vi-jia.

⁴¹ Fü engu ayia anü kpa kpala, aku gba fü Me, adu kpa amaka ewü fi da era ara. Fü ah ayia amala ngü fü ewü, gü ba dene, "Yi la fi bü era ara? Ah ti eyi! Angü sîkpi ka-ra, *Ye Kpara ka Kpi ti eyi enatikine! Wüh to ra eyi fü wü vügü! ⁴² Yi yia la eyia, nih reke te-nih! Yi ceka la! Kpara te ena agü tamu ra ne, ah eyi te ekoro de kpane!"

Dene ngü te wüh zoro Yesu tete

Matayo 26:47-56; Luka 22:47-53; Yüwane 18:3-12

⁴³ Baka te Yesu ngbü la fi bü da emala ngü la fü wü kpara ka-ye, fü *Yuda Keriyota, te di de biri kpara esüka wü *kpara ka Yesu, nzükpa de füh ye 'basu ne, ayia akoro, de mere bi wü kpara gbü nga ye, te wü angbe cögbörö *kovo tima ewü, azoro Yesu. Wüh koro ta de wü mere maguruma, de wü ngbondo esaka wü. ⁴⁴ Angü Yuda Keriyota mala ta fü ewü, gü ba, "Ni ena agü tamu Yesu fü wü. Mene kpara te ni ena afaka, dela eyi engu. Wü zoro engu gö! anü di kpaka wü mere kpara." ⁴⁵ Fü Keriyota akoro kürrü, afaka Yesu, gü ba dene, "Mere kpara, mü ladü!" ⁴⁶ Fü ewü ayia 'duwa azoro Yesu.

⁴⁷ Fü gara kpara ka Yesu ayia aza mere maguruma ka-ye, ade güje gara kpara ka tima ka mere kpara füh kpökpö, akolo tuu!

⁴⁸ Fü Yesu arü amala ngü fü wü kpara te ewü zoro engu ne, gü ba dene, "Dene neh ene ngü ne? Ah mere neh baye te yi koro de wü mere maguruma, de wü ngbondo esaka yi ne. Ma de siti kpara? ⁴⁹ Gbü wü sîkpi ne 'buru, ma ngbü engbü de wü yi, etambasü *Mere Kambü ka Me, da eri wü kpara kpala. Yi wu bala de? Yi le ta

* 14:26 14:26 Ci ka Me te ewü bi la, ah de ci te wü di enga Yisarayeke ngbü ebi te nga re 'buru, teka karama ka Pasika la. † 14:27 14:27 Mü ena amaka ngü la gbü Zakariya 13:7.

azoro ra kpala de, neh teka ne? Ah mbi. Yi zoro ra ezoro, angü wüh ba ta ngü la eyi gbü *Ngari Me teka ra bala." ⁵⁰ Fū wü *kpara ka Yesu aci 'buru, akpe, ace engu.

⁵¹ Gara jaji komoko ta ladü kpala, te bu mba bu bongo ka rara te-ye, angbü efa nga wü Yesu, te wüh zoro engu. Fū ewü adu afü te-wü azoro kpah jaji komoko la. ⁵² Fū jaji komoko la ayia akpe, ace bongo ka-ye ciki esaka ewü, anü sü ngirimu.

Dene ngü ka Yesu engagira mere kpara füh kpökpö

Matayo 26:57-68; Luka 22:54-55, 63-71

⁵³ Fū wü kpara, te ewü zoro Yesu ne, aza engu anü di kpa engagira mere kpara füh kpökpö ka wü di enga *Yisaraye. Angü wü mere *kovo ka wü Yisarayele biti te-wü kpala, teka akolo ngü ka Yesu.

⁵⁴ Amba Petero, mü ngbü nda-mü da efa nga wü Yesu, mba kpa sidi gbü zi, zalü koro di etambasü ka mere kpara füh kpökpö. Fū mü anü arī angbü kötö, eya te-mü te wa, esüka wü komoko ka mere kpara füh kpökpö la.

⁵⁵ Fū wü mere kovo la abiti te-wü, akpo da egiri mene wü kpara, de te ewü ena amala ngü eküte Yesu de wu, gü ba, "Engu mere siti ngü eyi fanü," teka de ani mörö engu tete na. Wüh giri ngü la ma, wüh maka nda-wü de! ⁵⁶ Angü mere bi wü kpara, te ewü koro mala siti ngü eküte Yesu ne, ngü ka-ewü ka-ye 'buru kpikpi ye kpikpi ye, angü ah ka-ye 'buru de wu. ⁵⁷ Fū wü gara kpara ayia arü amala ngü eküte Yesu de wu, gü ba dene, ⁵⁸ "Ani je gara siti ngü ta te Yesu mala, gü ba, 'Ni ena amürü *Mere Kambü ka Me, te wü kundu ani ji ne, 'buru asidi, fū ni adu aji alügü gbü sikpi ngbee bata. Amba, ah ena adi tñe de mene kambü, te wü kpara ji de kpa wü ne de.' " ⁵⁹ Amba ngü nda-ewü, te ewü mala la, ah koro biringbö kpah de. Ah ka-ye fi bü kpikpi ye kpikpi ye.

⁶⁰ Fū mere kpara füh kpökpö ayia arü tikpi. Fū ah amala ngü fū Yesu, gü ba dene, "De-ye deyī, ye lügü ngü fū ani de, neh teka ne? Ye je ngü de te wü kpara ngbü emala eküte ye ne de?" ⁶¹ Fū Yesu anga ka-ye tñi, ah lügü ngü nda de. Fū mere kpara la adu ayi-ta Yesu kpepeke, gü ba dene, "Yesu, mü de neh da? Mü mala la zu ngü fū a! Mü ngbü de Ye Me, te engu tima füh kötö ne teka aküwa a ne?" ⁶² Yesu gü ba, "Wayi, ah ngbü bala. Te gara yi ena awu ra, *Ye Kpara ka Kpi, te ma ena angbü gbü kokpa ka Me, baka Mere Miri! Fū ra adu kpah akoro sene de mere wazi ka Me, baka agö te biti te-ye teka ali!"

⁶³⁻⁶⁴ Te mere kpara füh kpökpö je ngü te Yesu mala la, fū ah ayia asörö bongo eküte ne 'duwa traaa! Fū engu amala ngü, gü ba, "Apa! Komoko ne le afü te-ye ba Me? Yi wu eyi? Ngü nza eyi dela! Nih edu kpah agiri kpara, te ena amala nga siti ngü kaka, neh teka ne? Ah mala siti ngü ka-ye tñe cu eyi de komö ye dela! Yi ngbü efi nda-yi neh baye?" Fū ewü aci 'buru amala ngü, gü ba dene, "Ah de siti kpara! Wüh mörö engu amörö!"

⁶⁵ Fū ewü akpo da ememere engu. Gara ewü esü ngüsü gbügbüra na. Wü gara i jijia na, da emiki engu, gü ba dene, "Te ye gü ba, 'Ni de *mürü dofo ka Me,' la, de ye mere la ngü ka talara. Ye gü la iri kpara de te mi ye ne." Fū wü marajümüya ka mere kpara la aza engu, anü di, da ebebe.

Dene ngü te Petero cere nga ye di

Matayo 26:69-75; Luka 22:55-62; Yüwane 18:15-18, 25-27

⁶⁶⁻⁶⁷ Petero, mü ngbü ka-mü fi bü etambasü ka mere kpara la, da eya te-mü te wa. Fū gara jaji würiuse, kpara ka tima ka mere kpara la, ayia akoro aceka jia Petero, ayitata, gü ba dene, "Ye de neh da? Ye kpah de süka wü kpara, te ewü ngbü endoro gbü nga Yesu[‡] ne de?" ⁶⁸ Fū cürü ayia arü te Petero. Fū ah acere nga ye, ghere, gü ba dene, "Ngü te mü mala la, ma je ndara mbi mbi de. Mü gü neh fe?" Fū Petero ayia ace da wa la, anü arü kpa emöngiti ka 'baranga la. 'Duwa fū moko-ngü ayia amü gina koko.

⁶⁹ Fū würiuse la adu kpah amaka Petero. Fū ah arü amala ngü fū wü bu ye, gü ba dene, "Wü ceka la! Komoko la, ah ka-ye de kpara ka Yesu!" ⁷⁰ Fū Petero adu acere nga ye kpah ghere, gü ba, "A'a! Ni wu komoko ka-ye la nda-ni de."

Fütanga ngü la mba cükü'daye, fū wü kpara la adu amala ngü fū Petero, gü ba dene, "Fanü fanü, ye de kpara ka Yesu, angü ye kpah de kpara ka *Galilaya, bakaka." ⁷¹ Fū Petero ayia akina te-ye, gü ba, "Ma wu komoko la nda-ra de."

⁷² Petero bü te emala ngü la de, fū moko-ngü ayia amü e'ba'basu koko. Fū Petero adu afi nga ngü, ta te Yesu mala fū ye, gü ba, "Ye ena acere nga ye du bata, o moko-ngü mi e'ba'basu koko la de ne." Fū ngü la ato mere cinga fū Petero. Fū ah ayia akpo da eku gba de mere ngura 'duwa ba-neh-ene-la.

15

Dene ngü ka Yesu engagira Miri Pülatü
Matayo 27:1-2, 11-26; Luka 23:1-5, 13-25; Yüwane 18:28-19:16

[‡] 14:66-67 14:66-67 Jaji würiuse la gü ba, "Yesu de kpara ka Nazareta."

¹ Gügü kpurutokokpi la, fü wü mere *kovo ka wü *Yisarayeale adu afi nga ngü, te ani ena amere teka Yesu. Fü ewü amaka ngü la, adu aza Yesu, ai engu, anü di kpa engagira mere kpara de iri ye *Pilatü, de te Miri ka wü *Rüma o engu me-ye gbü nzö wü kpara ka *Yudaya ne. ² Te wüh koro de Yesu engagira Miri Pilatü, fü miri arü amala ngü fü Yesu, gü ba dene, "De-mü, wüh gü ba, mü de Miri ka wü Yisarayeale ne. Ngü la fanü?" Yesu gü ba, "Ah bü de te mü mala la."

³ Fü wü mere kovo ka wü Yisarayeale akpo da emala bi wü ngü eküte Yesu de wu. Amba Yesu lügü ngü fü ewü nda de. ⁴ Fü Miri Pilatü adu amala ngü fü Yesu, gü ba dene, "Gara ngü gömö ye, te ye ena amala fütanga wü ngü ne nda ma? Ye je bi wü ngü, te ewü emala eküte ye ne, de?" ⁵ Yesu lügü ngü fefe na nda-ye kpah de. Fü ngü la aga gbü jia Miri Pilatü 'duwa ba-neh-ene-la.

⁶ Ta gbü wü re la, gbü mere sikipi ka *Pasika 'buru, Miri Pilatü ngbü ta ece kpa te gara kpara ka ku biringbö, ba e te wü di enga Yisarayeale ngbü ele. ⁷⁻¹¹ Te di bala, fü wü gara kpara ayia akoro kpaka Miri Pilatü, ayi-tata, gü ba dene, "Mere kpara, ah ena ati ati fü ye ace kpa te kpara ka ku biringbö fü ani, kpah baka e te ye ngbü emere gbü wü sikipi ka Pasika 'buru ne?" Baka te Miri Pilatü, wu eyi, gü ba, maguma wü kovo la siti eyi eküte Yesu, fü ewü aza engu akoro di kpaka ni, teka de ni mörö engu asidi ne, fü engu ayia agiri kaje, de ni küwa Yesu tete na. Fü ah ayia amala ngü fü wü kpara la, gü ba dene, "Wü le de ni ce neh kpa te da? Te ni ce kpa te Yesu, miri ka-wü ne, ah esiti?" Te wü kpara la je ngü te Miri Pilatü mala de bala ne, fü ewü aci 'buru, amala ngü fü Miri Pilatü, gü ba, "Ani ele de ye ce kpa te Baraba engu fü ani!" Wüh mala bala kükürü de, angü wü kovo to ta ngü eyi guvu ewü gügü, gü ba, "Te Pilatü gü ba, ni le ace kpa te Yesu la, de wü ce ka-wü kpo. Wü mala fefe, gü ba, 'Ani le ka-ani Baraba engu.' " Baraba ta süka wü kpara te wüh gü gbü ku, teka te wüh ngbü emömörö wü kpara teka tö ka-wü. ¹² Miri Pilatü gü ba, "Anga Yesu, de te wüh ngbü ei engu, gü ba, ah de Miri ka wü *Yisarayeale ne, ni ena amere de engu neh ene?" ¹³ Fü ewü aci 'buru, aba rere kpa tikpi, gü ba dene, "Wüh mörö engu amörö! Wüh bere engu eküte *rü ghegbete!" ¹⁴ Miri Pilatü gü ba, "Tekä neh? Engu kpo neh ene liya ne? Ah mere ne *siti ngü ne?" Fü ewü adu akpo da eba rere, afa engu de tine ne ka, gü ba,

"Wüh mörö engu amörö! Wüh bere engu eküte rü ghegbete!"

¹⁵ Fü cürü arü te Miri Pilatü, teka mere bi wü kpara la. Fü ah adu ale ngü ka-ewü. Fü ah ayia ace kpa te Baraba fü ewü, ba e te ewü le. Fü ah adu ai wü marajümiya ka-ye de wüh süma Yesu. Fü ewü asüma Yesu de siti juru konü de biki gbü ye. Fütanga ngü la, fü Miri Pilatü adu aza Yesu, ato fü wü marajümiya ka-ye, de wüh nü, wüh bere engu eküte rü ghegbete.

Dene ngü ka wü marajümiya, te ewü ngbü efala Yesu

Matayo 27:27-31; Yüwane 19:2-3

¹⁶ Fütanga ngü la, fü wü marajümiya ayia aza Yesu, anü di agbü 'baranga, gbü sü ka Miri Pilatü, te wüh ngbü ei, gü ba, Peretoriyama ne. Fü ewü adu ai wü bu wü 'buru, abiti ede Yesu. ¹⁷ Fü ewü akpo da emü Yesu, gü ba, "Baka te engu di de mere miri ne, ah le de ani cu ngüngü na." Fü ewü ayia agbi bongo ka Yesu asidi, adu aza diri ngoro bongo ka-wü, nzenze baka nda miri la, ato eküküte na. Fü ewü agara bibi gbü ti, ato gbü nzö Yesu, baka *madudu ka wü miri. ¹⁸ Fü ewü angbü egü mandí fefe, da ede kpa wü, gü ba dene, "Wayi! Mandí fü ye, mere miri ka wü Yisarayeale!" ¹⁹ Fü ewü aza e baka gbaraka la, akpo da emü nzönzö na di, da esü ngüsü gbügbüra na, kpah da ebu nzökuta wü kötö, ba wü kpara te ewü ngbü ecu ngü miri la. ²⁰ Te wüh fala Yesu nza tete, fü ewü agbi nze bongo tete na la asidi, adu ato bongo kaka-na, alügü tete. Fü ewü aza engu, anü di teka abere füh *rü ghegbete.

Dene ngü ka Yesu, te wüh bere füh rü ghegbete

Matayo 27:32-44; Luka 23:26-43; Yüwane 19:17-27

²¹ Te wü marajümiya za Yesu tete, teka anü amörö ne, fü ewü anü amaka te-wü de wü gara komoko de iri ye Simüna,* kpara ka Kurene, te ngbü enü ka-ye te kaje, agbü Yerüsalema. Fü ewü azoro Simüna, ato esa *rü ghegbete, te ewü ena abere Yesu tete na ne, angü Yesu ngbü ta enü, da eti, da eti, teka tiri rü la.

²² Fü Simüna abi mere rü la, anü di fütanga Yesu, zalü akoro di gbü sü de iri ye Gologota, sü te wüh ena amörö Yesu tete na ne. Gologota la, ah baka e te wüh gü ba, "Sü ka biki-nzö," angü ah de sü te wüh ngbü emörö siti wü kpara tete. ²³ Fü gara kpara awu cinga Yesu, aza ngu *winü, te di de rü gbü ye,† ato fü Yesu. Amba Yesu le nda de. ²⁴⁻²⁵ Fü wü marajümiya

* **15:21** 15:21 Simüna de wö ye Alekezanda ake Rufusu. gbü jia kpara.

† **15:23** 15:23 Iri rü la de mire. Ah de rü te ena ato ra

aza Yesu, agbi bongo kaka-na asidi, aza engu, agbere eküte rü gbegete, abere engu gö gö gö! adu ae rü gbegete la tikpi. Ngü la mere te-ye gbü lö-ra menewa ka kpurutokokpi. Fü ewü aza bongo ka Yesu la, asó de gümare, aye süsüka na esüka wü. ²⁶ FÜ ewü aba nga siti ngü kaka, ao eküte rü gbegete la, to tikpi, gü ba dene, "Dene Mere Miri ka wü Yisaraye." ²⁷ FÜ ewü ayia aza wü mürü zi 'basu, abere ewü eküte wü rü gbegete ka-ewü ede nda Yesu, gara gbü kokpa, gara gbü kamisü. ²⁸ (Ngü[‡] la ti kpini de ngü ta te wüh ba gbü Ngari Me, gü ba, "Wüh ena akolo ngü ka züka kpara ka-ni, Me, dünda de wü siti kpara.")

²⁹ FÜ wü gara kpara, te ewü ngbü enü te kaje la, awu Yesu. FÜ ewü akpo da esoko engu, da egü nzó wü de tadu, gü ba dene, "Ata! Ye gü ta, ga, 'Ni de mere mürü wazi. Ni ti eyi amürü *Mere Kambü ka Me, adu afa gara gbü sikipi ngbee bata!' ³⁰ Te ye de mere wazi bala, de ye kö la ekó kótó, ye küwa te-ye." ³¹ Wü mere *kovo ka wü Yisarayele ngbü kphah da emü Yesu bala, da emala ngü esüka wü, gü ba dene, "Komoko la ngbü ta eküwa wü gara kpara. Ah mere neh baye, te engu ti aküwa te-ye de ne? ³² Te engu ena adi ta de Mere Miri te Me tima fü ani fanü la, ah le ta de engu küwa te-ye, de ah kö kótó, teka fü ani awu mere wazi kaka, adu ale ngü kaka." Wü mürü zi, te ewü bere ewü de wü Yesu ne, wüh ngbü kphah da esoko engu bala.

Dene ngü ka kpi ka Yesu

Matayo 27:45-56; Luka 23:44-49; Yüwane 19:28-30

³³ Fütanga ngü la, ah te enü akoro etü ra, fü sü ayia atí 'duwa mbirri, baka biti la. FÜ e la ayiri bala, zalü akoro gbü lö-ra bata ka tamurago. ³⁴ Gbü lö-ra engu la, fü Yesu ayia aku gba de mere ri ye kpa tikpi, gü ba dene, "Eloyi, Eloyi, lama sabakataní?" Ah baka e te wüh gü ba dene, "Me, Mere Miri ka-ra, mü ce ra kpi kpi ra, neh teka ne?" ³⁵ Wü gara kpara te ewü di kpala, wüh je ngü te Yesu mala la mbi mbi nda-wü de, fü gara ewü afi, gü ba dene, "Ah ngbü dela neh ei *llyia, de ah koro, ah küwa ni?" ³⁶ FÜ gara komoko ayia akpe de woro, aza e baka lifa fö'dó fö'dó bala, agü gbü fi, ato te nzó e baka gala la, aza ato te komó Yesu, de ah 'bü, gü ba dene, "E-wu neh da, anga llyia ena akoro aküwa engu?"

³⁷ FÜ Yesu ayia aku gba kpa tikpi, ayia ace maguma ye, akpi.

³⁸ Gbü lö-ra te Yesu kpi tete na, fü mere bongo ta te wüh i, kolo tü *Mere Kambü ka Me agbü Yerüsalema di, baka ngisi ne, fü ah ayia asörö te-ye de tete-ye, mbaaa kü kpa tikpi ngbüüü kótó. FÜ ngü la aga gbü jia wü kpara ba sirimbi.

Dela ta ngü te Yesu kpi tete na.

³⁹ Gara mere kpara ka wü marajümiya ngbü ta eceka Yesu kpala. Te engu je gba ka Yesu bala, fü ah awu kaje te Yesu kpi tete na, fü ah agü ba, "Komoko ne, ah kaje de Ye Me fanü fanü."

⁴⁰⁻⁴¹ Bi wü würüse ta te ewü ngbü efa nga Yesu ne, kphah ladü gbü sü te Yesu kpi tete na la. Wüh de wü *Mariya Egba-Magadala, bete Salüme, bete *Mariya ni ye wü Yakobo* ake Yüsa, kphah de mere bi wü bu wü, te ewü nü koro agbü Yerüsalema de wü Yesu. Angü, te wü Yesu di ta da endoro agbü *Galilaya, wü würüse la ngbü ta efa nganga na, da ele ta-ngü tete. Gbü lö-ra te Yesu kpi tete na, wü würüse la ngbü nda-wü mba canza edere sü kpala, da eceka kpi. FÜ ewü awu ngü ka kpi kaka 'buru.

Dene ngü teka kö Yesu

Matayo 27:57-61; Luka 23:50-55; Yüwane 19:38-42

⁴²⁻⁴³ Gara komoko ta ladü de iri ye *Yüsefa kpara ka Arimatayo,[†] te di de mere kpara esüka wü mere *kovo ka wü Yisarayele. Ah kphah de kpara te ngbü eo jia ye teka Miri, te Me ena atima teka aküwa wü kpara ne. Sikipi de ta te Yesu kpi tete na ne, ah ka-ye ta sikipi te wü kpara ngbü ereke te-wü tete, teka *sikipi ka Me ka wü Yisarayele. Te di bala, etamurago la, fü Yüsefa ayia, ai maguma ye gö, anü kpaka Miri *Pilatü, anda'ba te-ye fefe na, gü ba dene, "Mere kpara, ni le ayi-ta ye de gara ngü biringbö. Te ah ti eyi gbü jia ye la, ni ele de ye to kö Yesu fü ni, ni ti."

⁴⁴ FÜ Miri Pilatü adu afi nga ngü la, gü ba dene, "Yesu mere ngü ye, adu akpi kece neh fe?" FÜ Miri Pilatü ayia ai mere kpara ka wü marajümiya ka-ye, ayi-tata, gü ba dene, "Yesu kpi eyi fanü?" ⁴⁵ Komoko la ga, "Wayi, ah kpi eyi fanü." Te Miri Pilatü je ngü la bala, fü ah ayia ale ngü ka Yüsefa, ato kö Yesu fefe.

⁴⁶ FÜ Yüsefa ayia anü ase züka bu bongo, akoro di. FÜ ah adu aza kö Yesu eküte *rü gbegete asidi, adu agaga de bu bongo la. FÜ ah anü de kö Yesu, ati agbü gara gö da, te wüh ji sere sere bane, angü gele ka

[‡] 15:28 15:28 Gbü wü gara buku veresi 28 nda ma, amba gbü wü gara ah ladü. § 15:28 15:28 Mü ena amaka ngü la gbü buku ka Yisaya 53:12. * 15:40-41 15:40-41 Mene Yakobo dene, ah de mere Yakobo, kpara ka Yesu ne, nda de. Yakobo la ka-ye la ka'dörö. † 15:42-43 15:42-43 Arimatayo de sü ka wü Yüsefa, te wüh bi engu tete.

wü *Yisarayeale ta bala. Fū ah awara mere ngbürükü da, ao emö nga mbükü la, ani di.

⁴⁷ Dela ta ngü te ewü ti kö Yesu tete na. *Mariya Egba-Magadala ake *Mariya ni ye Yüsa, wüh ngbü nda-wü fi bü da eceka ngü la. Fū ewü awu sü te wüh ti Yesu tete na ne.

16

Dene ngü te mere te-ye kpa füh mbükü Yesu

Matayo 28:1-8; Luka 24:1-8; Yüwane 20:1-12

¹ Kpurutokokpí la, wü kpara 'buru ngbü efe te-wü, angü ah de *síkpi ka Me. Eta-murago la, te ra ti tete na, *síkpi ka Me nza eyi. Te di bala, fū *Mariya Egba-Magadala ayia de wü Salüme, bete *Mariya ni ye Yakobo, ayia anü ase *züka se-mü, teka amoko eküte kö Yesu.

² Gügü kpurutokokpí, fū ewü ayia anü kpa füh mbükü. ³ Te wüh ngbü enü tete na, fū ewü angbü emala ngü esüka wü, gü ba dene, "Anga mere siti da, te wüh ni mö mbükü la di ne, ani ena amere di, neh baye? Kpara te ena anzi da la asidi neh da, teka fū ani ari kpala?" ⁴ Fū ewü anü akoro kpa füh mbükü la, aceka kpí, yírrrri! Da, ta te wüh o emö mbükü ne, wüh nzi eyi asidi!

⁵ Fū ewü ayia ari agbü gö da, te wüh ti Yesu gbügbü na ne. Gbo! te gara jaji komoko de züka bu bongu te ye, te ngbü gbü mbükü kpala gbü kokpa. Fū cürü ari te ewü 'duwa ba-neh-ene-la. ⁶ Fū jaji komoko la ayia amala ngü fū ewü, gü ba dene, "Yi kpe cürü de. Ma wu eyi, gü ba, yi ngbü egiri Yesu, kpara te wüh bere engu te *rü gbegete ne. Ah zükü eyi. Yi ceka la sanga, ta te wüh o kökö gbügbü na ne. Engu sene ma! ⁷ Yi du edu, yi mala ngü la fū wü Petero de wü bu ye, gü ba dene, 'Yesu zükü eyi! Ah nü sü eyi kpa engagira nü agbü *Galilaya. Wüh nü enü, fū ewü amaka engu kpala, kpa ba ngü ta te engu mala fū ewü ne.' "

⁸ Te wü würise la je ngü la bala, fū ewü ayia akoro kpa etanü, ale woro de mere cürü emagama wü. Wüh mala ngü la fū wü gara kpara nda-wü de, ka cürü.

Köcökpa engu ta te Marako ba de kpa ye ne, ah düriü ka-ye eyi gügü. Amba wü gara wü köcökpa ladü fa sü, ta te wü diri wü kpara ta gügü ba esaka Marako. Wü köcökpa la gegege ba nda Marako de düriü ne. Gbü gara wü köcökpa la baka Marako 16:9-20 ngbürü ladü. Gbü gara wü köcökpa baka Marako 16:9-20 nda ma. Anga Marako ba ngü la me-ye fanü? Anga gara kpara? Nih wu de. Amba wü ngü la

ti kpini de wü ngü te wü Matayo ake Luka ba ne.

Dene ngü ka züzükü ka Yesu agbü kpi Matayo 28:9-10, 16-20; Luka 24:9-53; Yüwane 20:11-23; Mürü Tima 1:6-11

⁹ Gbü síkpi ka biri ka wü *Yisarayeale, te di de *síkpi ka Me ka-nih ne, gügü emözekpí, amba Yesu zükü ka-ye gbü kpi eyi. Gina kpara te Yesu gü tamu ye fefe, ah de *Mariya Egba-Magadala, ta te engu liki *siti wü di engu me guguvu na lorozi ne. ¹⁰ Fū Mariya ayia anü amaka wü bu ye, wü *kpara ka Yesu, te ewü ngbü da eku gba Yesu. ¹¹ Fū Mariya amala ngü fū ewü, gü ba dene, "Yesu zükü eyi! Ni wu engu eyi cu de jia ni." Amba wüh le ngü la nda-wü de, gü ba, "Ah ka-ye de wu!"

¹² Fütanga ngü la, fū wü gara *kpara ka Yesu 'basu ayia ace Yerüsalema, adu agba wü. Fū Yesu akoro amaka ewü te kaje. Amba wüh wu, gü ba, ah de Yesu ne, nda-wü de, angü küküte fū te-ye ka-ye eyi kpikpi ye. Fū Yesu ayia agü tamu ye fū ewü. Fū ewü adu awu engu. ¹³ Fū ewü ayia alügü nga wü, adu anü amala nga ngü la fū wü bu wü. Amba wü bu ewü le ngü ka-ewü la kpa de.

¹⁴ Fütanga ngü la, fū wü kpara ka Yesu nzükpa de füh ye biringbö ne, angbü ezü e ka-wü kpa esambü. Fū Yesu akoro agü tamu ye fū ewü. Fū ah arü amala ngü fū ewü, gü ba dene, "De-wü deyi, ah mere baye te nzö wü ngbü kpekepe bala? Wü bu wü mala nga ni fū wü, gü ba, 'Ni zükü eyi ne,' wü le ngü la de, neh teka ne?"

¹⁵ Fū Yesu adu arü amala gara ngü fū ewü, gü ba dene, "Yi nü, yi baya te nga sü füh kotö ne 'buru, de yi mala ngari ra fū wü kpara 'buru nde. ¹⁶ Mene kpara te to maguma ye fere, de yi to *babatiza fefe na, fū Me aküwa engu. Mene kpara te le ngü ka-ra la de, ah küwa kpa de. ¹⁷ Wü kpara te ewü ena ato maguma wü fere, Me ena ato wazi fū ewü me-ye, teka fū ewü amere wü angbe cögbörö tiri ngü di, teka fū wü kpara awu, gü ba, ngari ra ka-ye de zü ngü fanü fanü. Angü yi ena angbü da eliki *siti wü di engu me guvu wü kpara asidi. Yi ena angbü da emala bü ganzí mó ka wü gara kpara. ¹⁸ Yi ena azoro wü siti kpürü de kpa yi, kpürü de yi nda de. Te yi nzö siti rü la, ah mere yi esiti kpa de. Fū yi adi eo kpa yi gbü nzö wü mürü keke, fū keke ka-ewü adi egu."

Dela ta ngü te Miri Yesu mala fū wü kpara ka-ye, te engu zükü tete gbü kpi.

¹⁹ Fütanga ngü la, fū Me ayia aza Yesu, ago di agbü sü ka-ye, agbü kpí. Fū Yesu angbü kpala gbü kokpa ka Me. ²⁰ Te wü *kpara ka Yesu je ngü te engu mala fū ewü la, fū ewü ayia abaya te nga wü sü

'buru, angbü da emala ngü ka Yesu fū wū kpara 'buru nde. Fū Miri Yesu angbü da eto wazi fū ewü teka tima ka-ye la. Fū ah angbü kpah eto wazi fū ewü, de wüh ngbü emere wū mere tiri ngü ka talara di, teka fū wū kpara awu, gü ba, "Ngü ka Yesu, te ewü ngbü emala la, ah ka-ye de zu ngü fanü fanü."

Dela ngü teka Yesu *Kurisito, Ye Me. Adudu na bala.

Dene ngü ta te Luka ba teka Yesu Kurisito

Masere si-ngü

Kpara te ba buku ne, ah ena adi de gara mürü kuwa, ta te to maguma ye fü Yesu, de iri ye Luka ne. Engu ngbü ta endoro de wü Pawülü (Kolosayi 4:14). Luka engu ne, ah de engu *Yisarayeleye nda de. Ngü te engu ba ne ngbü esere fü nih, gü ba, "Yesu le kpah eyi aküwa wü *ganzi kpara, kpah baka te engu küwa wü di engu Yisarayeleye ne." Ah sere kpah, gü ba, "Yesu ngbü ewu cinga wü kpara, baka wü mürü keke, wü kpara te e di esaka ewü ma, wü kpara te *Satana i ewü eyi gbü ku ka-ye, bete mene wü kpara te wü bu wü ngbü ekpa ngü ewü akpa ne."

Luka ba kpah gara buku, teka wü ngü te mere te-ye, sidi nga gogo ka Yesu agbü kpi. Mü ena amaka wü ngü la gbü buku ka wü Mürü Tima ka Yesu. Luka ba wü buku de 'basu ne, tima fü gara awuba ye, de iri ye Teyofile. Wüh gü ba, Teyofile la ta de gara mere kpara ka wü *Rüma. Luka le de Teyofile wu, gü ba, ngü ka Yesu ka-ye de zu ngü fanü fanü.

Wü ngü te mü ena amaka gbü buku ka Luka, wüh dene.

Sapita 1:1-4 Masere ngü

Sapita 1:5-2:52 Ngü teka mabi Yüwane Mürü Babatiza ake Yesu, bete gaga ka-ewü

Sapita 3:1-20 Ngü ka Yüwane Mürü Babatiza

Sapita 3:21-4:13 Ngü teka babatiza ka Yesu,

bete ngü te Satana re maguma Yesu di

Sapita 4:14-9:50 Wü ngü te Yesu mere agbü Galilaya

Sapita 9:51-19:27 Wü ngü te Yesu mere o engu yia tete agbü Galilaya, da enü agbü Yerüsalema ne

Sapita 19:28-23:56 Adu ngü ka Yesu, bete ngü ka kpi kaka-na

Sapita 24:1-53 Züzükü ka Yesu gbü kpi, bete gogo kaka-na agbü kpi

Dene ngü te Luka ba teka Yesu Kurisito

¹⁻³ Wayi bala, mere kpara Teyofile, ma ngbü eba ngü ne fü mü teka ngü ka Yesu *Kurisito. Angü bi wü kpara kpo ta eyi, ere da eba ngü teka ngü ka Yesu, ta te engu ngbü emere esüka nih de sene ne. Wüh ba ngü la, gegege baka te ewü je gömó wü kpara, de te ewü wu ngü la ta cu de jia

wü ne. Kpah bala, ma ngbü ta egiri lö ngü la. Ma maka eyi mbi. Titine fü ra adu afi, gü ba, ah reke fa sü, te ma ena aba nga wü ngü, de te mere te-wü la, 'buru fü mü. ⁴ Ma mere bala, teka de mü wu mbi mbi mbi, gü ba, ngü ka Yesu, ta te ewü ngbü eri mü di ne, ah ka-ye de zu ngü fanü.

Dene ngü te malayika ka Me mala,

teka ngü ka yayaka ka Yüwane Mürü Babatiza

⁵ Gbü wü re ta te gina *Erode ngbü mere miri tete, gbü nga nzö sü ka *Yudaya, gara mürü gele ka Me ta ladu de iri ye Zakariya. * Iri wara ka ta de Elizabeta, te di kpah gbü nguwa *Arona. ⁶ Wü Zakariya ake wara ye, Elizabeta, ta 'basu mini de züka wü kpara gbü jia Me, te ewü ngbü emere wü riri ka Me 'buru de maguma wü biringbö. ⁷ Amba, wüh bi ye ta nda-wü de, angü Elizabeta ka-ye ta de wündü. Kpah bala, wüh gbe ka-wü ta eyi 'basu mini, re ka-ewü nye sü kpah eyi fa sü.

⁸ Gbü gara sikipi, wü Zakariya de wü bu ye ngbü ta emere tima ka-wü gbü *Mere Kambü ka Me agbü Yerüsalema. ⁹ Fü ewü amere gele ka mafe kpara, teka afe mene kpara, te ena ari agbü *nzila sü kpa esambü ka Me, teka adi ecuru *rü de züka se ye baka kici kpala. Fü iri Zakariya akoro me-ye. Fü Zakariya ari agbü nzila sü teka amere tima ka gele la engakara Me. ¹⁰ Gbü lö-ra te Zakariya ri tete kpala, fü mere bi wü kpara angbü nda-wü da eyi-ta Me kpa etanü.

¹¹ Fü *malayika ka Me ayia akoro kpaka Zakariya kpa esambü ka Me kpala, ari gbü kokpa ede *cangali, de te wüh ngbü ecuru züka se-rü fü Me tete na la. ¹² Te Zakariya wu malayika ka Me la, fü fingangü kaka ayia adürü ka cürü.

¹³ Fü malayika la amala ngü fü Zakariya, gü ba, "Zakariya, mü kpe cürü de, angü Me je gba ka-mü eyi. Wara mü, Elizabeta, ena abi ye komoko fü mü. Fü mü agü iri na *Yüwane. ¹⁴ Mü ena angbü de tadu teka ngü kaka. Kpah bala, mere bi wü kpara ena angbü de tadu teka ngü kaka-na. ¹⁵ Angü ah ena adi de mere kpeke kpara gbü tima ka Me. Te di bala, ah ti anzö fü nda de. Angü, gbü sikipi te wüh ena ayaka engu tete, Me ena ato wazi ka *Nzila Wazi ye fefe. ¹⁶ Ah ena alügü mere bi wü di engu *Yisarayeleye, ta te ewü dürü gbü ngü ka Me ne, 'buru te züka kaje ka Me. ¹⁷ Engu ena angbü endoro, da emere tima ka Me, gbü wazi ka Nzila Wazi Me, gegege baka nda *Iliya, *mürü dofo ka Me ta gügü ne. Ngü te engu ena ari wü kpara di ne, ena areke ngü

* 1:5 1:5 Zakariya ta gbü nguwa wü mürü gele ka Me gbü nguwa kundu ye Abiya.

esüka wü wö ye wü jaji, de wü di wü 'buru me-ye. Ah ena arı wü mürü kögö-nzö, de wüh fü maguma wü, adu angbü emere züka ngü gbü jia Me. Ah ena areke kpah maguma wü kpara, teka fü ewü angbü nzo, aci nga Mere Miri te Me ena atima." Dela ngü ta te malayika ka Me mala fü Zakariya.

¹⁸ Te Zakariya je ngü la bala, fü mam-aguma akolo. Fü ah ayia amala ngü fü malayika la, gü ba, "Ngü la, ma ena awu baye baye, gü ba, ah de zu ngü? Angü titine a gbe ka-a eyi 'basu mini fa sü."¹⁹ Fü malayika la alügü ngü fefe, gü ba, "Ma de malayika Gabürele. Ma ngbü erü engakara Me, teka angbü emere wü tima kaka-na. Engu tima ra me-ye teka amala ngü la fü mü.²⁰ Mü le aje ri ra de, neh teka ne? Te di bala, mü ti aro mö de. Mü ena angbü aböbö, zalü akoro gbü sikipi te wara mü ena ayaka tete." Fü malayika la ayia anü sü ka-ye.

²¹ Gbü lö-ra engu la, fü ngü la aga gbü jia mere bi wü kpara, te ewü ngbü nda-wü eci nga Zakariya kpa etanü ne, afa sü, angü Zakariya yiri agbü *nzila sü ka Me la eyi fa sü.²² Te Zakariya koro tete kpa etanü, ah ti aro mö nda tine de. Fü ah angbü emala ngü fü wü kpara la bü de kpa ye. Fü wü kpara la awu teke, gü ba, Me sere gara ngü eyi fü Zakariya agbü nzila sü ka-ye kpala.

²³ Te sikipi ka tima ka Zakariya nza tete, fü engu ayia ago kpa gba ye.²⁴⁻²⁵ Sidi nga sikipi mba cükü'daye, fü wara ka, Elizabeta amaka bu. Fü Elizabeta amala ngü, gü ba, "Wayi, ni gbo nga iri Me, teka züka ngü te engu mere fü ni ne! Angü ngü ta te wüh ngbü efala ni di ne, Me reke ngü engu na la eyi." Fü Elizabeta ayia awo ngü la teka fe 'buruve. Ah mala fü wü kpara 'buru 'buru de.

Dene ngü te malayika ka Me mala

teka ngü ka yayaka ka Yesu

²⁶⁻²⁷ Fütanga ngü la, fü Me ayia atima *malayika ka-ye, Gabürele, kpaka gara jaji wüürise de iri ye *Mariya, agbü gara köti de iri ye Nazareta, gbü nga nzö sü ka *Galilaya. Ngü la mere te-ye, o bu Elizabeta mere eyi fe ma'diya. Mariya ta de jaji wüürise, te wüh dara engu fü gara komoko de iri ye *Yüsefa, ta te di gbü nguwa Miri *Davidi.²⁸ Fü Malayika Gabürele ayia arı kpaka Mariya kpa esambü, amala ngü fefe, gü ba, "Mandı fü mü, Mariya. Mü ngbü de tadu, angü Me ladü tundu de mü. Ah o *züka maguma ye eyi te mü, fü ah ato mere wazi fü mü teka ngü la."²⁹ Te Mariya je ngü la bala, fü mamaguma agürü. Fü ah angbü da eyi-ta

tete-ye, gü ba, si-ngü gbü mandı la gü neh fe?

³⁰ Fü malayika la amala ngü fefe, gü ba, "Mariya, mü kpe cürü de, angü ngü ka-mü reke gbü jia Me fa sü.³¹ Mü ena amaka bu, fü mü abı ye komoko, agü iri na Yesu.³² Mbarase la, ah ena angbü mere kpara. Wüh ena angbü eı engu Ye Me. Mere Me ena ato wazi fefe, de ah ngbü mere miri füh kpökpö ka kundu ye, *Davidi.³³ Ah ena angbü mere miri gbü nzö nguwa *Yisaraye le 'buru, fi mere badi. Wazi miri kaka ti anza kpo fi de."

³⁴ Baka te Mariya je ngü la bala, fü ah amala ngü fü malayika la, gü ba, "Apa! Ngü la ena amere te-ye bala, neh baye baye? Baka te ni wu ngü ka komoko nda-ni la de ne."

³⁵ Fü malayika alügü ngü fefe, gü ba, "*Nzila Wazi Me ena ato wazi la fü mü me-ye. Angü mbarase de te mü ena abı ne, ah ena adi de Ye Me.³⁶ Mü ceka la, mürü mü, Elizabeta, maka bu kpah eyi, gbü gbe ye. Wü kpara ngbü ta efala engu, gü ba, 'Ah de wündü, ah ti abı ye de.' Titine engu eyi de bu, fe ma'diya dene.³⁷ Angü ngü te ena afa Me, nda kü ma."

³⁸ Te Mariya je ngü la bala, fü ah amala, gü ba, "Wayi, ma de labi ka Me. Ma eyi esa riri kaka. Ah le fü ngü la amere te-ye fere, baka te mü mala la." Fütanga ngü la, fü malayika la ayia ace engu, anü sü ka-ye.

Dene ngü te Mariya nü ceka Elizabeta tete

³⁹ Te *Mariya je nga Elizabeta, gü ba, engu eyi de bu ye ne, fü ah ayia bü kere, gbü wü sikipi la, anü aceka Elizabeta, agba wü Zakariya, te di eze wü da agbü *Yudaya.⁴⁰ Te engu koro agba Zakariya, fü ah amaka Elizabeta, agü mandı fefe.⁴¹⁻⁴² Te Elizabeta je ri Mariya, te gü mandı fü ye ne, fü engu awu 'duwa te mbarase kpo da emere wutu guvu ye. Fü Elizabeta amaka wazi ka *Nzila Wazi Me, amala ngü de ri ye kpa tikpi, gü ba, "Mariya, Me le ngü ka-mü eyi fanü, fa wü wüürise füh kotö ne 'buru. Kpah bala, engu ena ato wazi fü mbarase, de te mü ena abı ne.⁴³ De-mü, te mü di de ni ye Miri ka-ra ne, mü koro aceka ra tine bü cu me-mü bane? Apa! Ngü la neh baye?"⁴⁴ Mariya, mü ceka la, te ma je ri mü, de te mü to mandı fere ne, mbarase kpo 'duwa da emere wutu de tadu guvu ra.⁴⁵ Züka ngü di fü mü, de te mü to maguma mü eyi fü Me, teka ale ngü de te engu mala fü mü ne. Te di bala, wü ngü la ena amere te-wü 'buru tenga riri na, ba e te engu mala fü mü." Dela ngü te Elizabeta mala fü Mariya.

Dene ci ka tadu te Mariya bi

46 Teka ngü la, fü *Mariya angbü de tadu, ayia akpo ebì ci, gü ba, "Maguma ra ngbü eyi de mere tadu.

47 Ma egbo nga iri Mere Me, te küwa ra ne.

48 Angü engu fi nga ra eyi, te ma di de labi kaka-na ne.

Akpo enatikine, anü kpa engagira nü, wü kpara 'buru ena adi emala nga ra, gü ba,

'Ma de würose te Me to züka ngü eyi fefe.'

49 Me mere mere kpeke ngü eyi fere.

Ma egbo nga iri na, angü engu de wazi fa sü.

Ah ka-ye kpah *nzila.

50 Wü kpara 'buru, te ewü ngbü emere riri kaka,

engu ena aküwa ewü fi mere badi.

51 Ah ngbü emere wü mere kpeke ngü.

Ah baya wü müri kögö-nzö eyi, angü wawazi na fa sü.

52 Ah gügürü wü miri, de te ewü ngbü engbü gbü nzö wü kpara füh kotö ne, eyi 'buru kötö.

Fü ah aza wü kükürü kpara, adu ao da ewü.

53 Ah to mere bi wü e fü wü kpara, te ewü ngbü ekpi de tala ne.

Amba wü kpara, ta te ewü di de mere bi wü e esaka wü ne, ah liki ewü eyi de kpa wü kükürü.

54 Ah koro teka ale ta-ngü te wü kpara ka-ye,

wü di enga *Yisarayeale, de *züka maguma ye,

55 kpah baka ngü ta te engu mala fü *Abarayama,

gü ba, 'Ni ena amere wü ngü la bala te gara fefe na,

de wü di ye 'buru, fi mere badi,' ne."

Dela ci ta te Mariya bi, te engu koro tete kpaka Elizabeta.

56 Fü Mariya angbü kpaka Elizabeta kpala, teka wü fe bata. Fü ah ayia ago kpa kpa wü, agbü Nazareta.

Dene ngü ka yayaka ka Yüwane Müri Babatiza

57 Fütanga ngü la, fü sikipi ka Elizabeta ayia ati teka ayaka. Fü engu ayaka mbarase ka-ye la, jaji komoko. 58 Te wü bu ye Elizabeta, de wü müri ye na je ngü la, fü ewü angbü de tadu afa sü, gü ba, "Me to züka ngü eyi fefe."

59 Gbü sikipi 'bajena, fütanga yayaka la, fü ewü akoro, teka agü mbarase la esa *basa. Wüh le ta agü iri wö ye na, Zakariya, eküküte. 60 Fü Elizabeta ace kpo, gü ba, "A'a, iri na ena adi *Yüwane."

61 Fü ewü alügü ngü fefe, gü ba, "Apa! Iri

kpara baka e la ladü gbü nguwa yi fanü? Ah nda ma." 62 Fü ewü ayi-ta Zakariya bü de kpa wü, gbü ngü la, angü ah ti aro mö nda de. Wüh gü ba, "Ye ele de wüh gü iri mbarase ne, neh da?" 63 Fü Zakariya ayo köcökpa. Fü ah aba ngü fefeh, gü ba, "Iri na de Yüwane." Fü ngü la aga gbü jia wü kpara 'buru aga afa sü.

64 Kpah bü gbü lö-ra engu la, fü mi Zakariya ayia afuru te-ye. Fü ah akpo tine da ero mö mbölö mbölö. Fü ah akpo da egbo nga iri Me de mere ri ye kpa tikpi. 65 Teka ngü la, fü cürü ari te wü bu ye na la afa sü. Fü ngü la awü, abaya esüka wü kpara te nga nzö rüvü ka *Yudaya sela 'buru, tine 'duwa ba-neh-ene-la. 66 Mene wü kpara 'buru ta te ewü je nga ngü la, fü ewü angbü de mere fingangü, da eyi-ta ngü esüka wü, gü ba, "Apa! Ngü ka mbarase la, ah ena angbü te gara, neh baye?" Angü wüh ti eyi awu, gü ba, mbarase la, Me to wazi eyi me-ye fefe fanü fanü.

Dene ci te Zakariya gbo nga iri Me di

67 Fütanga ngü la, fü *Nzila Wazi Me ato wazi fü Zakariya. Fü engu akpo da emala ngü baka *müri dofo, da ebì ci, gü ba,

68 "Gbo nga e fü Mere Me, te di de Mere Miri agbü kpi, te ngbü gbü nzö wü kpara ka-ye, wü *Yisarayeale.

Nih gbo nga iri Mere Me, angü ah koro eyi teka aküwa nih, wü kpara ka-ye.

69 Me tima kpeke kpara eyi teka aküwa nih, engu de kundu ye Miri *Davidi.

70 Ah mala ta wü ngü la gügü gömö wü müri dofo ka-ye,

71 gü ba, 'Ni ena atima Mere Miri, te ena aküwa nih esaka wü vügü ka-nih.'

72 Wayi, Me sere *züka maguma ye eyi fü nih.

Ah fi nga ngü ta te engu mala fü kundu nih, *Abarayama ne, eyi,

73 gbü sikipi ta te ewü *nzö ngüte tete ake di, gü ba,

74 'Ni ena aküwa nih esaka wü vügü ka-nih,

teka fü nih amere tima ka-ni de wazi, cürü tine ma.

75 Teka de nih ngbü ba züka wü kpara ka-ni,

da emere wü züka ngü gbü jia ni, te nga wü sikipi 'buru,

o nih di la ladü de jia nih, füh kotö sene.'

76 Te di bala, de-mü, ye ra, wüh ena angbü ei mü, gü ba,

mü de müri dofo ka Mere Me. Angü mü ena anü kpa engagira nü,

da ereke kaje fü Mere Miri te Me ena atima.

⁷⁷ Kpah teka agü tamu ngü la fü wü kpara kaka, gü ba,

‘Ah ena akoro teka aküwa ewü, angü ah ena aboro *siti ngü ka-ewü.’

⁷⁸ Kükürü de, angü züka maguma ka Me fü nih fa sü.

Engu ena atima kpara te ena aküwa nih, te ena alofo sü fü nih füh kotö ne.

⁷⁹ Tekä ngü la, sü ena alofo gbü jia wü kpara 'buru, ta te ewü ngbü gbü mbiri sü ka kpi ne, alofo.

Nih ena angbü endoro tîne te züka kaje, de gu ngü emaguma nih teka ngü ka Me.”

Dela ci ka Zakariya ta te engu bi teka ngü ka ye, *Yüwane Müürü Babatiza ne.

⁸⁰ FÜ mbarase la aga, akoro mere komoko. FÜ engu amaka kpaah wazi, angbü kpeke kpara gbü jia Me. FÜ engu angbü kpa etü gü kpala, zalü koro di gbü sikipi, te engu koro gü tamu ye fü wü di engu Yisaraye te tete.

2

Dene ngü ka yayaka ka Yesu

¹ Gbü wü re engu la, fü mere Miri *Kayisara Agusito ato kpeke riri, gü ba, wü kpara 'buru nü ba iri wü gbü köcökpa, teka fü ni awu, gü ba, wüh neh fe? ² Ngü la mere te-ye, o Kuriniyo ngbü ta miri tete, gbü nga nzö köti ka Siriya. Ngü la, ah de gina ngü, te wüh ba iri wü kpara bala. ³ Tekä ngü la, fü wü kpara 'buru ayia anü aba iri wü, angbü sü te nguwa ewü di gbügbü na.

⁴ *Yüsefa, fü mü ayia angbü Nazareta,* teka anü aba iri mü agba yi, angbü Beteleme,[†] te di de köti ta te wüh bi Miri *Davidi gbügbü na, angü Yüsefa koro gbü nguwa Davidi. ⁵ FÜ ewü anü ake *Mariya, würüse ta te engu le aza ne, teka aba iri wü kpala ake di. Amba bu Mariya ndri ka-ye eyi. Ah ghamari teka ayaka. ⁶ FÜ sikipi ka yayaka ati fü Mariya, o wüh di ciki angbü Beteleme kpala. ⁷ FÜ Mariya ayaka gina engu ye, ye komoko. FÜ engu agaga mbarase la de bongo, aseke engu gbü külü e, te wü yiti ngbü ezü e gbügbü na, ciki esambü ka wü yiti la, angü wüh maka ta züka sü ka rara nda-wü de.

Dene ngü te malayika ka Me mala fü wü müürü kambiliki

⁸ Gara wü kpara ta ladü gbü sü la, te ewü ngbü endoro de wü kambiliki ka-wü gbü gü, da efete ewü. ⁹ Gbü bita la, fü Me atima gara *malayika ka-ye kpaka ewü. FÜ wazi

ka Me alofo sü ede ewü kpala 'buru raaa! FÜ cürü ayia ari te ewü afa sü.

¹⁰ FÜ malayika la amala ngü fü ewü, gü ba, “Yi mere e akpe cürü de, angü ma koro kpaka yi de züka tofo ngü, te ena areke wü kpara füh kotö ne 'buru. ¹¹ Angü enatikine gbü Beteleme,[‡] wüh yaka Miri, te Me tima teka aküwa yi ne, eyi. ¹² Dene ngü te yi ena awu engu tete. Yi ena amaka vürü jaji, te wüh gaga engu de bongo, seke gbü külü e, te wü yiti ngbü ezü wü e ka-wü gbügbü na ne.”

¹³ Fütanga ngü te malayika mala la, rurrru! fü mere bi wü malayika ka Me ayia angbü kpi, akoro arü, abiti te-wü ede kiri wü la. FÜ ewü akpo da ebü ci, da egbo nga iri Me, gü ba,

¹⁴ “Nih gbo nga iri Me.

Nih gbo nga Me angbü kpi.

Me to züka gu ngü eyi fü wü kpara ka-ye.

Wü kpara te engu le ngü ka-ewü,

wüh ena angbü de mere tadu füh kotö ne 'buru.”

¹⁵ Te wü malayika la nza ci ka-wü tete, fü ewü ayia ace wü müürü kambiliki la, ago ka-wü angbü kpi.

FÜ wü müürü kambiliki la amala ngü esüka wü ngberrre, gü ba, “Ani nü la enü angbü Beteleme, teka aceka mene ngü, de te Me sere fü ani ne, cu de jia ani.” ¹⁶ FÜ ewü ayia bü kere, anü akoro angbü Beteleme, amaka *Mariya ake *Yüsefa, bete vürü mbarase, te wüh seke engu gbü külü e, te wü yiti ngbü ezü e gbügbü na la, fanü.

¹⁷ Te wü müürü kambiliki koro wü ngü la bala, fü ewü amala nga ngü, de te malayika mala fü ewü, teka ngü ka mbarase la, 'buru fü wü kpara. ¹⁸ Baka te wü kpara je ngü de gömö wü müürü kambiliki la, fü ngü la aga gbü jia ewü 'buru afa sü. ¹⁹ FÜ Mariya akpo angbü da efi nga ngü la emaguma ye. ²⁰ FÜ wü müürü kambiliki la ale kaje ka-wü ago, da ecu ngü Me, kpaah da egbo nga iiri na, teka wü ngü 'buru te ewü nü ceka cu de jia wü, baka te ewü je gömö wü malayika ka Me ne.

Dene ngü te ewü gü iri Yesu tete na

²¹ Gbü sikipi 'bajena, fütanga yayaka la, fü wü *Yüsefa ake *Mariya aza mbarase, anü di, agü esa *basa, baka te di gbü gele ka wü *Yisaraye. FÜ ewü agü iiri na Yesu, iri ta te *malayika mala ngangu fü Mariya, o engu maka bu la de ne.

²²⁻²⁴ Fütanga ngü la, fü sikipi ayia ati fü Mariya, teka fü ewü areke ngü kaka sidi nga yayaka, baka te di gbü *Riri ka Müse. Te di bala, fü wü Yüsefa ake Mariya ayia anü de vürü mbarase, angbü *Mere Kambü

* 2:4 2:4 Nazareta de gara nzö köti ka Galilaya. † 2:4 2:4 Beteleme de gara nzö köti ka Yudaya. ‡ 2:11 2:11 Beteleme de köti ta te wüh bi Miri Davidi gbügbü. Wüh bi Miri Yesu kpaah sela.

ka Me agbù Yerùsalema, teka ato takpa fù Me, ba e te *Mùse ba gbù Rìrì ka Me, gù ba, "Wùh ena adi eto wù mò 'basu, teka areke ngù ka wùrùse, te bì ye, di." [§] Wùh le kpah ao Yesu engagira Mere Me, angù wùh ba ta kpah eyi, gbù Rìrì ka Me, gù ba, "Te wùrùse bì gina engu ye, te ah de komokola, ah le fù ewù aza engu, akoro di, ao engagira Mere Me."*

²⁵ Gara kpara ta ladù agbù Yerùsalema kpala, de ìrì ye Simìyona. Engu de zùka kpara, te le ngù ka Me de maguma ye biringbò. Ah ngbù ta kpah eo jia ye teka miri, te Me ena atima teka akùwa ani, wù di engu Yisarayeale ne. Angù *Nzila Wazi Me ngbù ta eto wazi fefe me-ye. ²⁶ Fù Nzila Wazi Me la amala ngù fefe, gù ba, ye ti akpi la de, zalù te ye ena awu Miri la cu de jia ye feke.

²⁷ Fù wù Mariya ake Yùsefa aza Yesu, anù akoro di kpa etambasù Kambù ka Me, teka ao engu engagira Mere Me, baka te di gbù rìrì ka gele ka-ewù. Gbù sikipi la, fù Nzila Wazi Me aza Simìyona, anù di kpah kpala, teka awu Yesu. ²⁸ Te Simìyona koro maka ewù kpala, fù ah abì Yesu esaka ye, akpo da egbo nga ìrì Me, gù ba, ²⁹⁻³¹ "Wayi Mere Me, enatikine ma wu Mere Miri E-kùwa-nih eyi cu de jia ra, kpah ba e ta te wù mala fere. Te di bala, ma ti e kara eyi akpi tìne, de gu maguma. Angù mbarase ne, mù tima engu teka akùwa wù kpara fùh kotò ne 'buru. ³² Engu ena adi de ra-sù te ena agù tamu zùka kaje kamù fù wù *ganzi kpara 'buru. Kpah bala, wù kpara ena agbo nga wù kpara ka-mù, wù di engu Yisarayeale, teka ngù kaka."

³³ Fù ngù de te Simìyona mala, teka Yesu ne, aga gbù jia wù Mariya ake Yùsefa afa sù. ³⁴ Fù Simìyona ayia ao kpa ye fùh wù Mariya, ayi-ta Me, de ah to wazi fù ewù. Fù ah amala ngù fù Mariya, ni ye Yesu, gù ba, "Mbarase ka-mù ne, Me fe engu teka are maguma wù kpara. Angù wù gara kpara ena ato maguma wù fefe, fù ewù akùwa. Amba mene ewù de te ewù le ngù kaka de ne, wùh kùwa kpah de. Angù engu de Rì Me te Me tima fù nih, amba mere bì wù kpara ti ale ngù la nda-wù de. ³⁵ Te di bala, siti fingangù ka-ewù, ta te wo te-ye awo ne, ena asere te-ye. Amba nda-mù Mariya, cinga ena akuru maguma mù, teka ngù ka mbarase ne, baka te wùh sò e de maguruma la."

³⁶⁻³⁷ Gara mere wùrùse wòkò ta kpah ladù kpala, de ìrì ye Ana, ye Fanùwele.† Engu ta de *mùrù dofo ka Me, te Nzila Wazi Me ngbù ta eto wazi fefe, de ah di

emala ngari Me. Wùh za ta te-wù ake watì ye, ra ngbee re lorozi. Fù watì ye na akpi ace engu. Fù wùrùse la ngbù kpikpi ye, fùtanga watì ye, zalù te re kaka koro tete teke bala de fùh ye bala (84). Ah ngbù ta endoro etambasù *Mere Kambù ka Me te nga wù sikipi 'buru, da egbo nga ìrì Me, ra de bitì, da eku gba fefe, kpah da *e'bi te-ye. ³⁸ Te wù Yùsefa ake Mariya koro de Yesu etambasù ka Mere Kambù ka Me la, fù Ana akoro kpaka ewù. Te engu wu Yesu, fù ah akpo 'duwa da egbo nga ìrì Me. Fù ah adu akpo da emala nga Yesu fù bì wù kpara, de te ewù ngbù eci nga miri, te Me ena atima, teka akùwa wù di engu Yisarayeale ne, gù ba, miri la koro eyi dene.

³⁹ Te wù Yùsefa ake Mariya nza wù ngù, te di gbù *Rìrì ka Me 'buru tete, fù ewù ayia ago agba wù, agbù Nazareta, te di gbù nga nzò sù ka *Galìlaya.

⁴⁰ Fù Yesu aga, akoro zùka kpeke mbarase. Fù engu awu wù ngù afa sù. Fù Me angbù ele ta-ngù tete, da eto wazi fefe.

Dene ngù ka Yesu de wù mùrù rìrì,

kpa etambasù Mere Kambù ka Me agbù Yerùsalema

⁴¹⁻⁴² Wù *Yùsefa ake *Mariya ngbù ta enù agbù Yerùsalema tenga wù re 'buru, teka azù *Karama ka Pasika, baka rìrì ka gele ka wù di engu *Yisarayeale. Te re ka Yesu koro tete nzùkpa de fùh ye 'basu, fù ewù anù agbù Yerùsalema, teka azù Karama ka Pasika de wù ni ye.

⁴³⁻⁴⁴ Te wù sikipi ka karama la nza tete, fù ni ye Yesu ake Yùsefa ayia ka-wù de wù bu wù, atì te kaje, angbù ego. Fù ewù anù gbù ra dela gbuuu, wùh fì nda-wù, gù ba, "Yesu dene ladù de wù bu ye sela, ego." Amba Yesu, mù ce te-mù ka-mù, ngbù eyi ciki agbù Yerùsalema kpala. Etamurago la, fù ewù akpo da egìri engu esùka wù bu ye, angù gbù sikipi engu la, wùh wu engu de. ⁴⁵ Wùh gírì engu ma, wùh maka de. Fù ewù ara te kaje. Fù kpì aseke. Fù ewù alùgù nga wù adu agbù Yerùsalema, teka agìri engu kpala.

⁴⁶ Te wùh du koro tete agbù Yerùsalema la, fù ewù ara aseke kpah kpì. Tìne gbù sikipi engu la, fù ewù adu amaka Yesu kpa etambasù *Mere Kambù ka Me, te ngbù esùka wù *mùrù rìrì, da eje ngù gòmò ewù, kpah da eyi-ta ewù de wù kpeke yitangù. ⁴⁷ Wù ngù de te engu ngbù elùgù fù wù mùrù rìrì la, ah ka-ye 'buru wù kpeke ngù. Fù ngù la aga gbù jia wù kpara la afa sù.

§ 2:22-24 2:22-24 "Wù mò ka gù 'basu, anga togo mò ka kòtì 'basu." Mù ena amaka ngù la gbù buku ka Rìrì ka Gele ka wù Levi 12:1-8. * 2:22-24 2:22-24 Mù ena amaka ngù la gbù buku ka Gogo ka wù Yisarayeale 13:2, 11-15.

† 2:36-37 2:36-37 Fanùwele, de kpara te di gbù nguwa Asera.

⁴⁸ Te wü ni ye Yesu maka engu kpa esüka wü kpara la tete, fü komö ewü ayia agu ka ngü la. Fü ni ye na, Mariya, amala ngü fefe na, gü ba, “Enga ni, ye mere ani ake wö ye bala, neh teka ne? Te ani ngbü egigiri ye de mere cinga emagama ani de bane ne!” ⁴⁹ Fü Yesu alügü ngü fü ewü, gü ba, “Yi ngbü egiri ra, neh teka ne? Yi wu de, gü ba, ah le fü ra angbü engbü esambü ka Wüba?” ⁵⁰ Amba ngü de te Yesu mala fü ewü de bala ne, wüh wu si-ngü gbügbü na nda-wü de.

⁵¹ Fütanga ngü la, fü Yesu ayia ago de wü ni ye, agbü Nazareta. Angü ah ngbü ta eje riri ka-ewü ereke areke. Fü ni ye na ao to ye fi te ngü te Yesu lügü fü ewü la.

⁵² Fü Yesu aga, akoro mere kpeke komoko, te wu ngü fa sü. Ngü kaka reke gbü jia Me fa sü, gbü jia wü kpara kphah bala.

3

*Dene ngü ka Yüwane Mürü Babatiza
Matayo 3:1-12; Marako 1:1-8; Yüwane
1:19-28*

¹⁻² Ta gbü re te mere miri *Kayisara Tiberiya ngbü füh kpökpö ka wü *Rüma teka re nzüka de füh ye 'buruve,* dela o wü Anasi ake Kayafa di ta de wü mere kpara füh kpökpö ka wü *mürü gele ka wü *Yisarayeale agbü Yerüsalema. Ta gbü wü re la, *Yüwane ye Zakariya ngbü ta engbü ka-ye kpa etü gü kpala. Fü Me ayia amala ngü fefe, de ah kpo de tima ka-ye. ³ Fü Yüwane ayia akpo da endoro gbü wü köti te ewü di agbü gü, ghamari ede mere ngu Yürüdene, da emala ngari Me, gü ba, “Wü ce *siti ngü ka-wü 'buru asidi, wü fü maguma wü, teka fü wü aza *babatiza, fü Me aboro siti ngü ka-wü 'buru.” ⁴ Ngü la ti kpini baka ngü te *mürü dofo Yisaya ba ta gügü gbü *Ngari Me, gü ba, “Gara kpara ena akoro, angbü emala ngü de mere ri ye kpa etü gü, gü ba, ‘Mere Miri, te ena aküwa ani ne, te ekoro! Ah le de wü reke kaje fefe mbi mbi mbi. ⁵ Wüh ena ani wü cudu 'buru ani. Wüh ena asoro mere rüvü asoro, fü ewü agbigbi wü ndugu ri, de wü da 'buru asidi. Wüh ena afü wü cingili kaje 'buru, ao mbi. Angü ah le de kaje la ngbü ngba ngba ngba teka Mere Miri la, ⁶ teka fü wü kpara 'buru awu, gü ba, Me tima kpara eyi teka aküwa ani.’” [†] Dela ngü ta te Yisaya ba teka ngü ka Yüwane.

⁷ Fü mere bi wü kpara aci akpo da ekoro kpaka Yüwane, teka de ah to babatiza fü

ani. Te Yüwane wu ngü la bala, fü engu amala fü ewü, gü ba, “De-yi, wü mürü mani! Yi baka wü kpürü, angü maguma yi esiti! Yi efi nda-yi, gü ba, ani ena aküwa gbü kuru, te Me ena ato fü wü siti kpara te gara ne, bü teka ngü, te yi ngbü emala bü de komö yi kükürü kükürü de bala? E-mala ngü la fü yi bala, neh da? ⁸ Te yi le aküwa fanü la, ah le de yi fü maguma yi, adi emere wü ngü te ena areke gbü jia Me. Yi efi nda-yi, gü ba, ‘Ani ena aküwa, angü ani de wü kundu ye *Abarayama,’ ne? A'a! Yi mere e afi nga ngü bala de! Te Me le la, ah ti eyi afü wü teme ne 'buru, akoro di wü di Abarayama tete, te ngü ka-ewü ena areke gbü jijia, afa nda-yi ka! ⁹ Yi ceka la, Me eyi nzo teka ato kuru fü yi, baka kpara te di de gif esaka ye, teka agiri mene rü te ri de, fü engu ade, agü agbü wa.”

¹⁰ Te mere bi wü kpara la je ngü gömö Yüwane bala, fü maguma ewü ayia akolo. Fü ewü akpo da eyi-tata, gü ba, “Ani ena amere tine dene neh baye?” ¹¹ Fü Yüwane alügü ngü fü ewü, gü ba, “Ah le de yi di ele ta-ngü te-yi esüka yi. Te mü de bongo esaka mü 'basu la, mü za gara, mü to fü kiri mü, de te ngbü ngirimu ne. Te mü de zü-e esaka mü, ah le fü mü aye süsüka, ato gara fü kiri mü te ngbü engbü tala.”

¹² Fü wü gara kpara, te ewü ngbü ero *jiase, eto fü miri, akoro kpaka Yüwane, de ah to babatiza fü ani. Fü ewü ayi-tata, gü ba, “Mere kpara, ani ena amere nda-ani baye?” ¹³ Fü Yüwane amala ngü fü ewü, gü ba, “Jiase te yi ngbü ero esaka wü kpara ne, yi mere e ao gara jiase fefeh de, ah ngbü ba e te wü miri mala fü yi.”

¹⁴ Wü marajümiya ta kphah ladü sela, fü ewü ayi-ta Yüwane, de nda-wü ngü, gü ba, “Amba de ani, nda-ani ngü ena adi neh baye?” Fü Yüwane alügü ngü kphah fü ewü, gü ba, “Yi mere e angbü egbürü jiase ka wü kpara de wazi de, angü dela zi. Yi mere e angbü ezoro wü kpara bü kükürü, da esutu wu eküte ewü kphah de. Jiase ka tima te wüh ngbü eto fü yi la, ah le fü yi adi eza de züka maguma yi.”

¹⁵ Tekä ngü la, fü mere bi wü kpara akpo da eyi-ta tete-wü, teka ngü ka Yüwane, gü ba, “Anga engu ena adi de *Kurisito, Miri te Me tima teka aküwa ani ne?” ¹⁶ Te Yüwane wu ngü la bala, fü engu amala ngü fü mere bi wü kpara la, gü ba, “Ma de Kurisito engu nda-ra de! Ma ngbü eto babatiza fü yi de ngu kükürü. Amba Mere Miri engu ladü, te ena akoro sidi nga ra. Wawazi na fa nda-ra ka. Ma nda-ra bü baka labi kaka, te ena areke kaje fefe. Ma

* **3:1-2** 3:1-2 Ta gbü wü re la, Pilatü nda-ye de miri te ngbü eceka kpí fütanga nzö wü sü ka Yudaya. Anitüpa Erode ta nda-ye miri ka Galilaya. Enga ni ye Erode de iri ye Filipo ngbü nda-ye miri agbü Ituraya bete Turakoniti. Lisaniya ngbü ta nda-ye miri agbü Abilene. † **3:6** 3:6 Mü ena amaka ngü la gbü buku ka Yisaya 40:3-5.

be teka tima la nda-ra de, angü engu mere de mere kpara fere. Te engu ena akoro la, ah ena ato babatiza fü yi de wazi ka *Nzila Wazi Me, te di baka wa, teka fü yi amere tima ka Me areke areke. ¹⁷ Ah ena akoro de körö esaka ye, teka afeke jia ndo ka-ye di. Te engu feke jia ndo ka-ye eyi la, ah ena aza jijia na, ao agbü kafa. Fü engu adu akö caca na la, acuru acuru gbü mere wa te ünü nda de.” ¹⁸ Dela ngari Me te Yüwane ngbü erī wü kpara di. Fü ah angbü kphah emala mere bi wü gara ngü gbü mani fü ewü bala.

¹⁹ Fü Yüwane angbü ta kphah erī Miri Anitüpa *Erode, teka bi wü siti ngü te engu ngbü emere, baka te ewü za te-wü ake Erodiya, te di de wara engu ni ye, de iri ye *Filipo ne. ²⁰ Teku ngü la, fü miri la adu amere kphah gara mere siti ngü, teka te engu zoro Yüwane, gü agbü ku ne.

*Dene ngü ka babatiza ka Yesu
Matayo 3:13-17; Marako 1:9-11*

²¹ Te engu gina, o Miri Anitüpa *Erode zoro *Yüwane, gü agbü ku la de, fü Yesu ayia akoro kpaka Yüwane, teka aza *babatiza, o mere bi wü kpara za nda-wü eyi 'buru. Fü Yüwane ayia ato babatiza fefe. Fütanga babatiza, fü Yesu akpo da eku gha fü Me. Fü kpi ayia aü te-ye. ²² Fü *Nzila Wazi Me akoro kpala baka mö, arü gbü nzö Yesu. Fü ri Me ayia awü kpa gbü kpi, gü ba, “Mü zu de Ye ra, te ma le fa sü, te ma o maguma ra eküküte.” Dela ngü ta te mere te-ye, te Yesu za babatiza tete esaka Yüwane.

Dene iri wü kundu ye Yesu

²³ Yesu kpo ta de tima, te Me tima engu de ah mere ne, o re kaka koro eyi teke biri de füh ye nzükpa. Wü kpara ngbü ta efi nda-wü, gü ba, engu de ye *Yüsefa, wati ye *Mariya, te di de ye Eli ne. ²⁴ Angü nguwa ewü kpo ta bane. Eli ta de ye Matata. Matata de ye Levi. Levi de ye Meleki. Meleki de ye Yanayī. Yanayī de ye Yüsefa. ²⁵ Yüsefa de ye Matatiya. Matatiya de ye Amüsa. Amüsa de ye Nawuma. Nawuma de ye Eseli. Eseli de ye Naga. ²⁶ Naga de ye Mata. Mata de ye Matatiya. Matatiya de ye Semeyini. Semeyini de ye Yüseka. Yüseka de ye Yoda. ²⁷ Yoda de ye Yüwane. Yüwane de ye Resa. Resa de ye Zerubabela. Zerubabela de ye Salatiyele. Salatiyele de ye Neri. ²⁸ Neri de ye Meleki. Meleki de ye Adī. Adī de ye Küsama. Küsama de ye Elemadama. Elemadama de ye Ere. ²⁹ Ere de ye Yesüwa. Yesüwa de ye Eliyezere. Eliyezere de ye Yürima. Yürima de ye Matata. Matata de ye Levi. ³⁰ Levi de ye

Simiyona. Simiyona de ye Yuda. Yuda de ye Yüsefa. Yüsefa de ye Yünama. Yünama de ye Eliyakima. ³¹ Eliyakima de ye Meleya. Meleya de ye Mena. Mena de ye Matata. Matata de ye Natana. Natana de ye *Davidi, ta te di miri ka wü di engu *Yisarayeleye ne. ³² Davidi ta de ye Yese. Yese de ye Obede. Obede de ye Büwaza. Büwaza de ye Salamona. Salamona de ye Nasona. ³³ Nasona de ye Aminadaba. Aminadaba de ye Adimina. Adimina de ye Rama. Rama de ye Ezerone. Ezerone de ye Perezere. Perezere de ye Yuda. ³⁴ Ah de ye *Yuda, te di de ye Yakobo ne. *Yakobo de ye Yisaka. *Yisaka de ye Abarayama. *Abarayama de ye Tera. Tera de ye Nayora. ³⁵ Nayora de ye Seruga. Seruga de ye Ruu. Ruu de ye Pelege. Pelege de ye *Ebere. Ebere de ye Sela. ³⁶ Sela de ye Kenana. Kenana de ye Arafakasada. Arafakasada de ye Seme. Seme de ye *Nüwa. Nüwa de ye Lemeke. ³⁷ Lemeke de ye Metusela. Metusela de ye Enoka. Enoka de ye Yerede. Yerede de ye Malalele. Malalele de ye Kenana. ³⁸ Kenana de ye Enosa. Enosa de ye Sete. Sete de ye *Adama. Adama nda-ye tüne de gina kpara ta te Me mere engu ne.

4

*Dene ngü te Satana re Yesu di
Matayo 4:1-11; Marako 1:12-13*

¹ Fütanga ngü te *Yüwane to *babatiza fü Yesu nza tete agbü Yürüdene, fü *Nzila Wazi Me ayia arī emaguma Yesu. Fü Nzila Wazi Me la ayia aza engu, anü di kpa etü gü. ² Fü tala ayia amere Yesu agbü gü kpala 'duwa ba-neh-ene-la, angü ah ra sikipi teke 'basu, ah zü e de. Fü *Satana angbü fi bü da ere mamaguma gbü wü sikipi la. ³ Fü Satana ayia amala ngü fefe, gü ba, “Te mü zu de Ye Me fanü fanü la, mü mala ngü fü teme dene, de ah fü te-ye, koro zü-e tete fü mü, fü mü azü.” ⁴ Yesu gü ba, “Mü fi, gü ba, e te ena aküwa kpara, ah bü duu de zü-e? *Ngari Me gü neh fe? E te ena aktüwa kpara fanü fanü, ah ka-ye de ngü ka Me.”*

⁵ Fütanga ngü la, fü Satana ayia aza Yesu, anü di kpa füh mere rüvü kpa tikpi, asere wü züka ngü de füh kotö ne, de wü nga nzö sü 'buru fefe na bü kere kere bala, ⁶ gü ba, “Ceka la wü e la, ah 'buru de ndara. Ma ti eyi ato bü nzö fü mene kpara, te ma le ngü kaka. ⁷ Te mü cu ngü ra ba me ka-mü la, ma ena ato wü e la ato 'buru fü mü. Ma ena ato kphah wazi fü mü, de wü züka wü e de füh kotö ne 'buru.” ⁸ Fü Yesu adu alügü ngü fefe, gü ba, “Wüh ba

* 4:4 4:4 Mü ena amaka ngü la gbü buku ka Manda nga Riri 8:3.

gbü Ngari Me, gü ba, 'Mü di ecu nzö ngü Mere Me kpikpi ye, de mü di emere duu riri kaka.' †

9 Te Satana je ngü la bala, fü ah adu kpah aza Yesu, anü di agbü Yerüsalema, ali ake di kpa enzö *Mere Kambü ka Me kpa tikpi. Fü ah ayia amala ngü fefe, gü ba, "Te mü zu de Ye Me fanü la, mü ce la te-mü, mü ti kpa kötö kpala, ah mere ngü de. 10 Angü wüh ba gbü Ngari Me, gü ba, 'Me ena atima wü *malayika ka-ye teka ale ta-ngü te mü. 11 Wüh ena akoro abi mü esaka wü, mü ti amo lö mü eküte teme de.' ‡ 12 Fü Yesu alügü ngü fefe, gü ba, "Wüh ba kpah eyi gbü Ngari Me, gü ba, 'Mü mere e are maguma Mere Me de.' §

13 Te Satana re Yesu tete de wü ngü la 'buru bi ma ne, fü ah ayia ace la mba engu teka gara sikipi.

Dene ngü te Yesu kpo de tima ka-ye tete agbü Galilaya

14 Fütanga wü ngü la, fü Yesu ayia kpala, adu agbü *Galilaya. Fü *Nzila Wazi Me angbü ake di, da eto wazi emamaguma. Fü nganga ayia awü gbü nga nzö sü la 'buru. 15 Fü engu akpo da eri wü kpapa gbü wü *kambü ka biti-te ka-ewü kpala. Fü wü kpapa 'buru angbü egbo nganga na.

16 Fütanga ngü la, fü Yesu ayia anü akoro agbü Nazareta, gbü sü ta te engu ga gbügbü na. Gbü *sikipi ka Me, fü engu ayia ari kpa esambü ka biti-te, baka te engu ngbü emere gügü gbü wü sikipi ka Me 'buru. Fü ah ayia arü tikpi teka atanga *Ngari Me fü ewü. 17 Fü ewü aza buku ka *mürü dofo Yisaya, ato fefe na, de ah tanga. Fü engu aza buku la, aü, amaka sü de te ewü ba ngü gbügbü kpala, gü ba, 18 "Nzila Wazi Me ngbü eto wazi fere, angü Me fe ra eyi teka aza ngari ni, Me, anü di, amala fü wü mürü cinga. Ah tima ra kpah kpaka wü kpapa agbü ku, teka amala fü ewü, gü ba, 'Ni, Me, ena afuru wü gbü ku la afuru.' Ah tima ra kpah de ma nü kpaka wü kpapa de te jia ewü ni ani, gü ba 'Ni ena aü jia wü.' Ah tima ra kpah teka aküwa wü labi gbü cinga ka-ewü. 19 Ah tima ra kpah kpaka wü kpapa ka-ye, amala ngü fü ewü, gü ba dene, 'Sikipi te ni, Me, ena aküwa wü tete, koro eyi.' "

20 Te Yesu tanga wü ngü la nza tete, fü engu alügü buku la kpaka mürü tima. Fü ah adu angbü ka-ye kötö. Fü wü kpapa 'buru de kpa esambü ka biti-te la angbü da eceka engu de kpeke jia. 21 Fü engu akpo da emala ngü fü wü kpapa la, gü ba, "Ngü

ta te wüh ba gbü buku ne, ah ti eyi kpini baka e te yi ngbü ewu dene."

22 Tekä ngü la, fü ngü ka Yesu aga gbü jia wü kpapa 'buru, teka kpeke ngü, de te engu ngbü emala fü ewü la. Fü ewü akpo tñe angbü da emala nganga na esüka wü, gü ba, "Apa! Ye komoko la, ah de ye *Yüsefa de?"

23 Te Yesu je ngü la bala, fü ah amala ngü fü ewü, gü ba, "Wü kpeke ngü 'buru, te yi ngbü eje nga ra di, te ma ngbü emere agbü Kaparanama ne, yi ngbü efi, gü ba, ma mere gbü sü ka-nih sene de, neh teka ne? Ngü ka-yi baka ngü mani, te wüh ngbü emala, gü ba, 'Te mü de mürü kuwa la, ah le de mü di kpah eküwa wü mürü mü.' 24 Ma ngbü emala fü yi dene zu ngü. Angü te mü de *mürü dofo la, wü kpapa gbü wü gara sü 'buru ena angbü ecu ngü mü me-wü, amba 'duwa wü mürü mü, wüh cu ngü mü nda-wü de.

25 Dene kpah gara kpeke ngü te ma ngbü emala fü yi. Yi efi nda-yi, gü ba, Me ti ale ta-ngü te wü *ganzi kpapa de? A'a, ah bala de! Yi ceka la, gbü wü re ta te mürü dofo *Iliya ngbü emere tima ka Me tete na, agö li de, teka re bata de tü ye. Fü mere tala ayia atü gbü sü la 'buru. Gbü wü re la, mere bi wü wökö ta ladü gbü tö ka wü *Yisaraye. 26 Amba Me tima ta Iliya kpaka ewü, teka ale ta-ngü te ewü, nda de. Me tima engu ka-ye bü duu kpaka gara würüse wökö, te di de ganzi kpapa agbü Zarefata, agbü tö ka Sidona. Yi fi nga ngü la nda-yi neh de? 27 Kpah bala, gbü wü re ta te Iliya ngbü emere tima tete, mere bi wü mürü *jiakö ta ladü gbü tö ka wü Yisaraye, amba wüh küwa 'buru de. 'Duwa Namana kpikpi ye, te di de ganzi kpapa, kpapa ka Siriya ne, küwa ka-ye bü duu me-ye."

28 Te mere bi wü kpapa la je ngü la tete bala, fü ewü azinga eküte Yesu. 29 Fü ewü ayia azoro Yesu, agbeke engu, anü di kpa etanü mba canza ede mere köti ka-wü. Fü ewü aza engu, ali di kpa füh mere rüvü,* de ani nzi engu, agü akötö. 30 Yiri! Fü Yesu adürü ka-ye bü esüka ewü sela, anye sü ka-ye.

Dene ngü ka Yesu de wü siti wü di engu me

Marako 1:21-28

31 Gbü gara ra, fütanga ngü la, fü Yesu anü akoro agbü Kaparanama.† Gbü *sikipi ka Me, fü Yesu ari kpa *esambü ka biti-te, akpo da eri wü kpapa kpala. 32 Fü ngü de te Yesu ngbü eri ewü di la, ayia aga gbü

† 4:8 4:8 Mü ena amaka ngü la gbü buku ka Manda nga Riri 6:13. ‡ 4:11 4:11 Mü ena amaka ngü la gbü Ci ka wü Davidi 91:11-12. § 4:12 4:12 Mü ena amaka ngü la gbü buku ka Manda nga Riri 6:16. * 4:29 4:29 Dene rüvü te wüh ji mere köti ka-wü fefeh na. † 4:31 4:31 Kaparanama de gara köti gbü nzö köti ka Galilaya.

jia ewü 'buru afa sü. Angü ah ngbü ta erü wü kpara la de mere wazi, baka mere kpara te Me tima engu me-ye.

³³ Gara komoko ta ladü, kpa esambü ka biti-te la, de *siti wü di engu me guvu ye. Fü komoko la ayia akpo da eba rere de mere ri ye, gü ba, ³⁴ "Apa! Yesu,‡ nda-ani ngü de wü ye, ah de ne ngü ne? Ye koro dela teka amörö ani asidi? Ani wu ye kpo. Ye de züka kpara te Me tima füh kotö ne!" ³⁵ Fü Yesu arü amala ngü fü siti wü di engu me la kpekpeke, gü ba, "Yi nga anga, de yi koro guvu komoko la asidi!" Fü siti wü di engu me la ayia agbü kömoko la, agbo kötö, esüka wü kpara sela. Fü ewü ayia akoro guguvu, akpe, atafa ka-wü. Wüh mere engu esiti de.

³⁶ Fü ngü la aga gbü jia wü kpara 'buru afa sü. Fü ewü angbü emala ngü esüka wü, gü ba, "Apa! Dene bane neh ene ngü ne? Yi ceka la, Yesu ngbü emala ngü fü wü di engu me de wazi, fü ewü angbü eje ngü kaka, angbü egoro guvu kpara asidi! Ah maka de wazi la neh kaye?" ³⁷ Tek a ngü la, fü nga Yesu awü esüka wü kpara gbü nga nzö sü la 'buru.

Dene ngü ka Yesu te küwa mere bi wü mürü keke

Matayo 8:14-17; Marako 1:29-34

³⁸ Fütanga ngü la, fü Yesu ayia ace *kambü ka biti-te la. Fü ah ayia anü ka-ye agba Simüna Petero. Gbü sikipi la, ni ye wara Simüna ngbü ta eke ake. Sosoko ri ta fa sü. Fü ewü anda'ba te-wü fü Yesu, de ah küwa engu. ³⁹ Fü Yesu akoro, arü ede würüse la, amala ngü fü keke la kpekpeke. Bü baka te engu mala ngü la, fü keke la ayia anza. Fü würüse la ayia anü 'duwa amere kümü, ato fü ewü.

⁴⁰ Etamura go la, te ra ti tete na, fü wü kpara gbü wü sü la ayia aza wü mürü wü, te ewü di de wü keke te wü 'buru, akoro de ewü kpaka Yesu, de ah küwa ewü. Fü Yesu ayia ao kpa ye gbü nzö ewü biri biri 'buru. Fü keke ka-ewü la anza 'buru. ⁴¹ Wüh koro ta kph de mere bi wü kpara, de *siti wü di engu me guvu wü. Fü Yesu amala ngü fü siti wü di engu me la. Fü ewü ayia akoro guvu wü kpara la asidi, da eku gba de mere ri wü, gü ba, "Yesu, ye de Ye Me fanü fanü!" Tek a ngü la, fü Yesu angbü emala ngü fü ewü kpekpeke, da etiri ewü, gü ba, "Wü nga anga." Kükürü de, angü siti wü di engu me la wu ta eyi, gü ba, Yesu ka-ye de *Kurisito te Me tima engu füh kotö ne.

Dene ngü te Yesu ndoro de to ngari Me tete,

gbü wü sü ka Galilaya

Marako 1:35-39

⁴² Te kpi seke tete, fü Yesu ayia agbü Kaparanama kpala, anü ka-ye agbü gü, teka aku gba fü Me. Fü mere bi wü kpara akpo da egiri engu. Te wüh nü maka engu, wüh le ta de engu ce ani, anü agbü gara sü de. Fü ewü angbü egiri kaje teka atiri engu. ⁴³ Te Yesu wu ngü la bala, fü ah amala ngü fü ewü, gü ba, "Ah le fü ni anü kph agbü gara wü sü, amala ngü ka Me fü wü kpara de kpala. Angü Me tima ni ngbüru teka ngü la. Wü mere e atiri ni sela de."

⁴⁴ Fü Yesu ayia akpo da endoro gbü nga nzö wü sü la 'buru, da erü wü kpara de ngü ka Me, kpa *esambü ka biti-te ka-ewü.

5

Dene ngü ka Yesu ake Simüna Petero

¹ Gbü gara sikipi, fü Yesu akoro angbü ede mere ngu de iri ye *Galilaya.* Fü mere bi wü kpara akoro teka aje ngari Me gögömö na. Fü ewü akpo da enzini te-wü da egbene sü. ² Fü Yesu aceka kpi, ayia awu wü *zabu 'basu te wüh i o edere ngolo. Wü mürü koro gbügbü na eyi. Wüh ngbü ezürü wü yimba ka si ka-wü. ³ Gara zabu la, ah de nda Simüna Petero. Fü Yesu ayia ali angbü gbügbü. Fü ah ayita Simüna, teka de ah ka de zabu la mba cükü'daye etü ngu. Fü Yesu angbü ka-ye gbü zabu la, kpa etü ngu kpala. Wü kpara nda-wü 'buru füh gumba. Fü engu akpo da erü wü kpara de to ngari Me.

⁴ Te Yesu mala ngari Me nza tete, fü ah amala ngü fü Simüna, gü ba, "Ye ka de zabu la kpa etü ngu, gbü sü te cu acu, fü wü agü yimba ka-wü de wü bu ye la, teka fü wü azoro si." ⁵ Fü Simüna amala ngü fefe na, gü ba, "Akoo! Mere kpara, ani mere tima di bü eyi gbü biti ne, ngirri! ani maka e nda-ani mbele de. Amba teka ngü de te ye mala la, ani ena agü yimba engu la bü agü bala."

⁶ Te wüh gü yimba ka-wü tete, baka te Yesu mala fü ewü la, fü ewü ayia azoro mere bi si gbe gbe gbe. Dela si tine de! Yimba ka-ewü yia ekolo akolo, teka tiri wü si. ⁷ Fü wü Simüna ai wü bu wü, te ewü di gbü gara zabu ne, da ecökölö ewü de kpa wü, teka de wüh koro, ale ta-ngü te ani. Fü ewü akoro, aro wü si gbü wü zabu de 'basu ne, asi 'buru gbe! Zabü yia tine erü ari esa ngu teka tiri wü si te fa sü.

⁸⁻⁹ Te Simüna wu ngü la bala, fü cürü ari tete afa sü. Fü ah ayia abu nzökuta ye kötö, eri lö Yesu, anda'ba te-ye fefe, gü ba,

‡ 4:34 4:34 Yesu ka-ye de kpara ka Nazareta.

* 5:1 5:1 Gara iri ngu Galilaya, ah de Genezareta.

“Mere kpara, mü yia ede ra sela asidi, angü ma ka-ra de siti kpara.” Angü ngü ka mere bi wü si la ga gbü jia wü Simüna de wü bu ye cu fa sü.

¹⁰ Fü cürü ayia arí kpah te wü bu ye Simüna de 'basu, wü *Yakobo ake *Yüwane, wü di Zebedayo, te ewü ngbü gbü gara zabu ne, afa sü.

Fü Yesu ayia amala ngü fü Simüna, gü ba, “Mü mere e akpe cürü de. Akpo enatikine, mü ena angbü ezoro wü kpara fü Me.”

¹¹ Fü ewü agbeke wü zabu ka-wü la edere ngolo, ace ao sela, ayia bü kürrü, alala gbü nga Yesu.

Dene ngü ka gara mürü jia, te Yesu küwa

Matayo 8:2-4; Marako 1:40-45

¹² Gbü gara síkpi, o wü Yesu ngbü tete gbü gara mere köti, fü gara komoko te di de *jiakö eküte ye, ayia akoro kpaka Yesu. Fü engu ayia abu nzökuta ye köto engagira Yesu, anda'ba te-ye fefe, gü ba, “Akoo, mere kpara! Ye de mere mürü wazi! Ni ngbü eyi-ta ye, te ah gbü jia ye 'be la, de ye küwa ni gbü keke ka-ni ne.” ¹³ Fü Yesu ayia ao kpa ye eküte komoko la, gü ba, “Wayi, ma le eyi. Küte mü reke ereke!” Baka te Yesu mala ngü la tete, 'duwa fü keke la ayia ace engu.

¹⁴ Fü Yesu adu amala ngü fü komoko la kpekpeke, gü ba, “De-ye deyi, ye mere e amala nga ngü la fü wü gara kpara de. Ye nü enü, ye mere ngü, ta te *Müse ba gbü *Riri ka Me ne. Ye za nü, ye nü di kpaka *müdü gele ka Mere Me, de ah wa, ah to fü Me teka ngü la, teka fü wü kpara 'buru awu, gü ba, küte ye reke eyi fanü.”[†]

¹⁵ Tekä ngü la, fü nga Yesu ayia awü tinea afa sü. Fü mere bi wü kpara aci angbü da ebite te-wü, teka adi eje to ngari Me gögömö na. Kpah bala, teka de Yesu küwa ani gbü wü keke ka-ani. ¹⁶ Amba fü Yesu angbü enü ewo te-ye angbü gü, teka adi eku gba fü Me kpikpi ye, kpala.

Dene ngü te Yesu küwa gara komoko te küküte kpi akpi 'buru

Matayo 9:2-8; Marako 2:2-12

¹⁷ Gbü gara síkpi, Yesu ngbü ta eri wü kpara de to ngari Me. Fü mere bi wü kpara akoro teka aje ngü la gögömö na. Gara wü *Farusi, de wü *müdü riri, ta kpah ladü esüka ewü. Gara ewü koro ta agbü wü nzö köti ka *Galilaya, gara nengete agbü *Yudaya, bete mene wü gara te ewü koro agbü mere köti, Yerüsalema ne. Fü Me angbü eto mere wazi fü Yesu teka aküwa wü müdü keke la di.

¹⁸ Wüh te eceka de, wü gara kpara bi gara komoko te küküte kpi akpi, koro di eyi, ta de ani nü di kpaka Yesu. Fü ewü agiri kaje, ta de ani ri de müdü keke la kpa esambü, ao engagira Yesu. ¹⁹ Amba dada ma, angü mere bi wü kpara ni ta kaje eyi 'buru. Da ewü te wüh ena arí akoro kpaka Yesu ma. Fü gara fingangü akoro gbü nzö ewü. Fü ewü ayia ali kpa enzö kambü, afuru nzö kambü la, ai ku te ka'da la, ato komoko la di te görö, de te ewü furu la, ferre esüka wü kpara la, ao 'duwa mbihi engagira Yesu, de ah küwa engu.

²⁰ Te Yesu wu ngü de te wü kpara la mere de bala, fü ah awu teke, gü ba, wüh to maguma wü eyi fü ni fanü fanü. Fü ah adu amala ngü fü müdü keke la, gü ba, “Enga wüna, ma boro *siti ngü ka-mü, te mü mere gbü jia Me ne, eyi!”

²¹ Te wü müdü riri, de wü Farusi je ngü la bala, fü ngü la ake te-wü. Fü ewü angbü da efi ngü emaguma wü, gü ba, “Apa! Dene ne töndö ngü ne? Komoko la neh da, te ngbü efala Me de bala? Ah ngbü eo te-ye baka Me? Kpara biringbö füh kotö ne, te ti aboro siti ngü ka kpara ladü? Ah nda ma! Ah ka-ye 'duwa de Me kpikpi ye, te ti aboro siti ngü ka kpara.”

²² Amba Yesu wu fingangü ka-ewü la eyi, fü ah amala ngü fü ewü, gü ba, “Yi ngbü efi ngü la emaguma yi bala, neh teka ne? ²³⁻²⁴ Yi wu de, gü ba, ma de *Ye Kpara ka Kpi? Te di bala, wazi ra ladü, teka adi eza siti ngü ka wü kpara füh kotö ne, gbü nzö ewü asidi. Yi fi nda-yi, gü ba, ma mala töndö ngü kükürü? Yi ena awu ngü la enatikine!”

Fü Yesu adu afü te-ye, amala ngü fü müdü keke la, gü ba, “De-ye deyi, ye yia eyia, ye za darara ka-ye, ye go kpa eköti.” ²⁵ Yesu kpah bü te emala ngü la anza, fü müdü keke la ayia 'duwa, arü tikpi gbü jia wü kpara la 'buru. Fü ah aza darara ka-ye la, ago agba ye, de mere tadu, kpah da egbo nga iri Me.

²⁶ Dela ngü te Yesu küwa müdü keke la tete. Fü ngü la aga gbü jia mere bi wü kpara la afa sü. Fü ewü akpo da egbo nga iri Me, de mere cürü emaguma wü, gü ba, “Apa! Enatikine ani wu mere kpeke ngü eyi!”

Dene ngü ka Levi te Yesu i engu

Matayo 9:9-13; Marako 2:13-17

²⁷ Fütanga ngü la, fü Yesu ayia akoro kpa etanü. Fü ah awu gara komoko de iri ye *Levi Matayo, te ngbü gbü sü ka tima kaye, da ero *jiase ka wü e esaka wü kpara, teka angbü eto fü miri ka wü Rüma. Fü Yesu arü amala ngü fefe, gü ba, “De-mü

† 5:14 5:14 Mü ena amaka ngü la gbü buku ka Gele ka wü Levi 14:1-32.

Levi, mü yia eyia, mü fa nga ra!" 28 Fù Levi ayia ace wü e ka tima ka-ye la 'buru sela, ayia kürrrü, alala gbü nga Yesu.

29 Fütanga ngü la, fù Levi ayia amere mere karama fù Yesu kpa gba ye. Fù bi wü bu ye, te ewü ngbü ero jiase fù miri de ewü ne, akoro kpah gbü karama la, be kpah te bi wü gara kpara. Fù ewü angbü ezü e de wü Yesu tundu.

30 Te wü *Farusi, de wü gara *mürü riri wu ngü la bala, fù ewü angbü edi ngü eküte wü Yesu gbü ngingiri ngü, gü ba, "Ah mere baye, te wü Yesu ngbü ezü e, de wü siti kpara de bala ne?" 31 Te Yesu je ngü la bala, fù ah adu amala ngü fù ewü, gü ba, "Te keke te mü ma la, mü ena anü kpaka mürü kuwa anü? Mü ti anü de. 'Duwa te keke ladü te mü, fù mü anü kpaka mürü kuwa, de ah küwa ni. 32 Ngü ka-ra kpah bala. Ma koro füh kotö ne, neh teka wü da? Tekä züka wü kpara? A'a, ah bala de! Ma koro ka-ra teka siti wü kpara, ai ewü, de wüh fù maguma wü."

Dene ngü ta te ewü yi-ta Yesu di, teka to riri kaka

Matayo 9:14-17; Marako 2:18-22

33 Gbü gara sikipi, fù wü gara kpara akoro kpaka Yesu, ayi-tata, gü ba, "Wü *Farusi zü e de, da *e'bi te-wü, teka adi eku gba fù Me, teka bi sikipi. Wü kpara ka *Yüwane Mürü Babatiza ngbü emere kpah bala. Anga ah mere neh baye, te ndaye wü kpara ne, ngbü ezü e gbü wü sikipi 'buru ne? Wüh le gele ka-ani mbi mbi nda-wü de?" 34 Fù Yesu alügü ngü fù ewü gbü mani, gü ba, "Yi fi nda-yi, gü ba, te wüh i wü kpara gbü karama la,‡ wüh ti azü e de? Wüh ena azü e azü, angü mürü karama la ladü tundu de ewü. 35 Amba te gara, te wü vügü ena aza mürü karama la, esüka wü awuba ye asidi la, wüh ti azü e de, ka cinga emaguma wü."

36 Fù Yesu adu kpah amala gara ngü mani fù ewü, teka to ngari Me, te engu ngbü eri wü kpara di ne, gü ba, "Te diri bongo ka-mü söro asöro la, mü ti eyi aza to bongo, teka atükü te didiri na la? Mü ti amere bala de, angü didiri na la ena adu kpah asöro ka-ye asöro. 37 Kpah bala, te mü le akü'da fi ka-mü la, de mü mere e akü'da gbü diri bütü körö körö ne de. Angü diri bütü la ena adü, aöfö ka-ye, fù fi ka-mü la atökö ka-ye 'buru akötö. 38 Ah le fù mü akü'da fi ka-mü gbü to bütü, angü fi ka-mü la ena asiti siti. Kpah bala, te mü ngbü ele to riri ka-ra la, mü ti alala fi bü eküte diri gele ka wü kundü mü nda-mü de. 39 Wü gara kpara ngbü emala, gü ba, 'Duru fi reke ka-ye me-ye.' Tekä

ngü la, wü kpara le adi enzö to fi fütanga duduru na nda-wü de."

Dela ngü te Yesu mala fù wü kpara teka to riri, te engu ngbü eri wü kpara di.

6

Dene ngü te Yesu mala teka sikipi ka Me Matayo 12:1-8; Marako 2:23-28

1 Gbü gara *sikipi ka Me, fù wü Yesu angbü enü de wü *kpara ka-ye. Fù ewü afü kpuru gbü yi ka ndo. Te wüh ngbü enü tete, fù wü kpara ka Yesu akpo da esösöro fi ndo la, da etitiri koko na, ezü ka tala.

2 Fù wü gara *Farusi awu ngü la. Fù ngü la asiti gbü jia ewü, gü ba, "Masöro fi ndo la, ah de tima." Angü riri ka wü *Yisarayele gü ba, "Gbü sikipi ka Me, mü mere e amere tima 'buru 'buru de." Tekä ngü la, fù wü Farusi la ayia akoro amala ngü fù wü Yesu, gü ba, "Wü ceka la! Wü ngbü emere tima gbü sikipi ka Me, neh teka ne? Wü je riri ka-ani ne nda-wü de? Wü le asiti gele ka-ani neh teka ne, te wü ngbü esösöro fi ndo la gbü sikipi ka Me de bala ne?"

3 Te Yesu je ngü la bala, fù ah alügü ngü fù ewü, gü ba, "De-wü deyi, wü tanga *Ngari Me nda-wü neh de? Ngü ta te wüh ba teka Mere Miri *Davidi ne, ah gü neh fe? Ta gbü gara ra, tala mere Davidi de wü kpara gbü nga ye. 4 Fù Davidi ayia akoro kpaka *mürü gele ka Mere Me, ayi-tata teka e-mazü. Fù mürü gele la ayia aza ambata, de te wüh ngbü eto fù Mere Me ne, ato fù Davidi. Fù Davidi azü, ato kpah fù wü kpara gbü nga ye 'buru.* Wüh mala ta eyi fefe, gü ba, 'Ye ngbü esiti gele?' Wüh mala bala de! Amba gbü riri ta te *Müse to fù wü mürü gele ne, ambata la, ah teka wü kükürü kpara fa fa fa nda de. 'Duwa wü mürü gele ka Mere Me ngbü ezü me-wü." 5 Fù Yesu adu amala gara ngü fù ewü, gü ba, "De-ra, *Ye Kpara ka Kpi, Me to wazi eyi fere, fa ngü ka gele la ka. Ma de mürü sikipi ka Me la me-ra. Ma ngbü eto to *Riri ka Me fù wü kpara ka-ra me-ra."

Dene ngü ka komoko, te Yesu reke kpakpa na gbü sikipi ka Me

Matayo 12:9-14; Marako 3:1-6

6 Gbü gara *sikipi ka Me, fù Yesu anü ari kpa *esambü ka biti-te, akpo da eri wü kpara kpala. Gara komoko ta ladü kpala, te kpakpa na ka kokpa ze aze.

7 Wü gara *mürü riri, de wü *Farusi ta kpah ladü kpala. Fù ewü angbü efete Yesu, da egiri kaje te ani ena amaka siti ngü kaka tete, fù ani amala nganga fù wü *kovo. Fù ewü angbü eceka Yesu, da efete engu

‡ 5:34 5:34 Karama la, ah de karama ka za würüse. *

6:4 6:4 Mü ena amaka ngü la gbü 1 Samüwele 21:1-6.

kpekpeke, anga engu ena aküwa komoko la gbü sikipi ka Me ya? Angü wüh fi nda-wü, gü ba, maküwa kpara, ah de tima.

⁸ Amba Yesu wu fingangü ka-ewü la eyi kpo. Teka ngü la, fü engu amala ngü fü komoko, de te kpakpa na ze aze ne, gü ba, “De-ye deyi, ye yia eyia, de ye koro la kpa engagira nü akine.” Fü komoko la ayia akoro. ⁹ Fü Yesu amala ngü fü wü mürü riri la, gü ba, “Ma ele ayi-ta yi de ngü biringbö. Gbü jia yi, ah ti fü kpara adi emere neh ene ngü ne, gbü wü sikipi ka Me? *Riri ka Me, te *Müse mala fü nih, gü neh fe? Wüh di emere züka ngü? Anga siti ngü reke me-ye? Ah le de nih küwa kpara? Anga ah le de nih ce kpara fü kpi?” ¹⁰ Fü engu ayia aceka kpi füh ewü ngberre 'buru. Fü ah adu amala ngü fü komoko la, gü ba, “Mü ghere kpa mü egbere!” Fü komoko la ayia agbere kpa ye. Fü kpakpa na areke te-ye, adu zürü! te nga ye.

¹¹ Te wü mürü riri la wu ngü la bala, fü ngü la ake te ewü afa sü, angü Yesu reke kpa komoko la gbü sikipi ka Me. Fü maguma ewü ayia asiti eküte Yesu. Fü ewü akpo da emala ngü esüka wü, gü ba, “Ani ena amere de Yesu neh baye?”

Dene ngü ka wü kpara nzükpa de füh ye 'basu, te Yesu fe ewü

Matayo 10:1-4; Marako 3:13-19

¹² Fütanga ngü la, fü Yesu ayia ka-ye, anü kpa enzö mere rüvü, teka aku gba fü Me kpala. Fü ah angbü kpala da eyita Me gbü biti la ngirri. ¹³ Te kpi seke tete, fü engu ai wü *kpara ka-ye 'buru kpaka ye. Fü ah ayia afe wü gara kpara nzükpa de füh ye 'basu, esüka wü kpara ka-ye la, ao ewü, wü *mürü tima ka-ye. ¹⁴ Dene iri wü kpara, de te engu fe ewü ne. Simüna, de te Yesu gü gara iri tete, gü ba, Petero,† ake enga ni ye de iri ye Anderiya. Wü *Yakobo ake *Yüwane, wü *Filipo ake Batülümayo,‡ ¹⁵ wü Matayo§ ake Toma, bete *Yakobo ye Alofaya, ake Simüna ta te ngbü emere gü teka tö ka-wü ne. ¹⁶ Gara de *Yuda, ye Yakobo, te wüh gü gara iri na Tadayo, bete *Yuda Keriyota ta te to Yesu fü wü vügü ne.

Dela ta ngü ka wü kpara te Yesu fe ewü.

Dene ngü ka Yesu de mere bi wü kpara
¹⁷⁻¹⁸ Fütanga ngü la, fü wü Yesu ayia kpa enzö mere rüvü la, adu kpa esa gö. Fü ah adu amaka mere bi wü gara wü *kpara ka-ye, te ewü ngbü gbü züka sü te di sele sele bala. Fü ewü ayia angbü de ewü sela. Fü mere bi wü gara wü kpara ayia akoro

kpah kpakaka na, teka aje to ngari Me gögömö. Wüh koro ta agbü Yerüsalemä bete tö ka *Yudaya 'buru. Gara ewü koro nengete agbü Tera ake Sidona.* Gara wü kpara la koro ta teka fü Yesu aküwa ani gbü wü keke ka-ani. Gara ewü de wü kpara, ta te *siti wü di enga me ngbü emere ewü. ¹⁹ Wü mürü keke la 'buru le amofö küte Yesu, angü wüh wu eyi, gü ba, wawazi na ladü, teka aküwa ani 'buru.

Dene ngü te Yesu mala, teka ngü ka tadu bete ngü ka cinga

Matayo 5:1-12

²⁰ Fütanga ngü la, fü Yesu ae gbüra ye, aceka wü *kpara ka-ye. Fü ah amala ngü fü ewü, gü ba,

“De-yi, wü mürü cinga,

Me ena ato züka ngü fü yi te gara,
angü yi ena amaka *küküwa,
angbü agbü sü ka Me agbü kpi.

²¹ De-yi, wü kpara te yi ngbü engbü de tala tütine,

Me ena ato züka ngü fü yi te gara,
angü yi ena amaka mere bi zü-e.

De-yi, wü kpara te yi ngbü eku gba tütine,
Me ena ato züka ngü fü yi te gara,
angü yi ena angbü de mere tadu.

²² Kpah bala, de-yi, wü kpara te wü bu yi ngbü ekpü yi akpü, da esoko yi, kpah da efala yi, teka ngü ka-ra ne, Me ena ato züka ngü fü yi te gara. ²³ Te wüh mere mü bala la, ah le de mü ngbü kamü de tadu emaguma mü, angü te gara, mü ena amaka mere züka ngü agbü sü ka Me agbü kpi. Mü mere e afi nga ngü de, angü ta gügü, wü kundu ewü ngbü emere siti ngü fü diri wü *mürü dofo ka Me kpah bala.

²⁴ Amba nda-yi, wü kpara de mere bi e esaka yi,

yi ena amaka cinga te gara,
angü yi maka züka ngü nda-yi eyi füh kotö ne.

²⁵ De-yi, wü kpara te yi ngbü ezü züka e enatikine,
yi ena amaka cinga te gara,
angü tala ena angbü emere yi.

De-yi, wü kpara te yi ngbü de tadu enatikine,

yi ena amaka cinga te gara,
angü yi ena angbü eku gba.

²⁶ Kpah bala, de-yi, te wü kpara 'buru ngbü egbo nga iri yi de enatikine ne, yi ena amaka cinga te gara, angü wü kpara ngbü ta egbo nga siti wü mürü wu ta gügü ne kpah bala.”

Dene ngü te Yesu mala, gü ba,

† 6:14 6:14 Si-ngü gbü iri Petero gü ba, baka da. ‡ 6:14 6:14 Gara iri Batülümayo de Nataniyele. § 6:15 6:15

Gara iri Matayo de Levi. * 6:17-18 6:17-18 Wü Tera ake Sidona de wü mere köti ede mere yi-ngu, te di to kpa ekati.

ah le de kpara di ele wü vügü ka-ye

²⁷ Fū Yesu adu amala gara ngü fū ewü, gü ba, "De-yi te yi ngbü eje ri ra ne, dene ngü te ma ele amala fū yi. Ah le de yi di ele wü vügü ka-yi de maguma yi 'buru, kphah da emere züka ngü fū wü kpara te ewü ngbü ekspü yi. ²⁸ Wü kpara te ewü ngbü esoko yi, da eto cinga te yi, ah le de yi ku gba fū Me teka ewü, de Me boro *siti ngü ka-ewü la. ²⁹ Te kpara be gbüra mü la, mü mere e azinga tete de, de mü ce gbüra mü fefe, de ah du, ah be kphah toto. Te kpara gbene bongo ka-mü la, de mü ce kphah gara bongo ka-mü fefe na, de ah za kphah bala. ³⁰ Te kpara yo e eküte mü la, mü mere e atiri engu de. Te kpara za e ka-mü la, mü mere e ayo de, mü ce e engu la fefe. ³¹ Mene züka ngü, de te yi ele de wü kpara di emere fū yi ne, de yi di kphah emere bala fū wü bu yi.

³² Te yi ngbü ele bü nzö wü kpara, de te ewü ngbü ele ngü ka-yi ne la, Me ena ato züka ngü fū yi, neh baye baye? Angü wü siti kpara, de te ewü le ngü ka Me de ne, wüh ngbü emere ngü la esüka wü bala me-wü. ³³ Amba te yi ngbü emere züka ngü bü nzö fū wü kpara, de te ewü ngbü emere züka ngü fū yi ne la, Me ena ato züka ngü fū yi, neh baye baye? Wü siti kpara ngbü emere ngü bala me-wü. ³⁴ Kphah bala, te yi ngbü eto e bü nzö fū wü kpara, de te yi wu eyi, gü ba, wüh ena alügü nana fū ani ne, Me ena ato züka ngü fū yi, neh baye baye? Angü wü siti kpara, te ewü le ngü ka Me de ne, wüh ngbü emere kphah bala esüka wü me-wü, angü wüh wu eyi kpo, gü ba, wüh ena alügü na e la alügü fū ani.

³⁵ Amba nda-yi, wü kpara ka-ra, ah le de ngü ka-yi ngbü kpikpi ye. Ah le de yi le wü vügü ka-yi ale, da emere züka ngü fū ewü. Kphah bala, te yi to e fū wü kpara la, yi mere e afi nganga na tüne de. Angü te yi mere bala, Me ena ato mere bi züka ngü fū yi, agbü sü ka-ye agbü kpí. Kphah bala, wüh ena awu, gü ba, yi zu de wü di Me fanü. Angü Me ngbü emere züka ngü fū wü siti kpara, de wü züka kpara kphah 'buru. ³⁶ Te di bala, yi di ewu cinga wü bu yi, kphah baka Wö yi, Me, te ngbü ewu cinga yi ne."

Dene ngü te Yesu mala, gü ba,

mü mere e akolo liya ka wü bu mü de
Matayo 7:1-5

³⁷ Fū Yesu adu amala gara ngü fū ewü, gü ba, "Wü di enga wüna, yi mere e adi esiti iri wü bu yi, da ekolo liya ka-ewü de, angü Me ena akolo liya ka-yi kphah bala. Angü, te yi ngbü eboru siti ngü ka wü bu yi la, Me ena aboro *siti ngü ka-yi, te yi ngbü emere ne, kphah aboro. ³⁸ Yi di eto e

fū wü bu yi, teka fū Me adi kphah eto e fū yi. Angü te yi mere bala la, Me ena ato mere bi züka ngü fū yi, afa mene te yi ngbü eto ne ka. Teka ne de, wü ngü de te yi ngbü emere fū wü bu yi ne, Me ena adi emere fū yi kphah bala."

³⁹ Fütanga ngü la, fū Yesu amala gara ngü fū ewü gbü mani, gü ba dene, "Kpara te jijia ni ani, ti ale ta-ngü te kiri ye, de te jijia ni kphah ani ne, nda de. Kükürü de, angü wüh ena atí ka-wü 'basu mini agbü mere du. Kphah bala, kpara te to maguma ye fū Me de, ti ari wü bu ye de ngari Me kphah de.

⁴⁰ Ngü ka mbarase ti afa nda mere kpara ka-ye de. Amba mene mbarase te ngbü eje riri ka mere kpara ka-ye mbi mbi la, ah ena adu te gara, angbü emere wü ngü kphah baka mere kpara ka-ye la.

⁴¹⁻⁴² Te mü le aza enga ca-gü gbü jia enga ni mü, o mere ndugu rü di ladü gbü jia mü la, ah de züka ngü? Mü dela mürü mani! Angü te enga gina, ah le fū mü agbi la mere ndugu rü, te di gbü jia mü ne feke, teka fū jia mü alofo raaa! Fū mü adu aza enga ca-gü, te di gbü jia enga ni mü ne, sisi."

Dene ngü te Yesu mala teka ri-rü

Matayo 12:33-35

⁴³ Fū Yesu adu amala kphah gara ngü fū ewü gbü mani, gü ba dene, "Siti ri-rü ti eyi ari eküte züka rü, de te wüh ngbü ezü riri na ne? Ah bala de. Kphah bala, züka ri-rü ti ari eküte siti rü ne, kphah de. ⁴⁴ Mü ena awu wü rü 'buru teka ri ewü. Mü ti eyi amaka ri manga eküte patra? Anga mü ti eyi amaka ri güwava eküte rü ngenee? Ah bala de! Rü manga ena ari 'duwa ri manga. Rü ngenee ena ari 'duwa ri ngenee. ⁴⁵ Te di bala, züka kpara ngbü emere züka ngü ka-ye duu me-ye, angü züka ngü ladü emaguma. Kphah bala, siti kpara ngbü emere nda-ye wü siti ngü, angü mamaguma esiti. Angü ngü te mü ngbü emala de komö mü, kphah da emere ne, ah de ngü de te ngbü ekoro emaguma mü."

Dene ngü mani te Yesu mala, teka
wü kpara 'basu,

te ewü ji kambü ka-wü

Matayo 7:24-27

⁴⁶ Fū Yesu adu amala kphah gara ngü fū ewü, gü ba dene, "Yi ngbü ei ra, mere kpara, mere kpara, bü kükürü bala, neh teka ne? Amba wü ngü de te ma ngbü eri yi di ne, yi le aje de, neh teka ne? Dela züka ngü? ⁴⁷ Mene kpara te ngbü eje ngü ka-ra, fū ah angbü kphah emere ne, ma ena asere ngü kaka fū yi. ⁴⁸ Engu ena adi baka mene kpara te ele aji kambü ka-ye. Fū ah amaka züka sü füh ndu-ta teka kambü

la. Fū ah aji du, ari areke, areke teka ato rü kambü la gbügbü. Baka te engu ji kambü ka-ye la nza tete, fū mere agö ayia alí. Kambü la müürü nda de, angü wüh ji kambü la reke areke te züka sü, füh nduta. ⁴⁹ Amba te mü le aje ngü ka-ra, de te ma ngbü erí mü di ne, de la, mü ena adi baka kpara te ji kambü ka-ye bü gbü siki, riri na ri gbü tó nda de. Te mere agö li la, kambü la ena amürü ka-ye kere, angü ah ngbü bü ngönzó ngönzó füh siki."

Dela wü ngü te Yesu ri mere bi wü kpara di gbü mene sü te di sele sele, gbü sikipi te engu fe wü *mürü tima ka-ye nzükpa de füh ye 'basu ne tete.

7

Dene ngü ka labi ka mere kpara ka wü marajümiya ka wü Rüma, te Yesu küwa engu

Matayo 8:5-13

¹ Fütanga ngü la, fū Yesu ayia de wü kpara ka-ye, anü akoro agbü Kaparanama. ²⁻³ Gara mere kpara ka wü marajümiya ka wü *Rüma ta ladü kpala, te labi kaka ngbü eke efa sü. Keke la fa engu eyi, ah yia ta ekpi akpi. Te mere kpara la je nga Yesu, fū ah amala ngü fū wü gara *kovo ka wü *Yisarayeale, de wüh nü kpaka Yesu, ayi-tata de engu koro, ah küwa labi ka-ni la, angü ngü labi kaka la ke tete na ta fa sü. ⁴ Te wü mere kpara ka wü Yisarayeale la koro tete kpaka Yesu, fū ewü anda'ba te-wü fefe, gü ba, "Akoo mere kpara! Ah le de ye le ta-ngü te komoko la, aküwa labi kaka, angü engu de züka kpara fanü fanü. ⁵ Ah ji ta *kambü ka biti-te fū ani me-ye, angü ah le ngü ka nguwa ani, wü Yisarayeale, fa sü."

⁶ Te Yesu je ngü la bala, fū ah ayia kurrü, anü de wü kpara la. Te wüh nü koro ghamari ede gba mere kpara ka wü marajümiya la, fū mere kpara la ayia awu ewü te ewü ngbü ekoro. Fū ah atima gara wü awuba ye, anü amaka Yesu te kaje. Fū ewü amala ngari mere kpara la fū Yesu, agü ba, "Mere kpara, deyí, ye mbü te-ye de. Angü ni ka-ni de *ganzi kpara, ah tí fū ye ari kpa esambü ka-ni nda-ye de, angü riri ka gele ka-wü, wü di enga Yisarayeale, le bala de. ⁷ Te di bala, ah tí fū ni akoro kpaka ye me-ni kphah de. Amba ni wu eyi, gü ba, wazi ye ladü. Te ye mala ta bü ngü kpa da ye kpala la, labi ka-ni la ena aküwa aküwa. ⁸ Angü ni tí kphah eyi awu ngü la bala, teka te ni ngbü kphah esa riri ka wü mere kpara ka-ni ne. Kpah bala, wü gara marajümiya ladü, te ewü di esa riri ka-ni. Te ni mala ngü fū gara, gü ba, ye nü enü la, ah ena anü kere, baka te ni mala fefe. Anga te ni mala fū gara, gü ba,

ye koro ekoro akine la, ah ena akoro kphah kere. Anga te ni mala ngü fū labi ka-ni, gü ba, ye mere mene ngü ne, ah ngbü kphah emere ngü engu la kere, baka te ni mala fefe."

⁹ Te Yesu je ngü la bala, fū ngü la aga gbü jijia. Fū engu afü te-ye, amala ngü fū mere bi wü kpara, te ewü ngbü efa nga ye ne, agü ba, "Kpara te to maguma ye fere baka komoko la, ma maka füh kotó ne ndara la kü de. Anga gbü nguwa nih, wü di enga Yisarayeale, kpara te to maguma ye bala, ah kphah ma. Amba ah ka-ye 'duwa de komoko la, te di de ganzi kpara ne."

¹⁰ Fū wü kpara, ta te ewü tima ewü ne, ayia ace Yesu te kaje sela. Fū ewü adu akoro kpaka mere kpara la, amaka labi la, keke kaka nza eyi!

Dene ngü ka engu würiuse wökö, te Yesu zükü engu gbü kpi

¹¹ Fütanga ngü la, fū Yesu ayia de wü *kpara ka-ye, anü agbü gara koti de iri ye Nayina. Fū mere bi wü kpara angbü efa nga ewü.

¹² Gara würiuse wökö ta ladü gbü koti la, ah bi ye kü bü ngbee biringbö, jaji komoko. Fū mbarase la ayia akpi ka-ye. Te wü Yesu nü koro kpa emongiti 'barang ka koti la, fū ewü amaka te-wü de mere bi wü kpara, te ewü bi kö mbarase la, enü di, ati. Fū ni ye mbarase la angbü enü fütanga kö enga ye la, da eku gba.

¹³ Te Miri Yesu wu ngü la bala, fū cinga würiuse la ari tete. Fū ah amala ngü fefe, gü ba, "Ye ku gba de!" ¹⁴ Fū Yesu anü akoro ghamari, amofa ka'da de te wüh bi kövö fefeh na la. Fū wü kpara la ace te-wü, arü. Fū Yesu amala ngü fū kövö la, gü ba, "Mbarase, ma emala ngü fū mü, mü zükü ezükü, mü yia tikpi!" ¹⁵ Fū kövö la azükü, ayia tikpi, akpo da ero mö. Fū Yesu aza engu, alügü fū ni ye na.

¹⁶ Fū ngü la ato cürü te wü kpara la 'buru. Fū ewü akpo da egbo nga iri Me, da emala ngü, gü ba, "Wü ceka la, mere *mürü dofo ka Me koro eyi esüka ani!" Fū wü gara amala nda-wü, gü ba, "Yesu de kpara te Me tima me-ye, teka aküwa ani!" ¹⁷ Fū tofo ngü ka Yesu la, awü abaya te nga nzó koti gbü sü la 'buru.

Dene ngü te Yesu mala teka Yüwane Mürü Babatiza

Matayo 11:2-19

¹⁸ Te wü kpara ka *Yüwane Mürü Babatiza je nga Yesu, teka wü ngü de te engu ngbü emere de bala, fū ewü anü amala nganga fū Yüwane agbü ku kpala. Te Yüwane je ngü la gömö wü kpara ka-ye bala, fū ah aï gara wü kpara ka-ye 'basu, ¹⁹ atima ewü kpaka Miri Yesu, teka ayi-tata, gü ba, "Ye ngbüri me-ye de Ye Me, ta te

Me mala nganga na, gü ba, ni ena atima füh kotö ne? Anga ah le de ani ci nga gara kpara te ena akoro?"

²⁰ Te wü kpara la nü koro kpaka Yesu kpala, fü ewü amala ngü fefe, gü ba, "Yüwane Mürü Babatiza tima ani, teka ayi-ta ye, gü ba, 'Ye ngbürü de Ye Me, ta te Me mala nganga, gü ba, 'Ni ena atima füh kotö ne?" Anga ah le de ani di la fi bü eci nganga?"

²¹ Wü kpara la koro ta, maka Yesu, te ngbü eküwa mere bi wü mürü keke, kpah da eliki *siti wü di enga me, te ngbü emere wü gara kpara. Ah ngbü kpah da eü jia mere bi wü kpara, de te ni eyi ani ne. ²² Baka te Yesu mere ngü la nza tete, fü ah adu alügü ngü fü wü kpara ka Yüwane Mürü Babatiza la, gü ba, "Yi du edu, yi mala nga wü ngü, de te ma ngbü emere, ne 'buru fü Yüwane, gü ba, 'Wü kpara de te jia ewü ni ani, wüh kpo eyi eceka kpi. Wü kpara de lö wü walawala, wüh kpo eyi enü nü. Wü mürü *jiakö küwa eyi. Wü kpara te güje ewü do ado, wüh kpo eyi eje ngü. Wü kövö kpo eyi ezükü gbü kpi. Wü mürü cinga ngbü eyi eje ngari Me. Wü ngü la 'buru ngbü eyi emere te-wü, ba e ta te wü *mürü dofo ba gbü *Ngari Me ne.*" ²³ Te di bala, yi mala fefe, gü ba, 'Mene kpara te ena alala fi bü eküte ra, Me ena aceka engu ba züka kpara ka-ye, fü ah angbü de mere tadu te gara.' " ²⁴ Fü wü kpara la ayia adu kpaka Yüwane, mere kpara ka-wü.

Fü Yesu adu afü te-ye, akpo angbü emala nga Yüwane fü mere bi wü kpara la, gü ba, "Yi ngbü efi teka Yüwane, egü neh fe? Ta te yi ngbü enü kpa etü gü, da eje ngü gömö Yüwane ne, yi nü kpala neh teka ne? Yi ngbü ta efi, gü ba, Yüwane de töndö kpara, de maguma ye 'basu 'basu, te ngbü emere ngü baka gala, te wege ngbü efe me-ye ne? A'a, ah bala de! ²⁵ Anga fingangü ka-yi, gü ba, Yüwane de mere miri, te to züka bongo eküte ye? A'a, ah bala kpah de, angü wü kpara te ewü ngbü eto züka bongo eküte wü, bete wü kpara te ewü di de mere bi wü e esaka wü ne, ngbü kpa etü gü nda-wü de! Wüh engbü ka-wü gbü mere köti, anga gba wü miri. ²⁶ Amba ma wu eyi, gü ba, yi nü ta aceka Yüwane kükürü de, angü engu de *mürü dofo ka Me fanü. Wayi, ma emala fü yi dene zu ngü, gü ba, ngü ka Yüwane fa nda wü mürü dofo 'buru ka. ²⁷ Angü Yüwane me-ye de kpara, ta te wüh ba ngü kaka-na gbü Ngari Me, gü ba dene, 'Me mala ngü fü Ye ye, gü ba, 'Ni ena atima mürü tima

ka-ni kpa engagira nü, teka areke kaje fü ye." ' ' "†

²⁸ Fü Yesu adu kpah amala gara ngü fü ewü, gü ba, "Ma ngbü emala fü yi dene zu ngü. Esüka wü mürü dofo ka Me 'buru, kpara te fa Yüwane Mürü Babatiza nda ma. Amba mene kpara te to maguma ye fere 'buru, ngü kaka ena afa nda Yüwane ka, angü *Nzila Wazi Me ngbü eto wazi fefe me-ye.

²⁹ Mere bi wü kpara je ngari Me ta gömö Yüwane, de wü siti wü kpara 'buru. Fü ewü ayia ale ngü la, afü maguma wü, aza *babatiza esakaka. ³⁰ Amba wü *Farusi de wü *mürü riri, le afü maguma wü nda-wü de, angü wüh o maguma wü fi bü teka gele ka-wü. Te di bala, wüh le aza babatiza esaka Yüwane kpah de."

³¹ Fü Yesu adu kpah amala gara ngü fü wü kpara la, gü ba, "Wü kpara te ewü le ngü ka-ra de ne, ma ena amala teka ewü, agü neh fe? Wüh neh baka wü da? ³² Wüh ena areke ewü ma! Wüh le züka ngü nda-wü de! Wüh de wü mürü yiki, baka wü jaji te ewü ngbü ega yiki esüka wü. Angü wü gara wü bu ewü ngbü ta emala ngü fü ewü, gü ba, 'Ani reke wü ma! Wü le züka ngü nda-wü de. Angü ani ngbü emi ku'du fü wü, wü le alo bi de. Ani ngbü ebi ci gba fü wü, wü le aku gba kpah de!' ³³ Angü, baka ta te Yüwane Mürü Babatiza koro ngbü esüka yi sene, ah zü e fa sü de, ah nzö fi kpah de. Te di bala, wüh ngbü ta efala engu, gü ba, 'Engu de *siti wü di enga me guvu ye!' ³⁴ Amba de-ra, te ma koro esüka yi sene, ma ngbü ezü e, kpah da enzö e, fü ewü angbü kpah efala ra, gü ba, 'Ma de mürü kü. Ma ngbü kpah eküya. Ma kpah de awuba ka siti wü kpara.' ³⁵ Wü kpara te ewü ngbü efala ngü ka-ra ne, ngbü efi nda-wü, gü ba, ani wu ngü fa sü. Amba wüh wü ngü nda-wü kü de. Ah ena adi bü nzö mene wü kpara, te ewü le ngü ka-ra eyi ne, wüh ena angbü ewu si-ngü la me-wü."

Dela ngü te Yesu mala fü wü kpara, teka ngü ka Yüwane Mürü Babatiza.

Dene ngü ka Yesu ake gara Farusi de iri ye Simüna

³⁶ Fütanga ngü la, fü gara *Farusi de iri ye Simüna, ai Yesu, kpa gba ye teka azü e. Fü Yesu ayia anü akoro agba ka. Fü ewü angbü ezü e. ³⁷ Gara würüse ta ladü gbü sü la, te ngbü emere wü *siti ngü efa sü. Te engu je, gü ba, wü Yesu ngbü ezü e agba Simüna, fü ah ayia aza *züka se-mü gbü kölökö,† ari di kpa esambü, gbü nga wü Yesu, o wüh ngbü ezü e. ³⁸ Fü würüse

* 7:22 7:22 Mü ena amaka ngü la gbü buku ka Yisaya 35:5-6; 61:1. † 7:27 7:27 Mü ena amaka ngü la gbü buku ka Malaki 3:1. ‡ 7:37 7:37 Kölökö la, wüh reke gbü da de iri ye alabasita ne.

la akoro angbü eri lö Yesu, akpo da eku gba de ngura. Fü ngungura angbü ego eküte lö Yesu. Fü wüürüse la angbü ekö ngura la de su-nzó ye, da efaka lö Yesu. Fü ah adu aza züka se-mü ka-ye la, akpo etökö da efuru eküte lö Yesu.

³⁹ Te Simüna wu ngü la bala, fü ah akpo da efi nga ngü emaguma ye, gü ba, "Ho! Te Yesu ena adi ta *mürü dofo ka Me fanü fanü la, de bane ah wu eyi, gü ba, 'Wüürüse de te engbü emofu ni ne, ah ka-ye de siti wüürüse, mürü küla.' "§

⁴⁰ Te Yesu wu ngü la bala, fü ah amala ngü fü mürü köti la, gü ba, "Simüna, ni le amala mba enga ngü fü ye." Fü Simüna ale ngü, gü ba, "Wayi, mere kpara, ye mala emala." ⁴¹ Fü Yesu amala ngü fefe gbü mani, gü ba, "Wü kpara 'basu ta ladü, te ewü za matiti ka gara kpara. Gara za nda-ye mere bi jiase, baka kama 'buruve (500), gara za nda-ye ngbee teke 'basu de füh ye nzükpa (50). ⁴² Amba jiase esaka ewü 'basu mini, teka alügü matiti ka kpara la di ne, nda ma. Fü mürü jiase la awu cinga ewü. Fü ah adu ace ngü la fü ewü. Te di bala, kpara te ena ale mürü jiase la afa sü, esüka ewü de 'basu ne, neh da?" ⁴³ Fü Simüna alügü ngü fefe, gü ba, "Ni efi, gü ba, ah ena adi de mene kpara de mere bi jiase gbü nga ye ne." Yesu gü ba, "Wayi, ye mala eyi mbi."

⁴⁴ Fü Yesu afü te-ye kpaka wüürüse la, adu amala ngü fü Simüna, gü ba, "Mü wu wüürüse ne eyi? Ah le ngü ka-ra fa nda-mü ka. Ceka la, te ma koro gba mü sene, mü le ato ngu fere azürü lö ra di de. Amba wüürüse ne, ah zürü lö ra eyi de ngura ye. Fü ah adu akö de su-nzó ye. ⁴⁵ Kpah bala, tüne te mü gü mandí fere ne, mü faka ra nda-mü de. Amba wüürüse ne, ah ce da efaka lö ra nda de. ⁴⁶ Mü za ra reke areke, ba ngba ka-mü ne, kpah de.* Amba wüürüse ne, ah za ra cu reke areke. ⁴⁷ Teka ngü la, ma ngbü emala fü mü, gü ba, mere bi wü *siti ngü ka wüürüse la, te engu mere la, Me boro eyi 'buru asidi. Nih ti eyi awu ngü la bala, angü ah le ra eyi fa sü. Amba te mü gü ba, ni mere siti ngü fa sü de, te ah bala, mü le ngü ka-ra mbi mbi nda-mü kpah de."

⁴⁸ Fü Yesu adu amala ngü fü wüürüse la, gü ba, "Ma boro wü siti ngü ka-mü eyi 'buru."

⁴⁹ Te gara wü *Farusi, de te ewü ngbü ezü e de wü Yesu ne, je ngü la bala, fü ewü akpo da emala ngü esüka wü, gü ba, "Komoko la ngbü eboro siti ngü ka

wü kpara, ne baye baye? Ah ngbü efi, gü ba, ni de Me?"

⁵⁰ Fü Yesu adu amala tüne adu ngü fü wüürüse la, gü ba, "Mü küwa eyi, angü mü to maguma mü eyi fere. Mü nü enü de gü maguma."

8

Dene ngü ka wü wüürüse, ta te ewü ngbü efa nga Yesu

¹ Fütanga ngü la, fü Yesu akpo da endoro de wü *kpara ka-ye nzükpa de füh ye 'basu ne, gbü wü nga nzö köti ka sü la 'buru. Ah ngbü ta emala to ngari Me fü wü kpara kpala, kpah da esere fü ewü, gü ba, "Miri te Me tima teka aküwa wü koro eyi, ah le de wü fü maguma wü afü." ² Wüh ngbü endoro kpah de wü gara wüürüse, ta te engu liki *siti wü di enga me guvu ewü, de wü gara ta te engu küwa ewü gbü wü keke ka-ewü ne. Ah de wü *Mariya Egba-Magadala, ta te Yesu liki siti wü di enga me guguvu lorozi ne, ³ bete Yüwana, wara Kuza, te di de kpara te engbü eceka kpi fütanga tima ka Miri Anitipa *Erode ne, bete Süzana, de mere bi gara ewü. Wü wüürüse la ngbü ta eza wü e ka-wü, adi ele ta-ngü di te wü Yesu.

Dene mani ta te Yesu mala, teka nguwa te wüh moko

Matayo 13:1-23; Marako 4:1-20

⁴ Mere bi wü kpara ngbü ta fi bü ekoro kpaka Yesu, teka adi eja to ngari Me gögömö na. Wüh koro ta gbü nga nzö wü köti ka sü la 'buru.

Gbü gara sikpi, fü Yesu, ayia akpo da emala ngari Me fü mere bi wü kpara la gbü mani, gü ba, ⁵ "Gara komoko ta ladü, te za nguwa ka-ye, anü di, amoko kpa agbü yi. Te engu koro kpala, fü ah akpo emoko nguwa ka-ye la. Fü wü gara nguwa atí nda-wü te jia kaje, fü wü kpara angbü edoto. Fü wü lu awu nguwa la, ayia akoro kere, adoro, ami. ⁶ Fü gara bete nguwa atí füh si-da, te tö di sela mbi mbi ma. Fü nguwa la ayia akö kere, teka ne de, angü tö sela sere sere. Fü ra ayia asü. Fü fundo la aürü ka-ye 'buru, angü sasa na ka-ye de da. ⁷ Fü gara nguwa atí esüka wü ti. Fü nguwa la akö aga de wü fu-ti la 'buru. Fü wü ti awündü züka fu-ndo la. Fü ah adu afü te-ye yi-andüla tete, angü wü fu-ti la ta ewü eyi 'buru. ⁸ Amba wü gara nguwa ti nda-wü gbü züka sü. Fü ewü ayia akö 'buru, aga, arí, azi jia wü, gbrri, afa sü, baka e kama biri (100) te nzö ndo biringbö." Fü Yesu adu amala ngü fü ewü de mere ri ye, gü ba, "Te güje mü ladü la,

§ 7:39 7:39 Mürü küla de siti mürü waza. * 7:46 7:46 Gbü gele ka wü di enga Yisarayele, te ngba koro eköti la, mürü köti ena ato ngu fefe, de ah zürü lö ye di, fü ah adu ato züka se-mü fefe, de ah furu gbü nzö ye.

de mü da güje mü te ngü ka-ra la mbi mbi mbi." Dela ngü te Yesu mala teka nguwa, te wüh moko.

⁹ Te wü *kpara ka Yesu je ngü la bala, fü ewü ayi-tata, gü ba, "Si-ngü gbü mani la, gü neh fe?" ¹⁰ Fü Yesu alügü ngü fü ewü, gü ba, "Ta gügü, wü kpara je si-ngü ka Me nda-wü de. Ngü ka Me ngbü gbü jia ewü 'daaa, ah wo te-ye awo. Nda-yi, wü kpara ka-ra, ma ngbü eyi esere ngü la fü yi 'buru mbölö mbölö, gü ba, Me le de wü kpara 'buru to maguma wü fü ni. Amba wü gara kpara la ti aje si-ngü la nda-wü de, angü wüh le ngü ka-ra de. Teka ngü la, ma ngbü emala ngü la fü ewü 'buru de mani. Ah kpara baka ngü ta te Me mala teka wü kpara la, gömö *mürü dofo Yísaya, gü ba dene, 'Wü ena aceka ngü kani ma, wü ti awu sisi na nda-wü de. Wü ena aje ngari ni, Me, ma, ngü la ti ari gbü nzö wü mbi mbi kpara de.'" ¹¹ Dela ngü ta te Me mala gügü teka wü kpara, te ewü le ngü ka-ra de ne."

¹¹ Fü Yesu akpo da emala si mani la fü ewü, gü ba, "Dene si-ngü gbü mani ka nguwa ne. Nguwa te wüh moko agbü yi ne, ah ka-ye baka ngari Me, te ewü ngbü emala fü wü kpara. ¹² Nguwa te ti te kaje, ah ba wü mene kpara, te wüh mala ngari Me fü ewü, amba ngü la ri gbü nzö ewü, fü ewü ao emaguma wü ne de. Te *Satana wu ngü la bala, fü ah ayia kere, akoro aza ngü la emaguma ewü asidi, angü wüh ena ara fü Me, fü ewü aküwa. ¹³ Nguwa te ti füh si-da, ah ba mene wü kpara, te wüh mala ngari Me fü ewü, fü ewü ayia aje ngü la, ale de mere tadu te wü. Amba wüh rü kpekpeke gbü ngü ka Me de. Wüh to maguma wü bü teka sikipi mba cükü'daye. Baka te cinga maka ewü, fü ewü ayia ace ngü ka Me ka. ¹⁴ Nguwa te ti nda-ye esüka wü ti ne, ah baka mene wü kpara te ewü le ngari Me la eyi, amba wüh maka wazi teka arü kpekpeke, gbü ngü ka Me nda-wü de. Angü fingängü ka-ewü ka-ye 'basu 'basu, teka ngü ka jiaše, de ngü ka tadu, de wü gara e füh kotö ne. Fü wü ngü la angbü esiti fingängü ka wü kpara la, wüh ti amere tima ka Me mbi mbi nda-wü de. Fü ewü angbü ka-wü 'buru baka yi-andüla tete. ¹⁵ Amba, mene nguwa te ti gbü züka sü ne, ah baka mene wü kpara de te ewü je ngari Me, fü ewü ale de maguma wü biringbö, azoro ngü la de kpa wü 'basu, ao to wü, angbü emere. Wü kpara la, wüh baka ndo te ri reke areke, gbrri bala. Dela si-ngü gbü mani teka nguwa ndo la."

Dene gara mani te Yesu mala teka ngü

* 8:10 8:10 Mü ena amaka ngü la gbü buku ka Yísaya 6:9.

ka Me

Marako 4:21-25

¹⁶ Fütanga ngü la, fü Yesu amala kpara gara mani fü ewü, gü ba, "Yi je eyi, gü ba, te wüh siya wa teka alofo sü kpa esambü gbü biti la, wüh ngbü ebuka neh esa sila? Anga eo esa ngbaga? Ah bala de. Wüh ngbü esiya wa, eo kpa tikpi füh e, teka fü ah angbü elofo sü fü wü kpara 'buru. Angü, te wü kpara ena angbü eri kpa esambü la, fü ewü angbü eceka kpi tete mbi mbi mbi. ¹⁷ Kpara bala, ngü ka-ra te wü kpara je mbi mbi de, te wo te-ye awo fü ewü ne, wüh ena awu ngü la te gara, angü Me ena adu asere ngü la fü ewü me-ye ngbaa ngbaa ngbaa. ¹⁸ Yi da güje yi teka ngü, de te ma ngbü emala fü yi ne, mbi mbi mbi. Kükürü de, angü te mü le ngü ka-ra ne eyi la, Me ena adu agü tamu gara wü ngü fü mü gbe. Amba te mü le aje ngü ka-ra nda-mü de, mba enga ngü cükü'daye te di gbü nzö mü ne, ah ena adürü ka-ye adürü asidi."

Dene ngü ka ni ye Yesu de wü di enga ni ye na

Matayo 12:46-50; Marako 3:31-35

¹⁹ Fütanga ngü la, fü wü di enga ni ye Yesu ayia akoro kpara na de wü ni ye na. Te wüh koro tete, fü ewü amaka mere bi wü kpara, te wüh biti te-wü, ngbü ede Yesu, teka aje to ngari Me gögömö. Amba da wü ni ye na, te ewü ena ari anü kpara kpa esambü la, nda ma. ²⁰ Te wü kpara la wu ngü la bala, fü ewü amala ngü fü Yesu, gü ba, "Mere kpara deyi, wü ni ye, de wü di enga ni ye, koro eyi, ngbü kpa etanü kpane. Wüh ngbü ede awu ye." ²¹ Te Yesu je ngü la bala, fü ah ayia amala ngü fü wü kpara la 'buru, gü ba, "Ah mbi, amba mene wü kpara, te ewü ngbü eje riri ka Me, angbü emere ne, wüh kpara baka wüna, de wü di enga wüna."

Dela ngü ta te Yesu mala fü mere bi wü kpara la.

Dene ngü te Yesu tata mere wege di

Matayo 8:23-27; Marako 4:35-41

²² Gbü gara sikipi, fü Yesu ayia amala ngü fü wü *kpara ka-ye, nzükpa de füh ye 'basu ne, gü ba, "Ani nü la kpa etangu." Fü wü kpara kaka ayia ale. Fü ewü ali 'buru gbü *zabu, teka akö ngu.

²³ Fü ewü anü, anü, anü akoro kpa etü mere ngu *Galilaya la. Amba Yesu ti ka-ye eyi era ara. Fü mere wege ayia akoro kere, akpo da efe jia ngu de wazi. Fü zabu akpo da eyiki, efüfü te-ye, da ekolo ngu gbü ye. Fü ngu angbü esi gbü zabu la. Zabu la yia ta ebu ewü abu agbü ngu.

²⁴ Fū wū *kpara ka Yesu angbü de cürü. Fū ewü anü azükü engu, gü ba, "Mere kpara, mere kpara, ani te ekpi! Ani te ekpi!" Fū Yesu ayia azükü, awu ngü la bala. Fū ah amala ngü fū siti wege la, gü ba, "Wege, mü nga anga! Ngu, mü ngbü ziii!" Fū wege ayia anga. Fū ngu angbü ziii. Fū sü ayia anga 'duwa ngbiini!

²⁵ Fū Yesu adu amala ngü fū wü kpara ka-ye, gü ba, "Yi ekpe neh cürü ne? Yi to maguma yi fere mbi mbi la fi de?" Fū ngü la aga gbü jia wü kpara kaka-na la afa sü. Fū ewü angbü de cürü, da emala ngü esüka wü, gü ba, "Apa! De bané neh ene ngü ne? Komoko la neh da, te ngbü emala ngü bü de komö ye, fū wü wege de wü ngu angbü eje riri kaka-na ne?"

Dela ngü ta te Yesu mere, te engu to riri fū mere wege tete.

Dene ngü te Yesu küwa gara komoko,

de mere bi siti wü di engu me guvu ye Matayo 8:28-34; Marako 5:1-20

²⁶ Te wü Yesu kö ngu tete, fū ewü akoro kpa füh gümba, agbü tö ka wü Garasa, te di kpa etangu mere ngu *Galilaya.

²⁷⁻²⁹ Gara komoko ta ladü kpala, te *siti wü di engu me sibi guguvu gbe fa sü. Teká mere bi sikpi, ah ngbü engbü ka-ye ngirimu. Ah ngbü ta eköti nda kpah de, ah ngbü era ka-ye etü wü mbükü. Fū wü di engu me la angbü ta emere engu efa sü. Fū wü kpara angbü 'buru ekpe engu akpe. Fū ewü angbü edü wü kengbe gbü kpakpa, de wü lölö na. Fū ah angbü ekukuru wü kengbe la eküte ye asidi. Fū wü di engu me la angbü eza engu, enü di agbü gü.

Baka te wü Yesu ngbü la bü egoro kpa füh gümba, fū komoko la awu Yesu. Fū ah akoro atü kötö eri lölö na, da eba rere. Fū Yesu amala ngü fū wü siti wü di engu me la, gü ba, "Wü ce engu ace!" Fū komoko la anda'ba te-ye kpaka Yesu, da emala ngü fefe de mere ri ye, gü ba, "Yesu, Ye Mere Me, ye ele amere de ni ne ngü ne? Tima ka-ni gbü ngü ka-ye nda ma! Ni ngbü enda'ba te-ni fü ye, de ye mere e ato kuru te ni la de!" ³⁰ Te Yesu je ngü la bala, fū ah ayi-tata, gü ba, "Iri ye neh da?" Fū komoko la alügü ngü, gü ba, "Iri ni de Bi-nzö-gü." Ah gü iri ye bala, angü wü di engu me sibi guguvu gbe fa sü. ³¹ Fū wü di engu me la, anda'ba te-wü fū Yesu, gü ba, "Ye mere e aliki ani, ato agbü mere du ka cinga ne de."

³² Mere bi wü mba ka köti ta ladü gbü sü la, te ewü ngbü ezü e füh gümba sela. Fū wü di engu me la afüwa te-wü fū Yesu, gü ba, "Ye tima ani, de ani nü ri kpa guvu wü mba la." Fū Yesu ayia ale ngü la fū

ewü, de wüh nü, baka te ewü mala. ³³ Fū wü di engu me la ayia akoro guvu komoko la asidi, ace engu, akpe ari aguvu wü mba la. Fū wü mba la aci de mere woro, ago kpa esa gö, agürü agbü mere ngu, anzö ngu, akpi 'buru kpala.

³⁴ Te wü kpara, de te ewü ngbü eceka kpä fütanga wü mba la, wu ngü la bala, fū cürü amere ewü. Fū gara ewü akpe de woro, anü amala nga ngü, te Yesu mere la, fū wü kpara agbü mere köti, bete wü sü edede la 'buru. ³⁵ Te wüh je ngü la, fū mere bi wü kpara akpe akoro, teka aceka ngü la cu de jia wü. Fū ewü akoro amaka komoko, ta te wü di engu me ngbü emere engu ne, te ngbü ka-ye eri lö Yesu sela. Ah to tüne züka bongo eküte ye, fingangü kaka du koro kpah eyi mbi. Fū ngü la ato cürü fū wü kpara la afa sü, gü ba, "Dela sirimbi!"

³⁶ Fū wü kpara, de te ewü wu ngü la cu de jia wü ne, ayia angbü emala nga komoko la fū wü bu wü, gü ba, "Yesu liki wü di engu me guguvu na me-ye." ³⁷ Fū ngü la ato mere fingangü, de cürü fū wü kpara ka sü la 'buru. Fū ewü aci 'buru ayi-ta Yesu, de ah ce sü ka-ani.

Fū Yesu ali de wü kpara ka-ye gbü *zabu, teka anü ka-wü. ³⁸ Fū komoko de te wü di engu me koro guguvu na ne, ayia anda'ba te-ye fū Yesu, gü ba, "Ni ele anü ka-ni ake ye." Fū Yesu alügü ngü fefe, gü ba, ³⁹ "A'a, ye du edu kpa gba wü, fü ye amala nga züka ngü, de te Me mere fü ye ne, fū wü di engu ni ye." Fū komoko la ayia adu, angbü endoro gbü nga nzö köti la, da emala nga ngü, de te Yesu mere fü ye ne, fū wü kpara.

Dene ngü te Yesu küwa ye Yayirü,

bete gara würiuse

Matayo 9:18-26; Marako 5:21-43

⁴⁰ Fütanga ngü la, fū wü Yesu alügü nga wü adu kpa etangu agbü sü ka-wü, agbü *Galilaya. Te wü Yesu du koro tete, fū mere bi wü kpara aci akoro kpakaka na de mere tadu, angü wüh ngbü ta kü eci ngangá. ⁴¹ Gara komoko ta ladü kpala de iri ye Yayirü. Engu ta de mere kpara te ngbü emere tima kpa *esambü ka bitite. Fū Yayirü ayia akoro, atü eri lö Yesu, anda'ba te-ye fefe gü ba, "Mere kpara deyí, ye koro la mba agba ni, teka aküwa ye ni."

⁴² Angü yeye na ka-ye ta ngebe biringbö, ye würiuse te re kaka di baka nzükpa de füh ye 'basu. Mbarase la ngbü ta eke efa sü, ah yia ekpi akpi. Te Yesu je ngü la, fū ewü ayia anü de wü Yayirü. Fū mere bi wü kpara aci kpah anü gbü nga ewü, da enzinzi te-wü, ededere Yesu.

⁴³ Amba gara würiuse ta kpah ladü sela, te ngüte ngbü ego tete teka wü re nzükpa

de fūh ye 'basu. Ngū la ngbū ta eto mere cinga fū wūrūse la efa sū. Ah ngbū ta enū kpaka mere bi wū mūrū kuwa, de wūh kūwa ni, amba wū mūrū kuwa la to rū fefe ma, ah le ta-ngū tete de. ⁴⁴ Te wūrūse la je nga Yesu, gū ba, "Engu koro eyi sela ne," fū ah ayia agbeke te-ye, anū kpala. Te engu koro kpala, fū ah ayia azi te-ye 'bīlī 'bīlī, esūka mere bi wū kpapa la, anū amofō mō bongo ka Yesu to kpa ekūkūrūfe. Wūrūse la kpah bū te emofō bongo ka Yesu, 'duwa fū ngūte la ayia akolo tete.

⁴⁵ Te Yesu wu ngū la bala, fū ah ayi-ta ngū, gū ba, "E-mofō bongo ka-ni neh da?" Fū wū kpapa 'buru acere nga wū gberē. Fū Petero ayia amala ngū, gū ba, "Mere kpapa, ye ena angbū eyi-ta ngū bala ne, ye wu mere bi wū kpapa, te ewū ngbū egbene sū agbene, ne de?" ⁴⁶ Fū Yesu angbū de ngū la fi gōmō ye, gū ba, "Gara kpapa mofō ni eyi, angū ni wu eyi kpo, gū ba, wazi te Me to fū ni ne mere tima eyi." ⁴⁷ Te wūrūse la wu, gū ba, Yesu wu ngū la eyi, fū ah aka te-ye, akoro atī eri lō Yesu, kūkūte 'buru elo'bōka ka cūrū. Ah du cere nga ye tīne de. Fū ah amala fū Yesu gbū jia wū kpapa la 'buru, gū ba, "Ah de ni, ni mofō bongo ka-ye me-ni. Teka ngū la, fū ni ayia akūwa dene." ⁴⁸ Fū ngū la areke te Yesu, fū ah amala fefe, gū ba, "Enga ra, mū kūwa eyi, teka te mū to maguma mū eyi fere. Mū nū enū de gu maguma."

⁴⁹ Baka te Yesu ngbū la bū emala ngū fū wūrūse la, fū gara kpapa akpe akoro agba Yayīrū, te mbarase kaka ngbū eke ake ne, amala ngū fefe, gū ba, "Yayīrū deyi, ah nza eyi! Ye mere e ambū mere kpapa la tīne de, angū ye ye kpi ka-ye eyi." ⁵⁰ Te Yesu je ngū la bala, fū ah amala ngū fū Yayīrū, gū ba, "Ye mere e akpe cūrū de. Te ye to maguma ye 'buru fū ni, mbarase ka-ye ena akūwa."

⁵¹⁻⁵³ Fū wū Yesu ayia anū akoro agba Yayīrū. Fū ewū amaka wū kpapa kpala 'buru da eku gba de mere cinga te wū, teka kpi ka mbarase la. Te Yesu wu ngū la bala, fū ah amala ngū fū ewū, gū ba, "Wū mere e aku gba de, angū mbarase la ngbū era ka-ye ara, ah kpi akpi nda de!" Fū wū kpapa la, aci 'buru angbū emū ngū ka Yesu la amū, angū wūh wu eyi fanū, gū ba, mbarase la kpi ka-ye eyi.

Fū Yesu ayia arī te sū, te ewū o kō mbarase la tete. Ah le fū mere bi wū kpapa arī kpa esambū kpala de. Ah za bū Petero, *Yūwane ake *Yakobo gbū nga ye, bete wū ye mbarase la, ake ni ye na. ⁵⁴ Fū Yesu ato kpa ye, azoro kpa jaji wūrūse la, amala ngū fefe, gū ba, "Enga ra, mū yia eyia tikpi!" ⁵⁵ Fū mbarase la ayia azūkū gbū kpi. Fū Yesu adu amala ngū fū wū wō ye na ake ni ye na, de wūh to zū-e fefe.

⁵⁶ Fū ngū la aga gbū jia wō ye mbarase la, ake ni ye na afa sū. Fū Yesu amala ngū fū ewū kpekepeke, gū ba, "Wū mere e amala nga ngū la fū wū kpapa de de de."

9

Dene ngū te Yesu tima wū kpapa ka-ye nzūkpa de fūh ye 'basu tete, teka amala ngari Me

Matayo 10:5-14; Marako 6:7-13

¹⁻² Gbū gara ra, fū Yesu ai wū kpapa ka-ye, nzūkpa de fūh ye 'basu ne kpapa ye, angū ah le atima ewū, teka anū amala to ngari Me agbū wū gara sū. Fū engu ato wazi fū ewū, teka fū ewū adi eliki *siti wū di engu me di, de wū muruyi, kpah da ekūwa wū mūrū keke. Fū engu amala ngū fū ewū, gū ba dene, "Yi nū enū, yi mala ngari ra fū wū kpapa, gū ba, 'Miri, te Me tima teka akūwa ani ne, koro eyi. Ah le de wū fū maguma wū afū.' Yi di kpah ekūwa wū mūrū keke. ³ Te yi te enū, yi mere e aza wū e esaka yi de. Yi za ngbanga de. Yi za kombo kpah de. Yi za ambata kpah de. Yi za jiaše kpah de. Yi za bongo 'basu 'basu kpah de. ⁴ Gbū wū sū te yi ena anū akoro gbūgbū na, te wū kpapa la za yi eyi gbū mūrū, de yi ngbū nzō gba kpapa biringbō la, zalū gbū sīkpi te yi ena ayia anū sū tete. ⁵ Kpah bala, teka mene wū sū te wū kpapa le ngū ka-yi gbūgbū de, yi mere e angbū sela de. Yi yia sela asidi, de yi bunda zu-tō ka sū ka-ewū la te lō yi, ce ciki sela, teka agū tamu ngū la fū ewū, gū ba dene, 'Me le ngū ka-wū de, angū wū le ngū wū kpapa ka-ni, Me, kpah de.' " Dela ngū te Yesu mala fū wū kpapa ka-ye, te engu tima ewū ne.

⁶ Fūtanga ngū la, fū wū *kpapa ka Yesu la ayia anū andoro gbū wū kōti ka sū la biri biri 'buru, da emala to ngari Me fū wū kpapa, kpah da ekūwa wū mūrū keke gbū wū sū la 'buru.

Dene ngū te fīngangū ka Miri Anitīpa Erode siti tete,

teka ngū ka Yesu

Matayo 14:1-2; Marako 6:14-16

⁷⁻⁸ Fūtanga ngū la, fū iri Yesu awū ka-ye tīne gbū wū sū la 'buru. Fū wū kpapa akpo da eyi-ta tete-wū, gū ba, "Apa! Mene kpapa la neh da?" Wū gara ewū gū ba, "Ah de *Yūwane Mūrū Babatiza, ta te Miri Anitīpa *Erode mōrō ne, ah zūkū me-ye gbū kpi." Wū gara gū ba, "Ah ena adi de gara *mūrū dofo, te zūkū me-ye gbū kpi." Wū gara gū ba, "Ah de mūrū dofo *īliya, te zūkū me-ye gbū kpi."

Fū Miri Anitīpa Erode aje nga Yesu, fū fīngangū kaka akpo angbū endoro faaa. ⁹ Teka ngū la, fū ah angbū efi ngū, gū ba,

“Angü ni mörö ta Yüwane eyi ne, amba mene kpara, te ni ngbü kphah eje nganga ne, neh da?” Fü ah akpo da egiri kaje, de ni wu Yesu, cu de jia ni.

Dene ngü te Yesu to zü-e di fü mere bi wü kpara

Matayo 14:13-21; Marako 6:30-44; Yüwane 6:1-13

¹⁰ Fü wü *mürü tima ka Yesu, ta te engu tima ewü ne, adu akoro kpakaka. Fü ewü amala nga wü ngü, de te ewü nü mere kpala ne, 'buru fefe. Fü Yesu ayia aza nzö bü ewü, anü di agbü gara sü de iri ye Betesayida.

¹¹ Te wü kpara je, gü ba, Yesu nü sü eyi agbü Betesayida, fü mere bi ewü aci ayia anü afa nganga na kpala. Te Yesu wu ngü la bala, fü ah awu cinga ewü. Fü ah akpo da emala to ngari Me fü ewü, kphah da eküwa wü gara mürü keke esüka ewü.

¹² Etamurago la, o ra ti nza la de, fü wü *kpara ka Yesu, nzükpa de füh ye 'basu ne, ayia angbü de mere fingangü. Fü ewü ayia anü kpaka Yesu, amala ngü fefe, gü ba. “Mere kpara, ani ena amere baye, teka mere bi wü kpara ne? Baka te ani di kpakine edere sü, köti kphah na me, ani ena amere baye? Ah le de ye mala ngü fü wü kpara la, de wüh nü agbü mere köti, teka agiri zü-e, kphah bete sü ka rara fü wü kpala.” ¹³ Te Yesu je ngü la bala, fü ah amala ngü fü ewü, gü ba, “Yi ena ato zü-e fü ewü enatikine me-yi.” Wüh gü ba, “Apa! Mere kpara! Ambata esaka ani sene ngbee 'buruve bete si 'basu ne. Wü e la ena ati de mere bi wü kpara la kü ati fanü? Anga te ani ena anü ase e la, ah ena aza jiasene neh fe?” ¹⁴ Wüh mala ngü la bala kükürü de, angü wüh wu eyi, gü ba, wü kpara la sibi fa sü, wü kpara la ta 'buru baka wü komoko kutu 'buruve (5,000).^{*} Fü Yesu adu amala ngü fü wü kpara ka-ye la, gü ba, “Yi biti wü kpara la, de wüh ngbü kötö tundu tundu, baka wü kpara teke 'basu de füh ye nzükpa gbü sü biringbö.”

¹⁵ Baka te wü kpara kaka-na je ngü la bala, fü ewü anü 'duwa abiti wü kpara la 'buru, angbü gbü wü da-sü ka-wü, baka te engu mala la. ¹⁶ Fü Yesu ayia aza wü ambata 'buruve la, bete wü si 'basu ne esaka ye, ae jia ye, aceka kpi kpa tikpi, agbo nga iri Me teka zü-e la. Fü ah akukuru tü wü ambata la, ato esaka wü kpara ka-ye, de wüh gafa fü wü kpara la 'buru. ¹⁷ Fü wü kpara la aci 'buru, azü e la, asika di, ace dudu na kötö sela. Fü wü kpara ka Yesu adu aro du wü e la 'buru, abiti gbü wü kuwu, asi gbe gbe gbe, nzükpa de füh ye 'basu.

Dela ngü ta te Yesu mere, te engu to zü-e di fü mere bi wü kpara ne.

Dene kpeke ngü te Petero mala teka Yesu

Matayo 16:13-28; Marako 8:27-9:1

¹⁸ Gbü gara ra, fü Yesu anü angbü ka-ye kpi kpi ye, da eku gba fü Me. Fü wü kpara kaka ayia akoro kpakaka na. Fü Yesu ayi-ta ewü, gü ba, “Angü wü kpara ngbü emala tungü ra egü neh fe? Wüh gü ba, ma de neh da?” ¹⁹ Fü ewü alügü ngü fefe, gü ba, “Wü kpara ngbü efi, gü ba, ye de kpeke kpara. Angü wü gara kpara ngbü emala nda-wü, gü ba, 'Mü de *Yüwane Mürü Babatiza.' Wü gara ewü gü ba, 'Mü de mürü dofo *Iliya.' Wü gara emala nda-wü, gü ba, 'Mü de biri kpara esüka wü *mürü dofo ka Me ta gügü ne, te zükü me-ye gbü kpi.' ” ²⁰ Fü Yesu adu ayi-ta ewü, gü ba, “Anga cu de-yi, yi ngbü efi nda-yi teka ra, egü neh fe?” Petero, fü mü ayia arü amala ngü fefe, gü ba, “Mü de *Kurisito, Mere Miri te Me tima teka aküwa a ne!”

²¹ Te Yesu je ngü gömö Petero de bala, fü ah amala ngü fü wü kpara ka-ye la kpekpeke, gü ba, “Yi mere e amala nga ra fü wü kpara, gü ba, ma de Kurisito, ne de.”

²² Fü Yesu adu kphah amala gara ngü fü ewü teka kpi ka-ye, gü ba, “Mere cinga ladü te ena amere ra, angü ah le de cinga mere *Ye Kpara ka Kpi bala. Wü angbe cögbörö kpara, de wü mürü gele ka Me, bete wü *mürü riri, wüh ngbü eyi ekpü ra. Te di bala, wüh ena amörö ra amörö. Amba gbü *ebabata sikipi, Me ena azükü ra gbü kpi la.”

²³ Fütanga ngü la, fü Yesu amala ngü fü mere bi wü kpara la 'buru, gü ba, “Te mü le angbü zu kpara ka-ra la, mü mere e afi nga wü e ka-mü 'buru 'dö de. Mü reke te-mü teka kpi ka-mü, baka kpara te ngbü ebü mere *rü gbegete, te wüh ena abere engu fefeh na, amörö. Fü mü ayia alala fi bü gbü nga ra. ²⁴ Te mü le aküwa te-mü de tete-mü la, mü ti aküwa te-mü nda-mü de. Amba te mü ce te-mü o fü kpi, teka ngü ka-ra la, Me ena aküwa mü me-ye. ²⁵ Mü fi la nga kuru mü! Angü te mü ce ngü ka Me, fü mü adu ato te-mü 'buru teka ngü ka kötö ne, da emaka mere bi jiasene, de mere bi wü züka e, de füh kötö ne 'buru la, wü e la ena aküwa mü fanü? Wüh ti aküwa mü nda-wü de, angü mü ce ngü ka Me eyi! ²⁶ Mü fi nga *adu sikipi, te ma ena adu akoro tete na. Angü de-ra, Ye Kpara ka Kpi, ma ena adu akoro füh kötö ne, de wazi ka Wüba, de wü *malayika kaka

* 9:14 9:14 Gbü gele ka wü Yisaraye, te wüh tanga wü kpara, te ewü biti te-wü la, wüh tanga wü würi de wü jürü jaji nda-wü de.

mini. Angü te mü ce ngü ka-ra, ma ena ace mü kpah ace, gbü adu sikipi, te ma ena adu akoro tete na. ²⁷ Ma ngbü emala fü yi dene zu ngü fanü fanü. Wü gara kpara ladü esüka yi sene, wüh ti akpi la de, zalü te wüh ena awu mere wazi te Me to fere, Ye Kpara ka Kpi, te ma ena aküwa wü kpara di ne feke."

Dela ngü ta te Yesu mala fü wü kpara te ewü le afa nga ye.

Dene ngü ka küte Yesu te fü te-ye

Matayo 17:1-8; Marako 9:2-8

²⁸ Fütanga sikipi 'bajena, fü Yesu aza wü Petero ake *Yüwane, bete *Yakobo. Fü ewü ayia anü kpa enzö mere rüvü, teka aku gba fü Me kpala. ²⁹ Te wüh koro kpala, fü gbüra Yesu ayia afü te-ye, o engu ngbü eku gba fü Me. Fü bongo kaka avi 'duwa kpilili! Ah ngbü kpah eci aci baka ra. ³⁰⁻³¹ Wüh te eceka kpi bane de, gbo! te wü kpara 'basu, te ewü koro de mere wazi ka Me. Fü ewü angbü ero mö de wü Yesu, teka ngü ka kpi kaka-na, te engu ena akpi agbü Yerüsälema ne. Amba wü kpara la, wüh ka-wü de diri wü kovo ka Me ta gügü, wü *Müse ake *Iliya. ³² Te ngü la ngbü emere te-ye tete, Petero de wü bu ye ne kpi ka-wü eyi de ra. Fü ewü adu azükü, awu Yesu, de wü kpara 'basu, te ewü ngbü de ewü ne, te küte ewü ngbü 'buru eci aci gbü wazi ka Me. ³³ Baka te wü kpara la yia ece Yesu tete, fü Petero ayia amala ngü fü Yesu, gü ba, "Mere kpara, wü kpara ne di ngbü enü neh ka-ye? Ah reke ta ngbürü pe te ani ena angbü ka-ani bü sene, angü sü de sene reke gbü jia ni fa sü. Te di bala, ani ena aji wü gugu bata, nda-ye biringbö, nda Müse biringbö, nda Iliya kpah biringbö." Petero mala ngü la bü bala, angü ah wu züka ngü, te engu ena amala ne, nda de.

³⁴ Petero bü te emala ngü la bala, fü sangu ayia akoro agba ewü 'buru. Fü ngü la ato mere cürü eküte wü Petero afa sü. ³⁵ Fü ri Me ayia awü gbü sangu la, gü ba, "Dene zu de Ye ra, te maguma ra le engu fa sü, angü ma fe engu me-ra. Yi di eje riri kaka-na."

³⁶ Fütanga ri Me de te ewü je ne, wüh te efü jia wü bane de, yirri! wü Müse ake Iliya nda-wü tine eyi ma, bü Yesu te ngbü ka-ye kpi kpi ye. Fü ngü la aga gbü jia wü *kpara ka Yesu de bata la afa sü. Fü komö ewü agu 'duwa agu. Gbü wü sikipi la, wüh mala nga ngü, de te ewü wu la, fü biri kpara mbele de.

Dene ngü te Yesu küwa gara mbarase

de siti wü di engu me guvu ye

Matayo 17:14-18; Marako 9:14-27

³⁷ Te kpi seke tete, kpurutokokpi la, fü wü Yesu ayia de wü kpara ka-ye de bata la, adu kpa esa gö. Fü ewü anü amaka te-wü kpah de mere bi wü kpara te kaje. ³⁸⁻³⁹ Esüka mere bi wü kpara la, gara komoko ta ladü te yeye di ngbee biringbö, ye komoko. *Siti wü di engu me ngbü ta emere mbarase la, da egbofo engu kötö. Fü ah angbü eku gba. Fü durufu angbü egoro gögömö tuku tuku bala! Te e la kpo eyi da emere engu la, ah ngbü emere engu sisiti, ah le ace engu kere de. Te komoko la wu Yesu, fü ah akpo enda'ba te-ye fefe na, gü ba, "Akoo, mere kpara! Ye ceka la cinga te ani ne baaa! Ni le de ye küwa la ye ni ne, angü siti wü di engu me ngbü emere engu 'duwa ba-neh-ene-la. ⁴⁰ Ni za engu koro ta di kpaka wü kpara ka-ye, sidi kpa ye sene, de wüh küwa engu ne, amba wazi ewü, te ewü ena aliki wü di engu me la di, nda ma. Fü ni angbü eci nga ye di dene."

⁴¹ Te Yesu je ngü la bala, fü ah ayia amala ngü fü wü kpara ka-ye, gü ba, "De-yi wü kpara ka re ne, yi de wü siti kpara, yi le ato maguma yi fü Me de, neh teka ne? Ma ena angbü de wü yi sene teka re neh fe, teka fü ngü la ari gbü nzö yi?" Fü ah adu afü te-ye, amala ngü fü wö ye mbarase la, gü ba, "Ye koro de mbarase la akine!" ⁴² Te wö ye mbarase la za ta mbarase la, enü di tete kpaka Yesu, wüh te egoro ghamari, fü wü di engu me la ayia agbürü engu, agbo kötö. Fü mbarase akpo eyiyili te-ye. Te Yesu wu bala, fü ah ayia amala ngü fü wü di engu me la kpekpeke, gü ba, "Wü ce engu ace!" Fü wü di engu me ayia ace mbarase la. Fü mbarase la ayia aküwa. Fü Yesu aza engu, ato fü wö ye. ⁴³ Fü komö wü kpara la agu 'buru agu, ga, "Ani wu mere wazi ka Me enatikine eyi!"

Dene e'ba'basu ngü te Yesu mala teka kpi ka-ye

Matayo 17:22-23; Marako 9:30-32

⁴⁴ Baka te mere bi wü kpara la ngbü la fi bü emala nga ngü la esüka wü, fü Yesu afü te-ye, amala ngü fü wü kpara ka-ye, gü ba, "Ngü de te ma emala fü yi dene, ah le de ngü la ri gbü nzö yi mbi mbi mbi. Angü wüh ena ato ra fü wü vügü ka-ra, fü ewü amörö ra." ⁴⁵ Amba ngü de te Yesu mala fü ewü la, wüh wu si-ngü gbügbü na nda-wü de, angü si-ngü la wo te-ye ka-ye fü ewü awo. Wüh le ta de ani yi-ta Yesu teka si-ngü la. Wüh du yi-tata na nda-wü de, ka lümü.

Dene yiki te wü kpara ka Yesu ga, teka kpara esüka wü,

te ena angbü ba mere kpara

Matayo 18:1-5; Marako 9:33-40

⁴⁶ Fütanga ngü la, fü wü *kpara ka Yesu, akpo da ega yiki esüka wü, gü ba, "Kpara te ena angbü mere kpara esüka ani fütanga Yesu neh da?" ⁴⁷ Te Yesu wu fingangü ka-ewü bala, fü ah ayia aza mbarase cükü'daye, ao eode ye. ⁴⁸ Fü ah amala ngü fü ewü, gü ba, "Mene kpara te ena ao ngü ka-ye kötö, baka jaji la, ah ena adi ka-ye me-ye de mere kpara gbü jia Me. Mene kpara te ena aza mbarase baka engu ne gbü mürü, te iri ra la, ah le ka-ye dela cu ra. Kpah bala, te mü le ra eyi la, amba mü le Wüba Me, te tima ra ne, kpah eyi."

⁴⁹ Fütanga ngü la, fü *Yüwane ayia amala ngü fü Yesu, gü ba, "Mere kpara, ani maka gara komoko kpane, te ngbü eliki wü di engu me guvu wü kpara te iri ye. Te ani wu ngü la, fü ani atata engu, de ah ce ngü la asidi, angü engu de kpara esüka ani nda de." ⁵⁰ Te Yesu je ngü la bala, fü ah alügü ngü fü Yüwane, gü ba, "Yi mere e atata engu de, angü mene kpara te gü gü de wü nih de, ah ngbü dela ele ta-ngü te nih."

Dene ngü ka nünü ka Yesu agbü Yerüsalema

⁵¹ Fütanga ngü la, baka te sikipi ka Yesu koro tete ghamari, teka ago agbü kpi, fü Yesu ayia areke te-ye, teka anü agbü Yerüsalema. ⁵² Fü ah ayia atima wü gara kpara ka-ye engagira nü, teka areke sü fü wü gbü gara kötö biringbö, gbü tö ka *Samaríya. Fü wü Yesu adu ayia de wü gara kpara ka-ye, tine fütanga ewü.

⁵³ Te wü kpara gbü köti engu la wu, gü ba, wü Yesu te enü agbü Yerüsalema, fü ngü la asiti te ewü. Te di bala, wüh le de Yesu ra gba ani sela de.

⁵⁴ Te wü *Yakobo ake *Yüwane wu ngü la bala, fü ngü la ake te ewü, fü maguma ewü ayia anzu. Fü ewü amala ngü fü Yesu, gü ba, "Mere kpara, ah le de nih ku gba fü Me, de ah tima wa, teka acuru wü kpara la!" ⁵⁵ Te Yesu je ngü la bala, fü ah afü te-ye, amala ngü fü ewü kpepeke, gü ba, "Yi ce ngü la, angü dela fingangü ka *Satana. Yi wu bala de? De-ra, *Ye kpara ka Kpi, ma koro füh kotö ne teka amörö kpara nda-ra de, amba ma koro teka aküwa ewü."

⁵⁶ Fütanga ngü la, fü ewü ale kaje ka-wü, anü sü, ara agbü gara köti.

Dene ngü te Yesu mala, gü ba, te kpara le afa nga ni la,

ah tüka te-ye atüka

Matayo 8:19-22

⁵⁷ Te wü Yesu ngbü enü tete te kaje ka Yerüsalema la, fü gara kpara ayia akoro kpaka Yesu, amala ngü fefe, gü ba, "Ni ele afa nga ye, gbü wü sü 'buru, te ye ena angbü enü tete. Ni ena alala fi gbü nga

ye, ni ti ace nga ye de." ⁵⁸ Fü Yesu alügü ngü fü komoko la, gü ba, "Ah le de mü wu awu, gü ba, te mü le afa nga ra la, züka ngü te mü ena amaka füh kotö ne nda ma. Angü de-ra, *Ye Kpara ka Kpi, *si fere füh kotö ne, teka ara, afe te-ra tete, nda ma. Angü wü zaza ngbü era nda-wü gbü wü gö ka-wü. Wü lu ngbü era nda-wü kpah gbü wü suta ka-wü. Amba nda-ra, sü fere bala nda ma." Te komoko la je ngü la bala, fü ah adu ace da efa nga Yesu.

⁵⁹ Gbü gara sikipi, fü Yesu amala ngü fü gara kpara, gü ba, "Mü lala gbü nga ra." Fü kpara la alügü ngü fefe, gü ba, "Mere kpara, ni le eyi. Amba wö ni gbe eyi. Ni le adu aci nganga. Te ah kpi eyi la, fü ni ati engu feke, fü ni adu akoro afa nga ye sidi." ⁶⁰ Yesu gü ba, "De-mü, mü nü, mü mala ngari Me fü wü kpara. Mü ce wü di engu ni mü, te ewü le ngü ka-ra de ne, de wüh ti wö mü me-wü, angü wüh ka-wü kpah eyi baka kövö la."

⁶¹ Gbü gara sikipi, fü gara kpara amala kpah ngü bala fü Yesu, gü ba, "Mere kpara, ni le eyi afa nga ye. Amba ah le de ni nü la kpa eköti, asere ngü la fü wü di engu ni ni feke. Ye ci nga ni. Ni ena adu akoro."

⁶² Te Yesu je ngü la bala, fü ah amala ngü fefe, gü ba, "Te maguma mü 'basu 'basu la, mü ti ara fü Me, amere tima kaka mbi mbi de."

10

Dene ngü te Yesu tima wü kpara ka-ye,

teke bata nzükpa de füh ye 'basu

¹ Fütanga ngü la, fü Miri Yesu ayia afe kpah gara wü kpara ka-ye teke bata nzükpa de füh ye 'basu (72) ne, teka atima ewü 'basu 'basu kpa engagira nü, gbü wü sü 'buru te engu ele anü tete. ² Fü ah amala ngü fü ewü, gü ba, "Bi wü kpara ladü, te ewü di eyi nzo teka ato maguma wü fere. Amba wü kpara te ewü ena amala ngü ka-ra fü ewü, wüh ka-wü mba nzoko. Ah baka yi te di memere fa sü, amba wü kpara, te ewü ena amere tima gbü yi la, wüh be nda-wü de. Te di bala, ah le de yi yi-ta Me, te di de mere mürü tima la, de ah tima wü gara kpara, teka ale ta-ngü te yi gbü tima la. ³⁻⁴ Yi nü enü! Yi mere e aza mere bi wü e esaka yi de. Yi mere e aza jiase de, yi za kombo kpah de, yi za gara kamaka fü yi kpah de. Yi mere e angbü erürü te kaje, da egü mandí fü wü kpara 'daaa de. Te di bala, yi ceka 'be, angü ma tima yi dene baka wü kambiliki esüka wü siti kpara, te ewü di baka siti wü nü.

⁵ Te yi koro gbü gara köti, gina ngü te yi ena amala fü ewü, yi ena ato mandí fü ewü, gü ba, 'Me di de yi, gbü köti ne.' ⁶ Te

mürü köti la de züka kpara, de lele ka Me emagama ye la, mandü ka-yi, de te yi to de gu ngü ka Me gbü ye ne, ah ena angbü fefe na. Amba te mürü köti la le ngü ka-yi de, züka gu ngü ka Me, te yi to fü ewü ne, ti angbü gbü köti la nda de.

⁷ Gbü mene köti, de te wüh ena ale ngü ka-yi, yi ngbü duu sela, yi zü wü e 'buru, de te wüh ena angbü eto fü yi ne. Anga te ah de e-manzö, baka ngu, yi mere e ace de, angü ah le fü kpara te ngbü emere tima ne, amaka na tima ka-ye. Yi mere e angbü endoro, da era gba wü kpara fa fa fa, da egiri wü züka ngü, ne de. ⁸ Gbü wü sü 'buru, de te yi ena akoro gbügbü, te wüh le ngü ka-yi la, yi ngbü sela. Wü e 'buru, de te wüh ena ato fü yi ne, yi zü azü. Yi mere e ace de. ⁹ Te yi maka wü mürü keke gbü wü sü la, de yi küwa ewü aküwa. De yi mala kpah fü wü kpara 'buru gü ba, 'Wü fü maguma wü efü, angü Miri, te Me tima teka aküwa ani ne, koro eyi.' ¹⁰⁻¹¹ Amba te yi nü koro gbü wü gara sü, te wü kpara le ngü ka-yi de la, yi mere e angbü sela de. Yi yia sela asidi, de yi furu zu-tö gba ewü la esatilö yi asidi, de yi mala fü ewü, gü ba, 'Ani mere ngü la kükürü de, angü ani mere bala teka ace kina ka Me gbü nzö wü. Amba ah le fü wü awu, gü ba, Miri, te Me tima teka aküwa ani ne, koro eyi.' "

¹² Fütanga ngü la, fü Yesu amala fü ewü, gü ba, "Ngü te ma emala fü yi dene, ah zu de kpeke ngü. Gbü sikipi te Me ena akolo ngü ka wü kpara, ah ena ato mere kuru te wü kpara gbü sü la, afa nda siti wü kpara ka *Sodomo ta gügü ne afa."

¹³ Fü Yesu adu amala gara ngü, teka wü kpara gbü wü köti, te engu ngbü emere tima ka-ye gbügbü ne, gü ba, "De-yi wü kpara ka Korazina, de wü kpara ka Betesayida, Me ena ato mere kuru te yi te gara, angü yi le ngü ka-ra de. Angü wü mere kpeke ngü, de te ma ngbü emere gbü wü sü ka-yi ne, te ma ena angbü emere ta bala fü wü *ganzi kpara, baka wü kpara ka Tera ake Sidona la, de bane wüh ngbü ta eyi de mere cinga te-wü, teka *siti ngü ka-wü, da eto kala bongo eküte wü, eza kpah mbï abu gbü nzö wü, da enda'ba te-wü fü Me, agü ba, 'Ani le eyi afü maguma ani!' ¹⁴ Teka ngü la, gbü sikipi te Me ena akolo ngü ka wü kpara, ah ena ato mere kuru te yi, wü kpara ka Korazina ake Betesayida, afa nda wü kpara ka Tera bete Sidona ka. ¹⁵ Kpah bala, de-yi, wü kpara ka Kaparanama, yi fi nda-yi, gü ba, ngü ka-ani ena areke gbü jia Me, fü ani akoro agbü kpi? A'a! Ah bala de! Ngü ka-yi ena

asiti gbü jia Me asiti, fü yi anü agbü du ka wa, angü yi le ngü ka-ra de."

¹⁶ Fütanga ngü la, fü Yesu adu amala ngü fü wü kpara ka-ye, te engu yia etima ewü la, gü ba, "Kpara te ena aje ri yi, engu ngbü dela eje ri ra. Mene kpara te je ri yi de, ah je ri ra kpah de. Kpah bala, kpara te je ri ra de, ah je ri Me te tima ra ne, kpah de."

Dela ngü te Yesu mala fü wü kpara ka-ye teke bata nzükpa de füh ye 'basu (72), te engu tima ewü ne. Fü ewü ayia anü amere tima, kpah baka e te Yesu mala fü ewü la.

Dene ngü ka dudu ka wü kpara ka Yesu,

teke bata nzükpa de füh ye 'basu ne

¹⁷ Te wü *kpara ka Yesu teke bata nzükpa de füh ye 'basu (72) ne mere tima ka-wü nza tete, fü ewü adu akoro kpaka Yesu. Fü ewü angbü de mere tadu, da emala nga ngü la fefe, gü ba, "Wayi bala, mere kpara, baka e te ani nü ne, ani ngbü eto riri fü *siti wü di engu me te iri ye. Fü ewü angbü eje ri ani, da ekpe ani akpe!" ¹⁸ Fü Yesu amala ngü fü ewü, gü ba, "Ngü la mere te-ye kükürü de, angü Me sö *Satana eyi kpa kötö. Fü ra awu engu te ngbü eyere, eti baka ülele ka mügbara, angü Me nza wawazi eyi. ¹⁹ Yi je la ngü de te ma emala fü yi ne. Ma to wazi eyi fü yi, teka amere gü de wü siti wü di engu me, te ewü di de vügü ka-nih ne, da eza esaka ewü. Te di bala, yi ti eyi adoto wü kpürü, de wü etünü* gbü lö yi. Gara siti ngü biringbö ti amere yi kpo de. ²⁰ Yi ngbü de tadu, teka ngü ka wü di engu me, de te ewü ngbü eje riri ka-yi ne? Wayi, ah mbi, amba ah le fü yi angbü de mere tadu, angü wüh ba iri yi eyi gbü buku ka *küküwa agbü kpi."

Dene ngü teka tadu ka Yesu

Matayo 11:25-27; 13:16-17

²¹ Fütanga ngü la, fü Yesu ayia angbü de mere tadu emagama ye, teka ngü te Me mere fü wü kpara ka-ye, te wü bu ewü ngbü eceka ewü baka töndö kpara ne. Fü ah akpo da egbo nga iri Me gbü wazi ka *Nzila Wazi Me, gü ba, "Wayi, Wüba Me, mü de Miri agbü kpi, mü kpah de Miri füh kotö ne, gbü nzö wü kpara 'buru. Ma ngbü egbo nga iri mü, angü mü wo ngü ka-mü te wü e-wu-ngü, de angbe cögbörö wü kpara 'buru, awo. Fü mü adu agü tamu ngü la fü töndö wü kpara, te ewü di ka-wü baka wü jaji ne. Ah fanü Wüba, ngü engu ka-ye bala, angü mü le ngü la me-mü, de ah mere te-ye bala.

²² Wüba, mü ce wü ngü eyi 'buru esaka ra. Kpara biringbö te wu ngü ka-ra mbi mbi mbi nda ma, 'duwa de-mü Wüba, mü

* 10:19 10:19 Etünü, ah baka jigbe. Gbü ngü Arabi, ah de agarabu.

wu ngü ka-ra ka-mü me-mü. Kpah bala, kpara biringbö, te wu ngü ka-mü, Wüba, nda ma. Ma wu ngü ka-mü duu me-ra, de wü kpara te ma gü tamu ngü ka-mü fü ewü ne."

²³ Fütanga ngü la, fü Yesu adu afü te-ye kpaka wü kpara ka-ye, amala ngü bü nzö fü ewü, gü ba, "Me mere züka ngü eyi fü yi, angü yi ngbü eceka wü ngü, de te ma ngbü emere ne, cu de jia yi!" ²⁴ Angü ta gügü wü *mürü dofo, de wü miri, de wü diri kpara ka Me 'buru, ngbü ta eo gümü ra, de ani wu ra cu de jia ani, baka te yi ngbü ewu dene, amba wüh wu ra nda-wü de. Wüh le ta de ani di eje ngü, te ma ngbü emala ne, baka te yi ngbü eje de güje yi dene, amba wüh je nda-wü kphah de."

Dela ngü ta te Yesu mala fü wü kpara ka-ye teke bata nzükpa de füh ye 'basu (72) ne, gbü sikipi, te ewü du koro kpakaka na, fütanga tima, de te engu tima ewü di ne.

Dene mani te Yesu mala teka ganzi kpara te mere züka ngü

²⁵ Fütanga ngü la, fü gara *mürü riri biringbö ayia akoro kpaka Yesu, teka are mamagama gbü mani. Fü ah ayi-ta Yesu, gü ba, "Mere kpara, ni ena amere neh baye, teka fü ni aküwa, angbü gbü sü ka Me, fi mere badi?" ²⁶ Yesu gü ba, "Gbü *Riri ka Me te engu to fü nih ne, wüh ba teka ngü la, gü neh fe?" ²⁷ Fü mürü riri la, alügü ngü, gü ba, "Ma je ngü gbü Riri la, gü ba,

'Mü le Mere Me de maguma mü biringbö, mü o fingangü ka-mü kphah 'buru tete, mü le ngü kaka de wazi mü kphah 'buru, mü to te-mü kphah 'buru fefe.

De mü le wü bu mü kphah baka e te mü ngbü ele küte mü."

²⁸ Fü Yesu alügü ngü fefe, gü ba, "Züka ngü, mü mala ngü la eyi reke areke. Ah le de mü mere bala, teka fü mü aküwa."

²⁹ Fü mürü riri la adu afi ngü emagama ye, gü ba, "Te ni le ngü la 'duwa ale la, wü kpara ena afi, gü ba, Yesu za ngü gömö ni eyi." Fü ah adu kphah ayi-ta Yesu, gü ba, "Mene wü bu ni, te ni ena ale ewü ne, neh mene ewü dey?"

³⁰ Fü Yesu adu amala ngü fefe gbü mani, gü ba, "Ta gbü biri ra, gara komoko yia ta agbü Yerüsalema, teka anü agbü Yeriko. Te engu nü koro kpa etungba kpala, fü ah anü amaka te-ye de wü siti kpara, te ewü ngbü efete wü kpara. Fü wü kpara la azoro engu, amü, agbo kötö, agbene wü bongo kaka 'buru, aza wü jiase kaka, akpe ka-wü, atafa, ace engu gbülüküsü kötö sela.

³¹ Fütanga ngü la mba cükü'daye, fü gara *kovo ka Me angbü enü kphah bü te kaje engu la. Fü engu anü akoro, gbo! te

komoko la kötö! Fü cürü ari tete, fü ah ade sü ka-ye edere sü, anye sü.

³² Sidi nga kovo la, fü gara kpara gbü nguwa *Levi, te ewü ngbü emere tima kpa esambü ka Me, ayia kphah akoro te sü te ewü mü komoko la tete. Fü ah aka te-ye, akoro gbamari, aceka komoko la bala, akolo sü ka-ye kphah kpa edere sü, atafa.

³³ Fütanga engu Levi la, fü gara komoko angbü kphah efü te kaje la. Ah ka-ye de *ganzi kpara, engu *Samaríya. Te engu Samaríya la wu komoko la bala, fü cinga komoko la ari tete afa sü. ³⁴ Fü ah aka te-ye, akoro gbamari kpakaka na. Fü ah ae engu tikpi, aza rü te wüh mere de ngu *vinü, azürü wü ka de eküküte la di, a'büra de mü, ai de züka bongo. Fü ah ae engu, ao füh nü ka-ye, de te engu ngbü endoro di ne, abi engu, anü di agbü kambü ka wü ngba. Fü ah ale ta-ngü tete kpala areke areke.

³⁵ Baka egambi la, fü ah aza jiase, ato fü mere kpara ka tima ka kambü ka wü ngba la, amala ngü fefe, gü ba, 'Ni ce komoko ne eyi esaka ye, de ye le ta-ngü tete na mbi mbi mbi. Te jiase la be de, de ye za jiase ka-ye, ye se wü e tungüngü na di. Ni ena adu akoro, alügü na jiase ka-ye la 'buru da ye."

³⁶ Dela ngü ta te Yesu mala fü *mürü riri la. Fü ah adu ayi-tata na, gü ba, "Esüka wü kpara ta de bata la, kpara te mere züka ngü neh da?" ³⁷ Fü mürü riri la alügü ngü, gü ba, "Ah de mene kpara, de te le ta-ngü te komoko la." Fü Yesu adu amala ngü fefe, gü ba, "Wayi, ah ngbü baka te mü mala la. Mü nü enü, de mü mere züka ngü fü wü bu mü kphah bala."

Dene ngü ka Yesu de wü Mariya ake Marata

³⁸ Baka te wü Yesu ngbü la fi bü enü tete agbü Yerüsalema, fü ewü anü akoro agbü Betaniya. Fü gara würüse de iri ye Marata ayia aza ewü agba ye, baka wü ngba ka-ye. ³⁹ Gara engu ni ye Marata ta ladü de iri ye *Mariya. Te wü Yesu koro ngbü kötö, fü Mariya akoro angbü kötö eri lö Yesu, teka aje ngari Me gögömo na. ⁴⁰ Fü maguma Marata angbü enzu te Mariya, teka bi wü tima, te engu ngbü emere zü-e fü wü Yesu ne. Angü Mariya ce ta engu gbü tima la kikipi ye. Fü Marata akoro kpaka Yesu, amala ngü fefe, gü ba, "Mere kpara, ngü la gbü jia ye neh baye, te engu ni ni, Mariya, ce ni, embü de tima kikipi ni de bane ne? Ye mala fefe, de ah koro, ah le ta-ngü te ni ke!" ⁴¹ Fü Yesu alügü ngü fefe, gü ba, "Apa, Marata, mü ngbü engbü de mere fingangü ne bü teka mere bi wü tima te mü ngbü emere ne? Ah le bala de. Ah le de mü o fingangü ka-mü

biringbö teka ngü ka Me. ⁴² Ngü de te engu ni mü, Mariya fe, teka angbü eje ri ra ne, ah de züka ngü te reke fa sü. Wüh ti aza ngü la esasaka na asidi de." Dela ngü te Yesu mala fü Marata teka ngü ka maje ngari Me.

11

Dene ngü te Yesu mala fü wü kpara ka-ye, teka maku gba fü Me

Matayo 6:9-13; 7:7-11

¹ Gbü gara sikipi biringbö, Yesu ngbü ta eku gba fü Me gbü gara sü. Te engu ku gba fü Me nza tete, fü gara kpara biringbö esüka wü kpara kaka-na, ayitata, gü ba, "Mere kpara, ye gü tamu maku gba fü Me fü ani, kpah baka nda *Yüwane Mürü Babatiza, ta te engu gü tatamu fü wü kpara ka-ye ne ke." ² Fü Yesu amala fü ewü, gü ba, "Te yi ngbü eku gba fü Me la, yi di emala fefe, gü ba, Wayi bala Wö a Me agbü kpi! Ah le fü wü kpara 'buru agbo nga iri mü, angü mü de Me biringbö. Mü de Mere Miri.

Mü koro, mü ngbü gbü nzö wü kpara füh kotö ne, baka e te mü ngbü engbü agbü kpi. ³ De mü to zü-e fü a gbü wü sikipi biri biri 'buru.

⁴ Mü boro wü *siti ngü ka-a emaguma mü asidi, angü a ngbü kpah eboro siti ngü ka wü kpara, de te ewü ngbü emere fü a ne. De mü ce a, fü a ati gbü re-ngü ka *Satana, de, angü a ena adürü."

Dela gba te Yesu gü tatamu fü wü kpara ka-ye, de wüh di eku bala fü Me.

⁵⁻⁶ Fütanga ngü la, fü Yesu adu kpah amala ngü fü ewü, gü ba, "Te ngü fa mü, fü mü anü kpaka gara kiri mü gbü biti, ayitata, gü ba, 'De-ye deyi, gara engu ni ni koro eyi, gbü gara sü nengete, titine kpaka ni gbü biti ne. Amba mba engu e, te ni ena ato fefe titine de ah zü ne, nda ma. Ni koro dene ayi-ta ye, teka de ye le ta-ngü te ni, ato mba ambata ngbee bata fü ni, teka fü ni ato fefe na, de ah zü.'" ⁷ Te mü mere bala, kiri mü te di kpa esambü ne, ena alügü ngü fü mü, agü neh fe? Ah ena alügü ngü, gü ba, 'A'a, ah ti de! Mü ce da embü ni gbü biti bane! Angü ani ri eyi de wü jaji ka-ni 'buru kpa esambü era ara. Ani ni möngiti ka-ani kpah eyi. Ni ti akoro, teka ato ambata fü mü gbü biti bane, nda-ni de.' Kpara ladü te ena alügü ngü bala fü engu ni ye? Ah nda ma! ⁸ Ma ngbü emala fü yi dene kpeke ngü, te engu le ayia teka

ato ambata la fü mü de, amba teka ii, de te mü ngbü fi bü embü engu di ne, engu ena ayia tine bü bala, ato wü e de te mü ngbü ele ne fü mü, teka fü mü ace da embü ni.

⁹ Nda-ra, ngü de te ma le amala fü yi ne, ah dene. Yi fi nda-yi, gü ba, Me le ato züka ngü fü ani de? Ah bala de. Te cinga e ngbü emere mü la, mü ngbü fi bü da eyo eküte Me, Me ena ato e la ato fü mü. Mü ngbü fi bü da eyo tata gbü wü sikipi 'buru, mü mere e ace da ei engu de, ah ena amere ngü la fü mü. ¹⁰ Angü wü kpara 'buru, de te ewü ngbü eyo e ne, Me ngbü eto e la fü ewü ato. Wü kpara 'buru, de te ewü ngbü egiri e kpaka Me, wüh ngbü emaka amaka. Me ngbü kpah eü möngiti fü mene wü kpara, de te ewü ngbü eü i ne. ¹¹⁻¹² Gara süka yi ladü sene te di de wü ye wü jaji, te yeye na yo zü-e tete la, ah ena aza kpürü, ato fefe? ¹³ De-yi, te yi di de siti wü kpara ne, te yi wu da eto züka wü e fü wü jaji ka-yi ereke areke la, amba yi fi nda-yi, gü ba, Me te di de Wö nih agbü kpi ne, ti ato züka ngü fü ani afa sü di de? Te di bala, ah le de yi yi-tata, de ah to *Nzila Wazi ye fü yi. Ah ena ato Nzila Wazi la ato fü yi. Angü delu ngü te reke eküküte cu fa sü!"

Dela ngü te Yesu mala fü wü kpara ka-ye, teka maku gba fü Me.

Dene ngü te Yesu mala teka siti wü di engu me

Matayo 12:22-30, 43-45; Marako 3:22-27

¹⁴ Gbü gara sikipi, fü Yesu ayia aliki *siti wü di engu me guvu gara kpara, ta te ro mö de. Te wü di engu me la koro tete guguvu asidi, fü komoko la akpo da ero mö ereke areke. Fü ngü la aga gbü jia wü kpara afa sü.

¹⁵ Fü gara wü kpara akpo da emala ngü esüka wü, gü ba, "Yesu ngbü emere ngü la kükürü de, angü *Satana,* te di de miri ka wü di engu me ne, ngbü eto wazi la fefe na me-ye, teka adi eliki wü di engu me la di." ¹⁶ Wü gara kpara ngbü nda-wü ta egiri kaje, teka akpa ngü ka Yesu. Teku ngü la, fü ewü ayi-tata, de ah mere ngü ka talara fü ani, teka fü ani awu, gü ba, ah ngbü emere tima ka-ye la, de wazi ka Me fanü. ¹⁷ Amba Yesu wu fingangü ka-ewü la eyi kpo, fü ah amala ngü fü ewü, gü ba, "Te nguwa wü kpara biringbö kpo eyi da emere gü esüka wü la, ngü la ena adi mbi? Ah reke nda de. Nguwa ewü ena akpi, anza ka. ¹⁸ Kpah bala, te Satana du ngbü tine cu egü gü esüka wü de wü kpara ka-ye la, ah ena ayiri gbü miri ka-ye la ayiri? Ngü kaka ena anza ka. Te di bala, ngü te

* 11:15 11:15 Gara iri Satana de Belezubaba.

yi mala, gü ba, Satana ngbü eto wazi fere me-ye, teka fü ra adi eliki wü di enga me di ne, ah de töndö ngü."

¹⁹ Fü Yesu adu ayi-ta wü kpara la, gü ba, "Te yi gü ba, ma ngbü eliki wü di enga me de wazi ka Satana la, amba e-ngbü eto wazi fü wü kpara ka-yi, teka adi eliki wü di enga me di, neh da? Tek a ngü la, zu wü kpara ka-yi, ena adi emala nga yi me-wü fü wü kpara, gü ba, ngü te yi mala la, ah de töndö ngü. ²⁰ Ma emala fü yi fanü fanü, gü ba, ma ngbü eliki wü di enga me gbü wazi ka Me. Te di bala, ah le de yi wu, gü ba, kpara te Me tima aküwa yi ne koro eyi!

²¹ Yi fi la nga ngü ne mbi mbi mbi! Te kpeke kpara ladü de wü e ka gü esaka ye la, e-ena agbene wü e kaka neh da? Angü ah ngbü eceka kpi fütanga kambü ka-ye 'be 'be 'be. ²² Amba te gara kpeke kpara koro, te wawazi fa nda gina kpara la, fü ah amere gü kpakaka na, afa engu la, ah ena agbene wü e kaka, ta te engu ngbü eo fingangü ka-ye tete na la 'buru. Fü ah aza wü e la, anü di, agafa fü wü kpara ka-ye. Te di bala, yi ti eyi awu, gü ba, wazi ra fa nda Satana, te ngbü embü yi de füh kotö ne, ka. ²³ Te di bala, te mü le ngü ka-ra de, mü de vügü ka-ra. Te mü le ta-ngü te ra gbü tima ka-ra de, mü ngbü nda-mü dela egiri kaje teka asiti tima la."

²⁴ Fü Yesu adu amala kpa h gara ngü fü ewü, gü ba dene, "Te wü di enga me koro eyi guvu kpara asidi la, wüh ena amere baye? Wüh ena anü, angbü endoro, gbü wü siti sü te ürü aürü, egiri mene sü te wüh ena angbü tete. Amba, te wüh maka sü kpala de la, wüh ena adu afi nga ngü, gü ba, 'Ani du la edu agbü sü ka-ani, ta te ani ngbü gbügbü na,' ne. ²⁵ Te wüh du kpaka kpara la, fü ewü amaka maguma kpara la mböömbo, *Nzila Wazi Me gbügbü na ma la, ²⁶ wüh ena anü agiri gara wü bu wü, de ani ngbü de ewü. Fü ewü anü amaka wü gara wü bu wü lorozi, te wazi ewü fa nda gina ewü la. Fü ewü adu ari angbü de ewü guvu kpara la. Te di bala, adu ngü ka kpara la ena angbü baye? Ah ena angbü emere wü siti ngü, tine afa mene wü ngü, de te engu ngbü ta emere te enga gina, ne ka."

²⁷ Te Yesu ngbü la bü emala wü ngü la bala, fü gara würüse ayia esüka mere bi wü kpara la, amala ngü fefe, gü ba, "Wayi bala, mere kpara, züka ngü ngbü fü mene würüse ta te bi mü, aga mü de ngu-ka ye ne!" ²⁸ Te Yesu je ngü la bala, fü ah adu amala ngü fü würüse la, gü ba, "Wayi, amba züka ngü te fa ngü la, ah ka-ye fü

wü kpara, de te ewü ngbü eje ngari Me, da emere wü riri kaka-na ne!"

Dene ngü te Yesu mala teka ngü te ena asere fü wü kpara, gü ba, Me tima ni me-ye Matayo 12:38-42

²⁹ Fütanga ngü la, fü mere bi wü kpara akpo da ekoro kpaka Yesu, teka aje ngü gögömö na. Fü Yesu ayia amala ngü fü ewü, gü ba, "De-yi, wü kpara ka re ne, yi ka-yi de siti wü kpara. Angü yi ngbü eyi-ta ra, de ma mere lara ngü ka talara gbü jia ani, teka fü ani awu, gü ba, Me tima ra me-ye fanü. Te di bala, Me ti agü tamu lara ngü biringbö fü yi nda de. Ah ena adi bü mene lara ngü, te ena amere te-ye baka nda *Yona tane. ³⁰ Fanü fanü ngü ka-ra ena adi kpa h baka nda Yona. Angü Yona ti ta gbü mere *yi-ngu, fü mere si ayia ami engu. Fü Yona ara guvu mere si la sikipi bata. Gbü *ebabata sikipi la, fü si la ayia azi Yona kpa edere ngolo füh siki. Fü Yona ayia anü agbü Nineve ba e ta te Me mala fefe, de ah nü, ah mala ngari ni, Me, fü wü kpara de kpala ne. Fü ngü ka Yona la agü tamu wazi ka Me fü wü kpara ka Nineve. Fü ewü ayia afü maguma wü.† Kpa h bala, de-ra *Ye Kpara ka Kpi, kö ra ena ara gbü tö sikipi bata, fü ra adu azükü.

³¹⁻³² Te di bala, gbü *adu sikipi, te Me ena akolo ngü ka wü kpara füh kotö ne tete, ah ena ato mere kuru te yi, wü kpara ka re ne, angü yi le ngü ka-ra de. Wü kpara ka Nineve ena ayia gbü sikipi la, amala nga siti ngü ka-yi, angü wüh je ta ri Yona, fü ewü afü maguma wü, adu ale ngü ka Me. Amba ngü ka-ra, te fa nda Yona ka ne, yi le aje nda-yi de. Kpa h bala, mere würüse, ta te engu di de miri ka Seba, ena ayia kpa h amala nga siti ngü ka-yi, angü ah yia ta agbü tö ka-ye, nengete kpala, akoro teka agbo nga iri Miri *Solomona, teka wazi te Me to fü Solomona ne.‡ Amba wazi ra te fa nda Solomona ka ne, yi le nda-yi kpa h de! Dela si-ngü te Me ena ato mere kuru te yi tete, angü engu tima ra teka aküwa yi, amba yi le ngü ka-ra nda-yi de!"

Dela ngü ta te Yesu mala fü bi wü kpara la, teka ngü ka talara, te ewü le de Yesu mere fü ani.

Dene ngü te Yesu mala teka jia kpara

³³ Fütanga ngü la, fü Yesu amala gara ngü fü ewü, gü ba, "Te wüh siya wa, teka alofo sü kpa esambü gbü biti la, wüh ngbü ebuka neh esa sila? Ah bala de. Wüh ngbü esiya wa, eo kpa tikpi, ga füh e, teka fü ah angbü elofö sü kpa esambü 'buru.

³⁴ Jia mü, ah baka ze-wa te ngbü elofö sü fü mü. Te jia mü ngbü eceka kpi 'be

† 11:30 11:30 Mü ena amaka ngü ka Yona, gbü buku ka Yona. ‡ 11:31-32 11:31-32 Mü ena amaka ngü la gbü gina buku ka wü Wü Miri 10:1, bete e'ba'basu buku ka 2 Ngangü 9:1.

la, mü ka-mü baka kpara te ngbü endoro gbü ra-sü. Amba te jia mü ceka kpi mbi mbi de la, mü ka-mü baka kpara te ngbü endoro gbü mbiri-sü. ³⁵⁻³⁶ Angü te jia mü ü eyi aü, awu ngü ka-ra mbi mbi la, wü *siti ngü de te mü ena amere, mü ena awu ewü 'buru, gü ba, ni ngbü dela emere siti ngü, 'duwa fü mü ace, angü ma ena angbü elofu sü fü mü me-ra. Tekä ngü la, ah le fü mü aü jia mü aü gbü ngü ka-ra, angü ah ena adi baka ze-wa fü mü. Te mü le ngü ka-ra de la, ah ena adi ba e te jia mü ni eyi, fü mü angbü endoro gbü bitü."

Dene ngü te Yesu mala teka wü Farusi de wü mürü riri

Matayo 23:29-36

³⁷ Te Yesu mala ngü la fü wü kpara nza tete, fü gara *Farusi aï Yesu teka de ah nü, ah zü e kpa gba ni. Fü Yesu anü ari kpa esambü, angbü kötö. ³⁸ Baka te Yesu kpo da ezürü kpa ye, ah mere baka riri ka gele ka wü *Yisaraye ne nda de. Fü ngü la asiti te Farusi la, angü fingangü kaka gü ba, mere kpara baka Yesu, te ngbü eri wü kpara de bala ne, ena amere ta riri ka gele ka-ani, ka wü Yisaraye, areke areke.

³⁹ Fü Miri Yesu awu ngü te di emam-aguma la teke. Fü ah alügü ngü fefe, gü ba, "De-yi, wü Farusi, yi ele nda-yi bü adi ezürü wü kpa yi, de küte wü ndü'ba bete wü sila, amba kpa emaguma yi, siti fingangü bete gimü wü e ladü, te sibi fa sü! ⁴⁰ Dela töndö ngü! Yi ngbü efi nda-yi, gü ba, Me de te mere küte yi ne, ah mere maguma yi kphah me-ye nda de? ⁴¹ Yi za gara wü e ka-yi, te di gbü wü ndü'ba de wü sila ka-yi la, de yi to fü wü mürü cinga. Te yi mere bala, ngü ka-yi ena areke gbü jia Me."

⁴² Fü Yesu amala ngü fü wü Farusi la, gü ba, "De-yi wü Farusi, Me ena ato mere kuru te yi te gara! Angü yi ngbü eo fingangü ka-yi kpekepe teka riri ka gele ka-yi. Baka te yi ngbü eto tari wü e ka-yi 'buru fü Mere Me ereke areke ne, ah esiti de, amba to yi iri eyi teka ale Me de maguma yi, anga teka amere züka ngü fü wü mürü cinga. Dela ngü te siti gbü jia Me fa sü.

⁴³ De-yi wü Farusi, Me ena ato mere kuru te yi te gara! Angü yi o to yi 'buru teka de wü kpara di ecu ngü ani. Tekä ngü la, te yi ri kpa *esambü ka bitü-te la, yi le 'duwa adi engbü füh züka kpökpö kpa engagira nü. Kpah bala, te yi maka te-yi de wü kpara te kaje la, yi le de wüh di egü mandü fü ani, da ecu ngü ani acu.

⁴⁴ De-yi wü Farusi, Me ena ato mere kuru te yi te gara! Yi baka wü mbükü te wü kpara ngbü endondoro fefeh, angü wüh wu de. Wüh ngbü eceka küte yi ba züka wü kpara ne bü kükürü, amba kpa emaguma yi, wü siti ngü de wü libiti sibi fa sü!"

⁴⁵ Tekä ngü la, fü gara *mürü riri bir-ingbö ayia amala ngü fü Yesu, gü ba, "Mere kpara, gbü wü ngü ka-ye, de te ye ngbü emala la, ye ngbü dela kphah efala ani."

⁴⁶ Fü Yesu alügü ngü fefe, gü ba, "De-yi wü mürü riri, Me ena ato kphah mere kuru te yi ato! Angü yi fü riri ka Me, o baka mere tiri e, te wüh ngbü eo gbü nzö wü kpara. Amba cu de-yi, yi mere riri engu la nda-yi de!

⁴⁷ De-yi, wü mürü riri, Me ena ato kuru te yi te gara! Angü yi ngbü esu wu te-yi, da ereke mbükü wü *mürü dofo ka Me ta gügü ne, gü ba, ani ngbü ecu ngü ewü. Amba wü kundu yi ngbü mömörö wü mürü dofo la ta me-wü! ⁴⁸ Ngü ka-yi de te yi ngbü emere la, ah kphah baka nda wü kundu yi, angü yi le aje ngü ta te wü mürü dofo la mala ne, nda-yi kphah de. ⁴⁹ Angü Me te wu ngü 'buru ne, mala ta ngü ka-yi la eyi, gü ba, 'Ni ena atima wü mürü dofo, de wü *mürü tima ka-ni fü yi, teka amala ngari ni fü yi. Amba yi le ngü la nda-yi de! Fü yi angbü emömörö wü gara, kphah da eto cinga te wü gara.' ⁵⁰⁻⁵¹ Kphah bala, de-yi wü kpara ka re ne, te yi le aje riri ka Me de ne, Me ena ato mere kuru gbü nzö yi teka ngü la. Te di bala, ma ngbü emala fü yi dene zu ngü, ah kpo te kpi ka Abele, gina kpara te kpi füh kotö ne,§ akoro te kpi ka Zakariya, ta te wüh mörö engu kpa *esambü ka Me, gbü *nzila sü ne,* liya ka ngüte wü kpara ka Me la 'buru, ah ena adi gbü nzö yi, wü kpara ka re ne.

⁵² De-yi wü mürü riri, Me ena ato kphah mere kuru te yi te gara, angü yi wu ngü ka Me 'buru kpo, reke areke. Amba yi le amere ngü la nda-yi de. Kpah bala, wü gara kpara te ewü le ta ale ngü ka Me ne, fü yi angbü etiri kaje fü ewü kphah ghere!"

⁵³⁻⁵⁴ Fü Yesu ayia ace sü la, anü sü ka-ye. Fü ngü ka Yesu la angbü eke eküte wü mürü riri de wü *Farusi efa sü. Fü ewü akpo da ekpülü Yesu de mere bi kpeke wü yitangü, teka afete engu, de engu mala ngü dürü, fü ani azoro engu tete.

12

Dene wü gara ngü te Yesu ri wü kpara

§ 11:50-51 11:50-51 Mü ena amaka ngü ka kpi ka Abele gbü Gina Ngü 4:8. ngü ka kpi ka Zakariya gbü e'ba'basu buku ka 2 Ngangü 24:20-22.

* 11:50-51 11:50-51 Mü ena amaka

di

¹ Gbü gara sikipi, fü mere bi wü kpara abiti te-wü kpaka Yesu gbe afa sü, fü ewü angbü edodoto lö wü bu wü. Fü Yesu akpo da emala ngü fü wü kpara ka-ye, gü ba, "Yi ceka te-yi mbi, teka siti mani ka wü *Farusi la. Angü wüh le de wü kpara ceka ani ba züka kpara. Te di bala, wüh ngbü ewo wü *siti ngü ka-wü, te wüh ngbü emere ne, awo. ² Amba wü ngü 'buru de te wüh ngbü ewo awo ne, wü kpara ena awu ngü la te gara. Kpah bala, mene ngü te wü kpara ngbü emere gbü mani, anga esalakumu ne, ngü la ena asere te-ye te gara 'buru, te ngambasü. ³ Angü wü ngü 'buru de te yi ngbü emala gbü ngingiri ngü kpa esambü ne, wü ngü la ena awü te gara, de mere ri kpa tikpi.

⁴ Wü di enga wüna, dene ngü te ma ele amala fü yi, yi ena akpe neh cürü da? Mü ena akpe wü siti kpara füh kotö ne, te ewü ngbü emörö wü kpara ne? Mü kpe ewü de, angü wüh ti eyi amörö bü küte mü kükürü. ⁵ Ah le fü mü akpe 'duwa Me kpi kpi ye. Angü te ngü ka-mü siti gbü jijia na la, engu de wazi teka amörö küte mü, aza kpah kuru mü, agü agbü wa. ⁶⁻⁷ Yi mere e akpe cürü de, angü Me ngbü eceka kpi fütanga yi me-ye. Yi ceka la wü lu te ewü sibi fa sü ne, Me ngbü eceka kpi fütanga ewü biri biri 'buru, toto iri teka biri süka ewü de. Amba teka ngü ka-yi, ah kpah bala, angü Me le yi, fa nda mere bi wü lu la ka. Ah tanga wü su-nzö yi biri biri kpah eyi 'buru.

⁸ Ma ngbü emala fü yi dene zu ngü. Mene kpara te kpe cürü de, fü ah amala nga ye gbü jia wü kpara ngbaa ngbaa ngbaa, gü ba, 'Ni de kpara ka-ra' la, ma ena amala nganga kpah gbü jia wü *malayika ka Me gbü *adu sikipi, ngbaa ngbaa ngbaa, gü ba, 'Engu de kpara ka-ra fanü.' ⁹ Amba te mü cere nga mü, gü ba, 'Ni wu ra de la,' ma ena amala tungü mü kpah bala, gbü jia wü malayika ka Me, gbü adu sikipi, gü ba, 'Ma wu mü kpah de.'

¹⁰ Mene kpara, te ena amala siti ngü eküte ra, *Ye Kpara ka Kpi, te ah fü maguma ye la, Me ena aboro siti ngü kaka la. Amba mene kpara te le ngü ka *Nzila Wazi Me de, fü ah angbü esoko engu asoko ne, Me ti aboro *siti ngü kaka kpo fi de.

¹¹ Te wü kpara ena ai yi, teka akolo liya ka-yi, engagira wü *kovo, anga engagira wü miri, teka te yi di de wü kpara ka-ra la, yi mere e akpe cürü de. Yi mere e adi efi nga ngü, teka ngü te yi ena alügü fü ewü ne, kpah de. ¹² Angü Nzila Wazi Me ena agü tamu wü ngü, te yi ena alügü fü ewü gbü sikipi la, 'buru me-ye."

Dene ngü te Yesu mala teka güümü wü e ka kotö ne

¹³ Fütanga ngü la, fü gara kpara ayia esüka mere bi wü kpara la, amala ngü fü Yesu, gü ba, "Mere kpara, ah le fü ye amala ngü fü enga ni ne, teka de ah ye süka wü e-nga-kpa, te wö ani kpi, ce o ne, esüka ani." ¹⁴ Te Yesu je ngü la bala, fü ah alügü ngü fefe, gü ba, "De-mü, mü ce kükürü ngü la! Mü efi nda-mü, gü ba, ma koro füh kotö ne, teka aye süka wü e ka-ani?"

¹⁵ Fü Yesu afü te-ye, amala ngü fü mere bi wü kpara la 'buru, gü ba, "Yi ceka te-yi 'be, teka ngü ka güümü wü e de füh kotö ne. Angü kpara ti aküwa bü teka wü e ka-ye nda de."

¹⁶ Fü ah ayia amala gara ngü mani fü ewü, gü ba, "Gara komoko ta ladü, te di de mere bi wü e esaka ye. Fü ah amaka züka sü ka yi, angbü eru wü e ka-ye gbügbü na. Fü e kaka angbü eri efa sü. ¹⁷ Fü komoko la adu afi ngü, gü ba, 'E gbü yi ka-ni ri eyi fa sü. Te kafa ka-ni be de ne, ni ena amere baye?' ¹⁸ Fü ah adu amaka züka fingangü, gü ba, 'Wayi, titine, ngü de te ni ena amere, ah dene! Wü kafa ka-ni ne, ni ena amürü ewü 'buru amürü asidi, teka fü ni aji gara memere na, afa ewü la. Fü ni abiti jia wü e ka-ni, kpah de gara wü e ka-ni 'buru gbügbü.' ¹⁹ Fü komoko la angbü de mere tadu, da emala ngü tine emagama ye, gü ba, 'Wayi! Titine wü e ka-ni sibi fa sü. Wü e la ti eyi ale ta-ngü te ni teka mere bi wü re. Gara ngü te ni ena adu amere tine ma. Ni ena angbü efe te-ni, fü ni adi ezü wü e ka-ni, da enzö wü e ka-ni la, de mere tadu.' ²⁰ Fü Me amala ngü fefe, gü ba, 'Mü ka-mü de töndö kpara! Ceka la! Gbü biti ne, ma ena aza kuru mü, fü mü akpi! Mere bi wü e ka-mü la, mü ena ace ewü neh fü da?'"

²¹ Fü Yesu adu kpah amala gara ngü fü ewü, gü ba, "Te mü o to mü 'buru, teka amaka mere bi wü e ka kotö ne, te ngü ka-mü reke gbü jia Me de la, mü ti aküwa nda-mü de. Mü ena akpi kpah baka nda komoko la."

Dene ngü te Yesu mala fü wü kpara ka-ye, gü ba,

Me ena aceka kpi fütanga wü me-ye Matayo 6:19-21, 25-34

²² Fütanga ngü la, fü Yesu adu amala kpah gara ngü fü wü kpara ka-ye, gü ba, "Dene ngü te ma ele amala fü yi. Yi mere e asiti fingangü ka-yi, teka ngü ka e-mazü, nda-yi de. Anga yi mere e angbü de mere fingangü teka bongo te yi ena amaka, adi eto eküte yi ne kpah de. ²³ Angü ngü ka küte mü fa ngü ka bongo ka. Te di bala, Wö nih Me, te o küte nih ne, ah ti ato bongo fü nih de? Kpah bala, ngü ka *küküwa fa

ngü ka zü-e ka. Me te ngbü eküwa nih ne, ena adi kphah eto zü-e fū nih.

²⁴ Yi ceka la bü wü lu, te ewü ru e kphah de, wüh biti wü e fū wü kphah de, kafa ka-ewü kphah ma. Amba Me ce ewü nda de, ah ngbü fi bü eto zü-e fū ewü! Yi efi nda-yi, gü ba, ngü ka-ani fa ngü ka mere bi wü lu la de? Me ti ace yi, fū yi akpi ka tala de.

²⁵ Te sikipi ka kpi ka-mü koro eyi la, wazi mü ladü teka afa te-mü gbü kpi la, teka adu angbü teka gara sikipi? A'a, wazi mü nda ma. ²⁶ Te yi ti amere engu ngü cükü'daye bane de la, yi di ngbü esiti fingangü ka-yi teka wü gara ngü, neh teka ne?

²⁷ Yi ceka la wü yi-rü, wüh ngbü ekoro neh baye baye? Baka te wüh mere tima 'buru de, wüh tükü bongo kphah de. Miri *Solomona ta te di de mere bi wü e esaka ye ne, bongo kaka-na su baka yi-rü agbü gü ne, kphah de. ²⁸ Yi wu eyi, te Me ngbü ereke wü yi-rü eküte wü rü, baka züka bongo te su asu fa sü ne, fingangü ka-yi gü ba, Me ti ato züka bongo fū ani de? Te di bala, yi to maguma yi fū Me mbi mbi de, neh teka ne?

²⁹ Yi mere e angbü esiti fingangü ka-yi, teka wü e te yi ena azü, anga ngu te yi ena anzö ne, de. Ah le de yi to maguma yi 'buru fū Me. Yi mere e angbü de maguma yi 'basu 'basu de. ³⁰ Wü kpara te ewü wu ngü ka Me de, wüh ngbü egiri wü e füh kotö ne bala me-wü. Amba nda-yi, yi mere bala de, angü Wö yi, Me, ladü. Ah ena ato wü e fū yi me-ye, angü ah wu kpo, gü ba, cinga wü e la ngbü emere yi. ³¹ Te di bala, yi to la maguma yi, da emere tima ka Me feke, angü wü gara e la 'buru, Me ena adu ato fū yi sidi, gbü sikipi te engu le me-ye.

³² Yi ngbü ekpe cürü teka ne? Tek a te wazi yi di mba cükü'daye ne? Yi kpe cürü de! Angü Me, te di de Wö yi, ena aceka kpi fütanga yi, da eto wazi fū yi, teka amere tima ka-ye di me-ye, angü dela ngü te reke gbü jijia. ³³⁻³⁴ Te di bala, yi cinzi wü e ka-yi 'buru asidi, de yi to jias engu la fū wü mürü cinga. Angü wü e ka füh kotö ne ena anza ka-wü 'buru anza. Wü gara, wü mürü zi ena azi, anga wü gara, wü ka ena alafa, asiti. Amba, te yi to maguma yi teka ngü ka Me agbü kpi la, ngü la ti anza de."

Dene ngü te Yesu mala fū wü kpara ka-ye,

*de wüh ngbü da ecü sü
Matayo 24:45-51*

³⁵⁻³⁶ Fū Yesu adu kphah amala gara ngü fū wü kpara ka-ye, gü ba dene, "Ah le de yi reke te-yi, de yi rü kpekpeke, angü yi baka wü kpara ka tima, te ewü ngbü eci nga mere kpara ka-wü, te ena adu

akoro gbü sü ka karama gbü biti. Yi to bongo te yi reke areke, de yi siya wa ka-yi, ngbü di nzo, teka te mere kpara ka-yi ena adu akoro, akü möngiti la, yi ena adi nzo, teka aü fefe na. ³⁷ Te mere kpara la du maka wü kpara ka-ye ezükü da eci nga ye la, ah ena angbü de mere tadu. Engu ena ato mere züka zü-e fū ewü, de mere bi wü gara züka ngü. ³⁸ Anga, te mere kpara ka-ewü la ena adu etü biti, anga gügü emözekpi la, ah le de engu maka ewü ezükü, teka fū ewü angbü de tadu. ³⁹⁻⁴⁰ Ah ena adi kphah bala teka ngü ka-ra, te ma di de mere kpara ka-yi ne. Te ma du maka yi nzo gbü tima ka-ra la, ma ena angbü kphah de mere tadu. Te di bala, ah le de yi ngbü nzo teka adi eci nga sikipi ka-ra, angü yi wu sikipi engu la de. Angü ma ena adu amaka yi kphah gbü iri-to, baka mürü zi, te ngbü ekoro gbü biti, amaka mürü koti da era ara."

⁴¹ Tek a ngü la, fū Petero ayia amala ngü fū Yesu, gü ba, "Mere kpara, ye ngbü emala ngü mani dela nzö bü fū ani, anga fū wü kpara 'buru?" ⁴² Fū Yesu alügü ngü fefe, gü ba dene, "Te mü ena adi de mere kpara gbü nzö wü bu mü, ah le fū mü amere tima ka-mü mbi mbi mbi. Te mere kpara ka-mü yia nü agbü gara sü nengete, ah le de mü mere wü ngü 'buru te engu ce esaka mü, da egafa zü-e fū wü bu mü, kphah ba e te engu mala fū mü. ⁴³ Angü, te mere kpara ka-mü du maka mü da emere wü ngü la 'buru mbi la, ah ena ato mere tadu fū mü. ⁴⁴ Ma emala fū mü dene zu ngü, mere kpara ka-mü la ena ace wü ngü ka-ye 'buru esaka mü. Fū ah ao mü ba mere kpara gbü nzö wü e ka-ye 'buru. ⁴⁵⁻⁴⁶ Amba, te kpara ka tima la fi emaguma ye, gü ba, 'Mere kpara ka-ni ti adu kere de,' fū ah angbü ka-ye bü tündü, adi emere wü bu ye esiti, da eto cinga te ewü. Ah ngbü efi ka-ye bü nzö nga ye, da ezüfa wü e, da enzö wü fi, eküküya di. Te di bala, mere kpara kaka la ena adu akoro amaka engu gbü iri-to, gbü sikipi te engu wu de. Fū ah ato mere siti kuru tete, aliki engu asidi, teka ngü ka kögö-nzö ka-ye la.

⁴⁷ Mene kpara ka tima, te wu wü ngü, de te mere kpara kaka ngbü ele, ne eyi, fū ah ace ngü la ladru la, engu ena azü juru gbü ngü la afa sü. ⁴⁸ Amba te engu wu ngü la de, fū ah amere dürü-ngü gbü tima ka-ye la, wüh ena asüma engu mba cükü'daye. Amba nda-yi wü kpara ka-ra, te ma ngbü eri yi de mere bi wü ngü ne, ah le fū yi adi emere wü ngü 'buru mbi. Fū yi angbü eri wü bu yi kphah bala, angü dela tima te ma to fū yi."

Dene ngü te Yesu mala, teka tima ka-ye,

te engu ena amere

Matayo 10:34-36

⁴⁹ Fū Yesu adu amala kpah gara ngü fū wü kpapa ka-ye, gü ba “Wayi, tima te Me tima ra tete fūh kotö ne, ah baka wa te ena aye süka ngü ka wü kpapa fūh kotö ne. Ma ele de ngü la mere te-ye kere!” ⁵⁰ Kpah bala, mere cinga ladü, te ena amere ra te gara. Ah le de ngü la mere te-ye kere, teka fū ah anza kpah kere!

⁵¹ Yi efi nda-yi, gü ba, ma koro teka fū yi amaka gu ngü esüka wü kpapa fūh kotö sene? A'a, ah bala de! Kokoro ka-ra fūh kotö ne ena ato makpü, fū wü kpapa angbü ekpü yi akpü, angü yi de wü kpapa ka-ra. ⁵² Angü wü kpapa 'buruve, gbü köti biringbö, ena aye süka wü, teka ngü ka-ra. Te wü kpapa 'basu le ngü ka-ra, wü bu ewü de bata ne ti ale ngü ka-ra de, fū ewü akpo da ekpü te-wü teka ngü la. ⁵³ Kpah bala, wü jaji komoko ena akpü te-wü de wü wö wü, teka ngü ka-ra. Wü jaji würise ena akpü te-wü de wü ni wü. Wü würise ena akpü kpah te-wü de wü wara wü di enga wü.”

Dene ngü te Yesu mala teka ngü ka wü laki

⁵⁴ Fū Yesu adu amala kpah ngü fū mere bi wü kpapa la, gü ba, “Te yi wu wege, te ngbü egoro to kpa ekati, da edu to kpa fügö la, yi ena awu teke, gü ba, agö ena alí. Ah bala de?” ⁵⁵ Kpah bala, te yi wu wege, te ngbü efe edu to kpa ekati la, yi ena awu kpah teke, gü ba, ra ena asü enatikine asü. Ah ena adi kpah bala fanü. ⁵⁶ De-yi wü mürü kögö-nzó! Yi wu si-ngü gbü kuru wü ngü, te ngbü egü tamu laki fūh kotö ne, 'buru reke areke. Amba yi wu wü si-ngü teka tima ka-ra de, neh teka ne?

⁵⁷ Te yi gü ba, ani wu ngü ka Me reke areke la, amba yi le amere ngü ka Me mbi mbi de, neh teka ne? ⁵⁸ Te ngü ladü esüka yi ake kiri mü la, ah le de yi reke ngü la esüka yi kere, o engu i mü engagira miri la de. Angü wüh ena ato mü fū wü marajümiya, fū ewü agü mü agbü ku. ⁵⁹ Te di bala, ma emala fū mü dene zu ngü, wüh ti ace kpa te mü kere de, zalü te mü ena ato wü jiase kaka-na la anza 'buru feke. Ngü ka Me ka-ye kpah bala. Ah le de mü reke ngü ka-mü kpapa Me kere, o *adu sikipi koro la de!”

Dela ngü te Yesu mala fū wü kpapa teka ngü ka kögö-nzó.

13

Dene ngü te Yesu mala fū wü kpapa,

gü ba, ah le de wüh fū maguma wü

¹ Fütanga ngü la, fū wü gara kpapa akoro kpapa Yesu, amala nga ngü ta te

Miri *Pilatu mere, te engu mörö wü gara kpapa ka *Galilaya, o wüh ngbü eto la 'bi fū Mere Me kpa etambasü ka *Mere Kambü ka Me agbü Yerüsalema ne. ² Fū Yesu alügü ngü fū ewü, gü ba, “Yi efi nda-yi, gü ba, wü kpapa la, wüh kpi teka te ewü mere siti ngü fa wü gara kpapa gbü Galilaya la 'buru?” ³ A'a, ah bala de! Ma emala fū yi dene zu ngü. Te yi fū maguma yi, ace *siti ngü ka-yi de la, yi ena akpi kpah 'buru baka wü kpapa la.

⁴ Kpah bala, yi ngbü efi nga wü kpapa ta nzükpa de fūh ye 'bajena, te mere kambü ka Silowa mürü gbü nzö ewü ne, gü ba, Me to kuru te ewü bala, angü siti ngü ka-ewü fa nda wü bu wü agbü Yerüsalema ne 'buru?” ⁵ A'a, ah bala de! Ma emala fū yi dene zu ngü. Te yi fū maguma yi, ace siti ngü ka-yi de la, yi ena akpi kpah 'buru baka wü kpapa la.”

⁶ Fū Yesu adu kpah amala gara ngü fū ewü gbü mani, gü ba, “Gara kpapa ta ladü, te ru rürü ka-ye agbü yi. Amba rü la le ari nda de. ⁷ Fütanga re bata, fū komoko la ayia amala ngü fū kpapa ka tima, te ngbü eceka kpi fütanga yi ka-ye la, gü ba, 'Ceka la, teka re bata dene, ni ngbü egoro sene ta teka akolo rü-rü la, amba ah rü nda de. Te ah bala la, ye de rü la ade asidi, angü ah ngbü etiri sü sene kükürü.’ ⁸ Fū kpapa ka tima la alügü ngü fefe, agü ba, 'Enane, mere kpapa, ye ce la rü la ace gbü re dene. Ni ena asö sasa na. Fū ni ao wü ca-e, de ah zi esasa. ⁹ E-wu neh da, ah ena adu ari. Anga, te ah du rü tine kpah fi de la, gbü re sidi ne, fū ewü adu ade tine asidi.’ ”

Dela ngü te Yesu mala fū wü kpapa la, gü ba, ah le de wüh fū maguma wü kere, angü du sikipi, te Me to fū ewü, ka-ye mba cükü'daye.

Dene ngü ka würise te Yesu küwa engu gbü sikipi ka Me

¹⁰ Gbü gara *sikipi ka Me, fū Yesu akpo da eri wü kpapa kpa *esambü ka biti-te. ¹¹ Fū ah awu gara würise kpala, te *siti wü di enga me ngbü emere engu, teka re nzükpa de fūh ye 'bajena. Wü di enga me la diri engu adiri, ngbü tine cüngülü bala. Ah ti agbere te-ye de. ¹² Te Yesu wu ngü la bala, fū ah ayia ai würise la kpapa ye, amala ngü fefe, gü ba, “Enga wüna, keke ka-mü nza eyi.” ¹³ Fū ah ao kpa ye gbü nzönzö. 'Duwa fū keke kaka ayia anza. Fū kükürüfe agbere te-ye. Fū würise la akpo da enü nü tine mbi mbi mbi, da egbo nga iri Me teka ngü la.

¹⁴ Te mere kpapa ka kambü ka biti-te la wu ngü la bala, fū mamaguma ayia anzu, teka te Yesu küwa mürü keke la gbü sikipi ka Me ne. Angü rüri ka gele ka wü di enga *Yisaraye le bala de. Fū mere kpapa la

ayia amala ngü fü mere bi wü kpara la, gü ba, "De-wü deyi, te keke ka-wü ladü, ah le fü wü angbü ekoro di kpaka Yesu gbü wü kükürü sikipi, de ah küwa wü. Wü mere e akoro di gbü sikipi ka Me de, angü riri ka Me mala bala."

¹⁵ Te Miri Yesu je ngü la bala, fü ah amala ngü fü mere kpara la, gü ba, "De-yi, wü mürrü mani! Te wü nü ka-mü ladü, mü ti afuru ewü, anü di kpa esa biri, fü ewü anzö ngu, gbü sikipi ka Me de? ¹⁶ Te yi ti eyi awu cinga wü nü ka-yi la, yi ti awu cinga kpara de, neh teka ne? Würüse la kphah de egba *Yisarayeleye, kundu ye *Abarayama, baka nih. *Satana i engu eyi teka re nzükpa de füh ye 'bajena dene. Baka te ma furu engu gbü ku ka Satana asidi ne, ngü la siti gbü jia yi, neh teka ne?"

¹⁷ Ngü de te Yesu lügü ne, fü ah ato vi-jia fü wü vügü kaka la 'buru. Amba wü gara kpara ngbü nda-wü 'buru de tadu, teka wü mere kpeke ngü, te Yesu ngbü emere la, angü wü ngü la reke gbü jia ewü fa sü.

*Dene gara wü mani te Yesu mala
Matayo 13:31-33; Marako 4:30-32*

¹⁸ Fü Yesu adu amala gara ngü fü wü kpara la, gü ba dene, "Ma ena amala gara ngü mani, teka agü tamu ngü ka Me fü yi. ¹⁹ Angü ngü ka Me ka-ye baka jia gara rü de iri ye müsitada, te di de jia ye baka jia li'ba, jürrrü bane. Te mü ru nguwa la agbü tö, ah ena aga, akoro mere rü, te wü lu ena angbü efe te-wü gbügbü."

²⁰ Fü Yesu adu kphah amala gara ngü fü ewü, gü ba, "Ma ena amala kphah gara mani fü yi teka ngü ka Me la. ²¹ Angü ngü ka Me ka-ye baka *kö, te würüse ngbü eku'da zu ambata di. Fü kö la angbü emere tima ka-ye gbü ambata la. Fü ah akpo da eu, eu, zalü akoro memere, te wüh ti eyi amere bi wü ambata gbügbü."

Dela wü mani 'basu, te Yesu mala fü wü kpara, teka ngü ka Me, te ena akpo mba 'dongoni, fü ah adu akoro memere.

²² Fü Yesu ayia ace sü la, angbü fi bü da enü te kaje ka Yerüsalema. Ah ngbü enü da erü gbü wü köti 'buru te nga kaje la, da eri wü kpara de ngari Me.

*Dene ngü te Yesu mala teka ngü ka
maguma 'basu 'basu*

²³ Fütanga ngü la, fü gara kpara ayia ayi-ta Yesu, gü ba, "Mere kpara, wü kpara te ewü ena aküwa, fü ewü akoro agbü sü ka Me, wüh neh fe? Ah ena adi bü mba wü kpara nzoko de?" ²⁴ Fü Yesu adu amala ngü fü wü kpara la 'buru, gü ba dene, "Ah le deyi le ngü ka Me de maguma yi biringbö, teka fü yi ari agbü sü ka Me. Angü möngiti, te wüh eri tete kpala ne, ka-ye mba cükü'daye. Fanü, mere bi wü kpara ele ari kpala, amba wüh

maka kaje de. ²⁵ Angü mürrü köti ena ayia ani möngiti ka-ye la. Te di bala, te yi ena akoro sidi, yi ti ari kpala de. Yi ena angbü nda-yi kpa etanü da ekü möngiti, enda'ba te-yi, gü ba, 'Mere kpara! Mere kpara! Ye ü la möngiti fü ani ke!' Ah ena alügü ngü fü yi, gü ba, 'Yi neh wü da? Yi koro neh kaye? Ma wu yi nda-ra de!' ²⁶ Yi ena agü ba, 'Mere kpara, ye mere bala de! Ani wu ye ta cu de jia ani! Ani ngbü ta ezü e de wü ye. Ye ngbü ta eri wü kpara gbü mere köti ka-ani! Ye mere e ace ani bala de, baaa!' ²⁷ Ah ena agü ba, 'Ma wu yi de! Yi de siti wü kpara! Yi jia emöngiti kara sela asidi!' ²⁸ Te di bala, yi ena angbü eku mere gba, da ezü gbü te yi, angü yi ena awu wü kundu yi, wü *Abarayama, ake *Yisaka, bete *Yakobo, de wü *mürrü dofo ka Me 'buru, te ewü ngbü ka-wü eyi agbü züka sü ka Me, amba de-yi, yi ti ari gbügbü na de. ²⁹ Fütanga ngü la, wü *ganzi kpara ena ayia te nga wü sü 'buru, akoro ari agbü sü ka Me la, angbü köto, akpo da ezü e ka-wü, de mere tadu te-wü. ³⁰ Angü wü gara kpara te wü bu wü ngbü eceka ewü ba töndö wü kpara füh kotö sene ne, Me ena aceka ewü baka züka wü kpara ka-ye, fü ah aza ewü, ao kpa engagira nü. Amba mene wü kpara te ewü ngbü efi, gü ba, ani ka-ani de wü kpeke kpara ne, Me ena adu ao ewü kpa sidi."

*Dene ngü te Yesu mala teka Yerüsalema
Matayo 23:37-39*

³¹ Fütanga ngü la, fü gara wü *Farusi ayia akoro kpaka Yesu, amala ngü fefe, gü ba dene, "Ye mere e angbü sene de! Angü Miri Anitipa *Erode ngbü egiri ye, teka amörö." ³² Te Yesu je ngü la, fü ah alügü ngü fü ewü, gü ba dene, "Yi nü, yi mala fü mürrü mani la, gü ba, 'Ma ti akpe de. Enatikine ma ngbü emere tima ka-ra, da eküwa wü kpara, da eliki *siti wü di enga me. Egambi, ah ena adi kphah bala. Amba egarambi, ma ena anza tima ka-ra la. ³³ Ah le de ma nü, ma koro agbü Yerüsalema feke, angü wü *mürrü dofo ka Me 'buru ngbü ekpi kpala.' "

³⁴ Fü Yesu adu angbü de mere cinga, gü ba, "Ööö! Yi ceka la mere cinga te ena amaka wü kpara ka Yerüsalema te gara ne! Angü wüh ngbü emömörö wü mürrü dofo, te Me ngbü etima fü ewü ne 'buru amörö. Ma ngbü ele ta abiti wü kpara ka Yerüsalema, 'buru, teka aküwa ewü, baka yi-ngü te ngbü ebiti wü di enga ye, esa mbula ye, amba wüh le nda-wü de! ³⁵ Te di bala, Me ti ale ngü ka-ewü kphah de! Ah ena ayia ka-ye ace *Mere Kambü ka-ewü agbü Yerüsalema de kpala kükürü, fü wü vügü akoro, amümürü Mere Kambü la,

de mere kōti ka-ewü 'buru, te gara. Ma emala fü yi dene zu ngü, wüh ti awu ra de, zalü te ewü ena afü maguma wü, adu ale ngü ka-ra, gü ba, Me tima ra me-ye fanü."

Dela ngü te Yesu mala teka mere cinga te ena amere wü kpara ka Yerüsalema.

14

Dene ngü ka gara mürü keke,

te Yesu küwa engu kpah gbü sikipi ka Me

¹ Gbü gara *sikipi ka Me, fü Yesu anü agba gara mere kpara ka wü *Farusi, teka azü e kpala. Fü wü gara Farusi, ta te ewü ngbü ezü e de ewü ne, angbü eceka engu kpekpeke, teka ngü ka riri ka gele ka-wü.

² Gara komoko ta ladü kpala, te küküte u au. Fü komoko la akoro arü engagira Yesu. ³ Te Yesu wu fingangü ka wü *mürü riri de wü Farusi la bala, fü ah ayi-ta ewü, gü ba, "Riri ka Me mala, teka maküwa kpara gbü sikipi ka Me, gü neh fe?" ⁴ Fü wü Farusi la anga ka-wü ti, wüh lügü ngü nda-za wü de. Fü Yesu aza mürü keke la, aküwa engu. Fü ah ato kaje fefe na, de ah nü sü ka-ye.

⁵ Fü Yesu adu amala ngü fü wü Farusi la, gü ba, "Te gara yiti, anga kambiliki kamü, ti gbü mere du gbü sikipi ka Me la, mü ena amere neh baye? Mü ti aküwa engu gbü sikipi la de?" ⁶ Ngü te wü Farusi la ena alügü fü Yesu nda ma.

Dene ngü te Yesu mala teka dangbüngbü

⁷ Fü Yesu angbü eceka ngü ka wü ngba, de te ewü ngbü ekoro gbü karama ne, angü wüh ngbü efe wü da-ngbüngbü, te reke areke. Fü Yesu amala ngü fü ewü, gü ba, ⁸ "Te wüh i mü gbü karama la, mü mere e anü 'duwa angbü füh züka dangbüngbü, te reke fa sü, ne de. Angü ewu neh da, wüh i gara mere kpara te fa mü kpah eyi. ⁹ Te di bala, mürü kōti la ena akoro, amala fü mü, gü ba, 'Enga wüna, mü ce sü la fü mere kpara.' Mü ena ayia adu, anü angbü kpa sidi, de mere lümü te mü! ¹⁰ Amba, te wüh i mü gbü karama la, mü nü, mü ngbü ka-mü kpa sidi kpala feke. Te di bala, mürü kōti la ena akoro, ai mü me-ye, agü ba, 'Enga wüna, mü nü, mü ngbü gbü züka sü de kpa engagira nü de kpala.' Te mü mere bala, wü kpara 'buru ena awu mü ba mere kpara. ¹¹ Angü mene kpara te ena ao te-ye memere, ngü kaka ena adu kpa sidi. Amba mene kpara te ena ao te-ye kōtō ba jaji la, Me ena ao engu mere kpara me-ye."

¹² Fü Yesu adu amala ngü fü mürü kōti, te i ye la, gü ba, "Te mü le ai wü kpara teka azü e agba mü la, mü mere e ai bü wü awuba ka-mü de. Mü mere e ai bü nzö wü di engu ni mü, anga wü mürü mü ne, kpah de. Mü i kpah bü nzö wü kpara, te ewü di de mere bi e esaka wü ne, kpah de. Kükürü de, angü wü kpara la ena adu kpah ai mü, teka alügü na wü e, de te mü mere fü ewü ne. ¹³ Te mü le ato zü-e ka karama fü wü kpara la, ah le de mü i kpah wü mürü cinga, wü mürü keke, wü kpara te lö ewü ze aze, de wü kpara te jia ewü ni ani ne, kpah mini. ¹⁴ Te mü mere bala la, Me ena ato mere züka ngü fü mü. Angü wü mürü cinga la ti alügü na wü e la fü mü nda-wü de. Amba gbü sikipi te Me ena azükü wü kpara ka-ye gbü kpi tete, engu ena alügü na wü e la 'buru fü mü me-ye."

Dene mani te Yesu mala teka mere karama

Matayo 22:1-10

¹⁵ Te wü kpara, ta te ewü ngbü ezü e de wü Yesu ne, je ngü la bala, fü biri kpara esüka ewü ayia amala ngü fü Yesu, gü ba, "Te ah bala la, ani ena angbü de mere tadu te gara, da ezü karama agbü sü ka Me agbü kpi, afa engu de füh kōtō ne ka."

¹⁶ Fü Yesu ayia amala ngü fefe gbü mani, gü ba, "Gara mere komoko ta ladü te reke mere karama agba ye. Fü ah atima ngü fü mere bi wü kpara, teka de wüh koro, wüh zü e gbü karama la. Fü ewü ale ngü te nga wü 'buru mbi. ¹⁷ Gbü lö-ra te wüh reke wü zü-e tete, o eyi 'buru nzö, fü engu ayia atima kpara ka tima ka-ye, de ah nü, ah i wü kpara, de te ni tima ngü fü ewü terane, gü ba, 'Titine sikipi ka karama ti eyi, wüh koro ekoro 'buru enatikine, azü e.' ¹⁸ Fü wü kpara la ace 'buru kpo. Fü gina kpara amala ngü fü mürü tima la, gü ba, 'A'a, tima fa te ni sü. Ni se la yi ka-ni esaka gara kpara titine. Ni yia enü dene kpala, teka aceka yi la. Ye mala fü mere kpara ka-ye, de ah ce siti ngü la fü ni, angü ni ti akoro kpala de.' ¹⁹ Fü gara kpara amala nda-ye, gü ba, 'Ni se wü yiti ka-ni eyi nzükpa,* ah le fü ni anü aceka ewü. Ye mala fü mere kpara ka-ye, de ah ce siti ngü la fü ni, angü ni ti akoro kpala de.' ²⁰ Fü gara amala nda-ye, gü ba, 'Ni za würüse la bü mba titine dene. Teku ngü la, ni ti anü de.'

²¹ Fü kpara ka tima la alügü te-ye, adu kpaka mere kpara ka-ye. Fü ah amala ngari wü kpara la 'buru fefe, gü ba, 'Wü kpara la ce eyi 'buru kpo!' Te mere kpara la je ngü la bala, fü mamagama ayia anzu. Fü ah amala ngü fü kpara ka tima ka-ye la, gü ba, 'Ye yia eyia kere, ye nü agbü mere

* **14:19** 14:19 Wü yiti la, ah se teka fü ewü adi esö e. Te di bala, ah le anü teka are ewü, anga wüh ti eyi amere tima mbi ya?

köti, ye gîrî wü kpara te mere kaje kpala, wü mürü cinga, wü mürü keke, wü kpara te jia ewü ni ani, de ewü te lö ewü ze aze, ye koro de ewü 'buru akine, teka azü karama ka-ni ne.'

²² Fü kpara ka tima la ayia anü, amere kpah bala. Fütanga lö-ra mba cükü'daye, fü ah adu akoro kpaka mere kpara ka-ye, amala ngü fefe, gü ba, 'Mere kpara, ngü de te ye mala fü ni ne, ni mere eyi 'buru, amba du sü la fi ladü.' ²³ Fü mere kpara la ayia amala ngü fü kpara ka tima ka-ye la, gü ba, 'Te ah bala la, de ye du kpah edu, ye gîrî wü gara kpara gbü nga nzö wü köti ka sü la 'buru, ye koro de ewü sene, teka fü wü kpara asi gbü karama ka-ni sene gbe. ²⁴ Ni ngbü emala fü ye dene zu ngü, wü kpara terane, te ni i ewü, te ewü ce kpo ne, enatikine, ni le fü biri ewü ato kpa ye, are ngu ngütü wuru ka-ni ne de de de!' "

Dela wü ngü ta te Yesu mala fü wü *Farusi, te engu ngbü ezü e tete de ewü.

Dene ngü te Yesu mala fü wü kpara te ewü le afa nga ye

²⁵ Ta gbü wü sikpi la, mere bi wü kpara ngbü efa nga Yesu. Te Yesu wu wü kpara la bala, fü ah afü te-ye, amala ngü fü ewü, gü ba, ²⁶ "Te mü le afa nga ra la, ah le de mü ce ngü ka maguma 'basu 'basu. Angü ah le fü mü ace ngü ka wö mü ake ni mü, bete wara mü, de wü di mü, de wü di engu ni mü 'buru. Ah le kpah de mü ce te-mü cu akpi, teka ngü ka-ra. ²⁷ Wayi, te mü le alala gbü nga ra la, ah le de mü reke te-mü fü kpi, baka kpara te ngbü ebî mere *rü gbegete ka-ye, te wüh ena amörö engu fefeh na. Angü, te mü mere bala de la, mü de kpara ka-ra nda-mü de.

²⁸ Ngü la, ah ena adi baka e dene. Angü te mü le aji mere kambü ka-mü la, gina ngü te mü ena amere, ah de ne ngü ne? Ah le fü mü abiti wü e, te mü ena aji kambü la di, 'buru feke. Fü mü adu akpo eji kambü la. ²⁹ Angü te mü mere bala de, fü tima ka kambü la anü arü etungba la, wü kpara ena akpo emü mü, da efala mü, ³⁰ gü ba, 'Ceka la, kpara ne kpo da eji kambü ka-ye 'be, amba wawazi teka anza tima la di nda ma!'

³¹⁻³² Kpah bala, te gara miri le agü gü ake gara kiri ye la, ah le de engu fi nga ngü la mbi mbi mbi feke. Angü te wawazi be, teka afa kiri ye la di, nda de la, miri la ena amere baye? Ah le de engu tima gara kpara ka-ye kpaka kiri ye la kere, teka areke ngü de esüka ewü la. Angü kiri ye ena akoro de mere wazi, anza ngü kaka.

³³ Dela ngü te ma le amala fü yi. Te mü le afa nga ra, ah le fü mü afi nga ngü la mbi mbi mbi feke. Angü ah ele fü mü ace wü e ka-mü, de wü kpara ka-mü 'buru, fü mü alala gbü nga ra. Te mü mere bala de la, mü ti angbü züka kpara ka-ra kpah de.

³⁴⁻³⁵ Ah le de yi da güje yi te ngü ka-ra ne mbi mbi mbi. Angü mene kpara te ce ngü ka-ra, gü ba, ngü ka-ra ka-ye nda kpekpeke la, wüh ena ace engu kpah ace, baka cambiri ngütü gbü soro, te wüh ngbü ebu kpa füh ka ne. Angü tima kaka tine eyi ma."

15

Dene ngü ka kambiliki te dürü Matayo 18:12-14

¹ Gbü gara sikpi, wü kpara te ewü ngbü ero *jiase fü miri ka wü Rüma, de wü gara siti wü kpara, ngbü ta ekoro kpaka Yesu, teka adi eje ngari Me gögómó na. ² Te wü *Farusi de wü *mürü riri wu bala, fü ewü akpo da edi ngü te Yesu, gü ba, "Komoko la ngbü ezü e de wü siti kpara, te ewü le riri ka Me de, neh teka ne?"

³ Te Yesu wu ngü la, fü ah ayia amala ngü fü ewü gbü mani, gü ba, ⁴ "Te mü de wü kambiliki esaka mü teke 'buruve, fü bibiri na esüka ewü adürü la, mü ena amere baye? Mü ena ace engu, de ah dürü fi bala? A'a! Mü ena ayia ace mene ewü teke bala nzükpa de füh ye menewa ne sela, fü mü anü, teka agîrî engu de te dürü ne. Mü ena anü agîrî engu bala, bala, zalü te mü ena amaka engu, alügü esüka wü bu ye feke. ⁵ Te mü maka kambiliki ka-mü la eyi, mü ena angbü de mere tadu. Fü mü aza kambiliki ka-mü la, abi engu esügü mü, ⁶ adu di, alügü kpa esüka wü bu ye. Fü mü ai wü awuba mü de wü aji-köti ka-mü, gü ba, 'Ani ngbü de tadu, angü kambiliki ka-ni, ta te dürü ne, ni maka eyi.' "

Dela mani te Yesu mala fü wü mürü riri la. ⁷ Fü ah adu amala gara ngü fü ewü, gü ba dene, "Ma ngbü emala fü ye dene zu ngü. Me ena angbü de mere tadu, teka siti kpara biringbö, te ena afü maguma ye, adu ale ngü ka Me. Kpah bala, tadu la ena afa nda mere bi wü kpara,* te ewü ngbü efi, gü ba, 'Ani de wü züka kpara ka Me me-ani. Ani mere *siti ngü nda-ani de.' "

Dene ngü ka jiase te dürü

⁸ Fü Yesu adu amala kpah gara mani fü wü kpara la, gü ba, "Gara würüse ta ladü, te di de jiase esaka ye nzükpa. Te bibiri na dürü la, ah ena amere baye? Ah ena anü asiya wa, aka sa kambü 'buru, da egîrî jiase ka-ye la kpekpeke, zalü te

* 15:7 15:7 Mere bi wü kpara baka wü kpara teke bala nzükpa de füh ye menewa.

engu ena amaka. Ah ena adi bala de? ⁹ Te engu maka jiasse ka-ye la eyi, ah ena angbü de mere tadu, ai wü mürü ye, de wü awuba ye, amala fü ewü, gü ba, 'Ani ngbü de tadu, angü jiasse ka-ni, ta te dürü ne, ni maka eyi.' ¹⁰ Ma ngbü emala fü yi dene zu ngü. Me de wü *malayika ka-ye 'buru ena angbü kpah de mere tadu, te siti kpara biringbö ena ace *siti ngü ka-ye, adu ale ngü ka Me."

Dene ngü ka mbarase te dürü

¹¹ Fü Yesu adu amala kpah gara ngü mani fü ewü, gü ba, "Gara komoko ta ladü de wü di ye 'basu, 'buru wü jaji komoko. ¹² Gbü gara sikpi, fü sidi ye ayia amala ngü fü wö ye, gü ba, 'Wö ni deyi, ye to nda-ni e-nga-kpa, te ni ena amaka te gara sidi nga ye, te ye ena akpi la.' Fü wö ye na adu aza wü e ka-ye la, agafa fü ewü 'basu mini ake enga ni ye.

¹³ Fütanga sikpi mba cükü'daye, fü sidi ye la ayia acinzü wü e ka-ye la 'buru asidi, aza jiasse la, ayia ace gba wö ye, anü kpa te gara sü nengete. Fü ah angbü eröfö ngü ye, da endondoro kpala, asiti wü jiasse ka-ye la 'buru 'daaa, teka wü tadu ka füh kotö ne. ¹⁴ Te engu siti wü jiasse la nza tete 'buru, fü mere kpiri tala ayia atü gbü sü la. Fü cinga ari tete afa sü, angü gara e te engu ena azü nda tüne ma. ¹⁵ Fü ah ayia anü kpaka gara kpara gbü sü la, ayi-tata, de ah to tima fü ni. Fü kpara la ale, ato tima fefe, teka fü ah adi eceka kpi fütanga wü mba ka-ye. ¹⁶ Fü ah angbü eceka wü mba, te ewü ngbü ezü ca-e ka-wü la, fü gümü e la akpo kpah da emere engu. Angü kpara biringbö te ena ato e-mazü fefe na nda ma.

¹⁷ Fütanga ngü la, fü füngängü kaka adu afü te-ye, gü ba, 'Öö, ni ngbü ekpi ka tala sene kükürü, neh teka ne? Ceka la, kpa gba wö ni, wü kpara ka tima kaka kpala ngbü ezü züka e, esika di, gbü wü sikpi 'buru. ¹⁸ Te ah bala la, ni ena adu ka-ni adu kpaka wö ni, fü ni amala fefe, gü ba, "Wö ni deyi, ni mere *siti ngü eyi gbü jia Me, gbü jia ye kpah mini. ¹⁹ Ah ti fü ni angbü baka ye ye tüne de. Ye za ni, ye o tüne bü baka kpara ka tima ka-ye." ²⁰ Fü engu ayia aza kaje, angbü edu ka-ye kpaka wö ye.

Baka te engu di la mba ce ede köti nengete, fü jia wö ye na ayia atü tete kpala. Fü cicinga na ari te wö ye. Fü ah ayia ale woro, amaka te-wü ake di kpa te kaje kpala. Fü ah atü tete, afaka engu de mere lele. ²¹ Fü mbarase la ayia amala ngü fü wö ye, gü ba, 'Wüba, ma mere siti ngü eyi gbü jia Me, gbü jia mü kpah mini. Ah ti fere angbü baka ye mü, ne tüne de.' ²² Fü wö ye na ayia kere, amala ngü fü wü kpara ka tima ka-ye, gü ba, 'Wü kpe kere kere

kpah eköti, wü koro de züka bongo fefe, de ah to te-ye. Wü za kpah tüngü, wü to te jikpakpa, de wü za kpah kamaka, wü to te gbü lölö na. ²³ Wü nü, wü za engu yiti, te zege azege de mü te ye la, wü mörö, de ani zü karama. Angü ani de tadu teka ye ni, te du koro ne. ²⁴ Angü ye ni ne dürü ta eyi adürü, fü ani adu amaka engu enatikine dene. Ah ba e te engu kpi ta akpi, fü ah adu azükü gbü kpi la.' Fü ewü akpo de karama la, tüne de mere tadu.

²⁵ Amba, gina mbarase ka komoko la ngbü ta ka-ye agbü yi, da emere tima. Etamurago, te engu du koro tete gbamari ede köti, fü ah aje ri wü kpara, te ewü ngbü ebü ci, da elo bi. ²⁶ Te engu je ngü la bala, fü ah ai gara kpara ka tima ka-wü, ayi-tata, gü ba, 'Mere ngü la ngbü emere te-ye bala teka ne?' ²⁷ Fü kpara ka tima la alügü ngü fefe, gü ba, 'Ngü la ngbü emere te-ye kükürü de! Enga ni ye, ta te dürü ne, ah du koro me-ye. Fü wö ye aza züka engu yiti, amörö fefe, angü engu du koro eyi de züka küte ye.'

²⁸ Gina mbarase, te mü je ngü la bala, fü maguma mü ayia asiti. Mü le akoro kpaka ewü la de. Te wö ye na wu ngü la bala, fü ah akoro kpakaka na, anda'ba te-ye fefe, de ah akoro kpaka ani gbü karama la. ²⁹ Fü mbarase la ace ka-ye kpo. Fü ah amala ngü fü wö ye, gü ba, 'Wüba, mü je la ri ra ne. Ma ngbü ele ta-ngü te mü sene gügü. Wü riri ka-mü 'buru, te mü ngbü eto fere ne, ma ngbü emere ewü amere. Amba mba engu meme bane, te mü to fere, teka fü a azü de wü awuba ra ne, mü to kpah de. ³⁰ Mü ceka la, enatikine ye mü te du koro ne, ah siti ta jiasse ka-mü 'buru teka ngü ka wü jaji würüse, fü mü adu aza bü züka engu yiti ka-mü, amörö fefe? Mü mere ngü la bala neh teka ne?' ³¹ Fü wö ye na anda'ba te-ye fefe, gü ba, 'Enga ra, nih nda-nih ake nih ma sene, teka wü sikpi 'buru. Wü e ka-ra ne 'buru, wüh de wü e ka-mü. ³² Amba enatikine, enga ni mü, ta te dürü ne, du koro eyi. Te di bala, ah ti fü nih amere karama, angbü de mere tadu tekaka na de? Angü ah gegege baka ta te engu kpi akpi, fü ah adu azükü gbü kpi la.'

Dela wü mani ta te Yesu mala fü wü *mürü riri ne.

16

Dene ngü te Yesu mala fü wü kpara ka-ye teka jiasse

¹ Fütanga ngü la, fü Yesu adu amala gara ngü mani fü wü kpara ka-ye, gü ba, "Gara komoko ta ladü de mere bi wü e esaka ye. Gbü gara sikpi, fü wü gara kpara akoro kpaka mere kpara la, amala nga siti ngü

ka mere kpara ka tima kaka la, gü ba dene, 'Ah ngbü esiti wü e ka-ye.' ² Te kpara la je ngü la bala, fü ah ayia ai kpara ka tima ka-ye la, amala ngü fefe, gü ba, 'Ah mere baye, te ni ngbü eje bi wü ngü gbü nga ye de bane ne? Ah de ne ngü ne? Ah le de ye sere la nga wü tima ka-ye 'buru fü ni, angü ni le ye gbü tima ka-ni tîne de, teka wü siti ngü ka-ye, de te ni ngbü eje ne.'

³ Te kpara ka tima la je ngü la bala, fü ah akpo da efi ngü emagama ye, gü ba, 'Apa! Te mere kpara ka-ni za ni gbü tima la eyi asidi la, ni ena amere baye? Te wazi ni teka asö e di kphah ma, ni wu da ngü ka to-fere-eto nda-ni kphah de ne.' ⁴ Fü ah adu afi nga gara ngü, gü ba, 'Wayi! Te ah bala, ni wu gara mani eyi, te ni ena amere. Te mere kpara ka-ni ena ace ni gbü tima la, ni wu kaje eyi, te wü kpara ena ale ta-ngü te ni, te gara di.'

⁵ Fü kpara ka tima la ayia ai wü gara kpara, ta te ewü za matiti ka mere kpara ka-ye ne, biri biri 'buru, ayi-ta ewü, gü ba, 'Angü matiti ka mere kpara ka-ni gbü nga ye ta neh fe?' ⁶ Fü gina kpara la amala nda-ye, gü ba, 'Ah ta 'buru sila ka mü teke 'buruve.' Fü kpara ka tima la amala fefe, gü ba, 'Ye ceka la, dene köcökpa te mere kpara ka-ni to, teka ngü ka matiti ka-ye la, tîtîne ye ngbü kötö kere, de ye ba, gü ba, ah ka-ye ngbee teke 'basu de füh ye nzükpa, fü dudu la angbü tîne fü ye.' ⁷ Fü ah adu ayi-ta gara, gü ba, 'Amba nda-ye, ah ta neh fe?' Fü kpara la alügü ngü fefe, gü ba, 'Ah ta 'buru kombo ka ndo teke 'buruve.' Fü kpara ka tima la amala fefe, gü ba, 'Te ah bala la, köcökpa teka matiti ka-ye la, ah ladü sene, ye za, ye ba gbügbü na, gü ba, ah ta ka-ye ngbee teke bala, fü dudu la angbü tîne fü ye.' Dela ngü ta te kpara ka tima la mere, teka mere bi wü kpara, ta te ewü di de matiti ka mere kpara kaka gbü nga wü.

⁸ Fü mere kpara ka kpara ka tima la, aje ngü la. Fü ngü ka siti kpara ka tima la ayia areke gbü jijia afa sü, teka te engu reke wü ngü ka-ye 'buru de mani. Angü fanü fanü, wü kpara te ewü le ngü ka Me de ne, wüh de züka mani fa sü teka adi emere wü ngü de bala esüka wü, afa nda wü kpara ka Me."

⁹ Fü Yesu adu amala gara ngü fü wü kpara ka-ye, gü ba, "Ma ngbü emala fü yi dene zu ngü. Te mere bi wü e ka füh kötö ne ladü esaka mü, ah le de mü mere tima de wü e la reke areke, adi ele ta-ngü te wü bu mü di, teka fü ngü ka-mü areke gbü jia Me. Angü te gara, te wü e de esaka mü la ena anza la, fü mü amaka *küküwa agbü sü ka Me agbü kpî.

¹⁰ Mene kpara, te ngbü emere wü jürü ngü, te wüh to fefe la, de maguma

ye biringbö ereke areke la, te wüh to mere kpeke tima fefe, ah ena amere kphah de maguma ye biringbö ereke areke. Amba mene kpara, te ngbü emere wü jürü ngü de maguma ye 'basu 'basu la, te wüh to mere kpeke ngü fefe de engu mere la, ah ena amere kphah de maguma ye 'basu 'basu. ¹¹ Kphah bala, te Me to züka wü e ka füh kötö ne fü mü, fü mü adu asiti wü e la bü kükürü bala, ah ena ato küküwa fü mü agbü kpî baye baye? ¹² Te gara kpara to e ka-ye esaka mü, fü mü asiti e la bü kükürü bala la, Me ena ato züka ngü fü mü ato?

¹³ Mü ce ngü ka maguma 'basu 'basu asidi, angü kpara biringbö tî amere tima esaka wü miri 'basu de. Te mü le ngü ka gara, mü ena ace nda gara. Te mü ngbü eje riri ka gara ereke areke, mü ena angbü efala gara la afala. Te di bala, te yi to maguma yi eyi fü Me fanü, ah le de yi mere e ao to yi teka jiase de."

Dene ngü te Yesu mala fü wü Farusi teka jiase

Matayo 5:31-32; 11:12-13; Marako 10:11-12

¹⁴ Te wü *Farusi je ngü te Yesu ngbü emala fü wü kpara ka-ye teka jiase la, fü ngü la ayia ake te ewü, angü wüh le ngü ka jiase fa sü. Fü ewü angbü da efala ngü ka Yesu la. ¹⁵ Fü Yesu adu amala ngü fü ewü, gü ba, "De-yi, wü Farusi, yi ngbü esere te-yi gbü jia wü kpara, gü ba, ani de züka wü kpara, amba Me wu ngü te di emagama yi ne kpo. Angü mene ngü de te wü kpara ngbü ecu ngüngü, gü ba, ah de züka ngü ne, amba gbü jia Me, ah ka-ye de töndö ngü kükürü.

¹⁶ Ta gügü, o *Yüwane Mürü Babatiza kpo de tima la de, yi ngbü eje ngari Me 'duwa gbü Riri, te Me to fü yi gömö *Müse, be kphah te wü ngü ka Me te wü *mürü dofo ngbü emala fü yi. Enatikine, a kpo eyi emala nga züka ngü, gü ba, Me tima kpara eyi teka aküwa yi. Te di bala, mere bi wü kpara ngbü egiri kaje de wazi, teka amaka *küküwa la.

¹⁷ Amba yi mere e afi, gü ba, 'Riri ta te Me to esaka Müse ne, tî afü te-ye baka kükürü ngü ne,' nda de. Angü *Riri ka Me ka-ye de mere kpeke ngü. Ngü gbügbü biringbö tî anza de. Kpî ake tî ena anza anza, anga Riri ka Me tî anza nda de. ¹⁸ Baka Riri te Me to esaka Müse, teka ngü ka mace würüse. Amba, ma ngbü emala fü yi fanü fanü, gü ba, mene komoko te ena ace wara ye, fü ah adu aza gara würüse la, ah mere *siti ngü eyi, angü ah mere dela waza. Kphah bala, mene komoko te ena aza mene würüse, de te wati ye na ce engu ne, ah mere waza kphah eyi."

Dene ngü ka Lazaro ake komoko de mere bi wü e esaka ye

¹⁹ Fü Yesu adu kphah amala gara mani fü wü *Farusi la, gü ba dene, "Gara komoko ta ladü, te di de mere bi wü e esaka ye. Ah ngbü eto wü züka bongo, te su asu, te-ye, te wüh ngbü ese de mere bi jiaše. Gbü wü sikipi 'buru, ah ngbü engbü ka-ye 'be, da ezü wü züka e ka-ye. ²⁰ Gara müri cinga ta kphah ladü, gbü köti engu la, de iri ye Lazaro, de wü ka eküte ye. Ah ngbü engbü emöngiti 'baranga ka mere kpara la, angü züka sü fefe ma. ²¹ Ah ngbü ta ele de ni di ezü bü kporo zü-e, gbü nga mere kpara la. Kpah bala, wü büri ngbü ta ekoro, ela wü ka de eküküte la, da embü engu.

²² Gbü gara sikipi, fü Lazaro ayia akpi. Fü wü *malayika ka Me aza engu, anü di agbü kpi, kpara *Abarayama, fü ewü angbü ezü e ka-wü ake di kpala. Fü komoko de mere bi wü e esaka ye ne, adu kphah akpi. Fü ewü ati engu.

²³ Fü kuru mere kpara la akoro agbü du ka wa. Fü ah angbü gbü mere cinga, teka wa te ngbü ecuru engu. Fü ah ae jia ye tikpi, awu Abarayama ake Lazaro, nengete gbü züka sü, te ewü ngbü ezü e ka-wü. ²⁴ Fü mere kpara la anda'ba te-ye fü Abarayama de gba, gü ba, 'Akoo, wö ni Abarayama, ye ceka la cinga te ni ne, ye tima la bü mba Lazaro, teka fü engu anü ato jikpa ye gbü ngu, akoro di, atu mba füh mi ni, angü wa ne ngbü emere ni tine esiti!' ²⁵ Fü Abarayama alügü ngü fefe, gü ba, 'De-ye deyi, ye fi la nga wü ngü ta te ye ngbü emere, o ye di la de jia ye ne. Gbü wü sikipi la, ye ngbü ta emaka mere bi wü züka ngü, amba Lazaro ngbü nda-ye ta gbü cinga. Te di bala, ngü la du fü te-ye eyi, angü Lazaro maka züka ngü ka-ye eyi sene, amba ye du ngbü nda-ye eyi emaka cinga. ²⁶ Kpah bala, mere du ladü eze ngba ani sela, ah ti fü wü kpara ka-ani de sene ne, anü kpara wü kpala de. Kpah bala, nda-wü, wü kpara de kpala, ti akoro kpara ani kpakine kphah de.'

²⁷ Fü komoko la adu amala ngü fü Abarayama, gü ba, 'Wö ni, te ah bala la, ni eyi-ta ye, de ye tima Lazaro titine kpa gba ani, ²⁸ angü wü di engu ni ni ladü kpala 'buruve. Ah le de engu nü, ah ri ewü, teka fü ewü afü maguma wü. Angü wüh ena akoro angbü gbü siti sü ka cinga ne kphah baka ni.' ²⁹ Abarayama gü ba, '*Riri ka Müse ladü kpala. Wü *müri dofo ka Me ba ngü la kphah eyi gbü buku, ce o fü ewü kpala. Ah le de wü di engu ni ye je wü riri la, fü ewü afü maguma wü.' ³⁰ Fü komoko la agü ba, 'Akoo, wüba Abarayama, engu la ti ale ta-ngü de. Amba te gara kpara zükü gbü kpi, fü ah anü akoro, amala nga

wü ngü de sene ne cu me-ye fü ewü la, wüh ena ale ngü kaka ale, fü ewü afü maguma wü.' ³¹ Fü Abarayama amala fefe, gü ba, 'A'a. Te wüh le aje ngü ka *Müse, de nda wü müri dofo ka Me, nda-wü de la, amba wüh de wü müri kögö-nzö. Anga te gara kpara ena azükü gbü kpi kphah bü cu me-ye la, wüh ti aje ngü kaka kphah de.' "

Dela mani ta te Yesu mala fü wü *Farusi, teka ngü ka gümü jiaše.

17

Dene ngü te Yesu mala teka ngü ka fiti Matayo 18:6-7, 21-22; Marako 9:42

¹ Fütanga ngü la, fü Yesu adu amala ngü fü wü *kpara ka-ye, gü ba, "Füh kotö ne, gbü wü sikipi 'buru, ngü ka re-ngü ti alaki kpara de, amba teka mene kpara te ena afiti kiri ye, de ah düri te kaje ka Me asidi, Me ena ato mere kuru fefe ato. ²⁻³ Yi ceka te-yi mbi, angü mene kpara te ena afiti kiri ye, de engu ti gbü *siti ngü, ah esiti! Ah ena adi ta mbi, te wüh ena ai mere siti wö gbü ngüri müri fiti la, fü ewü aza engu di, agü agbü mere *yi-ngu feke, o engu fiti wü kpara la, la de. Angü kuru de te Me ena ato ta fü müri fiti la, teka fiti kaka la, ah ena afa mene kpi te wüh gü engu di gbü ngu ne ka.

Te engu ni mü mere siti ngü, ah le fü mü ari engu. Te engu ce siti ngü ka-ye eyi la, de mü boro siti ngü kaka-na la. ⁴ Anga te engu mere siti ngü fü mü du lorozi gbü sikipi biringbö, fü ah angbü ekoro, enda'ba te-ye fü mü kphah du lorozi, teka wü ngü la, de mü boro wü siti ngü la kphah 'buru."

Dene ngü teka mato maguma fü Me

⁵ Fütanga ngü la, fü wü *müri tima ka Yesu amala fefe, gü ba, "Mere kpara, ye to wazi fü ani, teka de ani to maguma ani fü Me fanü fanü." ⁶ Fü Yesu amala ngü fü ewü, gü ba, "Te yi ena ato ta maguma yi eyi fü Me mba cükü'daye bane la, de bane yi ti eyi amala ngü fü mere rü la, gü ba, 'Ye yia sela eyia, ye nü, ye ru te-ye agbü mere yi-ngu de kpala.' De bane ah ti eyi aje ri yi, fü ah ayia anü aru te-ye kpala fanü."

Dene ngü te Yesu mala teka kpara ka tima

⁷ Fü Yesu adu amala ngü fü ewü, gü ba, "Te biri kpara esüka yi sene de kpara ka tima ka-ye, te ngbü esö e kaka, anga eceka kpi fütanga wü nü kaka, te kpara ka tima la du koro kpa eköti fütanga tima la, mere kpara kaka ena amala fefe, agü neh fe? Ah ena amala, gü ba, 'Ye koro kpakine, ye zü e?' A'a, ah bala de! ⁸ Ah ena amala fefe, gü ba, 'Ye koro de e-mazü fü ni. Fü ye adu azü nda-ye sidi.' ⁹ Gbü wü ngü la 'buru, mere kpara la ti agbo nga iri kpara ka tima ka-ye

la de, angü dela ka-ye bü tima kaka. ¹⁰ Ah kphah bala teka ngü ka-yi. Te yi ngbü emere wü ngü de te Me mala fü yi ne 'buru ereke areke la, yi mere e agbo nga yi teka ngü la de. Ah le de yi mala bü, gü ba, 'Ani ngbü nda-ani emere bü mene wü tima, te Me to fü ani amere,' ne. Angü wazi ka-ye 'buru esaka Me."

Dene ngü ka wü kpara nzükpa de jiakö te-wü te Yesu küwa ewü

¹¹ Fütanga ngü la, o wü Yesu ngbü enü fi bü te kaje ka Yerüsalema, fü ewü ayia afü esüka wü nga nzö sü ka *Samaríya ake *Galílaya. ¹² Wüh te enü akoro agbü gara köti bane de, fü ewü amaka wü kpara nzükpa, de *jiakö te wü, te ewü ngbü ka-wü mba canza edere sü. ¹³ Fü ewü akpo da enda'ba te-wü de mere ri wü fü Yesu, gü ba, "Öö, Yesu, mere kpara, ye ceka la bü cinga te ani ne!" ¹⁴ Fü Yesu afü jia ye aceka ewü, adu amala ngü fü ewü, gü ba, "Wayi, te ah bala, wü nü enü, wü sere te-wü fü wü *mürü gele ka Mere Me, teka fü wü amere gele, baka te wüh ngbü emere fü wü kpara, te jiakö nza eküte ewü eyi fanü fanü ne." Fü wü kpara la ayia, teka anü kpaka wü mürü gele la. O wüh ngbü la bü enü tete te kaje, fü küte ewü ayia areke te-ye, adu te nga ye.

¹⁵⁻¹⁶ Gara biri *ganzi kpara ta ladü esüka ewü, te di ka-ye enga Samariya. Te engu wu, gü ba, ni küwa eyi ne, fü ah alügü nga ye, adu kpaka Yesu, da egbo nga Me de mere ri ye. Fü ah anü akoro ati kötö eri lö Yesu, abuka gbüra ye, ato wayi bala fü Yesu. ¹⁷ Te Yesu wu ngü la bala, fü ah amala ngü, gü ba, "Wü kpara tine te ewü küwa ne, wüh nzükpa de? Wü gara ewü menewa ne, wüh neh ka-ye?" ¹⁸ Biri kpara esüka ewü de menewa la, te ena adu teka agbo nga Me, ato wayi bala fefe na ne, nda ma? Bü ganzi kpara ne du koro ka-ye nzö me-ye? Dene neh ene ngü ne?" ¹⁹ Fü Yesu adu amala ngü fü enga Samariya la, gü ba, "Ye yia eyia tikpi, ye nü ka-ye enü. Ye küwa eyi, angü ye to maguma ye eyi fü Me."

Dene ngü te Yesu mala,

teka kaje te Me ena aküwa wü kpara ka-ye tete

Matayo 24:23-28, 37-41

²⁰ Fütanga ngü la, fü gara wü *Farusi akoro kpaka Yesu, ayi-tata, gü ba, "Mere kpara, sikipi te Me ena aküwa wü kpara ka-ye tete, ah ena adi elaye?" Fü Yesu alügü ngü fü ewü, gü ba, "Kaje te Me ngbü eküwa wü kpara tete, ah de e te wü kpara ti awu de jia wü nda-wü de. ²¹ Te di bala, wüh ti amala, gü ba, 'Ceka la! *Küküwa

la ladü sene, anga ah ladü to kpala,' ne kphah de. Kükürü de, angü küküwa ka Me la ladü emaguma kpara."

²² Fü Yesu adu afü te-ye, amala ngü fü wü kpara ka-ye, gü ba, "Te gara, sidi nga ra, yi ena ao jia yi teka awu sikipi ka-ra, *Ye Kpara ka Kpi, te ma ena adu akoro tete füh kotö ne, amba yi ti awu sikipi engu la nda-yi de. ²³ Wü gara kpara ena amala fü yi, gü ba, 'Yi ceka la, ma koro eyi ngbü to kpala!' Amba ah ka-ye de wu! Yi mere e ale ngü ka-ewü la nda-yi de. ²⁴ Angü dudu ka-ra, Ye kpara ka kpi, wü kpara gbü nga nzö sü füh kotö ne ena aci awu ngü la te nga wü 'buru. Angü ah ena adi baka ülele ka mügbara, te ngbü eü kpa tikpi, da elofu sü ne. Dudu ka-ra ena adi bala, ah ti awo te-ye de! ²⁵ Amba te enga gina, ma ena azü mere cinga feke, angü wü kpara de füh kotö ne le ngü ka-ra nda-wü de!

²⁶⁻²⁷ Gbü sikipi ka-ra, te ma ena adu akoro tete, ngü ta te mere te-ye gbü re ka *Nüwa, ena adu kphah amere te-ye. Angü wü kpara ena angbü ezüfa wü e, da enzönzö wü fi ka-wü, da eza te-wü, wüh ti afi ngü ka Me nda-wü kphah de. Ma ena adu akoro agüka ewü gbü ngü ka-ewü la, kphah ba e ta te mere agö güka wü kpara gbü sikipi, te Nüwa li tete agbü *zabu, fü mere ngu la amörö ewü 'buru ne.

²⁸ Ngü ka dudu ka-ra, ah ena adi kphah ba ngü, ta te mere te-ye agbü *Sodomo, gbü re te Loto ngbü ta tete de kpala. Angü wü kpara ena angbü ezüfa wü e, da enzönzö wü fi ka-wü. Wüh ena angbü da ese wü e ka-wü, wü gara ena angbü esö wü yi ka-wü, da eji wü kambü. Wüh ti afi nga ngü ka Me kphah de. ²⁹ Te di bala, ma ena adu akoro agüka ewü, kphah ba e ta te Me tima siti wa agbü kpi baka agö, fü ah akoro güka wü kpara ka Sodomo, gbü sikipi te wü *malayika ka Me za wü Loto, kpe di gbü Sodomo asidi ne. Fü wa la amörö wü kpara ka Sodomo 'buru. ³⁰ Dela ngü te ena amere te-ye, gbü sikipi ka-ra, Ye Kpara ka Kpi, te ma ena adu akoro asere te-ra tete füh kotö ne.

³¹ Kphah bala, gbü sikipi engu la, mene kpara te ena adi kpa enzö kambü, engu mere e akö kötö, adu ari kpa esambü, teka akö wü e ka-ye, tine de. Kphah bala, mene kpara te ena adi agbü yi, ah mere e adu kpa ekötö, aza wü e ka-ye tine de.

³² Yi fi la ngü te mere wara Loto.* Angü engu du ceka kpi kpa sidi, afi nga wü e ka-ye. Fü ah ayia afere te-ye ciki sela, akoro ba mere teme, bubu ba ngütü avuturu la. ³³ Mene kpara te le aküwa te-ye de tete-ye, ah ti aküwa nda de. Amba mene kpara te

* 17:32 17:32 Mü ena amaka ngü teka wara Loto gbü Gina Ngü 19:26.

ena ace te-ye akpi teka ngü ka-ra, Me ena aküwa engu me-ye.

³⁴ Ma ngbü emala fū yi dene zu ngü, gbü bitu te ma ena adu akoro tete, te wü kpara 'basu ngbü era fūh ka'da biringbö la, ma ena aküwa mene kpara te le ngü ka-ra eyi, fū ra ace mene kpara te le ngü ka-ra de ne. ³⁵ Te wü wüürise 'basu ngbü eyö zu ka-wü tundu gbü sü biringbö la, ma ena aküwa mene te le ngü ka-ra eyi, fū ra ace kphah mene te le ngü ka-ra de ne. ³⁶ Te wü kpara 'basu ngbü emere tima agbü yi biringbö la, ma ena aküwa mene te le ngü ka-ra eyi, fū ra ace kphah mene te le ngü ka-ra de ne."

³⁷ Te wü *kpara ka Yesu je ngü la bala, fū ewü ayi-tata, gü ba, "Mere kpara, ngü la ena amere te-ye neh to siye?" Fū Yesu alügü ngü fū ewü, gü ba, "Sikpi ka-ra la ti awo te-ye de, angü wü kpara 'buru ena awu ngü la. Ah ena adi baka sü te kö nü di ladü tete, wü nügünü, de wü gara wü lu, ena abiti te-wü 'buru fūh kö nü la."

Dela ngü ta te Yesu mala fū wü kpara ka-ye, teka sikpi te engu ena adu akoro tete na.

18

Dene mani te Yesu mala teka wüürise wökö ake siti miri

¹ Fütanga ngü la, fū Yesu adu amala gara cingangü de mani fū wü kpara ka-ye, teka asere fū ewü, gü ba, "Wüh mere e ambü de, wüh ngbü fi da eyi-ta Me." ² Fū ah amala fū ewü, gü ba, "Gara miri ta ladü, gbü gara köti biringbö, te ngbü ekolo ngü ka wü kpara te siti kaje, angü ah fi ngü ka Me 'buru 'buru de. Ah ngbü eceka wü kpara gbü jia ye 'buru kpaakpa. ³ Gbü gara sikpi, fū gara kpara amere siti ngü fū gara wüürise wökö gbü köti engu la. Fū wüürise la ayia anü kpara miri la, teka de engu ye süka ngü ka-ani ake vügü ka-ni la. Miri la le nda de. ⁴ Fū wüürise la angbü ekoro kpara miri la, gbü wü sikpi 'buru, teka ngü ka-ye la. Amba miri la le akolo ngü ka wüürise la nda de. Fütanga mere bi sikpi, fū miri la akpo da efi ngü emaguma ye, gü ba, 'Ni ena amere baye? Fanü fanü, ni kpe cürü Me de, ni ngbü kphah eceka wü kpara gbü jia ni 'buru kükürü. ⁵ Amba ngü ka wüürise wökö, te ngbü ekoro gbuuu embü ni ne, ah le de ni kolo ngü kaka la mbi. Angü ah ena angbü ekoro fi bü da embü nzö ni sene, gbü wü sikpi 'buru.' "

⁶ Fū Miri Yesu adu amala fū wü kpara ka-ye, gü ba, "Yi fi la nga mene ngü, de te siti miri la mala ne. Ah du le ta-ngü te wüürise wökö la eyi, angü ah mbü engu eyi fa sü. ⁷ Yi efi, gü ba, Me ti ale ta-ngü te wü kpara ka-ye neh de? Te wüh ngbü

fi bü da eku gba fefe ra de bitu la, Me ena ale ta-ngü te ewü ale. ⁸ Ma ngbü emala fū yi dene zu ngü, Me ti ayiri, teka ale ta-ngü te wü kpara ka-ye de. Amba gbü sikpi te ma ena adu akoro tete fūh kotö ne, ma ena amaka bi wü kpara, te ewü di eyi 'buru nzo gbü ngü ka Me fanü?"

Dene mani te Yesu mala, teka züka kpara ake siti kpara

⁹ Fütanga ngü la, fū Yesu adu amala gara mani, teka ngü ka wü kpara, de te ewü ngbü efi emaguma wü, gü ba, ani ka-ani de züka wü kpara gbü jia Me mani. Teka ngü la, fū ewü angbü efala wü bu wü afala. ¹⁰ Fū Yesu amala ngü, gü ba, "Wü kpara 'basu yia ta nü kpa etambasü *Mere Kambü ka Me agbü Yerüsalema, teka aku gba fū Me. Gara ta de *Farusi, gara de kpara te ngbü ero *jiase ka wü miri. ¹¹ Te Farusi la koro tete etambasü la, fū ah arü tikpi, gbü jia wü kpara 'buru, aku nda-ye gba fū Me, gü ba, 'Wayi bala Me, ni gbo nga ye, angü ni de züka kpara gbü jia ye. Ni mere *siti ngü baka gara wü kpara ne de. Angü wü gara ewü de mürü zi, wü gara ewü de mürü wu, wü gara ewü de mürü waza, wü gara ewü ngbü efiti wü bu wü teka ngü ka gümü e, baka kpara te ngbü ero jiase ne. ¹² Amba nda-ni, ni ngbü emere 'buru wü ngü, te reke areke gbü jia ye. Gbü wü sikpi lotozi, ni ngbü *e'bi te-ni du 'basu. Ni ngbü kphah eto wü tari wü e ka-ni 'buru fū ye. Fanü fanü, ni de züka kpara!'

¹³ Amba kpara te ngbü ero jiase ne, mü nü rü nda-mü mba edere sü kpala. Mü le ae jia mü tikpi kphah de, teka cinga emaguma mü. Fū mü ayia anda'ba te-mü fū Me, gü ba, 'Akoo Me, ye ceka la cinga ni, de ye boro *siti ngü ka-ni, angü ni ka-ni de siti kpara.' "

¹⁴ Fū Yesu amala ngü fū wü kpara ka-ye, gü ba, "Yi fi nda-yi, gü ba, esüka wü kpara de 'basu ne, e-reke gbü jia Me neh ngü ka da? Ma emala fū yi dene zu ngü, ngü ka kpara te ro jiase reke me-ye. Te di bala, mene kpara te ngbü eo ngü ka-ye memere, Me ti ale ngü kaka de. Amba mene kpara, te ngbü enda'ba te-ye fū Me, teka wü siti ngü ka-ye la, Me ena ao engu ba mere kpara me-ye."

Dene ngü ka Yesu de wü jürü jaji Matayo 19:13-15; Marako 10:13-16

¹⁵ Fütanga ngü la, fū gara wü kpara ayia akoro de wü jürü jaji ka-wü kpaka Yesu, de engu o kpa ye gbü nzö ewü, teka de Me to wazi fū ewü. Te wü *kpara ka Yesu wu ngü la bala, fū ngü la asiti te ewü. Fū ewü akpo da eliki wü jaji la. ¹⁶ Te Yesu wu ngü la bala, fū ah ayia ai wü jürü jaji la kpaka ye. Fū ah amala ngü fū

wü kpara ka-ye la kpekpeke, gü ba, “Yi ce wü jaji la, de wüh koro kpaka ra. Yi mere e atiri ewü de. Angü wü jürü jaji cu ngü wü de, wüh mere mani kphah de. Mene wü kpara te maguma ewü di baka nda wü jaji de bala ne, wüh ena aküwa gbü sü ka Me agbü kpi me-wü. ¹⁷ Ma ngbü emala fü yi dene zu ngü. Te mü le ara fü Me, ah le de mü fü maguma mü ba nda wü jürü jaji. Angü te maguma mü ngbü ba nda wü jaji de la, mü ti ari gbü sü ka Me agbü kpi kphah de.”

Dela ngü ta te Yesu mere fü wü jürü jaji.

Dene ngü te Yesu mala teka wü kpara de mere bi e esaka wü

Matayo 19:16-30; Marako 10:17-31

¹⁸ Fütanga ngü la, fü gara mere kpara ayia akoro kpaka Yesu, ayi-tata, gü ba, “Züka mere kpara, ni ena amere baye, teka fü ni aküwa agbü sü ka Me, fi mere badi?”

¹⁹ Fü Yesu amala ngü fefe, gü ba, “Mü i ra züka kpara neh teka ne? Züka kpara füh kotö ne nda ma, 'duwa Me kpi kpi ye. Mü wu bala de? ²⁰ Te mü le aküwa la, ah le de mü mere wü *Riri ka Me 'buru mbi mbi. Mü wu Riri la de? Riri la gü ba, 'Mü mere e amere waza de.

Mü mere e amörö kpara de.

Mü mere e azi e de.

Mü mere e adi esutu wu te wü bu mü de.

Mü je riri ka wö mü ake ni mü. ’ ”*

²¹ Fü mere kpara la alügü ngü, agü ba, “Ni kpo da emere wü ngü la eyi kü gügü, o ni di la jaji, zalü akoro di dene, ni ngbü fi bü emere wü Riri la.” ²² Te Yesu je ngü la bala, fü ah amala ngü fefe, gü ba, “Ah de züka ngü. Amba du ngü ladü biringbö te mü mere la de. Te di bala, mü du edu, mü cinzi wü e ka-mü 'buru asidi. Fü mü aza jase engu la, ato fü wü mürü cinga, fü mü adu alala gbü nga ra, teka fü mü adu amaka *kükuwa te gara, agbü sü ka Me agbü kpi.” ²³ Te mere kpara la je ngü la bala, fü ah angbü de mere cinga emaguma ye. Fü ah ayia alügü nga ye, edu agba ye, de mere fingängü gbü nzö ye, angü engu ta de mere bi wü e esaka ye fa sü.

²⁴ Fü Yesu aceka nga mere kpara la. Fü ah amala ngü fü wü kpara ka-ye, gü ba, “Wü kpara te ewü di de mere bi wü e esaka wü ne, ah kpekpeke fü ewü teka afü te-wü, ato maguma wü fü Me! ²⁵ Ah baka ya† te le ari gbü enga gö sögbe ne.‡ Ah ti eyi ari kpala fanü? Ah ti ari nda de. Amba ngü ka mene kpara de mere bi wü e esaka ye, ah kphah bala. Ah ena adi kpekpeke fefe, teka afü maguma ye, ara fü Me.”

²⁶ Te wü *kpara ka Yesu je ngü la gögömö na bala, fü ewü akpo da eyi-ta tete-wü, gü ba, “Te ngü la tüne bala la, biri kpara ladü te ena aküwa?” ²⁷ Fü Yesu alügü ngü fü ewü, gü ba, “Kpara te ena aküwa te-ye de tete-ye nda ma. Angü ngü la fa wü kpara eyi 'buru. 'Duwa te Me ena aküwa mü me-ye, angü ngü te ena afa Me nda ma.”

²⁸ Petero, fü mü arü amala ngü fü Yesu, gü ba dene, “Mere kpara deyi, ye ceka la, ani ce wü e ka-ani eyi 'buru, teka alala gbü nga ye. Te di bala ne, ngü ka-ani ena adi baye?” ²⁹⁻³⁰ Fü Yesu amala fü ewü, gü ba, “Wayi, yi ena amaka züka ngü amaka. Ngü te ma emala fü yi dene, ah de kpeke ngü. Te mü ce wü e ka-mü teka ngü ka-ra, teka amala ngari Me fü wü kpara la, Me ena ato mere bi züka ngü fü mü, afa nda-mü te mü ce ne ka. Anga mü ce neh ene. Te ah de gba mü, wara mü, wü di enga ni mü, wö mü ake ni mü, anga wü di mü, te mü ce ewü teka ngü ka-ra la, Me ena ato mere bi züka ngü fü mü füh kotö ne, da wü e te mü ce la. Kpah bala, Me ena aküwa mü gbü sü ka-ye agbü kpi fi mere badi.”

Dela ngü te Yesu mala, teka wü kpara de mere bi wü e esaka wü.

Dene ehabata ngü te Yesu mala, teka kpi ka-ye

Matayo 20:17-19; Marako 10:32-34

³¹ Fütanga ngü la, fü Yesu amala ngü fü wü kpara ka-ye nzüka de füh ye 'basu ne, gü ba, “Yi wu eyi, gü ba, nih ngbü enü dene agbü Yerüsalema. Te nih ena akoro kpala, wü ngü 'buru, ta te wü *mürü dofo ba gbü *Ngari Me teka ngü ka-ra, *Ye Kpara ka Kpi ne, wüh ena amere te-wü. ³² Angü wüh ena ato ra esaka wü *ganzi kpara, fü ewü akpo emü ra, da efala ra, da esü ngüsü gbüra ra. ³³ Wüh ena asüma ra de juru, fü ewü amörö ra. Amba Me ena adu azükü ra gbü kpi la gbü *ehabata sikpi.” ³⁴ Amba ngü de te Yesu mala la, wü kpara kaka je sisi na nda-wü de. Angü si-ngü la wo te-ye fü ewü awo, ah ri gbü nzö ewü kphah de.

Dene ngü te Yesu küwa kpara te jija ni ani

Matayo 20:29-34; Marako 10:46-52

³⁵ Baka te wü Yesu ngbü la fi bü enü te kaje ka Yerüsalema ne, fü ewü anü akoro gbamari ede Yeriko. Fü ewü amaka gara komoko, te jija na ni ani, te ngbü edere kaje, da eyo e te wü kpara. ³⁶ Fü komoko la aje giri mere bi wü kpara, te ewü ngbü enye sü ne. Fü ah ayi-ta ngü teka ngü la,

* **18:20** 18:20 Mü ena amaka wü riri ka Me la gbü buku ka Gogo ka wü Yisarayele 20:12-16. † **18:25** 18:25 Ya te wüh mala ngangana de sene, gbü ngü Giriki, wüh mala ka-wü nga kamele. ‡ **18:25** 18:25 Sögbe de libira anga sindani. § **18:37** 18:37 Yesu ka-ye de kpara ka Nazareta.

gü ba, "Wü di engä ni ni, e-ngbü emere te-ye ne ngü ne?"³⁷ Fü ewü alügü ngü fefe, gü ba, "Ah de Yesu,^S te ngbü enye sü me-ye."³⁸ Te komoko la je ngü la bala, fü ah akpo eba rere kpa tikpi, da ei Yesu, gü ba, "Yesu! Kundu ye *Davidi! Ni wu eyi, gü ba, ye koro teka aküwa ani! Ye ceka la bü cinga te ni ne baaa!"³⁹ Fü wü kpara, ta te ewü ti engakara nü ne, ayia amala ngü fefe kpekepeke, gü ba, "Ye nga anga!" Amba komoko la, mü le aje ngü ka-ewü la nda-mü de. Fü mü angbü fi bü da eba rere te iri Yesu kpa tikpi, gü ba, "Yesu! Kundu ye Davidi! Ye ceka la bü cinga te ni ne baaa!"

⁴⁰ Te Yesu je ngü la, fü ah ace te-ye, arü, agü ba, "Wü koro de engu akine!" Fü ewü aza komoko la, akoro di kpara Yesu. Fü Yesu ayi-tata, gü ba,⁴¹ "De-ye dey, ye le de ni mere fü ye ne ngü ne?" Fü komoko la alügü ngü fefe, gü ba, "Akoo, mere kpara, ma le de mü ü jia ra, teka fü ra adi kpahe eceka kpi!"⁴² Fü Yesu amala ngü fefe, gü ba, "Wayi, ceka la, mü küwa eyi, angü mü to maguma mü eyi fü Me!"⁴³ Yesu bü te emala ngü la bala, 'duwa fü jia komoko la aü te-ye, raaa! Fü engu ayia kürrü, akpo efa nga wü Yesu, da egbo nga iri Me. Te mere bi wü kpara la wu ngü la bala, fü ewü angbü 'buru de tadu, kpahe da egbo nga iri Me teka ngü la.

19

Dene ngü ka Yesu ake Zakayü

¹ Fütanga ngü la, fü wü Yesu ayia anü arü kpuru gbü Yeriko. ² Gara komoko ta ladü kpala, de iri ye Zakayü. Ah de mere kpara, te ngbü eceka kpi fütanga wü kpara, te ewü ngbü ero *jiase fü miri ka wü Rüma. Zakayü ta de mere bi wü e esaka ye. ³ Te wü Yesu ngbü enye sü tete, fü Zakayü angbü ta egiri kaje de ni wu Yesu. Amba teka mere bi wü kpara, te ewü ngbü enü gbü nga Yesu ne, dada te engu ena awu Yesu nda ma, angü ah ka-ye de piti kpara. ⁴ Te Zakayü wu bala, fü ah ayia akpe anü kpa engagira nü, ali angbü rü* kpa tikpi, teka fü ni awu Yesu mbi mbi mbi. Angü wü Yesu ena akoro, aguru sü kpuru te kaje engu la.

⁵ Te wü Yesu nü koro mbi esa rü la, fü ah ayia ae jia ye kpa tikpi, aceka Zakayü, adu amala ngü fefe, gü ba, "Zakayü, ye kö ekö kere kötö akine. Angü enatikine, ni ena anü ara agba ye."⁶ Te Zakayü je ngü la bala, fü ah ayia akö kere kötö, ale ngü la de mere tadu. Fü ah ayia aza wü Yesu, anü de ewü kpa gba ye.

⁷ Te mere bi wü kpara wu ngü la bala, fü ewü ayia akpo da emala ngü gbü ngingiri

ngü, gü ba, "Ayü, wü ceka la! Komoko ne yia enü ara dene kpa gba siti kpara de bala?"

⁸ Te wü Yesu nü koro kpa gba Zakayü, fü Zakayü ayia arü amala ngü fü Miri Yesu, gü ba, "Mere kpara, ni ena aye süka wü e kani, aza gara, ato fü wü müürü cinga. Kpah bala, te ni za ta wü e ka gara kpara eyi de mani la, ni ena adu alügü nana fefe du bala."⁹ Te Yesu je ngü la bala, fü ah ayia amala ngü fefe, gü ba, "Enatikine, ma koro eyi gba yi sene, teka aküwa yi, angü yi to maguma yi eyi fü Me kpahe baka kundu yi, *Abarayama."¹⁰ Angü de-ra, *Ye Kpara ka Kpi, Me tima ra füh kotö ne, teka agiri wü kpara, te ewü düürü te kaje ka Me de bala, teka aküwa ewü."

Dene ngü mani te Yesu mala teka wü kpara ka tima nzükpa

¹¹ Fütanga ngü la, te wü Yesu nü koro gbamari ede Yerüsalemä, fü ah amala kpahe gara mani fü wü kpara, te ewü ngbü eje ngü gögömö na ne, angü wüh ngbü ta efi nda-wü, gü ba, Me ena akoro angbü gbü nzö ani titine. ¹² Fü Yesu amala fü ewü, gü ba, "Gara ye miri ta ladü, te di de mere bi wü e esaka ye. Baka te wö ye na kpi, fü ah areke te-ye, teka anü agbü gara sü nengete, agba mere müürü tö la, teka fü ewü ato wazi fü ni, ao ni miri, da wö ni."¹³ Fü engu ayia ai wü kpara ka tima ka-ye nzükpa kpaka ye, ato jiase fü ewü biri biri 'buru, amala fü ewü, gü ba, 'Wü za e la, wü mere tima di, teka amaka gara fefeh. Wü mere bala, zalü gbü sikkpi te ni ena adu akoro tete.'

¹⁴ Amba gara wü kpara gbü tö ka-ewü la le ngü kaka nda-wü de. Fü ewü atima gara wü kpara kpaka mere miri, müürü tö la, teka asiti ngü la, gü ba, 'Ani le fü komoko la angbü miri gbü nzö ani de!'¹⁵ Amba mere miri la le ngü ka-ewü la nda de. Fü ah adu ao ye miri la, miri da wö ye.

Fü mere kpara la ayia adu agba wü. Fü ah ai wü kpara ka tima ka-ye, ta te engu to jiase fü ewü ne, teka awu nga tima, de te wüh mere de jiase la. ¹⁶ Fü gina kpara ka tima kaka ayia arü, amala ngü fefe, gü ba, 'Mere kpara, jiase ta te ye to fü ni ne, ni maka gara eyi fefeh nzükpa dene.'¹⁷ Fü mere kpara kaka amala ngü fefe, gü ba, 'Wayi, ye de kpeke kpara! Angü engu tima 'dongoni, ta te ni to fü ye ne, ye mere eyi mbi. Te ah bala, ni ena ao ye mere kpara adi eceka kpi fütanga wü koti nzükpa.'

¹⁸ Fü e'ba'basu kpara ka tima akoro, asere nda-ye ngü, gü ba, 'Mere kpara, nda-ni kpahe bala. Jiase ta te ye to fü ni ne, ni maka gara eyi fefeh 'buruve.'¹⁹ Fü mere kpara la amala fefe, gü ba, 'Wayi, nda-ye,

* 19:4 19:4 İri rü la de sikamü.

ni ena ao ye mere kpara, adi eceka kpi fütanga wü kötö 'buruve.'

²⁰⁻²¹ Fü gara ayia kpaah akoro, amala ngü, gü ba, 'Mere kpara, ye ceka la, jiasse ka-ye ta te ye to fü ni ne, ah dene. Ni kpe cürü, angü ni wü kpo, gü ba, ye de kpeke kpara, te ye ru e de la, ye ka-ye fi bü emaka e. Tekka ngü la, fü ni aza jiasse ka-ye la, agaga de kala bongo, awo awo. Ah dene.'²²⁻²³ Fü mere kpara la amala ngü fefe, gü ba, 'Ye de siti kpara! Te ye wu ta kpo, gü ba, ni de kpeke kpara, te ni ngbü emaka wü e gbü wazi ka-ni la, ye du za ta jiasse ka-ni la, ao kpaka wü kpara, te ewü ngbü eceka kpi fütanga jiasse ka wü kpara, de neh baye? De bane, baka te ni du koro dene, ni ena amaka ta jiasse ka-ni la, de gara na füh ye. Te ah bala, ni ena akolo ngü ka-ye, te nga ngü ka-ye te ye mere la.'

²⁴ Fü mere kpara la adu amala ngü fü wü komoko ka-ye, te ewü ngbü de kpala ne, gü ba, 'Wü za jiasse de esasaka la, wü to fü mene kpara te maka nda-ye nzükpa ne.'²⁵ Fü ewü alügü ngü fefe, gü ba, 'Apa, mere kpara! Nda-ka jiasse kpaah ladü nzükpa ne, wüh ena adu kpaah ato gara fefe na?''²⁶ Fü mere kpara la adu amala ngü fü ewü, gü ba, 'Ni emala fü wü dene zu ngü. Mene kpara te mere tima kpekepeke, fü ah amaka mere bi e, wüh ena aza kpaah gara wü e, ato fefe. Amba mene kpara te mere tima mbi mbi de, mba enga e te di esasaka ne, wüh ena aza asidi.'²⁷ Amba teka ngü ka wü vügü ka-ni, te ewü le de ni ngbü miri gbü nzö ani de ne, wü nü, wü zoro ewü, wü koro de ewü engagira ni sene, de wü mörö ewü gbü jia ni asidi.' "

Dela mani ta te Yesu mala teka wü kpara ka tima nzükpa la.

Dene ngü ta te Yesu ngbü eri tete agbü Yerüsalema

Matayo 21:1-9; Marako 11:1-10; Yüwane 12:12-15

²⁸ Fütanga ngü la, fü Yesu ayia ati engagira nü, ale kaje tîne, enü anü agbü Yerüsalema, de wü kpara ka-ye gbü nga ye.²⁹ Te wüh nü koro ghamari ede Yerüsalema, fü ewü ale kaje kötö de kpa engakara wü la. Te wü koro kpala, wü ena amaka dongi, te wüh i, o kpala. Enganga na, te wüh li fefeh na la de. Wü furu dongi la, de wü za koro di fü ni akine.³¹ Amba te gara kpara yi-ta wü, gü ba, 'Wü ngbü efuru engana nü la teka ne la,' de wü lügü ngü fefe, gü ba, 'Mere kpara ka-ani ngbü ele me-ye.' "

³² Fü wü kpara de te Yesu tima ewü ne, ayia anü amaka wü ngü la kpaah 'buru, baka te Yesu mala fü ewü ne.'³³ Fü ewü akpo da efuru engana dongi la. Fü wü mirü nü la akoro, ayi-ta ewü, gü ba, "Ah mere baye, te wü ngbü efuru engana dongi ne?"³⁴ Wü *kpara ka Yesu la gü ba, "Mere kpara ka-ani ngbü ele me-ye."

³⁵ Fü ewü afuru engana dongi la, aza, adu di kpaka Yesu. Fü ewü aza bongo ka-wü, aghala, agü füh gü engana dongi la, ae Yesu, ao fefeh na. Fü ewü ale kaje, angbü enü agbü Yerüsalema.³⁶ Fü mere bi wü kpara ayia akoro angbü efuru nga iri Yesu. Fü gara ewü angbü eghala wü bongo ka-wü kötö te kaje, teka fü Yesu angbü enü fefeh na.³⁷ Te wü Yesu koro tete ghamari ede Yerüsalema, gbü sü te wüh kpo da ebiki tete kpa esa gö, fü mere bi wü kpara ka Yesu, te wüh ngbü enü de ewü ne, aci 'buru, angbü de mere tadu. Fü ewü akpo da emi koko, da eba rere, egbo nga iri Me de mere ri wü kpa tikpi, teka wü mere kpeke ngü ka Yesu, te ewü ngbü wu ne.³⁸ Fü ewü angbü ebi ci, gü ba,

"Gbo nga e ngbü te iri Me!

Me to wazi fü mü, angü ah tima mü fü a me-ye.

Mü de mere miri te ena aküwa a!

Gbo nga e ngbü te iri Me agbü kpi!"

³⁹ Te wü gara *Farusi, de esüka mere bi wü kpara la, je ngü la bala, fü ewü amala ngü fü Yesu, gü ba, "Mere kpara deyü, ye mala ngü fü wü kpara ka-ye la, de wüh nga anga."⁴⁰ Yesu gü ba, "Wüh ena anga teka ne? Ma emala fü yi dene zu ngü, angü Me le me-ye de wüh gbo nga iri ra bala. Te wü kpara la ena ace da egbo nga iri ra la, ngü la ena asiti te Me, fü ah adu ato wazi fü wü da, de wüh gbo nga iri ra tîne me-wü!"

⁴¹ Te wü Yesu nü koro tîne cu ghamari ede Yerüsalema kpala, fü Yesu ayia ae jia ye, aceka kpi, awu Yerüsalema. Fü ah akpo da eku gba de ngura, teka siti ngü te ena amere te-ye te gara kpala ne.⁴² Fü ah amala ngü, gü ba, "Ööö! De-yi, wü kpara ka Yerüsalema, yi ceka la mere cinga, te ena amaka yi te gara! Te yi ena ale ta ngü ka-ra, te Me tima ra teka aküwa yi ne eyi la, de bane, yi ena aküwa ta fanü. Amba tütine, yi le nda-yi de, angü ngü la wo te-ye ka-ye awo gbü jia yi."⁴³ Te di bala, te gara, wü vügü ka-yi ena akoro de wazi, afü kere 'baranga ka-yi gbaa, ani nga yi.⁴⁴ Wüh ena amörö yi de wü jaji ka-yi, anza 'buru asidi. Fü ewü amümürü wü mere kambü ka-yi 'buru akötö. Da biringbö, te ewü ena ace ao füh kiri ye, kpo ma! Kükürü de, angü kpara te Me tima teka aküwa yi ne, yi le engu nda-yi de!"

Dene ngü ta te Yesu liki wü kpara di,

*etambasü Mere Kambü ka Me**Matayo 21:12-13; Marako 11:15-18*

⁴⁵ Te wü Yesu du koro tete agbü Yerüsalema, fü engu anü sü 'duwa, ari kpa etambasü *Mere Kambü ka Me. Fü engu amaka mere bi wü kpara, te ewü ngbü ecinzi wü e ka-wü kpala. Fü ah ayia akpo 'duwa eliki ewü, ⁴⁶ gü ba, "Me mala teka Kambü ka-ye, gü neh fe? Me gü ba, 'Kambü ka-ni, ah de sü te wü kpara ena angbü egbo nga iri ni gbügbü."[†] Yi wu bala de? Amba nda-yi, yi fü tambasü Kambü ka Me eyi, ba sü ka wü mürü zi!"

⁴⁷ Fütanga ngü la, fü Yesu akpo angbü eri wü kpara gbü wü siki 'buru etambasü Kambü ka Me. Wü angbe cögbörö *kovo de wü *mürü riri ngbü ta egiri kaje teka amörö engu. ⁴⁸ Amba wüh maka kaje te ewü ena azoro engu tete ne nda-wü de, angü cürü ngbü emere ewü, teka ngü ka mere bi wü kpara, te ewü ngbü 'buru eje ngü gömö Yesu de mere tadu te wü ne.

20

Dene ngü te wü angbe cögbörö kpara ka Yisaraye

*yi-ta Yesu di**Matayo 21:23-27; Marako 11:27-33*

¹ Gbü gara siki, o Yesu ngbü eri wü kpara de ngari Me etambasü *Mere Kambü ka Me, fü wü mere *kovo ka-ewü, wü *mürü gele, de wü *mürü riri ayia akoro kpakaka na, ² ayi-tata, gü ba, "De-ye deyi, ye ngbü emere wü ngü de bala ne, neh gbü wazi ka da? Kpara te tima ye, aliki wü kpara etambasü Mere Kambü ka Me ne, neh da?" ³ Fü Yesu amala ngü fü ewü, gü ba, "Ni ele kpah ayi-ta wü de ngü biringbö, de wü lügü fü ni. ⁴ Yitangü ka-ni la teka *Yüwane Mürü Babatiza. E-tima engu teka ato babatiza fü wü kpara neh da? Ah de Me de? Anga ah mere ngü la de tete-ye?"

⁵ Fü ewü akpo da emala ngü esüka wü, gü ba. "Ani ena alügü ngü la fefe, agü neh fe? Anga te ani mala, gü ba, 'Me to wazi fü Yüwane me-ye' la, Yesu ena adu kpah ayi-ta ani, gü ba, 'Te ah bala la, ani le ngü kaka de, neh teka ne?' ⁶ Amba te ani mala, gü ba, 'Yüwane ngbü emere ngü la de tete-ye,' la, ah kpah esiti, angü maguma bi wü kpara ne 'buru ena asiti eküte ani, fü ewü asötö ani, amörö de teme, angü wüh le ngü ka Yüwane fa sü, gü ba, engu de *mürü dofo ka Me."

⁷ Te di bala, fü wü angbe cögbörö kpara la alügü ngü fü Yesu, gü ba, "Ani wu kpara te to wazi fü Yüwane ne, nda-ani de."⁸ Fü

Yesu adu amala ngü fü ewü, gü ba, "Wayi, ah mbi! Te ah bala la, ni tü amala nga kpara te to wazi fü ni ne kpah de."

Dene mani te Yesu mala teka wü kpara,

*te ewü ngbü eceka kpi fütanga riru**Matayo 21:33-46; Marako 12:1-12*

⁹ Fütanga ngü la, fü Yesu akpo da emala ngü fü wü kpara gbü mani, gü ba, "Gara komoko ta ladü te ru mere bi wü rü *vinü ka-ye. Fü ah adu aza wü kpara ka tima, ao kpala, aro mö de ewü areke areke, de wüh di eceka kpi fütanga yi ka-ni la mbi mbi mbi. Fütanga ngü la, fü ah ayia ka-ye, anü kpa gbü gara sü nengete, teka mere bi wü re. ¹⁰ Te kpiri ka makolo ri-rü la koro tete, fü komoko la ayia atima biri gara labi ka-ye, kpaka wü kpara ka tima la, teka aza ri-rü fü ye. Fü wü kpara ka tima la azoro labi la, amü engu, alügü kpaka mere kpara de kpa ye kükürü. ¹¹ Fü mürü riru la ayia atima kpah gara labi ka-ye kpaka ewü. Fü ewü azoro kpah engu, amü, asosoko engu, amemere lalara, alügü engu de kpa ye kpah kükürü. ¹² Fü mürü riru la adu atima kpah ehabata labi ka-ye. Nda-ka la, wüh du mere engu kpah bala. Wüh siya ka eküküte, aza engu, asö kpa etanü. Fü labi la akpe adu de kpa ye kpah kükürü. ¹³ Fütanga ngü la, fü mürü riru la adu afi ngü, gü ba, "Titine ni ena amere baye? Te ah bala, ni ena atima tine cu ye ni, de te ni le engu fa sü ne. Angü wüh ena akpe cücürü na, fü ewü aje ngü kaka.' Fü ah ayia atima ye ye la kpaka ewü. ¹⁴ Te wü kpara la wu ye mürü riru la te ngbü egoro, fü ewü akpo da emala ngü esüka wü, gü ba, 'Ceka la! Ye mürü riru la te egoro! Engu ena aza e-nga-kpa wö ye, te gara me-ye. Te di bala, ah le de ani mörö engu asidi, teka fü yi ka-ewü ne angbü te gara fü ani.' ¹⁵ Fü ewü ayia azoro ye mürü riru la, anü di agbü gü, amiki engu kpö kpö kpö! amörö ka."

Fü Yesu adu ayi-ta wü kpara la, gü ba, "Gbü fingangü ka-yi, mürü riru la ena amere de wü siti kpara la neh baye?" ¹⁶ Ah ena ayia akoro kpaka ewü de mere wazi, amömörö ewü 'buru, adu aza wü gara kpara, ao ewü teka aceka kpi fütanga wü riru ka-ye la." Te wü angbe cögbörö kpara la je ngü la bala, fü ngü la ake te ewü afa sü. Fü ewü amala ngü, gü ba, "Ngü la ti amere te-ye bala de!"

¹⁷ Fü Yesu afü te-ye, aceka ewü, amala ngü fü ewü, gü ba, "Ngü ta te wüh ba gbü *Ngari Me, teka ngü la, gü neh fe? Ah gü ba, 'Wü gara kpara ngbü ta eji *Mere Kambü ka Me. Fü ewü amaka gara rü, te

[†] 19:46 19:46 Mü ena amaka ngü la gbü buku ka Yisaya 56:7. wü Davidi 118:22.

* 20:17 20:17 Mü ena amaka ngü la gbü Ci ka

ewü le nda-wü de. Fū ewü ace rü la asidi. Titine rü ta te ewü ce la, Me du o tine eyi mere kpeke rü de wazi ye, te wü bu ye na ngbü engbü 'buru eküküte.*¹⁸ Kpara te ena atí fūh rü la, ah ena akukuru akukuru, coro coro! Kpah bala, te rü la tū fūh kpara la, rü la ena akpa'da engu akpa'da."

¹⁹ Te wü angbe cōgbörö wü kpara, wü mürü gele, de wü *mürü riri, je ngü la bala, fū maguma ewü ayia anzu, angü wüh wu eyi, gü ba, Yesu mala mani la eküte ani, teka te ani le ngü kala nda-ani de ne. Te di bala, wüh le ta de ani zoro Yesu gbü lö-ra la, amba dada ma, teka mere bi wü kpara la, angü wüh le ngü ka Yesu fa sü.

Dene ngü ta te wüh yi-ta Yesu di, teka mase ngürü

Matayo 22:15-22; Marako 12:13-17

²⁰ Fütanga ngü la, fū wü angbe cōgbörö wü kpara la akpo angbü afete komö Yesu afete, anga ah ena amala siti ngü ya. Kpah bala, fū ewü ayia atima wü gara kpara kpaka Yesu gbü mani, teka agiri kaje, afiti Yesu de engu mala siti ngü eküte miri ka wü *Rüma, teka de ani zoro engu tete, anü di engagira miri la. Amba wü kpara la mere mani, fū te-wü baka züka wü kpara, te ewü le ngü ka Yesu eyi fanü. ²¹ Te di bala, fū wü mürü mani la akoro amaka Yesu, amala ngü fefe na, gü ba, "Mere kpara, ani wu eyi, gü ba, ye de kpeke kpara, te ye ngbü emala zu ngü ka Me fū ani fanü fanü. Angü ye kpe cürü wü kpara nda-ye 'buru 'dö de, ye ngbü ele ka-ye 'duwa ngü ka Me. ²² Te di bala, gara ngü ladü te ani le ayi-ta ye di. Ah ti atí fū ani ase ngürü ani fū *Kayisara, miri ka wü Rüma, te ngbü gbü nzö ani ne? Anga ah ti de? *Riri ka Müse gü neh fe?"

²³ Amba Yesu, mü wu mani ka-ewü la nda-mü eyi kpo. Fū mü ayia amala ngü fū ewü, gü ba, ²⁴ "Wü za la biri jiasa sela, wü sere fū ani." Fū ewü aza gara jiasa biringbö, ato fefe. Fū ah aceka jiasa la, agü ba dene, "Kuru kpara bete iri kpara, de te wüh ba eküte jiasa ne, neh nda da?" Fū ewü alügü ngü, gü ba, "Ah de nda miri Kayisara." ²⁵ Yesu gü ba, "Ah mbi! Te ah bala la, yi lügü e ka miri fū miri. Te ah de nda Me la, de yi lügü kpah fū Me."

²⁶ Dela ngü ta te Yesu mala fū wü kpara, teka mase ngürü. Angü gara siti ngü gbügbü, te ewü ena azoro engu di, ah nda ma. Fū komö ewü agu 'buru agu gbü ngü la.

Dene ngü ta te wüh yi-ta Yesu di, teka züzükü gbü kpi

Matayo 22:23-33; Marako 12:18-27

²⁷ Wü gara kpara ta ladü esüka wü di enga *Yisaraye, te wüh ngbü ei ewü, gü ba, wü *Saduke. Wüh ngbü efi nda-wü, gü ba, te kpara kpi eyi la, ah kpi eyi fi mere badi. Ah du azükü gbü kpi tine de. Te di bala, fū wü gara Saduke la ayia akoro kpaka Yesu, ayi-tata gbü mani, teka aza ngü gögömö na. ²⁸ Fū ewü amala ngü fefe, gü ba, "Mere kpara, gara ngü ladü te ani le ayi-ta ye di. *Müse ba ta ngü fū ani gbü *Riri ka Me, gü ba, 'Te kpara kpi, ce wara ye, o wüh bi ye ake di la de la, ah le de enga ni ye na za würüse gbü nganga na la, teka abi ye dada na, angü iiri na ena adürü'† ²⁹ Amba, te wü kpara ena azükü gbü kpi azükü fanü fanü la, ngü la ena adi baye? Angü gara wü komoko ta ladü, wüh guvu ni wü lorozi. Fū gigna aza würüse, fū ah akpi ka-ye ace würüse la, o wüh bi ye ake di la de. ³⁰ Fū e'ba'basu ayia aza wökö gbü nga enga ni ye la. Fū ah ayia kpah akpi, o wüh bi ye la de. ³¹ Fū ehabata adu kpah aza. Fū ah ayia kpah akpi, ace würüse la fi kükürü. Ngü la ngbü mere te-ye bala fū ewü lorozi 'buru, te ewü ngbü za würüse la. Fū ewü akpi 'buru ace würüse la bü bala, wüh bi ye tete nda-wü de. ³² Fū würüse la adu akpi nda-ye tine sidi nga ewü 'buru. ³³ Te di bala, te wü kpara ena azükü azükü gbü kpi fanü la, würüse la ena adi neh wara da? Kükürü de, angü wü kpara de lorozi la 'buru, za ta würüse la eyi wara wü tete!"

³⁴ Fū Yesu alügü ngü fū ewü, gü ba, "Wü kpara fūh kotó sene eza te-wü me-wü. ³⁵ Amba mene wü kpara, te Me le eyi azükü ewü gbü kpi ne, te wüh koro eyi agbü sü ka Me agbü kpi kpala la, wüh za te-wü nda-wü tine de. ³⁶ Wüh ti akpi tine kpah de, wüh ena angbü ka-wü tine baka wü *malayika ka Me. Wüh ena adi tine wü di Me, angü wüh zükü gbü kpi eyi.

³⁷ Amba, wüh ba teka ngü ka züzükü gbü kpi gbü *Ngari Me, gü neh fe? Gbü ra ta te Me gü tamu ye tete fū *Müse ne,‡ Me gü ba dene, 'De-ni Me, ni de *vüngüte ka *Abarayama, ake *Yisaka bete *Yakobo.'

³⁸ Amba gbü ra ta te Me mala ngü la tete, o wü Abarayama kpi eyi gügü. Me ena amala ngü teka wü kövö, gü ba, 'Wüh de wü vüngüte ka-ni?' Ah bala de. Me mala ngü la, angü wü Abarayama ka-wü eyi ladü ezükü agbü sü ka Me fi mere badi."

³⁹ Fū wü gara *mürü riri, te wüh ngbü ei ewü *Farusi ne, angbü kpala, eje ngü

† 20:28 20:28 Mü ena amaka ngü la gbü buku ka Manda nga Riri 25:5-6. ‡ 20:37 20:37 Me gü tamu ye fū Müse gbü gara rü, te ngbü eci aci baka wa. Mü ena amaka ngü la gbü buku ka Gogo ka wü Yisaraye 3:6, 15.

te Yesu ngbü elügü fü wü Saduke la. Fü ewü amala ngbü efe, gü ba, "Wayi, mere kpara, ye mala eyi zu ngü!" Angü ngü te Yesu mala la ti kpini de ngü, te wü Farusi la ngbü ele. Amba wü Saduke la le ngü la bala nda-wü de. ⁴⁰ Fütanga ngü la, gara kpara te du le aga yiki ake Yesu nda tina ma.

Dene ngü ta te Yesu mala, teka Miri te Me ena atima füh kotö ne

Matayo 21:41-45; Marako 12:35-37

⁴¹ Fütanga ngü la, fü Yesu amala ngü fü wü kpara, gü ba, "Wü *mürü riri mala teka *Kurisito, Miri te Me ena atima füh kotö ne, teka aküwa wü kpara, gü neh fe? Wüh gü ba, 'Kurisito ena adi de kundu ye Mere Miri *Davidi, te ena angbü gbü nzö ani kpa baka Davidi.' Ah bala de? Amba Miri la ena adi baka Davidi fanü? ⁴² Angü Davidi ba ta ngü cu me-ye gbü *Ngari Me, gü ba dene,

'Me mala ngü fü Miri ka-ni, gü ba dene, "Ye ngbü gbü kokpa ka-ni sene.

Angü ni fe ye, o eyi Mere Miri.

Te di bala, ye ena angbü gbü nzö wü kpara 'buru!

⁴³ Angü ni ena ao wü vügü ka-ye 'buru esa lö ye!" '§

⁴⁴ Dela ngü ta te Davidi ba teka Miri la, gü ba, engu de Miri ka-ni. Te di bala, wawazi na fa nda Davidi de? Ma emala fü yi, gü ba, ngü kaka ena afa nda Davidi afa."

Dela ngü ta te Yesu mala teka Mere Miri te Me ena atima teka aküwa wü kpara.

Dene ngü ta te Yesu mala teka wü mürü riri

Matayo 23:1-4; Marako 12:38-40

⁴⁵ Fütanga ngü la, o mere bi wü kpara ngbü eje ngü gömö Yesu tete, fü ah afü te-ye amala ngü fü wü kpara ka-ye, gü ba, ⁴⁶ "Yi ceka te-yi mbi teka ngü ka wü *mürü riri. Yi mere e angbü baka ewü de. Angü wüh le de wü kpara 'buru ngbü ecu ngü ani. Te di bala, fü ewü angbü eto wü ngboro bongo eküte wü, endondoro di esüka wü kpara. Wüh ngbü ele de wü kpara 'buru ngbü egü mandi fü ani baka wü mere kpara. Te wüh koro kpa *esambü ka biti-te la, wüh ele adi angbü füh züka da-ngbüngbü kpa engagira nü. Gbü wü sü ka karama, wüh ngbü emere kpa bala. Wüh ele ka-wü bü adi angbü gbü wü sü ka wü cögbörö kpara. ⁴⁷ Wüh le de wü kpara 'buru wu ani baka züka wü kpara ka Me. Amba de, wüh ngbü ezi wü e ka wü würüse wökö de mani, ece ewü gbü cinga. Wüh ngbü kpa eyi-ta Me teka mere bi lö-ra, teka fü wü kpara acu ngü ani, adi eceka ani ba kpeke wü kpara.

Te di bala, Me ena ato mere siti kuru te wü mürü riri la te gara, afa sü!"

Dela ngü ta te Yesu mala, teka wü mürü riri la.

21

Dene ngü ka takpa ka würüse wökö Marako 12:41-44

¹ Fütanga ngü la, fü Yesu adu angbü kötö ede kuwu, te wü kpara ngbü eto takpa fü Me gbügbü na. Fü ah angbü eceka kpi, awu wü kpara te ewü di de mere bi wü e esaka wü, te ewü ngbü ekoro egü takpa ka-wü gbü kuwu la. ² Fü ah adu awu gara würüse wökö biringbö, te di ka-ye mürü cinga. Fü würüse la ayia akoro agü nda-ye enga jiase ka-ye ngbee 'basu, baka e te wüh ena ase ambata biringbö di. ³ Te Yesu wu bala, fü ah amala ngü fü wü kpara ka-ye, gü ba, "Ma emala fü yi dene zu ngü. Jiase te würüse wökö ne to ne, ah reke gbü jia Me, fa nda wü bu ye ne 'buru. ⁴ Angü wü kpara de mere bi wü e esaka wü ne, e te ewü to fü Me, ngüngü gbü jia ewü ma, angü dudu ladü esaka ewü. Amba würüse ne to nda-ye jiase ka-ye eyi 'buru. Dudu na esasaka, te engu ena ase mba enga zü-e di, nda tina ma."

Dela ngü ta te Yesu mala, teka takpa te wüh ngbü eto fü Me.

Dene ngü ta te Yesu mala,

teka ngü te ena amere te-ye te gara Matayo 24:1-14; Marako 13:1-13

⁵ Fütanga ngü la, fü gara wü *kpara ka Yesu akpo da emala ngü teka *Mere Kambü ka Me agbü Yerüsalema ne, gü ba, "Kambü ne su fa sü! Ceka la, wü angbe cögbörö da te ewü fa di, kpa bala de wü züka e eküküte, te wü miri to ba takpa fü Me." Te Yesu je ngü la bala, fü ah amala ngü fü ewü, gü ba, ⁶ "Yi ngbü eceka dela bü mere züka Kambü ka Me ne? Te gara, wüh ena amürü kambü la amürü 'buru kötö. Da biringbö, te wüh ena ace ao füh kiri ye sela, ena adi ma."

⁷ Te wü kpara kaka-na je ngü la bala, fü ewü ayi-tata, gü ba, "Mere kpara, ngü la ena amere te-ye neh elaye? Anga ngü te ena agü tamu ngü la fü ani mbi mbi mbi, gü ba, siti ngü la koro eyi gbamari, ah de ne ngü ne?"

⁸ Fü Yesu alügü ngü fü wü kpara ka-ye, gü ba, "Yi ceka te-yi mbi teka wü mürü fiti, angü wüh ena afti yi. Angü mere bi wü kpara ena akoro, amere mani te iri ra. Fü ewü angbü efti wü kpara, gü ba, 'Ani de miri te Me tina ani me-ye.' Wü gara ena amala nda-wü, gü ba, '*Adu sikipi koro ka-ye eyi!' Amba yi mere e aje ngü ka-ewü

la de. ⁹⁻¹¹ Angü mere bi wü lara ngü ladü, te ewü ena amere te-wü feke, o adu sikipi la koro la de. Yi mere e akpe cürü de, angü Me ladü te ena aceka kpi fütanga yi, gbü wü ngü la 'buru. Wü gü ena amere te-wü gbü mere bi wü sü füh kotö ne. Nguwa wü kpara ena ayia amere gü esüka wü. Kpah bala, gara miri ena amere gü ake kiri ye. Yiki-tö ena amere te-ye kpekepeke, gbü mere bi wü sü füh kotö ne. Kpah bala, gbü wü gara sü, mere siti kpiri tala ena ati gbü nzö wü kpara. Gbü wü gara sü, wü siti keke ena amere wü kpara. Wü gara lara ngü ena amemere te-wü kpa tikpi, te ena ato mere cürü fü wü kpara füh kotö ne. Dela 'buru wü ngü te ena amere te-wü füh kotö ne, o adu sikipi koro la de.

¹² Amba ah le de yi ceka te-yi mbi, angü gara wü siti ngü ladü te ena amere yi feke. Wüh ena akpo da ekpülü yi, teka ngü kara. Wüh ena azoro gara yi, anü di ato fü wü angbe cögbörö wü kpara, de wü miri. Fü ewü aza yi, agü agbü ku. ¹³ Yi mere e akpe cürü de, angü wü ngü la ena adi fü yi ba züka kaje, teka fü yi amala ngü ka-ra fü wü mere kpara la. ¹⁴ Te di bala, gbü wü ngü la 'buru, fingangü ka-yi mere e asiti, teka ngü de te yi ena amala fü ewü ne, de. ¹⁵ Angü ma ena ato wazi de züka fingangü fü yi me-ra, teka amala mere kpeke ngü fü ewü. Te di bala, wü vügü ka-yi la ti aza ngü gömö yi de.

¹⁶ Yi ceka te-yi 'be, angü wü di enga ni yi, de wü wö yi, de wü ni yi, ena ato yi fü wü vügü cu me-wü. Wü vügü la ena akolo ngü ka-yi, fü ewü amörö wü gara yi teka ngü ka-ra. ¹⁷ Angü wü kpara 'buru ena angbü ekpü yi akpü, teka ngü ka-ra. ¹⁸⁻¹⁹ Ngü ma, yi rü kpekepeke gbü wü cinga la, angü Me ena aküwa yi agbü sü ka-ye agbü kpi. Biri kpara esüka yi ti adürü de."

Dene ngü te Yesu mala, teka mere cinga,

te ena amere wü kpara ka Yerüsalema te gara

Matayo 24:15-19; Marako 13:14-17

²⁰ Fü Yesu adu amala gara ngü fü ewü, gü ba, "Te yi wu mere bi wü marajümiya, te ewü koro te gara, fü kere Yerüsalema gbaa la, yi wu awu, gü ba, sikipi ka cinga ka Yerüsalema koro eyi. Angü wüh ena amümürü wü kambü, amömörö wü kpara kpah 'buru. ²¹ Te di bala, te mü ngbü engbü agbü Yerüsalema, anga agbü tö ka *Yudaya la, ah le de mü kpe agbü gü kere, te ngü la koro eyi la! Te ngü la maka mü agbü gü, mü mere e akpe adu agbü mere köti tine de! ²² Angü sikipi engu la, ah ena adi de sikipi, te Me ena ato mere kuru te wü kpara ka Yerüsalema tete, baka ngü ta te wüh ba gbü *Ngari Me.

²³ Ako! Yi ceka la mere cinga, te ena amere wü kpara gbü wü sikipi engu la! De bala ta ne cinga ne! Cinga la, ena afa sü fü mene wü würüse, te ewü di de bu wü, kpah bete mene ewü, te ewü di de vürü wü jaji esaka wü. Angü maguma Me ena anzu eküte wü kpara gbü Yerüsalema sene 'buru, fü ah ato mere kuru te ewü. ²⁴ Wüh ena adodoro wü gara kpara, amörö de maguruma, azoro wü gara kpara, anü di agbü wü gara ganzi sü nengete, ao ewü labi ka-wü. Wü *ganzi kpara la ena adoto Yerüsalema zu adoto esa lö wü, zalü akoro di gbü sikipi, te Me ena afe me-ye."

Dene ngü teka dudu ka Yesu füh kotö ne Matayo 24:29-31; Marako 13:24-27

²⁵ Fü Yesu adu kpah amala gara ngü fü wü kpara ka-ye, gü ba, "Te sikipi ka-ra, te ma ena adu tete, yia ekoro gbamari la, mere bi wü sirimbi ena akpo da emere te-wü. Angü yi ena awu wü sirimbi te ena amere te-wü agbü kpi, wü gara gbü jia fe, wü gara gbü jia ra, wü gara kpah gbü jia wü küfara. Wü nguwa wü kpara füh kotö ne 'buru ena alo'böka ka cürü, teka ngü ka mere *yi-ngu, te ena angbü ekada, da eyiki de mere giri ye. ²⁶ Te di bala, wü kpara ena aboto ka cürü, teka ngü te ena amere te-ye, te gara füh kotö ne. Angü wü nga nzö sü 'buru ena asiti, da eyiki te-wü, kpah de wü e agbü kpi mini.

²⁷ Fütanga wü sirimbi la, yi ena adu awu ra, *Ye Kpara ka Kpi, te ma ena adu akoro. Wü kpara 'buru ena aci awu ra kpa gbü kpi, te ma ngbü ekoro de mere wazi baka Mere Miri. Fü ewü aci 'buru acu ngü ra. ²⁸ Te di bala, te yi ena awu wü sirimbi la, te ewü ena akpo da emere te-wü la, yi rü kpekepeke, da eo jia yi teka ra, angü yi ti eyi awu, gü ba, "Küküwa ka-ani koro eyi gbamari."

Dene mani ta te Yesu mala teka dudu ka-ye

Matayo 24:32-35; Marako 13:28-31

²⁹ Fü Yesu adu amala gara ngü fü ewü gbü mani, gü ba, "Ngü ka dudu ka-ra ena adi baka ngü ka wü rü. ³⁰ Angü te yi wu wü rü, te ngbü eyi ayi, da eto to kpa wü la, yi ngbü egü neh fe? Yi ti eyi awu, gü ba, bigü koro eyi. Ah bala de? ³¹ Kpah bala, te yi wu wü sirimbi, te ma mala ngangana fü yi ne eyi la, de yi wu awu, gü ba, sikipi ka dudu ka-ra eyi gbamari.

³² Ma ngbü emala fü yi dene zu ngü. Siti cinga la ena amaka yi fanü, amba ngü la ti anza ngü ka-yi, wü kpara ka-ra nda de. ³³ Ngü te ma ngbü emala fü yi dene, ah de kpeke ngü, te ena angbü fi mere badi. Angü Me ena agara kotö ne ake kpi, fü ngü

ka-ewü anza 'buru. Amba ngü de te ma ngbü emala fü yi ne, ah ti anza nda de."

Dene ngü te Yesu mala, gü ba, nih ceka te-nih mbi

³⁴⁻³⁵ Fü Yesu adu amala ngü fü wü kpara ka-ye la, gü ba, "Yi ceka te-yi 'be. Yi mere e ao to yi teka wü ngü ka tadu ka kotö ne, de. Yi mere e ao to yi teka ngü ka fi, anga fingangü teka wü e ka-yi, kpah de. Ah le de yi ngbü nzo, angü sïkpi ka dudu ka-ra, yi ti awu de. Ah ena agüka yi gbü iri-to, baka te nü ngbü eba gbü ku. Angü sïkpi ka dudu ka-ra ena atata wü kpara füh kotö ne kpah 'buru atata bala. ³⁶ Amba nda-yi, yi reke te-yi areke, yi ngbü nzo, da eci sü, kpah da eyi-ta Me gbü wü sïkpi 'buru, teka fü yi amaka wazi, aküwa gbü wü siti ngü la 'buru. Te di bala, sïkpi la ti agüka yi, ato cürü fü yi de. Angü yi ena arü engagira ra, *Ye Kpara ka Kpi, de mere tadu emagama yi."

Dela wü ngü ta te Yesu mala fü wü kpara ka-ye, teka wü ngü te ewü ena amere te-wü te gara, kpah teka sïkpi ka dudu ka-ye.

³⁷⁻³⁸ Gbü wü sïkpi 'buru, fü Yesu angbü ta eri wü kpara etambasü *Mere Kambü ka Me. Fü wü kpara angbü eko kpakaka bü gügü kpurutokokpi, teka adi eje ngari Me gögömö na. Amba ah te eko eta-murago la, fü engu angbü enü era ka-ye kpa füh da, de iri ye Olive ne.

22

Dene ngü te Yuda Keriyota to Yesu di fü wü vügü

Matayo 26:1-5, 14-16; Marako 14:1-2, 10-11

¹ Ngü ne mere te-ye ta gbü mere sïkpi ka wü Yisaraye, te wüh ei, gü ba, *Pasika.* Te sïkpi ka Pasika la koro tete gbamari, ² fü wü angbe cögbörö kpara ka wü *Yisaraye, wü mürü gele, de wü *mürü riri angbü nda-wü da egiri kaje, te ani ena azoro Yesu tete gbü zi, amörö. Amba dada ma, teka ngü ka mere bi wü kpara, te ewü le ngü ka Yesu fa sü ne, angü wüh ena aci de gü eküte ani.

³ Te di bala, fü *Satana ayia arü emagama *Yuda Keriyota, te di de biri kpara esüka wü *kpara ka Yesu, nzüka de füh ye 'basu ne. ⁴ Fü Keriyota ayia anü akoro kpaka wü angbe cögbörö wü kpara la, de wü marajümiya ka-wü, amala ngü fü ewü, gü ba, "Ni ena agiri kaje, te ni ena ato

Yesu di fü wü." ⁵ Fü wü kpara la angbü 'buru de mere tadu teka ngü la. Fü ewü amala ngü fefe, gü ba, "Te ye to Yesu fü ani fanü fanü la, ani ena ato jiasse fü ye." ⁶ Fü ngü la areke te Keriyota. Fü ah akpo da egiri züka kaje, te ni ena ato Yesu di fü ewü gbü zi, gbü lö-ra te mere bi wü kpara ena adi ma.

Dene ngü ka Yesu te zü Karama ka Pasika de wü kpara ka-ye

Matayo 26:17-29; Marako 14:12-25

⁷ Dene gele ta te wü Yisaraye ngbü emere teka *Karama ka Pasika. Gbü gina sïkpi ka Pasika la, wü mürü köti 'buru ngbü eza togo kambiliki, enü di kpaka wü mürü gele ka Mere Me, de wüh wa, ato fü Me. Te mürü gele wa eyi la, fü wü mürü köti aza so kambiliki la, anü di, azü de wü kpara agba wü 'buru.†

Te di bala, te sïkpi ka Pasika la koro tete, ⁸ fü Yesu amala ngü fü wü Petero ake *Yüwane, gü ba, "Wü nü enü, teka areke zü-e ka Karama ka Pasika fü ani." ⁹ Fü ewü ayi-ta Yesu, gü ba, "Mere kpara, ye ele de ani nü reke e la neh kaye?" ¹⁰ Fü Yesu alügü ngü fü ewü, gü ba, "Wü nü kpa gbü Yerüsalema. Wü ena amaka gara komoko kpala, te bi ngu ka-ye gbü sila, ego di kpa eköti. Wü fa nganga na, zalü koro di gbü köti, te engu ena arü de ngu la gbügbü. ¹¹ De wü mala ngü fü mürü köti la, gü ba, 'Mere kpara gü ba, "Sü te ani ena azü Karama ka Pasika tete, de wü kpara ka-ni ne, ah neh kaye?" ¹² Mürü köti la ena agü tamu mere guvu kambü, te di kpa tikpi füh kiri ye. Wü ena amaka sü te wüh reke eyi 'buru nzo, teka karama ka-ani la. Te di bala, wü reke zü-e fü ani kpala."

¹³ Fü wü Petero ayia anü agbü Yerüsalema, amaka wü ngü la kpah 'buru baka te Yesu mala fü ewü la. Fü ewü areke Karama ka Pasika la fü wü gbü kambü engu la. ¹⁴ Etamura la, te wüh reke wü e la 'buru nza tete, fü wü Yesu ayia akoro angbü kötö, akpo da ezü karama la de wü kpara ka-ye nzüka de füh ye 'basu ne.

¹⁵ Te wüh ngbü ezü e la tete, fü Yesu amala ngü fü wü kpara ka-ye la, gü ba, "Ma le ngü ne cu fa sü, de nih zü Pasika ne de nih ma tundu bane feke, o ra zü cinga la de. ¹⁶ Angü ma ngbü emala fü yi dene zu ngü, ma ti adu azü karama de bane ne tüne de, zalü akoro di gbü sïkpi te Me ena

* 22:1 22:1 Gbü Karama ka Pasika la, wüh ngbü ezü ambata de kö gbü ye de. Mü ena amaka si-ngü ka Pasika la gbü buku ka Gogo ka wü Yisaraye 12. Mü ti kpah amaka si-ngü la gbü "Si wü gara kpeke ngü te di gbü Ngari Me ne." † 22:7 22:7 Wüh ngbü ezü so kambiliki la de ambata de kö gbü ye ma. Mü ena amaka ngü la gbü buku ka Gogo ka wü Yisaraye 12. Mü ti kpah amaka si-ngü la gbü "Si wü gara kpeke ngü te di gbü Ngari Me ne."

ao ra Mere Miri tete, fū wū kpara adu awu si-ngü teka karama ne mbi mbi mbi.”

¹⁷ Fū Yesu ayia aza ndü'ba de ngu *vinü gbü ye, agbo nga iri Me tekaka, adu amala fū wū kpara ka-ye la, gü ba, “Yi za e la eza, yi gafa esüka yi 'buru. ¹⁸ Angü ma ngbü emala fū yi dene zu ngü, akpo enatikine, ma ti anzö ngu vinü tine kpo de, zalü akoro di gbü sikipi, te Me ena ao ra Mere Miri tete na.”

¹⁹ Fū engu ayia aza ambata, agbo nga iri Me tekaka, adu akukuru, agafa fū ewü, gü ba dene, “Dene küte ra, te ma to fū kpi tüngü yi. Yi ngbü da emere ngü la fi bala sidi nga ra, teka adi efi nga ra tete.”

²⁰ Fütanga zü-e la, fū engu ayia aza ndü'ba de ngu vinü gbü ye, ato fū ewü kphah bala, gü ba, “Dene ngüte ra. Yi nzö enzö, ba e te yi ngbü enzö *ngüte de wü Me. Angü ngüte ra engu ne, ah ena atökö, teka areke zengba yi de wü Me.”

²¹ Fū engu adu amala gara ngü fū ewü, gü ba, “Kpara te ena ato ra fū wü vügü ne, ah ladü esüka nih sene. ²² De-ra, *Ye Kpara ka Kpi, ma ena amaka cinga, fū ra akpi, baka ngü te Me le me-ye. Amba mere cinga ena adi fū mene kpara, te ena ato ra fū wü vügü la!” ²³ Fū wü *kpara ka Yesu akpo da eyi-ta ngü esüka wü, gü ba, “Mene kpara esüka ani, te ena amere ngü de bala, ah ena adi de neh da?”

Dene yiki te wü kpara ka Yesu ngbü ega esüka wü

²⁴ Fütanga ngü la, fū wü kpara ka Yesu akpo de mere yiki esüka wü, gü ba, “Kpara esüka ani te ena angbü ba mere kpara fū wü bu ye, fütanga Yesu, neh da?”

²⁵ Te Yesu wu ngü la bala, fū ah amala ngü fū ewü, gü ba, “De-yi, yi wu eyi, gü ba, wü miri füh kotö ne ngbü engbü gbü nzö wü kpara de mere wazi. Kpah bala, wü miri la ngbü egbo nga wü, gü ba, ani de züka kpara. ²⁶ Nda-yi, yi le amere kphah bala? Ah bala de! Te mü le angbü ba mere kpara gbü jia Me la, ah le de mü fū te-mü baka jaji, te ngbü emere tima fū wü bu ye. ²⁷ Kpara te di memere yi kiri ye neh da? Kpara te ngbü nda-ye kötö ezü e, anga ah ena adi de mene kpara te reke e la fefe. Amba nda-ra, ma koro füh kotö ne baka mere kpara de. Ma koro teka ale ta-ngü te wü kpara. Ah le de yi mere kphah bala!”

²⁸ Nih ngbü eyi de nih ma sene teka bi re. Wü re-ngü de te ngbü emere ra ne, yi wu kphah eyi 'buru, yi ce ra nda-yi de. ²⁹ Tekan ngü la, baka te Wüba Me o ra ba Mere Miri, kphah bala, ma ena ato wazi fū yi me-ra, teka fū yi angbü wü miri tete. ³⁰ Gbü sikipi te ma ena adu akoro angbü Miri tete gbü nzö wü kpara, nih ena angbü de nih ma

tundu, da ezü e de mere tadu. Kpah bala, yi ena angbü füh wü kpökpö baka wü miri ede ra, da ekolo ngü ka wü kpara füh kotö ne, de nguwa wü di engu *Yisarayeले 'buru.”

Dene ngü te Yesu mala fū Petero Matayo 26:31-35; Marako 14:27-31

³¹ Fütanga ngü la, fū Miri Yesu amala ngü fū Simüna Petero, gü ba, “Simüna, Simüna, mü je la ngü ne! *Satana yi-ta Me eyi teka yi, de ni re maguma yi, baka kpara te efeke jia ndo ka-ye. ³² Amba ma yi-ta Me kphah eyi teka ngü ka-mü, teka de mü ce ngü ka-ra de. Te di bala, te mü ena adu alügü maguma mü kpaka ra la, de mü to wazi fū wü di engu ni mü.” ³³ Petero gü ba, “Mere kpara, ngü ma, te wüh zoro mü, gü gbü ku la, ma ti ace mü de. Anga te ah di bü de kpi la, nih ena akpi ake nih ma.”

³⁴ Fū Yesu alügü ngü fefe, gü ba, “Petero engu wüna, ngü te ma emala fū mü dene, ah de zu ngü. Enatikine, gbü biti ne, o moko-ngü mi koko la de, mü ena acere nga mü du bata ghere! gü ba, ‘Ni wu ra de.’ ”

³⁵ Fütanga ngü la, fū Yesu adu amala ngü fū wü kpara ka-ye la 'buru, gü ba, “Angü ta te ma tima yi amala ngari Me fū wü kpara ne, yi nü ta de kpa yi kükürü, yi za e esaka yi 'buru de. Te di bala, gbü wü sikipi la, yi maka ta wü e de?” Fū ewü alügü ngü, gü ba, “A'a, kpara maka ta wü e eyi fa sü.”

³⁶ Fū Yesu adu amala ngü fū ewü, gü ba, “Amba enatikine ngü la fū te-ye eyi. Te wü e ka-mü ladü, de mü zoro gö! esaka mü. Te mere maguruma ka-mü ma, ah le fū mü aza bongo ka-mü, acinzi asidi. Fū mü aza jiasse engu la, ase maguruma di.

³⁷ Kükürü de, angü ma ngbü emala fū yi dene zu ngü, gü ba, ngü ta te wü *mürü dofo ba teka ngü ka-ra gbü *Ngari Me ne, ena amere te-ye enatikine! Baka ngü ta te wüh ba, gü ba, ‘Wüh ena akolo ngü ka züka kpara ka-ni, Me, dunda de wü siti kpara.’ ” ³⁸ Te wü kpara ka Yesu je ngü la bala, fū ewü alügü ngü fefe, gü ba, “Wayi, mere kpara, wü maguruma ladü esaka ani sene ngbee 'basu dene.’ Wüh mala bala, angü wüh je si-ngü gbü mani te Yesu mala la nda-wü de. Fū Yesu amala fū ewü, gü ba, “Ah ti eyi! Ngü la rü bala!”

Dene gba te Yesu ku fū Me Matayo 26:36-46; Marako 14:32-42

³⁹ Fütanga ngü la, fū Yesu ayia de wü kpara ka-ye, anü kpa füh da, de iri ye Olive, kphah baka e te engu ngbü emere gbü wü sikipi 'buru. ⁴⁰ Te wüh nü koro kpa füh da la, fū Yesu arü amala ngü fū wü kpara ka-ye, gü ba, “Yi ku gba fū Me, de ah to wazi fū yi, angü *Satana ena afiti yi.”

⁴¹ Fū engu aka te-ye mba canza edere sū kpīkpī ye. Fū ah abu nzókuta ye kótó, akpo da eku gba fū Me, gū ba, ⁴² “Wüba, sīkpī ka-ra koro eyi dene! Te ah gbü jia mü mbi la, de mü za cinga la eküte ra asidi. Amba ngü la, ma ce o eyi esaka mü, ah le fū mü amere ba e te mü ngbü ele. Ah di ba e te ma le me-ra ne de.”

⁴³ Fū gara *malayika ka Me ayia agbü kpī, akoro ato wazi fefe na. ⁴⁴ Fū cinga azoro maguma Yesu tīne cu afa sü. Fū engu adu angbü eku gba fū Me kpekpeke. Fū wütisü angbü ego eküküte, triii! baka ngüte la.

⁴⁵ Te engu ku gba fū Me nza tete, fū ah ayia tikpi, adu kpaka wü kpara ka-ye. Fū ah amaka ewü 'buru te ewü ngbü era ara, angü wazi ewü nza eyi ka cinga. ⁴⁶ Fū ah amala ngü fū ewü, gū ba, “Apa! Yi ngbü neh era ara? Yi le aku gba fū Me nda-yi de? Yi yia eyia tikpi, de yi ku gba fū Me, angü Satana ena afiti yi fiti.”

Dene ngü te wüh zoro Yesu tete

Matayo 26:47-56; Marako 14:43-50; Yüwane 18:3-12

⁴⁷ Baka te Yesu ngbü la bü emala ngü la fū wü kpara ka-ye, fū *Yuda Keriyota, te di ta esüka wü *kpara ka Yesu nzükpa de fūh ye 'basu ne, ayia akoro de mere bi wü kpara gbü nga ye. Fū Keriyota akoro kpaka Yesu, agü mandī fefe, afaka engu. ⁴⁸ Fū Yesu amala ngü fefe, gū ba, “Apa, Keriyota! Mü mere dela züka ngü? Mü ngbü egü mandī fere, da efaka ra afaka de bala ne, bü teka agü tamu ra fū wü vügü?”

⁴⁹ Te wü kpara ka Yesu ne wu ngü la bala, fū ewü afi nga ngü ta te Yesu mala fū wü ne. Fū ewü ayi-tata, gū ba, “Mere kpara, ah tī fū ani agü gū kpaka ewü, de maguruma de esaka ani ne, de?” ⁵⁰ Fū gara süka ewü aza maguruma ka-ye, atī te gara mürü tima ka mere kpara fūh kpökpö ade gügüje na ka kokpa, akolo gbö! ⁵¹ Fū Yesu amala ngü fū ewü, gū ba, “Yi ce ngü la ace!” Fū engu aza güje komoko la, alügü da ye.

⁵² Fū Yesu arü amala ngü fū wü mere *kovo, te ewü koro azoro engu ne, gū ba, “Ah mere neh baye, te yi ngbü ekoro de wü maguruma, de wü ngbondu esaka yi de bala? Ma de siti kpara?” ⁵³ Ma ngbü engbü de wü yi, da erī wü kpara etambasü *Mere Kambü ka Me, gbü wü sīkpī 'buru ne, yi wu ngü la de? Yi le ta azoro ra kpala de, neh teka ne? Ah mbi! Ngü ma! Titīne, ah de lö-ra ka-yi, wü kpara ka *Satana.”

⁵⁴ Fū ewü azoro Yesu, anü di agba mere kpara fūh kpökpö ka wü mürü gele.

Petero, fū mü angbü efa nga ewü mba kpa sidi, gbü zi.

Dela ngü ta te wüh zoro Yesu tete na.

Dene ngü te Petero cere nga ye di

Matayo 26:57-58, 69-75; Marako 14:53-54, 66-72; Yüwane 18:12-18, 25-27

⁵⁵ Te wüh koro de Yesu agba mere kpara fūh kpökpö tete, fū wü marajümiya adeke wa fū wü etambasü, angbü tete na ka zü. Petero, fū mü anü akoro gbü zi, angbü eya te-mü te wa esüka ewü sela.

⁵⁶ Gara würüse ta ladü kpala, te di de kpara ka tima ka mere kpara la. Fū würüse la awu Petero, te ngbü eya te-ye te wa sela. Fū ah angbü eceka engu kpekpeke, adu amala ngü, gū ba, “Komoko la ngbü ta kpah endoro de wü Yesu tundu.”

⁵⁷ Te Petero je ngü la bala, fū cürü arī tete. Fū ah acere nga ye gbere, gū ba, “De-ye deyī, ni wu komoko la nda-ni de.”

⁵⁸ Fütanga ngü la mba cükü'daye, fū gara kpara ayia awu Petero, adu kpah amala ngü fefe, gū ba, “De-ye deyī, ye de *kpara ka Yesu de?” Petero gū ba, “A'a, ni de kpara kaka nda-ni de.”

⁵⁹ Fütanga lö-ra biringbö, fū gara kpara adu kpah a'dü ngü la, da emala nda-ye cu de wazi, gū ba, “Fanü fanü, komoko la ngbü ta engbü de wü Yesu, angü ah kpah de kpara ka *Galilaya.” ⁶⁰ Petero, fū mü alügü ngü fefe, gū ba, “Ata! Ngü kamü de te mü ngbü emala la, ma wu ndara de.” Petero bü te emala ngü la bala, 'duwa fū moko-ngü ayia amī koko. ⁶¹ Fū Miri Yesu afü gbüra ye mbiimbi, aceka Petero. Fū jia ewü amaka te-ye. 'Duwa, fū Petero adu afi nga ngü, de te Yesu mala fū ye, gū ba, “Gbü biti ne, o moko-ngü mī koko la de, ni ena acere nga ni du bata ne.” ⁶² Fū ngü la ato mere cinga fū Petero afa sü. Fū ah ayia 'duwa, akoro ka-ye kpa etanü, akpo da eku gba de mere ngura 'duwa ba-neh-ene-la.

Dene ngü ka Yesu engagira

angbe cögbörö wü kovo ka wü Yisaraye

Matayo 26:59-68; Marako 14:55-65

⁶³ Fütanga ngü la, fū wü marajümiya ta te ewü zoro Yesu ne, akpo da efala engu, kpah da emiki engu. ⁶⁴ Fū ewü ai jijia, ani de bongo, adu abe gbügbüra. Fū ewü ayi-tata, gū ba, “Te ye de *mürü dofo ka Me la, de ye mere ngü ka talara. Ye gū la iri kpara, de te mī ye ne.” ⁶⁵ Fū ewü angbü efala engu, da emü, kpah da emala bi wü gara siti ngü fefe.

⁶⁶ Te kpī seke tete, fū wü angbe cögbörö wü *kovo ka wü Yisaraye ayia abiti te-wü 'buru, wü *mürü gele de wü *mürü riri. Fū ewü aza Yesu, akoro di engagira

ewü. ⁶⁷ Fū ewü ayi-tata, gü ba, "Mü mala la ngü ne fū a mbi mbi mbi. Mü ngbürü de *Kurisito, te Me tima füh kotö ne, teka aküwa a fanü?" Fū Yesu alügü ngü fū ewü, gü ba, "Te ma ena amala ngü la fū yi mbööl bala la, yi ti ale ngü ka-ra kpa de. ⁶⁸ Kpah bala, te ma ena ayi-ta yi de gara ngü la, yi ti alügü ngü la fere kpa de. ⁶⁹ Amba sidi nga ngü ne, de-ra, *Ye Kpara ka Kpī, ma ena adu angbü gbü kokpa ka Me, baka Mere Miri. Ngü la ti ayiri de." ⁷⁰ Te wü mere kpara la je ngü la bala, fū ewü aci 'buru ayi-tata, gü ba, "Amba mü neh de Ye Me?" Fū Yesu alügü ngü fū ewü, gü ba, "Ah ngbürü bala." ⁷¹ Fū ewü akpo da emala ngü esüka wü, gü ba, "Wayi, nih je ngü la tüne eyi cu gögömö na. Nih ngbü tüne egiri kpara, te ena amala nga siti ngü ka komoko ne, neh teka ne? Ah mala ngü ka-ye eyi cu me-ye de komö ye dela."

Dela ta ngü te Yesu lügü engagira angbe cögbörö wü kpara ka wü Yisarayeale. Fū wü mere kpara la aci 'buru, aza Yesu anü di engagira Miri *Pilatü.

23

Dene ngü ka Yesu engagira Miri Pilatü Matayo 27:1-2, 11-26; Marako 15:1-15; Yüwane 18:28-19:16

¹ Fū wü angbe cögbörö wü *kovo ka wü *Yisarayeale akoro de Yesu engagira Miri *Pilatü, ta te mere miri ka wü *Rüma o engu gbü nzö wü kpara ka *Yudaya ne. ² Fū ewü akpo da emala mere bi wü ngü de wu eküte Yesu, gü ba, "Komoko la ngbü esiti nzö wü kpara, gü ba, wüh mere e ase ngürü wü fū wü miri ka wü Rüma de. Ah ngbü kpahe egbo nga ye, gü ba, ni de miri me-ni."

³ Te Miri Pilatü je ngü la bala, fū ah ayi-ta Yesu, gü ba, "Ye ngbürü de miri ka wü Yisarayeale fanü?" Fū Yesu alügü ngü fefe, gü ba, "Ah ngbürü bala."

⁴ Fū Miri Pilatü afü te-ye amala ngü fū wü kovo la, gü ba, "Ma maka siti ngü ka komoko ne nda-ra de. Ma le eyi ace kpa tete." ⁵ Te wü kovo la je ngü la bala, fū ewü amala ngü kpekpeke de mere ri wü, gü ba, "A'a! Ah ngbü esiti nzö wü kpara gbü tö ka-ani sene 'buru! Ah kpo de ngü ka-ye la agbü *Galilaya. Titine ah koro de ngü la kpahe eyi cu sene."

⁶ Te Pilatü je iri Galilaya, fū ah ayi-ta ewü, gü ba, "Komoko la de kpara ka Galilaya?" ⁷ Angü gbü wü sikipi engu la, Miri Anitipa *Erode, te di miri gbü nga nzö sü ka Galilaya ne, koro ta gbü Yerüsalema sela, teka *Karama ka Pasika. Te di bala, te Pilatü je, gü ba, Yesu de kpara ka Galilaya

ne, fū ah ayia atima Yesu kpara Miri Anitipa Erode.

⁸ Te Miri Anitipa Erode wu Yesu, fū engu angbü de mere tadu, angü ah ngbü ta bü eje nga Yesu aje. Ah le ta de ni wu Yesu, teka kpeke wü lara ngü, de te Yesu ngbü emere ne, cu de jia ni. ⁹ Te di bala, fū Miri Anitipa Erode akpo da eyi-ta Yesu de bi wü yitangü, amba Yesu lügü ngü fefe na nda de. ¹⁰ Wü mere kovo ka wü Yisarayeale ngbü ta kpahe kpara, fū ewü angbü emala bi wü ngü eküte Yesu kpekpeke efa sü. Yesu le ngü kpahe de. ¹¹ Teka ngü la, fū wü miri, de wü marajümiya ka-ye, akpo da efala Yesu. Fū ewü aza züka bongo baka nda wü miri la, ato eküküte, angbü emü engu di. Fū Miri Anitipa Erode adu alügü engu kpara Pilatü.

¹² Gbü sikipi la, fū wü Pilatü ake Miri Anitipa Erode adu ale te-wü, angbü gbü züka awuba. Angü ta te enga gina, wüh le te-wü de.

¹³ Te wüh du koro de Yesu engagira Pilatü, fū Pilatü abiti wü mere kpara ka mürü gele, de wü gara mere kpara ka wü Yisarayeale 'buru, kpahe de mere bi wü gara kükürü kpara. ¹⁴⁻¹⁵ Fū ah adu amala ngü fū ewü, gü ba, "Komoko ne, yi koro ta de engu engagira ra sene, gü ba, 'Ah ngbü esiti fingangü ka wü kpara.' Yi ceka la, Miri Anitipa Erode du lügü engu kpahe eyi dene. Angü ah giri siti ngü kaka, te wüh ena amörö engu tete ne, kpahe ma. Ma ngbü giri siti ngü kaka kpahe bü engagira yi sene ma, ma maka siti ngü kaka 'buru 'dö de. Gbü jia a, komoko ne mere siti ngü, te wüh ena amörö engu tekaka ne, nda de. ¹⁶ Te ah bala, ma ena asüma engu bü de juru, teka fū ra adu ace engu, ago ka-ye."

¹⁷ Angü, te enga wü re 'buru, gbü wü sikipi ka *Karama ka Pasika, Miri Pilatü ngbü ece kpa te gara kpara ka ku biringbö ace. Teka ngü la, fū Pilatü amala fū ewü, gü ba, "Ni ena ace kpa te Yesu."

¹⁸ Te wü kpara la je ngü la bala, fū ewü ayia aci 'buru, da emala ngü de mere ri ewü, gü ba, "Wüh mörö komoko la amörö! Ye mere e ace kpa tete de! Ye ce kpa te Baraba!" ¹⁹ Baraba ta de kpara te wüh zoro, gü gbü ku, teka te wüh maka engu, da emere gü gbü mere koti ka Yerüsalema, da emömörö wü kpara teka tö ka-wü.*

²⁰ Fū Pilatü adu kpahe amala ngü fū wü kpara la, angü ah le ta ace kpa te Yesu. ²¹ Amba mere bi wü kpara la le ngü la nda-wü de. Fū ewü angbü eba rere kpa tikpi, gü ba, "Wüh mörö engu amörö! Wüh bere engu füh *rü ghegbete!"

* 23:19 23:19 Baraba ta de wügü ka miri ka wü Rüma.

²² Ebabata yitangü ka Pilatü gü ba, “Ni ena amörö engu neh teka ne? Ah mere ne siti ngü ne? Ni maka siti ngü kaka, te ti fü ewü amörö engu tete ne, nda-ni de. Te ah bala, ni ena asüma engu bü de juru kükürü, fü ni ace kpa tete.” ²³ Fü Pilatü ambü te-ye de ngü la ma. Amba wü kpara la ka-wü fi bü emala ngü, da eba rere, gü ba, “Wüh mörö engu amörö!” Fü rere ka-ewü aza sü 'buru, angbü engo tine wooo! bala. ²⁴ Fü Pilatü adu akolo ngü ka Yesu, ba e te ewü le, angü ah kpe cürü ewü. ²⁵ Fü Pilatü ayia ace kpa te Baraba, ta te mörö kpara ne, ba ngü te ewü le. Amba fü ah aza Yesu, ato esaka ewü, de wüh mere ngü de engu tine, baka te ewü ngbü ele.

Dene ngü ka Yesu te wüh bere füh rü ghegbete

Matayo 27:32-44; Marako 15:21-32; Yüwane 19:17-24

²⁶ Fü wü marajümiya aza Yesu, anü di, teka amörö. Te wüh ngbü enü tete, fü ewü amaka gara komoko, de iri ye Simüna, kpara ka Kurene, te ngbü enü ka-ye agbü Yerüsalema. Fü wü marajümiya azoro engu, ato esa *rü ghegbete ka Yesu ne, de ah bi, angü Yesu ngbü ta enü, da eti, da eti, teka tiri rü la.

²⁷ Fü mere bi wü kpara angbü efa nga wü Yesu, de wü gara wü wüüruse, te ewü ngbü eku yiye de gba, teka ngü ka Yesu. ²⁸ Te Yesu wü ngü la bala, fü ah afü te-ye, amala ngü fü wü wüüruse la, gü ba, “De-yi, wü wüüruse ka Yerüsalema, yi ku gba teka ra de! Ah le de yi ku gba teka ngü ka-yi, de wü di engu yi. ²⁹ Angü te gara, mere siti cinga ena amere yi, wü kpara ka Yerüsalema. Gbü wü sikipi la, te cinga la kpo eyi da emere te-ye, yi ena amala, gü ba, “Züka ngü ka-ye fü wü wüüruse wündü, angü wüh bi ye nda-wü de.” ³⁰ Gbü wü sikipi engu la, wü kpara ena angbü emala ngü tine bü faaa, gü ba, ‘Ah le de wü da mürü, ti füh ani, anza ngü ka-ani, angü wü vügü ena amaka ani!’ ³¹ Angü te wüh to cinga te ra bü kükürü bala, te ma mere siti ngü 'buru 'buru de ne, wüh ena adu ato cinga te yi, de te yi ngbü emere siti ngü ne, tine baye?”

³² Gara wü siti kpara ta ladü 'basu, te wüh za ewü kpah, koro di, teka amörö de wü Yesu.

³³ Fü ewü anü akoro gbü sü de iri ye Gologota. Gologota la, ah baka e te wüh gü ba, “Sü ka Biki-nzö,” angü ah de sü te wüh ngbü emörö siti wü kpara tete. Fü wü marajümiya aza Yesu, agbi bongo kaka-na asidi, aza engu, agbere füh rü ghegbete, abere engu gö gö gö! adu ae engu de rü ghegbete la tikpi. Fü ewü aza wü siti kpara de 'basu la, abere kpah bala

füh nda-wü rü ghegbete, ao ede nda Yesu, gara gbü kokpa, gara gbü kamisü.

³⁴ Baka te wüh e Yesu tikpi, fü ah ayia aku gba fü Me, gü ba, “Wüba, mü boro *siti ngü ka wü kpara ne, angü ngü de te ewü ngbü emere ne, wüh wu nda-wü de.”

Fü wü marajümiya aza wü bongo ka Yesu, akpo da esö gümare, teka wü bongo kaka la.

³⁵ Fü mere bi wü kpara angbü eceka ngü la. Fü angbe cögbörö wü *kovo angbü efala Yesu, gü ba, “Komoko la ngbü ta eküwa wü gara kpara. Ah mere neh baye, te engu ti aktüwa te-ye de? Te engu zu de *Kurisito te Me tima me-ye, teka aktüwa ani la, ah le de engu küwa te-ye!”

³⁶ Fü wü marajümiya angbü efala engu kpah bala. Fü ewü aza fi, ato fefe na, ³⁷ da emala ngü, gü ba, “De-ye deyi, te ye de miri ka wü *Yisaraye le, de ye küwa te-ye eküwa.”

³⁸ Fü ewü aba ngü, abere, ao eküte rü ghegbete kaka la wü tikpi, gü ba, “Dene Mere Miri ka wü Yisaraye le.”

³⁹ Fü gara siti kpara, te wüh bere engu füh rü ghegbete ede nda Yesu, to gbü kamisü ne, akpo kpah efala Yesu, gü ba, “Ah mere neh baye, te ye küwa te ye de ne? Te ye di de Mere Miri, te Me tima füh kotö ne fanü la, ye küwa te-ye ke! Tekä fü ye adu kpah aktüwa ani!” ⁴⁰⁻⁴¹ Te kiri ye la je ngü la bala, fü ah adu azinga tete, gü ba, “De-ye deyi, ye kpe Me de? Angü ani ena akpi enatikine, kpah baka komoko la, de? Nda-ani, wüh to kuru ne te ani mbi, angü ani ngbü ta emere wü siti ngü fanü. Amba komoko ne, te mere siti ngü 'buru de ne, ye ngbü emü engu neh baye?” ⁴² Fü ah adu amala ngü fü Yesu, gü ba, “Yesu deyi, gbü sikipi te Me ena ao ye tete, Mere Miri gbü nzö wü kpara la, de ye fi nga ni kpah mini.” ⁴³ Fü Yesu alügü ngü fefe, gü ba, “Ma emala fü mü dene zu ngü. Enatikine, nih ena angbü ake nih ma agbü sü ka Me agbü kpi.”

Dene ngü ka kpi ka Yesu

Matayo 27:45-56; Marako 15:33-41; Yüwane 19:28-30

⁴⁴⁻⁴⁵ Fütanga ngü la, ah te enü akoro etü ra, fü sü ayia ati 'duwa mbirri baka biti la. Fü e la ayiri bala, zalü akoro gbü lö-ra bata ka tamurago. Fü mere bongo te wüh o emöngiti ka *Mere Kambü ka Me agbü Yerüsalema, baka ngisi ne, ayia asörö tü-ye de tete-ye 'duwa mbaaa, kü kpa tikpi ngbüüü köto!

⁴⁶ Fü Yesu ayia amala ngü de mere ri ye kpa tikpi, gü ba, “Wüba, ma ce maguma ra eyi esaka mü.” Te engu mala ngü la bala, fü ah ayia ace maguma ye, akpi.

47 Te mere kpara ka wü marajümüya la wu ngü, de te mere te-ye de bala ne, fü engu agbo nga Me, gü ba, "Fanü fanü, komoko la ka-ye de züka kpara gbü jia Me!" 48 Mere bi wü kpara, ta te ewü ngbü eceka ngü la, te ewü wu wü ngü de te mere te-ye de bala ne, fü ewü ayia angbü edu agba wü de mere cinga, da eku gba teka ngü la.

49 Wü kpara 'buru ta te ewü ngbü engbü de wü Yesu, kpa de wü wü rüse, ta te ewü yia koro de wü Yesu kü agbü *Galilaya ne, wüh ngbü nda-wü mba canza edere sü, da eceka kpi. Fü ewü awu wü ngü la 'buru cu de jia wü.

Dela ngü ka kpi ka Yesu.

Dene ngü teka kö Yesu

Matayo 27:57-61; Marako 15:42-47; Yüwane 19:38-42

50-51 Gara komoko ta ladü de iri ye *Yüsefa. Engu de kpara ka Arimatayo.† Ah ta de züka kpara, te ngbü eo jia ye teka Miri, te Me ena atima teka aküwa wü kpara ne. Engu ta de gara mere kpara esüka wü *kovo ka wü Yisaraye. Amba ngü ta te wü bu ye na ngbü emere, da egiri kaje teka amörö Yesu ne, ah le nda de.

52-54 Ngü la ngbü ta emere te-ye gbü sikipi ka 'buruve, angü ah de sikipi, te wüh ngbü ereke te-wü teka *sikipi ka Me ka wü Yisaraye.‡ Te di bala, etamura go la, Yüsefa, fü mü ayia ai maguma mü, anü kpaka Miri *Pilatü. Fü ah ayi-tata, da enda'ba te-ye, gü ba, "Mere kpara, te ye le la, de ye to kö Yesu fü ni, de ni ti." Fü Miri Pilatü ayia ale ngü la fefe. Fü Yüsefa ayia aza kö Yesu, adu di, aza züka bu bongo, agaga kö Yesu di. Fü ah aza kö Yesu, anü di, ati gbü to mbükü, de te wüh ji gbü da, angü gele ka wü *Yisaraye ta bala. Fü ah awara mere siti ngbü rükü da, ao emö mbükü la, ani di.

55 Fü wü wü rüse, ta te ewü koro de wü Yesu agbü *Galilaya ne, afa nga Yüsefa, anü awu mbükü te wüh ti kö Yesu gbügbü na la, ao te nga jia wü. 56 Fü wü wü rüse la adu agba wü, areke *züka se-mü, teka de ani du ta di, amoko eküte kö Yesu.

Gbü sikipi ka ma'diya, wü wü rüse la ngbü ka-wü kpa eköti, da efe te-wü, kpa baka te riri ka gele ka wü Yisaraye mala, angü ah de *sikipi ka Me ka-ewü.

† 23:50-51 23:50-51 Arimatayo de sü ka wü Yüsefa, te wüh bi engu tete. ‡ 23:52-54 23:52-54 Sikipi ka Me ka wü Yisaraye la, ah ka-ye gbü sikipi ka ma'diya. * 24:9-10 24:9-10 Wü wü rüse la ta Mariya Egba-Magadala, Yüwana, bete Mariya ni ye Yakobo, kpa de wü gara wü wü rüse ta te ewü di de ewü ne. † 24:13 24:13 Zengba Emawu ake Yerüsalema, ah baka kilometere 11.

24

Dene ngü ka Yesu te zükü gbü kpi

Matayo 28:1-8; Marako 16:1-8; Yüwane 20:1-10

1 Gbü sikipi ka biri ka wü *Yisaraye, te di de *sikipi ka Me ka-nih, fü wü wü rüse la ayia bü gügü kpurutokokpi, aza *züka se-mü, de ta te ewü reke la, anü di kpa füh mbükü. Wü wü rüse la, ah de wü *Mariya Egba-Magadala, Yüwana, bete *Mariya ni ye Yakobo, kpa de wü gara wü bu wü. 2 Wüh te ekoro kpala de, gbo! te mö mbükü te di mböombö kükürü! Angü mere ngbü rükü da, ta te wüh ni mö mbükü la di ne, wüh nzi, o eyi edere sü. 3 Fü ewü anü ari gbü gö da kpala, nzaawö! E nda ma! Wüh maka kö Miri Yesu nda-wü de. 4 Fü wü wü rüse la angbü de mere fingangü, angü wüh wu ngü, de te ewü ena amere ne, tine de. Te wüh ngbü la bü efi ngü la bala, fü ewü aceka kpi bane, gbangbara! te wü komoko 'basu, te bongo ka-ewü ngbü eci aci gbele gbele bane. 5 Fü mere siti cürü ari te wü wü rüse la. Fü ewü agü nzo wü 'buru köto, agu angbü rifa. Te wü komoko la wu bala, fü ewü ayi-ta ewü, gü ba, "Kpara te di eyi ezükü ne, yi du ngbü egiri engu esüka wü kövö, neh teka ne? 6 Engu sene nda ma. Ah zükü ka-ye gbü kpi eyi, ba e ta te engu mala fü yi agbü *Galilaya, 7 gü ba, 'Wüh ena ato ni, *Ye Kpara ka Kpi, fü wü siti kpara, teka fü ewü abere ni te *rü gbegete. Amba gbü *ebabata sikipi, ni ena adu azükü gbü kpi la.' "

8 Fü wü wü rüse la adu afi nga ngü ka Yesu la. 9-10 Fü ewü ayia kpa füh mbükü la, adu kpaka du wü *mürü tima ka Yesu, nzükpa de füh ye biri ne, amala nga wü ngü la 'buru fü ewü, kpa de wü gara wü kpara kaka 'buru.* 11 Amba wü *kpara ka Yesu la le ngü la nda-wü de. Angü wüh fi, gü ba, ngü de te wü wü rüse la mala fü ani ne, ah ka-ye de töndö ngü kükürü.

12 Amba Petero, fü mü ayia nda-mü de mere woro, akpe anü akoro kpa füh mbükü la. Te engu koro kpala, fü ah abiki, aceka kpi gbü mbükü. Fü ah awu bü züka bongo, ta te wüh gaga kö Yesu di ne, e gbügbü nda tine ma. Fü engu ayia alügü te-ye, adu de mere fingangü emaguma ye.

Dene ngü te mere te-ye te kaje ka Emawu

Marako 16:12-13

¹³ Etamurago, gbü sīkpī engu la, fū wū gara *kpara ka Yesu 'basu ayia agbū Yerūsalema, edu agba wū agbū Emawu.†
¹⁴ Te wū kpara la ngbū enū tete te kaje, fū ewū agbū emala nga wū ngū ka kpi ka Yesu, de te mere te-ye agbū Yerūsalema ne, esūka wū. ¹⁵ Baka te ewū ngbū emala ngū la bala esūka wū, enū di, Yesu, fū mü ayia anū akoro gbmari ekürufe ewū, akpo da enū de ewū tundu. ¹⁶ Wüh ceka engu bü eyi ne, amba wüh wu, gü ba, kpara la, ah de Yesu ne, nda-wū de.

¹⁷ Fū Yesu ayi-ta ewū, gü ba, "Wū ngbū emala nda-wū, da enū di te kaje ne, ne ngū ne?" Te wüh je ngū la bala, fū ewū ace te-wū, arū de mere cinga emaguma wū. ¹⁸ Fū gara, de iri ye Kiliyopa ne, ayia amala ngū fefe, gü ba, "Apa! Ngū de te mere te-ye agbū Yerūsalema gbū wū sīkpī ne, ye wu nda-ye de?" ¹⁹ Fū Yesu ayi-ta ewū, gü ba, "Ah de ne ngū ne?" Fū ewū alügü ngū fefe, gü ba, "Ani ngbū emala ngū ka Yesu.‡ Angü engu ta de *mürü dofo, te Me to mere wazi fefe, fū ah ngbū emere wū kpeke ngū, kpah da erī wū kpara de ngari Me. Ngū kaka reke ta gbü jia Me fa sü, kpah de wū kpara 'buru. ²⁰⁻²¹ Ani ngbū ta eo jia ani tete, angü ani ngbū ta efi, gü ba, engu ena adi de Miri, te Me tima teka aküwa ani, wū *Yisaraye. Amba ekere-sikine wū cögbörö *kovo, de wū mere *mürü gele ka-ani zoro engu, to fū wū *Rüma de wū mörö engu. Fū ewū ayia abere engu te *rū gbegete. ²²⁻²³ Gügü kpurutokokpī ne, wū gara wū würüse esūka ani nū tīne kpa fūh mbümbükü. Amba te ewū koro kpala, wüh maka kökö nda-wū de. Fū ewū akpe adu amala nga ngū la fū ani, gü ba, 'Wū *malayika ka Me sere te-wū fū ani, fū ewū amala ngū fū ani, gü ba, Yesu zükü ka-ye gbü kpi eyi.' Fū ngū la agürü maguma ani afa sü. ²⁴ Kpah bala, fū wū gara kpara esūka ani, ayia anū tīne kpah kpa fūh mbükü kpala. Fū ewū amaka wū ngū la kpah 'buru, baka te wū würüse la mala, wüh maka kö Yesu de. Kpah bala, wüh maka cu Yesu engu nda-wū kpah de."

²⁵ Fū Yesu, te ewū ngbū enū de ewū ne, adu amala ngū fū ewū, gü ba, "Yi de töndö kpara! Ngū ta te wū mürü dofo ba, gbü *Ngari Me ne, yi je de?" ²⁶ Wüh ba ta gbü Ngari Me teka Miri te Me ena atima la, gü neh fe? Wüh gü ba, 'Ah ena azü mere cinga bala feke, fū ah adu amaka wazi ka mere miri ka-ye sidi.' " ²⁷ Fū Yesu akpo da emala nga si wū ngū, te wüh ba gbü Ngari Me, teka ngū ka-ye ne, 'buru fū ewū, akpo te wū ngū ka *Müse, zalü akoro di te nda wū gara mürü dofo 'buru.

²⁸ Fū ewū anū, anū akoro gbmari ede

Emawu. Fū Yesu amere te-ye, baka kpara te ele anye sü ka-ye anye la. ²⁹ Fū wū kpara la atiri engu, gü ba, "Apa! Ra ti nza eyi dene. Ah le fū ye anū ara agba ani." Fū Yesu ayia ale ngū la. Fū ah anū akoro de ewū kpa eköti.

³⁰ Fū ewū ayia angbū kötö teka azü e. Fū Yesu ayia aza ambata, agbo nga iri Me tekaka. Fū ah akukuru ambata la, ato fū ewū, azü. ³¹ Fū fingangü ka wū kpara la ayia aü, fū ewū awu tīne mbi mbi mbi, gü ba, ah ka-ye de Yesu. Bü yikiri! fū Yesu ayia adürü ka-ye, ace ewū sela.

³² Te wüh wu ngū la bala, fū ewū akpo da emala ngū esūka wū sela, gü ba, "Apa! Ani wu engu tīne gügü de, neh teka ne? Fanü fanü ngū kaka tīne, te engu ngbū erī ani di, gbü Ngari Me ne, ah ngbū erī emaguma ani baka wa!"

³³ Fū ewū ayia bü 'duwa kere, edu adu agbū Yerūsalema, teka amala nga ngū la fū wū bu wū.

Dene ngū ka Yesu te sere te-ye fū wū kpara ka-ye

Matayo 28:16-20; Marako 16:14-18; Yüwane 20:19-23; Mürü Tima 1:6-8

Te wū Kiliyopa du koro tete agbū Yerūsalema, fū ewū amaka du wū *mürü tima ka Yesu nzükpa de fūh ye biri ne, te ewū biti te-wū, de wū gara *kpara ka Yesu kpala. ³⁴ Fū wū mürü tīma la amala ngū fū wū Kiliyopa, gü ba, "Miri Yesu zükü ka-ye gbü kpi eyi fanü! Sīmüna Petero wu engu eyi cu de jia ye!" ³⁵ Fū wū Kiliyopa ayia atī kpah te ngū te mere te-ye fū ewū, te kaje ka Emawu ne, gü ba, "Te Yesu koro maka ani ne, ani wu, gü ba, ah de Yesu ne de. Amba te ani nū koro kpa eköti, fū ah adu aza ambata, akuru, ato fū ani. Fū ani adu awu tīne, gü ba, ah ka-ye de Yesu fanü."

³⁶ Baka te wüh ngbū la bü emala nga ngū la esūka wū bala, gbangbara! te Yesu, te koro rü ngbū esūka ewū. Fū ah amala fū ewū, gü ba, "Me di de yi, de ah to gu ngū fū yi." ³⁷ Fū wū kpara ka Yesu la, angbū 'buru eyi ayi ka cürü, angü wüh fi nda-wū, gü ba, "Dela sirimbi!" ³⁸ Fū Yesu amala ngū fū ewū, gü ba, "Yi ngbū ekpe cürü teka ne? Maguma yi ka-ye 'basu 'basu? Yi fi, gü ba, ah de ra de?" ³⁹ Ah ka-ye de ra! Yi ceka la nga wū ka esatüka ra bete lö ra ne. Yi tala la küte ra. Yi ceka ra sene, ma baka kuru kpara? So bete biki te kuru kpara ladü? A'a, ah nda ma!"

⁴⁰ Te engu mala ngū la fū ewū bala, fū ah adu asere satüka ye fū ewū, bete lö ye, de wüh wu nga ka müsümarī, ta te wüh bere engu di ne. ⁴¹ Ngū la ri gbü nzö ewū kere nda de, ah ga gbü jia ewū kpah fa sü, angü wüh ngbū de mere tadu emaguma

‡ 24:19 24:19 Yesu ka-ye de kpara ka Nazareta.

wü. Teka ngü la, fü Yesu adu ayi-ta ewü, gü ba, "Mba engä e-mazü ladü esaka yi sene?"
⁴² Fü ewü aza du si te wüh oro aoro, ato fefe na. ⁴³ Fü Yesu aza si la, azü gbü jia ewü sela. Fü ewü adu awu, gü ba, ah de engu fanü fanü, ah de kuru kpara nda de.

Dene adu riri te Yesu ri wü kpara ka-ye di

Marako 16:19-20; Mürü Tima 1:9-11

⁴⁴ Fütanga ngü la, fü Yesu amala fü wü kpara ka-ye, gü ba, "Yi fi la nga wü ngü, de ta te ma ngbü emala fü yi, o nih ngbü ta endoro de nih ma ne. Wü ngü 'buru, ta te wüh ba teka ra gbü *Ngari Me, ena amere te-wü 'buru, baka te wüh ba la."

⁴⁵ Fü Yesu akpo da eü fingangü ka-ewü, erü ewü de Ngari Me, teka fü ewü awu singü la mbi mbi mbi. ⁴⁶ Fü ah amala fü ewü, gü ba, "Wüh ba ngü la eyi gbü Ngari Me mbölö, teka ra, *Kurisito te Me tima füh kotö ne, teka aküwa wü kpara ne, gü ba, 'Ah le de engu maka cinga, fü ah akpi, fü ah adu azükü gbü kpi gbü *ebabata sikpi.' " ⁴⁷⁻⁴⁸ Fü ah adu amala fü ewü, gü ba, "Ah le de yi mala ngari ra fü wü nguwa wü kpara füh kotö ne 'buru, de wüh fü maguma wü, teka fü Me aboro *siti ngü ka-ewü, teka ngü ka-ra. Angü yi de kpara, te yi wu wü ngü ka-ra, cu de jia yi. Yi ena akpo de ngü la ciki gbü Yerüsalema sene. ⁴⁹ Amba ah le de yi ngbü la feke, aci nga wazi ka Me, te ma ena atima fü yi agbü kpi, kpañ ba e ta te Wüba mala ne."

⁵⁰ Fütanga ngü te Yesu ri wü kpara ka-ye la nza tete, fü ah aza ewü gbü Yerüsalema sela, anü de ewü agbü Betaniya. Te wüh koro agbü Betaniya kpala, fü Yesu ae kpa ye tikpi, ayi-ta Me teka ewü, de ah to wazi fü ewü. ⁵¹ Ah te emere ngü la bala, fü Me adu aza engu gbü jia ewü sela, ago di kpaka ye agbü kpi.

⁵² Te wü *kpara ka Yesu wu ngü la bala, fü ewü agbo nga iri na. Fü ewü ayia alügü nga wü, adu agbü Yerüsalema de mere tadu emaguma wü. ⁵³ Fü ewü angbü ebiti te-wü, gbü wü sikpi 'buru, kpa etambasü *Mere Kambü ka Me, da egbo nga iri Me.

Dene ngü ta te Yüwane ba teka Yesu Kurisito

Masere si-ngü

Kpara te ba buku ne, ah ena adi de *Yüwane ye Zebedayo, te di biri kpara esüka wü *mürü tima ka Yesu ne. Engu mala, gü ba, "Yesu de Ri Me. Engu za küte, fü ewü abí engu baka nih wü kpara füh kotó ne," (Sapita 1:14). Gbü buku ne, Yüwane ngbü eí te-ye, gü ba, "Mene kpara te Yesu le engu fa sü ne," angü engu le agü iri ye nda de. (Mü ceka Sapita 21:20-24.) Yüwane wu wü ngü ta te Yesu ngbü emere ne cu de jia ye. Ah ba wü ngü ne, teka de wü kpara le, gü ba, Yesu zu de Ye Me fanü. Te wü kpara to maguma wü fü Yesu la, Yesu ena aküwa ewü, fi mere badi (Sapita 20:31).

Yüwane mala kpah nga wü talara ngü lorozi, te Yesu ngbü mere, teka asere fü wü kpara, gü ba, "De-ni Yesu, ni zu de Ye Me." Ah mala kpah nga riri, te Yesu ngbü ri wü kpara di tüngü ye, abe te ngü ka tima ka-ye ne. Ah ngbü mala wü ngü la gbü mani, gü ba, "Ni ka-ni baka zü-e," (Sapita 6:35), "Ni kpah baka ra-sü," (Sapita 8:12), "Ni kpah de kpara te ngbü eceka kpi fütanga wü kambiliki ka-ni," (Sapita 10:11), "Ni de kaje te enü kpaka Me," (Sapita 14:6), "Ni de mere riru," (Sapita 15:1). Gbü sapita 13-16, nih ena amaka mene riri, te Yesu ri wü mürü tima ka-ye nzüka de füh ye 'basu ne di, etamura, gbü sikpi te wüh zoro engu tete. Gbü sapita 17, ah de ngü ka gba te Yesu ku fü Me, teka wü kpara ka-ye, te engu le ace ewü ne.

Wü ngü te mü ena amaka gbü buku ka Yüwane, wüh dene.

Sapita 1:1-18 Ngü ka Ri Me te fü te-ye, akoro kpara tete

Sapita 1:19-51 Ngü ka Yüwane Mürü Babatiza,

bete ngü ka gina wü kpara te wüh lala gbü nga Yesu

Sapita 2:1-12:50 Wü ngü te Yesu ngbü ri mere bi wü kpara di

Sapita 13:1-17:26 Wü ngü te Yesu ngbü ri wü mürü tima ka-ye, nzüka de füh ye 'basu, di ne

Sapita 18:1-19:42 Ngü ka kpi ka Yesu

Sapita 20:1-21:25 Ngü ka züzükü ka Yesu gbü kpi

Dene ngü ka Yesu Kurisito,

o wüh bi engu la de

1-2 Ta gügü, te enga gina, o Me o kotó ne la de, Yesu *Kurisito ladü. Ah ka-ye de Ri Me. Ah ka-ye kpah Me. Wüh ngbü ta ake Me te enga gina. 3 Te Me mere kpi ake tö, ah to tima la 'buru esaka Yesu, de ah mere tima la 'buru me-ye. Te ah bala la, Yesu ka-ye de kpara, te mere tö ake kpi, de wü e gbü ye, 'buru me-ye. 4 Fü Me atima engu füh kotó ne, de ah nü, ah küwa wü kpara, da elofu sü maguma ewü. 5 Angü wü kpara füh kotó ne ngbü 'buru gbü biti. Ri Me ka-ye ba Ra-sü te ngbü esü da eliki biti la. Gara wü kpara le Ra-sü la nda-wü de, amba ah ngbü esü ka-ye fi bü asü. Wüh ti atiri engu nda-wü de.

6 Te Yesu koro füh kotó ne, fü Me ayia atima gara kpara ka-ye de iri ye *Yüwane Mürü Babatiza, kpa engagira nü fefe, o Yesu kpo de tima la de. 7 Me tima Yüwane, de ah mala nga Ra-sü la fü wü kpara. Fü Yüwane angbü eri dofo, gü ba, "Ah le de wü kpara 'buru fü maguma wü, wüh le ngü ka Ra-sü la." 8 Gara wü kpara fi ta nda-wü, gü ba, Yüwane me-ye de Ra-sü la. Amba ah bala de. Yüwane ka-ye de kpara te emala nga Ra-sü la fü wü kpara.

9 Ra-sü la, ah ka-ye Yesu, te ena alofo maguma wü kpara füh kotó 'buru. 10 Yesu o wü kpara füh kotó ne 'buru me-ye. Amba, te engu koro füh kotó ne, wü kpara le ngü kaka nda-wü de. 11 Wüh bi engu gbü nguwa wü *Yisaraye. Amba wü Yisaraye le la ngü kaka nda-wü kpah de. 12 Amba teka mene wü kpara 'buru, te ewü to maguma wü eyi fü Yesu ne, Yesu fü ewü eyi ba wü di Me. 13 Mü ti afü te-mü ba ye Me de tete-mü nda-mü de. Ah ba e te wüh ngbü eyaka kpara füh kotó ne nda de. Me ena afü mü me-ye, fü ah ao mü ba ye ye.

14 Fü Ri Me la adu afü te-ye, aza küte baka nih, wü kpara füh kotó ne. Fü ah angbü esüka nih. Ah ka-ye de kpara te gü tamu *züka maguma ka Me fü nih, da emala zu ngü ka Me fü wü kpara. De-a, wü *mürü tima kaka, a wu engu cu de jia a. A wu kpah mere wazi kaka, gü ba, engu zu de biri Ye Me biringbö.

15 *Yüwane Mürü Babatiza, wu engu kpah kpo. Fü ah angbü emala ngü kaka fü wü kpara, gü ba, "Yesu ka-ye de kpara, ta te ni mala nganga na fü wü, gü ba 'Kpara te ena akoro sisi nga ni ne, wawazi na fa nda-ni ka, angü engu ta kü ladü o wüh bi ni la de.' " Dela ngü ta te Yüwane mala teka Yesu.

16 Yesu Kurisito ka-ye de kpara te gü tamu züka maguma ka Me fü nih. Teku ngü kaka-na, nih küwa eyi. Nih ena amaka kpah mere bi wü züka ngü, teka ngü kaka. 17 Me to ta *Riri ka-ye fü wü Yisaraye esaka *Müse. Amba züka ngü te Yesu to

fü nih ne, ah fa nda Müse ka. Angü Yesu ngbü emala zu ngü ka Me fü nih fanü fanü, gü ba, "Me le nih fa sü." ¹⁸ Kpara biringbö te wu Me de jia ye nda ma. 'Duwa Yesu Kurisito kpikpi ye, angü engu de Ye Me, te ngbü ka-ye ake Me. Ah wu Me me-ye, fü ah akoro amala ngü ka Me fü nih fanü fanü.

Dene ngü te Yüwane Müürü Babatiza

mala teka Yesu

¹⁹ *Yüwane Müürü Babatiza ngbü ta eri dofo fü wü kpara. Fü gara wü kpara angbü efi nda-wü, gü ba, engu de kpara, te Me tima teka aküwa ani ne. Fü wü angbe cögbörö kpara ka wü Yisaraye, te ewü ngbü agbü Yerüsalema ne, ayia aje ngü la. Fü ewü atima wü kpara kpaka Yüwane. Wüh tima wü müürü gele, kpah de wü kpara te ewü ele ta-ngü te ewü, gbü nguwa wü *Levi ne. Fü wü kpara la akoro kpaka Yüwane, ayi-tata, gü ba, "Ye de neh da? Ye de *Kurisito, te Me gü ba, ni ena atima teka aküwa ani ne?" ²⁰ Amba Yüwane cere nga ye nda de. Fü ah amala nga ye fü ewü mbölö, gü ba, "A'a. Ni de Kurisito nda-ni de." ²¹ Fü ewü adu kpah ayi-tata, gü ba, "Ye de neh da? Ye de müürü dofo *İliya?" Yüwane gü ba, "Bala de. Ni de İliya nda-ni kpah de." Wüh gü ba, "Ye de mere *mürü dofo, ta te wü müürü dofo ba ngüngü na ne?" Yüwane gü ba, "A'a. Ni de müürü dofo la nda-ni de." ²² Wüh gü ba, "Te di bala, ye ngbü eri dofo, neh baye baye? Ye di nda-ye de neh da? Ah le fü ani adu alügü zu ngü fü wü kpara, te ewü tima ani ne. Ye ena agü tungü ye, neh fe?" ²³ Yüwane gü ba, "Ma de kpara ta te müürü dofo Yisaya ba ngüngü gbü *Ngari Me, gü ba, 'Me ena atima kpara, te ena angbü etü gü, da emala ngü de mere ri ye, gü ba, 'Wü reke kaje fü Mere Miri,' ne." ²⁴

²⁴ Gara wü *Farusi ta kpah ladü esüka wü kpara, te wüh tima ewü kpaka Yüwane ne. Fü wü Farusi la ayia ayi-ta Yüwane, gü ba, ²⁵ "Te ye gü ba, 'Ni de Kurisito de, ni de İliya kpah de, ni de mere müürü dofo la kpah de,' te di bala, ye ngbü eto babatiza fü wü kpara, neh baye baye?" ²⁶ Yüwane gü ba, "Ma ngbü eto babatiza fü wü kpara ne de ngu kükürü, teka areke kaje fü Mere Miri. Angü Miri engu ne ladü esüka yi sene, amba yi wu engu nda-yi de." ²⁷ Ah ena akpo de tima ka-ye titine. Ah de mere kpara fere, angü wawazi fa nda-ra ka. Ma be te ma ena angbü ba labi kaka nda-ra la de."

²⁸ Dela ngü ta te Yüwane mala teka Yesu, gbü lakı te engu ngbü eto babatiza

fü wü kpara gbü gara köti de یری ye Betaniya,† te di kpa etangu mere ngu de یری ye Yürüdene ne.

Dene ngü ka Yesu te di ba Kambiliki ka Me

²⁹ Baka te kpi seke tete, o *Yüwane müürü Babatiza ngbü de wü kpara ka-ye, fü ah awu Yesu te ngbü ekoro. Fü Yüwane ayia amala ngü fü wü kpara ka-ye la, gü ba, "Yi ceka komoko la, ah baka *Kambiliki ka Me, te ena akpi teka afa wü kpara gbü *siti ngü ka-wü." ³⁰ Ah de kpara ta te ma mala ngüngü na fü yi, gü ba, 'Kpara te ena akoro sidi nga ra ne, ah de mere kpara, te fa ra ka, angü ah ka-ye kü ladü, o wüh bi ra la de.'

³¹ Ma wu engu gügü nda-ra de. Ma wu engu mba titine. Amba si-ngü te ma koro ato babatiza fü yi tete de ngu ne, ah teka areke kaje fefe, kpah da egü tamu ngü kaka fü yi. ³² Ma wu engu, teka *Nzila Wazi Me, te koro agbü kpi baka mö, arü gbü nzözo. ³³ Te ah ena adi ta bala de la, de bane ma wu engu nda-ra de. Angü Me, te tima ra, de ma to babatiza fü yi de ngu ne, mala ta ngü fere me-ye, gü ba, 'Ma ena awu Nzila Wazi ni, te ena akoro arü gbü nzö gara kpara. Kpara engu la, ah de kpara te ni tima engu, de ah koro, ah to babatiza de Nzila Wazi ni, Me,' ne. ³⁴ Ma wu ngü la cu de jia ra. Fü ra adu agara tatamu kpah fü yi, gü ba, 'Engu de Ye Me.' "

Dela ngü ta te Yüwane mala fü wü kpara ka-ye, teka Yesu, te di baka Kambiliki ka Me.

Dene ngü ka Yesu de wü kpara ka

Yüwane Müürü Babatiza

³⁵ Gbü gara sikipi, fü Yüwane Müürü Babatiza adu angbü kpah kpala, de wü gara kpara ka-ye 'basu. ³⁶ Fü Yüwane awu Yesu te ngbü ekoro. Fü ah amala ngü fü wü kpara ka-ye de 'basu ne, gü ba, "Yi ceka komoko la, ah baka *Kambiliki ka Me!" ³⁷ Te wü kpara de 'basu ne je ngü la, fü ewü ayia kürrü, afa nga Yesu.

³⁸ Fü Yesu ayia afü te-ye, aceka ewü te ewü ngbü efa nga ye ne. Fü ah amala ngü fü ewü, gü ba, "Wü ngbü egiri, neh ene?" Fü ewü alügü ngü fefe, gü ba, "Mere kpara, ye ngbü engbü neh siye?" ³⁹ Yesu gü ba, "Yi koro la ekoro, fü yi awu." Fü ewü anü akoro awu sü, te Yesu ngbü engbü tete. Ngü la mere te-ye gbü lö-ra bala ka tamurago. Fü ewü angbü de ewü, zalü ekoro di gbü biti.

⁴⁰ Estika wü kpara de 'basu la, gara de Anderiya, enga ni ye Simüna Petero.

* 1:23 1:23 Mü ena amaka ngü la gbü buku ka Yisaya 40:3.

† 1:28 1:28 Mene Betaniya ne ka-ye kpikpi ye. Ah de mene engu ede Yerüsalema ne nda de.

41 Fū Anderiḡya ayia 'duwa, anū amaka Simūna, amala ngū fefe, gū ba, "A maka *Kurisito, te Me tima engu teka akūwa nih ne eyi!" 42 Fū Anderiḡya aza Simūna, akoro di kpaka Yesu. Fū Yesu aceka Simūna, amala ngū fefe, gū ba, "Mū de Simūna ye Yona. Ma ena afū iri mū la, ao Petero."* (Ah ba e te ewū gū ba, kpeke kpapa baka da.)

Fütanga ngū la, fū wū Anderiḡya ake Simūna, bete gara kiri wū la, akpo 'duwa da elala gbū nga Yesu.

Dene ngū ka Yesu de wū Filipo ake Nataniyele

43-44 Fütanga ngū te wūh mere ne, fū ewū adu ara. Fū kpī aseke. Fū Yesu afi ngū, gū ba, ni ele adu agbū *Galilaya. O wūh nū la de, fū ah ayia anū amaka gara komoko de iri ye *Filipo, te di de kpapa ka Betesayida, kpah baka wū Anderiḡya ake Petero. Fū ah amala ngū fefe, gū ba, "Mū koro, mū lala gbū nga ra." Fū Filipo ayia ale.

45 Fütanga ngū la, fū Filipo ayia anū amaka gara kiri ye, de iri ye Nataniyele, amala ngū fefe, gū ba, "Ani maka *Kurisito eyi, kpapa ta te wū *Mūse ba ta ngū kaka gbū *Ngari Me, gū ba, 'Me ena atima engu teka akūwa ani ne.' Iiri na de Yesu, kpapa ka Nazareta, ye *Yūsefa." 46 Nataniyele gū ba, "Ho! Dene ne tōndō ngū ne? Mere zūka ngū tī eyi akoro gbū Nazareta?" Filipo gū ba, "Ye koro la ekoro, de ye ceka cu de jia ye." Fū ewū ayia anū akoro kpaka Yesu.

47 Te Yesu wu Nataniyele te ngbū ekoro, fū ah ayia amala ngū, gū ba, "Kpapa la, ah de zūka enga *Yisarayele, te mani di tete ma." 48 Nataniyele gū ba, "Ye wu ni neh baye baye?" Yesu gū ba, "Ni wu ye tīne, te ye ngbū esa rū de kpane, o Filipo i ye la de ne." 49 Fū Nataniyele ayia agūka, agū ba, "Mere kpapa, mū wu ngū 'buru! Mū de Ye Me! Mū de Mere Miri ka wū Yisaraye!" 50 Yesu gū ba, "Ye fū te-ye, le ngū ka-ni bū kere ne, teka ngū te ni mala fū ye, gū ba, 'Ni wu ye esa rū de kpala' ne? Ye ena awu wū gara kpeke ngū, te fa engu la!" 51 Fū Yesu adu amala ngū fū ewū 'buru, gū ba, "Ngū te ma emala fū yi ne, ah de zu ngū. Te gara, ma ena agū tamu ngū ka Me agbū kpī fū yi. Fū yi awu ra, te ma di baka 'be'be te wū *malayika ka Me ngbū ekoro agbū kpī, da edu fefeh na."

2

Dene ngū ta te Yesu mere agbū Kana

1 Fütanga sikipi 'basu, fū wū Yesu aje ngū, gū ba, gara kpapa ngbū emere karama ka wofo, gbū gara kōti ka *Galilaya, de iri ye Kana. Fū ni ye Yesu ayia anū kpala. 2 Fū ewū ai kpah wū Yesu agbū karama la. Fū wū Yesu ayia anū akoro kpala, de wū kpapa ka-ye 'buru.

3 Te wūh ngbū kpala, fū wū kpapa anzō fi anza. Fū ni ye Yesu amala ngū fū Yesu, gū ba, "Fi nza ka-ye esaka ewū eyi." 4 Yesu gū ba, "Ni ni deyi, de ni mere baye? Ni ti amere gara ngū nda-ni la de, angū lakī ka-ni koro la de." 5 Fū ni ye Yesu anū amaka wū labi, te ewū ngbū emere tima de kpala, amala ngū fū ewū, gū ba, "Te Yesu mala gara ngū fū wū la, de wū mere kpah bala."

6 Fū Yesu afū te-ye, aceka wū cōgbōrō bütü,* ma'diya, te wūh o kpala, da ese ngū gbūgbū, teka azürü e di, tenga gele ka wū *Yisaraye. 7 Fū Yesu amala ngū fū wū labi la, gū ba dene, "Wū nū, wū se ngu, wū koro di, de wū tōkō gbū wū bütüngu la 'buru." Fū ewū ayia anū ase ngu, atōkō gbū wū sila la 'buru cere cere, kpah baka e te Yesu mala fū ewū la. 8 Fū Yesu adu amala fū ewū, gū ba, "Yi se ngu la mba cükü'daye, yi nū di kpaka kpapa te ngbū egafa e la."

9 Fū ewū ase ngu la, anū di kpakaka na. Fū kpapa te egafa e la ayia anzō e la, are. Ah ka-ye de fi! (Amba ah wu, gū ba, e la ka-ye de ngu ne, nda de. 'Duwa wū labi, te ewū se ngu la, wu me-wū.)

Baka te kpapa te ngbū egafa e re e la, fū ah agūka, adu amala ngū fū watī wūrūse la, 10 gū ba, "Ata! Fi ne türü fa sū! Wū gara kpapa mere ngū, baka nda-mū ne, nda-wū de. Wūh ngbū eto zūka fi te enga gina. Fū ewū adu ato mene fi te türü de, tīne sidi, te wū kpapa sika eyi. Amba nda-mū, mū wo zūka fi te türü fa sū ne, du to sidi, neh teka ne?"

11 Dela ta gina kpeke ngū te Yesu mere, teka agara tamu wazi, te Me to fefe na ne. Ah mere ngū la ta gbū Kana.† De-a, wū kpapa kaka-na, a wu ngū la cu de jia a. Fū a ayia ato maguma a fefe tīne afa sū, teka ngū la. 12 Sidi nga ngū la, fū wū Yesu ayia anū agbū Kapananama, de wū ni ye, de wū di enga ni ye, de wū kpapa ka-ye 'buru. Amba wūh ra kpala fa sū nda-wū de.

Dene ngū ta te Yesu mere agbū Yerūsalema

13 Gara mere sikipi ka wū *Yisarayele ladū, te wūh ngbū ei, gū ba, *Pasika. Te mere sikipi la koro tete gbamari, fū wū Yesu ayia de wū kpapa ka-ye, anū

‡ 1:42 1:42 Petero gbū ngū Ebere de Kefa.

*

2:6 2:6 Bütü la, wūh mere ta gbū da. Wūh ga fa sū ba baramili.

† 2:11 2:11 Kana de gara kōti ka Galilaya.

agbü Yerüsalema. ¹⁴ Te wüh koro agbü Yerüsalema kpala, fü Yesu anü akoro etambasü *Mere Kambü ka Me. Fü ah amaka mere bi wü kpara kpala, te ewü ngbü ecinzi wü nü de wu lu[‡] ka-wü, teka fü wü kpara adü ese, eto la 'bi tete fü Mere Me. Wü gara ngbü nda-wü ekura jiase. ¹⁵ Fü ngü la asiti gbü jia Yesu, angü wüh ngbü ecinzi e ka-wü la, ciki etambasü Mere Kambü ka Me. Fü Yesu aza ju-ku, akpo eliki ewü, de wü nü ka-wü la di. Fü ah anzini wü cangali ka wü kpara, te ewü ngbü da ekura jiase fefeh la, agbofo 'buru kötö. Fü jiase ka-ewü la angbenge kpah 'buru kötö sela. ¹⁶ Fü ah amala ngü fü wü kpara, te ewü ngbü ecinzi wü e la, gü ba, "Dene neh ene ngü ne? Yi ngbü emere ngü la etambasü ka Me, neh teka ne? Yi yia de wü e ka-yi la sene asidi! Sü ne, ah de Kambü ka Wüba! Yi le afü kambü ka Wüba, ao ba sü ka se-e?"

¹⁷ Te wü kpara kaka-na wu bala, fü ewü adu awu, gü ba, ngü ka Kambü ka Me ke te Yesu kpah baka nda *Davidi ta gügü. Angü Davidi ba ta ngü la gbü *Ngari Me, gü ba, "Mere Me, ngü ka Kambü ka-mü ke te ra fa sü! Te wü vügü ka-mü mörö ra teka Kambü ka-mü la, ah mere e de, gümü Kambü ka-mü ti anza te ra de!"[§]

¹⁸ Te wü mere kpara ka wü Yisarayeje ngü te Yesu mere la, fü ngü la ake te ewü afa sü. Fü ewü akoro ayi-ta, gü ba, "De-ye deyü, ye mere ngü la, neh teka ne? Ye gü ba, Me tima ni me-ye? Te ah bala, de ye mere la mere kpeke ngü, te ena aga gbü jia ani, teka fü ani awu, gü ba, Me to wazi la fü ye me-ye fanü." ¹⁹ Yesu gü ba, "Mere kpeke ngü te ma ena amere, ah dene. Te yi mürü Kambü ka Me ne asidi la, ma ena aji, alügü da ye gbü sikipi ngbee bata." ²⁰ Wü mere kpara la gü ba, "Ho! Wüh ji ta kambü la de mere bi re, ba e teke 'basu de füh ye ma'diya ne, fü mü agü ba, 'Ni ena aji alügü, gbü sikipi ngbee bata?"

²¹ Amba Yesu mala la ngü gbü mani tungü ye. Si-ngü gbü mani la gü ba, "Küte ni, Yesu, baka Kambü ka Me. Te wüh mörö ni la, ni ena adu azükü gbü *ebabata sikipi." ²² Te koro gbü sikipi te wüh mörö engu tete, fü ah adu azükü gbü sikipi bata kpah ba ngü te engu mala la. Te di bala, de-a, wü kpara kaka, fü a adu afi nga ngü, ta te engu mala ne. Ngü la ti kpini de ngü, ta te wü *mürü dofo ba gbü Ngari Me ta gügü, teka kpara te Me ena atima ne. Fü a adu awu, gü ba, Yesu de Ye Me fanü fanü.

²³ Te Yesu ngbü ta agbü Yerüsalema teka mere *Karama ka Pasika la, fü ah angbü emere wü gara kpeke ngü kpala. Te mere

bi wü kpara wu ngü la, fü ewü adu ale ngü kaka, gü ba, engu de Miri te Me tima, teka aliki wü vügü ka-ani ne. ²⁴ Amba Yesu le ato te-ye gbü ngü ka-ewü la nda de, angü ah wu eyi, gü ba, fingangü ka-ewü ka-ye 'basu 'basu. ²⁵ Angü engu de kpara, te ngbü ewu ngü emaguma wü kpara 'buru. Kpara te ena agü tamu ngü fefe nda ma.

3

Dene ngü ka Yesu ake Nikodemü

¹ Gara *Farusi ta ladü de iri ye Nikodemü, te di de mere *kovo ka wü *Yisarayeje. ² Gbü gara sikipi, fü Nikodemü ayia gbü biti, anü akoro kpaka Yesu. Fü ah amala ngü fü Yesu, gü ba, "Mere kpara, ani wu eyi, gü ba, wazi ye fa sü, teka ngü ka wü mere bi wü kpeke ngü, te ye ngbü emere ne. Kpah bala, ani wu kpah kpo, gü ba, Me tima ye me-ye, teka ari ani de ngü ka-ye, ka Me. Angü kpara ti amere kpeke ngü ba e la de tete-ye nda de, 'duwa te Me to wazi fefe me-ye la."

³ Yesu gü ba, "Ngü te ma emala fü mü ne, ah de zu ngü. Te mü le akoro kpara ka Me la, ah le de wüh yaka mü toto. Mene kpara te wüh yaka engu toto de, engu de kpara ka Me nda de." ⁴ Nikodemü gü ba, "Ata! Te kpara gbe tine eyi la, wüh ena ayaka engu toto, neh baye baye? Ah ena adu ari guvu ni ye, fü ewü adu ayaka engu kpah toto?"

⁵⁻⁶ Yesu gü ba, "Ngü te ma emala fü mü ne, ah de zu ngü. Wü kpara, te wüh ngbü ebi ewü gbü küte füh kötö ne, wüh de wü kpara ka küte. Amba, te *Nzila Wazi Me yaka mü me-ye la, ah ena azürü mü, fü mü akoro kpara ka Me fanü fanü.

⁷ Fingangü ka-mü ngbü ejiji faaa, teka ngü te ma mala fü mü, gü ba, ah le de wüh yaka mü toto ne? Mü fi nga ngü de. ⁸ Ngü ka kpara, te wüh eyaka engu toto, ah baka ngü ka wege. Mü ti eyi awu sü te wege koro tete? Anga mü ti eyi awu sü te wege ngbü enü tete? Mü ti awu de! Wege ngbü efe ka-ye baka e te engu ngbü ele. Mü eje nda-mü bü gigiri na kükürü. Mü wu küküte kpah de. Ngü ka kpara te Nzila Wazi Me yaka engu me-ye ne, ah kpah baka ngü ka wege la."

⁹ Nikodemü gü ba, "Ngü la ena adi bala, neh baye baye?" ¹⁰ Yesu gü ba, "Mü di ne mere kpara te mü ngbü eri wü bu mü, wü di enga Yisarayeje, me-mü ne, mü ti awu ngü la de, neh teka ne? ¹¹ Ngü te ma emala fü mü ne, ah de zu ngü fanü fanü. Angü ah de ngü te ma wu cu de jia ra. Amba yi le aje ngü ka-ra nda-yi de, neh

‡ 2:14 2:14 Wü nü la, ah de wü yiti de wü kambiliki bete mö ka kötö. § 2:17 2:17 Mü ena amaka ngü la gbü Ci ka wü Davidi 69:9.

teka ne? ¹² Mü da la güje mü teka ngü te ma ngbü emala fü mü ne, angü ma ngbü emala ngü ka wü e de füh kotö ne fü yi, baka mani. Te yi je si-ngü la de la, ma ena amala nga wü ngü ka Me agbü kpî, fü yi aje sisi na, neh baye baye? ¹³ Angü kpara te nü koro kpaka Me agbü kpî nda ma. 'Duwa de-ra, Ye Me, angü ma yia kpala, akoro sene, teka amala ngü kaka fü yi.

¹⁴ Kaje te yi ena akoro tete kpara ka Me, fü yi aküwa fi mere badi, ah kphah baka ngü ta te *Müse mere fü wü kundu nih, te ewü ngbü ejiji tete agbü gü ne. Angü te siti wü kpürü ngbü ta ede ewü kpala ne, Müse mere ta neh ene? Ah za ta kuru kpürü, te wüh mî gbü se, ae ao eküte rü kpa tikpi, teka fü wü kpara adi eceka. Mene wü kpara ta te ewü ngbü eceka kpürü la, wüh kpi nda-wü de, wüh küwa ka-wü ta eyi.* Kpah bala, de-ra *Ye Kpara ka Kpî, wüh ena ae ra eküte rü kpa tikpi, te gara, teka fü wü kpara adi eceka. ¹⁵ Te di bala, mene kpara te ena agbü eo jia ye eküte ra, ah ena aküwa ka-ye aküwa fi badi."

¹⁶ Angü Me le ngü ka wü kpara füh kotö ne fa sü, fü ah ayia atima biri Ye ye biringbö, teka aküwa nih. Te di bala, te mü to maguma mü fü Yesu la, mü ti akpi fi de. Mü ena aküwa ka-mü aküwa fi badi. ¹⁷ Me tima Ye ye füh kotö ne, neh teka ne? Teko ato kuru te wü kpara? Ah bala de. Me tima Ye ye teka aküwa wü kpara füh kotö ne 'buru. ¹⁸ Te mü to maguma mü fü Ye Me la, Me to kuru te mü de. Te mü to maguma mü fefe de la, Me ena ato kuru te mü ato, angü mü le ngü ka biri Yeye na nda-mü de. ¹⁹ Si-ngü te Me ena ato kuru tete di te wü kpara ne, angü engu tima ra-sü, koro di füh kotö ne, teka asere kaje ka *küküwa fü ewü, amba wü kpara le ra-sü la nda-wü de. Wü kpara ngbü ele ka-wü biti, efa ra-sü di, teka lümü ka *siti ngü ka-wü te ewü ngbü emere ne. ²⁰ Angü siti kpara le ra-sü nda de. Ah ngbü ekpe ra-sü akpe, angü wüh ena awu siti ngü ka-ni, te ni ngbü emere ne. ²¹ Kpara te ngbü ele zu ngü ka Me de maguma ye 'buru 'buru ne, ah ngbü engbü ka-ye gbü ra-sü, teka fü wü kpara awu, gü ba, ngü te ni ngbü emere ne, ah de ngü te ngbü ereke gbü jia Me.

Dene kphah gara ngü te Yüwane Mürü Babatiza

mala teka Yesu

²² Sidi nga ngü la, fü Yesu ayia de wü kpara ka-ye, ace Yerüsalema, anü andoro agbü wü jürü kötî ede Yerüsalema sela. Fü ewü angbü de wü kpara ka-ye, da eto

*babatiza fü wü kpara de kpala. ²³⁻²⁴ Ngü la mere ta te-ye, o wüh gü *Yüwane agbü ku la de. Yüwane ngbü nda-ye ta eto babatiza agbü tö ka *Yudaya, kphah baka Yesu. Ah ngbü ta eto babatiza sela, agbü gara sü de irti ye Ayinona,[†] angü züka ngü ladü sela, te cu acu. Fü mere bi wü kpara angbü fi bü egoro kpakaka na, da eza babatiza esakaka na.

²⁵ Gbü gara ra, fü gara engu *Yisarayele akoro kpaka wü kpara ka Yüwane, akpo da ega yiki de ewü, teka ngü ka babatiza. ²⁶ Fü komoko la ayia amala nga Yesu fü ewü, gü ba, "Titine mere bi wü kpara ngbü egoro kpaka Yesu, efa nda Yüwane ka." Te wü kpara ka Yüwane je ngü la bala, fü ngü la ake te ewü. Fü ewü ayia anü akoro kpaka Yüwane, amala nga Yesu fefe, gü ba, "Mere kpara, ceka la! Kpara ta te ani ngbü de ewü, kpa etangu Yürüdene ne, te ye ngbü egü tatamu, gü ba, engu de Kambiliki ka Me ne, ah kpo eyi eto babatiza fü wü kpara. Bi wü kpara ngbü eyi 'buru enü kpakaka na kpala!"

²⁷ Yüwane gü ba, "Züka ngü. Me to wazi la fefe me-ye. Angü kpara ti amere kpeke ngü bala, de tete-ye, nda de. ²⁸ Ma mala ta fü yi eyi, gü ba, ma de *Kurisito te Me tima engu ne nda-ra de. Yi je ngü la ta eyi. Ma nda-ra mene kpara, te wüh tima ra kpa engagira nü fü Kurisito la, teka areke kaje fefe. ²⁹ Te komoko le aza würüse, ah ena atima engu ni ye kpa engagira nü, teka areke ngü la. Kpara la, ah de wati würüse la nda de. Ah de kpara te ena areke ngü fü wati würüse la. Te kpara la wu wati würüse la te ngbü egoro, ah ena agbü de mere tadu, gü ba, 'Mere kpara ka-ni koro eyi!' Enatikine ma ngbü eyi de mere tadu, angü mere kpara ka-ra koro eyi dela! ³⁰ Ah le de ngü ka Yesu nü kpa engagira nü, de nda-ra ngü du kpa sidi." Dela ngü ta te Yüwane Mürü Babatiza, mala teka Yesu.

³¹ Yesu de kpara te koro agbü kpî. Ah wu ngü fa nda wü kpara füh kotö ne 'buru. Baka te Yüwane di de kpara füh kotö ne, ah ngbü emala ngü ka Me baka kpara ka kotö ne. Ah ti amala ngü ka Me baka kpara te koro agbü kpî ne nda de. Amba ngü ka Yesu fa nda Yüwane ka, angü engu koro ka-ye agbü kpî. ³² Ah ngbü emala ngü ka Me ereke areke, angü engu koro ka-ye agbü kpî. Ah ngbü emala ngü te engu wu cu de jia ye, amba wü kpara le aje ngü kaka nda-wü de. ³³ Te mü le ngü te Yesu gü tatamu fü mü ne eyi la, amba mü wu eyi, gü ba, Me tima engu me-ye fanü fanü. ³⁴ Yesu ngbü emala ngari Me fü nih, angü Me tima engu me-ye. Me to wazi ka

* **3:14** 3:14 Mü ena amaka ngü la gbü buku ka Namba 21:6-9. † **3:23-24** 3:23-24 Ayinona de sü ghamari ede Salima.

*Nzila Wazi ye eyi 'buru fefe, de ah mere ngu di ba e te engu ngbü ele. ³⁵ Angü Wö ye na le engu fa sü, fū ah ace wü ngü 'buru esakaka. ³⁶ Kpara te to maguma ye fū Yesu, Ye Me, ah ena aküwa fi mere badi. Amba mene kpara te to maguma ye fū Yesu de, ah küwa kphah de, angü Me ena asü gü fefe fi mere badi.

4

Dene ngü ta te Yesu mala fū egba Samariya

¹⁻³ Gbü wü sikpi la, mere bi wü kpara ngbü ta ekoro kpaka Yesu de ah to *batiza fū ani. Fū wü *kpara ka Yesu angbü eto babatiza fū ewü me-wü, angü Yesu to babatiza nda de. Fū wü Farusi aje, gü ba, mere bi wü kpara le ngü ka Yesu eyi, fa nda *Yüwane ka. Fū maguma ewü ayia asiti teka ngü la. Te Yesu wu bala, fū ah ayia ace tö ka *Yudaya, anü ka-ye agbü *Galilaya. ⁴ Amba ah le afü ka-ye kpuru gbü tö ka wü *Samariya. Fū ah ayia de wü kpara ka-ye, ati te kaje.

⁵ Fū ewü anü akoro gbü gara köti ka wü Samariya de iri ye Sikara. ⁶ Gara du-kpa-ngu ladü sela, te *Yakobo jī gügü. Fū wü Yesu anü akoro kpa fūh du-kpa-ngu la etü ra, o engu ndiri eyi ka nü. Fū ah anü angbü efe te-ye ede du-kpa-ngu la. ⁷⁻⁸ Fū wü kpara kaka-na anü ase e-mazü agbü Sikara.

Fū gara egba Samariya akoro teka ase ngu. Fū Yesu amala ngü fefe, gü ba, "Ye to ngu fū ni, de ni nzö." ⁹ Egba Samariya la gü ba, "Ye de engä *Yisaraye le de? Ah mere baye, te ye ngbü eyo ngu te ni, te ni di de egba kpara ka Samariya ne?" Ah mala bala kükürü de, angü wü di engä Yisaraye le te-wü de wü kpara ka Samariya nda-wü de.

¹⁰ Yesu gü ba, "Te mü ena awu ta züka ngü, de te Me le ato fū mü ne la, anga te mü ena awu ra ta kphah kpo, baka te ma yo ngu eküte mü ne, de bane mü ena ayo ta kphah ngu te ra, fū ra ato mene ngu, de te ena aküwa fū mü fi mere badi ne." ¹¹ Würüse la gü ba, "Ye ena ase ngu la, neh baye baye? E ka-ye de te ye ena ase ngu di kphah ma! Te du-kpa-ngu engu ne di kphah cucu de bala! Ye ena amaka nda-ye de ngu ka *küküwa ne, neh kaye? ¹² Ye fa kundü ani, Yakobo, ta te ce du-kpa-ngu ne fū ni ne? Yakobo jī ta du-kpa-ngu ne me-ye fū wü di ye, de wü nü ka-ye 'buru, fū ewü angbü enzö." ¹³ Yesu gü ba, "Kpara te ngbü enzö ngu gbü du-kpa-ngu ne, gümü ngu ena adu kphah amere engu. ¹⁴ Amba kpara te ena anzö ngu, de te ma

ena ato fefe na ne, gümü ngu du amere engu tñe de. Angü ngu te ma ena ato fefe na, ah ena angbü emamaguma baka du-kpa-ngu, te ena aküwa engu fi mere badi." ¹⁵ Würüse la gü ba, "Mere kpara, ye to ngu la eto fū ni, de ni nzö, angü gümü ngu ena adu kphah amere ni. Angü ni ena adu kphah angbü endoro te ngere kaje ne, da ese ngu."

¹⁶ Fū Yesu amala ngü fefe, gü ba, "Ye nü, ye i wati ye, de wü du koro ake di sene." ¹⁷ Würüse la gü ba, "Wati ni nda ma." Yesu gü ba, "Ye mala eyi zu ngü! ¹⁸ Tekä ne de, angü ye za ta wü komoko 'buruve, fū ye ace ewü 'buru. Te di bala, mene komoko te ye ngbü ake di titine ne, ah de wati ye nda de. Ngü te ye mala la, ah fanü." ¹⁹ Würüse la gü ba, "Mere kpara, ma wu eyi, gü ba, mü de *mürü dofo ka Me. ²⁰ Te di bala, gara ngü ladü te ma ele amala fū mü. Wü kundü a ngbü ta egbo nga iri Me, kpa fūh mere da ka Samariya la. Amba de-yi, wü di engä Yisaraye le, yi gü ba, ah le de wü kpara 'buru di egbo nga iri Me kpa agbü *Mere Kambü ka Me agbü Yerüsalemä ne. Te di bala, mene sü te wü kpara ti agbo nga iri Me gbügbü, ah ena adi neh engu dey?" ²¹⁻²³ Yesu gü ba, "Tangbase, mü da güje mü te ngü te ma ngbü emala fū mü ne. Me ka-ye biringbö. Te di bala, ah le de mü gbo nga iiri na de maguma mü biringbö. Ngü ka sü te wüh ngbü egbo nga iiri tete na, ah de mere ngü nda de. De-yi, wü kpara ka Samariya, yi ngbü egbo nga iri Me te yi wu mbi mbi de. De-a, wü di engä Yisaraye le, a ngbü egbo nda-a zu nga iri Me, te a wu kpo. Angü Me gü tamu ngü ka *küküwa eyi fū a. Amba ah ena akpo titine, wü kpara ena angbü egbo nga iri Wüba Me, te nga wü sü 'buru. Ah ena adi bü duu fūh da sene, anga agbü Yerüsalemä kphah de. Wüh ena agbo nga iiri na de maguma wü le 'buru. Angü Wüba Me le eyi bala. ²⁴ Angü Me zu de Me biringbö. Te mü le agbo nga iiri na la, ah le de mü gbo nga iiri de maguma mü biringbö."

²⁵ Würüse la gü ba, "Mere kpara, ngü te ye mala la, ah kpekpeke. Ni wu kpo, gü ba, Me ena atima Miri te ena aküwa nih. Te engu koro eyi la, engu ena amala si wü ngü 'buru fū ani." ²⁶ Yesu gü ba, "De-ra, de te ma ngü emala ngü fū mü ne, ma de Miri la me-ra."

²⁷ Kphah bü gbü lö-ra la, fū wü *kpara ka Yesu adu akoro, amaka engu da ero mó ake würüse la. Fū ngü la ayia aga gbü jia ewü afa sü. Kpara te ena ayi-ta würüse la, gü ba, "Ye le neh ene?" ne, nda ma. Kpara te ena ayi-ta Yesu, gü ba, "Ah mere baye, te

* 4:5 4:5 Sikara gbamari ede mere yi ta te Yakobo to fū ye ye de iri ye Yüsefa ne.

ye ngbü ero mö ake würüse la?" nda kphah ma.

²⁸ Fū würüse la ayia ace sila ka-ye ciki sela, afū nga ye, adu agbü mere kōti la, amala ngü fū wü kpara, gü ba, ²⁹ "Yi nū la akine, yi ceka kpara, de te ma maka engu kpa fūh du-kpa-ngu de kpane. Angü ah mala nga wü ngbü, te ma mere, te kpara wu de ne, 'buru gbü nzō ra. Ah ena adi dela *E-küwa-nih ne de?" ³⁰ Te wüh je ngü la bala, fū mere bi wü kpara aci anü kpaka Yesu.

³¹ Fū wü kpara ka Yesu angbü enda'ba te-wü fū Yesu, gü ba, "Mere kpara, ani koro de e-mazü eyi. Ye zü la e." ³² Fū engu adu amala ngü fū ewü, gü ba, "Gara e-mazü ka-ni ladü, te wü wu nda-wü de." ³³ Fū wü kpara kaka-na angbü eyi-ta ngü esuka wü, gü ba, "Gara kpara koro de e-mazü la fefe me-ye?" ³⁴ Fū Yesu amala fū ewü, gü ba, "Ma ngbü emere tima te Me tima ra di. Ngü la, ah fere baka e-mazü. Ma le fi bü amere tima la, de ah nza anza."

³⁵ Fū Yesu adu kphah, amala ngü fū wü kpara ka-ye, gü ba, "Wü kpara ngbü emala teka ndo, egü neh fe? Wüh ngbü emala, gü ba, "Te wüh moko ndo eyi la, ah ena amere fe bala, fū ewü adu awa." Ah bala de? Amba yi ceka la bü bi wü kpara, te ewü ngbü ekoro kpaka nih ne. Ma emala fū yi, gü ba, wüh baka ndo te ma moko titine, ah ndri kphah eyi, lakü kaka-na koro kphah eyi, teka awa, aza ao gbü kafa. ³⁶ Angü Wüba tima ra, de ma ru ngari ni emaguma wü kpara baka ndo. Yi nda-yi baka wü kpara, te ewü ngbü ele ta-ngü te ra gbü tima la. Nih bitü wü kpara ebitü gbü kafa ka Wüba, de wüh küwa fi mere badi. Te nih mere bala la, mürü ndo la ena ato takpa fū nih, fū nih angbü 'buru de mere tada teka ngü la.

³⁷ Tani te wüh ngbü emala, gü ba, "Te kpara ru ndo ka-ye la, gara kpara ena adu akoro awa me-ye ne, ah de zu ngü! ³⁸ Enatikine ngü la koro eyi, angü ma ngbü etima yi, teka awa nzia ndo te yi ru me-yi de. Wü gara kpara mere ta tima la me-wü, fū ewü ai yi, akoro amaka bü nzinzia gbü nga ewü la." Dela ngü ta te Yesu mala fū wü kpara ka-ye, te engu wü wü kpara ka *Samaríya, te ewü ngbü ekoro.

³⁹ Angü mere bi wü kpara ka sū la le ngü ka Yesu, teka ngü te würüse la mala fū ewü, gü ba, "Yesu mala nga wü ngü ka-ni, de te ni ngbü emere ne, eyi 'buru."

⁴⁰ Te di bala, fū ewü akoro kpaka Yesu, ayitata teka de ah ngbü kpaka ani sela. Fū Yesu angbü kpala sikpi 'basu, da arí ewü de ngari Me. ⁴¹ Fū mere bi wü kpara ayia kphah ato maguma wü fū Yesu, teka ngü te ewü je gögömö na la. ⁴² Fū ewü amala ngü fū würüse la, gü ba, "A le ngü ka kpara

la ta teka ri mü. Amba titine, a je riri na eyi cu de güje a. Te di bala, a wu eyi, gü ba, engu de kpara, te ena aküwa wü kpara fūh kotō ne 'buru, angü ah de *E-küwa-nih."

Dene e'ba'basu kpeke ngü,

ta te Yesu mere agbü Kana

⁴³ Sidi nga sikpi 'basu la, fū wü Yesu ayia de wü kpara ka-ye, adu agbü *Galilaya. ⁴⁴ Yesu mala ta ngü fū wü kpara ka-ye, gü ba, "Te mü de *mürü dofo la, wü kpara gbü wü gara sū 'buru ena angbü ecu ngü mü me-wü, amba 'duwa wü mürü mü ti acu ngü mü nda-wü de." ⁴⁵ Mere bi wü kpara te ewü ngbü agbü Galilaya nū ta agbü Yerüsalema teka *Karama ka Pasika. Fū ewü awu wü kpeke ngü ta te Yesu ngbü emere de kpala. Fū ewü adu amala nga wü ngü la fū wü bu wü, kpa ekōti. Te di bala, te wüh wu Yesu te koro tete agbü Galilaya, fū ewü angbü de mere tadu, gü ba, engu ena amere wü kpeke ngü gba ani sene, kphah ba e te engu mere agbü Yerüsalema ne.

⁴⁶ Fū engu adu akoro kphah agbü Kana, gbü sū ta te engu fū ngu, koro di vinü tete na. Gara mere kpara ka miri ta ladü agbü gara kōti de iri ye Kaparanama, te yeye na di de keke te-ye, ah yia ta ekpi akpi. ⁴⁷ Te komoko la je ngü, gü ba, "Yesu du koro eyi, gbü Kana ne," fū ah ayia agbu wü agbü Kaparanama, anü amaka Yesu agbü Kana kpala.

Te engu koro kpaka Yesu, fū ah anda'ba te-ye fefe na, gü ba dene, "Mere kpara, ye koro kere, aküwa ye ni, angü ah yia eyi ekpi akpi." ⁴⁸ Yesu gü ba, "De-yi, wü kpara gbü sū ne, te ma mere kpeke ngü gbü jia yi de la, yi ti ale ngü ka-ra nda-yi kphah de. Ngü ka-yi ena adi fi bü bala?" ⁴⁹ Komoko la gü ba, "Mere kpara, bala de, baaa! Mü koro mba kere, mü küwa ye ra, angü ah ena akpi." ⁵⁰ Yesu gü ba, "Ye mü küwa eyi. Mü du edu." Fū komoko la ale ngü te Yesu mala fū ye la. Fū ah ayia adu kpa ekōti.

⁵¹ Baka te engu ngbü edu kpa ekōti, fū ewü amaka te-wü de wü labi ka-ye te kaje. Fū ewü amala fefe, gü ba, "Mere kpara, ye mü küwa eyi!" ⁵² Fū engu ayi-ta ewü, gü ba, "Keke la nza eküküte gbü lö-ra fe?" Wüh gü ba, "Keke la nza esikine etü ra, ba lö-ra biringbö." ⁵³ Fū wö ye mbarase la awu teke, gü ba, "Keke la nza gbü lö-ra te Yesu mala ngü fū ni tete, gü ba, 'Ye ni küwa eyi ne.' " Fū komoko la ayia ato maguma wü fū Yesu, de wü kpara gba ye 'buru.

⁵⁴ Dela e'ba'basu kpeke ngü ta te Yesu mere agbü Kana. Ah mala ngü bü de komō ye, fū mbarase la aküwa ciki agba wü, agbü Kaparanama kpala. Yesu mere ngü

la, o engu yia tete agbù *Yudaya, ego agbù *Galilaya.

5

Dene ngü ta te Yesu mere gbü sikipi ka Me,

ede kara de iri ye Beteseda

¹ Sidi nga wü ngü dela, fü wü Yesu ayia anü agbù Yerüsalema, teka gara *karama ka wü *Yisaraye. ² Gara mere kara ta ladü agbù Yerüsalema kpala,* te ewü gü iri na, gü ba, Beteseda. ³ Mere bi wü mürü keke ngbü era esa e ede kara la. Ah de wü kpara te jia ewü ni ani, gara ewü de lö wü walawala, gara ewü te küte ewü di titiri. Wüh ngbü era kpala, da eci nga ngu te ena akada. ⁴ Angü wüh gü ba, gbü gara sikipi, *malayika ka Me ngbü ekoro, da eyiki ngu la, fü ngu la angbü ekada teka ngü la. Te di bala, mene kpara, te ena ati fi me-ye fü wü bu ye, gbü ngu la, keke kaka-ena ena anza.

⁵⁻⁶ Gbü gara ra, fü wü Yesu akoro füh kara la. Fü ah awu gara komoko kpala, te di de keke te-ye teka mere bi re, baka e teke biri nzükpa de füh ye 'bajena. Te Yesu wu komoko la, fü ah awu teke, gü ba, ah ra eyi sela fa sü. Fü ah amala ngü fefe, gü ba, "De-mü, mü ele aküwa?" ⁷ Mürü keke la gü ba dene, "Mere kpara, ni ena aküwa, neh baye baye? Angü engu ni ni, te ena agü ni gbü ngu la, fü ni aküwa ne, ah nda ma. Ni te egbeke te-ni enü kpala, küte ni titiri, fü wü gara kpara angbü eti ka-wü fi me-wü." ⁸ Fü Yesu amala ngü fefe, gü ba, "Enga wüna, ma ena ato wazi fü mü. Mü yia eyia tikpi, de mü za darara ka-mü, mü go kpa eköti." ⁹ Yesu bü te emala ngü la bala, fü keke ka komoko la ayia anza. Fü engu ayia aza darara ka-ye, ago kpa eköti.

Sikipi te Yesu küwa komoko la tete, ah de *sikipi ka Me. Angü gbü gele ka wü di engu Yisaraye, wüh le de wü kpara mere tima gbü sikipi ka Me 'buru 'buru de. ¹⁰ Te ah bala, baka te wü *kovo ka wü Yisaraye wu ngü la, gü ba, komoko la ngbü ebi darara ka-ye gbü sikipi ka Me, fü ewü ai engu, ayi-tata, gü ba, "Ah mere neh baye, te ye ngbü ebi darara ka-ye gbü sikipi ka Me ne? Ye wu de, gü ba, gele ka-ani le de wüh mere e abi e gbü sikipi ka Me de?" ¹¹ Komoko la gü ba, "Ah de ngü ka-ni nda de. Ni ngbü ta eke ka-ni ake, fü gara komoko ayia akoro aküwa ni gbü keke la. Fü ah amala ngü fü ni, gü ba, 'Ni bi darara ka-ni ebi, ni go di kpa eköti.' Fü ni abi darara ka-ni ne tüngü la." ¹² Wüh gü ba, "Kpara te küwa ye neh da?"

¹³ Amba komoko la je iri kpara te küwa ye ne nda de. Angü mere bi wü kpara ta ladü gbü sü, te Yesu küwa komoko la tete ne. Fü Yesu azi te-ye zirri, anü sü ka-ye.

¹⁴ Fütanga ngü la, fü Yesu anü amaka komoko la, kpa etambasü *Mere Kambü ka Me. Fü ah amala ngü fefe, gü ba, "Enga wüna, mü ceka te-mü 'be, angü mü küwa eyi gbü keke ka-mü la. Te di bala, ah le de mü ce da emere *siti ngü. Angü gara siti ngü, te ena afa keke la, ena adu kphah amere mü." ¹⁵ Fü komoko la ayia bü kere, anü amala nga ngü la fü wü kovo ka wü Yisaraye, gü ba, "Kpara te küwa ni ne, ah de Yesu."

¹⁶ Dela si-ngü te wü kovo la kpo da ekpü Yesu tete na, gü ba, "Engu ce gele ka-ani eyi," angü engu küwa kpara la gbü sikipi ka Me. Wüh gü ba, ngü la, ah de tima. Ah le ta de ah mere ngü la gbü sikipi ka Me de.

Dene ngü ta te wü Yesu ga yiki tete,

de wü kovo ka wü Yisaraye, teka sikipi ka Me

¹⁷ Te Yesu je ngü la, gü ba, wü *kovo ka wü *Yisaraye ngbü ewü nga, teka ngü te ni küwa komoko la gbü *sikipi ka Me ne, fü ah adu amala ngü fü ewü, gü ba, "Ngü te ma mere ne, ah siti gbü jia yi, neh teka ne? Wüba, Me, ngbü emere kphah bala, angü engu ngbü eto züka ngü fyi gbü wü sikipi 'buru. Ah ce da emere züka ngü fyi yi gbü sikipi ka Me eyi? Ah ce de! Te ah bala la, züka ngü te ma mere fü komoko la gbü sikipi ka Me ne, ah siti gbü jia yi, neh teka ne?" ¹⁸ Fü ngü la asiti emaguma ewü 'duwa ba-neh-ene-la. Wüh gü ba, "Yesu siti gele ka-ani, ka sikipi ka Me ne eyi. Ah mala kphah gara siti ngü, gü ba, 'Ni de Ye Me.' Ah le ao te-ye baka Me?" Fü ewü angü egiri kaje, teka de ni möro engu tete.

¹⁹ Fü Yesu adu amala fü ewü, gü ba, "Ngü te ma emala fü yi ne, ah de zu ngü. Te ma mala, gü ba, ma de Ye Me ne, yi ngbü efi nda-yi, gü ba, 'Ma ngbü emere tima la de tete-ra?' Ah bala de. Ma ngbü emere 'duwa tima te ma wu esaka Wüba. Wü ngü te Wüba ngbü emere, ma ena amere 'buru. ²⁰ Wüba ngbü egü tamu wü ngü ka-ye 'buru fere, angü ah le ra fa sü. Dela si-ngü te ma ngbü eküwa wü mürü keke tete ne. Gara tima kphah ladü te Wüba gü tatamu fere, te fa engu dela, te ma ena amere, te ena aga gbü jia yi afa sü. ²¹ Angü Wüba ngbü ezükü wü kövö, da eküwa ewü fi mere badi. Te di bala, de-ra, te ma di de Yeye na ne, ma ena angbü kphah ezükü wü kpara gbü kpi, da eküwa ewü, baka e te ma ngbü ele.

* 5:2 5:2 Kara la, ah gbmari ede möngiti ka wü kambiliki agbù Yerüsalema kpala. Wüh jì yafu edede na ba e 'buruve.

²² Gara tima te Wüba to fere, ah de ngü ka makolo liya. Angü Wüba gü ba, 'Ma ena akolo liya ka wü kpara 'buru me-ra. Ni ce tima la eyi 'buru esaka ra.' ²³ Wüba ce tima la esaka ra, teka fü wü kpara angbü ecu ngü ra, kphah baka e te wüh ngbü ecu ngüngü. Kpara te cu ngü ra de, ah cu ngü Wüba kphah de, angü engu tima ra me-ye."

²⁴ Fü Yesu adu amala gara ngü fü wü *kovo la, gü ba, "Ngü te ma emala fü yi dene, ah de zu ngü. Te mü ena aje ngü ka-ra, te mü le kphah ngü ka Wüba te tima ra ne, mü küwa eyi. Mü ena angbü de *küküwa la fi badi. Wüh ti ato kuru te mü tine de, angü mü küwa gbü kpi eyi.

²⁵ Ngü te ma emala fü yi dene, ah de zu ngü. Amba ah ena akpo titine, ma ti eyi amala ngü fü wü kövö. Mene ewü te ewü ena aje ri ra, ma ena aküwa ewü, angü ma de Ye Me. ²⁶ Wüba to wazi la eyi fere me-ye. Wü e füh kotö ne 'buru ngbü eküwa neh baye? Wüba ngbü eküwa ewü me-ye de? Kpah bala, ah to wazi la eyi fere, teka fü ra adi eküwa wü kpara di. ²⁷ Ah to kphah wazi eyi fere, teka akolo liya ka wü kpara di, angü engu tima ra, *Ye Kpara ka kpi, kpa füh kotö kpkahine me-ye.

²⁸ Ngü la mere e aga gbü jia yi de. Angü *adu sikpi ladü te ena akoro. Gbü sikpi la, ma ena ai wü kpara 'buru, teka akolo ngü ka-ewü. Te di bala, wü kpara te ewü kpi eyi ne, wüh ena aje ri ra, ²⁹ fü ewü azükü gbü kpi 'buru. Mene wü kpara, te ewü mere züka ngü, wüh ena azükü, aküwa fi mere badi. Amba mene ewü, te ewü mere *siti ngü ne, wüh ena azükü nda-wü teka amaka cinga. ³⁰ Ngü de te ma ngbü emere ne, ma mere de tete-ra nda-ra de. Liya te ma ngbü ekolo ne, ma ekolo ba e te ma je gömö Wüba. Te di bala, ma ngbü ekolo liya ka wü kpara reke areke, angü ngü te ma ngbü emere ne, ma ngbü emere ngü la ba e te Wüba ngbü ele, angü ah tima ra me-ye."

Dene ngü te Yesu mala tungü ye

³¹ Fü Yesu adu amala kphah gara ngü fü wü *kovo la, gü ba, "Yi efi nda-yi, gü ba, ngü te ma emala ne, ma ngbü ecu ngü ra de tete-ra? Ah bala de. Ta te ma ena angbü egbo nga ra de tete-ra la, de bane ngü te ma ngbü emala ne, ah ena adi de töndö ngü kükürü. ³² Wüba Me ngbü emala ngü tungü ra ereke cu me-ye. Te di bala, fü ra awu, gü ba, ngü te engu ngbü emala tungü ra ne, ah de zu ngü.

³³ *Yüwane Mürü Babatiza mala nga ra fü yi ta kphah eyi, baka te yi tima wü kpara ka-yi kpkakaka na ne. Ah mala nga ra fü yi cu reke areke. ³⁴⁻³⁵ Yüwane ngbü ka-ye ta baka ze-wa te ngbü elofu sü, teka agü tamu züka kaje ka Me fü yi. Fü yi angbü

ta de tadu teka ngü la, da ele ngü kaka. Te yi ena ale ta ngü te Yüwane mala teka ra ne eyi la, ah ena adi ta mbi. Amba yi du ce ngü kaka bü kere bala, neh teka ne? Yi mere e afi, gü ba, ma gü iri Yüwane dela, angü ma ngbü eo jia ra teka ngü ka kpara füh kotö ne, yi mere e afi bala de. Ma gü iri Yüwane gbü ngü la, teka fü yi afi nga ngü ta te engu mala ne, teka fü yi adu ale ngü ka-ra, fü yi aküwa.

³⁶ Te yi le ngü ka Yüwane de la, de yi fi la nga wü mere kpeke ngü te ma ngbü emere ne. Angü wü ngü la, ah de ngü ka-ra de, ah ka-ye de ngü ka Wüba, te engu tima ra ne, fü ra angbü emere wü ngü la gbü wazi kaka. Te yi fi ngü la mbi mbi la, yi ena awu, gü ba, Me tima ra me-ye fanü.

³⁷ Wayi, Wüba te tima ra ne, ah mala zu ngü tungü ra fü yi gbü *Ngari ye. Yi le ngü kaka la de, neh teka ne? Yi le de engu koro kpa ka yi, teka fü yi awu engu cu de jia yi feke? ³⁸ Amba ngü te engu mala fü yi gbü Ngari ye ne, ngü la ri gbü nzö yi de, neh teka ne? Te ngü la ena arü ta gbü nzö yi eyi la, de bane yi ena ale ngü ka-ra, gü ba, Me tima ra me-ye fanü. ³⁹ Yi ngbü fi bü da etanga Ngari Me, da egiri ngü gbügbü, gü ba, ani ena aküwa teka ngü la. Amba Ngari Me la ngbü emala nga ra fü yi, ⁴⁰ gü ba, ah le de yi koro kpa ka ra, fü ra aküwa yi. Te di bala, yi le ngü la de, neh teka ne?"

⁴¹ Fü Yesu adu amala kphah gara ngü fü wü kovo la, gü ba dene, "Yi efi nda-yi, gü ba, ma ngbü ele de wü kpara 'buru di ecu ngü ra? Ah bala de. Ma ele de wü kpara koro kpa ka ra, teka de ma küwa ewü. ⁴² Amba nda-yi, yi le ngü ka-ra de. Te ah bala, ma wu eyi, gü ba, yi le Me de maguma yi nda-yi kphah de. ⁴³ Angü Me tima ra me-ye. Fü ra akoro kpa ka yi de sene gbü wazi kaka. Yi le ra de, angü yi le ka-yi 'duwa mene wü kpara te ewü ngbü ekoro, da ecu ngü wü de tete-wü ne.

⁴⁴ Yi ena ato maguma yi fere, neh baye baye? Angü yi ngbü eo fingangü ka-yi 'buru, gbü wü ngü te ngbü ereke gbü jia wü bu yi ne. Amba yi le afi nga ngü, te ngbü reke gbü jia Me ne, nda-yi de. Te di bala, yi ti ale ngü ka-ra kphah de.

⁴⁵ Yi ngbü efi nda-yi, gü ba, ma ena ai ani engagira Wüba, teka fü ah akolo ngü ka-ani, teka te ani le ngü ka-ra de ne? Ah bala de. Kpara te ena ai yi engagira Wüba, ah de *Müse. Yi ngbü fi bü da etanga ngü te Müse ba, da eo fingangü ka-yi 'buru tete. ⁴⁶ Amba te yi ena aje ta si-ngü, te Müse ba ne, eyi la, de bane yi ena ale kphah ngü ka-ra, angü Müse ba ta ngü la teka ngü ka-ra. Te di bala, yi le ngü la de, neh teka ne? ⁴⁷ Te yi le ngü ta te Müse ba gbü Ngari Me ne de la, yi ena ale ngü ka-ra, neh baye baye?"

Dela ngü ta te Yesu mala fü wü *kovo ka wü Yisarayeleye la agbü Yerüsalema. Fütanga ngü la, fü wü Yesu ayia de wü kpara ka-ye la, adu agbü *Galilaya.

6

Dene ngü te Yesu to zü-e di fü mere bi wü kpara

Matayo 14:13-23; Marako 6:31-46; Luka 9:10-17

¹ Gbü gara ra, fü wü Yesu ayia agbü Kaparanama, alí gbü *zabu, akö ngu kpa etangu *Galilaya. ² Fü mere bi wü kpara ayia afa nganga na, angü wüh wu wü mere kpeke ngü ka talara, de te engu ngbü emere, da eküwa wü mürü keke di ne. ³ Te wü Yesu kö ngu la tete na, fü ewü alí kpa füh gümbe de wü kpara ka-ye. Fü Yesu angbü kötö, akpo da eri ewü. ⁴ Ngü la ngbü ta emere te-ye gbamari ede mere sikipi ka wü Yisarayeleye, de iri ye *Pasika ne.

⁵ Fü Yesu afü jia ye, aceka mere bi wü kpara, te ewü koro ngbü edede na, da eje ngü gögómó na ne. Fü cinga ewü ayia ari tete, angü wüh ngbü eyi fa sü. Fü ah ayia afü te-ye, amala ngü fü *Filipo, gü ba dene, "Filipo deyí, ye ceka la mere bi wü kpara ne. Ani ena amaka mere bi zü-e, teka ato fü wü kpara ne, neh kaye?" ⁶ Ah mala ngü la fü Filipo bala, teka are fingangü kaka di, angü Yesu wu ngü kaye, de te engu ena amere ne, kpo. ⁷ Fü Filipo alügü ngü, gü ba, "Ni wu de. Wü kpara ne sibi fa sü. Te mü mere tima teka re biringbö, fü mü aza jiasé la, anü ase ambata di la, ah tí de wü kpara la nda kphah de."*

⁸ Fü Anderiya, enga ni ye Petero,† ayia amala ngü fü Yesu, ⁹ gü ba dene, "Gara mbarase ladü sene, de ambata esaka ye ngbee 'buruve, bete si 'basu. Mba enga e cükü'daye de bala, ta de e te ena atí fü mere bi wü kpara de bala?" Yesu gü ba, "Wü koro di ekoro."

¹⁰ Züka fu-gü ta ladü gbü sü la, fula fula bala. Fü Yesu amala ngü fü wü kpara ka-ye, gü ba, "Wü mala fü wü kpara la, de wüh ngbü kötö füh fu-gü la." Fü wü kpara la ayia angbü kötö. Wüh baka wü kpara kutu 'buruve (5,000). ¹¹ Fü Yesu aza ambata la, adu agbo nga iri Me tekaka. Fü ah ayia ato esaka wü kpara ka-ye la. Fü ewü akpo da egafa fü mere bi wü kpara la. Fü ambata la atí te nga wü kpara la 'buru kpiní. Fü Yesu aza wü si 'basu la, ato fü

ewü kphah bala. Fü wü kpara la azü e la, asika di.

¹² Te wüh zü e la, sika di, fü Yesu amala ngü fü wü kpara ka-ye, gü ba, "Wü nü, wü ro du e la, angü ah ena asiti." ¹³ Fü ewü aro du e la, abiti gbü wü kuwu, asi ba e nzükpa de füh ye 'basu. Dela ta bü mba ambata 'buruve bete si 'basu, te wü kpara la zü, ce dudu ne.

¹⁴ Te wü kpara la wu mere kpeke ngü ka talara te Yesu mere la, fü ewü ayia afí, gü ba, "Komoko la, ah zu de *mürü dofo, ta te wüh ba ngü kaka gbü *Ngari Me gügü, gü ba, 'Me ena atima engu füh kotó ne.'"¹⁵ Fü ewü angbü efi ngü la, gü ba dene, "Te komoko la ena adi ta miri gbü nzó ani la, ah ena areke afa sü." Gara ewü gü ba, "Te ah bala la, ah le de ani reke te-ani, agü gü, teka aliki wü *Rüma, te ewü ngbü gbü nzó ani ne. Fü ani aza Yesu, ao miri ka-ani tete." Te Yesu wu ngü la bala, ngü la tí gbü jijia na nda de. Fü ah ayia ka-ye bü zirri, adürü esüka ewü, anü alí angbü ka-ye kpa füh mere rüvü kpi kpi ye.

Dene ngü ka Yesu te engu nü nü di füh ngu

Matayo 14:24-33; Marako 6:47-52

¹⁶⁻¹⁷ Etamurago, o Yesu di la fi kpa füh rüvü kpala, fü wü kpara kaka-na ayia adu kpa esa gö, era ngu, alí gbü *zabu ka-wü, edu agbü Kaparanama, baka te Yesu mala fü ewü. Fü biti ayia amaka ewü, fi da enü nü. ¹⁸ Fü mere wege akoro, angbü efe ngu. Fü ngu angbü ekada de ewü. ¹⁹ Fü ewü anü de zabu, akoro kpa etü ngu, nengete.‡ Wüh te efü jia wü bane de, gbo! te kpara te ngbü enü kpaka ewü, de lö ye füh ngu. Fü ngü la angbü gbü jia ewü ba sirimbi. Fü cürü ayia ari te-wü. ²⁰ Te kpara la koro gbamari, fü ewü awu, gü ba, ah de Yesu. Fü Yesu amala ngü fü ewü, gü ba, "Yi kpe cürü de, ah ka-ye de-ra." ²¹ Fü maguma ewü ayia agu. Fü Yesu ayia alí kpaka ewü agbü zabu. Wüh te enü mba 'dongoni bane de, wüh koro eyi edere ngolo, gbü sü te ewü le akoro tete na ne.

Dene ngü ta te Yesu mala,

teka mene e te ena akiwa wü kpara

²² Te kpi seke, wü kpara te Yesu to zü-e fü ewü ne, wüh ka-wü fi bü ladü gbü sü la. Fü ewü akpo da egiri Yesu. Angü baka esikine la, *zabu ka-ye ta sela ngbee biringbö. Baka te wü *kpara ka Yesu li nü sü ne, Yesu nü de ewü nda de. Wüh wu eyi, gara kaje te Yesu ena adu akö ngu tete na kphah ma. Fü ewü afí, gü ba, te

* 6:7 6:7 Jiasé la ta denariya 200. Angü ta gbü wü re la, te mü mere tima teka sikipi biringbö, wüh ena ato denariya biri fü mü. † 6:8 6:8 Anderiya kphah de gara kpara esüka wü kpara ka Yesu nzükpa de füh ye 'basu ne. ‡ 6:19 6:19 Wüh nü baka miles bata, anga kilometere 'buruve, fü ewü akoro etü ngu la.

ah bala la, Yesu ka-ye fi la bü ladü sela. ²³⁻²⁴ Fü ewü akpo da egiri engu ma. Fü ewü afü jia wü, awu bi wü gara zabu te yia kpa etangu agbü Tiberiya, da ekoro sela. Fü ewü ayia ali gbügbü, anü agbü Kaparanama, teka agiri Yesu kpala.

²⁵ Fü ewü anü akoro kpa etangu agbü Kaparanama. Fü ewü anü amaka Yesu kpa *esambü ka biti-te. Fü ewü ayi-tata na, gü ba, "Mere kpara, ani giri ye kpa etangu kpane ma, angü ye koro kpakine neh elaye?" ²⁶ Yesu gü ba, "Yi ngbü egiri ra, neh teka ne? Yi ngbü egiri ra ne bü teka ambata, te ma to fü ye esikine, te yi sika di ne? Yi le kpah de ma to gara fü ani? Fingangü ka-yi fi bü teka e-mazü? Ah le de yi fi nga kpeke ngü te ma ngbü emere ne, teka fü yi awu sisi na mbi mbi mbi. ²⁷ E-mazü ena aküwa yi fi mere badi? A'a. Ah ti aküwa yi fi mere badi nda de. Gara züka e-mazü ladü esaka ra sene, te ena aküwa yi fi mere badi. Ah le de yi o fingangü ka-yi eküte ra, angü ma ti eyi aküwa yi me-ra. Wüba tima ra teka ngü la."

²⁸ Wüh gü ba, "Mere kpara, ani ena amere neh baye, fü ngü ka-ani areke gbü jia Me?" ²⁹ Yesu gü ba, "Züka ngü te Me ngbü ele, ah le de yi to maguma yi fere, angü Me tima ra me-ye." ³⁰ Wüh gü ba, "Te ah bala la, de ye gü la tamu wazi ye fü ani. Te ye ngbü eto zü-e fü ani gbü wü sikpi 'buru la, ani ena awu, gü ba, Me tima ye me-ye fanü. Te di bala, ani ena alala gbü nga ye. ³¹ Angü Me tima ta *Müse fü wü kundu ani, te ewü ngbü ejiji agbü gü ne. Fü Müse angbü eto e-mazü fü ewü, te ngbü ekoro agbü kpi ne, te nga wü sikpi 'buru, ba e te wüh ba ta gbü *Ngari Me. ³² Fü ewü angbü ezü e la te nga mere bi wü re, baka wü re teke 'basu. Ye ti eyi amere kpah bala? Angü nda-ye, ye to zü-e fü ani bü ngbee du biringbö."

³² Yesu gü ba, "Ngü te ma emala fü yi ne, ah de zu ngü. E-mazü ta te Wüba to fü wü kundu nih esaka Müse ne, ah to teka areke bü küte ewü kükürü. Gara züka e-mazü ladü, te Wüba ngbü ele ato fü yi enatikine. ³³ Angü e-mazü la koro agbü kpi, teka aküwa wü kpara füh kotö ne fi mere badi." ³⁴ Wüh gü ba, "Wayi, mere kpara, ah le de ye di eto zü-e la fü ani, gbü wü sikpi 'buru, fü ani adi ezü." ³⁵ Yesu gü ba, "E-mazü te ena aküwa wü kpara fi badi ne, ah ka-ye de-ra. Mene kpara te ena ato maguma ye fere, tala ti amere engu tine de. Gümü ngu ti amere engu tine kpah de. ³⁶ Ma mala ta ngü la fü yi eyi gügü, gü ba, yi wu ra eyi cu de jia yi,

amba yi le ato maguma yi fere nda-yi de. ³⁷ Kükürü de, angü Me ngbü eto wü kpara ka-ra fere me-ye. Mene wü kpara te Wüba ngbü efe, teka fü ewü ato maguma wü fere ne, ma ena angbü eza ewü de tadu. Ma ti aliki ewü de. ³⁸ Angü dela si-ngü te ma yia tete agbü kpi, koro füh kotö sene, teka amere ne. Angü Wüba tima ra me-ye. Ma koro teka amere ngü ka-ra de. ³⁹ Dene ngü te Me ngbü ele de ma mere füh kotö ne. Ah le de ma di eceka kpi sidi nga wü kpara, te engu to esaka ra ne, angü süka ewü ena adürü. Ah ngbü ele kpah de ma zükü ewü gbü kpi, te gara, gbü *adu sikpi. ⁴⁰ Angü Wüba Me ngbü ele de wü kpara ka-ra, te ewü ngbü eo jia wü eküte ra, da eto maguma wü fere ne, küwa aküwa fi mere badi, angü ma ena azükü ewü gbü kpi, gbü adu sikpi."

⁴¹ Te wü kpara la je ngü te Yesu mala, gü ba, ni de e-mazü te koro agbü kpi ne, fü ewü angbü emala ngü gbü ngingiri ngü, ⁴² gü ba, "Komoko la mala töndö ngü de bala, neh baye baye? Engu gü ba, ni de neh da? Engu de Yesu, ye *Yüsefa ne, de? Te ani wu wö ye na ake ni ye na, kpah bü kpo ne. Fü engu agü ba, 'Ni koro agbü kpi?'"

⁴³ Yesu gü ba, "Yi ce la ngü ka yiki ka-yi la ace, de yi da güje yi te ngü te ma emala ne. ⁴⁴ Te Wüba gü tamu ngü ka-ra emagama kpara nda de la, ngü la ena adi gbü jijia ba töndö ngü fanü. Angü kpara ti afü te-ye, akoro kpara ka-ra de tete-ye, nda de. Ah le de Wüba o ngü la emamagama me-ye, fü engu akoro kpara ka-ra. Fü ra adu azükü engu te gara, gbü adu sikpi. ⁴⁵ Angü wü *mürü dofo ba ta ngü la eyi gbü *Ngari Me, gü ba, 'Me ena angbü eri wü kpara ka-ye 'buru me-ye.' Te mü ngbü eje si-ngü, de te Wüba ngbü eri mü di ne, mü ena ato maguma mü fere fanü. ⁴⁶ Kpara biringbö füh kotö ne, te wu Me de jia ye, ladü? A'a, ah nda ma. 'Duwa de-ra, ma wu engu me-ra, angü ma koro kpakaka na me-ra.

⁴⁷ Ngü te ma ngbü emala fü yi ne, ah de zu ngü. Te mü to maguma mü eyi fere la, mü küwa eyi fi badi. ⁴⁸ Angü ma de e-mazü te ma ngbü eküwa wü kpara me-ra. ⁴⁹ Wü kundu nih, ta te Me to e-mazü fü ewü esaka Müse ne, wüh dene fi ladü? Wüh kpi nza ka-wü eyi 'buru. ⁵⁰ Amba mene e-mazü te koro agbü kpi ne, ah de e-mazü te ena aküwa kpara fanü fanü. Te kpara zü e-mazü engu la, ah ti akpi de. ⁵¹ Ah ena aküwa fi mere badi. E-mazü engu te koro agbü kpi ne, ah de-ra. Ah de küte ra, te ma ena ato teka aküwa wü kpara füh kotö ne."

⁵² Fū wū kpara la akpo da ega yīkī esūka wū, gū ba, “Angū komoko ne ena ato kūte ye fū ani azū, neh baye baye?” ⁵³ Yesu gū ba, “Ngū te ma ngbū emala fū yi ne, ah de zu ngū. Ah le fū yi azū kūte ra, da enzō *ngūte ra, fū yi akūwa. Angū te yi mere bala de, yi kūwa kphah de. ⁵⁴ Mene kpara te ngbū ezū kūte ra, da enzō ngūte ra, ah kūwa eyi fi mere badi. Kpah bala, ma ena akūwa engu gbū kpi, gbū *adu sīkpī te ena akoro. ⁵⁵ Kūte ra de zūka e-mazū te ena ato *kūkūwa fi mere badi. Kpah bala, ngūte ra kphah de zūka e. Te mü nzō la, ah ena ato tadu emagama mü, te tī anza de. ⁵⁶ Te mü ngbū ezū kūte ra, da enzō ngūte ra la, nih ena angbū tundu ake nih ma ba wū vūngūte. Fū nih angbū gbū mürü fi mere badi. ⁵⁷ Wūba te tima ra ne, ah de kpeke mürü wazi. Ma maka wazi la kphah eyi esakaka. Kpah bala, mene kpara te ena azū kūte ra, ah ena amaka kphah wazi la esaka ra, fū ah akūwa fi mere badi.

⁵⁸ Dela ngū te ma mala fū yi, teka e-mazū te koro agbū kpi ne. Ah baka nda wū kundu nih, ta te ewū zū de kpala ne, nda de. Angū wūh kpi ka-wū nza eyi 'buru. Mene kpara te ena azū e-mazū ne, ah ena akūwa fi mere badi!”

⁵⁹ Dela ngū ta te Yesu mala, da erī wū kpara kpa *esambū ka bitī-te, agbū Kapanama.

Dene ngū te wū kpara ka Yesu fi, teka ngū te engu mala la

⁶⁰ Te wūh je ngū te Yesu mala de bala, fū gara wū kpara esūka wū *kpara kaka la, ayia amala ngū, gū ba, “Mene ngū dela kpekpeke. Ani le aje mene ngū de bala nda-ani de.” ⁶¹ Te Yesu wū fingangū kawewū bala, fū ah amala ngū fū ewū, gū ba, “Ngū ka-ra siti gbū jia yi bū gūgū bala? Yi le eyi ace ra titīne? Te ah bala, ah mbi, yi nū enū. Gara ngū te ma ena amala fū yi nda ma, angū nzō yi kpekpeke. ⁶² Amba te yi ena awu ra, te ma ena ayia ago agbū kpi la, ngū la tī arī gbū nzō yi nda kphah de? ⁶³ Yi kpe cūrū teka ngū te ma mala fū yi teka kūte ra ne? Ah le de yi je si-ngū la mbi mbi mbi. Angū, te yi ena aje ta si-ngū la eyi la, ngū la ena akūwa yi fi mere badi. Yi ce ngū ka cūrū asidi, angū yi ena akpi. ⁶⁴ Ah le de yi to maguma yi fere, angū ma wu kpo, gū ba, wū gara yi ladū te ewū to maguma wū fere la de.”

Yesu mala bala kükürü de, angū ah wu ngū te di emagama wū kpara la 'buru kpo. Ah wu mene ewū, te ewū to maguma wū fū ye de ne kpo. Ah wu mene kpara te ena agū tamu nī, fū wū vūgū ne, kphah kpo. ⁶⁵ Fū ah adu kphah amala gara ngū

fū wū kpara ka-ye, gū ba, “Dela si-ngū te ma mala fū yi, gū ba, ‘Kpara tī afū te-ye, akoro kpara ka-ra de tete-ye, nda de. Ah le de Wūba o ngū la emamagama me-ye, fū engu akoro kpara ka-ra.’”

⁶⁶ Te wū kpara la je ngū te Yesu mala la, fū wū kpara ayia abaya, ace engu. Wūh du ndoro gbū nganga na nda-wū tīne de. Wūh ce bū duu wū *mürü tima kaka, nzūkpa de fūh ye 'basu ne. ⁶⁷ Fū Yesu adu amala ngū fū wū kpara ka-ye, nzūkpa de fūh-ye 'basu la, gū ba, “Yi le kphah eyi ace ra, anū gbū nga wū kpara la?” ⁶⁸⁻⁶⁹ Fū Simūna Petero adu alūgū ngū fefe, gū ba, “Mere kpara, a wu eyi, gū ba, mü zu de Ye Me, te koro agbū kpi. A ngbū da eje zūka ngū ka Me gōmō mü, de te mü ngbū emala fū a ne. Tekā ngū ka-mū la, a ena akūwa fi mere badi. Gara kpara, te ena arī a baka mü, ladū? Angū a ena ayia, anū nda-a ne, gbū nga da?” ⁷⁰⁻⁷¹ Yesu gū ba, “Ngū te mü mala la, ah de zūka ngū.” Fū ah adu afū te-ye, afi nga *Yuda Keriyota,* te ena ato ye fū kpi ne, gū ba, “Akoo! Ma fe yi ta nzūkpa de fūh ye 'basu, ba wū zūka kpara ka-ra. Amba gara kpara esūka yi du fū te-ye eyi vūgū ka-ra tete?”

7

Dene ngū ka nūnū ka Yesu agbū Yerūsalema,

teka Karama ka Gugu

¹ Sidi nga wū ngū la, fū wū Yesu angbū ka-wū fi agbū *Galilaya, angbū endoro kpala. Yesu le anū andoro agbū *Yudaya de. Angū wū *kovo ka wū Yisarayeale kpala ngbū egiri engu, teka amōrō. ² Gara karama ka wū *Yisarayeale ta ladū, te wūh ngbū ei, gū ba, *Karama ka Gugu. Te sīkpī ka karama la koro tete gbamari, ³ fū wū di engā ni ye Yesu ayia amala ngū fefe, gū ba, “Ah le de nih nū agbū Yerūsalema teka karama la, teka fū gara wū kpara ka-mū de kpala awu wū mere kpeke ngū ka-mū, te mü ngbū emere ne. ⁴ Angū, te mü le de bi wū kpara fa nga ni la, de mü mere e adi emere wū ngū la gbū zi de. Mü di emere wū ngū la gbū jia wū kpara 'buru ngbaangba, teka fū ewū adi efa nga mü.” ⁵ Angū gbū wū ngū la 'buru, wū di engā ni ye Yesu to maguma wū fefe nda-wū de.

⁶ Fū Yesu alūgū ngū fū ewū, gū ba, “Ma tī anū nda-ra la de, angū sīkpī ka-ra koro la de. Nda-yi, yi tī eyi amere ngū ka-yi gbū wū sīkpī 'buru. ⁷ Angū wū kpara ka kotō ne kpū yi nda-wū de. Amba nda-ra, wūh ngbū ekpū ra, teka te ma ngbū erī ewū teka *siti ngū ka-ewū, de wūh ce asidi ne. ⁸ Te

* 6:70-71 6:70-71 İri wō ye Yuda Keriyota, ta de Simūna.

di bala, yi nü ka-yi enü agbü karama la. Ma ti anü nda-ra la de, angü sîkpî ka-ra koro la de.”

⁹ Te Yesu mala ngü la fü wü di enga ni ye nza tete, fü ewü ayia ka-wü, anü agbü Yerüsalema, teka karama la, ace Yesu ciki gbü Galilaya sela. ¹⁰ Te wü di enga ni ye Yesu nü sü tete agbü karama la, fü wü Yesu ayia de wü kpara ka-ye, anü afa nga ewü sidi, gbü zi.

Dene kpah gara yîki te wü kovo ka wü Yisarayeale ga

de wü Yesu, teka sîkpî ka Me

¹¹ Gbü sü ka karama la, wü *kovo ka wü Yisarayeale ngbü ta egîri Yesu, teka azoro. Wüh gü ba, “Komoko la wo te-ye neh kaye?” ¹² Fü mere bi wü kpara angbü emala ngü esüka wü teka Yesu. Gara ewü gü ba, “Yesu ka-ye de züka kpara.” Gara ewü gü ba, “Komoko la ngbü dene efiti wü kpara de?” ¹³ Wüh ngbü emala ngü la gbü ngingiri ngü, angü wüh le amala ngü teka Yesu mbölö mbölö nda-wü de. Wüh ngbü ekpe cürü wü kovo, angü wü kovo la le ngü ka Yesu nda-wü kü de.

¹⁴ Te wüh mere karama la, koro di etüngba, fü Yesu ayia anü akoro agbü Yerüsalema. Fü ah anü akoro etambasü ka *Mere Kambü ka Me, akpo da erî wü kpara kpala. ¹⁵ Te wü kovo je ngü te Yesu ngbü erî wü kpara di, fü ngü la aga gbü jia ewü. Fü ewü angbü eyi-ta ngü la esüka wü, gü ba, “Ata! Komoko la gü ba, ni ngbü dela kpah erî wü kpara? Engu gü ba, ni de neh da? Ah wu ngü la neh kaye? Te engu gîri ngü fa sü kphah de ne.”

¹⁶ Te Yesu wu fingängü ka wü kovo la bala, fü ah amala ngü fü ewü, gü ba, “Ngü te ma ngbü emala ne, yi fi nda-yi, gü ba, ma ngbü emala ngü, teka agbo nga irî ra di? Ah bala de. Angü ah de ngü ka-ra nda de, ah ka-ye de ngü ka Wüba Me, te engu tima ra di, de ma koro, ma ri wü kpara di. ¹⁷ Te mü to te-mü teka amere tima ka Me la, mü ena awu si-ngü ka-ra mbi mbi, gü ba, ngü la, ah de zu ri Me fanü. ¹⁸ Yi ngbü efi nda-yi, gü ba, ma ngbü ecu ngü ra gbü wü ngü, de te ma ngbü erî wü kpara di ne? Te ma ena angbü ta emala ngü la de tete-ra la, de bane ma ena acu ngü ra fanü. Amba ah ka-ye de zu ngü ka Me, te engu tima ra di me-ye. Fü ra angbü erî wü kpara di, teka de wüh gbo nga iiri na. Te di bala, ah le de yi wu si-ngü te ma ngbü emala ne, angü ah de zu ngü ka Me fanü fanü. ¹⁹ Yi gü ba, “*Müse ta de mere kpara ka-ani.’ Müse to ta *Riri ka Me fü yi de? Titine yi le amere riri kaka mbi

mbi de. Amba yi le amöro ra kükürü, neh teka ne?”

²⁰ Wü kovo la gü ba, “Mü röfö aröfö? Kpara te le amöro mü neh da?” ²¹ Yesu gü ba, “Yi di ngbü ekpü ra bala, neh teka ne? Yi ngbü ekpü ra ne, teka ngü te ma mere terane, te ma küwa kpara gbü *sîkpî ka Me ne? Ma wu kpo, gü ba, ngü la ke te yi eyi fa sü, angü yi gü ba, ma ce gele ka-ani eyi. ²² Yi efi nda-yi, gü ba, gele ka sîkpî ka Me fa wü gara gele ‘buru? Anga gele ka *basa, te yi ngbü emere gbü sîkpî ka Me ne?” Te sîkpî ka jaji komoko ti gbü sîkpî ka Me la, yi ti awa engu de? ²³ Te yi ngbü ereke ngü ka wü jaji ka-yi gbü sîkpî ka Me la, ah mere baye, te yi ngbü esiti irî ra, teka te ma küwa komoko la gbü sîkpî ka Me ne? ²⁴ Yi ce da ekolo ngü, de te yi wu mbi mbi de ne asidi. Ah le de yi gîri si-ngü la feke, fü yi adu akolo ngü la mbi mbi mbi.”

Dela ngü ta te Yesu mala etambasü ka *Mere Kambü ka Me, agbü Yerüsalema. Gbü ngü la, wüh zoro engu nda-wü de.

Dene ngü te wü kpara ka Yerüsalema ngbü efi teka Yesu

²⁵ Fütanga ngü la, fü wü kpara ka Yerüsalema akpo da emala ngü esüka wü teka Yesu. Gara ewü, gü ba dene, “Ngü la neh baye? Wüh ngbü tine egîri komoko la, teka amöro de? ²⁶ Yi ceka la! Amba ah mere baye, te engu ngbü emala ngü gbü jia wü kpara bü ngbaangba, te wüh le azoro engu de ne?” Gara ewü gü ba, “Yi efi nda-yi, gü ba, wü *kovo ka-ani ne, wu eyi fanü fanü, gü ba, komoko la de *Kurisito, te Me tima aküwa nih ne?” ²⁷ Gara ewü gü ba, “Bala de. Ani wu sü te komoko la koro tete kpo. Amba, teka Kurisito te Me ena atima, wüh ti awu sü te engu ena akoro tete na, nda-wü de!”

²⁸ Yesu, mü ngbü ka-mü fi da erî wü kpara, kpa etambasü *Mere Kambü ka Me. Baka te mü je ngü ka wü kpara la, fü mü adu amala ngü de mere ri mü, gü ba, “Yi wu ra kpo? Mene sü te ma koro tete ne, yi wu kpo? Yi wu nda-yi de, angü ma koro sene de tete-ra nda-ra de. Wüba, te di zu Me ne, tima ra ka-ye me-ye. Yi wu engu nda-yi de. ²⁹ Ma wu engu ka-ra mera, teka te ma koro kpakaka na, angü ah tima ra me-ye.”

³⁰ Te wü kovo la je ngü te Yesu mala de bala, fü ngü la ake te ewü afa sü. Fü ewü akpo angbü egîri kaje, teka de ani zoro engu. Amba wüh gîri kaje nda-wü ma. Angü Me tiri kaje fü ewü me-ye, angü sîkpî ka kpi ka Yesu ti nda la de.

* 7:22 7:22 Kpara te kpo de gele ka basa, ah ka-ye de Abarayama, angü Me sere ngü la fefe me-ye. Fü Müse adu aba ngü la gbü *Ngari Me. Mü ena amaka ngü la gbü Gina Ngü 17:1-27.

³¹ Gbü ngü te Yesu ngbü eri wü kpara di la, fü mere bi ewü adu ale ngü kaka. Fü ewü angbü emala ngü esüka wü, gü ba, "Wazi komoko la fa sü! Ceka la wü kpeke ngü, de te engu ngbü emere la! Gara kpara te ti amere mere kpeke ngü bala, ah ngbü rü ladü? Ah nda ma! Te di bala, engu ka-ye zu de Kurisito te ena aküwa nih ne!"

³² Te wü *Farusi je, gü ba, mere bi wü kpara ngbü eyi 'buru ele ngü ka Yesu ne, fü ngü la ake te ewü afa sü. Fü ewü anü amala ngü la fü wü *mürü gele. Fü wü mürü gele la ayia atima wü marajümiya ka-wü, de wüh nü, wüh zoro Yesu. ³³ Te Yesu wu bala, fü ah amala ngü fü ewü, gü ba, "Yi efi nda-yi, gü ba, ani ena azoro ra enatikine? A'a. Yi ti azoro ra la de, angü du sikipi ka-ra la ladü. Ma ena adi la ladü esüka yi sene, teka du sikipi mba cükü'daye, fü ra alügü nga ra, adu kpaka kpara te tima ra ne. ³⁴ Yi ena agiri ra ma. Yi ti amaka ra de, angü sü te ma ena ayia anü tete ne, yi ti awu de."

³⁵⁻³⁶ Fü wü gara kovo ka wü Yisaraye akpo da emala ngü esüka wü, gü ba, "Komoko ne gü neh fe? Ah gü ba, 'Ni ena anü agbü gara sü, te ani ti awu de?' Ah ena anü neh kaye? Ah ena anü kpaka wü gara wü di enga ni ani, te ewü ngbü kpa gbü sü ka wü *Giriki ne? Ah ena anü ari wü *ganzi kpara kpala? Si-ngü la neh baye?" Tekka ngü la, wü marajümiya la ti azoro engu la de, ka cürü.

Dene kpah gara yiki te wü Yisarayele ga esüka wü,

teka ngü ka Yesu

³⁷ Gbü adu sikipi ka mere *karama la, fü Yesu ayia esüka wü kpara la, arü amala ngü fü ewü de mere ri ye, gü ba, "Te gümü ngu ngbü emere mü la, de mü koro egoro kpaka ra, fü ra ato ngu fü mü, anzö. ³⁸ Angü te mü to maguma mü eyi fere la, ngü la ena atü kpini de ngü, ta te wü *mürü dofo ba gbü *Ngari Me, gü ba, "Nzila Wazi Me ena angbü emaguma mü ba ngu, te ngbü ego. Fü mü angbü de tadu teka ngü la, fi mere badi.' " ³⁹ Ngü ta te Yesu mala la, ah mala ngü la teka Nzila Wazi Me, te Me ena atima fü wü *kpara ka Yesu. Angü ta gbü sikipi la, Me tima Nzila Wazi ye fü wü kpara ka Yesu nda la de. Ah du tima tine sidi nga Yesu, te go agbü kpi ne.

⁴⁰ Te wü kpara je ngü te Yesu mala la, gara ewü gü ba, "Fanü, komoko la ka-ye de mürü dofo ka Me!" ⁴¹ Gara ewü gü ba, "Ah de *Kurisito, te Me tima aküwa ani ne." Gara ewü gü ba, "Ape! Kurisito ena akoro agbü *Galilaya fanü? Te ah bala la, engu de Kurisito ne, nda de. ⁴² Angü wüh

ba ta gbü Ngari Me, gü ba dene, 'E-küwan-nih la ena akoro gbü nguwa Miri *Davidi. Wüh ena abi engu gbü tö ka *Yudaya, agbü Beteleme, te di ta köti ka Davidi ne.' "† ⁴³ Dela ta yiki te wü kpara la ngbü ega esüka wü, teka ngü ka Yesu. Gara ewü le ngü kaka eyi. Gara ewü le ngü kaka nda-wü de. ⁴⁴ Nda wü kovo la, wüh ngbü fi bü da egiri kaje de ani zoro engu. Amba, gbü ngü la, gara kpara te mofu engu nda ma.

⁴⁵ Fütanga ngü la, fü wü marajümiya la ayia adu kpaka wü *kovo ka-wü la, de kpa wü kükürü. Fü wü kovo la ayi-ta wü marajümiya la, gü ba, "Ah mere baye? Wüh tima wü teka azoro Yesu de? Engu neh kaye? Wü du koro de kpa wü kükürü, neh teka ne?" ⁴⁶ Wü marajümiya la gü ba, "Ata! Kpara baka komoko la kü ladü? Kpara te ena amala ngü bakaka, neh da?"

⁴⁷ Wü *Farusi gü ba, "Ah fiti wü neh baye baye? Wü ce ani de töndö ngü ka-wü la! ⁴⁸ Esüka ani, wü cögbörö kpara, kpara biringbö te le ngü kaka, neh da? ⁴⁹ Amba de-wü, wü kpah baka wü kükürü kpara, te wüh le gele ka-ani mbi mbi de ne? Te ah bala la, wü le acuru de ewü 'buru agbü wa?"

⁵⁰ Nikodemü, ta kpah ladü esüka wü bu ye, kovo la. Engu ta de gara *Farusi, te koro kpaka Yesu gbü biti, teka aje ngü gögömö na ne. Fü Nikodemü ayia amala ngü fü wü bu ye la, gü ba, ⁵¹ "Ah mere baye, te ngü ka Yesu ke te yi de bala? Yi gu la maguma yi cükü'daye. Ah le fü nih ai komoko la engagira nih feke, teka aje ngü gögömö na, teka fü nih awu ngü kaka mbi mbi mbi. Angü dela ngü te di gbü riri ka-nih. Nih ti ato kuru te kpara kükürü kükürü bala de. Ah le agiri si-ngü kaka feke." ⁵² Wü bu ye Nikodemü la gü ba, "Nikodemü deyi, ye fü te-ye kpah eyi kpara ka Galilaya? Ye wu ngü te di gbü *Ngari Me nda-ye de? Wüh ena abi mere *mürü dofo ka Me engu ne gbü Galilaya?" ⁵³ Sidi nga ngü la, fü ewü adu abaya, ago agba wü.

8

¹ Etamurago la, fü wü Yesu ayia etam-basü *Mere Kambü ka Me, adu anü ara ka-wü agbü gugu, kpa füh da de iri ye Olive ne.

Dene ngü te Yesu mala

teka wü rüse te mere siti ngü

² Gügü kpurutokokpi, fü Yesu adu akoro etambasü *Mere Kambü ka Me. Fü mere bi wü kpara akoro angbü edede na. Fü engu areke te-ye, akpo da eri ewü. ³ Fü wü *Farusi de wü *mürü riri ayia aza gara

† 7:42 7:42 Mü ena amaka ngü la gbü 2 Samüwele 7:12bete Mika 5:2.

würüse, te ewü maka engu da emere waza ake gara komoko, akoro di engagira Yesu, esüka wü bi wü kpara te Yesu ngbü erī ewü la. ⁴ Fū wü Farusi la ayi-ta Yesu, gü ba dene, “Mere kpara, a le ayi-ta mü teka ngü ka würüse ne. Angü a maka engu bü titine dene, da emere waza ake gara komoko. ⁵ Gbü riri ta te *Müse to fū nih, ah gü ba, ‘Te kpara mere *siti ngü bala la, ah le de wüh sötö engu, mörö de teme.’ Teka ngü la, fū a aza engu, akoro di kpaka mü dene, teka ayi-ta mü gbü ngü la. Ah le de a mere baye? A mörö engu amörö?” ⁶ Wüh mala ngü la kükürü de, angü wüh ngbü egiri kaje, teka de ani zoro Yesu gbü ngü la. Amba Yesu wu ngü ka-ewü la nda-ye kpo. Ah le alügü ngü fū ewü nda de. Ah nga ka-ye tiii, da eba e ka-ye kötö de jikpa ye.

⁷ Fū ewü alala fi bü de ngü ka-wü la. Fū Yesu ae nzö ye tikpi, amala ngü fi ewü, gü ba, “Te kpara biringbö ladü esüka yi sene, te mere siti ngü füh kotö ne de la, de engu za teme fi me-ye, de ah esötö würüse la di.” ⁸ Fū Yesu adu kphah azuru ka-ye, eba e kötö. ⁹ Te wü kpara la je ngü te Yesu mala la, fū lümü ayia ari te ewü, fū ewü ayia abaya bü biri biri, ago agba wü. Ah kpo te cögbörö wü kovo la, akoro di te jürü ewü. Fū ewü ace bü wü Yesu ‘basu wü ‘basu ake würüse la sela.

¹⁰ Baka te wü kpara la baya tete ‘buru, fū Yesu ayia ae gbüra ye tikpi, ayi-ta würüse la, gü ba dene, “Wü kpara ne, neh kaye? Kpara biringbö o kpa ye te mü de?” ¹¹ Würüse gü ba, “Mere kpara, kpara biringbö te mere ra esiti nda ma.” Yesu gü ba, “Te ah bala, mü ti eyi anü kamü. Ma to kuru te mü kphah de. Amba mü mere e adu amere gara siti ngü tine de.”

Dela ngü ta te Yesu mere agbü Yerüsalema, te engu za ngü di esaka wü *kovo ka wü Yisaraye, te ewü ngbü egiri kaje, teka azoro engu.

Dene ngü te Yesu mala, gü ba, ni de rasü fū wü kpara

¹² Gbü gara sikipi, fū Yesu akpo da erī wü kpara, gü ba, “Ma de ra-sü, te ngbü elofo sü fū wü kpara füh kotö ne ‘buru. Te mü lala gbü nga ra, mü ena angbü gbü rasü, te ena aküwa mü fi mere badi, mü ti andoro gbü ngbami tine de.”

¹³ Fū wü *Farusi adu amala ngü fefe, gü ba, “De-ye deyī, ngü te ye mala la, ye ngbü ecu ngü ye de tete-ye. Te ah bala la, ani ti ale ngü ka-ye nda-ani de.” ¹⁴ Yesu gü ba, “Bala de. Mene ngü te ma ngbü emala teka ra ne, ah de zu ngü. Angü ma wu kpo, gü ba, ma koro agbü kpi. Ma wu kphah eyi,

gü ba, ma ena ago kphah agbü kpi. Amba nda-yi, yi ti awu ngü la nda-yi de. ¹⁵ Yi ngbü eo siti maguma yi eküte ra ne, teka te yi ngbü eo fingangü ka-yi fi bü gbü gele ka-yi ne? Amba nda-ra, maguma ra ti asiti eküte yi nda de. ¹⁶ Te ngü ka-yi siti gbü jia ra la, amba ngü ka-yi siti kphah eyi gbü jia Wüba. Angü ma fi ngü la de tete-ra nda de. ¹⁷ Te ri wü kpara ‘basu ti kpini gbü ngü biringbö la, yi ngbü efi nda-yi, gü ba, ‘Ah de wu?’ Ah de wu nda de! Dela ka-ye zu ngü fanü fanü! Angü wüh ba ta ngü bala gbü *Riri ka Müse. ¹⁸ Ma ngbü emala nga ra fū yi, gü ba, ‘Ma koro agbü kpi.’ Wüba ngbü emala nga ra fū yi kphah bala, angü ah tima ra me-ye. Ri a ti ake di gbü ngü la kpini. Te di bala, ah de wu nda de.”

¹⁹ Wüh gü ba, “Hoo! Wö ye, de te ye ngbü emala nganga na ne, engu neh kaye?” Yesu gü ba, “Yi ti eyi awu Wüba? Baka te yi le ngü ka-ra de ne, yo ti awu Wüba kphah de. Ta te yi ena ale ngü ka-ra ale la, de bane yi ti eyi awu Wüba.”

²⁰ Dela ta ngü te Yesu mala fū wü Farusi, o engu ngbü erī wü kpara etambasü *Mere Kambü ka Me.* Wüh le ta azoro engu, amba kpara biringbö, te o kpa ye tete, nda ma, angü sikipi kaka ti la de.

Dene ngü te Yesu mala fū wü kpara, te ewü le ngü ka-ye de

²¹ Fütanga ngü la, fū Yesu adu amala ngü fū wü mere kpara ka wü *Yisaraye la, gü ba dene, “Ma ena anü ka-ra te gara, agbü gara sü, fū yi agiri ra ma, yi ti amaka ra de. Te di bala, yi ena akpi anza gbü *siti ngü ka-yi, angü yi le ngü ka-ra nda-yi de.” ²² Fū wü *kovo la amala ngü esüka wü, gü ba, “Komoko la gü neh fe? Ah gü ba, ‘Sü te ni ena anü tete, kpara biringbö ti awu de.’ Ah ena anü neh kaye? Anga ah le amörö te-ye amörö?”

²³ Yesu gü ba, “Ma koro ka-ra agbü kpi. Nda-yi, yi de wü kpara ka kotö ne, angü yi ngbü eo fingangü ka-yi fi bü teka wü ngü ka kotö ne. ²⁴ Dela si-ngü te ma ngbü emala fū yi, gü ba, ‘Yi ena akpi gbü siti ngü ka-yi ne. Angü yi le ngü ka-ra de.’ Ngü te ma ngbü emala fū yi, gü ba, ‘Ma de kpara te Me tima ra fū yi’ ne, te yi le ngü la de la, yi ena akpi gbü siti ngü ka-yi la akpi.” ²⁵ Wüh gü ba, “Mü kü de neh da?” Yesu gü ba, “Yi ngbü eyi-ta ra bala, neh teka ne? Ma mala ta ngü la fū yi gügü de? ²⁶ Mere bi ngü ladü emaguma ra, te ma ngbü ele amala fū yi, teka siti ngü ka-yi. Ma mala ngü la kükürü de, angü ah de mene ngü te ma je gömö kpara te tima ra ne. Kpara engu ne, ah su wu nda de, ah ngbü emala ka-ye zu

* 8:20 8:20 Ngü la ngbü emere te-ye gbü sü, te wüh o kuwu, de te wüh ngbü eto takpa gbügbü.

ngü fanü fanü. Fü ra adu angbü emala ngü ka kpara, te tima ra ne, fü wü kpara 'buru." ²⁷ Amba wü kpara la wu, gü ba, Yesu ngbü emala ngü la teka Wö ye agbü kpi ne, nda-wü de.

²⁸ Fü Yesu amala ngü fü ewü, gü ba, "Ma wu eyi, gü ba, yi ngbü egiri kaje teka amörö ra. Ah mbi, sikipi ena akoro te yi ena ae ra, *Ye Kpara ka Kpi, tete tikpi eküte rü. Gbü ra la, jia yi ena aü, fü yi awu, gü ba, Me tima ra me-ye fanü. Fü yi adu kphah awu, gü ba, wü ngü 'buru te ma ngbü eri ani di ne, ah de wü ngü te Wüba gara tatamu fere kphah me-ye. Ma mere wü ngü la de tete-ra nda-ra de. ²⁹ Amba Wüba de te tima ra ne, ah ti ace ra de, ah ena angbü fi bü da eto wazi fere, angü ma ngbü emere fi bü züka ngü, de te engu ngbü ele."

³⁰ Te wü kpara la je ngü, de te Yesu ngbü emala fü ewü la, fü mere bi ewü ayia ato maguma wü fü Yesu.

Dene ngü ka yiki te Yesu ga de wü kovo ka wü Yisaraye,

teka Abarayama

³¹ Fütanga ngü la, fü Yesu adu amala ngü fü wü kpara, de te ewü le ngü ka-ye ne, gü ba dene, "Ah le de ye lala gbü ngü ka Me, te ma ngbü eri yi di ne, teka fü yi angbü züka wü kpara ka-ra fanü fanü. ³² Te yi lala gbü ngü ka Me la, yi ena adi eje sisi na mbi mbi mbi, fü yi aküwa gbü *siti ngü ka-yi 'buru. Yi ti adu angbü wü labi ka siti ngü tine de."

³³ Fü gara wü *kovo ayia akolo ngü gömö Yesu, gü ba, "Yesu deyi, ye gü neh fe? Ye ngbü efi nda-ye gü ba dene, ani de wü di enga labi? Te ani di zu de wü kundu ye *Abarayama ne. Te kpo gügü akoro dene, ani ngbü labi ka wü bu ani nda-ni de."

³⁴ Yesu gü ba, "Ngü de te ma ngbü emala fü yi ne, ah de zu ngü. Te yi ngbü emere siti ngü la, yi ena angbü labi ka siti ngü. ³⁵⁻³⁶ Te di bala, ah le fü ra aküwa yi gbü siti ngü ka-yi la, angü ma de Ye Me. Te ma küwa yi me-ra la, yi ti angbü labi tine de. Te mü de labi la, mü ti eyi angbü gba mere kpara ka-mü fi badi? Mü ti angbü bala de, angü, te mürü koti la le acinzi mü asidi la, ah ti eyi amere ngü la. Amba 'duwa kpara te di zu de ye mürü koti la, ah ti eyi angbü me-ye fi mere badi.

³⁷ Ma wu eyi, gü ba, yi de wü kundu ye Abarayama fanü. Amba ngü te ma ngbü emala fü yi ne, yi le nda-yi kü de. Fü yi angbü egiri kaje, teka de ani mörö ra. Dela züka ngü? ³⁸ Amba nda-ra, ngü de te ma ngbü emala ne, ma je gömö Wüba. Nda-yi kphah bala, angü siti ngü de te yi ngbü emere ne, yi je kphah gömö wö yi."

³⁹ Wüh gü ba, "Hoo! Yesu deyi, ye ngbü emala de bala ne töndö ngü ne? Te ani di ka-ani zu de wü di Abarayama ne!" Yesu gü ba, "Fanü fanü, yi de wü di Abarayama? Ta te yi ena adi wü di Abarayama la, de bane yi ena aje ri ra, kphah baka Abarayama, ta te ngbü eje ri Me ne. ⁴⁰ Amba yi le ngü ka-ra nda-yi de. Yi ngbü egiri kaje de ani mörö ra, teka ngari Me te ma ngbü eri yi di ne. Abarayama ngbü ta emere ngü bala? ⁴¹ Te yi le eyi amörö ra la, amba wö yi ka-ye kpi ye." Wüh gü ba, "Ani de ye waza nda-ani de! Ani ka-ani zu de wü di Me!"

⁴² Yesu gü ba, "Te yi ena adi ta zu de wü di Me fanü fanü la, de bane yi ena ale ra ba zu enga ni yi. Angü Me de Wüba, ah tima ra me-ye. Ma koro de tete-ra nda-ra de. ⁴³ Yi le ngü ka-ra de, angü yi le ka-yi fi bü siti ngü. Yi le züka ngü nda-yi de. ⁴⁴ Te di bala, yi ngbü efi gü ba, wö ani neh da? Wö yi ka-ye de *Satana! Angü yi maka ngü la eyi esakaka, fü yi angbü fi bü da emere ngü, baka te engu ngbü ele. Angü Satana ngbü ele fi bü adi efiti wü kpara, kphah da emörö ewü. Ah kpo de ngü ka-ye la eyi gügü, angü ah le ngü ka Me nda de. Ah ngbü fi bü da esutu wu, angü dela tima kaka.

⁴⁵ Nda-ra, ma su wu nda-ra de. Ma ngbü eri yi de zu ngü ka Me. Amba yi le ngü ka-ra la nda-yi de, angü yi ka-yi de wü di Satana. ⁴⁶ Baka te ma ngbü emala zu ngü ka Me fü yi fanü fanü ne, yi le ngü ka-ra de, neh teka ne? Ma mere siti ngü eyi gbü jia Me? Kpara biringbö esüka yi sela, te ena agü tamu siti ngü ka-ra neh da? ⁴⁷ Dela si-ngü te ma mala fü yi, gü ba, 'Yi de wü di Me nda-yi de ne.' Angü wü kpara ka Me ngbü engbü ka-wü fi bü da eje ngü ka Me. Yi le aje ri ra de, angü yi de wü kpara ka Me nda-yi de."

⁴⁸ Fü maguma wü kovo la ayia anzu teka ngü la. Fü ewü akpo da esokoh Yesu, gü ba, "Ye de *ganzi kpara! Ye kphah de muruyi!" ⁴⁹ Yesu gü ba, "Bala de! Yi guvu ra nda ma! Ma ngbü ecu ngü Wüba. Te yi ena adi ta wü kpara ka Me la, de bane yi ti asoko ra bala de. ⁵⁰ Ma giri da ra, teka adi ecu ngü ra, nda-ra de. Kpara te le, de yi di ecu ngü ra ne, ah ka-ye de Wüba. Te yi le ngü ka-ra de la, Wüba ena ato kuru te yi me-ye."

⁵¹ Fü Yesu adu amala gara ngü fü ewü, gü ba, "Ngü te ma ngbü emala fü yi ne, ah de zu ngü. Te kpara ngbü emere ngü ka-ra de maguma ye biringbö la, ah kpi nda de." ⁵² Wü kovo gü ba, "Titine ani wu eyi, gü ba, ye de muruyi fanü! Kpara ladü te ti akpi de? Amba mere kundu ani, *Abarayama, de wü *mürü dofo, ta te ewü kpi ne. Fü ye amala, gü ba, 'Mene kpara te ena aje ngü ka-ni ne, ah ti akpi

nda de?’ Ye röfö aröfö, te ye ngbü emala ngü de bala? Ye ngbü efi, gü ba, ni de neh da? ⁵³ Ye de mere kpara, te fa kundu ani, Abarayama ne? Ye ce töndö ngü ka-ye la asidi!”

⁵⁴ Yesu gü ba, “Yi ngbü efi nda-yi, gü ba, ma o te-ra ba mere kpara ne, de tete-ra? Angü, te ah ena adi ta bala, de bane ngü ka-ra ena adi de töndö ngü kükürü. Amba, kpara te o ra ba mere kpara ne, ah ka-ye de Wüba, te yi ngbü emala, gü ba, ‘Ah de Wö ani ne.’ ⁵⁵ Yi ngbü esu ka-yi dela wu! Angü yi wu engu nda-yi de. Nda-ra ma wu engu kpo. Fū ra angbü emere riri na. Te ma ena amala, gü ba, ma wu engu de la, de bane ma ena adi kphah de mürü wu, baka yi la.

⁵⁶ Abarayama ngbü ta eo jia ye teka awu ra. Te engu wu ra tete, fū ah angbü de mere tadu teka ngü ka-ra.” ⁵⁷ Wüh gü ba, “Apa! Te ye di la bü mbarase, te wüh bi ye tüne dene ne! Wü wu te-wü ake Abarayama neh elaye? Abarayama kpi ka-ye ta eyi gügü, o wüh bi wü kundu ani la de!” ⁵⁸ Yesu gü ba, “Ngü de te ma ngbü emala fū yi ne, ah de zu ngü fanü fanü. O wüh bi Abarayama la de, ma ka-ra ladü!”

⁵⁹ Te wüh je ngü la, fū maguma ewü ayia asiti. Fū ewü ayia aza teme, de ani sötö Yesu di. Fū Yesu ayia adürü ka-ye bü ziri bala, afü ka-ye gbu! kpa ekere sü, awo te-ye.

Dela ngü ta te Yesu ngbü eri wü kpara di, etambasü *Mere Kambü ka Me agbü Yerüsalem.

9

Dene ngü ka Yesu ake komoko te jijia na ni ani

¹ Gbü gara sikipi, fū Yesu angbü enü de wü kpara ka-ye. Fū ewü awu gara komoko te jijia na ni ani, angü wüh bi engu ta kü bala. ² Fū wü *kpara ka Yesu ayi-ta Yesu, gü ba, “Mere kpara, si-ngü de te jia komoko ne ni tete na, neh ene? Kpara te mere *siti ngü la neh da? Ah de wö ye na? Anga ah cu de engu?” ³ Yesu gü ba, “Bala de. Ngü la koro teka siti ngü kaka de. Wüh bi engu bala, teka fū ra asere wazi ka Me tete fū wü kpara. ⁴ Angü Me tima ra füh kotö ne, teka amere tima ka-ye. Te di bala, ah le de nih mere tima ka kpara te tima ra ne emere, o sü ti la de, angü kpara ti amere tima gbü biti nda de. Angü te nih kpi eyi la, nih ti amere tima ka Me tine de. ⁵ Baka te ma di la ladü füh kotö sene ne, ma de ra-sü fū wü kpara.”

⁶ Te Yesu mala ngü la bala, fū ah ayia asü ngüsü kötö, akü'da tö di. Fū ah ayia aza a'büra te jia komoko la. ⁷ Fū ah ayia

amala ngü fū komoko la, gü ba, “Ye nü enü, ye zürü gbüra ye, kpa esa biri, agbü Silowa.”* Fū komoko la ayia anü azürü gbüra ye kpa esa biri kpala. Fū jijia na aü te-ye ciki kpala, 'duwa raaa! Fū ah akpo da eceka kpi.

⁸ Te komoko la ngbü edu tete kpa eköti, fū wü bu ye na, de wü kpara te ewü wu engu kpo ne, fū ewü akpo angbü emala ngü esüka wü, gü ba, “Apa! De bane neh ene ngü ne, ü jia ni me-ye. Ah kü'da bü tö, te wü kpara te kaje ne de?” ⁹ Gara ewü gü ba, “Ah de engu fanü.” Gara ewü gü ba, “A'a, ah de engu nda de. Ah yia angbü ge bakaka.” Fū komoko la adu alügü ngü fū ewü, gü ba, “Ah de-ra fanü.” ¹⁰ Wüh gü ba, “Te ah bala la, jia ye ü te-ye neh baye baye?” ¹¹ Komoko la gü ba, “Kpara de iri ye Yesu ne, ü jia ni me-ye. Ah kü'da bü tö, 'büra te jia ni. Fū ah amala ngü fū ni, gü ba, 'Ni nü, ni zürü gbüra ni gbü Silowa.' Fū ni ayia anü azürü gbüra ni kpala. Fū jia ni ayia aü te-ye dene.” ¹² Wüh gü ba, “Kpara engu na ne, neh siye?” Ah gü ba, “Ni wu nda-ni de.”

Dene ngü ka komoko te Yesu ü jijia

engagira wü Farusi

¹³ Fütanga ngü la, fū ewü aza komoko, te Yesu ü jijia la, akoro di engagira wü *Farusi, de wüh yi-tata teka ngü ka gele ka-wü. ¹⁴ Kükürü de, angü Yesu ü jia komoko la ta gbü *sikipi ka Me. Angü wü Farusi le de wü kpara mere tima gbü sikipi ka Me nda-wü de. ¹⁵ Fū wü Farusi la ayia ayi-ta komoko la, gü ba, “Wüh ü jia ye, neh baye baye?” Komoko la gü ba, “Yesu kü'da bü tö, fū ah a'büra te jia ni. Fū ni anü azürü gbüra ni agbü ngu. Fū jia ni ayia aü te-ye dene.” Te komoko la mala ngü la bala, fū ngü la ake te ewü, angü wüh gü ba, “Te kpara kü'da tö bala gbü sikipi ka Me la, ah mere dela eyi tima.”

¹⁶ Fū gara wü Farusi amala ngü, gü ba, “Te ah bala la, Yesu de kpara ka Me nda de. Ah ka-ye de siti kpara, angü ah le aje riri ka-ani nda de, ah ce gele ka sikipi ka Me eyi asidi.” Gara ewü gü ba, “Siti kpara ti amere kpeke ngü ba e la nda de.” Fū ewü ayia angbü ega yiki esüka wü teka ngü la.

¹⁷ Fū ewü adu ayi-ta komoko la, gü ba, “Te ye gü ba, Yesu ü jia ni me-ye la, ye ngbü efi nda-ye teka ngü kaka, egü neh fe?” Komoko la gü ba, “Yesu de *mürü dofo ka Me.” ¹⁸ Wü *kovo ka wü Yisaraye le la le ngü la bala nda-wü de. Fū ewü akpo da emala ngü fū komoko la, gü ba, “Ye ngbü esu ka-ye wu! Jia ye ni nda de!”

* 9:7 9:7 Silowa ba e te wüh gü ba dene, kpara te wüh tima engu atima.

Fü ewü atima ngü, aï wü wö ye na, ¹⁹ ayi-ta ngü te ewü, gü ba, “Dene zu mbarase kawü? Wü bi engu ta kü bala, de jia ye ma? Te di bala, ah du ngbü eceka kpi titine, neh baye baye?” ²⁰ Fü wü wö ye na alügü ngü fü ewü, gü ba, “Ani wu kpo, ga, engu de mbarase ka-ani, te ani bi engu de jia ye ma. ²¹ Amba ani wu kpara te ü jijia na ne nda-ani de. Ah ena amala ka-ye me-ye de komö ye. Wü yi-tata na, angü ah koro eyi mere kpara.” ²² Wü wö ye na ngbü emala ngü la de cürü bala, angü wü kovo la mala ngü ta, gü ba, “Mene kpara te le ngü ka Yesu, wüh ena aliki engu *esambü ka biti-te ka-wü asidi.” ²³ Dela si-ngü te wüh mala ngü, gü ba, “Mbarase ka-ani la koro eyi mere kpara, ah ena amala ngü la cu me-ye de komö ye,” ne.

²⁴ Fü ewü adu kphah aï komoko la, gü ba, “Mü mala la zu ngü fanü fanü, gbü jia Me. Yesu ü jia mü me-ye fanü fanü? Angü a wu eyi, gü ba, Yesu ka-ye de siti kpara.” ²⁵ Komoko la gü ba, “Anga te engu di de siti kpara la, ma wu nda-ra de. Ma wu nda-ra bü, gü ba, jia ra ni ta ani. Fü Yesu ale tangü te ra. Titine fü ra akpo angbü eceka kpi dene. Gara ngü te ma ena amala nda ma.”

²⁶ Wüh gü ba, “Te ah bala la, Yesu ü jia ye, neh baye baye?” ²⁷ Komoko la gü ba, “Ni mala ngü la tine fü wü kphah eyi! Wü je ngü la fi de? Wü ngbü fi bü da eyi-ta ni de ngü la, teka ne? Wü le afü te-wü ale ngü kaka-na?”

²⁸ Te wüh je ngü la, fü maguma ewü ayia asiti. Fü ewü ayia asoko engu, gü ba, “Mü le ngü kaka ka-mü bü me-mü! A le ka-nda-a ngü ka *Müse! ²⁹ Angü a wu eyi, gü ba, Me mala ta ngü fü wü kundu a gömö Müse. Amba a wu sü, te Yesu maka wazi ka-ye tete na ne, nda-a de.” ³⁰ Komoko la gü ba, “Ape! Dela ne töndö ngü ne? Ah mere baye, te ye wu sü te Yesu maka wazi tete na de ne? Amba ma wu eyi, gü ba, engu ü jia ra ne me-ye, angü wüh bi ra ta de jia ra ma. ³¹⁻³³ Ta gügü, yi wu gara kpara eyi, te ngbü eü jia kpara baka e la? Te Yesu ena amaka wazi la esaka Me de la, ah ti eyi amere ngü bala? Me ti eyi ato wazi ba e la fü siti kpara? Ah bala te, me ngbü eto wazi fü wü kpara, te ewü ngbü ecu ngüngü na, da emere ngü kaka.” ³⁴ Wüh gü ba, “Ah mere baye, te mü le ari a, te a di de wü kovo ne? *Siti ngü ka-mü, te wüh bi mü di ne, fi ladü gbü nzö mü.” Fü wü kovo la ayia aliki komoko la kpa etanü.

³⁵ Te Yesu je, gü ba, wüh liki komoko la eyi ne, fü engu ayia akoro amaka komoko la, amala ngü fefe, gü ba, “De-ye deyï, ye to maguma ye eyi fü *Ye Kpara ka Kpi?” ³⁶ Komoko la gü ba, “Mere kpara, ni ena ato maguma ni neh fü da? Ye gü tamu

Ye Kpara ka Kpi engu la fü ni, angü ni wu engu nda-ni de.” ³⁷ Yesu gü ba, “Mü wu engu kpo! Angü ah de-ra, te ma ngbü emala ngü fü mü ne.” ³⁸ Te komoko la je ngü la bala, fü ah ayia 'duwa, atï kötö eri lö Yesu, da ecu ngüngü na, gü ba dene, “Miri ka-ra, ma to maguma ra eyi fü mü.”

³⁹ Fütanga ngü la, fü Yesu ayia amala ngü fü wü kpara ka-ye, gü ba, “Dela si-ngü te ma koro tete na füh kotö ne, teka eye süka ngü ka wü kpara. Te di bala, mene wü kpara te jia wü ni ani ne, wüh angbü eceka kpi. Amba mene wü kpara te ewü ngbü eceke nga wü, gü ba, ‘Jia ani mba amba’ ne, jia ewü ena adu avi.”

⁴⁰ Fü gara wü *Farusi ayia aje ngü la. Fü ewü ayi-ta Yesu, gü ba, “Ye ngbü efi, gü ba, jia ani ni kphah ani?” ⁴¹ Fü Yesu ayia alügü ngü fü ewü, gü ba, “Yi ngbü efi, gü ba, ‘Jia ani ngbüri ladü?’ Te di bala, yi wu ra de, neh teka ne? Te ye ena ale ta eyi, gü ba, ‘Jia ani ma’ la, de bane Me ena awu cinga yi, fü ah aboro siti ngü ka-yi la. Amba, baka te ye cere nga yi eyi, gü ba, ‘Jia ani ladü’ ne, Me ti aboro *siti ngü ka-yi nda kphah de.”

10

Dene mani te Yesu mala, teka wü kambiliki ka-ye

¹⁻² Fü Yesu adu kphah amala ngü fü wü *Farusi la, gü ba, “Gara kpeke ngü ladü, te ma le amala fü yi. Ah de ngü ka wü kambiliki. Mene kpara te di de kambiliki esaka ye, ah ngbü eri gbü nga wü kambiliki ka-ye, neh baye baye? Ah ngbü eri te möngiti de? Amba te kpara mbölö görö, ri tete gbü nga wü kambiliki la, ah de mürü zi de? Mene kpara te ngbü eri gbü nga wü kambiliki ka-ye te möngiti, ah ka-ye me-ye de mürü wü kambiliki la. ³ Kpara te ngbü efete mö nga wü kambiliki la ena aü möngiti fefe, fü ah ari agbü 'baranga la, teka aï wü kambiliki ka-ye. Ah ena adi eï ewü 'buru te iri ewü, fü ewü aje kphah riri na. Fü ewü akoro kphakaka na. ⁴ Fü ah ayia atï engagira nü fü ewü, akoro de ewü kpa etanü, teka ato e-mazü fü ewü. Wü kambiliki la ena angbü efa nganga na, angü wüh je riri na kpo. ⁵ Te ah ena adi ta de ganzi kpara la, wü kambiliki la ti afa nganga na nda-wü de. Wüh ena akpe engu ka-wü akpe, angü wüh wu engu nda-wü de.” ⁶ Ngü de te Yesu mala la, ah mala ngü la gbü mani. Amba wü Farusi la je si-ngü kaka la nda-wü de.

⁷⁻⁹ Fü Yesu adu kphah amala ngü fü ewü, gü ba dene, “Ngü te ma ngbü emala fü yi ne, ah de zu ngü. Ma ka-ra baka möngiti ka 'baranga ka wü kambiliki. Te wü kambiliki ka-ra ri 'buru agbü 'baranga la, ma ena akuwa ewü esaka wü siti nü.

Wüh ena angbü era kpala, gbü züka gu sü, zalü akoro kpurutokokpí. Fü ewü angbü ekoro kpa etanü, egiri e-mazü ka-wü. Gara wü kpara, ta te ewü koro te enga gina fere ne, wüh gü ba, 'Ani ena aceka kpí fütanga wü kambiliki la me-ani.' Amba wüh ka-wü de wü mürü zi. Tekä ngü la, wü kambiliki ka-ra le aje ri ewü nda-wü de. ¹⁰ Angü mürü zi ngbü ekoro nda-ye bü teka azi wü kambiliki, da emörö wü gara. Amba ma koro nda-ra teka aküwa ewü fi mere badi.

¹¹ De-ra, ma de kpara te ma ngbü eci wü kambiliki ka-ra mbi mbi mbi, ereke areke, da eto te-ra fü kpi teka ewü, angü ma de mürü ewü. ¹²⁻¹³ Kpara te ngbü eci wü kambiliki teka jiase, ah ceka kpí sidi nga ewü mbi mbi nda de, angü ah de mürü ewü nda de. Te di bala, te engu wu siti nü te ngbü ekoro la, ah ena akpe ka-ye, ace wü kambiliki la, ao sela. Fü siti nü la akoro azoro wü gara kambiliki la, angbengbe ewü. Angü fíngangü ka kpara la teka wü kambiliki la nda ma. Ah ngbü emere tima la bü teka jiase. Te ah ena adi ta de mürü ewü la, de bane ah tí akpe nda de. ¹⁴ Amba nda-ra, ma zu de mürü wü kambiliki la. Ma angbü eci ewü ereke areke ne, angü wüh de wü e ka-ra. Ma wu ewü kpo, wüh wu ra kpa kpo. ¹⁵ Kpah baka e de te Wüba wu ra kpo ne, ma wu Wüba kpa kpo. Ma le wü kambiliki ka-ra fa sü. Ma le eyi ato te-ra, akpi teka aküwa ewü.

¹⁶ Gara wü kambiliki ka-ra kpa ladü, te ewü ngbü kpa te gara sü nengete. Ah le fü ra anü aza ewü, adu di, adünda de wü bu ewü, teka fü ewü angbü eje ri ra, da efa nga ra. Fü ra angbü eceka kpí fütanga ewü 'buru me-ra.

¹⁷ Wüba ngbü ele ra, teka te ma ngbü eje riri kaka-na. Angü ma le ato te-ra akpi, teka ngü ka wü kambiliki la. Amba ma ena adu kpa azükü gbü kpi engu la. ¹⁸ Gara kpara te di de wazi teka amörö ra nda ma. Ma ena ace te-ra fü kpi la me-ra. Ma de wazi teka ato te-ra fü kpi. Ma kpa de wazi teka azükü gbü kpi la. Angü dela ngü te Wüba mala fere, de ma mere."

¹⁹ Te wüh je ngü gömö Yesu bala, fü wü kpara la akpo kpa de yiki esüka wü. ²⁰ Fü mere bi ewü amala ngü, gü ba, "Yesu de muruyi. Ah röfö aröfö. Ah mere neh baye, te wü ngbü eje ngü gömö na ne?" ²¹ Gara ewü gü ba, "Baye ya? Te komoko la ena adi ta de muruyi la, ah ti eyi aü jia kpara bala?"

Dene ngü ta te Yesu mala

* **10:22-23** 10:22-23 Karama la, ah de Karama te wüh ngbü efi nga sikipi, te wüh reke Mere Kambü ka Me tete.

† **10:22-23** 10:22-23 Sü te Yesu ndoro tete la, ah kpa esa yafu te wüh ei, gü ba, yafu ka Solomona ne. ‡ **10:34** 10:34 Mü ena amaka ngü la gbü Ci ka wü Davidi 82:6.

gbü gara mere karama ka wü Yisaraye

²²⁻²³ Fütanga ngü la, te karanga koro tete na, fü wü di enga *Yisaraye ayia amere gara karama ka-wü agbü Yerüsalema.* Fü Yesu ayia akoro, angbü endoro kpa etambasü *Mere Kambü ka Me la.†

²⁴ Fü wü *kovo ka wü Yisaraye akoro abiti te-wü ede Yesu, amala ngü fefe na, gü ba, "Ah mere baye, te ye ngbü emala ngü fü ani fi bü gbü mani, da ewo awo ne? Te ye de *Kurisito, de te Me tima fü ani ne la, ah mere baye, te ye le amala ngü la fü ani mbölö mbölö de ne?" ²⁵ Yesu gü ba, "Ma kpo da emala ngü la fü yi eyi kü gügü. Yi le aje nda-yi de. Wü mere kpeke ngü, te ma ngbü emere gbü jia yi, de wazi ka Wüba ne, ah gü tamu ra fü yi nda la fi de?"

²⁶ Te yi ena adi ta de wü kambiliki ka-ra la, de bane yi ena ale ngü ka-ra de maguma yi. ²⁷ Angü wü kambiliki ka-ra ngbü eje ri ra, da efa nga ra, angü wüh wu ra kpo. Ma wu ewü kpa kpo. ²⁸ Ma küwa ewü eyi fi mere badi. Wüh ti akpi nda-wü tine de. Ma zoro ewü eyi gö! de kpa ra 'basu. Gara kpara ti agbü ewü esaka ra de, ²⁹ angü Wüba to ewü fere me-ye. Kpara ti agbü ewü esaka Wüba kpa de, angü engu de mere mürü wazi, fa wü e 'buru. ³⁰ A ngbü emere wü tima ka-a ake Wüba, ba kpara biringbö."

³¹ Te wü kovo ka wü Yisaraye je ngü te Yesu mala, gü ba, "Ani ake Wö ni ba kpara biringbö ne," fü ngü la asiti te ewü afa sü. Fü ewü akpo akö teme, de ani söto Yesu di. ³² Yesu gü ba, "Yi ele asötö ra de teme, teka te ma küwa mere bi wü kpara gbü jia yi sene, de wazi ka Wüba ne?" ³³ Wüh gü ba, "Ah bala de! Ani le amörö ye teka wü züka ngü, de te ye ngbü emere ne, nda-ani de. Ani le amörö ye, teka siti ngü te ye mala ne. Angü ye kpa bü de kükürü kpara ba ani ne, ah mere baye te ye ngbü eo te-ye ba Me? Ye ngbü dela afala Me!"

³⁴ Yesu gü ba, "Anga ngü ta te wüh ba gbü *Ngari Me, gü ba, 'Me mala ngü fü wü kpara ka-ye, gü ba, 'Ni o wü baka ni, Me, fü wü adi emere tima ka-ni füh kotö sene ne." † Ngü la neh baye? ³⁵ Yi ti afü Ngari Me de, angü Ngari Me de mere kpeke ngü, te ngbü fi mere badi. Ah le de yi je si-ngü ne mbi mbi mbi. Wü kpara ta te Me fe ewü teka tima ka-ye ne, Me ngbü ei ewü ta baka wü me. ³⁶ Nda-ra ngü ka-ra kpa bala. Me fe ra me-ye. Fü ah atima ra füh kotö sene teka tima ka-ye. Te ma gü ba, 'Ma de Ye Me la,' ngü la siti te yi, neh teka ne?"

³⁷⁻³⁸ Yi fi la nga tima, te ma ngbü emere ne. Ma ngbü emere wü ngü la, neh de wazi ka da? Te yi wu eyi, gü ba, wü kpeke tima te ma ngbü emere ne, ah de tima ka Me la, ah le de yi le ngü ka-ra. Amba, te ah de tima, te Wüba tima ra di me-ye, nda de la, de yi mere e ale ngü ka-ra kpah de. Te yi le ngü ka-ra ta gügü de la, ah le de yi le ra tîne, teka wü kpeke ngü, de te ma ngbü emere ne. Te yi le ngü ka-ra eyi la, yi ena awu, gü ba, a ka-a ake Wüba kpara biringbö.”

³⁹ Te wüh je ngü gömö Yesu bala, fü ewü ayia agiri kaje de ani zoro engu. Fü Yesu ayia adürü ka-ye esaka ewü bü zirri bala.

⁴⁰ Fütanga ngü la, fü wü Yesu ayia ace sü la, adu anü sü ka-wü kpa etangu Yürüdene, angbü kpala. Wüh nü ngbü gbü sü, ta te *Yüwane Mürü Babatiza ngbü eto babatiza fü wü kpara tete na ne. ⁴¹ Fü mere bi wü kpara ayia akoro kpaka Yesu, teka aje ngü gögömö na. Fü ngü la aga gbü jä ewü afa sü. Fü ewü akpo da emala ngü esüka wü, gü ba dene, “Amba Yesu ka-ye de *E-küwa-ani fanü, baka ta te Yüwane mala ngangana fü ani ne. Wü ceka la, wawazi na fa sü, angü mere bi wü kpeke ngü, te engu ngbü emere ne, Yüwane mere ta bala de. Amba ngü ta te Yüwane mala tekaka na ne, ah ka-ye de zu ngü.” ⁴² Tekka ngü la, fü mere bi wü kpara adu ato maguma wü fü Yesu.

11

Dene ngü ka kpi ka Lazaro

¹⁻² Gara komoko ta ladü de iri ye Lazaro, te di de wü di engana ni ye 'basu, *Mariya ake Marata. Wüh wu te-wü de wü Yesu fa sü. Gba ewü ta agbü Betaniya. Ah de Mariya ta te tökö *züka se-mü ka-ye te lö Yesu, fü ah ayia afuru de su nzö ye ne.*

Gbü gara ra, fü Lazaro ayia atü de keke, o wü Yesu di sela ma. ³ Fü wü di engana ni ye de 'basu ne atima ngü fü Yesu, gü ba, “Mere kpara deyü, züka awuba ka-ye, te ye ngbü ele engu efa sü ne, ah ngbü eke ake.” ⁴ Te Yesu je ngü la, fü ah agü ba, “Lazaro ti akpi gbü keke la fi nda de. Keke ka Lazaro la koro, teka agü tamu wazi ka Me fü wü kpara. Fü ewü egbo nga iri ra gbü ngü la, angü ma de Ye Me.”

⁵ Yesu le ta wü Lazaro ake Marata bete Mariya fa sü. ⁶ Amba, baka te engu je nge keke ka Lazaro tete, ah nü kpaka ewü kere nda de. Ah du ra ka-ye sikipi 'basu feke.

⁷ Sidi nga ngü la, fü Yesu ayia amala ngü fü wü kpara ka-ye, gü ba, “Ani du la edu agbü Betaniya.” ⁸ Wüh gü ba, “Ayü!

Mere kpara, terane wü kpara gbü *Yudaya ngbü egiri kaje, teka amöro ye. Ye ele dene adu kpah kpala?” ⁹ Fü Yesu alügü ngü fü ewü gbü mani, agü ba, “Yi mere e afi nga ngü de. Angü te kpi seke eyi la, sü ena angbü ka-ye raaa! zalü akoro etamurago. Te di bala, te mü ngbü endoro gbü ra-sü la, mü ti ado lö mü de, angü sü lofo ka-ye alofo. ¹⁰ Amba te mü ce ra-sü, fü mü akpo da endoro gbü biti la, mü ena ado lö mü ado. Te di bala, wü vügü ka-ra ti amofa ra la de, angü sikipi ka-ra koro la de.”

¹¹ Fü ah adu amala ngü fü ewü, gü ba, “Lazaro ngbü era ka-ye ara. Ni enü dene anü teka azükü engu gbü ra la.” ¹²⁻¹³ Ah ngbü emala nga kpi ka Lazaro fü wü kpara ka-ye la gbü mani. Amba wü kpara kakana la wu, gü ba, Lazaro kpi eyi ne, nda-wü de. Fü ewü amala ngü fefe, ga, “Mere kpara deyü, te engu ngbü era ara la, ah de züka ngü, angü engu ena adu amaka wazi, fü sosoko alofo.” ¹⁴ Fü Yesu adu amala ngü la fü ewü tîne mbölö, gü ba, “Lazaro kpi ka-ye eyi. ¹⁵ Ma ngbü de tadu teka ngü ka-yi, te Lazaro kpi, o ra di kpara sene ne. Angü kpi ka Lazaro la ena ü fingangü ka-yi, fü yi ato maguma yi fere. Te di bala, nih nü enü agbü gba kaka-na la.” ¹⁶ Fü Toma† ayia amala ngü fü wü bu ye, gü ba dene, “Te ah bala la, ani nü enü. Te wüh le amöro mere kpara ka-ani kpala la, de ani kpi tîne de ewü.” Fü ewü ayia anü agbü Betaniya.

Dene ngü te Yesu zükü Lazaro di gbü kpi

¹⁷ Te wü Yesu nü koro tete agbü Betaniya, fü ewü aje, gü ba, wüh ti Lazaro eyi, ngangana ra eyi gbü tö sikipi bala. ¹⁸ Betaniya de engu köti gbamari ede Yerüsalema.‡ ¹⁹ Tekka ngü la, mere bi wü kpara koro ta agbü Yerüsalema, teka aceka cinga te wü Mariya ake Marata, teka kpi ka engana ni ewü la.

²⁰ Te wü Yesu koro tete gbamari ede gba wü Marata, fü wü gara kpara akpe anü amala ngangana fü wü Marata, gü ba, “Yesu te ekoro.” Te Marata je ngü la tete bala, fü ah ayia bü kere, ace Mariya kpa esambü la, anü amaka te-wü ake Yesu kpa te kaje.

²¹ Te Marata koro tete kpaka Yesu, fü ah atü de gba, gü ba, “Mere kpara, te mü ena adi ta ladü sene la, de bane engu wüna ti akpi de. ²² Amba, ah ba ngü de, angü ma wu eyi, gü ba, Me ti eyi amere wü ngü 'buru fü mü, te mü ena ayi-tata na la.” ²³ Yesu gü ba, “Marata, engana ni mü la ena azükü gbü kpi la azükü.” ²⁴ Marata gü

* 11:1-2 11:1-2 Mü ena amaka ngü la gbü Yüwane 12:1-8. † 11:16 11:16 Gara iri Toma de Dadase. ‡ 11:18 11:18 Betaniya ka-ye gbamari ede Yerüsalema. Ah koro miles 'basu de, ah baka kilometere bata.

ba, "Wayi, ah ngbürü bala. Ma wu eyi kpo, gü ba, enga wüna ena azükü gbü kpi azükü, gbü *adu sikipi te wü kpara 'buru ena azükü tete."

²⁵ Fü Yesu amala ngü, gü ba, "Ma de kpara te ngbü ezükü wü kpara gbü kpi, kphah da eküwa ewü. Kpara te to maguma ye fere, ngü ma, te engu kpi la, ah ena adu azükü azükü gbü kpi la. ²⁶ Kpah bala, mene kpara te di ezükü, te ah to maguma ye fere la, ah ti akpi fi nda de. Ah ena aküwa ka-ye aküwa, fi mere badi. Marata, mü je ngü la eyi?" ²⁷ Marata gü ba, "Wayi, mere kpara, ma wu kpo, gü ba, mü de Ye Me. Mü de *E-küwa-a de te Me mala nganga, gü ba, ni ena atima füh kotö ne."

²⁸ Te Marata mala ngü la bala, fü ah adu kpa eköti, amala ngü fü engu ni ye gbü zi, gü ba, "Mere kpara koro eyi sene. Ah ngbü eyi-ta ye." ²⁹ Te Mariya je ngü la bala, fü ah ayia bü kere, akoro kpa etanü, anü kpaka Yesu. ³⁰ Angü Yesu koro ta kpa etambasü nda la de. Ah rü ta la fi bü te kaje, gbü sü te Marata nü maka engu tete na ne. ³¹ Gara wü kpara ta ladü kpa esambü de wü Mariya. Te ewü wu Mariya, te mü koro tete kere kpa etanü ne, fü ewü afi, gü ba, "Ah ngbü enü dela aku gba kpa füh mbükü." Fü ewü ayia kphah, anü afa nganga na.

³² Fü Mariya anü akoro kpaka Yesu kpa te kaje kpala. Fü ah ati eri lö Yesu de gba, gü ba, "Mere kpara, te mü ena adi ta ladü sene la, de bane enga wüna ti akpi de."

³³ Te Yesu wu wü Mariya de wü mere bi wü kpara, te ewü ngbü eku gba de bala ne, fü ah angbü de mere cinga emaguma ye. ³⁴ Fü ah ayi-ta ewü, gü ba, "Wüh ti engu neh siye?" Wüh gü ba, "Mere kpara, ye koro ekoro, ye ceka mbükü la." ³⁵ Te Yesu je ngü la bala, fü ah ayia ati de gba. ³⁶ Fü ngü la aga gbü jia wü kpara la afa sü. Fü ewü angbü emala ngü esüka wü, gü ba, "Apa! Yi ceka la! Amba Yesu le ngü ka Lazaro neh bala?" ³⁷ Gara ewü gü ba, "Te Yesu ena akoro ta, o Lazaro kpi la de la, de bane, Lazaro ti akpi de, angü wazi Yesu fa sü. Ah ngbü ta eü jia wü kpara, de te ni ani ne."

³⁸ Fü cinga wü kpara, te ewü ngbü gbü gba ka Lazaro ne, ayia ari te Yesu afa sü. Te engu ku gba tete, fü ah ayia 'duwa, anü akoro kpa füh mbükü la. Mbükü la, ah ka-ye de gö da. Wüh wara ta gara mere ngbürükü da, o emö mbükü la. ³⁹ Fü Yesu agü ba, "Wü nzi da emö mbükü la asidi." Marata ga, "Ape, mere kpara! Dene se kpara koro tîne eyi esiti de? Angü ah ra gbü tö eyi sikipi bala dene." ⁴⁰ Yesu gü ba, "Mü fi nga ngü tîne, te ma mala fü mü ne, gü ba, 'Te mü le ngü, de te ma ngbü emala

fü mü ne eyi la, mü ena awu wazi ka Me.' " ⁴¹ Fü ewü ayia anzi ngbürükü da emö mbükü la asidi.

Fü Yesu ae jia ye, aceka kpi kpa tikpi, amala ngü fü Wö ye, gü ba, "Wüba, ma ngbü egbo nga iri mü, angü mü ngbü eto wazi fere me-mü, teka amere züka ngü kamü di, gbü jia wü kpara. ⁴² Ma wu eyi kpo, gü ba, mü ngbü eto wazi fere te nga wü sikipi 'buru. Ma mala ngü ne fü mü bala, teka aü fingangü ka wü kpara, te ewü ngbü ede ra ne, teka de wüh wu, gü ba, mü tima ra me-mü."

⁴³ Te engu mala ngü la bala, fü ah ayia amala ngü de mere ri ye kpa tikpi, gü ba, "Lazaro, mü koro ekoro!" ⁴⁴ Fü kövö la ayia azükü agbü mbükü la, akoro kpa etanü! Wüh gaga ta kpaka na, de wü lölö, de wü küküte 'buru de bongo. Wüh i kokomö kphah de kala bongo. Fü Yesu ayia amala ngü fü ewü, gü ba, "Yi furu wü bongo eküküte la efuru. Yi ce engu, de ah go de lö ye kpa eköti." Fü ewü afuru bongo, te wüh gaga eküte Lazaro la. Fü ewü ayia ago de ewü 'buru kpa eköti.

Dene ngü ka wü cögbörö kovo ka wü Yisarayeale,

te ewü le amörö Yesu

⁴⁵ Fütanga ngü la, fü mere bi wü kpara ka Yerüsalema, ta te ewü koro kpaka wü *Mariya, aceka cinga te ewü ne, ayia ato maguma wü fü Yesu, angü wüh wu ngü de te Yesu mere, te engu zükü Lazaro gbü kpi ne. ⁴⁶ Amba fü gara ewü ayia anü ndawü kpaka wü *Farusi, amala nga ngü la fü ewü, gü ba, "Yesu zükü gara kpara eyi gbü kpi."

⁴⁷ Te wü Farusi je ngü la, fü maguma ewü ayia asiti. Fü ewü anü amaka wü mürü gele, de wü gara wü cögbörö *kovo ka wü Yisarayeale. Fü ewü ayia abiti te-wü, akpo da efi nga ngü teka Yesu, gü ba, "Ani ena amere neh baye, teka atiri komoko la? Angü ah ngbü eyi efiti wü kpara 'buru, de wü ngü ka-ye la. ⁴⁸ Te ani ce engu fi bü bala la, wü kpara ena adu 'buru, ale ngü kaka. Fü ewü adu aza engu, ao ba miri. Te wü mere kpara ka *Rüma ena aje ngü la bala la, ngü la ena asiti te ewü afa sü. Fü ewü akoro de gü, amürü *Mere Kambü ka Me ka-ani, anza ta nguwa ani 'buru. Angü wüh ena afi, gü ba, ani le ngü kaka kphah eyi."

⁴⁹ Esüka wü cögbörö kovo ka wü *Yisarayeale la, gara kpara ta ladü de iri ye Kayafa. Ta gbü mene re engu la, engu ta me-ye de mere kpara füh kpökpö ka wü kovo. Fü Kayafa ayia amala ngü fü wü bu ye, gü ba, "Ay! Nda-yi de bane neh ene cürü ne? ⁵⁰ Ah le de Yesu kpi gbü ngü ka-ye la me-ye. Angü ah reke ta

ngbürü pe te kpara biringbö ena akpi me-ye, teka aküwa mere bi wü kpara 'buru, da engu de te nguwa nih ena anza 'buru ne." ⁵¹ Amba Kayafa mala ngü la de siti maguma ye, teka amörö Yesu asidi. Me za ta ngü la, o me-ye gögömö na, de ah mala ngü la bala baka *mürü dofo, angü ah ta de mere kpara füh kpökpö. Engu mala dela bü ngü te Me reke, o, teka te Yesu ena akpi, aküwa wü Yisaraye, ⁵² ah be kpah te mene wü kpara füh kotö ne 'buru, te ewü to maguma wü eyi fü Me ne. Angü Yesu kpi teka aküwa ewü, abiti ewü 'buru, ao biringbö, wü di Me.

⁵³ Te wü kovo la je ngü te Kayafa mala la, fü ewü ayia ale ngü la. Fü ewü areke te-wü, akpo 'duwa da egiri kaje teka amörö Yesu tete. ⁵⁴ Tekala ngü la, Yesu le andoro tîne gbü jia wü kovo ka wü Yisaraye ngeangba ne de. Fü ah ayia anü ka-ye agbü gara sü de iri ye Efürayima, te di de gara koti mba canza kpa edere sü.

⁵⁵ Fütanga ngü la, te sikpi ka *Pasika koro tete gbmari, fü mere bi wü kpara angbü egboko, enü agbü Yerüsalema, a'bi te-wü teka karama la. ⁵⁶⁻⁵⁷ Wü kpara la ngbü da eo jia wü fi te kaje, da eceka Yesu, anga engu ena akoro? Anga ah ena akpe cürü wü cögbörö kovo ya? Te wüh ngbü kpa etambasü *Mere Kambü ka Me la, fü ewü angbü emala ngü esüka wü, gü ba, "Wü fi nda-wü, gü ba, Yesu ena ai maguma ye, akoro gbü karama ne, te re ne fanü? Ah ngbü ta ekoro gbü wü re 'buru. Amba gbü re ne, ah ti akoro de, angü wü kovo ka-ani to ta riri kpekepe, gü ba, "Te kpara wu sü de te Yesu ngbü engbü tete na la, de ah koro, ah mala ngangü fü ani." Angü wüh le azoro engu azoro. Te di bala, te Yesu wu ngü la eyi bala la, ah ti akoro nda de."

12

*Dene ngü ka Yesu ake Mariya
Matayo 26:6-13; Marako 14:3-9*

¹ Te sikpi ka mere *karama la koro tete gbmari, dudu tîne ngebe ma'diya, fü Yesu ayia anü akoro agbü Betaniya, kpa gbü sü ta te engu zükü Lazaro tete na ne. ² Te engu koro kpala, fü ewü amere züka e-mazü fü ewü. Wü Marata ngbü ta ereke e-mazü la me-wü. Fü Lazaro angbü esüka wü kpara te ngbü ezü e de wü Yesu la. ³ *Mariya ta kpah ladü sela. Fü Mariya ayia aza *züka se-mü ka-ye de iri ye nada ne, te wüh ngbü ese de mere bi jiasa, akoro di, atökö te lö Yesu. Fü ah aza mere kala su-nzó ye, afuru se-mü la di te lö Yesu. Fü

se mü la ayia agba sü kpa esambü la, truun bane.

⁴ Fü ngü la ayia asiti te gara *mürü tima ka Yesu de iri ye *Yuda Keriyota, te di de kpara te ena agü tamu Yesu fü wü wügü ne. Fü Keriyota amala ngü, gü ba, ⁵ "Apa! Ah mere baye? Züka e te wüh ngbü ese de mere bi jiasa ne,* wüh ena atökö, asiti bü bala? Ah reke ta pe te ewü ena aza e la, acinzi de mere bi jiasa, ale ta-ngü di te wü mürü cinga." ⁶ Amba Keriyota mala ngü engu la, teka wü mürü cinga fanü fanü, nda de. Ah mala ngü la de mani, teka jiasa la, aza ka-ye fü ye, angü ah ta de kpara te ngbü eceka kpi fütanga jiasa ka-ewü 'buru me-ye.

⁷ Fü Yesu adu arü amala ngü fü Keriyota, gü ba, "Mü ce engu ace. Angü ah tökö mü ne eküte ra, baka e te wüh ngbü emoko se-mü eküte kövö. Kükürü de, angü sikpi ka kpi ka-ra koro eyi gbmari. ⁸ Te ye le ale ta-ngü te wü mürü cinga la, ah ngbü mbi, yi ti eyi amere ngü la sidi nga ra. Angü yi ena adi engbü de ewü sene, te nga wü sikpi 'buru. Amba sikpi ka-ra, te ma ena angbü de wü yi sene, ah mo nda tîne de. Ma ena ace yi ace títine."

⁹ Fütanga ngü la, fü mere bi wü kpara ka Yerüsalema ayia aje, gü ba, Yesu ladü agbü Betaniya. Fü ewü aci 'buru, anü kpala teka awu engu. Wüh le ta kpah awu Lazaro, de te Yesu zükü engu gbü kpi ne. ¹⁰ Amba teka ngü la, wü cögbörö *kovo ka wü Yisaraye ngbü nda-wü kpah ereke ngü, teka amörö Lazaro. ¹¹ Angü mere bi wü kpara du kpo eyi ele ngü ka Yesu, teka ngü ka Lazaro, te engu zükü ne. Wüh du le ngü ka wü kovo la tîne de.

Dene ngü ka kokoro ka Yesu agbü Yerüsalema

Matayo 21:1-9; Marako 11:1-10; Luka 19:29-38

¹²⁻¹⁴ Kpurutokopi la, fü wü Yesu ayia angbü enü agbü Yerüsalema. Fü Yesu anü amaka engu dongi, ali fefeh, angbü enü di. Fü mere bi wü kpara, te ewü koro gbü Yerüsalema teka *karama la aje, gü ba, "Yesu te ekoro." Fü ewü aza kpa mbira, anü amaka te-wü de wü Yesu kpa te kaje, akpo angbü ecu ngüngü, da eba rere, da emi koko, gü ba,

"Wayi bala! Gbo nga e ngbü te iri Me! Me to wazi fü mü, angü a tima mü fü a me-ye!

Angü mü de Mere Miri ka-a fanü!"

¹⁵⁻¹⁶ Ngü te Yesu li di füh engu dongi ne, wü kpara kaka wu si-ngü gbügbü nda-wü de. Amba tîne 'duwa sidi nga züzükü

* **12:5** 12:5 Ngü Giriki gü ba, mere bi jiasa baka 300 denariya. Ah baka mere bi jiasa te mü ena amaka te mü mere tima teka re biringbö. † **12:15-16** 12:15-16 Gara iri Yerüsalema de Siyona.

kaka gbü kpi, fü ewü adu awu, gü ba, ah gegege ba e ta te wüh ba gbü *Ngari Me ta gügü, gü ba, "Me emala ngü fü wü kpara ka Yerüsalema,[†] gü ba, 'Wü kpe cürü de. Wü ceka la, Miri te ni le atima ne, ah ena akoro kpaka wü, füh enga dongi.' [†]"

¹⁷⁻¹⁸ Si-ngü te wü kpara la koro tete, aza Yesu kpa te kaje, arí di agbü Yerüsalema ne, ah kükürü de. Wüh mere ngü la bala, angü wüh je nga ngü ta te Yesu mere, te engu zükü Lazaro tete gbü kpi ne. Angü wü kpara ta te ewü wu ngü la de jia wü ne, wüh du ngbü emala nga ngü la fü wü bu wü me-wü.

¹⁹ Te wü *Farusi je ngü la, fü ewü akpo angbü ezü komö wü, gü ba, "Ani ena amere amaka tine sela ne ngü ne? Wü ceka la aceka! Wü kpara ci ka-wü tine eyi 'buru, ele ngü ka komoko la!"

Dene ngü te Yesu mala teka kpi ka-ye

²⁰ Gara wü di enga *ganzi kpara ta ladü, esüka wü kpara ta te ewü koro, agbo nga iri Me gbü mere *karama la.

²¹ Fü wü ganzi kpara la ayia akoro kpaka *Filipo,[§] ayi-tata, gü ba dene, "Mere kpara, ani le awu Yesu." ²² Fü Filipo ayia amala ngü la fü Anderiya. Fü ewü ayia 'basu mini, anü amala ngü la fü Yesu.

²³ Te Yesu je ngü la bala, fü ah arü amala ngü fü wü kpara 'buru, gü ba dene, "Ah reke pe, angü sikipi ka-ra koro eyi dene. Sikipi engu la, ah de sikipi te wü kpara ena awu ra tete, gü ba, ma de *Ye Kpara ka Kpi fanü fanü. ²⁴ Ngü te ma emala fü yi ne, ah de zu ngü. Ngü ka kpi ka-ra la, ah baka ngü ka jia ndo. Te jia ndo la ngbü fi bü gbü kafa la, ah ti eyi azi jia ye? Ah ti azi jia ye nda de. Ah ena angbü ka-ye fi bü kpi kpi ye. Amba te wüh za jia ndo la, ru gbü tö la, küküte na la ena akpi ka-ye kpala, fü mamaguma adu akö, aga, azi jia ye 'duwa ba-neh-ene-la. ²⁵ Te mü le aküwa te-mü de tete-mü la, mü ti aküwa te-mü nda-mü de. Amba te mü ce te-mü, o fü kpi teka ngü ka-ra la, Me ena aküwa mü me-ye fi badí. ²⁶ Te mü le angbü ba züka kpara ka-ra la, de mü lala fi gbü nga ra. Ngü ma, te ah de kpi la, mü mere e akpe cürü de. Te mü rü fi bü kpekpeke gbü ngü ka-ra la, mü ena akoro agbü kpi, fü nih angbü ake nih ma tundu. Te di bala, Wüba ena acu ngü mü, angü mü de züka kpara ka-ra."

²⁷ Fü Yesu adu arü amala ngü, gü ba, "Ööö! Sikipi ka kpi ka-ra koro eyi gbamari. Mere siti ra ngü sü eyi fere dene. Maguma ra eyi de mere cinga ka ngü la. Ma ena amere dene neh baye? Ma ti aku gba fü

Wüba, de ah küwa ra gbü ngü la nda-ra de! Angü dela si-ngü te Wüba tima ra tekaka na, teka de ma maka cinga engu la." ²⁸ Fü Yesu adu aku gba fü Wö ye, gü ba, "Wayi bala, Wüba, mü gü tamu wazi mü fü wü kpara, teka de wüh gbo nga iri mü." Te engu mala ngü la bala, fü ah aje ri Me, te wü koro agbü kpi, gü ba, "Ma gü tamu wazi ra eyi fü ewü, gbü ngü ka-mü. Ma ena adu kpah agü tamu wazi ra fü ewü toto."

²⁹ Gara mere bi wü kpara, te ewü rü de wü Yesu ne, wüh je ri Me, te wü agbü kpi ne, mbi mbi nda-wü de. Ah wü gbü güje ewü ba giri e kükürü. Gara ewü gü ba, "Mügbara mere e la me-ye." Gara ewü gü ba, "Malayika ka Me ngbü emala ngü fü Yesu me-ye." ³⁰ Fü Yesu amala ngü fü ewü, gü ba dene, "Me mala ngü la me-ye. Ah mala teka ra nda de. Amba ah mala ngü la teka yi, teka ale ta-ngü te yi, fü yi adu ale ngü ka-ra.

³¹ Sikipi ka-ra koro eyi gbamari. Sikipi engu la, ah de sikipi, te ma ena agü gü tete ake *Satana, te o te-ye ba miri füh kotö ne. Ma ena afa engu gbü ngü la, fü ra aliki engu asidi. ³² Ah kpah de sikipi, te wüh ena ae ra tete kpa tikpi eküte rü. Te di bala, ma ena abiti wü kpara gbü nga nzö sü füh kotö ne 'buru, de wüh lala gbü nga ra." ³³ Yesu mala ngü la kükürü de. Ah mala ngü la teka agü tamu ngü ka kpi ka-ye, te wüh ena agü engu di kpa tikpi ne.

³⁴ Te mere bi wü kpara la je ngü de te Yesu mala la, fü ngü la ato mere fingangü fü ewü. Fü ewü alügü ngü fefe, gü ba dene, "Ngü la ena amere te-ye bala, neh baye baye? Ye gü ba, wüh ena ae ni, Ye Kpara ka Kpi, kpa tikpi? Ye de *Kurisito te Me tima teka aküwa ani ne de? Angü ani tanga ta ngü gbü *Ngari Me, gü ba, Kurisito, te Me ena atima fü ani ne, ah ti akpi nda de. Mene Ye Kpara ka Kpi te ena akpi akpi ne, neh engu deyi?" ³⁵ Fü Yesu alügü ngü fü ewü, gü ba, "Yi ce ngü ka yiki asidi, de yi ceka te-yi mbi. Angü ma la fi mba ladü esüka yi sene ba ra-sü, teka du sikipi mba cükü daye. Te ah bala la, yi nü enü kere kere tenga ra-sü engu ne, angü biti ena ati amaka yi titine, fü yi adürü, angü jia biti ma. ³⁶ Baka te ma di la ladü esüka yi sene, ba ra-sü ne, ah le de yi to maguma yi eto fere, teka fü yi afü te-yi, adu akoro ba wü kpara ka ra-sü."

Fütanga ngü te Yesu mala la, fü ah ayia anü awo te-ye ka-ye ede ewü nengete.

Dene ngü ka wü kpara te ewü le ngü ka Yesu de

† 12:15-16 12:15-16 Mü ena amaka ngü la gbü buku ka Zakariya 9:9.

§ 12:21 12:21 Filipo engu la, ah de kpara

ka Betesayida te di gbü nzö koti ka Galilaya.

³⁷ Yesu mere ta mere bi wü kpeke ngü, te kpara ti amere de, di bü eyi gbü jia wü kpara fa sü ne, amba wü kpara le ngü kaka nda-wü fi de. ³⁸ Fü ngü la atü kpini ba ngü ta te *mürü dofo Yisaya ba ta gügü gbü *Ngari Me, gü ba dene, "Ako, Mere Miri Me, ani mala ngü ka-ye eyi fü wü kpara, amba kpara biringbö, te le ngü te ani ngbü emala la, nda ma. Kpara te ena agbo nga iri ye teka mere wazi ka-ye, de te ye ngbü emere ne, nda kpah ma."* ³⁹ Kpah bala, wü kpara la le ngü ka Yesu de, angü nzö ewü kpekpeke. Yisaya du kpah ba ngü te Me mala la, gü ba, ⁴⁰ "Nzö wü kpara la koro eyi kpekpeke. Wüh ni güje wü ka-wü ani, angü wüh le aje ngü ka-ni de. Wüh ni jia wü kpah ani, angü wüh le awu ngü ka-ni kpah de. Te ewü ena aje ta ngü ka-ni, Me, mbi mbi la, de bane wüh ena ace *siti ngü ka-wü, adu ale ngü ka-ni, fü ni, Me, aküwa ewü."† ⁴¹ Yisaya ba ta ngü la teka Yesu, angü Me gü tamu ngü la fefe na me-ye gügü, o wüh bi Yesu la de. Me gü tamu Yesu fü Yisaya, te Yesu ngbü tete de mere wazi ye, agbü kpi kpala. Fü Yisaya ayia amala ngangana na fü wü kpara.

⁴² Esüka wü *kovo ka wü Yisaraye la, mere bi ewü ladü, te ewü ngbü ele ngü ka Yesu. Amba maguma ewü ka-ye 'basu 'basu. Wüh le asere te-wü de, ka cürü wü bu wü, wü *Farusi. Angü wü Farusi mala ta ngü, gü ba, "Te kpara le ngü ka Yesu la, ah ti ari kpa *esambü ka biti-te ka-ani nda de." ⁴³ Teka ngü la, fü ewü angbü ekpe cürü wü bu wü la, efa nda Me ka. Angü wüh le de ngü ka-ani reke gbü jia wü bu ani la. Wüh fi nga ngü, teka areke ngü ka-wü gbü jia Me ne, nda-wü de.

⁴⁴ Baka te Yesu ngbü tete esüka wü kpara la, ah mala ta ngü fü ewü, gü ba, "Mene kpara te le ngü ka-ni, ah le dela duu ngü ka-ni nda de, ah le ngü ka Wö ni, te tima ni ne kpah eyi. ⁴⁵ Kpara te wu ni eyi, ah wu Wö ni kpah eyi. ⁴⁶ Angü ni koro füh kotö ne baka ra-sü. Mene kpara te to maguma ye eyi fü ni, ah ena angbü ka-ye gbü ra-sü, ah ti angbü gbü mbiri sü nda de. ⁴⁷⁻⁴⁸ Wü ngü de te ni ngbü emala fü wü ne, te wü le aje de la, wüh ena amaka kuru amaka. Kuru engu la, ni to me-ni nda-ni de. Angü ni koro sene, teka ato kuru te wü kpara, nda-ni de. Ni koro ka-ni teka aküwa ewü. Te kpara le aje ngü, te ni ngbü emala, ne de la, wü ngü te ni ngbü emala la, ah ena ato kuru tete na me-ye gbü *adu sikipi, te Me ena akolo ngü ka wü kpara tete. ⁴⁹ Angü wü ngü de te ni ngbü emala fü wü ne, ni so wü ngü la de tete-ni nda-ni de. Wö ni mala nga

wü ngü la fü ni me-ye, fü ni angbü emala fü wü kpara dene. ⁵⁰ Ni wu eyi kpo, gü ba, ngü ka Me ena aküwa mene wü kpara te ewü to maguma wü fü Me. Te di bala, wü ngü de te ni ngbü emala fü wü ne, ah de wü ngü te Wö ni, Me, mala ce o gömö ni. Fü ni angbü emala ngü la kpah bala, fü wü kpara ne."

Dela ngü ta te Yesu ngbü emala fü wü kpara, te ewü le ngü ka-ye de ne.

13

Dene ngü ka mere ngü mürü, te Yesu mere fü wü kpara ka-ye

¹⁻² Baka te du sikipi ka *Pasika laki tine eyi ngbee biringbö ne, fü wü Yesu abiti te-wü de wü *mürü tima ka-ye, angbü da ezü e de ewü. Dela tine o *Satana kpo eyi da eo siti fingangü emaguma *Yuda Keriyota,* teka de ah gü tamu Yesu fü wü vügü kaka. Gbü ngü la, Yesu wu eyi kpo, gü ba, sikipi ka-ni koro eyi gbamari, teka ace sü füh kotö ne, ago ka-ni kpaka Wö ni.

Ta te Yesu di la füh kotö sene ne, ah le wü mürü tima ka-ye de maguma ye 'buru. Teka ngü la, ah le agü tamu mere ngü mürü ka-ye fü ewü areke areke. ³ Dene kaje te Yesu gü tamu ngü mürü la di fü ewü. Yesu wu ta bü kpo, gü ba, Me de Wö ni, te tima ni, akoro füh kotö ne. Ah to wazi fü ni kpah me-ye, teka wü ngü 'buru. Amba gbü wü ngü la 'buru, Yesu le acu ngü ye nda de. ⁴ Te di bala, fü Yesu ayia gbü sü ka zü-e la, agbü züka bongo ka-ye eküte ye ne asidi. Fü ah adu aza gara kala bongo ka tima, ai etadu ye. ⁵ Fü ah ayia atökö ngu gbü fara sila, akpo da ezürü lö wü kpara ka-ye di, da efuru ngu la te lö ewü de kala bongo, te engu i etadu ye la.

⁶ Te engu koro eküte Simüna Petero, teka azürü lö lö na ne, fü Petero ayia amala ngü fefe, gü ba, "Ata! Mere kpara! Mü ena azürü lö ra tine cu me-mü?" ⁷ Fü Yesu alügü ngü fefe na, gü ba, "Ngü de te ma ngbü emere dene, mü ti awu sisi na enatikine nda-mü la de. Mü ena adu awu si-ngü la te gara." ⁸ Petero gü ba, "Bala de! Mü ti azürü lö ra kpo de!" Yesu gü ba, "Te ma zürü lö mü de la, mü ena adi de kpara ka-ra neh baye baye?" ⁹ Petero gü ba, "Te ah tine eyi bala la, de mü zürü bü duu lö ra de. Ah le de mü zürü tine wü kpa ra, de wü nzö ra 'buru, teka fü ra angbü ba züka kpara ka-mü!" ¹⁰ Yesu gü ba, "Te mü zürü küte mü tine eyi te enga gina la, libiti ena adi eküte mü tine ma, 'duwa te lö mü. Te di bala, ah le de ma zürü bü lö mü, teka fü küte mü ari

* 12:38 12:38 Mü ena amaka ngü la gbü buku ka Yisaya 53:1. † 12:40 12:40 Mü ena amaka ngü la gbü buku ka Yisaya 6:10. * 13:1-2 13:1-2 İri wö ye Yuda Keriyota de Simüna.

akoro ngbala. Baka te ma zürü lö yi eyi ne, yi koro eyi ba züka wü kpara, de küte wü ngbalangbala. Amba 'duwa kpara biringbö, te di de siti fingangü emaguma ye eküte ra ba libiti." ¹¹ Yesu mala ta ngü la bala, angü ah wu kpara te ena agü tamu ye fü wü vügü ne kpo.

¹² Te Yesu zürü lö wü kpara ka-ye la 'buru nza tete, fü ah adu ato züka bongo ka-ye la, alügü eküte ye, adu angbü kötö, da emala ngü fü ewü, gü ba, "Yi wu si-ngü, de te ma mere fü yi ne eyi?" ¹³ Ma mere ngü la kükürü de. Ah le de yi mere kphah bala. Yi da güje yi reke areke te ngü ka-ra ne. Ah de züka ngü, te yi ngbü eï ra, gü ba, 'Mere kpara,' bete 'Miri,' angü ma ngbü bala fanü. ¹⁴⁻¹⁶ Esüka wü mbarase ake mere kpara ka-ye, e-ga fa kiri ye neh da? Ngü ka mbarase ti eyi afa nda mere kpara ka-ye? Ah bala de! Yi ceka la, te ma di de miri ka-yi ne, ma yia cu me-ra, fü ra azürü lö yi baka labi, teka agü tamu lele ka-ra fü yi. Te di bala, ah le fü yi adi emere kphah bala fü wü bu yi. Yi mere e ao te-yi ba wü mere kpara de. Angü ma gü tamu ngü mürü eyi fü yi bala, teka fü yi anü amere ngü la kphah bala. ¹⁷ Titine yi wu ngü te ma mere la eyi. Te yi ena angbü egü tamu lele la fü wü bu yi kphah bala la, ma ena angbü eceka yi ba züka wü kpara ka-ra."

Dene ngü ka Yesu ake Yuda Keriyota

¹⁸ Fü Yesu adu kphah amala gara ngü fü wü kpara ka-ye, gü ba, "Ngü te ma mala fü yi, gü ba, yi di ele ta-ngü te wü bu yi ne, angü ma wu eyi, gü ba, gara kpara ladü esüka yi, te le amere ngü la de. Ma wu fingangü ka-yi eyi 'buru, angü ma fe yi me-ra. Ma wu eyi, gü ba, kpara biringbö ladü esüka yi, te ena amere siti ngü, te ena ati kpini de ngü, ta te wüh ba gbü *Ngari Me gügü, gü ba, 'Kpara te a ngbü ezü e ake di, ah ena adu afü te-ye, ato ra fü kpi.'"[†] ¹⁹ Ma ngbü emala ngü la fü yi bala, o ngü la mere te-ye la de. Te di bala, gbü sikipi te wü ngü la ena amere te-wü tete, ba e te ma mala fü yi la, yi ti eyi awu, gü ba, ma de Ye Me fanü fanü.

²⁰ Ngü te ma ngbü emala fü yi ne, ah de zu ngü. Mene kpara te ena ale ngü ka-yi, wü kpara ka-ra, amba ah le ngü ka-ra kphah eyi, angü ma tima yi me-ra. Kphah bala, kpara te ena ale ngü ka-ra, amba ah le ngü ka Me kphah eyi, angü engu tima ra me-ye."

²¹ Fütanga ngü la, fü mere cinga adu azoro Yesu afa sü. Fü ah amala ngü, gü ba, "Ö'öö! Yi da la güje yi te ngü te ma ngbü

emala fü yi ne. Angü biri kpara ladü esüka yi sene, te ena ato ra fü wü vügü." ²² Fü ngü la ayia aga gbü jia wü kpara kaka-na la afa sü. Fü ewü akpo da eceka jia wü, da efi nga ngü, gü ba dene, "Yesu mala ngü la, neh teka da?"

²³ Gara biri ewü, te Yesu le engu fa sü ne,[‡] ta kphah bü ladü sela, te ngbü ka-ye ghamari ede Yesu. ²⁴ Fü Simüna Petero akuru jia ye fü komoko la, de ah yi-ta Yesu, anga ah mala ngü la, neh teka da? ²⁵ Fü komoko la aka te-ye, adu agü nzö ye mari ede Yesu, ayi-tata gbü ngingiri ngü, gü ba dene, "Mere kpara, kpara engu la neh da?" ²⁶ Fü Yesu alügü ngü fefe gbü ngingiri ngü, gü ba, "Mene kpara te ma ena afunu kümü, ato gbü wuru, aza ato fefe na ne, ah de engu."

Te di bala, fü Yesu ayia aza kümü la, ato fü Keriyota. ²⁷ Fü Keriyota aza e la, azü. Fü *Satana adu ari tine emamaguma 'duwa trrrö! Te di bala, fü Yesu amala ngü fefe na, gü ba dene, "Keriyota deyi, ngü te ye le amere ne, ye nü tine enü, ye mere kere."

²⁸ Wü bu ye Keriyota, te ewü ngbü ezü e de ewü ne, wüh wu si-ngü, de te Yesu mala ngü tete fü Keriyota de bala ne, nda-wü de. ²⁹ Gara ewü fi nda-wü, gü ba, Yesu ngbü etima Keriyota, teka anü ase e ka *karama fü ani. Gara ewü fi nda-wü, gü ba, anga ah tima engu neh, teka ato e fü wü mürü cinga? Angü Keriyota ngbü ta emere kpa te jase ka-ewü me-ye.

³⁰ Fütanga ngü te Keriyota zü e la tete, fü ah ayia 'duwa, akoro ka-ye kpa etanü, agbü mbiri sü.

Dene ngü te Yesu mala fü wü kpara ka-ye,

gü ba, ni ena ace wü

³¹ Baka te Keriyota yia nü sü tete, fü Yesu afü te-ye, amala ngü fü du wü kpara ka-ye la, gü ba, "Titine ngü kpo eyi dene. Yi ena awu gara ngü te ena agü tamu wazi ra fü yi. Yi ena awu kphah wazi Me gbü ngü la. ³² Ngü la ena amere te-ye amere titine, amba Me ena ato wazi ye fere gbü ngü la. Fü yi adu awu wazi Me kphah gbü ngü la.

³³ Wü di engu ra, ma ena adi la mba ladü de wü yi sene, teka du lö-ra mba cogbo. Yi ena adu angbü egiri ra agiri, angü sü te ma ena anü tete na, yi ti akoro kpala de, kphah baka ngü ta te ma mala fü wü *kovo ne. ³⁴ Te di bala, dene to riri te ma le ato fü yi. Yi di ele te-yi esüka yi ale, ba e te ma ngbü ele yi de maguma ra 'buru ne. ³⁵ Te yi le te-yi esüka yi bala la, wü kpara 'buru ena awu, gü ba, yi de wü kpara ka-ra fanü."

[†] 13:18 13:18 Mü ena amaka ngü la gbü Ci ka wü Davidi 41:9. [‡] 13:23 13:23 Kpara te Yesu le fa sü ne, ah Yüwane ye Zebedayo, te ba buku ne. Mü ena amaka ngü la gbü Masere Si-ngü.

³⁶ Fū Petero ayi-tata, gü ba, “Mere kpara, ye yia enü neh kaye?” Yesu gü ba, “Sü te ma ena anü tete ne, mü tī afa nga ra kpala enatikine de. Mü ena adu afa nga ra te gara.” ³⁷ Petero gü ba, “Mere kpara, ah mere baye, te ni tī afa nga ye enatikine tīne kpah de ne? Amba te ah kpah de kpi la, ni ena ato te-ni akpi teka ngü ka-ye!” ³⁸ Yesu gü ba, “Mü le ngbürü eyi akpi teka ngü ka-ra fanü? Ngü te ma ngbü emala fū mü ne, ah de zu ngü. Enatikine, gbü biti ne, o moko-ngü mī koko la de, mü ena acere nga mü du bata, gü ba, ‘Ni wu ra de.’”

14

Dene ngü te Yesu mala, gü ba,

“Ni me-ni de kaje te enü kpaka Me”

¹ Fütanga ngü la, fū Yesu afü te-ye, amala ngü fū wü kpara ka-ye, gü ba, “Yi mere e afi nga ngü de. Yi to maguma yi fū Me, de yi to kpah fere. ² Ma ngbü eyi enü kpaka Wüba, teka areke sü fū yi. Angü mere bi sü ladü kpala, teka wü kpara 'buru. Ngü te ma ngbü emala fū yi ne, ah de zu ngü fanü fanü. ³ Te di bala, yi mere e afi nga ngü de, angü ma ena adu akoro sene, aza yi, anü de yi kpaka ra kpala. Fū nih angbü tīne de nih ma kpala tundu. ⁴ Sü de te ma ngbü enü tete ne, yi wu kaje engu kpo.”

⁵ Toma gü ba, “Mere kpara, ani wu sü engu, de te ye ngbü enü tete la nda-ani de. Te di bala, ani ena awu kaje la, neh baye baye?” ⁶ Yesu gü ba, “Ma zu de kaje te ngbü enü kpaka Wüba. Angü ma ngbü emala fū yi zu ngü ka Wüba. Ma ngbü kpah eküwa wü kpara, te ewü to maguma wü fere. Gara kpara te tī aküwa wü kpara nda ma, 'duwa de-ra. Gara kaje 'buru 'buru nda ma, duu de-ra. ⁷ Yi kpo eyi da ewu ra mba ce ce ce. Te di bala, yi kpo kpah eyi ewu Wüba. Akpo enatikine anü kpa engagira nü, yi ena adu awu Wüba tīne areke areke.”

⁸ Fū *Filipo ayia amala ngü fū Yesu, gü ba, “Mere kpara, gara yitangü ka-ni ladü sene. Ye gü la tamu Wö ye fū ani, teka de ani wu engu de jia ani. Fū ani ace da embü ye de wü yitangü.” ⁹ Yesu gü ba “Filipo deyī, te mü wu ra eyi, mü wu Wüba kpah eyi. Ah mere baye, te mü gü ba, ‘Ma gü tamu Wüba fū ani’ ne? Angü ma yiri esüka yi sene eyi fa sü, zalü akoro dene, mü wu ra la fi de? ¹⁰ Ngü ta te ma mala fū yi, gü ba, ‘Ma ngbü engbü guvu Wüba, Wüba ngbü kpah engbü guvu ra ne,’ mü le ngü la de, neh teka ne? Ngü de te ma ngbü emala fū yi ne, ma mala de tete-ra nda-ra de. Ah de ngü ka Wüba te ngbü engbü guvu ra ne. Angü engu ngbü ereke

tima ka-ye esaka ra me-ye. ¹¹ Ngü te ma mala fū yi, gü ba, ‘Ma ngbü engbü guvu Wüba, Wüba ngbü kpah engbü guvu ra ne,’ ah le de ngü la rī gbü nzö yi mbi mbi mbi. Te ngü la rī gbü nzö yi mbi mbi de, anga yi je sisi na mbi mbi kpah de la, ah le de yi fi nga wü mere kpeke ngü te ma ngbü emere gbü jia yi ne, fū yi adu awu si-ngü la areke.”

Dene ngü te Yesu mala fū wü kpara ka-ye,

de wüh rü kpekepeke sidi nga ni

¹² Fū Yesu adu amala gara ngü fū ewü, gü ba dene, “Ngü te ma ngbü emala fū yi ne, ah de zu ngü. Te mü to maguma mü fere la, ma ena ato wazi fū mü, teka fū mü amere wü kpeke ngü di, kpah ba e te ma ngbü emere ne. Fū ngü la aga gbü jia wü kpara, fū ewü angbü egbo nga iri Wüba, teka ngü ka-mü la. Tima ka-mü la ena afa nda-ra, ta te ma mere ne ka, angü ma ngbü ego ka-ra ago kpaka Wüba. Te ma nü eyi kpala la, ma ena atima wazi fū yi. ¹³ Mene ngü te yi ena ayi-ta Wüba di, te iri ra, ma ena ato ato fū yi. Te di bala, wü kpara 'buru ena awu ngü la, fū ewü agbo nga iri Wüba, teka wazi te ma to fū yi la. ¹⁴ Wayi, wü e 'buru te yi ena ayo kpaka Wüba te iri ra, ma ena amere wü ngü la fū yi.

¹⁵ Te yi le ra de maguma yi 'buru la, yi ena aje wü ngü, de te ma ngbü eri yi di ne 'buru, kpah da emere ereke areke.

¹⁶ Te ma nü koro eyi kpaka Wüba la, ma ena ayi-tata, fū engu atima gara kpara te ena akoro, angbü de wü yi da ra sene, fi mere badi. Kpara la, ah de *Nzila Wazi Me, te ena akoro ato wazi fū yi, da engbü tundu de wü yi. ¹⁷ Nzila Wazi Me engu la ena angbü emala zu ngari Me fū yi. Yi ena awu engu areke areke, angü engu ena angbü guvu yi. Amba wü kpara te ewü le ngü ka-ra de, wüh tī awu engu kpah de, angü wüh le ngü kaka kpah de.

¹⁸ Yi fi nga ngü de, angü ma tī ace yi kpi kpi yi de, ma ena adu akoro kpaka yi.

¹⁹ Ah ce du lö-ra mba cükü'daye, ma ena ayia teka ace sü füh kotö ne. Te di bala, wü kpara te ewü le ngü ka-ra de, wüh tī awu ra tīne de. 'Duwa de-yi, fütanga sikipi mba cükü'daye, yi ena adu awu ra me-yi. Angü ma ena adu azükü, fū yi aküwa kpah gbü ngü ka-ra la. ²⁰ Gbü sikipi te ma ena adu akoro tete kpaka yi, yi ena adu awu ngü la areke, gü ba, Wüba ngbü engbü guvu ra fanü. Ma ngbü engbü nda-ra guvu yi. Fū yi angbü nda-yi kpah guvu ra.

²¹ Te yi je riri ka-ra, da emere ngü la 'buru ereke areke, ma ena awu, gü ba, yi le ra eyi de maguma yi fanü. Te di bala, Wüba ena ale ngü ka-yi, angü yi ngbü kpah

ele ngü ka-ra. Ma ena ale kphah ngü ka-yi, fü ra agü tamu ra fü yi.”

²² Gara *mürü tima ka Yesu ta la kpala de iri ye Tadayo.* Fü Tadayo amala ngü fü Yesu, gü ba, “Mere kpara, ni je ngü la mbi mbi de. Te ye ena adu agü tamu ye fü ani la, ah mere neh baye, te wü gara kpara ti awu ye de ne?” ²³ Yesu gü ba, “Te mü le ra eyi fanü fanü la, mü ena aje riri ka-ra, da emere ereke areke. Te di bala, Wüba ena ale ngü ka-mü afa sü. Fü a akoro ake Wüba, angbü guvu mü. ²⁴ Mene kpara te le ra nda de, ah le riri ka-ra nda kphah de. Ngü te ma emala fü yi ne, ma mala de tete-ra nda-ra de. Ah de ngü ka Wüba te tima ra ne.

²⁵⁻²⁶ Sidi nga ra sene, Wüba ena atima *Nzila Wazi ye fü yi, te ena angbü da ra, teka ato wazi fü yi. Nda-ra, ma mala ngü la fü yi mba ce, o ra di la ladü esüka yi sene. Te Nzila Wazi Me engu koro eyi la, ah ena agü tamu si-ngü, de te ma mala fü yi ne, mbi mbi mbi 'buru me-ye. Fü ngü la ari gbü nzö yi areke areke.

²⁷ Yi ngbü engbü de cinga ne, teka te ma yia ece yi ne? Yi fi nga ngü de, angü ma ena ato gu ngü fü yi, te ena agu maguma yi kpina. Ah ena adi baka nda wü kpara füh kotö ne nda de. Yi fi nga ngü de. Yi ngbü de cinga kphah de. Yi rü kpekpeke. ²⁸ Ngü te ma mala fü yi, gü ba, 'Ma ena ace yi, anü kpaka Wüba, fü ra adu akoro kpaka yi sidi ne,' ngü la ngbü eto cinga fü yi me-ye? Ah le de ngü la to cinga fü yi de. Te ye ena ale ra ta, de maguma yi fanü fanü la, de bane yi ena angbü de tadu, teka ngü te ma mala la. Tekane de, angü ma nü kükürü de, ma ego kpaka Wüba, te di de mere kpara fere, teka fü engu ao ra Mere Miri gbü nzö wü ngü 'buru.

²⁹ Titine, ma ngbü emala ngü ne fü yi, o ngü engu mere te-ye la de. Te ma ce yi eyi la, de yi fi nga ngü, de te ma mala fü yi ne, fü yi awu, gü ba, ma togo eyi kpaka Wüba fanü. ³⁰ Ma ti ari yi de gara ngü tine gbe de, angü lö-ra ma. *Satana, te di de miri ka kotö ne, te ekoro, agü gü kpaka ra. Amba engu ti afa ra de siti ngü ka-ye la nda de. ³¹ Ma ena ace te-ra esasaka, ba e te Wüba mala fere, teka fü wü kpara awu, gü ba, ma le Wüba eyi, fü ra angbü emere wü ngü, ba e te engu ngbü ele.

Te ah bala, nih yia gbü sü dene eyia, nih nü e ka-nih enü.”

15

Dene ngü te Yesu mala, gü ba,

ah le de wü kpara ka-ni lala eküte ni

¹ Fütanga ngü la, fü Yesu afü te-ye, amala ngü fü wü kpara ka-ye, gü ba dene, “Nih de nih ma, nih baka rü *vinü. Yi nda-yi baka yakpa rü la, ma nda-ra tine cu baka rürü na, te ngbü eto wazi fü yi. Wüba nda-ye me-ye baka kpara te ru rü vinü la. ² Mene yakpa rü te ri de ne, Wüba ngbü ede, egü kötö. Wüba ngbü kphah ereke wü yakpa rü, te ewü ngbü eri la, teka de wüh di eri gbrirrrri! 'duwa ba-neh-ene-la. ³ Kpah bala, ngü de te ma ri yi di ne, ah reke yi eyi, yi koro eyi *nzila. ⁴ Yakpa rü ti eyi ari kpikpi ye? Ah bala de. Te yakpa rü lala eküte rü ye de la, ah ti ari kphah de. Kpah bala, ma le de yi lala eküte ra, baka yakpa rü te lala eküte rü ye, teka fü ra ato wazi fü yi, teka fü yi amere züka ngü di. Angü te yi lala eküte ra de la, ngü ka-yi ti areke gbü jia Me kphah de.

⁵ Wayi, ma de rü vinü engu la, yi baka yakpa ra. Te ye lala eküte ra, fü ra angbü eto wazi fü yi la, yi ena amere züka ngü afa sü. Angü yi ti amere ngü ka-ra de tete-yi nda-yi de. ⁶ Mene kpara te lala eküte ra de, ah ena adi ba yakpa rü, te wüh de ade, gü kötö. Te yakpa rü la ürü eyi la, tima kaka tine neh ene? Wüh ena aza engu, agü agbü wa, fü ah acuru acuru. ⁷ Te ye lala eküte ra, fü ngari ra angbü emagama yi la, mene ngü te ye ena ayitata kpaka Wüba, ah ena ato ato fü yi. ⁸ Te ye ngbü ba wü züka kpara ka-ra la, ye ena angbü emere wü züka ngü afa sü. Te ye mere bala la, wü kpara ena angbü egbo nga iri Wüba, teka ngü ka-yi la.

⁹ Ma le yi fa sü, kphah baka e te Wüba ngbü ele ra. Ah ele de ye lala eküte ra, teka fü nih angbü ele te-nih de nih ma. ¹⁰ Te ye je riri ka-ra, da emere mbi mbi mbi la, nih ena angbü ele te-nih efa sü. Kpah baka e te ma ngbü eje riri ka Wüba, fü a angbü ele te-a ake di ne. ¹¹ Ma ngbü emala ngü ne fü yi, teka fü le-te ka-nih ato tadu fü yi, kphah baka te le-te ka-a ake Wüba ngbü eto tadu fere ne.

¹² Dene eyi riri ka-ra fü yi. Ah le de ye di ele wü bu yi, kphah baka e te ma ngbü ele yi ne. ¹³ Yi fi la nga lele ka-ra. Lele ka-ra fa nda wü kpara füh kotö ne 'buru. Kpara ti eyi ato te-ye, akpi teka aküwa wü di engu ni ye fanü? Ngü bala ladü? Ma wü ngü bala füh kotö sene nda-ra la kü de! ¹⁴ Te ye ngbü eyi emere wü ngü, de te ma ngbü eri yi di ne la, ye ena adi zu de wü di engu wüna fanü fanü. ¹⁵ Ma ngbü ei yi wü di engu wüna kükürü de, angü wü ngü ta te ma je gömö Wüba ne, ma mala eyi 'buru fü yi. Yi le wü ngü la kphah eyi. Ma ti aceka yi tine ba wü jaji de, angü jaji ti awu ngü, de te mere kpara kaka ngbü emere ne,

* 14:22 14:22 Gara iri Tadayo de Yuda, ah de Yuda Keriyota nda de.

nda de. ¹⁶ Ma fe yi, o ba wü di engä wüna me-ra. Amba yi fe ra me-yi nda-yi de. Ma fe yi, teka fū yi adi emere wü ngü, te ena angbü areke gbü jia Me. Fū yi angbü ba rü vinü, te ngbü erī gbrirri! te nga wü re 'buru. Amba ma ngbü ele de züka ngü ka-yi la nü kpa engagira nü. Ah mere e anza nda de. Te yi mere bala la, mene e te yi ena ayo kpara Wüba te iri ra la, Wüba ena ato e la ato fū yi. ¹⁷ Dela riri ka-ra te ma mala fū yi, ah le fū yi adi ele te-yi ale."

Dene ngü te Yesu mala fū wü kpara ka-ye,

gü ba, wü kpara ena akpü wü, kpah baka e te wüh kpü ni

¹⁸ Fū Yesu adu amala gara ngü fū wü kpara ka-ye la, gü ba dene, "Yi rü kpekpeke, angü wü kpara, te ewü le ngü ka-ra de ne, wüh ena akpü yi, kpah ba e te ewü ngbü da ekpü ra enatikine ne. ¹⁹ Kükürü de, angü ma fe yi me-ra, teka fū yi ace da emere *siti ngü baka nda wü kpara la. Te yi ena angbü ta emere siti ngü baka ewü la, de bane wüh ena ale ngü ka-yi ale. Amba nda-yi ngü ka-ye kpikpi ye. Dela eyi si-ngü te wüh ena adi ekpü yi tete na ne. ²⁰ Yi fi la nga mene ngü, ta te ma mala fū yi ne, gü ba, 'Ngü ka mbarase ti afa nda mere kpara ka-ye de,' ne. Angü, te wüh ngbü ekpü mere kpara la, wüh ena ale wü jaji kaka? Wüh ti ale de! Te di bala, wüh ena akpü yi, kpah baka e ta te wüh kpü ra. Te wüh ena aje ta ri ra la, de bane wüh ena aje ri yi kpah aje. ²¹ Wüh ena amere wü ngü la 'buru eküte yi bala, angü yi de wü kpara ka-ra. Angü wüh le ngü ka-ra nda-wü de. Wüh le, gü ba, ma de Ye Me, te Me tima ra me-ye ne, kpah de.

²²⁻²⁴ Wü kpara ngbü ekpü ra, neh teka ne? Ma koro füh kotö ne teka amala ngari Me fū ewü, amba wüh le ngü la de, neh teka ne? Dela eyi siti ngü te ena angbü gbü nzö ewü fi badi ne. Angü te ma ena akoro ta, amala nga wü ngü la fū ewü de la, de bane siti ngü ti angbü gbü nzö ewü nda de. Ma koro esüka ewü sene, fū ra amere mere bi wü kpeke ngü, te gara kpara ti amere de. Fū ewü awu wü ngü la cu de jia wü. Wüh fi nga ngü la nda-wü kpah de. Fū ewü akpo angbü ekpü a ake Wüba akpü. Angü te kpara ngbü ekpü ra la, ah ngbü dela kpah ekpü Wüba. Dela eyi mere siti liya gbü nzö ewü. ²⁵ Ngü la ti kpini de ngü ta te Miri *Davidi ba gügü gbü *Ngari Me, gü ba, 'Wüh ngbü ekpü ni kükürü, angü ni mere siti ngü fū ewü 'buru 'buru de.'*

²⁶ Wü di engä wüna, yi kpe cürü de, angü ma ena atima *Nzila Wazi Me, te ena

akoro ale-ta ngü te-yi, sidi nga ra. Ah ena akoro kpaka Wüba, fū ah angbü de wü yi sene. Ah ena aü jia yi, teka fū yi aje si-ngü te ma ngbü emala fū yi ne mbi mbi mbi. ²⁷ Kpah bala, ah le de yi mala nga ra fū wü kpara 'buru, angü nih ngbü eyi de nih ma tundu.

16

¹ Ma mala ngü la fū yi kükürü de, angü te wü kpara ena akpo da ekpü yi, ah le fū yi arü kpekpeke gbü ngü ka-ra. ² Angü wüh ena amere yi sisisi. Wüh ena aliki wü gara yi *esambü ka biti-te ka-wü asidi. Fū ewü amörö kpah wü gara yi, gü ba, ani ngbü dela emere züka ngü gbü jia Me. ³ Wüh ena amere wü ngü la 'buru eküte yi bala, angü wüh le ngü ka-ra nda-wü de. Wüh le, gü ba, Ma de Ye Me ne, kpah de. ⁴ Ma ngbü emala ngü la fū yi bala, angü te siki ka ngü la koro eyi la, wü kpara la ena amere wü siti ngü la eküte yi bala, fū yi adu afi nga ngü la, gü ba, ma mala ngü la ta fū ani eyi gügü. Te di bala, yi ena adu arü kpekpeke."

Dene kpah gara ngü te Yesu mala,

teka ngü te ena amere wü kpara ka-ye sidi nga ye

Fū Yesu adu amala gara ngü fū wü kpara ka-ye la, gü ba, "Ma mala ta ngü la fū yi te engä gina nda-ra la de, angü ma la ladü de te wü yi sene, da eceka kpü fütanga yi. ⁵ Titine ma le eyi adu kpaka Wüba te tima ra ne. Ah mere baye, te yi le ayi-ta ra, teka ngü la nda-yi de ne? ⁶ Yi ngbü de cinga teka ngü te ma mala fū yi ne? A'a. Yi mere e angbü de cinga teka ngü la de.

⁷ Ngü te ma ngbü emala fū yi ne, ah de zu ngü. Ah reke ta fa sü, te ma ena anü kpaka Wüba kpala, angü te ma nü eyi la, ma ena atima *Nzila Wazi Me, te ma ngbü emala nganga na, fū yi ne. Amba, te ma nü de la, ah ti akoro kpaka yi kpah de. ⁸⁻¹¹ Te Nzila Wazi Me la koro eyi la, ah ena amala ngari Me fū wü kpara kpekpeke. Fū ngü la aü jia ewü. Ah ena amala wü ngü bata fū ewü. Gina ngü gü ba, 'Wüh ngbü emere *siti ngü efa sü, angü wüh le ngü ka-ra nda-wü de.' E'ba'basu ngü gü ba, 'Ma de Ye Me, te ma ngbü emere züka ngü gbü jia Me duu mera. Angü ma ngbü ego kpaka Wüba te tima ra ne. Wü kpara ti awu ra nda-wü tine de.' Ebabata ngü gü ba, 'Me ena akolo liya gbü nzö wü kpara füh kotö ne, angü ah kolo liya ka *Satana eyi.'

¹² Wü gara ngü ta ladü emaguma ra, te ma le amala fū yi ne, ma ti amala fū yi tine de. Angü yi ti aje si-ngü la titine mbi mbi la de. ¹³⁻¹⁴ Ah le de *Nzila Wazi Me

* 15:25 15:25 Mü ena amaka ngü la gbü Ci ka wü Davidi 35:19bete 69:4.

koro kpaka yi feke, teka asere si-ngü la fü yi. Angü te engu koro eyi la, ah ena angbü emala wü ngü, de te engu ngbü eje gömö ra ne fü yi, teka fü yi adu aje sisi na mbi mbi mbi. Fü yi angbü egbo nga iri ra gbü wü ngü la. ¹⁵ Wü ngü ka Wüba 'buru, ah kphah de ngü ka-ra, angü fingangü ka-ake di 'buru biringbö. Tekä ngü la, fü ra amala fü yi, gü ba, 'Wü ngü te Nzila Wazi Me ena amala fü yi ne, ah ena aje gömö ra.'

¹⁶ Fütanga lö-ra mba cükü'daye, yi ti awu ra de. Yi fi nga ngü de, angü yi ena adu awu ra sidi nga sikipi mba cükü'daye."

¹⁷ Te wüh je ngü te Yesu mala la, fü wü gara kpara kaka angbü da efi nga ngü emaguma wü, gü ba, "Ngü de te engu mala, gü ba, 'Fütanga lö-ra mba cükü'daye ne, ani ti awu ni de, fü ani adu awu ni sidi nga sikipi mba cükü'daye' ne, si-ngü gbü ngü la gü neh fe? Baka te engu mala, gü ba 'Ni edu kpaka Wö ni,' ne, ani je si-ngü la kphah de. ¹⁸ Ngü de te engu mala, gü ba, 'Sikipi mba cükü'daye,' la, ah gü neh fe? Ani wu si-ngü de te engu ngbü emala la, nda-ani 'buru 'buru de."

¹⁹ Te Yesu wu, gü ba, wü kpara ka-ni la le ayi-ta ni teka ngü la, fü ah amala ngü fü ewü, gü ba, "Ma mala ta ngü fü yi, gü ba, 'Fütanga lö-ra mba cükü'daye, yi ti awu ra de, yi ena adu awu ra sidi nga sikipi cükü'daye.' Ngü la ngbü eto mere fingangü emaguma yi, neh teka ne? ²⁰ Ngü te ma ngbü emala fü yi ne, ah de zu ngü. Gbü wü sikipi ne, yi ena angbü da eku gba de ngura. Amba wü kpara te ewü le ngü ka-ra de, wüh ena angbü nda-wü de tadu. Yi ena angbü nda-yi de cinga, teka sikipi mba cükü'daye. Fütanga ngü la, cinga ka-yi ena anza, fü yi adu angbü de mere tadu. ²¹ Cinga ka-yi la, ah baka cinga ka würi se te ena abi ye. Angü, te sikipi ka yayaka kaka koro eyi la, engu ena angbü de cinga. Te engu yaka eyi la, ah du fi nga cinga ka-ye la tîne de. Ah ena angbü tîne de mere tadu, teka ngü ka mbarase ka-ye la. ²² Nda-yi kphah bala. Titine yi ngbü eyi de cinga, angü ma yia eyi ece yi. Yi mere e afi nga ngü de, angü ma ena adu akoro kpaka yi, fü yi adu angbü de tadu. Tadü ka-yi la ena angbü fi badi, ah ti anza de. ²³ Te sikipi engu ena akoro, yi ena adi awu ngü ka-ra areke. Yi ti ayi-ta ra tîne de.

Ngü te ma ngbü emala fü yi, ah de zu ngü. Te yi ena ayi-ta Wüba teka wü ngü 'buru te iri ra la, Wüba ena ato wü ngü la fü yi 'buru. ²⁴ Kü baka te nih ngbü de nih ma ne, yi yo e te iri ra kpaka Wüba nda-yi la de. Te di bala, yi yo e eyo kpaka Wüba, ah ena ato e la fü yi ato, fü yi angbü de mere tadu. ²⁵ Ma ngbü emala wü ngü la fü yi 'buru gbü mani. Amba gbü sikipi

te ena akoro, ma ti amala ngü fü yi tîne gbü mani de. Ma ena amala nga Wüba fü yi tîne mbölö. ²⁶ Gbü wü sikipi te ena akoro la, yi ena ayi-ta wü ngü 'buru kpaka Wüba te iri ra. Wüba ena amere wü ngü la amere 'buru fü yi. Angü yi ena angbü eyo e kpaka Wüba tîne me-yi sidi nga ra, fü ah angbü eto wü ngü la fü yi, ²⁷ angü ah le ngü ka-yi fa sü. Kükürü de, angü yi le ngü ka-ra eyi de maguma yi biringbö. Yi le kphah ngü te ma ngbü emala fü yi, gü ba, ma de Ye Me, ne eyi. ²⁸ Wayi, ma yia ta kpaka Wüba, akoro füh kotö sene. Amba titine dene ma yia eyi ece kotö ne, adu kpaka Wüba."

²⁹ Fütanga ngü la, fü wü kpara ka Yesu adu amala ngü feke, gü ba, "Wayi! Mü mala ngü dela fü a tîne eyi mbölö! Ah de mani gbü ye tîne de! ³⁰ Fanü, a wu eyi kpo, gü ba, mü wu wü ngü 'buru. Ngü tîne te a ngbü efi emaguma a afi, o a mala ngü la fü mü la de ne, mü wu ngü la, lügü kphah eyi! Tekä ngü la, a wu tîne eyi kpo, gü ba, amba mü zu de Ye Me fanü." ³¹ Yesu gü ba, "Bala? Yi to maguma yi eyi fere fanü? A'a. Maguma yi ka-ye fi la bü 'basu 'basu. ³² Yi ena awu ngü la enatikine, angü yi ena akpe, abaya 'buru, ace ra kpikpi ra. Amba ma kpikpi ra nda-ra de, angü Wüba ena ato wazi fere.

³³ Dela eyi ngü te ma mala fü yi, teka fü yi angbü de gu ngü emaguma yi sidi nga ra. Füh kotö ne, wü kpara te ewü le ngü ka-ra de, wüh ena ato cinga te-yi. Yi rü kpekpeke, yi kpe cürü de. Ma ena ale-ta ngü te yi, angü wazi ra fa nda wü kpara füh kotö ne 'buru."

Dela eyi ngü ta te Yesu mala fü wü kpara ka-ye, gbü sikipi te wüh zoro engu tete na ne.

17

Dene ngü te Yesu ku gba di kpaka Wö ye, teka wü kpara ka-ye

¹ Fütanga ngü te Yesu mala fü wü kpara ka-ye la, fü engu ayia ae jia ye tikpi, aku gba fü Wö ye, gü ba, "Wüba, mü to wazi fere, angü sikipi ka kpi ka-ra ti eyi dene. Mü to wazi fere, de ma rü kpekpeke gbü cinga la, teka fü wü kpara adu awu wazi mü eküte ra, fü ewü angbü egbo nga iri nih gbü ngü la. ² Ma yi-ta mü teka ngü la, angü mü o ra ta ba miri gbü nzö wü kpara füh kotö ne 'buru, teka fü ra aküwa wü kpara te mü to ewü fere ne."

³ Yesu mala ngü la kükürü de, angü wü kpara ti eyi aküwa fi mere badi, te ewü to maguma wü eyi fü Me, te di de zu Me fanü fanü ne. Ah le kphah de wüh to maguma wü fü Yesu Kurisito, angü ah

de kpara te Me tima engu teka aküwa wü kpara.

⁴ Yesu gü ba, "Wüba, tima ta te mü to fere amere ne, ma mere nza eyi. Ma mala ngari mü eyi fü wü kpara, kpah ba e te mü mala fere ne, fü mere bi ewü ato maguma wü fü mü. ⁵ Titine Wüba, te ah bala la, ma ngbü eyi-ta mü, de mü to wazi fere, teka fü nih adu angbü tundu ake nih ma agbü kpi kpala, baka e ta te nih ngbü tundu ake nih ma te enga gina, o nih mere kotö ne la de ne.

⁶ Wüba, mü ceka wü kpara ka-ra, te mü fe ewü esüka wü bu wü, ato fere ne. Angü ma mala nga mü eyi fü ewü 'buru, fü ewü aje ngari mü kpah eyi, da emere ereke areke. ⁷ Te di bala, wüh wu kpah eyi, gü ba, wü ngü 'buru, de te ma ngbü emala fü ani ne, ma je gömö mü. ⁸ Angü ngari mü, ta te mü to fere ne, ma mala eyi 'buru fü ewü. Fü ewü ale ngü la areke areke, ato maguma wü fü mü. Wüh wu kpah eyi kpo, gü ba, ma de Ye mü, te mü tima ra me-mü.

⁹ Wüba, ma ngbü eyi-ta mü teka wü kpara ka-ra ne, de mü le ta-ngü te ewü, da eto wazi fü ewü, angü wüh kawü de wü kpara ka-mü, te mü fe ewü, to fere. Ma yi-ta mü teka wü kpara 'buru nda-ra de, 'duwa teka wü kpara ka-ra ne. ¹⁰ Angü wü kpara ka-ra 'buru de wü kpara ka-mü. Kpah bala, wü kpara ka-mü 'buru de wü kpara ka-ra, angü mü fe ewü, to fere me-mü. Fü ewü awu wazi ra, gü ba, ma de Ye mü fanü. ¹¹ Wüba, ma ngbü eyi-ta mü, de mü mere kpa te wü kpara ka-ra ne gbü wazi ka-mü, teka de wüh rü kpekpeke sisi nga ra, angü ma ena adi tine füh kotö sene ma. Kpah bala, ah le de mü to wazi fü ewü, teka fü fingangü ka-ewü angbü biringbö, fü ewü adi ele tewü, baka nih ake nih ma, te fingangü ka-nih di biringbö ne. Mü mere kpa te ewü, angü süka ewü ena adürü. ¹² Baka ta te ma ngbü de ewü füh kotö sene ne, ma ngbü eceka kpi fütanga ewü me-ra, da ele ta-ngü te ewü, de wüh rü kpekpeke gbü ngü ka-mü. Kpara te dürü esüka ewü, ah ngbee biringbö, te yia ce ngü ka-mü. Ah de kpara te mü mala nganga ta gügü, gbü *Ngari mü, gü ba, engu ena adürü ne.

¹³ Wüba, titine ma le eyi adu ka-ra kpaka mü. Baka te ma ngbü de wü kpara ka-ra füh kotö sene ne, ma mala bi wü ngü eyi fü ewü, teka de wüh rü kpekpeke gbü ngü ka-ra. Tekan gü la, wüh ena angbü de mere tadu, kpah baka e te ma ngbü de tadu teka ngü ka-mü ne. ¹⁴ Ma mala ngari mü eyi fü ewü, fü ewü ayia ale ngü la. Wü kpara de te ewü le ra de ne, ngbü ekpü ewü ka ngü la, angü wü kpara ka-ra le *siti ngü ka wü kpara la nda-wü de, kpah baka ra, te ma le siti ngü ka-ewü de

ne. ¹⁵ Wüba, mü le ta-ngü te ewü, angü wüh ti ace sü füh kotö ne la de. Ma ngbü eyi-ta mü, de mü liki *Satana eküte ewü asidi, angü ah ena afti ewü. ¹⁶ Wüh le siti ngü ka wü bu wü füh kotö ne nda-wü de, fü ewü adu alala ka-wü gbü nga ra, angü ma le siti ngü ka wü kpara füh kotö ne kpah de. ¹⁷ Te di bala, ma ngbü eyi-ta mü, de mü fü ewü ba wü di mü, de ngari mü, angü wüh le ngari mü eyi de maguma wü. ¹⁸ Angü ma ena atima ewü, amala ngari mü fü wü kpara, kpah baka e te mü tima ra, amala ngari mü füh kotö ne. ¹⁹ Te di bala, ma to te-ra eyi akpi teka ewü, teka de wüh to kpah te-wü 'buru 'buru, gbü ngü ka-mü.

²⁰ Wüba, ma ngbü eyi-ta mü teka wü kpara ka-ra, te a ngbü de ewü ne. Ma ngbü kpah eyi-ta mü fü wü gara kpara, te ewü ena ato maguma wü fere sisi, teka ngari mü, te ewü ena aje gömö ewü ne. ²¹ Mü to wazi fü ewü, teka fü fingangü ka-ewü angbü 'buru biringbö, baka e te fingangü ka-nih di tundu ake nih ma ne. Mü to wazi fü ewü teka fü fingangü ka-ewü angbü biringbö, fü ewü alala gbü ngü ka-nih. Te wü kpara füh kotö ne ena awu fingangü ka-ewü biringbö bala la, wüh ena awu fanü, gü ba, ma de Ye mü, te mü tima ra me-mü. ²² Wazi ta te mü to fere ne, ma to eyi fü ewü, teka fü fingangü ka-ewü angbü di kpah biringbö baka nda-nih. ²³ Baka te fingangü ka-mü di emaguma ra ne, ah le de nda-ra ngbü kpah emaguma ewü, teka de fingangü ka-ewü ngbü kpah biringbö. Angü, te wü kpara füh kotö ne wu bala la, wüh ena awu fanü, gü ba, ma de Ye mü, te mü tima ra me-mü. Fü ewü awu kpah, gü ba, mü ngbü ele wü kpara ka-ra kpah baka e te mü ngbü ele ra.

²⁴ Wüba, ma ngbü eyi-ta mü teka wü kpara ka-ra, te mü to ewü fere ne, angü ma ngbü ele de a ngbü tundu de ewü, kpaka mü agbü kpi kpala. Tekan de wüh wu wazi ra, wazi ta te mü to fere agbü kpi ne, angü mü le ra ta eyi gügü, o nih reke kotö ne la de.

²⁵ Wüba, mü de züka kpara, amba wü kpara füh kotö ne wu mü nda-wü de. Ma wu mü ka-ra bü me-ra. Wü kpara ka-ra ne wu mü kpah eyi, gü ba, mü tima ra me-mü. ²⁶ Angü ma mala ngü ka-mü eyi fü ewü. Ma ena angbü kpah emala ngü ka-mü fü ewü bala, teka fü fingangü ka-ra angbü emaguma ewü, teka fü mü ale ewü de maguma mü 'buru, kpah baka e te mü ngbü ele ra ne."

Dela gba ta te Yesu ku kpaka Wö ye, teka wü kpara ka-ye.

18

Dene ngü te wüh zoro Yesu tete na

Matayo 26:47-56; Marako 14:43-50;

Luka 22:47-53

¹ Te Yesu ku gba kpaka Wö ye nza tete, fü ah ayia de wü kpapa ka-ye la, anü kpa etangu gara ngu de iringi ye Kidirona. Fü ewü anü akoro gbü gara sü kpala, te wüh ru riru de iringi ye Olive gbügbü na. ² *Yuda Keriyota wu sü engu la ta kpo, angü Yesu ngbü ta enü de wü kpapa ka-ye kpala.

³ Fü Yuda Keriyota ayia anü gbü mani, amala ngü la fü wü mere *kovo* ka wü Yisarayeale, gü ba, "Wü Yesu ladü kpikpi wü gbü gara sü kpane." Te wü kovo la je ngü la bala, fü ewü ayia bü kere, ai wü marajümiya,† teka de wüh nü, wüh zoro Yesu kpala. Fü ewü atima ewü de wü Keriyota, de ah nü, ah gü tamu sü la fü ewü. Wüh 'buru de wü mere maguruma, de wü dü esaka wü, kpa de wü ke, angü ngü la ngbü ta emere te-ye gbü biti.

⁴⁻⁵ Te Yesu wu wü marajümiya, te Keriyota ngbü ekoro de ewü la, fü ah ayia anü, amaka te-ye de ewü, angü ah wu eyi, gü ba, sikipi ka cinga ka-ni koro eyi dela. Fü ah ayi-ta ewü, gü ba, "Yi ngbü egiri neh da?" Wüh gü ba, "Ani ngbü egiri Yesu, kpapa ka Nazareta." Fü Yesu alügu ngü fü ewü, gü ba, "Kpapa te yi ngbü egiri ne, ah de-ra. Ma dene."

⁶ Te wü kpapa la je ngü te Yesu lügu fü ewü la, fü ewü aviti, adu kpa sidi ka cürü, atí 'buru kötö, ngebele kübaka! ⁷ Fü Yesu adu kpa ayi-ta ewü, gü ba, "Wüh ngbü egiri neh da ya?" Wüh gü ba, "Ani ngbü egiri Yesu, kpapa ka Nazareta ne." ⁸ Yesu gü ba, "Ma mala tine fü yi, gü ba, 'Kpapa de te yi ngbü egiri ne, ah de-ra.' Te ah bala la, de yi ce wü kpapa ka-ra, de wüh nü ka-wü."

⁹ Yesu mala ngü la bala, teka de wüh mere e azoro wü kpapa ka-ni de, kpa baka ngü te engu mala tine fü Wö ye, gü ba, "Wö ni, ni ceka kpi fütanga wü kpapa, ta te ye to fü ni ne eyi reke areke. Süka ewü biringbö düri esaka ni nda de."[‡]

¹⁰ Te Petero wu, gü ba, wü kpapa la le eyi azoro Yesu ne, fü engu ayia agbi maguruma ka-ye, atí te gara kpapa ka tima ka mere kpapa füh kpökpö,§ ade gügüje na ka kokpa, akolo tuu! ¹¹ Fü Yesu amala ngü fü Petero, gü ba, "Ayí! Mü mere bala teka ne? Mü za maguruma ka-mü, mü lügu da ye! Cinga te Wüba le de ma zü ne, ma tí ace nda-ra de!"

¹² Fütanga ngü la, fü wü marajümiya de wü mere kpapa ka-wü, de wü gara *kovo, ayia azoro Yesu, ai kpakpa na de ku, gö gö gö! ¹³ Fü ewü aza Yesu, anü di engagira gara mere kovo ka wü Yisarayeale de iringi ye Anasi, te di de wügingi ye Kayafa, kpapa te ngbü füh kpökpö ne. ¹⁴ Ah de Kayafa ta te mala ngü fü wü kovo ka wü Yisarayeale, gü ba, "Ah reke ta ngbüru pe te kpapa biringbö ena akpi me-ye, teka aküwa mere bi wü kpapa 'buru," ne.*

Dene ngü te Petero cere nga ye teka Yesu

Matayo 26:59-66, 69-75; Marako 14:55-72; Luka 22:55-62, 66-71

¹⁵ Te wüh ngbü enü de Yesu tete, fü Petero angbü efa nga ewü gbü zi. Fü gara *kpapa ka Yesu angbü kpa efa nga ewü gbü zi. Fü ewü afa nga wü Yesu, zalü akoro di emöngiti 'baranga ka Anasi. Fü kiri ye Petero la ayia ari kpa gbü nga wü Yesu kpala, angü mere kpapa la wu engu kpo. ¹⁶ Da Petero te ena ari kpala nda ma, angü wüh wu engu de. Ah ngbü nda-ye ciki etanü. Te kiri ye na la wu bala, fü ah adu akoro amala ngü fü würise, te ngbü efete möngiti ka 'baranga la, de ah ce kaje fü Petero, teka de engu ri kpa mini. Fü würise la ale ngü la. Fü Petero ayia ari agbü 'baranga la. ¹⁷ Fü würise la aceka Petero. Fü ah ayia ayi-tata, gü ba, "Mü de süka wü kpapa ka Yesu ne de?" Petero gü ba, "A! Ma de kpapa kaka nda-ra de!"

¹⁸ Gbü laki la, wü marajümiya de wü kpapa ka tima ka köti la, deke ta wa ka-wü, eya te-wü tete ka zü. Fü Petero ayia anü ari kpa esüka ewü kpala, da eya te-ye.

¹⁹ Amba Yesu, mü ka-mü kpa esambü. Fü Anasi akpo da eyi-ta Yesu kpekpeke, gü ba dene, "Ye mala la nga wü kpapa ka-ye fü ani. Wüh neh fe? Wüh ladü gbe? Ye ngbü eri ewü neh, de ne riri ne?" ²⁰⁻²¹ Fü Yesu alügu ngü fefe na, gü ba, "Angü mü ngbü eyi-ta ra de bala, neh teka ne? Te mü le akolo liya ka-ra la, de mü kolo mbi! Amba ah le de mü i wü gara kpapa, teka de wüh mala nga ra fü mü me-wü. Angü ma mala ngü esalakumu nda-ra de. Ma ngbü ta eri wü kpapa la ngbaangba gbü jia wü kpapa 'buru. Gara kpa *esambü ka biti-te ka-nih, gara kpa etambasü *Mere Kambü ka Me."

²² Fü gara marajümiya ayia abe gbüra Yesu, amala ngü fefe, gü ba, "Ye ngbü elügu ngü fü mere kpapa bala, teka ne?" ²³ Yesu gü ba, "Mü be ra baye? Ngü ladü bala? Te ma mala siti ngü la, de mü mala nga siti ngü ka-ra la, gbü jia wü kpapa. Te

* **18:3** 18:3 Wü kovo la de wü mere mürü gele, de wü Farusi. † **18:3** 18:3 Wü marajümiya la, gara ewü de wü marajümiya ka wü kovo la, gara ewü de wü marajümiya ka wü Ruma. ‡ **18:9** 18:9 Mü ena amaka ngü la gbü

Yüwane 17:12. § **18:10** 18:10 İri kpapa ka tima la de Malakusu.

* **18:14** 18:14 Mü ena amaka ngü la gbü

Yüwane 11:50.

ma mala züka ngü ne, mü du be ra, neh teka ne?"

²⁴ Fū Anasi ayi-ta Yesu ma, Yesu lügü ngü nda de. Fū ah ayia atima Yesu engagira Kayafa, o wüh furu ku te kpakpa na la de.

²⁵ Petero, mü fi bü engbü de wü kpara la eküte wa sela. Fū gara süka ewü ayi-ta Petero, gü ba, "Mü de kpara ka Yesu de?" Petero gü ba, "A'a! Ma de kpara kaka ndara de!" ²⁶ Gara kpara ka tima ka Kayafa ta kphah ladü sela, te di de mürü ye kpara ta te Petero de gügüje na ne. Fū komoko la ayia ayi-ta Petero, gü ba, "Mü de kpara, te ma wu engu de wü Yesu kpane, ne de?" ²⁷ Fū Petero alügü ngü fefe, gü ba, "Ma de engu nda-ra de!" 'Duwa ngbere! de gba moko-ngü mini, kphah ba e te Yesu mala fū Petero ne.†

Dene ngü ka Yesu engagira Miri Pilatü Matayo 27:1-2, 11-31; Marako 15:1-20; Luka 23:1-5, 13-25

²⁸ Baka te Kayafa yi-ta Yesu nza tete, fū ewü aza Yesu, gügü kpurutokokpi la, anü di kpa gba gara mere kpara ka wü *Rüma, de iri ye *Pilatü, te mere miri ka wü Rüma o engu, de ah ngbü gbü nzö wü kpara ka *Yudaya ne. Amba wü *kovo ka wü Yisarayeleye le ari kpa esambü ka Miri Pilatü nda-wü de, angü engu de *ganzi kpara. Wüh ngbü ta e'bi te-wü teka *Karama ka Pasika. Angü gele ka-ewü gü ba, te mü ri kpa esambü ka ganzi kpara la, mü ti azü karama engu la de. Tekka ngü la, fū ewü atima Yesu kpa esambü, kpaka Miri Pilatü kpikpi ye, de wü marajümiya ka-wü. Amba wüh ngbü ka-wü ciki kpa etanü.

²⁹ Fū Miri Pilatü, akoro kpa etanü, ayi-ta ewü, gü ba, "Angü komoko la mere ne siti ngü ne? Te yi za bü engu, koro di kpaka ra ne." ³⁰ Wüh gü ba, "Te komoko la ena amere ta siti ngü de la, de bane a ti aza engu akoro di kpaka mü kphah de." ³¹ Miri Pilatü gü ba, "Ah mbi. Te ngü ka-yi bala la, ma ti ari gbügbü nda-ra de. Yi za engu eza, yi nü di, de yi to kuru tete, baka e te di gbü riri ka-yi." Wüh gü ba, "A'a! Ah le de wü mörö engu amörö! Amba wazi a teka amörö engu nda ma, angü riri ka-yi, wü Rüma, gü ba, a ti amörö kpara de tete-nda-a de. Ah le de yi to wazi fü a me-yi."

³² Wü *Yisarayeleye to Yesu fū Miri Pilatü ne, teka de engu mörö Yesu, baka te di gbü gele ka wü Rüma. Fū ngü la ayia atü kpini de ngü ta te Yesu mala, gü ba, "Te wüh mörö ni la, wüh ena ae ni eküte rü kpa tikpi."‡

³³ Fū Miri Pilatü adu ari kpa esambü, te wüh ngbü ekolo liya ka wü kpara gbügbü

ne. Fū ah ai Yesu engagira ye, ayi-tata, gü ba, "Mü ngbüdü de mere miri ka wü Yisarayeleye fanü?" ³⁴ Yesu gü ba, "Wüh mala ngü la fū mü amala? Anga mü fi ngü la de tete-mü?" ³⁵ Miri Pilatü gü ba, "Mü ngbü emala ngü fere bala, ma de engu Yisarayeleye? Ma ka-ra de engu Rüma! Ma wu ngü ka-yi la nda-ra de. Wü nguwa mü, wü kovo ka-yi, za mü, koro di engagira ra me-wü. Te di bala, ma le ayi-ta mü, angü mü mere fū ewü, ne siti ngü ne?" ³⁶ Yesu gü ba, "Ngü ka-ra baka ngü ka wü miri füh kotö ne nda de. Te ma ena adi ta ba wü miri füh kotö ne la, de bane wü marajümiya ka-ra koro ta eyi, agü gü de wü marajümiya te ewü zoro ra ne, aküwa ra esaka ewü. Amba ngü ka-ra ka-ye kpikpi ye. Wazi ra teka angbü ba miri, koro ka-ye kpaka Me." ³⁷ Miri Pilatü gü ba, "Mü zu de miri fanü?" Yesu gü ba, "Wayi, mü mala eyi! Si-ngü te ma koro tete na füh kotö ne, ah teka amala zu ngari Me fū wü kpara. Mene kpara te di de kpara ka Me fanü fanü, ah ena aje riri ka-ra me-ye." ³⁸ Miri Pilatü gü ba, "Ho! Mü gü ba, 'Ni koro teka amala ngari Me fū wü kpara?' Dela neh lö ngari Me lö?"

Fū Miri Pilatü adu akoro kpa etanü, kpaka wü kovo ka wü Yisarayeleye la, amala ngü fū ewü, gü ba, "Ma giri siti ngü ka komoko la eyi ma, ma maka ndara de." ³⁹ Te di bala, ma du fi nga gara ngü, maka eyi. Te ma ena ace kpa tete na la, ah ena adi esiti? Angü engu de miri ka-yi. Kphah bala, enatikine, ah de mere sikipi ka *karama ka-yi." Miri Pilatü mala ngü la bala, angü ta gbü wü re 'buru, gbü gele ka wü Yisarayeleye, ah le de mere kpara di ece kpa te gara kpara ka ku biringbö, gbü sikipi ka Pasika la.

⁴⁰ Baka te wü kovo la je ngü te Miri Pilatü mala fū wü, gü ba, "Ni le ace kpa te Yesu ne," fū ewü akpo amala ngü de rere, gü ba, "Yesu nda kü de! A le nda-a Baraba!" Baraba engu ne, ah ka-ye de siti kpara ka gü, te ngbü egü gü de wü Rüma, teka tö ka-wü.

19

¹ Fütanga ngü la, fū Miri *Pilatü ayia amala ngü fū wü marajümiya ka-ye, de wüh süma Yesu de juru. Fū ewü ayia asüma Yesu de ka. ² Te wüh süma Yesu tete, fū wü marajümiya akpo angbü emü engu. Fū ewü agara bibi gbü ti, ato gbü nzö Yesu baka *madudu ka wü miri. Fū ewü adu aza diri ngboro bongo ka-ewü, nzenze baka nda miri la, ato kphah eküküte. ³ Fū ewü akoro, angbü ezuru engagigira, da egü mandü fefe, gü ba, "Wayi! Mandü fū

† 18:27 18:27 Mü ena amaka ngü la gbü Yüwane 13:38. Yüwane 12:32-33.

‡ 18:32 18:32 Mü ena amaka ngü la gbü Yüwane 3:14-15;

ye, mere miri ka wü *Yisaraye!e!" Fū ewü angbü ebe gbügbüra na.

⁴ Fütanga ngü la, fū wü marajümiya alügü Yesu kpaka Miri Pilatü. Fū Miri Pilatü ayia adu akoro kpa etanü, kpaka wü *kovo la, amala ngü fū ewü, gü ba, "De-wü deyi, ni le ace kpa te komoko la, angü ni gürü siti ngü kaka la nda-ni eyi ma, ni maka nda-ni de. Ni süma engu eyi. Ni ti ato gara kuru tete, nda-ni tüne de. Wüh ena aza engu, akoro di, fū wü awu engu cu de jia wü." ⁵ Fū ewü anü akoro de Yesu kpa etanü, gbü jia wü kpapa la. Bibi te wüh gara gbü ti ne, fi bü ladü gbü nzönzö, kpah fi bü de nze bongo la eküte ye. Fū Miri Pilatü amala ngü fū ewü, gü ba, "Engu tüne eyi dela."

⁶ Te wü kovo, de wü marajümiya ka-wü, wu Yesu bala, wüh le awu cicinga na nda-wü de. Wüh ka-wü fi bü de rere ka-wü la, da emala ngü de mere ri wü kpa tikpi, gü ba, "Wüh mörö engu amörö! Wüh bere engu eküte rü!" Miri Pilatü gü ba, "A'a! Ma le nda-ra de! Te yi le bala la, yi za engu, de yi nü mörö me-yi, teka de liya la ngbü gbü nzö yi! Angü ma gürü siti ngü kaka nda-ra eyi ma." ⁷ Fū wü kovo la alügü ngü fefe, gü ba, "Gbü riri ka-ani, ah le de engu kpi akpi, angü ah mala, gü ba, 'Ni de Ye Me.' Ah le ao te-ye ba Me!"

⁸ Te Miri Pilatü je iri Ye Me de bala, fū cürü ayia amere engu afa sü. ⁹ Fū ah aza Yesu, adu di kpa esambü, ayi-tata, gü ba, "Mü de ye da?" Yesu le ngü fefe na nda-ye de. Ah nga ka-ye tüü! ¹⁰ Miri Pilatü gü ba, "Ah mere baye, te mü le alügü ngü fere de ne? Mü wu de, gü ba, ma de wazi amörö mü? Anga ma kpah de wazi ace kpa te mü?" ¹¹ Yesu gü ba, "Wayi, mü de mere kpapa fanü fanü, angü Me to wazi la fū mü me-ye. Te Me ena ato ta wazi la fū mü de la, de bane mü ti amere ngü fere kpah de. Te di bala, siti ngü ka wü kpapa, te ewü zoro ra, akoro di engagira mü ne, ah fa nda-mü eyi ka."

¹² Te Miri Pilatü je ngü la bala, fū ah ayia akoro kpa etanü, kpaka wü kovo la, amala ngü fū ewü, gü ba, "Ni le ace kpa te Yesu." Wüh gü ba, "Te mü ce kpa te komoko la, mü ena awu ngü la me-mü! Angü ah o te-ye ba miri. Te di bala, ah ngbü ele amere gü kpaka *Kayisara, te di de mere miri kanih 'buru ne. Te mü le ngü kaka la, amba mü le ngü ka Kayisara nda-mü de. Te mü ce kpa mü tete la, a ena atima ngü la fū Kayisara, fū mü awu ngü ka-mü!"

¹³ Te Pilatü je ngü la bala, fū cürü Mere Miri Kayisara arü tete, angü Kayisara de mere miri ka-ewü fanü. Fū Miri Pilatü

adu amala ngü, de wüh koro de Yesu kpa etanü. Fū ah ayia angbü füh kpökpö ka-ye, te engu ngbü ekolo liya ka wü kpapa fefeh na.* ¹⁴ Ngü la ngbü ta emere te-ye etü ra, gbü sikpi te wüh ngbü ereke te-wü teka azü mere *Karama ka Pasika.

Fū Miri Pilatü ayia angbü kötó, teka akolo liya la. Fū ah amala ngü fū wü kovo la, gü ba, "Mere miri ka-yi dela!" ¹⁵ Fū ewü amala ngü de mere ri wü kpa tikpi, gü ba, "Ye mörö engu amörö! Ye mörö engu amörö! De ye bere engu füh rü!" Pilatü gü ba, "Ah ti eyi fū ra amörö miri ka-yi?" Wü kovo la gü ba, "Ani le ngü ka komoko la nda-ani de! Miri ka-ani ka-ye bü Kayisara."

¹⁶ Te Miri Pilatü wu, gü ba, ngü ka wü kpapa la fa ni eyi ne, fū engu ayia ale, de wüh za Yesu, wüh nü di, wüh mörö. Angü gara ngü te engu ena amere, nda tüne ma.

Dene ngü te wüh bere Yesu di füh rü gbegete

Matayo 27:32-44; Marako 15:21-32; Luka 23:26-43

Fütanga ngü la, fū wü marajümiya ayia aza Yesu kpaka wü. ¹⁷ Fū ewü aza mere tiri rü, te ewü ena abere engu fefeh na ne, ao esüsügü. Fū ewü aza engu, anü di agbü sü de iri ye Gologota,[†] te di ba e te wüh gü ba, sü ka biki-nzö.

¹⁸ Te wüh nü koro tete kpala, fū wü marajümiya ayia aza Yesu, abere kpakpa na de wü lölö na eküte *rü gbegete la. Fū ewü adu ae engu kpa tikpi. Fū ewü ayia aza kpah wü gara kpapa 'basu, abere ewü füh wü rü gbegete, ao ede Yesu sela, gara gbü kokpa, gara gbü kamisü.

¹⁹⁻²² Fū wü marajümiya aza ngü te wüh ba, gü ba, "Dene Yesu, kpapa ka Nazareta, Mere Miri ka wü Yisaraye!e," ne, ao eküte rü gbegete la kpa tikpi. Angü Miri *Pilatü mala ta ngü fū wü kpapa ka-ye, de wüh ba ngü la bala. Wüh ba ngü la gbü wü ngü bata, gbü ngü ka wü *Rüma, gbü ngü *Ebere, kpah gbü ngü *Giriki, teka fū wü kpapa 'buru adi etanga. Baka te wü mere *kovo ka wü Yisaraye!e wu ngü te Miri Pilatü ba la, fū ewü amala ngü fefe, gü ba, "Komoko la de miri ka-ani nda de! Ah le de wüh fū ngü la afü, gü ba, 'Engu o te-ye ba miri de tete-ye.' " Miri Pilatü gü ba, "Wüh ti afü ngü la de. Ngü te ni ba eyi, ah ngbü fi bala." Fū wü marajümiya aza e la, ao eküte rü gbegete ka Yesu kpa tikpi, teka fū wü kpapa adi eceka. Fū mere bi wü kpapa angbü etanga ngü la, angü sü engu la ta gbamari ede mere köti.

* **19:13** 19:13 İri sü la de Gabata, angü wüh fa ta da kötó gbü sü la. † **19:17** 19:17 İri Gologota la, ah ka-ye gbü ngü Ebere. Wü Rüma ngbü ei sü la gbü ngü ka-wü, gü ba, Kalavariya.

23-24 Te wü marajümiya bere Yesu füh rü ghegbete nza tete, fü ewü aza mere bongo kaka ne, aye süsüka na esüka wü, angü wüh ta de wü kpara bala. Fü ewü adu kpah aza mene bongo kaka-na, te su fa sü ne. Fü ewü amala ngü esüka wü, gü ba, “Ani mere e asörö engu ne de. Angü bongo la reke fa sü. Te di bala, ah le de ani sö gümare tungüngü. Mene kpara te ena azü la, de engu za e ka-ye fü ye.” Fü ewü amere ngü la kpah bala, ba e te wüh ba gbü *Ngari Me ta gügü, gü ba,

“Wüh ye süka bongo ka-ni esüka wü.

Gara bongo ka-ni la, wüh sö gbü gümare.”‡

25-26 Baka te wü marajümiya ngbü emere wü ngü ka-wü la tete, wü gara wü kpara 'buruve ta ladü ede rü ghegbete la. Ah de wü ni ye Yesu, ake enga ni ye, bete *Mariya wara Kiliyopa, abe kpah te *Mariya Egba-Magadala, bete gara *kpara ka Yesu biringbö, te Yesu le ngü kaka fa sü ne.§ Te Yesu wu ni ye, te ngbü de cinga ede kpara ka-ye la, fü ah ayia amala ngü fü ni ye, gü ba dene, “Wüna, mü ceka komoko la, ah tine eyi ba enga mü.” 27 Fü ah adu kpah amala ngü fü kpara ka-ye la, gü ba, “De-mü, mü za wüna tine ba ni mü.” Te di bala, fütanga kpi ka Yesu, fü kpara la aza *Mariya ni ye Yesu, adu di kpa gba ye.

Dene ngü ta kpi ka Yesu

Matayo 27:45-56; Marako 15:33-41;

Luka 23:44-49

28-30 Fütanga ngü la, fü Yesu adu angbü baaala. Fü engu ayia amala ngü, gü ba, “Gümü ngü ngbü emere ra.” Ngü la ti kpini de ngü ta te wüh ba gbü *Ngari Me gügü ne. * Gbü sü la, gara sila ta ladü kpala de fi gbü ye. Te wü marajümiya je, gü ba, Yesu ngbü eyo ngu ne, fü gara ewü anü aza e ba lifa, te di fö'dö fö'dö bane. Fü ewü ato eküte rü ba gala, ayia ato gbü fi la. Fü ah aza e la, ae, ato te komö Yesu, de ah 'bü. Te Yesu nzö fi la, fü ah awu, gü ba, ngü de te Wö ni tima ni amere ne, ni mere nza eyi 'buru. Fü ah adu amala ngü, gü ba, “Ah nza eyi!” Fü ah agü nzö ye, ace kpa te-ye, akpi.

Dene ngü teka kö Yesu

Matayo 27:57-61; Marako 15:42-47;

Luka 23:50-56

31 Sikipi ta te Yesu kpi tete na la, ah de sikipi te wü kpara ngbü ereke te-wü

tete na, teka mere *Karama ka Pasika. Te di bala, wü *Yisarayeale le kö kpara ngbü füh *rü ghegbete gbü biti la nda-wü de. Fü ewü ayia etamurago la, anü kpaka Miri *Pilatü, ayi-tata, teka akukuru lö wü kpara la, de wüh kpi kere, teka fü ewü aza kö ewü, anü di, ati. Fü Miri Pilatü ale ngü la fü ewü bala.

32 Fü wü marajümiya ayia akuru lö wü kpara 'basu, de te wüh bere ewü de wü Yesu ne. 33 Wüh te ekoro te Yesu, teka de ani kuru lölö na de, amba Yesu kpi ka-ye eyi. Fü ewü ayia agüka ka ngü la. Wüh du kuru lölö na nda-wü tine de. 34 Fü gara marajümiya ayia aza dü, asö sajikara Yesu di. Fü kpiri ngüte akpo da ekoro gbü nga dü la, de ngu gbü ye.

35 Ma wu ngü la cu de jia ra, ah de wu nda de. Fü ra ayia aba nga ngü la, teka fü yi ato maguma yi fü Yesu fanü fanü.

36 Ngü te wü marajümiya mere la, ah ti kpini de ngü ta te wüh ba gbü *Ngari Me gügü, gü ba, “Wüh kuru bibiki na biringbö nda-wü de.”† 37 Gara gü ba, “Te gara, wüh ena awu kpara, ta te wüh sö de dü ne.”‡

38 Te wüh ngbü emere ngü la, fü gara kpara de iri ye *Yüsefa, te di de kpara ka Arimatayo§ ne, ayia anü kpaka Miri Pilatü. Yüsefa ta de *kpara ka Yesu, amba ah le amala nga ye mbölö nda de. Ah ngbü ele ngü ka Yesu esalakumu, angü ah ngbü ekpe cürü wü mere *kovo ka wü Yisarayeale. Fü Yüsefa ayia ai maguma ye, anü kpaka Miri Pilatü, ayi-tata teka kö Yesu, de ni za, ni ti. Fü Miri Pilatü ale ngü la fefe. 39 Fü ewü anü aza kö Yesu ake Nikodemü. Ah de Nikodemü ta te nü kpaka Yesu gbü biti, teka aje ngü gögömö na ne. * Nikodemü za ta *züka mü de se ye,† akoro di, teka amoko eküte kö Yesu.

40 Fü wü Yüsefa ake Nikodemü ayia 'basu mini, aza kö Yesu, agaga de züka bu bongo, amoko züka se-mü la te kökö, baka gele ka wü Yisarayeale, te wüh ngbü emere teka mati kpara. 41 Fü ewü aza kö Yesu, anü di, ati mba kere kere. Angü sü te wüh bere wü Yesu tete ne, ah ta ghamari ede sü, te wüh ngbü eti wü kpara tete na. Wüh reke ta gara gö da sela baka mbükü, ce o nzo. Amba wüh ti kpara gbugbü na la de. 42 Fü ewü aza kö Yesu, ati sela. Wüh mere ngü la kere kere bala, o ra ti la de, angü

‡ 19:23-24 19:23-24 Mü ena amaka ngü la gbü Ci ka wü Davidi 22:18. § 19:25-26 19:25-26 Kpara te Yesu le fa sü

ne, ah Yüwane ye Zebedayo, te ba buku ne. Mü ena amaka ngü la gbü Masere Si-ngü. * 19:28-30 19:28-30 Mü ena amaka ngü la gbü Ci ka wü Davidi 22:15. † 19:36 19:36 Mü ena amaka ngü la gbü buku ka Gogo ka wü di engu Yisarayeale 12:46; Namba 9:12, bete Ci ka wü Davidi 34:20. ‡ 19:37 19:37 Mü ena amaka ngü la gbü Zakariya

12:10. § 19:38 19:38 Arimatayo de sü ka wü Yüsefa, te wüh bi engu tete. * 19:39 19:39 Mü ena amaka ngü la gbü Yüwane 3:1-15. † 19:39 19:39 Mü la de mire bete alowe. Titiri na fa sü, baka e 100.

sikpi ka Pasika koro eyi gbamari. Fū ewü awara mere ngbürükü da, ao emö gö da la.

20

Dene ngü teka züzükü ka Yesu gbü kpi Matayo 28:1-10; Marako 16:1-11; Luka 24:1-12

¹ Gbü sikpi ka biri ka wü *Yisaraye, te di de *sikpi ka Me ka-nih ne, bü gügü o kpi seke nza la de, fū *Mariya Egba-Magadala ayia anü kpa fūh mbükü Yesu. Ah te ekoro kpala, yirri! mere da, ta te wüh o emö mbükü la, ah ka-ye eyi edere sü. Fū engu ayia agüka, angbü de cinga teka ngü la.

² Fū ah ayia akpe kpaka wü *kpara ka Yesu, teka amala nga ngü la fū ewü. Fū ah amaka wü Petero, te ewü ngbü ake mene kpara ka Yesu, te Yesu le ngü kaka fa sü* ne. Fū ah amala ngü fū ewü, gü ba, "Ö! Wü di engu ni ni, wüh zi kö Yesu eyi. Anga wüh nü di, o neh kaye? Ni wu de! Ani ena amere ngü la neh baye?" ³ Bü 'duwa fū wü Petero ayia ake kiri ye la, akpe de mere woro, anü kpa fūh mbükü la.

⁴ Amba fū kiri ye Petero la ayia akpe de mere woro, akoro fi me-ye. ⁵ Te engu koro kpala, fū ah abiki, aceka kpi gbü mbükü, yirri! kö Yesu nda ma! Ah wu bü wü bongo, ta te wüh gaga kö Yesu di ne. Amba ah ri kpala nda de.

⁶ Petero, te mü koro nda-mü sidi ne, fū mü ayia ari 'duwa agbü mbükü, te wüh ji gbü gö da la, teka awu ngü la mbi mbi mbi. Fū ah awu kphah bü wü bongo la, te ewü ngbü kötö kpala. Kpara gbügbü nda ma. ⁷ Fū ah awu kphah gara bongo, ta te wüh buka gbüra Yesu ne. Ah ngbü ka-ye edere sü, ba e te wüh gara agara. Fū ngü la aga gbü jia Petero afa sü. ⁸ Fū kiri ye Petero la ayia ari kphah gbü nga Petero, agbü mbükü kpala. Te engu wu wü bongo la bala, fū ah ale, gü ba, Yesu zükü eyi gbü kpi fanü fanü.

⁹ Te wüh wu ngü la de jia wü bala, fū ewü adu ale. Fū ngü ta te wüh ba gügü gbü *Ngari Me ne, adu ari gbü nzö ewü. Angü, ta te enga gina, wüh wu si-ngü ta te wüh ba gbü Ngari Me, gü ba, "Yesu ena akpi, fū ah adu azükü," ne, nda-wü de.

¹⁰ Fū wü Petero ayia ago 'basu mini kpa eköti.

¹¹ Te wü Petero nü sü tete, fū *Mariya Egba-Magadala adu kphah akoro, angbü eku gba fūh mbükü la. Fū ah abiki, aceka kpi gbü mbükü la. ¹² Gbo! te wü *malayika ka Me 'basu, te küte ewü ngbü eci aci gbele gbele bala! Wüh ngbü

gbü sanga, ta te wüh o kö Yesu gbügbü na ne, gara ngbü eriri nzö, gara ngbü nda-ye etata lö.

¹³ Fū wü malayika la amala ngü fū Mariya, gü ba, "Wüna, mü ngbü eku gba, neh teka ne?" Fū Mariya alügü ngü fū ewü, gü ba, "Wüh za kö mere kpara ne ka-wü eyi. Ma wu de, anga wüh nü di, o ne neh kaye?"

¹⁴ Baka te Mariya ngbü fi bü da enda'ba te-ye teka ngü la, fū ah ayia afü te-ye, aceka kpi ekürufe ye bane, gbo! te gara komoko te rü ngbü ekükürufe sela. Anga ah kaye de Yesu, amba Mariya wu bala nda de. ¹⁵ Ah fi nda-ye, gü ba, ah de kpara te ngbü emere tima gbü sü la. Fū Yesu ayia ayi-tata, gü ba, "Ah mere baye, te mü ngbü eku gba de bala? Mü ngbü egiri neh da?" Fū Mariya alügü ngü fefe, gü ba, "Öö! Mere kpara, mü za kö miri ka-a ne me-mü? Te di bala, de mü mala fere ke, fū ra anü, aza e ka-ra."

¹⁶ Fū Yesu ai engu te iiri na, gü ba, "Mariya." Te Mariya je iri ye de bala ne, fū ah awu teke, gü ba, ah de Yesu. Fū ah afü te-ye kpakaka na, amala ngü, gü ba, "Apa! Mere kpara!" ¹⁷ Fū Mariya ayia ta, de ni faka engu. Yesu gü ba, "Mü mere e afaka ra de. Mü nü enü kpaka wü di engu wüna, de mü mala fū ewü, gü ba, 'Ma zükü gbü kpi eyi. Ma ngbü eyi ereke te-ra teka ago kpaka Wüba, te di de Me agbü kpi ne. Engu kphah de Wö yi, angü yi ngbü eje riri kaka-na.'"

¹⁸ Te Mariya wu ngü la bala, fū engu akpe anü amala ngü la fū wü *kpara ka Yesu, gü ba, "Wü di engu wüna, ma wu Miri Yesu ne eyi! Ah zükü gbü kpi eyi!" Fū Mariya akpo angbü emala nga wü ngü, de te Yesu mala fū ye ne, 'buru fū ewü.

Dene ngü te Yesu sere te-ye fū wü mürü tima ka-ye

Marako 16:14-18; Luka 24:36-49

¹⁹ Gbü sikpi engu la, ah te ekoro etamurago, fū wü kpara ka Yesu abiti te-wü kpa esambü. Wüh ni mö nga wü ani, angü wüh ngbü ekpe cürü, teka wü *kovo ka wü Yisaraye ena amere ani esiti.

Wüh te efü jia wü bane de, gbo! te Yesu, te koro, rü esüka ewü. Fū Yesu agü mandí fū ewü, gü ba, "Me di de yi." ²⁰ Fū ah agara tamu nga ka gbü kpa ye la fū ewü, de nga dü, te wüh sö sasajikara di ne. Te wü kpara kaka wu, gü ba, ah de Yesu fanü fanü ne, fū ewü angbü de mere tadu teka ngü la.

²¹ Fū ah adu kphah amala fū ewü, gü ba, "Me di de yi. Titine ma ena atima yi,

* 20:2 20:2 Kpara te Yesu le fa sü ne, ah de Yüwane, ye Zebedayo, te ba buku ne. Mü ena amaka ngü la gbü Masere Si-ngü. † 20:16 20:16 Mere kpara, gbü ngü Ebere, gü ba, "Raboni".

teka ato ngari ra fü wü kpara, kphah baka e te Wüba tima ra ne." ²² Füh ah ayia awo wazi ye gbü nzö ewü, gü ba, "Ma ngü eto wazi ka *Nzila Wazi Me fü yi, teka tima la. ²³ Mene wü kpara, te ewü ena aje ngari Me gömö yi, da eto maguma wü fü Me, yi ena ayi-ta Me, de ah boro *siti ngü ka-ewü. Me ena ale ngü la kphah bala. Amba mene ewü, te ewü le ato maguma wü fü Me de ne, siti ngü ka-ewü ena angbü gbü nzö ewü."

Dela ngü ta te Yesu mala fü wü kpara ka-ye, gbü sikipi te engu zükü tete gbü kpi ne.

Dene ngü ka Yesu ake Toma

²⁴⁻²⁵ Fütanga ngü la, fü wü kpara ka Yesu la adu amaka te-wü de wü Toma Dadase, te di gara kiri ewü ne. Füh ewü amala ngü fefe, gü ba, "Miri Yesu zükü eyi! Ani wu engu eyi cu de jia ani!" Toma gü ba, "Dela neh ene töndö ngü ne? Ma ti ale ngü la nda-ra de. 'Duwa te ma wu engu eyi cu de jia ra, fü ra ato jikpa ra gbü nga ka müsümarí de gbü kpakpa la, bete nga dü, de te wüh sö sasajikara di ne la, fü ra adu ale ngü la."

²⁶ Sidi nga sikipi lorozi, fü wü Toma adu abiti te-wü de wü bu ye la. Wüh ngbü kphah kpa esambü, ni mö nga wü ani. Füh Yesu akoro arü esüka ewü, agü mandí fü ewü, gü ba, "Me di de yi." ²⁷ Füh ah äi Toma, gü ba, "Toma, mü fi nda-mü, gü ba, ma zükü gbü kpi de? Mü nü akine, de mü ceka la kpa ra, de mü o jikpa mü gbü nga ka ne. De mü o kphah kpa mü gbü nga ka esajikara ra ne. Mü ngbü ega yiki, neh teka ne? Ah le de mü to maguma mü fere." ²⁸ Füh Toma ayia ale ngü, gü ba, "Ööö miri ka-ra, mü ngbüür de mere Me fanü fanü!" ²⁹ Yesu gü ba, "Mü wu ra cu de jia mü feke, fü mü adu ato maguma mü fere? Ah de züka ngü. Ah esiti de. Amba gara wü kpara, te ewü ena akoro sidi nga mü, ato maguma wü fere, o wüh wu ra la de ne, züka ngü ka-ewü ena afa nda-mü ka."

Dene si-ngü teka buku ne

³⁰ Dela wü ngü ta te Yesu mere, o engu di ta ta la füh kotö sene ne. Yesu mere ta mere bi wü kpeke ngü gbü jia wü kpara ka-ye, amba wüh ba wü ngü la 'buru gbü buku ne, nda-wü de. ³¹ Ma ba wü ngü la bala, teka fü yi ale, gü ba, Yesu de *E-küwa-nih, ah kphah de Ye Me fanü fanü. Wü di enga wüna, ah le de yi to maguma yi fü Yesu, teka fü yi aküwa fi mere badi.

21

Dene gara ngü te Yesu du kphah sere te-ye di fü wü kpara ka-ye

¹ Fütanga ngü la, fü Yesu adu kphah asere te-ye fü wü kpara ka-ye, ede mere ngu *Galilaya.* Amba ngü la mere te-ye ta bane. ² Ta gbü gara ra, wü Simüna Petero ngbü ta de wü Toma Dadase, bete Nataniyele kpara ka Kana, bete *Yakobo ake *Yüwane wü di Zebedayo, kphah de gara wü *kpara ka Yesu de 'basu ne. ³ Füh Petero amala ngü fü wü bu ye la, gü ba, "Ni le anü azoro si." Wü bu ye na la gü ba, "Ah mbi. Ani ena anü de wü." Füh ewü ayia anü, ali gbü *zabu, anü akoro kpa etü ngu, akpo angbü egü yimba ka-wü, teka azoro si. Amba gbü biti la, wüh maka se e mbele nda-wü de.

⁴ Baka te kpi ngbü eseke tete, bü gügü kpurutokokpi, fü ewü awu gara kpara te koro, rü kpa füh gümba la. Anga ah ka-ye de Yesu. Amba wüh wu, gü ba, ah de engu ne nda-wü de.

⁵ Füh Yesu ayi-ta ewü, gü ba, "Wü di engu ra, yi zoro si eyi?" Wüh gü ba dene, "A'a! A zoro si nda-a mbele de!" ⁶ Füh Yesu amala ngü fü ewü, gü ba, "Yi gü la yimba ka-yi to gbü kokpa, yi ena amaka si." Füh ewü ayia agü yimba ka-wü, ba e te Yesu mala la. Wüh te ga, ani gbeke yimba ka-ani etanü bane de, gbo! te mere bi wü si te sibi gbü yimba rudu rudu! Füh ewü egbeke yimba ka-wü la bi ma, ka tiri wü si la.

⁷ Gara *mürü tima, ta te Yesu le engu fa sü ne,† ta ladü sela. Te engu wu ngü la bala, fü ah awu teke, gü ba, kpara la ka-ye de Yesu. Füh ah amala ngü fü Petero, gü ba, "Amba kpara la ka-ye de Miri ka-ani." Te Petero je ngü la bala, fü engu agüka, ayia 'duwa, ato bongo ka-ye, angü ah ta ngürimu. Füh ah atí gbü ngu, akpo edo bojo, teka akoro kpakpa Yesu, kpa füh gümba. ⁸ Angü gümba la, ta mba gbmari, baka süka lö kama biri (100). Füh wü bu ye na angbü ka-wü ciki gbü zabu, angbü egbeke si ka-wü gbü yimba ne ferrre, akoro di kpa füh gümba.

⁹ Te wüh koro tete, fü ewü amaka Yesu kpala. Ah deke wa eyi, o si fefeh, angbü enzu. Ambata kphah ladü kpala. ¹⁰ Füh Yesu amala fü ewü, gü ba, "Yi za gara si te yi maka la, yi koro di akine."

¹¹ Füh Petero adu anü ali agbü zabu la, agbeke yimba de si gbü ye la, akoro di kpa füh gümba. Wü cögbörö si sibi gbü yimba la fa sü, baka kama biri teke 'basu nzükpa de füh ye bata (153). Yimba la ngbü ka-ye bü da ye, ah kolo kphah de.

¹² Füh ngü la ayia aga gbü jia ewü afa sü. Wüh le ta ayi-ta Yesu, gü ba, "Ye de neh da," ne. Amba wüh du yi-tata nda-wü de,

* 21:1 21:1 Wü Rüma ngbü ei ngu la, Tiberiya. † 21:7 21:7 Kpara te Yesu le fa sü ne, ah de Yüwane, ye Zebedayo, te ba buku ne. Mü ena amaka ngü la gbü Masere Si-ngü.

ka lümü, angü wüh wu eyi, gü ba, ah ka-ye de Yesu fanü.

Fü Yesu amala ngü fü ewü, gü ba, "Yi koro akine, yi ngbü kötö, azü e." Fü ewü akoro angbü edede na. ¹³ Fü Yesu ayia aza ambata bete si la, agafa fü ewü. Fü ewü azü.

¹⁴ Dela ta eabata ngü te Yesu sere te-ye di fü wü kpara ka-ye, fütanga züzükü ka-ye gbü kpi.

Dene ngü te Yesu mala fü Petero

¹⁵ Te wüh zü e la nza tete, fü Yesu aza Petero, anü di mba canza edere sü, amala ngü fefe, gü ba, "Petero,[‡] mü le ra eyi de maguma mü 'buru, fa nda wü bu mü?" Petero gü ba, "Wayi, mere kpara, mü wu kpo, gü ba, ma le ni eyi fanü fanü." Yesu gü ba, "Te ah bala la, ma ena ao mü ba kpara, te ena adi eceka kpi fütanga wü kpara kara, te ewü di ba kambiliki ne."

¹⁶ Fü Yesu adu kpah amala ngü la fü Petero, gü ba, "Petero, mü le ra eyi de maguma mü 'buru?" Petero gü ba, "Wayi, mere kpara, mü wu kpo, gü ba, ma le ni eyi." Yesu gü ba, "Te ah bala la, mü di eceka kpi fütanga wü kpara ka-ra."

¹⁷ Fü Yesu adu kpah, anda nga ngü la, gü ba, "Petero, mü le ra eyi fanü?" Fü Petero ayia angbü de cinga, teka ngü te Yesu yi-ta ye di, zalü du bata ne. Fü Petero alügü ngü fü Yesu, gü ba, "Mere kpara, angü mü wu maguma ra kpo, gü ba, ma le ni eyi fanü." Yesu gü ba, "Te di bala, de mü ceka kpi fütanga wü kpara ka-ra reke areke."

¹⁸ Fü Yesu adu amala kpah gara ngü fü Petero, gü ba, "Ngü te ma ngbü emala fü mü ne, ah de zu ngü. Baka ta te mü di la ka'dörö ne, mü ngbü ta emere wü ngü, ba e te mü ngbü ele. Mü ngbü ta ereke te-mü, ngbala ngbala, fü mü angbü enü gbü wü sü, ba e te mü ngbü ele. Amba, te mü ena agbe la, mü ti amere wü ngü la tüne de. Mü ena agbala kpa mü, fü gara kpara ai kpa mü la, angbü egbeke mü, enü di gbü sü, te mü le de." ¹⁹ Ngü de te Yesu mala la, ah le ta amala nga kpi, te Petero ena akpi di ne. Angü wüh ena amörö engu teka ngü ka-ni, teka te engu ngbü fi bü erü kpekpeke gbü ngü ka-ni. Te di bala, wü kpara ena agbo nga iri Me, teka ngü la. Fü Yesu adu amala ngü fü Petero, gü ba, "Mü lala gbü nga ra."

²⁰ Fü Petero afü te-ye, aceka kpi kpa sidi, awu kpara te Yesu le engu fa sü ne. [§] ²¹ Te Petero wu komoko la bala, fü ah adu ayi-ta Yesu, gü ba, "Anga komoko la? Ngü kaka ena adi baye?" ²² Fü Yesu alügü ngü fefe,

gü ba, "Mü yi-ta ngü bala, neh teka ne? Te ma le fü engu angbü ka-ye bala, akoro di gbü sikipi, te ma ena adu akoro tete na la, ah de ngü ka-mü? De-mü, ah le de mü lala gbü nga ra."

²³ Fütanga ngü la, fü ngü la ayia abaya esüka wü *kpara ka Yesu. Fü gara ewü akpo da efi ngü, gü ba, "Kpara la ti akpi nda de. Ah ena angbü ka-ye fi mere badi." Amba Yesu mala bala nda de. Ah mala ka-ye, gü ba, "Te ni le me-ni la, engu ena angbü ka-ye bala, akoro gbü sikipi te ni ena adu akoro tete na. Amba ah de ngü ka Petero nda de."

Dene adu ngü te Yüwane ba teka Yesu

²⁴ Kpara de te ba ngü ne, ah de-ra, *Yüwane, kpara de te Yesu le fa sü ne. Ma wu ngü la cu de jia ra, fü ra adu aba dene. Ngü de te ma ba ne, ah de wu de.

²⁵ Yesu mere ta mere bi wü ngü fa sü. Te ma ena angbü ta eba nga nzö ewü biri biri 'buru la, de bane ah ena anza mere bi wü köcökpa füh kotö ne 'buru.

Ngü te ma ba teka Yesu, ah nza bala.

[‡] 21:15 21:15 Petero de ye Yüwane. [§] 21:20 21:20 Kpara la, ah de engu ta te ngbü ghamari ede Yesu, o wüh ngbü ezü karama tete. Fü ah ayi-tata, gü ba, "Kpara te ena ato ye fü wü wügü neh da ya?" Ah ka-ye de Yüwane ye Zebedayo, te ba buku ne. Mü ena amaka ngü la gbü Masere Si-ngü.

Sapita 21:17-28:31 Ngü ka Pawülü te wüh i engu agbü ku

Dene wü ngü te Wü Mürü Tima ka Yesu ngbü mere sidi nga Yesu

Masere si-ngü

Buku ne, Luka ba kpah me-ye. Engu ba züka tofo ngü teka Yesu ne kpah me-ye. Ngü de gbü buku ne, ah ka-ye fi bü du tofo ngü, de te Luka ba teka ngü ka Yesu ne. Ah kpo te gogo ka Yesu agbü kpí, anü akoro te wü ngü te wü *mürü tima ka Yesu du ngbü mere sidi nga Yesu ne. Angü *Nzila Wazi Me to ta wazi fü ewü, fü ewü akpo da endoro, da emala ngü ka Yesu fü wü kpara. Wüh kpo de ngü la agbü Yerüsalema, anü akoro di agbü *Yudaya bete *Samaríya. Fü ewü andoro akoro te adu sü füh kotó ne 'buru (Wü Mürü Tima 1:8).

Luka de te ba buku ne, ah ta de kpara, te ewü ngbü endoro de wü Pawülü. Dela si-ngü te nih ngbü etanga gbü wü gara sü, te Luka ngbü emala ngü teka wü Pawülü la, ah mala de, gü ba, "Wüh mere bane," amba, ah ngbü emala, gü ba, "A mere ngü bane, anga bala," (Wü Mürü Tima 16:10-17; 20:5-21:18 bete 27:1-28:16). Luka ngbü emala ngü la da eto te-ye gbügbü. Kükürü de, angü engu ta ladü de wü Pawülü, gbü lakí te ngü la ngbü emere te-ye tete. Ah ge baka te Luka di ta ladü ake Pawülü, fü engu angbü ele ta-ngü te Pawülü gbü wü lakí te Pawülü di tete na gbü ku agbü *Rüma ne, zalü anü akoro gbü sikipi te wüh mörö Pawülü tete na (2 Timoteyo 4:11).

Wü ngü te mü ena amaka gbü buku ka wü Mürü Tima, wüh dene.

Sapita 1 Wü mürü tima ka Yesu reke te-wü teka amala ngari Yesu

Sapita 2:1-8:3 Wü mürü tima ka Yesu mala ngari Yesu gbü Yerüsalema

Sapita 8:4-12:25 Wü mürü tima ka Yesu mala ngari Yesu agbü nga nzö sü ka Yudaya ake Samaríya

Sapita 13-28 Pawülü mala ngari Yesu agbü mere bi wü nga nzö sü füh kotó ne

Sapita 13-14 Gina ndondoro ka Pawülü teka amala ngari Yesu

Sapita 15:1-35 Ngü ka mabiti ka wü mürü tima ka Yesu agbü Yerüsalema

Sapita 15:36-18:22 E'ba'basu ndondoro ka Pawülü teka amala ngari Yesu

Sapita 18:23-21:16 Ebabata ndondoro ka Pawülü teka amala ngari Yesu

¹ Wayi bala, enga wüna Teyofile, ngü ta te ma ba gbü gina kócökpa ka-ra ne, ah de nga ngü ta te Yesu kpo de tima ka-ye, da erí wü kpara di, ² zalü koro gbü sikipi te engu go tete agbü kpí. Amba, o engu go agbü kpí la de, ah to riri fü wü *mürü tima ka-ye ta te engu fe ewü la, gbü wazi ka *Nzila Wazi Me, teka tima te ewü ena amere sidi nga ye. ³ Angü fütanga kpi kaka-na, engu ngbü egoro da esere te-ye fü wü mürü tima ka-ye la teka sikipi teke 'basu, teka fü ewü awu, gü ba, ni zükü gbü kpi eyi fanü. Ah ngbü kpah da erí ewü de ngari Me.

⁴ Gbü gara sikipi, o wü Yesu ngbü eyi tundu de wü kpara ka-ye la, fü engu ayia ato riri fü ewü, gü ba, "Yi mere e ayia agbü Yerüsalema sene de. Ah le fü yi angbü sene, aci nga ngü ta te Wüba gü ba, ni ena ato fü yi ne. Ah de Nzila Wazi Me, ba e te ma mala ngangana fü yi, gü ba dene, ⁵ *Yüwane to ta *babatiza fü yi de ngu kükürü, amba sidi ne, Me ena ato babatiza fü yi, fü ah ato kpah wazi ka Nzila Wazi ye fü yi." Ngü la ena amere te-ye fanü fütanga sikipi mba cükü'daye."

Dene ngü te Yesu mala fü wü kpara ka-ye,

teka tima te ewü ena amere sidi nga ye
Marako 16:19-20; Luka 24:50-53

⁶ Fütanga ngü la, fü wü *kpara ka Yesu abiti te-wü edede, ayi-tata, gü ba, "Mere kpara, sikipi te ye ena ato wazi fü ani, wü di enga *Yisaraye, teka fü ani aliki wü vügü ka-ani tete, ah ena adi elaye?"

⁷ Fü Yesu alügü ngü fü ewü, gü ba, "Ngü ka sikipi la, ah de ngü ka-yi nda de. Kükürü de, angü ngü la, ah ka-ye de ngü ka Wüba, angü ah wu ngü ka sikipi engu la ka-ye me-ye. ⁸ Amba nda-yi, sidi nga sikipi mba cükü'daye, yi ena amaka wazi ka *Nzila Wazi Me, te ena akoro angbü gbü nzö yi. Ah ena ato wazi fü yi teka adi emala nga ra di fü wü kpara. Yi ena akpo de ngü la gbü Yerüsalema sene, kpah agbü nga nzö sü ka *Yudaya, *Samaríya, zalü koro di agbü adu sü füh kotó ne 'buru."

⁹ Te Yesu mala ngü la fü wü kpara ka-ye nza tete, 'duwa fü Me adu aza engu gbü jia ewü, ago di kpaka ye agbü kpí. Wüh du wu engu tine de, ka sangu te koro gba engu gbü jia ewü. ¹⁰ O wüh ngbü la fi bü eceka kpi agbü kpí, fü ewü agü jia wü, gbo! te wü kpara 'basu, de bu bongo te wü. ¹¹ Fü wü kpara la amala ngü fü ewü, gü ba, "De-yi wü kpara ka *Galilaya, yi ngbü erü fi bü da eceka kpi agbü kpí de bala, teka ngü ka Yesu, de te Me za engu, go di

agbü kpí ne? Fanü fanü, te gara, engu ena adu akoro füh kotó ne kpah bala.”

¹² Dela ngü te mere te-ye kpa füh da de iri ye Olive ne.

Dene ngü ka kpara te za tima gbü nga Yuda Keriyota

Fütanga gogo ka Yesu agbü kpí ne, fü wü kpara ka Yesu ayia kpa füh da la, adu agbü Yerüsalema, angü sü la ka-ye gbamari ede mere köti la. ¹³ Te wüh du koro agbü Yerüsalema, fü ewü anü ari kpa esambü te di ga füh kiri ye, angü ah de kambü te ewü ngbü gbügbü na. Wüh ta de wü Petero, *Yüwane, *Yakobo, Anderiya, *Filipo, Toma, Batülümayo, Matayo, *Yakobo ye Alofaya, bete Simüna* be kpah te *Yuda ye Yakobo. ¹⁴ Gbü wü sikipi 'buru, wüh ngbü ta ebiti te-wü, da eku gba fü Me de maguma wü biringbö. Wü di engu ni ye Yesu kpah ladü de ewü kpala, bete *Mariya ni ye Yesu, de wü gara würüse, ta te ewü ngbü endoro de ewü.

¹⁵ Gbü gara sikipi, fü wü *kpara ka Yesu ayia abiti te-wü baka wü kpara kama biri teke biri (120). Fü Petero ayia esüka ewü, amala ngü fü ewü, gü ba, ¹⁶⁻¹⁷ “Wü di engu wüna, ma ele amala gara ngü fü yi teka ngü ka *Yuda Keriyota, angü ah le de nih fe gara kpara dada na. Yi wu siti ngü kaka kpo. Angü ah ta de biri kpara esüka nih, te Yesu fe engu ta teka tima kpah baka nih. Fü ah adu afü te-ye vügü ka Yesu, agü tatamu, fü wü marajümiya azoro. Te di bala, ah le de nih fe gara kpara dada, baka ngü ta te wüh ba gbü *Ngari Me tekaka. Angü *Nzila Wazi Me mala ngü kaka ta eyi gügü gömö Miri *Davidi.”

¹⁸⁻¹⁹ Petero mala bala, angü wü kpara agbü Yerüsalema fe eyi 'buru, ga, Keriyota kpi eyi teka siti ngü ka-ye. Wüh to ta jiasse fefe teka ngü ka Yesu. Te engu kpi tete, fü ewü aza jiasse la, ase sü di, teka adi eti wü kpara gbügbü na. Amba engu ta de gina kpara te nzönzö ti gbü sü engu la, angü ah kpi, fü bubu na asü, fü nzanza na akoro etanü 'daaa. Teku ngü la, fü ewü agü iri sü la gbü mö ka-wü, gü ba, “Akela damu”, baka e te wüh gü ba, “Sü ka ngüte”.

²⁰ Fü Petero adu amala gara ngü fü ewü, gü ba, “Angü Davidi ba ngü teka Keriyota gbü gara ci ka-ye, gü ba, ‘Ah le fü sü kaka afü te-ye ndama, biri kpara mere e angbü kpala kpo fi de.’† Gara gü ba, ‘Ah le fü gara kpara aza tima dada na.’‡ ²¹⁻²² Te di bala, wü di engu wüna, ah le de ngü la mere te-ye fanü. Ah le fü ani afe gara kpara da

Keriyota, teka ale ta-ngü te ani gbü tima ka-ani, da emala nga züükü ka Miri Yesu ne fü wü kpara. Ah le kpara de te ani ngbü ta endoro de wü Yesu tundu de ewü, o Yesu ngbü ta la endoro de tima ka-ye füh kotó sene ne, akpo ngbü sikipi te *Yüwane to babatiza tete fefe, zalü koro di gbü sikipi te engu yia tete esüka ani, go agbü kpí.”

²³ Te wüh je ngü la bala, fü ewü afe wü kpara 'basu, *Yüsefa Barasaba,§ ake Matafiya. ²⁴ Fü ewü ayia ayi-ta Me, gü ba, “Ako Me, mü wu ngü te di emagama wü kpara 'buru. Esüka wü kpara de 'basu ne, ah tü fü mü agü tamu mene kpara te mü fe engu eyi, ²⁵ teka fü engu aza tima da Keriyota, teka amala ngari mü, angü Keriyota kpi ce tima la eyi.”

²⁶ Esüka iri wü kpara 'basu de te wüh fe ewü ne, fü ewü aza iri kpara te Me fe eyi esüka ewü. Fü iri Matafiya akoro bü me-ye. Fü engu eri esüka wü *mürü tima ka Yesu nzükpa de füh ye biri ne.

2

Dene ngü te Nzila Wazi Me to wazi tete fü wü kpara ka Yesu

¹ Te koro gbü sikipi teke 'basu de füh ye nzükpa (50), fütanga sikipi te Yesu zükü tete gbü kpi, sikipi la, ah ka-ye de mere sikipi ka karama ka wü *Yisaraye, te wüh ngbü ei *Petekosita ne. Fü wü *kpara ka Yesu abiti te-wü 'buru, kpah ba e te ewü ngbü emere gügü ne. ² Wüh te eje de, fü giri e angbü ewü gbu gbu gbu bane, baka mere wege. Fü giri e la awü gbü mere kambü, de te ewü ngbü gbügbü na ne 'buru. ³ Fü ewü awu e te ngbü eci aci ba mi-wa, te koro baya esüka ewü, ngbü kpah gbü nzö ewü biri biri 'buru. ⁴ Fü *Nzila Wazi Me asi emagama ewü 'buru. Fü ewü akpo da emala ngari Me fü wü kpara, gbü wü gara ganzi mö, te ewü je gügü la de, angü Nzila Wazi Me to wazi la fü ewü me-ye.

⁵ Gbü sikipi la, mere bi wü kpara koro ta ngbü agbü Yerüsalema, teka karama la. Wüh de wü gara wü di engu Yisaraye, te ewü yia gbü nga nzö sü füh kotó ne 'buru, teka aku gba fü Me agbü Yerüsalema. ⁶ Te wüh je giri e la bala, fü mere bi wü kpara la aci, akpe akoro gbü sü la, teka awu ngü, te ngbü emere te-ye de kpala. Fü ngü la aga gbü jia ewü afa sü, angü wüh ngbü eje ngü de te wü kpara ka Yesu ngbü emala la, gbü wü mö ka-ewü biri biri 'buru. ⁷⁻¹¹ Fü komö ewü agu ka ngü la 'duwa agu. Angü wü kpara la koro te nga nzö sü füh kotó ne 'buru. Gara ewü ka-wü cu wü di engu

* **1:13** 1:13 Simüna engu la, ah de kpara ta te mere gü teka tö ka-wü ne. † **1:20** 1:20 Mü ena amaka ngü la gbü Ci ka wü Davidi 69:25. ‡ **1:20** 1:20 Mü ena amaka ngü la gbü Ci ka wü Davidi 109:8. § **1:23** 1:23 Gara iri Yüsefa la de Yüsito.

Yisarayeale, gara ewü de *ganzi kpara, te ewü le adi emere gele ka wü Yisarayeale. Wü gara kpara yia agbü Parutiya, gara gbü Madayî, gara gbü Elama, gara gbü Mesopotamiya. Gara ewü de wü kpara ka *Yudaya, gara yia gbü Kapadokiya, gara gbü Potiyü, gara gbü Asiya. Gara koro agbü Firigiya, gara gbü Pafiliya, gara gbü *Ezepeto, gara gbü Libiya, ghamari ede Kurene. Gara ewü de wü kpara ka *Rüma, gara ewü de wü kpara ka Kürete bete wü kpara te ewü koro gbü sü ka wü Arabî. Fü ewü akpo da eyi-ta tete-wü, gü ba, "Apa! De bane neh ene ngü ne? Wü kpara, te ewü ngbü emala ngü la, wüh 'buru de wü kpara ka *Galilaya. Amba ah mere baye, te ani ngbü eje wü kpeke ngü ka Me de gömö ewü la, zu bü cu gbü wü mö ka-ani kpikpi ye kpikpi ye ne?"

¹² Fü ngü la aga te nga jia wü kpara la 'buru. Fü ewü angbü tine bü de yitangü gömö ewü bü 'daaa, gü ba, "Apa! Mene ngü de bala ne ngbü egü tine fe? Si-ngü la ena adi baye? Ah de wazi ka Me de? Me mere ngü la me-ye de?"

Dene ngü te Petero mala fü wü kpara la, gü ba,

Yesu de kpara te Me tima teka aküwa ani

¹³ Esüka wü kpara te ewü je ngü la, wü gara kpara ngbü efala wü *kpara ka Yesu la nda-wü afala, gü ba, "Ho! Wü kpara la ngbü eküya ka-wü aküya de fi de?"

¹⁴ Petero, fü yi ayia te nga yi nzükpa de füh ye 'basu ne le 'buru tikpi. Fü mü akpo emala ngü fü mere bi wü kpara la, de mere ri mü kpa tikpi, gü ba dene, "De-yi, wü di enga wüna, wü di enga Yisarayeale, ngü de te ma ele amala fü yi ne, ah le fü yi aje si-ngü la, awu mbi mbi mbi. ¹⁵ Yi ngbü efi nda-yi, gü ba, wü kpara ne küya aküya de fi? A'a, ah bala nda de, angü dene la bü lö-ra menewa ka kpurutokokpi. Wüh ngbü eküya gügü kpurutokokpi bala aküya fanü." ¹⁶ Ngü de te a ngbü emere ne, a maka wazi ka *Nzila Wazi Me, kpah baka ngü ta te Me mala nganga na gügü, gömö *mürü dofo Yüwele, ¹⁷ gü ba, "Dene ngü te ni, Me, ena amere gbü sikipi, te ni ena atima kpara ka-ni füh kotö ne tete. Gbü sikipi la, ni ena ato wazi ka Nzila Wazi ni fü wü kpara ka-ni 'buru. Wü jaji komoko de wü jaji würüse, wüh ena angbü emala ngari ni fü wü kpara de wazi ka Nzila Wazi ni la, baka wü mürü dofo ka Me. Nzila Wazi ni ena angbü esere ngari ni fü wü ka'dörö

de wü kovo gbü roto. ¹⁸ Ni ena ato wazi ka Nzila Wazi ni fü wü kpara ka tima ka-ni, wü komoko de wü würüse 'buru, teka fü ewü angbü emala ngari ni fü wü bu wü di. ¹⁹ Gbü sikipi la, ni ena amere wü lara ngü gbe, gara kpa tikpi agbü kpi kpala, gara füh kotö kpakine. Wüh ena awu e ba ngüte, de wa, bete nguwa te gba sü kpuuu! ²⁰ Ra ena afü te-ye ba biti. Fe ena afü te-ye kpah afü didiki baka ngüte la. Fütanga ngü la, ni ena akoro füh kotö ne ba Mere Miri. ²¹ Te di bala, mene wü kpara te ewü ena aku gba fü ni, de ni küwa ani, wüh ena aküwa 'duwa me-wü.* Dela ngü ta te Me mala gömö mürü dofo Yüwele, teka wazi ka Nzila Wazi Me, ba e te yi wu de enatikine."

²² Fü Petero adu amala kpah gara ngü fü wü kpara la, gü ba dene, "Wü di enga wüna, yi je la ngü de te ma le amala fü yi ne. Kpara te Me tima fü yi, teka aküwa yi, ah ka-ye de Yesu.† Ah le ta de yi wu ngü la mbi, angü Me to ta wazi fefe, teka aküwa wü mürü keke, kpah da emere mere bi wü gara kpeke wü ngü di. Ah mere wü ngü la cu gbü jia yi, gbü Yerüsalema sene. Ngü la ri gbü nzö yi la de? ²³ Me tima Yesu eyi fü yi, fü yi aza nda-yi engu, ato fü wü siti kpara, teka fü ewü abere engu, amörö füh *rü gbegete. Dela 'buru kaje te Me fe ta me-ye, reke eyi gügü baka fingangü ka-ye. ²⁴ Amba Me le de engu ngbü esa wazi ka kpi nda de, fü ah ayia azükü engu gbü kpi la asidi.

²⁵⁻³⁰ Miri *Davidi mala ngü ka züzükü ka Yesu la ta eyi gügü. Angü Nzila Wazi Me gü tamu ngü la eyi fefe me-ye, gü ba, 'Me ena atima Mere Miri füh kotö ne teka aküwa wü kpara.' Angü Me kina kina fefe ta eyi, gü ba, 'Te gara, ni, Me, ena aza gara kundu kundu ye, ao engu Mere Miri baka ye.' Te di bala, Davidi ba ngü teka Yesu gbü gara ci ka-ye, gü ba dene, 'Wüba Me, ma wu eyi, gü ba, mü ladü ake ra.

Mü ti ace ra nda-mü de.

Gbü wü sikipi 'buru, mü ngbü eto wazi fere.

Ma ngbü de mere tadu teka ngü ka-mü.

Ma gbo nga iri mü, de ci de koko mini.

Te ma ena akpi, ma ti akpe cürü kpah de.

Angü mü le ra de maguma mü 'buru.

Mü ti ace ra gbü kpi nda-mü de.

Küte ra ti azi gbü tö kpah de.

Mü mala ngü la eyi fere, gü ba, "Mü ena azükü ra gbü kpi."

Mü ena aza ra, ago di kpaka mü agbü kpi kpala.

* 2:21 2:21 Mü ena amaka ngü la gbü buku ka Yüwele 2:28-32. † 2:22 2:22 Yesu de kpara ka Nazareta. ‡ 2:25-30 2:25-30 Mü ena amaka ngü la gbü Ci ka wü Davidi 16:8-11.

Fü nih angbü de nih ma de mere tadu fi mere badi.*†

Dela ngü ta te Davidi ba gbü *Ngari Me, teka ngü ka Yesu."

Fü Petero adu amala kphah gara ngü fü wü kpara la, gü ba dene, "Wü di enga wüna, yi wu cu me-yi, gü ba, kundu nih Davidi ne kpi ta eyi gügü, fü ewü ati engu gbü mbükü. Zalu akoro enatikine dene, mbümbükü fi bü ladü esüka nih sene. Ah zükü gbü kpi nda de. ³¹ Te ah bala, ngü te engu mala, gü ba, 'Me ti ace ni gbü kpi de ne,' si-ngü gbü ngü la neh baye? Davidi mala ngü la teka ngü ka-ye nda de. Ah mala neh teka da? Ah mala ngü la de wazi ka Nzila Wazi Me, teka ngü ka *Kurisito, Mere Miri te Me ena atima sidi nga ye. Me gü tamu ngü ka Mere Miri la fefe eyi gügü, fü engu amala ngü kaka la, gü ba, 'Me ti ace engu gbü kpi de. Küküte ti azi gbü tö kphah de.' ³² Mere Miri la, ah ka-ye de Yesu, angü biri kpara te Me zükü engu gbü kpi, ah ka-ye duu Yesu kpi kpi ye. Yesu zükü gbü kpi fanü, angü a wu ngü la cu de jia a.

³³ Fütanga ngü la, fü Me aza Yesu, anü di, ao ba Mere Miri gbü kokpa ka-ye agbü kpi kpala. Fü engu ato wazi ka Nzila Wazi ye fefe, kphah ba e te engu mala. Enatikine, Yesu tima Nzila Wazi ye eyi gbü nzö a dene. Fü a amaka wazi gbü ngü la, teka amala ngü kaka fü yi gbü mö ka-yi biri biri 'buru, kphah ba e te yi ngbü eceka enatikine ne. ³⁴⁻³⁵ Angü Davidi ba ta kphah gara ngü, te Nzila Wazi Me sere fefe, gü ba,

'Me mala ngü fü Miri ka-ni, gü ba dene,

"Ye ngbü gbü kokpa ka-ni sene.

Angü ni fe ye, o eyi Mere Miri.

Te di bala, ye ena angbü gbü nzö wü kpara 'buru!

Angü ni ena ao wü vügu ka-ye 'buru esa lö ye!" †

Yi efi nda-yi, gü ba, Davidi de kpara te Me za, go di agbü kpi? A'a. Ah bala de. Amba ah mala ta ngü la teka Yesu.

³⁶ De-yi, wü di enga wüna, wü *Yisaraye, dela ngü te ma le amala fü yi enatikine. Yesu ka-ye de kpara te Me tima engu teka aküwa nih. Nda-yi, yi mörö engu, amba Me ce engu gbü kpi la nda de! Ah o engu kphah eyi Mere Miri gbü nzö wü kpara fuh kotö ne 'buru."

³⁷ Te mere bi wü kpara la je ngü te Petero mala de bala, fü maguma ewü akolo 'duwa tuu! Fü ewü ayi-ta Petero de wü gara wü bu ye la, gü ba, "Apa! Wü di enga wüna, kpara ena amereüne dene neh baye?" ³⁸ Petero, fü mü ayia amala

ngü fü ewü, gü ba, "Yi fü maguma yi efü, adu ale ngü ka Yesu Kurisito, de yi za *babatiza te iiri na. Fü Me aboro *siti ngü ka-yi, ato Nzila Wazi ye fü yi. ³⁹ Angü dela ngü te Me kina te-ye di gügü, gü ba, 'Ni ena aküwa wü kpara 'buru, te ni fe ewü, ba wü kpara ka-ni ne.' Ah mala ngü la eyi, teka yi de wü di yi, kphah teka wü kpara, te ewü ngbü gbü wü gara sü nengete ne 'buru."

⁴⁰ Fü Petero amala kphah gara bi wü ngü fü ewü, gü ba, "Fanü fanü, Yesu ka-ye de kpara te Me tima teka aküwa ani." Fü ah amala ngü la fü ewü kpekpeke, gü ba, "Wü le ngü ka Yesu, teka fü wü aküwa esaka mere kuru, te Me ena ato fü siti wü kpara fuh kotö ne te gara."

⁴¹ Fü mere bi wü kpara esüka wü kpara, te ewü ngbü eje ngü gömö Petero la, ayia ato maguma wü fü Yesu. Fü wü Petero ato babatiza fü ewü, wü kpara la ta kutu bata gbü siki engu la. ⁴² Fü wü kpara la ao maguma wü, teka angbü eje riri gömö wü *mürü tima ka Yesu. Fü ewü angbü engbü tundu de wü di enga ni wü, de maguma wü biringbö, gbü wü siki 'buru. Fü ewü angbü ezü wü e ka-wü 'buru tundu, kphah da ebite te-wü tundu, teka adi eku gba fü Me, da egbo nga iiri na.

⁴³ Ta gbü wü siki la, fü wazi ka *Nzila Wazi Me asi emagama wü mürü tima ka Yesu. Fü ewü angbü eküwa wü mürü keke, kphah da emere mere bi wü gara kpeke ngü. Teka ngü la, fü wü kpara angbü ecu ngü ka-ewü. ⁴⁴ Wü *kpara ka Yesu la, ngbü ta engbü ka-wü 'buru tundu, da ebite wü e ka-wü 'buru tundu, teka adi ele ta-ngü di esüka wü. ⁴⁵ Gbü wü ngü la, wüh ngbü kphah ecinzi gara wü e ka-wü, teka agafa jise la fü wü bu wü biri biri 'buru, baka te cinga ka-ewü di ladü. ⁴⁶ Gbü wü siki 'buru, wüh ngbü ebite te-wü kpa etambasü ka *Mere Kambü ka Me. Fü ewü angbü ezü wü e ka-wü esüka wü 'buru de tadu, kphah de züka maguma, da egbo nga iri Me. ⁴⁷ Fü ngü ka-ewü la angbü ereke gbü jia wü kpara 'buru efa sü. Teka ngü la, gbü wü siki 'buru, fü Me angbü eto wü gara kpara esüka ewü, te engu fe teka aküwa.

3

Dene ngü ka wü Petero ake komoko de lö ye walawala

¹ Gbü gara siki,* fü wü Petero ayia ake *Yüwane, anü kpa etambasü ka *Mere Kambü ka Me agbü Yerüsalem, teka agbo nga iri Me kpala. ² Wüh te ekoro emö

§ 2:34-35 2:34-35 Mü ena amaka ngü la gbü Ci ka wü Davidi 110:1. * 3:1 3:1 Ngü la mere te-ye baka lö-ra bata ka tamurago. † 3:2 3:2 Wüh gü iri mö nga 'baranga ka tambasü ka Me la, möngitü te su fa sü.

'baranga ka tambasü la,[†] fū ewü amaka gara komoko de lö ye walawala, gbamari ede möngiti la. Angü, gbü wü sikpi 'buru, komoko la ngbü engbü ede möngiti kpala, da eyo e te wü kpapa, de te ewü ngbü ekoro eri gbü 'baranga la. Wüh ngbü ebi engu ganzi, eo kötö kpala, angü ah ti anü nü nda de, kü baka e te ewü yaka engu tete. ³ Te komoko la wu wü Petero ake Yüwane yia eyi eri kpala, fū engu ayia ayo e te ewü. ⁴ Fū wü Petero ake Yüwane arü, angbü eceka engu de kpeke jia. Fū Petero amala ngü fefe, gü ba, "De-ye deyí, ye ceka la ani akine." ⁵ Fū komoko la ae jia ye, angbü eceka ewü kpah de kpeke jia, angü ah fi nda-ye, gü ba, ni ena amaka mba e esaka ewü.

⁶ Fū Petero amala ngü fefe, gü ba, "Mü efi nda-mü gü ba, jiase ladü esaka ra? A'a, jiase nda ma. Amba gara e ladü esaka ra sene, te ma ena ato fū mü. Ma emala fū mü, te iri Yesu,[‡] Miri te Me tima fū nih ne, mü yia eyia tikpi, de mü nü nü!" ⁷ Fütanga ngü la, fū Petero azoro kpa komoko la ka kokpa, ae engu tikpi. Bü kece bane de, fū Me ato wazi gbü lölö na. ⁸ Cinzili, fū komoko la aviti, arü füh lö ye, akpo 'duwa enü nü, da eviti de tadu, da egbo nga iri Me. Fū ewü ari tine de wü Petero tundu kpa etambasü ka Mere Kambü ka Me. ⁹ Fū mere bi wü kpapa awu engu, te ngbü enü nü, da egbo nga iri Me, de mere tadu te ye. ¹⁰ Fū wü kpapa la awu, gü ba, komoko la, ah de komoko ta te ani ngbü ewu da eyo e te wü kpapa, de lö ye walawala ne. Fū komo ewü ayia agu teka ngü la.

Dene ngü te Petero mala fū wü kpapa,

teka komoko, te engu küwa de wazi Yesu ne

¹¹ Ngü ka komoko la ga gbü jia wü kpapa la 'buru, fū ewü aci akpe anü kpaka wü Petero kpala,[§] teka aceka ngü la cu de jia wü, angü komoko la ce tine nga wü Petero nda de.

¹² Te Petero wu ngü la bala, fū ah amala ngü fū mere bi wü kpapa la, gü ba, "De-yi, wü di engu wüna, wü di engu *Yisarayeale, ah mere baye? Ngü ka komoko te küwa ne, ga gbü jia yi fa sü bala? Yi ngbü efi nda-yi, gü ba, kpapa küwa engu neh de tete-a? Anga a maka mere wazi la, angü a de züka wü kpapa gbü jia Me? A'a, ah bala de. Komoko ne küwa ka-ye duu teka wazi ka Yesu! ¹³ Mere Me* to wazi la fū Yesu kükürü de, angü ah tima engu me-ye. Amba nda-yi, yi le ngü kaka ta de, fū yi

azoro engu, anü di engagira Miri *Pilatu, de ah mörö engu. Pilatu le ta ace kpa tete, angü ah maka siti ngü kaka de. Yi le nda-yi 'buru 'buru de. ¹⁴ Yesu ka-ye de züka kpapa, te Me tima fū yi, amba yi le engu nda-yi de. Yi le ta nda-yi bü Baraba, siti kpapa te ngbü emörö wü kpapa ne, de Miri Pilatu ce kpa tete na fū ani, da Yesu. ¹⁵ Miri te Me tima fū nih, teka aküwa nih ne, yi mörö engu ta me-yi. Dela züka ngü? Me le ngü la nda de, fū ah ayia azükü engu gbü kpi la. Nda-a, a wu ngü la cu de jia a.

¹⁶ Yi wu komoko ne de? Ah ti ta eyi anü nü bala? Ah maka wazi la baye baye? Yesu to wazi fefe me-ye! Angü ah to maguma ye eyi fū Yesu, fū Yesu aküwa engu!

¹⁷ Wü di engu wüna, titine, ma wu eyi, gü ba, ngü ta te ye mere de wü mere *kovo ka-yi, te ye mörö Yesu tete na ne, yi mere ta ngü la bala, angü yi wu si-ngü la mbi mbi de. ¹⁸ Amba Me mere ngü la bala me-ye, teka areke ngü, baka ngü ta te engu mala gömö wü *mürü dofo ta gügü ne 'buru, gü ba, "Kurisito te ni ena atima füh kötö ne, ah ena azü cinga bala."

¹⁹ Wü di engu wüna, yi fū maguma yi efü. Yi du, yi le ngü ka Yesu, teka fū Me aboro wü *siti ngü ka-yi, fū ah adu aküwa yi, afü yi ba wü di ye. ²⁰ Te di bala, yi ena amaka mere tadu gbü sikpi te Yesu ena adu akoro tete na. Yesu ena adu füh kötö ne fanü, angü engu de *Kurisito te Me fe engu eyi gügü, teka aküwa nih.

²¹ Enatikine, Yesu Kurisito ngbü engbü ka-ye agbü kpi. Ah le de engu ngbü ka-ye kpala, zalü akoro di gbü sikpi te Me fe me-ye. Gbü sikpi la, engu ena adu akoro füh kötö ne, teka areke wü ngü 'buru toto, baka te Me mala ta gömö wü mürü dofo ka-ye ne.

²² *Müse mala ta ngü ka Yesu, gü ba, 'Mere Me ena atima gara mürü dofo fū wü, gbü nguwa wü, te ena amala ngü ka Me fū wü kpah baka ni. Ah le de wü je wü ngü ka Me 'buru gögömö. ²³ Te mü je ngü kaka de, wüh ena amörö mü asidi!'[†] Dela ngü ta te Müse mala teka Yesu.

²⁴ Fütanga Müse, fū Samüwele amala kpah nga wü ngü la de wü bu ye wü *mürü dofo 'buru. Ngü ta te wüh mala ngangala la, ah de ngü ka Yesu te ngbü emere te-ye gbü wü sikpi ne.

²⁵ Wü di engu wüna, ah le de ye fū maguma yi enatikine. Ah le de ye le ngü, ta te Me mala fū wü kundu nih, gömö wü mürü dofo ne. Ah le de ye je riri ka Me, angü yi de wü nguwa *vüngüte

[‡] 3:6 3:6 Yesu ka-ye de kpapa ka Nazareta. [§] 3:11 3:11 Wü Petero ngbü ebiti te-wü gbü sü te wüh ei, gü ba, "Yafu ka Solomona" ne. * 3:13 3:13 Petero gü ba, "Ah de Mere Me te di de vüngüte ka wü kundu nih, wü Abarayama, Yisaka bete Yakobo, te to wazi la fū Yesu." [†] 3:23 3:23 Yi ena amaka ngü la gbü buku ka Manda nga Riri 18:15, 18, 19.

kaka. Angü Me mala ta fü *Abarayama, gü ba, 'Ni ena aküwa nguwa nü kpara füh kotö ne 'buru, bü teka ngü ka kundu wü, Abarayama.'‡ 26 Wü di engä wüna, ma le amala fü yi enatikine, gü ba, kpara te Me tima füh kotö ne teka aküwa nih ne, ah ka-ye de Yesu. Ah tima engu kpaka nih, wü di engä Yisarayeले feke, teka fü engu ato wazi fü nih 'buru, teka fü nih ace wü siti ngü ka-nih, adu ale ngü kaka."

Dela ngü ta te wü Petero mala, teka ngü ka komoko de lö ye walawala, te engu küwa ne.

4

Dene ngü te wü mere kpara ka Yisarayeले yi-ta wü Petero di,

teka komoko te ewü küwa ne

1 Baka te wü Petero ake *Yüwane ngbü la bü eri mere bi wü kpara etambasü *Mere Kambü ka Me la, fü wü *kovo ka Me, ayia de wü marajümiya ka-wü, de gara wü bu wü, wü *Saduke,* akoro kpala. 2 Fü wü mere kpara la aje ngü de te wü Petero ngbü eri wü kpara di ne. Fü ngü la ake te ewü afa sü, angü wü Petero ngbü emala ngü ka Yesu, gü ba, engu zükü gbü kpi eyi fanü. 3 Tekä ngü la, fü wü kpara la ayia azoro wü Petero, agü agbü ku, teka aci nga kpi te ena aseke baka egambi, fü ani adu akolo ngü ka-ewü, angü ah koro tine eyi tamurago.

4 Amba mere bi wü kpara, te yi ngbü eje ngü gömö wü Petero ne, yi kpe cürü nda-yi de, fü yi ayia ato maguma yi fü Yesu. Te di bala, wü komoko de te ewü to maguma wü fü Yesu ne, wüh 'buru baka wü kpara kutu 'buruve (5,000).

5 Te kpi seke tete kpurutokokpi la, fü wü angbe cögbörö wü *kovo ka wü Yisarayeले bete wü *mürü riri, te ewü di agbü Yerüsalema kpala ne, ayia abiti te-wü 'buru, teka akolo ngü ka wü Petero la. 6 Wüh de wü Anasi, te di de mürü kpökpö ka wü *kovo ka Me, bete Kayafa, de wü Yüwane, de wü Alekezanda, te ewü di 'buru gbü nguwa mürü kpökpö la.

7 Fü ewü aza wü Petero ake Yüwane, akoro di engagira wü mere kpara la, fü ewü akpo da eyi-ta ewü kpekpeke, teka ngü ka komoko te ewü küwa, etambasü Kambü ka Me la, gü ba, "De-wü deyi, wü maka wazi teka aküwa komoko la di, neh kaye? E-to wazi la fü wü neh da?"

8 Fü wazi ka *Nzila Wazi Me asi emaguma Petero. Fü engu ayia amala

ngü fü wü mere kpara la, gü ba, "De-yi, wü mere kpara ka-a ne, 9 yi le ayi-ta a enatikine, teka züka ngü de te a mere fü kpara de lö ye walawala ne, gü ba, komoko la küwa neh baye baye ya? 10 Te di bala, dene ngü te ma ele amala fü yi enatikine, kpah fü wü di engä *Yisarayeले 'buru. Kpara te küwa komoko de te rü engagira yi, de soko ye 'buru mbi ne, ah ka-ye de Yesu,† angü engu to wazi la fü a me-ye. Angü Yesu ka-ye de *Kurisito de te Me tima teka aküwa nih ne. Nda-yi, yi le engu ta de, fü yi abere engu füh *rü ghegbete. Amba Me zükü engu gbü kpi la eyi.

11 Yesu engu ne, ah de kpara te Me tima teka aküwa nih. Yi le engu nda-yi de. Ah ba ngü ta te wüh ba gbü *Ngari Me, gü ba, 'Wü gara kpara ngbü ta eji Mere Kambü ka Me. Fü ewü amaka gara mere rü, te ewü le nda-wü de. Fü ewü ace rü la asidi. Titine rü ta te ewü ce la, Me du o tine eyi mere kpeke rü de wazi ye, te wü bu ye na ngbü engbü 'buru eküküte.‡ Yi kayi baka wü kpara la, angü yi le Yesu nda-yi de. 12 Angü Yesu ka-ye de Mere Miri te Me tima teka aküwa nih. Gara kpara te ti aküwa nih nda ma, 'duwa Yesu kpikpi ye. Angü Me tima engu füh kotö ne teka ngü la. Gara kaje nda ma."

13 Te wü mere kpara gbü mabiti la je ngü gömö wü Petero ake Yüwane de bala ne, fü ngü la aga gbü jia ewü afa sü. Angü wüh wü eyi, gü ba, wü Petero de wü kükürü kpara, te ewü giri ngü fa sü nda-wü kpah de. Amba te wüh rü engagira ani, wü angbe cögbörö kpara ne, cürü te ewü nda ma. Fü wü kpara la awu, gü ba, wü Petero de wü kpara ta te ewü ngbü endoro de wü Yesu. 14 Wüh le ta alügü ngü fü ewü kpekpeke, gü ba, "Ngü kawü la 'buru de wu," amba dada ma, angü komoko de te küwa ne, ah rü fi bü ede wü Petero sela, fü komö ewü agu ka lümü.

15 Fü wü mere kpara la amala ngü fü wü Petero de wüh nü kpa etanü, teka fü ani aro la mö teka ngü ka-ewü la. Fü ewü akpo da emala ngü esüka ewü, 16 gü ba, "Ööö, titine ani ena amere de wü kpara la neh baye, teka atiri ewü da emala ngü ka Yesu fü wü kpara? Wü kpara gbü Yerüsalema sene 'buru wu eyi, gü ba, wü kpara ne küwa komoko la me-wü. Te ani ena acere nga ngü la, gü ba, 'Ah de wu la,' wü kpara 'buru ena amü ani! 17 Te di bala, ah le de ani mala ngü fü ewü kpekpeke, teka fü ewü ace

‡ 3:25 3:25 Yi ena amaka ngü la gbü Gina Ngü 22:18; 26:4.

* 4:1 4:1 Wü kovo ka Me la 'buru, wüh le riri ka wü Saduke, gü ba, wü kpara te ewü kpi akpi, wüh ti azükü gbü kpi tine de. Wüh kpi eyi fi mere badi. Te di bala, wü Saduke la, wü le ngü ka Yesu de de de! † 4:10 4:10 Yesu ka-ye de kpara ka Nazareta. ‡ 4:11 4:11 Mü ena amaka ngü la gbü Ci ka wü Davidi 118:22.

da eri wü kpara de ngü ka Yesu, angü te ani mere bala de la, nga-ngü ka Yesu ena abaya esüka wü kpara 'buru."

¹⁸ Fü ewü adu ai wü Petero kpaka wü kpa esambü, ato riri fü ewü kpekpeke, gü ba, "Wü mere e adu amala nga Yesu fü wü kpara tîne kpo fi de." ¹⁹ Te wü Petero ake Yüwane je ngü la bala, fü ewü alügü ngü fü ewü, gü ba, "Ah le de wü fi nga ngü la cu me-wü. Angü Me mala fü ani, de ani mala nga Yesu fü wü kpara 'buru. Te ani ce ngü ka Me, adu amere ngü kawü la, ngü la, ah ena adi de züka ngü?" ²⁰ Amba cu de-ani, ani ti ace da emala nga Yesu fü wü kpara nda-ani de, angü ani wü wazi kaka cu de jia ani, fü ani aje ngü gögömö na cu de güje ani."

²¹ Te wü mere kpara je ngü la bala, fü ngü la ake te ewü afa sü. Fü ewü amala ngü fü wü Petero kpekpeke. Fü ewü adu ace kpa te ewü, angü da ewü teka ato kuru te wü Petero nda ma. Kpah bala wüh wu eyi, gü ba, wü kpara 'buru ngbü egbo nga iri Me, angü komoko la küwa eyi de wazi ka Yesu.

²² Dela ngü ta te wü Petero mere, te ewü küwa gara komoko de wazi ka Yesu. Ngü la ga gbü jia wü kpara fa sü, angü komoko la koro ta ka-ye eyi mere kpara. Re kaka nye teke 'basu eyi.

Dene gba te wü kpara ka Yesu ku fü Me

²³ Te wü mere *kovo la ce kpa te wü Petero ake Yüwane tete, fü wü Petero ayia anü kpaka wü bu wü, wü *kpara ka Yesu, amala nga ngü te wü mere kpara mala fü ewü ne 'buru. ²⁴ Te wü bu ye Petero je ngü la bala, fü ewü aci akpo da eku gba fü Me, gü ba, "Wayi bala Mere Miri Me, ah gbo nga iri mü, angü mü mere kpi ake tö, de mere *yi-ngu, kpa de wü e gbü ewü 'buru me-mü. ²⁵⁻²⁶ Mü wu ngü te ngbü emere a sene kpo. Mü wu ngü ka wü angbe cögbörö kpara, te ewü le amere eküte a, ne kpa kpo. Ah baka ngü ta te kundu a, *Davidi,§ ba gbü *Ngari mü, gü ba, 'Wü mere kpara biti te-wü teka agiri siti mani. Wü miri ka wü *ganzi kpara reke te-wü tundu teka amere gü eküte Mere Me, be kpa te Miri de te engu fe ne. Ngü ka-ewü la, ah de töndö ngü kükürü! Wazi ewü teka amere gü eküte Me nda ma.* ²⁷ Ngü ta te Davidi mala ne, ah mere te-ye ta eyi bala fanü. Angü Miri Anitüpa *Erode ake Miri *Pilatü† de wü bu wü, yia ta, biti te-wü kpa de wü mere kpara kanih, wü di enga Yisarayeale. Wüh mere ngü la cu gbü Yerüsalema sene, fü ewü

amere gü eküte Yesu, te di de mbarase kamü, ta te mü fe engu ao ba Miri ne. ²⁸ Fü ewü abere engu füh *rü gbegbete. Amba ngü de te ewü mere la, ah de wü ngü te mü le me-mü, gü ba, ah mere te-ye bala, gbü wazi ka-mü.

²⁹ Kpah bala, Mere Me, wü mere kpara biti te-wü enatikine teka amere gü eküte a. Mü wu la cinga te ewü le ato te a teka tima ka-mü, de mü to wazi fü a, teka de a ce ngü ka cürü, adu ai maguma a, teka amala ngari mü fü wü kpara. ³⁰ Mü to wazi fü a, teka fü a aküwa wü mürü keke, kpa da emere wü gara mere kpeke ngü, te ena aga gbü jia wü kpara, teka fü ewü awu, gü ba, mü tima Yesu me-mü. Mü tima a kpa me-mü, te a di de wü kpara kaka-na ne."

³¹ Te wüh yi-ta Me nza tete, fü sü de te ewü ngbü tete na la akpo da eyiki te-ye. Fü *Nzila Wazi Me ayia asi emaguma ewü 'buru. Fü ewü akpo da emala ngari Me fü wü kpara tîne cu de wazi.

Dene ngü ka lele de te wü kpara ka Yesu

ngbü egafa wü e ka-wü di esüka wü

³² Wü mere bi wü kpara de te ewü to maguma wü fü Yesu ne, wüh ngbü ta tundu de maguma wü 'buru biringbö, kpa de fingangü ka-wü biringbö. Kpara biringbö esüka ewü te ena amala ngü fü wü bu ye, gü ba, "Dene e ka-ni, wü mere e amfo de," ne, ah nda ma. Angü wüh biti wü e ka-wü la, o fü wü 'buru tundu, angbü ele ta-ngü te wü bu wü di. ³³ Wü *mürü tima ka Yesu ngbü ta emala nga Miri Yesu fü wü kpara cu de mere wazi fa sü, gü ba, engu zükü eyi gbü kpi fanü. Fü Me angbü kpa ele ta-ngü te ewü efa sü, da eto wazi fü ewü. ³⁴ Biri kpara esüka ewü ta te lakü e, fü ah angbü nda-ye gbü cinga, nda ma. Angü wü kpara 'buru ta te ewü di de mere bi e esaka wü, baka wü yi, anga mere bi wü kambü, anga ne e ne, wüh ngbü ta ecinzi gara wü e ka-wü la, angbü eza jiasa la, ekoro di, ³⁵ eto fü wü mürü tima ka Yesu. Fü ewü angbü eye süka jiasa la esüka wü de wü bu wü, tenga cinga ka-wü te di ladü.

³⁶ Gara kpara ta kpa ladü esüka ewü de iri ye *Yüsefa. Ah de enga Yisarayeale, gbü nguwa *Levi, te wüh bi engu ta gbü tö ka Kupuriyo. Wü kpara ka Me to ta gara iri fefe na, Baranaba. Ah ba e te ewü gü ba, kpara te eto wazi fü wü bu ye. ³⁷ Fü komoko la anü acinzi gara sü ka-ye biringbö, aza jiasa la, ato kpa 'buru fü wü mürü tima ka Yesu.

§ 4:25-26 4:25-26 Davidi de züka kpara ka Me ta gügü. wü Davidi 2:1-2. † 4:27 4:27 Gara iri Pilatü de Pondiyo.

* 4:25-26 4:25-26 Mü ena amaka ngü la gbü Ci ka

5

Dene ngü ka Petero ake Ananiya

¹ Gara komoko ta ladü esüka wü *kpara ka Yesu de iri ye Ananiya, iri wara ka de Safira. Te komoko la wu züka ngü ta te Baranaba mere la, fü ewü ayia ake wara ye, areke fingangü ka-wü, teka acinzi gara sü ka-wü, de ani to jiase la fü wü *mürü tima ka Yesu, kpah ba nda wü Baranaba. ² Te wü Ananiya cinzi sü ka-wü la, fü ah aza bete jiase la, anü di fü wü mürü tima ka Yesu, gü ba, "Jiase te wüh se sü ka-ani di 'buru dene." Amba de, wüh ce dudu ka-wü eyi fü wü. Wara ka, mü wu ngü la kpah eyi reke areke.

³ Te Ananiya koro de jiase la kpaka wü Petero, fü Petero arü ayi-tata, gü ba, "Apa, Ananiya! *Satana fiti mü bala, neh teka ne? Angü jiase de te mü maka gbü sü ka-mü te mü cinzi ne, mü wo gara eyi, fü mü adu asu wu fü *Nzila Wazi Me, gü ba, jiase 'buru dene? Mü mere bala teka ne? ⁴ Sü la, ah ka-mü de? Baka te mü cinzi sü la, jiase engu na, ah de nda-mü de? Mü fi ngü la emagama mü teka asu wu bala, neh teka ne? Mü ngbü efi, gü ba, mü fiti dela a, wü kpara? A'a, mü fiti ka-mü dela Me."

⁵ Ananiya, te mü je ngü la bala, fü mü ati ciki sela, yofee! mü kpi eyi! Te wü kpara je ngü la bala, fü ewü angbü 'buru de mere cürü te wü teka wazi ka Me la. ⁶ Fü wü ka'dörö ayia agaga kökö de bongo, abi, anü di, ati.

⁷ Fütanga ngü la mba cükü'daye,* fü wara Ananiya ayia akoro. Amba ah wu ngü de te mere watí ye ne nda-ye de. ⁸ Fü Petero ayi-tata, gü ba, "De-ye deyi, sü ka-wü ne, wü cinzi ta de jiase baka e te watí ye mala la fanü? Ye mala la ngü ne fü ni." Safira gü ba, "Wayi, jiase engu na ngbü rü bala." ⁹ Fü Petero adu amala ngü fefe, gü ba, "Yi fi ngü la esüka yi kpala reke neh baye? Mü le afti Nzila Wazi Me, kpah baka nda watí mü? Mü je la ngü te ma ena amala fü mü. Wü kpara te ewü ti watí mü ne, wüh ladü ghamari emöngiti sela. Wüh ena akoro titine, abí kö mü, anü di, ati kpah ba nda watí mü la."

¹⁰ Safira, te mü je ngü la bala, fü mü ayia atí kötö, akpi ciki eri lö Petero sela. Fü wü ka'dörö arí amaka kökö gbele! kötö sela, ah kpi eyi! Fü ewü abí kökö na, anü di, ati kpah ede mbükü watí ye.

¹¹ Dela ngü ta te mere wü Ananiya ake Safira, teka ngü ka mani. Fü ngü la ato mere cürü fü wü kpara ka Yesu 'buru, kpah de wü gara kpara te ewü je nga ngü la bala.

Dene ngü ka cinga, te wüh to te wü mürü tima ka Yesu

¹²⁻¹⁴ Ta gbü wü sikipi la, wü kpara ka Yesu ngbü ebiti te-wü etambasü ka *Mere Kambü ka Me' agbü Yerüsalema. Ngü ka-ewü ngbü ta ereke gbü jia wü kpara efa sü, amba cürü kpah ladü. Wü kpara te ewü to maguma wü fü Yesu de ne, le arí gbü ngü ka-ewü la de. Amba mere bi wü kpara ladü, te ewü ngbü eje ngü ka Miri Yesu gömö ewü, wü komoko de wü würüse. Fü ewü adu ato maguma wü fü Yesu.

Wü *mürü tima ka Yesu ngbü ta ekuwa wü mürü keke, da emere wü gara kpeke wü ngü gbü jia wü kpara efa sü. ¹⁵ Teka ngü la, fü wü kpara akpo ta da ebí wü mürü keke ka-wü füh wü ka'da ka-ewü, enü di, eo ewü edere kaje te Petero ngbü efü tete, gü ba, "Te Petero ena afü te kaje la, kukuru na ena akoro füh wü mürü keke la, de wüh küwa." ¹⁶ Fü mere bi wü kpara, te ewü ngbü gbü wü nzö köti ede Yerüsalema la, akpo da eza wü mürü keke, de wü mene kpara te *siti wü di engame me ngbü emere ewü, enü de ewü agbü Yerüsalema kpala, teka fü wü mürü tima ka Yesu aküwa ewü. Fü ewü angbü ekuwa kpah 'buru.

¹⁷ Te wü mürü kpökpö ka wü mere *kovo ka Me, de wü bu ye, wü *Saduke, te wüh je ngü la bala, fü ewü angbü de mere kanga, da ekpü wü mürü tima ka Yesu teka ngü la. ¹⁸ Fü ewü ayia azoro wü mürü tima ka Yesu la, agü agbü ku.

¹⁹ Ah te egoro gbü biti, fü Me ayia atima gara *malayika ka-ye, anü aü möngiti ka kambü ka ku la, aza wü mürü tima la, akoro di kpa etanü, amala ngü fü ewü, gü ba, ²⁰ "Wü nü enü kpa etambasü *Mere Kambü ka Me la, de wü ngbü fi bü da emala ngü ka Yesu fü wü kpara, teka fü ewü aküwa."

²¹ Fü wü mürü tima aje riri ka malayika la areke areke. Gügü kpurutokokpi, fü ewü ayia anü kpa etambasü Mere Kambü ka Me. Fü ewü akpo da eri wü kpara kpala, ba e te malayika mala fü ewü.

Wü mürü kpökpö de wü Saduke la, yi wu ngü la nda-yi de. Fü ewü ayia abiti te-wü, de wü angbe cögbörö *kovo ka wü *Yisarayeke 'buru, teka agiri siti ngü ka wü mürü tima ka Yesu. Fü ewü atima wü kpara teka anü kpa esambü ka ku, aza wü mürü tima ka Yesu, akoro de ewü engagira ani. ²² Amba te wü kpara la nü koro agbü kambü ka ku kpala, nzaawö! wüh maka wü mürü tima la nda-wü de. Fü ewü adu kpaka wü mere kpara ka-wü gbü mabiti la, amala nga ngü la fü

* 5:7 5:7 Ngü la mere te-ye ta sidi nga lö-ra bata te Ananiya kpi tete. † 5:12-14 5:12-14 Wü kpara ka Yesu ngbü ebiti te-wü esa Yafu ka Solomona.

ewü, ²³ gü ba, “Ööö, kpara koro kpala ne, a maka wü möngiti la 'buru, te wüh ni eyi ani reke areke, wü kpara te ewü eceka kpi fütanga wü kpara ka ku, wüh 'buru ladü te sü ka-wü emöngiti. Amba, baka te ani ü möngiti la, ani maka biri kpara kpa esambü kpala nda-ani de.” ²⁴ Te mere kpara ka wü marajümiya, de wü mürü gele ka Me, je ngü la bala, fü ngü anza gömö ewü. Fü ewü angbü de mere fingangü, da eyi-ta tete-wü, gü ba, “Angü wü kpara la dürü neh baye baye?”

²⁵ Fütanga ngü la, fü gara kpara akoro amala fü ewü, gü ba, “Wü mere kpara deyí, wü je la ngü ne. Wü kpara de te wü zoro ewü esikine ne, wüh ladü kpa etambasü ka Mere Kambü ka Me, da eri wü kpara kpala.” ²⁶ Fü mere kpara ka wü marajümiya ayia de wü kpara ka-ye, anü kpa etambasü ka Mere Kambü ka Me, azoro wü mürü tima la, teka alügü ewü engagira wü mere kpara. Amba wüh mere ewü esiti de, angü wüh ngbü ekpe cürü, angü wü kpara ena asötö ani, amörö de teme.

²⁷ Te wüh za wü mürü tima ka Yesu la, koro di tete, fü ewü ao ewü engagira wü mere kpara gbü mabiti la, fü mürü kpökpö akpo da emala ngü fü ewü kpekpeke, ²⁸ gü ba, “Wü le ao liya ka ngüte komoko la gbü nzö ani neh teka ne? Ani mala ngü fü wü ta kpekpeke, de wü mere e adu ari wü kpara de iri komoko la tine de. Wü je ngü la de, neh teka ne? Titine, ngü ka-wü de te wü ngbü eri wü kpara di ne, ah wü eyi gbü Yerüsalema 'buru.”

²⁹ Fü wü Petero ayia alügü ngü fü wü mere kpara la, gü ba, “Wü mere kpara deyí, ah le de ani mere riri ka Me. Angü te ani ce ngü kaka, teka adu aje ngü ka-wü, wü kpara ka füh kotö ne, ah esiti. ³⁰ Nda-wü, wü de wü kpara ta te wü zoro Yesu, fü wü abere engü füh *rü gbegete, amörö. Fü Me[‡] ayia azükü engü gbü kpi la. ³¹⁻³² Ani wu ngü la cu de jia ani, fü ani angbü emala nganga fü wü kpara de wazi *Nzila Wazi Me. Me ngbü eto Nzila Wazi ye la fü ani me-ye, angü ani ngbü eje riri kaka. Me za Yesu, o Mere Miri kpa gbü kpi kpala gbü kokpa ka-ye. Ah tima ta engü kpaka ani, wü di enga Yisaraye, teka aü jia ani de ani fü maguma ani, teka fü ni, Me, aboro *siti ngü ka-ani. Te di bala, ah le de wü fü maguma wü, du le ngü ka Yesu la.”

³³ Te wü mere kpara la je ngü la bala, fü ngü la ake te ewü afa sü. Wüh gü ba, “Ah le de ani mörö wü Petero asidi.”

³⁴ Gara kpara biringbö ta ladü esüka ewü gbü mabiti la, de iri ye Gamaliyele. Ah ka-ye de *Farusi. Ah kpah de *mürü riri, te wü kpara 'buru ngbü ecu ngüngü na. Fü Gamaliyele ayia, arü tikpi, amala ngü fü wü bu ye la, de wüh za wü mürü tima ka Yesu la, nü di kpa etanü, teka fü ani aro mö esüka ani teka ngü ka-ewü.

³⁵ Fü Gamaliyele adu amala ngü fü wü bu ye la, gü ba, “De-yi, wü di enga wüna, yi ceka te-yi 'be, teka ngü de te yi ele amere fü wü kpara la. ³⁶ Yi fi la nga ngü ka Tewuda tane, te yia o te-ye ba mere kpara, fü mere bi wü kpara ayia ale ngü kaka, baka wü kpara kama bala (400) ne. Amba, te engu kpi, fü wü kpara ta te ewü le ngü kaka ne, akpe ka-wü, abaya 'buru. Fü ngü kaka anza bü bala. Gara ngü te du mere te-ye fütanga ngü la, ah nda ma. ³⁷ Fütanga ngü la, gbü re te miri to riri teka atanga wü kpara, fü gara kpara ka Galilaya de iri ye Yuda ayia akoro kpah de nda-ye ngü. Fü mere bi wü kpara ale ngü kaka. Te engu kpi, fü ngü kaka anza, kpah de wü kpara ka-ye 'buru. ³⁸⁻³⁹ Te di bala, wü di enga wüna, yi fi nga ngü ka wü *kpara ka Yesu ne, mbi mbi mbi. Titine mere kpara ka-ewü kpi eyi. Te ngü ka-ewü di de kükürü ngü ka füh kotö ne la, ngü la ena anza ka-ye anza de tete-ye, baka ngü ka wü Tewuda ake Yuda ne. Amba te ngü la di zu de ngü ka Me fanü fanü la, yi ti amörö tima la nda-yi de. Te di bala, yi ele agü gü kpaka Me? Nih ce kpa te ewü ace.”

⁴⁰ Fü wü mere kpara la adu ale ngü la gömö Gamaliyele. Fü ewü adu ai wü mürü tima ka Yesu la, asüma ewü de juru, ato riri fü ewü kpekpeke, gü ba, “Wü mere e adu ari wü kpara de ngü ka Yesu, tine kpo fi de.” Fü ewü ace kpa te ewü. Fü ewü anü.

⁴¹ Fü wü mürü tima ka Yesu la ayia gbü sü ka mabiti sela, ago agba wü de mere tadu te wü. Kükürü de, angü Me le fü ani amaka cinga teka ngü ka Yesu. ⁴² Gbü wü silkü 'buru, wüh ngbü emala ngü ka Yesu fü wü kpara kpa etambasü *Mere Kambü ka Me, kpah kpa gba wü gara kpara, gü ba, “Yesu de *Kurisito te Me tima engu teka aküwa wü kpara.” Wüh ce ngü la nda-wü kpo fi de.

6

Dene ngü ka wü kpara lorozi, te wüh fe ewü,

teka ale ta-ngü te wü mürü tima ka Yesu

[‡] 5:30 5:30 Petero gü ba, “Ah de Mere Me, te di de vüngüte ka wü kundu ani te mere ngü la me-ye.” * 6:1 6:1 Wü kpara ka Yerüsalema, wüh de kpara te ewü ngbü emala ngü Ebere.

¹ Ta gbü wü sikipi la, wü *kpara ka Yesu ngbü esibi efa sü. Fü siti ngü ayia akoro esüka ewü, angü gara ewü, de te ewü ngbü emala ngü *Giriki ne, wüh kpo edi ngü te wü kpara ka Yerüsalema,* gü ba, "Te wüh ngbü egafa wü e fü wü würüse wökö la, nda-ani wü wökö maka wü e mbi mbi de."

² Fü wü *mürü tima ka Yesu, ewü nzükpa de füh ye 'basu ne, ayia aje ngü la bala. Fü ewü abiti te-wü de wü gara kpara ka Yesu la 'buru, amala ngü fü ewü, gü ba, "Wü di enga wüna, nda-a, ah le de a lala te tima, ta te Miri Yesu to fü a ne. Angü te a ena ace da eri wü kpara de ngari Me, adu alala teka ngü ka magafa e la, ah esiti! ³ Teka ngü la, ah le fü yi afe wü gara kpara teka tima la, kpeke wü kpara de te wazi ka *Nzila Wazi Me si emagama ewü, te ewü wu ngü kpah eyi awu mbi mbi mbi. Yi fe wü kpara baka lorozi, teka fü a ace tima ka magafa e la esaka ewü. ⁴ Nda-a tima ena adi nda-ye teka adi eku gba fü Me, kpah da emala ngari Me fü wü kpara."

⁵ Fü fingangü la areke gbü jia wü kpara ka Yesu la 'buru. Fü ewü ayia afe gara kpara de iri ye Setefanü, te to maguma ye 'buru fü Me. Wazi ka Nzila Wazi Me si kpah eyi emamagama. Wüh fe kpah *Filipo, de wü Porokoro, Nikanora, Timüna, Parumena, bete Nikola, te di de *ganzi kpara ne.† ⁶ Te wüh fe wü kpara la tete, fü ewü aza ewü, ao engagira wü mürü tima ka Yesu. Fü wü mürü tima ka Yesu ao kpa wü gbü nzö ewü, teka fü Me ato wazi ye fü ewü, gbü tima ka-ewü ka magafa e la.

⁷ Fütanga ngü la, ngari Me ngbü fi bü da ewü gbü Yerüsalema 'buru. Wü kpara ka Yesu ngbü kpah esibi efa sü. Gara wü mere *kovo ka wü Yisarayeale ngbü ta kpah bü eto maguma wü fü Yesu fanü.

Dene ngü ka Setefanü engagira wü angbe cögbörö kpara

⁸ Setefanü ta de biri kpara esüka ewü, de te wüh fe ewü teka tima ka magafa e ne. Ah ta de kpeke kpara te Me to wazi fefe. Ah ngbü kpah emere tima ka Me de wazi fa sü, kpah da ekuwa wü mürü keke, da emere gara wü kpeke ngü gbü jia wü kpara.

⁹ Gbü gara sikipi, fü gara wü di enga *Yisarayeale[‡] te ewü le ngü ka Yesu de, fü ewü ayia akpo ega yiki gömö Setefanü teka ngü ka Yesu. ¹⁰ Amba gbü yiki ka-ewü la, wüh ti afa engu nda-wü de, angü Setefanü

ngbü elügü ngü fü ewü de wazi ka *Nzila Wazi Me.

¹¹ Te wü kpara la wu bala, fü ewü ayia amere mani, ase wü gara kpara de jiasse, de wüh nü su wu eküte Setefanü, gü ba, "Ah ka-ye de siti kpara! Ani maka ta engu te ngbü efala Me! Ah ngbü kpah efala *Müse, ta te to *Riri ka Me fü ani ne!" ¹² Fü ngü ake te mere bi wü kpara afa sü. Fü wü angbe cögbörö *kovo ka wü Yisarayeale aje ngü te ewü mala la, fü ngü la ake te ewü kpah afa sü. Fü ewü atima wü kpara teka azoro Setefanü, akoro di engagira ani. ¹³ Fü ewü ai kpah wü gara kpara, de wüh koro, wüh mala nga siti ngü ka Setefanü engagira ani gbü mere mabiti. Fü wü kpara la ayia amala ngü de wu eküte Setefanü, gü ba, "Siti ngü ka komoko la fa sü! Ah ngbü fi bü da emala siti ngü te Mere *Kambü ka Me ka-ani ne, bete *Riri ka Müse, ¹⁴ gü ba, 'Yesu[§] ena afü ngü la 'buru. Ah ena amürü Mere Kambü ka Me ka-ani ne amürü. Ah ena afü kpah Riri ka Me, de ta te *Müse to fü ani ne, teka ato nda-ye riri.' "

¹⁵ Te wü mere kpara gbü mabiti la je ngü la bala, fü ewü akpo da ecka Setefanü kpekpeke, de siti maguma. Fü ewü awu gbüra Setefanü te ngbü eci baka nda *malayika ka Me.

7

¹ Fü mürü kpökpö ka wü mere *kovo la adu ayi-ta Setefanü, gü ba, "Ngü de te ewü mala eküte ye ne, ah fanü?"

² Fü Setefanü alügü ngü fefe, gü ba, "Wü wüba, de wü di enga wüna, ngü la bala nda de! Yi fi nga ngü ta te Me mere fü wü kundu nih ne mbi mbi mbi. Ngü la kpo ta gügü eküte mere kundu ye kundu nih de iri ye *Abarayama ne. Angü Mere Me koro ta, sere te-ye fü Abarayama de mere wazi ye. Ah mere ngü la, o Abarayama koro eyi ngbü gbü tö ka *Kanana sene? Ah bala de! Ah mere ngü la, ta te engu ngbü nengete agbü tö ka Mesopotamiya.*

³ Fü Me amala ngü fefe, gü ba, 'Ye yia eyia, de ye ce gba ye, de wü mürü ye, de ye go ngbü agbü gara ganzi sü, te ni ena agü tatamu fü ye.' ⁴ Fü Abarayama ayia gbü sü la, anü angbü ka-ye agbü gara sü de iri ye Arana. Fü wö ye na ayia akpi kpala. Fütanga ngü la, fü Me ayia aza wü Abarayama, anü akoro de ewü sene, gbü tö ka Kanana, de te nih ngbü gbügbü na ne. ⁵ Amba te engu koro sene,

† 6:5 6:5 Nikola ta de kpara ka Atiyokiya te fü te-ye du le gele ka wü Yisarayeale. ‡ 6:9 6:9 Wü kpara la ngbü ta ebiti te-wü kpa esambü ka biti-te, te wüh ei, gü ba, kambü ka wü labi te ewü ce kpa te ewü. Gara ewü koro agbü Kurene, gara agbü Alekezandariya, gara agbü Silisiya, gara agbü Asiya. § 6:14 6:14 Yesu ka-ye de kpara ka Nazareta. * 7:2 7:2 Ngü la mere te-ye o Abarayama nü agbü Arana la de.

Me to sü fefe gbü tō ne 'buru 'buru de. Amba, ah kina kina fefe, gü ba, 'Te gara, ni ena ato tō ne 'buru fü wü, de wü kundu ye, teka fü wü angbü gbügbü fi mere badi.' Gbü sikipi te Me mala ngü la tete, o Abarayama bi ye nda la de.

⁶ Fü Me adu amala kphah gara ngü fü Abarayama, gü ba, 'Ni ena ato wü jaji fü ye. Te gara, wü kundu ye ena ayia sene, anü akoro agbü gara tō nengete, angbü kpala baka wü ganzi kpara. Wü kpara gbü tō la ena afü ewü ba wü labi ka-wü, ato cinga te ewü teka wü re kama bala (400). ⁷ Fütanga ngü la, ni, Me, ena adu aküwa wü kundu ye esaka wü kpara, te ena ato cinga te ewü la, angü ni ena adu ato kuru fü nguwa siti wü kpara la. Fü wü kundu ye adu ayia gbü sü ka-ewü kpala, alügü nga wü, adu akoro gbü tō ka wü Kanana sene. Fü ewü agbo nga iri ni, da emere ngü ka-ni gbü sü ne.' Dela ngü te Me mala fü Abarayama. ⁸ Fü ah adu ato riri fefe, gü ba, 'Ah le de wü ti esa *basa, de wü nguwa ye 'buru, angü wü de nguwa *vüngüte kani, Me.'[†] Fütanga ngü la, fü Abarayama abi *Yisaka. Fütanga sikipi 'bajena, fü ah agü Yisaka kpa esa basa, kphah ba ngü ta te Me mala fefe. Fütanga ngü la, fü Yisaka abi *Yakobo, agü engu kphah esa basa. Fü Yakobo abi wü kundu nih, ewü nzükpa de füh ye 'basu ne, fü ah agü ewü kphah 'buru esa basa.

⁹ Gara ye Yakobo de iri ye *Yüsefa ne, wü di engu ni ye na ngbü ta ekpü engu efa sü. Fü ewü ayia azoro Yüsefa, acinzü engu fü wü gara kpara. Fü wü kpara la aza engu labi tete, anü di agbü *Ezepeto. Amba gbü wü ngü la 'buru, Me ngbü ta tundu ake di. ¹⁰ Fü Me aküwa engu gbü wü cinga ka-ye la 'buru, ato kphah wazi fefe, teka fü ngü kaka areke gbü jia miri ka Ezepeto. Fü miri la aza Yüsefa, ao engu mere kpara gbü nzö wü kpara ka Ezepeto 'buru. Fü Yüsefa akpo da ekö ndo, ebiti gbü kafa ka miri, angü ah wu eyi, gü ba, tala ena akoro.

¹¹ Fütanga ngü la, fü mere kpiri tala ayia ati agbü tō ka Ezepeto 'buru, kphah bete nda Kanana. Wü kpara zü cinga ta fa sü. Te di bala, wü Yakobo de wü di ye, te ewü ngbü ta agbü Kanana de sene, wüh maka ta biri e-mazü fü wü bane kpo de. ¹² Fü Yakobo aje, gü ba, 'Ndo ladü agbü Ezepeto kpala.' Fü ah atima wü di ye teka anü ase ndo la. Te Yüsefa wü ngü la, ah sere te-ye fü wü di engu ni ye nda de. Fü wü di engu ni Yüsefa la adu de ndo ka-wü la kpaka

wö wü. ¹³ Fütanga ngü la, fü ndo la ayia anza. Fü tala adu kphah amere ewü. Fü wö ewü adu kphah atima ewü agbü Ezepeto, teka ase gara ndo. Te wüh koro kpala, fü Yüsefa ayia asere te-ye fü ewü, gü ba, 'Ni de engu ni wü, ta te dürü' ne. Fü miri ka Ezepeto adu aje, gü ba, wü di engu ni ye Yüsefa koro eyi. Fü engu ayia ato sü fü ewü agbü Ezepeto kpala. ¹⁴ Tekä ngü la, fü Yüsefa adu atima kpara, teka anü aza wö ye, Yakobo, adu akoro di agbü Ezepeto, be kphah te wü kpara ka-ye kpala 'buru. Wüh ta 'buru wü kpara teke bata nzükpa de füh ye 'buruve (75). ¹⁵⁻¹⁶ Fü wü Yakobo ayia anü akoro angbü agbü Ezepeto, zalü koro di gbü sikipi te engu kpi tete. Te Yakobo kpi tete, fü ewü aza kökö, adu di agbü Kanana sene. Fü ewü ati engu agbü sü ka mbükü ta te Abarayama se.[‡] Fütanga ngü la, fü wü di Yakobo akpi kphah agbü Ezepeto kpala. Fü ewü aza kö ewü, akoro di, ati kphah gbü *Kanana sene.

¹⁷⁻¹⁹ Fütanga ngü la, fü wü kundu nih angbü ta agbü Ezepeto kpala, teka mere bi re. Fü ewü asibi kpala afa sü. Fü gara to miri ayia angbü gbü nzö wü Ezepeto. Fü miri la akpo angbü emere wü kundu nih sisiti, angü toto iri eyi teka züka ngü, ta te Yüsefa mere ne. Fü ah ayia afü wü kundu nih ba wü labi ka-ye, ato riri fü ewü, gü ba, 'Wü za wü di wü, wü jaji komoko, wü sötö agbü ngu, de wüh kpi kpala.'

Fütanga ngü la, fü sikipi ta te Me mala ngangä na fü Abarayama, gü ba, 'Ni ena aküwa wü kundu ye esaka wü vügü tete' ne, ayia akoro ghamari. ²⁰ 'Duwa fü ewü abi mere kundu nih de iri ye *Müse, te Me fe engu, o ba züka kpara ka-ye ne. Fü ewü awo Müse esambü ka wü wö ye teka fe bata. ²¹ Fütanga fe bata la, fü cürü ayia arü te wü wö ye na. Fü ewü aza Müse engu, anü di, ao kpa ede mere ngu. Fü gara ye miri, jaji wü rüse, anü amaka Müse kpa eküte ngu kpala. Fü ah aza engu, adu di, aga cu baka engu ye tete. ²² Fü Müse aga, angbü egiri ngü esüka wü jaji ka Ezepeto. Fü ah akoro kpeke komoko, te wu ngü fa sü, kphah baka wü di engu Ezepeto.

²³ Te re ka Müse koro tete teke 'basu, fü ah ayia afi ngü emaguma ye, gü ba, 'Ni ena anü aceka ngü ka wü di engu ni ni, wü di engu *Yisaraye.' ²⁴ Te engu koro kpala, fü ah awu gara kpara ka Ezepeto, te ngbü emi gara engu Yisaraye. Fü Müse ayia akoro teka ale ta-ngü te engu ni ye la. Fü ah amü engu Ezepeto la, amörö ka. ²⁵ Müse fi ta nda-ye, gü ba, wü di engu ni ni, wü di

[†] 7:8 7:8 Mü ena amaka ngü la gbü Gina Ngü 17:9-14.

[‡] 7:15-16 7:15-16 Wü ti Yakobo ta gbü sü te Abarayama se teka ati wara ye gbügbü. Mü ena amaka ngü la gbü Gina Ngü 23 bete Gina Ngü 50:12-14. Nda wü di Yakobo, wüh ti ewü ta agbü Sekeme, gbü sü te wüh se ta esaka wü di engu Amüra. Mü ena amaka ngü la gbü Yosuwä 24:32, bete Gina Ngü 33:18-20.

enga Yisarayeale, ena awu, gü ba, 'Me tima ni me-ye, teka aküwa ani,' amba, wüh wu ngü la bala nda-wü de.

²⁶ Baka egambi la, fü Müse adu amaka wü di enga Yisarayeale 'basu, te ewü ngbü emi te-wü. Fü ah ayia teka aye süka ewü. Fü ah amala ngü fü ewü, gü ba, 'Wü di enga ni ni, wü ngbü emere gü esüka wü bala teka ne? Wü de wü di enga ni de?' ²⁷ Fü kpara te ngbü emi kiri ye ne, ayia amala ngü fü Müse, gü ba, 'De-ye deyi, e-o ye ba miri gbü nzö ani neh da?' ²⁸ Ye ele amörö ni, kpah baka e te ye mörö enga Ezepeto esikine ne?' ²⁹ Te Müse je ngü la bala, fü cürü ari tete. Fü ah ayia akpe ka-ye, anü angbü agbü tö ka wü Midiyana. Fü engu aza würüse kpala, abi wü jaji komoko 'basu. Fü ah angbü agbü tö ka wü Midiyana kpala teka mere bi wü re.

³⁰ Fütanga re teke 'basu, fü Meš ayia akoro kpaka Müse, amala ngü fefe. Me koro ta kpaka Müse ne, o engu di gbü tö kanih de sene? Ah bala de! Ah koro kpaka Müse nengete agbü tö ka wü Midiyana kpala, o Müse ngbü ta endoro agbü gü, eküte mere da de iri ye *Sinayi. Ah bala de? Fü Müse ayia awu e ba te-wa, te ngbü eci eküte gara engu rü mbele mbele mbele mbele bane. ³¹ Fü ngü la aga gbü jia Müse afa sü. Fü engu ale ta de ni ka te-ni gbamari, teka de ni wu e la mbi mbi mbi. Te ah koro gbamari ede rü la, fü ah aje ri Me te ngbü emala ngü fefe, gü ba, ³² 'Ma de Mere Me, te di de *vüngüte ka wü kundu mü, wü Abarayama, Yisaka, Yakobo, de wü bu wü.' Te Müse je ngü la bala, fü küküte akpo angbü elo'böka, da eyi ka cürü. Ah ti fü engu aceka kpi kpala tine de. ³³ Fü Me amala ngü fefe, gü ba, 'Müse deyi, mü ghi kamaka gbü lö mü asidi, angü sü de te mü rü tete ne, ah ka-ye de sü ka-ra. ³⁴ Dene ngü te ma le amala fü mü. Ma wu cinga, de te wü kpara kara ngbü ezü agbü Ezepeto kpala, ne eyi. Ma je gba ka-ewü la kpah eyi. Te di bala, fü ra akoro dene, teka aküwa ewü. Demü Müse, mü yia eyia enatikine, angü ma le atima mü agbü Ezepeto, teka aküwa wü kpara ka-ra la.' Dela ngü ta te Me mala fü Müse."

³⁵ Fü Setefanü adu amala kpah gara ngü fü wü mere kpara gbü mabiti la, gü ba, "Wü di enga wüna, yi fi nga ngü la mbi mbi mbi. Müse engu la, wü kundu nih le engu ta de. Wüh fala ta engu, gü ba, 'E-o ye baka miri gbü nzö ani neh da?' Amba ah ka-ye de kpara te Me tima fü ewü, teka

aküwa ewü. Me du o engu miri gbü nzö ewü fanü. Fü ah ato mere wazi fefe teka ngü la.* ³⁶ Fü Müse ayia amere mere bi wü talara ngü gbü jia miri ka wü Ezepeto, teka de ah ce kpa te wü kundu nih. Fü Müse ayia aza ewü agbü Ezepeto kpala asidi, akoro di kpa era mere *yi-ngu. Fü ah amere gara kpeke ngü, angü ah mala ta bü ngü fü mere yi-ngu la, de ah ye süka ye, ce kaje, teka fü wü kundu nih akö ngu la kpa etangu tete. Fü ngu la aye süka ye fü ewü kpah fanü. Fü ewü angbü endoro de wü kpara ka-nih la, kpa gbü gü kpala teka re teke 'basu, kpah da emere mere bi wü kpeke ngü gbü jia ewü.

³⁷ Ah ta kpah de Müse engu te mala ngü fü wü di enga Yisarayeale, gü ba, 'Te gara Me ena atima gara *mürü dofo fü wü, kpara gbü nguwa wü, te ena amala ngari ni, Me, fü wü, kpah baka ni, Müse.' ³⁸ Müse ngbü kpah gbü nzö wü kundu nih, ta te ewü ngbü agbü gü kpala, eküte mere da de iri ye Sinayi ne. Fü Me amala ngü fü Müse kpa füh da kpala, ato *Riri ka-ye fefe. Fü Müse adu ato Riri la fü wü kundu nih. Fü wü kundu nih angbü da esere Riri la fü wü di wü, zalü akoro di eküte nih enatikine.

³⁹ Wü di enga wüna, yi fi nga ngü la mbi mbi mbi. Wü kundu nih le ta ngü ka Müse eyi fanü fanü? Wüh le ngü kaka nda-wü de. Wüh je riri kaka kpah de. Wüh gü ba, ani le adu agbü Ezepeto. ⁴⁰ Baka te Müse du koro kpa füh da la kere de ne, fü ewü ayia amala ngü fü *Arona, te di de enga ni ye Müse, gü ba, 'Ye reke faranda fü ani, teka de wü me ka faranda la ti engagira ani. Angü Müse de te za ani agbü Ezepeto, koro di de sene ne, ah dürü ka-ye eyi fi! Anga ngü te mere engu kpa füh da kpala, ah de neh ene? Ani wu nda-ani de, anga engu dene neh kaye ya?' ⁴¹ Fü ewü areke faranda ka-wü baka kuru engu yiti la. Fü ewü aza wü nü, awa, amörö, teka ato la'bi tete fefe. Fü ewü ayia amere mere karama teka faranda ka-wü, te ewü reke de kpa wü la. Fü ewü angbü tine de mere tadu teka ngü ka-wü la.

⁴² Wü di enga wüna, dela si-ngü te Me fü ta kürüfe ye fü wü kundu nih tete. Angü ah to riri fü ewü ma. Wüh ngbü fi bü da emere ngü kaka de maguma wü 'basu 'basu, de wü di wü, de wü kundu wü sisi nga wü. Te di bala, fü Me ayia ace ewü, gü ba dene, 'Wayi, ah 'be, wü nü enü, wü sama faranda ka-wü la. Wü ku gba fü *siti wü di enga me de wü küfara, anga wüh ena ale ta-ngü te wü ale ya?'

§ 7:30 7:30 Ta te Setefanü mala ngü la, ah gü ba, "Malayika ka Me koro kpaka Müse." Si-ngü la ka-ye bane, angü Me gü tamu ye fü Müse baka te-wa. Wü di enga Yisarayeale gü ba, te-wa la, ah baka malayika ka Me. * 7:35 7:35 Gbü ngü te Setefanü mala, ah gü ba, "Me to wazi fü Müse esaka malayika ka-ye."

Fü Me amala gara ngü fü ewü, gömö gara *mürü dofo ka-ye, gü ba, 'De-wü, wü di enga Yisarayeleye, ni le ngü ka-wü de. Kükürü de, angü wü le ngü ka-ni kphah de, kphah baka wü kundu wü, ta te ewü ndoro de wü Müse agbü gü, teka re teke 'basu ne. Wü kundu wü ngbü fi bü da emere ngü ka-ni de maguma wü 'basu 'basu. Wüh za mere bi wü nü, awa, gü ba, ani ngbü eto fü ni, Me. Amba ah bala de! ⁴³ Maguma ewü ngbü fi bü teka wü faranda ka-wü, de wü di enga me.† Wüh reke ta wü faranda ka-wü la, angbü ebi esaka wü, teka fü ewü angbü esama ngü fü ewü, da emere gele ka-ewü agbü gü kpala. Dela *siti ngü ta te wü kundu wü ngbü emere. Nda-wü, wü kundu ewü sidi nga ewü, wü kphah de kpara ka maguma 'basu. Wü ce ngü ka faranda la kphah de, wü ngbü fi bü enü di kpa engagira nü. Tekah ngü la, ni, Me, ena aliki wü agbü tö ka-wü asidi. Wü vügü ka-wü ena azoro wü, anü de wü agbü gara sü nengete, kpa ekere *Babilona kpala.*‡ Dela ngü te Me mala fü wü kundu nih, angü wüh le riri te ni, Me, to fü ewü gömö Müse ne nda-wü de.

⁴⁴ Wü di enga wüna, dene ngü te ma le amala fü yi teka *Mere Kambü ka Me. Ah le kphah de yi je si-ngü la mbi mbi mbi. Ta te wü kundu nih ngbü endoro agbü gü de wü Müse ne, Mere Kambü ka Me ladü? Ah ma! Wüh ngbü ta egbo nga iri Me, da emere gele kaka, gbü engah *gugu te ewü ngbü ebi esaka wü, endoro di ne. Wüh mere gugu la ta gbü konü, baka ngü te Me mala fü Müse, angü ah sere ta kuru gugu la fefe gbü roto. ⁴⁵ Fü ewü angbü endoro di balaaa. Fü ewü akpi 'buru agbü gü kpala. Fü wü di wü angbü kphah egbo nga iri Me gbü gugu la. Fütanga ngü la, fü mere kpara ka-ewü de iri ye *Yosuwah aza ewü, akoro de ewü gbü tö dene. Fü Me aliki wü nguwa wü kpara, ta te ewü ngbü sene, wü mürü tö ne, engagira ewü. Fü ewü adu ao gba wü sene. Gbü wü re la, wü kundu nih ngbü fi bü da egbo nga iri Me gbü gugu la. Wüh ngbü kphah emere ngü la zalü koro di gbü re, ka Mere Miri *Davidi.

⁴⁶ Angü Davidi ta de kpara te ngü kaka reke gbü jia Me areke fa sü. Fü fingangü ayia akoro gbü nzö Davidi, fü engu ayia ayi-ta Me, de ah le fü ni, de ni jü mere kambü fü ye, teka de wü di enga Yisarayeleye di egbo nga iri ye gbügbü na. ⁴⁷ Me le ngü la fefe nda de. Ah gü ba, 'Kpara te ena aji kambü fü ni, ah ena adi de ye ye, *Solomona.' Fü Solomona adu aji

Mere Kambü ka Me me-ye, sidi nga wö ye.

⁴⁸ Wü di enga wüna, yi fi nga ngü la mbi mbi mbi. Kambü de te wü kpara füh kotö ne jü de kpa wü ne, Mere Me te ngbü kpa gbü kpü ne, ah ena adu angbü gbügbü fanü? Me mala ngü la me-ye gügü, gömö gara mürü dofo ka-ye, gü ba dene, ⁴⁹ 'Kpi ka-ye baka kpökpö ka-ni, te ni ngbü engbü fefeh na. Kotö ka-ye de sü te ni ngbü eo lö ni fefeh. Te di bala, wü ena aji fü ni ne kambü ne ya? ⁵⁰ Angü wü e füh kotö ne 'buru, ni mere ta me-ni. § Dela ngü te Me mala teka Mere Kambü te wü kundu nih jü fefe."

⁵¹ Fü Setefanü adu amala gara ngü fü wü mere *kovo gbü mabiti la, gü ba dene, "Wü mere kpara ka-ra, yi gü ba, ma de siti kpara, te ma ngbü efala *Mere Kambü ka Me, kphah de *Riri ka Me, te Müse to fü nih. Amba Riri ka Me la, yi ngbü eyi eje fanü? Yi de wü mürü kögö-nzö! Yi le ngü ka Me 'buru 'buru de! Yi kphah baka wü kundu yi, te ewü le ngü ka *Nzila Wazi Me 'buru de ne! ⁵² Angü wü kundu yi ngbü ta eto cinga te wü mürü dofo 'buru, de te ewü ngbü emala ngari Me fü ewü ne. Kphah bala, wü kpara te ewü sere ngü fü ewü, gü ba, 'Me ena atima züka kpara ka-ye teka aküwa wü,' wüh mörö ewü kphah asidi. Enatikine Me tima züka kpara la eyi fü yi, fü yi aza engu, amörö kphah asidi. ⁵³ Wayi, Riri ta te Me to fü Müse* ne, wüh ri yi de ngü la ma! Yi le nda-yi de!"

Dela ngü te Setefanü mala fü wü angbe cögbörö kpara gbü mabiti, teka liya te ewü le ao gbü nzönzö.

⁵⁴ Te wü mere kpara la je ngü la bala, fü maguma ewü ayia asiti afa sü. Fü ewü akpo angbü ezü komö wü de gü. ⁵⁵ Fü Nzila Wazi Me ato wazi fü Setefanü, fü ah ae jia ye kpa tikpi, fü ah awu wazi ka Me te lofo sü gbü jia ye, bete Yesu te rü ede kpökpö ka Me gbü kokpa. ⁵⁶ Fü ah amala ngü fü wü mere kpara la, gü ba, "Yi ceka la, ma wu kpü te ü te-ye! Fü Yesu arü gbü kokpa ka Me!"

⁵⁷ Te wü kovo gbü mabiti la je ngü te Setefanü mala de bala ne, fü ewü akpo da eba rere kpa tikpi, da eni güje wü de jikpa wü. Fü ewü aci 'buru, akpe ati fefeh na, ⁵⁸⁻⁶⁰ azoro engu, aza, akoro di kpa edere sü, akpo da esötö engu de teme, teka amörö. Fü Setefanü ayia aku gba fü Me, gü ba, "Akoo, Miri Yesu, mü za kuru ra kpara mü!" Fütanga ngü la, fü ah ati de nzökuta ye kötö, aku gba de mere ri ye, gü ba, "Miri Yesu, mü mere e ao liya, gbü

† 7:43 7:43 İri wü di enga me te ewü ngbü esama la, gara de Moloko, gara de Refana. ‡ 7:43 7:43 Mü ena amaka ngü la gbü buku ka Amüsa 5:25-27. § 7:50 7:50 Mü ena amaka ngü la gbü buku ka Yisaya 66:1-2. * 7:53 7:53 Setefanü gü ba, "Me to riri la fü Müse gömö wü malayika."

nzö wü kpara la, teka ngü ne, de." Te engu mala ngü la bala, fü ah ace kpa te-ye, akpi.

Dela ngü ka kpi ka Setefanü. Wü kpara ta te ewü ngbü gbü mabiti la, wüh 'buru de wü züka bongo te wü. Te di bala, wü kpara ta te ewü sötö engu de teme ne, wüh gbi züka bongo ka-wü la, za o esaka gara jaji komoko de iri ye Sawula, angü wü bongo la ena asiti. Ngü ka kpi ka Setefanü la reke ta gbü jia Sawula areke, angü engu le ta kpah eyi de wüh mörö Setefanü amörö asidi.

8

Dene ngü ka cinga te Sawula to te wü kpara ka Yesu

¹⁻³ Gbü sikipi te wüh mörö Setefanü tete, fü gara wü *kpara ka Yesu ayia aza kö Setefanü anü di ati. Fü ewü angbü eku gba tekaka de mere cinga te wü fa sü.

Gbü sikipi la, fü wü angbe cögbörö *kovo ka wü Yisarayeale akpo da eto cinga te wü kpara ka Yesu, agbü Yerüsalema efa sü. Sawula, fü mü ato te-mü kpah teka asiti tima ka Yesu. Te di bala, fü mü akpo angbü egiri wü kpara ka Yesu biri biri kpa gba wü, wü komoko de wü würise, adi ezoro ewü, egü agbü ku. Fü cürü ari te wü kpara ka Yesu. Fü ewü akpe ka-wü, abaya agbü nga nzö sü ka *Yudaya bete nda *Samarüya. Amba nda wü *mürü tima ka Yesu, ewü nzüka de füh ye 'basu ne, wüh ngbü nda-wü fi bü agbü Yerüsalema.

Dene ngü te wü Filipo ake Petero mere agbü Samarüya

⁴ Wü *kpara ka Yesu ta agbü Yerüsalema, te ewü kpe baya gbü wü gara sü ne, angbü endondoro da emala ngü ka Yesu, gbü wü sü de te ewü kpe ngbü gbügbü na ne 'buru. ⁵ Fü *Filipo anü nda-ye agbü *Samarüya. Fü ah anü akoro cu gbü mere köti* kpala, akpo da emala ngü ka Yesu fü wü kpara, gü ba, "Yesu de *Kurisito, te Me tima teka aküwa ani." ⁶⁻⁸ Fü ah akpo da emere mere bi wü kpeke ngü gbü jia ewü, da eküwa mere bi wü mürü keke, te küte ewü kpi akpi, bete ewü te lö ewü di walawala. Ah ngbü kpah eliki *siti wü di enga me guvu wü gara kpara asidi. Fü siti wü di enga me la angbü ekpe de mere rere gömö wü mini. Fü wü kpara gbü mere köti la angbü de mere tadu teka ngü la. Fü mere bi ewü adu ale ngü ka Yesu, te ewü je gömö Filipo ne, de maguma wü biringbö.

⁹ Gara komoko ta ladü kpala de iri ye Simüna. Ah ka-ye ta de mürü kuwa. Ah ngbü ta eo te-ye ba mere kpara, angü ngü ka kuwa kaka la ngbü ega gbü jia

wü kpara ka Samarüya efa sü. ¹⁰ Wü kpara gbü köti la ngbü ta 'buru eje ngü kaka la kpekepeke. Wüh ngbü efi ta ngü, gü ba, "Wazi komoko la baka nda Me." ¹¹ Teka mere bi wü re, wü kpara ngbü ta fi bü da eje ngü kaka la, angü ah ngbü ta emere wü lara ngü ka talara gbü jia ewü, de kuwa ka-ye la.

¹² Te *Filipo koro kpala, fü ah akpo da emala ngü ka Yesu Kurisito fü wü kpara, gü ba, dene, "Me tima Yesu füh kotö ne teka aküwa ani. Te wü to maguma wü fefe, Me ena afü wü ba wü kpara ka-ye." Fü mere bi wü kpara ayia ale ngü gögömö na la. Fü ewü aza *babatiza, wü komoko de wü würise mini. ¹³ Simüna, fü mü ale kpah ngü la. Fü ewü ato babatiza fü mü kpah baka nda wü bu mü. Fü engu adu kpah alala fütanga Filipo. Fü ah angbü eceka bi wü kpeke ngü, de te Filipo ngbü emere de wazi ka *Nzila Wazi Me ne, fü ngü la angbü ega gbü jijia.

¹⁴ Fütanga ngü la, fü wü *mürü tima ka Yesu agbü Yerüsalema ne aje ngü, gü ba, gara wü kpara agbü Samarüya le ngü ka Yesu eyi. Te di bala, fü ewü atima wü Petero ake *Yüwane kpaka ewü kpala, teka awu si-ngü la mbi mbi mbi. ¹⁵⁻¹⁷ Te wü Petero ake Yüwane yia nü koro kpala, fü ewü awu, gü ba, wü kpara la to maguma wü eyi fü Yesu fanü. Filipo to *babatiza ta fü ewü kpah eyi de iri Yesu. Amba ngü te lakü, wüh maka ta Nzila Wazi Me nda-wü la de. Te di bala, fü wü Petero ayia ao kpa wü gbü nzö wü kpara la 'buru, ayi-ta Me, de ah to Nzila Wazi ye fü ewü. Fü Me ato wazi ka Nzila Wazi ye fü ewü gbü sikipi la fanü.

¹⁸ Te Simüna wu, gü ba, wü kpara de te wü Petero o kpa wü gbü nzö ewü ne, wüh maka Nzila Wazi Me eyi, fü ah ayia aza jiase, anü di kpaka wü Petero, de ni to fü ewü, ¹⁹ gü ba, "Wü to wazi la fü ni kpah baka nda-wü, teka te ni o kpa ni gbü nzö gara kpara la, de ah maka kpah Nzila Wazi Me."

²⁰ Petero, fü mü alügü ngü fefe, gü ba, "Dene ne siti fingangü ne? Mü fi nda-mü, gü ba, wüh ngbü ese wazi ka Me la ase de jiase? Mü ena akpi de wü jiase ka-mü la 'buru, anü agbü wa! ²¹ Ngü ka-mü gbü tima ka-a ne nda ma, kükürü de, angü fingangü ka-mü siti gbü jia Me fa sü! ²² Mü ce *siti ngü ka-mü la, de mü fü maguma mü. Mü nda'ba te-mü fü Me, de ah boro siti ngü ka-mü la emaguma ye asidi. ²³ Angü, ma wu eyi, gü ba, siti fingangü sibi eyi emaguma mü fa sü, angü ku ka *Satana zoro mü eyi, gö!"

* 8:5 8:5 İri mere köti la kpah de Samarüya.

24 Fū Simūna anda'ba te-ye fū wü Petero, gü ba, "Wü yi-ta Me fū ni me-wü, teka de wü ngü de te wü mala fū ni ne, ah mere e amere ni bala de."

25 Dela ngü ta te wü Petero ake Yüwane mere agbü mere köti ka Samariya kpala. Wüh ngbü ta eri wü kpara, da emala ngari Yesu fū ewü. Te wüh mere ngü la nza tete, fū ewü ayia alügü nga wü, edu agbü Yerüsalema, fi da emala ngü ka Yesu fū wü kpara, gbü mere bi wü jürü köti ka Samariya.

Dene ngü ka Filipo ake mere kpara ka Etiyopiya

26 Fütanga ngü la, fū gara *malayika ka Me ayia akoro kpaka *Filipo, amala ngü fefe, gü ba, "Ye yia sene, de ye le mere kaje ka Gaza, te nü kpa edebu sü gbü kokpa bane."[†] 27 Te Filipo je ngü la bala, fū ah ayia anü akoro kpa te kaje la. Fū ah anü amaka te-ye ake gara kpara[‡] ka Etiyopiya, § te ngbü enü te kaje la de arabiya* ka-ye. Komoko la ka-ye de mere kpara, te ngbü emere tima fū miri ka Etiyopiya.[†] Ah de kpara te ngbü eceka kpi fütanga jase. Ah nü ta agbü Yerüsalema, teka agbo nga iri Me gbü *Mere Kambü ka Me kpala. 28 Fū ah angbü ego agba ye. Fū Filipo awu engu te ngbü gbü arabiya ka-ye, da etanga *Ngari Me gbü buku ka Yisaya. 29 Fū *Nzila Wazi Me amala ngü fū Filipo, gü ba, "Ye nü enü, ye koro gbmari ede arabiya la."

30 Filipo, fū mü ayia akpe akoro gbmari ede arabiya la. Fū mü aje ngü de te komoko la ngbü etanga gbü Ngari Me ne. Fū ah ayi-ta komoko la, gü ba, "Ngü de te ye ngbü etanga ne, ye wu sisi na eyi mbi?" 31 Komoko la gü ba, "Te wüh sere si-ngü la fū ni de la, ni ena awu neh baye? Ye li eli kpakine, de ye sere si-ngü la fū ni."

32 Ngü ta te komoko la ngbü etanga gbü Ngari Me ne, ah gü ba, "Wüh zoro komoko la, nü di, amörö, baka te wüh ngbü emörö *kambiliki. Te wüh ngbü emere engu sisiti bala, ah nga ka-ye ti, baka kambiliki te wüh ngbü ewa. 33 Kpara te ye süka ngü kaka mbi mbi nda kpa ma. Wüh to lümü fefe bü kükürü bala. Wüh yia mörö engu asidi. Kpara te ena alügü siti ngü la gbü nzö ewü nda kpa ma."[‡]

34 Te kpara ka Etiyopiya la tanga wü ngü la bala, fū ah ayi-ta Filipo, gü ba, "Ye sere la si-ngü ne fū ni. *Mürü dofo te ba ngü la ngbü emala ngü la neh teka ngü ka da? Ah ngbü emala nga ye, anga nga gara kpara?"

35 Filipo gü ba, "Wüh ba ngü la teka Yesu." Fū ah adu akpo da emala ngü ka Yesu fefe 'buru, gü ba dene, "Yesu kpi bala, teka aküwa ani gbü *siti ngü ka-ani."

36 Baka te wüh ngbü la fi bü enü, fū ewü anü amaka ngu. Fū kpara ka Etiyopiya la amala ngü fū Filipo, gü ba, "Ceka la, ngu di bü dene. Te ye ena ato *babatiza fū ni la, ah ena adi esiti?" 37 Filipo gü ba, "Te ye to maguma ye eyi 'buru fū Yesu la, ye ti eyi aza babatiza." Mere kpara la gü ba, "Wayi, ni to maguma ni eyi 'buru fū Yesu Kurisito, angü ah de Ye Me." 38 Fū engu arü de arabiya ka-ye. Fū ewü akö 'basu mini ake Filipo, ari agbü ngu. Fū Filipo ato babatiza fefe.

39 Te wüh koro kpa füh gümbe, yirri! fū *Nzila Wazi Me aza Filipo, adürü di gbü jia kpara ka Etiyopiya la asidi! Ah du wu engu tine de. Fū kpara ka Etiyopiya la ayia ale fi bü kaje ka-ye, de mere tadu te-ye, ego ago.

40 Filipo, fū mü awu te-mü 'duwa agbü gara sü de iri ye Azoto. Fū ah akpo da endoro gbü wü köti kpala biri biri 'buru, da emala ngari Me fū wü kpara. Fū ah anü zalü akoro agbü Kayisariya, angbü ka-ye kpala.

9

Dene ngü ka Yesu te sere te-ye fū Sawula

1-2 Gbü wü silkpi la, Sawula, mü ngbü fi bü agbü Yerüsalema, da emere wü *kpara ka Miri Yesu kpala sisiti, da emala ngü fū ewü kpepeke, gü ba, "Ni ena amörö wü 'buru amörö." Fū ah adu afi, gü ba, "Te ah bala la, ni ena amaka gara ewü agbü Damaseke kpala." Fū ah ayia anü kpaka mere kpara füh kpökpö, ayi-tata, de ah to köcökpa fū ni, teka de ni nü, sere fū wü mere *kovo ka wü *Yisarayeale agbü Damaseke, fū ni amaka wazi, teka adi ezoro wü kpara ka Miri Yesu kpala di. Te ah de wü komoko, anga wü würise la, fū ni azoro ewü 'buru, adu di agbü Yerüsalema.

3 Te engu maka köcökpa la, fū ah ayia anü agbü Damaseke. Te engu nü koro gbmari ede mere köti la, fū wazi Me ayia alofo sü edede na 'buru raaa! 4 Gbuu! Wazi Me la nzi Sawula eyi, gbo kötö! Fū ah aje kpa ri kpara te ngbü emala ngü fū ye, gü ba, "Sawula, Sawula, ah mere baye, te mü ngbü eto cinga te ra de bane ne?" 5 Sawula gü ba, "Mere kpara, mü neh da?" Fū ri kpara la alügü ngü, gü ba, "Ah de-ra

[†] 8:26 8:26 Kaje la yia ta agbü Yerüsalema, fū agbü gü, gbü sü te köti di tete ma. [‡] 8:27 8:27 Komoko la ka-ye ta kpa 'banga. § 8:27 8:27 Titi ne nga nzö sü ka Etiyopiya la, ah de Südani. * 8:27 8:27 Arabiya la, ah de arabiya te wü nü ngbü egbeke me-wü. [†] 8:27 8:27 Miri ka Etiyopiya la, ah ta de würise de iri ye Kandake. [‡] 8:33 8:33 Mü ena amaka ngü la gbü buku ka Yisaya 53:7-8.

Yesu, kpara te mü ngbü eto cinga tete na ne.”⁶ Fū Sawula akpo da elo 'böka ka cürü, gü ba dene, “Mere kpara, ni ena amere baye?” Miri Yesu gü ba, “Ma fe mü eyi teka amere tima ka-ra. Mü yia eyia tikpi, mü nü agbü Damaseke kpala. Tima te ma ena ato fū mü ne, ma ena asere fū mü kpala.”

⁷⁻⁸ Fū Sawula ayia arü tikpi, aü jia ye, amba ah tī aceka kpī nda tīne de. Wü kpara de te ewü ngbü enü de ewü ne, rü nda-wü fi bü edede sela, wazi ewü teka amala ngü tīne ma, ka cürü. Angü wü ngbü eje bü ri kpara, de te ngbü emala ngü ne, amba wüh wu küte kpara engu nda-wü de. Fū ewü ayia azoro kpa Sawula, agbeke, anü di agbü Damaseke.⁹ Fū Sawula ara agbü Damaseke kpala sīkpī bata, ah ceka kpī de, ah zü e kpaah de.

¹⁰ Gara *kpara ka Yesu ta ladü agbü Damaseke kpala de iri ye Ananiya. Fū Miri Yesu akoro asere te-ye fefe gbü roto, amala ngü fefe, gü ba, “Ananiya! Ananiya!” Fū Ananiya ayia ale ngü, gü ba, “Wayi, mere kpara, ni dene.”¹¹ Fū Miri Yesu amala fefe, gü ba, “Mü yia eyia, mü nü kpa gba gara kpara de iri ye Yuda, te di gbü mere kaje, te wüh ei, gü ba, kaje mbiimbi. Te mü koro eyi kpala la, de mü yi-ta ngü ka gara kpara de iri ye Sawula,* angü ah ngbü kpala da eku gba fere.¹² Angü ah roto mü eyi, te mü koro rī kpaakaka, fū mü ao kpa mü gbü nzöngö, teka de jīia na ü.”¹³ Ananiya gü ba, “Ati, mere kpara! Ma je nga siti ngü ka komoko la gömō mere bi wü kpara eyi fa sü, gü ba, engu ngbü ememerē wü kpara ka-mü, agbü Yerūsalema de kpala ne esiti.¹⁴ Titīne, ah maka köcökpa eyi esaka wü angbe cögbörö kpara, teka azoro wü kpara 'buru, de te ewü le ngü ka-mü ne.”¹⁵ Fū Miri Yesu amala ngü fefe, gü ba, “Fü nü enü. Mü kpe cürü de, angü ma fe engu eyi, ao *mürü tima ka-ra tete, teka amala ngü ka-ra fū mere bi wü kpara, te nga nzö wü sü füh kotö ne, wü *ganzi kpara, de wü miri ka-wü, be kpaah te wü di enga *Yisarayeale.¹⁶ Engu ena amaka mere bi cinga, teka tima ka-ra la te gara, amba ngü la, ma ena agü tatamu fefe mera.”

¹⁷ Te Ananiya je ngü te Miri Yesu mala fū ye la, fū ah ayia anü. Te engu koro kpa gba Yuda kpala, fū ah amaka Sawula, amala ngü fefe, gü ba, “Enga ni ni Sawula, Miri Yesu, de te sere te-ye fū ye te kaje, o ye ngbü enü de kpakine ne, ah tima ni me-ye kpaka ye dene.” Fū Ananiya ao kpa ye gbü nzöngö, gü ba dene, “Yesu le eyi de jia mü da ü te-ye. Ah le kpaah eyi de mü maka wazi ka *Nzila Wazi Me.”

¹⁸ Baka te Ananiya ngbü la bü emala ngü de bala ne, bü kece bane, fū gara e te di baka ko-si la, ayia gbü jia Sawula, ati kötö. Raaa! fū jia Sawula aü te-ye. Fū ah akpo eceka kpī. Fū engu ayia tikpi. Fū Ananiya ayia ato *babatiza fefe.¹⁹ Fütanga ngü la, fū ewü ayia ato zü-e fefe. Fū ah ayia azü. Fū wawazi adu akoro.

Dela ngü ta te Sawula fū maguma ye tete. Fū engu ayia angbü de wü kpara ka Yesu agbü Damaseke kpala.

Dene ngü te mere Sawula agbü Damaseke

²⁰⁻²² Fütanga ngü la, fū Sawula akpo da erī kpa esa wü *kambü ka biti-te ka wü Yisarayeale agbü Damaseke kpala, teka amala ngü ka Yesu fū ewü. Fū engu angbü erī ewü, gü ba, “*Kurisito te Me tima füh kotö ne, teka aküwa ani, ah kaye de Yesu.” Fū wü gara kpara ale ngü ka Yesu gögömö na. Amba gara ewü le ngü ka Yesu nda-wü de. Fū Sawula angbü ega yiki de ewü, gü ba, “Yesu de Ye Me fanü.” Fū ngü la ayia aga gbü jia wü kpara la 'buru. Fū ewü akpo da eyi-ta tete-wü, gü ba, “Apa! Dene komoko te ngbü ta ezozoro wü *kpara ka Yesu, eto cinga te ewü, agbü Yerūsalema ne de? Engu koro de sene ne kpaah bü teka azoro wü kpara la, anü de ewü engagira wü mere kpara agbü Yerūsalema de? Titīne, ah du mere baye, te ngü la du fū te-ye de bala ne?” Sawula, fū mü angbü fi bü da emala ngari Yesu fū ewü, enü di kpa engagira nü. Fū ngü la ake te wü mere *kovo ka wü Yisarayeale gbü Damaseke de sela ne afa sü, angü ah ngbü emala ngü la kpekpeke de wazi ka Me, gara ngü te wüh ena alügü fefe nda ma.

²³ Fütanga mere bi sīkpī, fū gara wü di enga Yisarayeale agbü Damaseke kpala, ayia abiti fingangü ka-wü 'buru tundu, teka agiri kaje de ani mörö Sawula asidi.²⁴ Fū ewü akpo angbü efete Sawula, biti de ra mini, emöngiti 'baranga ka mere koti la, teka de ani zoro Sawula, amörö. Amba wü gara kpara wu ngü la nda-wü eyi. Fū ewü azi ngü la, anü di, amala fū Sawula.²⁵ Te wü kpara de te ewü le ngü ka Yesu gömō Sawula ne, je ngü la tete, fū ewü amaka kaje teka aküwa engu. Fū ewü ayia gbü biti, aza Sawula, ato gbü mere kuwu, ato engu te görö 'baranga ka mere koti la ferrre, kpa ekere e kpa koti kpala.

Dela ngü te Sawula küwa esaka wü kpara ka Damaseke tete. Fū engu ayia anü sü agbü Yerūsalema.

Dene ngü te mere Sawula agbü Yerūsalema

* 9:11 9:11 Sawula ta de kpara ka Tarasu.

²⁶ Te Sawula koro agbü Yerüsalema, ah le ta de ni ngbü tundu de wü kpara ka Yesu de kpala. Amba wü *kpara ka Yesu ngbü 'buru de cürü te wü, gü ba, Sawula to maguma ye fü Yesu nda de, ah ngbü efiti ani ka-ye afti.

²⁷ Te Baranaba wu ngü la bala, fü ah ayia aza Sawula, akoro di kpaka wü *mürü tima ka Yesu. Fü ah amala nga Sawula fü ewü, gü ba, "Wü kpe cürü de. Komoko ne to maguma ye eyi fü Yesu fanü. Te engu ngbü enü tete agbü Damaseke, fü Miri Yesu akoro asere te-ye fefe, amala wü ngü fefe na. Tekanga ngü la, ah du fü maguma ye eyi. Fütanga ngü la, fü engu akpo da emala ngü ka Miri Yesu fü wü kpara agbü Damaseke kpala kpekpeke de mere wazi."

²⁸ Te wü kpara ka Yesu ngü la bala, fü ewü adu ale ngü ka Sawula. Fü Sawula akpo da engbü de wü kpara ka Yesu agbü Yerüsalema ne tine tundu, da endoro de ewü, angbü emala ngü ka Miri Yesu fü wü kpara kpekpeke.

²⁹ Fü Sawula akpo da enü kpaka wü gara wü di engu *Yisarayelet† da erü ewü de ngari Yesu, kpah da ega yiki de ewü. Fü ngü la ake te wü kpara la. Fü ewü akpo da egiri kaje teka amörö engu. ³⁰ Te wü bu Sawula wu ngü la bala, fü ewü aza engu, anü di agbü Kayisariya. Fü ewü ato kaje fefe, de ah adu agba wü, agbü Tarasu. Fü engu anü angbü kpala.

Dene ngü te Petero mere agbü Luda

³¹ Gbü wü sikipi la, wü *kpara ka Yesu ngbü ta ziii, ewü de te ewü di agbü nga nzö sü ka *Yudaya, *Galilaya, bete nda *Samarinya ne 'buru. *Nzila Wazi Me ngbü kpah da eto wazi fü ewü. Tekanga ngü la, fü ewü asibi afa sü. Fü ewü angbü ecu ngü Me, da emere wü züka ngü te reke gbü jija.

³² Petero, mü ngbü ta nda-mü da endondoro gbü nga nzö wü sü la 'buru, da eto wazi fü wü *kpara ka Yesu.

Gbü gara sikipi, fü Petero ayia anü akoro agbü Luda, teka aceka wü kpara ka Yesu de kpala. ³³ Fü engu amaka gara komoko kpala de iri ye Ayiniya. Ayiniya ngbü era ta kötö teka re 'bajena, angü küküte na kpi akpi. ³⁴ Te Petero wu komoko la bala, fü ah amala ngü fefe, gü ba, "Ayiniya, Yesu Kurisito küwa mü eyi! Mü yia eyia tikpi, mü gara darara ka-mü." Petero bü te emala ngü la bala, cukuru! komoko yia eyi tikpi. ³⁵ Te wü kpara agbü mere koti ka Luda bete Saronu wu ngü la bala, fü mere bi ewü afü maguma wü, adu ale ngü ka Yesu.

Dene ngü te Petero mere agbü Yapo

³⁶ Gara würüse ta ladü de iri ye Tabita,‡ agbü mere koti de iri ye Yapo. Würüse la to ta maguma ye eyi fü Yesu. Ah ngbü ta emere mere bi wü züka ngü, da ele tangü te wü mürü cinga. ³⁷ Gbü wü sikipi la, fü keke azoro engu. Fü ah akpi. Fü ewü azürü küküte, aza kökö, ao gbü kambü te di ga fuh kiri ye.

³⁸ Fü wü *kpara ka Yesu agbü Yapo la aje nga Petero, gü ba, engu ladü agbü Luda, te di ghamari ede Yapo sela. Fü ewü atima wü kpara 'basu kpaka Petero, anda'ba te-wü fefe, gü ba dene, "Ako, mere kpara! Ani ngbü eyi-ta ye, de ye koro kpaka ani mba kere." ³⁹ Te Petero je ngü la bala, fü ah ayia bü 'duwa, anü tundu de wü kpara la, agbü Yapo.

Te wüh koro agbü Yapo kpala, fü ewü aza Petero ari di kpa esambü, te wüh o kö Tabita gbügbü na ne. Fü Petero amaka mere bi wü würüse wökö kpala, te ewü ngbü eku gba. Te wüh wu Petero, te ri gbü nga wü ne, fü ewü aci 'buru akoro kpakaka de gba gömö wü, da esere wü bongo ta te Tabita tükü, to fü ewü, o engu di la de jia ye ne. ⁴⁰ Fü Petero ayia amala ngü fü wü kpara la 'buru, de wüh koro kpa etanü, ace ni kpi kpi ni. Te wü kpara la koro 'buru kpa etanü, fü Petero abu nzökuta ye kötö, aku gba fü Me. Fü ah adu afü te-ye kpaka kövö la, amala ngü fefe, gü ba, "Tabita! Mü zükü ezükü, mü yia tikpi!" Fü Tabita ayia aü jia ye, awu Petero. Fü ah ayia angbü tikpi fuh ka'da. ⁴¹ Fü Petero azoro kpakpa, ae engu tikpi. Fü ah ai wü würüse wökö, bete wü gara kpara ka Yesu ne, alügü 'buru kpa esambü. Fü ewü amaka Tabita, ede Petero sela, te ngbü eyi tikpi.

⁴² Fü nga ngü la awü, abaya gbü mere koti ka Yapo sela 'buru. Fü mere bi wü kpara adu ato maguma wü fü Miri Yesu, teka ngü la.

⁴³ Dela ngü ta te Petero mere agbü Yapo. Fü ah angbü kpala teka mere bi sikipi. Ah ngbü ta engbü agba gara komoko de iri ye Simüna, kpara te ngbü ereke wü konü, adi ecinzi.

10

Dene ngü ka Petero ake Koroneliyo

¹⁻² Gara kpara ta ladü agbü mere koti ka Kayisariya, de iri ye Koroneliyo. Engu ta de züka kpara te le ngü ka Me fa sü, amba ah ka-ye de engu *Rüma. Engu ta kpah mere kpara ka wü marajümiya

† 9:29 9:29 Wü di engu Yisarayelet te Sawula ga yiki de ewü, ah de ewü te wüh ngbü emala ngü Giriki ne. ‡ 9:36 9:36 İri de Tabita ne, gbü ngü Giriki, ah de Doruka. Si-ngü gbü iri Tabita la gü ba, Egba-gbadu.

ka wü Rüma.* Gbü wü sikipi 'buru, Koroneliyo ngbü eku gba fü Me, de wü kpara kpa gba ye 'buru. Ah ngbü kpah da ele tangü te wü mürü cinga.

³ Gbü gara sikipi, fü Koroneliyo anghü eku gba fü Me. Fü ah ayia awu gara *malayika ka Me, te koro kpakaka baka e gbü roto la. Fü malayika la ai engu, gü ba, "Koroneliyo." ⁴ Fü Koroneliyo aceka jia malayika la, fü cürü ari tete afa sü. Fü ah amala ngü fü malayika la, gü ba, "Baye, mere kpara?" Fü malayika la amala ngü fefe, gü ba, "Koroneliyo, Me je gba ka-mü eyi. Züka ngü de te mü ngbü emere fü wü mürü cinga ne, ah reke kpah gbü jia Me fa sü. Te di bala, engu fi nga mü eyi, teka asere gara züka ngü fü mü. ⁵⁻⁶ Titine, ah le de mü tima gara wü kpara ka-mü anghü Yapo kpala, teka agiri gara komoko de iri ye Petero. Engu ngbü engbü agba Simüna,† de te gba ka di ghamari ede mere *yi-ngu ne. Te wüh maka engu la, de wüh mala ngü fefe, de ah koro kpaka mü sene, angü ah ena asere ngü la fü mü me-ye." ⁷ Te malayika ka Me la mala ngü la nza tete, fü ah ayia anü sü ka-ye.

Fü Koroneliyo ayia ai wü *mürü tima ka-ye 'basu, bete gara marajümiya ka-ye biringbö, te le ngü ka Me kpah fa sü. ⁸ Fü Koroneliyo amala nga wü ngü de te malayika ka Me la mala fü ye ne 'buru, fü wü kpara ka-ye la. Fü ah adu atima ewü anghü Yapo, teka anü ai Petero.

⁹ Baka egambi la, etü ra, o wü kpara la di eyi ghamari da ekoro anghü Yapo, Petero, fü mü ayia anü,‡ teka aku gba fü Me kpikpi mü. ¹⁰ Fü tala akpo emere engu. Baka te wüh ngbü la bü ezi e-mazü fefe, fü ngü akpo anghü emere te-ye gbü jijia na baka roto la. ¹¹ Gbü roto la, fü ah awu kpi te ü te-ye. Fü gara e anghü ekö kpala, baka mere bongo, te wüh i wü dedere na bala 'buru de ku bane. Fü e la anghü ekö kötö. ¹² Fü ah awu mere bi wü lara wü nü gbü e la, mene ewü te ewü endoro füh lö wü, mene ewü te ewü egbeke te-wü agbeke, de wü mene ewü te ewü di de mbula wü ne, wüh ngbü 'buru gbü e la. ¹³ Fü Petero aje ri kpara te wü, gü ba, "Petero, Me mala ngü fü ye, gü ba dene, 'Ye yia eyia, ye zoro gara wü e la, ye mörö, ye zü.'" ¹⁴ Te Petero je ngü la bala, fü ngü la aga gbü jijia. Fü ah alügü ngü, gü ba, "Öö, mere kpara, siti wü e de bala, ni zü ewü nda-ni la kü de." Ah mala bala, angü gara wü nü la, gele ka wü *Yisaraye le de wüh zü so ewü de. ¹⁵ Fü ri kpara la adu kpah awü, gü ba, "Enga ra, mü mere bala de. Wü

e 'buru de te Me mere ewü ne, mü mere e adi eceka ewü gbü jia mü baka wü siti e de." ¹⁶ Ngü la ngbü mere te-ye fü Petero bala du bata. Fü e la alügü te-ye, adu anghü kpi. ¹⁷ Fü ngü la aga gbü jia Petero afa sü. Fü ah anghü eyi-ta tete-ye, teka ngü de te engu wü baka roto ne, anga sisi na neh baye ya?

Amba kpah bü gbü lö-ra engu la, wü kpara, de te Koroneliyo tima ewü ne, koro eyi, rü emöngiti, ¹⁸ da eyi-ta ngü gü ba, "Gara kpara de iri ye Petero ne, ah la sene?"

¹⁹ Petero, baka te mü ngbü la bü efi nga roto ka-mü ne, fü *Nzila Wazi Me amala ngü emaguma mü, gü ba, "Petero, mü je la ngü, te ma ele amala fü mü ne. Gara wü kpara koro eyi sene, wüh ngbü egiri mü. ²⁰ Mü yia eyia, mü kö kpaka ewü kpala, fü mü anü de ewü. Mü mere e aceka ewü ba *ganzi kpara de, angü si-ngü de te mü ngbü egiri gbü roto ne, ah dela. Ma tima wü kpara la kpaka mü me-ra."

²¹ Fü Petero ayia akö kpaka wü kpara la, amala ngü fü ewü, gü ba, "Wü ngbü egiri kpara de iri ye Petero ne? Wayi, kpara engu de te wü ngbü egiri ne, ah de ni, ni dene." ²² Fü ewü alügü ngü fefe, gü ba, "Mere kpara ka-ani, de iri ye Koroneliyo ne, tima ani me-ye kpaka ye. Engu ka-ye de engu *Rüma, ah kpah de mere kpara ka wü marajümiya. Amba engu ka-ye de züka kpara, te le ngü ka Me fa sü. Wü Yisaraye 'buru ngbü ele ngü kaka. Ah tima ani kükürü de, angü gara *malayika ka Me koro kpakaka, mala ngü fefe, de ah tima wü kpara kpaka ye, teka fü ye anü amala ngari Me fü ni."

²³ Te Petero je ngü la bala, fü ah aza wü kpara la, ato kpa esambü, areke sü rara fü ewü. Fü ewü ara kaje de wü kpara la tundu, anü kpaka Koroneliyo. Gara wü *kpara ka Yesu anghü Yapo kpala ti ta kpah gbü nga wü Petero, fü ewü anü de ewü. Fü ewü anü, anü, ara te kaje biringbö.

²⁴ Baka egambi la, fü wü Petero anü akoro anghü Kayisariya. Koroneliyo, mü ngbü eyi de wü mürü mü, bete wü züka awuba mü, de te mü i ewü ne, eci nga wü Petero agba mü kpala. ²⁵ Petero te ekoro ari agba Koroneliyo, fü Koroneliyo ayia bü kere, anü amaka te-wü ake di, abu nzökuta ye kötö engagira Petero, teka acu ngüngü na. ²⁶ Amba Petero, mü le ngü la nda-mü de. Fü mü ayia ae Koroneliyo, da emala ngü fefe, gü ba, "Ye yia eyia tikpi!

* 10:1-2 10:1-2 Wü marajümiya te Koroneliyo ngbü gbü nzö ewü ne, ah de ewü de te wüh ei, gü ba, wü marajümiya ka İtaliya. † 10:5-6 10:5-6 Simüna la ta de kpara te ngbü ereke wü konü. ‡ 10:9 10:9 Sü ta te Petero nü ku gba fü Me tete ne, ah ka-ye ta kpa füh nzö kambü te di sele sele.

Ye mere e amere bala de! Angü ni kphah de kpara baka ye!”

²⁷ Fü Petero akpo da ero mö ake di. Fü ewü adu arí kpa esambü. Fü Petero amaka mere bi wü kpara gbe, te ewü biti te-wü kpa esambü kpala. ²⁸ Fü Petero ayia amala ngü fü ewü, gü ba, “Wü wu eyi, gü ba, teka ngü ka gele ka Me gbü nguwa ani, wü Yisaraye, ah ti ta te ani ena angbü de wü ganzi kpara baka wü ne de. Ani ti ta arí kpa esambü ka-wü ne kphah de. Amba Me sere ngü la eyi fü ni, gü ba, ‘De-ni Me, ni le nguwa wü kpara ‘buru, kphah baka e te ni le ani, wü di enga Yisaraye.’ Te di bala, de-ni, Petero, ni ti aceka wü baka ganzi kpara tine kphah de. ²⁹ Tekah ngü la, baka te ye tima wü kpara teka anü ai ni ne, ni ga yiki de. Fü ni ayia bü ‘duwa de wü kpara la, ati te kaje, akoro dene. Titine, ni ele ayi-ta ye, teka si-ngü de te ye i ni di ne, de ye mala fü ni.”

³⁰ Fü Koroneliyo ayia alügü ngü fü Petero, gü ba, “Wayi, mere kpara, ekere-sikine colo, gbü lö-ra bata, te fele-ra, ni ngbü ta esambü ka-ni sene, da eyi-ta Me. Ni te eceka kpi bane de, gbo! te *malayika ka Me, baka kpara te to bu bongo te ye, te ngbü eci aci gbele gbele bane. Fü malayika la akoro, arü engagira ni, ³¹ amala ngü fü ni, gü ba, ‘De-ni deyi, Me wu eyi, gü ba, ni le ngü ka-ni eyi de maguma ni fanü. Gba ka-ni, te ni ngbü eku fü ni ne, ni je eyi, be kphah te wü letangü, de te ni ngbü emere fü wü mürü cinga ne. Te di bala, ni, Me, fi nga ni eyi, teka asere gara züka ngü fü ni. ³² Ah le de ni tima wü kpara ka-ni etima, agbü Yapo kpala, teka anü ai ye, de ye koro kpaka ni sene. Angü ye ngbü era agba Simüna, de te gba ka di ghamari ede mere yi-ngu ne.’ ³³ Te ni je bala, fü ni ayia bü kere, atima wü kpara kpaka ye. Wayi, ye mere eyi züka ngü, angü ye koro eyi dene. Te di bala, ani biti te-ani eyi ‘buru engagira Me dene, teka aje ngü ka Me, de te engu tima ye di fü ani ne.”

³⁴ Petero, fü mü ayia arü amala ngü fü wü Koroneliyo, gü ba, “Titine ma wu eyi, gü ba, Me ngbü eceka nguwa wü kpara gbü jia ye ‘buru biringbö. ³⁵ Angü, ma wu eyi, gü ba, mene kpara te le ngü ka Me de maguma ye, da emere wü ngü te reke areke gbü jijia, Me ena aküwa engu aküwa, anga te engu di de enga Yisaraye, anga ganzi kpara.

³⁶ Dene ngü te Me le de ma mala fü yi enatikine. Ah de ngü ka Yesu Kurisito, te Me tima engu füh kotö ne, teka aküwa nih. Fanü fanü, ah tima engu kpaka a, wü di enga Yisaraye feke, teka asere ngü la fü

a. Amba ngü ka Yesu ka-ye teka wü kpara ‘buru, angü Yesu de Mere Miri gbü nzö nguwa wü kpara füh kotö ne ‘buru. ³⁷ Ngü ka Yesu la, ^S yi je gügü de? Ma fi, ga, yi je ngü la ta eyi. Ah kpo ta gbü wü sikpi te *Yüwane ngbü eri dofo fü wü kpara tete, teka de wüh ce wü *siti ngü ka-wü, fü ewü aza *babatiza ne. ³⁸ Fütanga ngü la, fü Yesu* akoro, akpo de nda-ye tima te Me tima engu di ne. Angü Me to ta *Nzila Wazi ye fefe na. Fü engu akpo da endoro gbü tö ka-a ‘buru, da emere wü züka ngü, da eküwa wü kpara, te ewü ngbü gbü ku ka *Satana ne. ³⁹ Dela wü ngü ‘buru de te Yesu ngbü mere, te a wu cu de jia a ne.

Fü wü mere *kovo ka-a agbü Yerüsalema ayia azoro engu, abere eküte *rü gbegete, amörö. ⁴⁰⁻⁴¹ Amba Me ce ngü la bala nda de! Gbü *ebabata sikpi, fü Me adu azükü Yesu gbü kpi la. De-a, de te a di de wü kpara kaka ne, a wu eyi, gü ba, engu zükü eyi gbü kpi fanü, angü a ngbü de ewü, fü a azü e kphah cu de ewü, fütanga kpi kaka. Amba wü gara kpara wu engu nda-wü de, angü Me sere engu fü ewü de. Ah sere engu ‘duwa nzö fü a, wü kpara kaka, angü engu fe a teka ngü la me-ye gügü.

⁴² Fü Yesu adu ato riri fü a, teka de a mala nga ngü ka-ni la fü wü kpara ‘buru, angü engu de kpara te Me o eyi baka Mere Miri, teka akolo ngü ka wü kpara ‘buru, mene ewü de te ewü kpi eyi akpi ne, kphah de nih, de te nih di la ezükü ne.

⁴³ Wü *mürü dofo ka Me ‘buru, ta te ewü ngbü emala ngü ka Me fü wü kundu a ne, wüh mala kphah ngü ka Yesu. Te di bala, ah le de yi to maguma yi fefe, teka fü Me aboro siti ngü ka-yi teka ngü kaka-na.”

⁴⁴ O Petero ngbü la bü emala ngü la, fü Nzila Wazi Me ayia arí emagama wü Koroneliyo de wü kpara kpa esambü ka-ye la ‘buru, angü wüh to maguma wü eyi fü Yesu fanü. ⁴⁵⁻⁴⁶ Te Nzila Wazi Me ri emagama wü Koroneliyo tete, fü ewü akpo da egbo nga iri Me gbü wü gara ganzi mö, te ewü je gügü de. Fü ngü la aga gbü jia wü kpara ka Yapo, ta te ewü koro de wü Petero ne, afa sü. Kükürü de, angü wü Koroneliyo ka-wü de wü *ganzi kpara, amba Nzila Wazi Me to wazi fü ewü kphah eyi baka nda-ani.

⁴⁷ Fü Petero ayia amala ngü fü wü bu ye, gü ba, “Wü ceka la, titine wü kpara ne maka Nzila Wazi Me eyi kphah baka ani dene, gara ngü kphah ladü te ena atiri ewü? Wüh ti ato babatiza fü ewü de?” ⁴⁸ Fü Petero amala ngü la fü wü bu ye la

^S 10:37 10:37 Petero gü ba, Ngü ka Yesu mere te-ye gbü tö ka-ani, wü Yisaraye. Ah kpo gbü nga nzö köti ka Galilaya. * 10:38 10:38 Petero gü ba, Yesu ka-ye de kpara ka Nazareta.

kpekepeke, de wüh mere e atiri ewü de. Fū ewü ayia ato babatiza fū wü Koroneliyo, de wü kpara la 'buru, de iri Yesu.

Fütanga ngü la, fū wü Koroneliyo ayia ayi-ta Petero, de ah ngbü kpaka ani mba teka sikpi cükü'daye. Fū Petero ayia ale.

11

Dene ngü ta te Petero mala agbü Yerüsalema,

teka ngü ka wü Koroneliyo

¹ Fütanga ngü la, fū wü *mürü tima ka Yesu de wü gara wü kpara kaka, te ewü di agbü Yerüsalema de kpala ne, aje, gü ba, "Petero to *babatiza eyi fū wü gara *ganzi kpara, angü wüh le ngü ka Yesu eyi kpah baka ani." ² Gara ewü ta ladü te fingangü ka-ewü di ka-ye la fi bü teka ngü ka gele ka-wü, ka *Yisaraye. Teka ngü la, ngü ka wü ganzi kpara la reke gbü jia ewü nda de. Te di bala, te Petero du koro tete agbü Yerüsalema, fū wü kpara la ayia akpa ngü kaka la, ³ gü ba, "Petero dey, ye ceka la, ngü ka-ye la reke de! Ye ngbü engbü de wü ganzi kpara, kpah da ezü e de ewü, neh baye? Dela siti ngü!"

⁴ Fū Petero ayia akpo amala nga wü ngü de te mere te-ye fū ye ne, kpi 'buru fū ewü, ⁵ gü ba, "Wü di enga wüna, o ra di ta agbü Yapo kpala, gbü gara sikpi, ma ngbü eyi-ta Me. Fū Me ayia agü tamu gara ngü fere baka roto bane. Ma wu gara e baka mere bongo bane, te wüh i dedere na 'buru de ku. Fū e la akö agbü kpi kpala, akoro gbmari ede ra. ⁶ Fū ra ayia aceka kpi gbü e la. Fū ra awu mere bi lara wü nü, ewü te ewü endoro füh lö wü, mene ewü te ewü egbeke te-wü agbeke, de wü mene ewü te ewü di de mbula wü, wüh ngbü 'buru gbü e la. ⁷ Fū ra ayia aje ri kpara te mala ngü fere, gü ba, 'De-ra dey, Me mala, gü ba, ma yia eyia, ma zoro gara wü e la, ma mörö, de ma zü.' ⁸ Te ma je ngü la bala, ma le nda-ra de, fū ra alügü ngü, gü ba, 'Öö, mere kpara, siti wü e de bala ne, ma zü ewü nda-ra la kü de!' ⁹ Fū ri kpara la adu kpah awü agbü kpi, gü ba, 'Ma mere bala de. Wü e 'buru de te Me mere ewü ne, ma mere e adi eceka ewü gbü jia ra baka siti e de.' ¹⁰ Fū ngü la amere te-ye fere bala anda nga ye du bata. Fū e la alügü te-ye ali ka-ye adu agbü kpi.

¹¹ Bü gbü lö-ra engu la, ma te eceka de, wü kpara bata koro eyi, eyi-ta ra, gbü kötö de te ma ngbü era gbügbü na ne. Wü kpara la, gara enga *Rüma, de iri ye Koroneliyo, tima ewü me-ye kpaka ra.*

¹² Fū *Nzila Wazi Me amala ngü fere, gü ba, 'Ah le de ma nü 'duwa tundu de wü kpara la. Ma mere e akpe cürü de, angü ni tima wü kpara la kpaka ra me-ni.' Tekka ngü la, fū ra ayia anü de ewü. Wü kpara ma'diya, de te a koro de ewü agbü Yapone, a nü ta de ewü 'buru agba Koroneliyo agbü Kayisariya kpala. Wüh ti kpah eyi asere ngü la fū yi.

¹³ Te a koro kpala, fū Koroneliyo amala ngü fū a, gü ba dene, "Malayika ka Me koro kpaka ni, mala ngü fū ni, gü ba, "Ah le de ni tima wü kpara agbü Yapone teka ai ra, de ma koro kpaka ni, ¹⁴ angü ma ena amala wü ngü de te ena aküwa ni, de wü kpara gba ni ne, 'buru fū ni.'" ¹⁵ Te ma je ngü la bala, fū ra akpo da emala ngü ka Yesu fū ewü. O ra ngbü la bü emala nga ngü la, 'duwa fū Nzila Wazi Me arü emaguma ewü, kpah baka e ta te ri emaguma nih te enga gina ne. ¹⁶ Tekka ngü la, fū ra ayia akpo da efi nga ngü, ta te Miri Yesu mala fū nih ne. Angü engu gü ba, "Yüwane to ta babatiza fū nih de ngu kükürü, amba sisi ne, Me ena ato babatiza fū nih, de Nzila Wazi Me." ¹⁷ Baka te Me le ngü ka wü Koroneliyo eyi de bala, fū ah ayia ato Nzila Wazi ye fū ewü, kpah baka ta te engu to fū nih, o nih to ta maguma nih fū Miri Yesu tete na ne, ma ena atiri ewü neh baye? Te di bala, fū ra adu aza ewü baka wü di enga wüna."

¹⁸ Te wü kpara gbü Yerüsalema je ngü ka Petero la bala, fū ewü angü ngbü, adu ace ngü ka yiki ka-wü la. Fū ewü akpo da egbo nga iri Me, gü ba, "Wayi bala! Me de mere wazi! Lele kaka fa sü! Angü ah le eyi fū wü *ganzi kpara afü maguma wü, aküwa fi mere badü!"

Dene ngü ka wü kpara ka Yesu agbü Atiyokiya

¹⁹ Ta te wü kpara kpo da eto cinga te wü *kpara ka Yesu, fütanga kpi ka Setefanü ne, fū wü kpara ka Yesu la ayia agbü Yerüsalema, akpe abaya ka-wü 'buru edere sü, ka cürü. Fū gara ewü akpe anü angbü ka-wü agbü gara nga nzö wü sü nengete nengete.† Fū ewü akpo da emala ngü ka Yesu fū wü kpara de kpala. Amba wüh mala ngü ka Yesu fū wü kpara ka sü la de, wüh ngbü emala nzö fū wü di enga ni wü, wü di enga *Yisaraye, te wüh ngbü engbü gbü wü sü la. ²⁰ Fū gara wü kpara ka Yesu‡ la akpe anü akoro agbü Atiyokiya. Fū ewü akpo da emala ngü ka Miri Yesu fū wü kpara ka Atiyokiya, te ewü di de wü di enga *Yisaraye nda-wü de ne, angü wüh ka-wü de wü *ganzi

* **11:11** 11:11 Wü kpara la yia agbü Kayisariya, teka anü kpaka Petero. † **11:19** 11:19 Gara ewü kpe ngbü agbü nga nzö sü ka Fonisiya, wü gara agbü Kupuriyo, gara agbü Atiyokiya. ‡ **11:20** 11:20 Wüh de wü kpara ta te ewü bi ewü agbü Kupuriyo gara ewü agbü Kurene ne.

kpara, wü di enga *Giriki. ²¹ Fü Miri Yesu angbü eto wazi fü ewü teka tima la. Füre mere bi wü kpara ka Atiyokiya la afü maguma wü, adu ara fü Miri Yesu.

²² Te wü kpara ka Yesu agbü Yerusalemale je ngü la bala, fü ewü ayia atima Baranaba kpaka ewü, agbü Atiyokiya kpala, teka awu si-ngü la mbi mbi mbi. ²³⁻²⁴ Angü Baranaba ka-ye ta de züka kpara, te to maguma ye 'buru fü Miri Yesu. *Nzila Wazi Me si kpah emaguma fa sü. Te Baranaba nü koro agbü Atiyokiya kpala, fü ah awu, gü ba, wü kpara la, Me to wazi ye eyi fü ewü fanü. Füre Baranaba angbü de mere tadu teka ngü la. Füre ah akpo da erü ewü de ngari Me, kpah da eto wazi fü ewü, teka de wüh rü kpekpeke gbü ngü ka Yesu de maguma wü biringbö. Teka ngü la, fü mere bi wü kpara agbü Atiyokiya angbü eto maguma wü fü Yesu.

²⁵ Te di bala, fü Baranaba adu afi nga Sawula, gü ba, "Engu ka-ye de kpeke kpara, te tü eyi ale ta-ngü te ni gbü tima la." Füre ah ayia agbü Atiyokiya, anü agbü Tarasu, teka agiri Sawula kpala. ²⁶ Te engu nü maka Sawula agbü Tarasu kpala, fü ah aza engu, adu ake di agbü Atiyokiya, teka ale-ta ngü te ye, da erü wü kpara la. Füre ewü angbü agbü Atiyokiya teka re biringbö, da ebiti te-wü de wü kpara ka Yesu de ta kpala ne. Füre ewü angbü erü wü mere bi wü kpara la de ngari Me. Gbü wü re engu la, wü kpara agbü Atiyokiya kpala, kpo ta da eü wü *kpara ka Yesu la, gü ba, wü kpara ka *Kurisito.

²⁷ Kpah gbü wü re la, fü gara wü kpara ka Yesu ayia agbü Yerusalemale, anü akoro agbü Atiyokiya kpala. Wüh de wü kpara te Nzila Wazi Me ngbü emala ngü gömö ewü, baka wü *mürü dofo ta gügü ne. ²⁸ Füre *Nzila Wazi Me ayia asere ngü fü gara *mürü dofo esüka ewü de iri ye Agobo. Füre Agobo ayia amala ngü la fü wü kpara ka Yesu 'buru, gü ba, "Mere kpäri tala ena atü agbü tö ka *Yudaya 'buru." § ²⁹ Te wü kpara ka Yesu agbü Atiyokiya je ngü la bala, fü ewü abiti te-wü, afi ngü, gü ba, "Ah le de ani bitü mba e, ba e te wazi ani di ladü, teka fü ani atima fü wü di enga ni ani, wü kpara ka Yesu agbü Yudaya de kpala ne, teka ale ta-ngü te ewü." ³⁰ Füre ewü adu abiti wü e la kpah 'buru, baka ngü te ewü mala la. Füre ewü atima esaka wü Baranaba ake Sawula, de wüh nü di, ato fü wü mere kpara gbü tima ka Yesu agbü Yudaya de kpala.

12

Dene cinga ta te Miri Agiripa Erode to te wü kpara ka Yesu

¹ Ta gbü wü re la, fü Miri Agiripa *Erode akpo da eto cinga te wü *kpara ka Yesu agbü Yerusalemale. ² Füre ah ayia atima wü marajümiya ka-ye teka amörö *Yakobo enga ni ye *Yüwane wü di Zebedayo ne. Füre wü marajümiya la aza mere maguruma, anü awa ngürü Yakobo di.

³⁻⁴ Füre ngü la areke te wü mere kpara ka wü *Yisarayeale afa sü. Te Miri Agiripa wu ngü la bala, fü ah adu kpah azoro Petero, agü agbü ku. Füre ah aza wü marajümiya nzüka de füh ye ma'diya, aye süka ewü bala bala, teka de wüh ceka kpi fütanga Petero mbi mbi mbi, angü ah ena akpe. Wüh ngbü mere ngü la ta, agbü sikpi ka *Pasika. Dada te wüh ena akolo ngü ka Petero gbü wü sikpi la nda ma. Te di bala, Miri Agiripa, fü mü afi ngü, gü ba, "Te ah bala la, ni ena akolo ngü ka Petero gbü jia wü kpara 'buru sidi nga Pasika." ⁵ Petero, mü tine eyi agbü ku kpala, esaka wü marajümiya, te ewü ngbü efete mü. Amba wü kpara ka Yesu ngbü nda-wü fi bü eyi-ta Me kpekpeke teka ngü kaka.

⁶ Gbü bitü, de te kpi ena aseke, fü Miri Agiripa akolo ngü ka Petero tete na ne, Petero, wüh i mü tine eyi gö! de nyari, o esüka wü marajümiya 'basu, de te ewü ngbü efete mü ne. Füre mü ati ka-mü era ara. Würe gara marajümiya ngbü ta nda-wü emöngiti kambü ka ku la sela.

⁷ Bü kece bane de, fü *malayika ka Me ayia akoro. Füre sü aci, alofo raaa! kpa esambü ka ku la. Füre malayika la akoro amofu Petero, azükü engu, gü ba, "Petero! Petero! Mü yia eyia kere!" Füre nyari de te wüh i kpakpa di ne, ayia afuru te-ye, ati kötö. ⁸ Füre malayika adu amala ngü fefe, gü ba, "Ye i ku etadu ye, de ye to kamaka ka-ye gbü lö ye." Füre Petero amere wü ngü la kpah 'buru bala. Füre malayika adu amala ngü fefe, gü ba, "Ye to mere bongo ka-ye la te ye, de ye fa nga ni." ⁹ Füre Petero ayia afa nga malayika la, teka akoro agbü kambü ka ku la kpa etanü. Petero ngbü ta efi nda-ye, gü ba, "Ngü de te malayika ngbü emere fü ni ne, ah de zu ngü nda de, ah ka-ye de roto."

¹⁰ Füre wü Petero ayia ake malayika la, anye gina wü marajümiya, te ewü ngbü efete engu ne, bete e'ba'basu ewü. Füre ewü anü akoro te mere siti möngiti* ka tambasü kambü ka ku la, de te ngbü enü agbü mere köti ne. Te wüh nü koro kpala, fü mere möngiti de te ewü ni gö ne, ayia aü te-ye ndaaa bü de tete-ye. Füre wü Petero akoro ka-wü kpa etanü, anü sü

§ 11:28 11:28 Ngü ka kpäri tala la mere ta te-ye fanü, gbü re te Kalodiyo ngbü miri ka Rüma tete. * 12:10 12:10 Mere möngiti ka kambü ka ku la, wü reke gbü se.

ka-wü te gara kaje. Petero, mü te eceka de, yiri! malayika la düürü ka-ye eyi.

¹¹ Fü fingangü ka Petero adu alügü te-ye mbi. Fü ah awu, gü ba, "Fanü fanü, Me tima malayika ka-ye me-ye, teka aküwa ni esaka Miri Agiripa, kpah esaka wü mere kpara ka wü Yisaraye, te ewü ngbü ta ele amörö ni asidi ne."

¹² Te Petero wu, gü ba, ni küwa eyi fanü ne, fü ah adu afi ngü, ayia anü ka-ye agba *Mariya, ni ye Marako.[†] Angü gbü köti la, mere bi wü kpara ka Yesu ngbü ta ebiti te-wü kpala, da eyi-ta Me teka ngü ka Petero. ¹³ Fü Petero anü akoro kpala, o wüh ni möngiti ka 'baranga eyi. Fü ah akpo da ekü möngiti 'baranga la, teka de ni ri kpala.

Gara jaji wüüruse, de iri ye Rüda, ngbü ta emere tima kpala. Te Rüda je giri möngiti la, fü ah akpe akoro, teka awu kpara de te ngbü ekü möngiti la. ¹⁴ Fü ah aje ri Petero teke, awu gü ba, ah de engu. Fü ah angbü de mere tadu, teka ngü la, dada te engu ena aü möngiti tine ma, ka tadu. Fü ah akpe alügü nga ye adu kpa esambü, teka amala nganga fü wü kpara la, gü ba, "Petero koro eyi! Ah ladü emöngiti sela!"

¹⁵ Te wü kpara la je ngü, de te Rüda mala fü ewü bala ne, fü ngü la ake te ewü. Fü ewü amala fefe, gü ba, "Rüda deyü, ye röfö aröfö!" Fü Rüda adu amala ngü la fü ewü kpekpeke, gü ba, "Ni su wu de! Ah de Petero fanü fanü!" Te wüh je bala, fü ewü adu afi ngü, gü ba, "Te ah bala, ah kpi eyi! Dela ka-ye tine kukuru na!"

¹⁶ Fü Petero angbü fi bü ekü möngiti, ah ce nda de. Fü ewü akoro aü möngiti la bane, gbo! te Petero, te rü ngbü eyi emöngiti sela fanü. Fü ngü la aga gbü jia ewü afa sü.

¹⁷ Fü Petero ari kpaka ewü kpa esambü la. Fü ah atata ewü de kpa ye, de wüh nga anga. Fü ah akpo da emala nga wü ngü, de te Me mere fü ye ne, gü ba, "Me tima *malayika ka-ye, fü ah aza ni kpa esambü ka ku kpala, akoro di kpa etanü, ato kaje fü ni dene." Fü Petero adu amala fü ewü, gü ba, "Ah le de wü mala nga ngü la fü *Yakobo, enga ni Yesu, bete wü gara kpara ka Yesu 'buru." Te engu mala ngü la nza tete, fü ah ayia akoro kpa etanü, anü ka-ye, awo te-ye agbü gara sü.

¹⁸ Te kpi seke tete, wü marajümiya, ta te wüh ngbü efete Petero kpa esambü ka ku ne, te eceka de, yiri! Petero nda tine ma. Fü nzö ewü afü ka. Fü ewü angbü de mere cürü. Fü ewü agiri engu ma, wüh maka engu nda-wü de.

¹⁹ Te Miri Agiripa *Erode je ngü la bala, fü ngü asiti tete. Fü ah amala ngü fü

wü kpara ka-ye, de wüh giri Petero. Baka te wüh giri engu ma, fü Miri Agiripa ai wü marajümiya, ta te ewü ngbü efete Petero ne, ayi-ta ewü kpekpeke teka ngü kaka. Amba ngü te ewü ena alügü fefe nda ma. Fü Miri Agiripa ayia ato riri fü wü bu ewü, de wüh mörö ewü amörö.

Dela ngü ta te Petero küwa esaka Miri Agiripa Erode tete.

Dene ngü ka kpi ka Miri Agiripa Erode

²⁰ Fütanga ngü la, fü Miri Agiripa *Erode ayia agbü *Yudaya sela, anü agbü Kayisariya, angbü kpala.

Wü mere köti de iri wü Tera ake Sidona ne, wüh ta ghamari ede tö ka Yudaya, te di esa riri ka Miri Agiripa Erode. Wü kpara ka Tera ake Sidona, wüh ta de wü kpara te ewü ngbü ese e efa sü. Wüh sö e nda-wü de. Wüh ngbü ta ese zü-e ka-wü, esaka wü kpara ka Yudaya.

Gbü gara sikipi, fü gara ewü ayia amere gara ngü, te ke te Miri Agiripa Erode fa sü. Fü mamagama ayia asiti eküte ewü. Te wü kpara la wu ngü la bala, fü ewü ayia akoro kpaka Miri Agiripa, teka areke ngü esüka wü. Te di bala, fü ewü anü te enga gina fi me-wü kpaka Balaseto, mere kpara ka miri, anda'ba te-wü fefe, de ah nü me-ye, ah mala nga ani fü miri. ²¹ Fü Miri Agiripa ale ngü la, ato sikipi fü ewü, de ani biti te-ani de ewü, teka areke ngü la.

Ah te ekoro gbü sikipi de te ewü reke de ewü ne, fü wü kpara abiti te-wü gbe. Fü Miri Agiripa ayia ato bongo ka-ye ka miri te ye, angbü füh kpökpö ka-ye ka miri. Fü engu ayia arü amala ngü te siti esüka wü la tine mbölo, gbü jia wü kpara la 'buru. ²² Te mere bi wü kpara la je ngü la bala, fü ewü akpo da ecu ngüngü na, da eba rere kpa tikpi, gü ba, "Wayi, mere kpara, ri ye, te ye mala fü ani ne, ah baka nda Me!" Wüh mala ngü la bala, de ngü türü tete.

²³ Amba bü gbü lö-ra la, fü *malayika ka Me akoro akina Miri Agiripa fü kpi, angü Miri Agiripa le fü wü kpara adi egbo nga iri ni, efa nda Me ka. Teka ngü la, fü mere siti keke ayia amere Miri Agiripa, angü wü jürü sürü ri me-wü guguvu, azüfa nzanza 'buru. Fü ah ayia akpi.

²⁴ Gbü wü re la, fü ngari Me angbü fi bü ebaya, enü anü gbü wü gara sü 'buru. Fü mere bi wü kpara angbü eto maguma wü fü Yesu.

²⁵ Te wü Baranaba ake Sawula nza tima ka-wü gbü Yerüsalema tete, fü ewü ayia ale kaje, adu agbü Atiyokiya. Fü ewü aza Marako,[‡] adu de ewü.

[†] 12:12 12:12 Gara iri Marako de Yüwane.

[‡] 12:25 12:25 Gara iri Marako de Yüwane.

13

Dene ngü te wüh fe Baranaba ake Sawula, tima ewü di

¹ Esüka wü *kpara ka Yesu agbü Atiyokiya de kpala ne, gara wü kpeke kpara ta ladü te *Nzila Wazi Me ngbü emala ngü gömö ewü, baka wü *mürü dofo ka Me ta gügü ne. Wüh kpah de wü *mürü riri, te ewü wu da eri wü bu wü de ngari Me ereke areke. Ah ta de wü Baranaba, Simiyona,* Lukiya,† Manayî[‡] bete Sawula.

² Gbü gara sikipi, fü wü kpara ka Yesu abiti te-wü, teka aku gba fü Me. Fü ewü *a'bi te-wü, wüh zü e de, teka amaka wazi esaka Me. Fü Nzila Wazi Me amala ngü fü ewü, gü ba, "Ni fe wü Baranaba ake Sawula eyi, teka anü amala ngü ka Yesu agbü wü gara sü. Ah le de wü o kpa wü gbü nzö ewü, teka ato wazi fü ewü gbü tima la." ³ Fü wü kpara ka Yesu la adu a'bi te-wü, aku gba fü Me teka wü Baranaba ake Sawula. Fü ewü ao kpa wü gbü nzö ewü, ato kaje fü ewü, teka fü ewü anü amala ngü ka Yesu agbü gara wü sü.

Dene ngü ka Baranaba ake Sawula agbü Kupuriyo

⁴ Fü *Nzila Wazi Me asere ngü fü wü Baranaba ake Sawula, de wüh nü agbü Selukiya, te di era mere *yi-ngu. Fü ewü ayia akoro kpala, adu ali gbü *zabu, teka anü sü kpa eta ngu, agbü Kupuriyo.

⁵ Marako§ nü ta de ewü tundu, teka ale tangü te ewü gbü tima la. Fü ewü anü akoro kpa eta ngu agbü Salami, te di de gara mere koti ka Kupuriyo. Fü ewü akpo da emala ngü ka Yesu fü wü kpara, agbü wü *kambü ka biti-te ka wü Yisarayeke kpala. ⁶ Fü ewü andoro, da emala ngü ka Yesu fü wü kpara gbü wü sü ka Kupuriyo kpala 'buru, zalü koro di agbü Pafü.

Te wüh nü koro agbü Pafü, fü ewü amaka gara enga *Yisarayeke kpala, de iri ye Elima.* Ah ka-ye de mürü kuwa, te ngbü efiti wü kpara, gü ba, ni de mürü dofo te ni ngbü emala ngü ka Mere Me.

⁷⁻⁸ İri miri ka Kupuriyo la ta de Serezeyo Pawülü. Engu kpah de kpara te wu ngü fa sü. Te miri la je, gü ba, wü Baranaba ake Sawula ladü sela, da emala ngari Me fü wü kpara ne, fü ah ai ewü kpaka ye, angü ah le kpah de ni je ngari Me gömö ewü. Fü ngü la ake te Elima, mürü kuwa la, kpürrrü! Kükürü de, angü miri ngbü ta

aje ngü gögömö na. Fü Elima akpo da ega yiki de wü Baranaba, angü ah le de miri le ngü ka Yesu la nda de.

⁹ Sawula, te wüh ngbü ei mü gbü ngü *Rüma, gü ba, Pawülü ne, fü Nzila Wazi Me ayia ato wazi fü mü. Fü mü ayia aceka mürü kuwa la kpekepeke. Fü mü awü nga fefe, ¹⁰ gü ba, "De-ye deyi, ye de ye *Satana! Ye de muruyi! Ye de vügü ka ngü ka Me! Ye kpah de wü bi siti mani gbü nzö ye! Ye ena ace da esiti tima ka Me neh elaye? ¹¹ Tekä ngü la, ye je la ngü ne. Titine, Me ena ato kuru te ye. Fü jia ye ani teka wü sikipi mba cükü'daye." Pawülü, mü bü te emala ngü la anza de, mbirri! sü ti gbü jia Elima eyi! Fü ah akpo da ejiji bü da ye sela, egiri kpara te ena azoro kpa ye, teka ale ta-ngü te ye.

¹² Te miri wu ngü la bala, fü ah ayia ato maguma ye fü Yesu, angü ngü ka Yesu, de te wü Baranaba ake Pawülü ngbü eri wü kpara di ne, ga gbü jijia na eyi fa sü.

Dene ngü ka Pawülü ake Baranaba agbü Pisidiya

¹³ Fütanga ngü la, fü wü Pawülü ayia de wü bu ye agbü Pafü sela, anü ali gbü *zabu, akö ngu kpa eta ngu, anü akoro agbü Peruga, te di agbü tö ka Pafiliya. Te wüh koro kpala, Marako,† fü mü ayia ace nda-mü nga wü bu mü ka, adu ka-mü agbü Yerüsalema. ¹⁴ Fü wü Pawülü ayia agbü Peruga, anü akoro agbü gara sü de iri ye Atiyokiya, te di gbü tö ka Pisidiya. Ah de Atiyokiya ta te ewü yia gbügbü te enga gina ne nda de. Ah te egoro gbü *sikipi ka Me, fü ewü ayia ari kpa *esambü ka biti-te ka wü Yisarayeke kpala, angbü kötö, teka aje ngari Me.

¹⁵ Fü gara wü *kovo ayia esüka wü bu wü, atanga ngü gbü *Ngari Me du 'basu.‡ Fü wü kovo la ayia ayi-ta wü Pawülü, gü ba, "Wü di enga ni ani, te gara ngü ladü kpaka wü, te ena ato wazi fü ani la, de wü mala emala fü ani."

¹⁶ Fü Pawülü ayia arü tikpi, ae kpa ye fü wü kpara, de wüh nga anga. Fü ah adu amala ngü fü ewü, gü ba, "De-yi wü di enga wüna, wü di engu Yisarayeke, kpah de wü di enga wü gara kpara, te yi le ngü ka Me ne, yi je la ngü de te ma le amala fü yi ne. ¹⁷ Mere Me fe ta wü kundu nih, wü di enga *Yisarayeke ne, me-ye, fü ah anzö *ngüte de ewü. Fütanga ngü la, o wüh ngbü ta agbü ganzi tö, agbü *Ezepeto, fü engu ayia ato wazi fü ewü, fü ewü asibi kpala afa sü. Fü ah aküwa ewü esaka miri

* 13:1 13:1 Wüh gü ta gara iri te Simiyona, gü ba, Biri-kpara. † 13:1 13:1 Lukiya de kpara ka Kurene. ‡ 13:1 13:1 Manayî de kpara ta te wüh ga tundu ake Miri Anitipa Erode. § 13:5 13:5 Gara iri Marako de Yüwane.

* 13:6 13:6 Gara iri Elima de Barayesu. Si-ngü gbü iri Elima gü ba, mürü kuwa. † 13:13 13:13 Gara iri Marako de Yüwane. ‡ 13:15 13:15 Ngari Me te wüh tanga la, wüh tanga gara gbü Riri ta te Müse ba, gara gbü köcökpa ka wü mürü dofo.

ka Ezepeto de mere wazi ka-ye. ¹⁸ Fū ah aza ewü, anü di agbü gü. Baka te wüh ngbü agbü gü, da ejiji kpala teka re teke 'basu ne, Me ngbü fi bü tundu de ewü, da ele ta-ngü te ewü.

¹⁹ Fütanga ngü la, fū Me ayia aza ewü, anü akoro di agbü tö ka *Kanana. Fū ah ato wazi fū ewü, de wüh mömörö wü mürü tö la, te ewü di ta baka nguwa wü kpara lorozi. Fū ah aza tö ka wü kpara la, ato fū wü kundu nih, de wüh ngbü gbügbü na fi badi. ²⁰ Ah mere wü ngü la bala, akpo gbü wü re de te engu fe kundu nih *Abarayama, zalü akoro gbü wü re te ewü za tö ka Kanana la tete, angbü gbügbü. Ngü la 'buru za mere bi wü re baka kama bala, teke 'basu de füh ye nzükpa (450).

Fütanga ngü la, fū Me aza wü gara kpara, ao baka wü jürü miri gbü nzö ewü, zalü akoro di gbü re ka *mürü dofo Samüwele. ²¹ Gbü wü re ka mürü dofo Samüwele la, fū wü kundu nih ayia ayita Me, de ah to mere miri, te ena angbü gbü nzö ani 'buru. Te Me wu bala, fū ah aza Sawula, § ye Kisi, ao engu mere miri. Fū ah angbü gbü nzö ewü teka wü re teke 'basu. ²² Fütanga ngü la, fū Me ayia ace Miri Sawula, teka siti ngü kaka. Fū ah adu aza *Davidi, ao mere miri gbü nzö wü kundu nih. Fū Me amala ta ngü teka ngü ka Davidi, gü ba, 'Wayi, ni maka Davidi* eyi, ah ena amere wü ngü de te ni le ne 'buru me-ye, angü ni le engu de maguma ni 'buru.' ²³ Fū Me akina te-ye fū Davidi, gü ba, 'Ni ena ao gara miri esüka wü kundu ye te gara, teka aküwa wü di engu Yisarayeale 'buru.' Wü di engu wüna, Miri ta te Me mala nganga na ne, engu de Yesu, angü engu de kundu kundu ye Davidi fanü, te Me tima engu füh kotö ne, teka aküwa nih 'buru.

²⁴ O Yesu kpo de tima ka-ye la de, *Yüwane Mürü Babatiza ngbü ta emala fū wü di engu Yisarayeale 'buru, gü ba, 'Ah le de wü fū maguma wü, teka fū ni ato *babatiza fū wü.' ²⁵ Fütanga ngü la, o tima ka Yüwane yia enza tete, fū engu adu amala ngü fū wü kpara la tine mbölö, gü ba, 'Wü ngbü efi tüngü ni, egü neh fe ya? Wü efi nda-wü, gü ba, ni de kpara de te wü ngbü eci nganga, teka aküwa ani ne? A'a, ah de ni nda de. Amba wü je la ngü de te ni emala fū wü ne. Kpara la ena akoro sidi nga ni. Ni baka labi kaka te ngbü ereke kaje fefe. Ni be teka tima la nda-ni de, angü engu de mere kpara te fa

ni ka.' Kpara ta te Yüwane ngbü emala nganga la, ah ka-ye de Yesu.

²⁶ Wü di engu wüna, wü di engu Yisarayeale, kpah de wü *ganzi kpara te yi le ngü ka Me ne, nih nda-nih de wü kpara, de te Me sere ngü ka-ye la fū nih, gü ba, 'Yesu ti eyi aküwa nih nzö me-ye.'

²⁷ Wü mere kpara ka-nih, de wü gara kpara ka Yerüsalema ne, wüh le ngü ka Yesu ta nda-wü de. Fū ewü amörö engu asidi. Ngü ta te wü *mürü dofo ba teka ngü ka Yesu ne, wü mere kpara la ngbü ta etanga ngü la cu me-wü gbü wü sikipi ka Me 'buru, amba wüh wu si-ngü la nda-wü de. Te di bala, wüh le ngü ka Yesu de. Fū ewü akolo ngü kaka, gü ba, 'Ah le de wüh mörö engu asidi.' Amba ngü te wüh mere la, ah ti kpini de ngü ta te wü mürü dofo ka Me ba ne. ²⁸ Baka te wüh maka siti ngü ka Yesu, teka fū ewü amörö engu tete na nda-wü de ne, fū ewü adu ayi-ta Miri *Pilatü, de ah mala fū wü marajümiya ka-ye, de wü mörö engu. ²⁹ Fū wü marajümiya la aza engu, anü di, amörö. Fū ewü amemere wü lara ngü eküküte. Te Yesu kpi tete, fū wü kpara kaka aza kökö na, anü di, ati, baka ta te wü mürü dofo ba gbü *Ngari Me ne. ³⁰ Amba gbü wü ngü la 'buru, fū Me adu azükü engu gbü kpi la. ³¹ Fū Yesu akpo da esere te-ye fū wü kpara ka-ye, de te ewü ngbü ta endoro de ewü, te kpo gbü *Galilaya, zalü akoro agbü Yerüsalema ne. Fū ah angbü de ewü bala teka bi wü sikipi. Enatikine dene, wü kpara la ngbü eyi emala nga Yesu fū wü bu wü, wü di engu Yisarayeale, gü ba, 'Yesu zükü gbü kpi eyi fanü.'

³² Wü di engu wüna, dene ngü te a le amala fū yi enatikine, angü Me kina te-ye ta eyi fū wü kundu nih, gü ba, 'Te gara, ni ena atima Miri teka aküwa wü.' ³³⁻³⁴ Ngü la, Me mere eyi fū nih enatikine fanü, angü ah tima Yesu eyi teka aküwa nih. *Davidi ba ta ngü ka Miri la gbü e'ba'basu ci ka-ye, gü ba, 'Me mala fū Miri la, gü ba, 'Ye de Ye ni. Enatikine, ni sere ngü la eyi fū wü kpara 'buru, gü ba, ni de Wö ye.' [†] Me du mala kpah gara ngü gömö gara mürü dofo, gü ba, 'Züka ngü ta te ni mala, gü ba, ni ena ato fū Davidi ne, züka ngü la ni ena amere fū wü amere.' [‡] Teka ngü ka züzükü ka Yesu gbü kpi, ³⁵ Davidi ba ngü la eyi mbölö gbü gara ci ka-ye, gü ba, 'Wayi bala Me, ni wu eyi, gü ba, ye ti ace züka kpara ka-ye gbü kpi nda de. Küküte ti azi gbü tö kpah de.' § ³⁶ Te di bala, yi efi nda-

§ 13:21 13:21 Sawula de engu Yisarayeale, gbü nguwa Benzamina. * 13:22 13:22 Davidi ka-ye de ye Yesu.

† 13:33-34 13:33-34 Mü ena amaka ngü la gbü Ci ka wü Davidi 2:7. ‡ 13:33-34 13:33-34 Mü ena amaka ngü

la gbü buku ka Yisaya 55:3. § 13:35 13:35 Mü ena amaka ngü la gbü Ci ka wü Davidi 16:10.

yi, gü ba, Davidi mala ta ngü la cu teka ye? A'a, ah mala ngü la teka ye nda de, angü te Davidi mere ta tima, te Me to fü ye, nza tete ne, fü ah akpi. Fü ewü ati engu ede mbükü wü kundu ye. Fü küküte azi ciki gbü mbükü sela. ³⁷ Amba, kpara de te kökö zi de, ah ka-ye de Yesu. Angü Me zükü ka-ye duu engu kpi kpi ye gbü kpi.

³⁸⁻³⁹ Wü di engu wüna, dene ngü te ma le amala fü yi enatikine, gü ba, kpara te ti aküwa yi gbü wü *siti ngü ka-yi, ah ka-ye de Yesu, de te a ngbü emala nganga fü yi ne. Angü Me ena aboro siti ngü ka-yi la teka ngü kaka. Te mü to maguma mü fü Yesu la, Me ena aceka mü baka züka kpara ka-ye. Yi efi nda-yi, gü ba, te ani ngbü emere wü *Riri ka Müse biri biri 'buru la, ngü ka-ani ena areke gbü jia Me? A'a, Riri ka Müse ti aküwa yi nda de.

⁴⁰ Te di bala, wü di engu wüna, yi ceka te yi 'be! Yi mere e ace ngü, de te a ngbü emala fü yi ne, de. Angü, te yi ce la, yi küwa nda-yi de. Ah kphah baka ngü ta te Me mala gömö wü mürü dofo ka-ye, gü ba dene, ⁴¹ 'De-wü, wü kpara te wü le ngü kani de ne, wü ceka la, ni ngbü emere mere kpeke ngü gbü wü sikpi ka-wü ne, amba wü le ngü ka-ni la nda-wü de. Wü kpara ena asere ngü la fü wü mbölo. Wü ti aje kphah de. Fü wü akpi ka-wü anza, teka ngü ka kögö-nzö ka-wü la.' ^{**}

Dela ngü ta te Pawülü mala fü wü kpara kpa *esambü ka biti-te la.

⁴² Te Pawülü mala ngü la nza tete, fü ewü ayia ake Baranaba, akoro esambü ka biti-te la kpa etanü. Fü wü kpara la ayi-ta ewü, de wüh du, wüh koro kphah gbü gara sikpi ka Me, teka amala fi bü ngü la bala fü ani.

⁴³ Fütanga mabiti la, fü mere bi wü kpara ayia agi nga wü Pawülü ake Baranaba. Gara ewü de wü di engu Yisaraye, gara ewü de wü ganzi kpara, te ewü le ngü ka Me. Fü wü Pawülü ake Baranaba akpo da eri ewü de ngü ka Me, de wüh rü kpekpeke, teka fü Me ato wazi fü ewü, de *züka maguma ye.

⁴⁴ Te koro gbü *sikpi ka Me sisi nga engu la, fü mere bi wü kpara gbü mere köti la ayia 'buru, abiti te-wü kpa esambü ka biti-te, teka aje ngari Me gömö wü Pawülü. ⁴⁵ Te wü gara wü *Yisaraye le mere bi wü *ganzi kpara kpa esambü ka biti-te ka-wü la, fü ngü la ato kanga emaguma ewü. Fü ewü akpo da ega yiki de wü Pawülü, kphah da esoko ewü, teka ngü ka wü ganzi kpara la.

⁴⁶ Fü wü Pawülü ake Baranaba adu amala ngü fü ewü kpekpeke, gü ba, "De-wü, wü di engu Yisaraye, ah le ta de ani

mala ngü ka Yesu ne fü wü te engu gina, teka fü wü aküwa fi me-wü. Amba wü le ngü la nda-wü 'buru 'buru de. Te di tine eyi bala ne, ah mbi te ani ena ace wü, anü ka-ani amala ngü ka Yesu fü wü ganzi kpara. ⁴⁷ Angü, ngü ta te Me mala fü ani, wü di engu Yisaraye ne, ah gü ba, 'Deni Me, ni o ani, wü di engu Yisaraye, eyi baka ze-wa fü wü ganzi kpara, de ani mala ngü ka-ni, Me, fü ewü, zalü akoro di gbü adu sü füh kotö ne, teka de wüh küwa.' ^{**}

⁴⁸ Baka te wü ganzi kpara je ngü la bala, fü ngü la areke te ewü, fü ewü angbü de mere tadu. Fü ewü akpo da egbo nga iri Me, teka ngü ka Yesu la. Fü wü kpara 'buru, de te Me fe ewü teka aküwa ne, ayia ato maguma wü fü Yesu.

⁴⁹ Fütanga ngü la, fü ngari Me akpo da ewü gbü nga nzö wü sü la 'buru. ⁵⁰ Amba ngü la ngbü eke ka-ye te wü Yisaraye ake. Fü ewü ayia anü kpara wü gara wara wü mere kpara, de te ewü le ngü ka Me ne. Fü ewü akpo da esiti fingangü ka-ewü, bete nda wü cögbörö kpara ka köti la, de wüh to cinga te wü Pawülü ake Baranaba, kphah teka aliki ewü gbü köti kani sela asidi. ⁵¹ Te di bala, fü wü Pawülü ake Baranaba ayia abunda zu-tö ka köti la esatilö wü asidi, teka asere fü ewü, gü ba, Me ena akolo ngü ka-ewü me-ye. Fü ewü ayia ka-wü, anü sü agbü İkonioyo.

⁵² Wü *kpara ka Yesu agbü Atiyokiya ne ce ngü ka Me nda-wü de, wüh lala ka-wü fi bü te ngü ka Yesu. Fü *Nzila Wazi Me angbü eto wazi fü ewü. Fü ewü angbü ka-wü fi bü de mere tadu.

14

Dene ngü ka wü Pawülü ake Baranaba agbü İkonioyo

¹ Te wü Pawülü ake Baranaba koro tete agbü İkonioyo, fü ewü ari kpa *esambü ka biti-te ka wü Yisaraye, kphah ba e te ewü ngbü emere gbü wü gara sü 'buru ne. Fü ewü amala ngü ka Yesu fü wü kpara kpala kpekpeke. Fü mere bi wü kpara, wü di engu *Yisaraye, kphah de wü kpara ka sü la, afü maguma wü, ale ngü ka Yesu.

² Amba gara wü di engu Yisaraye le ngü ka Yesu nda-wü de. Fü ewü ayia anü kpara mere bi wü kpara ka sü la, akpo da esiti fingangü ka-ewü eküte wü Pawülü ake Baranaba. ³ Amba wü Pawülü ake Baranaba kpe cürü ngü la nda-wü de. Fü ewü angbü fi bü agbü İkonioyo kpala teka mere bi sikpi, da emala ngü ka Miri Yesu fü wü kpara kpala kpekpeke, gü ba, "Me tima Yesu eyi teka aküwa ani, teka *züka maguma ye." Te di bala, fü Yesu angbü

* **13:41** 13:41 Mü ena amaka ngü la gbü buku ka Abakuka 1:5. † **13:47** 13:47 Mü ena amaka ngü la gbü buku ka Yisaya 49:6.

eto wazi fū ewü, fū ewü angbü ememere kpeke wü ngü ka talara, teka asere fū wü kpara, gü ba, ngü de te ani ngbü emala ne, ah de zu ngü ka Me fanü fanü.

⁴ Teka ngü la, fū mere yiki akoro esüka wü kpara gbü köti la afa sü. Fū gara ewü ale ngü ka wü Pawülü. Amba gara ewü le nda-wü fi bü ngü ka wü di engä Yisaraye, de te ewü le ngü ka Yesu de ne. ⁵ Fū wü gara wü di engä Yisaraye ayia abiti te-wü, de wü kpara ka sü la, de te ewü le ngü ka wü Pawülü de ne, kpah de wü mere kpara ka-ewü, teka asötö wü Pawülü ake Baranaba, amörö de teme. ⁶⁻⁷ Te wü Pawülü ake Baranaba wu ngü la bala, fū ewü akpe ka-wü, anü sü agbü tö ka wü Likoniya. Fū ewü akpo da endoro gbü tö la, da emala ngari Me fū wü kpara agbü Lisitera bete Derebe, de wü gara jürü köti ede ewü kpala 'buru.

Dene ngü ka wü Pawülü ake Baranaba agbü Lisitera

⁸ Fū wü Pawülü amaka gara komoko agbü Lisitera kpala, de lö ye walawala. Ah ti anü nü de, angü wüh bi engu ta kü bala. ⁹ Gbü gara sikipi, o Pawülü ngbü emala ngari Me fū wü kpara agbü Lisitera kpala, fū komoko la angbü eje ngari Me gögömö na. Fū Pawülü ayia eceka engu kpekpeke, awu 'duwa teke, gü ba, komoko la le ngü ka Me eyi de maguma ye biringbö. Te di bala, wazi ka Me ti eyi areke lölö na. ¹⁰ Fū Pawülü ayia amala ngü fū komoko la de mere ri ye, gü ba, "De-mü, mü yia eyia, mü rü tikpi füh lö mü!" Pawülü bü te emala ngü la bala de, fū komoko la ayia aviti cinzili! arü füh lö ye, akpo 'duwa da enü nü.

¹¹ Te mere bi wü kpara la wu ngü de te Pawülü mere ne, fū ngü la aga gbü jia ewü. Fū ewü amala ngü gbü mö ka wü Likoniya, gü ba, "Apa! Wü me fū te-wü, koro eyi baka wü kpara, endoro esüka ani füh kotö sene!" Angü wüh fi nda-wü, gü ba, wü Pawülü de me wü kundü ani. Amba ngü de te wüh mala la, wü Pawülü je ngü la nda-wü de, angü wüh mala ngü la gbü ngü mündü ka-wü, ka Likoniya. ¹² Fū ewü agü iri Baranaba, gü ba, "Zeyo", te di de miri ka wü me ka-wü. Fū ewü agü nda Pawülü, gü ba, "Ereme",* angü Pawülü ngbü ta emala wü ngü ne me-ye.

¹³ Fū mürü gele ka me, Zeyo† ne, adu afi nga gara ngü, gü ba, "Ah le de ani to la'bi fū wü me ne." Fū ah ayia aza wü yiti, teka awa fū wü Pawülü. Fū ah ai wü yi-rü gbü ngürü wü yiti la areke areke. Fū ah ayia

ai wü kpara, abiti, teka de wüh za wü nü la, wüh nü di, ato la'bi tete fū wü Pawülü, baka te ewü ngbü eto fū wü me ka-wü, Zeyo ne.

¹⁴ Te wü Baranaba ake Pawülü je ngü la bala, fū ngü la asiti te ewü 'duwa baneh-ene-la. Fū ewü ayia asörö bongo ka-wü, akpo da ele woro esüka wü kpara la, da emala ngü de mere ri wü, ¹⁵ gü ba, "Akoo, de-yi, wü di engä ni a, yi fi ngü la, amere bala teka ne? Yi mere e amere ngü bala de! A de wü me nda-a de! A kpah de wü kükürü kpara baka yi. A koro nda-teka amala zu ngü ka Mere Me fū yi, de yi ce ngü ka wü di engä me de bala asidi. De yi fū maguma yi, adu ale ngü ka Mere Me. Angü Me engu ne, ah de zu Me, te engu mere kpä ake tö bete ngu, de wü e gbü ewü 'buru me-ye. ¹⁶ Gbü wü re ta gügü ne, Me ce ta nguwa wü kpara füh kotö ne 'buru, angbü emere wü gele ka-wü kpikpi wü kpikpi wü, ba e te ewü le, angü wüh wu ngü kaka ta nda-wü la de. ¹⁷ Amba, gbü wü ngü la 'buru, Me ngbü fi bü da emere züka ngü ka-ye fū ewü, teka fū ewü awu ngü ka-ni tete. Fū ah angbü eto agö fū ewü, kpah da eto wazi fū wü e ka-ewü agbü yi, de wüh kö, adi erü, teka de wüh di emaka zü-e gbügbü na, adi engbü de mere tadu." ¹⁸ Fū wü Pawülü ambü ambü da emala ngü fū wü kpara la, amba wü kpara la le ace ngü ka-wü la nda-wü kpah de. Fū wü Pawülü angbü fi bü da emala ngü la fū ewü kpekpeke, gü ba, "Wü mere e ato la'bi fū ani de." Fū wü kpara la adu ace ngü la, abaya ka-wü.

¹⁹ Gbü gara sikipi, fū gara wü di engä Yisaraye ayia agbü Atiyokiya, te di gbü tö ka Pisidiya, bete İkonioya, akoro agbü Lisitera. Fū ewü akpo da emala mere bi wü siti ngü eküte wü Pawülü, da esiti fingangü ka mere bi wü kpara la. Fū wü kpara la ayia aza teme, akpo da esötö Pawülü di, teka amörö. Fū ewü asötö Pawülü bala, agbo gbülüküsü kötö! Fū ewü agbeke engu baka kö e la, anü di, ace mba canza ede mere köti kpala. Wüh fi nda-wü, gü ba, ah kpi eyi.

²⁰ Fū wü *kpara ka Yesu akoro abiti te-wü ede Pawülü sela. Wüh te eceka de, cukuru! Pawülü zükü eyi! Fū engu ayia arü tikpi, adu de ewü agbü mere köti. Kpurutokokpi la, fū ewü ayia ka-wü ake Baranaba, anü sü agbü Derebe.

Dene ngü te wü Pawülü ake Baranaba du tete

agbü Atiyokiya gbü tö ka Siriya

* **14:12** 14:12 Wü kpara la fi, gü ba, Zeyo ka-ye de miri ka wü me 'buru. Ereme ka-ye de me te ngbü baka ri Zeyo, te ngbü emala ngü fū wü kpara. † **14:13** 14:13 Mürü gele la ngbü ta emere tima ka-ye gbü mere kambü ka me Zeyo, te di ede möngiti 'baranga la.

²¹ Te wü Pawülü ake Baranaba koro tete agbü Derebe, fü ewü angbü da emala ngü ka Yesu fü wü kpara de kpala. Fü mere bi wü kpara ayia ato maguma wü fü Yesu afa sü.

Fütanga ngü la, fü wü Pawülü ake Baranaba ayia ka-wü kpala, adu agbü Lisitera, akoro gbü İkonioyo bete Atiyokiya te di gbü tö ka Pisidiya ne. ²² Fü ewü angbü eto wazi fü wü *kpara ka Yesu gbü wü sü la biri biri 'buru, da emala wü ngü fü ewü, gü ba, "Ah le de wü rü kpekpeke, da elala gbü ngü ka Yesu. Angü füh kotö ne, ani ena amaka mere bi cinga afa sü. Amba te ani rü kpekpeke la, te gara ani ena amaka tadu, agbü sü ka Me agbü kpi."

²³ Fü ewü ayia afe wü kpara, ao gbü nzö wü kpara ka Yesu gbü wü sü la biri biri 'buru, baka wü *kovo. Fü ewü ayia *a'bi te-wü, da eyi-ta Me, teka ace ewü esaka Mere Me, de Me ceka kpi fütanga ewü meye, angü wüh to maguma wü eyi fefe na.

²⁴⁻²⁵ Fütanga ngü la, fü wü Pawülü ake Baranaba ayia gbü tö ka Pisidiya, anü akoro agbü Peruga, te di gbü tö ka Pafiliya. Fü ewü amala ngü ka Yesu fü wü kpara de agbü Peruga de kpala. Fü ewü adu kphah anü sü, akoro agbü Ataliya. ²⁶ Fü ewü ayia agbü Ataliya kpala, ali gbü *zabu, ago agbü gina Atiyokiya, te di nda-ye gbü tö ka Siriya ne, angü ah de wü ta te wü kpara ka Yesu tima ewü tete, teka anü amala ngü ka Yesu gbü wü gara sü, baka e ta te ewü mere.

²⁷ Te wüh koro agbü Atiyokiya kpala, fü ewü abiti wü kpara ka Yesu 'buru, amala nga wü ngü, de te Me mere fü ani, gü ba, "Me ü kaje eyi fü mere bi wü *ganzi kpara, de wüh to maguma wü fü Yesu." ²⁸ Fü ewü angbü de wü kpara ka Yesu agbü Atiyokiya kpala teka mere bi fe.

Dela ngü ta te wü Pawülü ake Baranaba mere, gbü gina ndoro ka-wü, te ewü nü teka amala ngü ka Yesu tete ne.

15

Dene ngü ka mere mabiti agbü Yerusalem

¹ Gbü wü sikpi la, o wü Pawülü ake Baranaba ngbü tete agbü Atiyokiya kpala, fü gara wü di enga *Yisaraye ayia agbü *Yudaya, akoro agbü Atiyokiya. Fü ewü akpo da eri wü *kpara ka Yesu de kpala ne de siti riri, gü ba, "Te wü le eyi aküwa la, ah le de wü mere wü gele ka *Müse 'buru, baka matü esa *basa, de wü gara na."

² Te wü Pawülü ake Baranaba je ngü la bala, fü ngü la asiti te ewü afa sü. Fü ewü akpo da ega mere yiki de wü kpara la. Te di bala, fü wü kpara ka

Yesu de gbü Atiyokiya la ayia abiti te-wü, afe wü Pawülü ake Baranaba, bete wü gara kpara. Fü ewü ayia atima ewü agbü Yerusalem, teka amala nga ngü la fü wü *mürü tima ka Yesu, bete wü gara *kovo de kpala ne, teka awu fingangü ka-ewü gbü ngü la. ³ Fü wü kpara ka Yesu la ayia agü nga wü Pawülü, zalü akoro di kpa te mere kaje.

Fü wü Pawülü ale kaje, afü kpuru agbü tö ka Fonisiya bete *Samariya. Fü ewü angbü enü da enye kpaka wü kpara ka Yesu gbü wü köti, te ewü di te kaje la, da emala fü ewü, gü ba, "Mere bi wü *ganzi kpara kpo eyi da efü maguma wü, ele ngü ka Yesu." Fü ngü la angbü eto mere tadu fü wü gara kpara ka Yesu gbü wü sü la 'buru.

⁴ Te wü Pawülü nü koro tete agbü Yerusalem kpala, fü wü mürü tima ka Yesu, de wü gara kpara ka Yesu, bete wü kovo ka-wü, aza ewü de mere tadu. Fü wü Pawülü akpo da emala nga tima ka Me, te ani ngbü emere ne 'buru fü ewü, gü ba, "Mere bi wü ganzi kpara to maguma wü eyi fü Yesu." ⁵ Amba wü gara *Farusi ta ladü kpala, te ewü le ngü ka Yesu, amba fingangü ka-ewü ka-ye fi bü teka ngü ka gele ka-wü, ka Yisaraye. Te wü Farusi la je nga wü ganzi kpara la bala, fü ngü la asiti gbü jia ewü. Fü ewü ayia amala ngü, gü ba, "Te wü ganzi kpara la to maguma wü eyi fü Yesu fanü la, ah le de wüh gü ewü 'buru esa basa, de wüh mala fü ewü kpekpeke, teka de wüh di kphah emere *Riri ka Müse 'buru."

⁶ Te di bala, fü wü mürü tima, de wü mere kpara ka Yesu, ayia abiti te-wü, agiri si-ngü te wü Farusi mala, teka wü ganzi kpara la, mbi mbi mbi. ⁷ Sidi nga bi wü mö, de te ewü ro füh ngü la, Petero, fü mü ayia arü tikpi, amala ngü fü ewü, gü ba, "Wü di enga wüna, yi wu eyi, gü ba, Me fe ra ta gügü, esüka yi, teka de ma mala ngü ka Yesu fü wü ganzi kpara, teka de wüh je ngü la, adu ato maguma wü fefe. ⁸ Kpah bala, Me wu ngü te di emaguma wü kpara 'buru. Fü ah asere ngü la mbölö, gü ba, 'Ni le ngü ka wü ganzi kpara eyi.' Tekanü la, fü ah ato *Nzila Wazi ye fü ewü, kphah baka te engu to fü nih ne. ⁹ Angü ah ye süka nih de ewü nda de. Fü ah ayia afü ewü kphah ba wü züka kpara ka-ye, angü wüh to maguma wü eyi fü Yesu. ¹⁰ Amba titine, ngü te Me mala teka wü ganzi kpara ne, yi le afü ngü ka Me la, neh teka ne? Yi le aza mere riri ka gele la, ao gbü nzö wü kpara ka Yesu baka e la, neh teka ne? Angü riri la, wazi wü kundu nih, ta teka amere riri la di ne, nda kphah ma. Nih de enatikine ne, wazi nih teka amere riri la mbi mbi nda kphah ma. Te di eyi bala ne, yi le ato

kuru te wü ganzi kpara de riri la neh teka ne? Dela züka ngü? ¹¹ Nda-nih, wü di enga Yisaraye, nih wu eyi, gü ba, Miri Yesu wu cinga nih eyi, fü ah aküwa nih teka *züka maguma ye. Enatikine ah kpo eyi da eküwa wü ganzi kpara kphah bala. Amba yi le ngü la de, neh teka ne?"

¹² Te wü kpara gbü mabiti la je ngü te Petero mala de bala ne, fü ngü anza gömö ewü 'buru. Fü ewü angbü tine bü eje ngü gömö wü Baranaba ake Pawülü. Fü wü Baranaba akpo da emala nga wü kpeke ngü ka talara, te ewü ngbü emere esüka wü ganzi kpara gbü wazi ka Me, ne 'buru fü ewü.

¹³ Te wü Baranaba mala nga wü ngü la nza tete, fü *Yakobo, enga ni ye Yesu ne, ayia, amala ngü fü wü kpara la 'buru, gü ba, "Wü di enga wüna, yi je la ngü te ma emala ne! ¹⁴ Simüna Petero mala nga ngü, de te Me kpo ngbü emere fü wü ganzi kpara ne, eyi fü nih mbölo, gü ba, Me fe wü gara ganzi kpara la kphah eyi meye, teka de wüh fü maguma wü, adu ale ngü ka-ni, Me. ¹⁵ Ngü la ti kphah eyi kpini de ngü, ta te wü *mürü dofo ba gbü *Ngari Me, teka ngü ka wü ganzi kpara ne, ¹⁶ gü ba, 'De-wü deyü, wü ngbü engbü de cinga, neh teka ngü ka nguwa Miri *Davidi, te ewü di ba miri ka-wü tine de ne? Me mala eyi fü wü, gü ba dene, "Te gara ni ena atima gara miri fü wü, te ena adi zu de kundu ye Davidi fanü fanü. Ni, Me, ena ao engu mere miri gbü nzö wü. ¹⁷ Ni ena amere ngü la bala, teka de nguwa wü kpara füh kotö ne 'buru fü maguma wü, du ra fü ni, Me. Angü ni fe kphah gara wü ganzi kpara eyi, de wüh ngbü baka wü kpara ka-ni." ¹⁸ Dela ngü ta te Me sere fü wü kundu nih eyi gügü, gömö wü mürü dofo ka-ye."

¹⁹ Fü Yakobo adu kphah amala gara ngü fü wü bu ye la, gü ba, "Te di bala, dene ngü te ma ele amala fü yi, teka ngü ka wü ganzi kpara, de te ewü to maguma wü eyi fü Yesu ne. Nih mere e ambü ewü de mere bi wü riri ka gele ka-nih, ka wü Yisaraye ne, tine de. ²⁰ Amba, ah le fü nih ato riri fü ewü ngbee bata. Wüh mere e amere gele ka wü me ka wü kundu wü de. Wüh mere e amere waza de. Wü nü de te wüh emörö ewü da efüfürü ngürü ewü ne, wüh mere e azü de, angü ah de ngüte gbü ye. Wüh mere e azü ngüte wü nü kphah de.* Nih ba ngü la fü ewü gbü köcökpa, ²¹ angü dela ngü te *Müse ba fü nih, wü di enga Yisaraye, gbü *Riri ka Me. Nih ngbü eyi etanga wü riri la gbü wü *sikipi ka Me 'buru, kpa *esambü ka biti-te ka-nih.

Kpah bala, gbü nga nzö wü sü 'buru, te wü kpara ka-nih ngbü tete, wüh ngbü eyi esere si-ngü gbü wü riri la fü wü kpara mbölo."

²² Fü ngü de te Yakobo mala la ayia areke te wü *mürü tima, de wü *kovo, bete wü gara kpara ka Yesu 'buru. Fü ewü ayia afi ngü, afe wü kpara 'basu, teka atima ewü agbü Atiyokiya de wü Pawülü ake Baranaba, de wüh nü, wüh sere ngü la mbölo fü wü kpara ka Yesu de kpala ne. Fü ewü afe wü Barasaba† ake Sila, te ewü di ba mere kpara esüka wü bu wü.

²³ Fü wü Yakobo aba köcökpa, teka ato esaka ewü, gü ba, "De-a, wü mürü tima ka Yesu, de wü kovo kaka gbü Yerüsalema de sene, a ba köcökpa ne fü yi me-a, wü ganzi kpara, de te yi le ngü ka Yesu, agbü Atiyokiya, Siriya, bete Silisiya ne. A to mandü fü yi de iri Miri Yesu, angü yi de wü di enga ni a fanü. ²⁴ A je, gü ba, wü gara kpara, de te ewü yia kpaka a sene, koro kpaka yi kpala ne, kpo eyi da esiti fingangü ka-yi. Wüh gü ba, te yi le ngü ka Yesu fanü la, ah le de yi ti kphah esa *basa, afü te-yi ba wü di enga Yisaraye? Ngü la ka-ye wu! Angü wü ngü de te ewü ngbü mala fü yi la, a to riri la fü ewü me-a nda-a de. ²⁵ Tekan ngü la, a biti te-a eyi, fü a afe wü gara kpara, teka atima ewü kpaka yi kpala, te ewü ena anü tundu de wü Baranaba ake Pawülü, te ewü di de wü züka wü di enga ni a. ²⁶ Angü a wu eyi, gü ba, wü Baranaba ake Pawülü ce te-wü eyi akpi, teka tima ka Miri kanih Yesu Kurisito. ²⁷ A fe wü Barasaba ake Sila, tima ewü eyi kpaka yi dela, teka de wüh mala si-ngü, te a ba fü yi ne, cu me-wü mbölo. ²⁸ Angü *Nzila Wazi Me to fingangü la fü a me-ye, gü ba, a mere e ato mere tiri ngü gbü nzö yi de, angü ngü la ena anza wazi yi gbü tima ka Me. Te di bala, dene wü riri te a to fü yi, wüh ngbee bata. ²⁹ Yi mere e amere gele ka wü me ka wü kundu yi de. Yi zü ngüte nü kphah de. Wü nü te ewü ngbü efüfürü ngürü ewü afüfürü ne, yi mere e azü kphah de. Yi mere e angbü emere waza de. Te yi ce da emere siti wü ngü de bala eyi la, ah ena areke afa sü. Dela wü ngü te a ba fü yi gbü köcökpa ne, ah bala. Me di de yi kpala."

³⁰ Fü wü Pawülü ayia ake Baranaba de wü Barasaba bete Sila, aza köcökpa la, anü di agbü Atiyokiya. Te wüh nü koro agbü Atiyokiya, fü ewü abiti wü kpara ka Yesu de kpala 'buru, aza köcökpa la, ato fü ewü, fü ewü atanga. ³¹ Te wüh tanga köcökpa la esüka wü, fü ngü la atürü te wü kpara ka Yesu la 'buru, angü köcökpa

* 15:20 15:20 Yakobo mala bala kükürü de, angü gele ka wü Yisaraye le de kpara zü ngüte nü de. Te mü zü ngüte nü la, yi ti äündä te-yi de ewü tine de. † 15:22 15:22 Gara iri Barasaba de Yuda.

la reke fingangü ka-ewü eyi gbü tima ka Me.

³² Fü wü Barasaba ake Sila ayia anghü eto ngari Me fü ewü teka mere bi lö-ra. Fü wü ngü, de te ewü ngbü emala fü wü kpara la, anghü eto mere wazi fü ewü, anghü Nzila Wazi Me ngbü emala ngü la gömö ewü me-ye.

³³ Fütanga mere bi sikipi, fü wü Barasaba ayia teka adu agba wü, agbü Yerüsalema. Fü wü kpara ka Yesu agbü Atiyokiya ayia agi nga ewü, arü te kaje. Fü ewü anü sü de gu ngü emaguma wü. ³⁴ Fü Sila adu anghü ka-ye ciki kpala. ³⁵ Amba wü Pawülü ake Baranaba ngbü enghü nda-wü agbü Atiyokiya sela, de mere bi wü bu wü, da eri wü kpara ka Yesu, kpah da emala ngü ka Miri Yesu fü wü kpara kpala.

Dene ngü te wü Pawülü ye süka wü tete ake Baranaba

³⁶ Fütanga ngü la, Pawülü, fü mü ayia amala ngü fü Baranaba, gü ba, "Ah ti fü ani adu la gbü wü mere köti 'buru, de ta te ani ngbü mala ngü ka Yesu fü wü kpara gbügbü na ne, aceka la wü di engä ni ani de kpala, anga wüh gbü ngü ka Me kpala neh baye ya?" ³⁷ Baranaba gü ba, "Wayi, amba ah le de ani za Marako, teka de ah le ta-ngü te ani." ³⁸ Fü Pawülü amala fefe, gü ba, "A'a! Ah ti fü ani aza Marako gbü nga ani de, anghü ah kpe ce ani ta agbü Pafiliya, gü ba, ni le andoro de wü ani gbü tima de." ³⁹ Te Pawülü mala ngü la fü Baranaba bala, fü mere yiki akoro esüka ewü teka ngü la. Fü ewü ayia aye süka wü. Baranaba, fü mü aza Marako, ali gbü *zabu, fü yi anü ka-yi agbü Kupuriyo.

⁴⁰ Fü Pawülü afe nda-ye Sila, teka de ani nü ake di. Fü wü *kpara ka Yesu agbü Atiyokiya ayi-ta Me, de Me di de ewü.

⁴¹ Fü ewü ayia anü ka-wü, anghü endoro gbü nga wü sü, te di gbü wü tö ka Siriya bete nda Silisiya, teka ato wazi fü wü kpara ka Yesu de kpala ne.

16

Dene ngü ka Timoteyo te kpo da endoro de wü Pawülü

¹ Fütanga ngü la, fü wü Pawülü anü akoro gbü tö ka Likoniya, akpo da endoro, anü akoro agbü Derebe. Fü ewü ayia anü sü, akoro agbü Lisitera, teka aceka wü *kpara ka Yesu de kpala, da eto wazi fü ewü. Amba gara jaji komoko ta ladü agbü Lisitera kpala, de iri ye Timoteyo, te to maguma ye eyi fü Yesu. Ni ye na de egba *Yisarayeale, te to maguma ye kpah eyi fü Yesu, amba wö ye na ka-ye de engä *Giriki. ² Wü kpara ka Yesu agbü Lisitera bete İkonio ngbü ta emala nga züka ngü kaka, da egbo nga iri na efa

sü. ³ Te wü Pawülü nü koro kpala, fü ewü amaka te-wü de wü Timoteyo. Fü Pawülü ale de ni za engu, teka fü ani anghü endoro de ewü, da emala ngari Yesu. Te di bala, fü Pawülü ayia aza Timoteyo, agü esa *basa, baka gele ka wü Yisarayeale, teka fü wü di engä *Yisarayeale ale ngü ka Timoteyo baka engä ni wü. Angü wü kpara gbü wü nga nzö sü la 'buru wu ta eyi kpo, gü ba, wö ye Timoteyo de engä Giriki.

⁴ Fü wü Pawülü anghü endoro gbü nga nzö wü sü la 'buru, kpah da esere ngü ka köcökpa, de te wü *mürü tima ka Yesu agbü Yerüsalema ba fü wü bu wü, wü kpara ka Yesu ne. Angü wüh ba ngü la fü ewü, gü ba, "Wü *ganzi kpala, de te ewü le ngü ka Yesu eyi ne, wüh mere e adi embü ewü de mere bi iri ka gele ka wü di engä Yisarayeale tine de." ⁵ Fü wü kpara ka Yesu gbü wü sü la, anghü fi bü da emaka wazi, kpah da esibi efa sü te nga wü sikipi biri biri 'buru.

Dene ngü te sere te-ye fü Pawülü baka roto agbü Türüwa

⁶ Gbü gara sikipi, wü Pawülü le ta anü amala ngü ka Yesu gbü nga nzö wü sü ka Asiya. Amba *Nzila Wazi Me le fü ewü anü to kpala de. Te di bala, fü ewü anye sü agbü tö ka Firigüya bete nda Galatiya. ⁷ Fü ewü anü, anü akoro ghamari ede Misiya. Wüh le ta afü agbü tö ka Bituniya, amba Nzila Wazi Me le de wüh nü kpala kpah de. ⁸ Te di bala, fü ewü afü kpuru agbü tö ka Misiya, anye sü ka-wü, akoro agbü köti de iri ye Türüwa. Köti la ghamari ede mere *yi-ngu.

⁹ Te wüh nü koro agbü Türüwa kpala, gbü biti la, fü ngü asere te-ye fü Pawülü baka roto la. Fü ah awu gara komoko ka Makedoniya, te rü tikpi, da ei ye, gü ba, "Pawülü deyü, ye koro ekoro kpaka ani agbü Makedoniya kpakine, teka ale ta-ngü te ani!" ¹⁰ Kpurutokopi la, fü a ayia bü 'duwa agiri kaje, teka anü agbü Makedoniya. Angü a wu eyi teke, gü ba, Me ngbü ei a me-ye, teka de a nü amala ngü ka Yesu fü wü kpara gbü tö engu la.

Dene ngü te Ludiya to maguma ye tete fü Yesu

¹¹ Fütanga ngü la, fü a ayia agbü Türüwa, ali gbü *zabu anü 'duwa mbiü, akoro agbü Samütürake. Baka egambi la, fü a ayia sela anü akoro agbü Neyapoli. ¹² Fü a ayia tine gbü Neyapoli sela de lö a, anü akoro agbü Filipoyi, te di de mere köti gbü tö ka Makedoniya. Bi wü kpara ka *Rüma koro ta ngbü kpala, anghü sü la ta esaka ewü. Fü a ayia anü anghü kpala teka bi sikipi.

¹³ Te koro gbü *sikipi ka Me, fü a ayia anü andoro ede mere ngu, te di ghamari ede

mere kōti la. Kükürü de, angü a fi nda-a, gü ba, wü di engä Yisaraye le ngbü ebiti te-wü kpala, teka aku gba fü Me. Te a koro kpala, fü a amaka wü gara würüse, te ewü biti te-wü kpala. Fü a akpo da emala ngü ka Yesu fü ewü. ¹⁴ Gara würüse ta ladü esüka ewü de iri ye Ludiya, te di kpara ka Tiyatira. Tima kaka, ah de kpara te ngbü ese wü züka nze bongo, da ecinzi fü wü kpara. Ah kphah de kpara te le ngü ka Me fa sü, amba ah ka-ye de egba *ganzi kpara. Fü Pawülü ayia amala ngü ka Yesu fefe na. Te Ludiya fe ngü de gömö Pawülü ne, fü Me ato wazi fefe, teka fü engu ato maguma ye 'buru fü Miri Yesu. ¹⁵ Fütanga ngü la, fü a ayia ato *babatiza fü Ludiya de wü kpara gba ye 'buru. Fü Ludiya ayia amala ngü fü a, gü ba, "Te a wu eyi, gü ba, ni to maguma ni eyi fü Yesu fanü fanü la, de a koro ekoro, a nü, a ra agba ni." Fü ah alala fi bü te ngü la, fü a adu ale. Fü engu eceka kpi fütanga a areke afa sü.

Dene ngü te wüh gü wü Pawülü tete gbü ku

¹⁶ Gbü gara sikipi, o kpara ngbü enü kpa te sü, te wüh ngbü eku gba fü Me tete, fü a anü amaka gara jaji würüse, te *siti wü di engä me ngbü eto wazi fefe, fü ah angbü emala wü ngü de te ena amere te-ye te gara. Amba jaji würüse la ka-ye de labi. Mere bi jiasse de te engu ngbü emaka gbü tima la, wü mere kpara kaka ngbü eza 'buru me-wü. ¹⁷ Fü jaji würüse la ayia ati gbü nga a de wü Pawülü, da emala ngü kpa tikpi de mere ri ye, gü ba, "Wü ceka la wü kpara ne, wüh de wü mürü tima ka Mere Me! Wüh ngbü esere fü ani nga kaje, de te wü kpara ena aküwa tete." ¹⁸ Ah ngbü mere ngü la bala teka mere bi sikipi. Fü ngü la ayia ake te Pawülü. Fü ah ayia afü te-ye, amala ngü fü siti wü di engä me la kpekpeke, gü ba, "De-yi, siti wü di engä me, ma ngbü emala fü yi, te iri Yesu Kurisito, de yi koro guvu würüse la asidi!" Pawülü bü te emala ngü la de, 'duwa fü siti wü di engä me la ayia akoro guvu würüse la asidi.

¹⁹⁻²⁰ Te wü mere kpara ka würüse la wu, gü ba, siti wü di engä me la ce labi ka-ani eyi, ani ti amaka jiasse esasaka tine de, fü ngü la ake te ewü afa sü. Fü ewü ayia azoro wü Pawülü ake Sila, agbeke ewü de wazi, anü di engagira wü mere kpara, amala fü ewü, gü ba, "Wü kpara ne, wüh de wü di engä Yisaraye le, wüh ngbü emere siti ngü, da esiti fingängü ka wü kpara gbü mere kōti ka-ani sene. ²¹ Angü, wüh ngbü eri wü kpara de gele ka-wü. Gele la, ah ti fü ani, wüh di engä *Rüma, amere nda-ani de. Dela züka ngü?"

²² Fü ngü la ake te mere bi wü kpara. Fü ewü akpo da emere gü fü wü Pawülü ake Sila. Te wü mere kpara la wu bala, fü ewü ato iri fü wü marajümiya, de wüh gbi bongo eküte wü Pawülü ake Sila, teka asüma ewü de juru. ²³ Fü ewü aza juru, asüma wü Pawülü bü bala-ööö, aza ewü agü gbü ku. Fü wü mere kpara la amala ngü kpekpeke fü mere marajümiya, de te ngbü eceka kpi fütanga kambü ka ku ne, de ah fete ewü mbi mbi mbi.

²⁴ Te mere marajümiya la je ngü la bala, fü ah ayia aza wü Pawülü, anü de ewü, agü gbü adu guvu kambü ka ku la. Fü ah aza faka rü te ewü ba, mü wü görö gbügbü ne, ato lö wü Pawülü ake Sila gbügbü na, ai de nyari gö gö gö! angü wüh ena akpe kpe.

²⁵ Fü wü Pawülü ake Sila akpo angbü eku gba fü Me, da ebü ci, kphah da egbo nga iri Me angbü ku kpala. Fü wü gara kpara ka ku la angbü eje ngü la. Ah te ekoro etü biti de, ²⁶ kugbu kugbu! kugbu kugbu! mere yiki-tö kpo eyi emere te-ye! Fü yiki-tö la ayükü ri kambü ka ku la, ao tine bü koco koco. Fü wü möngiti ka kambü ka ku la aü te-wü 'buru, angbü mböömbö. Fü wü nyari, de te wüh ngbü i wü kpara ka ku di ne, afufuru te-wü kphah 'buru.

²⁷ Fü mere marajümiya la ayia azükü, awu, gü ba, wü möngiti 'buru ü te-wü eyi. Fü ah afi, gü ba, wü kpara ka ku ne kpe eyi 'buru. Fü ah ayia agbi mere maguruma ka-ye, teka de ni mörö te-ni di asidi.

²⁸ Te Pawülü wu bala, fü ah ayia amala ngü fefe, de mere ri ye, gü ba, "Ye mere e amörö te-ye de. Ani 'buru ladü!" ²⁹ Fü mere marajümiya la ayia ayo lamba, aza esaka ye, akpe arü kpa esambü ka ku, anü ati engagira wü Pawülü ake Sila, anda'ba te-ye fü ewü, da eyi ayi ka cürü gbö gbö gbö! ³⁰ Fü ah aza ewü kpala, akoro di kpa etanü, adu ayi-ta ewü, gü ba, "Akoo, wü mere kpara, ni ena amere baye, teka fü ni aküwa?" ³¹ Fü wü Pawülü alügü ngü fefe, gü ba, "Ah le de mü to maguma mü fü Miri Yesu, fü mü aküwa, de wü kpara gba mü 'buru." ³² Fü wü Pawülü ake Sila akpo da emala ngü ka Miri Yesu fü mere marajümiya la, de wü kpara gba ye 'buru.

³³⁻³⁴ Te wü Pawülü mala ngü ka Yesu fü ewü nza tete, fü mere marajümiya la, ayia aza wü Pawülü ake Sila anü di kpa gba ye, aza ngu, azürü jia ka te ewü la 'buru. Fü wü Pawülü ato *babatiza fefe de wü kpara kaka la 'buru.

Fütanga ngü la, fü mere marajümiya la ayia ato zü-e fü ewü azü. Fü ah angbü tine de tadu, de wü kpara gba ye la 'buru, angü wüh to maguma wü eyi fü Me.

³⁵ Te kpi seke tete, fü wü mere kpara ka wü Rüma, gbü mere kōti la, ayia

atima wü gara komoko ka-wü kpaka mere marajümiya la, amala fefe, gü ba, "Ye ce kpa te wü kpara la, de wüh nü ka-wü enü." ³⁶ Fü mere marajümiya la ayia anü, amala ngü la fü wü Pawülü, gü ba, "Wü mere kpara tima ngü fü ni sene, teka de ni ce kpa te wü. Te ah bala, wü ti eyi anü kaje fü. Me di de wü te kaje."

³⁷ Te Pawülü je ngü la bala, fü ah amala ngü fü wü marajümiya, de te wüh tima ewü ne, gü ba, "Ngü la ti bala de! Kükürü de, angü ani de wü di engä Rüma. Wüh kolo ngü ka-ani mbi mbi de. Wüh mī ani bü kükürü, to lümü te ani gbü jia wü kpara 'buru, fü ewü aza ani, agü gbü ku. Wüh mere ani cu bala teka ne? Enatikine, wüh fi nda-wü, gü ba, ani ena ace kpa te ani bü gbü zi, fü ngü la anza bü bala? Dela züka ngü? Te wü mere kpara la le de ani nü la, ah le de wüh koro, ato kaje fü ani cu me-wü."

³⁸ Fü wü marajümiya la, adu de ngü te wü Pawülü mala ne, amala fü wü mere kpara, de te tima ewü ne. Te wü mere kpara la je, gü ba, wü Pawülü ake Sila ka-wü de wü di engä Rüma ne, fü ngü la ato mere cürü fü ewü. ³⁹ Te di bala, fü wü mere kpara la akoro afüwa te-wü fü wü Pawülü, teka de wüh ce siti ngü la fü ani. Fü ewü adu anda'ba te-wü fü wü Pawülü, de wüh ce mere köti la. Fü wü mere kpara la ayia ace wü Pawülü, anü sü ka-wü.

⁴⁰ Baka te wü Pawülü ake Sila koro gbü ku la tete, fü ewü adu anü ka-wü kpa gba Ludiya, teka eceka wü *kpara ka Yesu de kpala ne. Fü ewü amala ngü fü wü kpara ka Yesu la, de wüh rü kpekpeke gbü ngü ka Me. Fü ewü ayia ka-wü gbü Filipoyi sela, anü sü agbü gara sü.

17

Dene ngü ka Pawülü ake Sila agbü Tesalonika

¹ Te wü Pawülü yia agbü Filipoyi kpala, fü ewü anü akoro agbü Afipoli. Fü ewü ayia sela, anü akoro agbü Apoloniya. Fü ewü anü fi bala, akoro tine agbü Tesalonika, angü *kambü ka biti-te ka wü Yisarayeale ta ladü sela. ²⁻³ Gbü *sikpi ka Me, fü Pawülü ayia arī kpa esambü ka biti-te la, ba e te engu ngbü emere gbü wü sü 'buru. Fü ah akpo da ero mö teka *Ngari Me de wü kpara kpala, gü ba, "Wüh ba ta gbü Ngari Me, gü ba, 'Ah le de *Kurisito, te Me ena atima teka aküwa ani ne, zü cinga, de ah kpi, fü ah azükü gbü kpi la.' Te di bala, Yesu, de te ni ngbü emala ngangä fü wü ne, engu meye de Kurisito engu la." Fü Pawülü angbü emala ngü ka Yesu la fü ewü mbölo mbölo

bala, te nga wü sikpi ka Me bata. ⁴ Fü gara wü di engä *Yisarayeale la ayia ale ngü ka Yesu gömö wü Pawülü ne. Kpah bala, mere bi wü *Giriki, de bi wü gara wara wü kovo, gbü mere köti la, ayia ato kpah maguma wü 'buru fü Yesu. Fü ewü adu angbü ebite te-wü, da emere ngü ka Me tine tundu de wü Pawülü ake Sila.

⁵ Fü ngü la ayia ato mere siti kanga fü gara wü di engä Yisarayeale, de te ewü le ngü ka Yesu de ne, angü mere bi wü *ganzi kpara to maguma wü eyi fü Yesu, teka ngü ka wü Pawülü. Fü ewü akpo tine bü ebite wü siti kpara, de te ewü ngbü emaka te kaje, eto siti fingangü guvu ewü, de wüh zoro wü Pawülü, amī. Fü ewü aci abiti te-wü, akpo da emere siti ngü, da eba rere, endoro di gbü mere köti la 'buru. Fü ewü anü akoro de ngü ka-wü la, zalü agba gara kpara de iri ye Yasona, agbü sü te wü Pawülü ngbü ngbü tete. Fü ewü arī kpa esambü la, agiri wü Pawülü, teka azoro ewü, anü di engä wü mere kpara ka Tesalonika.

⁶⁻⁷ Wüh maka wü Pawülü kpala nda-wü de. Fü ngü la ake te-wü. Fü ewü ayia azoro tine bü wü Yasona bete wü gara *kpara ka Yesu, anü de ewü engä wü mere kpara ka mere köti la, kpah da eba mere rere kpa tikpi, gü ba, "Wü siti kpara, te ewü ngbü esiti fingangü ka wü kpara füh kotö ne 'buru, titine wüh koro eyi sene, kpo da esiti fingangü ka-ani. Wüh le aje riri ka mere miri ka-ani, *Kayisara, ne de! Wüh gü ba, gara miri ka-ani ladü, de iri ye Yesu! Yasona le ngü ka wü kpara la kpah eyi! Fü ah aza ewü, wü ngba tete kpa gba ye!"

⁸ Fü ngü de te wü kpara la mala eküte wü Pawülü, teka ngü ka Miri Kayisara ne, ayia ato mere fingangü fü wü mere kpara ka Tesalonika, kpah de mere bi wü kpara te ewü je ngü la. ⁹ Fü wü mere kpara la ayia akuru jiasa gbü nzö wü Yasona, de wü bu ye la 'buru. Fü wü Yasona ato jiasa la, teka areke ngü ka wü Pawülü di. Wü mere kpara la gü ba, "Wü Pawülü yia eyia kere, nü sü ka-wü agbü gara sü. Angü ani ena ato kuru te wü to."

Dene ngü ka Pawülü ake Sila agbü Bereya

¹⁰ Fütanga ngü la, te sü ti tete, fü wü kpara ka Yesu ayia bü gbü biti la, aza wü Pawülü ake Sila, agi nga ewü te kaje ka Bereya. Fü wü Pawülü anü, anü, akoro agbü Bereya kpala. Ah te egoro gbü *sikpi ka Me, fü ewü anü ari kpa *esambü ka biti-te ka wü Yisarayeale de kpala ne, teka amala ngü ka Yesu fü wü kpara. ¹¹ Wü di engä Yisarayeale de agbü Bereya ne, ngü ka-ewü ka-ye kpi kpi ye, ah baka

mene ewü agbü Tesalonika ne nda de. Angü wüh ngbü nda-wü eje ngü ka Yesu gömö wü Pawülü ne, de mere tadu. Gbü wü sikpi 'buru, fü ewü angbü etanga Ngari Me, da egiri si-ngü gbügbü kpo kpo kpo, teka awu, gü ba, anga ngü ka Yesu, te wü Pawülü ake Sila ngbü emala la, ah de zu ngü ka Me fanü fanü ya? ¹² Teka ngü la, fü mere bi wü kpara esüka ewü ayia ato maguma wü fü Yesu, kpaah de wü di enga *Giriki mini, wü komoko, de wü würüse, kpaah de wü gara wü wara wü kovo ka Bereya la.

¹³ Fütanga ngü la, fü wü di enga Yisarayeleye agbü Tesalonika la aje, gü ba, wü Pawülü ngbü emala ngü ka Yesu fü wü kpara agbü Bereya. Fü ngü la ayia ake te ewü. Fü ewü ale kaje, anü akoro agbü Bereya kpala, akpo esiti fingangü ka mere bi wü kpara, da ekpülü ewü, teka de wüh mere gü fü wü Pawülü.

¹⁴⁻¹⁵ Teka ngü la, fü wü kpara ka Yesu agbü Bereya la, ayia kere, aza Pawülü, anü di te kaje ka mere *yi-ngu. Fü gara ewü agi nganga bala, zalü akoro di agbü Atenayî, ace engu kpala. Te wüh koro kpala, fü Pawülü aba köcökpa, ato esaka ewü, de wüh za du di fü wü Sila ake Timoteyo, teka de wüh fa nga ni kere agbü Atenayî kpala. Angü, ah ce ta ewü ciki agbü Bereya.

Dene ngü ka Pawülü agbü Atenayî

¹⁶ Fü Pawülü angbü agbü Atenayî kpala, da eci nga wü Sila ake Timoteyo. Fü ah ayia anü andoro gbü mere köti la. Fü ah awu mere bi wü faranda, te wü kpara ka Atenayî ngbü eo gba wü. Te Pawülü wu wü e la bala, fü ngü la ato mere cinga emamaguma afa sü. ¹⁷ Teka ngü la, fü Pawülü akpo angbü emala nga Yesu fü wü kpara agbü Atenayî kpala. Gbü wü *sikpi ka Me, ah ngbü eri kpa *esambü ka biti-te, da ega yiki teka ngü ka Yesu de wü di enga Yisarayeleye, kpaah de wü *ganzi kpara, de te ewü le ngü ka Me ne. Gbü gara wü sikpi, fü engu angbü enü kpaah agbü sü ka se-e, teka angbü emala ngü ka Yesu fü wü kpara, de te engu ngbü emaka ewü de kpala ne, ¹⁸ agü ba, "Yesu de Ye Me, te koro füh kotö ne, teka aküwa nih. Wüh mörö ta engu, fü Me adu azükü engu gbü kpi la."

Wü gara kpeke kpara, te ewü wu ngü fa sü, ta ladü agbü Atenayî kpala.* Te wü kpara la je ngü te Pawülü mala la, fü ngü la ayia aga gbü jia ewü afa sü. Fü ewü akpo da emala ngü esüka wü, gü ba,

"Apa! Mürü mö la ngbü egü neh fe ya?" Wü gara emala nda-wü, gü ba, "Komoko la ngbü emala dela ngü ka wü ganzi me fü ani de?" ¹⁹ Teka ngü la, fü ewü ai Pawülü, de ah nü, ah mala ngü la gbü jia wü e-wu-ngü 'buru, te ewü biti te-wü, gbü sü ka biti-te ka-wü, de iri ye Ariyopago ne.

Te Pawülü koro kpaka ewü kpala, fü ewü amala fefe, gü ba, "To riri ka-ye, de te ye ngbü eri wü kpara di ne, ani le aje ngü la gömö ye, cu de güje ani. ²⁰ Angü ngü de te ye ngbü emala la, ani je gügü la de. Ah ga gbü jia ani fa sü. Te di bala, ani le awu la sisi na mbi mbi mbi." ²¹ Wüh mala ngü la bala kükürü de, angü mene ngü te reke gbü jia wü kpara ka Atenayî la, kpaah de wü ganzi kpara, te ewü koro ngbü de kpala fa sü ne, ah ka-ye bü teka adi eje to ngü, te ewü je gügü la de, kpaah da ero mö teka wü ngü la esüka wü, teka adi ereke fingangü ka-wü di, baka nga-ngü la.

²²⁻²³ Fü Pawülü ayia arü tikpi, engagira mere bi wü kpara la, amala ngü fü ewü, gü ba, "De-yi wü kpara ka Atenayî, baka te ma koro sene, ma ngbü ndoro eyi gbü mere köti ka-yi sene 'buru. Fü ra awu mere bi faranda te yi ngbü reke, o gba yi sene, gbe gbe gbe. Fü ra awu, gü ba, yi le ngü ka wü di enga me ka-yi la, cu de maguma yi. Fü ra anü awu gara faranda, te yi ba e o tete, gü ba, 'Faranda la, ah de nda me, de te ani wu ngü kaka nda-ani de."[†]

Wü di enga wüna, dene si-ngü te ma koro tete sene, teka amala ngü ka Me, de te yi wu ngü kaka-na de, ne fü yi, teka fü yi adu awu ngü kaka mbi mbi mbi. ²⁴ Angü Me te ma ngbü emala nganga fü yi dene ne, ah de Mere Me, ta te mere kotö ne me-ye, de wü e gbü ye 'buru. Engu de Mere Miri agbü kpi, zalü koro di füh kotö sene 'buru. Te di bala, yi ngbü efi, gü ba, Me ngbü engbü gbü wü mere kambü, de te wü kpara ngbü eji fefe na ne? ²⁵ Yi ngbü efi, gü ba, Me de mürü cinga, te ani ena angbü eto e fefe na? Gara e biringbö, te Me le esaka nih nda ma! Engu ngbü eküwa nih, de wü e füh kotö ne 'buru me-ye, da eto wazi ye fü nih, teka fü nih angbü ememere wü ngü di. ²⁶ Engu o wü kpara füh kotö ne 'buru me-ye. Ta gügü, ah mere gina kpara ngbee biringbö, mere kundu nih de iri ye *Adama ne. Fü Me ato wazi fefe, teka de ah bi mere bi ngwa wü kpara, de wü baya, angbü füh kotö ne 'buru. Ah reke kpaah wü nga nzö sü, de te

* **17:18** 17:18 Wü e-wu-ngü la, wüh ngbü ei gara ewü, wü Epikure, gara ewü de wü Setowa. † **17:22-23** 17:22-23 Wüh ba e eküte gara faranda, gü ba, "Faranda ka Me te ani wu ngü kaka de," angü bi wü me ka-ewü ladü, de iri wü kpikpi ye kpikpi ye. Te di bala, mene te wüh wu iri na mbi mbi de, wüh ena areke nda-ka faranda, aba e eküküte bala.

nguwa wü kpara la ena angbü gbügbü na, biri biri 'buru. ²⁷ Me mere wü ngü la bala, teka de wü kpara wu ngü ka-ni, Me, de wüh le kpah ngü ka-ni de maguma wü. Te di bala, ah fanü, Me eyi ladü tundu de nih biri biri 'buru. ²⁸ Ah kpah baka gara ci ka-yi, te yi ngbü ebü, gü ba, 'Nih ngbü engbü dene 'buru teka ngü ka Me, da endondoro, engbü füh kotö sene.' Wüh bi ta kpah gbü gara ci, gü ba, 'Nih 'buru de wü di Me.'

²⁹ Te di bala, baka te nih di eyi de wü di Me fanü fanü ne, nih mere e afi, agü ba, Mere Me te di agbü kpi ne, ah baka wü e, de te wüh ngbü ereke gbü wü rü, anga gbü se, anga gara e, de te wü kpara ngbü ereke te nga fingangü ka wü, ne de. ³⁰ Baka ta te wü kpara wu ngü ka Me nda-wü mbi mbi la de ne, Me to kuru te ewü kpah de. Amba enatikine Me ngbü eyi emala ngü fü wü kpara te nga wü sü füh kotö ne 'buru, teka de wüh fü maguma wü, ace siti gele ka-wü, adu ale ngü ka-ni, Me, de maguma wü biringbö. ³¹ Angü, ah fe sikpi eyi biringbö, te engu ena akolo ngü ka wü kpara füh kotö ne 'buru mbi mbi mbi, ato kuru te ewü teka *siti ngü ka-ewü. Ah ce ngü la eyi esaka gara kpara ka-ye, ta te engu fe gügü, teka tima la. Angü Me sere ngü kaka ta eyi, gbü jia wü kpara 'buru, gü ba, kpara te ni fe engu, ah dene. Angü ta te wü kpara mörö engu ne, Me du zükü engu gbü kpi la."

³² Te mere bi wü kpara la je ngü la gömö Pawülü, gü ba, Me zükü gara kpara eyi gbü kpi ne, fü gara ewü akpo angbü emü engu. Fü wü gara angbü emala nda-wü, gü ba, "Ani ena adu aje si-ngü, teka ngü ka züzükü gbü kpi la, mbi mbi mbi gömö ye kpah toto, gbü gara sikpi."

³³ Te di bala, fü Pawülü ayia ace ewü sela, anü sü ka-ye. ³⁴ Amba wü gara kpara ta ngbü rü ladü, te ewü le ngü ka Yesu la gömö Pawülü. Esüka wü kpara la, gara de Diyoniyo, mere kpara ka koti la, be kpah te gara würüse de iri ye Damariya.

18

Dene ngü ta te mere te-ye agbü Korinito

¹ Fütanga ngü la, fü Pawülü ayia ace Atenayi, teka anü agbü gara koti de iri ye Korinito.* ² Fü engu ayia amaka gara engu *Yisarayeale kpala, de iri ye Akuwila.† Te engu gina, Akuwila ngbü ta engbü agbü *Rüma. Amba teka riri de ta te mere miri ka wü Rüma de iri ye Kalodiyo to, gü ba, wü di engu Yisarayeale yia gbü Rüma 'buru

asidi ne, fü Akuwila ayia ace Rüma, ake wara ye, de iri ye Pirišila ne, ago ka-wü agbü Korinito. ³ Fü Pawülü anü amaka wü Akuwila agbü Korinito kpala. Fü ah ayia angbü ka-ye kpaka ewü, angbü etükü e de ewü, teka amaka jiaše, adi ezü e di, angü tima kaka ta kpah matükü wü e[‡] gbü konü baka nda-ewü la. ⁴ Amba gbü wü *sikpi ka Me 'buru, fü Pawülü angbü enü kpa *esambü ka biti-te ka wü di engu Yisarayeale, teka adi emala ngü ka Yesu fü ewü, de wü *ganzi kpara kpah mini, teka de wüh to maguma wü fü Yesu.

⁵ Sidi nga ngü la, fü wü Sila ake Timoteyo ayia agbü Makedoniya, akoro kpaka Pawülü de letangü fefe.‡ Teka ngü la, fü Pawülü adu ace tima ka matükü e gbü konü ne, adu angbü tine bü emala ngü ka Yesu fü wü kpara te nga wü sikpi 'buru, da esere fü wü di engu Yisarayeale, gü ba, "Yesu de *Kurisito te Me tima engu füh kotö ne, teka aküwa ani." ⁶ Amba wü di engu Yisarayeale le ngü la nda-wü ta de. Wüh ngbü ga yiki fefe teka ngü la. Fü ewü angbü emala wü siti ngü fefe, da esoko engu. Teka ngü la, fü engu abunda zu-tö gbü bongo ka-ye, teka asere fü ewü, gü ba, Me le ngü ka-ewü la de. Fü ah amala ngü fü ewü, gü ba, "Te wü ce kaje ka *küküwa eyi la, ah de ngü ka-wü, ah de ngü ka-ni nda de. Amba Me ena ato kuru fü wü ato. Angü ni mala ngü la eyi fü wü. Baka te wü le ngü la de ne, akpo enatikine, anü kpa engagira nü, ni ena anü amala ngü la fü wü ganzi kpara."

⁷ Fü Pawülü ace ewü, ayia ago ka-ye, angbü agba gara ganzi kpara, de iri ye Tito Yüsite. Engu ta kpara te le ngü ka Me. Gba ka ta gbamari ede *kambü ka biti-te ka wü di engu Yisarayeale la. ⁸ Fü gara engu Yisarayeale, mere kpara ka kambü ka biti-te la, de iri ye Kürisipü ne, ayia ale ngü ka Miri Yesu, de wü kpara gba ye 'buru. Te di bala, fü mere bi wü gara kpara ka Korinito ayia aje ngü ka Yesu gömö Pawülü. Fü ewü ayia ato maguma wü fü Yesu. Teka ngü la, fü ewü ayia ato *babatiza fü ewü.

⁹ Gbü gara biti, fü Miri Yesu ayia asere te-ye fü Pawülü gbü roto, amala ngü fefe, gü ba, "Mü kpe cürü de. Mü di fi bü emala ngü ka-ra fü wü kpara. Mü mere e ace de. ¹⁰ Angü ma ena angbü eto wazi fü mü, da ele ta-ngü te mü. Kpara biringbö te ena amofu mü, ato cinga te mü, nda ma. Angü wü kpara ka-ra, te wüh ena ato maguma wü fere gbü Korinito sene, wüh fa sü."

¹¹ Teka ngü la, fü Pawülü ayia angbü agbü Korinito kpala re biringbö de tü ye,

* 18:1 18:1 Atenayi bete Korinito 'basu mini 'buru wü koti gbü tö ka wü Giriki. † 18:2 18:2 Wüh bi ta Akuwila engu gbü gara tö de iri ye Potiyü. ‡ 18:3 18:3 E ka-ewü te ewü ngbü etükü gbü konü ne, ah ka-ye de gugu.

§ 18:5 18:5 Mü ena amaka ngü la gü buku ka Filipoyi 4:14-16.

da eri wü kpara de ngü ka Yesu.

¹² Fütanga ngü la, fū wü di engā Yisarayeale, te ewü le ngü ka Yesu de ne, ayia abiti te-wü, azoro Pawülü, anü di engagira Miri Galiyo, te mere miri ka wü *Rüma o engu me-ye, de ah di eceka kpī sidi nga tō ka wü *Giriki 'buru. ¹³ Fū ewü angbü eto moto te Pawülü engagira Miri Galiyo, gü ba, "Komoko ne ngbü eri wü kpara, de wüh di emere ngü ka Me, te wü gara kaje, te riri ka gele ka-ani le de."

¹⁴ Fū Pawülü ayia arü tikpi ta de ni lügü ngü, fū Galiyo ayia akolo ngü gögömö na, gü ba, "De-yi, wü di engā Yisarayeale, yi je la ngü te ma ele amala fü yi ne. Te yi ena akoro ta de komoko ne engagira ra sene, teka siti ngü te engu mere la, de bane ma ti eyi aje ri yi. ¹⁵ Amba ngü ne, ah teka ngü ka iri wü me, bete gele ka-yi, ka wü di engā Yisarayeale. Te di bala ne, ah le de yi reke ngü ka-yi la me-yi esüka yi. Nda-ra, ma le ari gbü wü ngü de bala nda-ra de."

¹⁶ Fū ah ayia aliki ewü sela asidi.

¹⁷ Tekā ngü la, fū wü kpara ka Korinito ayia azinga eküte wü di engā Yisarayeale. Fū ewü atī te Sosotene te di de mere kpara ka kambü ka biti-te ka wü di engā Yisarayeale ne, amī engu ciki engagira Galiyo sela. Fū Galiyo ayia afü tarinzö ye fū ewü. Ah fi nga ngü ka-ewü, te ewü ngbü emī Sosotene di, la kpaah de.

¹⁸ Fū Pawülü adu angbü gbü Korinito sela, de wü *kpara ka Yesu, teka mere bi sikipi. Gbü gara sikipi, fū Pawülü ayia ato mandī fū ewü, teka adu agba ye, agbü Atiyokiya, te di gbü tō ka Siriya.

Ngü ka dudu ka Pawülü agbü Atiyokiya

Fū Pawülü ayia gbü Korinito sela, de wü Pirišila ake Akuwila, anü akoro agbü Kekureya, teka agiri *zabu, te ena aza ani, anü di agbü tō ka Siriya. Te wüh di la agbü Kekureya kpala ne, fū Pawülü ayia adürü su-nzö ye, angü ah kina ta kina fū Me,* gü ba, ni ena anü ato la'bi fū Me agbü Yerüsalema. Fū ewü amaka zabu sela, ayia anü di, zalü akoro agbü Efeso.

¹⁹⁻²¹ Te wü Pawülü koro tete agbü Efeso, fū engu ayia ari kpa *esambü ka biti-te ka wü Yisarayeale de kpala. Fū ah akpo da emala ngü ka Yesu fū wü kpara kpala. Fū wü kpara la ayia ayi-tata, teka de engu ngbü mba kpaka ani sela, teka bi sikipi. Amba Pawülü le bala de, angü fingangü kaka gü ba, ah le de ni koro agbü Yerüsalema feke, teka areke ngü ka kina ka-ni la. Fū ah ayia ato mandī fū ewü, gü ba, "Te Me le la, ni ena adu akoro kpaka wü sidi." Fū Pawülü ayia amaka gara zabu sela, anü sü di agbü Siriya. Fū

wü Pirišila ake Akuwila ayia angbü nda-wü ciki gbü Efeso sela.

²² Fū Pawülü ayia anü akoro agbü Kayisariya. Fū engu ayia akö gbü zabu sela, teka anü ato mandī fū wü kpara ka Yesu agbü Yerüsalema. Fū ah adu ayia sela, anü sü agba ye, agbü Atiyokiya.

²³ Sidi nga ngü la mba cükü'daye, fū ah adu ayia kpaah gbü Atiyokiya sela, teka anü andoro gbü tō ka Galatiya bete nda Firigiya. Fū ah angbü eri wü kpara ka Yesu, da eto wazi fū ewü gbü wü sü la 'buru.

Dene ngü ka Apolo agbü Efeso

²⁴ Gbü wü sikipi la, fū gara engā Yisarayeale de iri ye Apolo ayia akoro agbü Efeso. Wüh bi engu ta agbü Alekezandariya. Engu ta de kpara te wu da ero mö ereke areke. Kpaah bala, engu wu ngü gbü *Ngari Me reke kpaah areke. ²⁵ Ah wu ngü ka Yesu kpaah kpo. Fū ah angbü eri wü kpara de ngü ka Yesu la ereke kpaah areke. Amba ah wu ngü ka *Nzila Wazi Me mbi mbi de. Ngü ka *babatiza te engu wu, ka-ye bü mene babatiza, ta te *Yüwane ngbü eto fū wü kpara ne.

²⁶ Gbü gara sikipi, Apolo ngbü kpaah emala ngari Me fū wü kpara, gbü *kambü ka biti-te agbü Efeso kpala. Fū wü Pirišila ake Akuwila ayia aje ngü kaka-na la. Fū ewü ayia aza engu, anü di kpa gba wü, teka amala ngü ka Yesu fefe na tine mbi mbi mbi.

²⁷ Fütanga ngü la, fū Apolo ale de ni nü agbü tō ka wü *Giriki, amala ngü ka Yesu kpala. Fū wü kpara ka Yesu de gbü Efeso la ayia ale ta-ngü tete gbü ngü la. Fū ewü ayia aba köcökpa, ato fü wü kpara ka Yesu de agbü tō ka wü Giriki la, de wüh za engu gbü mürü, baka zu kpara ka Miri Yesu.

Fū Apolo ayia anü sü agbü Korinito, te di gbü tō ka wü Giriki. Te engu koro agbü Korinito kpala, fū ah akpo da eto wazi fū wü kpara, de te ewü to maguma wü eyi fū Yesu, teka *züka maguma ka Me ne. ²⁸ Fū wü Apolo angbü da ega yiki de wü di engā Yisarayeale de kpala, esüka bi wü kpara. Fū ah angbü eza ngü gömö ewü 'buru ka, de kpeke wü ngü te engu ngbü emala, gü ba, "Fanü fanü, Yesu de *Kurisito te Me tima engu füh kotö ne, teka aküwa wü kpara 'buru."

19

Dene ngü ka Pawülü agbü Efeso

¹ Te Apolo ngbü eto ngari Me tete agbü Korinito ne, dela o Pawülü ngbü nda-ye la fi bü da endoro gbü tō ka Galatiya bete Firigiya. Fū ah ayia kpala, anü akoro agbü

* 18:18 18:18 Gbü gele ka wü Yisarayeale, te mü kina kina, gü ba, ni ena ato la'bi fū Me la, mü ena adürü su-nzö mü asidi.

Efeso, amaka wü gara kpara ka Me kpala. ² Fū ah amala ngü fū ewü, gü ba, “Ta te wü fū maguma wü tete ne, wü maka *Nzila Wazi Me eyi?” Fū ewü alügü ngü, gü ba, “A'a, ani je nga ngü ka Nzila Wazi Me nda-ani la de.” ³ Fū Pawülü ayi-ta ewü, gü ba, “Te di bala, wü za *babatiza, neh baye baye?” Fū ewü alügü ngü fefe, gü ba, “Wüh to babatiza fū ani baka nda *Yüwane tane.” ⁴ Fū Pawülü ayia amala ngü fū ewü, gü ba, “Yüwane ngbü ta eto babatiza fū wü kpara teka asere, gü ba, wüh fū maguma wü eyi. Yüwane mala kpah fū wü di engä *Yisaraye, gü ba, ‘Ah le de wüh le ngü ka kpara, de te Me ena atima engu sidi nga ni ne.’ Kpara engu la, ah de Yesu.”

⁵ Te wü kpara la je ngü de te Pawülü mala la, fū ewü adu ato babatiza fū ewü te iri Miri Yesu. ⁶ Fū Pawülü ayia ao kpa ye gbü nzö ewü. Fū Nzila Wazi Me akoro ari emaguma ewü, ato wazi fū ewü. Fū ewü akpo da ero mö gbü wü ganzi mö, te wüh je ngü gbügbü na de, da emala ngari Me baka wü *mürü dofo. ⁷ Wü kpara la, wüh baka wü komoko nzüka de fūh ye 'basu.

⁸ Fütanga ngü la, fū Pawülü akpo da eri kpa *esambü ka biti-te ka wü di engä Yisaraye, angbü eri wü kpara de ngü ka Yesu kpekpeke, gü ba, “Yesu de Miri te Me tima engu teka aküwa ani.” Ah ngbü mere ngü la bala teka fe bata, fū gara wü di engä *Yisaraye la adu ale ngü ka Yesu, te engu ngbü emala fū ewü la. ⁹ Amba gara wü di engä Yisaraye la, nzö ewü ka-ye kpekpeke, wüh le ngü ka Yesu la nda-wü de. Fū ewü angbü emala bi wü siti ngü teka ngü ka Yesu la, gbü jia wü bu wü. Tekä ngü la, fū wü Pawülü ayia de wü kpara, te ewü le ngü ka Yesu la, ace *kambü ka biti-te ka wü di engä Yisaraye la. Fū ewü akpo angbü ebite te-wü agba gara komoko de iri ye Türanü. Fū Pawülü angbü eri ewü de ngü ka Yesu kpala te nga sikipi 'buru, kpah de wü *ganzi kpara, te ewü le adi eje ngü la gögömö na ne. ¹⁰ Ah ngbü mere ngü la sela bala teka re 'basu. Tekä ngü la, fū bi wü kpara, te ewü ngbü gbü tö ka Asiya, wü di engä *Yisaraye de wü di engä *Giriki ne, ayia aje ngü ka Yesu gömö Pawülü areke areke.

Dene wazi ka Me te Pawülü mere kpeke ngü di agbü Efeso

¹¹ Gbü wü sikipi la, Me ngbü to ta wazi fū Pawülü fa sü, fū ah angbü emere wü kpeke ngü. Fū komö wü kpara angbü

egu kaka-na 'buru agu. ¹² Wü gara ne, te wüh za bü mba bongo* ka Pawülü, nü di, to fū wü mürü keke la, fū wü keke ka-ewü la angbü enza. Anga te ah di de *siti wü di engä me, te ewü ngbü emere ewü me-wü la, fū ewü angbü kpah ece wü kpara, teka wazi ka Me gbü bongo la.

¹³⁻¹⁴ Wü gara wü di engä *Yisaraye la ladü lorozi. Wüh ta 'buru wü di gara *mürü gele ka wü Yisaraye, de iri ye Sekeva. Fū ewü angbü endoro gbü nga nzö sü la, da emala fū wü kpara, gü ba, ani ti eyi aliki siti wü di engä me guvu wü kpara. Te wüh je nga ngü de te Pawülü ngbü emere ne, fū ewü afi, gü ba, ani ena akpo kpah adi eliki wü di engä me de iri Miri Yesu, baka nda Pawülü. Fū ewü ayia amala ngü fū gara wü di engä me, gü ba, “Ani emala fū wü de iri Miri Yesu, te Pawülü ngbü emala ngü kaka ne, de wü koro guvu kpara ne asidi.” ¹⁵ Fū wü di engä me la alügü ngü fū ewü, gü ba, “Ani wü ngü ka Yesu kpo. Ani wü ngü ka Pawülü kpah kpo. Amba de-wü, wü nda-wü neh wü da?” ¹⁶ Fū komoko ta te wü di engä me ngbü emere engu ne, ayia ati te ewü, amimiki ewü, agbogbofo ewü 'duwa ba-neh-ene-la. Fū ah asösörö bongo eküte ewü 'buru anza ka. Fū ewü ayia akpe aküwa esasaka sela tine 'buru ngirimu, de wü ka eküte wü. ¹⁷ Fū wü di engä Yisaraye, de wü di engä *Giriki, ta te ewü ngbü engbü agbü Efeso ne, ayia aje ngü la. Fū cürü ayia amere ewü. Fū ewü akpo da ecu ngü ka Miri Yesu afa tine cu sü.

¹⁸ Fütanga ngü la, fū mere bi wü kpara, te ewü le ngü ka Yesu, ayia akoro, akpo da emala nga *siti ngü ka-wü, ta te wüh ngbü emere, gü ba, ani le eyi ace wü siti ngü la. ¹⁹ Mere bi ewü ta wü mürü rü, de wü mürü kuwa. Fū ewü aza wü rü ka-wü, kpah de wü buku† ka talara ngü ka-wü la, akoro di, acuru gbü jia wü kpara 'buru. Se-ngba wü buku de te wüh curu la fa ta sü.[‡]

²⁰ Dela wü kpeke ngü te Me mere agbü Efeso. Fū ngü ka Me angbü ega, da ebaya. Tekä ngü la, fū mere bi wü kpara ayia ato maguma wü fū Yesu. Fū ngü la angbü kpah eto wazi fū wü *kpara ka Yesu, fū ewü angbü erü kpekpeke.

²¹ Fütanga wü ngü la, fū *Nzila Wazi Me ayia amala ngü emaguma Pawülü, de engu nü ndoro agbü tö ka Makedoniya bete nda *Giriki, de ah nü sü kpah agbü Yerüsalema. Te di bala, fū Pawülü adu afi,

* **19:12** 19:12 Bongo ka Pawülü la, ah de bongo te engu ngbü ei te nzö ye, anga etadu ye da emere tima di ne.

† **19:19** 19:19 Wü buku la, wüh ba wü si-ngü de riri ka gele ka wü gara rü gbügbü na, kpah de wü ngü te mü ena asama rü la di.

‡ **19:19** 19:19 Ah baka jiasse kutu teke 'basu nzüka (50,000). § **19:21** 19:21 Mü ena amaka ngü la gbü buku ka Ruma 15:22-32.

gü ba, "Te ni nü eyi agbü Yerüsalema la, ah le de ni nü sü agbü *Rüma." § 22 Te di bala, fü ah ayia atima wü Timoteyo ake Ereseto, te ewü di de wü kpara, te ewü ngbü ele tangu tete gbü tima ka Me ne, de wüh nü agbü Makedoniya. Fü engu ayia angbü nda-ye la mba takü gbü Efeso sela, gbü tö ka Asiya.

Dene ngü te Demetiriyo mere agbü Efeso

²³ Fütanga ngü la, fü wü kpara ka Efeso ayia akpo aso mere ngü, da eba rere de gü, teka ngü ka Yesu. ²⁴ Angü gara mürü boro ta ladü de iri ye Demetiriyo. Engu ngbü ta emi wü kuru e gbü se, gü ba, ah de kuru me ka-ani, te di de me würüse, de iri ye Aritemisi. Wüh ngbü ta emaka mere bi jiasse gbü tima ka-wü la, de wü bu ye. ²⁵ Gbü gara sikpi, fü Demetiriyo ayia ai wü *mürü tima ka-ye abiti, kpah de wü gara wü bu ye, te ewü ngbü emere tima la de ewü ne 'buru. Fü ah amala ngü fü ewü, gü ba, "De-wü deyí, wü wu 'buru kpo, gü ba, ani ngbü emaka jiasse ka-ani, gbü wü kuru me Aritemisi, de te ani ngbü emi ne. ²⁶ Titine, wü je ngü, de te komoko de iri ye Pawülü, ngbü emala ne eyi. Engu gü ba, wü kuru e, de te ani ngbü ereke de kpa ani ne, ah de wü e, de te wü kpara ena angbü egbo nganga na, ne de. Te di bala, ah fiti mere bi wü kpara eyi de ngü ka-ye la. Angü ngü la wü eyi gbü Efeso sene, kpah gbü nga nzö sü ka Asiya ne 'buru. ²⁷ Teka ngü la, e-wu neh da, wü kpara ena aceka wü kuru e, de te ani ngbü emere ne, ba töndö e, fü ewü adu ace da ese. Wü gara ne, wüh ena adu akpa ngü mere kambü ka me Aritemisi ka-ani de sene ne, gü ba, ah ka-ye kükürü e. Amba ah le de wü kpara ka Asiya, de wü kpara gbü gara tö 'buru, di ecu ngü me ka-ani, Aritemisi la!"

²⁸ Te wü kpara la je ngü la bala, fü maguma ewü ayia anzu. Fü ewü akpo da eba rere, gü ba, "Me ka-ani, Aritemisi ne, ka-ye kpekpeke fa wü gara me 'buru!" ²⁹ Fü wü kpara gbü köti la aci 'buru, azinga, da eba rere de gü. Fü ewü ayia azoro wü Gayü ake Arisitarekü, te ewü di de wü kpara ka Makedoniya, te ewü ngbü endoro de wü Pawülü ne. Fü ewü azoro ewü gö! angbü egbeke ewü de woro, enü di agbü mere sü ka biti-te ka-wü.

³⁰ Te Pawülü je ngü la tete, fü engu ale ta de ni nü, ni mala ngü fü bi wü kpara, de te ewü biti te-wü la. Amba wü gara kpara ka Yesu du tiri engu ta me-wü. ³¹ Kpah bala, wü gara cögbörö kpara ka köti la, ta te ewü di de wü awuba ye Pawülü ne, ayia atima ngü fefe, gü ba, engu nü kpala de. Teka ngü la, Pawülü du nü ta de.

³² Fü wü kpara la alala fi bü te rere ka-wü la, gbü sü ka biti-te kpala. Fü ewü angbü emala wü ngü gömö wü 'buru kpikpi ye kpikpi ye. Teka ngü la, wü kpara ti awu si-ngü la mbi mbi de, anga wüh biti te-wü sela neh teka ne ya? Angü wüh ngbü 'buru bü da eba rere, da emala wü ngü faaa! ³³ Te di bala, fü cürü ayia ari te wü di engu *Yisaraye. Fü ewü ayia afe gara kpara de iri ye Alekezanda, de ah nü, ah rü engagira mere bi wü kpara la, de ah mala ngü ka-ani fü wü kpara la. Gbü ngü la, fü Alekezanda ayia arü tikpi, amere kpa ye fü wü kpara la, de wüh nga anga, teka de ni mala ngü fü ewü mbi mbi mbi. ³⁴ Amba baka te wü kpara la wu 'buru kpo, ga, engu kpah de engu Yisaraye, te le ngü ka Aritemisi de ne, fü ewü akpo da eba rere, da emala ngü, gü ba, "Me ka-ani, Aritemisi ne, ka-ye kpekpeke fa wü gara me 'buru!" Fü ewü angü eba rere, da emala ngü la bala teka lö-ra 'basu.

³⁵ Fü mere kpara ka Efeso la ayia akoro amala ngü fü ewü kpekpeke, de wüh nga anga. Te wüh nga tete, engu gü ba, "De-yi, wü kpara ka Efeso, kpara ka kpara wu kpo, gü ba, mere kambü te wü kpara ngbü egbo nga Aritemisi gbügbü ne ladü gba nih, gbü Efeso sene. Yi wu kpah kpo, gü ba, da ka me, Aritemisi, ta te ti kü agbü kpi ne, ah kpah bü ladü esüka nih sene. ³⁶ Angü gara kpara te ena aga yiki gbü ngü la nda ma! Te di bala, ah le de yi nga anga tii. Yi mere e adi emere wü ngü bü 'daaa bala ne de. ³⁷ Teka ngü ka wü komoko de 'basu ne, wüh zi e esambü ka me kanih de. Wüh fala me ka-nih, Aritemisi ne, kpah de. Yi zoro ewü koro di sene, neh teka ne? ³⁸ Te di bala, te wü kpara la mere siti ngü fü wü Demetiriyo, de wü bu ye la, ah le de wüh koro de ngü ka-wü la engagira miri, gbü sikpi, te engu o, teka adi ekolo ngü gbügbü na ne, de wüh sere ngü la fefe te züka kaje. ³⁹ Anga te yi le amere gara ngü teka ngü ne la, ah le de nih i wü kpara ka köti ne 'buru, de wüh biti te-wü teka aje si-ngü la mbi mbi mbi, fü ewü akolo ngü gbügbü na. ⁴⁰ Amba ngü de te yi zinga di enatikine ne, ma le ngü la nda-ra de! E-wu neh da, gara kpara ena anü amala nga ngü la fü mere miri ka wü *Rüma, te ngbü gbü nzö nih ne. Si-ngü de te yi ngbü emere ne nda ma. Ah ka-ye bü töndö ngü kükürü. Te wüh yi-ta nih la, ngü de te nih ena alügü mbi bane ne, ena adi kpah ma."

⁴¹ Te mere kpara ka köti la mala ngü ka-ye nza tete, fü ah ayia amala ngü fü wü kpara la, de wüh baya sela asidi, go agba wü.

Dela ngü ta te mere te-ye agbü Efeso.

20

Dene ngü ka ndoro ka Pawülü agbü Makedoniya bete tö ka wü Giriki

¹ Fütanga ngü ka rere te mere te-ye agbü Efeso la, fü Pawülü ayia abiti wü *kpara ka Yesu de gbü Efeso la 'buru. Fü ah arí ewü de wüh i maguma wü, arü kpekpeke sisi nga ni, gbü tima ka Me. Fü ah agü mandí fü ewü, ayia ale kaje, anü sü agbü Makedoniya. ² Fü engu agbü endoro agbü Makedoniya, da eto wazi fü wü kpara ka Yesu kpala, kpa da erí ewü de mere bi wü ngü gbü *Ngari Me.

Fütanga ngü la, fü Pawülü ayia ace Makedoniya, anü akoro agbü tö ka wü *Giriki. ³ Fü ah agbü agbü tö ka wü Giriki kpala teka fe bata. Fütanga fe bata la, fü ah ale ta de ni guru sü de *zabu agbü Siriya de, 'duwa fü ah ayia aje nga gara wü di enga *Yisarayeke kpala, gü ba, wüh ngbü efete engu te kaje la. Teka ngü la, fü ah ayia alügü nga ye, adu agbü Makedoniya, de lö ye.

⁴ Wü kpara ta te wüh ngbü egi nga Pawülü ne, ah de wü Süpatere ye Pira, te di de kpara ka Bereya, bete Arisitarekü ake Sekundu, te ewü di ka-wü wü kpara ka Tesalonika, bete Gayü ake Timoteyo, wü kpara ka Derebe, be kpahe te Tikiko ake Torofimü wü kpara ka Asiya. ⁵ Wü kpara la ti nda-wü engagira nü, anü aci nga a agbü Türüwa. ⁶ Amba nda-a ake Pawülü, a nü sü agbü Filipoji. Fü a azü *Karama ka Pasika kpala. Fütanga sikipi ka Pasika la, fü a ayia alí gbü *zabu, anü, anü, teka sikipi 'buruve. Fü a anü akoro agbü Türüwa, amaka te-a de wü bu a kpala. Fü a angbü de ewü gbü Türüwa sela, teka sikipi lorozi.

Dene ngü te Pawülü mere agbü Türüwa

⁷ Ah te ekoro gbü *sikipi ka Me, eta-murago, fü a abiti te-a de wü *kpara ka Yesu agbü Türüwa kpala, teka azü zü-e ka Me. Fü Pawülü ayia akpo emala ngari Me fü a. Fü ah aro mö fü a baaala, zalü akoro etü biti. Ah mere ngü la bala, angü ah ngbü efi, gü ba, ni ena ayia gügü kpurutokokpi, anü sü ka-ni. ⁸ Kambü ta te a biti te-a gbügbü ne, ah ngbü ga füh kiri ye kpa tikpi. Wüh siya ta mere bi lamba kpa esambü la, teka de ah lofo sü. ⁹ Gara jaji komoko ta ladü kpala, de iri ye Yutiko. Ah ngbü ede görö ka kambü kpa tikpi la. Pawülü, mü ce mö nda-mü fi de. Fü ra ayia azoro jia mbarase la, fü mü ayia kpa gbü eabata kambü kpa tikpi la, atü gbüü! kpa kötö. Wüh te enü, ae engu tikpi ne de, gbülüküsü! Mbarase la kpi eyi!

¹⁰ Te Pawülü wu bala, fü ah ayia akö kpa kötö kpala, anü ara abuka füh kö mbarase la, afaka engu, amala ngü fü wü kpara, gü

ba, "Baye? Yi eku gba teka ne? Yi kpe cürü de. Mbarase ne kpi nda de!"

¹¹ Fü Pawülü alí, alügü nga ye, adu kpahe kpa esambü, aza ambata akukuru, fü ewü azü de wü kpara la. Fü Pawülü adu angbü kpahe eto ngari Me fü wü kpara la, zalü koro di emözekpi. Kpurutokokpi la, fü engu ayia sela, anü sü ka-ye.

¹² Fü ewü ayia aza jaji komoko, te Pawülü zükü engu gbü kpi ne, adu di kpa eköti. Angü ah zükü gbü kpi eyi fanü fanü. Fü ngü la ato mere wazi fü wü kpara ka Yesu la 'buru.

Dene ngü ka nünü ka-a agbü Mileto

¹³ Fütanga ngü la, fü Pawülü amala ngü fü a, de a li nda-a gbü *zabu, anü kpa engagira nü agbü Asosa. Angü de-ni, Pawülü, ni ena anü nda-ni de lö ni, amaka a kpala. ¹⁴ Te Pawülü nü maka a agbü Asosa, fü a aza engu gbü zabu, teka anü ara agbü Mitilene. ¹⁵ Kpurutokokpi la, fü a ayia gbü Mitilene de zabu, anü akoro agbü Kiyö, ara kpala. Fü kpi aseke, fü a ayia gbü Kiyö sela, anü akoro agbü Samose, ara kpala. Kpurutokokpi la, fü a adu ayia gbü Samose sela, anü akoro agbü Mileto. ¹⁶ Angü Pawülü gü ba, ni ena anü mbümbi, teka fü ni akoro kere agbü Mileto. Ni le afü agbü Efeso de, angü kaje la ena aza mere bi sikipi. Ni le anü bala, teka fü ni akoro agbü Yerüsalema kere, o mere sikipi ka tari-e, de te wüh ngbü ei *Karama ka Petekosita ne, koro la de.

Dene adu ngü ka Pawülü fü wü kpara ka Yesu agbü Efeso

¹⁷ Te a nü koro tete agbü Mileto, fü Pawülü ayia atima ngü fü wü *kovo gbü tima ka Yesu agbü Efeso, de wüh yia kere, akoro kpaka ni gbü Mileto sela.

¹⁸ Te wü kovo ka Efeso la koro tete kpaka a, fü Pawülü arü amala fü ewü, gü ba, "Wü di enga wüna, yi wu ngü ka-ra eyi kpo. Akpo gbü sikipi te ma koro tete esüka yi, gbü tö ka Asiya sene, ¹⁹ ma ngbü emere tima ka Miri Yesu baka labi kaka. Ma o te-ra baka mere kpara nda-ra de. Ma ngbü ta de mere fingangü emaguma ra, fü ra amaka kpahe mere cinga, teka ngü ka wü bu ra, wü di enga *Yisarayeke, te ewü le ngü ka Yesu de ne. Angü wüh ngbü fi bü da egiri mani teka amere siti ngü fere. ²⁰ Te di bala, yi wu kpahe eyi, gü ba, ma kpe cürü wü ngü la nda-ra de. Ma ngbü fi bü da erí yi de ngari Me. Ma ngbü emere ngü la gbü jia wü kpara 'buru, kpahe agba yi biri biri 'buru. Ma cere mba ngü biringbö te yi nda-ra de. ²¹ Ma ngbü emala ngü la mbölö fü wü di enga Yisarayeke, kpahe fü wü *ganzi kpara, gü ba, ah le de wüh ce *siti ngü ka-wü, wüh du, wüh je ngü ka

Me. De wüh to kphah maguma wü fü Miri ka-nih Yesu Kurisito.

²² Wü di engä wüna, dene ngü te ma ele asere fü yi enatikine. Ma ngbü enü agbü Yerüsalema dene, angü *Nzila Wazi Me mala ngü la fere me-ye. Amba ngü de te ena amere ra de kpala ne, ma wu nda-ra de. ²³ Ngü de te ma wu, ah dene. Gbü wü mene köti 'buru, de te ma ngbü ekoro gbügbü ne, Nzila Wazi Me ngbü emala fere, gü ba, te gara wüh ena angbü ei ra gbü ku, da eto mere cinga te ra. ²⁴ Amba gbü jia ra, te ma ena akpi, ah ba mere ngü de. Angü, te ma ena amere tima, de te Miri Yesu to fere ne areke areke, zalü akoro di gbü adu sikipi ka-ra la, ngü ka kpi mere e de. Angü Yesu le de ma mala ngü ka-ni fü wü kpapa 'buru, gü ba, Me ena aküwa ewü teka *züka maguma ye.

²⁵ Ma ngbü ta endoro esüka yi sene, da emala ngü ka Yesu, te Me tima engu Miri ka-nih ne. Amba titine, ma wu eyi, ga, yi ti adu awu ra tine de. ²⁶⁻²⁷ Ma sere kaje te Me ena aküwa wü kpapa gbügbü, teka ngü ka Yesu ne, eyi 'buru fü yi. Ma cere mba ngü biringbö te yi nda-ra de. Teka ngü la, ma ngbü emala fü yi enatikine dene zu ngü. Te biri kpapa esüka yi ce ngü ka Me, fü ah akpi gbü dürü ngü ka-ye la, ah de ngü kaka. Ah de ngü ka-ra nda tine de, angü ma sere ngü la eyi fü yi.

²⁸ Te di bala, yi ceka te-yi mbi. Yi ceka kpi kphah sidi nga wü bu yi, wü *kpapa ka Yesu ne. Angü Nzila Wazi Me o yi eyi ba mere kpapa gbü nzö ewü, ba wü kpapa, te ewü eceka kpi sidi nga wü kambiliki. Angü Me se wü kpapa la eyi cu de *ngüte Ye ye, Yesu Kurisito. ²⁹ Ma wu eyi, gü ba, sidi nga ra, gara siti wü kpapa ena akoro kpapa yi, baka siti wü nü, agiri kaje teka asiti fingangü ka wü kpapa ka Yesu, de siti riri. ³⁰ Kphah bala, gara wü kpapa ena ayia cu esüka yi, adi efiti wü bu wü, de wüh ce ngü ka Yesu, du le siti riri ka-ani la. ³¹ Te di bala, yi ceka te-yi mbi, da efi nga ngü ta te ma ngbü eri yi di ne. Angü teka re bata, ma ngbü ta eri yi de ngari Me, cu de ngura, ra de biti mini, teka de yi lala gbü ngü ka Me de maguma yi biringbö.

³² Enatikine, ma ngbü ece ngü ka-yi esaka Me, de ah ceka kpi sidi nga yi me-ye. Ma emala fü yi, gü ba, ah le de yi ngbü da eje ngü kaka, angü ah to ngü la fü yi de züka maguma ye. Angü ngü ka Me la ena ato wazi fü yi, fü ah aküwa yi fi mere badi.

³³ Nda-ra, ma mere siti ngü fü yi 'buru 'dö de. Ma ngbü ta de güümü wü e ka-yi kphah de. Kpapa biringbö esüka yi de jiaše, anga bongo ka-ye, esaka ra nda ma. ³⁴ Yi

wu eyi kpo, gü ba, ma ngbü ta emere tima cu de kpa ra dene, teka amaka wü e di fere, be kphah te wü kpapa de te a ngbü endoro de ewü ne. ³⁵ Ma ngbü mere tima kpekpeke bala, teka asere fü yi mbölö, ga, ah le de yi mere tima kpekpeke kphah baka nda-ra, teka fü yi amaka wü e fü yi, kphah teka ale ta-ngü te wü mürü cinga di. Kphah bala, ah le de yi fi nga ri Miri ka-nih Yesu Kurisito, ta te mala fü nih, gü ba, 'Tadu ka kpapa te eto e, fa nda mene kpapa, te wüh ngbü eto e fefe na.' "

³⁶ Te Pawülü mala ngü la nza tete bala, fü ewü aci 'buru, abu nzökuta wü kötö, aku gba fü Me. ³⁷ Sidi nga ngü la, fü ewü ango 'buru de mere gba, da etiti eküte Pawülü, da efaka engu, teka ato adu mandí ka-wü fefe na. ³⁸ Ngü te to mere cinga fü ewü, ah de ngü ka Pawülü, te engu mala fü ewü, gü ba, "Wü ti adu awu ni tine de ne."

Fü wü kpapa ka Efeso la ayia agü nga Pawülü, zalü akoro di kpa era ngu. Fü a ali de wü Pawülü gbü *zabu anü sü agbü Yerüsalema.

21

Dene ngü ka nünü ka Pawülü agbü Yerüsalema

¹ Baka te a ce wü kpapa ka Efeso la tete, fü a ali gbü *zabu, anü akoro agbü Kose, ara kpala. Kpurutokokpi la, fü a ayia sela, anü akoro agbü Rode. Fü a ara sela. Fü kpi aseke, fü a ayia agbü Rode sela, anü akoro agbü Patara. ² Fü a ace zabu la kpala, amaka gara zabu, te ngbü enü agbü Tera.* Fü a ayia ali gbügbü, anü sü. ³ Fü a anü, anü, anü, akoro gbamari ede Kupuriyo. Fü a ace Kupuriyo gbü kamisi, ale kaje, anü agbü Siriya. Fü a anü akoro agbü Tera, akö gbü zabu la kötö, angü wüh yia ekö wü e de gbügbü na la sela.

⁴ Fü a ara gbü Tera sela, teka sikipi lerozi, angü a koro maka wü *kpapa ka Yesu te ewü di kphah ladü sela. Fü *Nzila Wazi Me amala ngü fü Pawülü gömö gara wü kpapa la, gü ba, ah le de engu nü agbü Yerüsalema de, angü siti ngü nü amere engu kpala. Amba Pawülü le ngü la bala nda de.

⁵ Fütanga sikipi lerozi la, fü a ayia sela teka anü sü agbü Yerüsalema. Dela de, fü wü kpapa ka Yesu la ayia akö te-wü 'buru, de wü wara wü, bete wü jaji, anü agü nga a kpa eküte ngu kpala. Te a nü koro de ewü kpala, fü a abu nzökuta a kötö, aku gba fü Me era ngu sela. ⁶ Te a gü mandí esüka a 'buru nza tete, fü a aye süka a de ewü, wüh te ego nda-wü kpa gba wü, fü a ali nda-a gbü *zabu, anü sü.

* 21:2 21:2 Tera de mere köti gbü tö ka Fonisiya.

7 Fū a ayia gbü Tera sela, anü akoro agbü Potolemayi. Fū a anü ato mandí fū wü di engu ni a, wü kpara ka Yesu, de sela ne. Fū a angbü de ewü teka sikpí biringbó. 8 Te kpí seke tete, fū a ayia aza nū sela balaaa, zalü anü akoro agbü Kayisariya. Fū a anü ara agba *Filipo, te ngbü emala ngü ka Yesu fū wü kpara de kpala ne. Filipo engu ne, ta kphah biri kpara esüka wü kpara lorozi, ta te wüh fe ewü, teka ale ta-ngü te wü *mürü tima ka Yesu ne.† 9 Ah ta de wü di ye bala, 'buru wü jaji würüse, te Nzila Wazi Me ngbü emala ngü gömö ewü, baka wü *mürü dofo ta gügü ne. 10 Fū a angbü gbü Kayisariya sela, teka mere bi sikpi.

Fütanga ngü la, fū gara mürü dofo ka Me, de iri ye Agobo, ayia agbü tö ka *Yudaya akoro sela. 11 Fū ah anü akoro kpaka a, kpa gba Filipo kpala. Fū ah ayia aza ku ka Pawülü, te engu ngbü ei etadu ye ne. Fū ah ayia ai wü lö ye de wü kpa ye di, amala ngü, agü ba, "Dene ngü te Nzila Wazi Me ele asere fū wü. Kpara de te ni za ku de etatadu ne, wü di engu *Yisaraye ele ena azoro engu agbü Yerüsalema, ai engu kphah bala, ato engu fū wü di engu *Rüma."

12 Te a je ngü la bala, fū sū asiti te a. Fū a ayia, de wü kpara ka Yesu de agbü Kayisariya ne 'buru, enda'ba te a fū Pawülü, teka de ah mere e anü agbü Yerüsalema tñe de. 13 Fū Pawülü ayia alügü ngü fū a, gü ba, "Baye? Yi ngbü eku gba da eto cinga emagama ra de bala teka ne? De-ra Pawülü, ma eyi nzo, teka azü cinga, teka ngü ka Yesu. Te wüh i ra gbü ku, anga te wüh le amörö ra amörö la, ma kpe cürü de!" 14 Fū a ambü de Pawülü teka ngü la ma, fū Pawülü afa a, aza ngü gömö a ka. Fū a adu amala tñe bü fefe, gü ba, "Wayi, ngü de te Me ele amere fū ye, ah mere tñe emere."

15 Fütanga ngü la, fū a ayia areke te a, adu ace wü Filipo, teka anü sū agbü Yerüsalema. 16 Fū wü gara kpara ka Yesu gbü Kayisariya la ayia agü nga a, anü di agba gara komoko de iri ye Minasüna, kpara ka Kupuriyo, te to maguma ye fū Yesu ta gügü. Fū a anü ara kpala, angü gba ka kpa etungba, te kaje ka Yerüsalema.

Dene ngü ka Pawülü de wü kovo ka tima ka Yesu

agbü Yerüsalema

17 Te a nū koro agbü Yerüsalema, fū wü di engu ni a, wü *kpara ka Yesu de kpala ne, aza a de tadu afa sū.

18 Te kpí seke, fū a ayia de wü Pawülü anü agba *Yakobo, engu ni ye Yesu, angü engu de mere kpara gbü nzó wü *kovo gbü tima ka Yesu gbü Yerüsalema sela. Fū

wü bu ye na abiti te-wü kphah 'buru kpala. 19 Fū Pawülü agü mandí fū ewü. Fū ah ayia akpo angbü emala nga wü ngü, de te Me ngbü emere fū ye, gbü tima ka-ye, ka Me, esüka wü *ganzi kpara ne 'buru.

20 Te wü mere kpara la je ngü de gömö Pawülü ne, fū ewü angbü de tadu, da egbo nga iri Me. Fū ewü adu afü te-wü, amala ngü fū Pawülü, gü ba, "Wayi, engu ni ani, ye wu eyi, gü ba, mere bi wü di engu *Yisaraye ele to maguma wü eyi fū Yesu, gbü tö ka *Yudaya sene. Wüh ngbü eyi 'buru emere wü *Riri, ta te Me to fū ani esaka *Müse ne, mbi mbi mbi, ereke areke. 21 Amba wü gara kpara ngbü esu wu eküte ye, gü ba, ye le *Riri ka Müse nda-ye de. Fū ye angbü eri wü di engu Yisaraye ele, te ewü ngbü gbü tö ka wü ganzi kpara ne, gü ba, wüh ce da emere wü riri ka gele kani la ace. Wüh mere e agü wü jaji ka-wü esa *basa kphah de. Fū ngü la angbü eke te ewü efa sū. 22 Titine, ani ena amere baye, te wü kpara la ena aje, gü ba, ye koro eyi sene la? 23 Te di bala, ngü te ani ena amala fū ye titine, ah ele de ye mere bala, teka areke fingangü ka-ewü, fū ewü awu, gü ba, ye ce Riri ka Müse nda-ye de. Angü gara wü di engu Yisaraye ele ladü sene bala, te ewü ngbü *e'bi te-wü, da eku gba fū Me. 24 Titine, sikpi te wüh ena adürü nzó wü gbügbü ti eyi. Te di bala, ah le de ye nū de ewü kpa gbü *Mere Kambü ka Me, fū ye amere gele teka areke ngü ka-ye di. Fū ye ato jiasé me-ye, ase wü nū, te wüh ena awa fū Me, teka wü kpara bala la 'buru, bete ye, teka gele la. Fū wü adürü nzó wü tundu de ewü, teka ngü ka gele te wüh mere nza la. Te ye mere bala la, wü kpara 'buru ena awu, gü ba, ngü de te wüh ngbü emala eküte ye ne, ah ka-ye de wu, angü ye ngbü emere Riri ka Müse amere.

25 Amba teka ngü ka wü ganzi kpara, de te ewü to maguma wü eyi fū Yesu ne, ani to ta riri eyi fū ewü gbü köcökpa gügü, gü ba, 'Wüh mere e amere gele ka wü me ka wü kundu wü de. Wüh mere e amere waza de. Wüh zü ngüte wü nū kphah de. Wü nū de te wüh emörö ewü, da efüfuru ngürü ewü ne, wüh mere e azü kphah de, angü ah de ngüte gbü ye.' Amba fanü fanü, mere bi wü gara riri ka gele kani, wü di engu Yisaraye ele ne, wü ganzi kpara la ti ambü te-wü teka wü ngü la nda-wü de."

Dela ngü te wü mere kpara ka Yesu agbü Yerüsalema mala fū Pawülü. Fū Pawülü ayia ale ngü la.

Dene ngü te mere Pawülü etambasü Mere Kambü ka Me

† 21:8 21:8 Mü ena amaka ngü la gbü buku ka wü Mürü Tima ka Yesu 6:1-6.

gbü Yerüsalema

²⁶ Kpurutokokpí la, fú Pawülü ayia de wü kpara bala la, anü kpa etambasü *Mere Kambü ka Me. Fú ewü akpo da emere gele teka areke ngü ka-wü tundu de ewü. Fú Pawülü anü asere ngü la fú wü *mürü gele, gü ba, gele la ena anza sidi nga síkpí lorozi. Angü gbü síkpí la, wüh ena akoro de wü nü, teka fú wü mürü gele awa, teka anza ngü ka gele la di.

²⁷ Te síkpí lorozi la yia enza tete, fú wü Pawülü ayia anü kpa etambasü Mere Kambü ka Me. Fú gara wü di enga *Yisarayeale, te ewü koro agbü Efeso,[‡] ayia awu Pawülü kpa etambasü Mere Kambü ka Me kpala. Fú ngü la ake te ewü. Fú ewü akpo da eto ngü guvu wü bu wü. Fú ewü ayia aci 'buru atí te Pawülü, azoro engu,[‡] da eba rere, gü ba, "Akoo, wü di enga Yisarayeale! Yi go woro akine, ale ta-ngü te a! Komoko de te ngbü esiti iri nih, da esoko nih, wü di enga Yisarayeale, kphah da ekpa ngü *Riri ka Müse, bete Mere Kambü ka Me ka-nih ne, ah dene! Ah ngbü endondoro gbü wü nga nzö sü 'buru, da esiti nzö wü kpara de siti riri ka-ye la. Enatikine, ah koro kphah eyi sene! Ah za wü gara ganzi kpara, koro de ewü eyi etambasü Mere Kambü ka Me sene! Yi wu eyi, gbü ngü kaka de bala, ah ngbü ele asiti *nzila sü ka Me ka-nih dene!"²⁹ Wüh mala ngü la bala, angü wüh wu Pawülü te ewü ngbü endoro ake Torofimü, te di de kpara ka Efeso ne, gbü mere köti sela. Fú ewü afi nda-wü, gü ba, Pawülü za engu, ri di eyi kpa esambü ka Me. Fú ngü la ake te ewü afa sü. Amba ah ka-ye de wu! Pawülü mere ngü bala nda de.

³⁰ Fú rere ayia awü. Fú sü ayiki 'duwa ayiki. Fú wü kpara 'buru angbü ekpe enü gbü sü la. Fú ewü atí te Pawülü, azoro engu, agbeke kpa etanü, ani wü möngiti ka Mere Kambü ka Me la 'buru ani.³¹ Fú wü kpara la akpo da emimiki Pawülü, teka de ani mörö engu amörö asidi.

Fú mere kpara ka marajümiya ka wü *Rüma ayia aje ngü la, gü ba, wü kpara ka Yerüsalema 'buru kpo eyi da emere gü.³² Fú mere kpara la ayia bü 'duwa kere, aza wü marajümiya ka-ye, akpe de ewü agbü sü la. Te mere bi wü kpara la wu engu de wü marajümiya gbü nga ye, fú ewü ace da emí Pawülü.

³³ Fú mere kpara la akoro azoro Pawülü, amala ngü fú wü komoko ka-ye, de wüh i engu de wü nyari 'basu. Fú ah akpo da eyi-ta wü kpara la teka ngü ka Pawülü, gü ba, "Komoko ne neh da? Ah mere ne siti ngü ne?"³⁴ Fú wü kpara la akpo da eba rere

bü 'daaa. Gara ewü emala gara ngü. Gara ewü emala kphah gara ngü. Teká ngü la, mere kpara la tí aje si-ngü la mbi mbi de. Fú ah adu amala ngü fú wü komoko ka-ye, de wüh za Pawülü, nü di agbü sü ka wü marajümiya.

³⁵ Sü ka wü marajümiya la ka-ye ta kpa füh da. Te ewü nü koro de Pawülü te kaje, te wüh ngbü eli tete kpa tikpi kpala, fú mere bi wü kpara la adu azinga. Fú ewü akpo da egiri da wü, teka agbüwü Pawülü esaka wü marajümiya la de wazi, de ani mörö. Fú wü marajümiya ayia abí Pawülü esaka wü, angü wü kpara la ena amörö engu.³⁶ Fú mere bi wü kpara la alala fi bü gbü nga ewü, da eba rere, gü ba, "Wüh mörö engu amörö! Wüh mörö engu amörö!"

*Dene ngü te Pawülü mala engagira**wü kpara te ewü zoro engu ne*

³⁷ Te wü marajümiya la za Pawülü, nü koro di kpa etikpi kpala, fú Pawülü amala ngü fú mere kpara ka wü marajümiya la, gü ba, "Ni le ta amala ngü fú ye." Fú mere kpara la agüka, angü Pawülü mala ngü la gbü ngü *Giriki. Fú mere kpara la ayi-tata, gü ba, "Ye je ngü Giriki kpo?"³⁸ Ye neh da? Ye de enga *Ezepeto, ta te kpo de gü eküte ani, te kö bi siti wü kpara gbü nga ye kutu bala, (4,000) ari di agbü gü, ne de?"³⁹ Pawülü, gü ba, "A'a, ah bala de. Ni kani de enga Yisarayeale. Wüh bi ni ta agbü Tarasu.[§] Ni ngbü eyi-ta ye, de ye le fü ni, fü ni amala mba engu ngü fú wü kpara, te ewü le amörö ni ne."⁴⁰ Fú mere kpara la ale de engu mala ngü la.

Dela de, Pawülü, fú mü ayia arü tikpi füh da la, amere kpa mü fú wü kpara de wüh nga anga. Fú wü kpara la ayia anga 'duwa ngbüii! Fú Pawülü ayia akpo da ero mö fú ewü gbü ngü *Ebere, te di de mö ka-ewü, ka wü di enga Yisarayeale ne.

22

¹ Pawülü gü ba, "Wü di enga wüna, yi je la ngü de te ma emala ne."² Te wü kpara la je, gü ba, Pawülü ngbü ero mö fú ani, gbü ngü *Ebere, te di de mö ka-ani, wü di enga Yisarayeale ne, fú ewü adu anga tüne 'duwa anga 'buru ngbüii, eda güje wü kpakaka. Fú Pawülü adu amala ngü fú ewü, gü ba,³ "Ma zu de enga *Yisarayeale. Wüh bi ra ta agbü Tarasu,* amba ma ga cu gbü Yerüsalema sene. Kpeke e-gü-tamungü, de iri ye Gamaliyele ne, gü tamu ngü ta fere cu me-ye. Ah ngbü ta egü tamu riri ka gele ka wü kundu nih fere. Gümü

[‡] 21:27 21:27 Efeso de mere köti gbü tö ka Asiya. [§] 21:39 21:39 Tarasu de mere köti agbü tö ka Silisiya. * 22:3 22:3 Tarasu de mere köti agbü tö ka Silisiya.

ngü ka Me fa ta te ra sü, kphah baka nda-yi, te yi ngbü emere de enatikine ne. ⁴ Teka ngü la, fü ra angbü eto cinga te wü kpara, de te wüh ngbü efa nga Miri Yesu ne, efa sü, baka te ma ena amörö ewü amörö. Ma ngbü ta ezozoro wü komoko de wü wüüruse, te ewü le ngü ka Yesu ne, 'buru, egü agbü ku. ⁵ Mere kpara ka wü *mürü gele bete wü gara cögbörö *kovo ti eyi amala nga ra fü yi, gü ba, ngü la ka-ye fanü. Angü wüh to ta köcökpa esaka ra me-wü, teka fü ra anü di agbü Damaseke, azoro wü di engä Yisaraye, de te ewü to maguma wü fü Yesu ne, adu de ewü gbü Yerüsalema sene, teka ato kuru te ewü.

⁶ Baka te ma nü koro ghamari ede Damaseke, etü ra, fü ra awu gara e, te yia ci gbü jia ra baka ülele ka mügbara la. ⁷ Te e la ci tete gbü jia ra, fü ra ayia atí gbuuul kötö. Fü ra aje ri kpara, te ngbü emala ngü fere, gü ba, 'Sawula, Sawula, mü ngbü eto cinga te ra bala, neh teka ne?' ⁸ Te ma je ngü la, fü ra ayi-ta kpara la, gü ba, 'Mere kpara, mü de neh da?' Fü kpara la alügü ngü fere, gü ba, 'Ni de Yesu,† de te ma ngbü eto cinga tete na ne.' ⁹ Wü kpara de te a ngbü endoro de ewü ne, wu e de te ci ne eyi. Amba ri kpara de te ngbü ero mö fere ne, wüh je nda-wü de. ¹⁰ Fü ra ayi-ta ngü, gü ba, 'Mere kpara, ma ena amere baye?' Fü Miri Yesu amala ngü fere, gü ba, 'Ma yia eyia tikpi, ma nü agbü Damaseke, angü wü ngü de te ma ena amere ne, wüh ena asere fere 'buru kpara.'

¹¹ Teka e de te ci gbü jia ra gbele gbele ne, ma du ceka kpi tine de. Fü wü kpara, ta te a ngbü enü de ewü ne, azoro kpa ra, agbeke ra, anü de ra agbü Damaseke.

¹² Gara komoko ta ladü agbü Damaseke kpala, de iri ye Ananiya. Ah de kpara te le ngü ka Me, da eje wü riri kaka 'buru. Ah kphah de kpara, te wü di engä Yisaraye de kpala le ngü kaka fa sü. ¹³ Fü Ananiya akoro amaka ra, arü ghamari ede ra, amala ngü fere, gü ba, 'Sawula, engä wüna, jia mü ü te-ye eü.' Ah bü te emala ngü la enza de, bü 'duwa, fü jia ra aü te-ye, raaa! Fü ra awu engu. ¹⁴ Fü Ananiya adu amala kphah gara ngü fere, gü ba, 'Mere Me fe ra eyi. Te di bala, fü engu asere ngü, te engu le de ma mere ne. Ah fe ra kphah teka awu Miri Yesu, *E-küwa-nih, de jia ra, kphah teka eje riri na. ¹⁵ Kükürü de, angü ah le de ma ngbü emala nga Yesu fü wü kpara 'buru, baka ngü de te ma wu cu de jia ra ne.' ¹⁶ Fü Ananiya adu amala tine fere, gü ba, 'Ma ngbü eci nga ne? Ah le de ma yia eyia kere, ma ku kphah gba fü

Miri Yesu, de ah boro *siti ngü ka-ra. Fü ra aza *babatiza te iri na.'

¹⁷⁻¹⁸ Fütanga ngü la, fü ra ayia adu akoro agbü Yerüsalema. Gbü gara sikipi, fü ra ayia anü kpa etambasü *Mere Kambü ka Me, teka aku gba fü Me. Fü Miri Yesu ayia asere te-ye fere, baka ngü gbü roto. Fü ah amala ngü fere, gü ba, 'Ma yia eyia gbü Yerüsalema sene kere asidi! Angü ngari ni, te ma ena angbü emala fü wü di engä Yisaraye agbü Yerüsalema ne, wüh ti ale nda-wü de.' ¹⁹ Fü ra alügü ngü fefe, gü ba, 'Wayi, mere kpara, amba ah le ta de wüh le ngü te ma ngbü emala fü ewü ne, angü wüh wu eyi kpo, gü ba, ma ngbü ta ekpü wü kpara ka-mü, fü ra angbü endondoro *esambü ka biti-te, gbü wü nga nzö sü 'buru, da egiri wü kpara ta te ewü to maguma wü fü mü, Yesu, ne, da emiki ewü, egü agbü ku. ²⁰ Kphah bala, o wüh ngbü ta emörö züka kpara ka-mü, de iri ye Setefanü‡ ne, ma ta kphah ladü kpala. A ngbü ta emere ngü la de ewü, angü ta te wüh ngbü esötö engu de teme ne, wü kpara la gbi ta züka bongo ka-wü, ce o esaka ra, de ma ceka kpi fütanganga.' ²¹ Fü Miri Yesu amala ngü fere, gü ba, 'Ma yia eyia, angü ni ena atima ra agbü wü gara sü nengete, teka amala ngari ni fü wü *ganzi kpara.' "

²²⁻²³ Fü wü kpara la aje ngü de gömö Pawülü la, zalü te adu ngü de te engu nü, gü iri wü ganzi kpara. Fü ngü la asiti te ewü, angü wüh le ngü ka wü ganzi kpara nda-wü de. Fü ewü akpo esösörö bongo ka-wü, da ecö tö, ebu kpa tikpi, da eba rere, gü ba, "Ah le de wüh nza ngü ka komoko la anza! Wüh mörö engu amörö! Ah ti fü engu aküwa kpo fi de!"

Dene ngü ka Pawülü ake mere kpara

ka wü marajümiya ka wü Rüma

²⁴ Te mere kpara ka wü marajümiya, te di gbü nzö ewü 'buru, wu, gü ba, maguma wü kpara la siti eyi eküte Pawülü fa sü ne, fü ah ayia ato riri fü wü marajümiya ka-ye, de wüh za Pawülü, nü di agbü 'baranga ka-wü. Te wüh ri tete kpala, fü ah adu amala fü ewü, de wüh süma Pawülü de juru, teka de ah mala si-ngü, de te wü kpara ngbü ebu komö wü tete na la, mbi mbi mbi. ²⁵ Fü wü marajümiya ayia ai Pawülü, aza juru, de ani süma engu di. Fü Pawülü amala ngü fü gara kpara fütanga mere ewü la, gü ba, "Apa! Ah mere baye? Te ni di de kpara ka *Rüma, wü ena asüma ni, o wüh ye süka ngü ka-ni la de, teka ne? Riri ka-ani, wü Rüma mala bala?"

† 22:8 22:8 Yesu ka-ye de kpara ka Nazareta. ‡ 22:20
wü Mürü Tima ka Yesu ne 7:57-8:3.

22:20 Mü ena amaka ngü ka kpi ka Setefanü gbü buku ka

²⁶ Te mere kpara la je ngü la bala, fü ah ayia anü amala ngü la fü mere kpara ka-ye, gü ba, "Ye ceka te-ye 'be! Angü komoko la ka-ye de enga Rüma!"

²⁷ Te mere kpara la je ngü la bala, fü cürü ayia arı tete. Fü ah ayia anü ayita Pawülü, gü ba, "Ye mala la zu ngü fü ni. Ye de enga Rüma fanü?" Fü Pawülü alügü ngü fefe, gü ba, "Wayi, ni de enga Rüma fanü." ²⁸ Mere kpara ne gü ba, "De-ni bane, ni to mere bi jiase teka afü te-ni, akoro enga Rüma." Fü Pawülü alügü ngü fefe, gü ba, "Amba nda-ni, wüh bi ni nda-wü kü enga Rüma."

²⁹ Baka te wü marajümiya, de te ewü le ta asüma Pawülü, je, gü ba, engu de enga Rüma ne, fü ewü ayia ace engu. Fü cürü arı kphah te mere kpara ka-ewü teka ngü la. Angü kpara te di de kpara ka Rüma, wüh ti ai engu gbü ku bü kükürü bala ne de.

Dene ngü ka Pawülü engagira wü mere kovo

³⁰ Te kpi seke tete, mere kpara ka wü marajümiya la ngbü fi bü egiri si-ngü ka Pawülü, te siti te wü di enga *Yisarayeleye ne. Te di bala, fü engu atima ngü fü wü angbe cögbörö *kovo ka wü Yisarayeleye, de wüh bitı te-wü. Fü engu ayia aza Pawülü anü di engagira ewü.

23

¹ Te wüh za Pawülü, koro di engagira angbe cögbörö wü *kovo ka wü Yisarayeleye tete, fü Pawülü ayia ae jia ye, angbü eceka wü kovo la kerrre. Fü ah adu amala ngü fü ewü, gü ba, "Wü di enga ni ni, ni wu eyi emaguma ni, gü ba, ni ngbü emere tima ka Me de maguma ni biringbö." ² Fü ngü la ake te mere kovo, te di de mürü kpökpö ka wü Yisarayeleye, de iri ye Ananiya ne. Fü engu ayia amala ngü fü wü kpara, te ewü di ghamari ede Pawülü ne, de wüh be gbügbüra. ³ Fü Pawülü amala ngü fefe, gü ba, "De-mü, mü de siti mürü mani! Ngü ma! Me ena amı mü me-ye! Mü gü ba, ani ngbü eye süka ngü ka-ra tenga *Riri ka Me, fü mü adu amala ngü fü wü kpara ka-mü de wüh be ra? Riri ka Me mala bala?"

⁴ Fü ewü amala ngü fü Pawülü, gü ba, "De-ye! Ye ngbü esoko mere kpara füh kpökpö ne, neh teka ne? Ye wu de, gü ba, Me o engu me-ye?" ⁵ Fü Pawülü alügü ngü fü ewü, gü ba, "Wü di enga ni ni, ni dürü adürü. Wü ce siti ngü ka-ni. Angü ni wu ta de, gü ba, ah de mere kpara füh kpökpö. Angü fanü fanü, wüh ba ta gbü *Ngari Me, gü ba, 'Mü mere e afala mere kpara ka-mü de.' "*"

⁶ Fü Pawülü ayia aceka wü kovo la, fü ah awu teke, ga, gara wü kpara de wü *Saduke, gara ewü de wü *Farusi. Fü Pawülü ayia amala ngü de mere ri ye, gü ba, "Wü di enga ni ni, ni de Farusi. Wü wö ni kphah de wü Farusi. Si-ngü te wüh i ni engagira wü enatikine, ah ka-ye bü teka ngü te ni ngbü eo emaguma ni, gü ba, wü kpara te ewü kpi eyi akpi, ena adu kphah azükü ne."

⁷ Baka te Pawülü mala ngü la bala, fü mere yiki ayia akoro esüka wü Saduke de wü Farusi. ⁸ Kükürü de, angü wü Saduke fi nda-wü, gü ba, wü kövö ti azükü gbü kpi nda-wü de. Wüh ngbü kphah efi, gü ba, wü *malayika ka Me nda-wü ma. Kuru kpara kphah ma. Amba wü Farusi ngbü ele wü ngü la nda-wü 'buru ale. ⁹ Fü ewü akpo angbü emala ngü esüka wü de rere. Fü wü gara Farusi ayia arü tikpi, amala ngü de gü fü wü Saduke, gü ba, "Ani wu siti ngü ka Pawülü nda-ani de. E-wu neh da, malayika sere ngü la fefe me-ye!" ¹⁰ Fü ngü la akoro baka gü esüka wü kpara la. Fü ewü akpo da egbegbeke Pawülü esüka wü.

Te mere kpara ka wü marajümiya ka wü *Rüma wu ngü la bala, fü cürü arı tete. Fü ah adu afi, gü ba, te ni ce Pawülü fi esüka ewü sela la, wü kpara la ena asösörö engu esüka wü jürü jürü. Tekka ngü la, fü ah amala ngü fü wü marajümiya ka-ye, de wüh nü, wüh za Pawülü esaka wü kpara la sela de wazi asidi, anü di agbü 'baranga ka wü marajümiya.

¹¹ Gbü bitı la, fü Miri Yesu akoro asere te-ye fü Pawülü, amala ngü fefe, gü ba, "Pawülü deyı, ye kpe cürü de, ye ri kpekpeke. Angü, ye mala ngü ka-ni fü wü kpara ka Yerüsalema eyi, amba ah le fü ye anü kphah agbü Rüma, amala ngü ka-ni fü wü kpara de kpala ne."

Dene mani ka wü di enga Yisarayeleye teka amörö Pawülü

¹² Te kpi seke tete, fü wü gara wü di enga *Yisarayeleye ayia abiti te-wü, aro mö, agiri kaje de ani mörö Pawülü asidi. Fü ewü ayia akina te-wü, gü ba, "Ani ti azü e, anga anzö e, kphah de, zalü te ani ena amörö Pawülü." ¹³ Wü kpara te ewü ngbü emere mani la, wüh nye wü kpara teke 'basu anye.

¹⁴ Te di bala, fü wü kpara la ayia anü kpaka mere kpara füh kpökpö, de wü angbe cögbörö wü kovo ka wü Yisarayeleye, amala ngü fü ewü, gü ba, "Ani kina te-ani eyi teka ngü ka Pawülü. Ani ti azü e de, zalü te ani ena amörö engu fefe. ¹⁵ Te di bala, ah le de wü mere mani

* 23:5 23:5 Mü ena amaka ngü la gbü buku ka Gogo ka wü Yisarayeleye 22:28.

bane. Wü tima ngü fū mere kpara ka wü marajūmiya, de ah za Pawülü, du koro di engagira wü, teka fū wü agiri ngü kaka, aye süsüka mbi mbi mbi. Amba nda-ani, ani reke te-ani eyi 'buru nzo. Te wüh te ekoro de engu la, fū ani amörö engu ciki kpa te kaje kpala." Dela ngü te wü kpara la mala fū wü mere *kovo ka wü Yisaraye, teka ngü ka Pawülü. Fū wü mere kpara la ayia ale.

¹⁶ Amba gara loko ye Pawülü ta ladü gbü sü la. Fū ah ayia aje ngü la gömō wü kpara. Fū mbarase la ayia akpe anü kpa gba wü marajūmiya, amala ngü la fū Pawülü agbü ku kpala.

¹⁷ Te Pawülü je ngü la bala, fū ah ayia ai gara mere marajūmiya te di sela ne, amala ngü fefe, gü ba, "Ah le de ye za jaji komoko ne, nü di kpaka mere kpara ka-wü, angü mba gara kpeke ngü ladü, te engu le amala fefe."

¹⁸ Fū marajūmiya la aza mbarase la, anü di kpaka mere kpara ka-wü, amala ngü fefe, gü ba, "Kpara ka ku, de iri ye Pawülü ne, i ni kpaka ye. Fū ah amala fū ni, de ni za mbarase ne, koro di kpaka ye sene, angü mba gara kpeke ngü ladü, te engu le amala fū ye."

¹⁹ Fū mere kpara la ayia azoro kpa mbarase la. Fū ewü anü mba canza edere sü kpiki wü. Fū ah amala ngü fefe, gü ba, "Ngü te ye le amala fū ni ne, ye mala emala." ²⁰ Fū mbarase la amala ngü fefe, gü ba, "Gara wü di enga Yisaraye ngbü eyi emere mani kpala, gü ba, ani ena ayita ye teka fū ye aza Pawülü egambi, adu akoro di engagira wü mere kpara, teka fū ewü agiri ngü kaka, akolo mbi. ²¹ Amba ah le de ye mere e ale ngü ka-ewü la de, angü mere bi wü kpara baka teke 'basu, wo te-wü eyi te kaje, da eci nga Pawülü teka amörö. Wüh kina te-wü eyi, gü ba, 'Ani ti azü e anga anzö e de, zalü te ani ena amörö engu feke.' Wüh ngbü tine bü eci nga ngü kpaka ye." ²² Te mere kpara ka wü marajūmiya la je ngü la bala, fū ah amala ngü fū jaji komoko la, gü ba, "Ye nü enü. Ye mere e angbe nga ngü, te ye mala fū ni ne, fū wü gara kpara tine de."

²³⁻²⁴ Bü 'duwa dela, fū mere kpara ka wü marajūmiya la ayia ai wü mere marajūmiya ka-ye 'basu, amala ngü fū ewü, gü ba, "Ah le de yi biti wü marajūmiya ka-yi,† baka kama bala teke bata de füh ye nzükpa, teka agi nga Pawülü kpaka Miri Felikisi, agbü Kayisariya. Yi za gara nü de engu li fefeh, anü di. De yi yia sene gbü lö-ra menewa

ka biti. Yi ceka 'be, angü wüh ena amere engu esiti."

²⁵ Fū mere kpara ka wü marajūmiya la adu aba köcökpa fū Miri Felikisi, gü ba, ²⁶ "Wayi, mere kpara, Felikisi, de-ra Kalodiyo Lisiya, ma to mandí fū mü cu fa sü. ²⁷ Komoko, de iri ye Pawülü, te ma ngbü etima engu fū mü ne, wü di enga Yisaraye zoro engu. Wüh le ta amörö engu amörö. Amba te ma je, gü ba, engu de kpara ka *Rüma ne, fū ra ayia de wü marajūmiya ka-ra, anü aküwa engu esaka ewü. ²⁸ Baka ta te ma le awu si-ngü de te wü Yisaraye zoro engu teka amörö tete ne, fū ra aza engu akoro di engagira wü mere kpara ka-ewü. ²⁹ Fū ra adu awu, gü ba, si-ngü de te wüh zoro engu tete na ne, ah de ngü te ti fū ewü amörö engu, anga agü engu agbü ku tete ne, nda de. Ah ka-ye de gara kükürü ngü teka riri ka gele ka-ewü. ³⁰ Fütanga ngü la, fū ewü amala fere, gü ba, gara wü di enga Yisaraye la ngbü egiri kaje teka amörö engu asidi. Tekala ngü la, fū ra aza engu, atima fū mü dela. Fū ra amala kphah fū wü kpara te ewü ngbü eto ngbanganga la, gü ba, ah le fū ewü anü de ngü kaka la engagira mü, teka fū mü akolo ngü la me-mü." Dela köcökpa te mere kpara ka wü marajūmiya tima fū Miri Felikisi.

³¹ Fū wü marajūmiya amere ngü la 'buru, baka te wüh mala fū ewü. Fū ewü aza Pawülü gbü biti la, anü di zalü akoro agbü Atipatirisi. ³² Te kpi seke tete, fū wü marajūmiya de te ewü ngbü enü nda-wü de lö wü ne, ayia adu kpa sidi, ace bü mene ewü te ewü di füh nü ne, de wüh za Pawülü nü sü di kpaka miri. ³³ Te wüh nü koro agbü Kayisariya, fū wü marajūmiya ato köcökpa la fū Miri Felikisi. Fū ewü ace Pawülü kphah esasaka kpala, ayia kawü ago agbü Yertisalema.

³⁴ Fū Miri Felikisi ayia atanga köcökpa la, fū ah ayi-ta Pawülü, gü ba, "Sü ka-wü to kaye?" Pawülü gü ba, "Ni de kpara ka Silisiya." ³⁵ Fū miri adu amala ngü fefe, gü ba, "Ni ena adu aje ngü ka-ye, te wü kpara de te ewü to ngbanga ye ne koro eyi la." Fū ah adu amala ngü fū wü kpara ka-ye, de wüh o Pawülü agbü mere kambü‡ te wüh ngbü ekolo ngü ka wü kpara gbügbü na ne.

24

Dene ngü ka Pawülü engagira Miri Felikisi

¹ Sidi nga sikpi 'buruve, fū mere kpara füh kpökpö ka wü di enga *Yisaraye,

† **23:23-24** 23:23-24 Mere kpara gü ba, ah le de wüh za marajūmiya kama 'basu, de wü gara ewü te ewü ngbü ego woro füh wü nü, teke bata de füh ye nzükpa, be kphah te wü gara kpara te ewü wu da esö dü, kama 'basu. ‡ **23:35** 23:35 Mere kambü la, Gina Miri Erode ji ta me-ye.

de یری ye Ananiya ne, ayia de gara wü *kovo ka-ye, anü agbü Kayisariya. Wüh za kphah gara kpara de یری ye Teretulu, te wu da emala ngü mbi mbi mbi, teka amala nga siti ngü ka Pawülü, engagira Miri Felikisi.

² Te wüh koro kpaka Felikisi tete, fü Felikisi ai Pawülü engagira ye. Fü Teretulu ayia akpo angbü eto ngbanga Pawülü, gü ba, "Akoo, mere kpara, mü de züka miri ka-a. Ah teka züka ngü ka-mü, fü kpara angbü engbü enatikine ziii dene. Kükürü de, angü mü ngbü ereke wü ngbü gbü tö ka-a sene 'buru 'be, teka mere bi wü re dene. ³ A ngbü de mere tadu teka züka ngü ka-mü la, da egbo nga یری mü te nga sikipi 'buru. ⁴ Amba ma le asiti lö-ra ka-mü afa sü kükürü de. Teka ngü la, ma ngbü enda'ba te-ra fü mü, de mü je la mba enga ngü, te a le amala fü mü, teka ngü ka komoko ne.

⁵ Fanü fanü komoko ne, ah de siti kpara, te to mere ba-nzö fü wü kpara. Angü ah ngbü esiti fingangü ka wü di enga *Yisaraye, gbü nga nzö sü füh kotö ne 'buru me-ye. Engu kphah mere kpara esüka wü kpara, te ewü le ngü ka siti kpara de یری ye Yesu ne. ⁶ A maka engu da egiri kaje, teka asiti ngü gbü *Mere Kambü ka Me ka-a, agbü Yerüsalema ne. Fü kpara azoro engu. A le ta akolo ngü kaka baka ngü te riri ka-a ngbü ele. ⁷ Amba Lisiya, mere kpara ka wü marajümiya ne, fü mü ayia ari gbü ngü la, agbü ngü engu esaka a de wazi. ⁸ Fü Lisiya ato riri fü a, de a koro de ngü la kpaka mü sene. Te mü yi-tata, mü ena awu kphah teke, gü ba, ngü kaka de te a mala fü mü ne, ah de zu ngü."

⁹ Dela ngü te Teretulu mala fü Miri Felikisi, teka ngü ka Pawülü. Fü wü kovo ka wü di enga Yisaraye la ango 'buru bala, gü ba, ah de zu ngü.

¹⁰ Fütanga ngü la, fü Felikisi ato kaje fü Pawülü, de ah mala la nda-ye ngü. Fü Pawülü ayia akpo emala ngü, gü ba, "Wayi, mere kpara, ma wu eyi, gü ba, mü ngbü eyi miri gbü nzö a sene, teka mere bi wü re. Mü wu da ekolo ngü ka wü kpara ereke areke. Te di bala, ma kpe cürü de. Ma ena amala nga ngü ka-ra fü mü de tadu, angü ma wu eyi, gü ba, mü ena aye süka ngü la mbi.

¹¹ Mere kpara, ma yiri agbü Yerüsalema nda-ra de. Ma koro mba titine dene, teka aku gba fü Me. Ma ra kpala ngbee sikipi nzükpa de füh ye 'basu. Te mü ena ayi-ta wü gara kpara la, mü ti eyi awu, gü ba, ma su wu de. ¹² Wü kpara ne maka la ra, da ega yiki de wü kpara etambasü Kambü ka Me la, neh elaye? Wüh maka ra da esiti fingangü ka wü kpara kpa *esambü ka biti-te, anga agbü gara sü, 'buru 'buru

kphah de. Angü ma mere ngü bala nda-ra la kü de. ¹³ Amba wü kpara la ngbü eto ngbanga ra fü mü bü kükürü bala? Wü siti ngü de te ewü ngbü emala eküte ra la, ah ka-ye 'buru de wu! Ngü de te ena asere fü mü, gü ba, ngü ka-ewü la de zu ngü ne, ah nda ma!

¹⁴ Ngü te di fanü, ah dene. Ma le ngü ka mere Me kphah baka wü wö a, de wü kundu a. Amba nda-ra, ma le ngü ka Yesu kphah eyi, te wü *kovo ne gü ba, ah de töndö ngü ne. Amba ngü ka Yesu la, ah de töndö ngü nda de. Wü ngü 'buru te *Müse ba gbü *Riri ka Me, ma ele kphah ale. Wü ngü te wü *mürü dofo ba gbü *Ngari Me, ma ele kphah ale, de maguma ra 'buru baka nda wü kpara ne. ¹⁵ Ma ngbü eo jia ra kphah te sikipi, te Me ena azükü wü kpara gbü kpi 'buru tete, züka ewü bete siti ewü, kphah baka nda wü kpara ne. ¹⁶ Teka ngü la, ma ngbü eo to ra 'buru teka adi emere züka ngü gbü jia Me, kphah gbü jia wü kpara füh kotö ne.

¹⁷ Teka mere bi wü re, ma ngbü endoro agbü wü sü ka wü *ganzi kpara. Ma du koro gbü Yerüsalema mba titine dene, teka ale ta-ngü te wü mürü cinga gbü nguwa a, kphah teka ato takpa fü Me, gbü *Mere Kambü kaka agbü Yerüsalema. ¹⁸ Fü wü kpara ne anü amaka ra kpa etambasü Mere Kambü ka Me, o ra reke te-ra nza eyi teka tima la. A ngbü de wü kpara gbe nda-a de, a mere gü kphah de, a ba rere kphah de, a mere siti ngü 'buru 'buru de.

¹⁹ Gara wü di enga Yisaraye ka Efeso ta kphah ladü kpala. Wüh siti fingangü ka wü mere kpara ne eküte ra eyi. Amba ah le ta de wüh koro engagira mü, ato ngbanga ra fü mü me-wü. ²⁰ Anga nda wü mere kpara, te ewü koro eyi enatikine sene, ah le de wüh mala fü mü mbölö, te wüh giri ngü ka-ra, anga wüh maka siti ngü eyi gbügbü na la, de wüh mala. ²¹ Amba ngü te ma wu, te siti te ewü ne, ah dene. Ah de ngü ta te ma mala esüka ewü, de mere ri ra mbölö, gü ba, 'Si-ngü te wüh i ra engagira wü tete ne, ah ka-ye bü teka ngü te ma ngbü eo maguma ra tete, gü ba, wü kpara te ewü kpi eyi akpi, ena adu kphah azükü ne!' " Dela ngü te Pawülü mala fü Miri Felikisi.

²² Miri Felikisi wu ngü ka wü *kpara ka Yesu ta kpo. Te di bala, fü ah ayia amala ngü fü wü mere kpara ka wü Yisaraye ne, de wüh du kpa eköti. Wüh ena adu aceka ngü la sidi, angü ah le aci nga Lisiya, mere kpara ka wü marajümiya ne feke. Te engu koro eyi la, fü ni adu akolo ngü la.

²³ Fü Miri Felikisi ayia amala ngü fü mere wü marajümiya, gü ba, "Ye lügü Pawülü agbü ku. Wü ceka engu mbi.

Amba wü mere e ai engu tüne de. Kpah bala, te wü kpara kaka le ale ta-ngü tete la, wü mere e atiri ewü kpah de.”

Dene ngü ka Pawülü engagira Felikisi ake Dürüsila

²⁴ Fütanga wü sikipi mba cükü'daye, fü Felikisi ayia adu akoro ake wara ye, Dürüsila, te di de egba Yisaraye le ne. Fü ah atima ngü de wüh koro de Pawülü engagira ani. Te wüh koro de Pawülü tete, fü Pawülü akpo da emala ngü fü ewü, gü ba, “Ah le de wü to maguma wü fü Yesu Kurisito, teka fü wü aküwa.” ²⁵ Fü Pawülü adu angbü emala gara wü ngü fü ewü, gü ba, “Ah le de wü di emere wü ngü te ena areke gbü jia Me. Ah le de wü tüka te-wü, da ece wü *siti ngü ka-wü, angü, te gara Yesu ena adu akoro füh kotö ne, teka akolo liya ka wü kpara 'buru.” Te Miri Felikisi je ngü la bala, fü mere cürü ari tete. Fü ah ayia amala ngü fü Pawülü, gü ba, “Ah ti eyi! Ye ce la ngü la ece. Ye du edu. Te ni du maka mba züka lö-ra eyi la, ni ena adu kpah ai ye, teka aje du ngü la.”

²⁶ Tenga mere bi wü sikipi, Miri Felikisi ngbü ta ei Pawülü kpaka ye, teka fü engu angbü ekoro ero mö kpaka ni. Amba ah ngbü ta efi ngü emaguma ye, gü ba, anga Pawülü ena ato mba jiase fü ni.

²⁷ Fütanga re 'basu, fü mere miri ka *Rüma aza Felikisi gbü tima ka miri asidi. Fü ewü ao gara kpara de iri ye Feseto, *miri, sidi ngangga. Te Felikisi yia ce Kayisariya tete, fü ah ace Pawülü, ao ciki agbü ku. Ah mere ngü la bala, de ngü reke te wü di engu *Yisaraye le.

25

Dene ngü ka Pawülü engagira Miri Feseto

¹ Te Miri Feseto koro agbü Kayisariya, te di gbü tö ka wü *Yisaraye le, teka akpo de tima ka-ye, fü ah angbü kpala sikipi bata. Fü ah ayia anü sü agbü Yerüsalema, teka aceka wü *kovo ka wü Yisaraye le de kpala. ² Te engu koro tete agbü Yerüsalema, fü wü kovo ka wü Yisaraye le ayia akoro kpakaka, teka ato ngbanga Pawülü fefe. ³ Fü wü kpara la ayi-ta Miri Feseto, gü ba dene, “Wayi bala, Miri, te ah ti ati fü ye la, de ye lügü Pawülü kpaka ani gbü Yerüsalema sene, teka fü ani akolo liya kaka.” Wüh mala bala kükürü de, angü wüh mere mani eyi, gü ba, te wüh te ena alügü Pawülü agbü Yerüsalema la, de ani nü, ani ci ngangga te kaje, de ani mörö engu. ⁴ Fü Miri Feseto alügü ngü fü ewü, gü ba, “A'a, ah ti bala de. Angü Pawülü ladü kpa gbü ku agbü Kayisariya

kpala. Cu de-ni, ni ele kpah adu kpala tüüne. ⁵ Te di bala, ah le de ani nü tundu de wü gara kpara ka-wü, teka aceka ngü ka komoko la. Te engu mere ne siti ngü ne, de wüh mala ngü kaka engagira ni kpala.”

⁶ Fütanga sikipi 'bajena, anga nzüka, fü Miri Feseto ayia ago agbü Kayisariya. Fü angbe cögbörö wü kpara ka wü Yisaraye le anü kpah tundu de ewü, baka te engu mala. Fü ewü ara kpala aseke kpi. Kpurutokokpi la, fü ewü ayia akoro te sü, te wüh ngbü ekolo ngü ka wü kpara tete. Fü Miri Feseto amala ngü, de wüh za Pawülü agbü ku kpala, koro di engagira ni.

⁷ Te wüh koro de Pawülü tete, fü wü mere kovo ka wü Yisaraye le ayia arü edede na, akpo da emamala bi wü ngü ka wu eküte Pawülü, bü faaa. Amba ngü te ena asere fü miri, gü ba, ngü ka-ewü la, ah de zu ngü fanü ne, nda ma. ⁸ Pawülü, mü rü ka-mü fi bü te ri mü biringbö. Mü gü ba, “De-ni bane, ni mere siti ngü biringbö nda-ni kü de. Ni mere siti ngü teka riri ka wü Yisaraye le de. Ni siti ngü ka *Mere Kambü ka Me ka-ewü kpah de. Ni mere siti ngü teka riri ka wü *Rüma, kpah de.”

⁹ Amba baka te Miri Feseto le de ngü ka-ni reke gbü jia wü Yisaraye le ne, fü engu ayia ayi-ta Pawülü, gü ba, “Ah ti ati fü ye anü agbü Yerüsalema, teka fü ewü akolo ngü ka-ye engagira ni kpala?” ¹⁰ Pawülü, mü le ngü la nda-mü de. Ah gü ba, “Ni ka-ni de kpara ka Rüma. Te di bala, ah le de wüh kolo ngü ka-ni ciki engagira ye sene, angü ye de miri te wü Rüma o gbü tö ne. Ye le ato ni fü wü Yisaraye le, neh teka ne? Tekä fü ewü amörö ni asidi? Ni ngbü emala fü ye, gü ba, ni mere siti ngü fü ewü nda-ni kü de. Ye wu ngü la kpah kpo. ¹¹ Te ni ena amere ta siti ngü eyi, te ti fü ewü amörö ni tekaka la, wayi, ni ti aga yiki de. Ni ena ale ngü la. Amba ngü te wü kpara ne ngbü emala eküte ni ne, ah de zu ngü nda de! Ah 'buru de wu! Te di bala, wüh ti ato ni fü ewü de. Te ye le akolo ngü ka-ni nda-ye de la, ni le eyi anü kpaka mere Miri *Kayisara agbü Rüma, te di de mürü tö ne, teka de ah kolo ngü ka-ni cu me-ye.”

¹² Te Feseto je ngü la bala, fü ah afü te-ye kpaka wü mürü riri ka-ye, aro mö mba de ewü ce. Fü ah ayia alügü ngü fü Pawülü, gü ba, “Wayi, ah esiti de. Baka te mü le eyi de Mere Miri Kayisara kolo ngü ka-ni me-ye ne, ah mbi. Mü ena anü anü kpakaka.”

Dene ngü te Feseto mala fü Miri Agiripa teka ngü ka Pawülü

* 24:27 24:27 Gara iri ye Feseto de Porosioyo.

¹³ Fütanga ngü la, fü gara miri, de iri ye Agiripa *Erode, ayia ake engä ni ye tangbase, de iri ye Berenike, akoro agbü Kayisariya, teka aceka Miri Feseto. ¹⁴ Fü ewü ara kpala teka bi wü sikipi. Fü Feseto ayia asere nga ngü ka Pawülü fü Miri Agiripa, gü ba, "Diri Miri Felikisi ce ta gara kpapa, de iri ye Pawülü, o gbü ku sene. ¹⁵ Baka ta te ma nü agbü Yerüsalema ne, fü wü *kovo, de wü angbe cögbörö wü kpapa ka wü Yisarayeale, ato ngbangbanga fere. Fü ewü yi-ta ra teka de ma kolo ngü kaka kere, de ani mörö engu asidi. ¹⁶ Fü ra ayia alügü ngü fü ewü, gü ba, 'A'a, ah bala de. Angü riri ka-a, wü *Rüma, le bala de. Ah le mene kpapa de te wüh to ngbangbanga fü miri, arü me-ye engagira miri, teka amala si-ngü ka-ye la feke, teka fü ewü akolo ngü kaka la mbi. Te wüh mere bala de, wüh ti ato kuru tete kpah de.'

¹⁷ Te di bala, fü a ayia de ewü kpala, akoro sene, teka agiri si-ngü la. Te a koro sene, ma le de ngü la yiri de. Te kpi seke tete, fü ra ayia kpurutokokpi la, anü agbü sü ka ngbanga, teka aceka ngü la. Fü ra atima kpapa, teka anü ai Pawülü agbü ku kpala. ¹⁸ Te wüh koro di engagira ra tete, fü wü vügü kaka ayia akpo de ngü ka-wü. Ma fi ta, gü ba, wüh ena amala nga wü siti ngü, te engu mere ne, mbölö fere. Amba wüh du mala bala nda-wü de. ¹⁹ Wüh du ngbü ega bü yiki esüka wü de wü Pawülü, teka ngü ka riri ka gele ka-wü, kpah teka ngü ka gara kpapa biringbö de iri ye Yesu, te kpi ta gügü ne. Angü Pawülü gü ba, ah zükü gbü kpi eyi. ²⁰ Te ma wu ngü la bala, da ra te ma ena akolo ngü la nda ma. Fü ra ayi-ta Pawülü, te ah ti eyi fefe la, de ah nü agbü Yerüsalema, teka fü ewü akolo ngü la engagira wü kovo, te ewü wu ngü ka gele la eyi mbi mbi mbi. ²¹ Amba Pawülü, mü le ngü la bala nda-mü de! Mü gü ba, 'Ni de engä Rüma! Ni le de *Kayisara, mere miri ka wü Rüma, kolo ngü ka-ni me-ye.' Tekä ngü la, fü ra ato riri, teka de wüh ceka kpi sidi nganga agbü ku, zalü te ma ena amaka kaje, teka atima engu agbü Rüma, angü sü la ka-ye nengete." Dela ngü te Miri Feseto mala fü Agiripa teka ngü ka Pawülü.

²² Te Agiripa je ngü la bala, fü ah amala ngü fü Feseto, gü ba, "Ni ele aje ri kpapa la cu me-ni." Feseto gü ba, "Wayi, mere Miri, ye ena awu engu egambi."

Dene ngü ka Pawülü engagira Miri Agiripa

²³ Te kpi seke tete, kpurutokokpi la, fü wü Agiripa ayia ake Berenike, ato züka bongo ka miri eküte wü, anü agbü mere sü ka biti-te. Fü wü mere kpapa ka wü marajümiya, bete wü mere kovo ka

köti la, ayia anü kpah kpala. Fü mere bi wü kpapa ayia angbü eceka ewü te kaje, da ecu ngü ewü. Te wüh koro kpala, fü Feseto adu atima kpapa, teka anü ai Pawülü agbü ku.

²⁴ Te wüh koro de Pawülü tete, Feseto, fü mü ayia arü amala ngü, gü ba, "Wayi, Miri Agiripa, de yi wü kpapa 'buru de te yi koro eyi sene ne, yi ceka la komoko ne. Wü gara wü di engä Yisarayeale, te ewü di agbü Yerüsalema, de gara ewü de sene ne, wüh koro ta ato ngbangbanga kpapa ra, da eba rere, gü ba, 'Ah le de engu kpi akpi.' ²⁵ Amba te ma giri si-ngü la, gara liya te engu mere, te wüh ena amörö engu tekaka ne, ma maka nda-ra de. Kpah bala, fü engu adu ayi-ta ra, ta de ma tima ni kpapa *Kayisara, mere miri ka wü Rüma, teka de ah kolo ngü ka-ni me-ye. Te di bala, ma le ta kpah eyi amere baka te engu le la. ²⁶ Amba gbü ngü la, ngü de te ma ena aba fü mere miri ka-nih teka ngü kaka ne, ma wu nda-ra de. Fü ra aza engu, akoro di engagira yi dene, ah fa sü 'buru, engagira mü, Miri Agiripa, de mü le ta-ngü te ra gbü ngü la. Angü te nih ena ayi-tata na de nih ma tundu sene la, ma ena amaka züka fingangü, aba ngü di tekaka fü mere miri. ²⁷ Angü te ma ena atima kpapa ka ku fü mere miri bü bala, wüh wu siti ngü kaka kpah de la, ah ka-ye gbü jia ra de töndö ngü."

26

¹ Fütanga ngü la, fü Miri Agiripa ayia amala ngü fü Pawülü, gü ba, "Titine ye ti eyi amala ngü ka-ye fü ani."

Fü Pawülü ayia tikpi akpo da emala ngü, da eda kpa ye, gü ba, ² "Wayi, Miri Agiripa, teka wü ngü 'buru de te wü di engä *Yisarayeale to ngbanga ra di, gü ba, ma de siti kpapa ne, ma de mere tadu enatikine teka amala ngü ka-ra la engagira mü. ³ Kükürü de, angü ma wu eyi, gü ba, mü wu riri ka gele ka-nih, wü di engä Yisarayeale, kpo. Mü wu ngü ka yiki, te a ngbü ega esüka a gbü ngü ka Me ne, kpah eyi. Te di bala, ma enda'ba te-ra fü mü, de mü ku maguma mü, teka aje la ngü de gömö ra ne.

⁴ Wü di engä Yisarayeale 'buru wu ngü ka-ra kpo, akpo gbü jaji te ra, zalü akoro dene. Angü ma kpah de engä Yisarayeale, te ga esüka ewü. Wüh bi ra ta agbü Tarasu. Amba fü ra akoro angbü cu gbü Yerüsalema teka mere bi wü re. ⁵ Te wüh ena ale ta ale amala zu ngü la, de bane wüh ena amala nga ra fü mü ta me-wü, angü wüh wu kpo, gü ba, akpo gügü, ma ngbü fi bü da eo to ra, teka amere wü riri ka Me 'buru, angü ma de *Farusi. ⁶ Dela si-ngü te wüh i ra engagira mü di enatikine,

angü ma o maguma ra 'buru 'buru te ngü, ta te Me mala fū wü kundu nih, gü ba, 'Ni ena azükü wü kpara ka-ni gbü kpi ne.'
 7 Amba, mere Miri, dela si-ngü te wü di enga Yisarayeale 'buru ngbü eo maguma wü, teka adi emere tima ka Me di, biti de ra ne, teka de Me zükü ani gbü kpi. Te di bala, wü di enga wüna, wü di enga Yisarayeale, le ato ngbanga ra enatikine, neh teka ne? Ah bü teka ngü te ma gü ba, Me zükü Yesu gbü kpi eyi ne? Dela züka ngü? 8 De-yi, wü di enga wüna, fingangü ka-yi gü ba, Me ti azükü kpara gbü kpi de? Yi efi bala neh teka ne? Ngü la ena afa Me afa?

9 Fanü fanü, cu de-ra dene, ta gügü ne, ma ngbü ta kpah etiri wü kpara, de wüh mere e ale ngü ka Yesu* de. 10 Ma kpo ta da emere wü ngü la agbü Yerüsalema, angü wü mere *kovo ka-nih yia ta to wazi fere me-wü teka ngü la. Fū ra akpo angbü ezoro bi wü *kpara ka Yesu, da egü ewü agbü ku. Te wüh le amörö ewü la, ngü engu ngbü ereke te ra kpah areke. 11 Ma ngbü ta endondoro kpa *esambü ka wü biti-te ka-nih agbü Yerüsalema 'buru, da egiri wü kpara ka Yesu la, teka adi eto mere kuru te ewü, de wüh ce ngü ka Yesu ace. Ma ngbü ta kpah eo makpü te ewü emagama ra efa sü. Fū ra angbü da eto cinga te wü kpara ka Yesu la, zalü koro di agbü tö ka wü ganzi kpara nengete.

12 Wayi, mere Miri, gbü gara sikipi, fū ra ayia teka anü to kpa fügö, agbü Damaseke, angü wü mere kovo ka-nih to ta wazi fere, teka de ma nü, ma mere wü kpara ka Yesu de kpala, kpah baka ta te ma ngbü emere mene ewü de agbü Yerüsalema ne. 13 Mere Miri, ma su wu de! Ah te ekoro etü ra, o ra di la bü te kaje enü, fū gara e ayia aci gbü jia ra, baka ülele ka mügbara la. E la, ci fa ra te ngbü esü ka! Fū wazi Me ayia alofo sü ede a raaa! de wü kpara de te a ngbü enü de ewü ne 'buru. 14 Fū a ayia ati 'buru kötö de wü kpara la. Fū ra ayia aje ri kpara, te mala ngü fere gbü mö ka-nih, wü di enga Yisarayeale, gü ba, 'Sawula, Sawula, mü ngbü eto cinga te ra bala, neh teka ne? Mü wu de, gü ba, ma fa ni de wazi? Mü baka yiti te le anü nü de, fū ewü angbü emi engu teka ngü la. Mü ngbü embü te-mü de ngü la kükürü, 'duwa te mü ena ace ngü la, adu ale ngü ka-ra.' 15 Te ma je ngü la bala, fū ra ayi-ta ngü, gü ba, 'Mere kpara, ye de neh da?' Fū ah ayia alügü ngü fere, gü ba, 'Ni de Yesu, de te ma ngbü eto cinga tete ne. 16 Amba ma yia eyia, ma rü tikpi. Angü ni sere te-ni fere kükürü de, ni fe ra eyi ba *mürü tima ka-ni. Wü ngü de te ma wu de enatikine

ne, ah le de ma mala fū wü kpara, kpah de wü gara ngü, te ni ena adu asere fere sidi ne. 17 Ni ena atima ra agbü wü gara sü nengete nengete, teka amala ngari ni kpah fū wü *ganzi kpara. Gbü wü sü la 'buru, ni ena adi ladü ake ra, teka aküwa ra esaka wü di enga Yisarayeale, kpah de wü ganzi kpara la. 18 Ma nü, ma mala ngari ni fū wü kpara 'buru, teka de wüh fū maguma wü, ace *siti ngü ka-wü, akoro angbü züka wü kpara ka Me, de wüh ce ngü ka *Satana, adu ara fū Me. Fū ewü ato maguma wü fū ni, Yesu, teka fū Me aboro *siti ngü ka-ewü, fū ewü amaka sü agba Me.' Dela ngü te Miri Yesu mala fere, gbü sikipi te engu fe ra baka *mürü tima ka-ye tete.

19 Miri Agiripa, te di bala, dene ngü te ma emala fū mü. Ma le ace ngü, de te Miri Yesu sere fere ne, nda-ra de. Ma ngbü fi bü emere riri kaka la. 20 Te di bala, ma kpo 'duwa gbü sikipi la, emala ngari Me fū wü kpara, teka de wüh fū maguma wü, wüh du kpaka Me, da emere wü ngü te ena areke gbü jijia, teka asere fū wü kpara, gü ba, fanü fanü, ani fū maguma ani eyi. Ma kpo de ngü la 'duwa ciki gbü Damaseke, koro di agbü Yerüsalema. Fū ra andondoro gbü nga nzö wü sü ka wü Yisarayeale 'buru, zalü koro di agbü wü tö ka wü ganzi kpara nengete nengete kpah 'buru.

21 Dela si-ngü te wü di enga Yisarayeale zoro ta ra di, etambasü *Mere Kambü ka Me agbü Yerüsalema. Fū ewü akpo da egiri kaje teka amörö ra tete na ne. 22 Fū Me ayia aküwa ra esaka ewü, zalü akoro di dene. Te di bala, fū ra ayia arü engagira yi dene, teka amala ngari Me fū yi, wü mere kpara de wü kükürü kpara 'buru. Ngü te ma ngbü emala ne, ah de kükürü ngü, te ma ngbü efi me-ra, ne de. Ah ngbü rü de zu ngü te wü *Müse mala ta gügü, de wü bu ye, wü *mürü dofo ka Me 'buru. Fū ewü adu kpah aba ngü la gbü *Ngari Me, 23 gü ba, 'Te gara Me ena atima Mere Miri füh kötö ne, teka aküwa wü kpara. Amba ah le de Miri la maka cinga feke, fū ah akpi. Te di bala, engu ena azükü fi me-ye gbü kpi esüka wü kövö 'buru, teka asere ngü ka *küküwa fū nih, wü di enga Yisarayeale, kpah de wü ganzi kpara 'buru.' "

24 Baka te Pawülü ngbü la fi bü emala ngü ka-ye la bala ne, 'duwa fū Feseto ayia aba rere, akolo ngü ka Pawülü, gü ba, "Apa Pawülü! Ye rófö arófö! Ceka la, bi ngü te ye tanga ne, siti nzö ye eyi!" 25 Fū Pawülü ayia alügü ngü fefe, gü ba, "Ako Miri Feseto, ma rófö arófö de, baaa. Wü ngü de te ma ngbü emala ne, ah de töndö ngü

* 26:9 26:9 Yesu de kpara ka Nazareta.

ka maröfö nda de. Sisi na ladü. ²⁶ Miri Agiripa wu ngü la eyi 'buru. Ah bala de? Angü ngü la mere ta te-ye gbü jia wü kpara 'buru. Teka ngü la, fū ra angbü emala ngü engu fefe mbölö. ²⁷ Te di bala, de-mü Miri Agiripa, ngü te wü mürü dofo ba gbü Ngari Me ne, mü le de? Wayi, ma wü eyi, gü ba, mü le ngü la eyi." ²⁸ Fū Miri Agiripa ayia amala ngü fū Pawülü, gü ba, "Ye fi nda-ye, gü ba, ye ena afü ni, akoro di ba *kpara ka Yesu, bü kere kere bala?" ²⁹ Pawülü, fū mü alügü ngü fefe, gü ba, "Te ena adi kpaḥ bü kere kere, anga ferre la, ma ngbü eyi-ta Me teka mü, Miri, bete wü kpara 'buru, de te ewü ngbü eje ri ra enatikine ne, de Me fū maguma yi 'buru, fū yi akoro kpara ka Yesu baka ra. Amba ah le fū yi amaka cinga baka nda-ra, te wüh ngbü ei ra de nyari ne, de."

³⁰ Fū ri Pawülü la ayia agürü maguma cögbörö wü kpara la 'buru. Fū Miri Agiripa, ayia de wü Feseto ake Berenike, bete wü cögbörö kpara, te ewü di de ewü ne, akoro kpa etanü. ³¹ Fū ewü akpo da emala ngü la esüka wü, gü ba, "Apa! Wü wu eyi? Gbü jia ani, komoko la mere siti ngü, te ti fū ewü amörö engu, anga ai engu gbü ku tete ne, nda de." ³² Fū Miri Agiripa ayia amala ngü fū Feseto, gü ba, "Te Pawülü ena ayi-ta ngü, gü ba, 'Ni le de miri ka wü *Rüma kolo ngü ka-ni me-ye,' ta de la, de bane ani ena ace engu."

Dela ngü ka Pawülü engagira Miri Agiripa Erode* ake Miri Feseto, agbü Kayisariya.

27

Dene ngü te wüh tima Pawülü tete agbü Rüma

¹ Baka te Pawülü gü ba, "Ni le fū mere Miri *Kayisara ka wü Rüma akolo ngü ka-ni me-ye," ne, fū Miri Feseto ayia ale teka atima Pawülü agbü *Rüma gbü *zabu. Te di bala, fū ewü aza wü Pawülü de wü gara kpara ka ku, ato esaka gara mere kpara ka wü marajümiya ka Rüma de iri ye Yuliyo,* de ah gī nga ewü, ah nü di, zalü akoro di agbü Rüma kpala. De-ra Luka, fū ra ayia anü kpaḥ de ewü. ² Gara kpara ka Tesalonika,† de iri ye Arisitarekü ne, nü kpaḥ de wü a. Fū Yuliyo ayia amaka gara wü kpara ka Aduramite, te ewü le anü de mere zabu ka-wü agbü Asiya, te di te kaje ka Rüma. Fū Yuliyo areke ngü

de ewü, teka de wüh za a gbü zabu ka-wü la, anü di agbü Asiya. Fū a ayia ace Kayisariya, ali gbü zabu la.

³ Te kpi seke tete, fū a anü akoro agbü Sidona. Fū Yuliyo amere züka ngü fū Pawülü, angü ah ce mba Pawülü, de ah nü, ah ceka wü bu ye de sela, teka fū ewü ale ta-ngü tete.

⁴ Fū a ayia gbü Sidona sela, fū wege akpo da embü a, da efe, elügü zabu kpa sidi. Te di bala, fū a anü aguru sü ede Kupuriyo, te nga mene sü, te wege ti alügü zabu tete sidi de. ⁵ Fū a anü bala, akö mere ngu ede Silisiya ake Pafliya. Fū a anü akoro agbü Mira.‡ Fū a akö kötö sela.

⁶ Fū Yuliyo, mere kpara ka wü marajümiya la, ayia anü agiri *zabu te ena aza a, anü di agbü Italiya. Fū ah amaka gara te yia agbü Alekezandariya. Fū a ayia ali gbügbü.

⁷ Fū a ayia agbü Mira, da enü, amba mere wege la ngbü fi bü da embü a. Tekka ngü ka wege la, fū a angbü enü mba ferre. Fū a anü, anü bala, akoro ede Kinide, sidi nga mere bi sikipi, de mere kuru te a fa sü. Te a koro kpala, a le ta anü kpa engagira nü, amba dada ma, teka ngü ka mere wege la. Te di bala, fū a afü te-a, anü akoro ede cükü ka Kürete. Te a nü koro ede Salomone, fū ah adu afü ekere Kürete. ⁸ Fū a angbü enü fi bü ferre bala, gbü mere kuru fa sü. Fū a anü akoro gbü züka sü ede Laseya. Fū a arü kpala, teka afe te-a.

⁹ A ngbü siti mere bi wü sikipi da enü de *zabu bala, angü gbü fe la, ah de wü fe ka siti wege. Gbü wü fe la, ngü ka nünü de zabu koro eyi esiti, angü karanga eyi gbmari.§ Te di bala, fū Pawülü ayia amala ngü fū a, gü ba, ¹⁰ "Wü di engu ni ni, ah le de ani ngbü la sene, aci nga züka fe, te ena akoro. Angü gbü jia ni, te ani ena adi enü fi bü gbü siti wü fe ka siti wege de bala, siti ngü ena amere ani te kaje, fū ani amaka cinga gbü ngü la. Angü mere zabu de mere bi wü e gbü ye ne, ena asiti siti, fū ani akpi kpaḥ 'buru!'" ¹¹⁻¹² Amba wü mürü zabu bete mere kpara ka tima ka-ye, le bala nda-wü de. Angü wüh gü ba, "Sü la, ah de engu sü cükü daye, ah de züka sü teka fū mere zabu angbü tete kpala, teka mere bi fe ne, nda de." Wüh gü ba, "Gara züka dere ngolo ladü gbmari, gbü sü de iri ye Fenikisi.* Ah le de ani nü

* 27:1 27:1 Wü marajümiya te Yuliyo di de mere kpara esüka ewü la, wüh de wü kpeke marajümiya, te wüh ngbü ei ewü, gü ba, wü marajümiya ka Mere Miri Agusito. † 27:2 27:2 Tesalonika de mere koti gbü tö ka Makedoniya.

‡ 27:5 27:5 Mira ka-ye gbü tö ka Lisiya. § 27:9 27:9 Luka gü ba, sikipi te wüh zü e gbügbü de, nü sü eyi. Sikipi la, ah de mere sikipi ka wü Yisaraye, te ewü ngbü e'bi te-wü, da ewa wü nü fū Me, teka siti ngü ka-wü. Sikipi la ena adi gbü adu sikipi ka fe ka gbüti-gü, anga gina sikipi ka fe ka miki-gü. Mü ceka ngü ka ma'bi-te gbü "Si wü gara kpeke ngü te di gbü Ngari Me." * 27:11-12 27:11-12 Ndere ngolo ka Fenikisi la mba to kpa kati.

ngbü kpala.” Fū mere bi wū kpara de gbū zabu la ale ngū ka-ewū. Fū mere kpara ka wū marajūmiya la, adu kpaḥ aje ngū ka-ewū la, ace nda Pawūlü ngū ne ka. Fū ah amala, gū ba, “Ah le de ani nū de ewū kpala.”

Dene ngū te mere wege ngbü mere wū Pawūlü di etü ngu

¹³ Fütanga ngū la, fū wege[†] akpo efe mba ferrre. Fū wū mürü *zabu ayia afi, gū ba, “Ani ti eyi anū akoro agbü Fenikisi enatikine.” Fū ewū afuru zabu la, fū ewū angbü enū di ferrre, gḃamari edere ngolo.

¹⁴ Baka te a nū la mba cükü'daye bane, fū gara mere wege,[‡] baka egbarakö la ayia akpo da efe sīsiti! ¹⁵ Fū wege la atiri zabu la, da a te a ena anū kpa engagira nū ma! Fū a ace te-a tīne bü te nga wege la. Fū wege aza zabu anū di de mere woro. ¹⁶ Fū a anū de woro bala, anye sū kpa ekere gara engā cükü de iri ye Kawuda. Fū engā cükü la ale ta-ngū te a mba cükü'daye, angū sela wege ngbü efe mba ferrre, ela eküte cükü la. Te di bala, fū a adu afi nga engā zabu, te a ngbü egbeke fütanga a ne. Fū a ayia abiti te-a, ae ao gbū memere na la, angū wege ena asiti sīti. Fū ngū la ato mere kuru te-a afa sū. ¹⁷ Fū ewū adu aza mere ju-ku, ai mere zabu la di gō! angū wege ena angbengbe. Fū wege angbü fi bü da enū de a bala. Fū wū mürü zabu la angbü de mere cürü, da efi ngū, gū ba, te zabu la nū koro, mo te-ye te mere siki de ede Libiya la, ah ena alala kpala, fū ngū ka-ani anza 'buru. Te di bala, fū ewū ayia afuru wū mere bongo te wege ngbü enzi zabu di ne 'buru asidi. Fū zabu akpo angbü enū nū tīne mba ferrre teka ngū la.

¹⁸ Fū mere sīti wege la angbü ka-ye fi bü da efe, da ekada ngu. Fū zabu angbü da eyiki, da efüfü te-ye, ekolo ngu gbū ye. Fū ngū la angbü fi bü da emere te-ye bala gbū biti la ngiri. Te kpī seke tete, fū ewū akpo eza wū gara tiri e gbū zabu la, egügü ewū agbü ngu, angū zabu ena amere tiri. Fū ngū la angbü fi bü da embü a bala. ¹⁹ Sidi nga sīkpī 'basu, fū mürü zabu akpo tīne cu da egügü wū gara e ka tima ka zabu ka-wū, kpaḥ 'buru agbü ngu. ²⁰ Fū wege la angbü efe fi bü bala, ra de biti, teka mere bi sīkpī. A ti awu ra de wū küfara tīne de, teka ngū ka mere sangu te zoro jia kpī. Tekā ngū la, a ti awu sū, te wege ngbü enū de a tete ne, kpaḥ de. Fū a akpo da efi, gū ba, a ena akpi akpi 'buru. ²¹ Da a te a ena azü e tete kpaḥ ma, teka mere bi sīkpī.

Fū Pawūlü ayia arū amala ngū fū wū kpara ka tima ka *zabu la, gū ba, “Wū

di engā wūna, te yi ena aje ta ri ra, te ma mala fū yi agbü Kürete ne, de bane, nih ti amaka cinga bane de. ²² Amba dene ngū te ma le amala fū yi. Yi i maguma yi ai, angū nih ena akūwa akūwa 'buru. 'Duwa zabu ena asiti ka-ye me-ye. ²³ Ma mala ngū la kükürü de, angū Mere Me agbü kpī, de te ma ngbü emere tima kaka-na ne, tima *malayika ka-ye eyi me-ye kpaka ra gbū biti ne, teka amala ngū la fere. ²⁴ Ah gū ba, 'De-ra Pawūlü, ma kpe cürü de! Ma ti akpi de. Me ena akūwa kpaḥ wū kpara, te ma di de ewū tundu gbū zabu ne, teka ngū ka-ra. Angū ah le fū ra anū akoro engagira mere miri ka wū *Rūma.' Dela ngū te malayika ka Me sere fere gbū biti ne. ²⁵ Te di bala, wū di engā wūna, yi rü kpekpeke, yi kpe cürü de, angū ma wu eyi, gū ba, ngū de te Me mala fere gömö malayika la, ena amere te-ye bala fanū. ²⁶ Amba dene ngū te ena amere te-ye. Zabū ena anū, abu nih agbü gara cükü.” Dela ngū te Pawūlü mala fū wū kpara ka tima ka zabu.

Dene ngū ka zabu te siti

²⁷ Fütanga sīkpī nzükpa de fūḥ ye bala, sidi nga yiyia ka-a agbü Kürete, fū mere wege la angbü fi bü da enzi a, enū di bala. [§] Tīne, gbū adu sīkpī la, ah te ena akoro etü biti, fū wū kpara ka *zabu afi nda-wū, gū ba, a koro neh eyi edere ngolo. ²⁸ Fū ewū aza e teka are macu ngu la di. Ah koro baka süka-lö teke 'basu. Fū a adu kpaḥ aka te-a mba cükü'daye, fū ewū adu kpaḥ are ngu. Ah koro baka süka-lö teke biri de fūḥ ye nzükpa. Fū ewū awu, gū ba, gūmba eyi gḃamari fanū. ²⁹ Fū ewū angbü de cürü, da efi, gū ba, zabu ena amō te-ye eküte da. Te di bala, fū ewū ayia aza gara mere tiri wū se baka bala, te wūḥ i de mere ju-ku, agü ewū to kpa sidi, teka fū zabu arū. Fū ewū akpo da eku gba fū Me, de zabu ngbü bala, zalü te sū ena alofo, teka fū ani awu zūka kaje te ani ena akūwa te ani tete na.

³⁰ Amba wū kpara ka tima ka zabu la fi nda-wū, gū ba, wū e la ti atiri zabu de. Wege la ena anzi zabu, fū ah amō te-ye eküte da fanū, fū ani akpi 'buru. Te di bala, fū ewū agiri kaje teka de ani kpe ka-ani. Fū ewū aza engā zabu, ta te wūḥ o gbū memere na ne, ao gbū jia ngu. Fū ewū angbü ememere te-wū, baka wū kpara te ewū ngbü egü wū gara tiri e, te ena atiri zabu to kpa engagira nū la. ³¹ Fū Pawūlü ayia awu mani ka-ewū la. Fū ah ayia amala ngū fū Yuliyo, mere kpara ka wū marajūmiya, gū ba, “Te wū kpara la ngbü gbū zabu de la, ani ti akūwa de.”

³² Te wū marajūmiya je ngū la bala, fū ewū

[†] 27:13 27:13 Wege la koro ta to kpa gbū Afirika. [‡] 27:14 27:14 Wūḥ gū iri wege la “Yurakula”. Ah koro edebu sū to kpa fūgō. [§] 27:27 27:27 Wege la ngbü ta efe ewū gbū mere yi-ngu de iri ye Adariya.

ayia akokolo wü ku, de te wüh i engu zabu la di ne, 'buru asidi, de ngu za, nü sü di.

³³ Kpurutokokpi la, o sü lofo nza la de, fü Pawülü ayia amala ngü fü wü kpara gbü *zabu la 'buru, gü ba, "De-wü deyî, wü ceka la, ani mere eyi sikipî nzükpa de füh ye bala dene, ani zü e de, teka ngü ka mere wege ne. ³⁴ Te di bala, ah le de ani zü e ezü, teka amaka wazi. Wü kpe cürü de, angü biri kpara esüka ani, te ena akpi gbü ngu sene, nda ma." ³⁵ Baka te Pawülü mala ngü la bala, fü ah ayia aza ambata, aku gba fü Me tekaka, gbü jia ewü 'buru, akpo angbü ezü. ³⁶ Fü wü kpara gbü zabu la 'buru ayia amaka wazi, akpo da ezü e. ³⁷ A ta gbü zabu la 'buru baka wü kpara kama 'basu, teke bata nzükpa de füh ye ma'diya (276). ³⁸ Baka te ewü zü e la, sika di, fü ewü ayia aza mere bi wü kombo ka jia ndo de gbü zabu ne, abu 'buru agbü ngu, teka de zabu koro mba fawu fawu.

³⁹ Te kpi seke tete, fü wü kpara ka tima ka zabu awu, gü ba, a koro eyi gbamari edere ngolo fanü, amba wüh wu sü engu la gügü nda-wü de. Fü ewü awu mba züka sü, te da di tete ma. Fü ewü adu afi, gü ba, te zabu ena anü amo te-ye, alala gbü siki kpala la, ah ena adi mbi. ⁴⁰ Te di bala, fü ewü akolo wü ju-ku te wü tiri se la asidi. Fü ewü afuru kpah ju-ku te rü, de te ngbü eji zabu ne, asidi, aza gara mere bongo, agbala, ai kpa tikpi gbüra zabu, teka de wege di efe e la, enzi, enü di kpa edere ngolo. ⁴¹ Dela de, fü zabu ayia anü alala gbü gara mere siki, te di etü ngu la. Fü mere siti wege la akoro, akpo da ekukuru zabu to kpa sidi.

⁴² Te wü marajümiya wu, gü ba, *zabu te esiti, fü ewü afi, gü ba, wü kpara ka ku ne ena akpe ka-wü. Te ah bala, ani mörö ewü amörö. ⁴³ Amba mere kpara ka wü marajümiya la, mü le ngü ka-ewü la nda-mü de. Angü ah le ta aküwa Pawülü. Fü ah ayia ato riri fü ewü, gü ba, "Wü mere e amere bala de." Fü ah adu amala gara ngü, gü ba, "Wü mene kpara 'buru, te ewü wu da edo bojo kpo ne, wüh ti gbü ngu fi me-wü, ado bojo, akoro kpa füh gümba." ⁴⁴ Fü ah amala ngü fü mene ewü, te ewü wu da edo bojo de ne, gü ba, "Ah le de wü giri fara rü zabu te ngbengbe la, azoro, teka ale ta-ngü te wü, akoro di kpa füh gümba." Fü a ayia amere kpah 'buru bala, akoro kpa füh gümba de küte a zözö.

Dela ngü te mere wü Pawülü gbü mere *yi-ngu, da enü agbü *Rüma.

28

Dene ngü te mere a gbü cükü ka Malita

¹ Baka te a küwa tete, koro 'buru kpa füh gümba, fü a aje, gü ba, sü la, ah de cükü de iri ye Malita. ² Wü kpara ka sü engu la, wüh ka-wü de züka wü kpara. Fü ewü amere ngü a areke 'duwa areke. Fü ewü ayia adeke mere wa. Fü a aya te-a tete, teka ngü ka zü, angü agö kpo ta kpah eyi eli ali.

³ Fü Pawülü ayia aro ci-wa, abi, agü agbü wa la, de ah ci memere. Amba Pawülü, mü kama kpürü nda-mü eyi gbü wü ci-wa la. Fü kpürü la ayia akoro ka wazi wa la, ade engu, alala te kpakpa.

⁴ Te wü kpara ka Malita la wü kpürü, te lala te kpa Pawülü bala, fü ewü ayia amala ngü esüka wü, gü ba, "Eeye! Yi wu eyi? Komoko la ena adi de siti kpara, te ngbü emörö wü bu ye de? Baka te engu küwa gbü ngu ne, mba ngü ka-ye la fi bü ladü sidi nganga. Kpürü la ena amörö engu tine me-ye."

⁵ Pawülü, fü mü ayia ayükü kpa mü. Fü kpürü la ayia ati agbü wa, gü kpürü la ri te mü nda de. ⁶ Amba wü kpara la ngbü nda-wü ta tine bü eyi eci nga Pawülü, te ngü ena amere engu. Ngale nga te kpürü la ena akpo au, anga ah ena ati kötö, akpi 'duwa akpi. Baka te wüh ngbü ci nga ngü la nda-wü ma ne, fü ewü ayia afü fingangü ka-wü, gü ba, "Apa! Komoko la de mürü talara!"

⁷ Sü te a koro ngbü tete la, ah ka-ye gbmari ede yi ka miri ka Malita sela. Iri mere kpara la de Pabiliyo. Fü miri la ayia aza a kpa gba ye, angbü emere ngü a ereke 'duwa areke. Fü a ara kpala sikipi bata.

⁸ Fü a aje, gü ba, siti keke ngbü emere wö ye Miri Pabiliyo. Küküte ngbü ewütü awütü, bubu ngbü kpah engü ngüte. Te di bala, fü Pawülü ayia anü aceka wö ye miri la. Fü ah ao kpa ye gbü nzönzö, aku gba fü Me tekaka. Fü keke kaka la ayia anza.

⁹ Tekka ngü la, fü gara wü mürü keke gbü Malita ayia aje nga ngü la. Fü ewü ayia anü akoro kpaka Pawülü. Fü Pawülü aküwa ewü kpah 'buru. ¹⁰ Fü ngü la aga gbü jia ewü. Fü ewü akpo da egbo nga a. Kpah bala, gbü sikipi te a yia tete, fü wü kpara la ale ta-ngü te a de mere bi wü e, teka nünü ka-a la.

Dela ngü te mere te-ye agbü Malita, te a ra tete kpala fe bata ne.

Dene ngü te Pawülü nü koro di agbü Rüma

¹¹ Fütanga fe bata la, fü a ayia teka ace Malita, angü wü fe ka siti wege nza eyi. Fü a amaka gara *zabu, te ngbü ta kpah kpala teka wü fe ka siti wege la. Zabu la yia ta agbü Alekezandariya, ah le anü agbü

* 28:11 28:11 Zabu la, wüh gü iiri, gü ba, Wü me dadase.

İtaliya.* Fū a ayia alī gbūgbū na. ¹² Fū a ayia de zabu la, anū akoro agbū Sīrakuza, ara kpala sīkpī bata. ¹³ Te a yia kpala, a za fi bū kūte ngu baaala, zalū nū koro agbū Regiyo. Fū a ara kpala aseke kpī. Kpurutokopī la, fū zūka wege akoro, afe zabu ka-a, anū di mbiimbi to anga kaje ka *Rūma. Fū a anū bala, anū akoro agbū Putiyole sidi nga sīkpī 'basu. Fū a ayia akō gbū zabu la, teka anū tīne sela de lō a, akoro agbū Rūma. Angū Rūma ka-ye te kükürü sū, ngu la koro kpuru gbū Rūma nda de. ¹⁴ Baka te a koro tete gbū Putiyole sela, fū a amaka gara wū *kpāra ka Yesu kpala. Fū ewū ayi-ta a, de a ngbū la mba de wū anī teka sīkpī lorozī, teka fū a ayia anū sū ka-a tīne agbū Rūma. Fū Yuliyo ayia ale. Sidi nga ngū la, fū a ayia anū sū tīne agbū Rūma.

¹⁵ Te wū kpāra ka Yesu agbū Rūma la je nga Pawülū, fū ewū ayia akoro agbū eci nga a te kaje, wū gara agbū sū ka se e ka Apiyo, gara ewū agbū sū te wūh ī, gū ba, Wū kambū bata ka wū ngba. Te Pawülū wu wū bu ye, wū kpāra ka Yesu, te ewū koro eci nga ye, te kaje ne, fū ngū la ato mere tadu fefe. Fū ah ayia agbo nga irī Me teka ngū la.

¹⁶ Te a nū koro agbū Rūma, wū mere kpāra le ao Pawülū gbū ku nda-wū de. Wūh to kaje fefe, de ah ngbū gbū gara kōtī bane, bū ake marajūmiya hiringbō, de te ngbū eceka kpī sidi ngangā na ne.

Dene ngū ka Pawülū de wū di engā Yisaraye agbū Rūma

¹⁷ Fūtanga sīkpī bata, fū Pawülū ayia aī wū *kovo ka wū Yisaraye, te ewū di agbū *Rūma, ne kpāka ye. Te wū kpāra la koro bitī te-wū 'buru tete, fū Pawülū ayia amala ngū fū ewū, gū ba, "Wū di engā wūna, ma emala fū yi dene zu ngū. Wū di engā ni nih, te ewū di agbū Yerūsalema ne, zoro ra bū kükürü bala, to esaka wū Rūma. Amba ma mere sītī ngū fū ewū nda-ra kū de. Ma sītī rīrī ka gele ka-nih kpah de. ¹⁸ Amba wū Rūma la le ta eyi ace kpa te ra, angū wūh maka sītī ngū de te ma mere, teka fū ewū amōrō ra tete ne, nda-wū de. ¹⁹ Amba wū di engā ni nih de kpala ne, le de wūh ce kpa te ra nda-wū de. Te di bala, fū ra ayia amala ngū fū mere kpāra la, gū ba, ma le fū miri ka wū Rūma akolo ngū ka-ra tīne cu me-ye. Ma mere ngū la bala, teka fū ra akūwa esaka wū kpāra ka Yerūsalema la. Amba ma le ato ngbanga ewū nda-ra de, angū wūh de wū di engā wūna. ²⁰ Te di bala, dela si-ngū de te ma ī yi tete, teka fū nih aro mō ne, ah dela. Angū wūh ī ra de nyarī bū teka ngū ka Me, ta te engu mala fū wū kundu nih, gū ba,

de-ni Me, ni ena atima Miri teka akūwa nih ne."

²¹ Fū wū di engā *Yisaraye la ayia alūgū ngū fū Pawülū, gū ba, "Baka te anī ngbū sene, anī maka la kōcōkpa te yia agbū Yerūsalema teka ngū ka-ye nda-anī de. Engā wū di engā ni anī te ewū ngbū ekoro sene ne, wūh mala la birī sītī ngū te irī ye fū anī, kpah de. ²² Amba ngū te anī wu eyi kpo, ah de ngū te wū kpāra 'buru ngbū emala ngū, teka wū *kpāra ka Yesu, gū ba, wūh de wū sītī kpāra. Te di bala, dela ngū de te anī ngbū ele awu kpāka ye. Ah le de ye mala la ngā ngū ka Yesu la fū anī mbi mbi mbi." ²³ Te di bala, fū ewū ayia akuru sīkpī de wū Pawülū, teka de anī maka te-anī, aje ngū la.

Te sīkpī la koro tete, fū wū di engā Yisaraye la akoro kpāka Pawülū gbe gbe gbe afa sū. Fū Pawülū akpo da erī ewū de ngari Me, kū kpurutokopī, zalū koro di etamura. Ah ngbū emala fū ewū, gū ba, "Miri te Me tima fūh kotō ne, teka akūwa wū kpāra, ah ka-ye de Yesu." Fū ah angbū esere wū ngū, ta te wū gara *mürü dofo ba gbū *Ngari Me teka ngū ka Yesu *E-kūwa-nih ne, fū ewū. Angū ah le agbeke fingangū ka-ewū, teka de wūh to maguma wū fū Yesu. ²⁴ Fū wū gara kpāra esūka ewū ayia ale ngū ka Yesu, te Pawülū mala la. Amba wū gara ewū le nda-wū de. ²⁵ Fū ewū angbū de mere yīkī esūka wū, teka ngū la. Fū ewū ayia ace Pawülū, teka ago agba wū, fi bū de yīkī la gōmō wū.

Fū Pawülū ayia amala gara ngū fū ewū, gū ba, "Wayi, ngū ka-yi la, ah fanū fanū, baka ngū te *Nzila Wazi Me mala fū wū kundu nih, gōmō *mürü dofo Yisaya, gū ba dene, ²⁶ 'Ye nū, ye mala fū wū kpāra ka-ni la, gū ba, "Wūh ena aceka ngū ka-ni, ka Me, ma, wūh tī awu si-ngū gbūgbū na nda-wū de. Wūh ena aje ngari ni ma, ngū la tī arī gbū nzō ewū mbi mbi kpah de." ²⁷ Kükürü de, angū nzō wū di engā Yisaraye koro eyi kpekpeke. Wūh ni gūje wū anī, angū wūh le aje ngū ka-ni de. Wūh ni jia wū anī, angū wūh le awu si-ngū ka-ni kpah de. Angū, te ewū ena aje ta si-ngū ka-ni, Me, mbi mbi la, de bane wūh ena ace *sītī ngū ka-wū, adu ale ngū ka-ni, fū ni, Me, akūwa ewū." †

²⁸⁻²⁹ Fū Pawülū adu kpah amala gara ngū fū ewū, gū ba, "Dene adu ngū te ma ena amala fū yi enatikine. Me tima wū kpāra ka-ye eyi, teka amala ngari ye fū wū ganzi kpāra, gū ba, ni, Me, ena akūwa ewū, angū wūh ena aje ri ni la me-wū."

Fū wū di engā Yisaraye la ayia ace Pawülū, ago agba wū, fi bū de yīkī la gōmō wū bala.

† 28:27 28:27 Mū ena amaka ngū la gbū Yisaya 6:9-10.

³⁰ Fütanga ngü la, fü Pawülü angbü agbü *Rüma sela teka re 'basu. Wüh o engu gbü ku nda-wü de. Ah ngbü engbü ka-ye ta gbü kambü ka wü gara kpara, te engu ngbü eto jiase tekaka. Fü ah angbü eza wü kpara, de te ewü ngbü ekoro kpaka ye ne, 'buru de mere tadu. ³¹ Fü ah angbü emala ngü ka Yesu Kurisito fü ewü mbölö mbölö de mere wazi, gü ba, Yesu de Miri te Me tima teka aküwa nih. Amba gbü ngü la, gara kpara biringbö bane, te tata engu de ngü la, nda ma.

Dene köcökpa te Pawülü ba fü wü kpara ka Yesu agbü

Rüma Rüma

Masere si-ngü

Ta gbü wü re la, *Rüma ta kpah de gara mere köti füh kotö ne. *Kayisara, te di de mere miri ka wü Rüma ne, ngbü ta gbü nzö mere bi nguwa wü kpara, te nga nzö mere bi wü sü 'buru me-ye. Kpah bala, mere bi wü gara kpara te nga nzö wü sü, ngbü kpah endoro agbü Rüma kpala.

Gbü re te Pawülü ngbü eba köcökpa ne tete, engu ngbü ngbü ka-ye ta agbü tö ka wü *Giriki. Engu ngbü ta ereke te-ye, teka anü agbü Yerüsalema de jiase, ta te wü *kpara ka Yesu de kpala biti, teka atima fü wü mürü cinga agbü Yerüsalema ne. (Sapita 15:25-26)

Teka mere bi re, Pawülü ngbü ta endoro gbü tö ka Asiya bete tö ka wü Giriki, da emala ngü ka Yesu fü wü kpara. Fütanga ngü la, fü engu adu afi ngü, gü ba, tima ka-ni gbü wü tö la ti la eyi bala. Engu koro ta agbü Rüma te enga gina nda la de. Amba engu le ta anü kpala, angü Rüma de mere köti. Engu le ta kpah anü agbü gara köti de iri ye Sïpaniya, angü wü kpara ka tö la je ngü ka Yesu nda-wü la de. Fü Pawülü angbü efi, gü ba, te ni ce jiase la eyi fü wü kpara ka Yesu agbü Yerüsalema la, ni ena areke te-ni teka anü sü agbü Rüma. Fü ni adu ayia gbü Rüma sela anü sü agbü Sïpaniya. Te di bala, wü kpara ka Yesu agbü Rüma ena ale ta-ngü te ni, teka nünü ka-ni de agbü Sïpaniya ne me-wü. (Sapita 15:22-24)

Dela si-ngü te Pawülü ba köcökpa ne tete, angü engu ngbü ereke te-ye, teka nünü ka-ye agbü Rüma. Engu le asere fingangü ka-ye 'buru fü wü kpara agbü Rüma, teka ngü ka Yesu, teka de wüh wu si-ngü, de te ni ele anü arı wü kpara di agbü Sïpaniya ne. (Sapita 15:14-21*)

Amba wü ngü la mere te-wü baka te Pawülü ngbü ele ne nda de. Angü, te engu nü koro tete agbü Yerüsalema ne, fü wü vügü ayia azoro engu, agü agbü ku bü kükürü bala. Wüh le ta amörö engu amörö, amba wüh du fü ngü, du tima wü marajümiya, aza engu, anü sü di agbü Rüma, teka de wüh kolo ngü kaka engagira mere miri ka Rüma. (Mürü Tima 21:27-28:31).

Mere kpeke ngü, de te Pawülü ba gbü köcökpa ne, ladü gbü Sapita 1:16-17, te gü ba, "Wü di enga wüna, ma wu eyi, gü ba, ngü ka Miri Yesu ne, ah ka-ye de mere

kpeke ngü, angü wazi Me ladü gbügbü na, teka aküwa wü kpara, te ewü ena ato maguma wü fefe na, anga wüh de wü di enga *Yisarayeale, anga wü *ganzi kpara. Ngü la ngbü esere züka kaje fü nih, wü kpara te ngü ka-nih ena areke tete na mbi gbü jia Me. Te mü to maguma mü fü Yesu *Kurisito de la, ngü ka-mü ti areke gbü jia Me nda kpah de. Ah ka-ye bü duu baka ngü ta te Me mala, gü ba, 'Mene wü kpara, te ewü le ngü ka-ni, Me, de maguma wü biringbö ne, ni ena aceka ewü baka züka wü kpara ka-ni fanü, fü ni adu aküwa ewü fi mere badi.' "

Wü ngü te mü ena amaka gbü köcökpa ka wü Rüma ne, wüh dene.

Sapita 1:1-17 Mere ngü te di gbü köcökpa ne

Sapita 1:18-3:20 Wü kpara 'buru ngbü ekpi akpi teka siti ngü ka-wü

Sapita 3:21-4:25 Dene ngü te ena areke wü kpara gbü jia Me

Sapita 5:1-8:39 Yesu fa nih eyi gbü siti ngü ka-nih

Sapita 9:1-11:36 Ngü ka wü di enga Yisarayeale

Sapita 12:1-15:13 Ngbüngbü ka wü kpara ka Yesu

Sapita 15:14-16:27 Adu ngü

Dene mandı ka Pawülü fü wü kpara ka Rüma

¹ De-yi, wü *kpara ka Yesu Kurisito, te yi di agbü *Rüma, de-ra Pawülü, te ma di de labi ka Yesu *Kurisito ne, ma ngbü eba köcökpa ne fü yi me-ra, angü ma de *mürü tima kaka. Engu fe ra me-ye, fü ah ao ra, adi emala nga ngü ka-ye, ka Yesu, fü wü kpara, gü ba, "Me le nih fa sü." ² Me mala ta ngü eyi gügü, gömö wü *mürü dofo ka-ye, gü ba, "Ni ena atima Ye ni, te ena akoro aküwa nih." Fü wü mürü dofo ayia aba ta ngü la, gbü *Ngari Me. ³ Kpara te engu tima ne, ah de Yesu Kurisito, te di de Miri ka-nih ne. Wüh bi engu ta baka kpara füh kotö ne, gbü nguwa Miri *Davidi, te di ta de mere miri ka-wa, wü *Yisarayeale ne. ⁴ Amba Yesu ka-ye de Ye Me, te Me tima kü agbü kpı. Nih ti eyi awu, gü ba, Yesu de Ye Me, angü Me sere ngü kaka fü nih, gü ba, engu de Ye ni fanü fanü, teka wazi te Me zükü engu di gbü kpı ne. ⁵ Teka ngü de te Miri Yesu mere la, Me te engu di de mürü *züka maguma ne, le ra fa sü. Fü engu afe ra, ao mürü tima ka Miri Yesu, de ma di emala ngü kaka fü nguwa wü kpara füh kotö ne, teka de wüh fü maguma wü, adi eje ngü kaka, da elala te riri kaka.

⁶⁻⁷ Dela si-ngü te ma ba köcökpa ne tete fü yi, angü ngü la kpah teka yi, wü kpara

ka Yesu Kurisito de agbü Rüma kpala ne. Me le yi fa sü, fü ah ayia afe yi wü kpara ka-ye. Ah le de Wö nih Me bete Miri Yesu Kurisito ngbü de yi, da eto gu ngü ka-wü fü yi de züka maguma wü.

Dene ngü te ma ngbü eo gümü yi, wü kpara ka Rüma, di

⁸ Dene gina ngü te ma ele amala fü yi. Ma ngbü egbo nga iri Me tungü yi 'buru, te iri Miri ka-nih Yesu. Kükürü de, angü ma wu eyi, gü ba, yi zoro ngü ka Yesu eyi de kpa yi 'basu. Te di bala, ngü ka-yi la wü baya eyi gbü wü sü 'buru. ⁹ Me, te ma ngbü emere tima kaka de maguma ra biringbö, da emala ngü ka Yeye na fü wü kpara ne, ah wu eyi kpo, gü ba, to ra iri tungü yi de. ¹⁰ Angü ma ngbü eyi-tata tungü yi gbü wü sikipi 'buru, de engu ü kaje fere, de ma nü gü jia ra te yi kpala, te engu le eyi la. ¹¹ Gümü yi ngbü eke ra cu efa sü, kükürü de, angü ma le ari yi de ngü ka Me, teka de yi maka wazi, arü di kpekepeke. ¹² Te di bala, te nih ngbü tundu la, ngü la ena ato wazi fü nih. Angü nih ena angbü baka ndugu wa, te wüh dünda adünda la. Angü ma ena amaka wazi teka ngü ka-yi, fü yi adu amaka wazi kpah teka ngü ka-ra. ¹³ Wü di enga wüna, ma ngbü emala fü yi dene zu ngü, gü ba, ma le ta teka akoro kpaka yi kpala kere ne, amba ma giri kaje eyi bi ma, angü wü gara ngbü fi bü da etiri ra. Te Me ü kaje fere la, ma ena akoro, teka amala ngü ka Yesu agbü sü ka-yi kpala, de wü kpara to maguma fü wü Yesu, kpah baka te ma ngbü emere gbü wü gara sü ne. ¹⁴ Angü ah le de ma mala ngü ka Miri Yesu, fü nguwa wü kpara füh kotö ne 'buru, angü ah de ngü, te engu fe ra tekaka na me-ye. Ah le de ma mala ngü ka Miri Yesu la fü wü kpeke kpara de wü töndö kpara, wü kpara te ewü wu ngü fa sü, kpah de mene ewü te ewü wu ngü nda-wü de ne. ¹⁵ Te di bala, ma le kpah akoro amala ngü ka Miri Yesu fü wü kpara agbü sü ka-yi agbü *Rüma kpala.

Dene ngari Miri Yesu te ngbü eküwa wü kpara

¹⁶ Wü di enga wüna, ma wu eyi, gü ba, ngü ka Miri Yesu ne, ah ka-ye de mere kpeke ngü. Angü wazi Me ladü gbügbü na, teka aküwa wü kpara, te ewü ena ato maguma wü fefe na, anga wüh de wü di enga *Yisaraye, anga wü *ganzu kpara. ¹⁷ Ngü la ngbü esere züka kaje fü nih, wü kpara te ngü ka-nih ena areke tete na mbi gbü jia Me. Te mü to maguma mü fü Yesu Kurisito de la, ngü ka-mü ti areke gbü jia Me nda kpah de, angü gara kaje

nda ma. Ah ka-ye bü duu baka ngü ta te Me mala, gü ba, "Mene wü kpara, te ewü le ngü ka-ni, Me, de maguma wü biringbö ne, ni ena aceka ewü baka züka wü kpara ka-ni fanü, fü ni adu aküwa ewü fi mere badi."*

Dene wü siti ngü te wü kpara ngbü emere gbü jia Me

¹⁸ Wü di enga wüna, ma ngbü emala fü yi dene zu ngü. Ah le de yi wu awu, gü ba, maguma Me ngbü enzu eküte wü kpara füh kotö ne, teka wü *siti ngü te ewü ngbü emere ne. Angü wüh ngbü emere fi bü siti ngü, te Me le de. Wü siti ngü ka-ewü la, siti fingangü ka-ewü eyi, angü wüh le adi emere zu ngü, de te Me ngbü ele ne, nda-wü de. ¹⁹ Maguma Me ngbü enzu eküte ewü, angü güje ewü ma. Te güje ewü ena adi ta ladü la, de bane ngü ka Me ri eyi gbü nzö ewü. Angü Me ngbü fi bü esere ngü ka-ye la fü ewü, teka mere bi wü re, wüh je ngü la nda-wü de. ²⁰ Ah kpo kü ta te enga gina, te Me o kotö ne tete na, engu sere te-ye fü wü kpara baka mere mürü wazi, teka mere bi züka wü e, te engu mere de füh kotö ne. Teka ngü la, wü kpara 'buru ti eyi awu, gü ba, Me ladü. Anga te nih ti awu engu de jia nih kpah de la, wü e de te engu mere la, ti eyi asere wazi kaka fü nih. Amba wü kpara le afü fingangü ka-wü nda-wü de. Te di bala, Me ena ato kuru te wü kpara de bala ato, te gara. Wüh ti aküwa gbü liya ka Me nda-wü de, angü wüh ngbü emere ngü la ladru! ²¹ Wüh wu eyi kpo, gü ba, Me ladü. Wüh wu kpah kpo, gü ba, Me ngbü ele de ani di emere züka ngü. Amba wüh le adi emere züka ngü nda-wü de. Wüh cu ngü Me kpah de. Wüh gbo nga iri na, teka züka ngü te engu ngbü emere fü ewü ne, kpah de. Te di bala, nzö ewü siti ka-ye eyi. Wüh ngbü efi ka-wü fi bü töndö wü kükürü ngü ka-wü. ²² Wüh gü ba, "Ani de kpeke kpara! Ani wu wü ngü 'buru kpo!" Amba wüh ka-wü de töndö wü kpara, te ewü wu ngü kpo de. ²³ Wüh le agbo nga Mere Me agbü kpä, te di de mürü wazi ne, nda-wü de. Wüh o to wü ka-wü 'buru, angbü ecu ngü wü e, te wüh ngbü ereke de kpa wü, baka kuru kpara, anga kuru lu, anga kuru nü, de kuru gara wü e de füh kotö ne.

²⁴ Teka kögö-nzö ka wü kpara la, fü Me adu afü kürufe ye fü ewü, ace ewü, de wüh mere la siti wü ngü ka-wü la emere, baka te maguma ewü ngbü ele. Angü maguma ewü fiti ewü eyi, to gümü siti wü ngü la fü ewü. Te di bala, fü ewü akpo da emere ngü ka lümü esüka wü.

* 1:17 1:17 Mü ena amaka ngü la gbü buku ka Abakuka 2:4.

25 Wüh le züka ngü ka Me ne nda-wü de. Wüh ngbü ele ka-wü bü nzó wü töndó ngü ka-wü la. Wüh ngbü egbo nga gara wü e, de te Mere Me mere ne, da ecu ngü wü e la. Amba wüh ena adi ecu ta bala ngü Mere Me, de te engu mere wü e la me-ye ne, da egbo nganga na, de bane ah ena adi ta mbi. Te di bala, ah le de nih di egbo nga iri Me tenga wü sikipi 'buru! 26-27 Baka te wüh le ngü ka Me nda-wü de ne, Me ce ewü eyi, de siti gümü ngü ka lümü la emaguma ewü bala. Wü komoko du ce da engbü de wü würüse ka, fü gümü wü bu wü, komoko, adu angbü eke ewü ka-ye nda tine me-ye. Fü ewü akpo da emere ngü ka lümü esüka wü, de wü bu wü, komoko. Kpah bala, wü würüse du ce da engbü de wü komoko kpo, fü gümü wü bu wü, würüse, adu angbü eke ewü ka-ye me-ye. Fü Me ayia ato kuru te wü kpara la 'buru. Ah to kuru la te ewü mbi, teka ngü ka lümü, de te ewü ngbü emere la.

28 Wü kpara la le ao fingangü ka-wü, teka adi emere wü ngü te Me ngbü ele ne, nda-wü de. Teka ngü la, fü Me ayia ace ewü, de wüh di emere wü ngü te ti de, teka siti fingangü ka-ewü la. 29-30 Siti ngü ka-ewü la sibi fa sü. Angü, te nga sikipi 'buru, wüh ngbü efi ka-wü fi bü nga siti wü ngü, adi emere. Gara ewü de wü mürü gümü e. Gara ewü ngbü ekpü te-wü, da emere gü, da emömörö te-wü. Gara ewü ngbü da emere kanga esüka wü. Gara ewü ngbü efiti wü bu wü. Gara ewü ngbü endoro de ambala'ba, da edi ngü te wü bu wü. Gara ewü ngbü ekpü Me. Gara ewü ngbü esoko wü bu wü asoko, fü ewü angbü ecu 'duwa ngü wü. Gara ewü le aje ngü ka wü wö wü, de wü ni wü, kpah de. 31 Wü kpara la, wüh ka-wü töndó wü kpara, te ewü wü ngü ka Me de. Gara ewü ngbü emere mani, da esutu wu, angü wü ngü te ewü ngbü emala ne, wüh mere bala nda-wü de. Gara ewü le wü di enga ni wü kpah de. Gara ewü wu cinga kpara biringbö bane kpah de. 32 Amba wü kpara la wü kpo, gü ba, mene wü kpara te ewü ngbü emere wü siti ngü de bala, Me ena amörö ewü asidi. Wüh wu ngü ka Me la reke areke, amba wüh le ace da emere wü siti ngü la nda-wü de. Wüh ngbü fi bü emere ngü la, enü di kpa engagira nü, baka te ewü ngbü ele. Fü ewü angbü efiti wü bu wü, de wüh di emere kpah baka ani.

2

Dene kaje, te Me ena aye süka ngü ka wü kpara tete

1 Enga wüna, mü ngbü efi, gü ba, "Ni de züka kpara, te ni ti eyi akolo ngü ka wü bu ni?" Kpara te o mü miri neh da?

Te mü fi, gü ba, "Ngü ka wü bu ni esiti, Me ena ato kuru te ewü la," te di bala, ah le de mü fi ngü la mbi mbi mbi feke. Te mü mala, gü ba, "Wü bu ni ngbü emere *siti ngü la," mü ngbü efi, gü ba, "Me wu siti ngü ka-ni nda de?" Te di bala, mü ngbü eza mere liya la, eo gbü nzó mü de tete-mü! Me ena ato kuru te mü ato, angü mü ngbü emere ngü la kpah bala. 2 Me ngbü ekolo ngü ka siti wü kpara de bala me-ye. Angü nih wu kpo, gü ba, engu ena akolo ngü la mbi, areke areke. 3 Enga wüna, te mü ngbü kpah emere siti ngü baka nda wü bü mü de bala, fü mü adu afü te-mü, angbü da ekolo liya ka wü bu mü la, mü efi nda-mü, gü ba, ni ena aküwa gbü liya ka Me? Ah bala de! 4-5 Yi ngbü efi, gü ba, "Me wu siti ngü ka-ani de. Ah ti ato kuru te ani kpah de." Amba ah bala de! Me le yi de *züka maguma ye. Te di bala, engu le ato kuru te yi kere la de, me-ye, angü ah ce laki eyi fü yi, de yi fü maguma yi, teka fü yi aküwa. Amba te nzó yi kpekpeke, yi le ace wü siti ngü ka-yi la fi de la, yi ti aküwa kpah de! *Adu sikipi ena akoro, te Me ena aye süka ngü ka wü kpara 'buru. Gbü sikipi la, Me ena ato mere kuru te yi, angü yi ngbü efala züka ngü kaka-na ne afala. 6 Te yi ngbü emere siti ngü la, Me ena ato kuru te yi. Amba te yi ngbü emere züka ngü la, Me ena aküwa yi fi mere badi. 7 Mene wü kpara, te ewü ngbü eto te-wü fi bü da emere züka ngü, te reke areke gbü jia Me, fanü fanü Me ena agbo nga iri ewü, fü ah aküwa ewü fi mere badi. 8 Wü gara kpara le züka ngü ka Me nda-wü de. Wüh ngbü efi ka-wü bü nga ngü ka-wü. Wüh ngbü eo to wü bü nzó teka adi emere siti ngü. Te di bala, maguma Me ena anzu eküte ewü, angü Me le siti ngü ka-ewü la nda de. 9 Me ena ato kuru te wü kpara, te ewü ngbü emere siti ngü de bala ne 'buru, anga wüh de wü di enga *Yisarayeale, anga wüh de wü *ganzu kpara. Angü Me ti afüwa gara kpara biringbö nda de. 10 Fü Me adu ato züka ngü fü mene wü kpara, de te wüh ngbü emere züka ngü ne, te wüh de wü di enga Yisarayeale, anga wü ganzu kpara. Angü engu ena agbo nga ewü 'buru, da eto wazi fü ewü, fü ewü adi engbü zözö, de gu maguma wü. 11 Engu ena akolo ngü ka wü kpara 'buru, te nga ngü te ewü ngbü emere, angü Me füwa kpara nda de.

12-13 Teka ngü ka wü di enga Yisarayeale, Me to ta *Riri ka-ye fü ewü eyi gügü gömö *Müse. Te wüh ngbü emere *siti ngü la, Me ena ato kuru te ewü, angü wüh le aje riri kaka-na de. Angü te mü ngbü eje Riri ka Me bü de güje mü kükürü, mü mere ngü engu de la, ngü la ti areke gbü jia Me nda de. Ah le de mü je Riri ka Me,

ale de maguma mü, da emere ngü engu amere, teka fü ngü ka-mü angbü mbi gbü jia Me. Tekä ngü ka wü *ganzi kpara, te ewü wu Riri ka Me te engä gina la de ne, te wüh mere siti ngü la, Me ena ato kuru te ewü kpaah ato fanü fanü, angü wüh wu siti ngü ake züka ngü kpo. ¹⁴ Amba wü ganzi kpara, te ewü wu ngü teka Riri ka Me nda-wü de ne, te wüh ngbü emere wü ngü te Me ngbü ele la, ah baka te wüh je Riri ka Me eyi. Angü ngü de te ewü ngbü emere ereke areke gbü jia Me ne, ah eyi baka Riri ka Me fü ewü. ¹⁵ Ah ge baka te Me o Riri ka-ye la eyi emaguma ewü. Kpah bala, wüh ti eyi awu kpa emaguma wü, gü ba, wü ngü te ani ele amere, ah de züka ngü, anga ah de siti ngü. ¹⁶ Me wu siti ngü emaguma wü kpara 'buru kpo. *Adu sikpi ka Me ena akoro, te engu ena ao Yesu Kurisito, teka aye süka ngü ka wü kpara, baka ngü te ma ngbü fi bü eri wü kpara di ne. Angü gbü sikpi la, engu ena aye süka ngü ka wü kpara mbi mbi mbi, kpini te nga wü ngü te di emaguma ewü.

¹⁷ Te mü de engä Yisaraye la, ah le de mü fi ngü ka-mü mbi mbi mbi. Yi ngbü ecu ngü yi, gü ba, "Ani de kpara ka Me. Ani ena aküwa teka ngü ka Riri ka Me, ta te engu to fü wü kundu ani esaka Müse ne?" Ah bala de! ¹⁸ Wüh gü tamu Riri ka Müse eyi fü yi fanü. Yi wu züka ngü te ngbü ereke gbü jia Me ne, kpaah kpo. Amba, te yi mere wü ngü engu la nda-yi de la, yi ena aküwa neh baye baye? ¹⁹⁻²⁰ Yi ngbü emala, gü ba, "Me mala zu ngü ka-ye eyi 'buru 'buru fü wü kundu ani gömö Müse. Ani wu ngü ka Me kpo. Ani de kpeke kpara. Ani ngbü egü tamu ngü la fü wü bu ani. Ani ngbü eri wü kpara, te jia ewü ni ani, da esere kaje fü ewü, teka de wüh wu ngü ka Me." ²¹ Ah mbi, amba te yi ngbü eri wü bu yi de ngü ka Me la, yi le adi emere wü ngü la cu me-yi de, neh teka ne? Yi gü ba, "Kpara mere e azi e de," anga yi du ngbü ezi e ka wü bu yi, teka ne? ²² Yi ngbü emala, gü ba, "Kpara mere e amere waza de," amba yi di ngbü engbü de wü gara wü rüse gbü zi, neh teka ne? Yi gü ba, "Ngü ka faranda esiti. Ah le ta de wüh mofu ngü la de." Te di bala, yi du ngbü enü ezü wü e, de te wüh ngbü eto gbü faranda, neh teka ne? ²³ Yi gü ba, "Ani de wü kpara ka Me, angü ani wu ngü ka Me kpo." Yi du ngbü eto lümü te Me cu me-yi, teka ne? Te di bala, yi le ngü ka Me de maguma yi fanü, nda-yi de. ²⁴ Ngü ka-yi kpaah baka ngü ka wü kundu yi, ta te wüh ba gbü *Ngari Me, gü ba, "Wü kpara ngbü esiti iri Me ne, teka ngü ka-yi, wü di

engä Yisaraye."*

Dene ngü teka wü di engä Yisaraye la

²⁵ Wü di engä wüna, yi ngbü efi, gü ba, "Ani de kpara ka Me, angü ani ti eyi esa *basa?" Te yi ngbü emere zu ngü ka Me la, ngü ka basa ka-yi la ena adi de züka ngü fanü fanü. Amba, te yi mere *Riri ka Me mbi mbi de la, ngü ka basa ka-yi la ena adi de kükürü ngü. Ah ti areke yi gbü jia Me nda de. ²⁶ Kpara te ngbü emere Riri ka Me de maguma ye 'buru, Me ena aceka engu baka züka kpara ka-ye, anga te engu ti eyi esa basa, anga ah ti esa basa kpaah de la, ah mere ngü de. ²⁷ Yi gü ba, "Ani de wü kpara ka Me. Ani ngbü emere gele ka Me, angü ani ti eyi esa basa." Amba yi mere zu Riri ka Me nda-yi de. Wü gara kpara ladü, te ewü ti esa basa de ne, wüh du ngbü emere Riri ka Me me-wü ereke areke. Ngü la to lümü fü yi de? Yi ceka te-yi 'be, angü Me ena ato kuru te yi gbü ngü la. ²⁸⁻²⁹ Ngü te ena ao yi mbi gbü jia Me, fü engu aceka yi baka züka wü kpara ka-ye ne, ah de ne ngü ne? Ah de ngü ka mati esa basa, baka te wü di engä *Yisaraye ngbü emala ne? Ah bala de! Ah ka-ye de ngü ka *Nzila Wazi Me te ngbü efü maguma kpara. Ngü ka gele ti areke ngü ka-mü gbü jia Me nda de. Te Nzila Wazi Me fü maguma mü me-ye la, Me ena adu aceka mü cu baka züka kpara ka-ye. Amba te yi ngbü emere wü gele, teka de wü kpara di eceka ani baka züka wü kpara la, ah ena adi ka-ye de töndö ngü kükürü.

3

¹ Amba nih ti eyi awu, gü ba, ngü ka wü di engä *Yisaraye la ngü ka wü *ganzi kpara eyi. ² Angü de-a wü di engä Yisaraye la, a de gina nguwa wü kpara, ta te Me sere ngü ka-ye fü a gbü *Ngari ye. ³ Ah fanü, wü gara wü di engä Yisaraye la le ngü ka Me de, amba yi mere e afi, gü ba, Me ena ace ewü 'buru ace, teka ngü ka wü bu wü, la de. Me ti ace ewü 'buru 'buru de, angü wüh de wü *vüngüte kaka. ⁴ Te di bala, Me ngbü fi bü emere wü ngü te engu ngbü emala. Ah ti afü ngü ka-ye, baka nda wü kpara füh kotö ne, te ewü ngbü esutu wu ne, nda de. Angü Miri *Davidi ba ta ngü la eyi gbü Ngari Me, gü ba, "Wayi bala Me, gbü wü ngü ka-mü, te mü ngbü emala 'buru, mü su wu nda-mü de, mü ngbü emere ngü la te bala. Kükürü de, angü, te mü kolo ngü ka wü kpara la, wü kpara 'buru ena awu, gü ba, mü kolo ngü la eyi mbi reke areke."*

* 2:24 2:24 Mü ena amaka ngü la gbü buku ka Yisaya 52:5. 51:4.

* 3:4 3:4 Mü ena amaka ngü la gbü Ci ka wü Davidi

5 Gara kpara ti eyi amala, gü ba, "Te ni mere *siti ngü la, ngü la ti eyi asere fü wü kpara, gü ba, Me ka-ye de züka kpara duu me-ye. Te di bala, Me ena ato kuru te ni teka ngü la, neh teka ne?" 6 Dela, ah de tondö ngü de? Me de kpara te ngbü ekolo ngü ka wü kpara 'buru ereke areke. Teka ngü la, Me ti eyi ato kuru te nih, teka dürü ngü ka-nih. 7 Gara kpara ena aga yiki, gü ba, "Te wü kpara di ngbü egbo nga iri Me, teka *siti ngü te ni ngbü emere ne la, Me ena adu ato kuru te ni, teka siti ngü la, neh teka ne?" 8 Ngü la, ah ge baka e te wüh ga, nih ti eyi adi emere siti ngü, angü züka ngü ena akoro gbü ngü ka-nih la, fü wü kpara adu agbo nga iri Me, teka wü siti ngü te ni ngbü emere la. Dela ne tondö ngü ne? Wü gara kpara ngbü esiti iri a, gü ba, a ngbü kphah cu emala ngü bala me-a. Dela mere siti wu. Me ena ato kuru te mene wü kpara, te ewü ngbü emala ngü de bala ne, te gara.

9 Wü gara ngbü efi nda-wü, gü ba, ngü ka-ani, wü di engä Yisaraye, reke fa nda nguwa gara wü kpara. Amba ah bala de. Angü wü kpara füh kotö ne 'buru ngbü emere siti ngü. Te di bala Me ena ato kuru te wü siti wü kpara la 'buru, kphah baka ngü te ma mala fü yi la. Anga wüh de wü di engä Yisaraye, anga nguwa *ganzi wü kpara. 10 Ah kphah baka ngü ta te wüh ba gbü Ngari Me gügü, gü ba, "Kpara biringbö, te ngbü emere züka ngü gbü jia Me, nda kü ma. 11 Kpara biringbö te ngü ka Me ri eyi gbü nzözo na mbi mbi mbi, nda ma. Kpara te to te-ye adi emere ngü ka Me de maguma ye 'buru 'buru, nda kphah ma. 12 Wü kpara 'buru ce ngü ka Me eyi. Wüh fü te-wü eyi 'buru emere bi siti ngü gbü jia Me. Kpara biringbö te ngbü emere züka ngü nda ma.† 13 Wü ngü te wüh ngbü emala, ngbü esere nga siti ngü ka-ewü, te ewü ngbü efi, angü ngü ka-ewü la koro eyi baka zizi e, te sese ngbü efu afu. Wüh ngbü fi bü esu wu,‡ da edi ngü te wü bu wü, kphah da emala wü gara kpeke ngü, te ngbü ecuru wü bu wü, baka kpürü, te ngbü ede kpara me-ye.§ 14 Bi lara ngü sibi gömö ewü fa sü, angü wüh ngbü fi bü esoko wü bu wü, da esiri ewü. Fü ngü la angbü eto cinga emaguma wü bu wü la efa sü.* 15 Maguma ewü ngbü enzu kere kere, fü ewü angbü emörö kpara teka siti maguma wü la. 16 Gbü wü sü 'buru te ewü ngbü ekoro tete, wüh ngbü fi bü eto cinga te wü bu wü. 17 Wüh le züka ngü, te ngbü eto gu ngü ne, nda-wü de.† 18 Wüh le ngü

ka Me 'buru 'buru de. Wüh kpe cürü Me kphah de."‡ Dela ngü te wüh ba gbü Ngari Me, teka wü kpara te ewü ngbü emere siti ngü de bala ne.

19 Wü di engä wüna, dela ngü te ma le amala fü yi, gü ba, kpara biringbö, te di züka kpara gbü jia Me, nda ma. De-a, wü di engä *Yisaraye, ah le de a wu awu, gü ba, a kphah de siti wü kpara, Me ena ato kuru te a kphah ato teka *siti ngü ka-a, angü *Ngari Me mala bala. Te di bala, kpara biringbö füh kotö sene, te ena aga yiki, nda ma. Angü Me ena ato kuru te wü kpara füh kotö ne 'buru, anga ah ena adi de wü di engä Yisaraye, anga wü *ganzi kpara. 20 Kpara biringbö ladü te ngbü emere wü *Riri ka Me la 'buru ereke areke fanü? Kpara te mere ngü la bala nda kü ma! Angü kpara biringbö te to tadu te Me gbü ngü ka Riri la nda kü ma! Amba Riri ka Me la ngbü esere fü nih, nga wü siti ngü, de te nih ngbü emere ne.

Dene ngü te ena areke wü kpara gbü jia Me

21-22 Wü di engä wüna, Me fi nga kaje, te ngü ka-nih ena akoro tete mbi gbü jia ni Me, ne eyi cu me-ye. Enatikine, Me sere ngü la eyi fü nih. Ah de ngü ka riri nda de. Ah ka-ye de ngü te Me reke me-ye, baka ngü ta te wü *mürü dofo ba gbü *Ngari Me gügü. Ngü la, ah ka-ye de ngü ka Yesu *Kurisito, te ena akuwa wü kpara me-ye. Angü te mü to maguma mü eyi fü Yesu Kurisito la, Me ena aceka mü baka züka kpara ka-ye tete, anga mü de engä *Yisaraye, anga mü de *ganzi kpara. Te di bala, Me ti afüwa a, zu wü di engä Yisaraye ne, nda kphah de, 23 angü a ngbü kphah emere *siti ngü baka gara wü kpara füh kotö ne 'buru. Angü züka kpara biringbö, te di mbi gbü jia Me, nda ma. 24 Amba Me de mürü *züka maguma, te le wü kpara fa sü. Fü engu ayia afa wü kpara gbü siti ngü ka-ewü, teka ngü ka Yesu Kurisito. 25-26 Angü Me tima Yesu Kurisito füh kotö sene, fü ah akpi teka areke ngü esüka nih de wü ye. Mene wü kpara te ewü ena ato maguma wü fü Yesu, Me ena aboro siti ngü ka-ewü. Dene eyi mene kaje te kpara ena akoro tete na mbi gbü jia Me. Te kpo ta gügü, zalü akoro enatikine, Me ngbü engbü de gu maguma ye, teka ngü ka siti ngü ka wü kpara. Ah le ato kuru te wü kpara kere la de. Yi ngbü efi, gü ba, Me wu wü siti ngü ka-ani de? Ah bala de. Me de züka miri, te ngbü emere zu ngü. Engu wu da eye süka

† 3:12 3:12 Mü ena amaka ngü la gbü Ci ka wü Davidi 14:1-3. ‡ 3:13 3:13 Mü ena amaka ngü la gbü Ci ka wü Davidi 5:9. § 3:13 3:13 Mü ena amaka ngü la gbü Ci ka wü Davidi 140:3. * 3:14 3:14 Mü ena amaka ngü la gbü Ci ka wü Davidi 10:7. † 3:17 3:17 Mü ena amaka ngü la gbü buku ka Yisaya 59:7-8. ‡ 3:18 3:18 Mü ena amaka ngü la gbü Ci ka wü Davidi 36:1.

ngü ka wü kpara mbi mbi mbi ne kpo. Ngü te engu le ato kuru te nih kere de ne, angü engu ce la laki fü nih, teka fü nih afü maguma nih, fü nih aküwa. Titine, dene eyi züka kaje te Me sere, teka areke ngü di esüka nih de wü ye. Angü Yesu Kurisito kpi eyi, teka afa nih gbü siti ngü ka-nih, de *ngüte ye te tökö ne. Te nih to maguma nih eyi fefe na la, nih ena aküwa. Dela ngü te ngbü esere, gü ba, Me de kpara te wu da eye süka ngü ka wü kpara 'buru mbi mbi mbi ne.

²⁷ Te di bala ne, te Me ngbü eceka nih baka züka kpara, 'duwa teka ngü ka Yesu la, mü ena acu ngü mü, gü ba, ni de kpeke kpara, neh baye baye? Mü ngbü efi, gü ba, Me ngbü ele ni, teka züka ngü te ni ngbü emere ne? Ah bala de! Ngü ka-nih reke gbü jia Me, bü teka te nih to maguma nih eyi fü Yesu Kurisito. ²⁸ Ngü ka-nih koro gbü jia Me mbi, neh teka ne? Anga ah teka te nih ngbü emere wü *Riri, ta te *Müse ba gbü Ngari Me ne? Ah bala kpah de! Ngü ka-nih koro gbü jia Me 'be, nzö teka te nih to maguma nih eyi fü Yesu Kurisito. ²⁹ Fingängü ka-yi gü ba, Me ngbü ele ka-ye bü nzö wü di engu Yisarayeale? Ah bala de! Me ngbü ele nguwa wü kpara füh kotö ne 'buru. ³⁰ Me ka-ye kü biringbö. Kaje te kpara ena aküwa tete na, ka-ye kpah ngbee biringbö, 'duwa te kpara to maguma ye eyi fü Yesu la. Ngü ma, te ah de engu Yisarayeale, anga ganzi kpara. ³¹ Fingängü ka wü gara kpara gü ba, nih, wü *kpara ka Yesu, ngbü eceka Riri ka Me, ta te engu to gömö Müse ne, baka töndö ngü. Amba ah bala de! Titine, baka te nih to maguma nih eyi fü Yesu Kurisito ne, nih wu si-ngü gbü Riri ka Me la eyi fanü.

4

Dene si-ngü te ngü ka Abarayama reke di gbü jia Me

¹ Wü di engu wüna, nih fi la nga ngü ka *Abarayama. Engu de züka kpara ka Me ta gügü. Engu kpah de mere kundu a, wü di engu *Yisarayeale. ² Me ceka Abarayama ta baka züka kpara ka-ye, neh teka ne? Ah teka wü züka ngü, de te Abarayama ngbü emere me-ye de tete-ye ne? Ah bala de! Te ngü la ena adi ta teka züka ngü te engu mere la, de bane Abarayama ena angbü ta da egbo nga ye de tete-ye. Amba Me le bala de. ³ Yi fi la nga ngü ta te *Müse ba gbü *Ngari Me gügü, teka ngü ka Abarayama, gü ba, "Abarayama to ta maguma ye fü Me. Tekan ngü la, fü Me adu aceka engu baka züka

kpara ka-ye."^{*} ⁴⁻⁵ Ngü la, ah baka te Me küwa Abarayama teka wü züka ngü te Abarayama mere? Ah bala de! Me mere ngü la teka *züka maguma ye. Kpah bala, te mü ngbü ta emere *siti ngü, fü mü adu ato maguma mü fü Me la, engu ena aboro wü siti ngü ka-mü la 'buru, adu aceka mü baka züka kpara ka-ye, angü engu de mürü züka maguma.

⁶ Nih gbo nga iri Me, angü engu de mürü züka maguma. Ah ngbü eceka nih baka züka kpara ka-ye ne, ah teka züka ngü de te nih ngbü emere ne nda de. Ah ka-ye teka züka maguma kaka. Ah kpah baka ngü, ta te Miri *Davidi ba gbü Ngari Me gügü, ⁷⁻⁸ gü ba dene, "Züka ngü ena adi 'duwa fü mene kpara, de te Me boro siti ngü kaka eyi asidi ne. Angü Me ti adu afi nga siti ngü kaka tine de."[†]

⁹ Züka ngü la nzö teka wü di engu Yisarayeale, te ewü ngbü eti esa *basa ne? Ah bala de! Yi fi la nga ngü ka Abarayama. Me ceka engu baka züka kpara ka-ye, teka te engu to maguma ye fefe. ¹⁰ Me mere ngü la fefe, neh teka ne? Angü engu ti eyi esa basa? Ah bala de! Me mere ngü la fefe te engu gina, o engu ti esa basa nda la de. ¹¹ Me du mala ngü ka basa la fefe sidi nga ngü la, teka asere fü wü kpara, gü ba, ni Me, ni o Abarayama eyi züka kpara ka-ni, angü ah to maguma ye eyi fü ni. Abarayama de gina kpara te Me wu engu züka kpara ka-ye. Tekan ngü la, Abarayama du ngbü baka kundu kundu wü kpara 'buru te ewü to maguma wü eyi fü Me, anga te wüh de wü di engu *Yisarayeale, anga wü *ganzi kpara, mene ewü te ewü ti eyi esa basa, anga wü mene ewü te ewü ti esa basa de. Dela mene wü kpara, te Me ngbü eceka ewü baka züka wü kpara ka-ye ne. ¹² Wüh ngbü ei nih wü kundu ye Abarayama ne, teka te nih ti eyi esa basa ne? A'a, ah bala de! Ah teka te nih to maguma nih eyi fü Me, kpah baka te Abarayama to maguma ye fü Me.

¹³ Ta gügü, Me mala ngü fü Abarayama, gü ba, "Te gara, wü kundu ye ena angbü wü miri füh kotö ne 'buru."[‡] Me mala ta bala, teka ne? Ah teka te Abarayama ngbü emere wü riri ka gele ereke areke? A'a, ah bala de! Me mala ta ngü la bala, teka te engu wu Abarayama baka züka kpara ka-ye, angü Abarayama to ta maguma ye eyi fü Me. ¹⁴ Amba wü gara kpara ngbü efi, gü ba, ani ti eyi aküwa, teka te ani ngbü emere wü riri ka gele ereke areke. Amba ngü la bala nda de! Te ah ena adi ta bala la, nih ngbü eto maguma nih fü Yesu *Kurisito, neh teka ne? Ah ena adi

* 4:3 4:3 Mü ena amaka ngü la gbü Gina Ngü 15:6. † 4:7-8 4:7-8 Mü ena amaka ngü la gbü Ci ka wü Davidi 32:1-2.

‡ 4:13 4:13 Mü ena amaka ngü la gbü Gina Ngü 17:4-5; 22:17.

de töndö ngü. Kpah bala, ngü ta te Me mala fü Abarayama teka wü kundu ye ne, ena adi kpah töndö ngü. ¹⁵ Te nih ngbü efi, gü ba, ngü ka-nih ena areke gbü jia Me, teka wü riri ka gele la, ngü ka-nih ti areke gbü jia Me nda de. Angü te nih dürü mba enga ngü cükü'daye gbü wü riri ka gele la, maguma Me ena anzu eküte nih, angü kpara biringbö füh kotö sene, te ti amere wü riri la areke areke ne, nda ma.

¹⁶ Wü di enga wüna, ngü ka-nih ena areke gbü jia Me, 'duwa te nih to maguma nih eyi fefe na la. Angü Me ena aküwa nih teka züka maguma ye. Ah kina kina eyi, gü ba, ni ena aküwa mene wü kpara, te ewü ena ato maguma wü fü ni, kpah baka Abarayama. Te di bala, nih, de te nih to maguma nih eyi fü Me ne, nih tine eyi 'buru wü kundu ye Abarayama. Anga ah de wü di enga Yisaraye, anga wü ganzi kpara. ¹⁷ Tekan ngü la, fü Me amala ta ngü fü Abarayama, gü ba, "Ni ena ato wazi fü ye, fü wü kundu ye asibi te gara, akoro mere bi nguwa wü kpara."§

¹⁸ Wü di enga wüna, Abarayama le ta wü ngü de te Me mala fü ye ne eyi de maguma ye 'buru, fü ah ayia ao to ye tete. Te engu ena adi efi ta bü nga wü ngü de füh kotö ne la, de bane engu ena aceka ngü la, te nga jia ye, baka ngü ka wu la. Kükürü de, angü engu koro ta eyi gbe kpara, wara ka gbe kpah eyi bakaka na. Wazi ewü teka abi ye di nda tine eyi ma. Amba Abarayama wu fi bü kpo, gü ba, wazi Me fa sü. Ngü biringbö de te ena afa Me nda ma. Engu ti eyi azükü wü kpara gbü kpi. Kpah bala, Me ngbü emala ngü bü de komö ye, fü wü ngü, ta te mere te-wü gügü la de ne, angbü emere te-wü. Tekan ngü la, fü Abarayama ayia ale ngü te Me mala fefe, gü ba, "De-ni Me, ni ena ato wazi fü ye, Abarayama, fü wü kundu ye asibi te gara, akoro mere bi nguwa wü kpara."

¹⁹⁻²⁰ Abarayama wu ta eyi, gü ba, wazi ni nza eyi, angü re ka-ni koro kpah eyi baka kama biri (100). Engu wu kpah eyi, gü ba, wara ni ti abi ye nda-ye tine de. Amba engu ceka ngü, te Me mala fü ye ne, te nga jia ye baka wu de. Ah to maguma ye 'buru fü Me, dü o to ye 'buru te ngü te Me mala fefe, gü ba, engu ena adi te gara de kundu ye mere bi wü kpara. Fü engu agbo nga iri Me teka ngü la. ²¹ Angü ah wu eyi, ga, Me de mürü wazi. Ah wu kpah kpo, ga, ngü de te Me mala la, Me ena amere fanü, Me ti ace de. ²² Dela si-ngü de te wüh ba ngü la tete na gbü *Ngari Me, gü ba, "Abarayama to ta maguma ye fü Me, fü Me adu aceka engu baka züka kpara ka-ye."*

²³⁻²⁴ Wü di enga wüna, wü ngü de te wüh ba teka Abarayama, gü ba, "Me ceka engu baka züka kpara ka-ye ne," wüh ba ngü la kpah tungü nih. Angü, te nih to maguma nih eyi fü Me la, Me ena aceka nih kpah baka züka wü kpara ka-ye, teka ngü ka Miri Yesu *Kurisito, de te Me zükü engu gbü kpi ne. ²⁵ Angü Yesu kpi teka aküwa nih gbü *siti ngü ka-nih. Fü Me ayia azükü engu gbü kpi la, teka asere fü wü kpara, gü ba, de-ni Me, ni ngbü eceka nih baka züka kpara, teka ngü ka Yesu.

5

Dene züka ngü te Me mere fü nih, teka ngü ka Yesu Kurisito

¹ Wü di enga wüna, Me reke ngü esüka nih de wü ye eyi. Ah fü nih eyi baka züka wü kpara ka-ye, angü nih to maguma nih eyi fü Miri Yesu Kurisito. ² Tekan ngü ka kpi ka Yesu, nih ti eyi awu wü züka ngü 'buru, te Me mere fü nih de *züka maguma ye ne, angü nih to maguma nih eyi fü Yesu Kurisito. Nih tine eyi de tadu, angü nih wu eyi, gü ba, nih ena angbü kpaka Me, agbü sü kaka agbü kpi kpala, fi mere badi.

³ Te di bala, nih ti kpah eyi agbo nga Me de tadu, gbü wü lö-ra ka cinga, te nih ena angbü ezü füh kotö ne. Angü nih wu eyi, gü ba, nih ena amaka züka ngü te gara, kpaka Me agbü kpi. Kükürü de, angü te nih tüka te-nih gbü wü cinga ka-nih la, maguma nih ena akoro kpekpeke. ⁴ Te maguma nih koro eyi kpekpeke la, ngü ka-nih ena areke gbü jia Me. Te ngü ka-nih reke eyi gbü jia Me la, nih ena adu ao jia nih te Me, te ena aküwa nih ne. ⁵ Te nih o jia nih eyi eküte Me la, engu ti ace nih de. Ah ena aküwa nih aküwa fanü fanü. Kükürü de, angü Me le nih cu fa sü, de maguma ye biringbö. Fü engu ayia atima *Nzila Wazi ye, de ah koro, ah ngbü emaguma nih, adi esere ngü la fü nih.

⁶ Me mere wü züka ngü la fü nih bala, kükürü de, angü wazi nih, te nih ena aküwa te-nih di de tete-nih ne, ta nda ma. Fü Me awu cinga nih, fü ah ayia atima Yesu Kurisito, de engu koro, ah to te-ye, ah kpi teka aküwa nih, wü siti kpara. Me mere ngü la gbü sikipi te engu fe me-ye. ⁷ Gara kpara ladü füh kotö ne, te ena akpi teka ngü ka kiri ye? Anga te kiri ye na la ena adi de züka kpara la, e-wu neh da, kpara la ena atüka maguma ye bü bala, akpi teka kiri ye la. ⁸ Te di bala, yi fi la nga mere lele ka Me tungü nih, teka kpi ka Yesu Kurisito. Gbü sikipi ta te Yesu Kurisito kpi tete teka ngü ka-nih ne, nih ta de züka wü kpara? Ah bala de! Nih ta

§ 4:17 4:17 Mü ena amaka ngü la gbü Gina Ngü 17:4-5.

* 4:22 4:22 Mü ena amaka ngü la gbü Gina Ngü 15:6.

de siti wü kpapa, angü nih ta de wü vügu ka Me.

⁹ Wü di engu wüna, Me küwa nih eyi, teka kpi ka Yesu Kurisito. Te di bala, maguma Me ti adu anzu eküte nih tine de. Angü engu boro wü *siti ngü ka-nih eyi, teka ngü ka Yesu. ¹⁰ Nih ta de wü vügu ka Me, amba Me yia fi nga ngü la ka-ye nda me-ye! Fü ah ayia areke ngü, te di ta esüka nih de wü ye ne, teka kpi ka Ye ye, Yesu! Titine, nih koro eyi wü *vüngüte ka Me. Te di bala, nih ena aküwa fi mere badi fanü, kpah baka Yesu Kurisito, angü engu zükü gbü kpi, fü ah angbü fi mere badi. ¹¹ Te di bala, nih gbo nga Me, teka ngü ka Miri ka-nih Yesu Kurisito, angü Yesu de kpapa ta te za nih, lügu kpaka Me, fü nih adu akoro wü vüngüte ka Me ne.

Dene züka ngü te Yesu fa nih di, gbü siti ngü ka kundu nih, Adama

¹² Wü di engu wüna, Yesu küwa nih eyi gbü *siti ngü ka-nih, angü ta gügu mere kundu kundu nih de iri ye *Adama ne, mere siti ngü gbü jia Me. Fü Me ayia aküna engu, de ah kpi akpi teka ngü la.* Dela si-ngü te wü kpapa füh kotö ne 'buru ngbü ekpi tete, angü wü kpapa 'buru de wü kundu ye Adama. Wüh ngbü fi bü da emere wü siti ngü baka nda diri kundu wü la. ¹³⁻¹⁴ Amba ngü ka *Riri ka Me nda-ye baye? Riri, te Me to gömö *Müse, koro ka-ye sidi, o siti ngü di ka-ye nda-ye kü eyi ladü füh kotö sene gügu, teka ngü ka kundu kundu nih, Adama. Amba fingangü ka-yi gü ba, wü kpapa ta te ewü kpi, o Me to Riri la de ne, wüh kpi teka ne? Wayi, wüh ti eyi akpi, angü ngü ka-nih siti eyi de ewü 'buru, teka siti ngü ka kundu nih, Adama. Baka te Me kina kundu nih, Adama, fü nih angbü ekpi 'buru teka ngü kaka-na ne, kpah bala, nih ena aküwa kpah 'buru teka ngü ka Yesu Kurisito, te Me zükü engu gbü kpi ne. ¹⁵⁻¹⁶ Te di bala, ngü ka Yesu fa ngü ka Adama ka, angü Yesu reke siti ngü, ta te Adama mere ne eyi.

Adama mere siti ngü kü me-ye kpikpi ye, fü ngü la ayia asiti ngü ka wü kpapa gbü jia Me 'buru 'buru. Fü Me ayia aküna wü kpapa 'buru, de wüh di ekpi. Yesu Kurisito ka-ye kpah kü kpikpi ye, te yia mere züka ngü fü nih, aküwa nih gbü siti ngü ta te Adama mere ne. Teku ngü ka Yesu la, fü maguma Me adu agu eküte nih. Fü ah angbü tine eceka nih 'buru baka züka wü kpapa ka-ye, teka *züka maguma ye. ¹⁷ Baka te Adama mere siti ngü, kü bü me-ye kpikpi ye ne, fü Me ayia aküna engu, teka ngü la, fü wü kpapa füh kotö ne angbü ekpi 'buru, gbü ngü kaka la.

Amba, ah kpah bü duu teka ngü ka Yesu Kurisito, fü Me ayia aküwa nih. Te di bala, te nih le züka ngü, de te Me mere fü nih, de züka maguma ye ne la, fanü fanü, nih ena aküwa ka-nih aküwa fi mere badi, teka ngü ka Yesu.

¹⁸⁻¹⁹ Baka ta te Adama le riri ka Me de ne, fü ngü ka wü kpapa 'buru ayia asiti gbü jia Me, fü Me ayia ato kuru fü ewü 'buru. Amba ngü la ngbü fi bala nda de. Angü, baka te Yesu Kurisito je riri ka Me, fü ah ayia akoro aküwa nih ne, fü Me adu aceka nih 'buru, baka züka wü kpapa ka-ye, teka ngü de te Yesu mere la.

²⁰ Amba, baka te wü kpapa le, gü ba, ani ngbü dela emere siti ngü, nda-ani de ne, fü Me ayia ato ta Riri ka-ye fü ewü gömö Müse, o nga ngü ka Adama ra eyi fa sü. Me to Riri la, neh teka ne? Teku asere nga mere bi wü siti ngü ka wü kpapa, te ewü ngbü emere ne, fü ewü. Baka te Riri koro, fü wü kpapa ayia awu, gü ba, maguma Me nzu eyi eküte ani fa sü, angü ani ngbü emere siti ngü. Amba Me le ta kpah de wü kpapa wu, gü ba, ni ti eyi aboro mere bi wü siti ngü, te ewü ngbü emere ne, te ewü le züka ngü de te Yesu mere ne eyi la.

Wü di engu wüna, dela ngü te ma ele amala fü yi. Fanü, siti ngü ka wü kpapa füh kotö ne zu eyi fa sü. Amba wazi lele ka Me fa wü siti ngü la 'buru ka. ²¹ Baka te wü kpapa füh kotö ne ngbü eyi ekpi teka siti ngü, te ewü ngbü emere ne, fü Me ayia awu cinga ewü, fü ah ayia atima Yesu Kurisito, teka aküwa ewü. Te di bala, te nih le ngü ka Miri ka-nih Yesu Kurisito eyi la, Me ena adu aceka nih baka züka wü kpapa ka-ye. Fü engu aküwa nih fi mere badi.

6

Dene ngü teka nih, wü kpapa ka Yesu, ah le de nih to te-nih teka adi emere züka ngü

¹ Wü di engu wüna, nih mere e afi nga ngü, gü ba dene, "Nih ti eyi amere wü *siti ngü baka te nih le, angü Me ena aboro siti ngü ka-nih, teka *züka maguma ye," ne, nih mere e afi ngü bala de. ²⁻⁴ Te yi ngbü efi ngü la bala la, dela ka-ye siti fingangü, angü ah ti fü nih angbü fi bü da emere wü siti ngü ne de. Nih fi la nga *babatiza, de te wüh to fü nih ne. Te wüh ngbü eto babatiza fü nih, nih gü ba, nih lala eyi eküte Yesu. Gbü ngü la, ah ge baka te nih kpi eyi, kpah baka Yesu Kurisito te kpi, fü ewü ati nih tundu de ewü. Te di bala, nih ena adu kpah angbü emere wü diri ngü, te nih ce eyi ne, baye baye? Kpah bala, baka te nih zükü eyi tundu de wü Yesu

* 5:12 5:12 Mü ena amaka ngü la gbü Gina Ngü 2:17; 3:6; 3:17-19.

Kurisito ne, ah le fü nih adu angbü emere wü siti ngü tîne de, angü nih ka-nih eyi ezükü guvu Yesu. Engu zükü eyi gbü kpi, teka mere wazi ka Wö ye. Te di bala, ah le de nih rü kpekpeke. Nih mere e adu angbü emere siti ngü tîne de. Angü nih fü te-nih eyi, teka adi emere züka ngü. ⁵ Wü di enga wüna, ah le de nih lala eküte Yesu Kurisito, angü ah ge baka te nih kpi eyi tundu de wü Yesu. Tek a ngü la, Me ena adu azükü nih kpah baka Yesu. Te di bala, de nih mere e adu amere siti ngü tîne de.

⁶ Gbü sikipi te wüh bere Yesu tete füh *rü gbegete, ah ba e te nih kpi tundu de wü Yesu, angü nih lala eyi eküküte. Te di bala, Yesu to wazi ye la eyi fü nih, teka fü nih afa siti ngü di. Nih ti adu angbü labi ka siti ngü tîne de. ⁷ Angü te kpara kpi eyi tundu ake Yesu la, ah ti adu amere siti ngü tîne de. ⁸ Fanü fanü, baka te nih kpi eyi, de siti ngü ka-nih, tundu de wü Yesu ne, nih ti eyi awu, gü ba, nih ena amaka *küküwa ka fi mere badi te gara kpakaka.

⁹ Wü di enga wüna, baka te nih lala eyi eküte Yesu ne, nih ti eyi awu, gü ba, Me zükü Yesu Kurisito gbü kpi eyi. Engu ti adu akpi nda tîne de, angü engu fa wazi kpi eyi. ¹⁰ Kpi de te engu kpi kpa füh rü gbegete ne, engu kpi teka aküwa nih, wü kpara, gbü siti ngü ka-nih 'buru. Engu ti adu akpi nda tîne de. Titiene engu ladü eto tadu te Me, agbü sü ka Me agbü kpi.

¹¹ Wü di enga wüna, ngü ka-yi kpah baka nda Yesu, angü yi ce siti ngü eyi, du lala eyi eküte Yesu. Te di bala, gümü siti ngü mere e adu ake yi tîne de. Ah le de yi ngbü fi bü da emere wü ngü, te ngbü ereke gbü jia Me. ¹² Te di tîne eyi bala ne, yi mere e ace te-yi, adi emere siti ngü, baka te maguma yi ngbü ele ne, tîne de. Angü fanü fanü, küte yi la ngbü eyi emere siti ngü. ¹³ Yi mere e ace te-yi adi emere siti ngü, baka te yi ngbü ele ne tîne de. Angü yi baka kpara te zükü gbü kpi, teka ngü ka Yesu Kurisito. Te di bala, ah le de yi rü kpekpeke, fü yi ato te-yi fü Me, angbü emere wü ngü de te ena areke gbü jijia. ¹⁴ Yi mere e angbü labi ka siti ngü tîne de, angü Me to wazi eyi fü yi, teka fü yi adi emere züka ngü, te ena areke gbü jijia na, di. Angü yi küwa eyi teka züka maguma ka Me. Ah teka ngü ka wü riri ka gele, te yi ngbü emere ne, nda de.

¹⁵ Gara kpara ti eyi amala, gü ba, "Baka te Me küwa nih eyi teka züka maguma ye ne, ah le de nih ce ngü ka riri ace, fü nih adu angbü emere siti ngü, baka te nih ngbü ele. Angü Me ti eyi aboro siti ngü la." Dela züka fingangü? Ngü bala ma! Dela ka-ye siti fingangü! ¹⁶ Ta gügü, o yi to maguma yi fü Yesu la de ne, yi to ta te-yi 'buru adi emere wü siti ngü, angü yi ta

de wü labi ka siti ngü. Yi ena akpi ta akpi teka siti ngü ka-yi la fanü. Amba titine Me fü yi eyi baka wü di ye. Te di bala, ah le fü yi ato te-yi 'buru 'buru, teka adi emere wü züka ngü, te ngbü ereke gbü jia Me. ¹⁷ Gbo nga e fü Me, angü yi de labi ka siti ngü tîne de! Angü yi le ngü ka Me de maguma yi 'buru, teka ngari Me, ta te wüh ri yi di ne. ¹⁸ Angü Me furu yi gbü ku ka siti ngü, ta te i yi ne, eyi. Fü ah adu afü yi, ao baka labi ka-ye, teka fü yi adi emere züka ngü. ¹⁹ Ma ngbü emala nga labi fü yi sene baka ngü mani, angü ma wu eyi, gü ba, jia yi mba teka ngü ka Me mbi mbi la de. Ta gügü, yi to te-yi 'buru 'buru, teka angbü emere siti ngü ka lümü, te Me le de. Fü wü siti ngü ka-yi asibi ta cu afa sü. Amba titine, ah le de yi to te-yi 'buru 'buru, teka adi emere züka ngü, te ena areke gbü jia Me, angü yi tîne eyi de wü labi kaka.

²⁰ Ta gügü, te yi ngbü labi ka siti ngü ne, yi ngbü ta emere wü ngü ka lümü, baka te yi ngbü ele. Wazi yi, ta te yi ena angbü emere züka ngü di ne, nda ma. ²¹ Yi maka ta gara züka ngü eyi gbü ngü te yi ngbü emere la? Yi maka de. Angü takpa ta te wüh ena ato fü yi teka ngü la, ah de kpi. ²² Titiene Me furu yi gbü ku ka siti ngü la eyi. Fü ah adu afü yi baka wü labi ka-ye. Fü ah ato wazi fü yi, teka fü yi angbü emere züka ngü, te ena areke gbü jijia, di. Yi ena adu amaka züka takpa gbü ngü la fanü fanü, angü Me ena aküwa yi agbü sü ka-ye agbü kpi, fi mere badi. ²³ Mene kpara te ngbü fi bü emere siti ngü, gara takpa te wüh ena ato fefe nda ma. Ah ena akpi, fü ewü aza engu agbü wa, fi mere badi. Amba, mene kpara te to maguma ye eyi fü Miri ka-nih Yesu Kurisito la, Me ena ato mere züka ngü fefe, teka *züka maguma ye. Fü engu aküwa fi mere badi.

7

Dene ngü te nih küwa esa wazi ka Riri ka Müse tete

¹ Wü di enga wüna, ma wu eyi, gü ba, yi wu Riri, ta te Me to fü *Müse ne, eyi reke areke. Amba titine yi ngbü tîne esa *Riri ka Müse la nda-yi de, angü yi kpi eyi tundu de wü Yesu. Wayi, ah le ta de yi di emere Riri la, o yi di la ezükü. Amba baka te yi kpi eyi tundu de wü Yesu ne, yi ti adu angbü esa wazi ka Riri la tîne de. ²⁻³ Yi fi la ngü ka wü rüse, te di esaka watı ye. Riri mala, gü ba, ah le de engu o jia ye nzö eküte watı ye. Te wü rüse la ngbü ake gara komoko, o watı ye na di la ladü de jia ye la, wü kpara ena amala, gü ba, wü rüse la mere *siti ngü eyi. Amba, te watı ye na kpi eyi la, riri te ena adu atiri engu tîne ma.

Engu ti eyi adu aza gara komoko ka-ye. Te ah bala la, wüh ena adu amala, gü ba, engu mere kpah siti ngü eyi? Ah bala de. ⁴ Wü di enga wüna, ngü ka-nih ka-ye kpah bala. Nih de wü kpara, te nih ngbü esa Riri ka Müse, nda-nih tine de, angü nih kpi eyi tundu de wü Yesu. Nih ka-nih tine eyi de wü *kpara ka Yesu *Kurisito. Angü Yesu Kurisito fa nih eyi gbü ngü ka Riri la, gbü sikipi ta te engu kpi tete füh *rü gbegete, fü Me azükü engu gbü kpi la. Baka te nih di eyi wü kpara ka Yesu ne, ah le de nih di emere wü züka ngü, te ngbü ereke gbü jia Me, te nga wü sikipi 'buru. ⁵ Ta gügü, o nih to maguma nih fü Yesu la de ne, nih ngbü emere siti ngü, baka e te nih ngbü ele. Angü gümü wü siti ngü, ta te Riri ka Müse ngbü etiri te nih ne, du ngbü emere nih efa sü. Te di bala, nih ngbü dela ta egiri nga kpi. ⁶ Angü ta gügü Riri ka Müse i nih gbü ku ka siti ngü. Nih giri kaje teka aje Riri ka Müse la tete ma, nih maka nda-nih de. Amba titine, nih ti agiri kaje tine de, angü *Nzila Wazi Me ngbü eyi emaguma nih, da eto wazi fü nih, teka fü nih adi eje ngü ka Me di mbi mbi. Angü nih ngbü ta esa wazi Riri ka Müse. Amba titine, nih ngbü esa wazi ka Riri la tine de. Me küwa nih gbü siti ngü la eyi, teka ngü ka kpi ka Yesu, angü nih kpi eyi tundu de wü Yesu.

⁷ Wü gara kpara ti eyi afi ngü, gü ba, te Riri ka Müse ngbü eto gümü siti ngü emaguma kpara la, te ah bala, Riri ka Müse ka-ye nda esiti. Yi mere e afi nga ngü bala de! Angü Riri ka Müse to siti ngü emaguma kpara nda de. Ah ka-ye de gümü siti ngü, te di emaguma nih, te ngbü efiti nih me-ye. Amba Riri ka Müse ngbü esere fü nih, gü ba, ngü la de siti ngü. Angü ta te ma ngbü ekpi gümü e ka wü bu ra ne, ma wu ta, gü ba, ngü la de siti ngü ne, nda-ra de. Kpah bala, fü ra adu atanga ngü la gbü Riri ka Müse, gü ba, "Mü mere e ao gümü e ka kiri mü de."* Fü ra adu awu, gü ba, ma mere siti ngü eyi. ⁸ Amba, baka te ma tanga ngü la, ma ce da eo gümü e ka wü bu ra eyi? Ma ce nda-ra de! Gümü e ka wü bu ra la du ngbü eke ra tine efa sü. Amba, teka te yi wu Riri ka Me, ta te engu to fü Müse, de ne, yi ti kpah awu, gü ba, ani ngbü emere siti ngü ne, nda-yi de. ⁹ Ta gügü, te ma wü Riri ka Müse nda-ra de ne, ma ngbü ta efi nda-ra, gü ba, ma kara de züka kpara. Amba, baka te ma du tanga ngü, te gü ba, "Mü mere e ao gümü e ka kiri mü de," ne, fü ra adu awu, gü ba, amba ma ngbü ta neh emere siti ngü. Angü ma du wu eyi, gü ba, Me ena ato kuru te ra, fü ngü ka-ra anza! ¹⁰ Ma fi nda-ra ta,

gü ba, ma ena aküwa teka Riri ka Müse la, angü ma ngbü ta emere Riri la ereke areke. Tine sidi sidi, fü ra adu awu, gü ba, ma ti aküwa teka Riri la nda-ra de. Angü ma mere wü ngü, de te Riri la ngbü ele ne kpini kpini, nda-ra de. ¹¹ Ta te ma ngbü efi nga Riri la, fü gümü siti ngü de emaguma ra la akpo da efiti ra, fü ra akpo da emere siti ngü. Te di bala, dela eyi si-ngü ta te Me ena ato kuru te ra tete na ne.

¹² Dela ngü te ma le amala fü yi kpekpeke, gü ba, angü Riri ta te Me to fü Müse ne, ah ka-ye de züka Riri! Siti ngü gbügbü na nda ma! Riri la ngbü esere wü züka ngü, de te ngbü ereke gbü jia Me!

¹³ Gara kpara ti eyi ayi-ta ra, gü ba, te Riri ka Müse ka-ye 'buru mbi la, kpara ena amaka kpi gbügbü na, neh baye baye? Ngü la bala nda de. Ngü te ena ato kpi fü nih, ah de ngü ka Riri ka Müse nda de. Ah ka-ye de gümü siti ngü, te di emaguma nih. Angü wü Riri la ka-wü 'buru mbi, amba wü Riri la ngbü esere fü nih, gü ba, wü ngü de te nih ngbü emere la, wüh 'buru de siti ngü. Te di bala, nih ti eyi awu, gü ba, wü siti ngü ka-nih la, siti nih eyi gbü jia Me 'buru 'buru.

Dene si-ngü, te maguma nih ngbü tete 'basu 'basu

¹⁴ Wü di enga wüna, nih wu eyi, gü ba, Me to ta Riri la gömō *Müse, teka de ah to wü züka ngü emaguma nih. Amba teka ngü ka-nih, nih ka-nih de kpara ka küte. Fü wü *siti ngü de emaguma nih la angbü efiti nih, adu ao nih labi ka-ye. Angü wazi nih, te nih ena afa ngü la di ne, nda ma. ¹⁵ Nih wu zu ngü, de te nih ngbü emere ne, nda-nih de. Nih le ta eyi adi emere wü ngü, te ena adi ereke gbü jia Me, amba wazi nih, te nih ena angbü emere ngü la di ne, nda ma. Nih le ta kpah eyi ace wü siti ngü, de te nih ngbü emere ne, amba gümü wü siti ngü, de emaguma nih ne, ngbü fi bü efiti nih, fü nih angbü fi bü emere wü siti ngü la. ¹⁶ Te di bala, wü siti ngü, de te nih ngbü emere ne, nih le ta adi emere bala nda-nih kü de, angü *Riri ka Me gü tamu züka kaje eyi fü nih. ¹⁷ Fingängü ka-nih, nih le ta ace da emere wü siti ngü. Amba nih du ngbü emere wü siti ngü la, neh teka ne? Nih ngbü emere wü siti ngü la, kükürü de, angü gümü siti ngü la ladü emaguma nih, te ngbü efiti nih. ¹⁸ Nih wu kpo, gü ba, wazi nih, te nih ena amere züka ngü di de tete-nih ne nda ma, angü nih de kpara ka küte. Te di bala, nih le ta amere züka ngü, te nga to riri te nih maka ne, amba wazi nih nda ma. ¹⁹ Wü züka ngü, de te nih

* 7:7 7:7 Mü ena amaka ngü la gbü buku ka Gogo ka wü Yisaraye 20:17, bete Manda nga Riri 5:21.

ngbü ele amere ne, nih ti amere de. Amba nih du ngbü emere ka-nih fi bü wü siti ngü, de te nih le de ne. ²⁰ Te nih ngbü eyi emere wü siti ngü, de te nih le de ne la, ah ta de ngü te nih le bala ne de. Amba maguma nih ka-ye 'basu 'basu. Ah ka-ye de gümü siti ngü de emaguma nih ne, te ngbü emere nih, fü nih angbü emere wü siti ngü la.

²¹ Ngü te nih wu kpo, ah dene. Te nih le amere wü züka ngü, de te Me ngbü ele ne la, da nih te nih ena amere nda ma. Angü gümü siti ngü de emaguma nih ne, ngbü fi bü eza nih, eto gbü siti ngü la. ²² Maguma nih ngbü ele Riri ka Me cu efa sü. ²³ Amba wazi gümü siti ngü de emaguma nih ne, du ngbü vügu ka züka ngü ka Me de emaguma nih ne. Angü gümü siti ngü de emaguma nih la ngbü eo nih labi ka-ye. Fü nih angbü emere wü siti ngü teka ngü la.

²⁴ Wü gara yi ngbü efi, gü ba, "Ngü la ngbü eto mere cinga fü ani efa sü. Kpara te ena ato wazi fü ani, teka fü ani adi efa wü siti ngü de emaguma ani ne di, neh da? Angü ani ena akpi gbü wü ngü de bala." ²⁵ Amba ah le de nih gbo nga iri Me, angü Miri Yesu *Kurisito ena ato wazi la fü nih me-ye.

Wü di enga wüna, dela ngü te ma le amala fü yi, angü maguma nih ka-ye 'basu 'basu. Teka ngü la, nih le ta eyi amere Riri ka Me areke areke, amba gümü siti ngü du ngbü efiti nih me-ye, fü nih angbü emere wü siti ngü la.

8

Dene ngü teka wazi ka Nzila Wazi Me emaguma kpara

¹ Wü di enga wüna, Me ti ato kuru te nih tine de, angü nih lala eyi eküte Yesu *Kurisito. ² Kükürü de, angü *Nzila Wazi Me ngbü eto wazi fü nih me-ye, teka fü nih afü maguma nih, teka ngü ka Yesu Kurisito. Fü nih adu ace da emere wü *siti ngü, de te ena ato kpi fü nih ne. ³ Wazi nih teka amere *Riri ka Me ne di, nda ma, angü maguma nih ka-ye 'basu 'basu. Te di bala, nih ti areke ngü ka-nih gbü jia Me de tete-nih nda-nih de. Amba Me maka kaje, teka areke nih gbü jia ye di, ne eyi. Angü engu tima Ye ye, Yesu Kurisito, de engu koro füh kotö ne baka nih, kpara ka küte, teka de engu fa nih gbü siti ngü ka-nih. Angü Me za siti kuru, ta te nih ena amaka, teka liya ka siti ngü ka-nih ne, o eyi 'buru gbü nzö Yesu Kurisito. ⁴ Me mere ngü la fü nih bala, teka fü nih amaka wazi kpaka Nzila Wazi Me, fü nih angbü emere Riri ka Me di mbi mbi mbi. Angü nih ena angbü eje 'duwa ngü ka Nzila Wazi Me de emaguma

nih ne, fü nih ace ngü ka gümü siti ngü la 'buru.

⁵⁻⁶ Te yi ngbü emere wü ngü te nga gümü wü siti ngü de emaguma yi ne la, yi ena angbü eo fingangü ka-yi, adi emere fi bü mene wü ngü, te ena angbü ereke gbü jia yi. Te di bala, yi ena amaka kpi gbü ngü la. Amba te yi ngbü emere züka ngü, baka te Nzila Wazi Me ngbü emala fü yi ne, yi ena ao fingangü ka-yi 'buru, teka angbü emere wü züka ngü, te ena areke gbü jia Me. Me ena ato gu ngü ka-ye emaguma yi, fü ah aküwa yi fi mere badi. ⁷ Te yi o maguma yi, angbü emere wü siti ngü, de te yi ngbü ele ne la, ah ge baka te yi fü te-yi eyi vügu ka Me tete, yi le aje Riri ka Me de. Te di bala, yi mere e afi, gü ba, ani ti eyi amere züka ngü gbü jia Me ne, de. ⁸ Angü, te yi ngbü emere bü mene wü siti ngü, te yi ngbü ele ne la, ngü ka-yi ti areke gbü jia Me nda de!

⁹ Wü di enga wüna, ngü ka wü *kpara ka Yesu bala nda de. Yi mere e ato te-yi, angbü emere wü siti ngü, baka te yi ngbü ele, ne de. Angü yi ce wü siti ngü la eyi. Yi to maguma yi eyi, teka ale ngü ka Nzila Wazi Me. Angü Yesu Kurisito tima Nzila Wazi Me la, de ah di engbü emaguma yi. Angü, te Nzila Wazi Me la ngbü emaguma mü de la, mü de kpara ka Yesu Kurisito nda-mü de. ¹⁰ Yesu Kurisito ngbü engbü cu emaguma nih. Te di bala, te küte nih kpi teka siti ngü ka wü kundu kundu nih la, kuru nih ena aküwa aküwa fi mere badi, angü Me reke nih, o eyi mbi gbü jia ye. ¹¹ Me de kpara te zükü Yesu Kurisito gbü kpi me-ye. Te di bala, te Nzila Wazi Me ladü emaguma nih to, Me ena azükü nih gbü kpi, fü ah ato to küte fü nih, kpah baka ngü te engu mere teka Yesu Kurisito. Kükürü de, angü Nzila Wazi Me eyi ladü emaguma nih.

¹² Wü di enga wüna, ah le fü nih adi fi bü emere wü ngü, te ena adi mbi gbü jia Nzila Wazi Me. Nih mere e angbü emere mene wü siti ngü, ta te maguma nih ngbü ele ne, de. ¹³ Angü, te yi le ngü ka gümü siti ngü de emaguma yi ne la, Me ena ato kuru te yi ato. Te di bala, ah le de Nzila Wazi Me to wazi fü yi, teka fü yi ace gümü siti ngü de emaguma yi la asidi, fü yi aküwa.

¹⁴ Wü di enga wüna, dene ngü te ma le amala fü yi, te yi ngbü emere ngü gbü wazi ka Nzila Wazi Me la, amba yi eyi zu de wü di Me fanü fanü. ¹⁵ Me to Nzila Wazi ye fü nih, neh teka ne? Ah teka de ah o yi baka labi, fü yi adi ekpe cücürü na akpe? Ah bala de! Me to Nzila Wazi ye fü nih, teka afü nih wü di ye tete. Te di bala, Nzila Wazi la ngbü eto wazi fü nih, fü nih angbü ei Me di, gü ba, "Wüba, wüba!" ¹⁶ Angü Nzila Wazi Me la ngbü esere ngü emaguma nih, gü ba, nih de wü di Me fanü. ¹⁷ Baka

te nih di de wü di Me ne, Me ti aküwa nih fi mere badi ne de? Engu ena aküwa nih aküwa, angü nih de wü di engu ni ye Yesu Kurisito. Dela si-ngü te nih ngbü emaka cinga tete na füh kotö ne, kphah gegege baka cinga, ta te wüh ngbü eto te Yesu Kurisito ne. Te di bala, nih ena amaka *küküwa te gara, fü nih adu angbü de wü Yesu agbü sü kaka-na agbü kpi, fi mere badi.

Dene ngü ka tadu, te Me ena ato fü nih agbü kpi

¹⁸ Wü di engu wüna, fanü fanü nih ngbü eyi ezü mere cinga füh kotö ne. Amba, te mü ngbü efi nga mere tadu, te Me ena ato fü nih te gara agbü kpi ne, ngü ka cinga la ena angbü gbü jia mü ba engu ngü cükü'daye. ¹⁹ Angü te gara, Me ena afü nih wü di ye tete, fü ah ato mere wazi fü nih, baka nda Yesu Kurisito. Wü e 'buru, te Me mere füh kotö ne, ngbü eci nga sikipi la. ²⁰⁻²¹ Angü Me reke wü e füh kotö ne, o ewü ta 'buru mbi. Amba titine ngü ka wü e la du siti eyi 'buru. Ah siti bala teka ne? Ah de siti ngü ka wü e la? Ah bala nda de! Ah de ngü ta te Me kina *Adama, dünda de wü e la 'buru 'dö biringbö, teka *siti ngü ta te Adama mere ne. Teku ngü la, wü e füh kotö ne ngbü eyi 'buru ekpi akpi. Amba Me le de ngü la ngbü bala fi mere badi ne, nda de. Angü gbü sikipi te Me ena afü nih, akoro di wü di ye tete, baka Yesu Kurisito la, Me ena adu afü kphah ngü ka wü e la 'buru. Fü ewü adu akoro kphah to wü e, te ewü ti akpi tine de. ²² Ah kpo gbü sikipi te Adama dürü ngü tete, zalü anü akoro di enatikine dene, wü e 'buru, te nih ngbü eceka de füh kotö ne, ngbü emaka cinga, baka wüüse te bubu ngbü ekeke akeke. Wüh ngbü 'buru eo jia wü teka sikipi, te Me ena afü ngü ka-ewü tete, akoro di toto.

²³ Nih ngbü kphah emaka cinga bala. Amba Nzila Wazi Me, te ngbü engbü emaguma nih ne, ngbü esere fü nih, gü ba, nih ka-nih zu de wü di Me, te engu fe nih eyi, teka aküwa nih aküwa. Nih ngbü eo jia nih, teka sikipi te Me ena ato wazi fü nih, fü nih angbü baka wü didi na fanü fanü, angü engu ena ato küte fü nih, te ti akpi tine de, baka nda Yesu Kurisito. ²⁴ Me küwa nih ka-ye eyi. Te di bala, ah le fü nih awu, gü ba, engu ena ato kphah to küte fü nih. Ah le de nih di eo jia nih tine teka ngü la, angü nih maka to küte, te Me ena ato fü nih te gara ne, nda-nih la de. Dela ngü te nih ena angbü eo jia nih tete. ²⁵ Te di bala, ah le de nih di eo jia nih, teka sikipi de te Me ena ato to küte la fü nih tete na ne, angü nih maka züka ngü la nda-nih la de.

Nih rü kpekpeke, da eci nga züka ngü la. Nih mere e andiri de.

²⁶ Me to *Nzila Wazi ye kphah eyi fü nih, de ah di eto wazi fü nih, angü wazi nih ena anza. Te fingangü ka-nih ngbü 'daaa, nih wu kaje, te nih ena ayi-ta Me di, de la, Nzila Wazi Me ena ato wazi fü nih me-ye. Te nih le aku gba fü Me, amba nih wu züka ngü te nih ena amala fefe de la, Nzila Wazi Me la ngbü eyi-ta Me fü nih me-ye.

²⁷ Angü Me wu wü ngü de emaguma nih ne kpo. Fü engu angbü ewu si-ngü, de te Nzila Wawazi na ngbü esere fefe, teka ngü ka-nih ne, ereke areke. Fü engu adi ele ngü la. Kükürü de, angü Nzila Wazi Me la ngbü eyi-ta Me da nih me-ye, teka de Me to wazi fü nih, angü nih de wü kpara kaka-na.

²⁸ Wü di engu wüna, ma ngbü emala fü yi kpekpeke, gü ba, te yi le Me de maguma yi 'buru la, Me ena adi eceka kpi fütanga yi me-ye. Anga te cinga ngbü emere yi efa sü la, engu ena afü wü ngü ka-yi 'buru 'buru baka züka ngü. Kükürü de, angü nih de wü kpara te engu fe nih, teka ngü te engu le me-ye. ²⁹ Angü ta gügü te engu gina, Me mala ta, gü ba, ni ena aküwa nih. Fü engu adu amala kphah, gü ba, ni ena adu afü fingangü ka-nih baka nda Ye ni, Yesu Kurisito. Angü Yesu Kurisito ka-ye de gina Ye Me. Nih nda-nih tine baka wü jaji, te ewü ti füh gü Yesu. ³⁰ Angü Me fe nih eyi kü gügü. Fü engu adu afü nih, ao baka züka wü kpara gbü jia ye. Te di bala, engu ena aküwa nih aküwa, teka fü nih angbü tine de wü Yesu agbü kpi kpala, fi mere badi.

Dene ngü ka mere lele, te Me le nih di, teka ngü ka Yesu

³¹ Wü di engu wüna, yi fi nga ngü la mbi mbi mbi. Te Me le nih eyi bala la, engu ti aceka kpi fütanga nih de? Gara ngü ladü te ena afa nih? A'a, gara ngü te ena afa nih nda ma! ³² Te Me wu cinga nih, fü ah ayia atima biri Ye ye, Yesu, de ah kpi teka aküwa nih. Baka te Me le nih de bala ne, gara züka ngü ena adi kphah ladü, te engu ena awo eküte nih? Ah kpo fi ma. Engu ena ato wazi fü nih de *züka maguma ye, teka fü nih arü di kpekpeke, alala eküküte fi mere badi. ³³ Wü di engu wüna, *Satana ti ato ngbanga nih engagira Me, teka de Me kolo ngü ka-nih ne, nda de. Angü Me fe nih, o eyi mbi gbü jia ye. ³⁴ Angü Yesu Kurisito kpi tüngü nih, fü Me adu azükü engu gbü kpi la. Fü ah adu aza engu, ao ede ye baka Mere Miri. Yesu titine ladü engbü kpala, da eyi-ta Me tüngü nih. Te di bala, Me ti adu ato kuru te nih tine de, angü Yesu Kurisito fa nih gbü ngü la eyi.

³⁵ Wayi, wü di engu wüna, Yesu Kurisito le nih cu fa sü, de maguma ye 'buru. Ah ti ace ngü la nda de. Te wü kpara ngbü eto cinga te nih, anga te tala ngbü emere nih, anga te nih ngbü endoro ngirimu, anga te wü kpara le amörö nih la, ah le de nih wu awu, gü ba, Yesu Kurisito ti ace nih kpo fi de. ³⁶ Nih ti eyi awu ngü la, angü ah kphah baka ngü ta te wü *Davidi ba gbü *Ngari Me, gü ba, "Akoo Me, mere bi wü kpara, te ewü le ngü ka-ye de, ngbü eyi embü ani, da emömörö ani teka ngü ka-ye, baka wü kambiliki, te wazi ewü di ma, angü ani lala eyi gbü ngü ka-ye."* ³⁷ Amba gbü wü ngü 'buru te ngbü emere nih ne, ngü biringbö te ena afa nih nda kü ma. Kükürü de, angü Yesu Kurisito ngbü fi eto wazi fü nih, angü engu le nih fa sü.

³⁸⁻³⁹ Dela ngü te ma le amala fü yi, gü ba, Me ngbü ele nih cu de maguma ye, teka ngü ka Miri ka-nih Yesu Kurisito. Nih ti eyi awu, gü ba, gara ngü te ena aye süka nih de wü Yesu ne, nda ma. Te ah de kpi, anga *küküwa la, Me ngbü fi bü ele nih. Anga te ah di de *siti wü di engu me, anga wü miri ka kotö ne, wü ti aye süka nih de wü Me nda-wü kphah de. Enatikine mere bi wü ngü ladü te ngbü embü nih. Te gara, wü ngü la ena adu azu tine cu afa sü. Amba wü ngü la ti aye süka nih de wü Me nda de. Kphah bala, gara kpara biringbö te ena aye süka nih de wü Me nda kphah ma. Anga kpara füh kotö ne, anga agbü kpi, anga kpa esa tö, ti aye süka nih de wü Me nda kphah de. Te mere bi wü ngü la ngbü emere nih bala la, ah ba ngü de, angü nih wu eyi, gü ba, Me ngbü ele nih de maguma ye 'buru, teka ngü ka Miri ka-nih Yesu Kurisito.

9

Dene ngü te ma ele amala teka nguwa a, wü di engu Yisaraye

¹⁻³ Wü di engu wüna, ma ngbü engbü de mere cinga, teka ngü ka wü di engu wüna, wü *Yisaraye. Angü mere bi ewü le ngü ka Yesu *Kurisito nda-wü de. Ma ngbü eku gba cu de ngura, angü ngü la ngbü ekolo maguma ra esiti. Ma ngbü ele ta de Me to kuru te ra da ewü, aye süka a ake Yesu Kurisito, teka fü wü di engu Yisaraye afü ngü ka-wü, amaka *küküwa ka fi mere badi, angü ma ngbü ele de wüh küwa aküwa. Angü fanü fanü, ma ngbü engbü de cinga teka ngü la, *Nzila Wazi Me wu ngü la kpo!

⁴ Ngü ka wü di engu Yisaraye la to mere cinga fere, angü mere bi ewü le ngü

ka Yesu nda-wü de. Me fe a kü gügü wü di ye tete. Ah sere ta te-ye fü wü kundu a de mere wazi ye. Fü engu ayia anzö *ngüte de wü kundu a la. Fü engu ayia ato kphah *Riri ka-ye fü ewü gömö *Müse. Fü Me ayia asere züka kaje de te wü kundu a la ena adi esama ni, da emere gele kani, Me, tete na ne, kphah gömö Müse. Fü engu ayia akina kina fü wü kundu a la, gü ba, ni ena atima mere kpeke Miri te gara, fü ah akoro aküwa wü. ⁵ Diri wü kpara ka Me ta gügü baka *Abarayama, *Yisaka ake *Yakobo, wüh 'buru de wü kundu a, wü di engu Yisaraye. Kphah bala, Yesu Kurisito, te wüh bi engu füh kotö sene baka nih ne, wüh bi engu kphah gbü nguwa a, wü di engu Yisaraye. Angü Yesu Kurisito fanü de Miri te Me tima engu, teka de ah koro, ah küwa nih füh kotö ne. Engu kphah de Me te ngbü gbü nzö wü ngü 'buru. Nih gbo nga iiri na fi mere badi! Ah di bala!

⁶ Wü gara kpara ngbü efi nda-wü, gü ba, "Te wü di engu Yisaraye le ngü ka Yesu de la, wüh ti aküwa de. Te di bala, mene ngü ta te Me mala fü wü Abarayama, gü ba, 'Ni ena aküwa wü kundu ye te gara aküwa ne,* ah du ce ngü la eyi?" Ah ce nda de. Angü ngü te Me mala eyi, ah ti afü, anga ace, nda de. Amba yi wu awu, gü ba, wü di engu Yisaraye 'buru de wü di Me nda-wü de. Angü Me ena aküwa ka-ye 'duwa mene engu Yisaraye te le ngü ka Yesu eyi ne. ⁷ Yi fi la nga ngü, ta te Me mere fü Abarayama ne. Me fe ta wü di Abarayama eyi 'buru, o ewü baka wü di ye? Ah bala de. Wü di Abarayama fa ta sü. Amba Me mala fü Abarayama, gü ba, "Mene kundu kundu ye, te ni mala nganga fü ye ne, wüh ena abi engu gbü nguwa *Yisaka. Angü ni, Me, fe ka-ni Yisaka."† Te di bala, Me ena afe 'duwa mene wü di engu Yisaraye, te ewü to maguma wü fü Yesu ne, de wüh koro wü di ni, Me. ⁸⁻⁹ Me fe ta Yisaka, neh teka ne? Ah fe engu, angü wü gara wü di Abarayama la, wüh ngbü bi ewü, kphah bü baka te wüh ngbü ebi wü jaji füh kotö ne. Amba ngü ka Yisaka ka-ye kpikpi ye. Angü Me mala ta ngü fü wü Abarayama ake wara ye Sara, gü ba, "Ni, Me, ni ena ato wazi fü Sara, fü engu abi ye komoko."‡ Fü wü Abarayama ayia ao to wü te ngü la. Fü Me ato wazi fü ewü, fü ewü abi Yisaka. Te di bala, wüh bi Yisaka ka-wü gbü wazi ka Me. ¹⁰⁻¹² Kphah bala, te Rebeka, wara Yisaka, di de bu, Me mala fefe na, gü ba, "Ye ena abi wü dadase, 'basu mini wü jaji

* 8:36 8:36 Mü ena amaka ngü la gbü Ci ka wü Davidi 44:22.

* 9:6 9:6 Mü ena amaka ngü la gbü Gina Ngü

17:7-8. † 9:7 9:7 Mü ena amaka ngü la gbü Gina Ngü 21:12-13.

‡ 9:8-9 9:8-9 Mü ena amaka ngü la gbü Gina

Ngü 17:19; 18:1-14; 21:1-5.

komoko. Mene engu, te ena akoro te enga gina ne, ena angbü eje ngü gömö mene de sidi ne.”[§] Wü jaji la 'basu mini de wü di Yisaka. İri gina ta de Esawu. İri mene de sidi ne ta de *Yakobo. Amba Me fe ka-ye Yakobo te di de jaji ne, adu ace Esawu. Me mere ngü la ta bala teka gara züka ngü, anga siti ngü, te ewü mere? Ah bala de. Ah fe Yakobo ka-ye kü gügü, o wüh bi engu la kpah de, angü Me le e ka-ye kü me-ye bala. ¹³ Ah kpah baka ngü de te Me mala gömö gara *mürü dofo, gü ba, “Ni fe Yakobo baka kpara ka-ni. Amba ni le ngü ka Esawu nda-ni de.”* Ah kpah bala, teka wü di engu Yisaraye. Wüh ena adi 'buru wü di Me nda-wü de, 'duwa mene te le ngü ka Yesu Kurisito.

¹⁴ Gara kpara ena afi nda-ye, gü ba, “Me ngbü emere siti ngü, angü engu ngbü efe kpara, fü ah angbü ece wü gara kpara, baka te engu ngbü ele.” Amba ngü la, ah bala nda de. ¹⁵ Angü Me de Mere Miri, te di de wazi, teka amere wü ngü baka te engu ngbü ele. Ah kpah baka ngü ta te Me mala gügü fü *Müse, gü ba, “Fanü fanü, ni ena aküwa mene wü kpara te ni fe ewü, teka *züka maguma ni ne.”[†] ¹⁶ Me ngbü efe wü kpara, neh teka ne? Ah teka te wü kpara la le ngü la de tete-wü? Ah bala de. Ah teka te wü kpara ngbü emere tima kaka ereke areke ne, kpah de. Me ngbü eküwa wü kpara bala, angü engu le me-ye bala, teka züka maguma ye. ¹⁷ Ah kpah baka ngü ta te Me mala ngü fü mere miri ka *Ezepeto, gömö Müse ta gügü, gü ba, “Ni de kpara te to wazi fü ye me-ni, fü ye angbü ba miri ne. Angü ni wu kpo, ga, ye de mürü kögö-nzö, te ye le ngü ka-ni nda-ye de. Amba ni ena agü gü ake ye, zalü te ni ena afa ye tete. Te di bala, wü kpara füh kotö ne ena awu wazi ni, teka ngü de te ni fa ye di la. Fü ewü angbü egbo nga iri ni. Dela si-ngü te ni fe ye tete baka mere miri ne.”[‡] ¹⁸ Te di bala, nih ti eyi awu, gü ba, te Me le eyi la, engu ena aküwa wü kpara teka züka maguma ye. Te engu le nda de la, engu ti eyi ace ewü, fü nzö ewü akoro kpekpeke. Te di bala, wüh ti ale ngü ka-ni, Me, de.

¹⁹ Wü gara kpara ena aga yiki, gü ba, “Amba, te ah bala la, Me ena ato kuru te wü mürü kögö-nzö, neh baye baye? Angü Me ce ewü me-ye, fü nzö ewü akoro kpekpeke ne. Amba, ah de dürü ngü ka wü kpara la nda de.” Fanü fanü, ma ngbü emala fü yi, gü ba, ngü la bala nda de!

²⁰⁻²¹ Ah ka-ye de ngü ka Me, te ngbü efe wü kpara te nga fingangü ka-ye. Gara kpara te ena ari engu nda ma. Angü nih ka-nih mba töndö wü kpara ka kotö ne, nih baka tö ka sila. Wü di engu wüna, sila ti eyi aga yiki fü kpara te fo ye, gü ba, “Ye fo ni bane teka ne?” Ngü bala ladü? Ngü bala nda ma. Kpara te ngbü efo sila ti eyi acö tö, aye süsüka na 'basu. Fü ah aza gara tö la, afo züka sila gbügbü, te su fa sü. Fü ah aza gara, afo baka endu-fara-e. Te di bala, endu-fara-e la ti eyi amala, gü ba, “Wüh fo ni nda-wü bala teka ne?” Gara kpara ladü te ena aga yiki fü kpara te ngbü efo wü e la, gü ba, “Ye mere bala teka ne?” Gara kpara nda kü ma. Te di bala, Me ti eyi amere ngü de nih, baka te engu ngbü ele, angü engu ngbü efe wü kpara, te engu le aküwa ewü ne, me-ye.

²² Angü fanü fanü, maguma Me nzu eyi, teka *siti ngü te wü kpara ngbü emere füh kotö ne. Ah le ta eyi asere wazi ye, bete maguma ye te nzu ne, fü wü kpara füh kotö ne. Amba engu du gu maguma ye la agu, teka mere bi wü re ne, angü engu ngbü eci nga *adu sikipi, teka ato kuru di te siti wü kpara la. ²³ Me le ato kuru te wü kpara kere de, neh teka ne? Me ce ngü la me-ye bala, angü engu le asere lele ka-ye, teka aküwa nih, wü kpara te engu fe, teka züka maguma ye. ²⁴ Angü Me fe wü kpara ka-ye, te engu le aküwa ne, nzö bü esüka a, wü di engu *Yisaraye, ne de. Ah fe kpah eyi esüka wü *ganzi kpara.

²⁵⁻²⁶ Wayi, Me ti eyi afe wü kpara, baka fingangü ka-ye. Ah kpah baka ngü ta te engu mala fü *mürü dofo Osey, gü ba, “Ta gügü, ni le wü de. Ni gü ba, ‘Wü de wü kpara ka-ni de.’ Amba enatikine, ni du fü wü eyi wü kpara ka-ni tete. Kpah bala, ni du le wü eyi de maguma ni 'buru. Te di bala, wü ena agbo nga iri ni, Me, da emala, gü ba, ‘Ani de wü di ni, Me.’”[§]

²⁷ Amba teka wü di engu wüna, wü di engu Yisaraye, *mürü dofo Yisaya mala ngü teka ewü, gü ba, “Ngü ma, te wü di engu Yisaraye sibi di bü fa sü baka siki la, amba mene ewü te ewü ena amaka *küküwa ne, wüh fa sü nda-wü de. Wüh ena adi mba cüküdaye. ²⁸ Angü Me ena ato kuru te mene wü kpara, te ewü le ngü ka-ni de, kpah ge baka ngü ta te engu mala.”*

²⁹ Ah kpah baka gara ngü te Yisaya mala, teka wü di engu Yisaraye, gü ba, “Mere Me du wu cinga ka-ani eyi, fü engu ayia

§ 9:10-12 9:10-12 Mü ena amaka ngü la gbü Gina Ngü 25:23. * 9:13 9:13 Mü ena amaka ngü la gbü buku ka Malaki 1:2-3. † 9:15 9:15 Mü ena amaka ngü la gbü buku ka Gogo ka wü Yisaraye 33:19. ‡ 9:17 9:17 Mü ena amaka ngü la gbü buku ka Gogo ka wü Yisaraye 9:16. § 9:25-26 9:25-26 Mü ena amaka ngü la gbü buku ka Osey 1:10bete 2:23. * 9:28 9:28 Mü ena amaka ngü la gbü buku ka Yisaya 10:22-23.

aküwa mba du wü jaji guvu ani ne, teka züka maguma ye. Angü, te ah ena adi ta bala de la, de bane nguwa ani nza eyi 'buru, baka nguwa wü kpara ka *Sodomo bete Gomora, ta te Me mörö ewü 'buru 'buru, teka siti ngü ka-ewü ne."†

Dene ngü ka kaje ka küküwa, te di ka-ye kü biringbö

³⁰ Yi fi la nga ngü ka wü gara kpara füh kotö ne. Ta gügü, wüh gürü ngü teka Me nda-wü de. Amba enatikine, Me küwa mere bi ewü eyi. Ah reke ngü ka-ewü eyi gbü jia ye, teka te wüh to maguma wü eyi fü Yesu Kurisito. ³¹ Amba teka wü di engä *Yisaraye, wüh le nda-wü areke ngü ka-wü gbü jia Me de wazi wü. Fü ewü angbü efi, gü ba, "Te ani ngbü emere wü *Riri ka Me 'buru ereke areke ne, ani ka-ani eyi züka wü kpara gbü jia Me." Amba wüh mere ngü la bala ma! Ngü ka-ewü reke gbü jia Me nda fi de. ³² Ngü ka-ewü reke ta gbü jia Me de, neh teka ne? Angü wüh to maguma wü fü Me nda-wü de. Wüh le adi ereke ngü ka-wü gbü jia Me de tete-wü. Kpah bala, wüh le awu singü teka kpi ka Yesu ne, nda-wü kpah de. Ngü ka kpi ka Yesu la ngbü fü ewü baka mere rü te tiri kaje. Wüh le ta de ani nzi asidi, fü ewü amaka mere cinga gbü ngü la. ³³ Ngü ka-ewü ena adi kpah baka ngü ka gara wü kundu a ta gügü, te Me mala nga ewü fü *mürü dofo Yisaya, gü ba, "Ni fe züka Miri eyi, te di baka kpeke rü kambü, teka de engu mere tima ka-ni agbü Yerüsalemä. Te wüh le ngü ka rü la de la, rü la ena atiri kaje fü mere bi wü kpara, angü wüh le ta de ani nzi rü la asidi, amba wazi ewü nda ma, fü ewü atü 'buru kötö. Amba mene wü kpara te wüh ena azoro rü la de kpa wü 'basu mini, wüh ena aküwa me-wü."‡

10

¹ Wü di engä wüna, ma ngbü eku gba fü Me cu de maguma ra, gü ba, ah le ta de engu küwa wü di engä wüna, wü *Yisaraye, aküwa. ²⁻³ Ma ngbü emala fü yi, gü ba, wü di engä Yisaraye zoro riri ka gele ka-wü de kpa wü 'basu. Wüh gü ba, ani le ngü ka Me eyi, amba züka to kaje, de te Me reke o, teka de wü kpara ngbü di gbü jia ni mbi ne, wüh le nda-wü de. Angü wüh ngbü efi nda-wü, gü ba, te ani mere wü ngü gbü *Riri ka Müse ne 'buru la, ngü ka-ani ti eyi areke gbü jia Me. ⁴ Ah le de wü kpara ce mene kaje, de te ewü le akoro di mbi gbü jia Me,

teka ngü ka riri ka gele ne, ace. Amba ah le de wüh le duu ngü ka Yesu *Kurisito, teka fü ngü ka-ewü areke di gbü jia Me.

⁵ Mere bi wü di engä wüna, wü di engä Yisaraye, le adi ereke ngü ka-wü gbü jia Me de wazi wü. Wüh ngbü emala, gü ba, "Duwa kpara te ena amere wü riri ka gele 'buru mbi, ah ena aküwa gbü ngü la me-ye." Angü wüh gü ba, "Dela ngü ta te *Müse mala fü ani gbü *Ngari Me ta gügü." ⁶ Amba züka kaje te kpara ena akoro di mbi gbü jia Me ne, ah ka-ye dene. Ah le de mü to maguma mü fü Yesu Kurisito. Mü mere e afi, gü ba, ngü la ka-ye kpekepe ne de. Mü mere e afi, gü ba, te ah bala, ah le de kpara li kpa gbü kpi, teka ato maguma ye fü Yesu Kurisito ne, kpah de. ⁷ Kpah bala, mü mere e afi, gü ba dene, ah le de kpara ri kpa esa tö, agbü mbükü, teka fü ah anü ato maguma ye fü Yesu Kurisito ne, kpah de. ⁸ Ah le de mü fi nga si-ngü, ta te wüh ba gbü Ngari Me ne mbi mbi mbi. Angü wüh ba, gü ba, "Ah le de mü di eje Ngari Me, da emere. Amba te engä gina, ah le de mü le ngü ka Me cu de maguma mü 'buru, fü mü adu amala cu de komö mü, gü ba, 'Ni ena amere wü ngü la.' ⁹ * Ngü ka Me la, ah de ngü ka Yesu Kurisito, te a ngbü eri wü kpara di ne. ⁹ Si-ngü gbü ngü la, gü neh fe? Si-ngü gbü ngü la ena adi bane. Te mü to maguma mü eyi fü Yesu, fü mü amala mbölö, gü ba, "Yesu Kurisito de Miri ka-ni," fü mü ale kpah, gü ba, "Me zükü engu eyi gbü kpi fanü fanü la," mü ena aküwa ka-mü aküwa. ¹⁰ Angü, te nih to maguma nih eyi 'buru 'buru fü Yesu la, ngü ka-nih ena areke gbü jia Me. Kpah bala, te nih mala ngü ka Yesu mbölö, gü ba, "Nih to maguma nih eyi fefe la," nih ena amaka *küküwa. ¹¹ Ah baka ngü te wüh ba gbü Ngari Me, teka ngü ka Yesu, gü ba, "Te mü zoro engu de kpa mü 'basu la, mü ena aküwa aküwa."†

¹² Wü di engä wüna, ngü ne, ah teka wü kpara 'buru, anga mü de engä Yisaraye, anga mü de *ganzi kpara. Wü kpara 'buru te wüh to maguma wü fü Me, engu ena aküwa ewü aküwa, anga te ewü ena adi de wü di engä Yisaraye, anga wüh ena adi gbü nguwa wü ganzi kpara. Angü Yesu Kurisito de Miri ka-nih 'buru me-ye. Engu ena ato wazi fü mene wü kpara te ewü ngbü eku gba fefe na. ¹³ Angü fanü fanü, mene kpara te ena aku gba fü Me, de ah küwa ni la, kpara la ena aküwa aküwa.‡

¹⁴ Gara kpara ena angbü de cinga, gü

† 9:29 9:29 Mü ena amaka ngü la gbü buku ka Yisaya 1:9. ‡ 9:33 9:33 Mü ena amaka ngü la gbü buku ka Yisaya 8:14; 28:16. * 10:8 10:8 Mü ena amaka ngü la gbü buku ka Manda nga Riri 30:14. † 10:11 10:11 Mü ena amaka ngü la gbü buku ka Yisaya 28:16. ‡ 10:13 10:13 Mü ena amaka ngü la gbü buku ka Yüwele 2:32.

ba, "Wü di engä Yisarayelee ena aku gba fü Miri Yesu, de ah küwa ani, neh baye baye? Angü wüh le ngü kaka nda-wü la fi de ne. Wüh ena ale ngü kaka, neh baye baye, te ewü wu ngü tengüngü de la? Te wüh sere fü ewü kphä de la, wüh ena awu ngü tengüngü, neh baye baye?"¹⁵ Amba fanü fanü, wüh mala ngü ka Yesu Kurisito eyi fü wü di engä Yisarayelee. Angü Me tima wü kpara eyi, teka amere ngü la. Ah le ta de wüh le ngü la, teka fü ah angbü baka ngü ta te wüh ba gbü *Ngari Me, gü ba, "Wü kpara te ewü ngbü enü da emala ngü ka Me fü wü kpara ne, ngü ka-ewü reke fa sü. Angü wü kpara ena aje ngü la de tadu."§¹⁶ Amba mere bi wü di engä Yisarayelee le ngü la nda-wü de. Ah baka ngü te *mürü dofo Yisaya ba ta gügü, gü ba, "Ako Mere Miri Me, ani mala ngü ka-ye eyi fü wü kpara, amba kpara biringbö te le ngü, te ani ngbü emala fü ewü la, nda ma."*¹⁷ Ma ngbü emala fü yi, gü ba, wü gara wü di engä Yisarayelee ladü, te ewü ngbü eto maguma wü fü Yesu Kurisito, teka ngü de te ewü ngbü eje gömö wü kpara, te Me tima fü ewü ne.

¹⁸ Te gara kpara ena aga yiki, gü ba, "E-wu neh da, wüh mala ngü ka Yesu fü wü gara wü di engä Yisarayelee la de," te di bala, ma ti eyi alügü ngü bane, gü ba, "Wüh gü tamu ngü ka Me fü wü di engä Yisarayelee eyi fanü. Ah baka ngü te wüh ba gbü Ngari Me, gü ba, 'Ngü ka Me wü eyi fü wü kpara füh kotö ne 'buru.'"[†]¹⁹ Gara kpara ena aga nda-ye yiki, gü ba, "Wü di engä Yisarayelee la, kaje te Me ngbü eo kpara di mbi gbü jia ye ne, wüh wu reke mbi mbi nda-wü de." Gbü ngü la, ma ti eyi alügü fü ewü, gü ba, wüh je si-ngü la reke mbi mbi nda-wü de, kükürü de, angü nzö ewü kpekpeke. Tekä nguwa wü ganzi kpara, te ewü giri ngü ka Me ta gügü nda-wü de ne, wüh du je ngü kaka reke mbi me-wü. *Müse de gina kpara, te Me mala ngü la te kokomö na, gü ba, "De-ni, Me, ni ena aküwa nguwa gara wü kpara, te wü ngbü ekpa ngü ka-ewü, gü ba, wüh wu ngü ka gele mbi mbi nda-wü de ne. Fü wü angbü te gara de kanga bete gü emagama wü, teka te ni ena aküwa wü ganzi kpara ne."[‡]²⁰ Me du kphä mala ngü la kpekpeke, gömö mürü dofo Yisaya, gü ba, "Nguwa wü ganzi kpara la giri ngü ka-ni te engä gina nda-wü la de. Fü ni ayia asere to ngü ka-ni fü ewü, teka de wüh to maguma

wü fü ni.²¹ Amba teka ngü ka wü di engä Yisarayelee, ni le ewü cu de maguma ni, fü ni angbü eda kpa ni fü ewü, ra de biti, amba güje ewü je ngü de. Wüh le ngü ka-ni la nda-wü de."§

11

Dene ngü teka züka maguma ka Me fü wü di engä Yisarayelee

¹ Wü di engä wüna, nih ngbü efi, gü ba, te di eyi bala ne, Me le ngü ka wü di engä *Yisarayelee nda tine eyi de? Ngü la, ah bala nda de. Angü wüh kawü de wü kpara kaka-na. Kphä bala, de-ra Pawülü, ma kphä de kpara gbü nguwa wü Yisarayelee. Ma de kundu ye *Abarayama, gbü nguwa Benzamina. Te di bala ne, Me ce ra eyi asidi? Ah ce ra nda de!² De-a, wü di engä Yisarayelee, a de gina wü kpara ta te Me fe gügü. Ngü a ti anza emagama Me nda de.

Yi fi la nga ngü ka mürü dofo *Iliya, ta te wüh ba gbü *Ngari Me gügü ne. Angü Iliya ku ta gba fü Me de mere cinga emagama ye, gü ba, "Ako Me! Wü di engä Yisarayelee ce ngü ka-ye eyi 'buru 'buru asidi."³ Sü ta te wüh fa teka angbü egbo nga iri ye tete na ne, wüh mürü eyi 'buru asidi. Wüh mörö wü *mürü dofo ka-ye nza kphä eyi 'buru. Ni laki tine bü duu me-ni dene, te ni ngbü la fi ele ngü ka-ye. Wüh ngbü kphä eyi egiri da ni teka amörö, baka te wüh mörö wü bu ni ne."⁴ Te Me je ta ngü te Iliya mala la, ah lügü ngü fefe na, gü neh fe? Me gü ba, "Iliya deyi, ye mere e afi, gü ba, 'Ni laki bü me-ni kplikpi ni,' ne de. Angü bi wü kpara kani, te ewü to maguma wü fü ni, fi ladü, baka kutu lorozi (7,000). Mene ewü, de te ewü le ngü ka kükürü me, de iri ye Ba-ala,* nda-wü de ne."⁵ Kphä bala, enatikine, Me fe mba wü gara kpara eyi, esüka a, wü di engä Yisarayelee, teka *züka maguma ye, teka de a fü maguma a, ale ngü ka Yesu *Kurisito.⁶ Me fe a, neh teka ne? Ah fe a teka züka ngü te a ngbü emere gbü jijia na ne, nda de. Ah fe a ka-ye teka züka maguma ye. Angü dela ngü te engu le me-ye. Te Me ena angbü efe a ta, teka züka tima te a ngbü emere ne la, de bane ngü ka züka maguma ka Me ena adi ta de kükürü ngü.

⁷ Yi fi nga ngü ne mbi mbi mbi. Wü di engä wüna, wü di engä Yisarayelee, ngbü ta egiri kaje, te ani ena akoro tete na mbi, gbü jia Me. Amba wüh giri kaje

§ 10:15 10:15 Mü ena amaka ngü la gbü buku ka Yisaya 52:7. * 10:16 10:16 Mü ena amaka ngü la gbü buku ka Yisaya 53:1. † 10:18 10:18 Mü ena amaka ngü la gbü Ci ka wü Davidi 19:4. ‡ 10:19 10:19 Mü ena amaka ngü la gbü buku ka Manda nga Riri 32:21. § 10:21 10:21 Mü ena amaka ngü la gbü buku ka Yisaya 65:1-2. * 11:4 11:4 Mü ena amaka ngü la gbü gina buku ka wü Wü Miri 19:18.

la ma. Wüh maka kaje la nda-wü de, teka te wüh le ngü ka Me de, angü wüh de wü mürü kögö-nzö. 'Duwa mba de-a wü kpara nzoko, te Me fe a me-ye, teka züka maguma ye, fü a amaka kaje la. ⁸ Wü mürü a la, wüh ge baka wü kpara, ta te wü mürü dofo ba ngü teka ewü gbü Ngari Me, gü ba, "Wü de töndö kpara! Me mala züka ngü eyi fü wü ma! Wü le aje de. Amba titine ngü ka Me ti adu ari gbü nzö wü de, angü nzö wü kpekepeke."[†] Ngü la kpo kü te wü kundu a ta gügü ne, zalü akoro di eküte wü mürü a de enatikine ne. ⁹ Miri *Davidi mala ta kphang ngü teka wü kundu a la, gü ba, "Akoo Me, ah le de ye zoro wü kpara la, de ye i ewü, o gbü ku, angü wüh le aje ngü ka-ye de. ¹⁰ Ah le de ye siti fingangü ka-ewü, angü ngü ka-ye ti ari gbü nzö ewü tine de. Ah le de wüh ngbü tine labi ka siti ngü ka-ewü la, fi mere badi."[‡]

¹¹ Yi ngbü efi, gü ba, teka *siti ngü ka wü di engä *Yisarayeale, te ewü le ngü ka Yesu Kurisito di de ne, Me ti adu ale ngü ka-ewü tine de, fi mere badi? Ah bala de! Fanü fanü, wü di engä Yisarayeale mere siti ngü eyi. Te di bala, teka ngü te wüh le ngü ka Yesu nda-wü de ne, fü Me adu angbü eküwa ka-ye nguwa wü *ganzi kpara. Kükürü de, angü te wü di engä Yisarayeale ena angbü ewu züka ngü, te Me ngbü emere fü wü ganzi kpara ne la, ngü la ena akpo angbü eto kanga emaguma ewü. Tekä ngü la, e-wu neh da, wüh ena adu afü te-wü, angbü egiri kaje, teka de Yesu Kurisito küwa ani, kphang baka nda wü ganzi kpara la. ¹² Wayi, wü di engä wüna, wü di engä Yisarayeale dürü eyi te kaje ka Me fanü fanü. Tekä ngü la, fü Me ayia ato mere wazi fü wü ganzi kpara cu afa sü. Te di bala, te Me du fü te-ye, küwa wü di engä Yisarayeale la, ngü la ena adu angbü baye? Te di bala, züka ngü la ena adu afa tine mene gina züka ngü tane ka.

¹³ Wü di engä wüna, wü ganzi kpara, dene ngü te ma ele amala fü yi. Yi wu eyi reke areke, gü ba, Me tima ra, teka akoro amala ngü ka Yesu Kurisito fü yi. Te di bala ne, ma ngbü engbü de mere tadu, da eceka tima la baka mere kpeke ngü. ¹⁴ Kphang bala, ma ngbü ele wü nguwa ra, wü di engä Yisarayeale, cu efa sü. Ma le eyi, de kanga di emere ewü, teka de wüh fü maguma wü, fü ewü aküwa. ¹⁵ Me ce wü di engä Yisarayeale, de wüh di la fi emere kögö-nzö, kükürü de, angü wüh le ngü ka Yesu Kurisito de. Tekä ngü la, fü Me adu aza wü ganzi kpara baka wü di ye. Amba, te wü di engä Yisarayeale du

fü te-wü, le ngü ka Yesu la, Me ena adu areke ngü de esüka ye de ewü ne, areke fanü, fü ewü aküwa. Ah ena adi ge baka te engu küwa ewü gbü kpi. ¹⁶ Yi ngbü efi nda-yi, gü ba, te wüh funu mba engä kümü, to fü Me la, du kümü la, ah de nda Me de? Wü kundu kundu ye wü di engä Yisarayeale, wü *Abarayama, *Yisaka bete *Yakobo ne, wüh ta de *vüngüte ka Me. Te di bala, wü jaji ka-ewü, de wü kundu ewü, ti angbü wü vüngüte ka Me de? Kphang bala, te si-rü, te ri gbü tö, 'buru mbi la, wü ya-rü la ti angbü kphang mbi ne de? Wüh ena angbü kphang mbi teka si rü la.

¹⁷ Me mere züka ngü eyi. Ah ba e te engu de ya gara rü ka köti asidi. Fü ah adu aza wü gara ya-rü ka gü, akpokpo da ya-rü la. De-yi, wü ganzi kpara, yi baka gara ya-rü ka gü, te wüh kpokpo eküte rü ka köti la. Titine yi du ngbü eyi elala eküte züka rü ka köti la, angbü emaka wazi gbügbü na. ¹⁸ Dela züka ngü, amba ma ngbü emala fü yi kpekepeke, gü ba, yi mere e akpa ngü wü di engä Yisarayeale de. Angü si-rü ngbü emaka wazi neh esaka ya ye? Ah bala de. Ya-rü ngbü emaka wazi me-ye esaka si ye, teka angbü ega di. ¹⁹ Yi mere e agbo nga yi, gü ba, "Me ce wü di engä Yisarayeale eyi, du za ani, o da ewü," ne de. ²⁰ Yi fi nga si-ngü te Me ce wü di engä Yisarayeale tete. Me ce wü di engä Yisarayeale, teka te wüh le ngü ka Yesu Kurisito de. Ah bala de? Amba nda-yi, Me le ngü ka-yi, angü yi to maguma yi eyi fü Yesu Kurisito. Te di bala ne, yi mere e acu ngü yi de. Ah le de yi ceka te-yi 'be. ²¹ Me ce wü di engä Yisarayeale, angü wüh le ngü ka Yesu de. Te di bala, te yi ena ace ngü ka Yesu, kphang baka wü di engä Yisarayeale la, yi ngbü efi, gü ba, Me ti ace ani de?

²² Wü di engä wüna, maguma Me reke ka-ye fa sü, amba mamaguma ngbü enzu kphang anzu eküte wü kpara te ewü le ngü kaka de. Engu ngbü ele nih de züka maguma ye, angü nih ngbü elala eküküte. Amba mene wü kpara te ewü le engu de ne, engu ngbü eto kuru te ewü de siti maguma ye. Te di bala, te yi ce ngü kakana la, yi fi, gü ba, engu ti ato kuru te yi bala de? ²³ Kphang bala, te wü di engä Yisarayeale fü ngü ka-wü, adu ale ngü ka Yesu Kurisito la, Me ena adu kphang ale ngü ka-ewü. Ah ena adi baka te engu du za ewü, kpo lügü te rü la. ²⁴ De-yi, wü ganzi kpara, yi nda-yi baka ya-rü ka gü, te Me de, kpokpo eküte züka rü ka köti. Ah de rü, te yi koro gbügbü na, ne de. Te Me mere ngü la fü yi bala, Me ti eyi adu aza wü ya züka rü la, akpokpo

[†] 11:8 11:8 Mü ena amaka ngü la gbü buku ka Manda nga Riri 29:4, bete buku ka Yisaya 29:10. [‡] 11:10 11:10 Mü ena amaka ngü la gbü Ci ka wü Davidi 69:22-23.

alügü te sü ka-wü, te wüh fü ngü ka-wü la.

²⁵ Wü di engu wüna, wü gara kpara esüka yi ena afi nda-wü, gü ba, Me le ngü ka wü di engu *Yisaraye le 'buru 'buru de. Amba ma ele amala fü yi ngü te Me sere fere. Angü gara wü ngü ladü te yi wu la de. Fanü fanü, mere bi wü di engu Yisaraye le de wü mürü kögö-nzö, amba ngü la ti angbü fi bala ne de. Amba Me fe süka wü *ganzi kpara eyi. Te di bala, mere bi wü di engu Yisaraye le ena angbü fi bü wü mürü kögö-nzö bala, zalü akoro di gbü sikpi, te wü ganzi kpara la ena ato maguma wü fü Yesu feke. ²⁶ Sidi nga ngü la, Me ena adu aküwa gara wü di engu Yisaraye le kpah 'buru bala. Ah ena angbü ge baka ngü ta te Me mala gügü, gü ba, "De-ni Me, ni ena atima Miri, fü ah akoro aküwa wü di engu Yisaraye le. Miri engu la ena adi kpah gbü nguwa wü Yisaraye le." § ²⁷ Fü Me adu amala kpah gara ngü, gü ba, "Te di bala, de-ni, Me, ni ena adu areke ngü ka *vüngüte esüka ani de wü di engu Yisaraye le ne kpah toto, fü ni aboro siti ngü ka-ewü 'buru."* ²⁸ Amba baka te wü di engu Yisaraye le koro eyi baka vügü ka Me ne, ngü la du le ta-ngü te yi, wü ganzi kpara, ta te yi nzö ngüte de wü Me nda-yi de ne. Ngü la mere te-ye bala, teka fü yi amaka *küküwa, baka ta te Me to fü wü di engu Yisaraye le ne. Amba Me ngbü la fi ele ngü ka wü di engu Yisaraye le, wü vüngüte ka-ye ne, ekuru wü kundu wü. ²⁹ Angü Me fe ewü ta gügü, gü ba, "Wüh ena adi de wü vüngüte ka-ni." Te di bala, ah ti ace da ele ewü nda de.

³⁰ Kpah bala, de-yi, wü ganzi kpara, ta gügü, yi le ngü ka Me nda-yi kpah de. Te wü di engu Yisaraye le ce ngü ka Me, fü Me adu aküwa yi da wü di engu Yisaraye le, teka *züka maguma ye. ³¹ Enatikine, baka te wü di engu Yisaraye le ngü ka Me de ne, fingangü ka-yi gü ba, Me ti adu ale ewü, fü ah aküwa ewü teka züka maguma ye, baka te engu mere fü yi ne, de? ³² Te di bala, dene ngü te ma ele amala fü yi. Angü Me wu eyi, gü ba, wü kpara 'buru ngbü emere *siti ngü, te ah de wü di engu Yisaraye le, anga wü ganzi kpara. Te di bala, engu ena awu cingä wü kpara 'buru, fü ah aküwa ewü nzö teka züka maguma ye.

³³ Nih gbo nga iri Me,
Angü engu de mürü züka maguma!

Nih gbo nga iri Me!

Angü engu wu ngü 'buru kpo!

Nih gbo nga iri Me,

angü engu ngbü emere mere bi
wü kpeke ngü,
teka aküwa wü kpara ka-ye.

Ni gbo nga iri Me,
teka züka ngü te engu ngbü emere fü
wü kpara 'buru de züka maguma ye
ne.

³⁴ Nih gbo nga iri Me,
angü Me ngbü emere ngü ka-ye baka
fingangü ka-ye.

Nih gbo nga iri Me,
angü kpara biringbö te ti ato riri
fefe na nda ma.

³⁵ Nih gbo nga iri Me, teka züka maguma
kaka.

Nih gbo nga iri Me,
angü engu küwa nih, siti wü kpara ne,
eyi.

Nih gbo nga iri Me,
angü kpara biringbö, te ena agbo nga
ye, gü ba, Me küwa ni, teka züka
ngü, te ni ngbü emere ne, nda ma.

³⁶ Nih gbo nga iri Me,
angü Me mere wü e 'buru me-ye. Fü
ah ato wazi fü ewü teka de wüh di
ezu.

Nih gbo nga iri Me,
angü Me ngbü eküwa wü kpara 'buru
me-ye.

Nih gbo nga iri Me, teka wü ngü de te engu
mere de bala ne,
angü ngü la reke gbü jijia na fa sü.

Nih di egbo nga iri Me fi mere badi!

Ah di bala.

12

Dene wü ngü te Me le de nih di emere

¹ Wü di engu wüna, ah le de yi o to yi teka ngü te ma ngbü emala ne. Me le nih cu fa sü, fü ah ayia aküwa nih teka *züka maguma ye. Te di bala, ma ngbü emala fü yi kpekpeke, gü ba, ah le de yi to maguma yi, de küte yi 'buru fü Me, teka adi emere ngü kaka. Angü, te yi mere bala la, ngü la ena ato tadu fü Me. Ah ena adi ba e te yi ngbü eto züka takpa fü Me, gbü wü sikpi 'buru. ² Yi mere e angbü emere ngü, baka nda wü kpara de füh kotö ne, de. Ah le de *Nzila Wazi Me fü maguma yi me-ye, teka fü ah ato to fingangü gbü nzö yi. Te di bala, yi ena awu wü züka ngü, de te Me ngbü ele de yi di emere ne, mbi mbi mbi. Fü Me angbü de tadu teka ngü ka-yi.

³ Wü di engu wüna, Me o ra baka *mürü tima ka-ye me-ye, teka züka maguma ka-ye, te engu o kpaka ra. Te di bala, dene ngü te ma ele amala fü yi. Yi mere e aceka te-yi baka cögbörö wü kpara ne de. Angü Me ngbü eto wazi fü yi me-ye, teka fü yi

adi emere ngü kaka di. Ah le de yi ngbü de züka fingangü gbü nzö yi, teka fü yi awu ngü areke mbi. ⁴ Wü di engu wüna, yi fi la nga küte kpara. Küte kpara ka-ye ngbüürükü biringbö, amba mere bi wü jürü yaya na ladü. Tima ka-ewü kphah kpkipi ye kpkipi ye. ⁵ Baka te nih, wü *kpara ka Yesu Kurisito, sibi fa sü ne, amba nih ka-nih ngbee biringbö baka ngbüürükü Yesu Kurisito. Te di bala, ah le de nih di ele tangü te-nih esüka nih ereke areke. ⁶ Me to wazi eyi fü nih kpkipi ye kpkipi ye, teka adi emere tima ka-ye di. Te di bala, ah le de nih rü te nga nih 'buru kpekpeke, teka fü nih amere tima, de te Me to fü nih ne, tundu de maguma nih biringbö. Te Me to wazi fü mü, teka adi emala ngü ka-ye fü wü kpara baka *mürü dofo la, ah le de mü mere ngü la reke areke, de wazi te Me to fü mü la, de maguma mü biringbö. ⁷ Te Me to wazi eyi fü mü, teka amere tima fü wü bu mü la, de mü mere emere de maguma mü 'buru. Te Me to nda-mü wazi, teka de mü di erü wü bu mü de ngü ka Me la, de mü mere kphah emere de maguma mü 'buru. ⁸ Anga te Me to nda-mü wazi, de mü di eto wazi di fü wü bu mü gbü ngü ka Me, teka de wüh lala gbü ngü ka Yesu la, de mü mere kphah bala. Te Me to nda-mü wazi teka fü mü adi ewu cinga wü bu mü, da ele ta-ngü te ewü, de wü e ka-mü la, de mü di eto e la fü ewü de züka maguma mü. Te Me to mani gbü nzö mü, fü mü adi erü wü kpara baka kpeke *kovo la, ah le de mü to te-mü, teka adi emere tima la mbi mbi.

⁹ Ah le de yi di ele wü bu yi de maguma yi biringbö. Yi mere e ale ewü de maguma yi 'basu 'basu de. Ah le kphah de yi to te-yi 'buru adi emere züka ngü, de yi di ekpe *siti ngü akpe. ¹⁰ Yi di ele te-yi esüka yi, de zu lele ka Me fanü fanü, angü yi de wü di engu ni gbü ngü ka Yesu Kurisito. Ah le kphah de yi di ecu ngü wü bu yi, amba yi mere e adi ecu ngü yi de tete-yi de! ¹¹ Yi to te-yi teka amere tima ka Miri Yesu de maguma yi 'buru. Basa mere e adi emere yi de! ¹² Ah le de yi ngbü de tadu, kükürü de, angü yi ngbü eo jia yi teka *küküwa guvu Yesu Kurisito ne. Te yi ngbü ezü cinga teka ngü ka Yesu la, de yi rü kpekpeke. De yi o to yi teka adi eku gba fü Me, gbü wü sikpi 'buru. ¹³ Te cinga ngbü emere wü bu yi, wü kpara ka Me la, yi le ta-ngü te ewü de wü e ka-yi. Yi mere e ace ewü gbü cinga de. Te wü ngba koro kpa gba yi la, ah le de yi mere ngü ewü reke areke.

¹⁴ Te wü vügü ka-mü ngbü eto cinga te

mü la, de mü mere e asiri ewü de. Mü mere e alügü siti ngü la fü ewü kphah de. Mü yi-ta Me, teka de Me boro siti ngü ka-ewü la. ¹⁵ Te wü bu mü ngbü de tadu la, ah le de mü ngbü kphah de tadu teka ngü ka-ewü. Te wüh ngbü gbü cinga la, de mü ngbü kphah gbü cinga tundu de ewü. ¹⁶ Yi di engbü de wü bu yi 'be, de züka maguma yi. Yi mere e ao te-yi gbü nzö wü bu yi, baka wü mere kpara, ne de. Te wüh ngbü ele de mü mere tima, baka tima te wü labi ngbü emere me-wü la, wayi, de mü le ale. Mü mere e angbü e'du ngü mü, da ecu ngü mü, ne de.

¹⁷ Te gara kpara mere siti ngü fü mü la, de mü mere e alügü na siti ngü la fefe na de. Mü to te-mü teka adi emere züka ngü gbü jia wü kpara nde 'buru. ¹⁸ Ah reke pe te mü ena ato te-mü, adi engbü de wü kpara 'buru mbi, de gu maguma. ¹⁹ Te kpara mere siti ngü fü mü la, de mü mere e alügü siti ngü la fefe na nda-mü de. Mü ce ngü la esaka Me. Angü Me mala eyi, gü ba, "Ni ena ato kuru te wü kpara, te ewü ngbü emere siti ngü fü wü kpara ka-ni la, me-ni."* ²⁰ Wüh ba kphah gbü *Ngari Me, gü ba, "Te tala ngbü emere vügü ka-mü la, ah le de mü to zü-e fefe na. Te gümü ngu ngbü eke engu la, de mü to ngu fefe na, ah nzö. Te mü mere züka ngü la fefe na bala la, ngü la ena ato lümü fefe. E-wu neh da, ah ena adu afü maguma ye."† ²¹ Wü di engu wüna, te wü vügü koro ngbü da emere yi de siti ngü la, siti ngü la mere e afa wazi yi de. Ah le de yi to te-yi teka adi emere züka ngü fü ewü, teka afa wazi siti ngü ka-ewü la di.

13

Dene ngü teka fü nih adi emere rüri ka wü miri

¹ Wü di engu wüna, dene kpeke ngü fü nih. Ah le fü nih adi eje ngü ka wü miri ka-nih füh kotö ne. Kükürü de, angü Me fe wü miri la, o me-ye gbü nzö nih. ² Te mü le ngü ka wü miri de la, ah kphah ge baka te mü le ngü ka Me de, angü Me fe ewü me-ye. Te di bala, fanü fanü, mü ena amaka kuru teka ngü te mü mere la. ³ Me fe wü miri la, neh teka ne? Ah teka ato kuru te wü kpara, te ewü ngbü emere züka ngü? Ah bala de! Me fe ewü, teka ato cürü te wü kpara, te ewü ngbü emere siti ngü, teka de wüh ce ngü la. Te di bala, te mü le angbü ka-mü zözö la, ah le de mü di emere fi bü züka ngü. Miri ena agbo nga mü teka ngü la. Ah ti ato kuru te mü nda de. ⁴ Angü Me to tima la

* 12:19 12:19 Mü ena amaka ngü la gbü buku ka Manda nga Riri 32:35. † 12:20 12:20 Mü ena amaka ngü la gbü buku ka Ngü Mani 25:21-22.

fü miri la me-ye, teka de engu di ele tan-
 gü te wü kpara ka-ye. Amba te mü ngbü
 emere wü siti ngü la, mü ena angbü fi bü
 de cürü te mü fanü. Angü Me to wazi eyi
 fü miri, teka de ah di eto kuru te wü kpara
 de bala. ⁵ Te di bala, ah le de nih di eje
 riri ka wü miri la, amba ah di bü nzö teka
 wazi ka-ewü de. Ah le de nih di ecu ngü
 ewü de züka fingangü, kükürü de, angü
 Me fe ewü me-ye. ⁶ Dela si-ngü te yi ngbü
 ese ngürü tete fü wü miri ne. Angü Me
 fe wü miri la me-ye, teka de wüh di fi bü
 emere tima te Me to fü ewü ne, de jiase
 la. ⁷ Ah le de yi di eje ngü ka wü miri, da
 emere. Te wüh yi-ta yi, teka de yi di ese
 ngürü yi, de wü ngürü wü e ka-yi la, anga
 de yi to jiase teka wü e te yi ngbü ecinzi la,
 ah le de yi to ato. Te wüh mala fü yi, teka
 de yi mere wü gara tima cu de kpa yi la,
 ah le de yi mere amere. Yi di eje ngü ka
 wü miri da ecu ngü ewü.

*Dene ngü te nih ena adi ele te-nih di
 esüka nih*

⁸ Dene kpah gara ngü te ma le amala
 fü yi. Te mü za e, anga matiti ka jiase,
 esaka gara kpara la, ah le de mü lügü e
 kaka la fefe. Ah le de e kaka la ngbü gbü
 nga mü de. Angü ah le de yi di fi bü ele
 te-yi esüka yi ale. Te mü le wü bu mü
 de maguma mü, amba mü ngbü dela eyi
 emere wü ngü, de te Me mala gbü *Riri
 ka-ye ne, 'buru. ⁹ Wü ngü te Me mala gbü
 Riri ka-ye sibi fa sü. Gara riri gü ba, "Mü
 mere waza de." Gara gü ba, "Mü mörö
 kpara de." Gara gü ba, "Mü zi e de." Gara
 gü ba, "Mü kpi gümü e ka kiri mü de,"*
 abe kpah te mere bi wü gara riri. Amba
 mere kpeke riri esüka wü riri la 'buru, gü
 ba, "Mü le wü bu mü, kpah baka e te mü
 ngbü ele küte mü."† ¹⁰ Kükürü de, angü
 te mü le kiri mü fanü fanü la, mü ti amere
 siti ngü fefe na nda-mü de. Te di bala, te
 mü ngbü ele wü bu mü la, mü ngbü dela
 eyi emere wü Riri ka Me 'buru.

¹¹ Ah ena adi de züka ngü, teka fü yi
 adi emere wü ngü, de te Me ngbü ele.
 Kükürü de, angü sikipi de te Miri Yesu ena
 akoro, aküwa nih gbü wü siti ngü de füh
 kötö ne, koro eyi ghamari. Ta gügü,
 te nih to maguma nih tete fü Yesu, nih
 ngbü ta efi, gü ba, "Sikipi la ka-ye la
 nengete." Amba enatikine, sikipi la koro
 eyi ghamari. Ah le de nih ngbü fi bü
 ezükü, da eci nga sikipi la! ¹² Sü kpo eyi
 elofu. Nih ce da emere wü töndö ngü,
 baka te wü kpara ngbü emere gbü biti ne,
 ace. Nih reke te-nih ereke, nih ngbü nzo,
 baka wü marajümüya, te ewü ngbü enü

amere gü. ¹³ Nih mere züka ngü, baka
 e te wü kpara ka ra-sü ngbü emere. Nih
 mere e angbü enzö fi, da eküya di, de. Nih
 ce ngü ka waza asidi. Nih mere e angbü
 emere wü ngü ka lümü de. De nih ce ngü
 ka yiki ace. De nih ce kpah ngü ka kanga
 asidi. ¹⁴ Te di bala, ah le de yi o to yi
 'buru teka adi emere riri ka Miri Yesu. Yi
 i maguma yi gö! Yi rü kpekpeke. Yi mere
 e adi efi nga siti gümü wü ngü, de te ngbü
 ekoro emaguma yi ne, de.

14

Dene ngü te ma ele amala fü yi, gü ba,

*yi mere e adi emala ngü eküte wü bu yi
 de*

¹ Wü di enga wüna, teka ngü ka wü bu
 yi, te ewü to maguma wü fü Yesu, ah le
 de yi le ewü baka wü di enga ni yi. Te gara
 kpara koro esüka yi, fü yi afi, gü ba, engu
 wu ngü ka Me reke mbi mbi de, amba ah
 to maguma ye ka-ye eyi fü Yesu la, ah le
 de yi za engu esüka yi gbü mürü. Yi mere
 e angbü ega yiki fefe na, teka fingangü
 kaka-na, te di kpi kpi ye ne, de. ² Nih ceka
 la, wü gara kpara ngbü efi nda-wü, gü ba,
 "Me le de ani zü so de." Fü ewü angbü ezü
 ka-wü bü kpa wuru. Amba wü gara kpara
 ngbü efi nda-wü, gü ba, "E-mazü de kpeke
 ngü gbü jia Me nda de." Te di bala, fü
 ewü angbü ezü nga nzö wü e 'buru. ³ Te
 mü fi, gü ba, "Ah ka-ye mbi gbü jia ni,
 teka fü ni adi ezü wü gara e 'buru azü,"
 la, ah de siti ngü nda de, mü zü e ka-mü
 ezü. Amba de mü mere e adi emala ngü
 te kpara, de te ngbü ece wü gara e ace,
 ne de. Kükürü de, angü Me le engu ka-ye
 eyi. Kpah bala, te mü le adi ezü nda-mü
 bü duu kpa wuru la, ah de siti ngü nda
 kpah de. Amba de mü mere e adi emala
 ngü te kpara, te ngbü ezü wü e 'buru azü,
 ne de. Kükürü de, angü Me le engu ka-ye
 eyi. ⁴ Mü ngbü emala ngü eküte kpara la
 bala, engu de labi ka-mü? A'a, ah bala de!
 Kpara la ka-ye de labi ka Me! Kpara la
 ngbü emere tima ka-ye fü Me. Te di bala,
 mü ena amala, gü ba, engu ngbü emere siti
 ngü, neh baye? Me, te di de mere kpara
 kaka-na ne, ena amala nga siti ngü, anga
 züka ngü kaka, ka-ye me-ye. Me ngbü ele
 nih 'buru, angü ngü ka zü-e, ah gbü jia Me
 ba kpeke ngü nda de.

⁵ Kpah bala, wü gara kpara esüka yi
 ngbü efi nda-wü, gü ba, gara sikipi de mere
 sikipi gbü jia Me. Wü gara yi ngbü efi
 nda-wü, gü ba, wü sikipi ka-wü 'buru 'dö
 biringbö. Ah le de yi fi nga ngü la mbi
 mbi mbi. Te mü fi, gü ba, sikipi ne de mere

* 13:9 13:9 Mü ena amaka ngü la gbü buku ka Gogo ka wü Yisaraye 20:13-17. † 13:9 13:9 Mü ena amaka ngü
 la gbü buku ka Riri ka Gele ka wü Levi 19:18.

sikpì, ah mbi. Anga te gara kpara fi nda-ye, gü ba, sikpì la, ah de mere sikpì nda de la, ah kpah mbi. Ah le de yi mere bü mene ngü te Me sere fü yi. ⁶ Te kpara fe gara sikpì, ga, ah de mere sikpì, ah ngbü emere ngü la bala teka ne? Ah fe sikpì la teka agbo nga iri Me gbügbü de? Anga te kpara ngbü ezü wü so 'buru la, engu gbo nga iri Me teka wü so la de? Anga te kpara le azü so de la, ah ce so la teka ngü ka Me de? Wayi, engu ngbü kpah egbo nga Me teka ngü la. Te di bala ne, Me ngbü eceka wü kpara la 'buru baka wü di ye. ⁷⁻⁸ Baka te nih di la ladü füh kotö sene ne, nih ena angbü emere ngü, baka e te nih ngbü ele? Ah bala de! Ah le de nih di emere mene ngü, de te ena areke gbü jia Me. Kpah bala, te nih ena akpi la, nih ti afe sikpì ka kpi ka-nih me-nih ne, nda-nih de. Me ena afe sikpì la ka-ye me-ye, angü nih de wü kpara kaka.

Te nih ngbü ezükü, anga te nih kpi akpi, ah le de nih wu awu, gü ba, nih de kpara ka Miri Yesu. ⁹ Angü dela si-ngü te Yesu Kurisito kpi tete, fü engu adu azükü gbü kpi ne, teka adu angbü Miri gbü nzö wü kpara 'buru, mene ewü te ewü kpi eyi, abe kpah te mene ewü te ewü di la ezükü ne. ¹⁰ Te di bala, mü ena angbü emala siti ngü te engu ni mü bala, neh teka ne? Mü ena ayi-tata, teka ngü te engu ngbü emere, neh baye baye? Dela ngü ka-mü? Dela ka-ye ngü ka Me. Angü te gara, gbü *adu sikpì, nih ena arü 'buru engagira Me, fü engu ayi-ta nih, teka wü ngü de te nih ngbü emere ne, ka-ye me-ye. ¹¹ Angü wüh ba ngü la eyi gbü *Ngari Me, gü ba, "Me kina kina eyi, gü ba, 'Te gara, wü kpara 'buru ena abu nzökuta wü, da enda'ba te-wü engagira ni, Me. Fü ewü aci 'buru agbo nga iri ni.' " ¹² Te di bala, Me ena ayi-ta nih, biri biri 'buru, teka wü ngü de te nih ngbü emere ne, ka-ye me-ye.

¹³ Yi ce da ekpa ngü ka wü bu yi. Ah le de kpara di efi bü nga nda-ye ngü. Yi ceka 'be, teka wü gara ngü te yi ena angbü emere, angü ah ena agbeke fingangü ka wü bu yi, fü ewü anü amere *siti ngü. ¹⁴ Wü di engu wüna, ma wu eyi reke areke, gü ba, zü-e ti asiti yi gbü jia Me nda de. Ma wu ngü la bala kükürü de, angü Miri Yesu sere ngü la fere cu me-ye. Amba, ah le fü yi afi nga ngü la mbi mbi mbi. Te gara kpara ngbü efi, gü ba, so nü la, ni zü de, angü ah de *Riri ka Me, amba te engu wü gara kpara te zü so la, fü ah adu afü te-ye, azü so la fanü, ah mere siti ngü eyi. ¹⁵ De-mü, de te mü ngbü ezü so wü nü 'buru azü ne, te mü ngbü ezü e la bala gbü jia engu ni mü, te zü so wü nü 'buru de

ne, ngü la ena asiti fingangü kaka. Te di bala, mü mere dela züka ngü? Te mü le engu ni mü de maguma mü 'buru la, mü ti amere mene ngü de bala gbü jijia na de. Angü, te engu ni mü wu mü da ezü so la bala, fü engu adu afü te-ye azü e, ta te engu le azü de ne, ngü la ena asiti engu gbü jia Me de? Dela züka ngü, te mü ena amere fü kpara, te Yesu Kurisito kpi teka aktüwa engu ne? Ah de siti ngü! ¹⁶ Te yi ngbü efi, gü ba, ngü ka zü-e ti asiti ani gbü jia Me nda de la, ah mbi. Amba te wü kpara ngbü esiti iri Me, teka ngü de te yi ngbü emere de bala, ah ena adi de siti ngü. Te di bala, ah le de yi ce ngü de bala ace asidi. ¹⁷ Fanü fanü, te nih zu de wü kpara ka Me la, nih mere e ao maguma nih teka ngü ka zü-e de. Nih o maguma nih, teka adi emere ngü, te ena areke gbü jia Me. Te di bala, nih ena adi engbü de wü bu nih, de gu ngü esüka nih. Fü nih angbü kpah de tadu teka wazi ka *Nzila Wazi Me, te di emaguma nih ne. ¹⁸ Te yi ngbü emere riri ka Yesu Kurisito ereke areke bala la, ngü ka-yi ena areke gbü jia Me afa sü. Kpah bala, wü kpara füh kotö ne ena aceka yi baka züka wü kpara ka Me.

¹⁹ Wü di engu wüna, ah le de nih o to nih teka angbü engbü de wü di engu ni nih ziii. Ah le de nih o to nih teka angbü emere ngü, te ena ato wazi fü ewü, teka fü ewü alala teka ngü ka Me. ²⁰ Mü le asiti fingangü ka wü bu mü, teka ngü ka zü-e, teka ne? Dela züka ngü? Fanü fanü, mene zü-e, te di esiti gbü jia Me ne, nda ma. Amba mü mere e azü mene e, de te ena asiti fingangü ka engu ni mü, fü ah adu ace ngü ka Me, ne de. Angü ngü de te mü mere la ena adi esiti gbü jia Me. ²¹ Te mü wu eyi, gü ba, so de te ni ngbü ezü, anga fi de te ni ngbü enzö ne, ena asiti fingangü ka engu ni ni, fü engu adürü te kaje ka Me la, ah le de mü ce da ezü so, anga da enzö fi, ace.

²² Te mü wu eyi mbi, gü ba, zü-e ti asiti ni gbü jia Me de la, ah mbi, Me wu fingangü ka-mü emaguma mü la eyi. Amba mü mere e aga yiki ake kiri mü, teka nda-ka zü-e nda-mü de. Ah le de mü fi nga ngü ka-mü la mbi mbi mbi, adi emere 'duwa wü ngü te ena areke gbü jia Me, fü mü amaka tadu gbü ngü la. ²³ Te fingangü ka-mü 'basu 'basu teka e te mü ele azü, fü mü adu azü ladru la, ah ena adi esiti gbü jia Me. Angü te mü mere ngü la de maguma mü 'basu 'basu la, ngü la ena ato mü gbü siti ngü.

15

1-2 Wü di engu wüna, te mü de kpeke

* 14:11 14:11 Mü ena amaka ngü la gbü buku ka Yisaya 45:23.

kpara, te mü wu si-ngü gbü ngü ka Me reke areke la, dela züka ngü. De-nih, te nih di de kpeke wü kpara ne, nih mere e angbü efi bü nzö nga ngü ka-nih ne de. Ah le de nih di efi nga wü di enga ni nih, de te ngü la ri gbü nzö ewü mbi de ne, kpah mini. Fü nih angbü eto wazi fü ewü, teka fü ewü arü kpekpeke. Nih mere e adi emala ngü la fü ewü de nga de. Nih di emala ngü la fü ewü ferre. ³ Nih di emere wü ngü 'buru baka nda Yesu Kurisito. Engu ngbü ta emere bü nzö ngü ka-ye, te engu ngbü ele ne, nda de. Engu o ta to ye angbü emere ngü, te ngbü ereke gbü jia Me. Wü kpara fala ta engu, fü ewü amere bi wü ngü ka lümü eküküte. Amba engu rü ka-ye fi bü kpekpeke, ah ce da emere züka ngü nda de. Ngü la, ah ge baka ngü ta te *Davidi ba gbü *Ngari Me, gü ba, "Akoo Me, wü vügü ka-ye ngbü egiri kaje, teka de ani di efala ye ne, fü ewü adu angbü efala ni da ye. Amba ni tü ace ngü ka-ye, teka ngü ka-ewü la, de." ⁴ Wü ngü 'buru ta te wüh ba gbü Ngari Me gügü ne, wüh ba ngü la kükürü de. Wüh ba wü ngü la, teka de ah gü tamu ngü ka Me fü nih, fü ah ato wazi fü nih, teka fü nih arü di kpekpeke, da eo jia nih teka *küküwa, te Me ena ato fü nih ne.

⁵ Ma ngbü eyi-ta Me teka de engu to wazi fü yi, fü yi angbü elala fi bü te ngü kaka-na. Kpah bala, teka fü yi angbü engbü de wü gara wü di enga ni yi de maguma yi 'buru biringbö, baka te Yesu Kurisito ngbü ta emere ne. ⁶ Kpah bala, teka fü yi angbü emaka te-yi tundu, da egbo nga Me, te di de Wö ye Miri Yesu Kurisito, de maguma yi biringbö.

⁷ Wü di enga wüna, ma ngbü fi bü enda nga ngü ne fü yi, gü ba, ah le de yi di ele te-yi esüka yi ale, kpah baka te Yesu Kurisito ngbü ele yi ne. Dela ngü de te wü kpara ena angbü ecu ngü Me tekaka. ⁸ Yi fi la nga ngü ka Yesu Kurisito. Engu koro ta füh kotö sene, teka aküwa a, wü di enga *Yisaraye, teka de a wu, gü ba, Me de kpeke kpara. Angü ngü ta te Me mala fü wü kundu a, gü ba, "Ni ena atima Miri, fü engu akoro aküwa a ne," toto iri teka ngü la nda de. ⁹ Kpah bala, Yesu koro füh kotö ne teka aküwa yi, wü *ganzi kpara, angü engu wu cinga yi eyi. Te di bala, ah le de yi di egbo nga iri na teka ngü la. Te yi ngbü emere bala la, yi ena adi baka wü awuba ye *Davidi, ta te engu bi ci teka ngü ka-ewü, gü ba, "Wayi, mere Me, ni le abi ci, de wü awuba ni,

wü ganzi kpara ne, teka agbo nga iri ye di." [†] ¹⁰ Wüh ba kpah gara ngü gbü Ngari Me, gü ba, "De-yi, wü ganzi kpara, ah le de yi di kpah egbo nga iri Me, tundu de wü a, wü di enga Yisaraye, angü yi kpah de wü kpara kaka-na." [‡] ¹¹ Fü ewü aba kpah gara ngü, gü ba, "Ah le de nga nzö nguwa wü kpara füh kotö ne 'buru gbo nga iri Me." [§] ¹² Fü *mürü dofo Yisaya aba kpah gara ngü, gü ba, "Me ena atima gara Miri te gara, gbü nguwa Davidi.* Miri la ena angbü ngü nzö wü kpara 'buru me-ye. Fü nga nzö wü kpara ao jia wü 'buru tete na, de ah küwa ani." [†]

¹³ Me di de yi, da eto wazi ka *Nzila Wazi ye fü yi, de yi di eo jia yi eküküte fanü fanü. Fü yi ato maguma yi 'buru fefe na, teka fü yi angbü engbü ziii, de mere tadu emaguma yi, teka ngü ka Yesu.

Dene kpah gara ngü te ma ele amala fü yi teka tima ka-ra

¹⁴ Wü di enga wüna, ma wu eyi fanü fanü, gü ba, yi de kpeke wü kpara. Yi ngbü fi bü emere ngü te ngbü ereke gbü jia Me. Yi wu si-ngü gbü ngü ka Me 'buru kpo. Yi wu kpah da eri wü bu yi kpo. ¹⁵ Ma ba wü gara kpeke ngü fü yi gbü köcökpa ne, angü ma le de to yi mere e airi teka wü ngü ne de. Me de kpara te to tima ne fere me-ye, teka *züka maguma ye, ¹⁶ teka de ma di emere tima ka Yesu Kurisito, da emala ngü kaka fü wü *ganzi kpara. Tek de *Nzila Wazi Me to wazi fü ewü, fü ewü ato te-wü 'buru 'buru ara fü Me, de maguma wü biringbö. Te di bala, dela züka takpa te ma ena ato fü Me.

¹⁷ Yesu Kurisito ngbü eto wazi fere, teka tima ka-ye ne, me-ye. Fü ra angbü emala ngü de tadu, gü ba, ma mere tima kaka reke eyi areke ne. ¹⁸ Ma mere tima dene de tete-ra nda-ra de. Yesu Kurisito to wazi fere me-ye, teka fü ra angbü emala ngari Me di, da emere ngü te ngbü ereke gbü jia Me ne. Te di bala, de-yi, wü ganzi kpara, yi kpo da eje ngari Me teka ngü ka-ra. ¹⁹ Angü Nzila Wazi Me to wazi fere, teka adi emere wü kpeke ngü, te komö wü kpara ngbü egu kaka agu ne. Fü ra angbü fi bü da emere tima la de maguma ra 'buru, zalü akoro di de enatikine dene. Ma kpo ta emere ngü la kü agbü Yerüsalema, zalü akoro di nengete agbü Iliriko. ²⁰ Ma ngbü ele teka adi emala ngü ka Yesu Kurisito gbü wü sü, te wü kpara je ngü ka Yesu tete na la de ne. Angü ma le aza tima ka gara kpara, angbü emere, enü di kpa engagira

* 15:3 15:3 Mü ena amaka ngü la gbü Ci ka wü Davidi 69:9. † 15:9 15:9 Mü ena amaka ngü la gbü 2 Samüwele 22:50bete Ci ka wü Davidi 18:49. ‡ 15:10 15:10 Mü ena amaka ngü la gbü buku ka Manda nga Riri 32:43. § 15:11 15:11 Mü ena amaka ngü la gbü Ci ka wü Davidi 117:1. * 15:12 15:12 Davidi de ye Yese. † 15:12 15:12 Mü ena amaka ngü la gbü buku ka Yisaya 11:10.

nü ne, nda-ra de. Ma ele akpo de tima la gbü to wü sü. ²¹ Ah ge baka ngü ta te wüh ba gbü *Ngari Me gügü, gü ba, "Wü kpara ta te wüh je ngü ka Me gügü de ne, wüh ena adu amala ngü la fü ewü, fü ewü ale ngü la, angü wüh ena aje sisi na areke mbi me-wü."[‡]

²² Dela si-ngü te ma koro tete na kpaka yi, agbü *Rüma kpala, kere nda-ra la de ne, angü ma ngbü emala ngü ka Yesu la, agbü mere bi wü gara sü bala. Angü ma wu eyi, gü ba, yi je ngü ka Yesu Kurisito ta eyi, gömō wü gara kpara. ²³⁻²⁴ Te di bala, ma ngbü ta la endoro gbü wü sü, te wüh je ngü ka Yesu tete na la de ne. Amba titine, ma nza tima ka-ra gbü wü sü la eyi. Ma ngbü efi dene, teka anü agbü Sīpaniya, amala ngü ka Yesu Kurisito kpala. Gbü nünü ka-ra la, ma ena afü kpuru to kpaka yi agbü Rüma, angü ma ngbü efi nga yi kü gügü, teka de ma koro, ma ceka yi reke areke. Ma ena angbü kpaka yi sela mba cükü'daye, teka de yi le kpah ta-ngü te ra, teka nünü ka-ra agbü Sīpaniya ne.

²⁵ Amba gara ngü kpah ladü te ma ele amere feke. Ma le anü agbü Yerüsalema, teka ale ta-ngü te wü *kpara ka Yesu de kpala. ²⁶ Angü wü kpara ka Yesu agbü Makedoniya, bete Akaya, je nga cinga te ngbü emere wü kpara ka Yesu agbü Yerüsalema ne eyi. Fü ewü ayia abiti jīase, ato esaka ra, de ma nü, ma le ta-ngü di te wü mürü cinga la. ²⁷ Dela ta ngü te wü kpara la fi ta me-wü, teka atima jīase la fü wü di engā *Yisaraye. Amba, ah reke pe, te wüh mere ngü la bala, angü wü di engā Yisaraye le ta-ngü te wü *ganzi kpara de ngari Me. Te di bala, ah le kpah de wü ganzi kpara le ta-ngü te wü di engā Yisaraye de wü e ka-wü.

²⁸ Te di bala, ma ena anü de jīase la agbü Yerüsalema feke. Fütanga ngü la, ma ena afü kpuru kpaka yi sela. Fü ra adu aguru sü agbü Sīpaniya. ²⁹ Ma wu eyi, gü ba, gbü sīkpī te ma ena akoro tete kpaka yi kpala, Yesu *Kurisito ena ato wazi fü nih, fü nih angbü de mere tadu.

³⁰ Wü di engā wüna, ma wu eyi, gü ba, nih ngbü ele te-nih gbü wazi ka *Nzila Wazi Me. Te di bala, ma ngbü eyi-ta yi te iri Miri Yesu Kurisito, yi yi-ta Me kpekpeke, de ah to wazi fere, ale ta-ngü te ra, gbü wü kpeke tima te ma ngbü emere ne. ³¹ Yi yi kpah ta Me, de engu küwa ra esaka wü kpara agbü Yerüsalema, te ewü le ngü ka Yesu nda-wü de ne. Yi yi kpah ta Me fere, teka ngü te ma ena amere agbü Yerüsalema ne, de ah reke gbü jia wü kpara ka Yesu de kpala ne areke. ³² Te Me le eyi la, ma ena akoro kpaka yi kpala,

fü nih amaka te-nih de mere tadu, angü ngü la ena ale ta-ngü te nih, ato wazi fü nih.

³³ Me, te di de mürü gu maguma ne, ngbü de yi kpala 'buru, de ah to gu ngü fü yi.

16

Dene adu ngü ka-ra

¹ Ma ngbü etima köcökpa ne fü yi esaka tangbase ka-nih, de iri ye Foyibe, te ngbü emere tima ka Yesu Kurisito agbü Kekureya ne. ² Yi za engu gbü mürü te iri Miri Yesu. Angü dela ngü te wü *kpara ka Yesu ena adi emere esüka wü. Yi le ta-ngü tete na de wü e de te engu ngbü ele, angü engu le ta-ngü te ra, de wü gara kpara ka Yesu, eyi cu fa sü.

³ Ma to mandī fü wü Pīrīsila ake Akuwila, te ewü ngbü emere tima ka Yesu kpah baka ra ne. ⁴ Wüh ce ta te-wü, yia ekpi, teka aküwa ra esaka wü vügü. Ngü la türü te ra cu fa sü. Wü gara kpara ka Yesu gbü wü gara sü, ngbü 'buru 'dö de tadu, teka ngü de te ewü mere la. ⁵ Ma to kpah mandī fü wü kpara ka Yesu, te ewü ngbü ebite te-wü agba Akuwila la.

Ma to kpah mandī fü Apenito, te di de züka engā wüna. Engu ta de gina kpara agbü Asiya, te to maguma ye fü Yesu Kurisito. ⁶ Ma gü mandī kpah fü Mariya, ta te to te-ye, angbü emere tima kpekpeke tūngü yi ne. ⁷ Ma to mandī fü wü di engā wüna gbü nguwa ra, wü Andrünikü ake Yuniya, ta te wüh gü a de ewü gbü ku ne. Wüh de cögbörö kpara esüka wü *mürü tima ka Yesu, ta te ewü le ngü ka Yesu te engā gina, o ra to maguma ra fü Yesu la de ne.

⁸ Ma to mandī fü Apilyatü, te di de züka awuba ra gbü ngü ka Yesu ne. ⁹ Ma to mandī kpah fü Ürübanü, te ngbü emere tima ka Yesu Kurisito kpah baka ra ne. Mandī kpah fü Sītakī, te ma le engu fa sü, teka ngü ka Yesu Kurisito ne. ¹⁰ Ma to mandī fü Apele, te engu di de kpeke kpara ka Yesu Kurisito ne. Engu zü mere cinga teka ngü ka Yesu Kurisito fa sü, amba engu rü ka-ye fi bü kpekpeke. Ma to mandī fü Arisitobolo, de wü kpara ka Yesu agba ka la 'buru. ¹¹ Ma to mandī fü Erodiyo, te di kpah de engā *Yisaraye baka ra ne. Ma to mandī fü Narasisü, de wü kpara ka Miri Yesu de agba ka la kpah 'buru.

¹² Ma to mandī fü wü Terefina ake Terefusa, wü tangbase, te ewü ngbü emere tima ka Miri Yesu kpekpeke ne. Ma to mandī kpah fü Peresi, züka gara tangbase ka-nih, te mere tima ka Miri Yesu

[‡] 15:21 15:21 Mü ena amaka ngü la gbü buku ka Yisaya 52:15.

cu kpekpeke ne. ¹³ Ma to mandí fū Rufusu, te Miri Yesu fe engu eyi baka kpara ka-ye ne. Ma to mandí kpah fū ni ye na. Engu ngbü ta eceka kpí fütanga ra, cu baka te ma di de yíanga, te engu bí me-ye la. ¹⁴ Ma to mandí fū Asikirito ake Felegona, Erema, Patürüba ake Erema, de wü gara kpara ka Yesu 'buru, te ewü ngbü ebiti te-wü de ewü kpala ne. ¹⁵ Ma to mandí fū Filologo ake Yuliya bete Nereyo ake enga ni ye tangbase, bete Olipiya, de wü gara kpara ka Yesu, te ewü ngbü ebiti te-wü de ewü kpala.

¹⁶ Ma le ta agü mandí ne fū yi bane cu me-ra, da efaka yi te iri Miri ka-nih Yesu Kurisito. Wü kpara ka Yesu Kurisito de kpakine 'buru to mandí fū yi, agbü *Rüma la.

¹⁷ Wü di enga wüna, ma ngbü emala fū yi kpekpeke, gü ba, ah le de yi ceka te-yi 'be, teka mene siti wü kpara, te ewü ngbü esu wu te-wü, gü ba, ani kpah de wü kpara ka Yesu ne. Amba wü ngü de te ewü ngbü emere ne, ah de ngü de te Yesu Kurisito le nda de. Wüh ngbü nda-wü efiti wü kpara ka Yesu de wüh ye süka wü. Wüh ngbü ka-wü dela esiti tima ka Me. Fingängü ka-yi gü ba, wüh ngbü dela eri ani de ngü ka Yesu fanü fanü? Ah bala de. Yi ce ngü ka-ewü la ace. ¹⁸ Wü kpara la ngbü emere dela tima ka Miri Yesu nda-wü de. Wüh ngbü emere tima la baka te ewü ngbü ele, bü teka amaka züka wü e gbügbü. Wüh ngbü emala wü türü ngü, bü teka asiti nzó wü kpara, te ewü wu ngü mbi mbi de ne. ¹⁹ Amba ma wu eyi, gü ba, yi ka-yi de kpeke wü kpara. Wü kpara 'buru wu kpah kpo, gü ba, yi ngbü ele ngü ka Me de maguma yi 'buru. Ma ngbü engbü de tadu, teka ngü ka-yi la. Ma le de yi wu wü züka ngü 'buru. Ma le de yi mere e ato te-yi gbü *siti ngü, kpo fi de!

²⁰ Me de kpara te ngbü ele ta-ngü te yi me-ye, da egu maguma yi, fū yi angbü engbü mbi ne. Engu ena afa jia *Satana tütine, fū engu aza Satana ao tüne esatülo yi. Gu ngü ka Miri Yesu Kurisito ngbü de yi, de *züka maguma ye.

²¹ Timoteyo, te ngbü ele ta-ngü te ra gbü tima ka Yesu Kurisito ne, to mandí fū yi. Lukiyo, Yasona ake Sosipata, te ewü di gbü nguwa ra ne, to kpah mandí fū yi.

²² De-ra, Teretiyo, te ma ba köcökpa ne te ngari Pawülü, ma to mandí fū yi te iri Miri Yesu. ²³ Gayü, te ma ngbü engbü gba ka, te wü kpara ka Yesu ngbü kpah ebiti te-wü gba ka ne, to mandí fū yi. Ereseto, te di de kpara te ngbü eceka kpí sidi nga jiase ka miri ka sü ne, to kpah mandí fū yi. Enga ni nih Küwarito, to kpah mandí fū yi kpala. ²⁴ Ah le de Miri Yesu le ta-ngü te yi kpala 'buru de züka maguma ye.

²⁵ Nih gbo nga Me, angü engu to wazi eyi fū yi, teka fū yi adi elala di gbü ngü ka Miri Yesu. Dela ngü ka Yesu Kurisito, te ma ngbü emala fū wü kpara 'buru ne. Fanü fanü, Me sere ta si-ngü la fū wü kpara te enga gina nda de. ²⁶ Amba ah sere ta mba bebete na fū wü *mürü dofo, te ewü ba gbü *Ngari Me ne. Amba tütine dene, Me sere si-ngü la tüne eyi fū nih mbölö, teka de nih di emala ngü la fū wü kpara füh kotó ne 'buru, teka de wüh to maguma wü fū Yesu, adi emere riri kaka.

²⁷ Nih gbo nga iri Me!

Engu ka-ye de kpara te wu ngü fa wü kpara di 'buru duu me-ye.

Me ka-ye kü ladü, ah ti anza nda de! Nih gbo ngangga fi mere badi, teka ngü ka Yesu Kurisito.

Ah di bala.

Dela adu ngü te ma mala fū yi, de-ra Pawülü.

Dene kōcōkpa te Pawülü ba fū wü kpara ka Yesu agbū

Korīnito 1 Korīnito

Masere si-ngü

Pawülü ba kōcōkpa ne me-ye fū wü *kpara ka Yesu Kurisito, de te ewü di agbū Korīnito. Ah de gina kōcōkpa, te engu ba fū ewü ne, nda de, angü gbü sapita 5:9, ah gü ba, “Ngü ta te ni ba fū wü gbü gina kōcōkpa ka-ni ne, ni mala fū ewü, gü ba, wü mere e adi engbü te sü biringbö de wü mürü waza de.” Amba gina kōcōkpa la, nih wu nda-nih de, angü ah dürü ka-ye ta eyi gügü. Mene kōcōkpa te wüh eī, gü ba, 1 Korīnito ne, tīne eyi de gina kōcōkpa te di ladü esaka nih enatikine.

Korīnito de mere kōti gbü tō ka wü *Giriki. Pawülü ta me-ye de gina kpara te mala ngü ka Yesu kpala. (Mü ti eyi amaka ngü la gbü buku ka wü Mürü Tima 18.)

Pawülü ba kōcōkpa ne, o engu di ta agbū Efeso. (Mü ti eyi atanga nga ngbüngbü kaka agbū Efeso gbü buku ka wü Mürü Tima 19.) Ah ba ngü la fū ewü kükürü de, angü engu je, gü ba, wü kpara ka Yesu Kurisito agbū Korīnito kpo eyi ega wü yiki da eye süka wü. Wü gara ewü kpo kpah eyi da emere gara wü *siti ngü, te reke gbü jia Me de. Kpah bala, wü kpara ka Yesu agbū Korīnito ba ta kōcōkpa, tima fū Pawülü, ayi-tata teka wü gara ngü, te engu ena alügü ngü gbü nganga na fū ani.

Ngü de te Pawülü ba fū wü kpara ka Korīnito de kpala, ah kpah bü wü ngü te ngbü embü nih de enatikine ne.

Sapita 1-4 Ngü ka yiki esüka wü kpara ka Yesu Kurisito

Sapita 5-7 Ngü ka ngbüngbü ka kpara ka Yesu ake wara ye agba wü

Sapita 8-11 Ngü ka mace gele ka wü me ka wü kundu wü

Sapita 12-14 Ngü ka magbo nga Me te züka kaje,

bete ngü ka wazi te Nzila Wazi Me ena adi eto fū nih

Sapita 15 Ngü ka züzükü ka wü kpara ka Yesu Kurisito fütanga kpi ka-wü

Dene mandī ka Pawülü fū wü kpara

ka Yesu Kurisito agbū Korīnito

¹⁻² De-ra Pawülü, te Me fe ra *mürü tima ka Yesu ne, ma ba kōcōkpa ne fū yi me-ra, wü *kpara ka Yesu Kurisito, te yi di agbū

Korīnito. A to mandī fū yi ake engu ni nih Sosotene, angü Me fe yi eyi me-ye, fū ah ato wazi fū yi, teka fū yi alala fi bü eküte Yesu Kurisito. Me fe yi me-ye, fū ah adu afü yi cu, akoro di züka wü kpara ka-ye, kpah baka te engu ngbü emere fū wü gara kpara ka-ye te nga wü sü 'buru, de te ewü to maguma wü fū Yesu Kurisito ne. Angü Yesu Kurisito de Miri ka-nih 'buru me-ye. ³ Wö nih Me ake Miri Yesu Kurisito ngbü de yi, de wüh to gu ngü fū yi de *züka maguma wü.

⁴ Ma ngbü egbo nga iri Me te nga wü sikipi 'buru, teka züka wü ngü te engu to fū yi de züka maguma ye, angü yi koro eyi wü kpara ka Yesu Kurisito. ⁵ Angü Me to mere wazi eyi fū yi teka ngü ka Yesu Kurisito. Ah to wazi ye la fū yi, teka fū yi adi eje si-ngü ka-ni di mbi mbi mbi, kpah teka de yi di emala ngü ka-ni la fū wü kpara ereke areke. ⁶ Te di bala, wü kpara 'buru ena awu, gü ba, ngü ka Yesu Kurisito te a mala fū yi ne, ah de zu ngü fanü fanü. ⁷ Angü Me to wazi ye eyi fū yi, teka fū yi adi emere mere bi wü züka ngü di titine gbü wü sikipi ne, baka te yi ngbü eo jia yi teka dudu ka Miri Yesu Kurisito kpa füh kotō kpakine. ⁸ Me de kpara te ngbü eto wazi fū yi, teka fū yi arü di kpekpeke, zalü akoro di gbü *adu sikipi, te Miri Yesu Kurisito ena adu akoro tete na. Te di bala, Me ena aceka yi baka züka wü kpara ka-ye. ⁹ Angü Me fe yi me-ye, teka angbü tundu ba kpara biringbö ake Ye ye, Miri ka-nih Yesu Kurisito. Angü ngü de te engu mala ne, engu ti ace nda de.

Dene ngü ka yiki esüka wü kpara ka Me

¹⁰ Wü di engu wüna, ma ngbü emala ngü fū yi kpekpeke de iri Miri Yesu Kurisito, teka de yi ce ngü ka yiki asidi. Yi mere e aye süka yi de. Ah le de yi ngbü tundu baka kpara biringbö, de fingangü ka-yi, de maguma yi kpah 'buru 'dō biringbö.

¹¹ Ma mala ngü ne fū yi kükürü de, angü wü kpara ka Külüwe koro kpakine, fū ewü amala fere, gü ba, yi ngbü fi bü ega yiki esüka yi. ¹² Wü gara yi gü ba, “Ani nda-ani de wü kpara ka Pawülü.” Wü gara gü ba, “Ani nda-ani de wü kpara ka Apolo.” Wü gara gü ba, “Ani nda-ani de wü kpara ka Petero.*” Wü gara gü ba, “Ani nda-ani de wü kpara ka *Kurisito.” ¹³ Dela ne tōndō ngü ne? Yi ena aye süka Kurisito, neh baye baye? Kpara te kpi teka aküwa yi neh da? Ah ta de Pawülü? Wüh to *babatiza fū yi, neh te iri da? Te iri Pawülü? Ah bala de!

¹⁴ Ma gbo nga iri Me, teka ne de, angü ma to babatiza fū kpara biringbö esüka yi

* 1:12 1:12 Gara iri Petero de Kefa.

nda-ra de, 'duwa wü Kürisipü ake Gayü. ¹⁵ Te di bala ne, kpara biringbö esüka yi te ena amala, ga dene, wüh ngbü tane eto babatiza fü wü kpara te iri ra, Pawülü ne, nda ma. ¹⁶ Amba ma to ta babatiza 'duwa kpah eyi fü wü Setefanü de wü kpara ka-ye. Anga te gara kpara ena adi ladü, ma wu de, to ra ena airi eyi.

¹⁷ Wü di enga wüna, Yesu Kurisito tima ra kpaka yi, neh teka ne? Ah tima ra ta teka ato babatiza fü wü kpara? Ah bala de, Ah tima ra teka amala züka ngü ka-ni, ka Yesu, fü wü kpara. Ma ena amala ngü la neh te lö kaje lö? Ma ena amala ngü la de mere bi wü ngü gbü ye, baka kpara te wu ngü fa sü, teka areke ngü ka-ra gbü jia wü kpara? Te ma ena amere ta bala la, de bane yi ti aküwa de. De bane, wü ngü 'buru de te ma mala fü yi ne ena angbü ka-ye ba töndö ngü. Amba ma mala ngü la fü yi mbölö, gü ba, Yesu Kurisito kpi füh *rü gbegete, teka ngü ka-yi. Angü dela kpeke ngü, de te Me ena aküwa yi tete na, fi mere badi.

Dene ngü te ma le amala fü yi, teka ngü ka kpi ka Miri Yesu

¹⁸ Wü di enga wüna, ngü ka kpi ka Miri Yesu ka-ye de kpeke ngü, de te Me mere cu me-ye fü nih fanü fanü. Amba teka mene wü kpara de te ewü düürü te kaje ka Me eyi ne, ngü ka kpi ka Miri Yesu ka-ye gbü jia ewü ba töndö ngü kükürü. Te di bala, teka ngü ka-nih, de te Me küwa nih eyi ne, nih wu eyi, gü ba, ngü ka kpi ka Miri Yesu la, ah ka-ye de mere kpeke ngü te Me mere me-ye fanü fanü.

¹⁹ Ta gügü, wü *mürü dofo ba ngü la eyi gbü *Ngari Me, gü ba, "Wü mene kpara te ewü wu ngü fa sü, de-ni Me, ni le ngü ka-ewü nda-ni de. Wü fingangü ka-ewü gbü jia ni ka-ye töndö ngü."[†] ²⁰ Te di bala ne, wü kpara te ewü wu ngü fa sü la, ngü ka-ewü gbü jia Me 'be? A'a! Ngü ka-ewü gbü jia Me ka-ye töndö ngü. Te mala eyi bala! ²¹ Angü Me de kpara te wu ngü 'buru me-ye. Engu mala ngü la ta, gü ba, "Wü kpara ti awu ngü ka-ni, Me, de tete-wü nda-wü de." Me mala, gü ba, "Ni ena aküwa nzö mene wü kpara te ewü to maguma wü fü ni, teka ngü ka kpi ka Miri Yesu." Dela ngü ka Me te a ngbü emala, de te ngbü gbü jia wü kpara füh kotö ne baka töndö ngü kükürü ne.

²² Wü di enga *Yisaraye le ngü ka Yesu, te a ngbü emala fü ewü ne, nda-wü de, angü wüh ngbü ele de a di emere mere kpeke lara ngü gbü jia ani, de ani wu, gü ba, ngü de te a ngbü emala ne, ah de zu

ngü ka Me fanü fanü. Wü *Giriki le ngü la kpah de, angü wüh le de a mala ngü la fü ani kpekpeke baka kpara te wu ngü fa sü, teka fü ngü la areke gbü jia ani. ²³ Amba teka ngü ka-a, a le ngü ka-ewü la nda-a de. A ngbü nda-a emala nzö nga Yesu Kurisito, de te wüh bere engu te *rü gbegete teka ngü ka-nih ne. Amba ngü la siti gbü jia wü di enga Yisaraye le fa sü. Fü wü Giriki angbü eceka ngü la kpah baka töndö ngü kükürü. ²⁴ Amba wü kpara de te Me fe ewü me-ye ne, ngbü eje si-ngü la ereke 'duwa me-wü mbi mbi mbi. Angü wüh wu eyi, gü ba, Yesu Kurisito sere wazi ka Me eyi fü ani. Kpah bala, engu sere kpeke fingangü ka Me kpah eyi fü ani. ²⁵ Kükürü de, angü ngü ka kpi ka Miri Yesu ngbü ka-ye gbü jia wü kpara füh kotö ne baka töndö ngü la. Amba ah ka-ye de mere kpeke ngü ka Me, te fa wü ngü ka wü kpara 'buru.

²⁶ Wü di enga wüna, gbü sikipi ta te Me fe yi tete, yi ngbü gbü jia wü bu yi, neh baye? Yi ta baka cögbörö wü miri? Ah bala de. Anga yi ta baka wü mere *mürü riri, te ewü wu ngü fa sü? Ah bala kpah de. ²⁷ Angü Me ngbü efe ka-ye wü kpara, te ewü di gbü jia wü bu wü baka töndö kpara, kpah baka wü jürü jaji ne. Ah mere ngü la bala kükürü de. Ah ngbü emere bala, teka de ngü la to lümü fü wü kpara, te ewü ngbü eceka te-wü baka kpeke wü kpara, da efi, gü ba, ani wu ngü 'buru me-ani ne. Angü Me le wü kpara de bala nda de. ²⁸ Wayi, Me ngbü efe ka-ye töndö wü kpara, wü kpara te wüh cu ngü ewü de, te wü bu ewü ngbü eceka ewü baka töndö wü kpara ne. Ah mere ngü la bala, teka agü tamu ngü di fü wü kpara füh kotö ne, gü ba, "Wü ngü de te ngbü ereke te nga jia wü ne, ah ka-ye de töndö ngü kükürü gbü jia ni, Me."

²⁹ Te di bala, kpara biringbö te ena acu ngü ye, gü ba, "Wayi! Ni küwa te-ni kani de tete-ni ne," nda ma. ³⁰ Me de kpara te ngbü eküwa nih duu me-ye. Angü engu to wazi eyi fü nih, teka fü nih alala eküte Yesu Kurisito. Yesu Kurisito sere züka ngü ka Me fü nih me-ye, angü engu kpah de kpara te reke nih me-ye gbü jia Me. Fü engu ato kpah wazi fü nih, teka fü nih adi emere ngü te ena areke areke gbü jia Me. Kpah bala, engu ngbü efuru nih gbü ku ka *siti ngü me-ye. ³¹ Te di bala ne, de nih mere e agbo nga nih de tete-nih de, nih gbo 'duwa nga Me, kpah baka ngü ta te ewü ba gbü Ngari Me gügü ne.

† 1:19 1:19 Mü ena amaka ngü la gbü buku ka Yisaya 29:14. ‡ 1:24 1:24 Wü kpara te Me fe ewü me-ye ne ngbü eje si-ngü la ereke 'duwa me-wü mbi mbi mbi, anga wüh de wü di enga Yisaraye le anga wü di enga Giriki, anga neh wü da?

2

1 Wü di engä wüna, si-ngü ta te ma koro di kpaka yi agbü Korinoto kpala ne, ah teka amala ngü ka Me fü yi. Amba ma le ayi-ta yi, gü ba, ma mala ta ngü la fü yi, neh baye baye? Ma ngbü ta ecu ngü ra, da emala mere bi wü ngü te türü atürü, baka mere kpara, te wu ngü fa sü? Ma mere ngü la ta bala nda-ra de. ² Angü ma mala ta ngü la eyi fü yi, te ma di ta la tete kpala ne, gü ba, "Ma ti amala gara ngü fü yi nda-ra 'buru de, 'duwa duu ngü ka Yesu Kurisito, te engu kpi füh *rü ghegbete, teka ngü kanih ne." ³ Ma ngbü ta emala ngü ka Me fü yi, baka kpara te wawazi na di ma. Fü ra angbü de mere fingangü emaguma ra, angü ma fi ta, gü ba, yi ti ale ngü, te ma ngbü emala fü yi ne, nda-yi de. ⁴ Tekä ngü la, yi to maguma yi fü Yesu Kurisito neh baye baye? Ah teka wü ngü ta te ma mala fü yi ne, türü gbü güje yi me-ye? Ah bala de. Yi le ngü la, angü *Nzila Wazi Me sere ngü la fü yi me-ye, gbü wazi ka-ye, ga, dela mere kpeke ngü ka Me fanü fanü. ⁵ Ah le fü yi ao maguma yi teka fingangü ka wü kpara füh kotö ne de, angü ngü ka-ewü ena anza ka-ye anza. Amba ah le de yi to maguma yi fü Me, angü engu de mere kpeke mürü wazi.

Dene mere kpeke ngü, de te Nzila Wazi Me sere fü nih

⁶ Fanü fanü, mere kpeke ngü ka Me ladü, te ma ngbü emala fü wü *kpara ka Yesu, mene ewü te ewü ndri eyi gbü ngü kaka. Amba teka mene wü kpara, te ewü to maguma wü fü Yesu la de ne, wüh ngbü eceka ngü la gbü jia wü baka töndö ngü kükürü. Kpah bala, wü cögbörö miri füh kotö ne ngbü eceka ngü la gbü jia wü kpara baka kükürü ngü. Amba ngü ka wü cögbörö miri la ena anza ka-ye anza! ⁷ Mere kpeke ngü ka Me la, ah de ngü ta te Me fi eyi gügü, o engu mere kotö ne la de, gü ba, "Ni, Me, ena aküwa nih, fü ni aza nih akoro di kpaka ni agbü kpi." Me fi ta ngü la gügü, amba ah sere ngü la fü wü kpara füh kotö ne de. ⁸ Wü cögbörö miri füh kotö ne wu si-ngü gbü ngü la nda-wü kpahe, angü ta te ewü ena awu si-ngü la eyi la, de bane, wüh ti amörö Ye Me ne de.

⁹ Ah kpahe baka ngü ta te *mürü dofo Yisaya ba gbü *Ngari Me gügü, gü ba, "Mere züka ngü ka *küküwa, te Me ngbü efi emaguma ye, teka ato fü mene wü kpara, de te ewü ena ato maguma wü fü ni, Me ne, wü kpara te ewü le ngü ka Me de, ti aje si-ngü la nda-wü de. Wüh

ti awu ngü la de jia wü kpahe de. Ngü la ti arı gbü nzö ewü kpahe de."*

¹⁰ Dela ta ngü de te Me sere eyi fü a, wü *mürü tima ka-ye de *Nzila Wazi ye. Angü Nzila Wazi Me wu wü si-ngü la 'buru kpo. Kpah bala, wü cögbörö kpeke fingangü ka Me, de te wü kpara ti awu de ne, ah wu 'buru me-ye. ¹¹ Kpara te ena awu fingangü, te gara kpara ngbü efi emaguma ye, neh da? 'Duwa kpara la te ena awu ngü ka-ye la me-ye de tete-ye. Ah kpahe bala, kpara te ena awu fingangü ka Me, te engu ngbü efi emaguma ye ne, nda ma. 'Duwa nzö Nzila Wazi Me te ti awu ngü la me-ye.

¹² Amba teka ngü ka-a, wü *mürü tima kaka, a wu züka ngü de te Me to fü a ne eyi fanü fanü. A wu ngü la, neh baye baye? Wü kpara füh kotö ne sere ngü la fü a me-wü? Ah bala de. A wu ngü la, angü Me tima Nzila Wazi ye, fü ah akoro angbü emaguma a, da esere ngü la fü a me-ye.

¹³ Te di bala ne, a ngbü emala ngü ka Me fü wü kpara, neh baye baye? A ngbü emala ngü la de mere bi wü ngü gbü ye, baka ngü ka kpara de mani gbü nzö ye, te wu ngü fa sü? Ah bala de. A ngbü emala bü duu ngü de te Nzila Wazi Me ngbü esere fü a me-ye, kpahe fü mene wü kpara, de te ewü di de Nzila Wazi Me emaguma wü ne. Angü wü gara kpara ti aje si-ngü la nda-wü de. ¹⁴ Kpara de te Nzila Wazi Me di emamaguma ma, engu ena awu si-ngü de te Nzila Wazi Me ngbü esere fü a, wü kpara ka-ye ne, neh baye baye? Ngü la ena angbü ka-ye gbü jia kpara la baka töndö ngü. Angü kpara te ena awu ngü la de tete-ye nda ma. Ah le fü Nzila Wazi Me agüfa ngü la fefe me-ye. ¹⁵ Amba teka kpara te di de Nzila Wazi Me emaguma ye, kpara la ti eyi awu wü si-ngü gbü wü ngü 'buru. Amba wü kpara te ewü le ngü ka Me de ne, wüh ti awu ngü ka kpara de Nzila Wazi Me emaguma ye ne nda-wü de. ¹⁶ Ah kpahe baka gara ngü te *mürü dofo Yisaya ba ta gbü Ngari Me, gü ba, "Kpara te ena awu fingangü ka Me neh da? Kpara te ena arı engu kpahe ma."† Amba tüngü a, wü mürü tima kaka, a ti eyi awu ngü la, angü Yesu Kurisito to fingangü ka-ye eyi emaguma a.

3

Dene ngü te ma ele amala fü yi, teka ngü ka-a,

wü mürü tima ka Yesu

¹ Wü di engä wüna, ta te ma di kpaka yi agbü Korinoto kpala ne, ma ngbü ta

* 2:9 2:9 Mü ena amaka ngü la gbü buku ka Yisaya 64:4. 40:13.

† 2:16 2:16 Mü ena amaka ngü la gbü buku ka Yisaya

emala ngü fū yi neh baye? Ma ngbü ta emala wü kpeke ngü fū yi, baka te ma ngbü emala ngü fū wü kpara, te ewü wu ngü ka Me eyi la? Ah bala de! Ma ngbü ta emala ngü fū yi ferrre, baka te ma ngbü emala ngü fū wü kpara, te fingangü ka-ewü di baka wü kpara fūh kotö ne. Teka ne de, angü yi to la maguma yi fū Yesu Kurisito titine dene. Te di bala ne, yi ka-yi la baka vürü jaji, te wüh yaka engu toto. ² Te wüh yaka jaji toto la, engu ti eyi azü kpeke e baka so? Ah bala de. Ah ngbü ela ka-ye la bü ngu-ka. Amba te jijia kpo eyi emba, fū tete akpo ekö la, fū ah akpo tine adi ezü so, teka amaka wazi gbügbü na. Ngü ka-yi kphah bala, wüh ti ari yi de kpeke ngü la de, angü yi la fi bü baka wü vürü jaji. ³ Angü fingangü ka-yi la fi bü baka fingangü ka wü kpara ka kotö ne. Angü teka ne de, yi ngbü engbü esüka yi fi bü de kanga emagama yi, kphah da ega yiki esüka yi! Dela ngü ka *Nzila Wazi Me? Ah bala de. Dela ngü ka wü kpara ka kotö ne! ⁴ Te gara kpara ngbü emala, gü ba, "Ni de kpara ka Pawülü," gara gü ba, "Ni de kpara ka Apolo," dela züka ngü? Wü *kpara ka Yesu ngbü emere ngü esüka wü bala? A'a, wüh mere ngü bala de! Dela ka-ye ngü ka wü kpara ka kotö ne.

⁵ Wü di enga wüna, yi fi ngü tüngü a ake Apolo bala de. Angü a de mere kpara nda-a de, a ka-a bü wü *mürü tima, de te Me tima a me-ye, teka amala ngü ka Yesu fū yi, fū yi ayia ale ngü la gömō a. Amba teka ngü ka-a, a ngbü emere nda-a nzö bü duu tima de te Miri ka-a to fū a, de a di emere ne. ⁶ Nda-ra, ma baka kpara te ru e. Apolo nda-ye baka kpara te buru gbü e la. Amba kpara te ngbü eto wazi fū e la akö, fū ah aga di ne, neh da? Ah ka-ye de Me! ⁷ Te di bala ne, mere kpara neh da? Kpara te ru nguwa la, ah de mere kpara? Ah bala de! Kpara te mere maburu la, ah de mere kpara me-ye? Ah bala kphah de! Me ka-ye de mere kpara me-ye, angü engu ngbü eto wazi fū wü kpara te ewü to maguma wü fefe na. ⁸ Fingangü ka-ra ake nda Apolo 'buru 'dö biringbö, baka fingangü ka wü kpara 'basu te ewü ngbü emere tima 'buru gbü yi biringbö. Timu de te Me to esaka a ne, ah kpkipi ye kpkipi ye, amba fingangü ka-a ka-ye 'buru biringbö. Te gara, Me ena ato mere takpa fū a, teka tima de te a ngbü emere fefe na ne. ⁹ Angü a 'basu mini de wü mürü tima, te Me tima, teka amere tima agbü yi ka-ye. Yi engu la, ah de yi, wü kpara ka Korinito.

Kpah bala, de-yi, wü kpara ka Korinito, yi kphah baka kambü te Me tima a, teka de a

koro, a jī fū ni. ¹⁰ De-ra Pawülü, ma baka gina kpara te kpo de tima ka kambü la. Me to wazi fere, fū ra ayia areke sü kambü la. Fütanga ngü la, fū wü gara kpara akoro angbü eji kambü la, enü di. Ah le de wüh mere tima la reke areke de züka fingangü. ¹¹ Me fe sü de te wüh ena aji kambü la tete na ne eyi. Angü sü kambü la neh siye? Ah ka-ye de Yesu Kurisito. Gara kpara te ena afü ngü la nda ma. ¹² Wü gara kpara ngbü emere tima ka-wü kpekpeke. Wüh ngbü eji kambü de da bete se. Wü gara ngbü eji nda-wü kambü engu ne bü bala de tö, gala bete gü. ¹³ Yi ceka te-yi 'be, angü te gara, gbü *adu sikpi, Me ena awu nga wü tima, de te nih ngbü emere ne 'buru, anga ah de züka tima, anga ah de siti tima. Angü kokoro ka Yesu Kurisito la ena adi baka wa, teka are tima ka kpara biri biri 'buru. ¹⁴ Te kpara jī kambü ka Me de kpeke züka wü e la, wa la ti acuru kambü la nda de. Te di bala, Me ena adu ato züka takpa fū kpara la. ¹⁵ Amba te kpara jī kambü ka Me de töndö wü e la, wa la ena acuru kambü la acuru 'buru 'buru asidi. Te di bala ne, engu ti eyi amaka takpa? Ah ti amaka de! Engu ena akpe atafa bü de mere cinga eküte ye, baka kpara te kpe küwa gbü wa, bü de ngiri kpa ye.

¹⁶ Wü di enga wüna, yi baka mere züka kambü ka Me, angü *Nzila Wazi Me ngbü engbü cu emagama yi. Yi wu bala nda-yi de? ¹⁷ Te di bala, te kpara le asiti fingangü ka-yi, ah ge baka kpara te ele asiti kambü ka Me. Me ena ato kuru tete na, angü yi ka-yi baka kambü kaka-na. Yi fi ngü gbü ngü la mbi mbi mbi!

¹⁸ Wü di enga wüna, fingangü ka-yi mere e asiti de. Te mü mala, gü ba, ni de mere kpara fū wü bu ni, anga ni wu ngü fa sü, dela töndö ngü. Ah le de yi ce ngü la asidi, fū yi afü te-yi, agiri zu ngü, de te di de ngü ka Yesu Kurisito ne. ¹⁹ Teka ngü de te ngbü ega gbü jia wü kpara de fūh kotö ne, ah ka-ye gbü jia Me baka töndö ngü kükürü. Ah kphah baka ta te wü *mürü dofo ba gbü *Ngari Me gügü, gü ba, "Teku wü kpara te wüh wu ngü fa sü, baka wü mürü mani ne, Me ngbü ezoro ewü bü kpara'da gbü fiti ka-ewü la!"* ²⁰ Fū ewü adu kphah aba gara ngü, gü ba, "Fingangü ka wü cögbörö kpara, te ewü wu ngü fa sü ne, ka-ye gbü jia Me baka töndö ngü kükürü."†

²¹ Te di bala ne, yi mere e agbo nga yi de. Yi mere e adi egbo nga wü cögbörö kpara ka-yi, gü ba, "Ma nda-ra de kpara ka Pawülü," anga, "Ma nda-ra de kpara ka

* 3:19 3:19 Mü ena amaka ngü la gbü buku ka Eyobo a 5:13. 94:11.

† 3:20 3:20 Mü ena amaka ngü la gbü Ci ka wü Davidi

Apolo," ne de. Teka ne de, angü Me tima a baka wü labi, teka de a to wazi ka-ni, ka Me, fü yi. ²² Te ah ena adi de ngü ka Pawülü, anga Apolo, anga Petero la,† dela 'buru wü kpara, te Me tima teka ale tangü te yi. Wü gara ngü füh kotö ne 'buru, anga ah de ngü ka *küküwa agbü kpí, ah 'buru de ngü ka-yi. Kpah bala, ah le de yi kpe cürü kpi de, angü te yi kpi la, Me ena azükü yi gbü kpi la azükü. Züka wü e te ewü di ladü enatikine, kpah de züka wü e te ena akoro te gara, ah kpah de wü e ka-yi. ²³ Me tima ta Yesu Kurisito de ah mere ngü ka-ni, Me. Amba nda-yi, Me o yi, teka de yi di emere ngü ka Yesu Kurisito.

4

Dene kpah gara ngü tüngü wü mürü tima ka Yesu Kurisito

¹ Wü di enga wüna, yi mere e adi eceka a ake Apolo, de wü gara *mürü tima ka Yesu, baka cögbörö wü kpara de. Yi di eceka a baka wü labi ka Yesu Kurisito. Angü Yesu Kurisito tima a teka amala ngü ka Me fü wü kpara. Amba ta gügü ne, Me wo ngü ka-ye la ka-ye awo te wü kpara. Titiine dene, engu le eyi fanü fanü de wü kpara 'buru di eje ngü ka-ni la.

² Te mere kpara ka-mü tima mü teka anü amere ngü ka-ye la, ah le de mü mere ngü la areke areke, de maguma mü biringbö. Ah bala de? Ah kpah bala teka ngü ka-a ake Apolo, angü Yesu Kurisito tima a, teka amere tima ka-ye. ³⁻⁴ Mü fi, gü ba, kpara te ena aceka nga ni neh da? Ah ena adi de gara kpara? Ah bala de! Mere kpara te tima mü ne, ena aceka nga mü me-ye. Te di bala ne, teka ngü ka-ra, te yi mala, ga, ma mere tima ka Me 'be 'be nda-ra de la, ah ba ngü de. Te wü kpara mala kpah 'buru bala, gü ba, ma mere tima ka Me 'be 'be de la, ah kpah ba ngü de. Cu de-ra, ma ti akolo ngü ka-ra de tete-ra kpah de. Gbü jia ra, ma mere tima la eyi reke fa sü, amba ma ti acu ngü ra de. Angü dela ngü ka-ra de. Ah kpah de ngü ka-yi de. Ah ka-ye duu de ngü ka Me, angü Me to tima la fere me-ye. Kpah bala, engu ena amala ngü la me-ye, ga, ma mere tima la eyi mbi, anga ma mere esiti.

⁵ Amba kpah bala, teka ngü ka-yi, yi mere e ao te-yi ba miri, teka adi eye süka ngü ka wü bu yi, de. Angü sikipi ka ngü la koro nda la de. Gbü *adu sikipi, te Miri Yesu ena adu akoro tete füh kotö ne, engu ena aye süka ngü ka wü kpara areke 'buru me-ye mbi mbi mbi. Angü engu wu fingangü ka wü kpara, te ewü ngbü efi emagama wü ne, eyi 'buru. Ah ena asere ngü la fü wü kpara 'buru, kpah de gara

wü ngü te ewü ngbü emere gbü zi. Kpah bala, engu ena agbo nga wü kpara, te ewü mere tima ka-ye reke areke ne me-ye.

⁶ Wü di enga wüna, dela ngü te ma le amala fü yi tüngü a ake Apolo, de wü gara kpara ka tima ka Yesu. Yi mere e aceka gara kpara biringbö baka mere kpara, te fa wü bu ye 'buru ne, de. Yi mere e akpa ngü gara kpara kpah de. Angü wüh ba ngü la gbü *Ngari Me bala. Te di bala, yi di efa duu nga Yesu, angü engu de mere kpara me-ye. ⁷ Yi mere e ao te-yi ba wü mere kpara de. Kpara te o yi baka miri gbü nzö wü bu yi, neh da? Yi ngbü emala, gü ba, wazi ani ladü. Wayi, ah ngbüri bala, anga yi maka wazi la neh baye baye? Yi maka wazi la de tete-yi? Ah bala de! Me to wazi la fü yi me-ye. Te wüh to e fü mü la, mü ena angbü egbo nga mü, baka te mü maka e la de tete-mü? Dela züka ngü? ⁸ Yi di wü mere kpeke mürü wazi fanü? Yi ngbü efi, gü ba, "Me o ani eyi baka wü cögbörö miri gbü nzö wü kpara füh kotö ne 'buru?" Dela si-ngü de te yi le aje riri ka-a tete de ne? Te Me ena afü yi ta ba cögbörö wü miri la, ah ena adi ta de züka ngü. Gbü ngü la, de bane nih ena angbü ta de nih ma tundu, baka wü cögbörö miri gbü nzö wü kpara 'buru! ⁹ Amba teka ngü ka-a, wü *mürü tima ka Yesu, yi ngbü efi, gü ba, Me za a, fü baka wü labi? Anga ah fü a baka wü kpara te wüh ena amörö ewü amörö, gbü jia wü kpara 'buru, teka fü wü kpara 'buru, de wü *malayika ka Me agbü kpí, adi eceka lümü de te a ne?

¹⁰ Fanü fanü, wü kpara ngbü eceka a ba töndö kpara, teka ngü ka Yesu Kurisito. Amba nda-yi, yi gü ba, ani wu ngü teka ngü ka Yesu 'buru 'dö kpo. Nda-a, wazi a nda ma, amba nda-yi, yi ka-yi de kpeke wü kpara! Kpah bala, wü kpara ngbü ekpa ngü a, amba nda-yi, wüh ngbü egbo nga yi. ¹¹ Kü te kpo de kpala, akoro enatikine dene, a ngbü engbü ka-a fi gbü cinga, teka ngü ka Yesu Kurisito. Gbü gara sikipi, tala ngbü emere a. Gümü ngu ngbü kpah da eke a. Bongo eküte a ne ngbü kpah enza anza. Gbü wü gara sikipi, wüh ngbü kpah emi a. Züka sü de te a ena adi engbü tete ne kpah ma. ¹² A ngbü emere tima ra de biti, de wütüsü te a triii, teka amaka mba enga e-mazü tete fü a. Te wüh soko a la, a fi ngü la nda-a kpah de, fü a adu ayi-ta Me teka ngü ka wü kpara la. Te wüh ngbü embü a la, a ngbü erü ka-a fi bü kpekpeke, gbü tima ka Yesu. ¹³ Te wüh ngbü esu wu, da emala ambala'ba ka-wü te iri a la, a ngbü elügü fi bü züka ngü fü ewü. Kü te kpo de kpala, zalü akoro di enatikine dene ne, wü kpara ngbü eceka a

† 3:22 3:22 Gara iri Petero de Kefa.

baka töndö kpara, baka ca-e te wüh ka, bu eyi kpa füh ka.

¹⁴ Wü di engä wüna, yi ngbü efi, gü ba, ma ngbü emala ngü la fü yi bala, teka ato lümü gbü nzö yi? Ah bala de! Ma le arí yi bala, angü yi zu de wü jaji ka-ra. ¹⁵ E-wu neh da, anga Yesu Kurisito tima bi wü gara kpara eyi, teka de wüh ri yi la, ah kpah 'be. Amba kpara de te bi yi ne ka-ye ngbee biringbö. Kpara la, ah de-ra Pawülü, angü ma de kpara, ta te yi le ngü ka Yesu Kurisito gögömö na. ¹⁶ Te di bala ne, ma ngbü emala fü yi kpekpeke, gü ba, ah le de yi lala eküte Yesu Kurisito kpah baka ra. ¹⁷ Dene si-ngü te ma tima Timoteyo tete kpaka yi, angü engu de zu ye ra gbü ngü ka Yesu. Engu kpah de kpeke kpara gbü tima ka Miri Yesu. Te engu ena akoro kpaka yi kpala, engu ena arí yi de riri ka Yesu Kurisito, baka te ma ngbü emere, da erí wü kpara ka Me di, gbü wü sü 'buru ne.

¹⁸ Wü gara yi ngbü egbo nga wü, da eo te-wü ba wü cögbörö kpara, gü ba, ma ti adu akoro kpaka yi kpa gbü Korinito kpala tîne eyi de. Ah bala de! Te Miri Yesu le la, ma ena akoro kpala kere! ¹⁹ Gbü sikipi te ma ena akoro tete kpaka yi kpala, ma ena agiri lö-ngü ka wü kpara te ewü gü ba, ani wu ngü fa sü la. Wüh ngbü emala wü cögbörö ngü fanü. Amba wazi ka Me ladü gbü ngü ka-ewü la? ²⁰ Te Me o mü baka mere kpara, de mü di emala ngari ni fü wü bu mü la, ah ena ato fü mü neh ene? Ah ena ato mere bi kükürü mö fü mü? Ah bala de! Ah ena ato mere wazi ka-ye fü mü, teka fü mü amere ngü ka-ni la di! ²¹ Te ma ena akoro kpaka yi kpala, ma ena amere baye? Ma ena akoro de juru esaka ra, asüma yi di? Anga ma ena akoro, arí yi ferrre de züka maguma ra? Yi ena awu ngü la me-yi!

5

Dene ngü teka wü kpara ka Yesu, de te ewü ngbü emere siti ngü

¹ Wü di engä wüna, ma je gara ngü ka-yi, te to cinga fere fa sü. Wüh mala ngü fere, gü ba, gara kpara ladü esüka yi, te ngbü emere mere *siti ngü ka lümü, angü kpara la ngbü engbü ake wara wö ye! Dela züka ngü? Wü kpara te ewü le ngü ka Me de ne, wüh ti amere ngü ba e dela kpah de! ² Yi ti eyi angbü de tadu teka ngü de bala? Ah ena areke areke te yi ena angbü de mere cinga. Ah le de yi liki kpara de bala esüka yi asidi.

³ Nda-ra, baka te ma di kpaka yi kpala ma ne, amba kpakine ma ngbü eyi-ta Me teka ngü ka-yi, ra de biti mini. Wayi, amba

ma je ngü de te komoko la mere ne eyi. Dene ngü te yi ena amere teka ngü la. ⁴ Ah le de yi biti te-yi tundu te iri Miri Yesu, teka aye süka ngü la mbi mbi mbi. Te di bala, fingangü ka-ra ena adi tundu de wü yi. Kpah bala, wazi ka Miri Yesu ena adi kpah tundu de wü yi, teka ale ta-ngü te yi gbü ngü la. ⁵ Ah le fü yi aye süka ngü ka komoko la, gü ba, engu de *kpara ka Yesu tîne de, angü engu fü te-ye eyi baka kpara ka *Satana. Tekane de, angü ah le de wü siti ngü kaka-na la nza anza 'buru 'buru asidi, teka de engu fü maguma ye, fü ah aküwa te gara, gbü *adu sikipi te Miri Yesu ena akoro akolo liya ka wü kpara 'buru tete.

⁶ Wü di engä wüna, yi mere e acu ngü yi de. Angü yi wu kpo, gü ba, te e biringbö zi azi esüka wü bu ye la, ah ena asiti gara wü bu ye la 'buru. ⁷ Zizi e la, ah baka siti ngü ka kpara de biringbö la. Yi ce wü siti ngü 'buru asidi. Yi liki siti ngü de bala esüka yi asidi, teka fü yi adu angbü *nzila, baka züka to ri-rü, te zi de. Ma wu eyi, gü ba, yi ka-yi eyi fanü nzila, angü Yesu Kurisito fa nih eyi gbü wü siti ngü ka-nih. Angü engu kpi, baka *kambiliki de te wüh ngbü ewa ne, teka fü *ngüngüte la areke ngü te di esüka nih de wü Me. ⁸ Te di bala, nih ce ngü ka siti maguma ace. Fü nih agbo nga Me de maguma nih 'buru biringbö.

⁹ Gbü gina köcökpa ta te ma ba fü yi ne,* ma mala ta eyi fü yi, gü ba, "Yi mere e adi engbü te sü biringbö de wü mürü waza de." ¹⁰ Yi ngbü efi nda-yi, gü ba, ma mala ta ngü la teka wü kpara te ewü le ngü ka Yesu de? A'a, ah bala nda de! Angü füh kotö ne, mere bi wü kpara ladü, te ewü di wü mürü waza, wü gara kpara nda-wü wü mürü gümü e, wü gara nda-wü wü mürü zi, wü gara le nda-wü gele ka me ka faranda. Te mü ngbü engbü füh kotö sene la, mü ena angbü engbü esüka wü siti kpara de bala. Ngü ta te ma mala ne, ah teka wü kpara de bala ne de. ¹¹ Ma mala ngü la ta duu teka wü kpara ka Yesu. Angü wü gara kpara ladü te ewü ngbü emala, gü ba, "Ani de kpara ka Yesu, ani de kpara ka Yesu," amba wüh o maguma wü ka-wü teka adi emere siti ngü. Wü gara de wü kpara te ewü emere waza, wü gara de mürü gümü e, wü gara ngbü ele gele ka wü me ka wü kundu wü, wü gara ngbü fi bü esoko wü bu wü, wü gara ngbü nda-wü fi bü eküya te nga wü sikipi 'buru, wü gara nda-wü wü mürü mani. Te wü kpara de bala ladü esüka yi la, yi mere e adi engbü de ewü de. Yi mere e azü e de ewü kpah de. ¹²⁻¹³ Amba teka wü kpara te ewü le ngü ka Me de ne, ah

* 5:9 5:9 Gina köcökpa la tütine nda ma.

de ngü ka-nih nda de. Me ena ato kuru fü wü kpara la ka-ye me-ye. Amba teka mene wü kpara te ewü emala, gü ba, "Ani de wü kpara ka Yesu" ne, dela fanü ah de ngü ka-nih. Ah le de ye yi süka ngü ka wü kpara la reke areke. Fü yi aliki mene wü kpara te ewü le ace siti ngü ka-wü de ne, esüka yi asidi.

6

Dene ngü te ma ele amala fü yi, teka maye süka ngü te di ezengba yi de wü bu yi

¹ Wü di enga wüna, te ngü ladü esüka yi, wü *kpara ka Yesu, ake kiri mü la, yi ena amere de ngü la neh baye? Angü ma je eyi, gü ba, wü gara kpara esüka yi ngbü eí wü bu wü engagira wü miri de füh kotó ne, te ewü le ngü ka Yesu Kurisito de ne. Dela züka ngü? Ah bala de! Dela siti ngü! Ah le de wü *kpara ka Yesu Kurisito di ereke ngü ka-wü me-wü esüka wü. ²⁻³ Angü gbü *adu sikipi te Miri Yesu Kurisito ena adu tete füh kotó ne, nih wü kpara kaka-na, nih ena angbü tundu de ewü, teka aye süka ngü ka wü kpara füh kotó ne, kphah de nda wü *malayika mini. Yi wu bala nda-yi de? Te di bala, te yi ti eyi akolo ngü ka wü kpara 'buru la, ah di mere neh baye, te yi ti areke mba wü jürü ngü de esüka yi la de ne?

⁴ Wü di enga wüna, te wü ngü ladü esüka yi la, yi ti afe gara kpeke kpara esüka yi, fü ah adi ereke ngü ka-yi de, neh teka ne? Yi ngbü ekpe de ngü ka-yi 'duwa kpaka kpara te le ngü ka Yesu Kurisito de, neh teka ne? ⁵ Ngü la to lümü fü yi de? Mba biri kpara te wu da ereke ngü esüka yi ne, nda ma? Te di bala, engu ti areke ngü esüka yi kpala de, neh teka ne? ⁶ Nda-yi, yi ngbü eí wü bu yi, wü kpara ka Yesu Kurisito, engagira wü miri, te ewü le ngü ka Yesu Kurisito nda-wü de ne. Dela neh ene ngü ne? ⁷ Dela ngü te wü kpara ka Yesu Kurisito ti adi emere de. De-mü, te mü ngbü eto ngü te kiri mü, gü ba, engu mere siti ngü fü ni, anga ah fiti ni, ah ti fü mü agu maguma mü gbü ngü la de? Ah ti fü mü ace ngü ka e ka-mü, de te wüh zi la, de? ⁸ Amba nda-yi, yi ngbü efiti zu wü di enga ni yi guvu Yesu Kurisito, adi emere ewü esiti. Dela züka ngü?

⁹ Wü di enga wüna, ma emala ngü ne fü yi kpekpeke, gü ba, siti wü kpara ti aküwa, akoro agbü sü ka Me agbü kpi, nda-wü de. Yi wu bala de? Yi ceka te-yi mbi mbi mbi, angü *Satana ena afti yi. Wü mürü waza ti aküwa de. Wü komoko te ewü ngbü egiri wü bu wü komoko würüse tete, ti aküwa de. Wü kpara te wü ngbü fi emere gele ka wü me ka faranda, küwa

kphah de. ¹⁰ Wü mürü zi, de wü mürü zü, bete wü mürü maguma, küwa kphah de. Wü kpara te ewü o maguma wü fi bü teka adi enzó fi, de wü mene kpara te ewü ngbü esoko wü bu wü, küwa kphah de. ¹¹ Ta gügü, yi ngbü emere wü *siti ngü de bala, amba, yi ce ngü la eyi, angü Me zürü wü siti ngü la emaguma yi eyi asidi. Fü ah adu afü yi wü kpara ka-ye, angü yi koro eyi züka kpara gbü jija. Dela ngü de te Me mere fü yi teka ngü ka Yesu Kurisito, gbü wazi ka *Nzila Wazi ye ne.

Dene gara ngü teka waza

¹² Wü di enga wüna, wü gara yi ngbü efi ngü, gü ba, "Ani ti eyi amere wü ngü 'buru, baka te ani ngbü ele." Amba ma ngbü emala fü yi, gü ba, wü gara ngü ladü te ti ale ta-ngü te kpara de. Wü gara ngü kphah ladü te ti eyi afü mü, ao labi ka-ye. ¹³ Wü gara yi ngbü emala, gü ba, "Me mere zü-e fü nih azü, fü engu ao kphah bu nih teka zü-e la." Tekan ngü la, yi fi, gü ba, baka te ani to küte ani 'buru adi emere waza la, ah de züka ngü gbü jia yi? Amba ah le de ye wu, gü ba, zü-e la ena anza ka-ye anza. Kphah bala, bu nih ena anza ka-ye kphah anza. Ma ngbü emala fü yi kpekpeke, gü ba, Me o küte nih teka waza nda de! Angü ah reke küte nih teka ngü ka Miri Yesu Kurisito. Fü engu atima Miri Yesu teka ato wazi emaguma nih, kphah de küte nih la mini. ¹⁴ Me zükü Miri Yesu gbü kpi, fü ah adu ato to küte fefe na. Te di bala, engu ena azükü nih kphah bala. Fü ah ato to küte fü nih kphah baka nda Yesu Kurisito la.

¹⁵⁻¹⁶ Wü di enga wüna, te yi zu de wü *kpara ka Yesu Kurisito la, yi koro eyi kpara biringbö de wü Yesu Kurisito. Yi fi la ngü la mbi mbi mbi. Angü wüh ba gbü *Ngari Me, gü ba, "Te yi ngbü ake wara mü, yi koro eyi baka kpara biringbö."* Te ah bala, te mü ngbü ake würüse te di de siti mürü waza la, yi koro kphah eyi baka kpara biringbö ake di. Ah bala de? Ah ge baka te mü za küte Yesu Kurisito, angbü endoro di gbü nga waza ka-mü la. Ah ti bala nda de. ¹⁷ Angü te mü lala eyi eküte Yesu Kurisito la, maguma yi koro tüne eyi ake di ngbee biringbö.

¹⁸⁻¹⁹ Wü di enga wüna, ah le de ye kpe cürü ngü ka waza. Angü waza de siti ngü te ena asiti küte mü gbü jia Me. Küte yi de kambü ka Me, te *Nzila Wazi Me ngbü engbü gbügbü, yi wu bala de? Te di bala, te yi ngbü emere waza la, ah ge baka e te yi ngbü esiti guvu kambü ka Me la. Küte yi de e ka-yi nda de, ah ka-ye de e ka Me. ²⁰ Tekan ne de, angü Me se ye eyi, baka

* 6:15-16 6:15-16 Mü ena amaka ngü la gbü Gina Ngü 2:24.

kpara te se wara ye. Angü engu tima Yesu Kurisito, fü engu akoro ase yi cu de *ngüte ye gbü siti ngü ka-yi. Te di bala, nih ena amere de küte nih baye? Nih mere züka wü ngü di, teka de wü kpara gbo nga iri Me, teka züka ngü ka-nih la.

7

Dene ngü ka za-te

¹ Wü di enga wüna, yi ba ta ngü fere te enga gina, ayi-ta ra di teka ngü ka za-te. Gbü jia ra, ah reke pe te yi ena aza würise ta de. ² Amba, te mü ngbü eo jia mü bü fütanga wü würise fa fa fa la, ah de *siti ngü! Te ah bala, ah le de mü za wara mü ngbee biringbö, fü mü ao jia mü tete. Kpah bala, ah le de würise di de watü ye ngbee biringbö, fü engu adi eo jia ye duu tete. ³ Angü Me ngbü ele de komoko di emere ngü wara ye ereke areke, baka te wara ka ngbü ele. Kpah bala, Me ngbü ele de würise di emere ngü watü ye ereke areke, baka te watü ye ngbü ele. Dela ngü te ewü ena adi emere bala esüka wü. ⁴ Te würise mala fü watü ye, gü ba, "Ye mofu küte ni de, angü dela ngü ka-ni," ngü la, ah esiti, angü fanü, dela ka-ye ngü ka watü ye na. Kpah bala, te komoko mala fü wara ye, gü ba, "Ye mofu küte ni de," ngü la kpah esiti, angü dela ka-ye kpah fanü ngü ka wara ka. ⁵ Ma ngbü emala fü yi kpekpeke, gü ba, te komoko le amofu küte wara ye de, ah de siti ngü. Kpah bala, te würise le amofu küte watü ye de, ah de siti ngü. 'Duwa te yi ro mö esüka yi tundu, fü yi ale eyi, gü ba, "Ani ena angbü la mba cükü'daye kpkipi ani kpkipi ani, teka ato maguma ani, angbü eku gba fü Me la," ah de siti ngü de. Amba sidi nga ngü la, ah le de yi lügü te-yi, adu angbü era tundu, angü *Satana ena afiti yi, fü yi anü amere siti ngü, teka ngü te küte yi ngbü ele. ⁶ Dela si-ngü te ma mala fü yi, gü ba, te mü le aza würise la, ah esiti de. Ma mala ngü la fü yi baka riri de. Ma mala ngü la fü yi bala, teka de yi wu züka kaje te ena ale ta-ngü te yi.

⁷ Nda-ra, ma ngbü engbü ka-ra kpkipi ra. Gbü jia ra, te wü kpara ena angbü engbü ta 'buru kpkipi wü baka ra la, de bane, ah ti ta adi ba siti ngü de. Amba ma wu eyi, gü ba, Me ngbü eto wazi fü wü kpara kpkipi ye kpkipi ye. Engu ngbü eto wazi fü gara kpara, teka fü ewü angbü ake wara ye areke areke. Fü engu adu ato wazi fü gara wü kpara, teka fü ewü angbü engbü ka-wü kpkipi wü kpkipi wü gbü züka kaje.

⁸ Teka ngü ka wü wökö, ma ngbü emala, gü ba, ah reke gbü jia ra fa sü, te ewü ena angbü ka-wü kpkipi wü baka nda-ra. ⁹ Amba te gümü ngü ka küte ngbü embü

mü, mü ti atüka te-mü de la, ah le de mü za würise, anga komoko, te züka kaje, angü gümü ngü la ena adi ecuru mü baka wa.

¹⁰⁻¹¹ Teka wü kpara te ewü di de wara wü, ma ngbü emala fü yi kpekpeke fa sü te iri Miri Yesu, gü ba, ah le fü komoko ace wara ye de. Kpah bala, te mü de würise la, mü mere e ace watü mü de. Anga te mü ce engu eyi, de mü ngbü kpkipi mü. Te kaje ü te-ye fü mü la, mü ti eyi adu kpara watü mü. Mü mere e aza gara komoko de. Dela ngü te Miri Yesu mala cu me-ye, ah de ngü te ma fi bü de tete-ra ne de.

¹² Teka wü *kpara ka Yesu Kurisito te wara wü, anga watü wü, le ngü ka Yesu Kurisito de, Miri Yesu to riri fü nih teka ngü la nda de. Gbü jia ra, te wara mü le ngü ka Yesu Kurisito de, amba engu le eyi teka angbü ake mü la, de mü mere e aliki engu de. ¹³ Kpah bala, te watü mü le ngü ka Yesu Kurisito de, te ah le eyi teka angbü ake mü la, de mü mere ace engu kpah de.

¹⁴ Kükürü de, angü komoko, te le ngü ka Yesu Kurisito de, te wara ka to maguma ye eyi fü Yesu Kurisito la, Me ena aceka kpi fütanga komoko la, baka te engu di kpah de kpara kaka-na. Kpah bala, teka würise te le ngü ka Yesu Kurisito de, te watü ye na to maguma ye eyi fü Yesu Kurisito la, Me ena aceka kpi fütanga würise la baka kpara ka-ye, teka ngü ka watü ye na la. Yi fi ngü la mbi mbi mbi. Fingängü ka-yi gü ba, Me ngbü eeka wü jaji ka wü kpara de bala baye? Me ena ale ngü ka wü jaji ka-ewü la ale. Te ah bala la, yi mere a aye süka yi de.

¹⁵ Amba te wara mü le ngü ka Yesu Kurisito de, te engu ele ace mü la, de mü mere e atiri engu de wazi de. Anga te mü de würise, te watü mü le ngü ka Yesu Kurisito de, mü ena amere kpah bala. Te yi ngbü tundu, anga te yi ye süka yi la, ah le de yi gu maguma yi agu, yi mere e adi ewü nga esüka yi de. Angü Me gu maguma mü eyi gbü siki te engu fü mü kpara ka-ye tete. ¹⁶ E-wu neh da, watü mü, anga wara mü, ena adu ale ngü ka Yesu Kurisito teka ngü ka-mü la.

¹⁷ Wü di enga wüna, dene gara ngü te ma ele amala fü yi. Yi di emere wü tima ka-yi, baka ta te yi ngbü emere gügü, zalü koro di gbü siki te Me küwa yi tete na ne. Amba, ah le fü yi adi emere 'duwa mene ngü de te ena areke gbü jia Me. Dela ngü te ma ngbü emala fü wü *kpara ka Yesu Kurisito 'buru, gbü wü nga nzö sü te ma ngbü endoro tete na ne.

¹⁸ Ah baka ngü dene, te mü ngbü ta eyi emere gele ka wü di enga *Yisarayeale te enga gina, o Me fü mü kpara ka-ye tete la de la, wayi, de mü mere e acere nga ngü

la de. Anga te Me küwa mü, o mü mere gele ka-ewü la de la, wayi, de mü mere e agiri tîne gara kaje teka akpo de ngü la de. ¹⁹ Kükürü de, angü ngü teka gele nda ma. Mere kpeke ngü gbü jia Me ka-ye 'duwa te mü ngbü emere riri kaka-na la. ²⁰ Te di bala, ah le de yi ngbü fi bü gbü tima ka-yi baka e, te yi ngbü ta emere gügü ne, zalü koro di gbü sikipi te Me küwa yi tete na.

²¹ Kpah bala, te mü ta de labi ka gara kpara gbü sikipi ta te Me küwa mü tete, de ngü la mere e asiti fingangü ka-mü de. Amba, te mü mü mü la le ace kpa te mü, de mü nü ka-mü la, ah kpa mbi. ²² Kükürü de, angü gbü jia Me, ngü ka labi de mere ngü nda de. Te mü de labi, fü mü ale ngü ka Miri Yesu, mü ka-mü gbü jia Me de kpara te Miri Yesu fa engu eyi. Kpah bala, te mü de labi de la, te mü to maguma mü eyi fü Yesu Kurisito, mü fü te-mü koro tîne eyi labi ka Yesu Kurisito. ²³ Angü Me tima Yesu Kurisito, fü ah akoro akpi teka aküwa nih. Teka ngü la, ah le de yi mere duu riri ka Me. Yi mere e afü te-yi, angbü labi ka wü kpara füh kotö ne, tîne de. ²⁴ Dela ngü te ma ele amala fü yi, wü di enga wüna. Yi ngbü fi bü gbü wü tima ka-yi ta te yi ngbü emere ne, baka gbü sikipi te Me küwa yi tete. Angü Me ena angbü de yi, adi eto wazi fü yi gbü tima la.

²⁵ Teka ngü ka wü katu, Miri Yesu to riri fü nih teka ngü la nda-ye de. Amba nda-ra, ma ngbü esere fingangü ka-ra fü yi teka ngü la, angü Miri Yesu to wazi eyi fere, teka fü ra adi ewu wü ngü mbi mbi mbi. ²⁶ Yi fi nga wü laki, de te nih di gbügbü de tîtîne füh kotö ne. Ah de siti wü laki ka cinga. Te di bala, gbü jia ra, te kpara ngbü ka-ye kpipi ye la, ah ena areke afa sü. ²⁷⁻²⁸ Te wara mü ladü, mü mere e ace engu de. Amba te wara mü ma la, mü ngbü ka-mü kpipi mü bala. Amba, te mü le kpa aza wüüse la, ah ba siti ngü kpa de. Ma ele de yi wu, gü ba, gbü siti wü laki ka cinga, de-mü, de te mü za wüüse eyi ne, mü ena adi de mere bi fingangü teka wara mü de wü jaji. Dela si-ngü te ma mala fü yi, gü ba, ah ena adi ta mbi, te yi ena aza wüüse de, angü fingangü la ena angbü embü mü. ²⁹ Kükürü de, angü *adu sikipi ka Yesu eyi gbamari. Te di bala ne, yi mere e ao fingangü ka-yi, teka wü ngü de füh kotö ne de. Angü wü e ka kotö ne ena anü anza ka-wü anza 'buru asidi. Te di bala, te wara mü ladü, mü mere e ao fingangü ka-mü 'buru gbü nzönzö na de.

³⁰⁻³¹ Teka ngü ka adu sikipi te di eyi gbamari ne, to mü mere e airi teka ngü ka Yesu de. Te ah de ngü ka cinga, te mü mü mü kpi akpi la, mü fi ngang baka mere kpeke ngü afa sü de. Anga te mü

ngbü de tadu te mü, mü fi nga tadu ka-mü la baka mere kpeke ngü kpa de. Te mü de kpara te mü ngbü ese wü e, da ecinzi la, de mü o maguma mü teka wü e ka-mü la kpa de. Kükürü de, angü wü e de füh kotö ne ena anza ka-wü anza. Yi o maguma yi nzö teka ngü ka dudu ka Yesu.

³² Ma le de wü fingangü la di embü yi de. Te wara mü ma la, mü ti eyi ato maguma mü 'buru fü Me, angü mü le fü ngü ka-mü areke gbü jia Me. ³³⁻³⁴ Amba te wara mü ladü la, mü ena angbü efi nga wü ngü ka füh kotö ne, angü mü le fü ngü ka-mü areke gbü jia wara mü. Fü maguma mü angbü engbü 'basu 'basu. Kpah bala, teka ngü ka wüüse, de te wati ye na di ma ne, engü ti kpa eyi ato te-ye 'buru 'buru fü Me, teka amere tima kaka. Amba te engu za komoko la, mamaguma ena adi 'basu 'basu. Angü engu ena akpo da efi nga wü e ka kotö ne, teka fü ngü ka-ni areke gbü jia wati ni. ³⁵ Wü di enga wüna, ma ngbü emala ngü la fü yi teka agu maguma yi, de fingangü ka-yi ngbü mbi. Ma le atri yi teka ngü ka maza-te de. Ngü te ma ele, ah le de yi mere ngü te reke areke, fü yi ato te-yi, teka adi emere ngü ka Miri Yesu.

³⁶ Te mbarase ka-mü tangbase ladü, te za komoko la de, te mü le eyi de engu za komoko la, ah mbi. Ah ti de engu za komoko eza fanü. Ah de siti ngü de. Angü te engu ena agbe la, ah ti fefe na, fü ah angbü kpipi ye de. ³⁷ Amba te kpara ladü de mbarase ka-ye, jaji wüüse, fü engu afi emaguma ye, gü ba, ah le de engu za komoko de la, ah kpa mbi, angü dela züka ngü. ³⁸ Dela ngü te ma emala fü yi, te mü le mbarase ka-ni za komoko la, ah de siti ngü de. Amba te mü le kpa de mbarase ka-ni za komoko de la, ah kpa de mere züka ngü te reke fa sü.

³⁹ Amba teka mene wüüse, te za komoko eyi, ah le de engu o jia ye duu te wati ye de biringbö la, zalü akoro di gbü sikipi te engu ena akpi tete. Te wati ye na kpi eyi la, engü ti eyi aza gara komoko ka-ye, te engu le eyi la. Ah esiti de. Amba ah le de engu za kpara ka Miri Yesu. ⁴⁰ Amba gbü jia ra, te wüüse ngbü ka-ye kpipi ye la, ah ena areke afa sü.

Dela ngü te ma mala teka ngü la, angü *Nzila Wazi Me sere ngü la fere me-ye.

8

Dene ngü teka so ka faranda

¹ Wü di enga wüna, wü gara yi ngbü egbo nga wü, da emala, ga, "Ani wu ngü fa sü." Ah fanü, amba yi mere e angbü de mere tadu, da ecu ngü yi teka ngü la de. Angü ah ti fü yi angbü emere wü ngü baka te yi ngbü ele ne de, angü Me ngbü ele

de yi le wü bu yi, teka fū yi ato wazi fū ewü gbü ngü ka Me. ² Te yi mala, gü ba, "Ani wu ngü 'buru kpo," la, ah ka-ye de wu, angü gbü wü ngü la, yi wu ngü mbi mbi nda-yi la fi de. ³ Amba te yi le Me eyi de maguma yi 'buru la, Me ena aceka yi baka züka wü kpara ka-ye.

⁴ Wü gara yi ngbü emala, gü ba, "Te ani zü du so, te wüh ngbü eto fū wü me gbü faranda la, ah de *siti ngü de, angü faranda ka-ye de kükürü rü kükürü, wazi gbügbü na nda ma. Mere Me ka-ye nzö me-ye mürü wazi." Dela zu ngü fanü. ⁵ Mere bi wü kpara füh kotö ne ngbü emere gele ka wü di enga me. ⁶ Amba nih wu eyi kpo, ga, Me ka-ye ngbee biringbö te di angbü kpī. Engu de Wö nih. Engu de kpara te mere wü e füh kotö ne 'buru me-ye. Engu de kpara te nih to maguma nih eyi fefe na. Kpah bala, Miri ka-nih ka-ye ngbee biringbö, te di de Yesu Kurisito. Ta te Me ngbü ereke kotö ne, ah to wü tima la 'buru esasaka. Engu kphah de kpara te küwa nih me-ye fi mere badi. ⁷ Ngü la fanü, amba wü gara kpara ladü, te ewü ngbü la fi ekpe cürü wü me ka faranda. Te di bala, te ewü zü du e de te wüh to fū wü me gbü faranda la, wüh ngbü efi, ga, "Ah de zu ngü fanü. Du e la, ah de e ka wü me." Wüh ngbü eceka ngü la baka te ewü mere siti ngü eyi la. Fū lümü ngü la adu angbü emere ewü, da eto mere bi fingangü gbü nzö ewü.

⁸ Wü di enga wüna, ngü ka e-mazü de kpeke ngü gbü jia Me nda de. Te gara kpara ena amala fū mü, gü ba, mü mere e azü so wü gara nü de, ah esiti de, amba ngü ka so ti areke mü, anga asiti mü, gbü jia Me nda de. ⁹ Ma ngbü emala fū yi kpekpeke, ah le de yi fi nga ngü la mbi mbi mbi. Te mü de kpeke kpara, mü ceka temü 'be, de mü mere e asiti fingangü ka wü bu mü de. Angü wüh wu ngü cu baka nda-mü nda-wü de. ¹⁰ Te mü mala, gü ba, "Ngü ka faranda de töndö ngü kükürü," amba gbü gara sikipi, fū mü ayia anü angbü eri faranda, angbü ezü du so de te wüh to gbü faranda la. Anga te kiri mü, *kpara ka Yesu Kurisito, koro maka mü da ezü e la, engu ena afi tüngü mü, agü neh fe? Engu ena afi, gü ba, "Apa! Mere kpara ka Yesu Kurisito la ngbü emere kphah gele ka faranda?" Te di bala, engu ena adu afü te-ye amere kphah bala. ¹¹ Te kpara la lügü te-ye du ngbü emere diri gele ka faranda la, fū ah adürü te kaje ka Me teka ngü ka-mü la, dela züka ngü? De mü mere e amala, gü ba, "Ah ba mere ngü de, angü kpara la de töndö kpara te wu ngü mbi mbi de," mü mere e amala bala de! Angü

engu de kpara te Yesu Kurisito kpi teka aküwa engu. Ah de siti ngü fa sü, te engu ena adürü te kaje ka Me teka ngü ka-mü la. ¹² Te mü ngbü esiti fingangü ka wü bu mü bala la, mü ngbü dela emere ngü te siti fa sü gbü jia Yesu Kurisito. ¹³ Te so de te ma ngbü ezü ne yia egiri da ye asiti fingangü ka wü bu ra la, ma ena ace ace! Ma du azü tüne de de de. Angü ma le asiti fingangü ka wü bu ra de.

9

Dene ngü teka ngü ka-ra, Pawülü

¹ Wü di enga wüna, ma je, gü ba, wü gara yi ngbü emala ngü, da efala ra, ga, ma de *mürü tima ka Yesu nda-ra de. Ngü la fanü? Ma de labi ka-yi? Ah bala de! Ma de mürü tima ka Miri Yesu fanü fanü. Kükürü de, angü ma wu Miri Yesu cu de jia ra. Gina kpara te mala ngü ka Yesu Kurisito fū yi neh da? Ah ta de-ra de? Yesu Kurisito tima ra teka amere tima la me-ye. Te di bala, yi ngbü emala, gü ba, ma de mürü tima ka Yesu de, neh teka ne? ² Anga te wü gara kpara ladü gbü wü gara sü, te ewü ngbü emala, gü ba, "Miri Yesu tima ra me-ye nda de," la, amba de-ya, yi ti nda-yi amala ngü la bala kü de. Teki ne, angü yi le ngü, de te Miri Yesu tima a teka amala fū yi ne, gömö ra. Fū yi ato maguma yi fefe teka ngü la.

³ Wüh ngbü emala ngü la bala, teka te ma maka letangü gbü tima ka Yesu Kurisito de, ne? Te wüh yi-ta ra gbü ngü la, dene ngü te ma ena angbü elügü fū ewü. ⁴ Te Miri Yesu tima kpara de ah di emala ngari ni fū yi la, ah ti ati fanü fanü, te yi ena adi ele ta-ngü te kpara la mba de enga e-mazü. ⁵ Te kpara la de wara ye, ah le kphah de yi le ta-ngü te wara ka la. Dela ngü de te wüh ngbü emere fū wü Petero,* de wü di enga ni ye Miri Yesu, kphah de wü gara mürü tima ka Yesu Kurisito 'buru. ⁶ Te di bala, de-a ake Baranaba, te a di de zu mürü tima ka Yesu Kurisito ne, a le aza e esaka yi nda-a de. A ngbü emere tima ka-a de kpa a, teka amaka jiase, fū a adi ezü e di.

⁷ Yi fi nga ngü la mbi mbi mbi. Wü marajümiya, te ewü emere tima fū miri ka-wü ne, miri la to zü-e fū ewü de? Anga te gara kpara ngbü eceka kpī fütanga rürü ka gara kiri ye la, wüh ti ale ta-ngü tete de ri-rü la de? Anga te gara kpara ngbü kphah eceka kpī fütanga wü yiti ka mere kpara ka-ye la, wüh ti ale ta-ngü tete de ngu-ka yiti la de?

⁸ Ngü de te ma mala fū yi la, ah gbü jia yi ba kükürü ngü ka köti? Ah bala de. Angü *Müse ba ta ngü la eyi gbü *Ngari

* 9:5 9:5 Gara iri Petero de Kefa.

Me, ⁹ gü ba, “Te mü o kpara, de ah mere tima ka-mü agbü yī la, mü mere e ace engu, ao tala de.”[†] Dela *Riri ta te Me to fü Müse. Ah mala ngü la ta bala neh teka ne? Bü nzö teka ngü ka tima agbü yī?¹⁰ Ah bala de. Ah mala ngü la kphah teka ngü ka-a, wü kpara te ewü ngbü endoro de ngari Yesu. Kpah bala, te kpara sö yī ka-ye la, ah ti azü e de gbü yī ka-ye la te gara de? Anga te kpara wa ndo ka-ye la, engu ti azü kümü ndo ka-ye la te gara de?¹¹ De-a, a nda-a baka wü kpara te ewü sö yī, angü a de gina kpara te a mala ngü ka Yesu Kurisito fü yi. Te di bala, ah ti fü a amaka mba enga e-mazü teka tima la de?¹² Te wü gara kpara ngbü emaka letangü esaka yi, teka te ewü ngbü eri yi de ngü ka Yesu la, baka te a di zu de gina wü kpara, te a ri yi de ngü ka Yesu te enga gina ne, de bane yi ena adi ta ele ta-ngü te a, afa nda wü bu a la di ka.

Wü di enga wüna, ma emala ngü ne fü yi kpekpeke, gü ba, ngü la ti fü a bala nda de! Angü a le de de de, teka de a maka mba letangü gbü tima la. Yi fi, gü ba, a mere bala, angü a zu de wü mürü tima ka Yesu Kurisito de? A'a! Ah bala de! A ngbü engbü ka-a gbü cinga bala me-a, kükürü de, angü a ngbü ekpe cürü, gü ba, “Te a za e esaka yi la, ngü la ena atiri yi, teka ato maguma wü fü Yesu Kurisito.”

¹³ Wü kpara de te ewü ngbü emere tima kpa gbü *Mere Kambü ka Me agbü Yerüsalema ne, wüh maka letangü gbü wü e de te wü kpara ngbü eto fü Me ne de? Wü kpara te ewü ngbü ewa wü nü emörö fü Me ne, wüh zü du so, de te ewü ngbü emörö la, de?¹⁴ Ah kphah bala, teka wü kpara te ewü ngbü emala ngü ka Yesu Kurisito fü wü bu wü. Angü Me gü ba, “Ah reke pe te wüh ena amaka letangü esaka wü kpara, te wüh je ngü ka Me gömö ewü ne.”

¹⁵ Amba nda-ra, ma kphah ngbüürü de kpara, te Yesu Kurisito tima teka amala ngü ka-ye fü wü kpara. Amba ma le aza e biringbö esaka wü kpara, te ewü je ngü ka Me gömö ra ne, nda-ra de. Si-ngü te ma mala ngü la tete bala fü yi, ah teka aü fingangü ka-yi. Te ma kpi ka tala la, ngü ma. Ma le letangü kpaka kpara nda-ra de. Kükürü de, angü dela ngü te ngbü eto tadu emaguma ra, angü kpara biringbö te le ta-ngü te ra nda ma.¹⁶ Fanü, ma ngbüürü de kpara te ngbü emala ngü ka Yesu Kurisito fü wü kpara, amba ma ti te ma ena agbo nga ra gbü ngü la nda-ra de. Kükürü de, angü dela ngü te ma ngbü emere de tete-ra nda-ra de. Dela ka-ye tima te Miri Yesu Kurisito to fere me-ye.

Te ma ce da emala ngü kaka-na la, Miri Yesu ena ato kuru te ra teka ngü la ato.¹⁷ Te ma ena angbü emala ta ngü ka Yesu Kurisito baka ngü ka-ra la, ah ena adi ta 'be, te wü kpara ena adi ele ta-ngü te ra teka tima la. Amba ah ka-ye de tima te Miri Yesu Kurisito to fere me-ye.¹⁸ Te di bala, ma ti amaka e gbü ngü la 'buru de? Ah bala de. E te ma maka gbü ngü la, ah de mere tadu, te Yesu ngbü eto emaguma ra. Angü ma ngbü emere tima la, baka letangü te ma ngbü eto fü yi kükürü. Dela si-ngü te ma le de yi to e fere, teka tima ka Yesu Kurisito, de ne. Angü tadu ka mamala ngü ka Yesu Kurisito fa ngü ka mamaka jia se ka.

¹⁹ Dene kphah gara ngü te ma ele amala fü yi. Kpara füh kotö sene te ngbü gbü nzö ra nda ma, amba ma o te-ra baka labi mera, teka adi emere tima fü wü kpara 'buru. Kükürü de, angü ma le de wü kpara 'buru je ngü ka Yesu Kurisito gömö ra.

²⁰ Te ma ngbü emala ngü ka Yesu Kurisito fü wü di enga *Yisaraye la, ma ngbü efü te-ra kphah baka enga Yisaraye le. Fü ra angbü kphah emere diri wü gele, ta te *Müse ba gbü *Ngari Me ne. Amba ngü ka wü gele la, ma o maguma ra tüngüngü nda-ra de. Ma ngbü emere mba gara wü ngü la kükürü kükürü, teka de wü di enga Yisaraye le, te ewü o maguma wü teka gele ka-wü ne, de wüh di eje ngü ka Yesu Kurisito gömö ra.

²¹ Amba te ma ngbü emala ngü ka Yesu Kurisito fü wü *ganzi kpara la, ma ngbü ece gele ka Müse la ace asidi, angü ma le kphah de wü kpara la je ngü ka Yesu Kurisito gömö ra. Te ma mala, ga, ma ce gele ka Müse la, amba ma ce *Riri ka Me nda-ra de. Angü Yesu Kurisito mala zu riri ka Me eyi fü nih.

²² Kpah bala, te ma ngbü esüka wü kpara te ewü wu ngü mbi mbi de la, ma ngbü emala ngü fü ewü ferrre, angü ngü la ena asiti fingangü ka-ewü. Ma ngbü emere bala, teka de wüh je ngü ka Yesu Kurisito, te ma ngbü emala fü ewü ne. Te ma ngbü engbü neh esüka nguwa ne wü kpara ne la, ma kpa ngü gele ka-ewü nda-ra de, te gele ka-ewü esiti gbü jia Me de la. Ma mere bala kükürü de, angü ngü de te ma ngbü ele de maguma ra, gü ba, ah le de bi wü nguwa wü kpara 'buru füh kotö ne, je ngü ka Me gömö ra, fü ewü aküwa teka ngü la.²³ Angü ma ngbü ele de wü kpara te nga sü 'buru je ngü ka Yesu Kurisito. Te di bala, ma ngbü emere tima kpekpeke, eto te-ra 'buru, teka adi emala ngü la fü wü kpara, teka te wüh le ngü ka

[†] 9:9 9:9 Mü ena amaka ngü la gbü buku ka Manda nga Riri 25:4.

Me eyi gômö ra la, ma ena amaka mere züka tadu gbü ngü la, kpah ba nda-wü.

²⁴ Wü di engä wüna, mere bi wü kpara ngbü 'dö emere tima ka yi, amba wü kpara de te ewü ena amaka zü afa sü, ah 'duwa mene ewü, te ewü to te-wü teka amere tima la kpekpeke. Te di bala, ah le de yi o kpah to yi teka amere tima ka Yesu kpekpeke, teka fü yi amaka takpa te gara agbü sü ka Me agbü kpí. ²⁵ Fanü, wü kpara te ewü ngbü emere tima ka yi füh kotö ne, wüh ngbü eo maguma wü 'buru teka adi emere tima kpekpeke. Tekä ne, angü wüh le de ani maka mere bi e gbü tima la. Amba ngü la ena anza ka-ye anza. Ah ngbü fi nda de. Nda-nih, nih o maguma nih 'buru teka amere tima ka Me, angü te gara kpala, Me ena ato mere takpa fü nih agbü sü ka-ye agbü kpí, te ena adi de takpa te ena angbü fi mere badi.

²⁶ Wü di engä wüna, dela si-ngü te ma to te-ra teka amere tima ka Me di kpekpeke, baka kpara te to te-ye teka ago woro kpekpeke, teka akoro kpa te adu sü, te ni ena arü tete. Kpah bala, te wü kpara ngbü emí te-wü ake kiri ye la, engu ena angbü emí kükürü sü gbü wege? Te vügü la küwa esakaka la, engu ena amere neh baye? Ah ti fü engu adi emí ku küte vügü ka-ye la, teka afa engu. ²⁷ Vügü ka-nih de neh ene? Ah de siti fíngängü ka-nih. Te di bala, ah le de nih gü gü de wü siti fíngängü ka-nih la, teka ace asidi. Fü nih ao fíngängü ka-nih 'buru te Yesu Kurisito. De-ra, te ma ngbü emala ngü ka Yesu Kurisito fü wü bu ra ne, ah le de ma o fíngängü ka-ra 'buru tete, angü ma ena alakí gbü takpa ka Me la.

10

Dene kpah gara ngü te ma ele amala fü yi, teka gele ka wü me ka faranda

¹ Wü di engä wüna, yi ceka te-ye 'be 'be 'be. Yi fi la nga ngü ta te mere te-ye fü wü kundu nih, wü di engä *Yisarayeale ta gügü ne. Me tima ta *Müse, teka de ah küwa ewü esaka miri ka wü *Ezepeto. Ah tima ta e baka mandurumba engagira ewü, de ah di esere kaje fü ewü. Fü wü kpara la 'buru angbü efa nga mandurumba la. Fü Me ayia aü züka kaje te ürü aürü etü mere *yi-ngu. Fü wü kpara ayia akó ngu 'buru te kagara sü la. ² Baka te ngü la mere te-ye fü ewü bala, ah baka te wüh to *babatiza eyi fü ewü, angü wüh lala fütanga Müse baka te nih lala fütanga Yesu ne. ³ Te wü kpara la 'buru ngbü endoro tete kpa gbü gü, wüh ngbü ta ezü fi bü mene e biringbö, ta te Me ngbü eto fü ewü gbü wazi ka-ye ne. ⁴ Wüh ngbü

ta 'buru enzö ngu biringbö, ta te Me ngbü eto fü ewü. Angü ngu la ngbü ta edü gbü da, baka te Me mala fü ewü. Da la ka-ye ta cu de Yesu Kurisito, angü Yesu Kurisito ta de kpara te ngbü enü de ewü te nga kaje la, da eceka kpí fütanga ewü me-ye. ⁵ Amba fíngängü ka-yi gü ba, wü kundu nih la ta 'buru de züka wü kpara gbü jia Me? Ah bala de! Mere bi ewü ta de siti wü kpara gbü jia Me. Fü ewü akpi 'buru agbü gü kpala. Fü ewü ati ewü kpah ciki kpala.

⁶ Yi fi nga ngü la mbi mbi mbi, angü dela ngü te ena ato fíngängü fü nih fanü. Wü kpara la ngbü ta ekpi teka *siti ngü ka-wü, te ewü ngbü ta fi emere. Nih mere e ao to nih angbü emere siti ngü, baka ta te ewü ngbü emere la, nda-nih de. Angü nih ena akpi kpah baka ewü la. ⁷ Wü gara ewü ngbü ta emere gele ka faranda, angü wüh ba gbü *Ngari Me, gü ba, "Wü kpara la ngbü era wü nü gbü faranda. Fü ewü adu angbü kötö adi ezü so la. Fü ewü ayia tikpi, akpo elo bi. Fü ewü angbü kpah da emere waza."* Wü di engä wüna, nih mere e adi emere gele ka faranda de. ⁸ Wü gara ewü ngbü ta kpah emere waza bala, fü Me ayia amörö mere bi ewü baka wü kpara kutu teke biri de füh ye bata (23,000) gbü síkpí biringbö. Nih mere e adi emere waza de. ⁹ Wü gara ewü re ta maguma Me. Fü maguma Me ayia anzu te ewü. Fü Me ayia atima wü kpürü, de wüh di ede ewü. Fü mere bi ewü ayia akpi gbü ngü la. Nih mere e adi ere maguma Me de. ¹⁰ Wü gara ewü ngbü ta kpah edi ngü te Müse, mere kpara de te Me o gbü nzö ewü ne. Fü Me atima *malayíka ka-ye, amörö wü kpara la. Yi mere e adi edi ngü te mere kpara de te Me fe engu, o gbü nzö yi, ne de. ¹¹ Wü ngü la mere ta te-wü gbü lakí ka diri wü kpara ta gügü, fü ewü ayia aba, ao gbü Ngari Me ne. Kükürü de, teka de ngü la di eri nih, wü *kpara ka Yesu Kurisito de titine ne.

¹² Yi fi nga ngü la mbi mbi mbi. Te di bala, te yi ngbü efi, gü ba, "Ani ngbü erü kpekpeke gbü wazi ka-ani" la, de yi ceka 'be, angü yi ena ati gbü siti ngü. ¹³ Te mü ti gbü siti ngü la, mü mere e amala, gü ba, "Siti ngü la, ah de ngü ka-ni de, angü *Satana fiti ni me-ye," ne, mü mere e amala bala de. Angü Satana ngbü ere wü kpara füh kotö ne 'buru, amba Me ti ace nih nda de. Te Satana fiti mü la, Me ena ato wazi fü mü arü di kpekpeke. Siti ngü la ti afa mü nda de, angü Me ena aü kaje, fü mü aküwa tete.

¹⁴ Wü di engä wüna, ma ngbü emala fü yi kpekpeke, gü ba, yi ce gele ka faranda

* 10:7 10:7 Mü ena amaka ngü la gbü buku ka Gogo ka wü Yisarayeale 32:6.

asidi. ¹⁵ Ma wu eyi, gü ba, yi zu de kpeke wü kpara, amba ah le de yi fi nga ngü la mbi mbi mbi. ¹⁶ Yi fi la nga *zü-e ka Me. Nih ngbü eza ndü'ba ka ngu *vinü, fü nih agbo nga Me tengüngü. Fü nih anzö baka te nih ngbü enzö *ngüte de wü Yesu Kurisito. Kpah bala, nih ngbü ekuru ambata da egafa esüka nih. Fü nih azü, baka te nih ngbü ezü kute Yesu Kurisito. ¹⁷ Ambata la ka-ye ngebe biringbö. Kpah bala, nih de te nih ngbü ezü ambata la, nih baka kpara biringbö, teka ngü ka Yesu Kurisito. ¹⁸ Ah kpah baka gele ka wü di engu *Yisaraye. Te mere kpara wa nü fü mere Me la, wü kpara eci 'buru, azü du so la. Fü ewü angbü de fingängü biringbö, alala eküte mere Me. ¹⁹ Ah kpah bala, te mü zü du so nü, de te wüh to gbü faranda la, ah baka te mü ngbü elala fi gbü gele ka faranda. Fanü fanü, faranda la, wazi gbügbü nda ma. ²⁰ Amba te wüh wa nü gbü faranda la, wüh ngbü efi, gü ba, ani ngbü eto so la fü züka me ka kundu ani, amba wüh ngbü eto so la ka-wü fü *siti wü di engu me. Ah de siti ngü te yi ngbü fi elala gbü gele ka siti wü di engu me de bala. ²¹ Yi ngbü enzö ngu vinü, baka te yi nzö ngüte de wü Miri Yesu Kurisito, fü yi adu kpah afü te-yi, angbü emere gele ka wü di engu me, te ewü di de wü vügu kaka ne? Dela züka ngü? ²² Yi ele ato kanga emaguma Miri Yesu? Wazi yi fa nda-ka? Te mamaguma nzu eküte nih la, nih ena aküwa neh baye baye?

²³ Wü gara kpara esüka yi ngbü emala ngü, gü ba, "Ani ti eyi amere wü ngü 'buru, baka te ani ele." Wayi, amba wü gara ngü ladü, te ti ale ta-ngü te nih de. Kpah bala, wü gara ngü ladü te ti asiti fingängü ka wü bu nih. ²⁴ Yi mere e adi efi bü duu nga yi de. Yi di efi kpah nga wü bu yi, teka fü yi adi eto wazi fü ewü. ²⁵ Te yi maka so, te wüh ngbü ecinzi la, wayi, yi ti eyi ase so la. Yi mere e ayi-ta ngü tengüngü na, gü ba, "Ah de du so te wüh to fü wü me?" ne de. Angü fanü fanü ngü ka so ti asiti yi gbü jia Me nda de. ²⁶ Baka te wüh ba gbü *Ngari Me, gü ba, "Me de mürü wü e füh kotö ne 'buru."[†] Te di bala, so la kpah de e kaka-na, ah ti asiti ngü ka-nih nda de. ²⁷ Kpah bala, kiri yi te le ngü ka Me de, te engu i yi teka azü e agba ye la, wayi, yi ti eyi azü e la. Yi mere e ayi-ta ngü teka wuru la de. Wuru ti asiti yi gbü jia Me nda de. ²⁸ Amba te ewü mala fü yi mbölö, ga, "Wuru ne, ah de du so te wüh to gbü faranda la," de yi mere e azü e la de. Angü kpara, de te mala ngü la fü mü, ngbü eceka mü, anga mü ena ace ngü ka Me, fü mü adu amere siti ngü ya.

²⁹ Fanü, te ah gbü jia mü esiti de la, amba ah ena adi esiti gbü jia kpara la. Te di bala, gara kpara ena amala, gü ba, "Ni ti ace züka ngü ka-ni teka ngü ka wü bu ni de. ³⁰ Angü te ni za zü-e la, fü ni agbo nga Me fefeh na la, wüh ena amala, gü ba, ah esiti, neh baye baye?" Amba ah le de nih mere e adi emere bala de.

³¹ Wü di engu wüna, dene mere kpeke ngü de te ma ele amala fü yi. Te yi ngbü emere gara ngü, anga yi ngbü ezü e, anga enzö e, anga yi ngbü emere ne ngü ne la, yi mere e afi nga ngü ka-yi de. Yi fi nzö ngü ka Me, teka de wü kpara gbo nga iri Me teka ngü ka-yi la. ³² Yi ceka 'be, angü te fingängü ka wü bu yi siti teka ngü ka-yi la, ah ena adi de siti ngü. Te engu de *kpara ka Yesu Kurisito, anga te engu di de engu Yisaraye, anga te engu di de kpara te le ngü ka Me de, yi mere e asiti fingängü kaka-na de. ³³ Amba de-ra Pawülü, nda-ra, ma o te-ra teka adi eto tadu te wü kpara 'buru. Ma fi nga ra nda-ra de. Ma ngbü efi nga wü kpara 'buru, teka de wüh to maguma wü fü Yesu Kurisito, fü ewü aküwa fi mere badi.

11

¹ Ah le de yi mere ngü kpah baka ra, angü ma ngbü emere ngü kpah baka nda Yesu Kurisito.

Dene ngü te yi ena adi emere,

te yi ngbü ebite te-yi da emere ngü ka Me la

² Wü di engu wüna, ma ele agbo nga yi, angü riri ta te ma ri yi di ne, yi ngbü fi bü da emere. Dela züka ngü. ³ Amba du ngü ladü te lakü, te ma ele amala fü yi. Yi wu kpo, ga, Yesu Kurisito de miri ka wü kpara 'buru. Kpah bala, komoko nda-ye de miri gbü nzö wara ye. Me nda-ye de miri gbü nzö Yesu Kurisito. ⁴ Te ah bala, te komoko rü me-ye esüka wü kpara, teka aku gba fü Me, anga teka amala ngari Me fü ewü, engu mere e agba nzö ye de bongo de. Angü te engu gba nzö ye agba la, wüh ena afala engu teka ngü la.

⁵⁻⁶ Amba te ah de würüse te rü me-ye esüka wü kpara, teka aku gba fü Me, anga te engu ngbü emala ngari Me fü wü kpara la, ah le de engu gba nzö ye agba fanü, angü engu ena ato lümü te wati ye. Kükürü de, angü te engu gba nzö ye de la, wüh ena aceka engu ge baka te engu woro su-nzö ye aworo la. Angü gbü gele ka-yi, te würüse woro su-nzö ye aworo la, ngü la ena ato lümü fefe afa sü. Te di bala, ah le de ah angbü egba nzö ye agba de bongo.

[†] 10:26 10:26 Mü ena amaka ngü la gbü Ci ka wü Davidi 24:1.

⁷ Ah ti fü komoko agba nzò ye de bongo de. Teká ne, angü Me mere komoko gegege baka ye. Te wü kpara ngbü eceka komoko la, wüh ena angbü egbo nga iri Me teka ngü kaka. Teká ngü ka würise, ah le de engu gba nzò ye agba de bongo. Teká te wü kpara wu würise la, fü ewü angbü egbo nga iri wati ye na teka ngü kaka, angü Me reke würise gbü komoko.

⁸⁻⁹ Angü gbü sikipi te Me mere gina wü kpara füh kotò sene ne, ah mere ta komoko te engá gina, ge baka ye. Fü ah adu agbi sajkara komoko la, areke würise gbügbü, teka de engu le ta-ngü te wati ye la.* ¹⁰ Te di bala, ah reke fa sü, te würise ena adi egba nzò ye agba de bongo, teka asere fü wü kpara füh kotò sene, kpah de wü kpara agbü kpí, gü ba, engu ngbü eyi esa riri ka wati ye.

¹¹ Amba yi fi la nga gara ngü dene, Me reke komoko ake würise 'buru biringbö. Würise ti angbü kpike ye de. Komoko ti kpah angbü kpike ye de. ¹² Te engá gina, Me za sajkara komoko, adu afü würise tete. Enatikine dene, würise ngbü ebi wü komoko kpah me-ye, angü Me mere ngü la me-ye bala.

¹³ Yi fi nga ngü la mbi mbi mbi. Te würise ngbü eku gba fü Me gbü jia wü kpara, te ah gba nzò ye agba de la, ngü la ena adi mbi? ¹⁴ Dela gele ka wü kpara füh kotò ne de? Te komoko ngbü de mere kala su-nzó ye fa sü la, ah 'be'? Wü kpara 'buru ena angbü emü engu amü. ¹⁵ Amba te ah de würise de mere kala su-nzó ye la, ah ena areke afa sü gbü jia wü kpara, fü ewü adi egbo ngangá, ga, "Ah su fa sü." Angü Me to kala su-nzó fefe na, teka de ah gba la te-ye, ah ni nzönzó.

¹⁶ Amba te yi le de wü würise gba nzò wü de la, dene ngü te ma ena alügü fü yi. De-a, wü *mürü tima ka Yesu Kurisito 'buru, a ngbü erí wü kpara bala, gü ba, ah le de wü würise di egba nzò wü agba, kpah de gara wü *kpara ka Yesu Kurisito gbü gara wü sü 'buru.

Dene ngü te yi ena adi emere teka zü-e ka Me

¹⁷ Gbü mene ngü dene, ma ti agbo nga yi de, angü ngü te yi ngbü emere ne, ah de züka ngü nda de. ¹⁸ Angü ma je nga yi, gü ba, te yi biti te-yi tundu, teka azü zü-e ka Me la, yi ngbü eye süka yi kpike yi kpike yi. Gbü jia ra, ngü la, ah de wu de. ¹⁹ Yi ngbü efi neh baye? Yi ngbü efi, gü ba, "Ah le de ani di eye süka yi, teka fü ani adi ewu mene wü kpara, te ngü ka-wü reke areke gbü jia Yesu Kurisito," ne? ²⁰ Yi

ngbü ebiti te-yi, gü ba, "Ani ena azü *zü-e ka Me," amba ngü de te yi ngbü emere ne, ah baka ngü de te Miri Yesu Kurisito mala ne nda de. ²¹ Angü wü gara yi ngbü ezü kpah bü züka e-mazü ka-wü, te ewü koro di me-wü. Fü ewü angbü esika di, o wü gara kpara nda-wü angbü de tala te wü. Wü gara ngbü nda-wü enzö fi efa sü, fü ewü angbü eküya di. ²² Dela neh ene ngü ne? Gba yi ma? Te ah bala, ah le de yi di ezü wü gara e ka-yi la ciki agba yi kpala. Yi mere e angbü ekpa ngü wü kpara ka Me bala de. Angü ngü te yi ngbü emere la ngbü eto lümü te wü kpara, te e ka-ewü di ma ne, efa sü. Ma ena amala fü yi, agü neh fe, teka ngü la? Ma gbo nga yi? Ma ti agbo nga yi teka ngü la nda-ra de!

²³ Ngü ka zü-e ka Me te ma mala tñe fü yi te engá gina ne, ma je ngü la gömò Miri Yesu. Gbü sikipi te wüh to engu fü wü vügü kaka tete, etamurago la, Miri Yesu ngbü ta ezü e de wü *kpara ka-ye. Fü engu aza ambata, ²⁴ agbo nga Me tekaka. Fü ah akukuru tütü na, agafa fü ewü, gü ba, "Dene küte ra, te ma to fü kpi tündü yi. Yi ngbü da emere ngü la fi bala sidi nga ra, teka fü yi adi efi nga ra tete." ²⁵ Te wüh zü e la nza tete, fü ah aza ndü'ba de ngu *vinü gbü ye, ato fü ewü kpah bala, gü ba, "Dene *ngüte ra. Yi nzö enzö, baka te yi ngbü enzö *ngüte de wü Me. Yi di emere fi bala, teka fü yi adi efi nga ra tete."

²⁶ Te di bala, yi fi nga ngü la mbi mbi mbi. Te yi ngbü ezü zü-e ka Me, da enzö ngüte Yesu Kurisito la, yi ngbü dela esere ngü ka kpi ka Yesu Kurisito fü wü kpara. Yi di fi emere ngü la bala, zalü akoro di gbü sikipi, te Miri Yesu ena adu akoro tete füh kotò ne. ²⁷ Te di bala, te yi ngbü enzö ngüte Yesu Kurisito baka kükürü e la, ah ge baka te yi ngbü ekpa ngü ngüte Yesu Kurisito la. ²⁸ Yi mere bala de. Ah le de mü wu ngü te di emagama mü kpo kpo kpo, fü mü areke feke. Fü mü adu anzö ngüte Yesu Kurisito. ²⁹ Yi ceka 'be, angü te yi ngbü enzö ngüte Yesu Kurisito baka kükürü e, yi ena amaka mere kuru gbü ngü la. ³⁰ Dela si-ngü te keke ngbü emere wü gara yi, fü wü gara yi angbü ekürü. Wü gara kpara kpi kpah eyi teka ngü la. ³¹ Ah reke fa sü te nih ena afü maguma nih, angü Miri Yesu ena ato kuru te nih. ³² Me ngbü eto kuru fü nih kükürü de. Ah baka wó ye jaji te ngbü esüma ye ye, teka de ah je riri. Me ngbü erí nih kpah bala, teka de nih fü maguma nih, fü nih aküwa te gara, gbü *adu sikipi te engu ena adu, teka ato kuru te mene wü kpara, te ewü le ngü kaka de ne.

³³ Wü di engá wüna, dela ngü te ma la amala fü yi. Te yi biti te-yi, teka azü zü-e ka

* 11:8-9 11:8-9 Mü ena amaka ngü la gbü Gina Ngü 2:18-24.

Me la, yi fi kpah nga wü bu yi, da eci nga ewü. Yi mere e angbü de kü te yi de. ³⁴ Te tala ngbü emere yi efa sü la, ah le de yi di ezü e ka-yi kpa gba yi, teka fü yi adu azü zü-e ka Me te züka kaje. Tekana ne de, angü yi ena amaka kuru gbü ngü la.

Wü gara ngü kpah ladü, te ma le amala fü yi gbü ngü la. Ma ena amala fü yi sidi, gbü sikpi te ma ena adu akoro tete kpaka yi agbü Korinoto kpala.

12

Dene ngü teka wazi ka Nzila Wazi Me

¹ Wü di engana wüna, ma ngbü ele de yi reke fingangü ka-yi, teka ngü ka wazi ka *Nzila Wazi Me, mbi mbi mbi. ² Ta te engana gina, o yi le ngü ka Yesu Kurisito la de ne, yi ngbü ta fi emere gele ka wü di engana me. Wüh ngbü ta efiti yi, fü yi angbü edürü te wü siti kaje. ³ Ma ngbü emala fü yi kpekpeke, gü ba, ngü ka Nzila Wazi Me ka-ye kpikpi ye, ah baka ngü ka wü di engana me nda de. Te kpapa ngbü emala ngü de wazi ka Nzila Wazi Me la, engu ti eyi asoko Yesu? Ah bala de! Te gara kpapa mere ngü bala la, amba ah ka-ye de ngü ka wü di engana me. Kpah bala, te kpapa mala ngü, gü ba, "Yesu de Miri kani," engu mala ngü la bala zu de wazi, te Nzila Wazi Me to fefe na me-ye fanü fanü.

⁴ Nzila Wazi Me ngbü eto wazi fü nih, fü nih adi emere tima ka Me di kpikpi ye kpikpi ye. Amba Nzila Wazi Me ka-ye ngbee biringbö. ⁵ Miri Yesu Kurisito to tima fü nih kpah kpikpi ye kpikpi ye, amba Miri te ngbü gbü nzö wü kpapa la, da eceka nga ewü, ka-ye ngbee biringbö. ⁶ Nih ngbü emere tima ka Me te wü kaje kpikpi ye kpikpi ye, amba Me ka-ye ngbee biringbö, te ngbü eto wazi teka wü tima la 'buru me-ye.

⁷ Nzila Wazi Me ngbü eto wazi fü wü kpapa kükürü de. Ah ngbü eto teka de kpapa la le ta-ngü te wü bu ye di.

⁸ Nzila Wazi Me ngbü eto wazi fü wü kpapa, de wüh wü si-ngü gbü *Ngari Me mbi mbi mbi, teka de wüh di emala singü la fü wü bu wü. ⁹ Ah ngbü eto wazi fü wü gara kpapa, de wüh le ngü ka Me de maguma wü biringbö, gü ba, "Me ti eyi amere wü ngü 'buru." Ah ngbü eto wazi fü wü gara kpapa, teka de wüh di eküwa wü mürü keke. ¹⁰ Ah ngbü eto wazi fü wü gara kpapa, de wüh di emere kpeke ngü di. Ah ngbü eto wazi fü wü gara kpapa, de wü di emala ngari Me di fü wü bu wü. Ah ngbü eto wazi fü wü gara kpapa, de wüh di eye süka ngü di mbi mbi mbi, teka awu, anga ngü la koro esaka Nzila Wazi Me fanü ya. Ah ngbü eto wazi fü wü gara kpapa, fü ewü adi ero

mö gbü ganzi wü mö, te Nzila Wazi Me to fü ewü, te wü kpapa je ngü gbügbü na de. Ah ngbü eto wazi fü wü gara kpapa, teka de wüh di eje ngü gbü ganzi mö la, fü ewü adi emala si-ngü gbügbü fü wü bu wü. ¹¹ Nzila Wazi Me ka-ye biringbö. Ah ngbü eto wazi fü wü kpapa kpikpi ye kpikpi ye, baka te engu ngbü ele.

¹² Ah baka ngü ka ngbürikü kpapa. Küte kpapa ka-ye ngbürikü biringbö, amba wü e eküküte fa sü, baka wü kpakpa, wü lölö, de wü gara na. Kpah bala, nih wü *kpapa ka Yesu Kurisito, nih baka küte Yesu Kurisito ngbee biringbö. ¹³ Nih 'buru kpikpi nih kpikpi nih. Wü gara nih de wü di engana *Yisaraye, wü gara nih de wü *ganzi kpapa. Wü gara nih de wü mere kpapa, wü gara de wü kükürü kpapa. Amba te wüh to *babatiza tete fü nih, Nzila Wazi Me dünda nih eyi eküte Yesu Kurisito. Fü Nzila Wazi Me biringbö la angbü emagama nih, teka ao maguma nih biringbö.

¹⁴ Küte kpapa ka-ye e biringbö, amba ah ka-ye kpah de mere bi wü e te ye, baka wü lö, wü kpa, wü güje, de wü jia. Wü e la 'buru eküte kpapa biringbö, de tima ka-wü kpikpi ye kpikpi ye, kpah baka nih wü kpapa ka Yesu. ¹⁵ Te lö mü mala ngü, gü ba, "Tima ka-ni baka nda kpa nda de. Te ah bala, ni de e eküte kpapa la nda-ni de," dela züka ngü? Lö mü ti eyi amala ngü bala? ¹⁶ Anga te güje mü ena amala nda-ye, agü ba, "Ni de jia nda-ni de, te ah bala, ni de e eküte kpapa la nda-ni de," dela züka ngü? Güje mü ti eyi amala bala? ¹⁷ Te ngbürikü kpapa ena adi ta 'buru jia la, ah ena aje ngü, neh baye baye? Anga te ngbürikü kpapa ena adi ta 'buru bü güje la, ah ena aje se e, ta neh baye baye? ¹⁸ Me o wü e eküte nih kpikpi ye kpikpi ye, baka te engu le. ¹⁹ Te ngbürikü kpapa ena angbü ta 'buru e biringbö la, ah ena amere tima neh baye?

²⁰ Wü e sibi eküte kpapa fa sü, amba ah ka-ye bü ngbürikü kpapa biringbö. ²¹ Jia kpapa ti eyi amala fü kpa kpapa, gü ba, "Ma le mü de"? Ngü bala ma! Anga te nzö kpapa mala kpah fü lö, gü ba, "Ma le mü de," la, ngü bala kpah ma! ²² Wü gara e ladü eküte nih, te nih ngbü eceka baka kükürü e. Te wü e la ena adi ta ma la, küte nih ti angbü zürü ne, de. ²³ Wü gara e ladü eküte nih, te di de e ka lümü. Te di bala, nih ngbü eto bongo te nih teka ngü la, teka ne de, angü wü kpapa ena adi ewu. ²⁴ Wü gara wü e eküte nih te su asu gbü jia wü kpapa, baka gbura nih, nih to bongo tete de. Me reke wü ngü la 'buru me-ye bala. ²⁵ Küte kpapa ti aye süka ye kpikpi ye kpikpi ye de. Kpah bala, de-nih, te nih di de wü *kpapa ka Yesu ne, nih ti aye

süka nih kpikpi nih kpikpi nih de, angü nih tine eyi küte Yesu Kurisito ngbürükü biringbö. Me ngbü ele de nih le te-nih esüka nih ale, kphah gegege baka te küte nih di de ngbürükü e biringbö ne. ²⁶ Angü te gara e eküte mü ngbü eke te mü ake, baka kpa mü, anga lö mü la, soko mü ti ake 'buru ake de? Te biri e eküte mü ngbü de tadu, baka bu mü la, soko mü ti angbü kphah 'buru de tadu de? Ah kphah bala teka nih, wü kpara ka Yesu. Te gara kpara esüka nih ngbü de cinga, ah le de nih ngbü kphah de cinga, teka ngü kaka. Te gara kpara esüka nih ngbü de tadu la, ah le de nih ngbü kphah 'buru de tadu tekaka.

²⁷ Wü di enga wüna, yi 'buru de küte Yesu Kurisito. Kphah bala, de-yi biri biri 'buru, yi baka wü e eküte Yesu Kurisito. ²⁸ Me o nih eyi 'buru wü kpara ka-ye, de wü tima ka-nih kpikpi ye kpikpi ye. Gina wü kpara te engu fe ewü, ah de a, wü *mürü tima ka Yesu Kurisito. E'ba'basu wü kpara, ah de mene ewü, te ewü ngbü emala ngari Me fü wü kpara ne. Ehabata wü kpara, ah de mene ewü, te ewü ngbü eri wü kpara ka Me de riri kaka. Sidi nga ngü la, fü Me adu ato wazi fü wü gara kpara, fü ewü adi emere kpeke ngü, te komö wü kpara ngbü egu kaka 'buru agu. Fü engu afe wü gara kpara, fü ewü angbü eliki keke te wü kpara. Fü engu ato wazi fü wü gara kpara, de wüh di ele ta-ngü te wü bu wü. Fü engu ato wazi fü wü gara kpara, teka adi ereke ngü esüka wü kpara. Fü engu ato kphah wazi fü wü gara kpara, teka de wüh di ero mö gbü lara gara ganzi mö, te *Nzila Wazi Me to fü ewü. ²⁹ Yesu Kurisito fe wü kpara 'buru baka cögbörö wü mürü tima nda de. Wü kpara 'buru ti amala ngari Me, akoro di kpini te nga riri na ne, nda-wü de. Wü kpara 'buru ti ari wü bu wü de riri ka Me ne de. Wü kpara 'buru ti amere kpeke lara ngü kphah de. ³⁰ Wü kpara 'buru ti aküwa wü mürü keke kphah de. Wü kpara 'buru ti amala ngü gbü mö, te Nzila Wazi Me ngbü eto ne, kphah de. Nzila Wazi Me to wazi fü wü kpara 'buru, teka aje si-ngü gbü mö la, teka adi efa sisi na fü wü bu wü ne, kphah de. Angü engu ye süka tima la aye, baka te engu le. ³¹ Te ah tine eyi bala la, de mü to maguma mü, teka amere zu tima ka Me, te ena ato tadu tete.

Dene ngü teka le-te

Wü di enga wüna, ma ngbü emala fü yi, gü ba, ah le de yi di ele te-yi esüka yi ale. Angü dela ngü te reke te Me fa wü gara ngü 'buru.

13

¹ Angü te mü ti eyi amala mö ka

wü kpara füh kotö ne 'buru, kphah de mö ka wü *malayika ka Me agbü kpi, amba te mü le wü bu mü de la, mü ka-mü baka kono, te wüh ngbü eu bü kükürü kükürü bala. ² Anga te mü ti eyi amala ngari Me, anga mü ti kphah eyi awu wü kpeke ngü ka Me 'buru areke areke la, ngü ma. Anga te mü to maguma mü 'buru fü Me, fü mü angbü de wazi teka amere wü cögbörö kpeke ngü di la, te mü le wü bu mü de la, ngü ka-mü la ka-ye 'buru de kükürü ngü. ³ Anga te mü to jia de wü e ka-mü 'buru fü wü mürü cinga, anga te mü to te-mü di akpi teka ngü ka Yesu Kurisito, te mü le wü bu mü de la, wü ngü ka-mü la 'buru reke gbü jia Me nda de.

⁴ Te mü le wü bu mü de maguma mü 'buru la, mü ena adi emere züka ngü fü ewü. Te wüh mere siti ngü fü mü la, mü ena aboro siti ngü ka-ewü la aboro. Mü ti akpi gümü e ka-ewü de. Kphah bala, mü ti agbo nga mü de. Mü ti akpa ngü ewü kphah de. ⁵ Te mü le wü bu mü de maguma mü la, mü ti ato lümü te ewü de. Mü ti adi efi bü nzö ngü ka-mü ne de. Maguma mü ti kphah angbü enzu eküte ewü kere kere ne de. Mü ti kphah ati ngü ka wü bu mü guvu mü de. ⁶ Te mü le wü bu mü de maguma mü, te gara ewü mere ngü sisiti, anga dürü ngü gbü jia mü la, ah ena areke te mü? Ah bala de. Ngü de te ena areke te mü 'duwa te engu ngbü emere züka ngü. ⁷ Te mü le kiri mü de maguma mü la, mü ti eyi aboro wü siti ngü kakana. Mü ena angbü eo maguma tete gbü wü sikpi 'buru, mü ena angbü kphah eo to mü tete. Mü ti ace engu nda-mü de.

⁸ Te mü le wü bu mü de maguma mü 'buru la, ngü la ti anza de. Amba te mü ngbü eto ngari Me fü wü kpara la, ngü la ena anza anza fanü. Anga teka ngü ka maro mö gbü ganzi mö, te *Nzila Wazi Me to fü mü ne, ngü la ena anza ka-ye kphah anza. Te mü ti eyi angbü ewu si wü ngü 'buru la, ngü la ena anza ka-ye kphah anza. ⁹ Kükürü de, angü baka te nih ngü angbü füh kotö sene ne, nih ti eyi awu ngü ka Me mba cükü'daye. Te di bala, nih ngbü emala ngari Me fü wü bu nih kphah mba cükü'daye. ¹⁰ Amba te gara, te nih ena angbü agbü sü ka Me agbü kpi, nih ena awu wü ngü 'buru. Ngü te nih wü mba cükü'daye enatikine ne, ah ena adu angbü te nga jia nih ba engu ngü. ¹¹ Ta gügü, te ma di la mba jaji ne, ma ti aro mö 'be 'be ne de. Fingangü ka-ra mbi bane ne kphah ma. Angü ngü ka wü jaji ka-ye bala. Amba te ma ga koro mere komoko tete, fü ra adu ace ngü ka jaji la asidi. ¹² Titine dene, nih baka wü jaji, angü nih wu ngü ka Me mbi mbi la de. Ngü ka Me te nih ngbü emere ne, ah ka-ye la baka kuru ngü

gbü roto. Amba te gara, te nih ena angbü de wü Me agbü kpī, nih ena awu jia Yesu Kurisito, fü nih adu awu wü ngü ka Me 'buru areke areke, kphah baka te engu ngbü ewu wü ngü ka-nih 'buru ne.

¹³ Te di bala, wü di engu wüna, dene ngü te ma le amala fü yi. Titine wü cögbörö ngü ladü bata, te Me ngbü ele de nih di emere. Te mü to maguma mü eyi fü Me la, ngü la ti anza de. Te mü ngbü eo jia mü teka dudu ka Yesu Kurisito, ngü la ti anza kphah de. Te mü le wü bu mü de maguma mü, ngü la ti anza kphah de. Mere ngü te fa wü bu ye 'buru, esüka wü ngü de bata ne, ah de ngü ka le-te.

14

¹ Te di bala, ah le de yi to te-yi adi ele wü bu yi de maguma yi 'buru.

Dene ngü teka maro mö gbü ganzi mö,

te Nzila Wazi Me ngbü eto

Ah le de yi yi-ta Me, teka de engu to wazi ka *Nzila Wazi ye fü yi. Gina mere ngü te ena ale ta-ngü te wü kpara, ah de wazi teka angbü emala ngari Me di. ² Kükürü de, angü te mü ro mö gbü gara ganzi mö te Nzila Wazi Me sere fü mü me-ye la, wü bu mü ena aje si-ngü la, neh baye baye? 'Duwa Me te ena aje si-ngü la ka-ye me-ye. Angü ngü te mü ngbü emala la, Nzila Wazi Me to wazi la fü mü me-ye, teka fü mü adi emala wü ngü de te wü kpara ti aje de. ³ Amba te mü ngbü emala zu ngari Me fü wü bu mü, wüh ena aje ngü la areke mbi mbi mbi, fü ngü la ato wazi fü ewü. ⁴ Te mü ngbü emala ganzi mö, te wü bu mü je de, mü ena amaka wazi la ka-mü nzö me-mü. Amba te mü ngbü emala ngari Me la, mü ngbü dela eto wazi fü wü kpara 'buru. ⁵ Te yi ena aci 'buru angbü ero mö gbü ganzi mö te Nzila Wazi Me to fü yi, ah esiti de. Amba te yi ena aci 'buru adi eto ngari Me la, ah ena areke afa cu sü. Ngü ka kpara te ngbü eto ngari Me, fa ngü ka kpara te ngbü emala ngü gbü ganzi mö te Nzila Wazi Me to fefe. Angü ngü de te ewü emala gbü ganzi mö la, ah ti ato wazi fü wü kpara de. 'Duwa te gara kpara ladü sela te Nzila Wazi Me to wazi eyi fefe na, teka de engu wu si-ngü gbü ganzi mö la, fü ah amala fü wü bu ye. ⁶ Wü di engu wüna, ta te ma ena akoro kpara yi kpala, angbü ero mö gbü mö te Nzila Wazi Me to fere, te yi je ngü gbügbü de la, ah ena ato wazi fü yi, neh baye baye? Amba, te ma ngbü emala fü yi ngü ka Me, de te engu to fere, de ma mala ne, anga te ma ngbü eri yi de riri ka Me, dela ngü te ena ato wazi fü yi, areke maguma yi fanü.

⁷ Yi fi nga ngü ne mbi mbi mbi. Te kpara ngbü emü gambi, bü faaa, baka te jaji ngbü

emü e me-ye la, wü kpara ena abi ci, alo bi areke te nganga, neh baye baye? ⁸ Anga te kpara ngbü eu kono teka gü bü 'daaa, wüh je ngü gbügbü reke de la, wü kpara ena awu neh baye, fü ewü areke te-wü teka gü? ⁹ Teku ngü ka-yi, ah kphah bala. Te yi mala ngü reke areke de la, wü kpara ena aje, neh baye baye? Ngü ka-yi ena adi ka-ye baka kükürü ngü. ¹⁰ Mere bi mö ka wü kpara füh kotö ne ladü fa sü, te di kpikpi ye kpikpi ye, si-ngü gbügbü na kphah kpikpi ye kpikpi ye. ¹¹ Te kpara mala ngü fü yi gbü mö ka nguwa ye, te yi je ngü gbügbü de la, yi ti aje si-ngü gbü ngü de te engu mala fü yi la kphah de, angü engu de ganzi kpara.

¹² Wü di engu wüna, ma wu eyi, gü ba, yi ngbü ele de Nzila Wazi Me to wazi fü yi teka amere tima di. Te di bala, ah le de yi yi-ta Me, de ah tima Nzila Wazi ye fü yi, teka fü yi amere wü ngü, te ena ato wazi fü wü bu yi. ¹³ Kphah bala, te Nzila Wazi Me to wazi fü mü teka aro mö gbü ganzi mö, te wü bu mü je de, de mü yi-ta Me, teka de engu to kphah wazi fü mü, teka de mü wu si-ngü la mini, teka fü mü adi esere sisi na fü wü bu mü. ¹⁴ Te mü gbo nga Me gbü mö te wü bu mü je de la, fingangü ka-mü wu si-ngü la nda de. Mü ngbü egbo nga Me dela nzö de wazi ka Nzila Wazi Me te di emaguma mü. ¹⁵ Ah le de mü gbo nga Me de maguma mü 'buru, de fingangü ka-mü kphah mini. Ah kphah bala, teka wü ci ka Me. Ah le de yi bi wü ci la de maguma yi, kphah de fingangü ka-yi mini. ¹⁶ Te mü ngbü egbo nga Me gbü ganzi mö la, wü gara kpara ti aje ngü la de. Te di bala, wüh ti ale ngü ka-wi la kphah de. ¹⁷ E-wu neh da, mü ngbü egbo nga Me ereke areke, amba ngü la ti areke maguma wü bu mü de.

¹⁸ Nda-yi, yi ngbü egbo nga yi, gü ba, ani wu da ero mö gbü mö te Nzila Wazi Me sere fü ani ne fa sü. Amba nda-ra, ma gbo nga iri Me fa sü, angü ma ngbü ero mö gbü mö, te Nzila Wazi Me sere fere, fa yi 'buru di ka. ¹⁹ Amba te ah esüka wü kpara la, ma le adi emala ngü, te wü bu ra ti eyi adi eje 'buru. Te ma mala di bü mba engu ngü cükü'daye, te wüh ti eyi aje sisi na la, ah reke cu fa sü, fa mere bi wü ngü, te wüh ti aje sisi na de ne.

²⁰ Wü di engu wüna, yi fi nga ngü ne mbi mbi mbi. Yi ce fingangü ka wü jaji asidi. Ah le de maguma yi ngbü baka nda wü jaji, angü wü jaji ti ngü emaguma wü nda-wü de. Amba teka fingangü, yi ngbü baka wü cögbörö kpara de fingangü gbü nzö wü. ²¹ Yi ngbü efi nda-yi, gü ba, ani de kpeke kpara, teka te ani ngbü ero mö gbü ganzi mö, te Nzila Wazi Me sere fü ani la, te wü bu ani ti aje nda-wü de ne. Me

mala teka ngü la gü neh fe? Wüh ba ta gbü *Ngari Me, gü ba dene, "De-ni, Me, ni ena atima wü *ganzi kpara kpaka wü kpara ka-ni, teka ato kuru te ewü. Angü wüh ena angbü emala ngü ka-ni fü ewü gbü ganzi mö, te ewü je ngü gbügbü de. Amba wüh tĩ ale ngü ka-ni la nda-wü fi de!"*

²² Te yi biti te-yi teka agbo nga Me, te mere bi yi ngbü ero mö gbü ganzi mö la, ah ena asere fü wü kpara, te ewü le ngü ka Me de, ga, Me ngbü emala ngü la gömö yi me-ye fanü. Amba Me ngbü emala ngü la neh fü wü da? Ah ngbü emala ngü la fü wü kpara, te ewü le ngü kaka de, teka fü ewü awu wazi ka-ni, Me. Amba te kpara ngbü eto ngari Me fü yi, gbü mö te wü kpara je si-ngü gbügbü na kpo la, ngü la ena asere fü yi, gü ba, Me ladü tundu de ani, teka ato wazi fü ani.

²³ Ah kpaah bala, te yi biti te-yi tundu, fü gara kpara biringbö, te le ngü ka Yesu la de, akoro angbü esüka yi, fü yi angbü ero mö ka-yi 'buru gbü mö te wü kpara je ngü gbügbü na de la, kpara la ena afi, ga dene, yi ka-yi 'buru wü mürrü maröfö.

²⁴ Amba te engu maka yi te yi ngbü 'buru emala ngari Me gbü mö de te engu je kpo la, ngü la ena arĩ gbü nzöngö. Fü ngü la amofö mamagama teka wü *siti ngü kaka. Ngü la ena ato kpaah mere fingangü fefe na, fü ah afü maguma ye. ²⁵ Tekane de, te ngari Me la maka ngü te kpara la wo awo emagama ye, ah ena ato cürü fefe na afa sü, teka te engu je ngü la cu gömö kpara de te to ngari Me la. Tekane ngü la, engu ena anda'ba te-ye engagira Me, gü ba, "Fanü Me ladü de yi tundu."

Dene ngü te yi ena adi emere, te yi biti te-yi,

teka agbo nga iri Me la

²⁶ Wü di enga wüna, nih ena amere baye, te nih biti te-nih teka agbo nga Me la? Ah le de yi mere wü ngü 'buru te züka kaje. Te gara kpara esüka yi ena adi de ci emagama ye teka agbo nga Me di la, ah mbi. Anga, te nda gara kpara nda-ye di ngü te koro kpaka Me, teka arĩ wü bu ye di la, ah esiti de. Anga te gara kpara kpaah de nda-ye ngü, te engu ele amala gbü ganzi mö, te gara kpara nda-ye di kpaah ladü te je si-ngü la, amala fü wü bu ye la, ah esiti kpaah de. Amba gbü ngü la 'buru, ah le de yi gĩri mene ngü de te ena ato wazi, fü ah areke maguma wü kpara 'buru. ²⁷ Te wü kpara ladü 'basu, anga bata, te ewü ele aro mö gbü ganzi mö la, ah le de wüh mere ngü la biri biri. Ah le kpaah de gara kpara mala si-ngü la fü wü bu ye. ²⁸ Te kpara te ena amala si-ngü

la fü wü kpara nda ma la, ah le de wüh mala ngü gbü ganzi mö engagira wü bu wü de. Wüh nga tũü, wüh mala ngü la ciki emagama wü, angü Me ena aje ngü la me-ye.

²⁹ Ah kpaah bala, teka mene ewü, de te ewü ngbü eto ngari Me ne. Ah le wü kpara 'basu anga bata. Wü bu wü ngbü nda-wü angbü, adi eje, da efi ngü de te wüh ngbü erĩ ewü di ne. ³⁰ Te gara kpara biringbö ngbü eto ngari Me, fü gara kpara ayia tikpi, teka amala gara ngü te Me sere fefe, te ah bala la, de gina kpara la nga nda-ye anga, teka ace sü fü kiri ye la. ³¹ Te yi ngbü 'buru emala ngari Me, ah de züka ngü, amba ah le de yi mala biri biri. Kükürü de, angü ah le de yi je wü ngü la kpaah 'buru tenga yi, teka amaka wazi gbügbü na. ³² Wü kpara te Me ngbü etima ngü te komo ewü, ah de ngü ka-ewü, anga wüh ele amala ngü la neh elaye? Anga, ah le de wüh ci nga wü bu wü, de wüh nza nda-wü ngü feke. ³³ Me tima nih teka adi ero mö bü 'daaa ne nda de. Ah to gu maguma fü nih 'buru, teka adi emala ngü ka-ni, ka Me, te züka kaje. Yi di emere wü ngü 'buru mbi, kpaah baka te wü gara kpara ka Me gbü wü gara sü ngbü emere ne.

³⁴ Ah kpaah bala, te yi ngbü ebiti te-yi, ah le de wü würüse nga nda-wü anga. Wüh ro mö esüka wü de. Ah le de wüh di eje wü ngü, baka ta te wüh ba gbü *Ngari Me. ³⁵ Te gara ngü ladü, te ewü je reke mbi mbi de la, ah le de wüh du yi-ta wü wati wü sidi, o wüh du eyi kpa eköti. Angü te wü würüse ngbü ero mö gbü lö-ra, te wüh ngbü eto ngari Me tete la, ah esiti.

³⁶ Dela ngü te ma le amala fü yi, yi di emere wü ngü 'be 'be 'be, baka wü gara kpara ka Me gbü wü gara sü 'buru. Yi mere e afi, gü ba, "Ani wu ngü fa nda wü bu ani ne," de, angü yi de gina wü kpara, te yi kpo de ngü ka Me me-yi ne, de. ³⁷ Te kpara mala, gü ba, "Nzila Wazi Me to wazi eyi fü ni," te ah bala, engu ti eyi ale, ga, ngü de te ma ba ne, ah de ngü ka Miri Yesu Kurisito fanü. ³⁸ Te kpara le ngü ka-ra ne de, mü mere e ale ngü kaka-na nda-mü kpaah de.

³⁹ Wü di enga wüna, dela ngü te ma ele amala fü yi, yi to maguma yi 'buru teka adi emala ngari Me fü wü kpara. Amba te wü gara kpara ele aro mö gbü ganzi mö te Nzila Wazi Me to fü ewü la, yi mere e atĩri ewü de. ⁴⁰ Amba ah le de yi di emere wü ngü la 'buru te züka kaje, baka ngü te ena atĩ kpini gbü jia wü kpara, kpaah gbü jia Me.

* 14:21 14:21 Mü ena amaka ngü la gbü buku ka Yisaya 28:11-12.

15

Dene ngü ka züzükü ka wü kpara gbü kpi, teka ngü ka Miri Yesu

¹ Wü di engu wüna, yi fi la nga kpi bete züzükü ka Yesu Kurisito, ta te a mala fü yi gügü ne. Dela ngü ta te yi le, fü yi adu azoro de kpa yi 'basu. ² Titine yi lala eyi kpekpeke te ngü la. Te di bala, yi ena aküwa aküwa fi mere badi teka ngü la. Amba, te ngü ka züzükü ka Yesu gbü kpi ena adi ta fanü de la, de bane yi küwa kphah de.

³ Dela mere kpeke ngü de te ma je gömō Yesu Kurisito, angü Yesu Kurisito kpi teka aküwa nih gbü *siti ngü ka-nih, baka te wüh ba ta gbü *Ngari Me gügü. ⁴ Fü ewü ati engu. Gbü ebabata sikpi, fü Me ayia azükü engu gbü kpi, kphah baka ta te wüh ba gbü Ngari Me. ⁵ Fü ah asere te-ye fi fü Petero. Fütanga ngü la, fü ah adu kphah asere te-ye fü wü *kpara ka-ye nzükpa de füh ye 'basu ne. ⁶ Sidi nga ngü la, fü ah adu asere te-ye tine fü mere bi wü gara kpara ka-ye baka kama 'buruve (500). Wü kpara la, wü gara ewü dene la fi ladü de jia wü, amba wü gara kpi eyi. ⁷ Fütanga ngü la, fü ah adu asere te-ye fü *Yakobo. Fü ah adu kphah asere te-ye fü wü *mürü tima ka-ye 'buru nde.

⁸ Sidi nga wü ngü la 'buru, ah du sere te-ye cu fere, angü ma nda-ra tine baka adu ye, te wüh bi engu duu sidi nga wü di engu ni ye. ⁹ Ma nda-ra baka kpara te koro tine sidi sidi. Ngü ka-ra baka nda wü gara mürü tima ka Yesu Kurisito ne nda de. Fanü, ah ti ta fü ra angbü baka mürü tima kaka ne de. Angü te engu gina, ma to ta cinga te wü *kpara ka Yesu Kurisito fa sü. ¹⁰ Amba fü Me adu awu cinga ra, fü ah adu afü ra kpara ka tima ka-ye, baka te yi ngbü ewu ra de enatikine ne. Fü engu ato wazi fere teka adi emere tima ka-ye di kpekpeke, afa nda wü gara mürü tima ka-ye ne di ka. Amba ma mere tima la de wazi ka-ra de, Me to wazi la fere me-ye, teka *züka maguma ye.

¹¹ Te di bala, zu ngü ka Me ka-ye ngbee biringbö. Anga te ma ena amala fü yi mera, anga gara kpara, anga neh da, ah ka-ye fi bü de ngü biringbö.

¹² Wü di engu wüna, yi fi nga ngü ne mbi mbi mbi, teka ngü ka Me te a ngbü emala fü wü kpara, gü ba, Me zükü Yesu Kurisito gbü kpi eyi ne. Te di bala, ah mere baye, te wü gara kpara esüka yi ngbü emala, gü ba, te wü kpara ka Yesu kpi la, wüh ti azükü gbü kpi nda-wü de ne? Ngü la fanü? ¹³ Te wü kpara ti azükü gbü kpi de la, de bane Yesu Kurisito ti ta kphah azükü de. ¹⁴ Te Yesu Kurisito ena azükü gbü kpi ta de la,

de bane ngü ka Me, te a ngbü emala fü wü kpara ne, ena angbü ka-ye bü töndö ngü kükürü. Kpah bala, teka ngü ka-yi, te Yesu Kurisito ena azükü gbü kpi ta de la, de bane ngü ka Yesu Kurisito, te yi le ne, ena adi ka-ye kphah bü kükürü ngü. ¹⁵⁻¹⁶ Te ah ena adi ta bala, de bane, wü ngü de te a ngbü emala, teka ngü ka Me, ena adi 'buru de wu. Angü a mala, ga dene, Me zükü Yesu Kurisito gbü kpi eyi. Amba te wü kpara ti azükü gbü kpi de la, de bane, Yesu Kurisito ti ta kphah azükü gbü kpi de. ¹⁷ Te Yesu Kurisito ena azükü gbü kpi ta de la, de bane, ngü ka Yesu, te yi le gömō a ne, ena adi ta de töndö ngü kükürü. Kpah bala, de bane Yesu Kurisito ti ta kphah aküwa yi gbü *siti ngü ka-yi de. ¹⁸ Te ngü la ena adi ta bala, de bane wü kpara ka Yesu Kurisito, de te ewü kpi eyi ne, wüh ena akpi ka-wü ta fi mere badi. ¹⁹ Wü di engu wüna, te Yesu ti ta azükü nih gbü kpi de la, de bane cinga ka-nih ena afa sü.

²⁰ Amba, ah bala de! Me zükü Yesu Kurisito gbü kpi eyi fanü fanü! Engu baka gina nguwa te kö eyi, te nih ena awu tete, ga, te wü kpara ka Me kpi la, Me ena azükü ewü kphah bala. ²¹⁻²² Ta gügü, biri kpara mere siti ngü me-ye, fü Me akina wü kpara 'buru, de wüh di ekpi teka ngü kaka la. Kpara la, ah de gina kundu nih, de iri ye *Adama. Amba enatikine, kpara biringbö mere züka ngü eyi, te Me ena azükü nih gbü kpi teka ngü kaka. Kpara la, ah de Miri ka-nih Yesu Kurisito. Nih ngbü ekpi, angü nih 'buru de kundu ye Adama. Kpah bala, te nih zu de wü kpara ka Yesu Kurisito la, nih ena azükü azükü gbü kpi kphah bakaka.

²³ Yesu Kurisito de gina kpara te zükü eyi me-ye gbü kpi. Te gara, gbü sikpi te Yesu Kurisito ena adu akoro tete füh kotó sene, Me ena azükü nih, wü kpara ka-ye, gbü kpi 'buru baka Yesu. ²⁴ Fütanga ngü la, ngü ka kotó ne ena anza. Yesu Kurisito ena afa jia wü vügü ka-ye 'buru, de wü miri gbü nguwa wü kpara füh kotó ne, kphah bete *Satana de wü kpara ka-ye 'buru. Fü Yesu adu ace wazi la fü Me, te di Wö ye. ²⁵ Angü Yesu Kurisito ena angbü miri füh wü ngü 'buru. Me ena ato wazi fefe, de ah fa jia wü vügü ka-ye di, adu ao ewü esa lö ye. ²⁶ Fü engu adu anza ngü ka kpi, teka de wü kpara kaka kpi tine de, fi mere badi. ²⁷ Dela ngü ta te wü *mürü dofo ba gbü *Ngari Me teka Yesu, gü ba, "Me ena ao wü ngü 'buru esa lölö."* Ngü te wüh ba, gü ba, "Wü ngü 'buru ena adi esa lölö," ne, amba nih wü eyi kpo, ga, Me ti angbü esa lö Yesu nda de, angü Me de kpara, te o engu miri me-ye. ²⁸ Yesu

* 15:27 15:27 Mü ena amaka ngü la gbü Ci ka wü Davidi 110:1.

Kurisito ena angbü füh wü ngü 'buru ba Mere Miri. Fū Me adu angbü tīne me-ye miri gbü nzö Yesu, de wü ngü la 'buru. Angü engu to wazi la fū Yesu me-ye.

²⁹ Wü di enga wüna, gara ngü kphah dene te ma le amala fū yi. Yi fi nga ngü ne mbi mbi mbi. Te Me ti azükü kpara gbü kpi de la, wü kpara de te ewü za *babatiza teka wü mürü wü, de te wü kpi eyi ne, wüh ena amere baye? Dela ena adi ka-ye bü tondö ngü kükürü.

³⁰ Gara ngü kphah dene, de-a, wü *mürü tima ka Yesu, a ngbü ece te-a fū kpi, teka tima kaka, neh teka ne? Te wü kpara ti azükü gbü kpi de la, ah ena adi zu tondö ngü kükürü. ³¹ Wü di enga wüna, ma su wu de. Ma ngbü ece te-ra fū kpi bala, teka ngü ka Yesu Kurisito, kphah teka tadu te ma ngbü emaka teka ngü ka-yi. ³² Mere bi wü ngü ngbü embü ra agbü Efeso kphah efa sü. Ma ngbü egü gü de wü vügü ka Yesu Kurisito, te ewü di baka siti wü nü ne. Ma ngbü emere bala, neh teka ne? Teka de ma maka züka ngü füh kotö ne? Ah bala de! Ma ngbü emere ngü la bala, teka ngü ka Yesu Kurisito. Amba, te Me ti azükü wü kpara gbü kpi kphah de la, tima te ma ngbü emere ne, ah ena adi ka-ye kükürü ngü. Te wü kpara ti azükü gbü kpi ta de la, ah ena areke ta areke, te nih ena agiri da nih, akoko tadu titine füh kotö ne, angü egambi, nih ena akpi ka-nih akpi fi!

³³ Yi ceka 'be, teka ngü ka wü kpara te ewü ngbü efiti yi, gü ba, "Wü kpara zükü gbü kpi de," ne. Yi mere e ale ngü ka-ewü la de. Te yi ngbü engbü de wü siti kpara de bala, wüh ena asiti fingangü ka-yi 'buru. Angü yi wu kpo, gü ba, te e biringbö zi azi esüka wü bu ye la, ah ena asiti gara wü bu ye la 'buru. ³⁴ Yi ce tondö fingangü ka-ewü la, yi ce kphah da emere wü siti ngü. Angü ma wu eyi fanü fanü, ga, wü gara kpara ladü esüka yi, te ewü le ngü ka Me de. Ngü la ena ato mere lümü fū yi.

³⁵ Wü di enga wüna, wü gara yi le ayi-ta ra, gü ba, "Wü kpara ena azükü gbü kpi, neh baye baye? Anga wüh ena adu amaka gara küte, neh baye baye?" ³⁶ Dela tondö yitangü. Yi fi nga ngü la mbi mbi mbi. Te mü ru jia e gbü tö la, küte e la ena azi ka-ye ciki agbü tö, amba mamaguma ena akö ka-ye akö. Ah kphah bala teka nih, wü kpara ka Yesu. Küte nih ena akpi, fū ah azi azi. Fū Me adu azükü nih gbü kpi la, tīne gbü to küte. ³⁷ Jia e te mü ngbü eru gbü tö, ah ka-ye kü bü biringbö, anga ah de ndo, anga ah de neh ene. ³⁸ Fū Me ato wazi fū jia e la, de ah kö, fū ah aga kphah fi bü baka te Me o. Jia yara ena akö nda-ye fi bü yara. Jia ndo ena akö nda-ye fi bü ndo. ³⁹ Kphah bala, küte wü e füh kotö ne

ka-ye kpi kpi ye kpi kpi ye. Küte wü kpara ka-ye kphah kpi kpi ye. Küte wü nü ka-ye kphah kpi kpi ye. Küte wü lu nda-ye kphah kpi kpi ye. Küte wü si nda-ye kphah kpi kpi ye. ⁴⁰ Küte wü e de füh kotö ne 'buru ka-ye kpi kpi ye kpi kpi ye. Kphah bala, küte wü e kpa gbü kpi ka-ye kphah kpi kpi ye. Susu, de wü ngü ka-ewü kphah 'buru 'dö kpi kpi ye kpi kpi ye. ⁴¹ Süsü ka ra ka-ye kpi kpi ye te nda fe. Wü küfara ngbü eci nda-wü aci ndra ndra ndra. Amba wü gara küfara ngbü eci nda-wü cu de wazi, da elofu sü efa nda wü bu wü ka.

⁴² Ngü ka-nih, wü kpara ka Yesu, te nih ena azükü gbü kpi, ena adi kphah bala. Angü Me ena adu afü küte nih, de te nih di di titine ne, kpi kpi ye. Küte nih de te nih ngbü di ne, ena akpi, fū ah azi. Amba to küte te Me ena adu ato fū nih ne, ah du kpi nda tīne de. ⁴³ Küte nih de te nih di di ne, ah ka-ye küte ka cinga, ah ka-ye kphah walawala. Amba to küte, te Me ena adu ato fū nih ne, ah ena asu afa sü, fū ah angbü kphah de kpeke wazi gbü ye. ⁴⁴ Küte nih de titine dene ne, ah de e ka füh kotö ne. Amba to küte, de te Me ena ato fū nih ne, ah ena adi de küte ka kpi.

⁴⁵ Ah baka ngü ta te wüh ba gbü *Ngari Me, gü ba dene, gina kpara te Me mere füh kotö ne, ah de kundu nih *Adama. Me o Yesu Kurisito baka e'ba/basu kundu nih, amba ngü kaka ka-ye kpi kpi ye. Angü Me zükü engu gbü kpi, adu ato to küte fefe na, ah de mene küte te ti akpi nda de. Te di bala, Yesu de wazi teka aküwa wü kpara, te ewü to maguma wü fefe, angü wüh tīne eyi de wü kpara gbü ngunguwa. ⁴⁶⁻⁴⁷ Gbü sikipi te Me mere kundu nih Adama, ah za ta tö, fū ah afo engu gbü gbü. Amba teka Yesu Kurisito, gbü sikipi te Me zükü engu gbü kpi tete, Me to to küte fefe na, te ti akpi de. Küte nih te wüh bi nih di ne, ah ka-ye de e ka tö. Te gara, Me ena ato to küte fū nih, baka nda Yesu. ⁴⁸ Nih, wü kpara füh kotö 'buru, nih de wü kundu ye Adama. Küte nih kphah 'buru baka nda Adama, de te Me mere gbü tö ne. Amba teka ngü ka-nih, nih nda-nih de wü kpara ka Yesu Kurisito. Te di bala, sisi nga kö nih, Me ena ato to küte fū nih, te di de küte ka kpi, kphah baka nda Yesu Kurisito. ⁴⁹ Amba titine dene, küte nih ka-ye la de küte ka kotö, baka nda Adama. Te gara, küte nih la ena adi tīne de küte ka kpi, baka nda Yesu Kurisito.

⁵⁰⁻⁵³ Wü di enga wüna, dela ngü te ma ele amala fū yi. Küte nih ka kotö ne ti angbü agbü kpi nda de. Küte nih dene ena akpi akpi, fū ah azi anza ka. Sü ka Me agbü kpi ti anza nda de. Te di bala, ah le de Me to to küte, te ti anza kphah de ne, fū nih. Yi da güje yi te ngü de te ma emala ne.

Angü dene ngü de te Me sere fü wü kpapa te enga gina la de. Wü gara nih ladü, te ewü ti akpi la de. Angü te gara, te Yesu Kurisito ena adu akoro füh kotö ne tete, ah ena adu amaka ewü fi ezükü de jia wü. Fü Me adu afü küte ewü bü kere baka roto la, akoro di toto gbü sikipi la. Angü gba kono ena awü, fü wü *kpapa ka Yesu, de te wüh kpi eyi ne, ayia azükü gbü kpi, de to küte ewü, te ti akpi tüne de. Amba teka ngü kanih, te nih di la ezükü ne, Me ena ato to küte fü nih kpah bala.

⁵⁴ Gbü sikipi te Me ena ato to küte la fü nih tete, ah ena adi gegege baka ta te wüh ba gbü Ngari Me, gü ba, "Wü kpapa ka Me ti akpi tüne de, angü Me nza ngü ka kpi eyi fi mere badi."[†] ⁵⁵ Nih ti kpah eyi abi ci te kpi, angü Yesu Kurisito fa jia kpi eyi. Wüh ba ta ci la gbü Ngari Me, gü ba, "Kpi, wazi mü nza eyi!

Kpi, mü tüne de mere miri de.

Kpi, mü ti amörö a tüne de.

Nda-a, a ti akpi nda-a tüne de!"[‡]

⁵⁶ Wü kpapa ngbü ekpe cürü kpi, neh teka ne? Ah teka ngü ka *siti ngü de? Angü wüh wu eyi, gü ba, Me ena ato kuru te ani, teka siti ngü ka-ani la. Nih wu ngü ka kuru la, neh baye baye? Angü wüh ba ngü la ta eyi gügü gbü *Riri ka Me. ⁵⁷ Nih gbo nga Me, angü engu tima Yesu Kurisito eyi, akpi, teka afa nih gbü kpi la.

⁵⁸ Te di bala, wü di enga wüna, yi rü kpekepe, fü yi azoro ngü ka Me de kpa yi 'basu. Yi o maguma yi teka amere tima ka Yesu Kurisito. Angü tima de te yi ena amere la, ah ti angbü kükürü de. Yi ena amaka takpa ka-yi te gara, gbü *adu sikipi te Yesu ena adu akoro tete na.

16

Dene ngü te ma ele amala fü yi, teka ngü ka mabiti jiase,

teka wü mürü cinga agbü Yerüsalema

¹ Te yi le aro jiase, teka ale ta-ngü di te mene wü *kpapa ka Yesu Kurisito, te ewü di de mürü cinga agbü Yerüsalema ne la, ah le de yi mere baka ta te ma mala fü wü kpapa ka Yesu Kurisito, agbü Galatiya ne. ² Gbü wü sikipi ka Me 'buru, yi di engbü kötö, fü yi afi la nga wa-e de te Me to fü yi gbü wü sikipi la. Fü yi adu aza bete jiase la, ao kpikpi ye, teka wü mürü cinga. Tekate ma ena akoro tete kpapa yi kpala la, de jiase la di ladü nzo. Angü te yi ena akpo angbü ero e la, o ra di ladü kpala la, ah ti areke de. ³ Ah le kpah de yi fe kpeke wü kpapa, te ewü ena aza jiase la,

anü di agbü Yerüsalema. Te ah bala, te ma ena akoro tete kpapa yi kpala, ma ena aba köcökpa ato esaka wü kpapa la, de wüh nü di, wüh to fü wü kpapa ka Yesu Kurisito de agbü Yerüsalema de kpala ne. ⁴ Amba te ah ti kpah fü ra anü mini la, ma ena adu ale kaje tundu de ewü.

Dene ngü ka ndoro ka-a

⁵ Wü di enga wüna, ma ele anü aceka yi kpala. Amba ah le ta de ma fü to agbü Makedoniya feke, teka agü jia ra te wü *kpapa ka Yesu de kpala. ⁶ Sidi nga ngü la, fü ra adu akoro angbü mba kpapa yi kpala teka bi sikipi. Anga karanga ena anza te ra kpapa yi sela? Ma wu la de. Angü ah le de yi le ta-ngü te ra, te ma ena ayia anü agbü wü gara sü tete, anga ah ena adi neh lö sü lö ya? Ma wu kpah de.

⁷ Te ma ena akoro kpapa yi kpala titüne la, ma ena ara mba sikipi 'dongoni, baka rara ka Me* 'basu, anga bata. Dela, ah ti de. Te ah 'be gbü jia Me la, ma ngbü ele teka ara mba kpapa yi sela teka bi sikipi. ⁸ Ma le angbü gbü Efeso sene zalü akoro gbü sikipi ka *Petekosita, sikipi ta te *Nzila Wazi Me koro tete. ⁹ Kükürü de, angü Me ü kaje eyi fere, teka de ma mere tima ka-ni sene kpekepe. Amba wü vügü ka-nih kpah ladü kpakine. ¹⁰ Ma ena atima Timoteyo kpapa yi kpala titüne. Te engu koro eyi kpapa yi kpala la, yi za engu gbü mürü de züka maguma yi. Angü engu de kpapa te ngbü emere tima ka Yesu Kurisito kpekepe kpah baka ra. Yi mere e ato cinga tete na de. ¹¹ Yi mere e akpa ngü kaka kpah de. Yi mere ngü fefe na 'be, teka de engu du kpapa ra kpakine de gu maguma. Angü a ena angbü kpakine da eci nganga, de wü gara wü di enga ni nih.

¹² Tekan ngü ka enga ni nih, Apolo, ma mala ngü fefe na eyi kpekepe, de engu yia kere, ah nü aceka yi kpala. Amba ngü la ti te nga jijia na de. Engu ena adu akoro kpapa yi kpala sidi, te engu maka züka sikipi eyi la.

Dene adu ngü ka-ra

¹³ Wü di enga wüna, yi ceka 'be. Yi zoro ngü ka Yesu Kurisito de kpa yi 'basu. Yi kpe cürü de. Yi rü kpekepe. ¹⁴ Yi di emere wü ngü ka-yi 'buru, da ele te-ye ale.

¹⁵ Yi wu Setefanü de wü kpapa gba ye 'buru kpo. Wüh de gina wü kpapa gbü sü ka-yi kpala,[†] te ewü to maguma wü fü Miri Yesu. Fü ewü ato te-wü kpah 'buru teka adi ele ta-ngü te wü *kpapa ka Miri Yesu. Wü di enga wüna, ma ngbü emala ngü ne fü yi kpekepe, gü ba, ¹⁶ ah le de yi di eje

[†] 15:54 15:54 Mü ena amaka ngü la gbü buku ka Yisaya 25:8. [‡] 15:55 15:55 Mü ena amaka ngü la gbü buku ka Oseyia 13:14. * 16:7 16:7 Rara ka Me, te wüh mala nganga na ne, ah de poso anga izibuwa. [†] 16:15 16:15 Iri nga nzö sü ka wü Korinoto la, ah de Akaya.

ngü gömō wü Setefanü, kpah gömō mene wü kpara, te ewü to te-wü teka adi emere tima ka Yesu kpekpeke, baka wü Setefanü ne. ¹⁷ Ta te wü Setefanü, Forotünatü bete Akayakasī koro tete na kpakine ne, ma ngbü ta de tadu da egbo nga ewü. Angü ah ngbü ge baka te ma wu yi, wü kpara ka Korīnito, ta eyi 'buru la. ¹⁸ Wüh to wazi fere, kpah baka te ewü ngbü eto fü yi ne. Te di bala, ah reke fa sü, te yi ena adi ecu ngü wü kpara de bala, angü wüh de kpeke wü kpara gbü tima ka Yesu.

¹⁹ Wü *kpara ka Yesu Kurisito agbü Asiya kpakine ne to mandī fü yi fala de. Akuwila ake Pīrisila to mandī fü yi kpekpeke de iri Miri Yesu Kurisito, kpah de wü kpara ka Yesu Kurisito te ewü ngbü ebite te-wü agba wü Akuwila ne. ²⁰ Wü di enga ni yi 'buru guvu Yesu Kurisito to mandī fü yi. Yi faka te-yi esüka yi da ra.

²¹ Dene mandī ka-ra, Pawülü, te ma ba cu me-ra de kpa ra fü yi. ²² Teka mene wü kpara, de te ewü le ngü ka Miri Yesu de ne, ah le de Me to kuru te ewü. Wayi, Miri Yesu, mü du edu, mü koro füh kotō ne kere! ²³ Ah le de Miri Yesu ngbü de yi, de ah to wazi fü yi, de *züka maguma ye. ²⁴ Ma le yi eyi 'buru de maguma ra biringbö, teka ngü ka Yesu Kurisito. Dela adu ngü ka-ra, Pawülü. Ah rü baka e dela.

Dene kóćkpa te Pawülü ba fü wü kpara ka Yesu agbü Korinoto 2 Korinoto

Masere si-ngü

Dene kpah gara kóćkpa, te Pawülü ba fü wü kpara ka Yesu Kurisito agbü Korinoto.

Nih tanga gbü 1 Korinoto 5:9, gü ba, te enga gina, o Pawülü ba mene kóćkpa, te nih ngbü ei, gü ba, gina Korinoto ne, la de, engu ba ta gara kóćkpa eyi, tima fü wü kpara ka Korinoto. Te di bala, 1 Korinoto la, ah zu de gina kóćkpa, de te Pawülü tima fü wü kpara ka Korinoto, nda de. Amba nih ngbü ei, gü ba, ah de 1 Korinoto ne, angü ah de gina kóćkpa ka Pawülü fü wü kpara ka Korinoto, te wüh to eyi esüka gara wü buku gbü *Ngari Me. Angü gígina na, ta te Pawülü ba ne, dürü ka-ye eyi.

Teka mene kóćkpa ne, te nih ngbü ei, gü ba, 2 Korinoto ne, ah ena adi ka-ye de ebabata, anga ebabala kóćkpa te Pawülü ba fü wü *kpara ka Yesu agbü Korinoto. Nih ngbü ei, gü ba, 2 Korinoto ne, teka te kóćkpa la di de e'ba'basu kóćkpa ka Pawülü fü wü kpara ka Korinoto, te wüh to eyi esüka wü gara buku, te di gbü Ngari Me.

Fingängü ka wü gara kpara te ewü wu ngü fa sü, gü ba, sidi nga mene kóćkpa te nih ngbü ei, gü ba, 1 Korinoto, ta te Pawülü tima fü wü kpara ka Yesu agbü Korinoto ne, wü gara kpara agbü Korinoto kpala kpo ta da efala Pawülü, da ekpa ngüngü na, gü ba, "Pawülü de mürü fiti, angü engu zu de *mürü tima ka Yesu nda de." Tekan gü la, fü Pawülü ayia gbü Efeso, anü agbü Korinoto, teka de ni reke ngü la kpala. Dela, ah de mene kokoro kaka, te engu mala, gü ba, "Ngü la to ta mere cinga fü wü kpara ka Korinoto fa sü ne." (Mü ena amaka ngü la gbü 2 Korinoto 2:1.) Fü Pawülü ayia ta azinga te mene wü kpara, te ewü mere siti ngü la. (Mü ena amaka ngü la gbü 2 Korinoto 13:2.) Fü ah alügü nga ye, adu agbü Efeso.

Ta te Pawülü du agbü Efeso ne, ah du ba gara kpeke kóćkpa kpah eyi fü wü kpara ka Korinoto la. (Mü ena amaka ngü la gbü 2 Korinoto 2:3-4.) Ah tima ta kóćkpa la esaka Tito. Fü ewü ayia areke ngü ake Tito, gü ba, te Tito ena ayia gbü Korinoto, teka adu agbü Efeso la, ah le de Tito fü to gbü Makedoniya bete Türüwa. Amba sidi nga ngü te Tito nü sü tete, fü wü gara siti ngü akpo da emere te-wü gbü Efeso

sela, teka ngü ka Yesu, te Pawülü ngbü erí wü kpara di ne. (Mü ena amaka ngü la gbü buku ka Wü Mürü Tima 19:23-41.) Te di bala, fü Pawülü ayia gbü Efeso, teka de ni nü, ni maka Tito agbü Türüwa kpala. Kpah bala, teka de ni rí wü kpara de kpala de ngü ka Yesu. Amba baka te engu koro kpala, Tito koro nda la de. Fü ngü la ayia ato mere cinga emagama Pawülü. Fü Pawülü adu ayia sela, ale kaje, anü agbü Makedoniya. Fü ah anü amaka Tito kpala. Fü ah aje züka ngü, te wü kpara ka Korinoto mere ne, gömü Tito. Angü wüh le ngü ka kóćkpa, te Pawülü tima fü ewü ne, reke areke. Sidi nga züka ngü te Pawülü je de bala, fü ah adu aba mene kóćkpa, te nih ngbü ei, gü ba, 2 Korinoto ne.

Wü ngü te mü ena amaka gbü kóćkpa ka 2 Korinoto ne, wüh dene.

Sapita 1-7 Ngü te di ezengba wü Pawülü de wü kpara ka Yesu

Sapita 8-9 Ngü teka jiasse fü wü mürü cinga agbü Yudaya

Sapita 10-13 Wazi te Yesu to fü Pawülü angü engu de mürü tima kaka

Dene mandí ka Pawülü fü wü kpara

ka Yesu Kurisito agbü Korinoto

¹ De-yi, wü *kpara ka Yesu Kurisito agbü Korinoto, a ba kóćkpa ne fü yi me-a, de-ra Pawülü, te Me fe ra *mürü tima ka Yesu, ake enga ni nih, Timoteyo. A to mandí fü yi, wü kpara ka Yesu de kpala, kpah de wü kpara ka Yesu agbü tö ka Akaya 'buru. ² Wö nih Me ake Miri Yesu *Kurisito di de yi, de wüh to gu ngü ka-wü fü yi, de *züka maguma wü.

Dene ngü teka wazi te Me ngbü eto fü nih

³ Ma gbo nga irí Me, te di de Wö ye Miri ka-nih Yesu Kurisito ne, angü engu ngbü ewu cinga nih, fü ah angbü ele ta-ngü te nih. ⁴ Engu ngbü kpah eto wazi fü nih, gbü wü cinga te ngbü embü nih ne 'buru. Te di bala, nih ti kpah eyi ale ta-ngü te wü bu nih, adi egu maguma ewü gbü cinga ka-ewü, teka wazi de te Me ngbü eto fü nih ne. ⁵ Angü te nih maka mere cinga baka nda Yesu Kurisito la, Yesu ena ele ta-ngü te nih, de mere wazi ka-ye. ⁶ Cinga te a ngbü ezü ne, ah teka ngü ka-yi, teka de yi je ngü ka Yesu, fü yi aküwa. Kpah bala, wazi te Me ngbü eto fü a gbü cinga ka-a ne, ah kpah tüngü yi, teka de yi maka wazi, fü yi arü di kpekepe gbü cinga ka-yi, te ngbü embü yi kpah baka nda-a ne. ⁷ Te di bala ne, a kpe cürü de, angü a wu eyi, gü ba, te yi ngbü emaka cinga, kpah baka nda-a la, yi ena amaka wazi kpah baka a, fü yi arü di kpekepe gbü ngü ka Me.

8-9 Wü di engu wüna, a le amala nga cinga, te mere a agbü Asiya, ne fü yi. Dela cinga nda de. Angü ah de mere siti cinga, te fa wazi a cu afa. Fü a afi, gü ba, "A ena akpi akpi gbü cinga la, a ti aküwa nda-a de." Amba cinga la mbü a kükürü nda de. Ah teka de a ce ngü ka-a 'buru esaka Me, de engu küwa a me-ye. Angü wazi a be teka ngü la nda de. Amba wazi Me ladü. Engu ti eyi azükü wü kpara gbü kpi, duu me-ye. ¹⁰ Wayi, Me küwa a gbü siti kpi la eyi fanü. Engu ena aküwa a kpah aküwa, gbü wü gara cinga, te ena amaka a te gara. Angü a o fingangü ka-a eyi 'buru eküte Me, gü ba, "Fanü, engu ena angbü fi bü da eküwa a gbü wü ngü 'buru." ¹¹ Ah le kpah de yi di eyi-ta Me fü a, angü gba ka-ya la ena ale ta-ngü te a. Teku ngü la, mere bi wü kpara ena agbo nga Me teka ngü ka-a. Kükürü de, angü Me ena adi eküwa a, teka gba te bi wü kpara ngbü eku fefe teka a ne.

Dene si-ngü te ma koro tete na kpaka yi la de ne

¹² Wü di engu wüna, wü gara kpara ngbü esu wu eküte a, gü ba, a de wü mürü fiti. Ah bala de! Angü a girü mani, teka adi efiti wü kpara di, baka wü kpara ka füh kotö ne, nda-a de. A wu eyi, gü ba, gbü ngbüngbü ka-a füh kotö sene, a ngbü fi bü emere ngü de maguma a biringbö, te ngbü ereke gbü jia Me, teka wazi de te Me ngbü eto fü a ne. Angü dela ngü te ngbü eto tadu fü a. Zu ngü te a ngbü emere ne, yi wu ta kpah kpo, gbü ngbüngbü ka-a esüka yi de kpala ne. ¹³⁻¹⁴ Ngü de te a ba tima fü yi ne, ngü ngbüngbü 'basu 'basu nda de. A ngbü emala ngü fü yi mbölö mbölö, baka te yi ngbü ewu, da eje ngü ngbüngbü na ereke areke ne. Ah le de yi fi ngü ne mbi mbi. Te yi wu ngü ka-a mbi mbi la de la, ah le de ngü ka-a ri gbü nzö yi, teka fü yi ao fingangü ka-ya yi tete. Te yi mere bala la, ngü ka-a ena ato tadu fü yi, kpah baka te ngü ka-ya ena ato tadu fü a te gara, gbü sikipi te Miri Yesu ena adu akoro tete.

¹⁵ Ma wu ngü la eyi, fü ra adu ao ta gbü fingangü ka-ra, gü ba, "Ma ena akoro aceka yi te engu gina, o ra nü agbü Makedoniya la de, teka de yi maka tadu du 'basu." ¹⁶ Angü ma fi ta, gü ba, "Te ma ena ayia agbü Asiya, da enü agbü Makedoniya la, ma ena afü kpuru to kpaka yi sela. Kpah bala, gbü dudu ka-ra agbü Makedoniya, ma ena afü adu kpah kpuru kpaka yi sela, teka de yi le ta-ngü te ra, teka nünü ka-ra agbü Yudaya." ¹⁷ Amba, baka te ma koro eyi agbü Makedoniya, ma fü kpuru kpaka yi de ne, ngü la gbü jia yi esiti? Yi ngbü efi, gü ba, ma de mürü

mani, te ma ngbü emala ngü efüfü afüfü? Ah bala de!

¹⁸ Wü di engu wüna, ma mala ngü fü yi 'basu 'basu nda-ra de. Ngü te ma mala fü yi de bala ne, ah de zu ngü, te Me wu kpo. ¹⁹ Angü ngü ka Yesu Kurisito, Ye Me, te a ngbü emala fü yi ake Sila bete Timoteyo ne, ah de ngü 'basu 'basu nda de. Ah ka-ye zu ngü ka Me biringbö. ²⁰ Angü mere bi züka ngü ta te Me mala gügü, gü ba, "Ni ena amere fü wü kpara ka-ni ne," wü ngü la 'buru, nih maka eyi, teka ngü ka Yesu Kurisito. Te di bala, nih ngbü egbo nga iri Me, teka ngü ka Yesu. Fü nih angbü kpah emala, gü ba, "Ah di bala," teka iri Yesu. ²¹ Me fe nih de nih ma 'buru me-ye, ao wü kpara ka-ye tete, teka ngü ka Yesu Kurisito. Fü ah ayia ato wazi fü nih, teka de nih rü kpekpeke gbü tima ka-ye la. ²² Me wa kpah tere eyi eküte nih, te ena adi esere nih, gü ba, nih de wü kpara kaka. Angü ah tima *Nzila Wazi ye, akoro angbü emaguma nih, baka gina takpa ka *küküwa, te Me ena ato te gara fü nih agbü sü ka-ye agbü kpi ne.

²³ Wü di engu wüna, ma su wu de. Me wu ngü la kpo. Si-ngü de te ma koro tete kpaka yi la de ne, ah teka te ma je nga *siti ngü ka-ya. Ngü de te ma je la, ah ke te-ra fa sü. Fü maguma ra ayia agürü. Fü ra ayia awu fanü, gü ba, te ma ena akoro ta kpaka yi kere sidi nga ngü la, de bane ma ena aro mö fü yi kpekpeke, fü ngü la ato cinga fü yi. Te di bala, fü ra ayia afi, gü ba, ma ti anü kpaka yi la de. Ah le de ma ba ngü la, tima fü yi bü gbü köcökpa. ²⁴ Yi ngbü efi, gü ba, a le ao te-a baka wü mere kpara, teka angbü gbü nzö ani de wazi? Ah bala de. A le ari yi, da eto wazi fü yi, teka de yi di engbü de mere tadu, angü a wu eyi, gü ba, yi to maguma yi eyi fü Yesu Kurisito fanü fanü.

2

¹ Gbü gara kokoro ka-ra ta kpaka yi ne, ma mala ta ngü fü yi kpekpeke, te to mere cinga emaguma yi fa sü. Kpah bala, ngü la du to mere cinga te ra kpah fa sü. Teku ngü la, fü ra adu afi, gü ba, ma ti adu anü kpala, ato gara cinga emaguma yi bala, nda-ra de. ² Angü te ma to cinga emaguma yi bala la, kpara te ena adu ato tadu te ra neh da? Ah ena adi kpah bü de yi, de te ma ena ato cinga emaguma yi ne, de? ³ Dela si-ngü te ma ba ta köcökpa fü yi, de riri kpekpeke, teka de yi ce ngü la, tete na ne. Ma mere ngü la kükürü de, angü te ma ena adu akoro kpaka yi kpala la, nih ena angbü de mere tadu de nih ma, ma ti angbü de cinga tine de. ⁴ Ngü ta te ma ba fü yi la, ah ke te ra cu fa sü, baka te maguma ra ena akolo akolo la. Ma ba

ngü la cu de ngura gbü jia ra. Ma le ta ato cinga fü yi de, amba ma ba ngü la bala, kükürü de, angü ma le yi cu de maguma ra 'buru.

Dene ngü teka kpara de te mere siti ngü

⁵ Wü di engä wüna, kpara te mere *siti ngü la, to cinga eyi fere fanü. Amba ma wu eyi, gü ba, ah to kpah mere cinga eyi fü yi 'buru. Ma le amala ngü kaka kpekpeke fa sü de. ⁶ Ma ba ta ngü fü yi, gü ba, ah le de yi to kuru tete. Fü mere bi yi ale ngü la. Amba titine kuru te yi to tete ne, ah ti la eyi bala. ⁷ Angü titine engu fü ngü ka-ye eyi, du ngbü engbü de cinga. Te di bala, yi mere e ato gara cinga fefe tine de. Ah le de yi boro siti ngü kaka-na, fü yi adu ato wazi fefe na, angü engu ena akpi ka fingangü. ⁸ Titine, ma ngbü enda'ba te-ra fü yi. Ah le de yi du sere fefe, gü ba, ani ngbü ele engu cu de maguma ani fanü fanü. ⁹ Si-ngü ta te ma ba ngü la fü yi, gü ba, yi to kuru fefe tete ne, ah dene. Ma le ta are fingangü ka-yi, anga yi ti eyi amere wü riri, ta te ma mala fü yi ne, fanü? ¹⁰⁻¹¹ Te di bala, ah reke fa sü, te yi ena adu aboro siti ngü kaka. Angü, te yi boro siti ngü kaka-na eyi la, ma ena aboro siti ngü kaka kpah aboro fanü. Amba ndara, teka mene siti ngü de te engu mere fere ne, Yesu Kurisito wu eyi, gü ba, ma boro siti ngü kaka la eyi gügü. Ma mere ngü la bala, teka de ngü la to wazi fü yi, angü *Satana ena amaka wazi, fü ah asiti tima ka-nih. Nih ce ngü ka makpü, de siti maguma asidi, angü nih wu kpo, gü ba, ngü ka makpü la, ah de mani ka Satana!

Dene fingangü te mere ra agbü Türüwa

¹² Ma ba ta köcökpa de kpeke riri gbü ye, teka *siti ngü la eyi, fü ra atima fü yi esaka engä ni nih, Tito. Fü ngü ka köcökpa la ato mere bi fingangü gbü nzö ra. Sidi nga ngü la mba ce, fü ra ayia gbü Efeso, anü agbü Türüwa, teka amala ngü ka Yesu Kurisito fü wü kpara de kpala. Fanü, fü ra amaka mere bi züka ngü kpala, angü Me ü kaje fere me-ye, teka amere tima la tete kpala. ¹³ Ma ngbü efi ta, gü ba, te ma ena akoro kpala la, ma ena amaka Tito kpala, de lügü-ngü ka-yi. Amba ma maka engu nda-ra de. Fü maguma ra angbü de mere cinga teka ngü la. Te di bala, fü ra ayia ato mandí fü wü *kpara ka Yesu Kurisito, de agbü Türüwa la, ayia anü sü ka-ra agbü Makedoniya, teka agiri Tito. Fü Tito akoro amaka ra kpala.* Fü ah ayia amala nga wü züka ngü ka-yi la fere, gü ba, "Yi fü maguma yi eyi, du ce siti ngü la." Te ma je ngü la, fü maguma ra adu agu.

Dene ngü teka wazi Yesu Kurisito

¹⁴ Nih gbo nga iri Me! Angü engu de mere kpara te ngbü eti engagira nü fü nih, teka ngü ka Miri Yesu Kurisito, baka mere kpara ka nzö-gü, te ngbü eliki wü vügü ka-ye. Me ngbü ebaya ngü ka Yesu te komö a, te wü sü 'buru, baka züka se e, te ngbü egba sü me-ye la. ¹⁵ Angü ngü ka-a, te a ngbü emala teka Yesu Kurisito ne, ah ngbü efu baka züka se e gbü gü Me. Wü kpara te Me küwa ewü eyi ne, ngbü eje züka se e la me-wü de tadu. Mene wü kpara, te wüh düri eyi te kaje ka Me ne, wüh ngbü kpah eje se e la. ¹⁶ Amba ngü ka Yesu, te a ngbü emala ne, du ngbü efu gbü gü ewü ba se kövö la, angü wüh le ngü la nda-wü de. Te di bala, Me ena aza ewü te gara, agü agbü wa. Amba fü mene ewü te Me küwa ewü eyi ne, ngü ka-a ngbü fü ewü baka züka se e, te ngbü eküwa ewü. Angü ngari Me ngbü eküwa mene wü kpara te ewü le ngü la, amba mene wü kpara te ewü le ngü la de ne, wüh ena akpi. Te di bala, ah le de Me to wazi fü a teka tima ka Yesu la, angü a ti amere tima la de tete-a nda-a de! ¹⁷ Wü gara kpara ngbü efi nda-wü, gü ba, ngü ka Me de e, te wüh ngbü emaka jase gbügbü. Amba nda-a ngü, ah bala nda de. Me fe a me-ye, o ba wü *mürü tima ka Yesu Kurisito. Te di bala, a ngbü erü engagira Me, teka adi emala zu ngü kaka fü wü kpara, de maguma a biringbö.

3

Dene ngü teka tima te Me to fü a

¹ Ngü de te a ba fü yi, teka tima te Me to fü a ne, ah gbü jia yi baka te a ngbü egbo nga a? Yi wu de, gü ba, Me tima a me-ye? Fingangü ka-yi gü ba, ah le de a koro kpaka yi de köcökpa, te ena asere züka ngü ka-a fü yi, baka te wü gara kpara ngbü emere ne? Anga ah ena adi de köcökpa, te yi ena aba me-yi, teka asere züka ngü ka-a fü wü kpara? Ah bala de! ² Yi me-yi de köcökpa, te ena asere ngü ka-a fü wü kpara. Angü wü kpara 'buru ti eyi awu, gü ba, yi je ngü ka Yesu eyi gömö a, fü yi afü maguma yi, adu angbü emere wü ngü te ngbü ereke gbü jia Me. Te di bala, wü kpara 'buru ena awu züka ngü ka-a eküte yi, gü ba, a de wü *mürü tima ka Yesu fanü. ³ Wü kpara 'buru ena angbü eceka yi baka köcökpa, te Yesu Kurisito ba cu me-ye, teka tima ka-a ne. Angü, ta te yi le ngü ka Yesu gömö a ne, Yesu tima *Nzila Wazi Me fü yi, teka afü maguma yi, ato wazi fü yi, de yi di emere züka ngü ka Me di.

* 2:13 2:13 Mü ena amaka ngü ka Tito te maka Pawülü gbü Makedoniya ne gbü 2 Korinoto 7:5-6.

⁴ A mala ngü la bala kükürü de, angü a wu reke cu areke, gü ba, Me fe a me-ye, fü ah ato wazi fü a, teka amere tima ka-ye la di, teka ngü ka Yesu Kurisito. ⁵ Amba a ti amala, gü ba, a ngbü emere tima ka Me ne gbü wazi ka-ne, de. Me ngbü eto wazi la fü a me-ye, teka amere tima ka-ye ne di. ⁶ Angü, teka ngü ka Yesu Kurisito, Me du reke to kaje fü nih, wü kpara ka-ye, teka fü nih aküwa tete. Fü engu adu ao a wü mürü tima ka-ye tete, teka de a di emala ngü kani la fü wü kpara. Ta gügü, te Me nzö *ngüte de wü di enga *Yisaraye ne, Me to ta *Riri ka-ye gömö *Müse. Fü Müse ayia aba ngü la eküte fara da.* Amba to kaje, te Me ü fü nih ne, ah ka-ye kpikpi ye. Ah de ngü ka Riri, te wüh ba aba ne, nda de. Ah ka-ye de ngü ka Nzila Wazi Me, te Me o emaguma nih. Baka te wü di enga Yisaraye te ti amere Riri, ta te Müse ba ne, mbi mbi de ne, fü ngü la adu ato kpi fü ewü. Amba Nzila Wazi Me ngbü nda-ye eküwa kpara fi mere badi.

⁷ Me fe ta Müse teka amala nga gina Riri ka-ye la fü wü di enga Yisaraye. Gina Riri la ti aküwa kpara nda de. Amba gbü sikipi ta te Müse to Riri la fü wü di enga Yisaraye tete, fü Me ato mere wazi ka-ye fefe fanü fanü. Angü gbüra Müse kpo ta eci ka wazi ka Me la. Te di bala, wü di enga Yisaraye ti ta aceka gbüra Müse mbi mbi de. Tine, sidi nga ngü la mba cükü'daye, fü e la adu anza.† ⁸ Amba nda-a, wazi te Me to fü a, teka amala to ngü ka *küküwa ka Nzila Wazi Me fü yi di ne, wazi la ena afa nda gina Riri ka Müse la ka. ⁹ Wayi, gina Riri la de züka ngü fanü, amba kpara, te ti amere wü Riri la 'buru areke areke ne, nda ma. Te di bala, Me ena ato kuru te wü kpara, teka ngü ka Riri ka-ye, te ewü le amere de ne. Amba to ngü te Nzila Wazi Me ngbü emere emaguma nih ne, du ngbü ereke nih gbü jia Me me-ye. Te di bala, wazi ngü ka Yesu ka-ye kpekpeke fa nda gina Riri la ka! ¹⁰⁻¹¹ Ta gügü ne, gina Riri la ngbü de wazi ye, angü Me to ta me-ye. Amba enatikine, wazi Riri la nza eyi, teka to ngü ka Yesu, te ngbü eküwa nih fi mere badi ne. Angü ngü ka Yesu ti anza nda de.

¹² Tekan ngü la, a kpe cürü nda-a de. Fü a angbü emala ngari Yesu fü wü kpara 'buru ngbaa ngbaa ngbaa ne! Angü a wu eyi, gü ba, tima ka Yesu ti anza nda de. ¹³ Amba a baka Müse nda-a de. Angü ta te gbüra Müse ngbü eci tete ne, wü di enga Yisaraye ngbü ta ekpe cürü. Fü Müse ayia ai gbüra ye, ani de bongo. Amba gbüra Müse la ngbü ta fi bü eci aci bala

ne nda de. Ah kpara baka wazi diri Riri ka Me, te ngbü fi badi nda de ne. ¹⁴ Amba wü di enga Yisaraye je si-ngü gbü diri Riri la mbi mbi nda-wü de. Kükürü de, angü nzö ewü ta kpekpeke, ngü ka Me ri gbü nzö ewü de. Akoro enatikine dene, te wüh tanga ngü gbü Gina *Ngü Mürü ka Me la, ah ge baka te wüh ni jia ewü de bongo, baka nda Müse tane. Tekan ngü la, si-ngü gbü Gina Ngü Mürü, te wüh ngbü etanga la, ah ti ari gbü nzö ewü nda de. Amba mene kpara te to maguma ye fü Yesu, Yesu ena afuru e, te ni jijia baka bongo la, asidi. ¹⁵ Enatikine, te wü di enga Yisaraye tanga Riri, ta te Me tima gömö Müse ne, si-ngü la ri gbü nzö ewü nda la fi de. ¹⁶ Amba mene kpara te fü maguma ye, du le ngü ka Miri Yesu, Me ena afuru e gbü jijia baka bongo la, asidi, teka fü kpara la awu si-ngü gbü Riri ka Me areke areke, gü ba, ngü te ena aküwa nih, ah 'duwa de ngü ka Yesu. ¹⁷ Angü te mü to maguma mü fü Miri Yesu, *Nzila Wazi Me ena ari emaguma mü, fü ah afuru ku ka *siti ngü, de te i mü ne, asidi. ¹⁸ Te di bala, nih, de te nih to maguma nih eyi fü Yesu ne, nih ti eyi awu wazi Me gbü ngü ka Yesu, angü wüh furu e, te ni jia nih baka bongo, ne eyi asidi. Kpara bala, Nzila Wazi Me ngbü fi bü emere tima emaguma nih, teka fü nih angbü emere wü züka ngü baka nda Yesu. Te di bala, wü kpara ti eyi awu ngü ka Me eküte nih.

4

Dene ngü ka wazi ka Me te di emaguma a

¹ Wü di enga wüna, Me to tima ka mamala ngari Yesu ne, fü a me-ye, teka *züka maguma ye. Te di bala, kpara ti ace tima la nda-a de. ² A to te-a eyi 'buru teka amere tima la areke areke. Wü mani te wü kpara ngbü emere esalakumu ne, a le adi emere ngü la nda-a de. A le adi efiti wü kpara kpara de. A su wu, da efüfü ngü ka Me nda-a kpara de. A ngbü emala zu ngari Me fü wü kpara mbölo mbölo. Te di bala, wü kpara 'buru ena awu, gü ba, a ngbü emere zu ngü, te reke areke gbü jia Me.

³ Fanü fanü, wü gara kpara ladü, te ewü je si-ngü gbü ngü ka Yesu Kurisito, de te a ngbü emala fü ewü ne, de. Si-ngü la wo te-ye fü ewü awo, angü wüh düri te kaje ka Me eyi asidi. ⁴ Wüh ti aje si-ngü ka Me de, angü *Satana ni fingangü ka-ewü eyi. Satana ka-ye de siti miri, te ngbü gbü nzö wü kpara füh kotó ne. Te di bala, Satana le de wü kpara je ngü ka *küküwa

* 3:6 Mü ena amaka ngü la gbü buku ka Gogo ka wü Yisaraye 34:27-28. † 3:7 Mü ena amaka ngü la gbü buku ka Gogo ka wü Yisaraye 34:29-35.

guvu Yesu ne, kpo fi de. Angü Yesu de *E-küwa-nih, ah kpah de Ye Me, te ngbü esere ngü ka Me fü wü kpara. ⁵ Fanü fanü, ngü te a ngbü emala fü wü kpara ne, ah de ngü ka-a nda de. Ah de ngü ka Yesu Kurisito, angü engu de Miri ka-nih 'buru. Amba nda-a, a ka-a bü wü kpara ka tima ka-yi, gbü ngü ka Yesu. ⁶ Ta gügü, te Me ngbü eo kotö ne tete, sü ngbü 'buru mbiri! Fü Me ayia amala ngü, gü ba, "Sü lofo elofu." Fü sü ayia alofo, raaa!* Enatikine Me lofo sü emaguma nih kpah eyi bala, teka fü nih awu ngü ka-ni, Me, areke areke. Angü wazi ka Me, te Yesu Kurisito sere fü nih ne, ngbü eyi elofu sü baka ra. Dela si-ngü te a ngbü emala ngü ka Me tete fü wü kpara.

⁷ Angü, fanü fanü, tima de te Me to fü a ne, ah de mere kpeke tima. Amba wazi a teka tima la nda ma. A ka-a bü kükürü e, baka fara sila, te Me wo mere kpeke wazi ka-ye gbügbü na. Me mere ngü la bala, teka de wü kpara 'buru wu mere wazi kani, Me, tete. Angü wazi a nda ma. ⁸ Mere bi wü ngü ladü, te ngbü emere a te nga wü sikipi 'buru. Amba wü ngü la fa a nda-wü de, teka wazi Me, de te engu ngbü eto fü a ne. Gbü wü gara sikipi, a wu zu ngü de te a ena amere ne nda-a de, amba ngü la kolo maguma a nda de. ⁹ Wü vügü ka-a fa sü, amba Me ce a kpi kpi a nda de, engu ladü te ngbü fi ele ta-ngü te a. ⁸ Wü vügü ka-a ngbü eto mere cinga te a, amba a kpi gbü ngü la nda-a de. ¹⁰⁻¹¹ Gbü wü sikipi 'buru, a ngbü eto te-a fü kpi baka nda Yesu Kurisito, teka asere fü wü kpara, gü ba, Yesu Kurisito zükü gbü kpi eyi fanü. ¹² Nda-a, wü *mürü tima ka Yesu, te nga wü sikipi 'buru, wü vügü ngbü egiri kaje teka amörö a. Amba nda-yi, wü kpara ka Korinoto, ngü la ena aküwa yi fi mere badi.

¹³ Ah kpah baka ngü de te wüh ba gbü *Ngari Me, gü ba, "Ma ngbü emala ngari Me fü wü kpara ne, angü ma to maguma ra eyi fefe na."† Kpah bala, a ngbü emala Ngari Me fü wü kpara ne, angü a to maguma a eyi fefe na. ¹⁴ A wu eyi, gü ba, Me zükü Miri Yesu eyi gbü kpi. Kpah bala, Me ena azükü a gbü kpi, teka ngü ka Yesu. Fü engu adu aza nih de nih ma 'buru, ago di kpaka ye agbü kpi. ¹⁵ Wü ngü 'buru te ngbü embü a ne, a ngbü ece te-a gbü wü ngü la, teka ngü ka-yi, de yi je ngü ka Me. Kpah bala, ah le de ngü ka Me abaya füh kotö ne 'buru, fü Me aküwa mere bi wü kpara teka *züka maguma ye la. Te di bala, wü kpara ena adu da egbo nga iri Me 'duwa ba-neh-ene-la.

¹⁶ Dela si-ngü te a ngbü erü di kpekepeke gbü tima ka Me. Angü a wu eyi, gü ba,

wazi küte a ngbü enza ka-ye anza, amba Me ngbü eto wazi ka-ye emaguma a, te nga wü sikipi 'buru. ¹⁷ Wü ngü te ngbü embü a füh kotö sene ne, ka-wü mba wü jürü ngü kükürü, wüh de kpeke ngü nda-wü de, wüh ena anza ka-wü anza. Amba ngü la ena aü kaje fü a, teka fü a angbü kpaka Me agbü kpi, fi mere badi. Angü züka ngü de agba Me la ena afa wü ngü de füh kotö ne 'buru. Ngü la ti anza de. ¹⁸ Nih mere e ao to nih, teka wü ngü ka kotö ne, de. Ah le de nih o to nih, teka ngü ka Me agbü kpi. Kükürü de, angü wü ngü ka kotö ne ena anza, amba ngü ka Me ti anza nda kü de.

5

¹ Fanü fanü, küte nih, de te nih ngbü engbü di füh kotö ne, ah ka-ye kükürü e baka gugu, te wüh ji mba teka sikipi 'dongoni, fü ah adu amürü ka-ye. Amba nih wu eyi, gü ba, ngü ka küte nih la ena anza ka-ye anza, fü Me adu ato to küte fü nih, te di baka to kambü, de te engu reke fü nih agbü kpi, te ti anza tine de. ² Füh kotö sene, nih ngbü engbü de cinga emaguma nih, angü nih ngbü ele de Me to to küte la fü nih. ³ Me ena ato to küte la fü nih baka to bongo. Te di bala, kuru nih ti angbü kükürü tine de. ⁴ Enatikine nih ngbü la fi engbü gbü diri küte nih, te di baka gugu ne, da emaka cinga de mere bi fingangü. Ah baka te nih le, de kuru nih ngbü kükürü ne, ah bala de. Nih ngbü ele ta de Me to to küte, baka nda wü kpara agbü kpi ne, fü nih. Kpah bala, nih ngbü ele de Me fü siti töndö küte, te ngbü e kpi akpi ne, gbü züka to küte, te ena aküwa fi mere badi agbü kpi. ⁵ Angü Me reke nih, teka *küküwa la, ka-ye me-ye. Fü engu adu ao *Nzila Wazi ye emaguma nih, baka gina takpa, te nih ngbü eo maguma nih tete, teka *küküwa, te Me ena ato fü nih kpa gbü kpi de kpala ne.

⁶⁻⁷ Te di bala, nih ngbü erü fi bü kpekepeke, maguma nih gürü de. Angü nih ngbü fi bü eo jia nih eküte Miri Yesu. Amba, baka te nih ngbü la füh kotö ne, nih ti awu engu de jia nih la de. ⁸ Nih ngbü erü fi bü kpekepeke, angü mere fingangü ka-nih titine, ah teka ace küte nih ka kotö ne, teka anü angbü kpaka Miri Yesu agbü kpi kpala. ⁹ Te di bala, te nih la ladü füh kotö sene, angü sikipi ka-nih ena ati, fü nih ago angbü agbü kpi kpaka Miri Yesu la, ah le fü nih adi emere fi bü züka ngü, te ngbü ereke gbü jia Miri Yesu. ¹⁰ Tekane de, angü te gara nih ena akoro 'buru, arü engagira Miri Yesu Kurisito, teka fü engu aye süka ngü ka-nih biri biri 'buru.

* 4:6 4:6 Mü ena amaka ngü la gbü Gina Ngü 1:3. † 4:13 4:13 Mü ena amaka ngü la gbü Ci ka wü Davidi 116:10.

Fü nih adu amaka na wü ngü ka-nih, de te nih ngbü emere füh kotö de sene ne, te ah de züka ngü, anga siti ngü.

Dene kaje te Me reke ngü di esüka nih de wü ye

¹¹ Wü di enga wüna, a ngbü engbü de cürü Miri Yesu emagama a. Tekä ngü la, fü a ato te-a, angbü emala ngü ka Yesu fü wü kpara, de wüh fü maguma wü. Ngü de te a ngbü emere ne, ah de zu ngü. A ti afiti ewü de, angü Me wu ngü de emagama a ne kpo. Ah le de yi wu ngü ka-a kphah awu reke areke, gü ba, a ngbü emere zu ngü. ¹² A mala ngü la bala, teka agbo nga a di ne, nda-a de! Amba wü gara kpara latü esüka yi, te ewü le nda-wü bü teka adi esere te-wü, gbü jia wü bu wü baka wü kpeke kpara. Wü kpara la ngbü efala a afala. Te di bala, ah le de yi wu zu ngü ka Me, te di emagama a ne, teka fü yi awu züka ngü, te yi ena alügü fü wü kpara la, teka ngü ka-a la. ¹³ Wü gara kpara ngbü emala, gü ba, a de wü mürü maröfö. Yi ngbü efi kphah bala? Anga yi ngbü efi, gü ba, nzö a ka-ye mbi? Ngü mal! Amba, ah le de yi wu, gü ba, wü ngü 'buru te a ngbü emere ne, ah teka ngü ka Me, ah kphah teka ngü ka-yi. ¹⁴ Mere kpeke tima ka Me, te a ngbü emere ne, a ngbü emere, neh teka ne? A ngbü emere tima la kükürü de, angü a wu eyi, gü ba, Yesu Kurisito le nih eyi, de maguma ye 'buru. A wu kphah eyi, gü ba, Yesu Kurisito kpi teka nih 'buru. Te di bala, ah kphah baka te nih kpi eyi tundu de wü Yesu Kurisito. ¹⁵ Yesu Kurisito kpi teka aküwa wü kpara 'buru. Te di bala, de nih, te nih küwa eyi ne, nih mere e ao to nih teka ngü ka-nih tine de. Ah le de nih o to nih teka ngü ka Yesu Kurisito, angü engu kpi tungü nih, fü Me ayia azükü engu gbü kpi la.

¹⁶ Dela ngü enatikine, te a le afi nga wü kpara, teka wü ngü, te ewü ngbü emere gbü jia wü bu wü, ne nda-a de. A ngbü efi 'duwa nga ngü te di emagama ewü. Ta gügü, o ra le ngü ka Yesu la de ne, ma ngbü ta efi nga Yesu Kurisito baka kpara füh kotö sene. Amba titine ma wu eyi, gü ba, engu de Ye Me. ¹⁷ Wü di enga wüna, te yi lala eküte Miri Yesu Kurisito la, Me ena afü yi de wü ngü ka-yi 'buru toto, fü yi angbü to kpara. Diri wü ngü, ta te yi ngbü emere ne, nza eyi! ¹⁸ Me mere wü ngü ne 'buru me-ye, angü engu tima Yesu Kurisito, teka akoro, areke ngü ezungba nih de wü ye. Fü ah ayia ato tima ne fü a, gü ba, a di emala ngü ka *küküwa ne, fü wü kpara 'buru. ¹⁹ Angü Me le me-ye, teka areke ngü ezungba nih de wü ye. Tekä ngü la, fü engu atima

Yesu Kurisito füh kotö ne. Te di bala, te nih le ngü ka Yesu eyi la, Me ena aboro wü *siti ngü ka-nih 'buru. Tekä ngü la, fü ah adu ato tima ne fü a, teka de a di emala nga züka ngü ne fü wü kpara 'buru. ²⁰ Baka te a ngbü emala ngü ka Yesu Kurisito fü wü kpara ne, Me ngbü ero mö cu me-ye gömö a. Dela si-ngü te a ngbü enda'ba te-a di fü wü kpara, gü ba, ah le de wüh le ngü ka Yesu Kurisito de maguma wü 'buru. Kükürü de, angü engu reke ngü eyi ezungba wü kpara de wü Me. ²¹ Fanü fanü, Yesu Kurisito mere siti ngü ta 'buru 'buru nda de. Amba teka ngü ka-nih, fü Me ayia ato kuru fü Yesu Kurisito, baka siti kpara, da nih, teka de ngü ka-nih du reke gbü jia ni, Me, teka ngü ka Yesu.

6

¹ Wü di enga wüna, a de wü kpara, te a ngbü emere tima tundu de wü Me. Te di bala, a ngbü enda'ba te-a fü yi, gü ba, "Ah le de yi to maguma yi 'buru fü Me, angü ah küwa yi eyi de *züka maguma ye. Yi mere e aceka ngü ka Me, gbü jia yi baka töndö ngü kükürü, ne de." ² Angü Me mala ta ngü fü mürü dofo *Yisaya, gü ba, "Ni je gba ka-ye eyi, fü ni ayia aküwa ye, angü züka sikipi, te ni, Me, fe, teka aküwa wü kpara gbügbü na ne, koro eyi."*

Wü di enga wüna, ma ngbü emala, fü yi, gü ba, sikipi te Me fe, teka aküwa wü kpara ka-ye gbügbü ne, ah koro eyi enatikine dene! Yi mere e aci nga gara sikipi de!

Dene ngü ka cinga te a ngbü ezü gbü tima ka Yesu

³ Wü di enga wüna, baka te Me to mere kpeke tima ka-ye fü a ne, a ngbü eo to a teka adi emere wü ngü la 'buru ereke areke. Angü, te a ngbü emere ngü, te ngbü etiri kaje ka Me fü wü kpara, fü ewü adi esiti iri Me teka ngü ka-a la, ah ena adi de siti ngü. ⁴ Te di bala, gbü wü ngü 'buru te a ngbü emere ne, a ngbü egiri kaje, te a ena adi esere fü wü kpara fanü fanü, gü ba, a zu de wü *mürü tima ka Me. Te wü vügü ka-a ngbü eto cinga te a, anga wü gara kpeke ngü ngbü emaka a la, a ngbü ei maguma a ai, da erü kpekpeke. ⁵ Te wüh süma a de juru, anga wüh gü a gbü ku, anga mere bi wü kpara biti te-wü teka ami a la, a kpe cürü nda-a de, a ngbü erü fi bü kpekpeke. Te a maka kaje, te a ena azü e tete na, de la, a fi kphah de. Kphah bala, teka mere bi wü tima, te a ngbü emere ne, te ra zoro jia a kphah de la, a fi nda-a kphah de. ⁶ A ngbü engbü ka-a *nzila. A ngbü kphah eo fingangü ka-a,

* 6:2 6:2 Mü ena amaka ngü la gbü buku ka Yisaya 49:8.

teka adi ewu zu ngü ka Me ereke areke. Maguma a nzu te wü kpara nda de, angü *Nzila Wazi Me ngbü eto wazi fü a, de a di ele wü kpara, de maguma a biringbö. ⁷ A ngbü emala zu ngü ka Me fü wü kpara, angü Me ngbü eto wazi la fü a me-ye. A ngbü eo to a 'buru, teka adi emere wü ngü, te ena areke gbü jia Me. Te di bala, züka ngbüngbü ka-a la ngbü fü a baka dü, teka agü gü di ake *Satana. Kpah bala, Satana ti afa wazi a nda de. ⁸ Wü gara kpara ngbü egbo nga a, wü gara kpara ngbü nda-wü efala a, da esoko a. Wü gara kpara ngbü emala züka ngü tüngü a, wü gara kpara ngbü nda-wü fi bü esiti iri a, gü ba, "A ngbü esu wu." Amba ngü de te a ngbü emala fü wü kpara ne, ah ka-ye de zu ngü ka Me. ⁹ Wü gara kpara gü ba, "A de töndö wü kpara," amba Me wu a ka-ye kpo, gü ba, "A de kpeke wü kpara ka-ni." Wazi a ngbü enza, amba a kpi nda-a de, angü Me ngbü fi bü da eto wazi fü a. Wü kpara gü ba, "Me ngbü eto kuru te a," amba Me ngbü ka-ye eküwa a me-ye. ¹⁰ Fanü fanü, a ngbü engbü de cinga, amba Me ngbü fi bü eto tadu emaguma a me-ye. Wü kpara ngbü eceka a, baka te e di esaka a ma, amba a ngbü eto züka ngü ka Me fü wü kpara. Wayi, füh kotö sene, e esaka a nda ngbü ma fanü, amba züka ngü ka Me agbü kpi la, ka-ye 'buru nda-a.

¹¹ De-yi, wü kpara ka Korīnito, wü ngü te di emaguma a ne, a mala eyi fü yi 'buru. Angü a le yi eyi de maguma a 'buru. ¹² Yi fi, gü ba, a le ani de? Ah bala de! Amba ah ka-ye de-yi, te yi le a de, me-yi! ¹³ Ma ngbü emala ngü ne fü yi bala, angü yi de wü jaji ka-ra. Wü di enga wüna, ma ngbü enda'ba te-ra fü yi, teka fü yi asere la lele de emaguma yi la, 'buru fü a, kpah baka te a ngbü ele yi ne.

Dene ngü teka wü kpara, te ewü le ngü ka Yesu de

¹⁴ Wü di enga wüna, wü gara kpara ladü, te ewü le ngü ka Yesu nda-wü de. Te di bala, yi mere e alala gbü nga ewü de. Yi ceka la, wü siti ngü ngbü ele te-wü ake züka ngü ale? Ra-sü ti eyi angbü te sü biringbö ake biti? ¹⁵ Yesu Kurisito ti eyi angbü tundu ake *Satana? Kpah bala, nih, wü kpara te nih ra eyi fü Yesu ne, nih ti angbü emere ngü baka wü kpara, te ewü le ngü ka Yesu de ne, nda-nih de! ¹⁶ Te wüh ena aza faranda, akoro di kpa esambü ka Mere Me la, ngü la ena areke te Me fanü? Ngü la ti areke te Me nda de! Wü di enga wüna, nih de wü di Me. Me mala ta

ngü la eyi gügü, gömö wü *mürü dofo ka-ye, gü ba, "De-ni, Me, ni ena akoro angbü tundu de wü kpara ka-ni, fü ni aji gba ni esüka ewü. Ni ena anzö ngüte de ewü, fü ewü angbü zu wü *vüngüte ka-ni fanü."[†] ¹⁷ Tek a ngü la, fü Me adu amala kpah gara ngü fü wü kpara ka-ye la, gü ba, "Ah le de wü yia esüka siti wü kpara la asidi, angü wü kpara la le ngü ka-ni nda-wü de. Wü mere e ari gbü siti ngü ka-ewü la de, teka fü ni adi ewu wü *nzila, baka züka wü kpara ka-ni tete."[‡] ¹⁸ Te di bala, de-ni, Me, ni fü wü baka Wö wü, wü nda-wü baka wü di ni."[§] Dela ngü de te Mere Miri Me mala teka wü kpara ka-ye.

7

¹ Wü di enga wüna, Me mala eyi, gü ba, ni ena amere wü züka ngü la amere fü nih. Te di bala, ah le de nih o to nih 'buru, teka fü nih adi emere wü züka ngü gbü jia Me. Nih mere e amere *siti ngü 'buru 'dö de. Nih to küte nih bete maguma nih 'buru, teka fü nih angbü *nzila, da ecu ngü Me.

Dene ngü teka gina köcökpa ta te ma ba fü yi

² Wü di enga wüna, yi le a de, neh teka ne? Ma ngbü enda'ba te-ra fü yi, gü ba, ah le de yi du, yi di ele a de maguma yi 'buru. A mere siti ngü ta eyi fü gara kpara esüka yi? A fiti ta gara kpara eyi, de ah ce ngü ka Me? A za ta e ka gara kpara eyi gbü zi? A'a! A mere wü ngü ta bala nda-a de! ³ Yi ngbü efi, gü ba, ma ngbü emala ngü la bala, teka ato lümü di te yi, teka te yi ngbü eje wu ka wü kpara, de te ewü ngbü esiti iri ra di ne? Ah bala de! Ah ka-ye baka ngü te ma mala fü yi te enga gina, gü ba, ma le yi de maguma ra 'buru ne. Te ah ena adi de kpi, anga *küküwa la, gara ngü de te ena atiri lele ka-ra kpaka yi, nda ma. ⁴ Ma wu eyi, gü ba, yi de züka wü *kpara ka Yesu Kurisito. Ngü ka-yi ngbü eto tadu fere efa sü, gbü wü cinga 'buru te ngbü emaka a ne. Tek a ngü la, fü ra angbü egbo nga iri yi fü wü bu ra.

⁵ Wü di enga wüna, baka te a koro gbü Makedoniya sene ne, maguma a gu la fi de. Angü wü vügu ka-a ngbü embü a, de bi wü ngü. Kpah bala, ngü ka-yi ngbü fi bü da eto mere fingangü fü a. ⁶ Amba te fele ngü ngbü etoro te nih la, ngü ma. Me ladü, te ngbü eto wazi fü nih. Nda-a, Me to wazi eyi fü a fanü, angü Tito du koro eyi kpaka a. ⁷ Kpah bala, engu mala nga yi eyi fü a, gü ba, yi to wazi eyi fü ni fa sü. Yi ngbü kpah ele teka awu ra. Yi ngbü engbü kpah de cinga, teka *siti wü ngü ta te yi

[†] 6:16 6:16 Mü ena amaka ngü la gbü buku ka Riri ka Gele ka wü Levi 26:11-12, bete Ezekele 37:27. [‡] 6:17 6:17

Mü ena amaka ngü la gbü buku ka Yisaya 52:11. [§] 6:18 6:18 Mü ena amaka ngü la gbü buku ka 2 Samüwele 7:14, bete 1 Ngängü 17:13.

mere. Yi le kpah ato wazi fere, gbü wü ngü te ngbü eto cinga te ra ne. Teka ngü la, fū ra ayia angbü de mere tadu emaguma ra.

⁸ Wü di engä wüna, ma wu eyi, gü ba, köcökpa ta te ma ba fū yi, teka siti ngü te yi mere esüka yi de kpala ne, köcökpa la mere züka ngü eyi. Cinga yi rī ta eyi te ra, teka köcökpa la. Amba cinga ka-yi la yiri ta fa sü nda de. ⁹ Te di bala, ngü ka köcökpa ta te ma ba la, reke te ra fa sü. Ngü te to tadu fere, ah de ngü ka cinga ka-yi nda de. Ma ngbü de tadu kükürü de, angü yi fū maguma yi eyi, du ce *siti ngü, ta te yi ngbü emere ne. Te di bala, cinga ka-yi la, ah de siti ngü nda de. Ah de züka cinga, te ngbü eto tadu fū Me. ¹⁰ Te cinga mere nih teka siti ngü ka-nih la, ah de züka cinga, te ngbü eküwa wü kpara. Angü cinga la ngbü efü maguma nih, fū nih adu ace siti ngü ka-nih. Amba siti cinga kpah ladü, ah de cinga ka fūh kotö ne. Cinga la ngbü eto kpi gbü jia wü kpara, angü wüh le afü maguma wü de. ¹¹ Amba cinga de te mere yi la, ah ka-ye de züka cinga. Yi ngbü ta de cinga teka siti ngü, de te biri kpara esüka yi mere ne. Cinga la fū maguma yi eyi fanü. Enatikine, yi to te-yi eyi, teka areke ngü ka-yi mbi mbi mbi gbü jia Me. Maguma yi ngbü ta enzu, angü yi reke ta ngü la kere la de. Cürü ngbü ta kpah emere yi, teka siti ngü la. Fū gümü ra angbü kpah eke yi. Fū yi ayia areke ngü, ta te di de ezengba nih ne. Teka ngü la, fū yi ayia ato kuru te mene kpara esüka yi, te mere siti ngü ne. Gbü wü ngü la 'buru, ma wu eyi, gü ba, maguma yi, de fingangü ka-yi du koro eyi mbi, reke areke.

¹² Yi ngbü efü, gü ba, ma ba köcökpa, nzö teka arī kpara, te mere siti ngü ne? A'a, ah bala de! Kpah bala, ma ba teka mene kpara, te wüh mere siti ngü fefe ne kpah de. Te di bala, ma ba köcökpa la, neh teka wü da? Ah teka ngü ka-yi, teka de yi sere fanü fanü gbü jia Me, gü ba, ani le a eyi de maguma ani biringbö. ¹³ Te di bala, maguma a gu eyi fanü. Kpah bala, a ngbü de tadu, teka züka ngü te yi mere fū Tito de kpala ne, angü yi to wazi eyi fefe na fanü fanü. ¹⁴ Angü, ta te ma tima Tito tete kpaka yi ne, ma ngbü gbo nga yi fefe na fa 'duwa cu sü. Te yi ena amere züka ngü fefe bala ta de la, de bane ngü la ena ato lümü fere afa sü. Amba wü züka ngü, de te ma mala tüngü yi ne, ah 'buru de ngü fanü, kpah baka wü gara ngü, te ma mala ta fū yi ne. ¹⁵ Tito mala fere, gü ba dene, "Te ni koro kpaka yi kpala ne, yi za ni zu gbü mürü, de maguma yi 'buru. Yi ngbü ecu ngü ni, da ele wü ngü, te ni ngbü emala ne, 'buru ale. Fū ni adu ale yi kpah afa sü, teka züka ngü ka-yi la." ¹⁶ Te di bala,

ma ngbü kpah de tadu, teka züka ngü ka-yi la, angü ma wu eyi, gü ba, yi de kpeke wü kpara fanü fanü, te fingangü ka-ra di kpaka ewü.

8

Dene ngü teka letangü te wü mürü cinga

¹ Wü di engä wüna, ma ngbü esere nga wazi, de te Me to fū wü kpara ka-ye agbü Makedoniya de *züka maguma ye. ² Wüh ngbü engbü kpala gbü mere cinga. Amba Me to wazi fū ewü, fū ewü angbü etüka te-wü gbü cinga la, angbü engbü de tadu te wü, teka ngü ka Yesu. E esaka ewü nda kpah ma. Fū Me adu ato wazi fū ewü gbü cinga la. Fū wü mürü cinga la adu me-wü, ato mere bi jiase, teka ale ta-ngü di te wü bu wü. ³ Ma ngbü emala fū yi dene zu ngü. Wü kpara la, wüh to ta mere bi jiase, fa wazi wü di ka! Wüh to e la bala teka lele emaguma wü. Gara kpara te to riri fū ewü, teka amere ngü la bala ne, ah nda ma. ⁴ Wüh koro ta kpaka a me-wü, ayita a, teka de a to kaje fū ani, de ani tima letangü fū wü kpara ka Me, te ewü ngbü emaka cinga agbü Yudaya. ⁵ Fū ewü adu kpah amere gara ngü, te fa engu dela, angü wüh to te-wü 'buru 'buru fū Miri Yesu. Fū ewü adu ato te-wü teka amere wü ngü te a rī ewü di, baka te Me ngbü ele. Fū ngü ka-ewü la aga gbü jia a 'duwa ba-neh-ene-la.

⁶ Teka nda-yi letangü fū wü mürü cinga la, Tito kpo ta eyi de tima la esüka yi te engä gina. Dela si-ngü de te a tima engu, lügü kpaka yi tete na ne, de ah to wazi fū yi, teka fū yi abiti du jiase, te yi ngbü ero ne, ato esakaka. ⁷ Wü di engä wüna, yi zu de kpeke wü kpara, teka tima ka Me fanü. Yi to maguma yi eyi 'buru fū Yesu Kurisito. Yi ngbü emala ngü ka Me kpah de wazi ereke areke, angü yi wu zu ngü ka Me eyi fanü fanü. Kpah bala, yi to te-yi eyi 'buru, teka amere tima ka Me de maguma yi biringbö. Yi le a kpah eyi de maguma yi 'buru. Te di bala, ah le de yi di ele ta-ngü te wü bu yi, te cinga ngbü emere ewü ne, kpah reke areke.

⁸ Wü di engä wüna, ma le ato riri fū yi, teka ngü ne, nda-ra de. Ma ngbü nda-ra bü emala fū yi, gü ba, wü gara wü bu yi to maguma wü eyi, teka adi ele ta-ngü te wü mürü cinga bala. Te di bala, ma ele awu, anga yi ngbü ngbü ele wü bu yi de maguma yi fanü fanü, baka nda-wü la? ⁹ Yi wu eyi reke areke, gü ba, Miri ka-nih Yesu Kurisito le nih de maguma ye 'buru. Angü wü ngü 'buru ladü esasaka na, fū engu ayia ace ngü la, adu afü te-ye baka

mürü cinga, teka aküwa nih, de nih maka mere bi züka ngü gbü cinga kaka-na la.

¹⁰ Ma ti ato riri fü yi kpekpeke de, amba gbü fingangü ka-ra, ah le de yi mere ngü teka letangü la reke areke, de züka maguma yi. Angü gbü re ta te nza ne, yi de gina wü kpara te yi kpo de fingangü la fi me-yi. ¹¹ Te di bala, ah le de yi nü de tima la de mere tadu, zalü koro di te adu ye, baka ta te yi kpo ngbü emere ne. Yi to takpa la te nga wazi e, te di ladü esaka yi. ¹² Angü, te e be esaka yi de, fü yi ato mba cükü'daye de züka maguma yi la, ngü la ena areke gbü jia Me afa sü. Angü engu wu eyi, gü ba, gara e esaka yi, te yi ena ato afa sü ne, nda ma. ¹³ Yi mere e afi, gü ba, "Ma yia eza cinga ka gara wü bu ani, ao 'buru gbü nzó ani," ne de. ¹⁴ Angü tütine dene, wü e eyi ladü esaka yi fa sü. Ah le de yi le ta-ngü di te wü mürü cinga. Angü te gara, te cinga kpo da emere yi la, wü bu yi ena ale ta-ngü te yi kpah bala. Te di bala, ngü ka-yi ena ati 'buru kpini. ¹⁵ Yi fi la nga ngü, ta te wüh ba gbü *Ngari Me, teka ngü ka wü di enga *Yisaraye, ta te wüh ngbü ero zü-e, te Me ngbü eto fü ewü, agbü gü ne. Ngü la gü ba, "Mene wü kpara, ta te ewü ngbü ero nda-wü zü-e efa sü ne, wüh ngbü ezü e la 'duwa enza anza 'buru, angü wüh ngbü eye süka e la, te nga wü 'buru kpini kpini de wü mürü cinga. Tek a ngü la, mene wü kpara, ta te ewü ngbü ero nda-wü mba cükü'daye ne, fü ewü angbü kpah ezü e, adi esika di ereke areke, teka te wü bu ewü ngbü ele ta-ngü te ewü."* Te di bala, dela ngü te wü kpara ka Me ena adi emere esüka wü.

Dene ngü teka Tito de wü bu ye

¹⁶ Tito de kpara te to te-ye eyi, teka ato wazi fü yi, kpah baka te ma ngbü emere ne. A gbo nga Me cu fa sü teka ngü la, angü Me de kpara te to wazi la fefe na me-ye. ¹⁷ Te a yi-tata na, de engu nü kpaka yi kpala ne, ah le ngü la cu de maguma ye, gü ba, "Dela zü de te ni ngbü ele ne, angü gümü yi ngbü eke ni efa sü."

¹⁸ A ngbü etima ewü ake gara enga ni nih, te wü *kpara ka Yesu 'buru ngbü ecu ngüngü, angü engu ngbü emala ngü ka Yesu fü wü kpara ereke cu efa sü. ¹⁹ Kpah bala, wü kpara ka Yesu de sene 'buru fe engu ta eyi, de a le kaje de ewü, teka aro jiase, de te wüh le ato fü wü mürü cinga ne. A mere tima la kükürü de, a ngbü emere ngü la bala, teka de wü kpara wu, gü ba, a ngbü ele teka ale ta-ngü te wü bu a, cu de maguma a, teka fü ewü adu agbo nga Me teka ngü la. ²⁰⁻²¹ Angü takpa de te wüh to ne, ah fa sü. Te di bala, ah

le de a mere tima la reke areke, gbü jia Miri Yesu, kpah gbü jia wü kpara. Angü wü kpara ena asiti iri a, gü ba, a zü jiase la eyi. ²² A ngbü kpah etima gara kpara, te engu ena anü de mene ewü de 'basu ne. A wu engu reke areke. Engu de kpeke kpara gbü tima ka Me. Engu je nga züka wü ngü, de te yi ngbü emere ne, eyi gömö a. Fü engu ayia ato te-ye 'buru 'buru teka tima la. ²³ Tito nda-ye de kpara te a ngbü emere tima ake di, teka ato wazi fü yi. Tek a wü gara kpara de 'basu, te ewü ngbü enü de wü Tito ne, wü kpara ka Yesu de sene ne fe ewü me-wü, atima kpaka yi. Kükürü de, teka de wü kpara gbo nga iri Yesu Kurisito, teka ngü ka tima la. ²⁴ Te di bala, ah le de yi mere ngü ewü kpala reke areke, de züka maguma, teka de wü kpara ka Yesu Kurisito de kpakine ne, wu, gü ba, ngü te ma ngbü egbo nga yi di fü ani ne, ah de zu ngü fanü fanü.

9

¹⁻² Wü di enga wüna, ma wu reke areke, gü ba, yi ngbü eyi egiri kaje, teka atima letangü fü wü *kpara ka Yesu agbü Yudaya. Te di bala, gara ngü te ma ena ato riri di fü yi, teka ngü la, nda ma. Angü ma kpo eyi emala nga yi fü wü kpara ka Makedoniya, gü ba, de-yi, wü kpara ka Yesu agbü tö ka Akaya de kpala ne, yi kpo eyi ereke te-yi teka tima la, kü gbü re de te nza ne. Te wü kpara ka Makedoniya je ngü la bala, fü mere bi ewü ato te-wü kpah, teka ale ta-ngü te wü kpara ka Yesu agbü Yudaya. ³⁻⁴ Si-ngü de te ma tima wü di enga ni nih ne tete kpaka yi, ah ba e te ma tima ewü de riri fü yi ne nda de. Ma du fi nga ngü la, maka sidi, gü ba, te wü gara kpara ka Makedoniya ena agi ta nga ra kpaka yi, fü ewü akoro awu, gü ba, yi biti jiase la, nza la fi de la, ah ena adi ta de siti ngü. Angü mere bi ngü, te a mala fü ewü tungü yi ne, ah ena adu akoro gbü jia ewü ba töndö ngu kükürü. Fü ngü la adu ato mere siti lümü fü nih de nih ma. ⁵ Fü ra adu afi, gü ba, te ah bala, ah le de ma tima wü gara kpara te enga gina, de ngü la kpaka yi, teka de yi reke te-yi, angbü nzo. Te di bala, gbü sikpi te ma ena akoro tete kpaka yi kpala, yi ena aza jiase la kere, ato baka ta te yi mala te enga gina ne. Kükürü de, teka fü wü kpara 'buru awu, gü ba, yi ngbü eto e la de züka maguma yi.

⁶ Yi fi nga ngü te ma ngbü emala fü yi ne. Te mü sö e, fü mü amoko nguwa gbügbü mba cükü'daye la, mü ena amaka mere bi zü-e gbügbü na? Mü ti amaka de! Amba te mü le amaka mere bi zü-e la, ah le de mü sö e memere, fü mü amoko nguwa

* 8:15 8:15 Mü ena amaka ngü la gbü buku ka Gogo ka wü Yisaraye 16:18.

gbügbü 'buru! ⁷ Teka ngü ka takpa, ah le de yi fi nga ngü la ferrre, de yi to e la, baka te kpara ngbü ele ato. Ah de ngü ka riri nda de. Yi to e la de maguma yi 'basu' basu de. Yi to de tadu, de maguma yi biringbö, teka fü ngü ka-yi areke gbü jia Me. ⁸ Kükürü de, angü Me de mürü wazi. Engu ena alügü na wü e la fü yi cu afa sü. Fü wü e ka-yi adi kpah ezu efa sü. Fü yi amaka wazi, adu angbü ele ta-ngü te wü mürü cinga, gbü wü gara ngü. ⁹ Angü Me mala ta ngü gügü, gömö *mürü dofo ka-ye, gü ba, "Kpara te ngü kaka reke gbü jia ni, Me, ah 'duwa de mene kpara, te ngbü ele ta-ngü te wü mürü cinga, de züka maguma ye ne. Züka ngü kaka-na ti anza de."* ¹⁰ Kpara te ngbü eto nguwa, fü yi adi eru ne, neh da? Anga kpara te ngbü eto wazi fü nguwa la, fü ah adi ega, eri, ekoro zü-e tete fü yi ne, neh da? Ah de Me de? Te di bala, Me ena angbü fi bü da eto mere bi zü-e fü yi, teka fü yi angbü fi bü da ele ta-ngü te wü mürü cinga bala, de züka maguma yi. ¹¹ Angü Me to wü e la fü yi kükürü de. Ah to teka de yi mere tima di. Te di bala, mere bi wü kpara ena agbo nga Me, teka takpa ka-yi, te yi ena atima esaka a ne.

¹²⁻¹³ Takpa de te yi to la, ena ale ta-ngü te wü kpara ka Yesu, de agbü Yudaya ne, cu afa sü. Wüh ena angbü de mere tadu, da egbo nga Me, teka takpa ka-yi la. Kpah bala, tima ka-yi la ena asere fü ewü, gü ba, yi to maguma yi eyi fü Yesu Kurisito fanü fanü, angü yi ngbü eyi emere riri ka Yesu ereke areke. Te di bala, wü kpara la ena agbo kpah nga iri Me, teka letangü ka-yi, te yi to reke areke de züka maguma yi ne. ¹⁴ Kpah bala, wüh ena adu ale yi de maguma wü 'buru. Wüh ena angbü kpah da eyi-ta Me teka ngü ka-yi. Kükürü de, angü Me to wazi eyi fü yi, teka ale ta-ngü di te ewü, de züka maguma yi.

¹⁵ Wayi, nih gbo nga Me, teka züka ngü kaka, te engu to fü nih. Angü engu tima Ye ye baka takpa, de ah koro füh kotó ne, teka aküwa nih. Takpa engu la de mere züka takpa, te fa wü gara takpa 'buru!

10

Dene ngü teka wazi te Yesu Kurisito to fere

¹⁻² Wü di enga wüna, de-ra Pawülü, ma ngbü enda'ba te-ra fü yi, angü yi ngbü emala, gü ba, "Te ma nü sü eyi mba nengete agbü gara sü la, ma ngbü emala ngü fü ani kpekpeke, fü ra angbü etima kpeke wü riri gbü köcökpa fü ani. Amba te

ma ladü tundu de wü ani la, ma ngbü ekpe cürü." Wü di enga wüna, ma le amala ngü fü yi kpekpeke nda-ra de. Ma le amala ngü fü yi ferrre, de gu maguma, baka nda Yesu Kurisito. Te di bala, ma ngbü enda'ba te-ra fü yi, de yi fü fingangü ka-yi afü. Angü te gara, te ma ena adu akoro kpaka yi kpala la, ma ena amala ngü fü yi kpekpeke fanü. Ma wu kpo, gü ba, wü gara kpara ladü esüka yi agbü Korinito kpala, te wüh ngbü emala, gü ba, "Ma ngbü emere tima ka Yesu Kurisito ne, teka de ma maka wü e ka füh kotó ne gbügbü na." Ngü la bala nda de, ah ka-ye de wu! Te wüh ce ngü la de la, wüh ena awu ngü la gbü sikpi te ma ena akoro tete na kpala! ³ Fanü fanü, a ngbü engbü füh kotó sene, kpah baka wü bu a. Amba, tima te a ngbü emere, de wü gü te a ngbü egü ne, ah de ngü ka füh kotó ne nda de, angü a ngbü egü gü la de wü *Satana. ⁴ A ngbü eza wü e ka gü, te Me to fü a ne, teka amere gü la di. Amba wü e la de wü e ka füh kotó ne, baka wü dü, keze bete maguruma ne, nda-wü de. Ah ka-ye de wazi de te Me to fü a, teka afa wazi Satana di ne. ⁵ A ngbü egü gü de wü *siti ngü, te ngbü esiti fingangü ka wü kpara, kpah de ngü ka kögö-nzó, te ngbü etiri ewü, teka de wüh to maguma wü fü Me de ne. A ngbü emere gü de wü siti ngü de bala, teka anza ngü ka-ewü anza 'buru 'buru asidi. Fü a angbü eri wü kpara, teka de wüh ce siti ngü de bala, adu afü maguma wü, ato te-wü 'buru fü Yesu Kurisito. ⁶ A ngbü kpah ele de yi fü maguma yi, adu ara fü Miri Yesu Kurisito. Amba te wü gara yi lala fi bü te ngü ka kögö-nzó la, a kpah de wazi teka ato kuru di te ewü!

⁷ Wü di enga wüna, gara kpara ladü esüka yi, te ena amala, gü ba, "Yesu Kurisito to wazi bü duu fü ni." Ngü la fanü? Ah le de yi fi ngü la reke areke. Te ah bala la, anga de-ra? Ma de kpeke kpara, te Yesu Kurisito to wazi fere me-ye, ne de? Te di bala, ah le de kpara, te ngbü egbo nga ye de bala ne, fi nga ngü la mbi mbi mbi, angü nih 'buru de wü kpara, te Yesu to wazi eyi fü ewü. ⁸ Miri Yesu to wazi eyi fere fanü fanü, amba wazi la ka-ye teka de ma to wazi di fü yi, gbü ngü ka Me. Ah teka fü ra angbü di gbü nzö yi, baka miri, ne nda de. Yi ngbü efi, ga, ma ngbü egbo nga ra teka ngü la? Te ah ena adi kpah bü bala la, ah ba ngü de, angü ma wu eyi, gü ba, ma ti amaka lümü gbü ngü la nda-ra de. ⁹ Yi ngbü efi, gü ba dene, ma ngbü eba wü ngü de bala fü ani, gbü wü köcökpa ne, teka ato cürü di emaguma ani? Ah bala de. ¹⁰ Wü gara kpara esüka

* 9:9 9:9 Mü ena amaka ngü la gbü Ci ka wü Davidi 112:9.

yi ngbü emala, gü ba, “Te ma ngbü eba köcökpa la, ma ngbü eba cögbörö kpeke wü ngü, baka kpeke kpara la. Amba te ma ladü esüka ani la, ma du ngbü baka töndö kpara, te wu da emala ngü mbi mbi de.” Ngü la fanü? ¹¹ Kpara te ngbü emala ngü de bala, ah le de engu fi ngü la afi feke. Ma ngbü emala ngü fü yi kpekepeke, gü ba, ngü te ma ngbü emere, ah nda-ye kpikpi ye fü mene ngü, te ma ngbü eba ne, nda de. Ma ena amere wü ngü la kpah bala, gbü sikipi te ma ena akoro tete na kpaka yi kpala. Fü yi adu awu ngü la.

¹² Wü gara kpara ladü esüka yi kpala, te ewü ngbü efi nga wü, gü ba, “Ani de wü cögbörö kpara, fa wü bu ani ka.” A ti amala fü yi, gü ba, a kpah de cögbörö wü kpara baka ewü la, nda-a de! Ah le de yi fi ngü ka wü kpara la mbi mbi mbi. Ngü te ewü ngbü emere la, ah de zu ngü, te wü kpeke kpara ngbü emere? Ah bala de! Wüh ngbü efi ka-wü bü duu nga wü, teka de ani ngbü gbü jia wü kpara, baka kpeke cögbörö wü kpara. Wüh fi nga ngü ka Me nda-wü de. Dela züka ngü? ¹³ Teka ngü ka-a, a ti agbo nga a me-a nda-a de. A ena agbo 'duwa nga tima, de te Me to fü a ne. Tima la, ah de tima te a ngbü emala ngü ka Yesu Kurisito di fü wü kpara, kpah de wü yi mini! ¹⁴ Te Me ena atima a ta de la, de bane a ti eyi akoro kpaka yi kpala? Amba Me tima a me-ye, fü a ayia akoro ta kpaka yi de kpala, amala ngü ka Yesu Kurisito fü yi, baka te engu mala. ¹⁵ A ti eyi agbo nga a, teka gara tima, te wü gara kpara ngbü emere? Ngü bala ma. A ti ari gbü tima, te Me to fü wü gara kpara, kpo fi de. A ngbü eo jia a fi bü tungü yi, teka fü yi arü kpekepeke gbü ngü ka Yesu, angü a le de yi nü de tima la kpa engagira nü. Dela ngü te ena areke gbü jia Me, angü engu to tima la fü a me-ye. ¹⁶ Te yi koro eyi kpeke wü kpara, gbü tima ka Yesu la, a ena ayia anü amere tima ka-a gbü wü gara sü nengete, gbü sü te wü kpara je ngü ka Miri Yesu tete na la de. Amba te a ce tima de te Me to fü a ne, ayia angbü emere tima ka gara kpara, teka de wü kpara gbo nga a tete na la, dela ka-ye töndö ngü kükürü! ¹⁷ Ah baka ngü ta te wüh ba gbü *Ngari Me gügü, gü ba, “Mü mere e agbo nga mü de tete-mü de. Mü gbo 'duwa nga Me, teka ngü te engu mere fü mü.”* ¹⁸ Me le ngü ka kpara, te ngbü egbo nga ye de tete-ye ne, nda de. Me ngbü ele 'duwa ngü ka mene kpara, te ngbü emere ngü gbü jia ni, Me, 'buru mbi ne.

11

Dene ngü teka wü mürü fiti

¹ Wü di enga wüna, enatikine te ma gbo nga ra fü yi la, ngü la mere e angbü gbü jia yi baka töndö ngü ne de. Kpah bala, maguma yi mere e anzu eküte ra de. ² Angü ma le yi fa sü. Ma baka wö yi, yi nda-yi baka wü di ra, wü mada. Ma reke ngü eyi tungü yi, teka de Miri Yesu se yi wara ye tete. Te di tine eyi bala ne, ah le de yi ngbü *nzila, fü yi ale ngü kaka de maguma yi biringbö. Yi mere e agiri wü gara ngü, anga angbü de maguma yi 'basu 'basu, ne tine de. ³ Ma ngbü de mere bi fingangü teka ngü ka-yi. Angü e-wu neh da, gara kpara ena akoro afti yi, baka mere kpürü, ta te fiti *Awa ne.* Fü yi adu angbü emere ngü ka Yesu, de maguma yi 'basu 'basu. ⁴ Ma mala ngü ne bala kükürü de, angü ma wu eyi, te wü mürü wu la koro kpaka yi, fü ewü akpo da esu wu fü yi la, yi ngbü ele wu ka-ewü la 'duwa bü kere! Amba ngü te wü kpara la ngbü emala, gü ba, ah de ngü ka Yesu ne, ah baka nda-a, de te a mala fü yi gügü ne, nda de. Angü kpara te to wazi la fü ewü, ah de *Nzila Wazi Me nda de. Yi ngbü ele ngü ka wu ka-ewü la, neh teka ne? ⁵ Wü kpara la ngbü emala fü yi, gü ba, “Ani de kpeke wü *mürü tima ka Yesu,” amba ma ngbü emala fü yi, gü ba, ngü ka-ewü ti afa nda-ra nda kü de! ⁶ Wüh ngbü emala, gü ba, “Ma wu da ero mö baka mere kpara nda-ra de.” Ngü la fanü? Amba ma wu eyi, gü ba, ma wu ngü ka Me reke areke. Yi wu ngü la kpah kpo, angü ma sere ngü la fü yi eyi, nda nganga anda!

⁷ Ta te ma ngbü kpa esüka yi de kpala, da emala ngü ka Yesu fü yi ne, ma yi-ta yi teka letangü nda-ra de. Ma mere te-ra ta baka mürü cinga, teka de yi maka wazi, fü yi akoro baka cögbörö wü kpara. Ngü la gbü jia yi esiti? ⁸ Ma ngbü emere ngü la ta bala, teka ato wazi di fü yi gbü ngü ka Me. Amba wü *kpara ka Yesu, de te ewü di gbü wü gara sü ne, wüh ngbü ta ele tangü te ra de jia se me-wü. Ah ge baka te ma to ta cinga te ewü, teka letangü de te ewü to fere, ale ta-ngü di te yi, gbü tima ka Me ne. ⁹⁻¹⁰ Te ma ngbü ta kpaka yi kpala ne, ma yo ta gara e eyi eküte yi? Wü kpara ka Yesu, ta te ewü koro agbü Makedoniya ne, le ta ta-ngü te ra ka-wü bü nzö me-wü. Teka ngü la, wü e ta te ma ngbü ele ne 'buru ladü. Te di bala, gara e te ma ena ayo kpaka yi nda ma. Angü dela ngü te ma ngbü egbo nga ra di, gbü sü ka Akaya 'buru, teka te ma yo e esaka wü kpara nda-ra kü de ne. Ma su wu de! Ma ti ace ngü la kpah de! Yesu Kurisito wu ngü la me-

* 10:17 10:17 Mü ena amaka ngü la gbü buku ka Yeremaya 9:24. gbü Gina Ngü 3:1-7.

* 11:3 11:3 Mü ena amaka ngü ka kpürü la

ye! ¹¹ Ma le aza jiase esaka yi de, neh teka ne? Angü ma le yi de? Ah bala de! Ma le yi eyi de maguma ra 'buru. Me wu ngü la cu me-ye! ¹² Angü ma le amere ngü la bala de, teka wü mürü mani, te ewü ngbü egbo nga wü, gü ba, "Ani ngbü emere tima kphah baka nda-a ne." De-ra Pawülü, ma le ngü ka-ewü la nda-ra kü de! Dela si-ngü de te ma le aza jiase esaka yi tete de ne.

¹³ Wü kpara la ngbü esutu wu fü wü kpara, gü ba, "Ani de wü mürü tima ka Yesu." Amba wüh ngbü emere dela tima ka Yesu nda-wü de, wüh ka-wü de wü mürü fiti. ¹⁴⁻¹⁵ Wayi, wüh ngbü emere ngü kphah baka nda mere kpara ka-wü, *Satana! Angü engu wu da efü te-ye baka *malayika ka Me kpo. Wü kpara kaka ngbü emere kphah bala, da efü te-wü baka wü mürü tima ka Yesu. Amba Me wu ngü ka-ewü la reke areke. Te gara, engu ena ato kuru te ewü, te nga wü ngü de te wü ngbü emere la!

Dene ngü ka cinga te ma maka gbü tima ka Yesu

¹⁶ Ma du ngbü kphah emala ngü ne fü yi, enda nganga na, gü ba, "Ma de töndö kpara nda-ra de." Te yi ngbü efi bala la, ah mbi. Amba ah le de yi le mba töndö ngü, te ma ngbü emala fü yi, teka ra ne, teka fü yi awu si-ngü, gbü wü ngü de te ma ngbü egbo nga ra tekaka ne. ¹⁷ Ma ngbü egbo nga ra bala teka ne? Miri Yesu mala ta fere, de ma di egbo nga ra bala? Ah bala de! ¹⁸ Amba baka te wü gara kpara ngbü egbo nga ngü ka-wü ne, ma le eyi amere kphah baka nda-ewü la. ¹⁹ Amba te yi fi, gü ba, ani de kpeke wü kpara, te ani wu ngü fa sü la, ah le de yi mere e afi nga töndö wü ngü, te ma ngbü emala teka ngü ka-ra la de! ²⁰ Fanü fanü, te kpara fiti yi la, yi ti eyi aje ngü kaka-na la, fü yi ale. Anga te engu ngbü ezü wü e ka-yi enza, anga te engu ngbü emala ngü fü yi baka wü labi ka-ye la, yi ena ale ngü kaka. Anga te engu ngbü efala yi, da ebe gbüra yi la, yi ena angbü fi bü da ele ngü kaka la ale! ²¹ Amba nda-a, a mere yi baka nda wü mürü fiti la nda-a de! Te di bala, dela si-ngü de te yi le aje ngü ka-a tete na de ne?

Te wü kpara la ngbü egbo nga wü bala la, ma ti kphah eyi agbo nga ra baka nda-ewü la. Angü ngü ka-ewü ti afa nda-ra nda de! ²² Te di bala, te wüh gü ba, ani de wü di engu *Yisarayeleye la, ma kphah de engu Yisarayeleye. Te wüh gü ba, ani de wü kundu ye *Abarayama la, ma kphah de kundu ye Abarayama. ²³ Ma ngbü fi bü emala ngü ne baka mürü maröfo! Te wüh gü ba, ani de wü *mürü tima ka Yesu

Kurisito la, ma kphah de mürü tima ka Yesu Kurisito. Timu ka-ra fa nda-ewü afa! Kuru te wüh to fere, teka ngü ka Yesu Kurisito, fa nda-ewü ka! Wüh i ra gbü ku, teka tima ka Yesu, neh eyi du fe? Wüh süma ra de juru teka ngü la, neh eyi du fe? Wüh le teka amörö ra amörö, neh eyi du fe? ²⁴ Wü di engu wüna, ma ngbü emala fü yi, gü ba, wü cögbörö kpara ka wü Yisarayeleye süma ra eyi teke biri nzükpa de füh ye menewa (39), du 'buruve. ²⁵ Wüh sötö ra de da eyi du biringbö. Wü cögbörö kpara ka *Rüma süma ra eyi du bata. Te ma ngbü endoro, da emala ngü ka Yesu ne, siti wü ngü mere ra kphah eyi. Te ma ngbü enü tete gbü *zabu, fü zabu la ayia ari esa ngu. Ngü la mere te-ye eyi fere bala du bata. Gbü gara sikipi, ma ngbü gbü ngu teka sikipi biringbö cu. Fü ra aküwa kphah gbü ngü la. ²⁶ Te ma ngbü ta endoro tete de lö ra te nga wü kaje, siti wü kpara yia ta kphah eyi teka amörö ra, neh du fe? Ma yia ta kphah eyi ekpi akpi gbü ngu te si asi, neh du fe? Wü di engu Yisarayeleye, te ewü di de wü di engu wüna ne, wüh giri ta da wü kphah eyi teka amörö ra, neh du fe? Wü *ganzi kpara mere ta kphah eyi bala. Ma maka cinga kphah eyi kpa etü gü. Ma maka cinga kphah eyi gbü cögbörö wü köti. Ma maka cinga kphah eyi, esaka wü mürü wu, te ewü gü ba, "Ani de wü di engu wüna, gbü tima ka Yesu ne!" ²⁷ Ma mere tima ka Yesu eyi kpekpeke, fü ra amaka mere bi mbümbü kphah eyi gbü ngü la, baka tala, gümü ngu, bete cinga bongo. Kphah bala, gbü wü gara biti, ra zoro jia ra de. Gbü gara sikipi, zü ngbü kphah emere ra. ²⁸ Amba ngü te ngbü eto cinga fere, efa wü gara ngü 'buru, ah de fingangü te ngbü embü ra, teka wü *kpara ka Yesu, de te ewü je ngü ka Me gömö ra ne. ²⁹ Kükürü de, angü wüh baka wü di ra. Te kpara ka Yesu biringbö maka wazi de la, ngü la ngbü eto cinga fere, angü ah kphah baka te wazi ra nza eyi. Te gara kpara ka Yesu mere *siti ngü la, ngü la ngbü ekolo maguma ra akolo.

³⁰ Dela wü ngü te ma ena agbo nga ra tekaka. Ma ena agbo nga ra teka wü cinga, te ngbü embü ra gbü tima ka Yesu ne, angü wazi ra nda ma. ³¹ Me wu ngü la me-ye. Ma su wu nda-ra de! Gbo nga e ngbü te iri Me fi mere badi!

³² Ta gügü, te ma di la agbü Damaseke ne, miri ka Damaseke la† mala ta ngü fü wü marajümiya ka-ye, de wüh ci ra emöngiti 'baranga ka mere köti la. Miri la mala ngü la bala, teka te ma ena akoro kpa etanü la, de wüh zoro ra azoro. ³³ Amba wü bu ra wu ngü la kpo. Fü ewü aza ra,

† 11:32 11:32 Miri ka Damaseke la, ah de miri ta te mere Miri Areta o engu me-ye.

ayia ato gbü mere kuwu. Fū ewü ayia alí kpa fūh mere 'baranga ka kōtí la. Fū ewü ayia ai ku te mere kuwu la, ato ra di ferre kpa kōtō. Fū ra ayia azi te-ra, akpe ka-ra, anū sū.

12

Dene ngü te Miri Yesu ngbü emere fere

¹ Ma wu kpo, gü ba, te kpara ngbü egbo nga ye de tete-ye la, ah de töndö ngü. Amba ah reke pe, te ma ena agbo nga ra mba ce. Angü ma ngbü ele amala nga ngü, de te Miri Yesu sere fere baka roto ne, fū yi. ²⁻⁴ Nga ngü la ra eyi baka re nzükpa de fūh ye bala dene. Me za ra ta, nü di agbü sū ka-ye agbü kpí. Anga ngü la, ma wu cu de jia ra, anga ah de roto ya, ma tí awu ngü la mbi mbi de! Me wu ngü la ka-ye nzō me-ye. Fū engu aza ra akoro di agbü sū ka-ye agbü kpí. Fū engu asere wü cōgbörö kpeke ngü, te komö kpara ngbü egu kaka-na agu, fere. Wü ngü te ma tí amala nganga na fū yi mbi mbi kpah de. ⁵ Ma tí eyi agbo nga ngü de bala, angü ah de mere kpeke ngü. Amba ma le agbo nga ra, teka ngü la, nda-ra de. Ma le agbo nga ra nzō teka wü cinga, te ma ngbü emaka teka ngü ka Miri Yesu Kurisito ne. ⁶ Te ma ena ale ta agbo nga ra la, wü ngü de te ma ena agbo nga ra tekaka na ne, ah ma? Ah ladü! Ma su wu de! Amba ma le amere ngü bala nda-ra de. Kükürü de, angü ma le de yi di ecu ngü ra, baka mere kpara, teka ngü ka roto, de te Miri Yesu sere fere ne, nda-ra kpah de. Amba de-yi, yi wu wü ngü, te ma ngbü mere gbü jia yi ne eyi. Yi je kpah wü ngü, te ma ngbü mala fū yi ne eyi, cu de güje yi. Ah ena adi ta mbi, te yi ena angbü efi nga ra teka wü ngü la.

⁷ Teká mere kpeke ngü, de te Miri Yesu sere fere gbü roto ne, Me le de ma ceka te-ra baka mere kpara de. Te di bala, fū Me ayia ato gara cinga te ra, te ngbü embü ra, baka tí te ngbü esösötö ra la. Cinga la ngbü ka-ye ge baka te *Satana tima kpara ka-ye me-ye, agü gü eküte ra la. Me to cinga la te ra, teka de ma mere e, aceka te-ra baka mere kpara, ne de. ⁸ Ma ku gba fū Miri Yesu eyi du bata, teka de engu za keke la te ra asidi. Amba engu le de. ⁹ Fū ah adu amala ngü fere, gü ba, "Te wazi ra ngbü enza la, ni ena angbü eto wazi fere. Ngü la tí fere la de? Ni ena adi eto wazi la fere bala, teka fū ra adi erü di kpekepe. Fū wü kpara adi ewu wazi ni, Yesu, teka ngü te ni ngbü emere fere la." Te di tine eyi bala ne, ma ngbü engbü de tadu, teka wü ngü te ngbü emere ra ne. Te wazi ra ngbü enza la, ma ngbü engbü de tadu, angü Yesu Kurisito ngbü eto mere wazi ye fere me-ye. ¹⁰ Ma ngbü

engbü de tadu, teka wazi ra te ngbü enza. Ma ngbü engbü de tadu, te wü kpara ngbü efala ra la. Te wü gara ngü ngbü efa ra la, ma ngbü engbü fi bü de tadu. Ma ngbü engbü de tadu, te wüh ngbü eto cinga te ra, teka ngü ka Yesu Kurisito la. Angü ma wu kpo, gü ba, te wazi ra ngbü enza la, Yesu Kurisito ngbü eto wazi ka-ye fere me-ye.

Dene fingangü te ngbü embü ra teka ngü ka-yi

¹¹ Ma ngbü emala ngü te komö ra, baka mürü maröfö, neh teka ne? Ma ngbü emere ngü la teka ngü ka-yi! Angü ah le ta de yi di emala nga züka ngü ka-ra fū wü kpara me-yi. Baka te yi le amere bala de ne, ma tí eyi agbo nga ra de tete-ra. Yi ngbü eceka ra gbü jia yi baka töndö kpara kükürü? Ah bala de! Amba, wü kpara te yi ngbü efi nga ewü, gü ba, "Wüh de wü cōgbörö wü kpara ka-ani, gbü tima ka Me," ne, ngü ka-ewü tí afa nda-ra nda de! ¹² Ta te ma ngbü tete na kpa esüka yi de kpala ne, wüh to ta cinga te ra fa sū, teka ngü ka Yesu Kurisito. Amba ma ngbü fi bü etüka te-ra, da emere tima la. Fū Me ayia ato wazi fere, fū ra angbü emere wü cōgbörö ngü ka talara di. Ngü la gü tamu ra fū yi, gü ba, ma zu de *mürü tima ka Yesu ne, la fi de? ¹³ Yi le ngü ka-ra la de, neh teka ne? Yi ngbü efi, gü ba, wü gara ngü ladü, te ma ngbü emere gbü gara wü sū, te ma mere kpaka yi la de? Amba ngü ladü ngbee biringbö, te ma mere de! Angü ma yi-ta yi ta teka jiase nda-ra de! Dela siti ngü? Te ah bala, ah le de yi ce siti ngü ka-ra la!

¹⁴ Wü di enga ra, kokoro ka-ra kpaka yi kpala eyi gbamari. Ah ena adi eyi de ebabata kokoro ka-ra. Ngü te ma ngbü ele kpaka yi ne, ah de jiase nda de! Ah de wü e ka-yi kpah de! Ma ngbü ele de yi le ra de maguma yi 'buru. Wü jürü jaji ngbü kpah eto e fū wö wü? Ah bala de. Ah de wö ye wü jaji, te ngbü eto zü-e me-ye fū wü di ye! Te di bala, ah le de yi wu, gü ba, ma kpah de wö ani. ¹⁵ Ma le eyi ato wü e ka-ra 'buru fū yi. Ma le kpah ato te-ra 'buru, teka ato wazi fū yi, gbü ngü ka Miri Yesu Kurisito, angü ma le yi de maguma ra 'buru! Amba yi le ra nda-yi de, neh teka ne?

¹⁶ Baka ta te ma ngbü kpaka yi kpala ne, ma yo ta e biringbö eyi eküte yi? Amba ma mere bala nda-ra de! Wü gara kpara ngbü emala, gü ba, ma de mürü fiti, ma ngbü emere mani, teka amaka jiase esaka yi. Si-ngü la baye? ¹⁷ Wü di enga wüna, yi fi nga ngü la mbi mbi mbi! Wü kpara ta te ma tima ewü kpaka yi ne, wüh koro kpala, fiti yi, zi jiase ka-yi, du di to fere? ¹⁸ Ma

mala ta fū wū Tito, de wūh nū te engā gina ake gara engā nī a. Tito fiti ta yi eyi, fū ah aza jiase esaka yi? Ngū ka Tito ka-ye kpah baka ngū ka-ra. A mere ngū de maguma a 'basu' basu nda-a de!

¹⁹ Wū di engā wūna, yi ngbū efi, gū ba, ma ba ngū la fū ani bala, teka de ngū ka-a reke gbū jia ani? Ah bala de! Ngū de te a ba fū yi la, ah ka-ye de zu ngū ka Yesu Kurisito, te engu to fere me-ye. Me wu ngū la kpo! Ma su wu de! Ngū te ma ba fū yi, ah teka de ah to wazi fū yi, gbū ngū ka Yesu Kurisito. ²⁰ Ma ngbū efi nga yi efa sū. Te ma ena akoro kpaka yi kpala la, ma ena amaka yi 'be? Anga, ngū ka-yi ena areke gbū jia ra fanū? Te ah bala de la, ngū te ma ena amere, ti areke gbū jia yi kpah de! Dela ngū te ngbū eto fingangū fere. Angū, te ma ena anū amaka yi, te yi ngbū engbū de siti maguma, da ekspū te-yi la, ah esiti! Anga te yi ngbū edi ngū ekūte wū bu yi, da efala te-yi, da emala ambala'ba ekūte wū bu yi, da egbo nga yi de tete-yi la, ²¹ ngū la ena ato lūmū fere gbū jia Me! Angū, te ma ena amaka wū kpara, te ewū di la fi emere siti ngū, da endondoro sidi nga wū wūruse fa fa fa, wūh le afū maguma wū de la, ma ena aku gba cu de ngura, teka ngū ka-ewū la! Dela eyi ngū, te ngbū eto mere siti fingangū emaguma ra!

13

Dene adu ngū te ma ele amala fū yi

¹ Ma ena akoro kpaka yi kpala mba kere. Dela ena adi de ebabata kokoro ka-ra kpaka yi kpala. Te ma ena akoro kpala la, nih ena akolo ngū ka wū mene kpara, de te ewū ngbū emere *siti ngū ne. Nih ena aye sūka ngū la areke areke, kpah baka te wūh ba gbū *Ngari Me ta gūgū, gū ba, "Te gara kpara i kiri ye engagira miri, te kpara la bū me-ye kpikpi ye la, de wūh mere e aje ngū kaka-na de. Ah le de wū kpara 'basu anga bata, te ewū wu ngū la de jia wū ne, di ladū." ² Ta gbū e'ba'basu kokoro ka-ra kpaka yi de kpala ne, ma mala ta ngū fū wū kpara, de te ewū ngbū emere siti ngū ne, kpekpeke, gū ba, "Te wūh fū maguma wū de la, wūh ena ato kuru te ewū ato fanū fanū." Titīne, baka te ma di kpaka yi kpala ma ne, fū ra adu kpah anda nga ngū la fū yi kpekpeke, gū ba, "Te ma du koro kpaka yi kpala, maka wū kpara la, o wūh fū maguma wū fi de la, ma ena ato kuru te ewū ato fanū fanū. Ma ti afūwa ewū tīne de." ³ Yi gū ba, "Ani ngbū ele awu, anga Yesu Kurisito ngbū ero mō te komō ra me-ye fanū ya?" Wayi! Yi

ena awu ngū la! Yi mere e afi, gū ba, wazi Yesu nza eyi ne de! Engu ena ato kuru te yi de mere wazi ye! ⁴ Fanū fanū, ta te wūh bere engu fūh *rū ghegbete ne, wawazi nza ta eyi. Sidi nga ngū la, fū Me adu ato mere wazi fefe na. Angū Me zūkū engu gbū kpi la, fū ah adu angbū ka-ye de mere wazi ka Me la, fi bala. Nda-a, a ngbū elala fi bū ekūkūte na, angū wazi a ngbū ka-ye kpah enza anza. Amba gbū sīkpi te a ena akoro tete kpaka yi kpala, a ena angbū de mere wazi ka Me gbū wū ngū ka-a, kpah baka nda Yesu.

⁵ Dene ngū te ma le amala fū yi. Ah le de yi ceka ngū ka-yi mbi, anga yi to maguma yi eyi fū Yesu Kurisito fanū fanū ya? Yi wu de, gū ba, Yesu Kurisito ngbū engbū emaguma ani? Yi fi nga ngū la mbi mbi mbi! Te Yesu ngbū emaguma yi de la, yi ena adi de wū *kpara ka Yesu, neh baye baye? ⁶ Ma wu eyi, gū ba, te yi fi nga ngū ne mbi mbi la, yi ena awu, gū ba, a zu de wū *mūrū tima ka Yesu Kurisito fanū. ⁷ Amba, ah de mere ngū de. Mere ngū te ma ngbū eku gba fū Me tūngūngū kpekpeke ne, ah dene. Yi ce da emere wū *siti ngū. Anga te yi ngbū emala, gū ba, a de wū mūrū tima ka Yesu de la, ah ba ngū de. Amba, ah le de yi di emere menē ngū, te ena areke gbū jia Me. ⁸ Angū dela ka-ye zu ngū ka Me, a ti aga yiki de. A ngbū fi bū emere tima, teka de ngū ka Me ga nū kpa engagira nū. ⁹ Te wazi a nza anza la, ngū ma! Amba te yi maka wazi eyi, teka ngū ka Yesu Kurisito la, ngū la ena ato tadu fū a. Angū a ngbū fi bū eyi-ta Me, teka de yi rū kpekpeke gbū ngū ka Me, anū de ngū ka Me la kpa engagira nū. ¹⁰ Dela si-ngū te ma ngbū eba ngū ne tete fū yi, o ra di la nengete de kpakine ne. Angū, te ma ena akoro kpaka yi kpala la, ma le awu, gū ba, yi fū maguma yi eyi fanū fanū. Te di bala, ma ti ato kuru te yi ndara tīne de. Fanū, Me to wazi eyi fere, teka ngū ka-yi. Amba Me to wazi la fere, teka fū yi angbū de cinga, ne nda de. Me to wazi la, teka de yi maka wazi, teka fū yi arū di kpekpeke, gbū ngū ka Yesu Kurisito.

¹¹ Wū di engā wūna, dene adu ngū ka-ra. Yi rū kpekpeke gbū ngū ka Yesu Kurisito, de yi nū de ngū la kpa engagira nū. Yi je wū ngū ka-ra la. Yi mere e angbū ega yiki esūka yi de. Yi di ele te-yi esūka yi de maguma yi biringbō. Te yi ngbū emere bala la, Me ena angbū tundu de wū yi fanū fanū, angū engu de kpara te ngbū ele nih de maguma ye biringbō. Dela eyi ngū te ma le amala fū yi.

¹² Yi to mandī ka-a fū wū di engā ni nih, gbū tima ka Yesu Kurisito de kpala

* 13:1 13:1 Mū ena amaka ngū la gbū buku ka Manda nga Riri 19:15.

ne 'buru. Wü kpara ka Yesu de kpakine ne, to kpah mandī ka-wü fū yi kpala fa sü. ¹³ Yesu Kurisito di de yi, de *zūka maguma ye. De Me ngbü de yi, de ah le yi de maguma ye 'buru. De *Nzila Wazi Me ngbü kpah de yi, de ah to wazi fū yi, fū yi adi ele te-yi esūka yi di.

Dela adu ngü te ma mala fū yi, de-ra Pawülü.

Dene kôcôkpa te Pawülü ba fû wü kpapa ka Yesu agbü Galatiya Galatiya

Masere si-ngü

Kpapa te ba kôcôkpa ne, ah de Pawülü. Ah ba ta ngü la fû wü *kpapa ka Yesu agbü sü de یری ye Galatiya. Wü kpapa ka Galatiya la je ngü ka Yesu gömô wü Pawülü ake Baranaba, gbü wü kôti de یری ye Atiyokiya, İkoniyu, Lisitera bete Derebe. Angü wü Pawülü nü mala ta ngü ka Yesu gbü wü kôti la gbü gina ndoro ka-wü. (Mü ena amaka ngü la gbü buku ka Wü Mürü Tima ka Yesu 13:13-14:23.)

Dene si-ngü te Pawülü ba kôcôkpa ne tete, angü ah je, gü ba, sisi nga ani, wü gara kpapa koro kpapa wü kpapa ka Yesu gbü wü sü la. Fû ewü akpo da esiti fingangü ka wü kpapa ka Yesu la, de gara riri kpiki ye, gü ba, dela riri ka Me. Ngü ka Yesu te Pawülü ri ewü di, gü ba, "Te mü le ngü ka Yesu de maguma mü biringbö la, Me ena aboro wü *siti ngü kamü la asidi, teka ngü ka Yesu, angü Yesu kpi teka aküwa nih." Nda wü gara kpapa la, wüh gü ba, "Te mü le akoro kpapa ka Yesu la, ah le de mü fû te-mü baka enga *Yisarayele feke. Mü ena amere wü gele ka wü di enga Yisarayele 'buru, baka matı esa *basa, gele ka zü-e, gele ka mazürü kpa, de wü gara mere bi wü gele ka-ewü 'buru. Te mü mere bala de la, mü ti aküwa de." Amba Pawülü le ngü la kpo de! Tek a ngü la, fû ah aba kôcôkpa ne, atima fû wü kpapa ka Yesu agbü Galatiya kpala, gü ba, "Wü mere e ale ngü la de. Angü ngü ka Me ka-ye kü ngbee biringbö, ah bü ngü ka Yesu ta te ewü je gömô ani ne. Gara ngü te mü ena amere, fû ah aküwa mü ne, nda ma. Ah le de mü to bü duu maguma mü fû Yesu Kurisito." Te di bala, ah le kpah de nih de enatikine ne, nih to maguma nih fû Yesu, fû nih aküwa.

Wü ngü te mü ena amaka gbü kôcôkpa ka wü Galatiya ne, wüh dene.

Sapita 1-2 Si-ngü te Yesu Kurisito fe Pawülü mürü tima ka-ye tete

Sapita 3-4 Gele ti aküwa kpapa de.

Wü kpapa ngbü eküwa bü duu teka ngü ka Yesu

Sapita 5-6 Ah le de nih di emere wü ngü te ena areke gbü jia Me de wazi ka Nzila Wazi Me

Dene mandı ka Pawülü fû wü kpapa ka Yesu agbü Galatiya

1-2 De-yi wü *kpapa ka Yesu Kurisito, te yi di agbü Galatiya, ma ba kôcôkpa ne fû yi me-ra. De-ra Pawülü, te ma di de *mürü tima ka Yesu Kurisito ne. Gara kpapa te tima ra nda ma, 'duwa Yesu *Kurisito, ake Wö ye, Me, te zükü engu gbü kpi ne, wüh tima ra me-wü, teka amala ngü ka-wü fû wü kpapa.

Wü gara wü di enga ni yi, wü kpapa ka Yesu, te a di de ewü sene, to mandı fû yi fala de.

3 Wö nih Me ake Miri ka-nih Yesu Kurisito di de yi, da eto gu ngü fû yi de *züka maguma wü. 4 Angü Yesu Kurisito to te-ye akpi, teka aküwa nih gbü wü *siti ngü ka-nih, de te nih ngbü emere, kpah baka wü kpapa füh kotö, de wü siti fingangü ka-ewü ne. Yesu Kurisito mere ngü la bala, angü ah de ngü te Wö nih, Me, le me-ye. 5 Ah le fû nih adi egbo nga یری Me teka ngü la fi mere badi. Ah di bala.

Dene ngü ka ngari Me, te di ka-ye ngbee biringbö

6 Ma je gara ngü ka-yi titine, fû ngü la akolo maguma ra afa sü. Angü Me fe yi, ao yi ba züka wü kpapa ka-ye teka ngü ka Yesu Kurisito. Te di bala, ah mere neh baye, te yi yia bü kere, ce ngü kaka, adu ale gara riri te di kpiki ye ne? Dela ne ngü ne? 7 Ma ngbü emala fû yi dene zu ngü fanü fanü, gü ba, gara ngari Me nda ma. Ngü ka Me ka-ye ngbee biringbö. Ah de ngü ka Yesu, ta te ma mala fû yi ne. Ma mala bala kükürü de, angü ma wu eyi, gü ba, gara wü kpapa koro eyi kpaka yi, teka afiti yi, asiti fingangü ka-yi. Angü wüh le afü ngü ka Yesu Kurisito, ao kpiki ye. 8 Amba, ma ngbü emala fû yi kpekpeke, gü ba, te gara kpapa koro kpapa yi, da eto gara riri fû yi, te ngü la ti kpini de ngü, ta te a mala fû yi ne, nda de la, ah ka-ye de wu! Anga te ah cu de-a, anga *malayika ka Me, anga neh da, yi mere e aje ngü kaka de! Ah ti fû kina ka Me angbü gbü nzö kpapa la, de ah kpi, anü agbü wa fi mere badi. 9 A mala ngü la fû yi ta eyi, amba titine ma du ngbü kpah emala fû yi toto, gü ba, te gara kpapa koro kpapa yi, emala ngari Me fû yi, te ngü kaka ti kpini de mene ngü, ta te yi je gömô a ne, de la, ah ka-ye de wu! Ah ti fû kina ka Me angbü gbü nzö kpapa la.

10 Yi ngbü efi, gü ba, ma ba ngü la fû yi bala, angü ma ele de wü kpapa gbo nga ra? A'a, ah bala de! Ma ele nda-ra fû Me agbo nga ra me-ye. Yi efi, gü ba, ma le fû ngü ka-ra areke gbü jia wü kpapa? A'a, te ma ngbü emere bü ngü te ena areke gbü jia wü kpapa la, ngü ka-ra ti areke gbü jia Yesu Kurisito nda de.

Dene si-ngü te Yesu Kurisito fe ra mürü tima ka-ye tete

11-12 Wü di engu wüna, ma ngbü emala ngü ne fū yi, gü ba, ngü ka Yesu, de te ma ngbü emala fū wü kpara ne, ah de kpeke ngü. Angü ma je ngü la gömō kpara fūh kotō ne nda-ra de. Yesu Kurisito gü tamu ngü la fere cu me-ye.

13-14 Gbü jia ra, yi je nga ra tane eyi, o ra ngbü la emere gele ka wü kundu ra, wü di engu *Yisarayelete tete ne. Angü, ma to ta te-ra teka adi emere gele ka wü kundu a la, fa nda gara wü di engu Yisarayelete 'buru. Fū ra angbü ta eto cinga te wü *kpara ka Yesu cu de wazi ra 'buru, da egiri kaje teka amörō ewü ta 'buru asidi. 15-16 Amba, Me de mürü *züka maguma. Gbü sikipi ta te Me le afü ngü ka-ra tete, fū engu ayia asere Ye ye, Yesu Kurisito, fere.* Angü ah fe ra ta nda eyi gügü, o wüh bi ra la de. Fū ah ai ra teka de ma mere tima ka-ni, adi emala ngü ka Yesu fū wü *ganzi kpara, te ewü wu ngü ka Me la de ne. Gbü sikipi ta te Me to tima la fere, ma nü ta teka ayi-ta gara kpara nda-ra de. 17 Ma nü agbü Yerüsalema, teka ayi-ta gina wü *mürü tima ka Yesu, kpah de. Ma yia ka-ra bü 'duwa, nü agbü tō ka wü Arabi, gbü mene sü te wü kpara di tete ma. Fū ra angbü kpala, da eku gba fū Me. Fū Me ayia asere ngü ka-ye fere. Fū ra adu anü angbü agbü Damaseke.

18 Fütanga re bata, fū ra ayia anü agbü Yerüsalema teka aceka Petero. Fū ra angbü kpakaka kpala teka sikipi ngbee nzükpa de fūh ye 'buru. 19 Ma wu ta gara wü mürü tima ka Yesu kpala nda-ra de. Amba, ma wu bü *Yakobo, engu ni ye Miri Yesu. 20 Ngü de te ma ba fū yi ne, ah de zu ngü te mere te-ye fere bala fanü, Me wu ngü la kpo. Wu gbügbü ma!

21 Fütanga ngü la, fū ra ayia anü andoro agbü tō ka wü Siriya, bete nda Silisiya. 22 Ta gbü wü re la 'buru, bi wü kpara ka Yesu agbü tō ka Yudaya, wu ra mbi mbi nda-wü de. 23 Wüh ngbü eje nga ra bü gömō gara wü kpara, te ewü ngbü emala, gü ba, "Komoko, ta te ngbü eto cinga te ani ne, ah du fū te-ye eyi. Ah kpo eyi da emala ngü ka Yesu fū wü kpara fine cu me-ye." 24 Fū ewü angbü egbo nga iri Me teka ngü ka-ra la efa sü.

2

Dene ngü ka-ra, Pawülü, de wü gara mürü tima ka Yesu

1 Fütanga re nzükpa de fūh ye bala, fū ra adu kpah, anü agbü Yerüsalema. A nü ta kpala ake Baranaba. Ma za Tito gbü nga ra kpah mini. 2 Ma nü ta kpala kükürü de, angü Me sere ngü la ta me-ye fere, gü ba, ah le de ma mere bala. Te ma koro tete kpala, fū a abiti te-a de wü cögbörō

*kovo ka Yesu, angbü kpikpi a. Fū ra asere nga ngü ka Yesu, de te ma ngbü emala fū wü *ganzi kpara ne, fū ewü, angü ma le fū tima, de te ma ngbü emere ne, akpi kükürü de.

3-4 Tito, ta te a koro de ewü ne, ah ka-ye de engu *Giriki. Te di bala, fū gara wü kpara kpala, amala ngü, de wüh za engu de wazi, agü esa *basa. Amba wü cögbörō kovo le amere ngü la de wazi nda-wü de. Wü kpara te ewü le bala, wüh de wü mürü mani, de te ewü ngbü esu wu, gü ba, "Ani kpah de wü *kpara ka Yesu ne." Wüh ri ta gbü mabiti ka-a la gbü zi, teka awu ngü te a ngbü eri wü kpara di, anga a ngbü eri ewü, de wüh ce gele kani, ka wü di engu *Yisarayelete, anga de? Angü wüh lala fi bü baka ka gele la, de wü kpara 'buru di emere, esa riri kani, baka wü labi la. Amba te nih lala eküte Yesu Kurisito, ngü ka gele la ti ai nih de. 5 Te di bala, ngü ka mani ka-ewü la, a le nda-a kpo fi de. Angü ah le de zu ngü ka Yesu, te Me tima a di ne, ah ngbü da ye, teka aküwa yi.

6 Wü kpara la, wüh baka cögbörō wü kpara gbü jia wü kpara, amba ma fi nga ngü ka-ewü la, ba mere kpeke ngü, nda-ra de. Angü ma wu eyi, gü ba, fingangü ka Me, ah baka nda wü kpara de. Wayi, te ma sere nga ngü ka Yesu, de te ma ngbü eri wü kpara di ne, fū wü cögbörō kpara la, fū ngü la areke te ewü, agü ba, "Wayi, ah de züka ngü." Wüh mala gara ngü fere nda-wü de. 7-8 Angü wüh wu eyi fanü, gü ba, Me to tima la fere me-ye. Angü Me fe ra *mürü tima ka-ye, fū ah ato wazi fere, teka de ma di emala ngü ka Yesu la fū wü *ganzi kpara, kpah baka te engu fe Petero, teka ari wü di engu Yisarayelete ne. 9 Te di bala, wü *Yakobo, ake Petero, bete *Yüwane, te ewü ngbü gbü jia wü kpara ba cögbörō wü kovo ne, wüh wu kpah eyi, gü ba, Me to wazi eyi fere fanü, teka tima ka Yesu la. Fū ewü ale, gü ba, a nü nda-a, ake Baranaba, adi emala ngü ka Yesu fū wü ganzi kpara. Nda-ani, ani ena adi emala fū wü di engu Yisarayelete. Fū ewü ayia ato mandí fū a ake Baranaba, da egbo nga iri Me. 10 Gbü wü ngü la 'buru, ngü biringbö, te wüh mala fū a baka riri, ah 'duwa de ngü ka wü mürü cinga, de a di ele ta-ngü te ewü. Angü dela ngü te ti kpah kpini de fingangü ka-ra.

Dene ngü ka-ra, Pawülü, ake Petero agbü Atiyokiya

11 Fütanga ngü la, fū Petero ayia akoro kpaka a, agbü Atiyokiya. Fū ra amala ngü fefe kpekepe gbü jia wü kpara 'buru,

* 1:15-16 1:15-16 Mü ena amaka ngü la gbü Mürü Timu 9:1-16.

teka siti ngü de te engu mere. ¹² Angü te engu gina, Petero ngbü ta ezü e de wü *ganzi kpara tundu. Fütanga ngü la, fü gara wü di engu *Yisarayeale, te *Yakobo tima ewü kü agbü Yerüsalema, ayia akoro kpaka a. Te Petero wu wü kpara la, fü engu ayia afü te-ye, ace da ezü e de wü ganzi kpara la, angü ah ngbü ekpe cürü jia wü di engu Yisarayeale, te ewü koro agbü Yerüsalema la. Angü wüh gü ba, ani ele de wü ganzi kpara 'buru di emere gele kani, wü di engu Yisarayeale. ¹³ Fü gara wü di engu Yisarayeale esüka a de sene awu mani ka Petero la. Fü ewü akpo kpah da emere mani baka nda-ka. Fü Baranaba akpo kpah da erü gbü ngü la. ¹⁴ Te ma wu ngü la, gü ba, wüh ngbü emere ngü te ti kpini de *Ngari Me nda de ne, fü ra ayia arü amala ngü fü Petero kpekpeke gbü jia wü kpara 'buru, gü ba, "De-ye, Petero, ye zu de engu Yisarayeale de? Ah mere baye te ye mere gele ka-ani, wü di engu Yisarayeale, mbi mbi de, fü ye adu afü te-ye, adi eto riri fü wü ganzi kpara la kpekpeke, de wüh di emere gele la me-wü ne?"

¹⁵ Dela ngü ta te ma mala fü Petero gbü jia wü kpara 'buru. Ma mala ngü la kükürü de, angü zu de-a, wü Yisarayeale, a ngbü efi nda-a, gü ba, a de wü kpara ka Me me-a, a mere *siti ngü baka nda wü ganzi kpara nda-a de. ¹⁶ Amba a wu eyi, gü ba, ngü ka-a ti areke gbü jia Me, teka ngü ka gele de. Ah bü nzö de ngü ka Yesu Kurisito, te ena areke kpara gbü jia Me me-ye. Te di bala, a to maguma a eyi fü Yesu, teka fü ngü ka-a areke gbü jia Me. Angü gele ti areke kpara gbü jia Me de.

¹⁷ Gara wü di engu Yisarayeale gü ba, te a ce ngü ka gele ka-a, fü a adu angbü egiri kaje teka areke gbü jia Me teka ngü ka Yesu Kurisito la, ah baka te a fü te-a eyi wü siti kpara, te ewü le *Riri ka Me de. Te ngü la ena adi ta bala la, ah ena adi ba e te Yesu Kurisito siti ngü ka-a me-ye. Amba, ah bala nda de! ¹⁸ Amba, te ma ce ngü ka Yesu, adu ari gbü diri gele ka-a, te ti aküwa kpara de ne, ma mere siti ngü eyi gbü jia Me. ¹⁹ Ma le ta alala gbü ngü ka gele ka-a, teka fü ra aküwa gbü ngü la. Amba fü ra adu awu, gü ba, ngü ka gele la fa ra eyi, ma ti aküwa gbü ngü la nda-ra de. Fü ra adu ace ngü ka gele la, adu alala tine gbü ngü ka Yesu, teka fü ra aküwa. ²⁰ Angü Yesu Kurisito kpi eyi füh *rü ghegbete teka aküwa ra. Te di bala, ah ba e ta te ma kpi eyi tundu ake di. Te ma ngbü ezükü la, ah de ngü ka-ra de, angü ah ka-ye de Yesu Kurisito, te ngbü eto wazi fere me-ye. Baka te ma di la füh kotö ne, ma giri kaje teka

aküwa te-ra de tete-ra tine de. Angü ma to maguma ra eyi 'buru fü Yesu, Ye Me, de ah küwa ra me-ye. Angü ah le ra eyi cu de maguma ye, fü ah ato te-ye akpi teka ngü ka-ra. ²¹ Te ma ena angbü ta egiri kaje teka aküwa gbü ngü ka gele la, ah ena adi ta ba e te ma gü ba, züka ngü te Me mere fere, atima Yesu, akpi teka ra ne, ah ka-ye de töndö ngü kükürü. Angü te ngü ka gele ti eyi aküwa nih la, amba Yesu Kurisito kpi ka-ye bü kükürü.

3

Dene ngü ka gele te ti aküwa kpara de

¹ De-yi, wü kpara ka Galatiya, amba yi ka-yi bü töndö kpara bane? E-fiti yi de bala neh da? Angü a mala ta ngü ka Yesu fü yi eyi mbölö. Yi je si-ngü la kpah eyi mbi mbi mbi, baka e ta te yi wu kö Yesu, füh *rü ghegbete la, cu de jia yi. ² Te di bala, ma le ayi-ta yi teka ngü biringbö, de yi lügü fere. Yi maka ta wazi ka *Nzila Wazi Me, neh baye baye? Gbü kaje ka gele? A'a, ah teka te yi le ngü ka Yesu gömö a de maguma yi ne. Yi le afü ngü la, neh teka ne? ³ Nzö yi ma? Yi röfö aröfö? Yi kpo ta da emere tima ka Me de wazi ka Nzila Wazi Me. Titine yi le afü ngü la, amere de nda-yi wazi, neh teka ne? ⁴ Mere bi wü kpeke ngü, ta te Nzila Wazi Me mere esüka yi ne, yi ceka bü baka töndö ngü kükürü? A'a, ah le de yi ceka wü ngü de bala ba kükürü ngü ne de! ⁵ Me to ta wazi ka Nzila Wazi ye fü yi, neh teka ne? Ah ngbü emere wü kpeke ngü esüka yi, neh teka ne? Ah teka te yi ngbü efa nga gele ka wü *Yisarayeale, da emere wü riri engu na mbi mbi mbi? Ah bala de! Ah ngbü mere wü ngü la fü yi bala, angü yi lala eküte ngü ka Yesu, ta te a mala fü yi ne.

⁶ Yi fi la ngü ka *Abarayama ta gügü. Wüh ba gbü *Ngari Me teka ngü kaka, gü neh fe? Wüh ba ta, gü ba, "Abarayama to ta maguma ye fü Me, fü Me adu aceka engu baka züka kpara ka-ye teka ngü la."* Ah teka ngü ka riri ka gele nda de. ⁷ Te di bala, ah le fü yi awu, gü ba, zu wü kundu ye Abarayama ka-ye de mene wü kpara, de te ewü to maguma wü eyi fü Me ne.

⁸ Ta gügü, Me wu eyi, gü ba, te gara, wü *ganzi kpara ena ato maguma wü fü ni. Tekka ngü la, ni ena aceka ewü ba züka wü kpara ka-ni. Fü Me asere ngü la fü Abarayama, kpah baka te wüh ba gbü Ngari Me, gü ba, "Ni ena aküwa nguwa wü kpara füh kotö ne 'buru teka ngü ka-ye."† ⁹ Te di bala, te mü to maguma mü

* 3:6 3:6 Mü ena amaka ngü la gbü Gina Ngü 15:6.

† 3:8 3:8 Mü ena amaka ngü la gbü Gina Ngü 12:3.

fü Me baka nda Abarayama la, Me ena ato züka ngü fü mü kphah baka nda-ka.

¹⁰ Amba te mü to maguma mü teka gele ka wü Yisaraye, gü ba, ni ena amere wü riri ka gele la 'buru areke areke, teka de ngü ka-ni reke gbü jia Me la, Me ti ale ngü ka-mü teka ngü la nda de. Kina ka Me ena angbü gbü nzö mü. Kükürü de, angü wü riri la sibi fa sü. Kpara te ti amere wü riri la 'buru mbi ne nda ma. Ah baka ngü te wüh ba ngü gbü Ngari Me, gü ba, "Wü Riri te wüh ba gbü Ngari Me ne 'buru, te mü ngbü emere wü gara 'buru mbi, fü mü ace gara biringbö, kina ka Me ena angbü gbü nzö mü." † ¹¹ Te di bala, nih wu eyi, gü ba, kpara biringbö te ena aküwa teka ngü ka gele nda ma. Kükürü de, angü wüh ba ta ngü la eyi bala gbü Ngari Me, gü ba, "Mene wü kpara, te ewü le ngü ka-ni, Me, de maguma wü biringbö ne, ni ena aceka ewü baka züka wü kpara ka-ni fanü, fü ni adu aküwa ewü fi mere badi." §

¹² Amba ngü ka Riri ka-ye kpikpi ye, ngü ka mato maguma fü Me kphah kpikpi ye. Angü wüh ba gbü Ngari Me, gü ba, "Duwa kpara te ena amere wü riri ka gele 'buru mbi, ah ena aküwa gbü ngü la me-ye." * ¹³ Te ah bala, nih ena aküwa baye baye? Angü nih ti amere mere bi wü riri ka gele la 'buru mbi mbi mbi nda-nih de. Nih ena aküwa 'duwa teka ngü ka Yesu Kurisito. Angü mere siti kuru, ta te Me ena ato fü nih teka ngü ka Riri ka-ye, te nih mere mbi mbi de ne, Yesu Kurisito za eyi gbü nzö ye, gbü sikipi te engu kpi tete füh *rü gbegete. Angü kpi de füh rü gbegete la, ah de siti kpi. Ngü la, ah ti kpini de ngü te wüh ba ta gbü Ngari Me, gü ba dene, "Ah ti fü kina ka Me angbü gbü nzö mene kpara, te kpi füh rü gbegete." † ¹⁴ Yesu Kurisito le azü cinga bala, teka fü wü kpara 'buru aküwa teka ngü ka-ni, kphah ba e ta te Me mala fü Abarayama. Te di bala, te nih to maguma nih fü Yesu, Me ena ato wazi ka *Nzila Wazi ye fü nih 'buru.

Dene ngü teka vüngüte ezungba Me ake Abarayama

¹⁵ Wü di enga wüna, yi fi nga ngü la mbi mbi mbi. Te wü kpara 'basu nzö ngüte esüka wü la, gara kpara ti eyi akoro afü ngü ka *vüngüte ka-ewü la? A'a, ngü bala ma! Angü wüh reke ngü ka-wü eyi esüka wü. ¹⁶ Ah kphah bala teka ngü ka vüngüte ezungba Me ake *Abarayama ne. Angü Me nzö ngüte ake Abarayama ta gügü, † o wüh bi *Müse la de. Fü Me amala ngü fü

Abarayama, gü ba, "Ni ena ato züka ngü fü ye, fü ni ato kphah fü kundu ye, te wüh ena abi fütanga ye." Yi ceka la, te wüh ba ngü la gbü *Ngari Me, wüh ba, gü ba, "wü kundu ye," baka mere bi wü kpara ne, nda-wü de. Wüh gü ba "kundu ye," te di kpara ngbee biringbö. Kpara la, ah ka-ye de Yesu Kurisito, te di de mere kundu kundu ye Abarayama. ¹⁷ Wayi, ngü te ma ele amala fü yi, ah dene. Me nzö ngüte ake Abarayama ta gügü, o wüh bi Müse la de. Fütanga ngü la, baka mere bi re kama bala teke biri de füh ye nzüka (430), fü Me adu ato *Riri ka-ye fü wü di enga *Yisaraye, wü kundu ye Abarayama, gömö Müse. Te di bala, ngü ka Riri te Müse to ne, ena afü ngü ka vüngüte la, neh baye baye? ¹⁸ Te mü ena afi, gü ba, "Me ena aküwa ni, angü ni ngbü emere riri ka gele ereke areke la," mü küwa nda-mü de. Angü Me ena aküwa mü 'duwa teka *züka maguma ye. Me mala ta eyi fü Abarayama, gü ba, "Ni küwa ye eyi teka züka maguma ni." Me ti afü ngü la de!

¹⁹ Te di bala, Me to ta Riri ka-ye fü nih, neh teka ne? Me to ta Riri la, teka de nih wu mene wü ngü, te di esiti gbü jia ni, Me. Ah to wü Riri la, de wüh ngbü gbü nzö nih bala, zalü akoro di gbü sikipi, te kundu ye Abarayama la ena akoro tete, baka te Ngari Me mala nganga na ne. Te enga gina fü Me ato wü Riri ka-ye fü wü di enga Yisaraye, ah to ta fü wü *malayika ka-ye feke, fü wü malayika adu ato fü Müse, fü Müse adu asere fü wü di enga Yisaraye. ²⁰ Angü Müse ta de kpara te Me ngbü emala ngü gögö, de ah di emala fü wü kpara. Amba teka ngü ka vüngüte te di ezungba wü Me ake Abarayama ne, gara kpara te reke ngü la esüka ewü nda ma, 'duwa Me kpikpi ye, te mere ngü la teka züka maguma ye.

²¹ Yi ngbü efi, gü ba, ngü ka Riri ta te Me to gömö Müse, ena afü ngü te Me mala fü Abarayama ne? A'a, Me mala ngü 'basu 'basu nda de. Amba si-ngü gbü Riri te Me to fü Müse ne, ah teka aküwa kpara nda de. Ah teka areke kpara gbü jia Me kphah de. ²² Me to Riri la teka agü tamu *siti ngü, te wü kpara ngbü emere, baka te wüh ba gbü Ngari Me, gü ba, wü kpara füh kotö ne 'buru ngbü esa wazi siti ngü. Tek a ngü la, wü kpara, de te ewü to maguma wü fü Yesu Kurisito ne, ena aküwa bü duu me-wü.

Dene ngü te Me fü nih eyi ba wü di ye tete

‡ **3:10** 3:10 Mü ena amaka ngü la gbü buku ka Manda nga Riri 27:26. § **3:11** 3:11 Mü ena amaka ngü la gbü buku ka Abakuka 2:4. * **3:12** 3:12 Mü ena amaka ngü la gbü buku ka Riri ka Gele ka wü Levi 18:5. † **3:13** 3:13 Mü ena amaka ngü la gbü buku ka Manda nga Riri 21:23. ‡ **3:16** 3:16 Mü ena amaka ngü ka vüngüte ka wü Me ake Abarayama la gbü Gina Ngü 15.

²³ Ta gügü te engä gina, o Yesu Kurisito koro la de, *Riri ka Müse zoro ta wü kpara füh kotö ne 'buru, o ewü baka labi. Ngü la mere te-ye zalü koro di gbü sikipi, te Me tima Yesu Kurisito füh kotö ne, teka aküwa wü kpara, te ewü ena ato maguma wü fefe. ²⁴ Angü Riri la ngbü ta baka kpara te ngbü egü tamu züka kaje ka Me fü nih, zalü te Yesu Kurisito koro tete, fü nih ato maguma nih fefe. Fü Me adu aceka nih ba züka wü kpara ka-ye teka ngü ka Yesu. ²⁵ Titine baka te ngü ka Yesu koro eyi ne, nih du ngbü esa wü Riri la nda-nih tine de, angü nih küwa eyi teka ngü ka Yesu.

²⁶ Angü te mü to maguma mü eyi fü Yesu Kurisito la, Me ena aceka mü ba ye ye, angü mü lala eyi eküte Ye ni, Yesu. ²⁷ Angü gbü sikipi ta te yi za *babatiza tete, yi gü ba, ani le eyi alala eküte Yesu Kurisito. Fü ngü ka Yesu adu afü yi *nzila, baka kpara te to züka bu bongo eküte ye. ²⁸ Te di bala, Me ngbü eceka nih gbü jia ye 'buru ba wü di ye. Anga te mü de engä *Yisaraye, anga *ganzi kpara, ah ba ngü de. Anga te mü di de mere kpara, anga kükürü kpara baka labi, ah ba ngü kphah de. Anga te mü di de komoko, anga würose la, ah ba ngü kphah de. Nih 'buru de wü di Me, teka ngü ka Yesu Kurisito, angü nih lala eyi eküküte. ²⁹ Kphah bala, te mü de *kpara ka Yesu Kurisito la, mü koro kphah eyi kundu ye *Abarayama. Te di bala, mü ena aküwa kphah ba e ta te Me mala fü Abarayama ne.

4

¹ Gara ngü te ma ele amala fü yi, ah dene. Ah baka ngü ka mbarase cükü' daye, te wö ye na di de mere miri. Te mbarase la ga koro eyi mere komoko la, ah ena amaka wazi, angbü sidi nga wö ye. Amba, o engu di la mba vürü jaji, wawazi nda ma. Ah ka-ye la kphah baka labi. ² Angü wü gara kpara ladü, te ewü ngbü eri engu, da eceka kpi fütanganga. Ngü ma, te engu di bü ye mere kpara la, ah ena angbü fi bü da eje riri ka wü kpara la, zalü gbü sikipi te wö ye na ena awu, gü ba, engu koro eyi komoko.

³ Wü di engä wüna, nih ta kphah 'buru bala. Angü nih ngbü ta esa wazi *siti wü di engä me füh kotö ne baka wü labi, o nih je ngü ka Me mbi mbi la de ne. ⁴ Amba titine, sikipi de te Me fe teka ngü la koro eyi, angü Me tima Ye ye eyi füh kotö ne teka aküwa nih. Wüh bi engu gbü nguwa *Yisaraye, kphah baka nih wü kpara füh kotö ne. Fü engu angbü kphah da eje *Riri ka Müse. ⁵ Me tima engu teka afuru nih, gbü ku ka riri ka diri gele, afü nih 'buru wü di ye. ⁶ Te di bala, yi ti eyi awu, gü ba, ani de wü di Me fanü, angü Me tima *Nzila Wazi ye eyi, de ah ngbü emaguma

nih, adi eto wazi fü nih, teka fü nih aku gba fü Me, gü ba, "Aba! Wüba!" ⁷ Tekä ngü la, yi de wü labi tine de, angü Me fü yi eyi ba wü di ye. Te di bala, Me ena ato *küküwa, de mere wazi ye fü yi, angü titine yi eyi de wü di Me fanü, teka ngü ka Yesu.

Dene ngü te ma le amala fü yi,

yi mere e adu gbü ngü ka riri ka diri gele de

⁸ Ta gügü, o yi le ngü ka Me la de ne, yi ngbü ta wü labi ka *siti wü di engä me, te ewü di de zu Me fanü fanü de ne. ⁹ Amba titine, yi le ngü ka Me eyi. ¹⁰ Kphah bala, Me le yi eyi ba wü di ye. Te di bala, ah mere baye, te yi le adu alala gbü töndö riri ka diri gele? Ngü la ti areke yi gbü jia Me nda de. ¹⁰ Ma je, gü ba, yi ngbü eo fingangü ka-yi teka adi emere gele ka gara wü sikipi, baka to re, de wü fe, bete laki ka wü e. Yi ngbü efi nda-yi, gü ba, ngü la ti eyi areke ani gbü jia Me? ¹¹ Ngü ka-yi la ngbü eto mere cinga de fingangü fere, angü, te yi dürü eyi bala la, mere kpeke tima, ta te ma mere teka yi ne, ena adu angbü kükürü.

¹² Wü di engä wüna, ma ngbü enda'ba te-ra fü yi, gü ba, yi fü te-yi, de yi ce ngü ka gele la kphah baka ra, angü ma ce ngü ka gele ka-a, wü di engä *Yisaraye ne, eyi, du ngbü baka yi, wü *ganzi kpara. Yi fi la ngü teka gina kokoro ka-ra kpara yi. Gbü sikipi la, yi ngbü ta emere wü züka ngü fere. ¹³ Yi wu kpo, gü ba, si-ngü ta te ma koro tete kpara yi la, ah teka te ma ngbü ta eke ake. Fü ra akpo da emala ngü ka Yesu fü yi, o wazi ra di ma. ¹⁴ Keke kara la ngbü ta fü yi baka re-ngü, amba, gbü wü ngü la 'buru, yi ce ra nda-yi de. Yi za ta ra gbü müri, baka te ma di de *malayika ka Me, anga cu baka Yesu Kurisito. ¹⁵ Ta gbü wü sikipi la, ngü ka-ra to mere tadu fü yi. Amba titine ngü la du fü te-ye, neh baye baye? Gbü wü sikipi la, ma wu eyi, gü ba, te ah ena atü ta atü fü yi la, de bane, yi gbi jia yi cu eyi, to fere, angü yi le ra ta fa sü. ¹⁶ Titine ma du koro ba vügü ka-yi ne, bü teka ngü ka Me, te ma ngbü emala fü yi ne?

¹⁷ Wü müri wu la ngbü ele agbeke fingangü ka-yi kpara wü, angü fingangü ka-ewü ka-ye esiti. Wüh ele aye süka nih de nih ma, teka fü yi ace nga a, adi efa nga ani. ¹⁸ Te wü kpara la ena ale ta yi de maguma wü fanü la, de bane, ah ena adi de züka ngü. Amba ma wu kpo, gü ba, ngü ka-ewü ka-ye 'basu 'basu, angü wüh ngbü emere ngü la bü teka adi efiti yi. Angü ta, te ma di esüka yi kpala ne, yi le ngü ka-ra fa sü. Yi du fü te-yi, neh teka ne? Ma ngbü emala fü yi kpekepe, gü ba, tenga wü sikipi 'buru, te ma ladü esüka yi,

anga te ma di kphah ma la, ah le de yi lala fi bü te ngü, ta te ma mala fü yi ne. ¹⁹ Wü di engara, ma le yi fa sü. Amba ma ngbü engbü de mere cinga teka ngü ka-yi, teka ngü te ma je, gü ba, yi kpo eyi da eje wu ka wü mürü mani la. Ngü ka-yi la, ngbü eto cinga fere, baka cinga ka wüüruse te ngbü ekeke teka ayaka. Cinga la ti anza de, zalü te yi ena ace ngü ka wu ka-ewü la asidi, adu alala gbü ngü ka Yesu Kurisito. ²⁰ Ma le ta de nih ngbü tundu de nih ma titine. Angü, te nih ena angbü ta de nih ma tundu la, de bane ma ti eyi awu züka kaje, te ma ena arı yi di. Titine maguma ra kolo eyi tuu! teka ngü ka-yi. Ma ena amere baye?

Dene ngü ka Sara ake Agara

²¹ Te yi gü ba, ani le angbü esa *Riri ka Müse la, ah le de yi fi nga ngü, ta te *Müse ba gbü *Ngari Me. ²² Angü Müse ba ta ngü, gbü Gina Ngü teka *Abarayama, gü ba, Abarayama bi ta wü jaji komoko 'basu.* Ah bi ta gara ye eküte Agara, te di de labi ka-ewü ne. Amba gara ye, ah bi engu eküte Sara, te di de zu wara ka. ²³ Ngü ka wü jaji la ka-ye kpikpi ye kpikpi ye. Angü mbarase de te Abarayama bi ake Agara ne, wü bi baka e te wü ngbü ebi wü jaji füh kotö ne. Amba, ye de te engu bi ake zu wara ye, Sara ne, wü bi de wazi ka Me, ba ngü te Me mala ta fü ewü, angü Sara gbe ka-ye ta eyi.

²⁴ Ngü ka wü wüüruse de 'basu ne, ah ka-ye de mani, teka asere fü nih ngü ka wü kaje 'basu, te wü kpara ena aküwa tete na. Ngü ka Agara ka-ye baka *Riri, ta te Me mala fü wü di engu *Yisarayeleye gömö Müse, kpa füh da de iri ye *Sinayi ne. Kükürü de, angü Agara ta de labi. Enganga na, de wü ata ye na, wü kphah de wü labi. Kpah bala, wü di engu *Yisarayeleye, ta te Me to wü riri ka gele la fü ewü, wü kphah baka wü labi esa wü riri la. ²⁵ Agara dela, ah baka da Sinayi.† Ah kphah baka Yerüsalema te di füh kotö ne. Angü wü kpara ka Yerüsalema ka-wü baka wü labi, te ewü ngbü esa mere bi wü riri ka gele la. ²⁶ Amba nih de wü labi nda-nih de! Nih ka-nih wü di engu Sara, nih de wü kpara ka to Yerüsalema, te di agbü kpi.‡ ²⁷ Ah kphah baka ngü ta te mürü dofo *Yisaya ba gügü gbü Ngari Me, teka ngü ka Sara, gü ba dene, "De-mü, wüüruse de te mü bi ye la de ne, ah le de mü ngbü de tadu, de mü tü karayi. Angü wü di engu mü ena asibi afa nda mene wüüruse, te ngbü efala mü ne, ka."§

²⁸ Te di bala, wü di engu wüna, ye de zu wü jaji, te wü bi yi gbü wazi ka Me, baka *Yisaka, kphah baka ngü ta te Me mala fü Abarayama. ²⁹ Ta gügü, engu Agara ngbü ta emere mene mbarase, de te ewü bi engu gbü wazi ka Me, ne esiti. Enatikine wü kpara, te ewü le ngü ka gele fa sü ne, ngbü emere nih kphah bala. ³⁰ Amba teka ngü la, wü ba gbü Ngari Me, gü neh fe? Ah gü ba, "Ye liki labi la, ake engu ye asidi. Angü engu labi la ti amaka e-nga-kpa wö ye baka mene mbarase, te wü bi ake Sara ne, nda de."*

³¹ Te di bala, wü di engu wüna, dela ngü te ti eyi asere fü nih, ga, "Nih de wü di engu labi de. Nih ka-nih nda-nih de wü di engu Sara, te di de zu wara Abarayama ne." Teku ngü la, nih mere e adu gbü riri ka diri gele tine de!

5

Dene ngü te ma le amala fü yi, de yi ce ngü ka gele asidi

¹ Wü di engu wüna, Yesu Kurisito küwa nih gbü ngü ka riri ka diri gele eyi asidi. Te di bala, ah le de yi rü kpekepe gbü ngü ka Yesu. Yi mere e adu arı gbü ngü ka riri ka diri gele tine de.

² Cu de-ra Pawülü, ma ngbü emala fü yi dene zu ngü. Te mü gü ba, ni ena ati esa *basa, teka fü ngü ka-ni areke gbü jia Me la, ah ba e te mü ceka ngü ka Yesu Kurisito ba töndö ngü kükürü. ³⁻⁴ Ma ngbü enda nga ngü ne fü yi kphah toto, gü ba, te mü o maguma mü teka ngü ka basa, teka fü ni aküwa gbü ngü la, mü du ri dela eyi gbü riri ka diri gele. Te ah ena adi ta bala, ah le ta de mü di emere wü ngü gbü riri ka gele ka wü *Yisarayeleye 'buru, teka fü mü aküwa gbü ngü la, angü mü ce ngü ka Yesu Kurisito eyi. Angü te mü ngbü efi, gü ba, ni ena aküwa teka ngü ka riri ka gele, ah ba e te mü gü ba, *küküwa te Yesu Kurisito to fü ni de *züka maguma ye ne, ah ka-ye de kükürü ngü. ⁵ Amba nda-nih, te nih di de wü *kpara ka Yesu fanü fanü ne, nih ngbü eo jia nih teka ngü ka Yesu Kurisito, te ena areke ngü ka-nih gbü jia Me de wazi ka *Nzila Wazi Me, angü nih to maguma nih eyi fefe. ⁶ Angü, te mü lala eküte Yesu Kurisito la, ngü ma, te mü ti eyi esa basa, anga te mü ti esa basa kphah de la, ah mere e de. Mere kpeke ngü, ah le de mü to maguma mü 'buru fü Yesu Kurisito, fü yi adi ele te-yi esüka yi.

⁷ Wayi, wü di engu wüna, yi ngbü ta emere ngü ka Yesu ereke areke. Yi du ce

* 4:22 4:22 Mü ena amaka ngü la gbü Gina Ngü 16, 21. † 4:25 4:25 Da Sinayi la, ah gbü tö ka wü Arabi. ‡ 4:26

4:26 Mü ena amaka ngü ka to Yerüsalema gbü Ebere 12:22bete Ngü te sere te-ye 21:10-22:5. § 4:27 4:27 Mü ena

amaka ngü la gbü buku ka Yisaya 54:1. * 4:30 4:30 Mü ena amaka ngü gbü Gina Ngü 21:10.

ngü la neh baye? E-fiti yi, fü yi adu ace ngü la, neh da? ⁸ Me le ngü la bala nda de, angü ah i yi me-ye, de yi ce ngü ka diri gele, adu alala gbü ngü ka Yesu Kurisito. ⁹ Ah baka ngü te wü kpara ngbü emala, gü ba, te e biringbö zi azi esüka wü bu ye la, ah ena asiti wü gara la 'buru! ¹⁰ Ma wu eyi, gü ba, yi ti ace ngü ka Miri Yesu nda-yi de, angü nih ngbü 'buru elala eküküte. Amba kpara de te ngbü esiti fingangü ka-yi la, anga engu neh da? Me ena ato mere kuru tete.

¹¹ Wü di enga wüna, wü gara kpara ngbü esu wu eküte ra, gü ba, ma ngbü erü wü kpara, gü ba, ah le de wü kpara 'buru ti esa basa, teka fü ewü aküwa. Fingangü ka-yi kpah bala? Te ma ena angbü ta erü wü kpara bala la, amba wü di enga Yisarayeles ngbü ekpü ra, neh teka ne? Angü ngü te ke te wü di enga Yisarayeles la, ah de ngü te ma ngbü erü ewü di, gü ba, ngü te ena aküwa kpara, ah 'duwa de ngü ka kpi ka Yesu Kurisito. Gara ngü kpala kpikpi ye, te ena aküwa wü kpara, nda ma. ¹² Wü kpara de te ewü ngbü esiti fingangü ka-yi de bala, ah ti fü kina ka Me angbü gbü nzö ewü.

Dene ngü ka wazi ka Nzila Wazi Me

¹³ Wü di enga wüna, Me küwa yi eyi gbü ngü ka riri ka diri gele fanü. Te di bala, yi ti angbü labi ka riri ka diri gele la nda-yi tine de. Amba ma ngbü emala fü yi kpekpeke, gü ba, yi mere e afi, gü ba, "Ani ti eyi amere wü *siti ngü, ba e te ani ngbü ele," ne, nda-yi de. Ah le fü yi adi ele te-yi de maguma yi 'buru, da ele ta-ngü te wü bu yi. ¹⁴ Angü mere *Riri te Me ngbü ele de nih mere ne, gü ba, "Mü le wü bu mü kpah baka te mü ngbü ele küte mü." ¹⁵ Amba, te yi ngbü ega yiki da ewü nga esüka yi la, de yi ceka 'be, angü yi ena amörö te-yi, fü tima ka-yi asiti 'buru gbü ngü la!

¹⁶ Wü di enga wüna, dene ngü te ma ele emala fü yi. Ah le fü yi ao to yi, teka adi emere wü ngü, te *Nzila Wazi Me ena angbü egü tatamu fü yi. Yi mere e ale siti kaje ka gümü ngü de füh kotö ne de.

¹⁷ Angü gümü ngü de füh kotö ne le te-wü ake ngü ka Nzila Wazi Me nda-wü de, wüh ka-wü de wü vügü. Te di bala, te Nzila Wazi Me to wazi fü yi de la, wazi yi, te yi ena amere ngü ka Me di, ena adi kpah ma. ¹⁸ Amba, te yi je ngü ka Nzila Wazi Me, ngü ka-yi ena areke gbü jia Me. Te di bala, yi du angbü ba labi ka riri ka diri gele ne tine de.

¹⁹ Yi wu siti gümü ngü ka kotö ne kpo. Wü kpara te ewü le wü ngü la ngbü emere waza, da efi nga wü ngü ka lümü, da emere wü ngü ka yala. ²⁰ Gara ewü ngbü emere gele ka faranda, da eo siti rü gbü

nga wü bu wü. Gara ewü ngbü ekpü te-wü, da ewü nga, da emere gü esüka wü, da emere kanga. Gara ewü de wü mürü gü, te maguma ewü ngbü enzu kere kere. Gara ewü ngbü ega yiki, fü ewü angbü eye süka wü. Gara ewü de wü mürü zü, anga mürü maguma, ²¹ te ewü engbü emere kü, da ekpi gümü e. Gara ewü to te-wü angbü eküya de fi, da elo siti bi. Dela ngü te wü kpara, te ewü le ngü ka gümü ngü ka kotö ne, ngbü da emere, kpah de gara wü siti ngü baka ewü la. Titine ma ngbü emala fü yi kpekpeke, kpah baka ta te ma mala fü yi te enga gina, gü ba, wü kpara, de te ewü ngbü emere wü siti ngü de bala, wüh ti aküwa gbü sü ka Me agbü kpi nda-wü de.

²² Amba ngü ka wü kpara, de te *Nzila Wazi Me ngbü engbü guvu ewü ne, ka-ye kpikpi ye. Angü wüh ngbü ele te-wü de wü bu wü. Wüh ngbü engbü de tadu ka Me emaguma wü. Wüh ngbü engbü de Nzila ziii, de ngboro maguma. Wüh ngbü engbü fi bü da ele ta-ngü te wü bu wü, da emere züka ngü fü ewü. Maguma ewü ngbü engbü ka-ye 'buru biringbö. ²³ Maguma ewü ka-ye baka nda wü jaji, angü wüh cu ngü wü nda-wü de. Wüh ngbü etüka te-wü, teka wü gümü ngü ka küte, atüka. Dela 'buru wü ngü te wü kpara, de Nzila Wazi Me guvu wü ne, ngbü emere. Angü *Riri ka Müse tiri züka wü ngü de bala kpah de. ²⁴ Tekä ngü la, wü kpara te ewü to maguma wü eyi fü Yesu Kurisito ne, wüh ce ngü ka gümü ngü ka kotö ne eyi 'buru. Ah baka te wüh za gümü ngü la, bere eyi kpah eküte *rü gbegete, tundu de wü Yesu.

²⁵ Wü di enga wüna, titine nih küwa eyi teka ngü ka Nzila Wazi Me. Te di bala, ah le fü nih adi emere wü ngü, de te Nzila Wazi Me ngbü erü nih di ne. ²⁶ Nih mere e adi ecu ngü nih de. Nih mere e aga yiki, da ewü nga esüka nih kpah de. Nih mere e angbü de kü, da ekpi gümü wü e ka wü bu nih kpah de.

6

Dene ngü ka le-te te yi ena ele te-yi di

¹ Wü di enga wüna, te biri kpara esüka yi mere *siti ngü la, yi de te yi di de wazi *Nzila Wazi Me guvu yi ne, ah le de yi lügü engu te züka kaje. Amba ah le de yi mere ngü la fefe de gu maguma yi, da erü engu ferre, teka de ah fü maguma ye, ah du gbü ngü ka Me. Amba cu de-mü, de te mü ngbü erü engu la, ah le de mü ceka te-mü mbi, angü *Satana ena afiti mü, fü mü ati gbü *siti ngü kpah bala.

² Ah le fü yi adi ele ta-ngü te wü bu yi, gbü wü ngü te ngbü emere ewü 'buru.

Angü te yi ngbü emere wü ngü la ereke areke bala la, yi ngbü emere dela eyi riri ta te Yesu Kurisito to fü nih ne. ³ Mü mere e, acu ngü mü, gü ba, ni de mere kpara meni, ni ti ale ta-ngü te wü bu ni de, mü mere e amere bala de. Angü mü ngbü dela efiti te-mü de tete-mü. Mü ka-mü gbü jia Me baka töndö kpara, te wu ngü de.

⁴ Ah le de mü di ere ngü ka-mü, te mü ngbü emere ne, ereke areke feke. Te mü wu, gü ba, ni mere tima ka-ni eyi 'buru mbi la, mü ti eyi angbü de tadu teka ngü la. Amba mü mere e angbü ecu ngü mü, gü ba, "Ngü ka-ni fa nda wü bu ni eyi," ne de. ⁵ Angü ah le de mü mere nda-mü tima, de te Me to fü mü ne, cu me-mü.

⁶ Te gara kpara ngbü ele ta-ngü te mü, da eri mü de ngari Me la, ah le de mü di kphah ele ta-ngü tete, de mene wü e te di ladü esaka mü.

⁷ Wü di enga wüna, yi mere e afiti te-yi kü de, angü kpara ti afiti Me nda de. Angü Me wu wü ngü ka-nih 'buru kpo. Te kpara ru ne nguwa ne gbü yi ka-ye la, te gara engu ena awa fi bü mene ri e, de te engu ru gbü yi ka-ye la. ⁸ Kpah bala, te mü ngbü emere fi bü wü mene siti ngü, baka te mü ngbü ele la, mü ena amaka kpi gbü ngü la. Amba te mü ngbü emere wü ngü de te Nzila Wazi Me le me-ye la, mü ena aküwa fi mere badi.

⁹ Wü di enga wüna, ah le de nih ngbü fi bü da emere wü ngü, te ena areke gbü jia Me. Nih lala fi gbügbü, nih mere e ambü de. Angü te nih ce ngü la de la, nih ena amaka *küküwa te gara, gbü sikipi te Yesu ena adu akoro tete na. ¹⁰ Te di bala, te ah ti eyi fü nih la, ah le de nih di ele ta-ngü te wü kpara 'buru. Amba kpeke ngü, ah le de nih, wü *kpara ka Yesu, di ele te-nih ale esüka nih.

Dene adu riri ka-ra fü yi

¹¹ Wü di enga wüna, yi ceka la ngü de te ma ba ne eceka, ma ba cu me-ra de kpa ra, memere memere bala.

¹² Wü kpara de te ewü ngbü esiti fingangü ka-yi, gü ba, ah le de yi ti esa *basa ne, ngbü emere ngü la kükürü de, angü wüh le de ngü ka-ani reke areke gbü jia wü kpara. Dela wü kpara, te ewü le amaka cinga teka ngü ka Yesu, nda-wü de. ¹³ Wüh gü ba, ani le ngü ka gele ka wü *Yisaraye fa sü. Tek a ngü la, fü ani alala te ngü ka basa. Amba mere bi wü riri ka gele la ladü, te ewü mere mbi mbi nda-wü de. Wüh ngbü ele bü, de yi di eti esa basa, teka fü ani adi egbo nga ani tete, gü ba, yi le ngü ka-ani eyi. ¹⁴ Amba nda-ra, ma le agbo nga ra bala nda-ra de. Ngü biringbö te to tadu fere, ah bü nzö ngü ka Miri ka-nih Yesu Kurisito, angü ah

kpi füh *rü gbegete teka aküwa nih. Tek a ngü ka Yesu, wü ngü de füh kotö ne 'buru koro eyi gbü jia ra baka zizi-e. Kpah bala, wü kpara füh kotö ne ngbü eceka ra baka töndö e teka ngü ka kpi ka Yesu. ¹⁵ Te mü ti eyi esa basa, anga mü ti esa basa di de la, ah mere e kphah de. Amba mere ngü te ena areke gbü jia Me, nda bü te Me fü mü eyi ba züka kpara ka-ye la. ¹⁶ De-yi, wü kpara 'buru, de te Me fü yi eyi ba wü kpara ka-ye fanü fanü ne, ma ngbü eku gba fü Me teka yi, de engu wu cinga yi, de ah to gu ngü emagama yi.

¹⁷ Akpo enatikine, ah le de wü kpara mere e ambü ra, Pawülü, tine de. Kükürü de, angü nga wü ka de eküte ra ne, ah sere ngü ka-ra eyi, gü ba, ma zu de kpara ka Yesu Kurisito.

¹⁸ Wü di enga wüna, Miri ka-nih Yesu Kurisito ngbü de yi 'buru, da eto wazi fü yi de *züka maguma ye. Ah di bala!

Dela adu ngü te ma mala fü yi, de-ra Pawülü.

Dene köcökpa te Pawülü ba fū wū kpara ka Yesu agbū Efeso Efeso

Masere si-ngü

Efeso ta de mere kötī gbū tō ka Turukiya, ta te wūh ngbū ei, gü ba, Asiya ne. Gbū ebabata ndoro ka Pawülü da emala ngari Me, fū engu anü akoro agbū Efeso. Fū engu angbū kpala teka wū re 'basu anga bata. (Mü ena amaka ngü la gbū Mürü Tima 19.) Pawülü ngbū ta eba köcökpa ne, o engu di gbū ku agbū *Rüma. (Mü ena amaka ngü la gbū Efeso 3:1; 4:1.) Fū ah atima köcökpa ne fū wū *kpara ka Yesu agbū Efeso, esaka gara kiri ye de iri ye Tikiko. (Mü ena amaka ngü la gbū Efeso 6:21-22.) Buku ne, ah nzō fū wū kpara ka Me gbū sü biringbö nda de. Ah ka-ye fū mere bi wū kpara, te ewü ena angbū etanga.

Mere ngü gbū köcökpa ne, ah teka asere, gü ba, Yesu Kurisito de Mere Miri, te Me o gbū nzō wū kpara fūh kotō ne 'buru, kpah gbū nzō wū *malayika agbū kpī. Wū *siti wū di engu me, wūh kpah 'buru esa lölö na. (Mü ena amaka ngü la gbū Efeso 1:9-10, 21-22.) Te di bala, ah le de nih, wū kpara ka Yesu, nih ngbū da ele te-nih ba nguwa wū kpara biringbö. (Mü ena amaka ngü la gbū Efeso 4:1-6.)

Wū ngü te mü ena amaka gbū köcökpa ka wū Efeso ne, wūh dene.

Sapita 1-3 Mere zūka ngü, de te Me mere fū nih, teka ngü ka Yesu Kurisito ne

Sapita 4-6 Ah le de nih ngbū fi bü da emere wū ngü, te ena adi ereke gbū jia Me

Dene mandī ka Pawülü fū wū kpara

ka Yesu agbū Efeso

¹ De-ra Pawülü, de te Me fe ra *mürü tima ka Yesu ne, ma ba köcökpa ne fū yi me-ra, wū *kpara ka Yesu te yi di agbū Efeso. Angü ma wu eyi, gü ba, yi ngbū ele ngü ka Yesu *Kurisito de maguma yi biringbö. ² Wō nih Me ake Miri ka-nih Yesu Kurisito di de yi, da eto gu ngü fū yi, de *zūka maguma wū.

Dene wū zūka ngü te Me mere fū nih guvu Yesu Kurisito

³ Nih gbo nga iri Me, Wō ye Miri ka-nih Yesu *Kurisito, angü engu to mere bi wū zūka ngü, te di agbū kpī ne, eyi fū nih, teka te nih ngbū eyi elala eküte Yesu Kurisito. ⁴ Ta gügü, o Me mere kotō ne

la de, ah fe nih ta eyi guvu Yesu Kurisito, teka de nih ngbū ba wū zūka wū kpara ka-ni *nzila. ⁵ Me le nih eyi fa sü, fū engu afe nih kü gügü, teka fū ni, Me, afü nih baka wū di ni, teka ngü ka Yesu Kurisito. Ah le amere ngü la bala, angü ah de ngü te reke gbū jijia fa sü. ⁶ Te di bala, nih gbo nga iri Me, angü ah mere mere bi wū zūka ngü eyi fū nih, de *zūka maguma ye, teka ngü ka Ye ye, Yesu Kurisito, te engu le cu fa sü ne.

⁷ Yesu Kurisito kpi afa nih gbū *siti ngü ka-nih. Tekan ngü la, Me boro siti ngü ka-nih eyi guvu ye 'buru asidi. Te di bala, nih küwa eyi esaka *Satana. Nih gbo nga iri Me, angü engu de mürü zūka maguma, te le nih fa sü! ⁸ Nih gbo nga iri Me, angü wū zūka ngü, te engu to fū nih de zūka maguma ye, teka ngü ka Yesu ne, sibi eyi fa sü. Nih gbo nga iri Me, angü Me to wazi eyi fū nih, teka fū nih awu si-ngü gbū ngü ka-ni, Me, di. ⁹⁻¹⁰ Ngü la wo te-ye ta awo, fū Me adu asere si-ngü la fū nih enatikine. Ngü la, ah de ngü te Me ena aza Yesu Kurisito, ao ba Mere Miri gbū nzō wū kpara fūh kotō ne 'buru, kpah de wū *malayika agbū kpī. Me ena amere ngü la anza gbū *adu sīkpī, angü engu fi ngü la ta eyi bala kü gügü.

¹¹ Me fe nih ta eyi gügü, o engu mere kotō ne la de, de nih ngbū baka wū zūka kpara ka-ni guvu Yesu Kurisito. Ah mere ngü la gbū fingangü ka-ye, angü ah ngbū emere wū ngü ka-ye 'buru baka te engu le. ¹² Tekan ngü la, de-a wū di engu *Yisaraye, de te a di de gina wū kpara, te a to maguma a fū Yesu Kurisito ne, a ngbū egbo nga iri Me, teka mere wazi kaka-na la! ¹³ Ah le de yi, wū *ganzi kpara, di egbo nga iri Me kpah bala, angü Me to wazi ka *Nzila Wazi ye eyi fū yi, baka tere eküte yi, baka ngü ta te engu mala gügü fū wū kundu nih. Angü, yi je zu ngari Me gömō a, fū yi adu ato maguma yi fū Yesu Kurisito, fū yi aküwa gbū ngü la. ¹⁴ Me to Nzila Wazi ye fū nih, baka gina takpa te ngbū esere zūka ngü te gara, te nih ena amaka kpaka Me, gbū adu sīkpī. Te di bala, nih ti eyi awu, gü ba, nih de wū kpara ka Me fanü, angü Me ena aküwa nih te gara, agbū sü ka-ye agbū kpī, fū nih angbū eku ngüngü na fi mere badi.

Dene ngü te ma ngbū eku gba di fū Me

¹⁵⁻¹⁶ Te di bala, wū di engu wūna, ma ngbū egbo nga iri Me teka ngü ka-yi, ra de biti. Angü ma je nga yi, gü ba, yi to maguma yi eyi 'buru 'buru fū Miri ka-nih Yesu Kurisito, kpah da ele te-yi de wū kpara ka Me 'buru. Fū ra angbū efi nga yi, da eku gba fū Me teka yi kpekpeke. ¹⁷ Me de mere Wō nih agbū kpī, te to wazi fū

Miri Yesu Kurisito me-ye. Ma ngbü eyi-ta Me teka yi, de ah to Nzila Wazi ye fü yi. Fü Nzila Wazi la asere ngü ka Me fü yi, teka fü yi awu ngü ka Me la di, mbi mbi mbi. ¹⁸ Ma ngbü kpah eyi-ta Me, de ah aü fingangü ka-yi, fü yi awu, gü ba, Me le ani eyi fa sü, fü ah ä ani, teka fü ani angbü zu wü didi na. Tekä ngü la, engu mala eyi, gü ba, ni ena aküwa yi fi mere badi, ato mere bi züka ngü fü yi, agbü sü ka-ye agbü kpä, teka ngü ka Yesu. Fü nih angbü kpala tundu de wü Me gbü mere tadu! ¹⁹ Ah le kpah fü nih awu mere kpeke wazi ka Me, te ngbü emere tima emaguma nih, da ele ta-ngü te nih ne, angü nih to maguma nih eyi fefe. ²⁰ Wazi ka Me la, ah de wazi ta te engu sere eyi fü nih, wü kpara ka-ye, gbü ngü ka Yesu Kurisito. Angü, ah zükü ta Yesu gbü kpi, fü ah aza engu, ao ba Mere Miri, gbü kokpa ka-ye kpala agbü kpä. ²¹ Yesu Kurisito ka-ye de Mere Miri gbü nzö wü kpara, de wü ngü füh kotö ne 'buru, kpah gbü nzö wü *malayika ka Me agbü kpä. Wü *Satana, de wü *siti wü di engä Me, de wü me ka mbükü, de wü muruyi, wüh ngbü kpah 'buru esa lö Yesu, fi mere badi. ²² Angü Me o wü e 'buru esa lö, de ah ngbü bala, fi mere badi. Fü Me ao engu ba Mere Miri gbü nzö nih, wü kpara ka-ye. ²³ Nih, wü kpara ka Me, nih baka küte Yesu Kurisito. Kpah bala, Yesu baka nzö nih. Dela si-ngü te Yesu ngbü eto mere wazi di fü nih, teka tima ka-ye, de te nih ngbü emere ne. Kpah bala, engu de mere mürü wazi, angü wü e 'buru ngbü emaka wazi esakaka.

2

Dene ngü ka küküwa te Me to fü nih

¹ Wü di engä wüna, ta te yi le ngü ka Me la de ne, yi ngbü engbü ka-yi baka wü kövö, angü wazi yi teka amere ngü ka Me di ne ta nda ma, teka wü *siti ngü ka-yi, ta te yi ngbü da emere la. ² Angü ta gbü wü sikipä la, yi ngbü ta emere mere bi wü siti ngü, gegege baka nda wü kpara ka kotö ne. Yi ngbü ta kpah da eje riri ka *Satana, te di ka-ye de miri ka *siti wü di engä me ne. Angü te mü le aje ngü ka Me de la, mü ngbü ka-mü eyi esa lö Satana. ³ Fanü fanü, nih ta kpah 'buru baka wü kpara füh kotö ne, angü nih ngbü ta emere wü siti ngü baka te nih le. Tekä siti wü ngü ka-nih, de te nih mere la, ah le ta de Me to mere siti kuru te nih, kpah baka nda wü bu nih la.

⁴ Amba Me ka-ye de mere mürü *züka maguma, fü ah ayia awu cinga nih. ⁵ Angü nih ngbü ta gbü wü siti ngü ka-nih la, baka wü kövö. Fü Me ayia aküwa nih gbü kpi la teka ngü ka Yesu Kurisito. Te di bala,

nih küwa ka-nih nda-nih bü nzö teka züka maguma ka Me. ⁶ Me dünda nih eyi tundu de wü Yesu Kurisito. Fü ah aküwa nih gbü kpi la, teka ngü kaka. Fü ah adu afü nih, ao ba wü miri agbü sü ka-ye agbü kpä, kpah baka Yesu Kurisito. ⁷ Dela ngü te wü kpara 'buru ena adi ewu, gü ba, Me de mürü züka maguma, angü ah le nih fa sü, teka ngü ka Yesu Kurisito. ⁸ Angü Me küwa yi 'duwa bü nzö teka züka maguma ka-ye. Ah küwa yi bala, teka te yi to maguma yi fü Yesu. Mü ti aküwa te-mü de tete-mü nda-mü de. *Küküwa la, ah de takpa ka Me, te to fü nih kükürü, teka züka maguma ka-ye. ⁹ Yi efi nda-yi, gü ba, "Me küwa ani ne, neh teka züka wü tima ka-ani, de te ani ngbü emere ne?" A'a! Ah bala de. Ah küwa yi ka-ye bü duu teka züka maguma ka-ye. Te di bala, yi mere e adi egbo nga yi de. ¹⁰ Angü Me küwa nih, fü ah adu afü nih ba wü di ye, teka ngü ka Yesu Kurisito. Tekä ngü la, fü ah adu ato wazi fü nih, teka de nih di emere wü züka ngü di, angü engu le kü me-ye bala gügü.

Dene ngü te nih di tine eyi 'buru nguwa kpara biringbö

gbü ngü ka Yesu

¹¹ De-yi, te yi di de wü *ganzi kpara ne, yi fi la nga ngü ta te a, wü di engä *Yisarayeleye, ngbü emala tüngü yi gügü ne. A ngbü ta efala yi, gü ba, "Me le ngü ka-yi nda de, angü yi ti esa *basa de. Me ngbü ele ka-ye bü nzö ngü ka-a kpi a." ¹² Angü fanü fanü, ta gbü wü sikipä la, yi wu ngü ka Yesu nda-yi de. Yi de wü kpara ka Me ta kpah de. Yi de *vüngüte ka Me kpah de. Züka ngü te Me mala, gü ba, "Ni ena amere fü wü kpara ka-ni ne," yi wu ta kpah de. Tekä ngü la, yi ti ta aküwa de, angü yi wu ngü ka Me nda-yi kü de. ¹³ Amba titine, teka ngü ka kpi ka Yesu Kurisito, de-yi, ta te yi ngbü baka wü ganzi kpara ne, Me du fü yi koro di eyi gbamari kpaka ye, angü yi dünda te-yi tine eyi gbü mürü de wü Yesu Kurisito.

¹⁴ Te di bala, siti ngü ta te di ezengba a, wü di engä Yisarayeleye, de wü yi, wü ganzi kpara ne, Yesu reke ngü la eyi de *ngüte ye. Angü ah dünda nguwa wü Yisarayeleye, de wü ganzi kpara eyi 'buru biringbö. Siti makpü ta te di baka 'barangä, te ye süka nih ne, Yesu kuru eyi asidi, gbü sikipä te engu kpi tete na. ¹⁵ Yesu nza ngü ka mere bi wü riri ka gele ka-a, wü di engä Yisarayeleye ne, eyi 'buru, teka ngü ka kpi ka-ye. Te mü de engä Yisarayeleye, angä ganzi kpara la, mü ena aküwa bü duu te mü to maguma mü eyi fü Yesu la. Yesu mere ngü la bala, teka adünda wü di engä Yisarayeleye de wü ganzi kpara, ao baka nguwa kpara ngbee biringbö. Nih ti aye

süka nih tîne de. Angü engu to gu ngü eyi esüka nih. ¹⁶ Makpü ta te di esüka nih ne, Yesu Kurisito za eyi asidi, de ngüte ye. Angü ah kpi füh *rü gbegete, teka afü wü di enga Yisaraye, de wü ganzi kpara 'buru, ba wü di Me.

¹⁷ Yesu Kurisito koro füh kotö ne, teka amala nga *züka maguma ka Me fü yi, wü ganzi kpara, abe kpah te a, te a di de wü di enga Yisaraye ne. Angü ah reke ngü ezengba nih de wü Me ne eyi. ¹⁸ Ma mala ngü la bala kükürü de, angü nih maka kaje eyi de nih ma, te nih ena akoro tete kpaka Wö nih Me, teka ngü ka Yesu, angü *Nzila Wazi Me dündä nih eyi 'buru biringbö.

¹⁹ Te di bala, teka ngü ka Yesu, nih tîne eyi 'buru wü di kpara biringbö. Yi de wü ganzi kpara tîne de. Yi koro kpah eyi 'buru wü di Me, baka a, wü di enga Yisaraye. ²⁰ Titîne yi ngbü eyi biringbö de wü bu yi, wü kpara ka Me, baka wü züka teme, te wüh ngbü efa kambü ka Me di. Wü *mürü dofo ka Me ta gügü, de wü *mürü tima ka Yesu, kpo de tima la me-wü. Amba Yesu Kurisito nda-ye me-ye mere kpeke teme, te zoro ri kambü la gö gö gö! ²¹ Angü Yesu ngbü eji kambü la, ereke me-ye, baka e te engu le, de ah koro mere züka Kambü ka Me, te ena areke gbü jijia. ²² Te di bala, ah le de yi lala eküte Yesu Kurisito, teka fü yi angbü kpah baka züka Kambü ka Me, te Nzila Wazi Me ena angbü gbügbü na.

3

Dene tima te Me to fere, teka yi, wü ganzi kpara

¹ De-ra Pawülü, wüh zoro ra, gü gbü ku dene, teka ngü ka Yesu Kurisito, te ma ngbü emala ngangana fü yi, wü *ganzi kpara ne. ²⁻⁴ Angü Me tima ra me-ye, teka amala ngü ka *küküwa, de te ni, Me, le ato fü yi de *züka maguma ni ne. Ah sere ngü la me-ye fere, gü ba, "Ah le de ma di kpah emala ngü ka Yesu fü wü ganzi kpara," angü dela ngü te wü kpara wu gügü de. Ma fi, gü ba, yi je nga tima ka-ra la eyi gügü. Ma ba ngü ne fü yi bala, teka te yi te etanga wü ngü ne la, fü yi awu, gü ba, ma wu ngü, te wo te-ye awo, teka ngü ka Yesu Kurisito ne, eyi fanü fanü.

⁵ Me sere ta si-ngü la fü gina wü kpara nda de, ah sere fü wü kundu a kpah de. Amba titîne, gbü wü sikipi ne, Me du tima *Nzila Wazi ye eyi, teka fü ah asere si-ngü la mbölö fü a, wü *mürü tima ka Yesu, de wü *mürü dofo ka-ye, ka Me. ⁶ Te di bala, si-ngü de te Me sere ne, ah dene. De-yi, wü ganzi kpara, te yi lala eküte Yesu Kurisito la, Me ena afü yi, wü di ye, kpah baka a, wü di enga *Yisaraye. Fü nih

angbü tîne de nih ma baka nguwa kpara biringbö. Fü yi aküwa agbü sü ka Me agbü kpi fi mere badi, kpah baka ngü ta te engu mala fü wü kundu a ne.

⁷ Me fe ra me-ye, o ba mürü tima ka-ye, teka züka maguma ye. Fü ah ayia ato wazi fere, teka fü ra adi emala ngü ka Yesu di fü wü kpara mbi mbi mbi. ⁸ Fanü fanü, ngü ka-ra reke ta gbü jia Me nda de, ah reke gbü jia wü kpara ka tima ka Me, ta kpah de. Ma ka-ra ta bü baka töndö kpara kükürü. Fü Me ayia afe ra teka züka maguma ye, atima ra, teka de ma mala ngü ka-ni fü wü ganzi kpara, gü ba, "Ni ena aküwa wü, teka ngü ka Yesu Kurisito. Fü wü amaka mere tadu agbü sü ka-ni, agbü kpi kpala, te ti anza de." ⁹ Me le kpah de ma sere ngü ka-ni la mbölö fü wü kpara 'buru, gü ba, "Ah le de wü ganzi kpara küwa, kpah baka wü di enga Yisaraye." Dela ngü ta te Me fi gügü, o engu mere kotö ne la de. Ah wo ta ngü la fü wü kpara te enga gina ne awo, zalü koro di enatikine dene. ¹⁰ Amba titîne, Me le eyi asere mere kpeke fingangü ka-ye la fü kpara de wü *malayika agbü kpi, de wü *siti wü di enga me kpah 'buru, gü ba, "De-ni, Me, ni dündä wü ganzi kpara tîne eyi, de wü di enga Yisaraye, ba wü kpara ka-ni biringbö."

¹¹ Ah dündä wü ganzi kpara de wü di enga Yisaraye bala, teka ngü ka Miri Yesu Kurisito, baka ta te engu fi te enga gina, o engu mere kotö ne la de ne. ¹² Titîne, teka te nih to maguma nih eyi fü Yesu, da elala eküküte ne, nih ti akpe cürü tîne de, angü nih ti eyi akoro kpaka Me, de mere tadu emaguma nih, angü Yesu reke nih eyi gbü jia Me.

¹³ Te di bala, wü di enga wüna, maguma yi mere e agürü, teka ngü ka cinga te ma ngbü ezü gbü ku ne, de. Angü cinga de te ma ngbü ezü ne, ah teka tima te Me to fere teka ngü ka-yi ne. Ah le fü cinga te ngbü emere ra ne, ale ta-ngü te yi, da eto wazi fü yi gbü tima ka Me.

Dene ngü ka mere lele ka Yesu fü nih

¹⁴⁻¹⁵ Tekä ngü la, ma ngbü ebu nzökuta ra engagira Me, da eyi-tata teka ngü ka-yi. Angü Me de mere Wö nih, te o nih, de nguwa wü kpara füh kotö ne 'buru me-ye, kpah de wü *malayika agbü kpi mini. ¹⁶ Ma ngbü kpah eyi-tata, de ah to *Nzila Wazi ye emaguma yi, teka fü yi adi erü di kpekepe gbü ngü ka Me, angü wawazi fa sü. ¹⁷ Kpah bala, ma ngbü eyi-tata, teka de Yesu Kurisito di engbü emaguma yi, angü yi to maguma yi eyi fefe na. De ah to wazi fü yi, teka fü yi arü di kpekepe gbü ngü ka Me, teka fü yi adi ele engu de maguma yi 'buru, fü yi adi kpah ele te-yi esüka yi de wü bu yi. ¹⁸ Kpah bala,

fü yi adu awu, gü ba, Yesu Kurisito le yi eyi cu de maguma ye 'buru, kphah de wü gara kpara ka-ye mini. Angü lele ka Yesu, te engu le nih di la, ah ka-ye cucu, ah ga kphah fa sü. Lele kaka la fü te-ye nda de, ah ka-ye fi bü memere da ye. ¹⁹ Te di bala, ma ngbü eyi-ta Me, de ah ü jia yi, teka fü yi awu lele ka Yesu la mbi mbi mbi. Angü kpara ti awu ngü la, anza 'buru de. Te di bala, wü züka ngü ka Me, de wazi ka Me, ena asi emaguma yi gbe.

²⁰ Nih gbo nga iri Me angü engu de mere mürü wazi.

Ah ngbü eto wazi ye emaguma nih, teka fü nih adi ereke ngü ka-nih di. Wü ngü 'buru te nih ngbü eyi-tata di ne, ah ti eyi amere fü nih.

Fü ah angbü emere kphah wü gara ngü, te fa fingangü ka-nih afa.

²¹ Nih gbo nga iri Me, angü nih 'buru de wü kpara kaka.

Nih gbo nga iri Me, teka ngü ka Yesu Kurisito.

Nih gbo nga iri Me enatikine, zalü fi mere badi.

Ah di bala.

4

Dene ngü te yi ena angbü emere esüka yi

¹ Wü di engu wüna, dene ngü te ma ele amala fü yi kpekpeke, de-ra Pawülü, angü wüh gü ra gbü ku ne, teka ngü ka Miri Yesu Kurisito. Ah le de yi di emere wü ngü te ena areke gbü jia Me, angü engu fe yi me-ye, zu wü kpara ka-ye tete. Dela mere züka ngü te Me mere fü yi de *züka maguma ye. ² Ah le de yi di ele te-yi esüka yi, gbü wü sikipi 'buru. Yi di angbü ziii, da emere wü ngü 'buru ferrre. Yi mere e ao te-yi ba mere kpara de. Te gara kpara mere mü esiti la, mü mere e alügü siti ngü la fefe de. ³ Yi ngbü de maguma yi biringbö, de wazi ka *Nzila Wazi Me. De yi gu maguma yi, fü yi angbü kphah de gu ngü ka Me esüka yi. ⁴ Angü nih, wü *kpara ka Yesu Kurisito füh kotö ne, nih 'buru biringbö. Nzila Wazi Me, te ngbü eto wazi fü nih, ah ka-ye kphah ngbee biringbö. Ngü ka *küküwa, te nih ngbü eo jia nih tete na ne, ah kphah biringbö. ⁵ Miri ka-nih ka-ye kphah biringbö. Me, te nih to maguma nih fefe ne, ka-ye kphah biringbö. *Babatiza te nih za, nih za kphah 'buru te iri kpara biringbö. ⁶ Te di bala, Me ka-ye ngbee biringbö, te di de Wö nih 'buru. Engu ngbü gbü nzö nih 'buru me-ye. Ah ngbü kphah angbü emaguma nih 'buru. Kphah bala, ah ngbü eto wazi fü nih 'buru me-ye.

⁷ Amba wazi te Yesu Kurisito ngbü eto fü nih adi emere tima di ne, ah ka-ye kpi kpi ye kpi kpi ye, baka te engu le. ⁸ Dela si-ngü ta te wüh ba gbü *Ngari Me, gü ba, "Gbü sikipi te Miri ka-nih za esaka wü vügü ka-ye tete, fü ah ayia ago angbü kpi. Fü ah agafa kphah züka takpa fü wü kpara ka-ye 'buru."* ⁹ Wüh ba ngü la teka Miri Yesu. Angü engu de kpara te yia agbü kpi, koro füh kotö akine. ¹⁰ Te Yesu mere tima ka-ye füh kotö ne nza tete, fü ah adu ago agbü sü ka Me, agbü kpi. Te di bala, Yesu de Mere Miri gbü nzö wü kpara füh kotö ne 'buru, be kphah te wü *malayika agbü kpi.

¹¹ Ah de Yesu, de te to wazi fü wü kpara ka-ye kpi kpi ye kpi kpi ye, teka amere tima ka Me di ne. Ah to wazi fü wü gara kpara, fü ewü angbü nda-wü wü *mürü tima ka-ye. Wü gara ngbü nda-wü emala ngü ka Me baka wü *mürü dofo. Wü gara ngbü nda-wü endoro da emala ngari Yesu. Wü gara nda-wü wü *kovo ka Me. Wü gara ngbü eri wü bu wü de riri ka Me. ¹²⁻¹³ Yesu to wazi la fü wü kpara bala kükürü de, angü ah le de nih ngbü da eto wazi fü wü bu nih, wü kpara ka Me, teka de wüh di emere tima ka Me ereke areke. Kphah bala, teka fü nih arü 'buru kpekpeke, de maguma nih biringbö, da elala gbü ngü ka Yesu, Ye Me, kphah da eje ngü kaka ereke areke. Te nih mere bala, jia nih ena amba, fü nih amaka wazi, adu angbü kpeke wü kpara, gegege baka Miri ka-nih Yesu.

¹⁴ Wü di engu wüna, ah le de nih ce töndö wü ngü, baka nda wü jaji ne, asidi. Ah le de nih lala eküte zu riri ka Me. Te wü mürü mani le afiti nih de töndö ngü ka-wü la, nih mere e aje ngü ka-ewü la nda-nih kü de. ¹⁵ Te di bala, ah le fü nih alala eküte zu ngü ka Me, de nih di ele te-nih esüka nih de maguma nih biringbö, teka fü nih angbü kpeke wü kpara gbü ngü ka Me, gegege baka Yesu Kurisito, te di de Nzö-ngagira-nü fü nih, wü kpara ka Me ne. ¹⁶ Angü nih baka küte Yesu. Yesu ka-ye baka nzö nih. Tekanü la, fü Yesu angbü eto wazi fü nih, de nih di emere wü tima, te engu to fü nih ne di, mbi mbi mbi. Ah to wazi la kphah teka fü nih angbü di, baka nguwa kpara biringbö, adi ele te-nih esüka nih, teka fü tima ka Yesu aga anü kpa engagira nü.

Dene ngü teka ngbüngbü ka-nih, wü kpara ka Yesu

¹⁷ Wü di engu wüna, te yi di de wü *kpara ka Yesu ne, ma ngbü emala ngü ne fü yi kpekpeke, te iri Miri ka-nih Yesu Kurisito, gü ba, yi mere e angbü emere

* 4:8 4:8 Mü ena amaka ngü la gbü Ci ka wü Davidi 68:18.

wü *siti ngü, baka nda wü kpara de te ewü wu ngü ka Me de ne, tîne de. Angü wü kpara, te ewü wu ngü ka Me de ne, ngbü emere wü ngü ba e te ewü le, angü fingangü ka-ewü esiti. ¹⁸ Nzö ewü kpah ma. Wüh je ngü kpah de, angü fingangü ka-ewü düürü eyi adürü. Teka ngü la, wüh tî aküwa nda-wü de, angü wüh le ngü ka Me kpah de. ¹⁹ Lümü mere ewü nda kpah de. Wüh to te-wü eyi 'buru da emere lara siti wü ngü, de wü ngü ka waza, ba e te ewü ngbü ele.

²⁰⁻²¹ Amba nda-yi, yi mere e adi emere siti ngü baka nda-ewü la de, angü yi de wü *kpara ka Yesu Kurisito. Ngü ka Yesu Kurisito, te wüh ri yi di ne, gü neh fe? Ah gü ba, ah le de yi ce wü siti ngü ka-yi, adu alala te zu ngü ka Yesu. Ah bala de? ²² Te di bala, yi ce wü siti ngü ka-yi, ta te yi ngbü emere ne asidi, angü wü siti ngü la siti nzö yi, de fingangü ka-yi eyi, gegege baka diri kala bongo te birî eyi 'buru ka libiti. ²³⁻²⁴ Amba titîne, ah le fü yi afü ngü ka-yi, adu angbü emere wü züka ngü, te ena areke gbü jia Me. Angü Me fü yi eyi me-ye baka to wü kpara, teka fü yi angbü *nzila, baka kpara te to züka to bongo eküte ye.

²⁵ Te di bala, yi ce ngü ka wu, de siti mani asidi, de yi du ngbü emala tîne 'duwa zu ngü esüka yi, angü nih 'buru baka kpara biringbö teka ngü ka Yesu. ²⁶ Te maguma mü siti eküte enga ni mü la, mü ceka te mü 'be, angü mü ena amere siti ngü gbü ngü la. Te di bala, mü mere e ati ngü la guvu mü, akoro di etamurago, de. ²⁷ Angü *Satana ena afiti mü de ngü la, fü mü adürü te kaje ka Me.

²⁸ Te mü ta de mürü zi la, ah le de mü ce ngü ka zi la ace asidi. Amba ah le fü mü amere tima cu de kpa mü, teka fü mü amaka e-mazü teka mü, kpah de gara wü e, te ena ale ta-ngü te wü mürü cinga.

²⁹ Yi ce ngü ka soko, de siti ngü mündü te komö yi asidi. Amba ah le fü yi angbü emala 'duwa züka ngü esüka yi, te ena eto wazi fü wü bu yi gbü ngü ka Me.

³⁰ Te yi ngbü emere siti ngü la, ngü la ena ato mere cinga fü *Nzila Wazi Me. Angü Me to Nzila Wazi ye eyi emaguma yi, teka ato wazi fü yi, baka gina takpa te ngbü esere züka ngü te gara, te yi ena amaka kpaka Me, gbü *adu sikpi, te engu ena aküwa wü kpara ka-ye, tete na ne.

³¹ Yi ce ngü ka makpü asidi. Maguma yi mere e adi esiti eküte wü bu yi de. Yi mere e amere gü, anga awü nga esüka yi, ne de. Yi mere e adi esoko wü bu yi kpah de. Yi mere e ati ngü emaguma yi, eküte wü bu yi ne, kpah de. ³² Amba ah le fü yi adi ele te-yi, da ewu cinga wü bu yi, fü yi adi ele

ta-ngü te ewü. Te wüh mere siti ngü fü yi la, ah le de yi di eboro ngü ka-ewü la emaguma yi asidi, kpah baka te Me boro *siti ngü ka-yi, teka ngü ka Yesu Kurisito ne.

5

¹ Wü di enga wüna, yi de wü jaji ka Me, te Me le yi fa sü. Te di bala, ah reke fa sü, teka fü yi angbü emere 'duwa ngü kaka. ² Gbü wü ngü ka-yi 'buru te yi ngbü emere, ah le de yi di ele wü bu yi ale, baka Yesu Kurisito te le nih de maguma ye. Angü Yesu to te-ye akpi teka aküwa nih, baka *kambiliki te wüh wa, teka areke ngü ezengba nih di de wü Me. Dela ngü te reke gbü jia Me cu fa sü.

³ Titîne, yi de wü kpara ka Me. Te di bala, e de irî ye waza, anga ngü ka yala, anga gümü-e, mere e angbü emaguma yi tîne de. Angü dela ngü te siti gbü jia Me fa sü. ⁴ Ah tî fü yi angbü emala wü tondö ngü, da esoko soko esüka yi, de. Yi mere e adi egbo siti wü kala esüka yi ne kpah de. Angü dela ngü te tî gbü jia Me nda de. Amba nda-yi, ah le de yi ngbü da egbo nga irî Me engu gbü wü sikpi 'buru.

⁵ Ma emala fü yi dene zu ngü, gü ba, wü kpara de te ewü ngbü endondoro gbü nga wü würüse, da emere wü siti ngü ka lümü, kpah da eo mere maguma teka wü e ne, wüh tî aküwa agbü sü ka Me, ake Yesu Kurisito, ne de. Wü kpara te ewü ngbü eo maguma wü teka wü e, ah ba e te wüh ngbü eo wü e la me ka-wü tete, angü wüh le ngü ka Me nda-wü de. ⁶ Te gara kpara mala fü yi, ga, wü ngü la siti gbü jia Me fa sü nda de la, ah ngbü esutu dela wu! Yi mere e aje ngü kaka la nda-yi de. Me ena ato mere kuru te wü kpara, de te ewü ngbü emere wü ngü de bala, angü dela ngü te engu le de de de! ⁷ Yi mere e ao awuba de wü kpara, de te ewü ngbü emere wü ngü de bala ne, nda-yi de, angü yi ena arî gbü wü siti ngü ka-ewü la.

⁸⁻⁹ Ta gügü, o yi le ngü ka Me la de, yi ngbü ta engbü gbü ngbami.* Amba titîne, yi koro eyi gbü ra-sü, angü yi to maguma yi eyi fü Miri Yesu. Te di bala, ah le de yi ngbü da emere 'duwa züka ngü, te ena areke gbü jia Me fanü fanü. Angü dela ngü ka wü kpara, te ewü di gbü ra-sü.

¹⁰ Wü di enga wüna, ah le de yi o to yi, teka fü yi adi emere fi bü wü mene ngü, te reke areke gbü jia Miri Yesu. ¹¹ Yi mere e arî gbü *siti ngü ka wü kpara, de te ewü ngbü emere tondö ngü ka biti de bala ne, de. Amba yi ri ewü arî, kpah da esere züka ngü ka Me fü ewü, teka fü

* 5:8-9 5:8-9 Ngbami de mbiri sü baka biti.

ewü awu, gü ba, nda-ani ngü ne, ah ka-ye esiti. ¹² Amba yi mere e adi emala nga wü ngü ka wü kpara, te ewü ngbü emere gbü zi ne, esüka yi nda-yi de, angü dela ngü ka lümü. ¹³⁻¹⁴ Amba te yi ngbü erí ewü de zu ngü ka Me, kpah da emere wü züka ngü gbü jia ewü la, e-wu neh da, gara ewü ena ace siti ngü ka-wü, adu ale ngü ka Yesu Kurisito. Ngü la ena adi gegege baka ci, ta te wüh bí, gü ba, “De-mü, te mü ngbü era ra gbü ngbami, baka kövö ne, mü zükü ezükü, fü mü ace siti ngü ka-mü, teka fü Yesu Kurisito alofo sü emagama mü.”

¹⁵ Te di bala, yi ceka te-yi 'be. Yi mere e angbü ba töndö kpara de. Amba ah le fü yi adi emere wü züka ngü, te ena areke gbü jia Me. ¹⁶ De yi gírí da yi, teka fü yi angbü emere fi bü züka ngü. Angü gbü wü re ne, wü kpara ngbü emere wü siti ngü efa sü. ¹⁷ Te di bala, yi ce töndö ngü asidi, de yi o to yi 'duwa teka adi emere mene ngü te Miri Yesu ngbü ele.

¹⁸ Yi mere e adi eküya de fi de, angü ah de siti e, te ena asiti fingangü ka-yi, de küte yi. Amba ah le fü yi asika de *Nzila Wazi Me, ¹⁹ teka fü yi angbü de züka tadu ka Me emagama yi. Te di bala, ah le kpah fü yi adi ebí wü ci ka Me esüka yi, angü dela ngü te ena ato tadu fü Miri Yesu. ²⁰ Teká wü ngü ka-yi 'buru, ah le de yi di egbo nga írí Wö nih Me, gbü wü síkpí 'buru, teka ngü ka Miri ka-nih Yesu Kurisito.

²¹ Te di bala, ah le de yi di kpah eje ri wü bu yi, de wü mere kpara ka-yi, angü yi de wü *kpara ka Yesu Kurisito.

Dene ngü ka wü würiuse de wü wati wü

²² De-yi, wü würiuse, ah le de yi je ri wü wati yi, baka te yi ngbü eje ri Miri Yesu. ²³ Angü komoko de wazi gbü nzö wara ye, baka Yesu Kurisito te di de wazi gbü nzö wü kpara ka-ye. Angü nih, wü kpara ka Me 'buru baka küte Yesu, Yesu Kurisito nda-ye baka nzö nih, angü ah de *E-küwanih. ²⁴ Teká ngü la, ah le fü wü würiuse angbü engbü esa riri ka wü wati wü, gbü wü ngü 'buru, baka wü kpara ka Me, te ewü ngbü engbü esa riri ka Yesu Kurisito.

²⁵⁻²⁶ De-yi wü komoko, ah le fü yi adi ele wü wara yi de maguma yi 'buru, baka e te Yesu Kurisito ngbü ele wü kpara ka-ye. Angü Yesu Kurisito to te-ye ta akpi teka nih, teka afü nih wü di Me. Angü gbü síkpí te wüh to *babatiza fü nih, ah baka e te engu zürü nih de ngu, kpah de *Ngari Me, te nih ngbü eje ne. ²⁷ Yesu mere ngü la bala, angü ah le de nih ngbü *nzila gbü jia ni, Yesu, teka de siti ngü, anga libiti, mere e angbü emagama nih de. ²⁸ Te di bala,

ah le fü wü komoko adi ele wü wara wü, baka te ewü ngbü ele küte wü. Angü te mü ngbü ele wara mü bala la, mü ngbü dela ele cu küte mü. ²⁹⁻³⁰ Kpara ladü te ngbü ekpü küte ye de tete-ye? A'a, ah nda ma! Kpara ngbü ele küte ye, da egírí zü-e, eto fefe, da ereke küte ye la areke. Dela 'buru wü ngü te Yesu Kurisito ngbü kpah emere fü nih bala, angü nih baka küküte. ³¹ Dela si-ngü te wüh ba gbü Ngari Me, gü ba, “Komoko ngbü eyia ece wö ye ake ni ye, fü ah aza wara ye, alala tete na. Fü ewü adu angü ake di tüne, baka kpara biringbö ne.”[†] ³² Mere mani ladü gbü ngü, de te wüh mala la. Gbü jia ra, wüh mala ngü la teka ngü ka Yesu Kurisito, de wü kpara ka-ye, angü nih 'buru baka wara Yesu.

³³ Dela ngü te ma le amala fü yi 'buru, angü ngü la, ah fü yi kpah bala. Ah le fü wü komoko adi ele wü wara wü, baka e te ewü ngbü ele küte wü. Kpah bala, ah le fü wü würiuse adi eje riri ka wü wati wü.

6

Dene ngü ka wü jaji, de wü e-bi wü

¹ De-yi wü jaji, ah le fü yi adi eje ri wü wö yi, de wü ni yi, angü ngü la reke gbü jia Miri Yesu fa sü. ²⁻³ Angü Me mala eyi bala gbü *Ngari ye, gü ba, “Ah le fü mü adi ecu ngü wö mü ake ni mü, da eje riri ka-ewü.” Fü Me adu kpah amala gara ngü gbü ngü la, gü ba, “Te mü mere bala la, de-ni, Me, ni ena ato züka ngü fü mü, fü wü síkpí ka-mü asibi füh kotö ne afa sü.”*

⁴ De-yi, wü wö ye wü jaji, yi mere e adi erí wü jaji ka-yi de siti maguma de, angü ngü la ena ake te ewü. Amba ah le fü yi adi erí ewü ereke areke, te züka kaje, baka Miri Yesu te ngbü erí nih.

Dene ngü ka wü labi de wü mere kpara ka-wü

⁵ De-yi wü labi, yi di eje ri wü mere kpara ka-yi, da ele ngü ka-ewü de maguma yi biringbö. Yi di emere wü riri ka-ewü, da ecu ngü ewü acu, angü te yi mere bala, yi ngbü dela eyi emere riri ka Yesu Kurisito. ⁶ Yi mere e amere ngü baka wü gara labi, te ewü ngbü emere tima ka-wü bü gbü jia wü mere kpara ka-wü, teka fü ewü angbü egbo nga ani, ne de. Amba ah le de yi wu, gü ba, ani kpah de wü labi ka Yesu Kurisito. Te di bala, ah le de yi mere wü ngü 'buru, de te Me ngbü ele ne, de maguma yi biringbö, angü dela ngü te ena areke gbü jia Me. ⁷ Yi mere wü tima fü wü mere kpara ka-yi kpekpeke, de gümü ye mini, baka te yi ngbü emere tima ka

† 5:31 5:31 Mü ena amaka ngü la gbü Gina Ngü 2:24.

* 6:2-3 6:2-3 Mü ena amaka ngü la gbü buku ka Gogo ka wü Yisaraye 20:12, abe kpah te buku ka Manda nga Riri 5:16.

Miri Yesu. ⁸ Ah le de yi wu, gü ba, te mü mere züka ngü la, Miri Yesu ena aküwa mü, ato takpa fü mü, anga mü de labi, anga mere kpara.

⁹ De-yi, wü mere kpara, ah le kpara de yi mere züka ngü fü wü labi ka-yi. Yi mere e ato cinga te ewü de. Ah le de yi fi nga mere kpara ka-yi, Yesu Kurisito, te di agbü kpí ne. Angü Yesu tí afi nga yi ba wü mere kpara ne nda de. Te yi mere *siti ngü, Yesu tí afüwa yi teka ngü mere ka-yi la nda kpara de.

Dene wü e ka gü ka Me, afa wazi Satana di

¹⁰ Wü di engu wüna, dene adu rüri te ma le amala fü yi. Yi rü kpekpeke eküte Miri ka-nih, Yesu, angü engu de mere mürü wazi. ¹¹ Nih ngbü egü gü de wü *Satana. Te di bala, ah le de yi za wü e ka gü, de te Me to fü yi, ne 'buru esaka yi, teka fü yi agü gü di areke areke. Yi rü kpekpeke gbü ngü ka Me, angü Satana ena afiti yi de mani ka-ye. ¹² Angü, gü de te nih ngbü egü ne, nih ngbü egü gü la de wü kpara füh kotö ne nda-nih de. Nih ngbü egü gü de wü *siti wü di engu me, bete wü miri ka-wü, de te ewü ngbü esiti sü de füh kotö ne, de siti wazi ka-wü. Kpara bala, nih ngbü egü gü de wü siti wü lara wazi gbü wege kpa tikpi ne 'buru. ¹³ Te di bala, ah le fü yi aza wü e ka gü, de te Me to fü yi ne, angbü di nzo. Teku te Satana koro, agü gü kpaka yi la, de yi i maguma yi, yi rü kpekpeke baka wü komoko gbü ngü ka Me. Te yi mere bala, Satana tí aza esaka yi de.

¹⁴ Te di bala, de yi reke te-yi ereke, teka gü la. Gina ngü, ah le de yi le zu ngü ka Me de maguma yi biringbö, angü ngü ka Me la, ah baka ku etadu kpara, te ngbü ei bongo ereke areke. Yi di kpara emere wü ngü te di mbi gbü jia Me. Angü te yi mere bala, Satana tí aza esaka yi de. ¹⁵ Ah le kpara fü yi angbü nzo, gbü wü sikpi 'buru, teka adi emala ngü ka Yesu fü wü kpara, da egu maguma wü di. Te yi mere bala, ah baka te yi to züka kamaka† eyi gbü lö yi. ¹⁶ Ah le kpara de yi to maguma yi 'buru fü Me. Angü, te yi mere bala la, mani ka Satana, te di baka siti keze ne, tí amaka yi de. ¹⁷ Ah le de yi o jia yi te Yesu Kurisito, angü engu de kpara te ena angbü eküwa yi me-ye. Angü Yesu Kurisito fü nih baka madudu ka se la, te wü marajümiya ngbü eto gbü nzö wü teka gü. Kpara bala, ah le de yi zoro *Ngari Me gö! adi etanga gbü wü sikpi 'buru, angü ah de dü, te *Nzila Wazi Me to fü yi, teka fü yi amere gü di de wü Satana. ¹⁸ Gbü wü ngü la 'buru, te yi le amaka wazi teka arü di kpekpeke la, ah le de yi di eyi-ta

Me gbü wü sikpi 'buru, baka te Nzila Wazi Me ngbü esere fü yi. Yi ceka te-yi mbi, teka fü yi adi kpara eyi-ta Me fü wü bu yi, wü kpara ka Me, 'buru.

¹⁹ Yi di kpara eyi-ta Me fere mini, teka de Me to wazi fere, fü ra ace ngü ka cürü asidi, adi esere si-ngü ka Yesu fü wü kpara mbölö mbölö, de wazi ra 'buru. ²⁰ Angü dela si-ngü te Yesu Kurisito fe ra *mürü tima ka-ye tete, teka adi emala ngü ka-ni fü wü kpara füh kotö ne 'buru. Amba titüne, wüh i ra eyi gbü ku teka ngü ka Yesu la. Ngü ma! Yi yi-ta Me fere, de ma i maguma ra, ace ngü ka cürü asidi, teka adi fi bü emala ngü ka Yesu fü wü kpara, baka te Me fe ra, de ma di emala ne.

Dene adu ngü ka-ra, Pawülü

²¹⁻²² Kpara te ma tima engu de köcökpa ne, ah de engu ni nih de iri ye Tikiko, te di de züka kpara, te ngbü emere tima ka Me de züka maguma ye. Engu ena amala nga ra fü yi, teka fü yi awu wü ngü de te ngbü emere ra, de wü bu ra ne, 'buru me-ye. Kpara bala, engu ena ato wazi fü yi gbü ngü ka Me.

²³ Me, te di de Wö nih, ake Miri ka-nih Yesu Kurisito, di de yi wü di engu ni a, wü *kpara ka Yesu de kpala ne 'buru. De Me to gu ngü ka-ye fü yi, kpara de wazi ka-ye, teka fü yi adi ele te-yi di esüka yi, kpara teka fü yi ato maguma yi 'buru fü Yesu Kurisito. ²⁴ De Me o *züka maguma ye eküte yi 'buru, angü yi le ngü ka Miri ka-nih Yesu Kurisito eyi, de maguma yi biringbö.

Dela adu ngü te ma mala fü yi, de-ra Pawülü.

† 6:15 6:15 Kamaka de e te wüh ngbü eto gbü lö kpara.

Dene köcökpa te Pawülü ba fū wü kpara ka Yesu agbū

Filipoyi Filipoyi

Masere si-ngü

Filipoyi ta de mere köti gbü tö ka Makedoniya. Pawülü ta de gina kpara, te mala ngü ka Yesu fū wü kpara agbū Filipoyi. Angü ta gbü e'ba'basu ndoro kaka, gbü gara biti bane, fū ah awu gara komoko ka Makedoniya gbü roto, te koro kpakaka, rü tikpi, amala ngü fefe, gü ba, "Pawülü deyi, ah le de ye koro, to ngari Me fū ani agbū Makedoniya!" Te di bala, fū wü Pawülü ayia bü kere, akoro agbū Filipoyi, te di gbü tö ka Makedoniya. (Mü ena amaka ngü la gbü buku ka wü Mürü Tima ka Yesu 16:6-40.)

Pawülü ba ta ngü ne fū wü *kpara ka Yesu agbū Filipoyi, o wüh i engu tete gbü ku, teka ngü ka Yesu. Sü te engu mere ku ka-ye tete, nih wu mbi de. Angü gara wü kpara, ga, wüh zoro engu ta agbū Efeso, wü gara ga, agbū Kayisariya, anga agbū *Rüma, baka te wü kpara ngbū emala. (Mü ceka Filipoyi 1:12-17.) Fū wü kpara ka Yesu agbū Filipoyi ayia atima ta letangü fū Pawülü, teka ale ta-ngü di tete agbū ku kpala. Wüh tima e la esaka gara komoko de iri ye Epafuraditü. Fū Pawülü adu aba ngü ne fū ewü, gü ba, "Ni maka e la eyi mbi, fū ni angbū de mere tadu teka ngü la." Ah tima ta köcökpa ne fū ewü kpah esaka Epafuraditü engu na, de ah du di, ato fū ewü. (Mü ena amaka ngü la gbü Filipoyi 2:25-30; 4:10-20.)

Wü ngü te mü ena amaka gbü köcökpa ka wü Filipoyi ne, wüh dene.

Sapita 1 Pawülü to wazi fū wü kpara ka Filipoyi,

gü ba, ngü te mere ni ne, mere e ato cürü te ewü de

Sapita 2 Ah le de fingangü ka-nih ngbū baka nda Yesu Kurisito,

fū nih ao te-nih 'buru teka ngü kaka

Sapita 3-4 Ah le de nih ceka te-nih 'be teka wü mürü fiti

Dene mandi ka Pawülü fū wü kpara

ka Yesu agbū Filipoyi

¹ De-ra Pawülü ake Timoteyo, te a di de wü *mürü tima ka Yesu Kurisito ne, a tima köcökpa ne fū yi me-a, wü *kpara ka Yesu agbū Filipoyi, de wü *kovo ka-yi, kpah de wü kpara te ewü ngbū ele ta-ngü te ewü 'buru. A tima köcökpa ne fū yi kükürü de, angü a wu eyi, gü ba, yi ngbū elala eküte Yesu Kurisito fanü. ² Wö nih

Me, ake Miri Yesu Kurisito, di de yi, da eto gu ngü fū yi, de *züka maguma wü.

Dene ngü te ma ngbū eyi-ta Me di, teka yi

³⁻⁴ Wü di enga wüna, ma ngbū efi nga yi gbü wü sikipi 'buru, da eyi-ta Me teka yi, de mere tadu emagama ra, kpah da egbo nga iri Me teka ngü ka-yi. ⁵ Kükürü de, angü ah kpo ta gbü gina sikipi, te ma koro tete kpaka yi ne, zalü akoro di enatikine dene, yi ngbū la fi eto te-yi teka adi ele ta-ngü te ra, gbü tima ka Yesu, te ma ngbū emala nganga na fū wü kpara ne. ⁶ Te di bala, ma wu eyi kpo, gü ba, Me ti ace züka ngü, de te engu kpo eyi da emere emagama yi de bala ne, de. Ah ena angbū fi bü da eto wazi la fū yi bala, zalü akoro di gbü *adu sikipi, te Yesu Kurisito ena adu akoro tete na.

⁷ Fanü fanü, yi de wü züka wü di enga ni ra, te ma ngbū eo maguma ra te yi. Kükürü de, angü yi ngbū fi bü da ele ta-ngü te ra, gbü wü ngü ka-ra 'buru. Anga te ah de cinga te ngbū emere ra agbū ku de kpakine, yi ngbū kpah ele ta-ngü te ra gbügbü na. Anga te ah de kpeke tima te Yesu to fere, teka adi emala ngü ka Me fū wü kpara, da egbeke fingangü ka-ewü, teka fū ewü awu, gü ba, ngü ka Yesu de zu ngü ka Me fanü fanü ne, yi ngbū kpah da ele ta-ngü te ra, gbü tima la. Dela 'buru wü ngü de te yi to te-yi di, da ele ta-ngü di te ra, kpah da eto wazi fere. ⁸ Te di bala, Me wu ngü la me-ye, gü ba, ma le yi fa sü, baka e te Yesu Kurisito ngbū ele nih.

⁹ Teka ngü la, wü di enga wüna, ma ngbū eyi-ta Me, teka de ah to wazi fū yi, adi ele te-yi esüka yi di, kpah teka de jia yi mba, awu ngü ka Me areke areke, fū yi anü de wü ngü la kpa engagira nü.

¹⁰ Kpah bala, teka fū yi awu da emere züka ngü, te ena areke gbü jia Me, teka fū yi angbū *nzila, zalü akoro di gbü *adu sikipi, te Yesu Kurisito ena adu akoro tete na.

¹¹ Angü, te yi ngbū fi bü da emere wü ngü ereke areke gbü jia Me, de wazi ka Yesu Kurisito la, wü kpara ena adi egbo nga iri Me teka ngü ka-yi la.

Dene ngü te to tadu fere agbū ku kpakine

¹² Wü di enga wüna, ma le fū yi awu, gü ba, ngü te wüh i ra di gbü ku ne, tiri kaje teka ngü ka Yesu nda de. Amba ngü la du ü kaje eyi, teka fū ngü ka Yesu abaya, anü kpa engagira nü. ¹³ Wü marajümiya ka miri ka wü *Rüma, be kpah te gara wü kpara gbü sü ne 'buru, kpo eyi da eje ngü ka Yesu *Kurisito, angü wüh wu eyi, gü ba, si-ngü de te wüh zoro ra di, gü gbü ku ne, ah teka ngü te ma ngbū emala ngü ka Yesu Kurisito fū wü kpara. ¹⁴ Kpah bala,

wü *kpara ka Yesu gbü sü ne wu ngü ka wazi, te Miri Yesu ngbü eto fere gbü ku de sene, ne eyi. Te di bala, fü ngü la ato wazi fü mere bi ewü, fü ewü ace ngü ka cürü, akpo da eto te-wü adi emala ngü ka Yesu fü wü kpara kpekpeke, da enü di kpa engagira nü.

¹⁵⁻¹⁷ Mere bi wü kpara la ngbü emala ngü ka Yesu Kurisito, de lele emagama wü, teka ato tadu fere. Angü wüh wu eyi, gü ba, Me to tima la fere me-ye, de ma di emala ngü ka Yesu fü wü kpara, teka fü ewü ale ngü kaka, gü ba, ah de zu ngü fanü fanü. Te di bala, wüh ngbü eyi ele ta-ngü te ra gbü tima la. Amba fanü fanü gara wü kpara esüka ewü ngbü nda-wü emala ngü ka Yesu Kurisito de kanga emagama wü. Wüh ngbü efi, gü ba, te mere bi wü kpara ena ale ngü ka Yesu gömö ani, fü ngü ka-ani aga, afa nda-ra ka la, ngü la ena ato mere kanga de cinga emagama ra. Angü wüh le angbü ba mere kpara, de wüh di ecu ngü ani gbü tima la.

¹⁸ Amba nda-ra, ma ti afi nga ngü ka-ewü la de. Anga te wüh ngbü emere ngü la de siti maguma, anga de züka maguma la, ah mere e de. Angü te wüh ngbü ebaya ngü ka Yesu Kurisito esüka wü kpara la, ngü la ena ato tadu te ra.

Wayi, wü di engä wüna, ma ena adi engbü ka-ra fi bü de tadu gbü wü ngü la 'buru. Tadu ka-ra la ti anza nda de. ¹⁹ Angü, ma wu eyi, gü ba, Yesu Kurisito ena aküwa ra me-ye, gbü wü cinga, te ngbü emere ra ne 'buru, teka ngü ka gba, de te yi ngbü eku fü Me teka ra ne. Ah kpah teka ngü ka *Nzila Wazi Me te ngbü ele ta-ngü te ra gbü wü ngü la. ²⁰ Angü dela ngü te ma ngbü eo jia ra tete, teka de ma rü kpekpeke gbü cinga la 'buru, angü ma ena ato lümü te Yesu Kurisito. Ma le eyi amere tima ka Yesu Kurisito gbü wü sikpi 'buru. Te ah de *küküwa, anga kpi la, ah mere e kpah de. Ngü te ma le, ah bü nzö ngü de te wü kpara ena adi egbo nga iri Yesu Kurisito tete, teka ngü ka-ra. ²¹ Angü mere ngü te ma le adi emere, o ra di la ezükü ne, ah de tima ka Yesu Kurisito. Kpah bala, te ma ena akpi, ah kpah de züka ngü, angü ma ena ago angbü ka-ra kpaka Yesu Kurisito agbü kpi kpala.

Wü di engä wüna, te ma ena ago kpaka Yesu Kurisito agbü kpi kpala, ma ena amaka mere tadu, afa wü gara ngü füh kotö ne 'buru. ²² Amba te ma kpi la de la, ah kpah de züka ngü, angü ma ti eyi areke ngü ka tima ka Yesu la mbi mbi mbi. Te di bala, mene züka ngü te ma ena afe ne, ma wu nda-ra de. ²³ Angü, ma wu eyi, gü ba, wü ngü 'basu ladü, te ewü ngbü egbegbeke ra. Gbü fingangü ka-ra, ma le ta eyi akpi, fü ra ago angbü ka-ra tundu

ake Yesu Kurisito, angü dela ngü te ena ato mere tadu fere, afa wü gara ngü 'buru. ²⁴ Amba, teka ngü ka-yi, ah reke kpah fa sü te ma ena angbü la mba de jia ra bane, teka fü ra adi ele ta-ngü te yi, da eto wazi fü yi, gbü ngü ka Yesu Kurisito. ²⁵ Te di bala, ma wu eyi fanü fanü, gü ba, Me ena aküwa ra gbü ngü ne, ma ti akpi la de. Fü ra adu angbü de wü yi, teka adi eto wazi fü yi gbü ngü ka Me. Fü yi amere ngü ka Me la, anü di kpa engagira nü, teka fü yi amaka mere tadu gbü ngü la. ²⁶ Angü, te Yesu Kurisito küwa ra gbü ku ne eyi, fü ra adu akoro kpaka yi la, yi ena angbü de mere tadu, da egbo nga iri Yesu Kurisito, teka ngü la.

Dene mere kpeke ngü te ma le de yi o to yi tete

²⁷ Wü di engä wüna, mere kpeke ngü, te ma le amala fü yi, ah dene. Ah le de yi di emere züka ngü, baka e ta te a ri yi di, de ngü ka Yesu ne, teka fü wü kpara adi egbo nga iri Yesu teka ngü ka-yi. Te di bala, te ma ena aküwa, adu akoro kpaka yi kpala, anga te ma ngbü fi bü gbü ku sene la, ma ena angbü de tadu, angü ma ti eyi awu, gü ba, yi ngbü engbü de fingangü biringbö esüka yi, da emere tima ka Me de maguma yi biringbö. ²⁸ Te wü vügü ka-yi, wü kpara de te ewü le ngü ka Yesu de ne, le amere yi esiti la, yi mere e akpe cürü ewü de. Angü te yi kpe cürü ewü de la, ah ena asere ngü fü wü vügü la, gü ba, yi de wü *kpara ka Yesu fanü, te Me ena aküwa yi fi mere badi. Ngü te yi rü di kpekpeke la, ena asere kpah fü wü vügü la, gü ba, Me ena ato mere kuru te ewü, te gara, fü ewü akpi, anü agbü mere du ka wa fi mere badi. ²⁹ Nda-yi, Me fe yi me-ye, fü ah ato wazi fü yi de *züka maguma ye, teka fü yi ato maguma yi fü Yesu Kurisito. Me du kpah to wazi fü yi, teka fü yi amaka cinga teka ngü ka Yesu, ³⁰ angü yi ngbü eyi emere tima kaka kpekpeke, kpah baka nda-ra. Yi wu eyi, gü ba, ma ngbü emaka cinga gbü tima ka Yesu. Zalü akoro dene, cinga la nza la fi de. Titine yi kpo kpah eyi da ezü cinga la baka nda-ra.

2

Dene ngü te yi ena adi emere, gegege baka nda Yesu

¹ Wü di engä wüna, Yesu Kurisito le nih de maguma ye 'buru, fü ah awu cinga nih. Fü ah angbü da eto wazi fü nih, angü nih lala eyi eküküte. Kpah bala, *Nzila Wazi Me ngbü engbü emagama nih, da ele ta-ngü te nih. ² Te di bala, ah le de yi di ele te-yi esüka yi ale. Ri yi di 'buru biringbö. Kpah bala, de yi di emere tima ka Me de fingangü biringbö. Angü te ma je bala la, ngü la ena ato mere tadu fere.

³ Yi mere e adi emere ngü ka Yesu, de yiki esüka yi, de. Yi mere e adi ecu ngü yi, ba wü mere kpara, kpah de. Ah le de yi o ngü ka-yi kötö. Yi mere e akpa ngü wü bu yi kpah de, yi di eo ewü ba mere kpara. ⁴ Yi mere e adi efi nzö nga yi de. Ah le de yi di efi kpah nga wü bu yi, da ele ta-ngü te ewü.

⁵ Wü di enga wüna, ah le de fingangü ka-yi ngbü gegege baka nda Yesu Kurisito. ⁶ Fanü fanü, Yesu Kurisito de Me, amba ah ceka ngü ka mere ka-ye la, ba mere kpeke ngü, nda de. ⁷ Ah ce ngü ka mere ka-ye la 'buru asidi. Füh ah aza küte baka nih, wü kpara füh kotö ne. Füh ah adu afü te-ye baka labi. ⁸ Ah o ngü ka-ye kötö, du fü te-ye ba mürü cinga. Füh ah angbü eje wü riri 'buru, te Wö ye na, Me, ngbü eto fefe. Füh ah adu ace te-ye fü kpi. Füh ewü abere engu te *rü gbegete, baka te wüh ngbü emere siti kpara la. ⁹ Dela si-ngü te Me o engu tete, Mere Miri gbü nzö wü kpara 'buru ne. Füh Me ato kpah mere iri fefe, te fa iri wü kpara füh kotö ne 'buru. ¹⁰⁻¹¹ Te di bala, ah le de wü kpara 'buru di ecu ngü Yesu, da egbo nga iri na, gü ba, engu de Mere Miri gbü nzö ani 'buru. Nih gbo nga iri Me! Angü wü kpara füh kotö ne 'buru, de wü *malayika ka Me agbü kpi 'buru, de *siti wü di enga me 'buru, ena angbü esa lö Yesu.

Dene riri ka Me, te yi ena angbü fi bü da emere

¹² Wü di enga wüna, o ra ngbü ta de wü yi kpala ne, yi ngbü ta eto te-yi da eje riri ka Me gömö ra, gbü wü sikpi 'buru. Titine, te ma di esüka yi kpala ma ne, ah le de yi ngbü emere wü ngü la fi bala, enü di kpa engagira nü. Ah le de yi o to yi teka adi emere wü ngü, te ena areke gbü jia Me, da ecu ngü ngü na, teka fü yi aküwa. ¹³ Yi ti eyi amere züka ngü bala, angü Me ngbü eto wazi fü yi me-ye, teka fü yi adi ele ngü kaka, da emere wü züka ngü gbü jijia.

¹⁴ Ah le de yi di emere wü ngü ka Me 'buru de züka maguma yi, yiki di gbügbü ma. Yi ce töndö fingangü asidi. ¹⁵ Angü yi de wü di Me. Ah le de yi ngbü *nzila, adi emere wü ngü 'buru mbi. Yi ngbü engbü esüka mere bi wü mürü kögö-nzö, te ewü le ngü ka Yesu de. Te di bala, ah le fü yi adi egü tamu züka kaje fü ewü, baka wü küfara, te ngbü eci, da elofu sü gbü biti. ¹⁶ Yi di kpah eri wü kpara la de ngari Me. Te yi mere bala, gbü sikpi te Yesu Kurisito ena adu akoro tete, ma ena angbü de tadu, teka mere tima, ta te ma ngbü emere esüka yi ne.

¹⁷ E-wu neh da, anga te miri ka wü *Rüma ena akolo ngü ka-ra, gü ba, ah le de wüh mörö ra asidi, teka ngü ka Yesu

la, ah mbi, angü ma kpi te iri Me. Ah le de yi to maguma yi 'buru fü Me, teka adi emere ngü te ena areke gbü jijia, kpah baka nda-ra. Angü te yi mere bala la, ah ena areke te ra afa sü. ¹⁸ Ah le kpah de yi ngbü de tadu teka ngü ka-ra. Füh nih angbü gbü tadu la tundu de nih ma.

Dene ngü ka Timoteyo

¹⁹ Te Miri Yesu le la, ma ena atima Timoteyo kpaka yi mba kere gbü wü sikpi ne, teka fü ah adu amala nga yi fere, fü maguma ra agu mba tete. ²⁰ Biri gara kpara kpakine, te ngbü efi nga yi baka ra nda ma, 'duwa bü Timoteyo kpikpi ye. Angü fanü fanü, gümü yi de cinga yi ngbü eke engu efa sü. ²¹ Mere bi wü kpara ngbü efi ka-wü bü nga wü. Wüh fi ngü ka Yesu Kurisito nda-wü de. ²² Yi wu eyi kpo, ga, Timoteyo to te-ye eyi kpekpeke, teka ale ta-ngü te ra gbü tima ka Yesu Kurisito, baka mbarase te ngbü ele ta-ngü te wö ye. ²³ Te di bala, ma ena atima engu kpaka yi kpala mba kere, sidi nga ngü ka-ra te wüh ena akolo, teka fü engu anü amala nga ra fü yi. ²⁴ Amba cu de-ra, ma le kpah anü aceka yi, angü gbü jia ra, ma wu eyi, gü ba, Miri Yesu ena aküwa ra gbü ku ne, teka fü ra akoro kpaka yi kpala kere.

Dene ngü ka Epafüraditü

²⁵ Amba, teka ngü ka enga ni nih, Epafüraditü, ma tima engu, lügü eyi kpaka yi dela. Baka ta te yi tima engu, de ah le ta-ngü te ra gbü cinga ka-ra ne, ah le ta-ngü te ra gbü tima ka Me kpakine eyi fa sü. ²⁶ Ma le de engu du kpaka yi kere, angü gümü yi ngbü eke engu efa sü. Kpah bala, ah ngbü engbü de cinga teka ngü ka-yi, angü ah wu eyi, gü ba, keke ta te mere ni ne, to cinga fü yi eyi fa sü. ²⁷ Angü fanü fanü, ah yia ta ekpi akpi gbü mere keke, de te mere engu ne. Füh Me ayia awu cicinga na, füh ah aküwa engu. Me du wu kpah cinga ra, angü te Epafüraditü ena akpi ta akpi la, de bane ma ena angbü de mere cinga, afa mene cinga de gbü ku ne ka. ²⁸ Teka ngü la, füh ra ale teka atima engu, alügü kere kpaka yi, teka fü yi angbü de tadu. Kpah bala, maguma ra ena angbü de tadu, angü engu du eyi teka ale ta-ngü te yi kpala. ²⁹ Te Epafüraditü engu du koro eyi kpaka yi kpala la, yi za engu de mere tadu, baka enga ni yi guvu Yesu. Ah le fü yi adi ecu ngü ngü na acu, ³⁰ angü ah ce dudud mba ce, de bane, ah kpi eyi gbü tima ka Miri Yesu. Angü fanü fanü, ah tüka te-ye, to te-ye, yia ta ekpi ne, teka ale ta-ngü te ra, da yi.

3

Dene gara kpeke ngü te ma le amala fū yi

¹⁻² Wü di enga wüna, ah le de yi ngbü de tadu, teka ngü ka Miri ka-nih, Yesu Kurisito.

Yi ceka te-yi mbi, teka wü mürü mani, te ewü le afiti yi de siti riri ka-wü, gü ba, ah le de yi ti esa *basa, angü te ah bala de la, yi ti aküwa kphah de. Dela mere siti wu! Wü kpara te ewü ngbü emala ngü de bala ne, wüh ka-wü baka siti wü nü, te ewü ngbü ezoro wü bu wü. Yi mere e aje ngü ka-ewü dela de. Ngü la, ma mala fū yi eyi gügü, nda ngangana anda. Amba ah le de ma du ba ngü la fū yi kphah toto. Ma ti ambü de, angü ah ena ale-ta ngü te yi. Yi wu awu, gü ba, wü mürü wu la ena afiti yi, fū yi adürü te kaje ka Me asidi.

³ Wü mürü wu la gü ba, ani de züka kpara ka Me me-ani, angü ani ti eyi esa basa. Amba ngü bala nda ma! Ngü ka Me, ah de ngü ka küte, anga gele nda de. Ah ka-ye de ngü ka maguma nih. Nda-nih, nih zu me-nih de wü kpara ka Me, angü nih to maguma nih eyi 'buru fū Me, gbü wazi ka *Nzila Wazi Me. Te di bala, ah le de nih wu awu, gü ba, ngü ka gele ti aküwa nih nda de. Yesu Kurisito ngbü eto wazi fū nih me-ye, fū nih adi eküwa di.

⁴ Te wü ngü ka gele ena angbü ta eküwa kpara aküwa la, de bane ma ena angbü ta eo maguma ra tete. Anga te gara kpara ngbü efi, gü ba, ni ena aküwa, angü ni ngbü emere riri ka gele ka wü *Yisarayeale 'buru mbi la, amba ngü kaka ti afa nda-ra de. ⁵ Angü, ma zu de enga Yisarayeale, te wü di enga Yisarayeale bi cu me-wü. Wüh bi ra gbü nguwa Benzamina. Te wüh yaka ra tete, wüh gü ra esa basa gbü sikipi 'hajena, kphah baka riri te Me to fū *Abarayama. Te jia ra mba tete, fū ra ato te-ra, teka adi emere riri ka gele ka-a, ka wü di enga Yisarayeale, ta te Me to fū a gömö *Müse ne, 'buru. Fū ra alala kphah te ngü ka wü *Farusi, te ewü le ngü ka riri ka gele la fa sü ne. ⁶ Fū ra ao to ra, teka adi eto cinga te wü *kpara ka Yesu, angü ma fi ta, gü ba, wü kpara ka Yesu la ngbü esiti riri ka gele ka-a. Te di bala, ma siti ta nda-ra biri riri ka gele ka wü kundu a, kpo fi de. Ma ngbü ta emere wü ngü la 'buru mbi mbi mbi. Tekan ngü la, ma ngbü ta efi, gü ba, ma me-ra de züka kpara gbü jia Me, angü ma mere biri siti ngü nda-ra de.

⁷ Amba titine, teka ngü ka Yesu Kurisito, wü ngü ka gele, ta te ma ngbü eo fingangü ka-ra tete, gü ba, ah de züka ngü, te ena aküwa ra ne, ma ngbü eceka wü ngü la tüne gbü jia ra, baka töndö ngü kükürü. ⁸⁻⁹ Angü fanü fanü, wü ngü füh kotö ne

'buru ka-wü töndö ngü. Ngü biringbö, te ma o maguma ra tete, ah de ngü ka Miri Yesu Kurisito. Tekan ngü la, ma ce wü ngü, ta te ma ngbü emere ne eyi 'buru asidi, teka ngü ka Yesu. Angü wü ngü de füh kotö ne, ma ngbü eceka ewü tüne gbü jia ra 'buru baka gifa, anga ca-e, de te wüh ngbü eka, ebu kpa füh ka ne. Ma ce wü ngü ta te ma ngbü emere ne eyi 'buru asidi. Fū ra adu ato te-ra teka awu ngü ka Yesu Kurisito, alala eküküte, da ele ngü kaka de maguma ra 'buru. Angü, ma wu eyi, gü ba, ma ti areke gbü jia Me, teka ngü ka gele la, nda-ra de. Titine, Me du ngbü eceka ra baka züka kpara ka-ye ne, angü ma to maguma ra eyi fū Yesu Kurisito. ¹⁰ Ngü te ma le de maguma ra 'buru, ah teka awu ngü ka Miri ka-ra, Yesu, anü di kpa engagira nü. Angü ma le de engu to wazi fere, teka fū ra adi emere ngü kaka di, kphah baka e te Me to wazi fefe, fū Me azükü engu gbü kpi ne. Ma le kphah atüka te-ra, ace te-ra fū kpi teka ngü ka Yesu, kphah baka te engu to te-ye akpi teka ngü ka-ra ne. ¹¹ Angü te ma to maguma ra fefe bala, Me ena azükü ra gbü kpi, kphah baka Miri Yesu.

Dene ngü te yi ena ao to yi tete na

¹² Wü di enga wüna, yi mere e afi, gü ba, ma eyi züka kpara, *nzila baka Yesu *Kurisito ne, ah bala de. Amba, ma ngbü la ere ngü la cu de wazi, da eto te-ra, teka adi emere wü ngü 'buru baka Yesu Kurisito. Angü fanü fanü, dela si-ngü te Yesu Kurisito fe ra *mürü tima ka-ye tete. ¹³⁻¹⁴ Wü di enga wüna, ma wu eyi, gü ba, ngü ka-ra koro 'buru baka nda Yesu Kurisito la de. Amba ma ce wü diri ngü, ta te ma ngbü emere ne, eyi 'buru asidi. Angü ngü biringbö te ma o maguma ra tete, ah dene. Ma ngbü eto te-ra, da eo to ra 'buru, teka adi emere tima ka Yesu Kurisito ereke areke, zalü te ma ena akpi. Te di bala, Me ena aza ra, ago di kpa ye agbü kpi. Fū a angbü tundu ake di kpala, fi mere badi, teka ngü ka kpi ka Yesu Kurisito.

¹⁵ Wü di enga wüna, nih 'buru de te jia nih mba eyi gbü ngü ka Yesu ne, ah le de nih ngbü de fingangü la bala gbü nzö nih. Te di bala, ah le de yi di eo to yi 'buru, teka adi emere tima ka Yesu, kphah baka nda-ra. Amba, te fingangü ka wü gara kpara esüka yi kpi kpi ye la, Me ena asere zu ngü la fū ewü, areke fingangü ka-ewü me-ye. ¹⁶ Amba kpeke ngü te ma le amala fū yi, ah dene. Ah le de nih to te-nih de wazi, teka adi emere wü ngü ka Yesu 'buru, baka ta te nih kpo di gügü ne.

¹⁷ Te di bala, wü di enga wüna, ah le de yi ci te nga yi 'buru, teka adi emere wü ngü baka nda-ra. Angü, a gü ta tamu

ngü la eyi fü yi 'buru me-a. Te di bala, ah le de yi di elala gbü nga wü kpara, de te ewü ngbü emere wü züka ngü de bala esüka yi ne. ¹⁸ Amba, yi ceka te-yi 'be teka siti wü müürü mani. Ma mala ngü la ta eyi fü yi, nda nganga anda. Titine, ma du ngbü kpah emala ngü la fü yi tîne cu de ngura gbü jia ra. Angü mere bi wü kpara ladü, te ewü ngbü esu wu te wü, gü ba, ani de wü *kpara ka Yesu. Amba te yi ceka wü ngü, te ewü ngbü emere la, yi ena awu, gü ba, wüh ka-wü de wü vügu ka Yesu. Baka te Yesu kpi te *rü gbegete, teka aküwa nih gbü *siti ngü ka-nih ne, wü kpara la le ace siti ngü nda-wü de. ¹⁹ Te di bala, adu ngü ka-ewü, ah de kpi. Me ena agü ewü agbü mere du ka wa, fü ewü akpi fi mere badi. Kükürü de, angü wüh o fingangü ka-wü 'buru teka wü e, te ewü ngbü emaka teka bu wü. Wüh ngbü ele wü siti ngü, de te di esiti gbü jia Me ne, amba ngü la to lümü fü ewü nda de. Wüh ngbü efi ka-wü bü nzö nga wü e de füh kotö ne. Wüh fi nga ngü ka Me nda-wü de.

²⁰ Wü di enga wüna, yi mere e ao jia yi teka wü ngü de füh kotö ne de. Angü nih de wü kpara ka kotö ne nda-nih de, nih ka-nih nda-nih wü kpara ka kpi. Te di bala, ah le de nih di eo jia nih teka dudu ka Miri Yesu, *E-küwa-nih ne. ²¹ Angü ah ena akoro afü küte nih de titine ka cinga ne, baka nda-ye, te di de züka küte de mere wazi gbü ye ne. Miri Yesu ena amere wü ngü la bala, de mere wazi ka-ye, de te Me to fefe, teka ao wü ngü di 'buru esa lö ye ne.

4

¹ Wü di enga wüna, gümü yi ngbü eke ra efa sü, angü ma le yi de maguma ra 'buru. Ma ngbü kpah de mere tadu teka ngü ka-yi, angü Miri Yesu ena agbo nga ra teka ngü ka-yi, gbü *adu sikipi, te engu ena adu akoro tete na. Te di bala, wü di enga wüna, dela ngü te ma mala fü yi. Yi rü kpekpeke gbü ngü ka Miri Yesu, ta te yi je gömö ra ne.

Dene adu ngü ka-ra fü yi

² Wü di enga wüna Ewüdiya ake Sitike, ma ngbü emala ngü fü yi, da enda'ba tera, gü ba, ah le de yi di ele te-yi, baka wü di enga ni, guvu Miri Yesu. ³ Kpah demü, te mü di enga wüna gbü tima ka Yesu ne, ma ngbü eyi-ta mü, de mü le ta-ngü te wü tangbase ka-nih la, wü Ewüdiya ake Sitike, de wüh ce siti maguma, de wü ngü ka yiki asidi. Ah le de wüh reke ngü te di eze ngba wü, adu angbü de gu maguma esüka wü. Angü wüh de wü kpeke kpara, ta te a mere tima de ewü, teka abaya ngü ka Yesu esüka wü kpara. Wüh mere

tima la ta de wü Kelemete, be kpah te gara wü di enga ni nih, te ewü di de züka *kpara ka Yesu, te Yesu küwa ewü eyi.

⁴ Wü di enga wüna, gbü wü sikipi 'buru, ah le fü yi angbü engbü de tadu, teka ngü ka Miri ka-nih Yesu. Ma ngbü enda nga ngü la fü yi kpah toto, gü ba, ah le de de yi di engbü de tadu! ⁵ Ah le de yi di engbü esüka wü kpara 'buru de gu maguma. Angü sikipi ka Miri Yesu eyi ghamari, teka fü ah adu akoro. ⁶ Fingangü ka-yi mere e adi esiti, teka wü ngü de füh kotö ne de. Maguma yi mere e agürü kpah de. Gbü wü ngü 'buru, yi di eku gba fü Me, da ece wü ngü la 'buru esakaka. Te cinga e ngbü emere yi la, de yi yi-ta Me tekaka, de züka maguma yi, de yi di kpah egbo nga iri na. ⁷ Te yi ngbü eku gba fü Me bala, Me ena ato wazi fü yi, teka fü maguma yi angbü egu kpina, gbü wü ngü la 'buru, teka ngü ka Yesu Kurisito. Te di bala, Me ena ato gu ngü ka-ye, te fa fingangü ka wü kpara 'buru ne, fü yi.

⁸ Wü di enga wüna, adu ngü, te ma le amala fü yi, ah dene. Yi mere e adi eo fingangü ka-yi, teka wü töndö ngü de füh kotö ne, de. Amba yi di eo fingangü ka-yi duu, teka zu ngü ka Me, de wü züka ngü, te ena areke gbü jijia. Fü yi adi efi nga wü ngü te di *nzila, bete mene ewü te di mbi, kpah de mene wü züka ngü, te wü kpara ena angbü egbo nga iri yi tete, te ena ato kpah tadu fü Me. Dela wü ngü te yi ena ao fingangü ka-yi tete. ⁹ Yi di efi nga wü mene ngü, ta te yi je gömö ra, be kpah te wü ngü ta te yi wu, te ma ngbü emere gbü jia yi ne, de yi di emere kpah bala. Te yi mere bala la, Me, de te ngbü eto gu ngü fü nih ne, ah ena angbü de wü yi tundu, da egu maguma yi.

Dene ngü teka letangü te yi tima fere

¹⁰ Ma ngbü de tadu, da egbo nga iri Miri Yesu, angü yi ngbü fi efi nga ra, fü yi ayia amaka kaje, teka atima letangü fere. Fanü fanü, ma wu eyi, gü ba, to yi iri teka ra nda de. Angü, yi le ta eyi amere ngü la fere gügü, amba yi maka kaje, te yi ena atima ta wü e la tete fere kere ne, nda-yi de. Wayi bala fü Me, teka te engu ü kaje la fü yi. ¹¹ Yi mere e afi, gü ba, ma mala ngü la bala, angü cinga wü e ngbü emere ra amere ne, de. Angü ma wu da etüka tera, adi engbü de gu maguma, gbü wü ngü 'buru ne, kpo. ¹² Ma wu da engbü ba müürü cinga, anga ba kpara te di de mere bi wü e esaka ye ne, kpah kpo. Angü gbü wü ngü la 'buru, ma wu da egu maguma ra, da engbü de tadu, gbü wü ngü de bala ne eyi. Anga te ma zü züka e, anga te ma ngbü tala la, ah mbü nda kpah de. ¹³ Te di bala, gbü wü ngü la 'buru, ma ti eyi angbü de gu

maguma, da emere tima ka Me, teka ngü ka Yesu Kurisito, de te ngbü eto wazi fere ne. ¹⁴ Wayi bala fü yi, teka te yi mere züka ngü, ale ta-ngü te ra gbü cinga ka-ra ne.

¹⁵ De-yi wü *kpara ka Yesu agbü Filipoyi, yi wu eyi mbi, gü ba, gbü lakı te ma kpo da emala ngü ka Yesu fü yi, o ra yia tete agbü Makedoniya* ne, gara kpara te le ta-ngü te ra nda ma, nzö bü de yi kpikpi yi, te yi le ta ta-ngü te ra, teka fü ra amaka wazi, anü de tima ka Me, kpa engagira nü.

¹⁶ Wayi, fanü fanü, gbü wü sikipi te ma di ta agbü Tesalonika,[†] yi tima ta wü letangü fere nda nganga, baka du 'basu. ¹⁷ Angü gbü wü ngü la, ngü te to mere tadu fere, ah de ngü ka letangü la nda de. Amba ma ngbü de mere tadu, angü ma wu eyi, gü ba, Me ena ato mere bi züka ngü fü yi, na wü e ka-yi la.

¹⁸ Titine ma ngbü de mere tadu, angü wü e 'buru, de te yi tima fere esaka Epafüraditü ne, ma maka eyi. Letangü ka-yi, te yi tima fere la, fa mene ta te ma ngbü ele ne ka. Ngü la reke gbü jia Me fa sü, angü ah baka te yi to e la cu fü Me. ¹⁹ Te di bala, Me ena ale ta-ngü te yi, de wü e 'buru te ngbü efa yi, teka ngü ka Yesu Kurisito, angü mere bi züka wü e ladü esakaka fa sü, te ti anza de. ²⁰ Te di bala, nih gbo nga iri Wö nih, Me, fi mere badi. Ah di bala.

Dene adu mandı ka-ra, Pawülü

²¹ Yi to mandı ka-ra fü wü *kpara ka Yesu agbü Filipoyi kpala 'buru, de iri Yesu Kurisito. Wü di enga ni nih, de te a ngbü emere tima ka Me de ewü kpakine ne, to kpah mandı ka-wü fü yi 'buru. ²² Wü kpara ka Yesu de kpakine 'buru to mandı fü yi. Ah fa sü le, mene wü kpara ka Yesu, te ewü ngbü emere tima kpa gba Miri *Kayisara ne, wüh to mandı fü yi cu fa sü.

²³ Miri ka-nih Yesu Kurisito di de yi, de ah di eto wazi fü yi, de *züka maguma ye. Ah di bala.

Dela adu ngü te ma mala fü yi, de-ra Pawülü.

* **4:15** 4:15 Filipoyi de gara köti gbü tö ka Makedoniya. Makedoniya.

† **4:16** 4:16 Tesalonika kpah de gara köti gbü tö ka

Dene köcökpa te Pawülü ba fü wü kpapa ka Yesu agbü Kolosalayi Kolosalayi

Masere si-ngü

Kolosayi ta de gara mere köti agbü tö ka Asiya, te di ede Efeso to kpa fügö, baka kilometere kama 'basu (2,000). Pawülü koro ta cu agbü Kolosalayi kpala nda de. Amba kpapa te mala ngü ka Yesu fü wü kpapa ka Kolosalayi, ah de gara komoko de iri ye Epafürasi, te Pawülü mala ta nganga na, gü ba, ni le engu fa sü, angü engu ngbü emere tima ka Yesu kpekpeke, kpah baka ni, Pawülü ne. Epafürasi engu na, ah kpah de kpapa ka Kolosalayi. (Mü ena amaka ngü la gbü Kolosalayi 1:7; 4:12.)

Pawülü ba köcökpa ne, o engu di agbü ku teka ngü ka Yesu Kurisito. (Mü ena amaka ngü la gbü Kolosalayi 1:24; 4:3, 10, 18.) Fü Epafürasi akoro amala nga wü *kpapa ka Yesu agbü Kolosalayi ne fü Pawülü, gü ba, wüh to maguma wü eyi 'buru fü Yesu Kurisito, kpah da ele te-wü de wü bu wü, wü kpapa ka Yesu. Te Pawülü je ngü la, fü ah angbü de mere tadu teka ngü ka-ewü la. (Mü ena amaka ngü la gbü Kolosalayi 1:4, 8.)

Fü Epafürasi adu amala kpah gara ngü fü Pawülü, gü ba, wü gara wü siti müri mani kpo eyi da efiti wü kpapa ka Yesu agbü Kolosalayi de siti riri ka-wü, gü ba, ah de riri ka Me. (Mü ena amaka ngü la gbü Kolosalayi 2:8-23.) Te Pawülü je ngü la bala, fü ah angbü de cinga teka ngü ka-ewü. Tekan ngü la, fü Pawülü ayia aba köcökpa ne fü wü kpapa ka Kolosalayi, teka aü fingangü ka-ewü, de wüh rü kpekpeke gbü ngü ka Yesu. Wüh mere e adi eje töndö ngü ka wü müri wu la nda-wü de. Mere kpeke ngü te engu mala fü ewü, ah gü ba, Yesu Kurisito de Mere Miri te ngbü gbü nzö nih, de wü gara ngü 'buru me-ye. Yesu küwa nih eyi gbü wü *siti ngü 'buru. Gara ngü te nih ena amere teka aküwa te-nih de tete-nih ne, ah nda ma. (Mü ena amaka ngü la gbü Kolosalayi 1:15-2:3.)

Pawülü tima köcökpa ne fü wü kpapa agbü Kolosalayi esaka Tikiko ake Üneshimü. (Mü ena amaka ngü la gbü Kolosalayi 4:7-9.) Tikiko kpah de kpapa te Pawülü tima köcökpa fü wü kpapa ka Efeso ta esakaka. Üneshimü nda-ye de kpapa ta te Pawülü ba köcökpa fü Filemüna tekaka na ne, angü Üneshimü engu ta de labi ka Filemüna.

Ngü te Pawülü ba tima fü wü kpapa ka Yesu agbü Kolosalayi ne, ah kpah ge baka wü ngü, te ngbü emere te-wü de titine ne.

Mere ngü gbü köcökpa ne, ah de ngü ka wazi ka Yesu te di füh wü ngü 'buru, angü engu ngbü eküwa wü kpapa 'buru, de te ewü ngbü baka labi gbü ku ka *Satana ne.

Wü ngü te mü ena amaka gbü köcökpa ka wü Kolosalayi ne, wüh dene.

Sapita 1 Ngü ka wazi ka Miri Yesu, te fa wü ngü 'buru

Sapita 2-4 Ngü ka ngbüngbü ka wü kpapa, te ewü ra fü Yesu

Dene mandä ka Pawülü fü wü kpapa ka Yesu, agbü Kolosalayi

¹⁻² De-ra Pawülü, te Me fe ra *müri tima ka Yesu Kurisito ne, a ba köcökpa ne fü yi me-a, ake enga ni nih Timoteyo. A ba köcökpa ne fü yi wü *kpapa ka Yesu agbü Kolosalayi, kükürü de, angü yi de züka wü di enga ni a, te yi lala eyi eküte Yesu Kurisito. Wö nih, Me, di de yi, da eto gu ngü ka-ye fü yi de *züka maguma ye.

Dene ngü te ma ngbü egbo nga Me di, teka ngü ka-yi

³ Gbü wü sikipi 'buru, a ngbü eku gba fü Me, Wö ye Miri ka-nih Yesu Kurisito ne, da egbo nga iri na, teka ngü ka-yi. ⁴ A ngbü egbo nga iri Me bala, kükürü de, angü a je nga yi, gü ba, yi to maguma yi eyi 'buru fü Yesu Kurisito, kpah da ele te-yi de wü bu yi, wü kpapa ka Yesu, de maguma yi biringbö. ⁵ Kükürü de, angü yi ngbü eyi eo jia yi teka *küküwa, de te Me reke o fü yi agbü sü ka-ye agbü kpi ne. Küküwa la, wüh mala nganga ta eyi fü yi gügü, gbü sikipi ta te Epafürasi mala zu ngü ka Yesu fü yi tete na ne. ⁶⁻⁷ Titine ngü ka Yesu la kpo eyi da ebaya gbü nga nzö wü sü, füh kotö ne 'buru. Fü mere bi wü kpapa, te ewü ngbü eje ngü ka Yesu la, akpo da efü maguma wü, ele ngü la de maguma wü biringbö. Ngü la ngbü emere te-ye kpah baka ngü te yi ngbü emere esüka yi agbü Kolosalayi kpala, akpo gbü sikipi ta te Epafürasi mala ngü ka Yesu fü yi tete, gü ba, "Me tima Yesu eyi, teka aküwa nih, teka *züka maguma ye ne." Epafürasi, ta te mala ngü ka Yesu fü yi ne, engu de züka kpapa, ah kpah de kpeke kpapa, te a le engu fa sü, angü ah ngbü emere tima ka Yesu de maguma ye biringbö kpah baka a. Tekan ngü la, fü a atima engu kpapa yi teka amala ngü ka Yesu fü yi. ⁸ Ah du mala nga yi fü a sene me-ye, gü ba, *Nzila Wazi Me to wazi eyi fü yi, teka fü yi angbü ele wü bu yi di.

⁹ Tekan ngü la, akpo gbü sikipi te a je ngü ka-yi la tete, fü a angbü fi bü da eyi-ta Me teka yi gbü wü sikipi 'buru, de Me di de yi, da eto Nzila Wazi ye emaguma ye, teka fü yi adi ewu wü ngü, de te Me ngbü ele ne, adi emere mbi mbi mbi. ¹⁰ Te di bala, yi

ena angbü fi bü da emere wü ngü, de te ena areke gbü jia Miri ka-nih Yesu Kurisito, da efa nganga mbi mbi mbi. Te yi ngbü emere züka ngü la bala, Miri Yesu ena angbü de mere tadu teka yi, fü yi awu ngü ka Me areke areke, anü di kpa engagira nü. ¹¹ A ngbü kphah eyi-ta Me, teka de Me to mere züka wazi ka-ye, te fa wü ngü 'buru ne, fü yi, teka fü yi adi engbü de tadu ka Me emaguma yi, erü kpekpeke, da etüka te-yi gbü wü cinga ka-yi 'buru.

¹² Nih gbo nga iri Wö nih Me de tadu, angü engu fü nih eyi züka wü di ye tete, teka fü nih amaka kphah züka ngü, de te engu reke o fü wü kpara ka-ye agbü kpi ne. ¹³ Angü Me küwa nih eyi gbü siti wazi ka *Satana, ta te zoro nih baka biti ne. Fü Me adu aza nih, ao esa wazi Ye ye, Yesu Kurisito, te engu le fa sü ne. ¹⁴ Angü Yesu Kurisito kpi teka afuru nih gbü ku ka Satana, kphah teka fü Me aboro wü *siti ngü ka-nih.

Dene ngü ka wazi ka Miri Yesu, te fa wü ngü 'buru

¹⁵ Kpara te wu Me de jia ye nda ma, amba nih tü eyi awu Me eküte Yesu Kurisito, angü engu de Me, te za küte baka nih. Yesu ka-ye ta kü ladü, o Me mere wü e la de. Me o engu ba Miri gbü nzö wü e, de te engu mere ne 'buru. ¹⁶ Angü Yesu mere wü e ka-ye 'buru me-ye, gbü wazi ka Me, te di de Wö ye na. Ah mere wü e agbü kpi, de mene ewü fih kotö ne, de mene wü e te nih tü eyi awu de jia nih, be kphah te mene ewü te nih tü awu de. Engu mere kphah wü *malayika, de wü mere kpara kawü, anga wü miri ka-wü. *Satana, de *siti wü di enga me, ta te ewü sü gü te Me ne, engu mere ewü kphah me-ye. Angü Me to wazi fü Yesu, de ah mere wü e la 'buru me-ye, teka de wüh di egbo nga iri Yesu teka ngü la. ¹⁷ Ta gügü te enga gina, o wüh mere gara e 'buru 'buru la de, Yesu Kurisito ka-ye ladü. Te di bala, ah ngbü eceka kpi sidi nga wü e la, da eto wazi fü ewü 'buru me-ye, de wüh di emere tima ka-wü gbü züka kaje.

¹⁸ Yesu Kurisito de Miri ka-nih. Ah kphah baka nzö nih, nih nda-nih baka küküte. Ah ngbü eküwa nih me-ye, angü ah kphah de gina kpara, te Me zükü engu gbü kpi. Dela si-ngü te Yesu Kurisito ngbü di mere Miri gbü nzö wü miri, de wü e 'buru ne. ¹⁹ Angü Me to wazi ye 'buru fü Yesu, de ah mere wü ngü 'buru gegege baka ni, Me. ²⁰ Kphah bala, Me mala teka wü e de füh kotö ne, de wü mene e agbü kpi, gü ba, de-ni, Me, ni ena areke ngü ka wü e la 'buru de *ngüte Ye ni, Yesu Kurisito. Angü Yesu kpi füh *rü gbegete teka aküwa nih, wü kpara 'buru.

²¹ Ta te enga gina, süka yi ngbü de wü Me nengete, angü yi ta ba wü vügü kaka, teka siti fingangü, de wü *siti ngü ka-yi, ta te yi ngbü emere ne. ²² Amba titine, Me boro siti ngü ka-yi emaguma ye eyi, teka ngü ka kpi ka Yesu Kurisito. Angü wüh bi Yesu Kurisito füh kotö ne, fü ah akpi teka afü yi ba wü di Me. Te di bala, yi tü eyi arü engagira Me ba züka kpara *nzila, angü gara siti ngü, te wüh ena amala ngü eküte yi tekaka ne, tüne eyi ma. ²³ Te yi le angbü ba wü di Me la, ah le de yi lala fi bü eküte ngü kaka, da eo jia yi teka ngü ka Yesu Kurisito, ta te wüh mala fü yi ne. Yi mere e ace ngü la de. Angü dela ngü ka Yesu, te wü eyi bala, gbü wü nga nzö sü füh kotö ne 'buru.

Dene ngü ka tima te Me to fere

De-ra Pawülü, Me tima ra kphah eyi teka fü ra angbü emala ngü ka Yesu fü wü kpara. ²⁴ Amba titine ma ngbü ezü cinga de gbü ku ne, teka ngü ka Yesu la. Te di bala, ma ngbü engbü de tadu teka cinga la, angü dela ngü te ena ato wazi fü yi. Angü Yesu mala ta ngü, gü ba, wü kpara ka-ni ena azü cinga bala, teka ngü ka-ni. Te di bala, ah ba e te ma ngbü ezü du cinga ka Yesu ne, teka ato wazi fü wü kpara kaka. ²⁵ Me fe ra *mürü tima ka-ye, teka ale ta-ngü te yi, ato wazi fü yi, wü kpara ka-ye. Angü ah mala ngü fere, gü ba, ma mala ngari ni, Me, fü yi, wü *ganzi kpara, 'buru. ²⁶⁻²⁷ Ngari Me, te engu to fere la, ah de ngü ka Yesu Kurisito. Ta gügü te enga gina, Me wo ngü ka Yesu la awo fü wü kpara 'buru. Amba titine, gbü wü sikpi ne, Me du sere ngü ka Yesu Kurisito la eyi fü nih, wü kpara ka-ye, mbölö. Dela mere kpeke fingangü ka Me, te fa wü ngü 'buru afa. Angü Me le agü tamu fingangü ka-ye la fü nguwa wü kpara füh kotö ne 'buru. Ngü la, ah de ngü ka Yesu Kurisito, te ngbü me-ye emaguma yi. Tekan ngü la, nih ngbü eyi 'buru eo jia nih, teka fü nih aküwa te gara, agbü sü ka Me agbü kpi.

²⁸ Dela si-ngü te a ngbü emala ngü ka Yesu Kurisito tete, fü wü kpara 'buru ne. Fü a angbü kphah da eri ewü kpekpeke, de wazi te Me to fü a ne. Angü a le de wü kpara 'buru to maguma wü fü Yesu Kurisito, fü jia ewü amba amba gbü ngü ka Me, teka fü ewü angbü ba züka wü kpara ka Me. ²⁹ Te di bala, ma ngbü eo to ra, teka amere tima la, anza, de mere wazi, te Yesu Kurisito ngbü eto fere ne.

2

¹ Wü di enga wüna, te ma wu yi de jia ra kphah de la, ngü ma, amba ma le fü yi awu, gü ba, ma ngbü eo to ra 'buru

teka ngü ka-yi, da eku gba fü Me teka yi, wü *kpara ka Kolosalayı. Ma ngbü kphah eku gba fü Me teka wü kpara ka Yesu de ede yi, agbü Lawüdikiya la, be kphah te mere bi wü kpara, te ewü wu ra de jia wü la de, kphah baka yi ne. ² Ma ngbü eku gba fü Me bala, de ah to wazi fü yi, teka fü yi arü kpekpeke gbü ngü ka Me, kphah da ele te-yi esüka yi de maguma yi biringbö. Ma le kphah de Me ü fingangü ka-yi, fü yi awu zu ngü ka Me 'buru areke areke, teka fü yi angbü de tadu. Angü ah de zu ngü ka Me, te Me sere fü nih gbü wü re ne. Ngü la, ah de ngü ka Yesu Kurisito, *E-küwanih. ³ Angü Yesu ngbü eto wazi fü nih, da eü fingangü ka-nih duu me-ye, teka fü nih awu mere kpeke ngü, gbü ngü ka Me mbi mbi mbi. Angü ngü ka Me la, ah de mere züka ngü, te wo te-ye awo fü wü kpara.

⁴ Ma mala wü ngü la fü yi bala, angü wü kpara ena afiti yi, de gara türü ngü ka mani ka-wü la fiti. ⁵ Baka te ma di esüka yi kpala ma ne, ah mere e de. Amba nih ladü de nih ma tundu gbü fingangü, angü ma ngbü kpakine fi bü da efi nga yi. Ma ngbü de tadu, angü ma je nga yi eyi, gü ba, yi ngbü kpala ele te-yi de wü bu yi, de maguma yi biringbö. Yi ngbü kphah erü kpekpeke gbü ngü ka Yesu.

Dene ngü ka ngbüngbü ka wü kpara, te ewü ra fü Yesu

⁶⁻⁷ Wü di enga wüna, tütine yi ra eyi fü Miri Yesu. Te di bala, ah le de yi di fi bü emere wü ngü 'buru, de te engu ngbü ele ne. Yi lala eküte Miri Yesu, baka rü te to si ye, lala gbü tö, de yi nü de ngü kaka kpa engagira nü. Yi rü kpekpeke gbü ngü ka Miri Yesu, de te wüh rü yi di la, de yi di eo to yi, da egbo nga iri Me, gbü wü sikpi 'buru.

⁸ Yi ceka te-yi mbi, angü wü gara kpara ena afiti yi de töndö riri ka-wü. Angü wüh gü ba, riri ka-ani la, ah de riri ka Me, amba ah de ngü ka Me nda de! Ah ka-ye de mere wu! Ah ka-ye de siti riri ka gele ka wü me ka wü kundu wü. Dela riri ka Yesu Kurisito nda de. ⁹ Ah le de yi lala te zu ngü ka Yesu, angü Yesu Kurisito de Me gegege baka Wö ye. Fü ewü abi engu ba kpara füh kotö ne, teka asere ngü ka Me la mbölö fü nih. ¹⁰ Engu kphah de Mere Miri, gbü nzö wü e 'buru, wü kpara, de wü *malayika ka Me, be kphah te wü *siti wü di enga me, de wü muruyi 'buru. Angü Me to wazi la me-ye fefe. Dela si-ngü te Me to kphah wazi la di fü yi, angü yi ngbü eyi elala eküte Yesu Kurisito.

¹¹ Tekah ngü ka Yesu, te yi lala eyi eküküte na ne, Me ba tere ka-ye eyi eküte yi, teka asere fü wü kpara, gü ba, yi de wü kpara ka-ni, ka Me fanü fanü. Nda wü di

enga *Yisaraye, wüh ngbü eti esa *basa, teka asere ngü la fü wü kpara, gü ba, ani de wü kpara ka Me me-ani. Amba, nda-nih tere te Me ba eküte nih ne, ah ka-ye kpi kpi ye. Ah de ngü te wü kpara mere de kpa wü ne nda de. Angü Yesu Kurisito za diri fingangü ta emaguma nih ne eyi asidi, teka fü nih angbü *nzila bakaka. ¹² Kphah bala, gbü sikpi ta te yi za *babatüza tete, ah baka ta te yi kpi eyi tundu de wü Yesu, fü ewü ati yi gbü mbükü kphah tundu de ewü. Fü Me adu azükü yi gbü kpi la, kphah tundu de wü Yesu, teka te yi to maguma yi eyi fefe. Kphah bala, angü yi le eyi, gü ba, Me zükü Yesu Kurisito eyi gbü kpi, de mere wazi ka-ye. ¹³ Angü te enga gina, yi ngbü ta baka wü kövö, teka wü *siti ngü ka-yi, ta te yi ngbü emere ne, angü yi wü ngü ka Me la de. Kphah bala, yi le ngü ka Me ta kphah de. Amba tütine, Me küwa yi gbü siti ngü la eyi, teka ngü ka Yesu Kurisito. Angü ah boro wü siti ngü ka-nih la eyi guvu ye 'buru asidi. ¹⁴ Angü Me kolo ta ngü ka-nih eyi, fü ah aba ngü la gbü köcökpa, gü ba, nih ena akpi akpi fi mere badi, angü nih mere *Riri ka-ni, Me, nda-nih de. Amba tütine teka ngü ka Yesu, te kpi füh *rü gbegete, teka aküwa nih ne, Me du söör ngü, ta te engu ba teka ngü ka-nih ne, eyi asidi. ¹⁵ Angü, gbü sikpi te Yesu kpi tete füh rü gbegete, Me nza wazi *siti wü di enga me eyi, de wü miri ka-wü, de wü muruyi 'buru. Fü ah ato lümü te ewü gbü jia wü kpara 'buru, ayia ao ewü tüne wü labi, esa lö Yesu.

¹⁶ Te di bala, wü di enga wüna, wü gara kpara le ao riri ka gele ka-wü kpekpeke ba riri ka Me, neh teka ne? Wüh gü ba, yi mere e azi mene e dene de, anga yi nzö mene e dene de. Anga teka gele ka to fufe, anga *sikpi ka Me, anga gara gele bane, yi di emere ngü bane, anga yi mere ngü bane de. Amba ma ngbü emala fü yi, gü ba, yi mere e aje ngü ka-ewü la nda-yi de. ¹⁷ Angü riri ka gele ka wü kundu nih la, ah bü baka kuru e, te Me to ta teka asere nga ngü ka *küküwa, te ni, Me, ena aküwa nih di ne. Amba zu küküwa la, ah ka-ye duu de Yesu Kurisito kpi kpi ye. Te di bala, ah le de nih ce ngü ka gele la, nih du, nih lala gbü nga Yesu. ¹⁸ Anga te gara kpara koro, fiti yi, gü ba, ah le de yi di ecu ngü wü di enga me, anga wü malayika, da eku gba fü ewü la, yi mere e aje ngü ka-ewü la nda-yi de, angü yi ena adürü te kaje ka Me. Te mü de *kpara ka Yesu la, mü di ecu 'duwa ngü Yesu kpi kpi ye. Wü kpara, te ewü emala siti riri de bala, le ao te-wü memere, gü ba, "Wüh sere ngü la fü ani gbü roto." Amba ngü ka-ewü la, ah de ngü ka Me nda de, ah ka-ye de töndö ngü kükürü. ¹⁹ Wü mürü wu

la lala eküte zu ngü ka Miri Yesu ne nda-wü de. Te di bala, nih lala nda-nih eküte Miri Yesu, angü engu baka nzö nih. Nih, wü kpara kaka, tîne baka küküte. Angü Miri Yesu ngbü eto wazi fü nih me-ye, teka fü nih adi ele te-nih de wü bu nih di. Fü nih angbü ba nguwa kpara biringbö, aga, akoro kpekepeke gbü ngü ka Me.

²⁰ Wü di enga wüna, ah mere neh baye? Yi wu, gü ba, te yi lala eyi gbü nga Yesu, yi kpi eyi tundu de ewü ne, yi wu bala nda-yi de? Te di bala, wü di enga me ti angbü de wazi gbü nzö yi nda-wü de, angü Yesu za yi eyi esa wazi ka-ewü la asidi. Te di bala, anga yi le adu angbü kphah emere wü riri ka wü gele, neh teka ne? ²¹⁻²² Yi mere e aje riri ka-ewü la nda-yi de, angü wü mürü wu la ena ato riri ka gele ka-wü la fü yi, gü ba, gara e bane, yi zü de, yi to kpa yi tete kphah de, angü ngü la ena asiti yi gbü jia Me. Amba dela ka-ye töndö riri ka wü kpara füh kotö ne, ah de riri ka Me nda de. Ah le de nih wu awu, gü ba, ngü ka wü e füh kotö ne ena anza ka-wü 'buru anza. Te di bala, wü e la ena asiti nih gbü jia Me, neh baye? ²³ Fanü fanü, wü gara kpara ngbü efi, gü ba, wü riri ka gele la de zu ngü, te ngbü eto wazi fü wü kpara, teka fü ewü areke di gbü jia Me. Wü kpara, te ewü le wü riri de bala, ngbü embü te-wü de mere bi wü riri la, kphah da *e'bi te-wü, da enda'ba te-wü fü wü di enga me. Amba ngü gbü wü e la 'buru nda ma. Wü riri ka gele la le ta-ngü te kpara, teka fü ah ace siti ngü ka-ye ne, nda de.

3

Dene zu riri ka Me, te ah le de nih di emere

¹⁻² Wü di enga wüna, ah baka te nih kpi ta eyi tundu de wü Yesu. Fü Me adu azükü nih gbü kpi la kphah tundu de ewü, angü nih lala eyi eküküte. Te di bala, ah le de yi o maguma yi, de wü fingangü ka-yi 'buru, teka ngü ka Me agbü kpi. Yi mere e afi nga wü e ka füh kotö ne de. Angü Yesu, de te yi lala eküküte ne, ah ngbü eyi füh kpökpö ka mere miri, gbü kokpa ka Me agbü kpi. ³ Kphah bala, yi wu kpo, gü ba, nih kpi ta eyi de wü Yesu. Te di bala, nih ti afi nga siti ngü ka kotö ne nda-nih tîne de, angü Me küwa nih eyi, teka te nih lala eyi eküte Yesu Kurisito ne. Te di bala, wü kpara füh kotö ne ti awu ngü ka *küküwa, te nih maka la, nda-wü de, angü küküwa la wo te-ye awo, guvu Yesu Kurisito. ⁴ Kphah bala, gbü sikpi te Yesu, *E-küwa-nih, ena adu akoro, teka asere te-ye tete fü wü kpara füh kotö ne 'buru, baka Mere Miri, engu ena asere nih fü ewü, baka züka wü kpara ka-ye *nzila.

⁵ Te di bala, ah le de yi ce siti gümü wü ngü ka füh kotö ne asidi. Yi ceka wü ngü la gbü jia yi baka e te yi kpi eyi akpi. Yi ce ngü ka waza, ngü ka yala, de wü siti fingangü ka lümü 'buru asidi. Mü za würüse, anga komoko ngbee biringbö, de yi ngbü duu ake di. Yi ce ngü ka gümü e kphah asidi, angü te mü ngbü ekpi gümü e la, ah ba e te mü ngbü eo wü e la baka me ka-mü. ⁶ Dela si-ngü te maguma Me ena anzu, fü ah ato kuru te wü kpara, te ewü ngbü emere wü *siti ngü de bala ne. ⁷ Angü ta gügü, o yi le ngü ka Yesu la de ne, yi ngbü ta emere wü *siti ngü de bala gbü wü sikpi 'buru, kphah baka wü bu yi. ⁸ Amba títine, yi mere e adu arí gbü wü ngü la tîne de. Yi mere e agü gü de wü kpara de. Yi mere e angbü de siti maguma kpaka wü kpara kphah de. Yi ce ngü ka kanga, ambala'ba, de wü soko 'buru asidi. ⁹ Yi mere e angbü esutu wu esüka yi de. Angü, gbü sikpi ta te yi to maguma yi tete fü Yesu ne, yi ce wü diri siti fingangü, ta te yi ngbü emere ne, eyi 'buru, ¹⁰ Títine ne, Me fü yi eyi ba to kpara gegege baka ye, teka fü yi adi ewu ngü ka-ni, Me, ereke areke, fü yi angbü emere wü ngü 'buru baka te ni, Me ngbü ele. ¹¹ Te di bala, nih, wü *kpara ka Yesu, nih ngbü tîne eyi baka nguwa kpara biringbö. Te mü de enga *Yisarayele, anga *ganzi kpara, ah mere e de. Te mü ti eyi esa *basa, anga mü ti nda-mü kphah de la, ah mere e kphah de. Te mü wu ngü fa sü, anga mü wu ngü 'buru 'buru de la, ah ba ngü kphah de. Te mü de mürü cinga, anga te mü di de kpeke kpara la, ngü ka-yi gbü jia Me, ka-ye 'buru biringbö. Angü mere ngü, ah ka-ye duu ngü ka Yesu Kurisito kpikpi ye, angü nih lala eyi eküküte, fü engu angbü emaguma nih.

¹² Wü di enga wüna, Me fe yi eyi, o züka wü kpara ka-ye tete *nzila, angü ah le yi fa sü. Te di bala, ah le de yi di ewu cinga wü bu yi, da emere züka ngü fü ewü bu, da ele ta-ngü te ewü, gbü wü sikpi 'buru. Yi mere e angbü e'du ngü yi de. Yi di emere wü ngü 'buru ferre. Maguma yi mere e adi enzu kere kere de. ¹³ Yi di engbü de gu maguma esüka yi. Te gara kpara mere yi esiti la, yi ce ngü la fefe. Ah le de yi di eboro siti ngü ka wü bu yi, kphah baka te Miri ka-nih Yesu ngbü eboro siti ngü ka-nih ne. ¹⁴ Mere ngü te yi ena angbü emere esüka yi, ah dene. Yi di ele te-yi esüka yi de maguma yi 'buru, angü te yi mere bala la, ngü ka-yi ena angbü kphah 'buru biringbö.

¹⁵ Ah le de Yesu Kurisito to wazi fü yi, teka fü yi angbü de gu maguma esüka yi. Angü dela si-ngü te Me i yi tete, teka fü yi angbü tundu ba kpara biringbö. Ah le

kpah de yi di egbo nga Me gbü wü sikipi 'buru. ¹⁶ Ah le de ngü ka Yesu Kurisito ngbü fi emagama yi, gbü wü sikipi 'buru, teka fü yi awu ngü kaka areke areke. Te di bala, ah le kpah de yi di eri wü bu yi de ngari Yesu, da eto wazi fü ewü. Yi di kpah ebi wü ci ka Me esüka yi, da egbo nga iri Me di de mere tadu.

¹⁷ Wü di enga wüna, dela kpeke ngü te ma mala fü yi. Ah le de wü ngü, te yi ngbü emere, anga emala esüka yi ne, de yi di emere wü ngü la 'buru de iri Miri Yesu. Yi di kpah egbo nga iri Wö nih Me, teka ngü ka Yesu.

Dene ngü ka ngbüngbü ka wü kpara ka Yesu agba wü

¹⁸ Dene ngü te ma le amala fü yi, wü würiuse. Ah le fü yi angbü eje ri wü watı yi. Angü te yi ngbü emere bala la, ngü la ena areke gbü jia Miri Yesu afa sü.

¹⁹ Nda-yi wü komoko, ma emala fü yi, gü ba, ah le fü yi angbü ele wü wara yi ale. Yi mere e adi emere ewü esiti de.

²⁰ Nda-yi wü jaji, ngü te ma le amala fü yi, ah kpah dene. Ah le de yi di eje riri ka wü wö yi de wü ni yi gbü wü ngü 'buru, angü ngü de bala reke gbü jia Me fa sü.

²¹ Nda-yi, wü wö ye wü jaji, de wü ni ewü, yi mere e adi eri wü jaji ka-yi de siti maguma de, angü ngü la ena asiti fingangü ka-ewü.

²²⁻²⁴ Tekka ngü ka-yi, wü labi, ma emala fü yi, gü ba, ah le de yi di eje riri ka wü mere kpara ka-yi gbü wü ngü 'buru. Yi mere e adi emere wü züka ngü bü teka jia wü mere kpara ka-yi, teka de ngü ka-yi reke, ne de. Yi mere e adi emere tima, te wüh to fü yi, de maguma 'basu 'basu de. Ah le de yi di emere tima ka-yi de maguma yi 'buru biringbö, baka te yi ngbü emere tima ka Miri ka-nih Yesu Kurisito. Ah le de yi di emere tima ka-yi kpekpeke, angü yi wu kpo, gü ba, te gara, yi ena amaka züka wü ngü, de te Miri Yesu reke, o agbü kpi fü wü kpara ka-ye ne. Angü zu mere kpara ka-yi, de te yi ngbü emere tima kaka-na ne, ah ka-ye de Yesu Kurisito. ²⁵ Amba mene wü kpara, de te ewü ngbü emere siti ngü ne, ah le de wüh wu awu, gü ba, Me ena ato kuru te ani te gara. Angü Me ena akolo ngü ka wü kpara 'buru, ah ti afüwa kpara biringbö nda de.

4

¹ Amba de-yi, wü mere kpara, ma emala fü yi, gü ba, ah le de yi di engbü de züka maguma kpaka wü labi ka-yi, da emere ewü ereke areke. Yi di ele ta-ngü te ewü

kpah ereke areke, angü yi wu eyi, gü ba, mere kpara ka-yi kpah ladü agbü kpi, te di de Yesu Kurisito. Angü engu wu ngü te yi ngbü emere ne 'buru kpo.

Dene gara ngü te ma le ari yi di

² Wü di enga wüna, yi di eku gba fü Me kpekpeke, da egbo nga iiri. Yi mere e ace da eku gba fü Me de. ³ Ah le kpah de yi di eku gba fü Me teka a. Yi di kpah eku gba fü Me, teka de engu ü kaje, fü a adi emala ngü ka Yesu Kurisito fü wü kpara, angü wüh wu ngü ka Yesu gügü nda-wü de. Te di bala, dela tima te Me fe ra, adi emere. Fü ewü ayia agü ra gbü ku ne, teka ngü la. ⁴ Te di bala, yi di eku gba fü Me teka ra, de ah to wazi fere, teka de ma di esere ngü ka Yesu la di mbölö mbölö fü wü kpara, de wüh di eje sisi na mbi mbi mbi, baka e te reke gbü jia Me.

⁵ Ah le de yi di eceka te yi 'be, teka ngbüngbü ka-yi, esüka wü kpara te ewü le ngü ka Yesu de ne. De yi giri züka kaje, teka amala ngü ka Yesu tete fü ewü. ⁶ Te yi ngbü emala ngü ka Yesu, anga ero mö de wü kpara, te ewü le ngü ka Yesu de ne la, yi di emala ngü fü ewü ferre, de züka türü ngü mündü gömö yi baka gütü, te mi ami gbü wuru la. Angü te wü kpara la yi-ta yi teka ngü ka Yesu la, yi ena awu züka kaje, te yi ena angbü elügü ngü la fü ewü tete.

Dene adu ngü ka-ra, Pawülü

⁷⁻⁸ Ma tima köcökpa ne fü yi esaka Tikiko, te di de züka enga wüna, te ma le engu fa sü, gbü ngü ka Yesu Kurisito. Engu de kpeke kpara te ngbü ele ta-ngü te-ra, angü a ngbü emere tima ka Yesu Kurisito la tundu de ewü. Engu ena amala nga ra fü yi tine cu me-ye mbi mbi mbi. Dela si-ngü te ma tima engu de köcökpa ne tete kpaka yi, teka de ah to kpah wazi fü yi gbü ngü ka Me. ⁹ Wü Tikiko ena akoro kpaka yi kpala ake Ünessimü,* züka enga wüna, te di kpah de kpeke kpara gbü tima ka Yesu. Engu kpah de kpara ka-yi, ka Kolosaɣi, te yia ta kpala, koro kpakine. Wüh ena amala nga wü ngü, de te ngbü emere a de kpakine ne, 'buru fü yi tine me-wü.

¹⁰ Arisitarekü, te a di ake di agbü ku de kpakine ne, to kpah mandı fü yi, ake Marako, te di de müri ye Baranaba ne. Te Marako koro eyi kpaka yi kpala la, yi le ta-ngü tete, angü ma mala ta ngangana eyi fü yi te enga gina. ¹¹ Yusito† to kpah mandı fü yi. Wü kpara de bata ne, Arisitarekü, Marako, Yusito, wüh de wü di enga *Yisarayeleye, te ewü to maguma wü eyi fü Yesu. Wüh ngbü ele ta-ngü te

* 4:9 4:9 Ünessimü de kpara te Pawülü ba köcökpa fü Filemüna tekaka, angü engu ta de labi ka Filemüna, te di de kpara ka Kolosaɣi. † 4:11 4:11 Gara iri Yusito de Yosuwu.

ra gbü tima ka Me efa sü. Amba gara wü di engu Yisarayeले te a ngbü emere tima de ewü kpakine, nda ma, 'duwa bü mene ewü de bata la.

¹² Enga ni yi, Epafürasī ne, to kpah mandī fū yi. Engu de zūka kpara gbü tima ka Yesu Kurisito. Ah ngbü fi bü eo to ye kpekpeke, da eyi-ta Me fū yi, teka de Me to wazi fū yi, arü di kpekpeke gbü ngü ka-ye, kpah da emere wü ngü 'buru baka te Me ngbü ele. ¹³ Ma ngbü emala fū yi dene zu ngü, gü ba, Epafürasī engu ngbü efi nga yi, da eku gba fū Me teka yi kpekpeke, kpah teka wü *kpara ka Yesu agbü Lawüdikīya, de mene ewü agbü Yerapoli ne.

¹⁴ Luka, zūka mürü kuwa, te a le engu fa sü ne, to kpah mandī fū yi mini, ake Dema.

¹⁵ Yi to mandī ka-a fū wü kpara ka Yesu agbü Lawüdikīya kpala 'buru. Yi to kpah mandī fū Nifa, de wü kpara ka Yesu, te ewü ngbü ebite te-wü agba ka la 'buru.

¹⁶ Te yi tanga köcökpa ne esüka yi eyi la, de yi tima kpah fū wü kpara ka Yesu agbü Lawüdikīya la, de wüh tanga. Ah le kpah de yi tanga mene köcökpa, te ma tima fū wü kpara ka Lawüdikīya ne.

¹⁷ Yi mala fū Arikīpo, gü ba, ah le fū engu amere tima, de te Miri Yesu to fefe na ne, de zūka maguma ye, akoro di te adudu na.

¹⁸ De-ra Pawülü, ma to mandī fū yi fa sü. Ma ba ngü ne fū yi cu me-ra de kpa ra. Yi di efi nga ra agbü ku kpakine mini, kpah da eku gba fū Me teka ra kpekpeke. Me di de yi, da eto wazi fū yi de *zūka maguma ye. Ah di bala.

Dene gina köcökpa te Pawülü ba fü wü kpara ka Yesu agbü Tesalonika 1 Tesalonika

Masere si-ngü

Dene gina köcökpa te Pawülü ba fü wü *kpara ka Yesu Kurisito agbü Tesalonika. Pawülü ta de gina kpara te mala ngari Yesu fü wü kpara agbü Tesalonika kpala me-ye. Ah nü ta kpala de wü bu ye 'basu, wü Sila ake Timoteyo. (Mü ena amaka ngü la gbü buku ka wü Mürü Tima ka Yesu 17.) Te wü Pawülü mala ngari Yesu fü wü kpara ka Tesalonika la, fü mere bi ewü afü maguma wü, adu ara fü Yesu.

Amba Pawülü ngbü ta kpala teka fe biringbö nda de, angü wü gara wü di enga *Yisaraye, te ewü ngbü de kpala, wüh yia liki engu agbü Tesalonika asidi. Angü wü di enga Yisaraye la, wüh le ngü ka Yesu, te Pawülü ngbü emala kpala ne, nda-wü de. Angü Pawülü gü ba, "Mene wü kpara, te ewü ena ato maguma wü fü Yesu ne, Yesu ena aküwa ewü aküwa 'buru. Anga te ah de wü di enga Yisaraye, anga wü *ganzi kpara, anga neh wü da, Yesu ena aküwa ewü 'buru." Ngü la siti eküte wü di enga Yisaraye fa sü, angü nda-wü fingangü gü ba, "Me le wü ganzi kpara 'buru 'buru de. Ah nzö de ani, wü di enga Yisaraye, ani ena aküwa 'duwa me-ani." Te di bala, fü ewü ayia aliki wü Pawülü agbü Tesalonika kpala de gü. Fü wü Pawülü ayia anü angbü agbü gara sü de iri ye Atenayi.

Fü Pawülü angbü agbü Atenayi kpala de mere fingangü emaguma ye, teka wü kpara de te ewü le ngari Yesu gömö ni ne. Angü ah ngbü kpala teka sikipi mba cükü'daye, dada te ah ena arı wü kpara dela, de ngari Me mbi mbi mbi bane ma. Ah wu kphah kpo, gü ba, "Wü kpara te ewü liki ni, wüh ena adu kphah ato cinga te wü kpara la." Pawülü le ta adu kpaka ewü kpala, teka ato wazi fü ewü, de wüh rü kpekepeke gbü ngü ka Me ne, amba ah maka kaje de.

Te di bala, fü Pawülü ayia atima Timoteyo agbü Tesalonika teka aceka ewü, de ah du, ah mala nga ewü fü ni. Te Timoteyo du koro, fü ah amala nga wü kpara la fü Pawülü, gü ba, "Wü vügü ka-ye agbü Tesalonika de kpala ne, ngbü eto cinga te wü kpara ka Yesu efa sü. Amba wü kpara ka Yesu la, wüh kpe cürü nda-wü de. Wüh ngbü erü fi bü kpekepeke gbü ngü ka Yesu."

Te Pawülü je ngü ka wü kpara la bala, fü ah angbü de mere tadu. Fü ah ayia aba köcökpa ne fü ewü, teka ato wazi fü ewü. Ah le kphah arı ewü de gara riri ka Me, te ewü je mbi mbi la de. Ah de ngü ka dudu ka Yesu, teka fü ewü angbü emere ngü, te ena areke gbü jia Me, zalü akoro di gbü sikipi, te Yesu ena adu akoro tete na. Te mü ena atanga ngü la enatikine, ah ena ato wazi kphah fü mü, agü kphah tamu wü riri ka Me fü mü fanü, fü mü amaka wazi gbü ngü la.

Wü ngü te mü ena amaka gbü 1 Tesalonika ne, wüh dene.

Sapita 1:1-3:13 Ngü ka wü kpara ka Yesu agbü Tesalonika te ngbü eto tadu fü Pawülü

Sapita 4:1-12 Ngü te wü kpara ka Yesu ena adi emere

Sapita 4:13-5:11 Ngü teka dudu ka Miri Yesu füh kotö ne

Sapita 5:12-28 Adu riri

Dene mandı ka Pawülü fü wü kpara

ka Yesu agbü Tesalonika

¹ De-yi wü kpara ka Me, wü kpara ka *Miri Yesu Kurisito, te yi ngbü agbü Tesalonika, a ngbü eba köcökpa ne fü yi me-a, de-ra Pawülü, bete Sila,* ake Timoteyo. Kpara to mandı fü yi fa sü. Me di de yi, da eto gu ngü ka-ye fü yi de *züka maguma ye.

Dene ngü te ngbü eto tadu emaguma a, teka ngü ka-yi

² Wü di enga wüna, a ngbü egbo nga iri Me, teka ngü ka-yi, gbü wü sikipi 'buru.

³ Kükürü de, angü a wu, gü ba, yi ngbü emere ngü te ereke areke gbü jia Miri Yesu, angü yi to maguma ye eyi fefe fanü fanü. Kphah bala, yi ngbü eto te-yi teka ale tangü te wü bu yi, angü yi le Miri Yesu eyi de maguma yi 'buru. Fü yi arü kpekepeke, angü yi ngbü eo jia yi teka dudu ka Yesu Kurisito. Te di bala, züka ngü ka-yi la, Me wu eyi 'buru.

⁴ Wü di enga wüna, a ngbü egbo nga iri Me, teka ne de, angü a wu eyi kpo, gü ba, Me le ngü ka-yi fa sü, fü engu afe yi, ao wü di ye tete. ⁵ Angü ta te a koro teka amala ngü ka Yesu Kurisito fü yi agbü Tesalonika kpala ne, *Nzila Wazi Me to ta wazi fü a me-ye, de a di emala ngü la di kpekepeke. Fü Nzila Wazi Me adu kphah ato wazi la fü yi, teka fü yi awu, gü ba, ngü ka Yesu Kurisito la de zu ngü ka Me fanü fanü. Wazi te Nzila Wazi Me to fü a la, yi wu cu de jia yi, angü, ta te a ngbü esüka yi kpala ne, a kpe cürü nda-a de, a rü fi bü kpekepeke, teka amala ngari Miri Yesu

* 1:1 1:1 İri de Sila, ah de Silivanü, wüh ngbü eı iri la mba piti bala.

fü yi. ⁶ Ta te yi wu bala ne, fü yi ayia amere kpah ba nda-a la. Angü yi rü kpah kpekpeke, baka a, kpah baka Miri ka-nih, Yesu Kurisito. Angü te wü bu yi ngbü ta eto mere kuru te yi tete, yi kpe cürü kpo de. Fü yi angbü kpah fi bü da ele nga ka Me gömö a de mere tadu, teka ne de, angü Nzila Wazi Me ngbü eto wazi la fü yi cu me-ye.

⁷ Dela si-ngü de enatikine, te iri yi wü tete gbü wü sü ka Makedoniya, bete sü ka Akaya† zalü nde 'buru ne, angü yi zoro ngü engu la ta de kpa yi 'basu mini, fü yi adu arü kpekpeke. Angü wü kpapa ka Me gbü wü sü la je wü ngü ta te yi mere dela eyi 'buru, fü ewü ale arü kpah kpekpeke baka yi la. ⁸ Te di bala, ngü ka Me wü eyi gbü nga nzö sü ne le 'buru, koro eyi zalü kpa gbü gara wü sü nengete, teka ngü ka-yi la. Amba a mala ngü la fü ewü nda-a de, ⁹ wü kpapa ngbü ebaya ngü la esüka wü de tete-wü, gü ba dene, "Te a koro kpaka yi, yi le ngü ka Miri Yesu gömö a de maguma yi 'buru. Angü yi ce gele ka wü me ka wü kundu yi eyi, fü yi adu afü maguma yi, akoro tine, alala eküte ngü ka Mere Me, te di kpa gbü kpä. ¹⁰ Fy yi adu tine, angbü eo jia yi gbü nga Yesu *Kurisito, Ye Me, te ena ayia agbü kpä, adu akoro fuh kotö sene." Angü yi wu eyi, ga, Me zükü Yesu gbü kpi eyi. Te gara, kpa engagira nü kpala, gbü *adu sikpi te Me ena ato kuru fü siti wü kpapa tete, Yesu ena aküwa nih gbü siti kuru la me-ye.

Dela si-ngü de te a ba köcökpa ne fü yi tete, teka nga ngü ka-yi, te wü gara kpapa ngbü emala fü a. Fü a aje ngü la de mere tadu.

2

¹ Wü di enga wüna, wü vügü ka-a ladü, te ewü ngbü emala ambala'ba, gü ba, "A de wü töndö kpapa, te a koro teka afiti yi." Amba yi wu eyi, gü ba, wü vügü la ngbü esutu wu, angü a ngbü ta esüka yi kpala, ba züka wü kpapa, te ngbü emala zu ngari Me fü yi. ² Yi wu wü ngü te mere a, ta te a koro tete kpaka yi ne, kpo. Angü te a di ta agbü Filipoyi, o a koro kpaka yi la de ne, wü kpapa ka Filipoyi to ta mere cinga te a, da efala a, fü a ayia akoro kpaka yi agbü Tesalonika de kpala, de mere kuru te a.* Wü gara kpapa kpa gba yi kpala le ta kpah aliki a. Te di bala, ah kpe cürü ta nda-a de. Angü Me to wazi fü a, fü a ayia ai maguma a, teka amala ngari Yesu fü yi.

³ Wü vügü ka-a ga, a de wü kpapa te a koro de mani, teka afiti yi, amala siti riri fü yi, ato yi te kaje ka *siti ngü. Amba

ah bala nda de. ⁴ Ngü te a mala fü yi, ah de zu ngari Me fanü fanü. Angü Me fe a cu me-ye, ayia atima a teka amala ngari ni fü wü kpapa. Te di bala, a fi ngü ka wü kpapa nda-a de. A ngbü efi nda-a nga Me, teka areke gbü jijia, angü engu wu fingangü ka-a 'buru kpo. ⁵ Fingangü ka-yi gü neh fe? Baka ta te a koro kpaka yi ne, a mala ta türü ngü, afiti yi di, de yi di eto jiase fü a? Ah bala de. Me ladü te wu ngü la kpah eyi cu me-ye. ⁶ Baka ta te a koro kpaka yi ne, a koro ta baka wü cögbörö kpapa, te wüh ena adu engü a acu? Ah bala de. Wü di enga wüna, yi wu ngbü kpo, ga, Yesu *Kurisito to wazi fü a me-ye, ba wü *mürü tima ka-ye. Amba a to riri fü yi kpekpeke, baka wü cögbörö kpapa, nda-a de. ⁷ A ngbü eri yi ferrre, baka würuşe te ngbü eri wü di enga ye. ⁸ Wü di enga wüna, gümü yi ngbü emere a efa sü. Dela si-ngü te a to te-a di 'buru teka amala ngari Me fü yi, de mere kuru la te a, angü a le yi fa sü. ⁹ De ta te a ngbü emala ngü ka Me fü yi tete ne, a yi-ta yi ta eyi, teka de yi to wü e fü a? A mere bala nda-a de. Angü yi wu ta kpah bü kpo, ga, a ngbü ta embü da emere tima de ra, de biti nde, teka amaka mba jiase, adi ese e-mazü di ne, cu de kpa a.

¹⁰ Wü di enga wüna, yi wu ta wü ngü ka-a, te a ngbü emere kpa esüka yi la, cu de jia yi. A ngbü ta emere siti ngü? Ah bala de. A ngbü ta ba züka wü kpapa. A ngbü ka-a ta emere fi bü züka ngü, te reke areke gbü jia Me. Me ladü te wu ngü la kpah 'buru kpo. ¹¹⁻¹² Angü a ngbü ta eri yi biri biri 'buru, baka kpapa te ngbü eri wü di ye. A ngbü ta eri yi ferrre, da eto wazi fü yi, de yi di ei maguma yi ai. Fü a angbü kpah emala ngü fü yi kpekpeke, teka de yi di enü 'be 'be 'be, fü yi akoro ba züka wü kpapa gbü jia Me. Angü Me i yi dela me-ye, de yi di ba wü kpapa ka-ni, de maguma yi lofo, fü yi angbü de wü ni, Me, kpa gbü kpi kpala de mere tadu.

¹³ Wü di enga wüna, a ngbü egbo nga iri Me teka ngü ka-yi, gbü wü sikpi 'buru. Tekane de, angü, de ta te yi je ngari Me gömö a ne, fü yi ayia 'duwa, ale ngü la. Yi le ngü la cu de maguma yi biringbö, angü yi wu kpo, ga, ngü engu la, ah de zu ngü ka Me, te engu tima fü yi me-ye. Ah de kükürü ngü ka-a, te a mala de tete-a ne, nda de. Ngü engu la, ah de zu ngü ka Me fanü fanü, te ngbü eto wazi fü yi. ¹⁴ Fanü fanü, ngü ka Me la ngbü fi bü da eto wazi fü yi, angü te wü bu yi ngbü eto cinga te yi la, a wu eyi, ga, yi ngbü erü ka-yi fi bü kpekpeke. Ngü ka-yi la, ah

† 1:7 1:7 Enatikine gbü wü sikpi dene, wüh ngbü ei sü ka Makedoniya bete sü ka Akaya 'buru tö ka wü Giriki.

* 2:2 2:2 Ngü te mere wü Pawülü gbü Filipoyi, yi ena amaka gbü Mürü Timä 16.

gegege ba ngü, de te wü *kpara ka Yesu Kurisito mere agbü *Yudaya. Teka ne de, angü wüh rü kpekpeke, te wü bu wü, wü di engä *Yisarayeles, ngbü eto cinga te ewü tete ne. ¹⁵⁻¹⁶ Angü wü di engä Yisarayeles la ngbü fi bü da emere *siti ngü gbü jia Me. Wüh kphä de wü kpara, te ewü mörö Miri Yesu. Ta gügü, wüh ngbü mörö wü *mürü dofo kphä bala. Dera, te ma di kphä de engä Yisarayeles ne, wüh le ngü ka-ra nda-wü kphä de. Fü ewü ayia aliki a agbü Tesalonika kpala asidi. Wüh le de a mala ngari Yesu fü nguwa wü *ganzi kpara, baka yi ne, nda-wü de. Wüh le de Me küwa nguwa gara wü kpara kphä de. Angü wüh ka-wü de vügü ka nguwa wü gara kpara, füh kotö ne 'buru. Amba ngü de te ewü ngbü emere la, ah reke te Me nda de. Ah ngbü gbü jijia na esiti 'duwa ba-neh-ene-la. Wüh lala ka-wü fi bü gbü siti ngü ka-wü la, wüh le ace nda-wü de. Tekä ngü la, fü maguma Me angbü enzu eküte ewü. Te di bala, sikipi te Me ena ato kuru te ewü tete eyi gbmari.

Dene kphä gara ngü te to tadu emaguma a,

angü yi lala fi bü gbü ngü ka Yesu Kurisito

¹⁷ Wü di engä wüna, gümü yi ngbü eke a efa sü. Baka ta te wüh liki a kpaka yi agbü Tesalonika de kpala ne, fü a anü angbü nengete, kpara du wu te-a de wü yi de. A ngbü kpakine kphä fi bü da efi nga yi. Tekä ngü la, nga a yiri de, fü a akpo da egiri kaje, teka adu kpaka yi kpala. Amba a giri kaje la ma. ¹⁸ Kphä cu de-ra Pawülü, ma giri kaje de ma du kpaka yi kpala bi ma, angü *Satana ni kaje la fere eyi. ¹⁹⁻²⁰ Gümü yi ngbü emere a kükürü de, angü yi de züka wü kpara ka-a, te yi to tadu fü a fa sü. Angü, baka te yi je ngü ka Me gömö a, fü yi adu arü kpekpeke gbü ngü la ne, te di bala, gbü sikipi te Miri Yesu ena adu akoro tete, engu ena agbo nga iri a teka ngü ka-yi la. Tekä ngü la, fü a angbü eo jia a fi bü teka sikipi la.

3

¹⁻² Tekä ngü la, a ngbü fi bü efi nga yi de mere bi sikipi. Angü gümü yi ngbü eke a 'duwa ba-neh-ene-la. Fü a aga dene, te ah tine eyi bala, ah le de a tima Timoteyo kpaka yi kpala, de ah to wazi fü yi, teka de yi i maguma yi, arü kpekpeke. Tekä ne de, angü Timoteyo de züka kpara, te mere tima ka Me kpekpeke. A ga, te a ngbü gbü Atenayi sene kpikpi a la, ah mere e de. Timoteyo nü enü kpaka yi kpala, de ah to wazi fü yi agbü Tesalonika la. ³⁻⁴ Angü yi ena ace ngü ka Me, teka cinga, te wüh

ngbü eto eküte yi la. Angü ma mala ngü la ta eyi fü yi, ga, "Te yi le ngü ka Yesu eyi la, wü kpara ena ato kuru te yi ato." Titine ngü la koro eyi fanü. Angü Me ngbü eto cinga fü nih, wü kpara ka-ye, teka are maguma nih di. De te di eyi bala ne, ah le de yi rü arü kpekpeke gbü ngü la. ⁵ Dela si-ngü de te ma tima Timoteyo kpaka yi tete na ne, ah dela. Angü ma ngbü efi nga yi efa sü. Ma wu de, angä *Satana fiti yi dene eyi, teka de yi ce ngü ka Me, ka ngü ka kuru la? Te ah bala, amba mere züka tima, te a mere teka amala ngari Me fü yi ne, ah ena angbü kükürü. Fü ra ayia atima Timoteyo tungü la, teka de ah nü, ah ceka yi, de ah du, ah mala nga yi fere.

⁶ Amba titine, baka te Timoteyo du koro, amala nga yi fü a ne, ma ngbü de mere tadu te ra fa sü. Angü ah gü ba dene, "Yi ngbü fi bü elala gbü nga Miri Yesu. Fü yi angbü ele te-yi de wü bu yi. Kphä bala, yi ngbü da efi nga a efa sü, baka e te kpara ngbü sene kphä efi nga yi ne." ⁷ Ngü ka-yi la ngbü eto wazi fü a, gbü mere cinga te ngbü kphä emere a de kpakine ne. ⁸ Fü maguma a adu agu, teka ngü ka-yi de te a je, ga, "Angü yi zoro lö Miri Yesu eyi de kpa yi 'basu ne."

⁹ Wü di engä wüna, ngü de te yi ngbü emere de kpala ne, ah ngbü eto tadu te a efa sü. Tekä ngü la, kpara gbo nga iri Me tine eyi cu fa sü de maguma a 'buru, teka te a je nga yi de bala. ¹⁰ A ngbü kphä eku gba fü Me teka yi, de ra de biti, da enda 'ba te-a fefe, de ah ü kaje fü a, de a lügü nga a, du koro kpaka yi kpala, teka arü yi de züka riri. Angü wü gara du riri ka Me ladü, te ma ri yi di la de.

¹¹ Dela gba ka-a, te a ngbü eku fü Wö nih Me, kphä fü Miri Yesu, teka de wüh ü kaje fü a, de a du koro kpaka yi kpala. ¹² Miri Yesu di de yi, da eto wazi fü yi, de yi di ele te-yi di esüka yi, de maguma yi biringbö, kphä baka e te a ngbü ele yi ne. Fü yi ale wü kpara kphä 'buru ba e la, anü de ngü la kpa engagira nü. ¹³ Te di bala, ah le de Miri Yesu to wazi fü yi, teka fü yi ace wü *siti ngü ka-yi le 'buru, adu angbü emere wü ngü te ngbü ereke gbü jijia. Te ah bala, te gara, gbü sikipi te Miri Yesu ena adu akoro tete na, de wü *malayika ka-ye zalü 'buru nde, yi ena arü engagira Wö nih Me, de mere tadu, angü yi eyi de züka wü kpara kaka fanü fanü.

4

Dene ngü te ena areke gbü jia Me

¹⁻² Wü di engä wüna, nih 'buru nde wü kpara ka Miri Yesu. Te di bala, a ngbü emala fü yi kpekpeke, ga, "Yi di emere fi bü züka ngü, te reke areke gbü jia Me."

Angü yi je ngü la eyi gömö a, ta te a ngbü esüka yi kpala ne. Te di bala, ah le de yi nü de ngü la fi bü kpa engagira nü.

³ Wü di enga wüna, Me ngbü ele de yi di engbü ba züka wü kpara ka-ni, *nzila. Te di bala, yi mere e angbü emere waza de.

⁴ Ah le de mü di engbü bü nzö de wara mü biringbö, de züka fingangü. De mü di emere ngü fefe ereke areke, angü Me to engu fü mü me-ye. ⁵ Wü kpara te ewü le ngü ka Me de ne, wüh ngbü emere ngü ba e te ewü le. Wüh fi nga wara wü baka kpara de, wüh le ewü nzö würise tete. Gara ewü ngbü eza würise nzö teka abi mere bi wü jaji. Amba nda-yi, yi mere e amere ngü baka nda-ewü la de, angü yi de wü kpara ka Me. ⁶ A mala ta ngü la eyi fü yi kpekepe, gü ba, "Te mü ngbü de würise te di de wara mü de, mü baka mürü zi te ngbü ezi e ka wü bu ye." Dela ngü te Me le 'duwa kpo fi de, furu afuru. Te mü ngbü emere ngü de bala, Me ena ato mere siti kuru fü mü fanü fanü. ⁷ Angü ngü ka waza siti gbü jia Me 'duwa ba-nehene-la. Me ngbü ele de wü kpara ka-ni di engbü nzila, adi emere bü duu züka ngü gbü jia ni. ⁸ Dela si-ngü de te engu to *Nzila Wazi ye tete fü yi, teka de yi di engbü nzila. Te ah bala, ah le de yi je riri ka-a ne reke areke. Teka ne de, angü ah de riri ka Me, ah baka gele ka köti nda de. Te di bala, te mü le ngü la de, Me ena ato kuru fü mü ato.

⁹⁻¹⁰ Dene e'ba'basu ngü te a le amala fü yi, ah de ngü ka le-te. A wu kpo, ga, yi ngbü ele te-yi de wü bu yi, wü *kpara ka Yesu, ale fanü fanü. Angü yi kpo de ngü la eyi gügü, angü Me gü tamu ngü la eyi fü yi. Fü yi angbü ele te-yi de wü kpara ka Yesu 'buru gbü sü ka-yi, agbü Makedoniya de kpala ne, ale. Wü di enga wüna, a ngbü emala fü yi kpekepe, ga, "Yi nü de wü ngü la fi bü kpa engagira nü."

¹¹⁻¹² Ah le kpa de yi di eo maguma yi teka angbü ziii. Yi mere e adi ekpülü wü bu yi de. Yi di emere tima de kpa yi, teka fü yi adi emaka e-mazü, te ena ati teka yi, kpa baka e te a mala fü yi tane. Te yi ngbü emere wü ngü la bala, wü kpara te ewü le ngü ka Yesu de ne, wüh ena awu, ga, yi de kpeke wü kpara.

Dene ngü teka dudu ka Miri Yesu, füh kotö ne

¹³ Wü di enga wüna, ma le amala ngü fü yi teka ngü ka wü kpara ka Me, te ewü kpi eyi ne. Te gara, Me ena azükü ewü azükü gbü kpi la. Wü kpara te ewü le ngü ka Me de ne, wüh ti awu ngü la bala nda-wü de. Fü ewü adi engbü de mere siti cinga, da eku mere gba, teka ngü la. Yi mere e adi engbü de mere cinga, baka

nda-ewü la, de. ¹⁴ Angü nih wu eyi, gü ba, Yesu kpi ta akpi, fü ah adu azükü. Kpah bala, Me ena azükü wü kpara ka-ye, te ewü to maguma wü fü Yesu, te ewü kpi eyi akpi ne, aza ewü kpara ye agbü kpi kpala, gbü sikipi te Yesu ena adu akoro tete.

¹⁵ Ngü de te ma emala fü yi ne, ah de kpeke ngü. Ah de ngü te Miri Yesu mala me-ye. Angü engu mala ngü la, gü ba dene, "Gbü sikipi te ni ena adu akoro tete, wü kpara ka-ni te ewü kpi eyi akpi ne, ni ti ace ewü de." Angü wüh ena ayia fi me-wü. ¹⁶ Angü gbü sikipi la, Miri Yesu ena ayia agbü kpi kpala, adu akoro. Fü wü kpara aje ri mere *malayika, de kono ka Me mini, teka abiti wü kpara ka Yesu Kurisito 'buru. Fü Miri Yesu ayia ai wü kpara ka-ye de mere ri ye. Fü wü kpara kaka te ewü kpi akpi ne, fü ewü ayia azükü fi me-wü, de to küte wü mini. ¹⁷ Fütanga ngü la, Me ena aza nih de ezükü ne, fü nih ayia 'buru de ewü, teka fü nih anü amaka tenih de wü Miri Yesu kpa tikpi kpala. Fü nih angbü de wü Miri Yesu, fi mere badi.

¹⁸ Te di bala, wü di enga wüna, te cinga te emere yi teka wü bu yi, te ewü kpi akpi ne la, yi di efi nga wü ngü de te ma mala fü yi ne, adi emala esüka yi, teka fü maguma yi adi egu gbü ngü la.

5

¹⁻² Wü di enga wüna, yi wu kpa h bü kpo, ga, kpara biringbö, te wu sikipi te Miri Yesu ena adu akoro tete na, ah nda ma. Te di bala, a ti amala nga sikipi la fü yi nda-a kpa de. Angü sikipi engu la ena ata wü kpara ata. Ah ena adi gegege baka mürü zi te ngbü ekoro gbü biti, agüka wü kpara da era ara. ³ Gbü sikipi engu la, wü kpara te ewü le ngü ka Me de, wüh ena agüka agüka. Angü wüh ngbü efi, gü ba dene, "Ani ngbü engbü ka-ani gbü züka gu sü ne zözö. Me wu ngü ka-ani nda de, ah ti ato kuru fü ani kpa de." Te gara wüh ga, ani ceka kpi bane de, gbangbara! Miri Yesu koro eyi, teka ato kuru te ewü! Ngü la ena agüka ewü gegege baka e te keke ka yayaka ngbü egüka würise de bu ye. Wüh ti aküwa de, angü da ewü teka afü maguma ewü nda tine eyi ma.

⁴ Wü di enga wüna, yi de wü kpara ka biti baka ewü nda-yi de. Te ah bala, sikipi ka Miri Yesu ti agüka yi agüka baka ewü de, angü yi ngbü eo jia yi teka sikipi la. ⁵ Nih ka-nih nda-nih wü kpara ka rasü, angü Me lofo jia nih eyi. Nih ti adu angbü gbü biti nda-nih tine de.

⁶ Wü di enga wüna, de te nih di ka-nih nda-nih wü kpara ka ra-sü ne, nih ceka te-nih mbi, da etüka te-nih, gbü wü rengü ka *Satana. Nih o fingangü ka-nih, teka amere wü ngü, te ena areke gbü jia

Me. Nih mere e adu gbü ngü ka biti, baka wü bu nih ne, de. ⁷ Angü wü bu nih la, wüh ka-wü de wü kpara ka biti, jia ewü nda ma. Wü kpara te ewü ele adi era ara ne, wüh ngbü era nda-wü gbü biti. Wü kpara te ewü le adi enzö fi ne, wüh ngbü enzö fi kphah gbü biti, da eküya di. ⁸ Amba nih mere e amere bala de, angü nih de wü kpara ka biti nda-nih de. Nih ka-nih nda-nih wü kpara ka ra-sü. Te di bala, ah le de nih ceka te-nih mbi, teka adi emere wü ngü te ena areke gbü jia Me. Nih ena amaka wazi, teka adi emere wü züka ngü di, neh kaze? Ah le fü Miri Yesu ato wazi fü nih me-ye. Te ah bala, nih to maguma nih fü Miri Yesu, da ele Miri Yesu de maguma nih 'buru, da eo jia nih teka sikipi ka dudu kaka. Teka ne de, angü nih wu eyi kpo, ga, Miri Yesu ena aküwa nih gbü sikipi la. ⁹ Nih ena aküwa fanü fanü, angü nih 'buru wü kpara te Me fe nih eyi, ao ba züka wü kpara ka Miri Yesu. Te ah bala la, Me ena adu ato kuru te nih, neh baye baye? Me ena aküwa nih aküwa, angü nih de wü kpara ka Miri Yesu Kurisito fanü. ¹⁰ Angü Miri Yesu to te-ye akpi teka nih, te nih di de wü kpara kaka-na ne. Miri Yesu ena adu abiti nih, gbü sikipi te engu ena adu akoro tete na. Anga ah ena adu akoro amaka nih ezükü, anga o nih kpi eyi la, engu ena abiti nih, fü nih angbü de ewü fi mere badi.

¹¹ Te di eyi bala ne, wü di engu wüna, te cinga ngbü emere yi, de yi di emala wü ngü la esüka yi, da eto wazi fü wü bu yi, teka fü yi arü kpekpeke, baka e te yi ngbü emere, zalü akoro di enatikine ne.

Dene adu rüri, te a ngbü eto fü yi

¹²⁻¹³ Wü di engu wüna, ah le de yi di emere wü ngü de te reke areke gbü jia Me. Teka ngü ka wü *kovo te Me o ewü, de wüh ngbü gbü nzö yi, da erü yi de ngü ka Me ne, ah le de yi di eje ngü ka-ewü, da ecu ngü ewü. Yi di kphah ele ta-ngü te ewü. Teka ne de, angü wüh ngbü emere tima kpekpeke 'duwa ba-neh-ene-la teka yi. Yi mere e angbü ega yiki esüka yi de ewü ne de.

¹⁴ Te ena adi teka wü bu yi la, yi mere e adi ewü nga fü ewü kphah de. Te wü gara ewü di de wü mürü cürü la, yi mala züka ngü fü ewü, de wüh rü kpekpeke. Te wazi ewü ma, de yi di ele ta-ngü te ewü. Te wüh di kphah de mürü basa la, yi di erü ewü mba kpekpeke de wüh ce ngü la. Yi ngbü de züka maguma, da emala ngü fü wü kpara 'buru de gu maguma yi. ¹⁵ Teka mene wü kpara, te ewü ngbü emere siti ngü eküte yi, yi mere e alügü siti ngü la fü ewü tine de. Yi di elügü fü ewü fi bü züka ngü. Kphah bala, yi di fi bü emere züka

ngü fü wü bu yi, wü *kpara ka Yesu, kphah de gara wü kpara 'buru nde.

¹⁶⁻¹⁸ Wü di engu wüna, ah le de yi ngbü da egbo nga iri Me gbü wü ngü ka-yi 'buru. Te ah di de züka ngü, anga te ena adi kphah de cinga la, yi mere e ace da egbo nga iri Me de. Te yi ngbü emere bala, yi ena angbü de tadu emaguma yi. Yi di kphah eku gba fü Me de ra de biti 'buru. Te fingangü ka-yi ngbü bala, dela ngü te ena areke gbü jia Me. Angü dela ngü te Me ngbü ele, ga, wü kpara ka Yesu Kurisito di emere bala.

¹⁹ Te *Nzila Wazi Me ngbü eyi erü yi emaguma yi la, yi je 'duwa ngü kaka-na. ²⁰ Te Nzila Wazi Me mala ngü fü yi gömö wü bu yi la, yi mere e ace ngü la kphah de. ²¹ Te gara kpara ena akpo da eto riri fü yi de iri Nzila Wazi Me la, yi di eceka kpi ngbü ngü engu la kpo kpo kpo feke. Te yi wu eyi, gü ba, ah de zu ngü ka Me fanü fanü la, de yi le ngü kaka de maguma yi 'buru. ²² Te ah ka-ye nda de siti riri la, de yi ce ace asidi.

²³ Wü di engu wüna, Me di de yi, da eto züka ngbü ngbü zözö, de gu maguma fü yi. Me di eto wazi fü yi gbü wü sikipi 'buru, de yi ngbü fi bü da emere wü ngü, te ena areke gbü jijia na. Me ceka kpi fütanga küte yi, de fingangü ka-yi, bete maguma yi zalü nde 'buru, teka de yi ngbü mbi, angü yi ena amere *siti ngü. Te di bala, Miri Yesu ti eyi amaka yi baka züka wü kpara ka-ye, gbü sikipi te engu ena adu akoro tete na. ²⁴ Angü Me fe yi, de yi ngbü ba wü di ni, cu me-ye. Teka ngü la, engu ena ato wazi fü yi bala fanü fanü, angü ngü te engu mala, ah ti ace de.

²⁵ Wü di engu wüna, yi ku gba fü Me teka a.

²⁶ Yi to mandi ka-a fü wü di engu ni nih kpala 'buru, de mere lele fa sü.

²⁷ Ma mala fü yi de iri Miri ka-nih, Yesu Kurisito, ga, "Yi i wü bu yi, wü kpara ka Me, de yi tanga köcökpa ne fü ewü zalü nde 'buru."

²⁸ Miri Yesu Kurisito ngbü de yi, da eto wazi fü yi, de *züka maguma ye.

Dela adu ngü te ma mala fü yi, de-ra Pawülü.

Dene e'ba'basu kóćkpa te Pawülü ba fù wü kpara ka Yesu agbü Tesalonika 2 Tesalonika

Masere si-ngü

Dene e'ba'basu kóćkpa te Pawülü ba fù wü *kpara ka Yesu agbü Tesalonika. Fütanga gina kóćkpa te engu ba la, fù Pawülü adu aje gara ngü ka wü kpara ka Tesalonika, gü ba, "Gara wü ngü ladü te kpo ngbü esiti fingangü ka wü kpara ka Yesu kpala."

Gina ngü, ah de ngü ka wü gara kpara, te ewü ngbü emala, ga, "Miri Yesu du koro eyi füh kotö ne." Te di bala, fù Pawülü aba ngü fù ewü, gü ba, "Miri Yesu ti akoro esalakumu nda de. Kpah bala, gara wü ngü ladü te ewü ena amere te-wü feke, fù Miri Yesu adu akoro sisi. Angü gara siti kpara ena akoro da efidi wü kpara, da emere wü *siti ngü efa sü."

E'ba'basu ngü, ah de ngü ka gara wü kpara esüka wü kpara ka Yesu, te ewü le amere tima de. Wüh ngbü emere tìne bü tóndö ngü, da engbü ka-wü bü kükürü bane. Pawülü mala ngü fù wü mürü basa la kpekpeke, gü ba, "Wü ce tóndö ngü ka-wü la asidi." Fù ah adu amala fù wü bu wü, gü ba, "Te kpara le amere tima de la, wüh mere e ato zü-e fefe kpa de."

Wü ngü te mü ena amaka gbü 2 Tesalonika, wüh dene.

Sapita 1 Ngü ka wü kpara ka Yesu agbü Tesalonika, te wü Pawülü gbo nga iri Me tekaka na

Sapita 2 Ngü teka dudu ka Yesu füh kotö ne

Sapita 3 Ngü de te wü kpara ka Yesu ena adi emere

Dene mandí ka Pawülü fù wü kpara

ka Yesu agbü Tesalonika

¹ De-yi wü kpara ka Me, wü kpara ka Miri Yesu *Kurisito, te yi ngbü agbü Tesalonika, a ngbü eba kóćkpa ne fù yi me-a, de-ra Pawülü, bete Sila,* ake Timoteyo. Kpara to mandí fù yi fa sü. ² Wö nih Me bete Miri Yesu Kurisito ngbü de yi, da eto gu ngü ka-wü fù yi, de *züka maguma wü.

Dene ngü de te a gbo nga iri Me tekaka na

³ Wü di enga wüna, a ngbü kpakine egbo nga iri Me teka ngü ka-yi, ra de biti mini. Kükürü de, angü ngü ka-yi ngbü eto mere

tadu fù a. Angü a je, gü ba, yi zoro ngü ka Me eyi de kpa yi 'basu mini, da ele te-yi de wü bu yi. A je kpa, gü ba, yi ngbü fi bü da emere ngü la, enü di kpa engagira nü. ⁴ Teka ngü la, kpara ngbü kpakine kpa da egbo nga iri yi fù wü kpara ka Me gbü wü sü 'buru, teka züka ngü de te yi ngbü emere la. Angü yi ngbü elala fi bü gbü nga Yesu *Kurisito. Baka te wü vügü ngbü fi bü da emere yi sisisi, teka ngü ka Yesu ne, yi kpe cürü nda-yi de, yi ngbü erü fi bü kpekpeke gbü mere cinga ka-yi la.

⁵ Wü di enga wüna, Me ladü, te wu cinga ka-yi la me-ye. Ah wü kpa eyi, gü ba, yi ngbü erü kpekpeke, gbü cinga de te ngbü emere yi ne, angü yi de wü kpara ka-ni. Te di eyi bala ne, ah ena aküwa yi gbü síkpí te Miri Yesu ena adu akoro tete. Angü gbü síkpí la, ah ena ai yi, gü ba, "De-yi dene, yi de züka wü kpara ka-ni. Te di bala, yi koro ekoro kpaka ni, fù yi angbü tundu de wü ani, agbü sü ka-ni agbü kpí, baka wü di ni." ⁶⁻⁹ Angü Me ka-ye de züka miri. Ah ena aküwa yi gbü mere cinga ka-yi la, fù engu aküwa kpa a gbü nda-a cinga ne. Fù nih angbü de ewü agbü kpí kpala gbü züka gu sü, de mere tadu fi mere badi. Amba Me ena ato mere cinga te wü kpara, de te ewü ngbü eto cinga te yi ne. Me ena amere ngü la bala, gbü síkpí te Miri Yesu ena adu akoro füh kotö ne, de mere wazi, de mere kpeke wü *malayíka ka-ye mini, teka azoro wü kpara, de te ewü le ngü ka Me de, te ewü le aje ngü ka Yesu kpa de ne. Me ena ato mere siti kuru te wü kpara la, de mere wazi ye, kpa de mere siti te-wa te embele ambele, fù ewü akpi fi mere badi. Wüh ti awu Me tìne de. ¹⁰ Gbü síkpí engu la, wü kpara 'buru te ewü to maguma wü fù Miri Yesu, wüh ena adu agbo nga iri na, teka mere wazi kaka. Wayi, ah ngbü bala, yi ena aci agbo nga iri na, gbü síkpí engu la kpa cu me-yi, angü yi le ngü kaka-na, de te yi je gómó a, ne eyi.

¹¹ Dela si-ngü de te a ngbü fi bü eku gba fù Me tete teka yi, gü ba, "Ah le de Me ceka yi baka züka wü kpara ka-ye, angü engu de kpara te fe yi teka ngü la me-ye. De ah to kpa wazi fù yi, teka fù yi adi eo jia yi, adi emere züka wü ngü, da emere tima ka Me kpekpeke, angü yi to maguma yi eyi fefe fanü." ¹² Te yi ngbü fi bü emere wü ngü la kpekpeke bala, fù wü kpara angbü da ewu züka ngü ka-yi la, wüh ena aci agbo nga iri Miri ka-nih Yesu Kurisito, ka ngü la. Fù ewü adi kpa da egbo nga iri yi, gü ba, "Yi de wü *kpara ka Yesu fanü fanü." Dela ngü te kpara ngbü eku gba fù Me tekaka na, teka ne de, angü

* 1:1 1:1 Iri de Sila ne, ah de Silivanü, wüh ngbü ei iri la mba piti bala.

a wu kpo, ga, Me ake Miri Yesu Kurisito ena ato wü ngü la fü yi me-wü, angü wüh de wü mürü *züka maguma.

2

Dene ngü teka dudu ka Yesu füh kotö ne

¹ Wü di enga wüna, dene ngü te a le amala fü yi, teka dudu ka Miri Yesu *Kurisito, teka akö nih, ago di kpaka ye. ² Angü ma je, gü ba, wü gara kpara ngbü efiti yi, gü ba, "Angü sikipi ka Miri Yesu la koro ka-ye eyi." Wüh ngbü esu ka-wü dela 'buru wu! Yi mere e adi eje ngü ka-ewü la de, angü fingangü ka-yi ena asiti. Te wüh mala, ga, "Angü *Nzila Wazi Me sere ngü engu fü ani me-ye," di de, "Angü de-ra Pawülü, ma mala fü ani cu me-ra," di de, "Angü ma ba, tima fü ani gbü köcökpa," yi mere e aje wü ngü la nda-yi 'buru de, angü dela ka-ye nda-ye 'buru wu!

³⁻⁵ Yi fi la nga wü ngü ta te ma mala fü yi, teka dudu ka Miri Yesu, o nih ngbü de nih ma agbü Tesalonika kpala ne. Yi mere e asiti fingangü ka-yi teka ngü la de, angü yi wu kpo, ga, Miri Yesu ti akoro esalakumu nda de. Tek a ne de, wü ngü de ta te ma mala ngang a fü yi ne, wüh ena amere te-wü feke, fü Miri Yesu adu akoro sidi. Angü, te sikipi ka dudu ka Yesu la koro eyi gbamari, mere bi wü kpara ena ayia ace ngü ka Me. Kpah bala, gara siti vügü ka Me, de ta te ma mala ngang a na fü yi ne, ah ena ayia akpo de tima ka-ye. Ah ena angbü esu wu te ye, da ecu ngü ye, gü ba, "Ngü ka-ni ga fa sü, fa nda Me ka." Angü ah ngbü ele ta, ga, wü kpara mere e agbo nga iri Me de. Wüh di ele nzö ngü ka-ni, da egbo nga iri ni. Te ah bala, ah ena arí kpa esa *Mere Kambü ka Me agbü Yerüsalema kpala. Fü ah angbü cu kpala, da egbo nga ye, gü ba, "Ni ka-ni de Me me-ni, wüh gbo nga iri ni."

⁶ Amba nda-yi, yi mere e akpe cürü de, angü Me ti aü kaje, teka siti komoko la, nda la de, angü Me ngbü eci nga sikipi te ni, Me, fe me-ni teka ngü la. ⁷ Gbü wü sikipi ne, mere bi wü *siti ngü ladü füh kotö sene fanü fanü, angü *Satana ngbü emere tima ka-ye la gbü zi. Ah mere ngü la ngbaangba la de. Kükürü de, angü Me to wazi eyi fü gara kpara, de ah ni kaje fü siti komoko te ena akoro la. Ma mala ngü la fü yi eyi gügü. Kpara la ena angbü fi bü da etüri kaje fü vügü ka Me, zalü akoro di gbü sikipi te Me fe me-ye. ⁸⁻¹² Gbü sikipi la, siti vügü ka Me ena ayia akoro, akpo tima ka-ye gbü jia wü kpara 'buru. Angü Satana ena ato mere wazi fefe na, de ah di emere wü kpeke ngü ka talara di, teka afiti wü kpara 'buru. Tek a ngü la, mere bi wü kpara ena ale ngü ka vügü la, gü

ba, "Komoko la de Me fanü." Wü kpara te ewü to maguma wü fü Me, Me ena aküwa ewü aküwa esaka vügü la. Amba mere bi wü kpara ladü, te ewü le ngü ka Me de. Wüh ena ao maguma wü, teka adi emere wü siti ngü, te reke areke gbü jia wü, baka e te ewü ngbü ele. Te di bala, Me ena ace ewü, de wüh le ngü ka vügü ka-ni la. Te di tine eyi bala ne, wüh ena amaka mere siti kuru te gara, angü Me ena agü ewü kpa gbü mere du ka wa, fi mere badi.

Teka ngü ka mere vügü ka Me la, yi mere e akpe cücürü de, angü Miri Yesu ena akoro de mere siti kpeke wazi ka-ye, fü ah azoro siti vügü ka Me la, amörö engu asidi. Wayi, ah ena auru engu bü de komö ye, fü siti vügü ka Me la adu akpi, azi ka!

Wü di enga wüna, dela ngü te ma le amala fü yi teka dudu ka Miri Yesu. Yi mere e afi, ga, ah du koro eyi ne, yi fi bala de, angü wü ngü la mere te-wü nda-wü la de.

Dene gba te a ngbü eku fü Me teka yi, de yi rü kpekepeke

¹³⁻¹⁴ Wü di enga wüna, a ngbü egbo nga iri Me de ra de biti, teka mere tadu, te Me to fü a teka ngü ka-yi. Angü Me fe yi eyi wü kpara ka-ye gügü te enga gina. Fü ah adu ai yi, teka ngü de te ye je gömö a ne. Fü engu ayia aküwa yi, angü yi le ngü la eyi, de maguma yi 'buru. Fü ah adu atima Nzila Wazi ye, de ah di efü yi züka wü kpara ka-ye tete. Fü Me ato wazi fü yi, teka fü yi ago te gara, angbü tundu de wü Miri Yesu Kurisito agbü kpi, angü ah le nih fa sü.

¹⁵ Te di bala ne, wü di enga wüna, yi di engbü tine de jia yi te ye. Yi zoro wü riri ka Me de kpa yi 'basu. Wü riri la, a to ta fü yi, o a ngbü emala ngari Me fü yi de kpala ne. Fü a adu kph and a nga wü riri la gbü köcökpa, ta te a ba fü yi ne. Te di bala, yi mere e ace wü ngü la nda-yi de.

¹⁶ Wü di enga wüna, Miri Yesu Kurisito ake Wö nih Me le nih fa sü. Tek a ngü la, fü ewü ayia ato wazi fü nih teka *züka maguma wü, de nih rü kpekepeke, zalü koro di gbü sikipi te nih ena ago tete kpaka ani la. Fü nih adu angbü eo jia nih teka züka wü ngü, te Me ena amere fü nih te gara kpala. ¹⁷ De te di tine eyi bala ne, a ngbü eku gba fü Miri Yesu ake Wö nih Me, de ewü ngbü de yi, da eto wazi fü yi, fü yi ai maguma yi di, arü kpekepeke, teka angbü kph fi bü emere züka wü ngü te reke areke gbü jia Me.

3

Dene gba te ye ena aku fü Me teka ngü ka-

¹ Wü di engu wüna, yi di kpah eku gba fü Me teka a, teka fü ngari Miri Yesu awü abaya gbü wü sü 'buru, teka de mere bi wü kpapa yia le ngü ka Miri Yesu gömô a, kpah baka nda-yi. ² Yi ku kpah gba fü Me, teka de Me di eküwa a kpah aküwa, esaka siti wü kpapa, te ewü ni kaje fü a, teka tima ka Miri Yesu ne, angü wüh le ngü ka Yesu nda-wü de.

³ Wü di engu wüna, Miri Yesu de kpeke kpapa. Ngü te engu mala, engu ti ace de. Te di bala ne, ah ena angbü fi bü da eto wazi fü yi, kpah da eceka kpi fütanga yi, teka wü ngü ka *Satana. ⁴ A wu kpah kpo, ga, yi de wü kpeke kpapa, te yi lala eyi gbü ngü ka Yesu. Yi ngbü kpah eyi emere wü riri, de ta te a to fü yi ne ereke areke, abe kpah te wü ngü de te a ba fü yi gbü köcökpa ne. ⁵ A ngbü eku gba fü Miri Yesu *Kurisito, teka de ah ngbü fi bü da eü jia yi, teka fü yi awu, ga, Me le ani de maguma ye 'buru. Ah le kpah de Miri Yesu to wazi fü yi, teka de yi di erü fi bü kpekepeke.

Dene ngü teka wü kpapa te ewü le adi emere tima de

⁶ Wü di engu wüna, gara ngü ladü te a le amala fü yi. Ah de ngü teka wü mürü basa esüka yi, te ewü le aje riri, ta te a to fü yi, ne de. Riri la gü ba, wü kpapa 'buru di emere tima. Te wü kpapa la ladü esüka yi la, a ngbü emala ngü fü yi kpekepeke de iri Miri Yesu Kurisito, ga, "Yi mere e adi engbü de ewü de." ⁷⁻⁸ Angü yi wu kpo, ga, tima de züka ngü. Ta te nih di de nih ma kpala ne, a ngbü ta angbü bü geee kükürü, a mere tima de? Anga a ngbü ta eyi endondoro bü faaa, da eyo e-mazü ba mürü to-fere-eto? A mere bala nda-a de! A ngbü ta emere tima kpekepeke de kpa a, ra de biti, teka amaka zü-e di. Ah le de yi di emere kpah bala! ⁹ Fanü fanü, ah le de yi di ele ta-ngü te wü kpapa, te ewü ngbü erü yi de ngari Me ne. Amba nda-a, a le ayita yi teka e nda-a de. Kükürü de, angü a le ta, teka de a gü tamu züka kaje fü yi, teka de yi ce ngü ka basa, adu amere tima kpekepeke, kpah baka nda-a la. ¹⁰ Fü a adu ato ta riri fü yi, gü ba, "Te kpapa le amere tima de la, wüh mere e ato zü-e fefe na kpah de."

¹¹ A mala ngü la kükürü de, angü a je nga yi eyi, ga, "Wü gara kpapa ladü esüka yi, te ewü ngbü emere tine bü töndö ngü, da engbü ka-wü bü kükürü bane. Fü ewü adu angbü eto ba-nzó fü wü bu wü gbü nda-ewü tima." ¹² A ngbü emala ngü fü wü kpapa dela, kpekepeke de iri Miri Yesu Kurisito, ga, "Wüh ce wü töndö ngü de bala asidi. Wüh yia eyia adi emere tima, teka de wüh maka e-mazü te ena atü de ewü."

¹³ Amba nda-yi, wü kpeke kpapa, yi mere e ace da emere züka ngü de. Yi i maguma yi ai, da emere fi bü kpeke ngü la.

¹⁴ Te wü mürü basa la le aje riri ka-a ne de, de yi mala nga ewü fü wü bu yi 'buru, teka de yi ce da engbü de ewü, teka de lümü zoro ewü, fü ewü afü maguma wü. ¹⁵ Te di bala, yi mere e aceka ewü baka vügü ka-yi de, yi kpü ewü kpah de, angü wüh de wü di engu ni yi. Yi du, yi ri ewü de *züka maguma yi, teka de wüh ce ngü la.

Dene adu ngü ka-a

¹⁶ Wü di engu wüna, Miri Yesu ngbü de yi 'buru, de ah to gu ngü fü yi gbü wü ngü 'buru, angü engu de kpapa te ngbü egu maguma yi, fi mere badi.

¹⁷ De-ra Pawülü, ma to mandü ne fü yi me-ra. Mandü la, ah de ngü te ma ba cu me-ra de kpa ra, teka de yi wu tete, ga, fanü fanü angü ma tima köcökpa ne fü yi me-ra.

¹⁸ Yesu Kurisito di de yi 'buru, de ah to wazi fü yi, de züka maguma ye.

Dela adu ngü te ma ba, tima fü yi. De-ra Pawülü.

Dene gina kôcôkpa te Pawülü ba fü Timoteyo 1 Timoteyo

Masere si-ngü

Dene gina kôcôkpa te Pawülü ba fü Timoteyo. Pawülü ta de kpara te ngbü endoro gbü wü gara sü, teka amala ngari Yesu fü wü kpara. Gbü gara ra, fü Pawülü akoro agbü gara sü de iri ye Lisitera. Fü engu amaka Timoteyo kpala. (Mü ena amaka ngü la gbü Mürü Tima ka Yesu 16). Timoteyo ta de jaji komoko te to maguma ye fü Yesu. Ah ge baka te Timoteyo le ngü ka Yesu gömö Pawülü, angü Pawülü ngbü eï engu, gü ba, "Ah de ye ni, gbü tima ka Me" (1 Timoteyo 1:2).

Te Pawülü du maka Timoteyo agbü Lisitera, fü ngü ka Timoteyo areke gbü jija afa sü. Te di bala, Pawülü gü ba, "Ni ena aza engu, de ah ndoro de wü ani ake Sila, teka ale ta-ngü te ani gbü tima ka Me." Fü Timoteyo ayia akpo da endoro de ewü teka mere bi re.

Gbü gara ra, wü Pawülü ake Timoteyo ngbü ta emala ngari Yesu fü wü kpara, agbü gara sü de iri ye Efeso. Te Pawülü yia teka ace Efeso, anü agbü gara sü, agbü tö ka Makedoniya, fü ah adu afi nga ngü, gü ba, "Ah reke areke te Timoteyo ena angbü agbü Efeso sene, teka ari wü *kpara ka Yesu de zu ngari Me, teka ato wazi fü ewü." Fü Timoteyo angbü ciki gbü Efeso sela, fü Pawülü ayia anü sü agbü Makedoniya. Fütanga ngü la, fü Pawülü adu atima kôcôkpa ne fü Timoteyo agbü Efeso kpala, teka agü tamu züka kaje fefe, te engu ena ari wü kpara di.

Te nih ena atanga kôcôkpa ne enatikine, nih ena amaka züka kaje, te wü kpara ka Yesu ena afa nganga tete. Nih ti eyi amaka kpah ngü teka wü *kovo gbü tima ka Me, anga mü ena ale neh ene kpara ne, teka tima la.

Wü ngü te Pawülü ba gbü kôcôkpa ne, wüh dene.

Sapita 1-3 Ngü teka wü kpara ka Yesu de wü kovo ka-wü

Sapita 4-6 Ngü teka kaje te Timoteyo ena amere tima ka-ye tete

Dene mandî ka Pawülü fü Timoteyo

¹ Wayi bala Timoteyo, de-ra Pawülü, ma ba kôcôkpa ne fü mü me-ra, te ma di de *mürü tima ka Yesu *Kurisito, kpara te nih ngbü eo jia nih gbü nganga na ne. Angü Yesu i ra ta me-ye gbü tima kaje la, bete Me E-küwa-nih. ² Ma tima kôcôkpa ne fü mü, Timoteyo, angü mü

tine fere baka ye ra gbü tima ka Me. Ma to mandî fü mü fa sü. Wö nih, Me, ake Miri Yesu Kurisito, di de mü, de wüh wu cinga mü, da eto züka gu ngü fü mü, de *züka maguma wü.

Dene ngü te mü ena ari wü kpara di, de wüh ce siti riri

³ Enga ra, ah le de mü ngbü fi bü gbü Efeso, da erî wü *kpara ka Yesu kpala, kpah baka e te ma mala fü mü, gbü ra ta te ma yia tete, teka anü sü kpa gbü Makedoniya ne. Angü ma ce mü gbü Efeso kpala kükürü de. Wü gara kpara la kpala, te ewü ngbü esiti nzö wü bu wü de siti riri. Te di bala, ah le de mü di etata siti riri la atata. ⁴ Mü mala ngü fü wü kpara la, de wüh ce wü töndö ngü ka wü la ace asidi. Ah le de wü *kovo di erî wü kpara de züka riri ka Me, ba e ta te nih mala fü ewü ne. Wüh mere e afü riri ka Me de. Wüh mere e adünda ngü ka Me de wü gara gele, te ewü maka gbü diri cingangü ka-wü, bete iri wü kundu wü ta gügü, ne de. Angü ngü la ti areke kpara de. Ah ena asiti fingangü ka wü kpara, da eto yiki esüka ewü. ⁵ Amba nda-nih, nih di erî wü kpara de züka riri ka Me, teka fü ewü adi ele te-wü. Angü nih ngbü erî wü kpara, de wüh reke fingangü ka-wü, adi emere wü ngü te ena areke gbü jia Me, da ele ngü ka Me de maguma wü biringbö, teka fü ewü amaka wazi, adi ele te-wü ale. ⁶ Angü wü kpara la yia ce da erî wü kpara, de züka riri ka Me, ne eyi, fü ewü adu angbü da emala ka-wü bü töndö ngü kükürü. ⁷ Wüh le ari wü bu wü de ngü ka Me, amba cu de-ewü, wüh je riri ka Me mbi mbi nda-wü de. Fü ewü adu adürü gbü ngü la, angbü emala bü töndö ngü kükürü.

⁸ Fanü fanü, *Riri ka Müse de züka riri, te mü wu si-ngü de te Me to riri la tete eyi mbi la. ⁹ Angü Me to Riri la fü Müse, neh teka wü da? Ah to Riri la teka wü kpara, de te ewü ngbü emere züka ngü gbü jia ni? Ah bala de. Me to riri la teka wü siti kpara, teka asere nga *siti ngü di fü ewü, de wüh ce ngü la asidi. Ah teka wü kpara te ewü je ngü de, wü mürü kôgö-nzö te ewü le ngü ka-ni, Me, kpah de. Baka wü kpara, te ewü ngbü emi wü ni wü de wü wö wü, bete ewü de te ewü ngbü emörö wü kpara ne. ¹⁰ Baka wü kpara te ewü ngbü emere waza, bete ewü te ewü ngbü ele wü bu wü komoko ba würüse tete. Baka wü kpara te ewü ngbü ezoro wü kpara de wazi, afü ewü ba labi ka-wü tete, kpah baka wü kpara te ewü ngbü esu wu, bete ewü te ewü ngbü efiti wü bu wü de mani, de wü kpara te ewü ngbü emere wü gara wü siti ngü 'buru. Me to

Riri ka-ye teka wü siti kpara la, de wüh ce siti ngü ka-wü, te di esiti gbü jia ni ne. ¹¹ Riri ka Yesu *Kurisito mala fü nih kphah bala. Ma egbo nga iri Me kpa gbü kpi, angü ah za züka ngü ka-ye, ka Miri Yesu la, to esaka ra, de ma di eri wü kpara ka-ni di!

¹²⁻¹³ Ma egbo nga iri Miri Yesu Kurisito, angü ah fe ra, ato tima ka-ye la esaka ra me-ye. Angü ta gügü, ma de siti kpara, te ngbü eto cinga eküte Miri Yesu de wü kpara kaka-na, da efala ewü. Amba Miri Yesu fi nga siti wü ngü ka-ra la nda de. Fü ah afü te-ye, aboro wü siti ngü ka-ra la, teka *züka maguma ye. Angü ah wu kphah kpo, ga, ma mere ngü la ta, o ra wu ngü ka-ni la de. Fü ah adu awu ra ba züka kpara ka-ye, adu ato wazi fere teka tima ka-ye, de te engu to fere ne. ¹⁴ Wayi, ah mere züka ngü eyi fere fanü fanü, fa tîne 'duwa cu sü, teka züka maguma ye la. Angü ah to wazi fere, teka fü ra ato maguma ra fefe na, adu ale wü bu ra, ba e te engu ngbü ele ra.

¹⁵ Angü nih wu kpo, ga, Yesu Kurisito koro füh kotö ne, teka aküwa wü siti kpara. Dela kpeke ngü fanü fanü. Ah le de wü kpara 'buru le ngü la, da eto maguma wü fefe. Nda-ra, ma ta de kpara te mere siti ngü fa nda wü bu ra le 'buru. ¹⁶ Fü Yesu Kurisito adu awu cinga ra. Fü ah adu aboro wü siti ngü ka-ra, teka züka maguma ye. Angü ah le de wü kpara 'buru wu, gü ba, te kpara düri ngü ba-neh-ene-la, te ah du fü maguma ye la, ni, Yesu Kurisito, ni ti eyi aboro siti ngü kaka, adu aküwa engu.

¹⁷ Nih gbo nga iri Me!
Iri Me ena angbü me-ye, fi mere badi!
Nih gbo nga iri Me!
Angü ah de Miri ka-nih,
te ngbü gbü nzö wü kpara 'buru, fi mere badi.

Nih gbo nga iri me!
Ah ti akpi nda kphah de!
Nih gbo nga iri Me!
Nih ti awu Me de jia nih nda-nih kphah de!
Ah ka-ye duu Me me-ye fanü fanü.
Nih gbo nga iri Me!

¹⁸ Timoteyo, ye ra, ma o mü me-ra, teka de mü di eto riri fü wü kpara agbü Efeso de kpala. Teka ne de, angü *Nzila Wazi Me mala ngü mü ta eyi gügü, gömö wü *kovo, gü ba, "Mü ena adi de kpeke kpara teka tima ka Me." Ngü de te Nzila Wazi Me mala teka mü la, ah ti eyi ato wazi fü mü. Mü za ngü la ba dü esaka mü, mü rü di kpekepeke, teka angbü eri wü kpara de züka riri ka Me, fanü fanü. ¹⁹ Ah le de mü lala eküte Me alala, fü mü adi emere züka ngü, te reke gbü jia Me. Mü mere e ale kaje ka wü Umenayo ake

Alekezanda ne de. Angü wüh ce züka riri ka Me ka, fü ewü adu ale ka-wü siti riri. Fü ewü adu angbü emere siti ngü gbü jia Me. ²⁰ Te di bala, ma ce wü Umenayo ake Alekezanda la, o eyi fü *Satana, de ah to cinga te ewü, teka de wüh wü siti ngü ka-wü la, fü ewü adu ace da efala ngü ka Me.

2

Dene ngü teka wü kpara ka Yesu Kurisito

¹ Timoteyo, enga ra, dene gina ngü te ma emala fü mü, teka wü *kpara ka Yesu Kurisito. Ah le de wü kpara ka Yesu di eku gba fü Me, da eyi-ta Me teka ngü ka-wü, de ngü ka wü bu wü, da egbo nga iri Me. Wüh di eku gba fü Me, teka wü kpara füh kotö ne nde 'buru. ² Wüh di kphah eku gba teka wü miri, de angbe cögbörö wü kpara, te ewü ngbü gbü nzö wü kpara füh kotö ne 'buru. Dela teka ne de, de wü mere kpara la di eto züka riri fü nih, teka de nih ngbü kpa füh kotö akine mba ziii, gbü gu sü, da emere mene wü ngü, de te ngbü ereke gbü jia Me areke ne. ³ Nih ku gba teka wü kpara 'buru, de Me küwa ewü. Te di bala, gba ka-nih la ena areke gbü jia Me. ⁴ Angü Me ngbü ele de wü kpara 'buru je zu ngü ka-ni, teka de ni küwa ewü.

⁵ Gbo nga iri Me! Me ka-ye kü ngbee biringbö. Kpara te Me fe teka areke ngü esüka ni de wü kpara, ah teka biringbö. Engu de Yesu *Kurisito, te wüh bi engu baka nih, kpara füh kotö ne. ⁶ Angü Yesu Kurisito to ta te-ye fü kpi, teka aküwa wü kpara füh kotö ne 'buru. Ah mere ngü la, gbü züka sikipi te Me fe me-ye, teka agü tamu ngü fü wü kpara 'buru, ga, ni Me, ni ngbü ele de wü kpara 'buru küwa aküwa. ⁷ Ma su wu de. Dela si-ngü de te Me fe ra tete, o *mürü tima ka-ye ne, de ma di emala ngü ka-ni, Me, la fü wü *ganzi kpara gbü gara wü sü nengete, teka de wüh to maguma wü fü Me.

⁸ E'ba'basu ngü te mü ena amala fü wü kpara ka-mü, gü ba, te yi biti te-yi teka aku gba fü Me la, ma ele de kpara te ena atí engagira nü fü yi, ah di de züka kpara, te o maguma ye teka amere ngü ka Me. Ah ti ngü guvu ye kphah de, engu mere e angbü mürü yiki kphah de.

⁹⁻¹⁰ Ebabata ngü, ah de ngü teka wü würi. Wü würi, te ewü di de wü kpara ka Yesu Kurisito ne, ah le de wüh di engbü de züka fingangü gbü nzö wü. Wüh di eto bongo de te ti gbü jia kpara atí kpini. Te wüh le angbü züka wü kpara gbü jia wü kpara la, wüh di emere züka ngü te Me ngbü ele. Wüh ce da eto mene bongo bete 'biri, te wüh ese de mere bi jiane ne,

ace. De wüh ce kphah da ei nzö ewü, egaga agaga, da egiri to ngü di ne, ace. Wüh di emere bala de, angü wüh dela wü kpara ka Me. ¹¹ Kpah bala, würüse di enga esa ri wü kovo anga.

¹² Ma le de würüse to riri fū komoko de. Kōti mere e ara gbü nzö würüse ne kphah de. Komoko di eto riri ekōti me-ye, fū würüse angbü eje. ¹³ Gina kpara ta te Me o fi engu, neh da? Ah de komoko de? Angü Me du mere *Awa tīne sidi, fütanga *Adama.* ¹⁴ Gina kpara ta te *Satana fiti engu, neh da? Ah de würüse de? Angü Awa je ngü ka Satana, fū engu ayia amere *siti ngü, te Me le de.*[†] ¹⁵ Te di bala ne, wü würüse ena aküwa kphah fi aküwa, teka ngü ka Yesu Kurisito, te würüse bi engu me-ye ne. Te ah bala, Me ena aküwa wü würüse, te ewü to maguma wü fefe, da ele ngü kaka-na, kphah da emere wü ngü te ti ati gbü jija na ne.

3

Dene ngü teka wü kovo gbü tima ka Me

¹ Nih wu eyi kpo, ga, ah de züka ngü te kpara le eyi angbü mere *kovo, te ena adi eri wü kpara de ngari Me. ² Te di bala, te mü ena afe wü kpara de bala, ah le mene kpara te mü fe engu la, ah di de züka kpara, te o fingangü ka-ye, teka adi emere wü ngü, te ena areke gbü jia Me. Ah le de ah o jia ye 'duwa duu teka wara ye biringbö. Ah di de kpeke kpara, de nzö ye mbi, te wü kpara ena adi ecu ngüngü acu. Ah di kpara te ena angbü emere ngü fū wü ganzi kpara ereke areke, te ewü koro ngba kpa gba ka la. Engu di kphah kpara, te wu da eri wü kpara mbi mbi mbi. ³ Ah mere e adi enzö fi efa sü de. Ah mere e adi ewü nga, da egü gü kphah de. Ah di de kpara te ngbü ka-ye ziii. Ah mere e angbü eo maguma ye teka jiase de. ⁴ Ah di de kpara te ti eyi ao kōti, aceka kpi fütanganga na reke 'duwa areke. Fū wü jaji kaka-na adi eje riri kaka-na, da ecu ngüngü na acu. ⁵ Angü te kpara ceka kpi fütanga kōti ka-ye mbi de la, engu ena aceka kpi fütanga wü kpara ka Me, neh baye baye? ⁶ Mü fe mene kpara te to maguma ye fū Miri Yesu eyi gügü. Angü te mü fe to kpara, te yiri gbü ngü ka Me nda la de, e-wu neh da, ah ena akpo da ecu ngü ye, gü ba, ni de mere kpara. Te ah bala, ah ena adu afü te-ye adi emere ngü baka nda *Satana. ⁷ Ah le de yi fe mene kpara, de te wü kpara wu engu eyi 'buru, gü ba, engu de züka kpara ka Me fanü fanü. Angü te Satana le afiti engu la, ah le de engu rü

kpekepeke, angü wü kpara ena asiti iri Me teka ngü kaka.

⁸ Kpah bala, teka ngü ka wü gara kpara, te ewü ngbü ele ta-ngü te wü kovo ka Me ne, wüh di kphah de kpeke wü kpara, de nzö wü mbi. Ah le de maguma ewü di biringbö, de wüh mere e adi emala ngü 'basu 'basu de. Wüh mere e adi enzö fi efa sü kphah de. Wüh mere e adi de wü mürü kü, anga kpara te eo gümü jiase ne kphah de. ⁹ Wüh di de kpara, te ewü ngbü elala eküte riri te Me to fū nih. Fū ewü adi emere ngü la de maguma wü ngbee biringbö. ¹⁰ Yi di eceka mene kpara, te yi ena afe engu teka tima la, aceka kpo kpo kpo feke. Te engu ti eyi kpini te nga jia yi la, fū engu adu tīne akpo tima la, amere.

¹¹ Tekä wü mene würüse gbü tima ka Me ne, wüh di kphah kpeke wü würüse, te ewü ngbü emere züka ngü. Wüh mere e adi mene wü würüse, de te ewü ngbü emala ambala'ba eküte wü kpara ne de. Wüh di mene wü würüse, de te ewü di de nzö wü mbi, te ewü ena adi emere tima ka Me de maguma wü biringbö.

¹² Kpah bala, kpara te ena ale ta-ngü te wü kovo gbü tima ka Me la, ah le de engu o jia ye duu teka wara ye biringbö, ah o kōti, fū ah adi eto riri fū wü jaji agba ye ereke areke. ¹³ Dela wü kpara te yi ena afe ewü, ao gbü tima ka Me, angü wüh ena adi emere tima la mbi mbi mbi, kphah da eri wü bu wü de züka riri ka Yesu *Kurisito, fū wü kpara 'buru awu ewü ba kpeke wü kpara.

Dene si-ngü te ma ba kōcökpa ne tete fū mü

¹⁴⁻¹⁵ Dela ngü te ma ba fū mü, teka ngü ka wü *kpara ka Yesu Kurisito, angü ah le de wü kpara ka Yesu ngbü fi bü da emere züka ngü, te reke areke gbü jia Me. Ma kpakine eyi mari teka akoro kpaka yi kpala kere. Amba te ma koro kere kphah de la, mü ena atanga wü ngü, de te ma ba la, fū mü awu mene wü züka kaje, te wü kpara ka Me ena angbü eza, adi emere züka ngü te ngangana. Angü tima ka wü kpara ka Me, ah teka agü tamu zu ngü ka Yesu Kurisito fū wü kpara 'buru. ¹⁶ Angü to *Ngü Mürü ka Me, de te engu gü tatamu fū nih la, ah eyi de mere ngü te ga fa sü le! Ah de ngü ka Yesu, kpara te wüh bi engu kphah ba nih ne. Fū *Nzila Wazi Me ato wazi fefe, angü ah de Ye Me fanü fanü. Wü *malayika ka Me wu engu kphah kpo. Fū wü kpara te engu tima ewü ne, ayia amala ngü kaka-na gbü wü sü füh kotö ne 'buru nde. Fū mere bi wü kpara aci ale ngü la, gü ba, engu de Ye Me fanü. Fütanga tima

* 2:13 2:13 Mü ena amaka ngü la gbü Gina Ngü 2:7, 18-22.

† 2:14 2:14 Mü ena amaka ngü la gbü Gina Ngü 3:1-13.

kaka fūh kotō ne, fū Me adu aza engu, ago di kpaka ye agbū kpī, de mere wazi. Dela ngū ka Me te engu tima Yesu di. Te di bala, ah le de nih le riri ka Yesu de maguma nih biringbō.

4

Dene kaje te mü ena ari wü bu mü tete na

¹ De-mü, ye ra Timoteyo, mü ri kpekpeke, da eri wü kpara de zu ngari Me. Angü *Nzila Wazi Me mala eyi fū nih mbölö, gü ba, "Gbü *adu wü sikipi ne, wü gara kpara ena ace ngari Me, afü te-wü, adi eje ngü ka *Satana, te *siti wü di engu me ena adi efiti ewü di, de siti wü riri kaka la" ² Wü kpara la, wüh ena ari ewü ma, wüh je ngü nda-wü de. Wüh gü ba, "Ani de wü kpara ka Me," amba wüh ngbü nda-wü eri wü bu wü de töndö ngü ka Satana la, ³⁻⁴ ga, "Me le de wü kpara kani mere e aza wü rüse de." Amba Me mala bala nda de. Gara ewü gü ba, "Te mü zü so gara wü nü, ah kpah de *siti ngü gbü jia Me." Ngü la, ah de ngü ka Satana, te wü kpara la ngbü efiti wü bu wü di. Te ena adi de nih, wü *kpara ka Yesu Kurisito, nih wü nda-nih kpo, ga, wü e-mazü te Me o ewü me-ye ne, wüh 'buru de züka zü-e. Angü Me o wü e la 'buru, to ewü e-mazü tete, fū nih adi ezü. Te di bala ne, gara zü-e ena adu afü te-ye, asiti gbü jia Me, neh baye baye? Nih, de te nih le ngü ka Me eyi ne, ah le de nih za e-mazü 'buru te Me ngbü eto fū nih ne de tadu, da egbo nga iiri na. ⁵ Te mü ku gba fū Me teka zü-e ka-mü la, Me o kpa ye fefeh de? Te Me to e fū mü, mü ena adu ace e la neh baye? Angü Me gü ba, "Wü zü-e 'buru mbi."

⁶ Enga ra, dela zu ngari Me, te mü ena ari wü bu mü di. Mü de kpeke kpara, angü mü lala eyi eküte züka riri ka Me. Te di bala, ah le de mü ngbü fi bü da eri wü bu mü de ngü la, teka fū mü angbü züka kpara ka tima ka Yesu Kurisito, te fe mü, o, teka tima la. ⁷ Mü mere e afü te-mü, adu aje töndö riri ta gügü ne, nda-mü de, angü ngü la ena asiti riri ka Me. Mü to maguma mü 'buru teka amere tima ka Me kpekpeke. ⁸ Te mü ngbü kpekpeke teka amere tima ka köti, ah esiti de. Amba, te maguma mü ngbü kpekpeke teka amere tima ka Me la, züka ngü de te mü ena amaka gbü ngü la, ena afa nda köti ka. Angü ngü ka köti ena anza anza. Amba ngü ka Me nza nda de. Te di bala, züka ngü te mü ena amaka gbü tima ka Me la, ah ena angbü fi mere badi, zalü akoro di agbü sü ka Me agbü kpī. ⁹ Dela kpeke ngü fanü fanü. Ah le de nih to maguma

nih 'buru teka ngü la. ¹⁰ Te di bala, nih to maguma nih, teka angbü emere tima ka Me la kpekpeke, de wazi nih 'buru, angü nih ena amaka *küküwa gbü ngü la. Nih o jia nih eyi teka Mere Me, angü ah ngbü eküwa wü kpara, te ewü to maguma wü eyi fū Yesu Kurisito ne 'buru me-ye. ¹¹ Dela ngü de te mü ena adi emala fū wü bu mü, da eri ewü di.

¹² Enga ra, mü ngbü ba kpeke kpara, angü wü kpara ena awu mü ba jaji. Mü di emere ngü kpekpeke, teka fū ewü adi eo lümü te mü. Mü di emere züka ngü gbü jia Me, kpah da ele ngü kaka de maguma wü biringbō. Mü di ele wü bu mü de maguma mü, kpah da emala züka ngü fū ewü ereke areke. Mü di eceka te-mü 'be teka ngü ka wü wü rüse, teka fū mü angbü *nzila. Te mü mere züka ngü ka Me la bala, ngü la ena agü tamu züka kaje fū wü kpara ka Yesu Kurisito, fū ewü angbü efa nga mü tete.

¹³ Mü ngbü fi bü da eri wü bu mü de ngü ka Me, zalü akoro di gbü sikipi, te ma ena adu akoro tete. Mü di etanga *Ngari Me, da esere si-ngü la fū ewü. ¹⁴ Mü mere e ace ngü la kpo fi de, angü dela tima te Me to fū mü, fū mü adi emere. Angü Me to ta wazi fū mü teka tima la, esaka wü *kovo, gbü sikipi ta te ewü o kpa wü tete gbü nzö mü, teka tima ka Me ne. Me to wazi fū mü ta kpah gbü wü ngü te wü kovo la mala teka mü gbü wazi ka *Nzila Wazi Me, gü ba, "Mü ena angbü ba kpeke kpara gbü tima ka Me." ¹⁵ Dela wü ngü te mü ena o maguma mü teka adi emere. Te mü mere bala, wü bu mü ena acu ngü mü, ga, mü te enü de ngü la kpa engagira nü.

¹⁶ Timoteyo, engu ra, mü o to mü fi bü teka amere züka ngü gbü jia Me, da eri wü bu mü de zu ngü ka Me la. Angü te mü mere bala, mü ena amaka *küküwa, fū mü aküwa kpah wü mene kpara, te ewü ena aje ngü la gömō mü la.

5

Dene kaje te mü ena ari wü kpara ka Yesu tete

¹ Te gara kpara mere mba ngü düri la, ah le de mü ri engu gbü züka kaje. Te ah de mere kpara, mü mere e ari engu de wazi de. Mü mala ngü fefe na ferre, ba e te mü emala ngü fū wö mü. Te ah de ka'dörö la, de mü to riri fefe na, ba e te mü eri engu ni mü. ² Te ah de mere wü rüse la, de mü ri engu baka ni mü. Te ah de jaji wü rüse la, de mü ri engu baka tangbase ka-mü. Mü mere e ao gümü tangbase la, wü rüse tete de.

Dene ngü teka wü wü rüse wökö

³ Ah le de yi di ele ta-ngü te wü wüürüse wökö, mene ewü te ewü di kpi kpi wü, te mürü ewü di ma ne. ⁴ Amba, te wü jaji ka-ewü ladü, ah le de wü jaji la di emere ngü ka Me agba wü areke areke, teka fü ewü ceka kpi fütanga ni wü me-wü, angü ni wü ngbü eceka kpi fütanga ewü ta meye. Kpah bala, dela züka ngü, te ena areke areke gbü jia Me.

⁵ Mene wüürüse wökö, te mürü ye na di ma fanü fanü la, ah le de engu o jia ye te Me, da eku gba fü Me ra de biti mini, de Me le ta-ngü tete na. ⁶ Amba, te wüürüse la ngbü eo to ye, teka tadu füh kotö ne, ba e te engu ngbü ele la, mene wüürüse la ena angbü gbü jia Me ba kö kpara. Angü ah je ngü ka-ni, Me, tine eyi de.

⁷ Enga ra, Timoteyo, mü mala ngü la fü wü *kpara ka Yesu kpekpeke, de wüh di eceka kpi fütanga wü ni wü de wü ata wü, angü wü kpara ena asiti iri ewü. ⁸ Te kpara ce wü mürü ye gbü cinga la, ah mere mere *siti ngü eyi gbü jia Me. Siti ngü kaka ena afa nda wü kpara, te ewü le ngü ka Me kü de ne, angü ah gü ba, "Ni de kpara ka Me," amba ah je riri ka Me nda de.

⁹ Ah le fü wü *kpara ka Yesu Kurisito adi ele ta-ngü te wü wüürüse wökö ale. Yi mere e amere ngü la fa fa fa de. Yi fi nga ngü la mbi mbi mbi feke. Ah le de wüh di de wü mere wüürüse, te re ka-ewü koro eyi ba e teke bata (60). Ah le kpah wü mene wüürüse, ta te ewü ngbü eo jia wü 'duwa duu teka wati wü biringbö ne. ¹⁰ Kpah bala, ah le fü ewü adi de wü wüürüse, de te wü kpara 'buru ngbü ewu ewü ba züka kpara. Ah le mene ewü, ta te ewü ngbü eri wü jaji ka-wü ereke areke, da ele ta-ngü te wü ngba, wü kpara ka Yesu Kurisito, da ese ngu fü ewü ne. Ah di kpah de mene wü wüürüse, de ta te ewü ngbü ele ta-ngü te wü mürü cinga, da emere wü ngü 'buru ereke areke ne. Te ah bala la, de mü ba iri ewü aba.

¹¹⁻¹² Te ah de jaji wüürüse la, mü mere e ale ta-ngü tete de. Angü wü wüürüse wökö te yi ena aba iri ewü la, wüh ena akina te-wü, gü ba, "Ani ena alala eküte tima ka Yesu Kurisito, ani du za komoko tine de." Te ah di de jaji wüürüse la, gümü komoko ena adu ake engu, fü engu ace ngü de te engu mala la, teka ngü ka komoko. Ngü la ena adu akoro fefe ba dürü ngü. ¹³ Ah kpah bala, teka mene jaji wüürüse, te wüh ele ta-ngü tete kükürü, basa ena azoro engu, angü tima kaka ma. Te di bala, ah ena angbü adi endoro tine bü faaa, te nga wü köti 'buru. Fü ah akpo

da emala ambala'ba, da egiri nga ngü te wü bu ye, da emala wü ngü te ti de. ¹⁴ Te ah bala la, ah ena adi de züka ngü, te wü jaji wüürüse ri gbü ngü la nda-wü kü de la. Te komoko kpi akpi esaka gara jaji wüürüse la, ah le de engu za gara komoko gbü züka kaje, teka fü ah abi wü jaji, da emere tima ka köti. Angü wü vügü ka-nih ena asiti iri wü kpara ka Yesu Kurisito teka ngü kaka. ¹⁵ Dela ngü te ma mala teka ngü ka wü jaji wüürüse, angü gara ewü ce ngü ka Yesu Kurisito eyi, du fü te-wü eje ngü ka *Satana.

¹⁶ Te mü gü ba, "Ni de kpara ka Yesu Kurisito," te wüürüse wökö ladü agba mü la, de mü le ta-ngü tete me-mü. Mü mere e ambü wü bu mü de ngü la de. Dela teka ace mba kaje fü wü kpara ka Yesu Kurisito, fü ewü ale ta-ngü te mene wü wüürüse wökö, de te mürü ewü di ma, ne.

Dene ngü teka wü kovo, te ewü ngbü emere tima ka Yesu

¹⁷ Wü *kovo gbü tima ka Yesu, te ewü emere tima ka-wü kpekpeke ne, ah le fü yi adi ecu ngü ewü acu, kpah da ele ta-ngü te ewü. Ma mala ngü la kpekpeke, angü wüh de wü kpara, de te ewü ngbü emala ngari Me fü wü kpara, kpah da eri wü kpara ka Yesu Kurisito ne. ¹⁸ Yi fi nga ngü te wüh ba gbü *Ngari Me, gü ba, "Te mü o kpara, de ah mere tima ka-mü agbü yi la, mü mere e ace engu tala de."* Gara gü ba, "Ah le de kpara, te ngbü emere tima ne, maka na tima ka-ye."[†]

¹⁹ Te gara kpara koro kpara mü, bü meye kpi kpi ye, teka asiti iri kovo ka Me la, de mü mere e aje ngü kaka-na la de. Ah ngbü ele wü kpara 'basu, anga bata, te ewü wu *siti ngü kaka-na la cu de jia wü. ²⁰ Te ah bala la, de mü je ngü ka-ewü la eje, fü mü aza mene kovo de te dürü ngü de bala, akoro de engu engagira wü *kpara ka Yesu Kurisito 'buru. Fü mü ari engu gbü jia wü bu ye na, teka fü wü bu ye na awu siti ngü kaka, angü wüh ena adürü ngü te gara kpah bala. ²¹ Mü mere e amere ngü la bü ka ka de. Mü ceka kpi gbü ngü engu la ferrre feke. Fü mü adu tine afi nga ngü gbügbü na, aye süsüka na mbi. Mü mere e areke ngü areke fefe na, angü ah de kovo, ne de. Mü mere e afüwa kpara, angü engu de engu ni mü, ne kpah de. Dela wü ngü te ma emala fü mü, gbü jia Me ake Yesu Kurisito, bete wü *malayika ka Me kpah nde 'buru, teka fü mü adi emere.

²² Te mü le eyi efe kpara gbü tima ka Me la, mü mere e afe kpara bü ka ka ka de. Mü fi nganga afi, ceka aceka kpo kpo kpo.

* 5:18 5:18 Mü ena amaka ngü la gbü Manda nga Riri 25:4.

† 5:18 5:18 Mü ena amaka ngü la gbü Matayo

Angü, te mü fe mene kpara, te ena adu afü te-ye, akpo da emere wü siti ngü la, ngü engu la ena adu angbü tîne gbü nzö mü. Mü mere e aza lümü, akoro di gbü nzö mü bala de. ²³⁻²⁵ Mü ceka wü kpara, te mü ena afe ewü, aceka kpo kpo kpo, angü wü gara kpara ngbü emere dürü ngü ka-wü gbü zi, esalakumu, te wü kpara wu ewü di de. Wü gara kpara emere nda-wü siti ngü gbü jia wü kpara ngbaa ngbaa ngbaa, fū wü kpara aci awu wü siti ngü ka-ewü engu la 'buru. Kpah bala, wü gara kpara ngbü emere wü züka ngü gbü jia wü kpara. Wü gara kpara emere nda-wü züka ngü ka-wü gbü zi, te wü kpara ti awu de. Wü kpara ena adu awu züka ngü ka-ewü la te gara.

Ye ra, Timoteyo, mü mere e adi enzö bü duu ngu de. Te soko mü ngbü emere mü kpah fi bü amere la, mü di enzö kpah mba enga *vinü 'dongoni, fū ah angbü ele ta-ngü te-mü baka rü, teka bu mü la.

6

Dene ngü teka wü labi

¹ Mene labi te ngbü emere tima fū kpara te le ngü ka Me de, mü mala fū ewü, de wü di eo lümü wü mere kpara ka-wü la, ao kpekpeke, angü wü kpara ena asiti iri Me teka ngü ka-ewü, gü ba, "Nih ngbü eri wü kpara de siti riri." ² Te mere kpara kaka di kpah *kpara ka Miri Yesu la, engu mere e adi efala mere kpara ka-ye la de. Ah mere e afi, ga, "Angü dela enga ni ni gbü ngü ka Yesu, ni ena aje ngü kaka baye?" ah mere e amala bala de. Baka te mere kpara kaka di de kpara ka Miri Yesu ne, engu di eje ngü kaka tîne efa sü, angü mere kpara kaka la de züka kpara, te le ngü ka Yesu Kurisito, te Me ngbü kpah ele engu.

Wayi, ye ra Timoteyo, dela eyi wü ngü, de te mü ena angbü eri wü *kpara ka Yesu di, fū ewü angbü emere.

Dene ngü ka wü kpara, te ewü ngbü eri wü bu wü de siti riri

³ Mene kpara te ngbü eri wü bu ye de gara riri, te di kpikpi ye ne, ah de siti kpara. Angü riri ka-nih, ah de züka ngü ka Miri Yesu Kurisito, te ngbü egü tamu züka kaje ka Me fū nih fanü fanü ne. ⁴ Mene kpara te ngbü eto gara riri de bala, ah ngbü ecu ngü ye, ga, "Ni de mere kpara, te ni wu ngü 'buru kpo," amba ah wu ngü 'buru 'buru de. Tima kaka-na ka-ye bü teka adi ega yiki, teka wü gara tondö ngü kükürü. Teka ngü la, ah ena akpo angbü ekpi kanga, da ewü nga de wü bu ye, da efala ewü. Angü ah ngbü efi nga

ngü, ga, wü bu ni nda-wü 'buru de siti wü kpara. ⁵ Fingangü kaka siti bala, angü ah je züka riri ka Me nda kpah de. Ah ga, "Ni ngbü emere tima ka Me," amba de! Ah o fingangü ka-ye 'buru teka züka ngü, te ni ena amaka gbü tima la.

⁶ Fanü fanü, mü ti eyi amaka mere bi züka wü ngü gbü tima ka Me. Amba ah de wü ngü de füh kotö ne nda de. Te mü mere tima ka Me de maguma mü biringbö, fū mü ace ngü ka gümü e asidi, te mü mere bala, mü ena angbü de tadu fanü fanü. ⁷ Wüh o maguma wü teka wü e de füh kotö ne, neh teka ne? Ta te ewü bi mü füh kotö ne, wü e la ladü esaka mü? Kpah bala, gbü ra te mü ena akpi tete, mü ena aza wü e ka-mü la, ago di? ⁸ Te di bala ne, te mü maka mba enga zü-e, bete kala bongo te mü ena ato eküte mü la, mü fi nga ngü de, mü ngbü ka-mü de tadu te mü, angü wü e la ti eyi ale ta-ngü te mü. ⁹ Mene kpara te o fingangü ka-ye teka amaka bi jise, ah ena amaka mere cinga gbü ngü la. Angü *Satana ena afti engu, de ah ti gbü yimba ka-ni. Te di bala, ah ena adürü te kaje ka Me asidi, fū ah akpi akpi fi mere badi. ¹⁰ Angü, te mü o maguma mü 'buru teka jise la, ngü la ena aza mere bi wü *siti ngü 'buru, akoro di gbü nzö mü. Wü gara kpara ce ngü ka Me eyi, teka gümü jise. Fū ewü amaka mere kuru teka ngü la.

Dene riri teka züka ngü te mü ena angbü emere

¹¹ Timoteyo, ye ra, mü mere e angbü ba siti wü kpara la de, angü mü nda-mü de mürü tima ka Me. Te di bala, mü to maguma mü fū Me, fū mü ao fingangü ka-mü 'buru, teka adi emere wü ngü te reke areke gbü jija, kpah teka adi angbü ziii, da ele wü bu mü de züka maguma mü. Mü di etüka te-mü, da erü kpekpeke gbü ngü ka Miri Yesu. ¹² Mü i maguma mü ai, baka kpara te ngbü emere gü teka ngü ka Me. Mü zoro ngü ka Me la de kpa mü 'basu, teka fū mü aküwa fi mere badi. Angü Me fe mü eyi teka *küküwa la. Mü fi la nga sikipi ta te mü kina te-mü, gbü jia mere bi wü kpara, gü ba, "Ni to maguma ni eyi fū Me fanü fanü ne."

¹³⁻¹⁴ Timoteyo, ye ra, wü ngü te ma mala fū mü la, ah de kpeke ngü. Ah le de mü di emere wü ngü la zalü 'buru. To mü mere e airi tete kpo fi de. Ma mala ngü la fū mü kpekpeke de iri Mere Me, angü ah ngbü eküwa wü kpara füh kotö ne 'buru me-ye. Ma mala ngü la kpah de iri Yesu *Kurisito, angü engu rü ta kpekpeke ba komoko engagira Miri *Pilatü.* Mü di

* 6:13-14 6:13-14 Gara iri Pilatü de Pondiyo.

emere wü ngü la bala, zalü gbü sïkpï te Yesu Kurisito ena adu akoro tete na. Fï Miri Yesu aceka mü ba züka kpara ka-ye.

¹⁵ Nih gbo nga ïri Me,
angü engu de kpara,
te ena agü tamu Yesu Kurisito fü nih
gbü sïkpï la.

Nih gbo nga ïri Me,
angü ah de Mere Miri duu me-ye,
te fa wü miri fïh kotö ne nde 'buru.

¹⁶ Nih gbo nga ïri Me,
angü gara kpara kpala bakaka kpa fïh
kotö akine nda ma.

Nih gbo nga ïri Me,
angü te engu di dela,
ah tï akpi nda kü de.

Nih gbo nga ïri Me,
angü ah ngbü engbü ka-ye
gbü züka sü kpa tikpi te eci aci ba ra,
te kpara tï ae jia ye, aceka de.

Nih gbo nga ïri Me,
angü ah ngbü me-ye gbü nzö nih, fi
mere badi.

Dene gara ngü teka wü kpara

te ewü di de mere bi jiase esaka wü

¹⁷ Mü rï wü kpara, te ewü di de mere bi jiase esaka wü ne, de wüh mere e adi ecu ngü wü de. Wüh mere e ao maguma wü teka mere bi jiase ka-wü la kpah de. Angü wü jiase, de wü e de fïh kotö ne, ena anza ka-wü 'buru anza. Wüh di eto maguma wü fü Me, angü engu de kpara te ngbü eto züka wü e engu la fü nih 'buru me-ye, de nih ngbü de tadu tekaka. ¹⁸ Mü rï ewü de wüh di emere wü züka ngü, te ena areke areke gbü jia Me. Ah le de wüh di ele ta-ngü te wü bu wü. Wüh mere e angbü mürü zü de. ¹⁹ Te wüh ngbü emere züka ngü bala la, wüh ena amaka mere züka ngü te gara, angü Me ena ale ta-ngü te ewü ale. Fï ewü aküwa, angbü de mere tadu agbü sü ka Me agbü kpi kpala, fi mere badi.

Dene adu riri ka-ra fü mü

²⁰⁻²¹ Wayi, ye ra Timoteyo, mü zoro riri ka Me de kpa mü 'basu mini. Angü ah de kpeke riri te engu to fü mü, teka fü mü adi eri wü bu mü di. Wü gara kpara ladü, te ewü ngbü ega yiki, da efiti wü kpara de töndö riri ka-wü. Mü mere e ao fïngangü ka-mü te siti riri ka-ewü la de. Wüh gü ba, "Ani wu ngü fa sü," amba de! Wüh dürü ka-wü te kaje ka Me eyi asidi.

Me di de yi, da ele ta-ngü te yi de *züka maguma ye.

Dela adu ngü ka-ra. De-ra Pawülü.

Dene e'ba'basu köcökpa te Pawülü ba fü Timoteyo 2 Timoteyo

Masere si-ngü

Dene e'ba'basu köcökpa te Pawülü tima fü Timoteyo. Fütanga gina köcökpa te engu tima fefe, fü wü kpara ka Miri ka wü *Rüma ayia azoro Pawülü, ai engu, agü gbü ku agbü Rüma kpala. Pawülü ba köcökpa ne o engu ngbü fi gbü ku la. Ah ba fü Timoteyo, gü ba dene, "Gbü jia ni, sikipi ka kpi ka-ni koro eyi ghamari." Angü ah fi gü ba, *Kayisara, Miri ka wü Rüma la, ena amörö ni amörö asidi. Te di bala, Pawülü kpe cürü nda de, angü ah wu kpo, gü ba, Me ladü te ena aküwa ni gbü sü ka-ye agbü kpi, fi mere badi. Gümü Timoteyo ngbü emere engu efa sü, fü ah amala fü Timoteyo, de engu yia kere, akoro kpaka ni agbü Rüma. Kpah bala, ah ri Timoteyo de mere bi züka riri, de ah rü kpekpeke sidi nga ni, da eri wü *kpara ka Yesu mbi mbi mbi.

Te mü ena atanga köcökpa ne enatikine, mü ena amaka mere bi züka riri, te ena ato wazi fü mü, teka fü mü arü kpekpeke, da elala gbü ngü ka Me.

Wü ngü te Pawülü ba gbü köcökpa ne, wüh dene.

Sapita 1:1-2:13 Ngü teka tima ka Timoteyo

Sapita 2:14-3:9 Ngü ka siti riri ka wü mürü fiti

Sapita 3:10-4:8 Ngü teka Ngari Me

Sapita 4:9-22 Adu ngü

Dene mandi ka Pawülü fü Timoteyo

¹ Wayi bala, Timoteyo, de-ra Pawülü, ma ba köcökpa ne fü mü me-ra. Ma de *mürü tima ka Yesu Kurisito kphah baka e te mü wu kpo, angü Me fe ra ta me-ye, teka de ma di emala ngari Yesu fü wü kpara, gü ba, "Yesu *Kurisito kpi teka aküwa wü kpara fi mere badi." ² Timoteyo, mü de züka ye ra. Ma to mandü fü mü fa sü. Wö nih, Me, ake Miri Yesu Kurisito, di de mü, de wüh wu cinga mü, da eto züka gu ngü fü mü, de *züka maguma wü.

Dene ngü ka-mü te ngbü eto tadu fere

³ Timoteyo, ye ra, ma ngbü egbo nga iri Mere Me teka ngü ka-mü. Ma de kpara te ma ngbü emere tima ka Me de maguma ra biringbö, kphah ba e ta te wü kundu ra ngbü emere ne. Ma egbo nga iri Me, angü mü to maguma mü 'buru fü Me kphah bala. Ma ngbü efi nga mü ra de biti 'buru, da eku gba fü Me teka mü, de ah to wazi fü mü. ⁴ Gümü mü ngbü eke ra efa sü, angü

ma ngbü efi nga gba ka-mü, ta te mü ku de ngura, gbü sikipi te nih ye süka nih tete. Nih ena adu awu te-nih neh elaye, teka fü nih angbü de tadu? ⁵ Ma gbo nga iri Me teka mü, angü ma wu kpo, ga, mü le ngü ka Yesu Kurisito eyi de maguma mü biringbö. Wü ni mü Yunisi ake ata mü Loyisi, wüh kpo de ngü la eyi gügü. Titine dene, ma wu kphah eyi, ga, mü lala kphah eyi gbü nga Yesu.

Dene ngü teka tima te Me to fü mü

⁶ Timoteyo, ye ra, mü o to mü 'buru teka amala ngari Me fü wü bu mü, angü dela tima ka Me, te engu to fü mü me-ye, gbü sikipi ta te ma o kpa ra gbü nzö mü tete. ⁷ Mü mere tima la amere kpekpeke, angü Me to wazi ka *Nzila Wazi ye eyi emaguma nih, teka tima ka-ye la. Te di bala, mü ti akpe cürü de, angü Me ngbü eto wazi fü nih, teka amere tima ka-ye di kpekpeke, de züka fingangü gbü nzö nih, kphah da ele wü bu nih de maguma nih.

⁸ Te di tine eyi bala ne, Timoteyo, mü rü arü kpekpeke, teka adi emala ngari Miri Yesu fü wü kpara. Mü mere e akpe cürü de. Mü wu ngü te ngbü emere ra kpakine ne eyi, angü wüh zoro ra, gü eyi gbü ku, teka ngü ka Miri Yesu. Te wüh le ato cinga te mü kphah bala la, mü mere e akpe cürü de, angü Me ena ato wazi fü mü me-ye kphah baka nda-ra. ⁹ Angü Me küwa nih eyi, o nih eyi ba züka wü kpara ka-ye, teka de nih di emere wü ngü te ena areke gbü jijia. Me küwa nih, neh teka ne? Tekka gara züka ngü te nih mere? Ah bala de! Me küwa nih teka mere lele ka-ye, angü ah le ngü la me-ye, de *züka maguma ye. Ta gügü te enga gina, o engu mere kotö ne la de, engu ga, "Ni ena aküwa wü kpara teka ngü ka Yesu *Kurisito." ¹⁰ Enatikine Yesu Kurisito koro eyi teka aküwa nih fanü. Angü Yesu fa wazi kpi eyi. Te di bala, te nih to maguma nih fü Yesu, nih ti akpi fi de. Te küte nih kpi la, Me ena ato to küte fü nih, fü nih aküwa fi mere badi. Dela eyi ngari Yesu, te Me to eyi fü nih, de nih di emala fü wü bu nih.

¹¹ Ngari Yesu la, ah de ngü te Me fe ra, tima, teka adi emala fü wü kpara, da eri ewü di. ¹² Dela si-ngü te ewü zoro ra, gü agbü ku tete na ne. Ma kpe cürü kphah de, angü ma to maguma ra eyi fü Yesu Kurisito. Ma wu eyi, gü ba, engu ti ace ra nda de. Yesu de kpara te to tima la fere me-ye. Ah ngbü fi bü eto wazi fere, teka amere tima ka-ye la di. Te di bala, ma wu kphah kpo, ga, tima ka Yesu ti anza nda de, zalü akoro di gbü sikipi de te engu ena adu akoro tete na.

Dene ngü teka züka riri ka Me, te mü ena angbü eri wü kpara di

¹³ Timoteyo, ma de kpara te ma ri mü de ngari Me la me-ra. Mü o to mü teka ngü la, de mü di eri wü bu mü di. Mü di elala fi bü gbü nga Yesu, de mü le wü bu mü de maguma mü biringbö, angü Yesu ena ato wazi la fü mü me-ye. ¹⁴ Ngari Me la, ah de kpeke ngü te engu to fü mü. Mü mere e afü ngü la de. Mü zoro ngü la de kpa mü 'basu, fü mü adi emala fü wü kpara, da eri ewü di. Angü *Nzila Wazi Me ladü emaguma mü, da eto wazi fü mü teka tima la.

¹⁵ Timoteyo, ngü te wü *kpara ka Yesu agbü tö ka Asiya mere ra di, mü wu kpo. Angü, te wüh je, gü ba, "Miri ka wü *Rüma zoro ra eyi, gü agbü ku," ne, fü wü Figelo ake Eremogene ayia afü te-wü, de wü bu wü 'buru, ba wü kpara te ewü wu ra de la. ¹⁶⁻¹⁷ 'Duwa duu Üneseiforo te kpe cürü de. Angü te engu koro kpa gbü Rüma kpakine, ah to te-ye teka agiri ra. Te engu je nga ra, fü ah adu anü zalü aceka ra, agbü ku. Fü ah ale ta-ngü te ra afa sü. Miri Yesu di de engu, da ele ta-ngü tete, de wü kpara kaka ka köti nde 'buru. ¹⁸ Üneseiforo de kpeke kpara fanü. Kpeke tima ta te engu ngbü emere fere, de wü kpara ka Me kpaka yi, agbü Efeso kpala ne, mü wu kpah eyi. Ah le de Miri Yesu le ta-ngü tete, de *züka maguma ye, gbü *adu sikipi, te engu ena akolo ngü ka wü kpara tete, te gara.

2

Dene ngü te ma emala fü mü, de mü rü kpekepeke

gbü wazi ka Yesu

¹ Timoteyo, mü mere e ace ra de, angü mü fere baka ye ra. Mü rü nda-mü kpekepeke de wazi ka Yesu *Kurisito. ² Mü je ngari Yesu Kurisito ta gömō ra, gbü jia mere bi wü kpara. Ah le de mü lala eküte ngari Yesu la, fü mü adu agiri kpeke wü kpara, te jia ewü mba amba. Fü mü amala ngari Yesu la fü ewü, da eri ewü di, teka fü ewü adi eri wü bu wü di, sisi nga mü.

³ Timoteyo, te mü ena amaka cinga, teka ngü ka Yesu Kurisito la, baka ngü de te ewü mere ra di ne, mü mere e afi nga ngü de. Mü i maguma mü ai kpah ba nda-ra. Angü nih de wü marajümiya ka Miri Yesu Kurisito. ⁴ Te ah bala, nih o fingangü ka-nih 'buru fü Miri Yesu, angü marajümiya o to ye teka wü gara wü ngü ka köti nda de. Ah ngbü eo fingangü ka-ye 'buru teka mere kpara ka-ye, teka amere wü ngü te ena areke gbü jijia na. ⁵ Ah

kpah baka kpara te ngbü emere kalafiyi.* Angü, te engu le woro gbü züka kaje de la, wüh ti agbo nganga na, anga ato takpa fefe kpah de. Kpah bala, ah le de mü mere tima ka Yesu gbü züka kaje, teka fü mü amaka takpa gbügbü na. ⁶ Te mü sö e kamü kpa gbü yi, ah le de mü mere tima engu la kpekepeke, teka fü mü amaka mere bi zü-e gbü kpiri kaka. ⁷ Dela wü ngü de bata te ma le amala fü mü, teka tima ka Yesu Kurisito. Mü fi nga wü ngü la mbi mbi mbi, fü Miri Yesu agü tamu si-ngü la fü mü me-ye.

⁸ Mü rü kpekepeke, da efi nga ngü ka Miri Yesu Kurisito, kundu ye *Davidi, fü mü amaka wazi gbü ngü la. Angü te engu kpi, fü Me adu azükü engu gbü kpi la. Dela ngari Yesu de te ma ngbü emala fü wü kpara 'buru. ⁹ Wü vügü ngbü eto kuru te ra teka ngari Yesu la, angü wüh zoro ra eyi, i de nyari baka siti kpara. Ma fi nga ngü la nda-ra de, angü wüh ti ai ngari Yesu nda-wü de. Ngü la ngbü fi bü da ewü ka-ye gbü wü sü 'buru. ¹⁰ Gbü wü ngü la 'buru, ma kpe cürü nda-ra de. Ma i maguma ra, teka ne de, angü ma ngbü efi nga wü gara kpara, de te Me fe ewü eyi ne. Ma ngbü fi bü da emala ngari Yesu fü wü kpara, teka fü ewü ato maguma wü fü Yesu Kurisito, fü ewü akuwa agbü sü ka Me, agbü kpi kpala fi mere badi.

¹¹ Wayi, Timoteyo, Yesu Kurisito de züka *E-küwa-nih! Mü di efi nga züka ci ka-nih, te gü ba dene,

Nih ce te-nih fü kpi baka Yesu,
Fü nih azükü gbü kpi kpah bakaka na.

¹² Nih rü kpekepeke gbü ngü ka Yesu,
Fü Yesu ao nih ba cögbörö wü kpara ka-ye te gara.

Nih mere e ace ngü ka Yesu de,
Angü Yesu ena ace ngü ka-nih kpah bala.

¹³ Te nih le ngü ka Yesu de,
Yesu ena amere wü ngü 'buru de te engu mala la.

Ah ti ace ngü ka-ye nda de.
Dela kpeke ngü fanü fanü. Mü fi nga ngü la, fü mü amaka wazi gbügbü na.

Dene ngü te ma le amala fü mü teka yiki

¹⁴ Timoteyo, ngü de te ma mala fü mü la, ah de mere kpeke ngü. Dela ngü te mü ena angbü eri wü bu mü gbü tima ka Me di. Mü ri ewü mbi mbi mbi, da emala fü ewü kpekepeke de iri Me, gü ba, "Wüh mere e aga yiki gbü ngü ka Me de." Angü te wü cögbörö kpara ngbü ega yiki esüka wü la, ah ka-ye de töndö ngü. Te wü gara wü di enga ni nih ena aje töndö ngü la bala, nzö ewü ena asiti, fü fingangü ka-ewü akoro faaa, fü ewü ace ngü ka Me

* 2:5 2:5 Kalafiyi anga kulakula de wutu ka woro, te wü kpara ngbü ego woro, teka akoro te enga gina, anga akoro gina kpara gbü woro la.

ka, teka ngü la. ¹⁵ De-mü Timoteyo, mü o fingangü ka-mü 'buru, teka fü mü adi ba züka kpara gbü jia Me. Mü mere tima ka-mü kpekepeke, angü Me to tima la fü mü me-ye. Mü ri wü kpara de zu ngü ka Me. Mü mere ngü la bala, teka fü mü angbü de tadu, gbü sikipi te mü ena arü engagira Me tete.

¹⁶ Mü di ekpe ngü ka yiki akpe, angü yiki de töndö ngü, te siti gbü jia Me fa sü. Wü kpara te ewü ngbü ega yiki, da efüfü ngü ka Me afüfü ne, wüh ena adürü te kaje ka Me asidi. ¹⁷ Riri ka-ewü la, ah baka mere ambalö eküte lö kpara, te ena asiti fingangü ka wü *kpara ka Yesu asiti. Wü Imeneyo ake Filito de wü bu wü, wüh ngbü eri wü kpara de siti riri la me-wü. ¹⁸ Angü wüh ngbü esu wu, ga, "Me züki nih gbü kpi eyi." Töndö riri ka-ewü la siti nzö wü gara kpara eyi, fü ewü adürü te kaje ka Me asidi. ¹⁹ Nih, de te nih di ndanih zu wü kpara ka Me fanü fanü ne, ah le de nih lala eküte zu ngü ka Me. Nih fi la nga mere kpeke ngü, de te wüh ba gbü *Ngari Me, gü ba dene, "Me wu wü kpara ka-ye eyi. Wü kpara te ewü le ngü kaka de ne, ah wu ewü kpah kpo."[†] Wüh ba kpah gara ngü gbü Ngari Me, gü ba, "Wü kpara te ewü ra fü Me, ah le de wüh ce *siti ngü ka-wü asidi."

²⁰ Te di bala, Timoteyo, ah le mü di emere züka ngü te reke areke gbü jia Me. Ah ba e te mü ena anü agba mere miri, mü ena amaka züka wü ndü'ba te zu asu, teka ato ngu di fü cögbörö wü kpara. Mü ena amaka kpah wü siti külü ndü'ba, te ngbü eyu ayu, te wüh ngbü eto ngu fü wü labi gbügbü na. ²¹ Te kpara ce siti ngü ka-ye la 'buru, fü ah angbü *nzila la, ah ena angbü ba züka ndü'ba, te ena areke gbü jia Miri ka-ye, teka fü ngu amere züka tima ka-ye di. ²² Te di bala, mü mere e amere wü siti ngü baka wü bu mü, wü ka'dörö ne, nda-mü de. Mü kpe ngü la akpe. Mü o to mü teka adi emere wü züka ngü te ena areke gbü jia Me. Mü lala eküte ngü ka Me. Mü le wü kpara de maguma mü, da engbü ziii de wü bu mü, wü kpara te ewü le ngü ka Me de maguma wü biringbö ne.

²³ Ye ra Timoteyo, mü di ekpe ngü ka yiki akpe. Wü kpara te ewü ngbü ega yiki, da efüfü ngü ka Me afüfü ne, wüh wü ngü mbi mbi nda-wü de. Mü mere e adi engbü de ewü de, angü ngü la ena akoro baka gü esüka yi. ²⁴ Te mü de kpara ka tima ka Me la, mü ti amere tima ka Me de gü nda-mü de. Ah le de mü ngbü de züka maguma mü, da eri wü kpara ferrre. ²⁵ Anga te gara kpara le aga yiki,

mü ri engu kpah ferrre. E-wu neh da, Me ena adu afü fingangü kaka la, fü engu adu afü maguma ye, ale zu ngü ka Me. ²⁶ Te di bala, fingangü kaka ena adu areke, fü ah ayia aküwa gbü yimba ka *Satana. Angü yiki la, ah de ngü ka Satana. Satana fiti kpara la me-ye, de ah mere tima ka-ni, ka Satana.

3

Dene ngü ka siti wü kpara gbü wü sikipi ne

¹ Timoteyo enga ra, dene kpeke ngü te ma le amala fü mü. Nih, te nih to maguma nih eyi fanü fanü fü Me ne, wü vügü kanih ena asibi afa sü, zalü akoro di gbü sikipi te Yesu ena adu akoro tete na. ² Angü siti wü kpara fa gbü sikipi ne eyi sü. Wü gara ewü le wü bu wü de. Wüh le 'duwa ngü ka-wü, da eo to wü 'buru teka angbü emaka jiase. Wü gara ewü ngbü da ecu ngü wü, da egbo nga iri wü, da esoko wü bu wü. Wü gara ewü je ngü ka wü wü de. Wüh fi nga wü kpara te ewü ngbü ele ta-ngü te ewü kpah de. Wüh ngbü fi bü da emere wü ngü, te siti gbü jia Me fa sü. ³ Wüh le wü müri wü agba wü kpah de. Wüh wu cinga kpara 'buru de. Wü gara ewü ngbü emala ambala'ba eküte wü bu wü. Gara ewü je riri 'buru 'buru de. Gara ewü de müri gü. Wüh le amere züka ngü nda-wü kü de. ⁴ Wü gara ewü ngbü efiti wü bu wü de mani, eto fü wü vügü. Wü gara ewü de wü müri kögö-nzö. Wü gara ngbü e'du ngü wü, gü ba, "Ani de kpeke kpara! Ani wu ngü fa sü!" Wüh le ngü ka Me nda-wü 'buru 'buru de. Wüh le ka-wü 'duwa ngü de füh kotö ne, angü ah ngbü eto tadu fü ewü me-ye. ⁵ Gara ewü gü ba, "Ani de kpara ka Me," amba maguma ewü ka-ye 'basu 'basu. Ngü ka-ewü ti de ngü ka Me nda de, angü wüh wu wazi Me nda-wü kpah de. Mü di ekpe wü kpara la akpe. Mü mere e adi engbü de ewü de.

⁶ Gara siti wü kpara baka e la eyi ladü, te ewü ngbü efiti wü kpara. Angü wüh ngbü eko ro agba wü kpara, fü ewü akpo da emala töndö riri fü ewü, gü ba, ah de riri ka Me. Fü ewü afiti wü kpara, te ewü wu ngü mbi mbi de, baka wü gara wü rüse, te ewü ngbü ekpe cürü, teka mere bi *siti ngü ka-wü. Angü wazi ewü teka ace siti ngü ka-wü la di nda ma. ⁷ Wüh ngbü ta ele awu zu ngü ka Me, amba wüh ti awu ngü la de, teka siti riri la. ⁸ Wü kpara te ewü ngbü efiti wü kpara de töndö riri de bala, wüh de wü vügü ka Me, kpah baka Yane ake Yambere tane, te ewü di

[†] 2:19 2:19 Mü ena amaka ngü la gbü Namba 16:5.

* 3:8 3:8 Wü Yane ake Yambere, wüh de wü müri talara, ta te ewü mere tima fü mere miri ka Ezepepo. Mü ena amaka ngü la gbü buku ka Gogo ka wü Yisarayele 7:10-13.

de wü vügü ka *Müse ne.* Wü müürü fiti la ngbü eo fingangü ka-wü 'buru teka siti ngü. Te di bala, Me ena ato kuru te ewü ato. ⁹ Fü ngü ka-ewü anza. Angü wü kpara 'buru ena awu töndö ngü ka-ewü la, kphah baka e ta te wüh wu töndö ngü ka wü Yane ake Yambere ne.

Dene ngü te ma emala fü mü, mü lala eküte ngari Me

¹⁰⁻¹¹ De-mü Timoteyo, ah le de mü rü kpekepe kphah baka ra. Mü wu ngü te ma ngbü emere ne 'buru kpo. Mü wu ngü te ma ngbü erü wü kpara di kphah kpo. Mü wu eyi, gü ba, ma ngbü eo jia ra fi bü teka tima ka Me. Mü wu kphah kpo, gü ba, ma ngbü eo to ra 'buru teka ngü ka Me, fü ra angbü kphah ele wü bu ra, de maguma ra 'buru. Mü wu mere cinga te wüh to eküte ra, teka ngü ka Yesu Kurisito ne, kphah kpo. Mü wu kphah kpo, gü ba, gbü wü ngü la 'buru, ma rü fi bü kpekepe. Mü wu ngü ta te mere ra agbü Atiyokiya ake İkonioy bete Lisitera ne kphah kpo.† Amba fü Miri Yesu ayia aküwa ra gbü wü ngü la 'buru. ¹² Angü wü kpara 'buru te ewü le afa nga Yesu Kurisito, wüh ena amaka cinga füh kotö ne amaka bala. ¹³ Amba siti riri ka wü müürü fiti la ena anü fi bü kpa engagira nü. Wüh ena angbü fi bü da efiti wü kpara, da eo maguma wü teka siti riri ka-wü la.

¹⁴ Timoteyo, enga ra, te di bala ne, ah le de mü rü kpekepe, da elala eküte zu ngari Yesu, te mü je gömō a ne. Mü wu eyi, gü ba, ah de zu ngü fanü fanü, angü a mala ngü la fü mü me-a. ¹⁵ Kphah bala, mü maka ngü la kphah eyi gbü *Ngari Me, angü mü kpo da etanga ngü la kü gügü, gbü jaji te mü. Angü Ngari Me la, ah de kpeke ngü, te gü tamu kaje eyi fü mü, teka fü mü ato maguma mü fü Yesu Kurisito, fü mü aküwa. ¹⁶ Angü wü kpara te ewü ba Ngari Me la, wüh ba ngü la ta 'buru esa ri Me. Me to ngü la fü nih, teka arü nih de züka riri, kphah teka agü tamu wü *siti ngü ka-nih fü nih, kphah teka ato wazi fü nih, de nih di emere wü ngü, te ena areke gbü jia Me di. ¹⁷ Te ah bala, te mü de kpara ka Me la, ah le de mü di etanga Ngari Me la, teka fü mü awu züka ngü, de te ngbü ereke gbü jia Me. Fü mü amaka kphah wazi, teka amere tima la di.

4

Dene ngü te mü ena amere sidi nga ra

¹ Timoteyo, enga ra, ma ngbü emala ngü ne fü mü kpekepe, gbü jia Me ake Yesu *Kurisito, te di de Miri ka-nih ne,

angü sikipi ka dudu kaka eyi gbamari. Ah ena adu akoro füh kotö ne, teka aye süka ngü ka wü kpara 'buru. ² Te di bala, ah le de mü di fi bü emala ngari Yesu fü wü kpara gbü wü sikipi 'buru. Anga te ewü le aje ngü la kphah de la, mü mere e ace da emala fü ewü nda-mü de. Mü di erü wü kpara te ewü ngbü emere *siti ngü, de wüh ce ngü la asidi. Mü di kphah eto wazi fü mene ewü, de te ewü ngbü emere züka ngü ne, teka de wüh nü de ngü la kpa engagira nü. Mü di erü ewü 'buru ferrre, de züka maguma mü. ³ Mü mere e ace da eri ewü de, angü te gara, mere bi wü kpara ena ace da eje riri ka Me, angü gümü siti wü ngü ena angbü eke ewü. Te di bala, wüh ena angbü egiri wü gara kpara, te ewü ena angbü eri ani de wü gara riri kpikepi ye kpikepi ye, te ena atü kpini de mene ngü, te ani ngbü ele. ⁴ Wüh ena ace zu *ngari Me, fü ewü adu ka-wü, adi eda güje wü, teka adi eje töndö wü lara ngü. ⁵ Amba de-mü, Timoteyo, ah le de mü ngbü nda-mü da emere tima ka Me gbü züka kaje, ba e te Me to fü mü. Mü di emala ngari Yesu fü wü kpara, anga te wüh to cinga te mü la, mü mere e akpe cürü de. Mü rü kpekepe, de mü ai maguma mü baka kpeke kpara.

⁶ Dela ngü te ma le amala fü mü enatikine, teka fü mü adi emere fütanga kö ra. Angü sikipi ka kpi ka-ra eyi gbamari. Ah de sikipi te wü vügü ena amorö ra tete, teka ngü ka Yesu Kurisito. ⁷ Ma wu eyi, gü ba, tima ta te Miri Yesu to fere ne, ma mere nza eyi 'buru, baka kpara te mere kalafiyi* ka mere woro, de wazi ye 'buru. Ma o to ra 'buru teka amere gü de wü vügü ka Miri Yesu, fü ra ayia afa ewü, angü ma lala fi bü fütanga Miri Yesu. ⁸ Te di bala ne, ma wu eyi kpo, gü ba, Miri Yesu ngbü eyi nzo, teka ato takpa fere teka tima la. Gbü sikipi te Yesu ena adu akoro tete ba Mere Miri, ah ena agbo nga iri ra, angü engu wu kpo, gü ba, ma mere züka ngü eyi gbü jia ni. Angü Yesu de züka Miri, te wü da eye süka ngü ereke areke. Ah ena ato züka ngü kphah bala fü gara wü kpara 'buru, te ewü o jia wü teka sikipi, te engu ena adu akoro tete na ne.

Dene adu ngü ka-ra

⁹ Timoteyo, enga ra, mü giri kaje teka fü mü akoro kpara ra kpakine kere. ¹⁰ Angü ma kpakine bü kpikepi ra. Ma tima gara wü bu ra ne eyi 'buru agbü wü gara sü. Keresekeke nü sü eyi agbü Galatiya. Tito nü sü nda-ye agbü Dalümatiya. Nda Dema, ah ce ra ta nda eyi gügü, teka gümü

† 3:10-11 3:10-11 Mü ena amaka ngü la gbü Müürü Tima 13-14. * 4:7 4:7 Kalafiyi anga kulakula de wutu ka woro, te wü kpara ngbü ego woro, teka akoro te enga gina, anga akoro gina kpara gbü woro la.

e de fūh kotō ne. Ah tadu ka-ye eyi agba ye, agbū Tesalonika. ¹¹ Kpara te di ede ra kpakine, ah ka-ye bū de Luka kpikpi ye. Te di bala ne, mü koro kere, de mü za Marako zalü, mü koro de engu akine, angü engu de kpeke kpara te ena ale ta-ngü te ra, gbü tima ka-ra ne. ¹² Ma tima Tikiko kpah eyi agbū Efeso. ¹³ Te mü te ekoro la, de mü za mere bongo ka-ra, ta te ma ce kpa gba Karapo agbū Tüürüwa kpala ne mini. Mü za kpah wü köcökpa ka-ra, mü koro di 'buru, bete mene ewü te ewü ba gbü wü konü ne.

¹⁴⁻¹⁵ Amba mü ceka te-mü mbi teka ngü ka Alekezanda, mürü boro la, angü ah mere ra ta esiti. Mü ceka 'be! E-wu neh da, engu ena aga, "Ni mere mü kpah bala," angü engu ka-ye de mere siti vügü ka tima ka-nih! Amba Me ladü! Ah wu ngü kaka-na la 'buru kpo!

¹⁶ Ta, gbü gina sīkpī te wūh ī ra engagira mere Miri ka *Rüma tete na ne, kpara biringbō te le ta-ngü te ra gbü ngü la, nda ma. Wūh kpe ka-wü 'buru, ce ra bū kpikpi ra bala. Ah le de Me ce siti ngü ka-ewü la asidi. ¹⁷ Ma rü ta engagira mere Miri ka wü Rüma la bū kpikpi ra. Fū Me ato wazi fere me-ye, teka fū ra amala ngari Yesu Kurisito fū mere miri la, de mere bi wü kpara, te ewü di gbü nganga na la 'buru. Fū Me aküwa ra esaka mere miri la, ba kpara te küwa gömō kami. ¹⁸ Te di bala ne, ma wu eyi kpo, ga, Me ena aküwa ra fi bala esüka wü siti ngü 'buru. Fū engu aza ra, akoro di kpa gbü sü ka-ye, kpa gbü kpī kpala. Ma gbo nga iri Me teka ngü la! Ah di bala!

¹⁹ Ma to mandī fū Akuwila ake Pīrisīla, be kpah te wü kpara agba Ünēsiforo. ²⁰⁻²¹ Wü Wubulu, Pudene, Linü, bete Kalodiya, abe kpah te wü *kpara ka Yesu de agbū Rüma de kpakine ne, tima kpah mandī ka-wü fū mü. Mü giri da mü, de mü koro kpakine mba kere, angü te ah koro eyi gbü bigü la, kaje ena adi ma teka siti wege gbü jia ngu. Ma ngbü kpakine bū kpikpi ra, angü ta te ma yia teka akoro kpa gbü Rüma kpakine ne, Eraseto ngbü ka-ye ciki gbü Korinito kpala. Ma ce Torofimü, o agbū Mileto de keke te ye.

²² Me di de mü, Timoteyo, be kpah te gara wü kpara ka Yesu Kurisito 'buru, da ele ta-ngü te yi de *züka maguma ye.

Dela adu ngü ka-ra. De-ra Pawülü.

Dene köcökpa te Pawülü ba fü Tito Tito

Masere si-ngü

Dene köcökpa te Pawülü ba fü Tito. Ngü ka Tito ta bane. Engu ka-ye de enga *Giriki, ah de enga *Yisarayeale baka Pawülü nda de. (Mü ena amaka ngü la gbü Galatīya 2:3). Ah ba e te Tito to ta maguma ye fü Yesu, esaka Pawülü, o Pawülü ngbü ta emala ngari Yesu, endondoro di ne, angü Pawülü i engu, gü ba "Ye ni". (Mü ena amaka ngü la gbü Tito 1:4). Tekä ngü la, fü Tito ngbü ta ele ta-ngü te Pawülü efa sü, gbü tima ka Me. Fü ewü adi endoro ake di zalü akoro agbü Yerüsalema. (Mü ena amaka ngü la gbü Galatīya 2:1-5). Fü Pawülü akpo da etima engu agbü wü gara sü, teka adi eceka wü kpara, te ewü le ngü ka Yesu gömō ni, Pawülü ne, kpaH teka de ah di edu, emala nga ewü fü ni. Anga gara ne, ah ngbü etima Tito de köcökpa, te engu ba de züka riri fü wü kpara la.

Gbü gara sikipi, fü wü Pawülü ayia de wü Tito, anü akoro agbü gara sü de iri ye Kürete. Fü ewü ngbü kpala, da emala ngari Yesu fü wü kpara. Fü Pawülü ayia ace Tito ciki sela, ayia anü agbü gara sü. Pawülü ba köcökpa ne fü Tito, o engu di fi bü agbü Kürete, angü Pawülü ce engu kpala, teka amere gara tima te lakı sidi nga ye.

Si-ngü ka köcökpa te Pawülü ba fü Tito ne, ah ngbü esere ngü ka tima te ni, Pawülü, to esaka Tito.

Sapita 1 Wü ngü te di teka wü *kovo gbü tima ka Me, te Tito ena afe ewü, teka aceka kpi fütanga wü bu wü ne
Sapita 2 Wü riri teka gara wü kpara, te ewü ngbü emere tima ka Me, baka wü mere kpara, bete wü mere wü rüse, wü mada, de wü ka'dörö, anga wü labi

Sapita 3 Riri fü wü kpara ka Me 'buru

Dene mandı ka Pawülü fü Tito

¹ Wayi bala Tito, de-ra Pawülü, ma to köcökpa ne fü mü me-ra, angü ma de labi ka Me, ma kpaH de *mürü tima ka Yesu *Kurisito. Me tima ra me-ye teka ato wazi fü wü kpara ka-ye te engu fe ewü, de ma di kpaH eri ewü de zu ngari Me, teka fü ewü adi emere züka ngü gbü jia ni. Me. ² KpaH bala, teka de wüH o jia wü teka *küküwa ka fi mere badi ne. Angü Me mala ta eyi bala gügü, gü ba, "Ni ena aküwa wü kpara, te ewü le ngü ka-ni." Ah fanü, engu ti asu wu de. ³ Te di bala, gbü sikipi te Me fe ne, ah gü tamu ngü ka-ye la

eyi fü wü kpara, angü engu de *E-küwanih. Dela si-ngü te engu o ra mürü tima ka-ye tete, teka de ma di emala ngü ka-ni la fü wü kpara ne.

⁴ Tito engä ra, ma tima köcökpa ne fü mü me-ra, mü zu de ye ra, te nih to maguma nih eyi 'buru fü Me. Wö nih, Me, ake Yesu Kurisito E-küwanih, di de mü, de wüH to gu ngü fü mü, de *züka maguma wü.

Dene si-ngü te ma ce mü tete agbü Kürete

⁵ Engä ra, ah le de mü ngbü fi bü agbü Kürete kpala, kpaH ba e te ma mala fü mü, teka fü mü areke gara wü ngü te lakı sidi nga ra. Ah le de mü fe wü *kovo, ao gbü tima ka Me, te nga nzö wü köti de kpala 'buru.

⁶ Wü kpara te mü ena afe ewü ne, ah le de wüH di wü kpara, de te ewü mere *siti ngü de, te wü kpara 'buru ngbü eceka ewü ba züka wü kpara. Ah le mene kpara te ngbü engbü ka-ye nzö ake wara ye biringbö. Ah le de wü jaji ka-ewü di de züka wü kpara, te ewü to maguma wü eyi fü Me, da eje riri ka wü wü wü. WüH di kpaH de wü jaji, te wü kpara ti amala siti ngü eküte ewü de. ⁷ Angü te kpara de kovo gbü tima ka Me la, ah le de engu mere siti ngü de. Ah mere e adi de mürü kögö-nzö kpaH de. Ah mere e amere gü kpaH de. Ah mere e adi eküya de fi de. Ah wü nga kpaH de. Ah ngbü de gümü jiasse kpaH de. ⁸ Ah di de kpara te ngbü emere ngü wü ngba ereke areke, da ele ta-ngü te ewü. Ah di ele duu züka ngü. Ah di kpaH de züka fingängü gbü nzö ye, da emere züka ngü gbü jia Me. Ah di de kpara te etüka te-ye atüka, teka wü gümü ngü ka küte. ⁹ Ah di de kpara te elala te zu ngü ka Me, baka te nih ri engu di. Angü ah ti eyi ari wü bu ye, de ngü ka Me mbi mbi mbi, da eto wazi fü ewü. Ah ti kpaH eyi aza ngü gömō wü kpara, de te ewü ngbü ega yiki teka ngü ka Me ne.

¹⁰ Angü mere bi wü mürü kögö-nzö ladü, te ewü ngbü efiti wü bu wü de töndö ngü ka-wü la. Gara wü di enga *Yisarayeale ngbü emere ngü la bala, gü ba, "Ah le de wü *kpara ka Yesu di emere gele ka-ani." ¹¹ Ah le de mü tata ewü de siti riri ka-ewü la, angü wüH ngbü efiti mere bi wü kpara, kpaH de wü wü rüse, de wü jaji mini. WüH ngbü esiti fingängü ka wü kpara de töndö riri ka-wü la, teka de ani di emaka jiasse esaka ewü. ¹² Tane, gara mere kpara esüka wü kpara ka Kürete mala, gü ba, "Gbü wü sikipi 'buru, wü kpara ka Kürete ka-wü de wü mürü wu. WüH baka siti wü nü, angü wüH de wü mürü töndö, wüH kpaH de wü mürü maguma, te ewü o fingängü ka-wü

nzò teka zü-e.”¹³ Ngü kaka la, ah fanü. Tekä ngü la, ah le de mü ri ewü kpekpeke, teka fü ewü azoro lö Yesu de kpa wü 'basu, kpah da eje ngü kaka.¹⁴ Tekä ngü te wü di enga Yisarayeke ngbü emala, gü ba, “Ah le de yi di emere gele ka-ani” ne, mü mala fü ewü, gü ba, “Dela ka-ye töndö ngü!” Angü wü kpara te ewü ngbü emala ngü de bala, wüh le ngü ka Yesu nda-wü de.¹⁵ Angü, te mü to maguma mü eyi fü Yesu la, e füh kotö ne, te ena asiti mü gbü jia Me, nda ma. Ngü ka-mü ena adi 'buru mbi gbü jia Me. Amba, te mü to maguma mü fü Yesu de la, mü ti amere züka ngbü gbü jia Me nda-mü kpah de, angü fingangü ka-mü ka-ye fi bü esiti.¹⁶ Ah kpah bala, fü wü kpara, te ewü ngbü eri wü bu wü de siti riri ka gele ka wü Yisarayeke la. Angü wüh gü ba, “Ani wu ngü ka Me eyi 'buru.” Amba de, ah ka-ye de wu! Wüh ka-wü de wü mürü kögö-nzö, te ewü je ngü ka Me de. Te di bala, Me ena ato kuru te ewu te gara, teka siti ngü ka-ewü la, ato.

2

Dene zu ngü ka Me, te mü ena adi eri wü kpara di

¹ Amba nda-mü, Tito, ah le de mü ri wü kpara, de wüh ngbü mbi, adi emere züka wü ngü, baka ngari Me, te a ri mü di.² Mü mala fü wü cögbörö kpara, de wüh di de kpeke wü kpara, de züka fingangü gbü nzö wü. Wüh zoro Yesu de kpa wü 'basu, da eje ngü kaka, kpah da ele wü bu wü de maguma wü 'buru. Wüh di etüka te-wü, da ei maguma wü gö! gbü ngü ka Me.

³⁻⁴ Mü mala kpah fü wü cögbörö würüse, de wüh ngbü baka züka wü kpara ka Me. Wüh mere e angbü wü mürü ambala'ba de. Wüh o to wü teka fi kpah de. Wüh di kpah eri wü mada, teka de wüh di emere wü ngü 'buru ba e te ti gbü jia wü kpara, kpah da ele wü wati wü, de wü jaji ka-wü.⁵ Wüh di eri ewü, de wüh di emere tima agba wü mbi mbi mbi, de züka fingangü gbü nzö wü, da eje riri ka wü wati wü. Angü, te wüh je ngü ne de la, wü kpara ena asiti iri wü *kpara ka Yesu, teka ngü ka-ewü la.

⁶ Kpah bala, mü ri wü ka 'dörö kpekpeke, de wüh ngbü de züka fingangü gbü nzö wü, da etüka te-wü teka siti gümü wü e de füh kotö ne.⁷ Amba zu teka mü, Tito, ah le de mü ngbü fi bü da emere züka ngü, te ngbü ereke gbü jia Me. Angü wü kpara ena awu da emere züka ngü, teka ngü ka-mü la. Mü ngbü kpekpeke, de züka fingangü gbü nzö mü. Fü mü angbü kpah da eri wü kpara de zu ngari Me, de maguma mü 'buru biringbö.⁸ Mü

ri wü kpara de züka riri, teka avi jia wü vügü, de te ewü le ngü ka Me de ne, angü wüh ena agiri kaje teka amala siti ngü eküte nih ma.

⁹ Mü mala ngü fü wü labi kpekpeke, de wüh di eje riri ka wü mere kpara ka-wü. Wüh di emere wü ngü 'buru te ena adi ereke gbü jia ewü. Wüh mere e alügü siti ngü fü mere kpara ka-wü de.¹⁰ Wüh mere e adi ezi e ka wü mere kpara ka-wü kpah de. Wüh di emere tima ka-wü kpekpeke de maguma wü 'buru. Te wüh mere bala la, wü kpara ena angbü egbo nga Me, E-küwa-nih ne, teka ngü ka-ewü la.

¹¹ Ma mala ngü la fü mü kükürü de, angü Me gara tamu *züka maguma ye eyi fü wü kpara 'buru, gbü ngü ka Yesu *Kurisito.¹² Dela ngü te Me mere fü nih, teka fü nih amaka wazi, ace ngü ka kögö-nzö, bete ngü ka gümü wü e de füh kotö ne. Fü nih adu angbü de züka fingangü gbü nzö nih, teka adi emere wü ngü 'buru mbi, o nih di la de jia nih füh kotö ne.¹³ Nih ngbü emere wü ngü de bala, kükürü de, angü nih ngbü eci nga züka tadu, te nih ena amaka te gara, gbü sikipi te Miri ka-nih Yesu Kurisito ena adu akoro tete. Nih gbo nga iri na de koko de karayi! Angü engu de Mere Me, ah kpah de *E-küwa-nih.¹⁴ Engu to ta te-ye, akpi teka aküwa nih, teka afü nih, ao wü di ye tete, teka fü nih ace *siti ngü ka-nih, adu ao to nih 'buru teka adi emere züka wü ngü füh kotö sene.

¹⁵ Dela wü ngü te mü ena angbü emala cu de wazi mü 'buru, angü wüh o mü eyi mere *kovo gbü nzö wü kpara ka Me. De mü di eto wazi fü mene wü kpara, te ewü ngbü emere züka ngü ne. Mene ewü, te ewü ngbü emere siti ngü ne, de mü di eri ewü kpekpeke, teka fü ewü ace wü ngü la ace. De mü ngbü de jia mü te mü, teka fü wü kpara awu züka ngü ka-mü, angü wüh ena afala mü.

3

Dene kpah gara ngü, te mü ena adi eri wü kpara ka Me di

¹ Tito, enga ra, ah le de mü ri wü kpara ka-mü de ngü ne mbi mbi mbi, teka fü ewü angbü de züka fingangü gbü nzö wü, da ecu ngü wü mere kpara ka-wü, de wü miri, kpah da eje riri ka-ewü mbi mbi mbi. Ah le de wüh reke te-wü, teka adi emere wü züka ngü fü wü kpara 'buru.² Wüh mere e adi emala siti ngü eküte kpara de. Wüh ngbü zii, de gu ngü ka Me emaguma wü. Wüh ngbü kpah de gu maguma esüka wü de wü kpara 'buru.

³ Angü nih ta 'buru wü töndö kpara, kpah baka wü bu nih füh kotö ne. Nih ta de wü mürü kögö-nzö. Nih ngbü ta edürü te wü siti kaje ka-nih kpikpi ye kpikpi ye. Angü ku ka *siti ngü i nih ta me-ye, teka gümü wü e de füh kotö ne. Nih ta wü mürü siti maguma, wü mürü makpü, angü nih ngbü ta ekpü te-nih de wü kpara 'buru. ⁴ Amba, o nih ngbü ta emere wü siti ngü la bala, fü Me ayia amere züka ngü fü nih, angü ah tima Yesu *Kurisito teka aküwa nih, teka mere lele ka-ye. ⁵ Nih efi nda-nih, gü ba, Me küwa nih teka züka tima te nih ngbü emere? A'a, ah bala de. Me küwa nih 'duwa teka *züka maguma ye. Angü cinga nih ri tete fa sü. Fü engu aküwa nih, azürü nih gbü wü siti ngü ka-nih, adu abí nih kpah toto gbü wazi ka *Nzila Wazi ye. ⁶ Angü engu to Nzila Wazi ye fü nih reke areke, teka ngü ka Yesu Kurisito, *E-küwa-nih ne. ⁷ Me to Nzila Wazi ye fü nih bala, teka afü nih wü di ye tete, teka fü nih amaka *küküwa te gara agbü kpí kpala. Angü ah fü nih me-ye züka wü kpara ka-ye tete, teka züka maguma ye.

⁸ Dela kpeke riri fanü fanü. Ma ele de mü ri wü kpara ka Me di kpekpeke, teka fü ewü ato te-wü 'buru, angbü emere wü züka ngü, te ena areke wü bu wü. Dela züka riri te ti eyi ato wazi fü wü kpara 'buru.

⁹ Amba teka wü mürü kögö-nzö, te ewü ngbü efüfü *ngari Me, da edünda de ngü ka gele ka wü *Yisarayele, kpah de iri wü kundu wü de ta gügü ne, mü mere e angbü ega yiki de ewü de, angü ngü la ti ale ta-ngü te kpara nda de. Dela ka-ye töndö ngü kükürü. ¹⁰ Angü, te kpara kpo da esiti nzö wü bu ye de gara riri te di kpikpi ye la, ah le de mü ri engu ari. Te engu le aje ngü la de la, de mü du ri engu du 'basu. Te engu je ngü nda fi de la, de mü ce engu ace. ¹¹ Angü nih wu eyi fanü, gü ba, kpara de bala ce züka ngari Me eyi gügü, teka angbü emere siti wü ngü ka-ye ladru. Te di bala, ah kolo liya ka-ye eyi de tete ye, angü Me wu siti ngü kaka la eyi.

Dene adu ngü ka-ra

¹² Ma ena atima Aritema, anga Tikiko kpaka mü la. Te kpara la koro eyi la, mü mere e ayiri kpala de. Mü yia kere, anü amaka ra agbü Nìkopolì. Angü ma ngbü efi ta teka angbü kpala, zalü akoro di gbü fe ka bala.

¹³ Tekä ngü ka Zena* ake Apolo ne, te ewü le ayia anü agbü gara sü la, de mü le ta-ngü te ewü reke areke, teka nünü ka-ewü la. ¹⁴ Kpah bala, ah le de mü mala fü

wü kpara ka-nih, de wüh o to wü teka adi ele ta-ngü te wü mürü cinga. Wüh mere e angbü mürü basa de.

¹⁵ Wü kpara 'buru te a di de ewü sene to mandí fü mü. Mü to mandí ka-ra fü wü kpara de te ewü to maguma wü fü Me de kpala 'buru. Me di de yi kpala 'buru, da eto wazi fü yi, de *züka maguma ye.

Dela adu ngü ka-ra. De-ra Pawülü.

* 3:13 3:13 Zena ta de mürü riri.

Dene köcökpa te Pawülü ba fū Filemüna Filemüna

Masere si-ngü

Filemüna ta de kpara ka Kolosayî, te to maguma ye fū Yesu teka *ngari Me te engu je gömō Pawülü. Fū ah angbü emere tima ka Me agbü Kolosayî kpala. Engu ta de labî ka-ye, de irî ye Ünēsîmü, te zi wü e kaka, kpe di. Fütanga ngü la, fū Ünēsîmü anü amaka te-ye ake Pawülü. Wüh wu tîne de, anga wüh maka te-wü ake Pawülü neh baye baye, angü gbü wü sîkpi la, Pawülü ta ka-ye agbü ku. Amba ngü te nih wu, ah ka-ye de ngü te Ünēsîmü fū maguma ye, teka ngü ka Yesu te engu je gömō Pawülü. Fū ah adu akoro *kpara ka Yesu. Fū ah akpo da ele ta-ngü te Pawülü agbü ku kpala. Fū Pawülü amaka fîngangü teka alügü engu kpaka Filemüna, angü engu de labî kaka. Tekan ngü la, fū Pawülü aba köcökpa ne, teka ayi-ta Filemüna, de ah ce *siti ngü ka Ünēsîmü. Ah du, ah za engu mürü tete, de ah di tîne baka labî kaka de. Angü ta gbü wü re la, te labî kpe akpe la, ah esiti. Te wüh du maka engu la, wüh ena ato mere siti kuru tete, afa sü. Amba gbü ngü la, Pawülü yi-ta Filemüna de ah boro siti ngü ka Ünēsîmü, de ah za engu tîne cu baka engu ni ye guvu Yesu *Kurisito.

Dene köcökpa ka Pawülü fū Filemüna

¹ Wayi bala Filemüna, ah de-ra Pawülü, kpara te wüh i gbü ku teka ngü ka Yesu *Kurisito ne. A ba köcökpa fū mü me-a, ake engu ni nih Timoteyo. A to mandî fū mü falade, angü mü de züka awuba a, de te nih ngbü emere tima ka Me tundu de nih ma ne. ² A to kphah mandî fū tangbase ka-nih Apiya, ake engu ni nih Arikipo, te di de kiri nih, marajümüya, gbü ngü ka Miri Yesu ne. A to kphah mandî fū wü *kpara ka Yesu Kurisito, te ewü ngbü ebiti te-wü kpa gba mü de kpala ne. ³ Wö nih, Me, ake Yesu *Kurisito di de yi, de wüh to gu ngü fū yi, de *züka maguma wü.

⁴ Enga wüna Filemüna, gbü wü sîkpi 'buru, ma ngbü egbo nga irî Me, da eku gba fefe, teka ngü ka-mü. Ma ngbü egbo nga irî Me teka mü kükürü de, ⁵ angü ma ngbü eje nga mü, gü ba, "Mü ngbü ele wü kpara ka Me de maguma mü 'buru, da ele ta-ngü te ewü, kphah da elala eküte ngü ka Miri Yesu." ⁶ Ma ngbü eku gba fū Me, de ah to wazi fū mü, de mü ngbü fi bü da elala eküte Miri Yesu, kphah da ewu wü züka ngü 'buru te Miri Yesu ngbü eto fū nih. Miri

Yesu to kphah wazi fū mü, teka fū mü adi ele ta-ngü di te wü bu mü, wü kpara ka Me 'buru, teka fū ewü adi egbo nga irî Yesu Kurisito gbü ngü la. ⁷ Enga wüna, ma ngbü de mere tadu teka ngü ka lele ka-mü la, angü mü le wü bu mü fa sü, da ele ta-ngü te ewü. Ngü ka-mü la to mere wazi eyi fere.

⁸⁻⁹ Te di bala, engu wüna Filemüna, teka ngü ka züka lele ka-mü ne, ma ngbü enda'ba te-ra fū mü teka gara ngü te to mere fîngangü fere. Ah de ngü ka-ra de, ah de ngü ka ye ra. Ma ti ta eyi amala ngü la fū mü kpekpeke de wazi baka rîrî, angü ma de mere kpara ka-mü gbü tima ka Yesu Kurisito. Amba ma le bala de. Ma di ngbü eyi-ta mü teka ngü la de gu maguma. Ah de-ra Pawülü, te di de mere kpara, te wüh o tîtine gbü ku teka ngü ka Yesu Kurisito ne, ma ngbü eku gba fū mü me-ra. ¹⁰ Wayi, ma ngbü enda'ba te-ra fū mü teka ngü ka ye ra, te ma bi engu gbü ngü ka Yesu Kurisito, o ra di gbü ku ne. Angü ah to maguma ye eyi fū Me, teka *ngari Me te engu je gömō ra. Irî na de Ünēsîmü. ¹¹ Ah de Ünēsîmü, ta te di de labî ka-mü, fū engu akpe esaka mü teka ngü ka zi ne. Ma ngbü eku gba fū mü, de mü ce *siti ngü kaka. Fanü fanü, engu fū mü ta baka tondö kpara. Amba tîtine, ah fū maguma ye eyi. Engu tîne de kpeke kpara, te ena ale ta-ngü te nih ake nih ma.

¹² Tîtine, ma ngbü etima engu, elügü kpaka mü kpala. Ah le fū mü ale engu, aza alügü gbü mürü, angü maguma ra le engu cu fa sü. ¹³ Ma ngbü ta ele de engu ngbü kpaka ra, ale ta-ngü te ra da mü, gbü ku sene. Angü ma wu kpo, gü ba, te mü ena adi ta ladü sene la, de bane mü ena ale ta-ngü te ra me-mü. ¹⁴ Amba, baka te engu di de labî ka-mü ne, ma ti atîrî engu sene de wazi de. Ah le de mü fi ngü la me-mü, de züka maguma, fū mü adu atima engu, alügü fere. ¹⁵ Ma ngbü efi, gü ba, Me ye süka yi ake Ünēsîmü, anga neh teka fū engu aje ngü ka Miri Yesu, adu ato maguma ye fefe ya? Angü engu dürü esaka mü teka sîkpi mba cogbo. Amba enatikine mü ena adu amaka engu ba to engu ni mü, fi badi. ¹⁶ Angü engu ta de labî ka-mü. Amba tîtine engu tîne eyi engu ni mü guvu Yesu Kurisito. Nda-ra, ma le engu fa sü. Ah ena adi mbi te mü ena adu ale engu kphah afa sü, angü engu de kpara ka-mü. Engu tîne eyi kphah de kpara ka Miri ka-nih Yesu Kurisito.

¹⁷ Te di bala, te mü le ra baka züka engu ni mü la, ah le fū mü ace siti ngü ka Ünēsîmü, fū mü adu aza engu baka mürü, kphah baka te mü ngbü eza ra mürü mü tete ne. ¹⁸ Te di bala, teka siti ngü de ta te engu

mere fü mü, anga engu za ta jiase ka-mü, zi wü e ka-mü la, de mü kuru ngü la 'buru gbü nzö ra. Ma ena alügü na wü e la fü mü me-ra. ¹⁹ De-ra Pawülü, ma ba ngü la cu de kpa ra, gü ba, ma ena alügü na wü e la me-ra. Mü fi nga ngü la mbi mbi mbi, angü nda-ra e kpah ladü gbü nga mü. E engu la, ah de *küküwa, de te mü maka esaka ra guvu Yesu ne.

²⁰ Wayi bala, enga wüna, ma ngbü enda'ba te-ra fü mü, de mü di emere züka ngü fere, teka ngü ka Miri ka-nih Yesu Kurisito. Te mü ngbü emere bala la, ah ena ato mere zo emaguma ra afa sü.

²¹ Ma ba köcökpa ne fü mü, Filemüna, angü ma wu eyi awu, gü ba, mü ti eyi aza Ünessimü baka zu enga ni mü, baka te ma mala fü mü ne. Fanü fanü, ma wu kpo, gü ba, mü ena amere ngü la afa sü di.

²² Adu ngü te ma ele amala fü mü, ah bane. Mü reke sü ka rara fere, mü o nzo, angü ma ngbü efi, gü ba, Me ena aje gba ka-yi aje, fü engu adu alügü ra kpaka yi kpala.

²³ Enga ni nih Epafürasi, de te a di ake di gbü ku kpakine, teka ngü ka Yesu Kurisito ne, to kpah mandü fü mü.

²⁴ Wü gara wü bu ra, wü kpara ka tima ka Yesu, wü Marako, Arisitarekü, Dema, bete Luka, wüh to kpah mandü fü mü.

²⁵ Miri ka-nih Yesu Kurisito ngbü de yi, de ah ato gu ngü fü yi de *züka maguma ye.

Dela adu ngü ka-ra. De-ra Pawülü.

Dene kóćkpa fū wū Ebere Ebere

Masere si-ngü

Kpara te ba kóćkpa ne, nih je ñiri na nda-nih de. Ah ba kóćkpa ne fū wū *kpara ka Yesu, amba sü ta te wū kpara la ngbü engbü tete ne, nih ti awu nda-nih kpah de, angü wüh sere nda-wü de. Ngü te nih ti eyi awu tungü ewü, ah bü teka te wüh di de wü di enga *Yisaraye, te wüh fū ngü ka-wü teka ale ngü ka Yesu. Dela si-ngü te nih gü ñri kóćkpa ne tete, gü ba, wū *Ebere. Angü dela kpah gara ñri wü di enga Yisaraye.

Nih wu kpah eyi, gü ba, wū vügu to ta mere cinga te ewü, teka ngü ka Yesu *Kurisito. Te di bala, gara ewü ngbü efi, gü ba, anga te ani ena ace ngü ka Yesu, adu ari gbü diri gele ka-ani, wū Yisaraye la, e-wu neh da, wū vügu ena adu ace da embü ani. Amba kpara te ba kóćkpa ne, mala fū ewü, gü ba, wü rü kpekpeke gbü cinga la, de wü mere e ace ngü ka Yesu de. Engu gü ba, ngü ka Yesu ka-ye memere, fa ngü ka ñiri ka gele ka wü di enga Yisaraye la. Fū ah amala ngü fū wü kpara la kpekpeke, gü ba, ah le de wüh mere e, ace ngü ka Yesu, teka adu angbü emere gele ka wü kundu wü ne, ñine de. Ngü la kpah fū nih de enatikine ne.

Gbü diri gele ka wü di enga Yisaraye, wüh gü ba, tima ka wü *Arona de wü kundu ye de mere kpeke tima. Wüh ngbü ei ewü, gü ba, wü *mürü gele. Timaka-ewü ka-ye adi ewa nü fū Me, teka adi ereke ngü eze ngbü wü kpara de wü Me di. Wüh ngbü ta ei Arona, gü ba, mere kovo ka wü mürü gele. Ngü kaka-na nye nda wü bu ye, te ewü eyiti e ne 'buru ka. Engu me-ye kpikpi ye de mene kpara te ngbü eri gbü mene guvu *Kambü ka Me agbü Yerüsalema, te wü kpara ri gbügbü na 'daaa de ne. Ah ngbü eri kpala du biri gbü re biringbö, de ngüte nü esaka ye, teka anü areke ngü eze ngbü wü kpara de wü Me, de ngüte nü la. Fütanga kpi ka Arona, fū ewü adu afe gara süka wü di ye na biringbö, teka amere tima ka mere kovo ka wü mürü gele la. Fū ngü la angbü engbü fi bü bala teka mere bi wü re.

Kpara te ba kóćkpa ne, gü ba, titine ah le de nih wu awu, gü ba, Yesu fū ngü la eyi. Angü kpara te ngbü ereke ngü eze ngbü nih de wü Me titine ne, ah ka-ye de Yesu. Ngüte, de te Yesu reke ngü di eze ngbü nih de wü Me ne, ah cu de *ngüngüte, te tókó kpa füh *rü gbegete, teka aküwa nih ne,

ah de ngüte wü nü nda ñine de. Fū Yesu ayia aza ngüte ye la, ago di agbü kpi, teka areke ngü te di eze ngbü nih de wü Me ne di. Te di bala, enatikine Yesu ka-ye ladü agbü kpi, ede kpókpó ka Me kpala.

Wü ngü te mü ena amaka gbü kóćkpa ka wü Ebere ne, wüh dene.

Sapita 1:1-3 Ngü ka Yesu ga fa nda wü kpara 'buru

Sapita 1:4-2:18 Wazi Yesu fa nda wü *malayika ka Me ka

Sapita 3:1-4:13 Ngü ka Yesu fa nda *Müse ka

Sapita 4:14-7:28 Yesu de mere mürü gele ka-nih

Sapita 8:1-9:28 Yesu de mere vüngüte ka-nih

Sapita 10:1-31 Yesu reke ngü te di eze ngbü nih de wü Me cu de ngüte ye

Sapita 11:1-13:25 Ah le de nih le ngü ka Yesu de maguma nih biringbö

Dene ngü ka Yesu, te ga fa nda wü kpara 'buru

¹ Wü di enga wüna, ta gügü, Me ngbü emala ngü fū wü kundu nih enda ngangá gömö bi wü *mürü dofo ka-ye. Ah ngbü ta esere ngü la fū ewü cükü'daye cükü'daye, enü di kpa engagira nü bala. ² Titine gbü wü adu re ne, Me mala ngü ka-ye eyi 'buru mbölö fū nih gömö Yesu *Kurisito, angü Yesu de Ye Me. Ta te Me mere kpi bete kotó tete, ah to tima la esaka Yesu, de engu mere tima la me-ye. Fū Me aza engu, ao kpah Mere Miri gbü nzó wü ngü 'buru, agbü kpi, zalü füh kotó sene 'buru. ³ Yesu ka-ye de Ye Me, ah kpah gegege baka Wö ye. Engu sere mere wazi ka Me fū nih, teka de wü kpara 'buru di egbo nga ñri Me. Te di bala, Yesu, Ye Me, ngbü eto wazi gbü wü ngü agbü kpi, akoro di füh kotó sene, 'buru me-ye, teka de wü ngü ka-ewü ngbü 'buru 'be. Yesu kpi teka aküwa nih gbü wü *siti ngü ka-nih. Fū engu ayia ago agbü kpi, angbü kpala ede kpókpó ka Mere Me, te di de mere mürü wazi ne.

Dene ngü ka wazi Yesu, te fa nda wü malayika ka Me ka

⁴ Te Me o Ye ye baka Mere Miri bala ne, fū ah ayia ato mere wazi fefe na, afa nda wü *malayika ka-ye la di ka. Te di bala, ah le de wü kpara 'buru di egbo nga ñri Yesu, afa nda wü malayika di ka.

⁵ Gara malayika ladü, te Me mala ngü fefe, gü ba, "Ye de ye ni"? Ah nda ma! Me mala ngü bala, duu teka Yesu, gü ba, "Ye de Ye ni. Enatikine, ni sere ngü la eyi fū wü kpara 'buru, gü ba, ni de Wö ye."*

* 1:5 1:5 Mü ena amaka ngü la gbü Ci ka wü Davidi 2:7.

Me mala kpah ngü teka Yesu, gömō gara *mürü dofo ka-ye, gü ba, "Ni fefe baka Wō ye na, engu nda-ye baka Ye ni."[†] 6 Me mala nga sīkpi de te ni ena adu atima biri Ye ni, de ah koro fūh kotō ne, gömō gara mürü dofo, gü ba, "Ah le de wū malayika ka-ni 'buru di egbo nganga na."

7 Dene ngü te Me mala teka wū malayika ka-ye, gü ba, "Wū malayika ka-ni, wūh de wū mürü kitima ka-ni, Me, te ni ngbü etima ewü, adi emere tima ka-ni. Ni ngbü kpah efü ewü gbü wege, efü wū gara baka te-wa, teka de wūh di emere tima ka-ni."[‡] 8 Amba dene ngü te Me mala fü Yesu Kurisito, gü ba, "Wayi, Ye ni, ni to wazi ni eyi fü ye, fü ye angbü baka ni, Me. Ye kpah de Mere Miri. Ye ena angbü gbü nzō wū kpara ka-ye fi mere badi. Ye ena angbü emere ngü ka-ewü ereke areke. 9 Ye ngbü ele de wū kpara 'buru di emere zūka ngü. Angü ye le siti ngü nda de. Dela si-ngü de te ni, Me, fe ye miri tete. Fü ni ato wazi fü ye, afa nda wū bu ye 'buru. Te wū kpara wu bala, fü ewü angbü ecu ngü de de mere tadu!"[§]

10 Wūh ba kpah ngü gbü *Ngari Me teka Yesu, Ye Me, gü ba, "Wayi Me, ye de mere kpara! Ta gügü te enga gina, ye reke kpi bete tō me-ye. 11 Ngü ka kotō ne bete ngü ka kpi, ena anza ka-wü 'buru anza, baka diri bongo, amba ngü ka-ye ti anza nda kü de. 12 Ye ena aza ewü, agara agara baka bongo, fü ngü ka-ewü anza. Amba ngü ka-ye ena angbü ka-ye fi da ye. Ye ti akpi nda-ye de."^{*}

13 Me mala kpah gara ngü gömō gara *mürü dofo tūngü Ye ye, gü ba, "Ye ngbü gbü kokpa ka-ni sene! Angü ni fe ye, o eyi Mere Miri! Te di bala, ye ena angbü gbü nzō wū kpara 'buru! Angü ni ena ao wū vügü ka-ye 'buru esa lö ye!"[†] Amba Me mala la ngü bala, fü biri gara malayika ka-ye nda kü de!

14 Wū *malayika nda-wü neh wū da? Wūh de wū mürü kitima ka Me, te ewü ngbü emere tima kaka. Fü Me angbü etima ewü teka adi eto wazi fü nih, wū kpara ka-ye, de te Me le aküwa ewü ne.

2

Dene kpeke ngü teka küküwa guvu Yesu

1 Wū di enga wūna, baka te ngü ka Yesu di de mere kpeke ngü de bala ne, ah le de nih ceka te-nih 'be, da erü kpekepeke gbü ngü ka Yesu. Angü ta te enga gina, wū *mürü tima ka Yesu sere zu ngü teka

Yesu eyi fü nih. To nih mere e airi teka ngü la de, angü nih ena adürü te kaje ka Me. 2 Ta gügü, Me to ta *Riri ka-ye fü *Müse, gömō wū *malayika ka-ye. Riri la ta de enga ngü nda de. Mene wū kpara te ewü le ta adi eje Riri la de ne, fü wū mere *kovo ka Me angbü eto kuru te ewü fanü fanü! 3-4 Amba ngü ka *küküwa, te Miri Yesu koro di ne, fa Riri ka Müse ka. Angü Miri Yesu sere ngü ka küküwa la cu me-ye fü wū mürü tima ka-ye. Sidi nga ngü la, fü wū mürü tima kaka, te ewü je ngü la gögömō ne, ayia tīne, akoro amala ngü la fü nih. Fü Me ayia asere kpah fü nih, gü ba, "Ngü ka Yesu la, ah ka-ye de zu ngü fanü fanü," angü Me to wazi fü wū *kpara ka Yesu la me-ye, de wūh di eküwa wū mürü keke, da emere wū gara ngü ka talara di. Fü Me ayia kpah ato wazi *Nzila Wazi ye fü wū kpara ka-ye 'buru, de te engu fe ewü ne, baka te engu le. Te di bala, te nih lala eküte ngü ka Yesu de la, nih ena aküwa baye baye? Nih ti aküwa de! Me ena ato kuru ato te nih fanü fanü!

Dene ngü teka Yesu, te kpi, aküwa nih ne

5 Me mala fü nih gbü *Ngari ye, gü ba, "Te gara, ni ena adu amere to kotō bete to kpi." Te Me mere ngü la eyi bala la, kpara te Me ena adu ao ewü, baka wū mere kpara gbü nzō wū ngü fūh to kotō la, ena adi neh wū da? Ah ena adi de wū *malayika? A'a, ah bala de! 6 Angü Me gü ba, "Ni ena ao nih, wū kpara de fūh kotō ne, baka wū mere kpara gbü sīkpi engu la," baka ta te wūh ba gbü Ngari Me, gü ba, "Öö Me, ani ka-ani de tōndō wū kpara kükürü, amba ye ngbü ele ani cu de maguma ye. Komō ani gu ka ngü la eyi agu! 7 Angü ta gügü, wazi ani koro baka nda wū malayika ka-ye la de. Amba tītine ye to mere wazi eyi fü ani. Ye o ani eyi baka wū miri, 8 teka de ani ngbü gbü nzō wū ngü fūh kotō ne 'buru."^{*} Dela ngü ta te wūh ba gbü Ngari Me. Te ah bala la, wū e 'buru ena angbü esa wazi ka-nih. Wū di enga wūna, tītine nih ngbü eyi baka wū miri, gbü nzō wū e fūh kotō ne 'buru, fanü? Ah bala de! Te di bala, ngü la neh baye? 9 Wū di enga wūna, wūh ba ngü la teka ngü ka Yesu. Angü, ta te Yesu koro fūh kotō sene, Me o engu baka kükürü kpara, baka nih bane. O Yesu di ta la de wū nih fūh kotō sene ne, wazi küküte ka-ye kpah bü baka nda-nih. Fü engu ayia azü cinga, akpi. Amba tītine, Me du o engu eyi

[†] 1:5 1:5 Mü ena amaka ngü la gbü 2 Samüwele 7:14. [‡] 1:7 1:7 Mü ena amaka ngü la gbü Ci ka wü Davidi 104:4.

[§] 1:9 1:9 Mü ena amaka ngü la gbü Ci ka wü Davidi 45:6-7. ^{*} 1:12 1:12 Mü ena amaka ngü la gbü Ci ka wü Davidi

102:25-27. [†] 1:13 1:13 Mü ena amaka ngü la gbü Ci ka wü Davidi 110:1. ^{*} 2:8 2:8 Mü ena amaka ngü la gbü

Ci ka wü Davidi 8:4-6.

baka Mere Miri, teka de wü kpara 'buru di ecu ngüngü na! Kükürü de, angü Yesu kpi teka aküwa nih, angü Me le me-ye bala, teka *züka maguma ye.

¹⁰ Me le nih, wü kpara, cu de maguma ye. Fü engu ayia atima Yesu, de ah koro, ah küwa nih. Kpah bala, teka de ah za nih, koro de nih agbü sü ka Me, agbü kpi kpala, baka wü di Me. Te di bala, Me le me-ye de Yesu zü cinga bala füh kotö sene, teka de engu tüka te-ye, de ah maka wazi gbü cinga la, teka ale ta-ngü di te nih. Dela ngü te Me le me-ye. Ah ti ati bala, angü Me de kpara te mere kotö bete kpi 'buru me-ye, fü ah angbü kpah eceka kpi fütanga wü e 'buru me-ye. ¹¹ Yesu küwa nih me-ye, fü ah adu afü nih, akoro di wü di Me. Yesu mere ngü la bala, angü engu fü te-ye, za küte baka nih, wü kpara füh kotö ne. Dela si-ngü te engu ngbü ei nih tete, gü ba, "Nih de wü di engu ni ni ne." Angü nih koro eyi, wü di engu ni ye na fanü. ¹² Nih ti eyi awu, gü ba, Yesu, Ye Me, ngbü ei nih, wü di engu ni ye. Kükürü de, angü engu mala fü Wö ye, gü ba, "Wö ni, Me, ni ena amala ngü ka-ye fü wü di engu ni ni, fü ani adi egbo nga iri ye tundu de ewü."† ¹³ Wüh ba kpah gara ngü te Yesu mala, gü ba, "Ni ena ato maguma ni 'buru fü Me. Ani ngbü eyi kpakine gbü ngü ka Me, tundu de wü di engu ni, te engu to fü ni ne."‡

¹⁴ Wü di engu wüna, de-nih, te wüh ngbü ei nih wü di engu ni ye Yesu ne, nih ka-nih de wü kpara ka kotö ne. Dela si-ngü te Yesu fü te-ye baka nih, wü kpara ka kotö ne, teka de ni kpi, teka aküwa nih. Kükürü de, angü kpi ka Yesu fa wazi *Satana, te di de miri ka kpi ne, ka. ¹⁵ De-nih, wü kpara füh kotö ne, te nih di la ladü de jia nih ne, nih ngbü engbü 'buru de mere cürü, teka ngü ka kpi. Amba Yesu kpi eyi, teka aküwa nih gbü cürü ka kpi la. ¹⁶ Yesu kpi teka aküwa wü da? Tek a aküwa wü *malayika ka Me? Ah bala de! Yesu kpi teka aküwa mene nih, de te nih to maguma nih eyi fü Me, baka nda kundü nih, *Abarayama ne. ¹⁷ Dela si-ngü te Yesu fü te-ye, za küte gegege baka nda-nih, wü di engu ni ye, teka aküwa nih. Te di bala, Yesu wu cinga nih kpo. Angü engu de gina engu ni nih, te ngbü ereke ngü eze ngü nih de wü Me, teka de Me boro wü *siti ngü ka-nih. ¹⁸ Yesu ngbü ewu cinga nih, angü engu zü ta mere cinga fa sü. Kpah bala, Satana re ta mamaguma ma! Te di bala, te Satana le are maguma nih la, Yesu ena ato wazi fü nih, arü di kpekepeke.

3

Dene ngü ka Yesu, te fa nda Müse ka

¹ Wü di engu wüna, nih 'buru de wü kpara ka Me, angü Me i nih me-ye. Te di bala ne, ah le de nih fi ngü ka Yesu mbi mbi mbi, de nih di ezoro engu, da elala tete, de kpa nih 'basu mini. Angü Yesu de kpara te Me tima engu, teka akoro, ari nih de zu ngari Me. Yesu kpah de gina engu ni nih, mere *mürü gele te ngbü ereke ngü eze ngü nih de wü Me. ² Te di bala, ngü ka Yesu fa nda *Müse afa, angü Me fe ta Yesu teka tima la me-ye. Fü engu angbü emere tima la de maguma ye biringbö. Müse ta kpah de mürü tima ka Me ta gügü. Engu ngbü ta kpah emere tima ka Me de maguma ye biringbö, da eri wü di engu *Yisaraye. ³ Baka te ngü ka Yesu fa nda Müse ka ne, nih ena angbü ecu neh ngü da? Nih ena acu ngü mere kpara? Anga nih ena acu ngü wü di ye, de te engu bi ne? Ah le de yi fi nga ngü la mbi mbi mbi. Enatikine, Yesu me-ye baka mere kpara la, angü engu fü nih eyi wü di Me tete. Te di bala, ah le de nih di ecu ngü Yesu. ⁴ Mere bi nga nzö wü kpara füh kotö ne 'buru, kundü wü ka-ye kpikpi ye kpikpi ye. Amba kpara de te o wü kundü wü la neh da? Ah de Me de? ⁵ Müse mere ta tima ka Me reke areke. Engu ngbü ta eri wü di engu Yisaraye de ngü ka Me. Fü engu angbü ta esere fü ewü wü ngü, de te Me ena amere te gara ne. Amba Müse o wü di engu Yisaraye la me-ye nda de. Me o ewü ka-ye me-ye. ⁶ Amba teka ngü ka Yesu *Kurisito, engu ka-ye de Ye Me. Me fe engu, o baka mere Wö nih, te bi nih 'buru me-ye. Baka te nih to maguma nih eyi fü Yesu ne, ah le de nih rü kpekepeke, fü nih ao jia nih bü nzö eküküte. Te di bala, engu ena afü nih, fü nih angbü tine wü di Me fanü fanü.

Dene ngü te nih ena adi ele ngü ka Yesu de maguma nih biringbö

⁷ Wü di engu wüna, yi fi la nga ngü, te wüh ba gbü *Ngari Me gbü wazi ka *Nzila Wazi Me ne. Ngü la gü ba, "Dene ngü te ni, Me, le amala fü wü enatikine, gü ba, 'Ah le de wü le ngü ka-ni, Me, de maguma wü biringbö. ⁸ Wü mere e angbü emere ngü, baka nda wü kundü wü ta gügü, ne de, angü wüh ka-wü ta de wü mürü kögö-nzö. Baka ta te wüh ngbü ejiji de wü *Müse kpa etü gü ne, wüh le ta adi eje riri ka-ni, Me, nda-wü de. ⁹ Angü wüh ngbü ta ere maguma ni, teka awu, anga ni ti eyi ale ta-ngü te ani fanü ya? Mere bi wü kpekepeke ngü, te ni ngbü mere fü ewü, nda nganga anda, teka wü re teke 'basu (40) ne, ngü la ri gbü nzö ewü

† 2:12 2:12 Mü ena amaka ngü la gbü Ci ka wü Davidi 22:22.

Yisaya 8:17-18.

‡ 2:13 2:13 Mü ena amaka ngü la gbü buku ka

'buru 'buru nda de. ¹⁰ Teka ngü la, fü maguma ni ayia ta anzu eküte ewü. Ni le ewü ta de, angü wüh le aje ngü ka-ni nda-wü de. Wüh le riri ka-ni kphah de. ¹¹ Baka ta te maguma ni nzu eküte ewü ne, fü ni ayia akina ewü, gü ba, "Wü ti ari gbü züka sü, te ni reke tüngü wü ne, de." ' *^{*} Dela ngü ta te Me mala fü wü di engä *Yisarayeale, teka kögö-nzö ka-ewü la.

¹² Wü di engä wüna, yi mere e angbü de maguma yi 'basu 'basu ne de. Yi mere e ace ngü ka Me de, angü engu ka-ye de mere mürü wazi. ¹³ Ah le de yi ngbü kphah da efi nga wü bu yi, da eto wazi fü ewü, teka fü ewü adi erü kpekpeke, da elala fi bü gbü nga Yesu. Yi mere ngü la te nga sikipi 'buru, o yi di la ezükü. Angü te maguma yi ngbü 'basu 'basu ngü ka Me la, nzö yi ena akoro ka-ye kpekpeke, fü yi adürü te kaje ka Me ka. ¹⁴ Angü ah le de nih di elala eküte Yesu gö gö gö! Nih di emere ngü la fi bü bala, baka ngü ta te nih to maguma nih tete fefe na ne, zalü koro di gbü sikipi te nih ena akpi tete. Te nih ngbü emere ngü la bala la, nih ena angbü wü *kpara ka Yesu Kurisito fanü fanü. ¹⁵ Dela si-ngü te Me mala fü nih enatikine, gü ba, "Ah le de nih le ngü kani, Me, de maguma nih biringbö ne. Nih mere e, amere ngü baka nda wü kundu nih tane de, angü wüh ka-wü ta de wü mürü kögö-nzö."

¹⁶ Wü mürü kögö-nzö, ta te ewü le aje ngü ka Me de ne, ah de wü da? Ah de wü *ganzü kpara, te ewü wu ngü ka Me ta la de? Ah bala de! Ah zu de wü gina wü di engä *Yisarayeale, te Me tima *Müse, teka aküwa ewü esaka wü kpara ka *Ezepeto ne. Fü Müse amere bi wü ngü ka talara gbü jia ewü. Amba maguma ewü ngbü kaye fi bü 'basu 'basu. ¹⁷ Wüh le aje ngü ka Me de, neh teka wü re fe? Wüh le aje ngü ka Me de, teka wü re teke 'basu (40). Teka ngü la, fü Me ayia afü kürufe ye fü ewü. Dela si-ngü de te wüh kpi ta tete 'buru kpa etü gü, fü ewü ati ewü ciki kpala ne. Wüh nü koro gbü sü, ta te Me reke fü ewü ne, nda-wü tine de. ¹⁸ Angü Me yia ta, kina ewü, gü ba, "Wü ti anü akoro gbü züka sü, te ni, Me, reke tüngü wü ne de." Me kina ta ewü bala kükürü de, angü güje ewü ma. ¹⁹ Dela si-ngü te wü gina wü di engä Yisarayeale la nü koro tete na agbü züka sü, ta te Me reke fü ewü, de ne, angü wüh ta de wü mürü kögö-nzö. Wüh le aje ngü ka Me ta nda-wü de.

4

¹ Wü di engä wüna, kphah bala Me mala ngü eyi fü nih, gü ba, "Ni reke züka sü eyi fü nih, teka fü nih anü afe te-nih tete kpala." Ah le de nih ceka te-nih 'be, angü te nih ngbü kphah de kögö-nzö baka nda wü kundu nih tane la, nih ti ari agbü züka sü la nda-nih kphah de. ² Wü kundu nih la wu ngü ka Me kpo, wüh je ngü ka Me kphah eyi. Amba wüh küwa de, angü wüh le ta ngü ka Me de maguma wü biringbö nda-wü de. Te di bala, ah le de nih ceka te-nih 'be, angü te nih le ngü ka Me de maguma nih biringbö de la, nih ti ari gbü züka sü ka Me nda-nih kphah de. ³ Fanü fanü, te nih le ngü ka Me de maguma nih biringbö la, nih ti eyi akoro gbü züka sü ka Me la. Amba mene wü kpara de maguma wü 'basu 'basu ne, wüh ti akoro agbü sü la nda-wü de, kphah baka ngü ta te Me mala, gü ba, "Ni kina wü mürü kögö-nzö la eyi, gü ba, "Wü ti ari gbü züka sü ka-ni de, ne." Me mala ngü la ta bala teka ne? Ah mala bala, angü ah reke sü la nza la de? Ah bala nda de! Ah reke sü la nza ta eyi gügü, o engu ngbü eo kotö ne. ⁴ Nih ti eyi awu ngü la, angü wüh ba ngü la eyi gbü *Ngari Me, gü ba, "Me mere kpi bete kotö de wü e 'buru, gbü wü sikipi ma'diya. Fü ah adu afe te-ye gbü sikipi lorozi." *⁵⁻⁶ Me reke ta sü teka wü kundu nih eyi, ce nzo. Amba wüh koro ta gbü sü la nda-wü de, angü wüh le ngü ka Me, ta te wüh ngbü emala fü ewü ne, nda-wü de. Dela si-ngü te Me mala ngü tete na, gü ba, "Wü ti ari agbü züka sü ka-ni de," ne.† Sü la, ah kaye fi ladü, zalü akoro enatikine. Me ngbü la fi bü ele wü kpara ka-ye, de wüh ri koro kpala.

⁷ Nih ti kphah eyi awu, gü ba, Me ngbü ele de nih ri agbü züka sü ka-ni la. Kükürü de, angü sidi nga mere bi wü re, *Nzila Wazi Me mala ta ngü la eyi, gömö Miri *Davidi, gü ba, "Dene ngü te ni, Me, le amala fü nih enatikine, gü ba 'Nih le ngü kani de maguma nih biringbö. Nih mere e adi emere ngü baka nda wü kundu nih tane de, angü wüh ka-wü ta wü mürü kögö-nzö.' "‡ Miri Davidi ba ngü la gbü *Ngari Me, sidi nga mere bi wü re, te Me kina wü kundu nih la tete na. Te di bala, ah le de nih wu awu, gü ba, du sikipi la ladü fü nih, teka fü nih akoro agbü züka sü ka Me la. ⁸ Angü, ta sidi nga kpi ka *Müse, *Yosuwa za wü di engä *Yisarayeale, akoro di me-ye, agbü tö ka wü *Kanana. Yi ngbü efi nda-yi, gü ba, tö ka Kanana la de züka sü, te Me mala ngangä ne? Ah bala de!

* 3:11 3:11 Mü ena amaka ngü la gbü Ci ka wü Davidi 95:7-11.

* 4:4 4:4 Mü ena amaka ngü la gbü Gina Ngü 2:2.

† 4:5-6 4:5-6 Mü ena amaka ngü la gbü wü Ci ka wü Davidi 95:11.

‡ 4:7 4:7 Mü ena amaka ngü la gbü wü Ci ka

wü Davidi 95:7-8.

Te ah ena adi ta bala la, Davidi du ba wü ngü la, sidi nga bi wü re, fütanga kpi ka Yosuwa, neh teka ne? ⁹ Te di bala, nih ti eyi anü ari agbü sü ka Me kpala, afe te-nih, baka ta te Me fe te-ye, gbü sikipi ka lerozi ne. ¹⁰ Gbü sikipi te yi ena agbü tete agbü sü ka Me, yi ena afe te-yi kphah bala, angü wü tima ka-yi nza eyi 'buru, baka ta te Me fe te-ye, te engu mere kpi ake kotö nza tete na ne. ¹¹ Te di bala, ah le de nih to te-nih 'buru 'buru teka ale ngü ka Me, teka fü nih ari agbü züka sü ka Me la. Nih mere e amere ngü ka kögö-nzö, baka nda wü kundu nih ta la, nda-nih de!

¹² Wü di enga wüna, ah le de nih le ngü ka Me de maguma nih biringbö. Nih ce ngü ka maguma 'basu 'basu asidi, angü nih ti afiti Me de. Ngü ka Me ka-ye baka mere maguruma te dere fa sü, te ti eyi awa so de biki gbü ye, akolo gbö! Angü Me ti eyi aceka kpi kpa emaguma nih kpörö! awu wü fingangü ka-nih kphah 'buru. ¹³ Kpara biringbö te ti afiti Me nda ma! Me wu wü ngü 'buru kpo! Ah wu fingangü ka-nih kphah kpo. Nih ti awo ngü gbü jia Me nda-nih de. Ah le de nih le ngü ka Me de maguma nih biringbö. Angü te gara nih ena arü engagira Me, fü engu aye süka ngü ka-nih mbi mbi mbi, te nga wü ngü ka-nih 'buru, te nih ngbü emere ne.

Dene ngü ka Yesu te di baka mere müürü gele,

te reke ngü ezengba nih de wü Me fanü

¹⁴ Wü di enga wüna, te nih gü ba, nih zu de wü *kpara ka Yesu la, ah le de nih zoro ngü ka Yesu de kpa nih 'basu. Angü Yesu de mere *mürü gele ka-nih, ah kphah de Ye Me. Engu tadu eyi kpa gbü kpi, kpaka Me, angü engu reke ngü ezengba nih de wü Me, nza eyi 'buru fi mere badi. ¹⁵ Ngü ka Yesu reke fa nda wü gara müürü gele 'buru. Yesu wu kpo, gü ba, wazi nih teka arü di kpekepeke gbü wü re-ngü ka *Satana nda ma. Wü mere bi ngü te Satana le afiti nih di ne, ah wu kphah kpo. Kükürü de, angü baka ta te Yesu di la füh kotö sene ne, Satana re engu ta kphah eyi, de wü ngü la 'buru, baka te engu ngbü ere nih di de enatikine ne. Ah re engu bima, teka mere bi wü sikipi, amba Yesu le wü siti ngü kaka-na la nda de. ¹⁶ Te di bala ne, de nih mere e akpe cürü de, nih i maguma nih ai, fü nih anü kpaka Miri Yesu. Kükürü de, angü engu ngbü ele nih de *züka maguma ye. Te Satana ngbü ere nih la, nih yi-ta Yesu. Engu ena awu cinga nih, fü ah ato wazi fü nih.

5

¹ Gbü gele ka-nih, ka wü di enga *Yisaraye,le, wü cögbörö *mürü gele ka Me ka-wü kphah bü kükürü wü kpara ka kotö ne. Wüh de wü kundu ye *Arona. Fü Me ayia afe ewü ta teka tima la. Te di bala, tima ka mere müürü gele neh ene? Ah ngbü ewete wü nü, da eto fü Me, teka *siti ngü ka wü kpara. ² Wü müürü gele ka wü di enga Yisaraye la, wüh ta wü kpara ka kotö ne, kphah baka nih. Te di bala, wüh ngbü ta ewu cinga wü kpara, te ewü ngbü emere siti ngü gbü iri-to ne. Kphah bala, wüh wu da eri wü kpara, te ewü ngbü edürü ngü ne, ferrre kpo. Angü wü kpara te ewü ngbü edürü ngü la, wüh wu ta ngü ka Me mbi mbi nda-wü de. ³ Baka te müürü gele la di ta kphah bü kpara ka kotö, te ngbü kphah edürü ngü baka nih ne, fü ah ngbü kphah ewa nü, eto fü Me, teka nda-ye siti ngü.

⁴ Tekka tima ka mere müürü gele, kpara ti ao te-ye mere müürü gele de tete-ye nda de. Me ngbü efe kpara teka tima la me-ye, angü dela ka-ye mere kpeke tima. Baka ta gügü te Me fe Arona, enga ni ye *Müse, ao engu mere müürü gele tete na ne. Engu me-ye de mere kundu ye wü müürü gele ka wü di enga Yisaraye la 'buru. ⁵ Yesu *Kurisito o te-ye mere müürü gele de tete-ye nda kphah de. Me fe engu teka tima la kphah me-ye, gü ba, "Ye zu de Ye ni. Enatikine ni sere ye eyi fü wü kpara 'buru, gü ba, ni de Wö ye, ni to tima la fü ye me-ni." ⁶ Me mala kphah gara ngü fü Ye ye, gü ba, "De-ni, Me, ni o ye me-ni mere müürü gele baka Miri Meleke-Sadiki. Ye ena angbü ereke ngü ezengba ni de wü kpara ka-ni, fi mere badi."†

⁷ Baka ta te Yesu di la füh kotö sene ne, ah yi-ta Me kpekepeke de mere ri ye, da eku gba de ngura, angü engu wu kpo, gü ba, Me ena aküwa ni gbü wazi ka kpi. Te di bala, fü Me ayia aje gba kaka-na, ayia ato wazi fefe na, teka de ah rü di kpekepeke. Angü Yesu o to ye 'buru teka amere tima te Me to fefe na ne. ⁸⁻⁹ Yesu de Ye Me fanü. Enatikine engu koro eyi mere kpeke kpara, baka te Wö ye na, Me, ngbü ele, angü engu ngbü eje riri ka Me ereke areke. Me le me-ye de engu zü cinga baka e dela, teka fü engu amaka wazi, amere ngü ka-ni, Me, anza di 'buru. Te di bala, wazi Yesu fa sü. Te nih le ngü kaka-na la, engu ti eyi aküwa nih fi mere badi. ¹⁰ Dela si-ngü de te Me o Yesu tete na mere müürü gele, teka adi ereke ngü ezengba nih, de wü ye, baka Meleke-Sadiki tane.‡

* 5:5 5:5 Mü ena amaka ngü la gbü Ci ka wü Davidi 2:7. † 5:6 5:6 Mü ena amaka ngü la gbü Ci ka wü Davidi 110:4. ‡ 5:10 5:10 Mü ena amaka ngü ka Miri Meleke-Sadiki gbü Gina Ngü 14:18-20.

Dene ngü te ma le amala fü yi, gü ba, yi mere e ace ngü ka Me de

¹¹ Wü di enga wüna, ngü ka Yesu, te reke ngü di eze ngba nih de wü Me ne, ah ka-ye de mere kpeke ngü. Ma le ta amala mere bi wü ngü fü yi teka ngü la, amba ngü la ti ari gbü nzö yi kere nda de. ¹² Yi le ngü ka Yesu tane eyi gügü. A ri yi eyi de ngü ka Yesu teka bi wü re. Amba ngü la ri gbü nzö yi fi de, neh teka ne? Fingangü ka-a gü ba, yi ena akpo ta dene me-yi, angbü erü wü bu yi de ngü ka Yesu. Amba yi di ngbü fi bü ele de wü gara kpapa di eri ani de mene wü ngü, ta te a ri yi di eyi ne kpah toto, neh teka ne? Yi le la angbü fi bü baka wü vürü jaji, te wüh ngbü ela ngu-ka? Ah le de yi zü kümü de so, angü yi ndri eyi. ¹³ Ah fanü, te wüh yaka vürü mbarase la, ah ti azü kümü la de, ah ena angbü ela ka-ye bü ngu-ka. Amba sidi nga re bata, anga bala, te mbarase la ngbü fi bü ela ka, ah le azü kümü de la, dela züka ngü? Teka ngü ka-yi, ah kpah bala. ¹⁴ A fi ta, gü ba, yi wu ngü ka Me eyi, yi je sisi na reke dene kpah eyi mbi mbi mbi. Yi ga koro dene kpah eyi kpekpeke gbü ngü ka Me, fü yi adi emere wü ngü te ena areke gbü jia Me. Amba yi ka-yi la fi baka wü vürü jaji? Te di bala, ah le de yi o to yi 'buru, teka aje si-ngü ka Me areke areke mbi mbi mbi, teka fü yi awu mene ngü, te ngbü ereke gbü jia Me ne. Te yi mere bala la, yi ena amaka wazi teka adi emere ngü ka Me di. Yi ena awu kpah mene wü ngü, te di esiti gbü jia Me ne. Fü Me angbü eto wazi fü yi, teka fü yi ace wü *siti ngü la.

6

¹⁻³ Wü di enga wüna, gina wü ngü ka Me, te di baka ngu-ka te vürü mbarase ngbü ela ne, a ri yi de ngü la eyi gügü, gü ba, "Ah le de yi fü maguma yi, fü yi ace *siti ngü ka-yi. Ah le de yi le ngü ka Yesu Kurisito de maguma yi biringbö. Ah le de wüh to *babatiza fü yi, fü ewü ao kpa wü gbü nzö yi, teka fü *Nzila Wazi Me akoro angbü emaguma yi. Te yi le ngü ka Yesu la, Yesu Kurisito ena aküwa yi, fü ah azükü yi gbü kpi, adu ato to küte fü yi. Amba, te yi le ngü ka Yesu de la, Me ena ato kuru te yi fi mere badi." Dela wü ngü ka Me ta te a ri yi di, yi wu ngü la bala de? Wayi, ah le de nih nü enü de ngü ka Me kpa engagira nü, teka fü Me aceka nih baka kpeke wü kpapa ka-ye.

⁴⁻⁶ Wü di enga wüna, nih nü enü de ngü ka Me kpa engagira nü. Yi mere e adu kpa sidi de, angü yi ena adürü te kaje ka Me. Yi ngbü efi neh ngü ne? Me ü jia yi eyi. Ah to wazi ka Nzila Wazi ye kpah eyi fü yi. Fü

yi angbü eje ngü kaka-na de mere tadu. Yi wu kpah wü kpeke ngü, de te wü *kpapa ka Yesu ngbü emere, de wazi ka Nzila Wazi Me, ne eyi. Te di bala, te mü fü te-mü, du ce ngü ka Yesu asidi la, mü ena adu afü maguma mü kpah toto, neh baye baye? Ngü la ti nda de! Angü mü fü kürüfe mü eyi fü Yesu! Wü kpapa ena angbü esiti iri Yesu teka ngü ka-mü la! Ah ge baka te mü du bere Yesu eküte *rü gbegete kpah toto!

⁷ Wü di enga wüna, yi fi nga ngü la mbi mbi mbi. Te mü ru e kpa gbü yi ka-mü, fü agö angbü eli fefeh na ereke areke la, wü e de te mü ru gbü yi la ena akö areke areke. Fü ewü aga kpah mbi. Fü mü amaka mere bi zü-e gbü yi la. Te di bala, mü ena angbü de mere tadu, gü ba, Me to wazi gbü yi kani eyi fanü. ⁸ Amba, te mü ru e gbü yi ka-mü, fü wü fu wü ti, de wü siti gü adu akö gbü yi ka-mü me-wü la, mü ena angbü de tadu? Mü ti angbü de tadu de! Mü ena angbü de cinga, fü mü adu ace yi la asidi, ah bala de? Wü gara ne, mü ena ato wa gbü yi la, fü ah acuru asidi! Te di bala, ah le de yi reke ngü ka-yi, teka fü yi angbü baka züka yi la. Yi mere e angbü baka mene yi te di esiti ne de!

⁹ Wü di enga wüna, ma ngbü emala wü kpeke ngü la fü yi, angü ma le yi fa sü. Amba ma wu eyi, gü ba, ngü ka-yi baka fu wü ti, de wü siti gü ne, nda de. Angü ma wu eyi, gü ba, yi ngbü elala fi bü sidi nga Yesu. Engu ena aküwa yi aküwa fanü fanü. ¹⁰ Me ka-ye de züka miri. Engu ngbü eto züka ngü fü wü kpapa te nga züka ngü ka-wü, de te ewü ngbü emere ne. Ah wu kpo, gü ba, yi ngbü ele ngü ka-ni de maguma yi 'buru. Angü engu wu kpah kpo, ga, yi ngbü ele ta-ngü te wü kpapa kani efa sü, zalü akoro dene, yi ngbü la fi bü emere bala. Te di bala ne, engu ena ato züka ngü fü yi ato, te gara fanü, toto ti airi te yi nda de. ¹¹ Ah le de yi o to yi teka anü de ngü ka Yesu la kpa engagira nü. Ma ngbü ele de yi di eo jia yi 'buru eküte Yesu, zalü akoro di gbü sikpi, te yi ena ago akoro kpakaka na, agbü züka sü ka Me agbü kpi. ¹² Ah le fü yi ato te-yi, ale ngü ka Me de maguma yi biringbö. Yi mere ngü kpah baka nda diri wü kpapa ka Me ta gügü ne. Te cinga ngbü emere yi la, yi i maguma yi ai, fü yi arü kpekpeke. Te di bala, yi ena amaka wü züka ngü agbü kpi, baka te Me mala nganga fü nih ne.

Dene ngü te ma le amala fü yi, gü ba,

ngü te Me mala, ah ti ace de

¹³⁻¹⁴ Wü di enga wüna, yi fi la nga ngü ka *Abarayama. Me mala ngü fü Abarayama ta gügü, gü ba, "Ni ena ato wazi fü ye,

* 6:13-14 6:13-14 Mü ena amaka ngü la gbü Gina Ngü 22:17.

teka de wü kundu ye sibi fa sü.* Fü Me ayia akina kina te iri ye, gü ba, "Ni ena amere ngü la bala, fanü fanü," kükürü de, angü gara kpara te fa Me nda ma. Tek a ngü la, fü Me ayia akina kina la te iri ye.¹⁵ Fü Abarayama ayia agu maguma ye, teka züka ngü de te Me mala fü ye ne. Fü ah angbü da ecí nga ngü la. Fü Me ayia amere züka ngü la fefe na bala fanü.

¹⁶ Wü di eng a wüna, te gara kpara mala ngü, kina te-ye te iri Me, gü ba, "Ni ena amere gara ngü ka-ni bane," wü bu ye na ena afi, gü ba, engu ngbü esu dela wu? A'a, ah bala de! Wüh ena adu ale ngü kaka, teka kina te engu kina te-ye di la.¹⁷⁻¹⁸ Dela si-ngü ta te Me kina kina fü nih di te iri ye, teka de nih wu, gü ba, de-ni Me, ni ti afüfü fingangü ka-ni nda-ni de. Angü, Me mala ta ngü kpekpeke, gü ba, "Ni, Me, ni o Yesu mere *mürü gele, teka areke ngü ezungba ni de wü kpara." Fü ah ayia akina kina, teka acu ngü la di. Te di bala ne, nih mere e afi nga ngü de. Nih rü kpekpeke, de nih zoro ngü ka Me de kpa nih 'basu, angü Me ena aküwa nih aküwa, baka ngü de te engu mala. Engu ti asu wü nda de.¹⁹⁻²⁰ Te di bala, ngü ka Yesu, te reke ngü ezungba nih de wü Me ne, ti eyi ato wazi fü nih fanü, fü nih angbü eo jia nih nzö eküte Yesu. Wü di eng a wüna, nih rü kpekpeke, da elala gbü nga Yesu, angü Yesu nü sü eyi kpa engagira nü, agbü sü ka Me agbü kpí, teka aü kaje fü nih. Angü Yesu de mere mürü gele ka-nih, te reke ngü ezungba nih de wü Me fi mere badi, kpara baka Miri Meleke-Sadiki, te di ta mere mürü gele, gbü re ka Abarayama ne.†

7

Dene ngü ka Yesu, te ngbü eyi to mürü gele ka-nih,

fi mere badi ne

¹ Yesu de mere *mürü gele ka-nih baka Miri Meleke-Sadiki ta gügü ne.* Miri Meleke-Sadiki la ta neh da? Meleke-Sadiki ta de mere miri ka gara sü de iri ye Salema.† Engu ta kpara de mürü gele, te ngbü emere tima ka mere Me. Ta gügü wü *Abarayama nü ti gü gbü nzö wü vügü ka-wü, fü ewü afa wü vügü la.‡ Te wü Abarayama ngbü ego tete kpa eköti, fü Abarayama anü amaka te-wü de wü Miri Meleke-Sadiki. Fü Miri Meleke-Sadiki ayia asü ngüsü gbü nzö Abarayama. Fü

ah ayia aku gba fü Me, teka de Me to wazi fefe na.² Fü Abarayama ayia aza süka wü e, te ewü za esaka wü vügü la, ato fü Miri Meleke-Sadiki baka tari-e,§ teka agbo nga iri Me di. Te di bala, ngü ka Miri Meleke-Sadiki ka-ye baka nda Yesu. Kükürü de, angü si-ngü gbü iri Meleke-Sadiki la gü ba, "Miri te ngbü emere ngü gbü jia Me ereke areke." Miri Meleke-Sadiki, ah kpara de miri ka Salema. Amba si-ngü gbü iri de Salema ne gü ba, "Zö-ngbüngbü."³ Ngü ka Miri Meleke-Sadiki koro ka-ye bü ghogbogbo! Baka te wüh ba ngü ka Miri Meleke-Sadiki gbü *Ngari Me ne, wüh ba iri wö ye na nda-wü de. Wüh ba iri ni ye na kpara de. Wüh ba iri wü kundu ye na kpara de. Nih wu wü sikpí anga re te wüh bi engu tete ne kpara de. Wüh je nga kpi kaka-na nda-wü kpara de. Ah ge baka te engu ngbü ka-ye ta ezükü, fi mere badi. Te ah bala, ngü kaka ka-ye baka nda Yesu, Ye Me, te di de mere mürü gele, te reke ngü ezungba nih de wü Me, fi mere badi ne.

⁴ Ceka la! Miri Meleke-Sadiki ta de mere kpeke kpara. Angü mere kundu nih, Abarayama, to ta takpa fefe baka tari-e, teka acu ngüngü na di. Wüh ngbü eto takpa de bala fü mere kpara de? Te ah bala la, Miri Meleke-Sadiki me-ye de mere kpara, te fa Abarayama ka.⁵ Gbü gele ka-nih, wü di eng a *Yisaraye, wü mürü gele ka-nih ka-wü 'buru gbü nguwa *Levi. Amba nih 'buru de wü kundu ye Abarayama. Te di bala, de-nih, wü di eng a Yisaraye 'buru, nih ngbü eto takpa ka tari-e fü wü mürü gele la, angü riri ka-nih mala bala.⁶ Miri Meleke-Sadiki ta de mürü gele ka mere Me, amba engu gbü nguwa Levi nda de. Abarayama me-ye de mere kundu ye Levi. Engu kpara de kpara te Me mala ngü fefe na, gü ba, "Ni ena ato mere wazi fü ye, fü nguwa ye asibi di afa sü." Amba Abarayama ta me-ye de kpara te to takpa baka tari-e fü Miri Meleke-Sadiki. Fü Meleke-Sadiki adu ayi-ta Me, teka de Me to wazi fü Abarayama.⁷ Kpara te ngbü eyi-ta Me, teka de Me to wazi fü wü bu ye, neh da? Ah de mere kpara de? Te ah bala, Miri Meleke-Sadiki de mere kpara fa Abarayama ka.⁸ Te di bala, ah ge baka te wazi Miri Meleke-Sadiki fa wazi wü di eng a Levi, wü mürü gele ka-nih, wü di eng a Yisaraye ne, afa. Kpara bala, wü di eng a Levi de wü mürü

† 6:19-20 6:19-20 Mü ena amaka ngü ka Miri Meleke-Sadiki gbü Gina Ngü 14:18-20. * 7:1 7:1 Mü ena amaka ngü ka Miri Meleke-Sadiki gbü Gina Ngü 14:18-20. † 7:1 7:1 Salema de diri iri Yerüsalema. ‡ 7:1 7:1 Wü vügü te wü Abarayama mere gü de ewü ne, wü de wü miri ka wü sü bala, te ewü zoro Loto, te di de ye eng a ni Abarayama. Mü ena amaka ngü la gbü Gina Ngü 14. § 7:2 7:2 Wü e ta te wü Abarayama za esaka wü vügü ne, wüh je süsüka na gbü wü da-sü nzüka nzüka. Fü ewü aza da-sü biringbö, ato fü Miri Meleke-Sadiki.

gele ka kotò ne, wùh tí eyi akpi. Amba teka ngù ka Miri Meleke-Sadiki, wùh je nga ngù ka kpi kaka-na nda-wù de. Ah ge baka te engu ngbù ka-ye ta ezùkù fí mere badi. ⁹⁻¹⁰ Abarayama ta de wò ye *Yisaka. Yisaka ta de kundu ye Levi, te di de kundu ye wù mùrù gele ka-nih, wù di engu Yisarayeale ne. Amba gbù sikipi ta te Abarayama to takpa la tete fù Miri Meleke-Sadiki ne, o Abarayama bi Yisaka ta nda la de. Ah baka te wù Levi to takpa kpah eyi fù Miri Meleke-Sadiki la guvu Abarayama. Te ah bala, Miri Meleke-Sadiki me-ye de mere kpara, te fa Levi, de wù kundu ye la, 'buru.

¹¹⁻¹² Tekà ngù ka *Rìrì, ta te Me to fù nih, wù di engu Yisarayeale, gómò *Mùse ne, Rìrì la gù ba, ah le de wù mùrù gele la di 'buru wù kundu ye *Arona, gbù nguwa Levi. Amba, sidi nga mere bi wù re fùtanga Mùse, fù Me adu amala gara ngù, gù ba, "Ni ena atima gara mùrù gele fù nih, te ena adi baka Meleke-Sadiki, teka fù engu areke ngù eze ngbà nih de wù ni, Me." Te mere bi wù mùrù gele gbù nguwa Levi la, ena angbù ta ereke ngù ka-nih gbù jia Me fanù la, de bane Me du tima gara mùrù gele fù nih, tìne de. Fanù, mere bi wù mùrù gele la tí areke ngù ka-nih gbù jia Me nda-wù de. Diri Rìrì la tí areke ngù eze ngbà nih de wù Me nda kpah de. Dela si-ngù te Me tima gara mùrù gele, de engu koro asere to kaje ka *kùkùwa fù nih, angù Me fù rìrì ka diri gele la eyi. Amba to mùrù gele la, ah de kundu ye Arona nda de, angù ngù kaka ka-ye baka nda Miri Meleke-Sadiki. ¹³⁻¹⁴ To mùrù gele ka-nih ne, ah de Miri Yesu. Ah koro gbù nguwa Levi nda de. Engu ka-ye gbù nguwa *Yuda. Rìrì ka Mùse mala teka wù mùrù gele gù neh fe? Rìrì la gù ba, wù mùrù gele la di 'buru gbù nguwa Levi. Ah mala ngù teka nguwa Yuda nda de.

¹⁵ Te di bala, nih tí eyi awu, gù ba, Me fù ngù ka diri Rìrì la eyi, angù engu du tima Yesu, gù ba, engu de mere mùrù gele baka Miri Meleke-Sadiki. ¹⁶ Me o Yesu baka mere mùrù gele, neh teka ne? Wùh bi engu ta gbù nguwa Levi? A'a, Me o Yesu baka mùrù gele, angù engu de kpara te ngbù ka-ye fí mere badi. Engu tí akpi nda de. ¹⁷ Yi fí la nga ngù, ta te wùh ba teka Yesu gbù *Ngari Me, gù ba, "De-ni, Me, ni o ye eyi mere mùrù gele fí mere badi, baka mere Miri Meleke-Sadiki tane."* ¹⁸⁻¹⁹ Me du fù ngù ka rìrì ka diri gele la eyi, angù gele la tí adu areke ngù eze ngbà nih de wù Me nda tìne de. Dela si-ngù te Me tima Yesu tete na, teka

de engu koro, agù tamu to kaje fù nih, de wazi te fa ngù ka diri gele la afa. Te di bala, de nih o jia nih ekùte Yesu, angù Yesu tí eyi areke ngù, te di eze ngbà nih de wù Me ne, duu me-ye.

²⁰ Kpah bala, ngù ka Yesu fa rìrì ka diri gele ka, teka kina te Me kina. Angù ta te wùh fe wù kundu ye Levi tete wù mùrù gele ne, Me kina kina nda de. ²¹ Amba, gbù sikipi te Me fe Yesu tete, Me gù ba, "De-ni, Me, ni kina kina eyi, gù ba, 'Ni o ye eyi mere mùrù gele, te ena angbù fí mere badi, teka adi ereke ngù eze ngbà ni de wù kpara.' " Dela ngù ta te Me kina kina di. Engu tí afù ngù la nda de. ²² Te di bala, ah le de nih wu, gù ba, ngù ka Yesu fa ngù ka mere bi wù diri mùrù gele tane afa. Ah le kpah fù nih awu, gù ba, Yesu tí eyi akùwa nih fanù, angù engu tìne eyi mere *vùngùte ka-nih.

²³ Kpah bala, diri wù mùrù gele la, wùh ta de kùkùrù wù kpara ka kotò ne. Te gara kpi eyi la, fù ewù angbù eo gara kpara gbù nguwa ewù la, da kiri ye te kpi la, teka de tima la di fí bù enù kpa engagira nù. Dela si-ngù te wùh sibi fa sù ne ²⁴ Amba, teka ngù ka Yesu, engu tí akpi tìne de. Wùh tí ao gara kpara dada na kpah de. Angù engu ngbù eyi me-ye baka mere mùrù gele, fí mere badi. ²⁵ Te di bala, te nih yi-ta Me te ìrì Yesu la, Me ena akùwa nih akùwa fí mere badi. Kùkùrù de, angù Yesu ngbù eyi fí da eyi-ta Me teka ngù ka-nih, de Me kùwa nih.

²⁶ Wù di engu wùna, dela ngù te ma le amala fù yi. Yesu ka-ye me-ye de mere mùrù gele ka-nih. Engu me-ye de kpara te ena akùwa nih. Angù engu de zùka kpara, *nzila, te ngù kaka reke gbù jia Me fa sù. Ah mere siti ngù nda kù de. Fù Me ayia ato mere wazi fefe na, adu ao engu ede ye, Mere Miri agbù kpì. ²⁷ Ngù ka Yesu fa ngù ka wù diri wù mùrù gele tane ka. Angù Yesu to te-ye, akpi, teka afa nih gbù wù *siti ngù ka-nih, cu de *ngùte ye. Ah mere ngù la ngbee du biringbò. Amba, teka ngù ka mere bi wù diri wù mùrù gele, wùh de wù kùkùrù kpara ka kotò ne. Wùh ngbù ta kpah emere wù gara *siti ngù. Tekà ngù la, fù ewù angbù kpah ewa wù nù, eto ngùngùte fù Me, teka siti ngù ka-wù feke, teka de Me boro siti ngù ka-ani la. Wùh le teka angbù eto ngùte wù nù la bala, te nga wù sikipi 'buru, angù ngùte wù nù, ta te wùh ngbù ewete la, tí anza siti ngù nda de.† ²⁸ Te di bala, mene wù kpara ta te wùh o ewù wù mùrù gele, baka te *Mùse mala gbù *Rìrì ka-ye ne, wùh ta de kùkùrù wù kpara ka kotò ne,

* 7:17 7:17 Mù ena amaka ngù la gbù Ci ka wù Davidi 110:4.

† 7:27 7:27 Mù ena amaka ngù la gbù buku ka Rìrì ka Gele ka wù Levi 9:7.

kpah baka nih. Amba, teka ngü ka Yesu, engu ka-ye de Ye Me. Wawazi na fa sü. Engu ka-ye de züka kpara gbü jia Me. Fü Me ayia ao engu baka to mürü gele ka-ye. Fü ah ayia akina kina, gü ba, tima ka Yesu ti anza nda de.

8

Dene ngü ka Yesu, te ngbü eyi mere mürü gele ka-nih agbü kpí

¹ Wü di engu wüna, mere kpeke ngü te ma le amala fü yi, ah dene. Miri Yesu de züka *mürü gele ka-nih ka-ye me-ye, te ü kaje ka *küküwa eyi fü nih. Titine engu ngbü engbü ede kpökpö ka Me, baka Mere Miri agbü kpí. ² Yesu reke ngü eze ngba nih de wü Me eyi, agbü *nzila sü kpaka Me. Sü la, ah baka *Kambü ka Me de füh kotö ne nda de, angü Kambü ka Me de füh kotö ne, wü kpara jì me-wü de kpa wü. Amba zu Kambü ka Me de agbü kpí ne, Me mere e ka-ye cu me-ye.

³ Tima ka wü mürü gele neh ene? Wüh ngbü ewete mere bi wü nü, teka adi eto ngüte ewü fü Me, teka afa *siti ngü ka wü kpara di. Ah bala de? Amba baka te Yesu di de mürü gele ka-nih ne, engu to fü Me neh ene? Ah to zu *ngüte ye. ⁴ Amba, te Yesu ena adi ta fi bü füh kotö sene la, de bane engu ti angbü mürü gele nda de. Angü mere bi wü mürü gele la ta ladü esüka wü di engu *Yisaraye, te ewü ngbü emere gele ka Me füh kotö ne. Amba Yesu ka-ye ladü agbü sü ka Me agbü kpí. Angü engu reke ngü eze ngba nih de wü Me nza eyi. ⁵ Amba tima de te mere bi wü mürü gele la ngbü ta emere de füh kotö de sene ne, ah ka-ye ta nda-ye bü kuru ngü, de te Miri Yesu du mere agbü kpí ne. Kpah bala, Kambü ka Me de füh kotö ne, ta te wüh ngbü emere gele ka Me gbügbü ne, ah ta kpah de kuru zu Kambü ka Me de agbü kpí ne. Angü Me sere ta zu Kambü ka-ye agbü kpí ne fü *Müse. Fü Me ayia amala ngü fü Müse kpekpeke, gü ba, "Ye mere Kambü ka-ni la füh kotö sene, kpah baka engu te ni sere fü ye la."* ⁶ Amba teka tima ka Yesu, engu mere zu gele ka Me agbü kpí ne nza eyi. Angü Yesu reke ngü eze ngba nih de wü Me eyi cu fa sü, fa nda diri wü mürü gele tane di ka. Kpah bala, Yesu nzö ngüte eyi de wü nih. Teku ngü la, titine Me eyi de mere *vüngüte ka-nih. Fü Me adu amala ngü fü nih, gü ba, "Ni ena adu aküwa nih, teka ngü ka Yesu la." Te di bala, ngü ka *küküwa te Yesu to fü nih ne reke fa ngü ka diri gele tane ka.

⁷ Me nzö ngüte de wü kundu nih ta gügü. Fü ngü la ayia asiti, angü maguma wü kundu nih la ka-ye ta 'basu' basu. Dela si-ngü te Me du nzö ngüte de wü nih kpah toto ne. ⁸ Te Me wu dürü ngü ka wü kundu nih la, fü ah ayia amala ngü gömö *mürü dofo ka-ye, gü ba, "Te gara, ni ena adu anzö ngüte de wü, wü kpara ka-ni, wü di engu Yisaraye, kpah toto. ⁹ Amba to ngüte engu la, ah baka didiri na, ta te ni nzö de wü kundu wü ne, nda de. Ta gügü, ni nzö ngüte de wü kundu wü la, o wü kundu wü la di ta wü labi, gbü tö ka wü *Ezepeto. Fü ni ayia aküwa ewü esaka wü kpara ka Ezepeto, angü wüh de wü vüngüte ka-ni. Fü ni ayia ato *Riri ka-ni fü ewü gömö Müse. Amba wüh le aje Riri ka-ni la nda-wü de. Fü ewü angbü emere ngü ka-ni de maguma wü 'basu' basu. Teku ngü la, fü ni ayia afü kürufe ni fü ewü. ¹⁰⁻¹² Amba te gara, ni ena adu anzö ngüte de wü kpah toto. Amba ngü la ti angbü baka mene diri ngü tane nda de. Angü ni ena awu cinga wü, fü ni ayia aboro wü *siti ngü ka-wü 'buru, teka *züka maguma ni. Ni ti adu afi nga siti ngü ka-wü la tine de. Ni ena aba wü riri ka-ni la, ao emaguma wü, angü wü ena adu ace ngü ka-ni. Ni ena ale wü afa sü, angü ni ena adi de mere vüngüte ka-wü. Wü ena ale riri ka-ni kpah de maguma wü biringbö. Wü ena awu ngü ka-ni areke areke, te nga wü 'buru. Fü wü angbü eje ngü ka-ni mbi mbi, da ele cu de maguma wü."† ¹³ Dela ta ngü te Me mala gömö mürü dofo ka-ye, gü ba, "Ni ena adu anzö ngüte te gara, de wü kpara ka-ni kpah toto," ne. Me mala ngü la bala, angü ngü ka diri ngüte, ta te engu nzö de ewü ne, siti eyi. Te e siti eyi la, mü ena amere di baye? Mü ena adu ace e la asidi, fü mü adu areke gara toto. Ah bala de? Te di bala, ah le de nih ce ngü ka diri gele la asidi, fü nih adu alala te to ngü ka Yesu ne.

9

Dene ngü ka diri gele ka wü di engu Yisaraye

¹ Diri wü *mürü gele tane, ngbü emere nda-wü tima gbü *Kambü ka Me, de te wüh jì füh kotö de sene. Fü ewü angbü efete wü riri ka gele, ta te Me to fü *Müse ne, ereke areke. ²⁻³ Wüh ye süka guvu Kambü ka Me la ta 'basu. Wüh gbala ta mere bongo baka ngisi la, kolo tütü na di. Mene gigna, de to kpa etanü ne, ah de mene de te wü mürü gele ngbü emere gele ka Me gbügbü na, te nga wü sikipi

* 8:5 8:5 Me sere ngü la fü Müse o wüh di tete na kpa füh mere da de iri ye Sinayi. Mü ena amaka ngü la gbü buku ka Gogo ka wü Yisaraye 25:40. † 8:10-12 8:10-12 Mü ena amaka ngü la gbü buku ka Yeremaya 31:31-34.

'buru. Lamba ta ladü kpala, te wüh ngbü esiya, teka de ah di elofu sü kpa esambü la. Cangali ta kpa ladü kpala, te wüh ngbü eo ambata fefeh na, adi eto fü Me. Mene e'ba'basu guvu kambü la, te di to kpa gbügbü ne, wü mürü gele 'buru ti ari gbügbü kpala nda-wü de. 'Duwa mere kpara füh kpökpö ka-ewü ngbü eri kpala me-ye, gbü re biringbö du biri. ⁴ Gbü e'ba'basu guvu kambü la, gara *cangali ladü, te wüh reke gbü *diki-se, te wüh ngbü ecuru *rü de züka se ye fefeh na. Mere züka *Sanduku ta kpa ladü kpala, te wüh o züka wü e ka Me gbügbü. Wü e la baka zü-e, ta te Me ngbü eto fü wü di enga *Yisaraye, o wüh ngbü endoro tete na kpa etü gü ne.* Bete ngbangba ka *Arona, ta te Me to wazi gbügbü na, fü ah ayia ato kpa ye baka fu-e ne. Kpah bete wü fara da 'basu, ta te wüh ba wü *Riri ka Me nzükpa fefeh ne. ⁵ Kuru mere wü *malayika ka Me ladü,† te wüh reke, o füh sanduku la. Füh mbula wü malayika la aghala te-ye füh sanduku la 'buru. Dela sü te mürü gele ngbü emoko ngüte nü tete, teka adi ereke ngü eze ngü kpara de wü Me di. Mere bi wü gara riri ka gele kpa ladü, amba ma le aza mere bi lö-ra, teka aro mö füh ngü la, nda-ra de.

⁶ Mere bi wü mürü gele ta ladü, te ewü ngbü eri agbü gina guvu kambü la, te nga wü sikipi nde, teka adi emere gele ka mere Me kpala. ⁷ Amba teka e'ba'basu guvu kambü la, 'duwa mere kpara füh kpökpö ka wü mürü gele la ngbü eri kpala me-ye. Ah ngbü eri kpala du biri, gbü re biringbö. Ah ri kpala bü kükürü kükürü bala ne de. Ah ngbü eza ngüte nü, angbü eri di kpala. Füh ah amoko ngüte la füh *Sanduku de kpa esambü la, teka afa *siti ngü ka-ye di, kpa bete wü siti ngü, de te wü kpara 'buru mere gbü mene re la. ⁸ Diri Kambü ka Me la, wü kükürü kpara ri nda-wü kpala 'buru 'buru de. Singü la, neh baye baye? Ngü la, *Nzila Wazi Me ngbü esere fü nih, gü ba, gele de te wü mürü gele la ngbü ta emere ne, ah ti areke ngü ka wü kpara gbü jia Me nda de. ⁹ Gbü wü ngü la, Nzila Wazi Me ngbü egü tamu ngü fü nih, gü ba, ngüte wü nü la ti afa wü kpara gbü siti ngü ka-ewü, nda kpa de. Ah ti azürü maguma wü kpara, de te ewü ngbü emere gele la, nda kpa de. ¹⁰ Mere bi wü riri la, ah

'buru teka gele ka mato e fü Me. Wü gara gele la, ah teka ngü ka mazürü küte, de wü ngü ka zü-e, de wü gara. Angü wü kpara la ngbü emere wü gele la 'buru de wü e füh kotö ne, te ti areke ngü ka wü kpara gbü jia Me nda 'buru 'buru de. Amba enatikine dene, Yesu reke züka kaje eyi fü nih cu de *ngüte ye.

Dene ngü teka Yesu, te reke ngü eze ngba nih de wü Me,

cu de ngüte ye

¹¹ Enatikine, Me o Yesu *Kurisito eyi baka mere *mürü gele ka-nih. Yesu mere nda-ye ngü la gbü *Kambü ka Me, te wü kpara ji de kpa wü füh kotö ne, nda de. Ah ri mere nda-ye ngü la cu agbü sü ka Me agbü kpi. Nda Yesu, gele de te engu mere ne, ah fa nda wü mürü gele füh kotö ne 'buru, angü ah küwa nih eyi fi mere badi. ¹² E te Yesu za, ri di agbü sü ka Me kpala, ah za cu *ngüte ye, ah de ngüte nü nda de. Angü ah kpi teka aküwa nih fi mere badi. Ah mere ngü la bala ngbee du biringbö, ah du nda nganga nda de. ¹³ Gbü *Riri ka Müse, te kpara le areke ngü ka-ye gbü jia Me la, kpara la ena aza meme, anga yiti, anü di kpaka mürü gele. Füh mürü gele aza nü la, awa, aza ngüngüte, amoko eküte kpara la.‡ Amba ngü la ngbü ereke bü nzö küte kpara, ah ti anza *siti ngü ka kpara la nda de. ¹⁴ Amba, teka ngü ka Yesu Kurisito, wazi ngüngüte na fa ngü ka ngüte wü nü ka. Angü Yesu mere siti ngü nda kü de. Füh *Nzila Wazi Me ayia ato wazi fefe na, fü ah ayia ato te-ye fü kpi, teka aküwa nih. Ngüte Yesu la ti eyi afa nih gbü siti ngü ka-nih 'buru fi mere badi. Te di tñe eyi bala ne, fanü fanü, cürü kpi ti angbü emere nih tñe de. Nih gbo nga iri Me, da emere tima kaka-na de tadu.

¹⁵ Wü di enga wüna, Yesu reke to kaje eyi fü nih. Kpah bala, engu reke ngü ta te di eze ngba nih de wü Me ne, eyi 'buru. Ah mere ngü la de ngüte ye, te engu tökö teka ngü ka-nih ne. Te di bala, nih ti eyi amaka züka ngü ka Me agbü kpi, baka te Me mala fü nih, te engu i nih tete ne. Angü Yesu kpi ne, teka afa wü siti ngü, de te nih mere ne 'buru. Angü wazi nih teka amere mere bi wü *riri ka gele, ta te Me to fü Müse ne, 'buru nda ma.

¹⁶⁻¹⁷ Te gara enga ni mü kpi eyi la, yi ti eyi aye süka e-nga-kpa gbü nganga la

* 9:4 9:4 E-mazü te wüh eif ga, mana ne, wüh o engu nda-wü gbü sila te ewü fo gbü diki-se. † 9:5 9:5 Wüh o ta kuru wü malayika la 'basu füh sanduku la. Mü ena amaka wü ngü la gbü buku ka Gogo ka wü Yisaraye 25:18-22. ‡ 9:13 9:13 Mürü gele ti kpa eyi aza so joro yiti, acuru acuru. Füh ah aza mbimbi na dela, areke ngü ka kpara la di. Mü ena amaka ngü la gbü buku ka Namba 19. § 9:16-17 9:16-17 Gbü wü re ta de kpala, kpara ngbü eba ngü me-ye de kpa ye, teka ngü ka wü e ka-ye, gü ba, "Sidi nga kö ni, wü e ka-ni dene, wüh to fü mene kpara bane". Amba te engu ba kpa bü ngü bala la, mü ti amofu wü e te engu ele ace fü mü ne la de, zalü te engu ena akpi feke.

de wü gara wü di engu ni mü.^S Amba te engu kpi nda la de la, mü ena aye süka wü e kaka, ba e-nga-kpa, neh baye baye? Mü ti amofu e kaka biringbö bane de! Te di bala, te Yesu ena akpi ta de la, de bane nih ti amaka *küküwa kpah de.¹⁸⁻¹⁹ Kpah bala, ah ngbü ele ngüte teka areke ngü di eze ngba nih, wü kpara, de wü Me. Dela si-ngü de te diri wü mürü gele tane ngbü ewa wü nü tete, teka adi eto ngüte ewü fü Me ne. Ah kpah baka ngü ta te Müse mere, gbü sikipi te engu sere wü riri ka Me tete 'buru fü wü kpara. Ah za ta ngüte yiti, bala de ngu, fü ah ayia amoko füh buku, de te engu ba wü Riri la gbügbü na ne. Fü ah adu amoko ngüte la kpah gbü nzö wü di engu *Yisaraye le 'buru,^{*} 20 gü ba, "Ngüte de te ni ngbü emoko gbü nzö wü enatikine ne, ah baka e te wü nzö *ngüte eyi de wü Me. Angü wü le wü *Riri ka Me ne eyi 'buru, de maguma wü biringbö."[†] 21 Fü Müse ayia amoko ngüte la kpah füh Kambü ka Me, de wü e de ta te wüh ngbü emere gele di, de gbügbü na la 'buru.²² Angü Riri ka Müse mala, gü ba, ah le de wüh di ereke ngü ka wü e 'buru de ngüte wü nü. Te wüh ena angbü ta ewa wü nü fü Me, teka adi ereke ngü ka-wü di de la, de bane ngü ka-ewü ti ta areke gbü jia Me nda de. Dela si-ngü te Yesu kpi tete na, atökö ngüte ye, teka azürü *siti ngü ka-nih ne.

²³⁻²⁴ Kpah bala, *Kambü ka Me de füh kotö ne, de wü ngü ka-ye, ah 'buru baka kuru ngü te di agbü kpi ne. Müse moko ngüte nü eküte wü e la mbi, teka de wü e la reke gbü jia Me, angü dela wü e te wü kpara mere me-wü de kpa wü. Amba Yesu Kurisito ri gbü Kambü ka Me de füh kotö ne nda de. Engu ri ka-ye agbü *nzila sü ka Me agbü kpi, angü Yesu tökö cu *ngüte ye, te reke fa sü ne. Titüne engu ladü agbü kpi kpala, da eyi-ta Me teka ngü ka-nih.²⁵ Yesu ri agbü sü ka Me, nda nga ye anda, te nga re biri biri ne, nda de. Mere mürü gele ka wü di engu Yisaraye le ngbü ta eri te nga wü re biri biri 'buru, guvu mene Kambü ka Me, te wüh ri gbügbü 'daaa de ne, de ngüte wü nü esaka ye.²⁶ Te ngü ka Yesu ena adi ta baka nda wü mürü gele la, de bane engu ena akpi ta te nga wü re biri biri 'buru, akpo gbü sikipi ta te Me mere kotö ne tete, zalü akoro di enatikine. Amba ngü la bala nda de. Yesu kpi ka-ye ngbee du biringbö. Te di bala, kpi te Yesu kpi di du biringbö ne, kpi la ti eyi afa wü kpara gbü siti ngü ka-ewü 'buru.²⁷ De-nih, wü kpara ka kotö

ne, nih ngbü ekpi neh du fe? Nih ngbü ekpi ngbee du biringbö. Sidi nga kpi la, fü nih adu akoro arü engagira Me, teka fü Me akolo ngü ka-nih.²⁸ Kpah bala, Yesu kpi ka-ye ngbee du biringbö. Angü ah ce te-ye fü kpi, teka anza siti ngü ka wü kpara 'buru, cu de ngüte ye. Fanü fanü, Yesu ena adu akoro füh kotö ne te gara. Amba engu du koro teka adu kpah akpi, teka afa nih gbü siti ngü ka-nih ne, nda tüne de. Yesu ena adu akoro füh kotö ne, teka abiti nih wü kpara ka-ye, te nih ngbü eo jia nih tengüngü ne. Engu ena aküwa nih, fü nih ago angbü agbü kpi kpala fi mere badi.

10

Dene ngü ka Yesu, te fa ngü ka diri gele ka

¹ Wü di engu wüna, dene ngü te ma le amala fü yi. Diri gele, ta te Me sere fü *Müse ne, ti areke ngü ka-nih gbü jia Me anza nda de. Angü ngü ka gele la ka-ye bü kuru ngü, te ngbü esere ngü ka Yesu fü nih. Angü Yesu zu me-ye de kpara, te reke ngü ka-nih, o eyi mbi gbü jia Me. Te ah teka ngü ka diri gele la, ah le de *mürü gele la di ewa wü nü, fü ah angbü eto ngüte ewü fü Me te nga wü re biri biri 'buru. Wüh ngbü emere ngü la enda nganga anda bala. Angü ngü ka gele la ti ta, teka areke ngü ka-nih gbü jia Me, nda de.² Te diri gele la ena areke ta ngü te di eze ngba nih de wü Me ne, anza ta eyi la, de bane wüh ena adu kpah adi emere gele la, enda nganga na anda? A'a! Wüh ti ta adu angbü emere gele la te nga wü re 'buru ne de.³ Fanü fanü, diri gele la ti teka areke ngü ka-nih gbü jia Me nda de. Teku ngü la, fü ewü angbü emere gele la, te nga wü re 'buru, angü wüh ngbü fi bü efi nga wü *siti ngü ka-wü, emaka.⁴ Kükürü de, angü ngüte wü nü la ti, teka areke ngü eze ngba nih de wü Me, nda de. Ah le ka-ye cu *ngüte Yesu Kurisito.

⁵⁻⁷ Dela si-ngü te Me tima Yesu *Kurisito, fü ah akoro füh kotö sene, aza küte baka nih, wü kpara, teka de engu kpi, teka aküwa nih. Angü, ta te Yesu ngbü ereke te-ye, teka akoro tete kpa füh kotö kpakine ne, ah mala ta fü Wö ye, gü neh fe? Ah mala ta, gü ba, "Wö ni, Me, ni ladü nzo. Ni to te-ni eyi 'buru 'buru teka amere ngü, de te ye ngbü ele ne. Angü ni wu eyi, gü ba, mere bi wü nü te wüh ngbü ewa fü ye ne, ngü la reke gbü jia ye nda de. Ngüte wü nü la ti anza siti ngü ka wü kpara nda de. Dela si-ngü te ye to küte di fü ni, teka de wüh mörö ni, teka fü ngüte ni anza

* **9:18-19** 9:18-19 Müse i kala kambiliki te di didiki, dunda de akindo, teka amoko ngüte la di. † **9:20** 9:20 Mü ena amaka ngü la gbü buku ka Gogo ka wü Yisaraye le 24:8. * **10:5-7** 10:5-7 Mü ena amaka ngü la gbü Ci ka wü Davidi 40:6-8.

siti ngü ka wü kpara, baka züka gele ka boro ngü, te ye ngbü ele.”* Dela ngü ta te wü *mürü dofo ba gbü *Ngari Me, teka kokoro ka Ye Me füh kotö ne. ⁸ Ngü te Yesu mala fü Wö ye, gü ba, “Ni wu eyi, gü ba, mere bi wü nü te wüh ngbü ewa fü ye ne, ngü la reke gbü jia ye nda de. ⁹ Wayi, ni ladü nzo. Ni to te-ni eyi 'buru 'buru, teka amere ngü te ye ngbü ele.” Ngü la, ah baka e te Yesu mala, gü ba, ngü ka wü diri gele la nza eyi. Angü enatikine dene, *ngüte Yesu du reke ngü la eyi cu me-ye. ¹⁰ Angü Yesu to te-ye 'buru 'buru, teka amere ngü de te Me ngbü ele ne. Füh ah ayia amere tima ka-ye kpini kpini, anza 'buru, baka te Me mala fefe. Füh ah ayia akpi ngbee du biringbö, teka aküwa nih gbü *siti ngü ka-nih fi mere badi.

¹¹ Teka mere bi wü mürü gele ka wü di engä *Yisarayele, wüh ngbü emere gele la, enda nganga anda. Wüh ngbü emömörö wü nü neh du fe, teka adi eto ngüte ewü fü Me? Amba ngüte wü nü la ti, teka areke ngü ka-nih gbü jia Me nda la fi de. ¹² Amba teka ngü ka Yesu, ah kpi ka-ye ngbee du biringbö. Füh *ngüngüte na la ayia areke ngü ka wü kpara, te ewü le ngü kaka ne 'buru. Te Yesu reke ngü ka-nih nza tete, fü engu adu angbü füh kpökpö, gbü kokpa ka Wö ye agbü kpi, baka mere miri. ¹³ Enatikine Yesu fi ladü engbü kpala, eci nga sikpi, te Me ena aza wü vügü kaka 'buru, ao esa lölö. ¹⁴ Kükürü de, angü baka te Yesu kpi, füh ah atökö ngüte ye teka siti ngü ka-nih ne, ngüngüte na la zürü nih, wü kpara kaka, eyi 'buru. Ngüte Yesu la du reke ngü ka-nih eyi 'buru gbü jia Me. Gara ngü tine eyi ma.

¹⁵ Gbü wazi ka *Nzila Wazi Me, wüh ba ngü la kphah eyi gbü *Ngari Me, gü ba, ¹⁶ “Me mala gü ba, ‘Te gara, ni ena adu anzö *ngüte de wü nih kphah toto. Amba ngü la ti angbü baka mene diri ngü tane nda de. Ni ena aba wü riri ka-ni la, ao emaguma nih, teka de nih mere e ace ngü la tine de.’ ¹⁷ Füh Me adu kphah amala gara ngü, gü ba, ‘Ni ena awu cinga nih, fü ni aboro siti ngü ka-nih 'buru, teka *züka maguma ni.’”† Dela ngü ta te Me mala gömö *mürü dofo ka-ye gügü. ¹⁸ Baka te Me boro siti ngü ka-nih eyi 'buru, teka züka maguma ye ne, nih ena adu angbü emere gele, da ewa wü nü, neh kphah teka ne? Ah le de nih ce ngü ka diri gele ace. Nih du, nih mere bala nda-nih tine de.

Dene ngü te nih ena arü di kpekpeke,

alala eküte Yesu

¹⁹ Wü di engä wüna, Yesu reke ngü te di eze ngba nih de wü Me ne eyi de *ngüte ye. Te di eyi bala ne, nih nü enü kpaka Me. Cürü mere e amere nih tine de. ²⁰ Angü Yesu ü to kaje eyi fü nih. Ah de kaje ka *küküwa. Te nih le kaje dela la, fanü fanü nih ena anü akoro kpaka Me. Yesu ü kaje la, neh baye baye? Ah ü kaje la, angü ah kpi füh *rü gbegete, teka aküwa nih. ²¹ Yesu me-ye de mere kpeke *mürü gele ka-nih. Ah reke ngü eze ngba nih de wü Me eyi 'buru reke areke, teka fü nih akoro züka wü kpara ka Me. ²² Te di bala, Me ngbü eyi eceka nih baka züka wü kpara ka-ye, angü ngüte Yesu zürü nih eyi *nzila. Tekä ngü la, nih koro ekoro kpaka Me. Nih mere e akpe cürü tine de. Ah le de nih lala te ngü ka Yesu de maguma nih biringbö, angü nih za *babatiza eyi te ürri na. ²³ Nih zoro ngü ka Yesu de kpa nih 'basu, baka kina ta te nih kina te-nih di ne. Nih o jia nih 'buru eküte Yesu, angü engu ena adu akoro te gara, teka aza nih, anü di kpaka ye agbü kpi, kphah baka ta te engu mala fü nih ne. ²⁴ Kphah bala, nih to te-nih, teka adi eto wazi fü wü bu nih, kphah da ele te-nih esüka nih, teka fü nih amaka wazi angbü emere züka ngü di. ²⁵ Ah le kphah fü yi adi ebite te-yi tundu de wü bu yi, teka adi egbo nga iri Me, da eto wazi esüka yi, teka fü yi alala fi gbü ngü ka Yesu. Angü wü gara kpara ce da ebite te-wü de wü bu wü eyi. Amba yi mere e amere nda-yi bala de. Kükürü de, angü Yesu ena adu akoro füh kotö sene kere.

²⁶ Wü di engä wüna, nih le ngü ka Me de maguma nih 'buru biringbö. Nih mere e ace ngü la de. Angü, te nih du fü te-nih, gü ba, nih du le ngü la nda-nih tine de la, nih ena aküwa baye baye? Dela mere *siti ngü, te siti gbü jia Me cu fa sü! Mene ngüte e te nih ena aza, teka areke ngü la di ne, ah de ngüte ne? ²⁷ Te yi gü ba, ani le ngü ka Yesu de la, Me ena ato mere kuru te yi. Yi ti aküwa kpo fi de! Angü engu ena agü yi gbü mere wa, te ünü nda kü de! ²⁸ Nih wu eyi, gü ba, ta gügü ne, te kpara le ngü ka *Riri ka Müse de la, kpara la ti aküwa nda de. Wüh ena ai engu engagira wü *kovo, teka agiri si-ngü kaka-na la. Te wü kpara 'basu, anga bata, mala ngü kaka eyi, gü ba, “Fanü fanü, ani wu siti ngü kaka eyi cu de jia ani la,” wüh ena adu amere de engu baye? Wüh ena akolo ngü ka kpara la, fü ewü amörö engu asidi.† ²⁹ Te di bala, te mü le ngü ka Yesu de la, mü ena aküwa, neh baye baye? Ah ge baka te mü ngbü ekpa ngü ka *ngüte Yesu, te tökö teka azürü *siti ngü ka-mü ne. Angü ah ge

† 10:17 10:17 Mü ena amaka ngü la gbü buku ka Yeremaya 31:34. ‡ 10:28 10:28 Mü ena amaka ngü la gbü Manda nga Riri 17:6.

baka te mü ngbü edoto Yesu esa lö mü la. Ah kphah ge baka te mü ngbü esoko *Nzila Wazi Me, de te ngbü eto wazi fü nih ne. Te mü ngbü emere ngü bala la, Me ena ato mere siti kuru te mü. ³⁰ Wüh ba ta ngü la gbü *Ngari Me, gü neh fe? Me gü ba, "Ni ena ato kuru te siti wü kpara 'buru." Fü ah adu kphah amala gara ngü, gü ba, "Te wü kpara ka-ni ngbü kphah emere siti ngü la, ni ena ato kuru te ewü kphah ato." § ³¹ Nih ceka ngü la mbi mbi mbi! Angü te Me to kuru te mü cu me-ye la, mü tî aküwa nda-mü de. Angü Me ka-ye de mere siti mürü wazi!

³² Wü di engä wüna, ma wu eyi, gü ba, yi to maguma yi fü Yesu eyi gügü. Te di bala, ah le de yi fi la nga wü züka ngü, ta te yi ngbü emere gügü ne. Angü, baka ta te yi to maguma yi fü Yesu ne, yi rü ka-yi ta kpekpeke. Ta te wü kpara ngbü eto cinga te yi teka ngü ka Yesu, yi kpe cürü nda-yi ta de. Yi zoro Yesu ta de kpa yi 'basu. Yi ce ngü kaka-na ta nda-yi de. ³³⁻³⁴ Wüh ngbü ta esoko wü gara kpara esüka yi, da emi ewü gbü jia wü kpara. Wüh ngbü ta ei wü gara yi, egü agbü ku. Fü wü gara yi angbü nda-wü ta da ele ta-ngü te wü bu wü, te wüh gü ewü agbü ku ne. Wüh ngbü ta egbene e ka wü gara yi, ece ewü de kpa wü kükürü. Gbü wü ngü la 'buru, yi kpe cürü ta nda-yi de. Yi ngbü ta de tadu te yi, angü yi wu kpo, gü ba, züka ngü ka-ani ladü agbü sü ka Me agbü kpî, te tî anza nda de.

³⁵⁻³⁶ Wü di engä wüna, ah le de yi i maguma yi ai! Yi mere e ace ngü ka Yesu de. Yi rü kpekpeke, adi emere 'duwa mene ngü te ena areke gbü jia Me, baka ta te yi ngbü emere gügü ne. Te yi mere bala la, Me ena ato mere tadu fü yi, fü ah adu aküwa yi fi mere badi, kphah baka ngü ta te engu mala fü yi ne. ³⁷ Yi fi nga ngü de, Yesu te edu. Engu ena adu akoro kere. Engu tî ayiri tîne de. ³⁸ Yi fi la nga ngü, ta te Me mala, gü ba, "Mene wü kpara, te ewü le ngü ka-ni, Me, de maguma wü biringbö ne, ni ena aceka ewü baka züka wü kpara ka-ni fanü, fü ni adu aküwa ewü fi mere badi. Amba, te wüh ce ngü ka-ni eyi la, maguma ni ena anzu eküte wü."* ³⁹ Wü di engä wüna, ma wu eyi, gü ba, yi lala eyi gbü ngü ka Yesu Kurisito. Angü fanü fanü, yi le ngü ka Me eyi de maguma yi biringbö. Tekä ngü la, Me ena aküwa yi aküwa fi mere badi. Ah tî ato kuru te yi tîne de.

§ **10:30** 10:30 Mü ena amaka ngü la gbü Manda nga Riri 32:35-36. * **10:38** 10:38 Mü ena amaka ngü la gbü Abakuka 2:3-4. * **11:3** 11:3 Mü ena amaka ngü ka kotó ne bete kpî, ta te Me o ewü ne, gbü Gina Ngü 1:1-31. † **11:4** 11:4 Mü ena amaka ngü ka Abele ake engä ni ye na gbü Gina Ngü 4:3-12. ‡ **11:5** 11:5 Mü ena amaka ngü ka Enoka gbü Gina Ngü 5:18-24. § **11:7** 11:7 Mü ena amaka ngü ka Nüwa gbü Gina Ngü 6 - 9.

11

Dene ngü ka wü diri kpara ka Me,

te ewü rü ta kpekpeke gbü ngü ka Me

¹ Wü di engä wüna, nih ena ale ngü ka Me de maguma nih biringbö neh baye baye? Te nih le ngü ka Me de maguma nih biringbö la, nih ena awu, gü ba, Me le nih fa sü. Te di bala, wü züka ngü de te Me mala nganga fü nih ne, engu ena amere amere fanü. Amba nih tî awu ngü la de jia nih tîtine la de, nih ena adu awu wü ngü la te gara. ² Angü mere bi wü kpara ka Me ta gügü ne le ngü ka Me 'buru de maguma wü biringbö. Fü ngü ka-ewü la areke ta te Me afa cu sü. ³ Te nih le ngü ka Me de maguma nih biringbö la, nih tî eyi awu, gü ba, Me o kotó ne bete kpî de wü e gbü wü 'buru me-ye. Angü, Me mala ta bü ngü de komö ye kükürü, fü wü e la ayia akoro!*

⁴ Yi fi la nga ngü ka Abele. Abele le ngü ka Me de maguma ye biringbö. Dela singü ta te ngü ka nü kaka, de te engu wa fü Me ne, reke di gbü jia Me fa sü, fa ngü ka tari-e, ta te engä ni ye na to fü Me ne.† Fü Me ayia aceka Abele baka züka kpara ka-ye, teka ngü ta te engu to maguma ye fü Me ne. Nih wu eyi, gü ba, Abele kpî ka-ye ta eyi gügü, amba teka züka ngü kaka la, ah ge baka e te nih ngbü eyi eje riri na, te nih ngbü etanga ngü kaka gbü *Ngari Me la.

⁵ Yi fi la kphah nga ngü ka Enoka.‡ Enoka le ngü ka Me ta kphah de maguma ye biringbö. Fü Me ayia aza engu cu ezükü bala, anü sü di agbü kpî, teka ngü ta te engu lala gbü nga Me ne. Enoka kpî ta akpî nda de. Angü wüh ba ta ngü tekaka gbü Ngari Me, gü ba, "Ngü ka Enoka reke gbü jia Me fa sü." ⁶ Te mü le ngü ka Me de maguma mü biringbö de la, ngü ka-mü tî areke gbü jia Me kphah de. Angü, te mü le aku gba fü Me la, ah le de mü wu, gü ba, fanü fanü, Me le nih fa sü. Ah le kphah de mü wu, gü ba, Me ngbü eto wazi fü mene wü kpara, te ewü le ngü kaka de maguma wü biringbö ne.

⁷ De yi fi la kphah nga ngü ka *Nüwa. Nüwa le ta ngü ka Me de maguma ye 'buru. Angü Me mala ta ngü fü Nüwa, gü ba, "Te gara, mere ngu ena asi, fü ah ata sü füh kotó ne 'buru. Te di bala, ah le de ye reke *zabu, teka fü ye aküwa gbügbü."§ Ngü ka ngu te si la, ah ta de ngü te wü kpara wu bala te engä gina nda-wü

la de. Amba Nüwa ceka ta ngü la gbü jia ye ba wu nda de. Füh ah ayia aje riri ka Me. Füh ah adu areke zabu, kpah baka e te Me mala fefe na la. Füh Nüwa ayia ta aküwa esaka ngu la, de wü kpapa ka-ye 'buru gbü zabu la. Füh wü gara kpapa füh kotö ne ayia akpi 'buru, angü wüh le ta aje riri ka Me la nda-wü de. Dela si-ngü ta te ngü ka Nüwa reke di gbü jia Me ne, angü engu le ngü ka Me de maguma ye biringbö.

⁸ Kpah bala, *Abarayama kpah de kpapa te le ngü ka Me de maguma ye biringbö. Me mala ta ngü fū Abarayama, gü ba, "Ye yia eyia, de ye ce gba ye, de ye go ngbü agbü gara ganzi sü, te ye wu ta gügü la de."* Füh Abarayama ayia aje ri Me, füh ah ayia anü agbü tö la. Füh Me ayia amala kpah gara ngü fefe, gü ba, "Te gara, ni ena ato tö ne füh wü kundu ye, füh ewü angbü gbügbü fi mere badi." ⁹⁻¹⁰ Amba Me to ta tö la füh ewü kere nda de. Abarayama ngbü ta endondoro, da ejiji gbü tö la sela, baka ganzi kpapa. Ah ji ta züka köti kpala nda de. Wüh ngbü ta era bü esa wü gugü. Ye ye na *Yisaka ake kundu ye na, de iri ye *Yakobo ne, wüh mere ta kpah bala. Amba wüh ceka ngü ka Me la gbü jia wü baka wu nda-wü de. Wüh o jia wü fi bü teka ngü te Me mala füh ewü ne, angü wüh wu eyi, gü ba, te gara Me ena ato züka köti füh ani, te Me reke cu me-ye tüngü ani, te ena angbü fi badi.

¹¹⁻¹² Fütanga ngü la, füh Me adu amala gara ngü fū Abarayama, gü ba, "Abarayama deyü, wü kundu ye ena asibi te gara, akoro kpah coboro baka wü küfara etongo kpi."† Amba ngü te Me mala la, Abarayama ceka gbü jia ye baka wu kpah de. Angü baka te wü Abarayama za te-wü ake Sara, teka mere bi wü re, wü bi ye nda-wü de. Wüh gbe ka-wü tüne eyi cu agbe. Amba wüh o jia wü nzö eküte Me, teka awu ngü te engu ena amere. Füh Me ayia ato wazi füh wü Abarayama ake Sara de wüh bi ye. Te ah ena adi ta gbü fingängü ka-nih, de bane nih ena amala ta, gü ba, Abarayama gbe eyi. Wawazi te engu ena abi ye di tüne eyi ma. Amba wazi ka Me fa ka-ye sü! Füh Me ayia ato wazi füh Abarayama, füh Abarayama adu abi ye.‡ Füh yeye na la abi wü jaji komoko 'basu. Füh wü jaji komoko 'basu la adu abi mere bi wü jaji. Füh wü kundu ye Abarayama la adu asibi gbe coboro, baka küfara agbü kpi la. Ngü la mere te-ye bala kükürü de,

angü Me to wazi füh Abarayama, teka te engu to maguma ye 'buru füh Me ne.

¹³ Wü kpapa te nih ngbü emala nga ewü ne, wüh le ta ngü ka Me de maguma wü 'buru biringbö, zalü koro di gbü sikpi te wüh kpi tete na. Wü züka ngü ta te Me mala, gü ba, ni ena amere füh ewü ne, Me mere ta wü züka ngü la füh ewü kere nda de. Te di bala, wüh ceka ta ngü ka Me la gbü jia wü baka wu ne nda-wü de. Wüh o to wü 'buru te ngü te Me mala la, angü wüh wu kpo, gü ba, Me ti eyi amere wü ngü la füh ani te gara, gbü sikpi ka-ye te engu fe me-ye. Füh wü kpapa la angbü ta de tadu teka ngü la. Wüh o ta maguma wü teka wü ngü füh kotö ne nda-wü de, angü wüh wu kpo, gü ba, "Gba ani füh kotö sene nda ma. Ani ngbü bü ejiji füh kotö ne, da endondoro baka wü ganzi kpapa la."

¹⁴ Te kpapa mala ngü bala la, nih ti eyi awu, gü ba, züka gba ka na ena adi ladü kpa te gara sü. ¹⁵ Te wü kpapa la ena ao maguma wü ta, teka wü e de füh kotö ne la, de bane wüh ena amala, gü ba, "Ani le angbü füh kotö sene ayiri ayiri." ¹⁶ Amba wüh o maguma wü ka-wü teka sü ka Me agbü kpi. Tekä ngü la, füh ngü ka-ewü ayia areke gbü jia Me. Füh Me angbü de tadu, angü wü kpapa la koro eyi *vüngüte kani. Füh Me ayia aza ewü agbü züka sü ka-ye agbü kpi, te engu reke füh ewü ne.

¹⁷⁻¹⁸ Ta gügü, Me mala ngü fū Abarayama, gü ba, "Mene kundu kundu ye, te ni mala nganga füh ye ne, wüh ena abi engu gbü nguwa *Yisaka. Angü ni, Me, ni fe ka-ni Yisaka."§ Gbü gara sikpi, füh Me ayia are maguma Abarayama, gü ba, "Ye za ye ye biringbö la, de ye wa engu füh ni la'bi tete."* Amba Abarayama fi nga ngü la de maguma ye 'basu 'basu ne nda de. Ah le ngü ka Me la zu de maguma ye biringbö. Füh ah ayia aza Yisaka, anü di, teka awa, ato la'bi tete, baka te Me mala fefe na la. ¹⁹ Angü Abarayama wu eyi, gü ba, wazi Me ladü teka amere wü ngü 'buru. Füh ah afi ngü la, gü ba, "Te ah bala, Me ena adu azükü Yisaka gbü kpi la." Füh Abarayama ayia aza mere maguruma ka-ye, teka awa ye ye la di. Füh Me ayia atiri engu, gü ba, "Abarayama deyü, ye ce engu ece! Ye mere e awa engu de!" Ngü la, ah ge baka te Me zükü Yisaka eyi gbü kpi la fanü fanü.

²⁰ Yisaka† ta kpah de kpapa te le ngü ka Me de maguma ye biringbö. Füh engu

* 11:8 11:8 Mü ena amaka ngü ka Abarayama te Me i engu, gbü Gina Ngü 12:1-7. † 11:11-12 11:11-12 Mü ena amaka ngü te Me mala fū Abarayama teka wü kundu ye ne gbü Gina Ngü 15:5. ‡ 11:11-12 11:11-12 Mü ena amaka ngü ka ye Abarayama te wüh bi la gbü Gina Ngü 18:10-12bete Gina Ngü 21:1-7. § 11:17-18 11:17-18 Mü ena amaka ngü te Me mala la gbü Gina Ngü 21:12-13. * 11:17-18 11:17-18 Mü ena amaka ngü ka Abarayama te yia teka ato ye ye füh Me la'bi tete ne, gbü Gina Ngü 22:1-14. † 11:20 11:20 Mü ena amaka ngü te Yisaka mala füh wü di ye ne, gbü Gina Ngü 27:25-29 bete 28:1-4.

ayia aza wü di ye 'basu ne, wü *Yakobo ake Esawu, ayia asere ngü ta te Me mala fū ewü, gü ba, "Te gara, ni, Me, ni ena ato tö la 'buru fū wü ne."

²¹ Yakobo le ta kphah ngü ka Me de maguma ye biringbö. Ta te engu wu, gü ba, sikipi ka kpi ka-ni eyi ghamari ne,‡ fū ah ayia aza wü kundu ye 'basu, wü di *Yüsefa, ayi-ta Me tüngü ewü, de Me to wazi fū ewü. Fū ah ayia ari te-ye te nghanba ka-ye, agbo nga Me.

²² Yüsefa le ngü ka Me kphah de maguma ye biringbö. Yüsefa ngbü ka-ye ta agbü *Ezepeto kpala, teka mere bi wü re. Te engu gbe tete, fū engu ayia afi nga tö, ta te Me mala nganga fū ewü, gü ba, "Te gara, ni, Me, ni ena ato tö la fū wü kundu ye Abarayama ne." Fū Yüsefa awu, gü ba, te ah bala la, te gara wü nguwa ani ena adu, ago angbü agbü tö engu la. Fū Yüsefa ayia amala ngü fū wü di ye kpekpeke, gü ba, "Te gara, te wü yia eyi, teka ago agbü tö ka-ani la, wü za kö ni, wü go di agbü tö te Me ena ato fū ani ne."

²³ De yi fi la kphah nga ngü ka wü wö ye *Müse.§ Wü wö ye Müse, wüh ta kphah wü kpara, te ewü le ngü ka Me de maguma wü biringbö. Gbü wü re la, miri ka *Ezepeto to ta riri, gü ba, "Ah le de wüh di emörö wü jürü jaji komoko ka wü *Yisarayeale, te wüh ngbü ebü ewü ne, 'buru asidi." Amba, baka te wüh bi Müse, wü wö ye na ake ni ye na ceka ta engu baka züka mbarase, te ngü kaka ena areke gbü jia Me afa sü. Te di bala, fū ewü ayia ai maguma wü, ayia aza vürü Müse, awo teka fe bata, angü wü marajümiya ka miri ena amaka engu. Fütanga ngü la, fū mbarase ka miri, ye würüse, anü amaka vürü Müse. Fū ye würüse la aza engu, adu di, teka aga engu engu ye tete, angü mbarase la su ta gbü jijia fa sü.

²⁴ Kpah bala, cu *Müse le ngü ka Me kphah de maguma ye biringbö. Kükürü de, angü baka te engu ga koro mere komoko tete, fū engu awu cinga, te wü di engu Yisarayeale ngbü ezü, esaka wü kpara ka Ezepeto ne. Fū ah adu afi, gü ba, "Ni le de wüh i ni kundu ye miri ka Ezepeto tüne de. Angü ni ka-ni nda-ni de engu Yisarayeale." ²⁵⁻²⁶ Te engu ena ao jia ye ta teka züka wü e, te miri ka wü Ezepeto la ngbü eto fū ye ne, de bane engu ü ta eyi angbü de tadu teka ngü la. Amba Müse le ace ngü ka Me, teka tadu ka wü e füh kotö, te ena anza anza ne, nda de. Angü ah wu eyi, gü ba, wü di engu Yisarayeale

ka-wü de wü kpara ka Me, te Me le ngü ka-ewü fa sü. Fū Müse ayia ale teka de ni zü cinga, teka ale ta-ngü te wü di engu ni ni, wü di engu Yisarayeale. Fū wü kpara ka Ezepeto angbü efala engu ka ngü la. Amba Müse fi nga ngü ka-ewü la nda de. Ah ngbü eo jia ye 'duwa teka Miri te Me ena atima te gara, teka aküwa wü kpara ka-ye ne. Kükürü de, angü Müse wu eyi, gü ba, wü züka ngü te Me ena ato ne, ena afa wü züka ngü ka miri ka Ezepeto la ka.

²⁷⁻²⁸ Fütanga mere bi wü re, fū Müse ayia aküwa wü di engu Yisarayeale esaka miri ka Ezepeto la.* Angü Me sere eyi fefe, gü ba, "Ni ena atima *malayika ka-ni, teka ato kuru te wü kpara ka Ezepeto la." Fū Müse ayia amala ngü fū wü di engu Yisarayeale, gü ba, "Ah le de wü za ngüte kambiliki, de wü 'büra eküte wü möngiti ka-wü. Te malayika ka Me la wu ngüte kambiliki la, ah ti amörö wü jaji ka-wü de." Fū wü di engu Yisarayeale ayia amere ngü la bala, baka te Müse mala la. Fū malayika la ayia akoro amömörö bü wü jaji ka wü kpara ka Ezepeto. Fū Müse ayia aza wü di engu Yisarayeale, akoro de ewü agbü Ezepeto asidi, anü sü de ewü agbü gü. Miri ka Ezepeto le ta atiri ewü agbü Ezepeto kpala, amba Müse le aje riri ka miri la nda de. Ah je ka-ye ta nzö ngü ka Me, angü ah wu eyi, gü ba, wazi Me fa wazi miri ka Ezepeto la ka-ye afa.

²⁹ Wü di engu Yisarayeale la, ta kphah wü kpara, te ewü le ngü ka Me de maguma wü biringbö. Angü, baka ta te wüh nü koro eküte mere siti *yi-ngu ne, fū Me ayia amala fū ewü, gü ba, "Wü kö ngu la ekö." Fū ewü ayia aje ngü ka Me la. Fū Me ayia aü kaje fū ewü gbü jia ngu la. Fū wü di engu Yisarayeale ayia akö ngu la füh kagara sü. Fū wü marajümiya ka miri ka Ezepeto, ta te wüh ngbü eliki nga wü di engu Yisarayeale ne, ayia ari kphah gbü nga wü di engu Yisarayeale la. Te wü marajümiya la koro tete kpa etü ngu la, fū Me ayia alügü ngu la da ye. Fū ngu la ata ewü, amörö ewü 'buru.†

³⁰ Fütanga ngü la, te wü di engu Yisarayeale nü koro tete agbü tö ka-wü, wüh ce ngü ka Me nda-wü de. Wüh ngbü fi bü ele ngü ka Me de maguma wü biringbö. Fū ewü akpo angbü ejiji ekere 'baranga ka gara mere köti de iri ye Yeriko ne, teka wü sikipi lorozi. Kükürü de, angü ah de ngü te Me mala fū ewü me-ye. Fū 'baranga la ayia amürü, atü 'buru köto. Fū wü di engu Yisarayeale

‡ 11:21 11:21 Mü ena amaka gba te Yakobo ku teka wü di ye Yüsefa gbü Gina Ngü 48:1-22. § 11:23 11:23 Mü ena amaka ngü ka wü wö ye Müse gbü buku ka Gogo ka wü Yisarayeale 2:1-10. * 11:27-28 11:27-28 Mü ena amaka ngü la gbü buku ka Gogo ka wü Yisarayeale 12:1-32. † 11:29 11:29 Mü ena amaka ngü la gbü buku ka Gogo ka wü Yisarayeale 14:1-31.

la ayia ari gbü mere köti la, amere gü, amömörö wü vügü ka-wü la 'buru, kphah baka te Me mala fü ewü ne.‡

³¹ Gara würüse ta ladü agbü Yeriko la de iri ye Rakaba. Engu kphah de kpara te le ngü ka Me de maguma ye biringbö. Angü ah küwa ta gara wü di engu Yisaraye, te ewü zi te-wü, nü ri agbü Yeriko ne. Teka ngü la, gbü sikipi te wü di engu Yisaraye mörö wü kpara gbü Yeriko tete na ne, wüh mörö Rakaba, de wü mürü ye, nda-wü de. §

³² Wü di engu wüna, ma ena amala fü yi, agü neh fe? Angü gina wü kpara ka Me, ta te ewü le ngü ka Me de maguma wü biringbö ne, wüh sibi fa sü! Dada te ma ena amala nga ewü biri biri 'buru ne, nda ma. Baka Gidona,* Baraka,† Simasona,‡ Yefeta,§ *Davidi bete Samüwele,* de mere bi wü gara *mürü dofo ka Me, te ma ti atanga iri ewü anza 'buru ne, nda-ra de. ³³ Me mala ta ngü fü wü kpara la biri biri 'buru, gü ba, "Ni ena ato wazi fü wü." Fü wü kpara la ayia ale ngü ka Me la de maguma wü biringbö. Fü Me ato kphah wazi la fü ewü fanü. Teka ngü la, fü wü gara ewü amaka ta wazi, teka agü gü di de wü gara miri, te ewü di de wü vügü ka-ewü ne, fü ewü ayia aza esaka ewü. Wü gara wü kpara ka Me la, wüh de wü miri. Fü ewü amaka wazi, teka adi ekolo ngü ka wü kpara ka-wü tîne ereke areke. Nda wü gara, kami le ta teka amörö ewü, azü, fü Me ayia aküwa ewü gömö wü kami la. ³⁴ Nda wü gara, wü vügü ka-ewü le ta asötö ewü, amörö, anga acuru ewü acuru gbü wa. Fü Me ayia aküwa ewü gbü wü kpeke ngü la. Wazi wü gara ewü ta nda ma. Fü Me ayia ato wazi fü ewü. Fü ewü adu akoro kpeke wü kpara. Fü ewü ayia agü gü de wü vügü ka-wü, afa wü vügü la ka. ³⁵ Wü gara ewü ta de wü würüse, te wü di engu ewü kpi akpi. Fü wü würüse la alala fi bü gbü ngü ka Me, de maguma wü biringbö. Fü Me ayia azükü wü di engu ewü la gbü kpi.

Wü gara kpara ka Me maka ta cinga teka ngü ka Me. Angü wü vügü miki ta wü gara ewü, mörö ka. Amba wüh le ace ngü ka Me nda-wü fi de! Kükürü de, angü wüh le ngü ka Me de maguma wü biringbö. Wüh wu kpo, gü ba, Me ena adu azükü ani te gara, fü ah ato to küte fü ani. Fü ani adu angbü tîne de wü Me fi mere badi. Angü wüh le amaka züka ngü füh kotö

sene nda-wü de. ³⁶ Wüh ngbü süsüma wü gara wü kpara ka Me la ta asüsüma. Fü wü kpara angbü efala gara ewü. Wüh i wü gara ewü ta, gü gbü ku. ³⁷⁻³⁸ Wüh sötö ta gara wü kpara ka Me la, mörö de teme. Wüh doro wü gara ewü, mörö ta de maguruma. Wüh de tü wü gara, kolo cu gbö! Amba wü kpara ka Me la ce ta ngü ka Me, teka wü cinga la, nda-wü de. Fü ewü adu aliki gara ewü agba wü kphah cu asidi. Fü wü kpara ka Me la akpe angbü ewo te-wü tîne agbü gü, de kpa wü kükürü. Bongo eküte ewü tîne kphah ma. Fü ewü angbü eto tîne bü wü konü eküte wü. Fü ewü angbü endondoro tîne bü faaa! Sü te wüh ena angbü tete mbi bane, tîne kphah ma. Wüh ngbü enü da era bü gbü wü gö da, de wü görö-zi. Amba gbü wü cinga la 'buru, wüh lala ka-wü fi bü gbü ngü ka Me de maguma wü biringbö. Wüh ta de wü kpeke kpara ka Me fanü fanü! Angü wü ngü füh kotö ne du ngbü gbü jia ewü, baka töndö ngü kükürü.

³⁹ Dela 'buru wü ngü ka gina wü kpara ka Me ta gügü, te ewü le ngü ka Me de maguma wü biringbö ne. Fü ngü ka-ewü la areke gbü jia Me afa sü. Amba *küküwa ta te Me mala nganga, gü ba, "Ni ena ato fü ewü ne," wüh maka füh kotö sene nda-wü de. ⁴⁰ Kükürü de, angü Me le de wü gina wü kpara la maka küküwa fi mere badi, kphah baka te nih maka, 'duwa teka ngü ka Yesu ne.

12

¹ Wü di engu wüna, dela ngü ka diri wü kpara ka Me ta gügü ne. Wüh le ta ngü ka Me, zu de maguma wü biringbö. Enatikine, wüh ladü agbü kpi kpala eceka nih. Te di bala, ah le de nih rü kphah kpekpeke baka nda-ewü la. Nih ce wü *siti ngü asidi, teka fü nih anü de ngü ka Me kpa engagira nü. Nih mere e andiri, ace ngü ka Me la de. Nih tüka te-nih, de nih nü fi bü kpa engagira nü. ² Nih o jia nih eküte Yesu, angü engu ü kaje ka Me fü nih meye, teka fü nih anü akoro kpa te adu kaje la. Nih fi la nga cinga te Yesu zü teka nih ne. Te di bala, ah le de nih lala fi bü gbü nga Yesu, da etüka te-nih gbü wü cinga kanih, kphah baka nda Yesu. Angü wüh za engu, bere füh *rü gbegete. Fü ah ayia akpi. Wüh ngbü ta efala engu, da eto lümü tete. Amba ah ce ngü ka Me, teka ngü ka lümü la, nda de. Ah o jia ye nzö teka

‡ 11:30 11:30 Mü ena amaka ngü ka Yeriko la gbü buku ka Yosuwa 6:1-21. § 11:31 11:31 Mü ena amaka ngü ka Rakaba la gbü buku ka Yosuwa 2:1-21 bete 6:22-25. * 11:32 11:32 Mü ena amaka ngü ka Gidona gbü buku ka Wü E-kolo-ngü 6 - 8. † 11:32 11:32 Mü ena amaka ngü ka Baraka gbü buku ka Wü E-kolo-ngü 4:6-16. ‡ 11:32 11:32 Mü ena amaka ngü ka Simasona gbü buku ka Wü E-kolo-ngü 13 - 16. § 11:32 11:32 Mü ena amaka ngü ka Yefeta gbü buku ka Wü E-kolo-ngü 10:6 - 12:7. * 11:32 11:32 Mü ena amaka ngü ka Samüwele gbü 1 Samüwele 1 - 28.

tadu, te ni ena amaka te gara ne. Fū engu ai maguma ye, arū kpekpeke. Enatikine, engu ladū agbū kpī, gbū kokpa ka Me, baka Mere Miri.

Dene riri ka Me, teka fū nih adi etūka te-nih di,

gbū wū cinga ka-nih

³ Wū di engu wūna, fanū fanū, ah le de yi fi la nga ngū ka Yesu, ta te wū vūgū kaka kpū engu di 'duwa sūrūsūrū ne. Wūh to ta mere cinga te Yesu, amba Yesu ce ta ngū ka Me nda de. Te di bala, ah le de yi rū kpekpeke kpah bakaka. Yi mere e ace ngū ka Me teka ngū ka cinga de. ⁴ Ma wu eyi, gū ba, siti wū kpapa ngbū eyi eto cinga te yi, teka ngū ka Yesu. Amba, wūh mōrō gara sūka yi nda-wū la kpah de. Te di bala, ah le de yi rū kpekpeke! ⁵⁻⁶ Nih de wū di Me. Te di bala, ah le de yi fi la nga zūka ngū, ta te wūh ba gbū *Ngari Me gūgū, gū ba, "Me ngbū erī nih kpekpeke, angū nih de wū di ye na, te engu ngbū ele cu de maguma ye. Me ngbū ece wū cinga angbū emere nih bala, angū ah le de jia nih mba amba, teka fū nih andri, akoro kpekpeke. Te di bala, ngū ka wū cinga la mere e asiti fingangū ka-nih de."*

⁷ Wū di engu wūna, te cinga ngbū emere nih la, nih i maguma nih ai, de nih rū kpekpeke. Kūkūrū de, angū gbū wū ngū la, Me ngbū dela erī nih, angū nih de wū di ye na. Te wū di mü ladū la, mü tī arī ewū de? Mü tī eyi arī ewū kpekpeke, teka fū jia ewū amba. ⁸ Yi fi la nga ngū te Me ngbū erī yi di ne. Te yi le de Me rī ani de la, yi ena adi zu wū di Me, neh baye baye? ⁹ Ta te nih di la wū jūrū jaji ne, nih je riri ka wū wō nih de? Wū wō nih la ngbū ta erī nih, teka de nih koro kpekpeke. Ah bala de? Te di bala, ah le de Me di kpah erī nih, angū engu me-ye de mere Wō nih. Ah ngbū emere bala teka de nih le riri ka-ni, fū nih akūwa te gara, angbū fi mere badi kpaka ni agbū kpī. ¹⁰ Wū wō nih la ngbū ta erī nih, baka ngū te di 'be te nga jia wū. Amba Me ngbū nda-ye erī nih, teka de nih di emere wū ngū 'buru mbi, baka te engu ngbū ele, teka de ngū ka-nih ngbū kpah baka nda-ni. ¹¹ Ta te wō mü ngbū erī mü kpekpeke ne, mü ngbū ta de tadu teka ngū la? A'a! Ngū la ngbū ta eke te mü efa sū! Amba te mü i maguma mü gbū ngū te Me ngbū erī mü di la, mü ena adu amaka wazi bete zūka ngū, teka angbū emere wū ngū, te ena areke gbū jia Me.

¹² Wū di engu wūna, dela ngū te ma le amala fū yi. Ah le de yi ce ngū ka maguma 'basu 'basu. Yi i maguma yi, fū yi arū

kpekpeke. ¹³ Ah le de yi di emere wū ngū te zūka kaje, ba e te Me ngbū ele, teka fū wū bu yi, te ewū ndri gbū ngū ka Me la de ne, adi efa nga yi. Angū te yi mere bala la, wūh tī adūrū te kaje ka Me de. Wūh ena amaka wazi, fū ewū arū kpah kpekpeke baka yi.

Dene siti ngū te ena amaka yi, te yi ce ngū ka Yesu la

¹⁴ Wū di engu wūna, ah le de yi o to yi 'buru, teka adi engbū de wū bu yi de maguma yi biringbō. Kpah bala, ah le de yi o to yi kpah, teka adi emere ngū te ena areke gbū jia Me. Angū te ngū ka-yi reke gbū jia Me nda de la, yi tī akoro agbū sū ka Me agbū kpī ne kū de. ¹⁵ Ah le de yi ceka te-yi 'be, angū gara yi ena adūrū te kaje ka Me asidi. Kūkūrū de, angū te wū gara yi kpo eyi emere *siti ngū la, ngū la ena asiti fingangū ka wū bu ewū, fū ewū adu ace ngū ka Yesu. ¹⁶ Yi ceka te-yi 'be. Yi mere e adi egiri wū wūrūse anga wū komoko 'daaa de. Yi o jia yi bū duu te wū wara yi, anga watī yi biringbō. Kpah bala, yi mere e aceka ngū ka Me baka tōndō ngū kūkūrū ne de. Yi fi la nga ngū ka Esawu, ta te engu mere ne. Engu ta de gina ye *Yisaka me-ye. Te di bala, wō ye na ena afe ta engu, ao ba mūrū kōtī sidi nga ye. Fū Me ato ta mere wazi fefe. Amba ngū la mere ta te-ye bala nda de. Kūkūrū de, angū ngū ka Me ngbū ta gbū jia Esawu baka kūkūrū ngū. Angū gbū gara sīkpī, tala yia ta mere Esawu. Fū ah adu amala ngū fū engu ni ye, de iri ye *Yakobo ne, gū ba, "Te ye to mba engu zū-e fū ni la, ni ena ace wazi, de te Me ena ato fū ni baka gina ye ne, 'buru fū ye." Ngū ka e-mazū siti ta fingangū ka Esawu bū me-ye, fū ah ayia ace ngū ka Me la. ¹⁷ Sidi nga ngū la, fū Esawu ayia anū kpaka wō ye, anda'ba te-ye fefe, de ah ku gba fū Me, teka de Me to wazi fū ni, de ni ngbū te gara da wō ni. Wō ye na tī ta eyi ato wazi la fefe na? A'a, ah tī nda de! Fū Esawu angbū egiri kaje, da eku gba cu de ngura, teka de ni reke ngū la, amba ngū la siti ka-ye ta eyi 'buru 'buru. Kūkūrū de, angū Esawu ceka ta ngū ka Me baka tōndō ngū. Te di bala, wū di engu wūna, yi mere e angbū efa ngū ka Me baka Esawu ne de.†

¹⁸ Wū di engu wūna, cūrū tī amere nih, da enū kpaka Me, tīne de, teka ngū ka *zūka maguma kaka guvu Yesu ne. Ta gūgū, te Me koro ro mō tete fū wū kundu nih, kpa fūh mere da de iri ye *Sinayi ne, ngū la ta baye? Ngū la to ta mere cūrū te ewū de? Angū wūh wu ta mere te-wa, te ngbū eci, da embele sū ambele fūh da

* 12:5-6 12:5-6 Mü ena amaka ngū la gbū buku ka Ngū Mani 3:11-12. † 12:17 12:17 Mü ena amaka ngū ka Esawu la gbū Gina Ngū 25:29-34; 27:30-40.

la. Fū sū la ayia atī 'duwa ngbuka! Fū ūlele angbū eū 'duwa lelele! ¹⁹ Fū ewū angbū eje ri Me, te ngbū ero mō fū ewū de mere ri ye, da engbōngbō sū 'duwa baneh-ene-la! Fū ngū la ato mere cūrū te ewū. Fū ewū anda'ba te-wū fū *Mūse, gū ba, "Ani le de Me ro mō tīne cu me-ye fū ani de." ²⁰ Fū Me ayia amala ngū fū ewū, gū ba, "Wū mere e amofō sū ne de! Angū, te kpara li kpa fūh da kpakine la, ah le de wūh mōrō engu amōrō! Anga te meme li kpakine la, wū sōtō engu de teme, mōrō asidī." Fū cūrū adu ta ari te wū kpara la afa cu sū. ²¹ Cūrū ngbū ta kpa cu emere Mūse amere. Fū ah amala ta ngū, gū ba, "Kūte ni ngbū eyī ayī ka cūrū!" [§]

²² Wū di enga wūna, to ngū ka Me te engu to fū nih ne, ah de mere zūka ngū te reke fa sū. Angū nih tī eyi akoro kpaka Me, agbū sū kaka agbū kpī, te wūh ngbū eī, gū ba, "To Yerūsalema" ne.* Fū nih angbū egbo nga irī Me kpala, de wū mere bi wū *malayīka kaka de mere tadu. ²³ Nih ena abiti te-nih tundu de wū *kpara ka Yesu 'buru agbū kpī, angū Me ba irī nih eyi 'buru gbū buku ka-ye. Nih ena angbū egbo nga irī Me agbū kpī kpala, de wū gara kpara kaka, de te wūh kpī eyi ne. Angū wūh ka-wū tītine ladū, da egbo nga irī Me kpala. Nih ena awu Mere Miri ka-nih, Yesu, te ena aye sūka ngū ka wū kpara 'buru me-ye mbi mbi. ²⁴ Angū Yesu kpī eyi teka ngū ka-nih. *Ngūngūte na fa nih gbū wū *siti ngū ka-nih eyi. Ta te Kayīna mōrō Abele tete ne, ngūte Abele ngbū ta eku gba fū Me, teka de Me to kuru te Kayīna, teka siti ngū, de te engu mere la.† Amba ngū ka ngūte Yesu reke ka-ye fa sū, angū ngūte Yesu ngbū eku gba fū Me, teka de Me boro siti ngū ka-nih. Te di bala, nih mere e ace ngū ka Yesu de.

²⁵ Wū di enga wūna, yi ceka ngū la mbi mbi mbi! Yi mere e amere ngū ka Yesu de maguma yi 'basu 'basu de. Ta gūgū, Me ngbū ero mō fū wū kpara ka-ye fūh kotō sene, gōmō Mūse de wū gara *mūrū dofo. Wū kpara ta te ewū mere ngū la de maguma wū 'basu 'basu ne, wūh kūwa eyi? A'a, wūh kūwa nda-wū de! Tītine Me ngbū ero mō fū nih cu gōmō Yesu, te di de Yeye ne. Te ah bala, te nih ngbū emere ngū ka Yesu de maguma nih 'basu 'basu la, nih ena akūwa, neh baye baye? ²⁶ Angū, ta gūgū, te Me ro mō tete fū wū kundu nih ne, tō yiki ta ayiki teka ri Me la. Sidi nga mere bi wū re, fū Me adu amala ngū fū

gara mūrū dofo ka-ye, gū ba, "Te gara ni ena ayiki tō ne, de wū e gbū ye 'buru, abe kpa te kpī mini."‡ ²⁷ Si-ngū gbū ngū la neh baye? Si-ngū la ena adi bane, angū Me ena ayiki wū e, de te engu mere fūh kotō ne 'buru, fū ah anza ngū ka-ewū. Me ena anza ngū ka wū e fūh kotō ne, neh teka ne? Ah ena anza ngū ka wū e la bala, teka de ngū ka-ni, Me, ngbū duu me-ye, fi mere badi.

²⁸ Wū di enga wūna, dela ngū te ma le amala fū yi. Nih mere e ace ngū ka Yesu de. Nih lala fi bū gbū nganga. Me ka-ye de Mere Miri ka-nih. Nih nda-nih de wū di ye na. Ah le de nih di egbo nga irī Me, da ecu ngūngū na de maguma nih biringbō. ²⁹ Kūkūrū de, angū wazi Me fa sū. Engu ka-ye ba mere wa, te ena acuru wū kpara 'buru, te ewū le ngū kaka de la.

13

Dene wū ngū te ena areke gbū jia Me

¹ Wū di enga wūna, ah le de yi di ele te- yi esūka yi, angū yi tīne eyi 'buru wū di enga ni biringbō, guvu Yesu Kurisito. ² Te wū ganzi kpara koro agba yi la, fanū fanū, ah le de yi za ewū gbū mūrū ba wū ngba ka-yi tete. E-wu neh da, wū kpara de bala, wūh ena adi ka-wū wū *malayīka ka Me, te Me tima ewū me-ye fū yi. Angū wū gara kpara za ta wū malayīka gbū mūrū kpa bala, amba wūh wu de, gū ba, wūh de wū malayīka ka Me.* ³ Te wū gara wū bu yi ngbū ezū cinga, anga wūh gū wū gara ewū gbū ku la, ah le de yi di ewu cinga ewū, fū yi adi ele ta-ngū te ewū. E-wu neh da, te gara yi ena azū cinga kpa baka nda-ewū la.

⁴ Ah le de yi di eo jia yi bū duu te wū wara yi, anga wū wati yi, biringbō, angū dela ngū te Me ngbū ele. Yi mere e adi emere waza de. Anga te yi za te-yi la de la, yi mere e adi egīrī wū wūrūse, anga wū komoko 'da 'da 'da kpa de. Angū Me ngbū eceka wū ngū de te ye yi ngbū emere la. Engu ena ato kuru te wū kpara, de te ewū ngbū emere wū *siti ngū de bala ne, ato.

⁵ Yi mere e adi ekpi gūmū e de. Yi mere e ao maguma yi teka mere bi jiasē kpa de. Angū Me de kpara te ngbū eceka kpī fūtanga nih me-ye. Engu mala eyi cu me-ye, gū ba, "Ni tī ace nih kpikpi nih kpo fi de." Ah le fū nih angbū de tadu teka ngū la. ⁶ Nih i maguma nih, nih rū kpekpeke, angū nih wu ngū de te wūh ba gbū *Ngari

‡ **12:20** 12:20 Mū ena amaka ngū la gbū buku ka Gogo ka wū Yisaraye le 19:12-13. § **12:21** 12:21 Mū ena amaka ngū la gbū buku ka Manda nga Riri 9:19. * **12:22** 12:22 Wūh ngbū kpa eī sū la, gū ba, "Da Siyona". † **12:24** 12:24 Mū ena amaka ngū ka Kayīna ake Abele la gbū Gina Ngū 4:1-12. ‡ **12:26** 12:26 Mū ena amaka ngū la gbū buku ka Agayi 2:6. * **13:2** 13:2 Mū ena amaka ngū la gbū Gina Ngū 18, 19.

Me, te gù ba, “Me ladü tundu de nih, engu ngbü eto wazi fù nih ka-ye me-ye. Te di bala, cürü mere e amere nih tìne de, angü wazi wü vügü tì afa nih nda de.”†

7 Ah le de yi fi la nga ngü ka wü *kovo, ta te ewü ri yi de ngari Me te enga gina ne. Wüh ngbü ta emere ngü baye? Te di bala, ah le de yi le ngü ka Yesu *Kurisito de maguma yi biringbö, kpah baka nda-ewü la. 8 Yesu Kurisito ti afü te-ye nda de. Te kpo kü gügü, akoro enatikine, anü kpa engagira nü fi mere badi, ah ka-ye fi da ye.

9 Yi ceka te-yi 'be teka wü mürü mani. Te wü gara kpara koro da erí yi de wü gara riri, te di kpikpi ye, te ah baka nda Yesu nda de la, de yi mere e ale riri ka-ewü la nda-yi de. Anga te wüh le asiti fingangü ka-yi, teka ngü ka wü e-mazü, gü ba, “Yi mere e azü so wü gara nü de la,” yi mere e aje ngü ka-ewü la kpah de. Angü kpara ti amaka *küküwa teka ngü ka e-mazü nda de. Ngü de te ena aküwa yi, ah ka-ye de wazi te Me ena ato fù yi, teka *züka maguma ye. 10 Angü Yesu ka-ye baka *kambiliki, te wüh mörö, teka de *ngüngüte reke ngü eze ngba nih de wü Me. Amba wü kpara, de te ewü to maguma wü, teka ngü ka diri gele ne, Yesu ti ale ta-ngü te ewü nda de.

11 Gbü diri gele ka wü *Yisaraye, mere *mürü gele ngbü eza nü, fù ah awa. Fù ah aza ngüngüte la, anü di kpa *esambü ka Me. Fù ah ayia ato ngüte la fù Me, teka areke ngü di eze ngba wü kpara de wü Me. Amba kö wü nü la, wüh ena aza, anü di, acuru kpa edere sü. 12 Dela si-ngü te wüh mörö Yesu di kpah kpa edere sü ne, angü engu kpi baka kambiliki, teka areke ngü eze ngba nih de wü Me, teka de nih koro wü di Me. 13 Te di bala, wü di enga wüna, ah le de nih lala fi bü eküte Yesu. Ngü ma, te wüh fala nih, anga wüh to lümü te nih, kpah baka te wüh mere eküte Yesu ne la, nih mere e ace nganga de, nih lala fi bü eküküte. 14 Angü züka sü fù nih füh kotö sene nda ma. Züka sü ka-nih ka-ye 'duwa agbü kpi kpaka Me, te nih ena anü te gara, angbü gbügbü na ne. Te di bala, ah le de nih o jia nih fi bü teka züka sü la.

15 De-nih, wü *kpara ka Yesu, nih ti angbü ewa wü nü, baka ta te wü kundu nih ngbü emere ne, nda-nih tìne de. Amba ah le fù nih angbü egbo nga iri Me, te nga wü sikipi 'buru. Angü ngü la ena ato tadu te Me, teka te nih to maguma nih eyi fanü fanü fù Yesu ne. 16 Ah le de yi di kpah emere züka ngü, da ele ta-ngü te wü bu yi de maguma yi biringbö. Angü dela kpah gara ngü, te ena areke gbü jia Me. Te mü

ngbü emere bala la, ah ge baka te mü ngbü eto züka takpa fù Me.

17 Ah le de yi di kpah eje ri wü *kovo, te Me o ewü gbü nzö yi ne, angü wüh ngbü eceka kpi fütanga yi ereke areke me-wü. Kükürü de, angü Me to tima la fù ewü me-ye. Ah ena ayi-ta ewü te gara, teka tima la. Te di bala, te yi ngbü eje riri ka-ewü ereke areke la, ngü la ena ato tadu fù ewü. Amba, te yi le aje ngü ka-ewü de la, ngü la ena ato mere cinga fù ewü. Tek a ngü la, yi ti amaka züka ngü kpah de.

18 Wü di enga wüna, yi di kpah fi bü eku gba fù Me tüngü a. A wu eyi, gü ba, ngü ka-a ka-ye mbi gbü jia Me, angü a o to a eyi, teka adi emere wü ngü, te engu ngbü ele. 19 Ah le de yi di kpah eyi-ta Me fere kpekpeke, teka de Me ü kaje fere, fù ra akoro kpaka yi kpala kere.

Dene adu ngü ka-ra fù yi

20-21 Wü di enga wüna, Me di de yi, da eto wazi fù yi, teka fù yi adi emere fi bü wü züka ngü, te ngbü ereke gbü jijia. Ah le de Me ngbü fi bü da ereke maguma nih, teka ngü ka Miri Yesu, teka fù ngü ka-nih areke gbü jijia.

Nih gbo nga iri Me,

te tima Yesu, te kpi teka areke ngü eze ngba nih de wü ye ne.

Nih gbo nga iri Me,

angü Me zükü Yesu gbü kpi eyi.

Nih gbo nga iri Yesu,

angü Yesu ngbü eceka kpi fütanga nih me-ye ereke areke,

baka kpara te ngbü eceka kpi fütanga wü kambiliki ka-ye.

Gbo nga e ngbü te iri Yesu fi mere badi!

Ah di bala!

22 Dela mba enga ngü te ma le amala fù yi, teka ato wazi di fù yi gbü ngü ka Me. Ah le de yi gu maguma yi, yi o to yi, teka adi eje ngü la.

23 Gara züka ngü ladü, te ma ele amala fù yi. Enga ni nih, Timoteyo, ta te wüh i engu, gü gbü ku ne, wüh ce kpa tete na eyi! Ma fi, gü ba, engu ena akoro kpaka ra kpakine tìtine. Te ah bala la, ma ena aza engu kpo, fù a akoro kpaka yi kpala ake di.

24 A to mandí ka-a fù wü cögbörö kpara esüka yi, wü kpara ka Me, de kpala 'buru. Wü di enga ni nih, wü kpara ka Italiya, to kpah mandí fù yi cu fa sü. 25 Me ngbü de yi kpala 'buru, de *züka maguma ye. Ah di bala.

† 13:6 13:6 Mü ena amaka ngü la gbü Ci ka wü Davidi 118:6.

Dene ngü ta te Yakobo ba fü wü kpara ka Me

Masere si-ngü

Yakobo ba köcökpa ne me-ye. Ah de mene *Yakobo te di de engä ni ye Yesu ne. (Mü ena amaka ngü kaka gbü Matayo 13:55, bete Galatiya 1:19.) Te engä gina, te Yesu kpo da endoro, da eri wü kpara, de ngari Me ne, Yakobo de wü gara wü di engä ni ye le ngü ka Yesu nda-wü de. (Mü ena amaka ngü la gbü Yüwane 7:1-5.) Amba fütanga züzükü ka Yesu gbü kpi, fü ewü adu afü maguma wü, ale ngü ka Yesu. (Mü ena amaka ngü la gbü Mürü Tima 1:14.) Fütanga ngü la, fü Yakobo adu akoro ta mere *kovo esüka wü *kpara ka Yesu agbü Yerüsalema. (Mü ena amaka ngü la gbü Mürü Tima 12:17; 15:13; 21:18.)

Fü Yakobo ayia aba köcökpa ne fü gara wü di engä *Yisaraye, te ewü le ngü ka Yesu *Kurisito. Angü mere bi ewü ce Yerüsalema, baya agbü nga nzö wü sü biri biri 'buru, teka cinga te wüh ngbü eto te ewü, teka ngü ka Yesu Kurisito ne. (Mü ena amaka ngü la gbü Mürü Tima 8:1; 11:19-20.) Amba ngü te Yakobo ba la, ah kpah teka nih, wü kpara ka Yesu Kurisito, gbü nguwa wü kpara füh kotö ne 'buru.

Yakobo ba mere bi wü ngü fü wü kpara la kpekpeke. Ah mala fü ewü, de wüh rü kpekpeke gbü mere cinga te ngbü emere ewü, teka ngü ka Yesu la, de wüh ce ngü ka maguma 'basu 'basu ace. Ah mala kpah, ga, te mü gü ba, "Ni de kpara ka Me," amba te mü je riri kaka, fü mü amere de la, mü de kpara ka Me nda-mü de. Te mü ena atanga köcökpa ne enatikine, mü ena amaka mere bi kpeke wü ngü gbügbü, te ena ato wazi fü mü, arü di kpekpeke gbü ngü ka Me.

Wü ngü te Yakobo ba gbü köcökpa ne, wüh dene.

Sapita 1:1-18 Ngü teka cinga te ngbü emere wü kpara ka Yesu

Sapita 1:19-27 Mene ngü te reke areke gbü jia Me

Sapita 2:1-13 Ngü teka wü mürü cinga
Sapita 2:14-26 Ngü te ena asere fü wü kpara, gü ba,

nih de wü kpara ka Me fanü fanü

Sapita 3:1-18 Ngü teka komö kpara

Sapita 4:1-17 Ngü teka maguma 'basu 'basu

Sapita 5:1-11 Ngü teka wü kpara de mere bi e esaka wü,

bete ngü teka wü mürü cinga

Sapita 5:12-20 Adu ngü

Dene mandä ka Yakobo fü wü kpara ka Yesu

¹ De-yi wü kpara ka Me, te yi baya ngbü gbü nga nzö wü sü füh kotö ne 'buru, ma ba köcökpa ne fü yi me-ra, de-ra *Yakobo, te ma di de labi ka Me ake Yesu *Kurisito ne.

Dene ngü te ma ele amala fü yi teka cinga

te ngbü emere yi

² Wayi, fanü fanü, wü di engä wüna, te wü cinga te ekoro da emere yi la, yi mere e aza cinga la ba siti ngü ne de. Yi za cinga la ba züka ngü, de yi ngbü ka-yi kpah fi bü de tadu, gbü cinga la 'buru. ³ Kükürü de, angü nih wu eyi, gü ba, cinga la ngbü ere maguma nih, teka fü nih ace ngü ka Me. Amba te nih rü gbügbü kpekpeke la, nih ena amaka wazi gbü ngü ka Me. ⁴ Te di bala, yi i maguma yi ai kpekpeke, teka fü jia yi amba amba, fü yi angbü ba kpeke wü kpara gbü jia Me. ⁵ Yi mere e akpe cürü, da efi nga ngü de. Te yi wu ngü te yi ena amere nda-yi de la, de yi yi-ta Me teka ngü la, angü engu ena agü tamu ngü, de te yi ena amere ne, fü yi me-ye. Angü engu ngbü eto züka ngü fü wü kpara ka-ye de *züka maguma ye biringbö.

⁶⁻⁸ Mba gara engä ngü kpah fi bü ladü te ma ele amala fü yi. Te yi te eku gba fü Me la, yi di eku gba de maguma yi zalü nde 'buru. Yi mere e adi engbü de maguma yi 'basu 'basu ne de. Angü kpara de maguma ye 'basu 'basu de bala ne, ah ge ba mene ngu, de te wege ngbü eyiki engu ayiki. Ah ti arü da ye kiiü ne de. Te mü mere bala, Me ena ato e fü mü, neh baye baye?

⁹ Wü di engä wüna, te gara kpara esüka yi de mürü cinga la, ah le de engu ngbü de tadu, teka ne de, angü Me ena o engu ba mere kpara gbü tima ka-ye, ka Me. ¹⁰⁻¹¹ Te mü di kpah de mere bi wü e esaka mü la, ah le de mü mere e angbü de tadu, teka mere bi wü e ka-mü la de. Mü ngbü de tadu, teka cinga te ena amere mü, teka ngü ka Yesu Kurisito ne. Tekä ne de, angü wü e ka-mü la ena anza ka-wü nda-wü anza, baka yi-rü te ngbü egürü gbü karanga. Ah ena adi kpah bala fü wü kpara, de te ewü o fingangü ka-wü teka mere bi wü e esaka wü. Kpi ena agüka ewü te gara kpah bü agüka.

¹² Wü di engä wüna, te yi ngbü ezü cinga teka ngü ka Yesu la, yi di ei maguma yi ai, da erü kpekpeke. Te di bala, yi ena amaka tadu fanü fanü. Angü te cinga la te ena adu anza la, Me ena akiwa yi, agbo nga yi, zalü fi mere badi. Angü teka ne de, Me mala ta ngü eyi gügü, gü ba dene, "Mene

kpara te le ni de maguma ye biringbö, ni ena aküwa engu aküwa."

¹³ Te cinga ngbü emere mü la, mü kpe cürü de. Mü mere e adi emala, gü ba dene, "Angü Me ngbü ere maguma ni meye, teka de ni ce ngü kaka," ne, mü mere e amala bala de. Angü Me le te-ye de *siti ngü nda kü de. Te di bala ne, Me ena are maguma yi, teka de yi mere siti ngü, neh baye? ¹⁴ Ngü te ngbü emere mü, ah ka-ye de wü siti fingangü, te di kpa emaguma mü. Tekane de, angü gümü wü e ngbü erü kpa emaguma mü, fü ah angbü efiti mü, gegege ba yi-wuru te ngbü efiti si eküte ngili la. ¹⁵ Angü, te mü wu e maka eyi la, fü maguma mü angbü 'duwa kpukpukpu teka e la, fü fingangü ka-mü teka wü e dela angbü efiti mü, de mü mere wü siti ngü. Te mü lala fi bü te mene siti ngü de bala la, ngü la ena ato fü mü, neh ene? Ngü la ena ato kpi fü mü, di bü gbü jia mü fanü.

¹⁶ Wü di enga wüna, yi mere e afi, gü ba, Me ngbü efiti ani me-ye ne, yi mere e afi ngü bala de, angü ah ka-ye de wu. ¹⁷ Wü ngü de te Me ngbü ele amere fü nih ne, ah ka-ye nda 'buru bü wü züka ngü, siti ngü gbügbü nda ma. Wü ra ake fe, de te ewü di kpa tikpi ne, ngbü efü te-wü afü, mbiri sü ake ra-sü. Wö nih Me o wü e la me-ye. Amba engu ti afü te-ye nda de. ¹⁸ Me fe nih eyi, adu afü nih, ao ba wü di ye, angü nih le zu ngü kaka fanü fanü ne eyi. Te di bala ne, nih tine esüka wü kpara füh kotö ne 'buru, gegege ba tari-e, de te wüh ngbü eto fü Me ne.

Dene mene ngü te reke areke gbü jia Me

¹⁹ Wü di enga wüna, ah ti atü fü yi angbü engbü de güje yi mböombö, areke te-yi, angbü nzo, teka adi eje ngü, de te wüh ena amala fü yi. Ah ti kphat atü teka fü yi angbü efi mba nga ngü afi ferrre bane feke, ka mene ngü te wüh etü tete, emala bü kere kere ne. Maguma yi mere e adi enzu kere kere kphat de. Yi fi nga ngü la ferrre feke. ²⁰ Ma mala ngü la fü yi bala kükürü de, angü te yi le angbü züka kpara gbü jia Me la, ah le de maguma yi mere e adi enzu kere kere de. ²¹ De te di eyi bala ne, yi ce wü töndö ngü, ta te yi ngbü emere ne, de wü siti fingangü, te di emaguma yi ne, le 'buru asidi. De yi di ele bü duu ngü ka Me de maguma yi biringbö, angü engu o ngü la emaguma yi me-ye, teka aküwa yi. ²² Yi di emere ngü te yi ngbü eje gbü *Ngari Me ne. Yi mere e aje, ace kükürü de. Ngü ka Me la mere e adi ewü gbü güje yi ba gba kono, te wüh ngbü eu kükürü, ne de. ²³⁻²⁴ Te mü mere ngü ka Me, de te mü ngbü eje ne, de la, mü ena angbü gegege ba kpara te za taratara, aceka gbüra ye gbügbü. Fü ah

ayia anü mari bane, sekele! fü toto airi kaye te kuru gbüra ye, de te engu ceka ne ka. ²⁵ Amba te mü ngbü engbü da efi ngü gbü Ngari Me, da emere wü ngü de gbügbü ne la, ah ena afuru mü gbü ku ka dürü ngü asidi. Fü mü adu amaka mere siti tadu esaka Me teka ngü la.

²⁶ Te gara kpara gü ba, "Ni de kpara ka Me, ni de kpara ka Me," amba te ah ngbü fi bü da emala töndö ngü, ega yiki de wü bu ye, kphat da esoko ewü la, engu de kpara ka Me nda de. Ah ngbü dela efiti te-ye de tete-ye. Me le ngü kaka nda de.

²⁷ Ngü te reke gbü jia Me, ah dene. Ah le de yi le ta-ngü te wü würüse wökö, bete wü di enga cörö, gbü cinga ka-ewü. Ah le kphat de yi ce da emere wü *siti ngü, baka te wü kpara de füh kotö ne ngbü emere ne, asidi, angü ngü la ka-ye esiti gbü jia Me!

2

Dene ngü te ma ele amala fü yi, teka wü mürü cinga

¹ Wü di enga wüna, nih ra eyi fü Mere Miri ka-nih Yesu *Kurisito, te wazi kaka fa nda wü gara kpara füh kotö ne 'buru. De te di eyi bala ne, yi mere e adi ecu ngü wü gara kpara, da efala wü gara afala ne de. ²⁻³ Te yi biti te-yi kpa esambü ka Me, fü mü aceka gara kpara te to züka bongo eküte ye, de züka tüngü gbü kpa ye, te ri kpaka yi, mü ena amala fefe na, agü ba, "Mere kpara, ye kolo kpa engakara nü kpakine, de ye ngbü füh züka da-ngbüngbü ne." Ah mbi. Anga te ah ena adi de mürü cinga, de kala bongo eküte ye, de lö ye kükürü la, mü ena agü fefe na, neh fe? Te mü du mala fefe na, gü ba, "Da-ngbüngbü nda ma, ye nü, ye kolo kpa rü, de ye ngbü fefeh na kpa ekere wü kpara kpa sidi kpala," dela bala züka ngü? ⁴ Dela ngü te Me ngbü ele? Yi eo nda-yi mene kpara, de wü mere bi e esaka ye, kpa engakara nü fü mürü cinga? Yi ga, kpara de mere bi e esaka ye nda me-ye mere kpara fa mürü cinga? Tekane? Te yi ngbü emere ngü ba e la, amba maguma yi ka-ye 'basu 'basu. Dela siti fingangü, te siti gbü jia Me fa sü.

⁵ Wü di enga wüna, yi fi nga ngü la mbi mbi mbi. Yi ngbü efi nda-yi, gü ba, Me ngbü ele ngü ka kpara de mere bi wü e esaka ye, afa nda wü mürü cinga? Yi ceka ngü la 'be! Wü mürü cinga neh fe, te Me fe ewü, fü ewü ale ngü kaka? Te gara, engu ena ato mere bi züka wü e fü ewü afa sü, agbü sü ka-ye agbü kpi kpala, kphat baka ngü ta te engu mala, ga, "Ni ena aküwa mene wü kpara, te ewü ngbü ele ni de maguma wü biringbö ne," fü cinga ka-ewü anza. ⁶ De te di eyi bala ne, yi

ngbü efala wü mürü cinga, neh teka ne? Yi ngbü fi bü ecu ngü wü kpara de mere bi wü e esaka wü. Yi efi nda-yi, gü ba, wüh ena ale ta-ngü te ani? A'a, ah bala de. Wü kpara de mere bi e esaka wü la, wüh ngbü eto kuru eküte yi, da ezoro yi, enü de yi kpa engagira wü miri. ⁷ Wüh kphah de wü kpara, te ewü ngbü efala ngü ka Miri ka-nih Yesu. Te di bala ne, yi ngbü ecu ngü ewü, neh teka ne?

⁸ Te yi le angbü züka kpara gbü jia Me la, ah le de yi di eje bü nzö riri ka Miri ka-nih Yesu Kurisito, te mala fü nih, gü ba dene, "Mü le wü bu mü, kphah baka e te mü ngbü ele küte mü." ⁹ Amba te yi ngbü efala wü mürü cinga afala la, yi ngbü dela eyi emere riri engu la fanü? Ah bala de. Yi siti dela eyi riri ka Me. Te di bala, Me ena ato kuru te yi ato!

¹⁰ Wü di enga wüna, Me to mere bi *riri eyi fü nih. Te nih je wü riri la zalü nde 'buru la, ah ena adi de züka ngü gbü jia Me. Te nih ngbü emere bü biri riri, da ece wü gara la, ah ti nda de. Te mü mere wü gara riri ka Me 'buru 'be, fü mü ace gara engu riri biringbö, angü mü le engu la de la, ah ba e te mü le riri ka Me 'buru de. Mü ena amaka kuru gbü ngü la! ¹¹ E-to wü riri la fü nih neh da? Me to wü riri la cu me-ye, gü ba dene, "Mü mere e amörö kpara de." Me mala kphah gara ngü, ga dene, "Mü mere e amere waza de." Te mü mala, ga, "Baka te ni ngbü ka-ni ne, ni mere *siti ngü nda-ni la kü de. Ni mörö kpara nda-ni la kphah de." Anga, te mü ngbü emere waza la, mü dela eyi siti kpara gbü jia Me, angü mü je riri kaka de.

¹² Gbü ngü ka-mü 'buru, te mü ena angbü emere, de wü ngü te mü ena angbü emala, ah le de mü di efi nga wü bu mü, da ele te-yi de ewü. Tekane de, angü dela riri te Yesu to fü nih. Te gara engu ena akoro, aye süka wü siti ngü ka-nih me-ye. ¹³ Te yi ceka cinga ka wü bu yi, afi nga ewü de la, Me fi nga cinga ka-yi kphah de. Me ena ato mere siti kuru eküte yi, angü yi je riri kaka de. Te mü de kpara te ngbü efi nga cinga ka wü bu mü la, Me ena afi kphah nga cinga ka-mü, ah to kuru te mü tine de.

Dene ngü ka wü kpara te ewü ngbü efiti te-wü, gü ba,

"Ani le ngü ka Me eyi."

¹⁴ Wü di enga wüna, wü gara yi ngbü emala, gü ba, "Ani le ngü ka Me eyi. Te ah bala, Me ti ato kuru te ani de." Anga te mü mere riri kaka de la, mü ngbü efi, gü ba, ni le ngü kaka eyi fanü? Mü ena aküwa gbü ngü la? ¹⁵ Mü ceka la, te biri kpara esüka wü di enga ni mü ngbü

emaka cinga, de mere tala te ye, ¹⁶ fü mü ayia amala fefe na, agü ba, "Me di de ye, de ye maka bi e-mazü de wü bongo." Te mü mala ngü la bü kükürü bala, mü to mba e fefe na kpo de la, dela züka ngü? ¹⁷ Ah kphah bala, te mü ngbü emala ngü bü de komö mü, gü ba "Ni le ngü ka Me eyi," amba, te mü je riri kaka, da emere nda-mü de la, mü ngbü dela emala töndö ngü kükürü.

¹⁸ Gara kpara esüka yi ena aga yiki ake ra, gü ba, "Wü gara kpara to nda-wü maguma wü fü Me, fü wü gara kpara angbü emere nda-wü wü züka ngü." Ma ena amala fü yi gbü ngü la, agü ba, "Ah mbi, anga te mü mere ngü ka Me de, ma ena awu neh baye baye, ga, mü le ngü ka Me eyi?" Nda-ra, yi ti eyi awu, gü ba, ma le ngü ka Me eyi fanü, teka züka wü ngü te ma ngbü emere, baka te Me ngbü ele ne. ¹⁹ Yi wu eyi, gü ba, Me ka-ye ngbee biringbö? Wayi, ah de züka ngü! Amba ngü la ti aküwa yi nda de. Angü *Satana, de wü *siti wü di enga me wu ngü la kphah eyi bala. Fü ewü angbü eyi ayi de cürü ka ngü la, amba wüh fü maguma wü nda-wü de. ²⁰ Yi wu ngü la bala nda-yi la fi de? Te yi gü ba, "Ani le ngü ka Me eyi," amba te yi mere wü ngü de te Me ngbü ele ne de la, ngü la ena afü te-ye, adu angbü töndö ngü kükürü!

²¹⁻²² Nih fi la nga ngü ka kundu nih, *Abarayama, ta te engu mere gügü ne. Ngü kaka-na reke ta gbü jia Me, neh teka ne? Ah teka züka ngü de te engu mere ne de? Abarayama le ta ngü ka Me, fü engu adu kphah amere riri ka Me, de te Me mala fefe na ne 'buru. Angü engu yia ta, za ye ye, *Yisaka, teka awa, amörö, ato la'bi tete fü Me, ba e te Me mala fefe.* Dela ngü te gü tamu ngü fü nih, gü ba, Abarayama to ta maguma ye eyi 'buru 'buru fü Me. ²³ Dela si-ngü ta te wüh ba gbü *Ngari Me, teka ngü ka Abarayama, gü ba, "Abarayama to ta maguma ye fü Me. Fü Me adu aceka Abarayama baka züka kpara ka-ye teka ngü la."† Dela si-ngü ta te Me i Abarayama tete, gü ba, ah de *vüngüte ka-ni ne.

²⁴ Wü di enga wüna, dene ngü te ma le amala fü yi. Te mü le angbü ba züka kpara gbü jia Me la, ah le de mü di eje riri ka Me, fü mü ngbü kphah emere amere. Amba, te mü gü ba, "Ni le ngü ka Me eyi," bü de komö mü kükürü kükürü bala la, ah ti nda de.

²⁵ Yi ceka la ngü ka Rakaba, würüse ta agbü Yeriko ne. Würüse la ka-ye ta siti mürü waza. Zu watü ye na bane ne nda

* 2:21-22 2:21-22 Mü ena amaka ngü la gbü Gina Ngü 22.

† 2:23 2:23 Mü ena amaka ngü la gbü Gina Ngü 15:6.

ma. Fū ngü ka wūrüse la adu afü te-ye, areke gbü jia Me, teka ne de, angü wūrüse la je ta riri ka Me. Fū ah aküwa ta gara wü di engä *Yisarayele, te ewü zi te-wü koro, aceka sü ka Yeriko. Fū Rakaba ayia aküwa ewü esaka wü vügu ka-ewü. Engu za ta ewü, wo esambü ka-ye, angbü emere ngü ewü. Fū engu amala ngü fū ewü, ga, "Wü za ka-wü gara kaje, de wü du tete." Fū wü kpara la ayia aküwa esaka wü vügu ka-wü. Dela züka ngü ta te Rakaba mere, fū ngü kaka la areke gbü jia Me.⁵

²⁶ Dela ngü te ma le amala fü yi, wü di engä wüna. Te mü ga, "Ni le ngü ka Me eyi," amba mü mere wü riri kaka de la, ah ena angbü ka-ye bü töndö ngü kükürü. Ngü ka-mü ena angbü gegege ba kövö, te ti amere ngü tine de.

3

Dene ngü teka komö kpara

¹ Wü di engä wüna, ma je eyi, gü ba, mere bi yi ngbü ele angbü mere kpara, teka adi eri wü bu wü de ngari Me. Ah le de yi ceka ngü la 'be 'be 'be feke! Tekä ne de, angü de-a, de te a ngbü eri wü bu a de ngari Me ne, te a mere ngü dürü la, Me ena ato mere kuru te a afa sü, afa nda wü bu a la nde 'buru. ² Yi wu eyi, gü ba, nih 'buru de wü kpara ka küte, te nih ngbü emere wü gara wü *siti ngü. Nih ngbü kpah da emala gara wü dürü ngü. Te mü mala ngü dürü de komö mü de la, amba mü de kpeke kpara, te wu da emere wü ngü 'buru mbi.

³ Yi ceka la, mba mbarase cükü'daye, te za engä rü esaka ye, angbü eliki bi wü yiti, enü de ewü kpa te sü, baka te engu ngbü ele. ⁴ Ah kpah bala, teka ngü ka *zabu. Te mü di de engä rü, te wüh ngbü eji zabu di esaka mü la, mü ti eyi afü zabu la, anü di agbü sü ba e te mü ngbü ele. ⁵ Ah kpah bala, teka ngü ka komö mü. De te komö mü di kpah bü mba engä e cükü'daye eküte mü ne, ah de wazi gbü ye, teka amala mere cögbörö tiri ngü di. Ah gegege ba engä nye-wa te ti gbü ke gü gbü karanga. Engä nye-wa la ti eyi acuru mere sü bane, anza 'buru nde. ⁶ Wü mene siti ngü te ekoro te komö mü la, wüh kpah gegege ba engä nye-wa, angü wü siti ngü sibi gbügbü fa sü. Ah ti eyi acuru züka fingangü emaguma mü, asiti 'buru asidi. Angü *Satana ngbü eto wazi fū komö mü la me-ye, teka fū mü adürü, akpi gbü ngü la.

⁷ Wü gara kpeke wü kpara ladü, te ewü wu ngü fa sü. Wüh ti eyi azoro siti nü, afü ao ba nü ka köti. ⁸ Te di bala ne, kpara ladü te ena afü komö ye, de ah ce

da emala siti ngü? Kpara bala ma! Te nga sükpi 'buru, komö wü kpara ka-ye nda fi bü emala wü ngü, enü di kpa engakara nü. Te di bala, komö kpara ka-ye ba mere siti kpürü, te a gömö ye mböömbo, eci kpara, teka ade.

⁹ Komö nih ngbü emala ngü 'basu 'basu. Ah emala züka ngü, ah emala kpah siti ngü. Nih ngbü egbo nga iri Wö nih Me, de komö nih la. Nih ngbü esoko wü bu nih, kpah de komö nih la. Engä Me o wü bu nih la ba kuru ye de? ¹⁰ Dela, ah de züka ngü? Biri komö nih de biringbö ne, fū wü züka ngü, de wü siti ngü angbü ekoro 'buru 'dö sela? Wü di engä wüna, ngü de bala ti fü nih, wü kpara ka Me, nda de. ¹¹⁻¹² Kpara ti eyi amaka siti ngu ake züka ngu 'buru gbü biri du-kpa-ngu biringbö? Manga ti eyi afü te-ye, ari, akoro ri ngenee? Mhamu ti eyi afü te-ye, ari, akoro ri gamba? Ah teka maguma kpara kpah bala. Te maguma mü biringbö la, mü ti adi emala ngü 'basu 'basu te komö mü de.

¹³ Wü di engä wüna, yi gü ba, ani de wü kpeke kpara te ani wu ngü fa sü? Te di bala, ah le de yi di eo to yi, teka adi emere wü ngü, te ena areke gbü jia Me. Yi mere e acu ngü yi de. Yi o ngü ka-yi kötö, baka nda wü jaji. Te yi ngbü emere bala la, wü kpara ti eyi awu, gü ba, yi de kpeke wü kpara ka Me fanü fanü. ¹⁴ Te kanga ladü emaguma mü, anga te mü di de mürü zü, te mü o te-mü, teka angbü ba mere kpara gbü nzö wü bu mü la, te ah bala, de mü mere e afi, ga, ni wu ngü fa sü, ne de, angü dela ka-ye wu. Angü kpara te wu ngü kpo, gbo nga ye de tete-ye nda de. ¹⁵ Wü ngü de bala, dela ngü ka Me nda de. Dela ngü ka kotö ne, ah de ngü ka *Satana. ¹⁶ Ma mala ngü la bala kükürü de, angü te wü kpara kpo eyi da angbü de kanga emaguma wü, gara ewü le eyi akoro mere kpara fū wü bu wü, engakara nü la, ah esiti! Te di bala, wü kpara de bala ena akpo da ewü nga esüka wü, da ememere wü gü esüka wü, kpah da ememere wü gara wü ngü ka lümü. Dela, ah de ngü ka Me? ¹⁷ A'a! Ah bala de! Angü te mü wu ngü ka Me eyi fanü fanü la, mü ti amere siti ngü kpo fi de. Mü ena agu maguma mü kpina, angbü emere wü ngü 'buru ziii, da eje ngü ka wü bu mü. Mü ena awu cinga wü bu mü la, da ele ta-ngü te ewü. Kpah bala, yi ena angbü de wü bu mü de maguma yi biringbö. Mü ti afti ewü de mani nda-mü de. ¹⁸ Wayi, ah fanü, te mü wu ngü ka Me fanü fanü la, mü ena angbü engbü kamü fi de gu maguma. Mü ena angbü kpah egu maguma wü bu mü, teka fū wü bu

mü adi engbü kphah de gu maguma kpina, baka nda mü. Te yi mere ngü la bala, ah ena adi de mere züka ngü gbü jia Me.

4

Dene ngü teka maguma 'basu 'basu

¹ Wü di engä wüna, yi ngbü ewü nga, da ememere gü esüka yi, neh teka ne? Si-ngü engu neh ene? Ngü la ngbü emere yi kükürü de, angü gümü wü e ngbü emere yi me-ye. Fü ah asiti maguma yi, fü yi angbü ememere gü esüka yi. ² Dela teka ne de, angü yi ngbü de gümü wü e emaguma yi, fü yi angbü eo mere maguma efa sü, teka wü e ka wü bu yi. Angü te yi maka e la de, yi ena akpo da emere gü, amörö kphah cu kpara teka e la. Wü di engä wüna, te cinga e ngbü emere yi la, yi yi-ta Me tekaka. Me ena ato fü yi. ³ Gara kpara ena amala ngü, gü ba, "Angü ni yi-ta Me ngbürü eyi ne, amba engu to e la fü ni nda de." Dela kükürü de, angü e de te engu yi-ta Me tekaka la, ah de e te reke gbü jia Me nda de. Ah yi-ta Me de mere kü emaguma ye, teka e de te engu ngbü ele me-ye la.

⁴ Wü di engä wüna, ah le de yi fü maguma yi enatikine! Te yi ce kaje ka Me teka ngü ka gümü wü e de füh kotö ne, e-di dela züka ngü? Ngü la ena angbü gegege ba würüse, te kpe ce watí ye, angbü endoro fütanga wü gara komoko. Maguma watí ye na ena asiti tete de? Maguma Me ena asiti eküte mü kphah bala. Angü, te mü o maguma mü eyi teka wü e de füh kotö ne la, ah ba e te mü fü te-mü, ngbü eyi vügü ka Me. ⁵ Yi wu ngü, de ta te wüh ba gbü *Ngari Me gügü ne, de? Ngü la gü ba, "Me le nih de maguma ye 'buru nde." Yi ngbü efi nda-yi, ga, dela bü kükürü ngü? ⁶ Te di bala, Me ena ato wazi fü yi nda kphah bü me-ye, teka fü yi afü te-yi, ale ngü kaka de maguma yi biringbö. Ngü biringbö, ah le de yi nda'ba te-yi fefe na. Angü wüh ba kphah eyi bala gbü Ngari Me, ga, "Te mü ngbü ecu ngü mü la, Me ti ale ngü ka-mü nda de. Amba te mü nda'ba te-mü fefe ba mürü cinga la, Me ena ato wazi fü mü, teka *züka maguma ye."*

⁷ De te di eyi bala ne, ah le de yi fü te-yi, adi eje duu riri ka Mere Me, fü yi angbü vügü ka *Satana, teka fü Satana ace kpa ye eküte yi. ⁸ Te yi zoro Me de kpa ye 'basu la, Me ena azoro yi kphah de kpa ye 'basu mini. Yi fü maguma yi, de yi ce wü *siti ngü ka-yi le 'buru asidi. Fü yi ale ngü ka Me de maguma yi biringbö. ⁹ Ah le de yi fi nga wü siti ngü, de te yi ngbü emere ne, fü yi angbü de cinga tekaka na. Yi

ngbü engbü de tadu, da emü zo, neh teka ne? Ah le de yi ku gba de ngura! ¹⁰ Angü, te kpara ngbü de cinga da enda'ba te-ye engakara Me la, Me ena awu cicinga na, fü ah aboro wü siti ngü kaka, aküwa engu.

¹¹ Wü di engä wüna, yi mere e adi edi ngü, da emala ambala'ba eküte wü bu yi, de. Angü te yi ngbü emere bala la, ah ba e te yi o te-yi ba miri gbü nzö wü bu yi. Amba Me o yi baka miri nda de. *Riri ka Me ga dene, "Nih le wü bu nih ba e te nih ngbü ele küte nih." Te yi ngbü da edi ngü eküte wü bu yi la, amba yi ce riri ka Me eyi asidi. Angü ah ena adi ba e te yi gü ba, "Ani de mere miri me-ani, ani ena angbü eto riri fü wü bu ani me-ani." ¹² Me ka-ye de miri duu me-ye, te ngbü eto wü riri fü nih. Engu ena aye süka ngü ka wü kpara füh kotö ne, kphah 'buru me-ye. Wazi ka-ye duu esakaka, teka aküwa kpara, anga amörö kpara di. De te di de bala ne, yi ena ao te-yi ba miri, ato riri fü wü bu yi de tete-yi, neh mbi mbi baye baye?

¹³ Yi da güje yi te ngü te ma emala ne. Wü gara yi ladü te ewü ngbü efi, ga, "Wayi, ani de mere kpara, de mere bi wü e esaka ani." Wüh ngbü emala, ga, "Egambi, te kpi ena aseke la, ani ena ayia anü kpa te gara sü kpane. Ani ena ara kpala re biringbö, fü ani amere wü ngü ka-ani bane bane. Ani ena ase wü e, fü ani adu amaka bi jiasse gbügbü na." ¹⁴ Dela zu ngü fanü? Mü wu, ga, kpi ena aseke amaka ni egambi, neh te ne? Mü ti awu ngü la de, angü mü gegege ba nguwa, te ngbü enü kpa etikpi, te wege ena afe ka-ye, anza bü titine dene. ¹⁵ Yi mere e adi egbo nga yi de tete-yi de. Ah le de nih di emala ngü, ece eo 'buru esaka Me, ga, "Te Me ce nih, fü kpi aseke, amaka nih egambi la, nih ena amere ngü bane bane." ¹⁶ Yi mere e agbo nga yi de tete-yi ne de. Yi mere e ao te-yi ba mere kpara kphah de, angü ngü la ka-ye gbü jia Me esiti. ¹⁷ Yi di efi nga wü ngü, de te ma mala fü yi ne. Te yi ce da emere wü riri ka Me la, ngü la ena areke te Me? A'a! Ah ena adi gbü jia Me de mere *siti ngü.

5

Dene ngü teka wü kpara de mere bi e esaka wü

¹ De-yi, te yi di de mere bi wü e esaka yi ne, yi da la güje yi, te ngü de te ma emala ne. Yi ngbü engbü de tadu teka mere bi wü e, te di esaka yi la? A'a! Tadu mere e akoko yi de! Ah le de yi kpo da eku gba de ngura. Angü Me ena ato mere kuru te yi te gara, kpa engagira nü kpala. ²⁻³ Mü di efi la nga *adu siki, te Me ena aye süka wü ngü ka-mü gbügbü na ne. Angü siki

* 4:6 4:6 Mü ena amaka ngü la gbü buku ka Ngü Mani 3:34.

engu la, ah eyi ghamari! Te di eyi bala ne, ah ena adi de zūka ngü, te mü ena aza wü e ka-mü 'buru, awo awo baka müürü zü la? Fanü fanü, mere bi wü e ka-mü la ena asiti ka-ye asiti, 'buru nde. Wü biri ena azü zūka wü bongo ka-mü, wü mene ewü de te mü to gbuu bala de ne, kpah 'buru. Mene wü e-mazü ka-mü, de te mü za wo awo ne, ena azi ka-wü asidi, fü wü ka ala bi jiase ka-mü la, asiti kpah 'buru asidi. Gbü ra te adu sikipi ena akoro tete, wü e ka-mü, de te ngbü esisiti la, ena angbü baka jia Me eküte mü. Fü wü e la agü tamu wü *siti ngü ka-mü, te mü ngbü ta emere fü Me ne me-wü, ga, mü kö wü e ka-mü, za wo 'buru awo tūngü mü. Mü le adi eto fü wü kpara de. Fü Me ato mere kuru te mü teka ngü la!

⁴ Gara siti ngü kpah ladü, te mü ngbü emere. Te wü kpara mere tima fü mü kpa gbü yi ka-mü la, mü le adi eto jiase ka wü kpara la fü ewü de. Mü ngbü efi nda-mü, ga, "Me wu ngü ka-ni la de?" Fanü fanü, ma emala fü mü, ga, "Mere Me ena aje gba ka wü kpara ka tima ka-mü, te ewü ngbü eku gba ka tala te wü la, fü engu ato kuru te gara te mü teka ngü la." ⁵ Mü ngbü nda-mü gbü mere tadu da ezü te-mü. Mü zege koro tine eyi ba kambiliki la. Te di bala ne, wüh ena amörö mü te gara, kpah ba e te wüh ngbü emörö kambiliki. ⁶ Mü ngbü eto mere cinga te wü kpara ka Me, fü ewü angbü ekpi gbü ngü la. Amba kpah le bima, Me ka-ye nda fi ladü. Mü ena awu ngü la te gara!

Dene ngü te ma le amala fü wü müürü cinga

⁷ Wü di enga wüna, Me ena ato kuru te wü kpara, de te ewü ngbü eto cinga te yi ne. Te di bala ne, yi gu maguma yi agu kpina, angbü eci nga Yesu, te ena adu akoro, aye süka ngü la. Te kpara ru ndo gbü yi ka-ye la, engu ena awa ndo la kpah bü egambi? A'a! Ah bala de. Kpara la ena angbü la bala, aci nga ndo, te ena aga, ari feke. Fü engu adu tine awa. ⁸ Ah kpah gegege bala teka ngü ka dudu ka Yesu. Yi mere e afi nga ngü de. Yi rü kpekpeke, angü sikipi ka Miri Yesu eyi ghamari.

⁹ Yi gu maguma yi agu, wü di enga wüna. Yi mere e adi esiti iri wü bu yi, teka wü ngü te ngbü emere yi ne, de. Angü wü ngü de bala, ah ka-ye gbü jia Me esiti. Wayi, yi ceka 'be, angü *adu sikipi, te Miri Yesu ena akoro aye süka wü ngü ka-nih tete, eyi ghamari.

¹⁰ Wü di enga wüna, te cinga maka yi teka ngü ka Yesu la, yi rü kpekpeke. Yi i maguma yi ai, baka wü *mürü dofo, ta te

ewü ngbü emala *Ngari Me fü wü kpara gügü ne. Wü müürü dofo la maka ta mere bi cinga de kuru, teka ngü ka Me, amba wüh ce ta ngü ka Me nda-wü kpo fi de. ¹¹ Nih wu kpah kpo, ga, ngü ka wü müürü dofo reke ta gbü jia Me areke, angü wüh rü ta arü kpekpeke gbü ngü ka Me, gbü wü cinga ka-wü la. Yi wu mere siti cinga, ta te Eyobo tūka te-ye, ngbü gbügbü na ne kpo. Eyobo ce ta ngü ka Me eyi, teka wü cinga te mere ye la? A'a! Engu rü ta fi bü arü kpekpeke. De te engu rü kpekpeke de bala ne, fü Me ayia awu cicinga, adu ato wazi fefe na. Fü Eyobo adu angbü tine gbü mere tadu 'duwa ba-neh-ene-la. Te di bala ne, ah le de yi rü kpah kpekpeke baka nda Eyobo.

Dene ngü ka gba, te yi ena di eku fü Me

¹² Wü di enga wüna, yi mere e adi ekina kina te iri Me de. Yi mere e akina kina te iri gara kpara, te Me o me-ye kpa füh kotó akine ne, kpah de. Te yi ngbü emala ngü la, yi mala, gü ba, "Wayi ngü la bala," ah ngbü duu bala. Te yi mala di, ga, "A'a, ngü engu la bala de la," de ah ngbü kpah duu bala. Yi mere e adi emala ngü de mani de. Ngü de bala gbü jia Me ka-ye esiti, angü Me ena ato kuru te yi.

¹³ Wü di enga wüna, yi di efi nga Me gbü wü ngü ka-yi zalü nde 'buru. Te cinga ngbü emere mü, de mü ku gba fefe na. Te ah di de tadu, de mü di ebi wü ci da egbo nga iri na di. ¹⁴ Te keke ngbü emere mü, mü i wü *kovo ka Me, de wüh koro, wüh ku gba fü Me gbü nzö mü, de wüh furu kpah mü eküte mü. ¹⁵⁻¹⁶ Te wü cögbörö kpara ka Me la ku gba fü Me de maguma wü ngbee biringbö la, Me ena aküwa mü gbü keke la, fü soko mü adu akoro zözö. Te keke koro eküte mü ka dürü ngü ka-mü, te mü ngbü emere la, de mü mere e acere da emala ngangga fü Me de. Mü di emala nga wü dürü ngü ka-mü, te mü ngbü emere ne, 'buru fü Me, teka fü engu adi eboro wü *siti ngü ka-mü la fü mü. Yi di emala kpah fü wü bu yi, teka fü ewü angbü kpah da eyi-ta Me teka yi, de Me boro siti ngü ka-yi emaguma ye asidi, adu aküwa yi gbü keke ka-yi la.

Wü di enga wüna, yi di eku gba fü Me kpekpeke, te nga wü sikipi 'buru. Angü te yi ngbü da eku gba fü Me de maguma yi biringbö la, Me ena aje gba ka-yi, fü ah ato mere wazi fü yi. ¹⁷ Yi ceka la ngü ta te mere te-ye fü *Iliya, te di de *mürü dofo ka Me ta gügü ne. Iliya ta kpah kpara de küte ye baka nih ne. Fü engu ayia aku gba fü Me de maguma ye biringbö, gü ba, "Agö mere e ali de." Fü agö ayia ade, teka re bata

* 5:17 5:17 Mü ena amaka ngü ka Iliya la gbü gina buku ka wü Wü Miri 17:1; 18:1.

de tü ye.*¹⁸ Fütanga ngü la, fü İliya adu aku kpah gara gba fü Me, gü ba, "Agö du edu, ah li." Currru! Fü agö adu ali, kpah te nga nzö sü zalü nde 'buru. Fü wü fu-e akpo ekö, da ega gbü yi ka wü kpara, da erī jete jete.[†] Te di bala ne, yi di eku gba fü Me, teka fü Me ato wazi fü yi gbü tima ka-ye.

¹⁹ Wü di enga wüna, te gara kpara esüka yi dürü te kaje ka Me asidi la, ah le de yi mala ngü fefe na ferrre, aza engu, alügü te kaje ka Me. Mene ngü de bala, reke gbü jia Me 'duwa ba-neh-ene-la. ²⁰ Angü te kpara, de ta te dürü eyi adürü te kaje ka Me ne, te engu fere nga ye, du kpaka Me la, Me ena aküwa engu aküwa fanü fanü. Fü Me aboro mere bi wü siti ngü kaka la guvu ye asidi.

Wü di enga wüna, dela adu ngü te ma le amala fü yi, ah bala. De-ra *Yakobo.

[†] **5:18** 5:18 Mü ena amaka ngü ka İliya la gbü gina buku ka wü Wü Miri 18:42-45.

Dene gina köcökpa te Petero ba fü wü kpapa ka Yesu 1 Petero

Masere si-ngü

Simüna Petero, te di ta de biri kpapa esüka wü *mürü tima ka Yesu ne, ba köcökpa ne me-ye. Gara komoko, de iri ye Silivanü ne, le ta-ngü tete me-ye gbü tima la. Petero ba köcökpa ne fü wü kpapa ka Yesu agbü wü sü de iri wü Potiyü, Galatiya, Kapadokiya bete Bituniya. Wü sü la, wüh 'buru gbü tö, te nih ngbü ei enatikine, Turukiya ne. Ta gügü, gbü wü re la, wüh ngbü ei tö la, Asiya. Si-ngü te Petero ba ngü la di fü ewü ne, ah teka te wü vügü ngbü eto cinga te ewü, teka ngü ka Yesu. Fü Petero amala ngü fü ewü, de wüh rü kpekpeke. Wüh mere e ace ngü ka Yesu teka cinga la de.

Wü ngü te Petero ba gbü köcökpa ne, wüh dene.

Sapita 1:1-12 Ngü ka *küküwa te Me to fü nih, teka ngü ka Yesu

Sapita 1:13-2:10 Ngü te Me le de nih di emere,

angü ah fe nih, ao baka züka wü kpapa ka-ye

Sapita 2:11-4:19 Ngü te nih ena adi emere, gbü wü cinga te ngbü emere nih ne

Sapita 5:1-4 Ngü teka wü *kovo gbü tima ka Yesu

Sapita 5:5-14 Ngü teka wü kpapa ka Yesu 'buru

Dene mandä ka Petero fü wü kpapa ka Yesu

¹ De-ra Petero, te ma di de *mürü tima ka Miri Yesu Kurisito ne, ma to mandä fü yi, wü kpapa ka Me, te yi baya baka wü ganzi kpapa, gbü wü gara sü gbü tö ka Asiya, gbü nzö köti ka Potiyü, Galatiya, Kapadokiya bete Bituniya* ne 'buru. ² Angü Wö nih Me fe yi me-ye gügü. Fü *Nzila Wazi Me ayia afü yi tüne wü kpapa ka Me, teka fü yi angbü emere ngü ka Yesu *Kurisito. Angü *ngüte Yesu zürü yi eyi *nzila gbü *siti ngü ka-yi. Me ngbü de yi, de ah to gu ngü fü yi fa sü di, teka *züka maguma ye.

Dene ngü teka küküwa te Me to fü nih, teka ngü ka Yesu

³ Wü di enga wüna, nih gbo nga iri Me, te di de Wö ye Yesu Kurisito ne, angü ah wu cinga nih, fü ah ayia aküwa nih gbü wü *siti ngü, te nih ngbü ta emere, afü nih ba wü di ye tete. Te di bala, nih ngbü

de tadu, fü nih angbü eo jia nih 'duwa teka wü züka ngü, te Yesu ena ato fü nih te gara, agbü sü ka-ye agbü kpi kpala ne. Angü Me zükü Yesu eyi gbü kpi. Amba sidi nga kpi ka-nih, engu ena adu azükü nih kpah bala, fi mere badi, fü nih angbü agbü sü kaka agbü kpi. ⁴ Me reke kpah mere bi wü züka ngü eyi fü nih kpala, te ti anza kpo de. Angü agbü kpi kpala, siti ngü nda ma, cinga ma, kpi kpah ma. ⁵ Me ena angbü eceka kpi fütanga yi me-ye gbü wazi ka-ye, angü yi to maguma yi eyi fefe na. Engu ena angbü fi bü da emere kpa te yi, zalü akoro di gbü *adu sikipi, fü ah adu aküwa yi fi mere badi.

⁶ Te di bala, ah reke fa sü, te yi ena angbü de tadu teka ngü la. Amba titine yi ngbü engbü la de cinga, teka bi wü ngü te ngbü embü yi gbü wü sikipi ne. ⁷ Ah reke fa sü te wü cinga la ngbü embü yi bala, teka ato wazi fü yi. Ah baka ngü ka se, te wüh ngbü emi kpa esa boro. Angü wüh ngbü eto se la gbü wa, fü ah ambe ambe 'duwa ba-neh-ene-la, teka de züka se-tima koro gbügbü. Amba ngü ka maguma yi ka-ye memere gbü jia Me, fa ngü ka se la ka, angü ngü ka se la ena anza anza. Amba te yi to maguma yi fanü fanü fü Me la, ngü ka-yi ti anza kpo fi de. Te di bala, Yesu Kurisito ena agbo nga yi, gbü sikipi te engu ena adu akoro, asere te-ye tete fü wü kpapa 'buru te gara ne. ⁸ Ah fanü, yi wu Yesu Kurisito de jia yi nda-yi de, amba ma wu eyi kpo, gü ba, yi le engu eyi cu de maguma yi. Titine dene, yi ti awu engu de jia yi kpah la de, amba yi to maguma yi eyi fefe na, fü yi angbü de mere tadu teka ngü la. ⁹ Angü yi wu eyi kpo, gü ba, Me ena aküwa ani aküwa fi mere badi, teka te ani to maguma ani eyi fü Yesu ne.

¹⁰ Wü *mürü dofo ka Me mala ta nga *küküwa la eyi gügü, gü ba, "Me ena aküwa wü kpapa ka-ye, teka *züka maguma ye." Fü ewü ayia afi ngü teka ngü la afa sü. Fü ewü angbü egiri da ewü, teka de ani wu si-ngü gbü ngü la. ¹¹ Amba *Nzila Wazi ka Yesu, te di ta emaguma ewü ne, ayia asere fü ewü, gü ba, Me ena atima gara kpapa te ena aküwa nih. Amba kpapa la ena azü mere cinga, fü ah akpi. Fü Me adu azükü engu gbü kpi la, de mere wazi ka-ye. Te wü mürü dofo la je ngü la, fü ewü ayia ao to wü 'buru, teka awu si-ngü la mbi mbi mbi. Anga wü ngü la ena amere te-wü baye baye? Anga neh elaye? ¹² Fü Me ayia asere ngü fü wü mürü dofo la, gü ba, ngü de te ewü ngbü emala nganga la, ah ti amere te-ye gbü wü laki ka-wü ne, nda la de. Ngü la ena amere te-ye te gara. Angü ngü ta te ewü ngbü emala nganga na

* 1:1 1:1 Wü sü la ta 'buru de nga nzö wü köti gbü tö de iri ye Turukiya ne.

la, ah ka-ye de ngü ka Yesu, te wü *mürü tima kaka ngbü kpah emala ngangana fū yi, gbü wazi ka Nzila Wazi Me ne. Ngü ka Yesu la, wü *malayika ka Me ngbü ta kpah ele de ani wu si-ngü gbügbü na.

Dene ngü te Me le, de nih di emere zu ngü gbü jia ni

¹³ Te di bala, ah le de yi reke te-yi ngbü nzo, teka adi emere züka ngü gbü jia Me. Yi di etüka te-yi atüka, da eci sü! Yi di eo jia yi 'buru 'buru teka *küküwa, te Me ena ato fü yi, gbü *adu sikipi, te Yesu ena adu akoro tete, asere te-ye fü wü kpapa füh kotö ne 'buru. ¹⁴ Ah le de yi di emere riri ka Me, angü yi de wü di Me. Yi mere e adu angbü emere wü *siti ngü, te maguma yi ngbü ele, baka ta te yi ngbü emere gügü, ne de. Yi ngbü ta emere wü ngü la bala, angü yi wu ngü ka Me mbi mbi la de. ¹⁵ Amba ah le de yi ce wü siti ngü ka-yi, fü yi adu angbü *nzila, gbü wü ngü ka-yi, te yi ngbü emere, 'buru. Angü Me i yi me-ye, de yi ngbü nzila, baka te engu di kpah nzila ne. ¹⁶ Angü ah kpah baka ngü te Me mala gbü Ngari ye, gü ba, "Ah le de wü kpapa ka-ni ngbü nzila, angü ni ka-ni nzila."[†]

¹⁷ Yi ngbü eku gba fü Me, da ei engu, Wüba. Amba yi wu awu, gü ba, engu de kpapa te ngbü eye süka wü ngü ka wü kpapa 'buru mbi mbi mbi, ereke areke. Engu de kpapa te ngbü efolo te-ye kperekede nda de. Te di bala, te yi la ladü ezükü füh kotö sene la, ah le de yi di ecu ngüngü, da emere riri kaka-na. ¹⁸⁻¹⁹ Angü yi wu eyi, gü ba, Yesu Kurisito küwa ani eyi, gbü töndö gele ka wü kundu ani ne. Te di bala, e ta te Yesu to, teka afa yi di, ah de neh ene? Ah ta de töndö e, baka jiase ne engu? Ah bala de! Yesu kpi cu me-ye, teka afa yi de *ngüte ye, angü ngüngüte fa wü e 'buru. Angü Yesu ka-ye baka züka *kambiliki, te keke di tete na ma, de te wüw wa teka areke ngü di, ezengba nih de wü Me ne. ²⁰ Me fe engu, o ta kü eyi gügü, teka aküwa nih, o Me mere kotö ne la de. Fü Yesu ayia akoro gbü wü adu sikipi ne, teka aküwa nih. ²¹ Teka ngü ka Yesu la, yi lala eyi gbü ngü ka Me. Yesu Kurisito to wazi la eyi fü yi, angü Me zükü engu gbü kpi, fü ah adu ato mere wazi fefe, agbü sü ka-ye agbü kpi. Te di bala, ah le de yi o jia yi te ngü ka Me, da eto maguma yi 'buru fefe na. Angü Me ti eyi aküwa yi fanü fanü.

²² Wü di engu wüna, ah le de yi di ele wü bu yi de maguma yi biringbö. Yi ti eyi amere ngü la titine bala, angü yi fü maguma yi eyi, du le zu ngü ka Yesu

Kurisito. Te di bala ne, ah le fü yi adi ele wü bu yi baka wü di engu ni yi. ²³ Angü Me bi yi eyi toto baka wü di ye. Titine nguwa yi tine baka nguwa wü kpapa de füh kotö, de te ewü ena anza anza, ne nda de. Yi tine eyi nguwa wü kpapa ka Me, te ti anza de. Angü yi le zu ngü ka Me, te ena ato *küküwa fü yi, ne eyi de maguma yi 'buru. ²⁴ *Mürü dofo Yisaya ba ta ngü la eyi gbü *Ngari Me, gü ba, "Wü kpapa füh kotö ne 'buru, baka yi-rü, te su fa sü. Angü yi-rü la ngbü engbü mba teka sikipi cükü'daye, fü ah ayia aürü, anza 'buru. ²⁵ Amba Ngari Me ti anza nda de. Ah te angbü ka-ye fi mere badi."* Amba ngü ka Me, te wüw mala ngangana la, ah de ngü ka Yesu Kurisito, te ti anza de.

2

¹ Te di bala, wü di engu wüna, ah le de yi ce ngü ka siti maguma, fiti, mani, ngü ka maguma 'basu 'basu, kanga, bete siti ngü mündü, 'buru asidi. ² Angü Me bi yi eyi toto. Yi tine eyi baka wü vürü jaji. Te di bala, ah le de yi o gümü ngü ka Me emaguma yi, baka wü jürü jaji, te ewü ngbü eo gümü ka, ala. Teka ngü la, yi ena aga gbü ngü ka Me, fü yi amaka *küküwa te gara gbügbü na. ³ Angü ah baka ngü ta te wüw ba gbü *Ngari Me, gü ba, "Me to Ngari ye eyi fü yi baka e-mazü, te türü fa sü."^{*}

Dene ngü te Me fe yi di, ao baka züka wü kpapa ka-ye

⁴ Wü kpapa de füh kotö ne, wüw le ngü ka Yesu nda-wü de. Amba Yesu ka-ye baka züka rü, te di de miri ka kambü. Baka ta te wü kpapa ngbü eji *Mere Kambü ka Me, wüw ce rü la kpo, angü wüw ceka rü la gbü jia wü baka töndö e. Amba Me fe rü la me-ye, baka züka rü, te wü bu ye ena amaka wazi, alala 'buru eküküte. Kpah bala, Me fe Miri Yesu me-ye, fü ah aza engu, ao baka züka kpapa ka-ye. Te di bala, yi nü enü kpaka Yesu, fü yi alala eküküte na, ⁵ teka fü yi angbü kpekpeke, baka züka wü rü, te Me ena aji kambü ka-ye di. Me ena ao yi kpah baka wü *kovo ka-ye, fü yi angbü emere tima gbü kambü kaka la. Te di bala, teka ngü ka Yesu Kurisito, *Nzila Wazi Me ena angbü eto wazi fü yi me-ye, teka fü yi adi emere tima la di mbi mbi mbi, gbü jia Me.

⁶⁻⁷ Wayi, yi to maguma yi eyi fü Miri Yesu. Yi wu engu kpah eyi, baka kpeke kpapa te ena aküwa yi, angü Me mala eyi gbü Ngari ye, gü ba, "Ni fe züka Miri eyi, te di baka kpeke rü kambü, te ni ena ao

[†] 1:16 1:16 Mü ena amaka ngü la gbü buku ka Riri ka Gele ka wü Levi 11:44-45 bete 19:2. [‡] 1:25 1:25 Mü ena amaka ngü la gbü Yisaya 40:6-8. * 2:3 2:3 Mü ena amaka ngü la gbü Ci ka wü Davidi 34:8.

engu memere, teka de engu mere tima ka-ni agbü Yerüsalema. Mene wü kpara, te ewü ena azoro rü la de kpa wü 'basu, wüh ena aküwa fi mere badi."[†] Amba teka mene wü kpara, te ewü le ngü kaka de, ngü ka-ewü ena adi gegege baka gara ngü, te wüh ba gbü Ngari Me, gü ba, "Wü gara kpara ngbü ta eji Mere Kambü ka Me. Fü ewü amaka gara mere rü, te ewü le nda-wü de. Fü ewü ace rü la asidi. Titine rü ta te ewü ce la, Me du o tîne eyi mere kpeke rü de wazi ye, te wü bu ye na ngbü engbü 'buru eküküte."[‡] ⁸ Te di bala, mene wü kpara, te ewü le engu de ne, wüh ena amaka mere cinga gbü ngü la, kpah baka gara ngü te wüh ba gbü Ngari Me gü ba, "Amba, te wüh le ngü ka rü la de la, rü la ena atiri kaje fü mere bi wü kpara, wüh le ta de ani nzi asidi, amba wazi ewü nda ma, fü ewü atü 'buru kötö."[§] Si-ngü de te wüh ena atü tete ne, angü wüh le aje Ngari Me nda-wü de. Me mala eyi bala.

⁹ Amba nda-yi, yi ka-yi eyi de nguwa wü kpara te Me fe me-ye. Yi kpah baka wü kovo te Me fe ewü, teka amere tima ka-ye. Yi ka-yi fanü fanü zu wü kpara ka Me. Te di bala ne, ah le de yi di egbo nga iri Me, teka fü yi adi emala nga wü kpeke ngü, te Me mere fü yi ne. Angü engu fe yi me-ye, fü ah ayia aküwa yi gbü *siti ngü, teka fü yi adi engbü gbü züka ngü kaka-na. ¹⁰ Ta gügü, yi de wü kpara ka Me nda-yi de. Amba titine Me za yi, o eyi zu wü kpara ka-ye tete fanü fanü, angü ta gügü, yi wu *züka maguma ka Me nda-yi kpah de. Amba titine Me sere züka maguma ye eyi fü yi.

Dene wü ngü te nih, wü kpara ka Yesu ena adi emere

¹¹ Wü di engu wüna, nih de wü kpara ka kotö ne nda-nih de. Nih ka-nih de wü kpara ka Yesu. Nih ngbü engbü füh kotö sene, baka wü ganzi kpara. Te di bala, ma ngbü emala fü yi kpekepeke, fü ba, yi ce ngü ka siti gümü wü ngü de füh kotö ne asidi, angü dela wü ngü te ena asiti ngü ka-yi gbü jia Me. ¹² Ah le de yi di emere fi bü wü züka ngü, angü wü kpara te ewü le ngü ka Me de ne, wüh ngbü kpah fi da eceka ngü te yi ngbü emere. Angü wüh ena angbü emala ambala'ba eküte yi, gü ba, yi de siti wü kpara. Amba, te yi ngbü ka-yi fi bü emere wü züka ngü te nga wü sikipi 'buru la, e-wu neh da, Me ena afü maguma ewü, teka fü ewü adu angbü egbo nga Me, teka wü züka ngü ka-yi, de te yi ngbü emere la.

¹³⁻¹⁴ Wü di engu wüna, ah le de yi di ecu ngü wü mere kpara, te ewü ngbü gbü nzö yi füh kotö ne 'buru. Kpah bala, ah le de yi di eje riri ka-ewü, anga te ah de mere miri, te di müri tö, anga wü jürü ewü. Angü Me fe wü miri la, o me-ye, teka adi eto kuru te wü kpara, te ewü ngbü emere *siti ngü ne. Kpah bala, miri ena angbü egbo nga mene wü kpara, te ewü ngbü emere züka ngü ne. Te di bala, ah le de yi di ecu ngü wü miri, teka fü wü kpara adi egbo nga iri Miri Yesu teka ngü ka-yi la. ¹⁵ Dela ngü te Me ngbü ele, teka de yi di emere. Te yi ngbü fi bü emere züka wü ngü bala la, wü töndö kpara ti adi emala siti ngü eküte yi nda-wü de. Ngü ena anza gömö ewü 'buru. ¹⁶ Fanü fanü, yi de wü labi ka siti ngü nda-yi tîne de, amba yi mere e afi, gü ba, te ah bala la, ani ti eyi amere wü siti ngü, baka te ani ngbü ele, ne de, angü yi ka-yi de wü labi ka Me. ¹⁷ Yi mere e aceka kpara kpaakpa de. Yi le wü bu yi, wü kpara ka Yesu de maguma yi 'buru, angü wüh de wü di engu ni yi. Yi to maguma yi 'buru 'buru fü Me, da ecu ngü ngü. De yi di kpah ecu ngü wü miri.

Dene ngü teka wü kpara, te ewü ngbü emere tima esa

riri ka wü mere kpara ka-wü

¹⁸ Te mü de labi la, ah le de mü di ecu ngü mere kpara ka-mü, da eje riri kaka-na. Ngü ma, te engu ngbü emere mü ereke areke, anga engu ngbü emere mü esiti la, mü ena adi fi bü eje riri kaka-na. ¹⁹ Kükürü de, angü te wüh ngbü eto cinga te mü kükürü, fü mü angbü etüka te-mü gbü cinga la, teka ngü ka Me la, ngü ka-mü ena areke gbü jia Me cu afa sü. Engu ena ato mere takpa fü mü, te gara, gbü ngü la. ²⁰ Te wüh ngbü emi mü, teka *siti ngü te mü ngbü emere la, wüh mi mü mbi, angü Me le siti ngü kpah de. Amba, te wü ngbü fi bü emere züka ngü, fü ewü angbü emi mü, fü mü angbü ka-mü fi bü etüka te-mü, angbü ka-mü de gu maguma gbü ngü la, ngü ka-mü la ena areke gbü jia Me afa sü.

²¹ Cinga la, ah de tima te Me to fü mü, angü Yesu Kurisito zü ta cinga teka mü, kpah bala. Te di bala, Yesu le de mü di emere wü ngü baka nda-ni, da elala gbü nga ni. ²² Miri Yesu mere ta siti ngü nda kü de. Kpah bala, engu mala ngü ka wü nda de, ah fiti kpara nda kpah de. ²³ Wüh ngbü ta esoko engu, amba engu soko ewü nda de. Wüh to mere cinga tete, amba engu mere siti ngü fü ewü kpah de. Amba ah ce wü ngü ka-ye, o 'buru esaka Me, de Me kolo liya la me-ye. ²⁴ Yesu Kurisito

[†] 2:6-7 2:6-7 Mü ena amaka ngü la gbü Yisaya 28:16.

[‡] 2:6-7 2:6-7 Mü ena amaka ngü la gbü Ci ka wü Davidi 118:22. [§] 2:8 2:8 Mü ena amaka ngü la gbü Yisaya 8:14.

kpi fūh *rū gbegete, teka afa nih gbū siti wū ngū ka-nih, kpah teka de nih ce wū siti ngū ka-nih asidi. Fū nih adu angbū emere fi bū zūka wū ngū, te ena areke gbū jia Me, te nga wū sīkpi 'buru. Te di bala, cinga ka Yesu la kūwa nih eyi gbū wū siti ngū ka-nih. ²⁵ Ta te enga gina, yi ngbū baka wū kambiliki, te ewū dūrū adūrū agbū gū. Amba enatikine Me maka yi, za du koro di eyi kpaka Yesu, de Yesu di eceka kpi fūtanga yi me-ye.

3

Dene ngū teka wū komoko de wū wara wū

¹ Teka ngū ka-yi, wū wūruse, ah le de yi di kpah eje riri ka wū watī yi. Angū, te wū watī yi le ngū ka Me de la, e-wu neh da, wūh ena adu awu zūka ngū, de te yi ngbū emere la, fū ewū adu afū maguma wū, ale ngū ka Me, o yi mala ngū ka Me fū ewū la de. ² Angū wūh ena angbū ewu, gū ba, wū ngū ka-yi, te yi ngbū emere, kawū 'buru mbi, angū yi to maguma yi eyi fū Yesu reke areke fanū. ³⁻⁴ Te mū le areke te-mū, de ni su asu gbū jia watī ni la, mū mere e afi nga susu ka-mū la de. Ah le de mū di engbū de zūka fingangū gbū nzō mū. Mū mere e ao maguma mū gbū ngū ka ma-i su-nzō mū, da efūfū de wū lara ye, gbū wū to mani de tītine, ne de. Kpah bala, mū mere e ao fingangū ka-mū, teka kpeke wū lara e ka ngūrū, anga 'biri, te wūh ngbū ese de bi jia, ne de. Yi mere e adi eto wū gara lara bongo, te wūh ngbū etūkū gbū siti kaje, te ngbū esiti fingangū ka wū kpara, ne kpah de. Ah le de mū o to mū, teka adi emere zūka ngū, te ena areke gbū jia Me, da engbū zii, baka zūka kpara de gu maguma ye. Angū te mū ngbū ziii kpah de gu maguma mū bala, ngū la ti angbū kükürü de. Mū ena amaka zūka ngū te gara gbūgbū. ⁵ Angū ta gūgū, gina wū wūruse, te wūh ba ngū ka-ewū gbū *Ngari Me ne, wūh ngbū ta emere zūka wū ngū bala. Fū ewū angbū eje riri ka wū watī wū. ⁶ Baka Sara,* ta te ngbū eje riri ka *Abarayama. Fū ah angbū ei engu, gū ba, "Mere kpara." Tītine, yi eyi de wū di enga Sara, angū yi ngbū eyi emere zūka ngū, baka te engu ngbū ta emere ne. Te di bala, ah le de yi di erū kpekepe. Yi mere e ace ngū ka Me, teka ngū ka cūrū ka wū ngū fūh kotō ne, de.

⁷ Kpah bala, de-yi, wū komoko, ah le de yi di engbū de wū wara yi te zūka kaje, de zūka fingangū. Yi mere e adi ekpa ngū ewū, da efala ewū, ne de. Fanū fanū, wazi ewū baka nda-yi, nda ma. Amba

Me kūwa ewū eyi, teka *zūka maguma ye, kpah baka te engu kūwa yi. Ah le de yi di engbū tundu de ewū, ereke areke de zūka fingangū, teka fū Me adi eje gba ka-yi ereke areke.

Dene mene ngū te ma le amala fū yi 'buru

⁸ Wū di enga wūna, ah le de yi di engbū de wū bu yi ereke areke, de fingangū ka-yi biringbō. Ah le de yi di ewu cinga wū bu yi, kpah da ele te-yi esūka yi, de maguma yi 'buru. Yi mere e adi eo ngū ka-yi memere de. ⁹ Te gara kpara mere siti ngū fū mū la, mū mere e alūgū na siti ngū la fefe na de. Te kpara soko mū la, mū mere e asoko engu kpah de. Mū du, mū mala zūka ngū fefe na, angū dela eyi ngū te Me le de mū di emere. Te mū mere bala, Me ena ato wazi fū mū ato fanū. ¹⁰⁻¹¹ Ah baka ngū te wūh ba gbū *Ngari Me, gū ba, "Te mū le akūwa, angbū de tadu la, ah le de mū ce *siti wū ngū ka-mū 'buru, adu angbū emere wū ngū, te ena areke gbū jia Me. Ah le de mū ce ngū ka di-ngū, mū mere e asu wu ekūte wū bu mū kpah de. Mū to te-mū, teka adi engbū mbi de wū bu mū, de gu maguma. ¹² Kükürü de, angū Me ngbū eceka kpi fūtanga mene wū kpara, te ewū ngbū emere ngū ereke areke gbū jia ye ne, fū engu angbū eje gba ka-ewū. Amba teka mene wū kpara, te ewū ngbū nda-wū fi bū da emere siti ngū ne, Me le ngū ka-ewū nda de."[†]

Dene cinga te yi ena azū, teka zūka wū ngū, te yi ngbū emere

¹³ Wū di enga wūna, ah le de yi di eo to yi 'buru, teka adi emere zūka wū ngū, te ena angbū ereke gbū jia Me. Te yi mere bala, gara kpara te ena amere yi esiti, gbū ngū la, nda ma. ¹⁴ Anga te yi ngbū ezū cinga, teka zūka wū ngū te yi ngbū emere la, ah le de yi ngbū de tadu! Angū Me ena ato wazi fi yi me-ye. Yi mere e akpe cūrū de. Yi fi nga ngū kpah de. ¹⁵ Yi di egbo nga iri Yesu emaguma yi, angū engu de Miri ka-yi. Ah le de yi reke te-yi, angbū nzo, angū wū kpara ena ayi-ta yi, teka si-ngū de te yi to maguma yi di fū Yesu ne, gū ba, "Yi ngbū eo to yi teka ngū ka Yesu, neh teka ne?" Te di bala, ah le de yi ngbū de zūka ngū gōmō yi, te yi ena alūgū fi ewū. Ah le de yi di elūgū ngū fū ewū ferre, de zūka fingangū. ¹⁶ Fū yi angbū fi bū emere wū ngū te reke areke gbū jia Me. Angū wū gara kpara ladū, te ewū ngbū efala nih, da emala ambala'ba ekūte nih, gū ba, nih, te nih di de wū kpara ka Yesu ne, nih de siti wū kpara. Amba te yi ngbū

* 3:6 3:6 Sara ta de wara Abarayama. Mū ena amaka ngū ka Sara gbū Gina Ngū 12-23. † 3:12 3:12 Mū ena amaka ngū la gbū Ci ka wū Davidi 34:12-16.

fi bü da emere züka ngü la, jia ewü ena avi, fü ngü adu anza gömö ewü. ¹⁷ Amba, te wüh to cinga te yi, zu bü teka züka wü ngü ka-yi la, ngü ma, ngü ka-yi ena areke gbü jia Me. Amba te yi mere *siti ngü, fü ewü ato cinga te yi teka ngü la, ngü la ena adi de siti ngü gbü jia Me afa sü. Angü mazü cinga teka züka ngü reke me-ye, da engu te mü ena azü cinga teka siti ngü ne.

¹⁸ Fanü fanü, ah le de yi fi la nga ngü ka Yesu Kurisito. Engu ngbü ta emere ka-ye fi bü züka wü ngü, fü ewü ayia ato mere cinga tete, teka züka ngü kaka la. Fū ah ayia akpi, teka aküwa nih, gbü *siti ngü ka-nih, angü ngü ka-nih ta gbü jia Me esiti fa sü. Te di bala, fü Yesu ayia akpi afa nih gbü siti ngü la, teka fü nih afü maguma nih, adu ara fü Me. Wüh mörö bü küte Yesu, amba *Nzila Wazi Me du zükü engu gbü kpi la eyi. Ah ti adu akpi tine de. ¹⁹ Kpah bala, fü Nzila Wazi ka Me ayia ato wazi fü Yesu, teka de ah nü agbü sü, te kuru wü kpara, te ewü kpi akpi, ngbü tete gbü ku. Fū ah ayia amala ngari Me fü kuru wü kpara la. ²⁰ Dela wü kpara ta gügü, gbü wü lakü ka mere kundu nih, *Nüwa, te ewü le ngü ka Me de ne. Angü gbü sikipi ta te Nüwa ngbü egoro *zabu ka-ye tete, Me ngbü ta de gu maguma, teka ace lö-ra fü wü kpara la, de wüh fü maguma wü, amba wüh le nda-wü de. Te di bala, ah ta bü wü kpara ngbee 'bajena, wü Nüwa de wü di ye, te ewü küwa esaka mere siti ngu, ta te si füh kotö 'buru ne.[‡] ²¹ Ngu te si la, ah ge baka ngu, te wüh to *babatiza di fü yi, teka fü yi aküwa. Angü ngu la, ah baka kükürü ngu, te yi ngbü ezürü küte yi di ne, nda de. Si-ngü la, ah teka asere fü wü kpara, gü ba, yi to maguma yi eyi fü Me, teka fü yi aküwa, teka ngü ka Yesu Kurisito, te zükü gbü kpi ne. ²² Angü Yesu togo eyi agbü sü ka Me agbü kpi. Engu ngbü engbü ka-ye füh kpökpö, gbü kokpa ka Me, baka miri. Engu ngbü gbü nzö wü kpara 'buru, wü *malayika ka Me, wü muruyi, siti wü di engu me, de wü miri kawü kpah 'buru.

4

Dene ngü te yi ena ao to yi teka adi emere

¹ Wü di engu wüna, yi fi la nga mere cinga, te Yesu zü füh kotö ne. Te di bala, yi i maguma yi gö! de yi rü kpekepe. Ah le de fingangü ka-yi di kpah baka nda Yesu, angü wüh ena ato cinga te yi kpah baka nda-ka. Angü te yi zü cinga füh kotö sene la, ah esiti de, angü yi küwa gbü ku ka *siti ngü eyi. ² Te di bala, ah le de yi ce gümü siti wü ngü de füh kotö ne asidi, teka fü

yi angbü fi bü da emere mene wü ngü, te ena adi ereke gbü jia Me, te nga wü sikipi 'buru, angü yi la ladü de jia yi füh kotö sene. ³ Ta te engu gina, o yi to maguma yi fü Me la de ne, yi ngbü tane emere wü ngü ka lümü, baka te yi ngbü ele. Angü yi ngbü ta emere waza bü fa fa fa, da enzönzö wü fi, eküya di, teka angbü elolo wü siti bi di. Kpah bala, yi ngbü kpah emere gele ka faranda ka wü kundu yi, kpah baka mene wü kpara, te ewü le ngü ka Me de ne. Amba enatikine, ah le de yi ce wü ngü la asidi, angü yi tine eyi de wü kpara ka Yesu. ⁴ Fanü fanü, wü diri wü awuba yi, te ewü le ngü ka Me de ne, ngü la ena adi gbü jia ewü esiti. Angü titine, yi le adu angbü emere siti wü ngü ka lümü baka ewü nda-yi tine de. Te di bala, wüh ngbü efala yi teka ngü la. ⁵ Amba nda-yi, yi mere e afi nga ngü ka-ewü la nda-yi de, angü wüh ena akoro te gara engagira Me, fü Me ayita ewü, teka wü siti ngü ka-ewü la. Angü gbü *adu sikipi, Me ena aye süka ngü ka wü kpara 'buru, mene ewü de te ewü di la ezükü, bete mene ewü de te ewü kpi eyi ne. ⁶ Dela si-ngü te Yesu mala ngü ka Me di, kpah cu fü mene wü kpara, de te ewü kpi eyi akpi ne. Ngü ma, baka te küte ewü kpi kpah eyi, baka nda wü gara kpara 'buru ne, kuru ewü ena aküwa kpah aküwa agbü sü ka Me agbü kpi, fi mere badi.

⁷ Wü di engu wüna, adu sikipi koro eyi gbamari. Te di bala, ah le de yi ceka te-yi mbi. Yi di engbü de züka fingangü gbü nzö yi, teka fü yi adi eku gba fü Me ereke areke. ⁸ Mere kpeke ngü, te ena areke te Me, afa wü gara ngü di 'buru le, ah de ngü te yi ena adi ele te-yi esüka yi de maguma yi biringbö. Angü te yi ngbü ele wü bu yi la, yi ena adi kpah eboro siti ngü ka-ewü. ⁹ Teku wü bu yi, wü kpara ka Yesu, te ewü ena angbü egoro kpaka yi, baka wü ngba ne, ah le de yi di eza ewü agba yi, gbü mürü, de mere tadu.

¹⁰ Me to wazi eyi fü yi 'buru, teka fü yi adi emere tima ka-ni di, te wü kaje kpi kpi ye kpi kpi ye. Ah le de yi di eto te-yi 'buru, adi emere tima te engu to fü yi la, teka adi eto wazi fü wü bu yi, baka te Me ngbü ele. ¹¹ Te mü ngbü eri wü kpara de ngari Me la, ah le de mü di emala fi bü mene ngü, te Me ngbü esere fü mü me-ye. Te tima kamü nda-ye, teka adi ele ta-ngü te wü bu mü la, ah le de mü mere tima la de maguma mü 'buru, te nga wazi de te Me to fü mü la. Ah le fü yi angbü emere fi bü wü züka ngü, teka fü wü kpara angbü egbo nga iri Me, teka ngü ka Yesu Kurisito. Ah le de nih di egbo nga Me, da ecu ngüngü na fi mere badi, angü engu de mere kpeke

‡ 3:20 3:20 Mü ena amaka ngü ka Nüwa gbü Gina Ngü 6 - 9.

mürü wazi. Ah di bala.

Dene kpah gara ngü ka cinga, te ena amere wü kpara ka Yesu

¹² Wü di engä wüna, te yi maka mere cinga, teka ngü ka Yesu la, ngü la mere e aga gbü jia yi afa sü de. ¹³ Amba ah le de yi ngbü de mere tadu, kükürü de, angü Yesu Kurisito maka cinga ta kpah baka nda-yi la. Te di bala, yi ena amaka mere tadu te gara, gbü sikipi te Yesu Kurisito ena adu akoro füh kotö sene tete, de mere wazi ye. ¹⁴ Te wüh soko mü teka ngü ka Yesu Kurisito la, ah de züka ngü, angü ngü la ngbü esere, gü ba, wazi ka *Nzila Wazi Me ladü emaguma mü. ¹⁵ Amba, te wüh to kuru te mü, teka te mü mere siti ngü, anga mü zi e, anga mü mörö kpara, anga mü ngbü eri gbü ngü ka wü kpara, de wüh di emere baka fingangü ka-ni la, ngü la ti nda de. ¹⁶ Te wüh to cinga te yi, teka ngü ka Yesu Kurisito la, yi mere e angbü de lümü de. Yi di egbo nga iri Me, angü wüh ena awu, gü ba, yi de wü kpara ka Yesu Kurisito, teka ngü la.

¹⁷ *Adu sikipi te Me ena akolo liya ka wü kpara tete, koro eyi gbmari. Engu ena akolo ngü ka wü kpara ka-ye te engä gina. Amba teka mene wü kpara, te ewü le ngü kaka de ne, ngü ka-ewü ena adi baye? Ah ena adi de mere siti cinga! ¹⁸ Baka ngü te wüh ba gbü *Ngari Me ta gügü, gü ba, "Ah ena adi kpekpeke fü züka wü kpara, te ewü ena amaka *küküwa, angü wüh ena azü cinga feke. Amba, teka mene wü kpara, te ewü le ngü ka Me de ne, wüh ti aküwa kpo fi de."*

¹⁹ Dela ngü te ma le amala fü yi, te Me ce mba yi, de yi zü cinga teka ngü ka Yesu Kurisito la, ah le de yi to maguma yi 'buru fefe, de yi ngbü fi bü da emere züka wü ngü, angü toto ti äiri te yi de.

5

Dene ngü te ma le amala fü yi, wü kovo ka Me

¹ Wü di engä wüna, ma kpah de mere *kovo ka Me baka yi. Ma wu cinga te wüh to eküte Miri Yesu Kurisito ne, cu de jia ra. Nih ngbü 'buru eo jia nih eküte Yesu, angü engu ena adu akoro füh kotö sene de mere wazi ye. Engu ena ato kpah wazi fü nih, wü kpara ka-ye, gbü sikipi la. ² Te di eyi bala ne, ma ngbü emala fü yi, wü mere kpara, kpekpeke, gü ba, ah le de yi ceka kpi fütanga wü *kpara ka Yesu mbi mbi mbi. Angü wüh baka wü kambiliki, te Me to ewü eyi esaka yi, teka fü yi adi eceka kpi fütanga ewü. Yi mere e amere tima

la de maguma yi 'basu 'basu de. Yi mere tima la de tadu, angü Me to tima la fü yi cu me-ye, de yi di emere. Yi mere e angbü de gümü jiasse de. Amba ah le de gümü wü kpara ka Yesu la di emere yi me-ye, teka fü yi adi eceka kpi fütanga ewü ereke areke. ³ Yi mere e angbü gbü nzö wü kpara ka Yesu la de wazi de, angü Me to ewü me-ye esaka yi. Yi di eri ewü ferrre. Yi di kpah fi bü emere züka wü ngü, te nga wü sikipi 'buru, teka fü ewü awu züka kaje te yi ngbü emere la, fü ewü adi emere kpah bala. ⁴ Te yi mere bala, Yesu, te di de mere kpara ka-nih ne, ena ato mere wazi fü yi, te ti anza de, gbü sikipi te engu ena adu akoro tete.

Dene ngü te ma le amala fü wü kpara ka Yesu 'buru

⁵ Tekä ngü ka-yi, wü ka'dörö, ah le de de yi di eje riri ka wü mere kpara ka-yi. De-yi, wü *kpara ka Yesu 'buru, ah le fü yi adi eo ngü ka-yi kötö, da ele ta-ngü te wü bu yi ferrre. Angü wüh ba ta eyi gbü *Ngari Me, gü ba, "Te mü ngbü ecu ngü mü la, Me ti ale ngü ka-mü nda de. Amba te mü nda'ba te-mü fefe, baka mü rü cinga la, Me ena ato wazi fü mü, teka *züka maguma ye."* ⁶ Te di bala, ah le de yi füwa te-yi engagira Me, angü engu ti eyi ato wazi fü yi gbü sikipi ka-ye, te engu le me-ye. ⁷ Yi mere e asiti fingangü ka-yi, angbü de cinga teka wü e, de. Yi ce wü ngü la 'buru esaka Me, angü engu ti eyi aceka kpi fütanga yi me-ye.

⁸ Yi rü kpekpeke da eci sü! Angü vügü ka-yi, *Satana, ladü gbmari. Engu ngbü endondoro, da engböngbö de gba, baka mere moko kami, te ngbü egiri nü azoro, azü. ⁹ Yi mere e akpe cürü Satana de. Yi i maguma yi gö! de yi rü kpekpeke gbü ngü ka Yesu. Baka te wüh ngbü eto mere bi cinga te yi, teka ngü ka Yesu ne, yi mere e ace ngü ka Yesu de. Angü wü di engä ni yi, wü kpara ka Yesu, gbü wü sü füh kotö ne 'buru, ngbü kpah ezü cinga efa sü baka nda-yi la. ¹⁰ Yi rü kpekpeke, da etüka te-yi gbü wü cinga la. Angü, fütanga sikipi mba cükü'daye, Me ena adu aküwa yi gbü ngü la, teka züka maguma ye. Angü Me fe yi me-ye, teka fü yi aküwa fi mere badi, agbü sü ka-ye, agbü kpi, teka ngü ka Yesu Kurisito. Me ena areke ngü ka-yi kpah 'buru me-ye. Engu ena ato wazi fü yi, teka fü yi arü di kpekpeke. ¹¹ Ah le de nih gbo nga iri Me, angü engu de Mere Miri ka-nih me-ye, fi mere badi! Ah di bala.

Dene adu ngü ka-ra

* 4:18 4:18 Mü ena amaka ngü la gbü buku ka Ngü Mani 11:31. * 5:5 5:5 Mü ena amaka ngü la gbü buku ka Ngü Mani 3:34. † 5:12 5:12 Wü gara kpara ngbü ei iri Silivanü ne, gü ba, Sila.

¹² Dela mba enga ngü, te ma ba, tima fū yi, teka ato wazi fū yi. Enga wüna, Silivanü,[†] te di de züka kpara ka Yesu ne, ah le ta-ngü te ra, da eba köcökpa ne meye. Ma ngbü emala fū yi kpekpeke, gü ba, ngü ka Yesu ne, ah de zu ngü ka Me, te engu to fū nih, teka *züka maguma ye. Ah le de yi rü kpekpeke gbü ngü la.

¹³ Wü kpara ka Yesu agbü *Rüma kpakine[‡] to mandí fū yi. Mbarase ka-ra, Marako, to kpah mandí fū yi. ¹⁴ Yi to kpah mandí fū wü kpara 'buru, da efaka te-yi, de züka maguma yi, te iri Miri Yesu.

Me di de yi, de ah to gu ngü fū yi, gbü ngü ka Yesu Kurisito.

Wü di enga wüna, dela adu ngü te ma le amala fū yi, ah bala. De-ra Petero.

[‡] **5:13** 5:13 Gbü wü gara buku, wüh ba iri *Babilona, angü ngü ka wü kpara ka Rüma, gbü wü re la, ta kpah baka ngü ka wü kpara ka Babilona.

Dene e'ba'basu köcökpa te Petero ba fü wü kpara ka Yesu 2 Petero

Masere si-ngü

Simüna Petero, te di de biri kpara esüka wü *mürü tima ka Yesu, nzükpa de füh ye 'basu ne, ba ngü ne ta me-ye. Engu ba köcökpa ne fü wü *kpara ka Yesu, amba sü te wü kpara la ngbü tete, wüh sere de.

Petero ba köcökpa dene, o engu koro eyi gbe kpara. Engu le de wü kpara ka Yesu di efi ngari ni la, sidi nga ni. Angü engu wu eyi, gü ba, wüh ena amörö ni kere teka ngü ka Yesu. Engu mala ngü la fü ewü, de wüh rü kpekepe gbü ngü ka Yesu. Wüh di eceka te-wü 'be 'be 'be, angü te gara, wü mürü mani ena akoro, angbü da efüfü ngü ka Yesu. Te di bala, wüh ena akpo da efiti wü kpara ka Yesu, adi esiti fingangü ka-ewü, gü ba, "Wü kpara ti eyi amere ngü baka te wüh ngbü ele." Kpah bala, wüh gü ba, "Yesu ti adu akoro nda de." Amba Petero ngbü eri nih, gü ba, "Yesu ena adu akoro fanü fanü, akolo ngü ka wü kpara. Te di bala, ah le de nih reke te-nih, nih ngbü nzo, da eci nga dudu ka Yesu."

Wü ngü te Petero ba gbü köcökpa ne, wüh dene.

Sapita 1 Ngü te wü kpara ka Yesu ena adi emere

Sapita 2 Ngü ka wü mürü mani

Sapita 3 Ngü ka dudu ka Yesu

Dene mandí ka Petero fü wü kpara ka Yesu

¹ De-ra Simüna Petero, te ma di de labi ka Yesu Kurisito ne, ma kpah de *mürü tima kaka, ma to mandí fü yi wü *kpara ka Yesu 'buru, angü yi to maguma yi eyi fefe. Miri Yesu *Kurisito to wazi eyi fü nih, teka fü nih ato maguma nih fefe, angü ah de *E-küwa-nih, ah kpah de Me, te ngbü emere wü ngü ka-ye 'buru ereke areke. Dela eyi mere züka ngü fü yi, kpah baka te di de züka ngü fü a ne. ² Me di de yi, de ah di eto gu ngü fü yi efa sü di, teka *züka maguma ye. Angü yi wü ngü ka Me, bete ngü ka Miri ka-nih Yesu eyi.

Dene mene wü ngü te yi ena adi emere

³ Me to wazi fü nih me-ye, teka fü nih angbü emere wü ngü, te ena angbü ereke tete, angü nih wu ngü kaka-na eyi mbi mbi. Angü engu fe nih me-ye gbü wazi ka-ye, teka *züka maguma ye. ⁴ Kpah bala, teka züka maguma kaka, engu mere mere bi wü züka ngü eyi fü nih. Fü ah ayia

aküwa nih fi mere badi, baka ngü ta te engu mala fü nih. Angü Me küwa nih gbü nda-nih *siti wü ngü, ta te nih ngbü emere, kpah baka nda wü kpara füh kotö ne, eyi. Fü engu adu afü nih wü di ye, teka fü nih angbü kpah baka ni, Me.

⁵ Teka mere züka ngü, de te Me mere fü nih de bala ne, ah le de yi di enü de ngü ka Me kpa engagira nü. Yi to maguma yi eyi fü Yesu. Wayi, ah mbi. Amba titine, ah le de yi to te-yi 'buru 'buru, adi emere züka wü ngü. Yi o to yi kpah teka awu ngü ka Me areke areke. ⁶ Ah le kpah fü yi angbü etüka te-yi atüka, adi ece siti gümü ngü asidi. Ah le kpah fü yi arü kpekepe, adi eo to yi, da emere mene wü ngü, de te ngbü ereke gbü jia Me. ⁷ Ah le kpah de yi di ele te-yi esüka yi baka wü di enga ni, de yi di kpah ele wü kpara 'buru ale. ⁸ Dela 'buru wü ngü te yi ena adi emere. Angü, te yi nü de wü ngü la kpa engagira nü la, yi ena awu ngü ka Miri Yesu areke areke. Kpah bala, yi ena amaka wazi, teka amere tima ka Yesu di kpah areke areke. Angü Me ngbü ele de yi di emere fi bü wü züka ngü de bala. ⁹ Amba te yi mere wü ngü la bala de la, yi ena adi baka kpara te jijia na ceka kpí mbi mbi de. Angü to yi iri te züka ngü, de te Me mere fü yi, baka ta te engu küwa yi gbü siti wü ngü ka-yi, de te yi ngbü emere ta gügü ne, eyi.

¹⁰ Wü di enga wüna, yi o to yi teka adi emere tima ka Me kpekepe, teka fü wü kpara awu, gü ba, fanü fanü, yi de wü kpara, te Me fe yi me-ye. Te yi ngbü emere züka wü ngü bala la, yi ti adürü te kaje ka Me asidi de. ¹¹ Te di bala, Me ena aza yi de mere tadu, fü ah aü möngiti fü yi, teka fü yi ari kpa gbü sü kaka agbü kpí. Fü yi angbü de wü Miri Yesu kpala, fi mere badi.

¹² Wü di enga wüna, dela ngü te ma ele amala fü yi. Ah le de yi o to yi teka adi amere mene wü ngü, te ena adi ereke gbü jia Me. Ma wu eyi, gü ba, yi wu ngü la reke eyi areke. Ma wu kpah kpo, gü ba, yi ngbü ezoro zu ngü ka Yesu de kpa yi 'basu. ¹³ Amba nda-ra, baka te ma di la ladü de jia ra ne, ma ti ace da emala ngü la fü yi de, angü to yi ena airi iri. ¹⁴ Ma wu eyi, gü ba, sikipi ka kpi ka-ra eyi ghamari, angü Miri ka-nih Yesu sere ta ngü la eyi mbölö fere. ¹⁵ Dela si-ngü te ma ngbü eo to ra di, teka adi emala nga wü ngü la fü yi kpekepe ne, teka fü yi adi efi nga wü ngü la sidi nga ra sene.

Dene ngü ka Yesu, te di de zu ngü

¹⁶ De-a, wü *mürü tima ka Yesu, a mala ta nga ngü ka Yesu fü yi me-a, gü ba, Yesu de mere mürü wazi. Engu ena adu akoro te gara, füh kotö sene. Ngü la, ah de mani

nda de. Ah de ngü te wü kpara fi de tete-wü, teka afiti nih di ne, nda kphah de. A wu wazi Yesu cu de jia a. ¹⁷⁻¹⁸ Angü a nü ngbü ta de wü Yesu, kpa füh da,* fü a ayia awu mere wazi te Wö ye na, Me, to fefe. Fū küküte afü te-ye, angbü eci 'duwa kpilili bala! Fū a aje kphah ri Me, te wü mbölö kpa gbü kpī, da egbo nganga, gü ba, "Yesu zu de Ye ni, te maguma ni le engu fa sü."

¹⁹ Nih wu kpo, gü ba, wü *mürü dofo ka Me ta gügü ne, ngbü emala zu *Ngari Me fanü fanü. Wüh mala ta kphah nga Yesu, te Me le atima ne eyi, o wüh bi engu la de. Te di bala, ah le de yi o to yi teka Ngari Me, te wü mürü dofo ka Me ba ta gügü la. Angü ngü ka wü mürü dofo la baka ze-wa, te wüh siya teka alofo sü di. Ngü ka-ewü ena asere kaje fü yi, zalü akoro di gbü sikipi te Yesu ena adu akoro tete cu me-ye. Angü engu ena ato wazi fü yi, teka fü yi awu ngü ka Me 'buru areke areke. ²⁰ Ah le fü yi awu awu, gü ba, ngü de te wü mürü dofo ka Me ba ta gügü gbü Ngari Me ne, wüh ba ngü la de tete-wü nda-wü de. ²¹ Angü Ngari Me de ngü te wü kpara so me-wü ne, nda kphah de. *Nzila Wazi Me ngbü ta eto wazi fü ewü me-ye, teka fü ewü adi emala Ngari Me la di.

2

Dene ngü teka wü mürü mani

¹ Wü di enga wüna, ah ngbü ele de yi di eceka te-yi 'be, teka wü mürü mani, te ewü ena akoro asiti fingangü ka-yi. Ta gügü, wü mürü mani ladü, te ewü ngbü esu wu efa sü, da efiti wü di enga *Yisarayelee, gü ba, ngü te ani ngbü emala fü wü ne, Me sere fü ani me-ye. Kphah bala, te gara, wü gara kpara esüka yi ena akpo da esu wu, da efiti wü *kpara ka Yesu de wü mani ka-wü. Siti riri ka-ewü, te ewü ngbü efiti wü kpara di la, ena asiti fingangü ka wü mere bi wü kpara. Siti wü mürü mani la le aje ngü ka Miri Yesu nda-wü de. Amba Yesu ka-ye de Mere Miri, te kpi teka afa wü kpara gbü *siti ngü ka-ewü. Baka te wü mürü mani la le aje ngü ka Yesu de ne, ngü ka-ewü ti ayiri kphah de. Angü Me ena ato mere siti kuru te ewü kere, teka siti ngü ka-ewü la. ² Siti wü mürü mani la ngbü ememere waza bü faaa, de wü gara ngü ka lümü, angü wüh ngbü esu wu, gü ba, ngü te ani ngbü emere la, ah de siti ngü gbü jia Me nda de. Te di bala, mere bi wü kpara ka Yesu ena adu ale ngü ka-ewü la. Fü ewü akpo da ememere wü ngü ka lümü, kphah baka nda-ewü la. Te wü gara kpara ena awu siti ngü, de te wü kpara la ngbü emere, wüh ena akpo

angbü efala ngü ka Yesu, teka ngü ka-ewü la. ³ Siti wü mürü mani la ena angbü efiti yi de wü töndö ngü ka-wü, te ewü ngbü eso la. Kükürü de, angü wüh de wü mürü gümü e. Wüh le de yi di eto mere bi wü e fü ani. Amba Me wu ngü ka-ewü la eyi gügü. Ah ngbü eyi nzo teka anza ngü ka-ewü 'buru asidi.

⁴ Wü di enga wüna, te wü kpara ngbü fi bü emere siti wü ngü la, Me ena ato kuru te ewü ato. Ta gügü, gara wü *malayika ka Me mere *siti ngü. Baka te wüh mere siti ngü de bala, Me du ce ewü bü bala? Me ce ewü bala de. Me za ewü, sötö 'buru agbü mere du, zalü akoro di dene. Titine, wüh la fi ladü kpala, agbü mbiri sü, da eci nga *adu sikipi, te Me ena anza ngü ka-ewü 'buru tete na.

⁵ Fütanga ngü la, gbü wü lakī ta ka mere kundu nih, *Nüwa, wü kpara ngbü ta ememere wü siti ngü efa sü. Wüh le aje ngü ka Me de. Te di bala ne, Me ce ta ngü ka-ewü la eyi bala? Engu ce bala kphah de. Engu yia tima ta mere ngu. Fü ngu la amörö ewü 'buru. Amba teka ngü ka wü Nüwa, Me küwa ewü, wü kpara ngbee 'bajena kükürü, angü Nüwa ta de züka kpara ka Me, te ngbü emala ngü ka Me fü wü kpara.

⁶ Fütanga ngü la, wü kpara ka *Sodomo, bete nda Gomora ngbü ta kphah ememere wü ngü ka lümü efa sü. Te di bala, Me ce ewü ta eyi bala? Engu ce ewü kphah de. Ah yia curu ewü de sü ka-ewü 'buru nde, de mere siti wa 'duwa 'buti 'buti! Ah mere ngü la, teka asere fü wü kpara 'buru, gü ba, de-ni, Me, ni ena ato kuru te gara, te wü kpara, de te ewü le ngü ka-ni de ne, kphah bala. ⁷⁻⁸ Amba Me küwa ta bü nzö *Loto, te ngbü engbü kphah agbü Sodomo ne, angü ah ta de züka kpara. Baka te Loto ngbü ta ewu wü ngü ka lümü, de te wü kpara ka Sodomo ngbü ememere, te nga wü sikipi 'buru ne, fü ngü la angbü eke tete efa sü. Angü wü kpara la ngbü ta ememere wü ngü, baka te ewü ngbü ele.

⁹ Wü di enga wüna, dela ngü te ma ngbü ele amala fü yi enatikine, gü ba, Me ena aküwa züka wü kpara ka-ye, gbü wü cinga, te ngbü embü ewü de füh kotö ne. Amba teka siti wü kpara, te ewü le aje ngü ka Me de ne, Me ena ato kuru te ewü te gara, angü ah wu ngü ka-ewü kpo. Sikipi kaka ladü, te ena akoro, te engu ena anza ngü ka-ewü tete 'buru 'buru asidi.

¹⁰ Fanü fanü, teka ngü ka wü mürü mani, te ewü ngbü efiti wü kpara de siti riri ka-wü la, Me ena ato mere kuru te ewü te gara. Angü wüh ngbü emere siti ngü

* 1:17-18 1:17-18 Petero i da la nzila, angü ah ta de sü te wüh wu wazi ka Me tete na.

ka lümü. Wüh kphah de wü mürü kögönzö. Wüh ngbü efi nda-wü, gü ba, “Ani ti eyi amere wü ngü 'buru, baka te ani ngbü ele.” Wüh de kpara ka 'du'du. Wüh ngbü esoko wü malayika. ¹¹ Wazi wü *malayika ka Me fa sü. Ah fa nda wü mürü mani la ka. Ah bala de? Amba wü malayika la soko kpara nda-wü de, angü ah de siti ngü teka adi esoko kpara. Kpah bala wü malayika la to moto eküte wü kpara engagira Me, nda-wü kphah de.*

¹² Amba wü mürü mani la, wüh ngbü emala siti ngü mündü, teka ngü ka Yesu, te nih ngbü eri wü kpara di ne, angü wüh wu si-ngü la mbi mbi nda-wü de. Fingangü ka-ewü ka-ye baka nda siti wü nü, te ewü ngbü emere ngü ka-wü, baka te ewü ngbü ele. Me ena amörö ewü te gara, baka te wü kpara ngbü emörö wü siti nü ne. ¹³ Fanü fanü, Me ena ato kuru te wü mürü mani la te gara ato, teka wü *siti ngü ka-ewü, te ewü ngbü fi bü da emere la. Angü wüh ngbü emere ngü 'buru baka te ewü ngbü ele. Wüh le adi enzö fi efa sü, da elo siti wü bi, kphah da emere siti wü ngü ka lümü ka-wü la, te nga wü sikipi 'buru, cu gbü ra! Te yi ngbü engbü da ezü e tundu de ewü te sü biringbö la, wü kpara ena angbü esiti iri yi, fü ngü ka-yi asiti gbü jia wü kpara 'buru. Angü wü mürü mani la to te-wü 'buru 'buru gbü ngü ka waza. ¹⁴ Wüh ngbü engbü ka-wü, te nga wü sikipi 'buru, fi bü da egigiri wü würiise. Wüh le ace siti ngü nda-wü de. Wüh ngbü efiti wü kpara, te ewü wu ngü ka Me mbi mbi la de ne, teka de wüh dürü te kaje ka Me asidi. Wüh kphah de mere siti wü mürü kü. Dela wü si-ngü te Me ena ato kuru di te ewü, tete ne. Angü wüh baka wü siti jaji, de te ewü le adi eje ri wö wü de ne. ¹⁵ Wüh ce zu ngari Me ne eyi asidi. Wüh ngbü emere siti ngü, teka gümü jiase, baka nda *mürü dofo de iri ye Balama† ne. Angü gara miri mala ta ngü fü Balama, gü ba, “Ni ena ato bi jiase fü ye, teka de ye kina wü di engä *Yisarayeledi, angü wüh de wü vügü ka-ani.” Amba Me mala ta eyi fü Balama, gü ba, ye mere e amere bala de. ¹⁶ Gbü ngü la, Balama, mü le aje ngü, ta te Me mala fü mü ne, nda-mü de. Mü du yia li füh dongi ka-mü, teka anü akina wü di engä Yisarayeledi, teka ngü ka jiase la. Te di bala, fü Me ayia ato wazi fü dongi ka Balama la, de ah ri engu me-ye, teka de ah ce siti ngü la asidi. Fü Balama ayia aje ri dongi ka-ye la. Fü ah adu ace da ekina wü di engä Yisarayeledi.

¹⁷ Wü di engä wüna, fanü fanü, Me ena

ato kuru ato, te wü mürü mani la. Engu ena aza ewü, agü agbü mbiri sü. Angü wüh ka-wü baka du-kpa-ngu, te nzürü, ürü eyi aürü. Wüh kphah baka agö te birri, baka e te yia eli ali la, fü mere wege ayia aza engu, anü sü di ka, ah du li nda tine de. ¹⁸ Angü wüh ngbü emala wü cögbörö wü tiri ngü, gü ba, ani ngbü dela eri wü kpara de ngari Me, amba riri ka-ewü la ka-ye 'buru wu, zu ngü gbügbü nda ma. Wüh ngbü egiri ka-wü nda-wü fi bü mene wü kpara, te ewü to maguma wü la toto fü Yesu ne, da efiti ewü. ¹⁹ Wüh ngbü emala, gü ba, “Te wü le riri ka-ani la, wü ti eyi amere wü *siti ngü 'buru, baka te wü ngbü ele. Ngü la ti asiti gbü jia Me nda de, angü gara kpara te ena ato riri fü wü, atiri wü teka ngü de bala ne, nda ma.” Amba wü kpara la ngbü ka-wü eyi cu gbü ku ka siti ngü, angü siti gümü ngü ka küte ewü la, fa wazi ewü eyi 'buru 'buru. ²⁰ Te kpara le ngü ka Miri Yesu eyi la, engu küwa ka-ye eyi. Amba, te engu du ce riri ka Me, alügü nga ye, ari ladru gbü siti wü ngü ka wü kpara, te ewü le ngü ka Me de ne, ah ena adu aküwa, neh baye baye? ²¹ Ngü kaka ena adu asiti, afa nda mene wü kpara, de te ewü le ngü ka Yesu la de ne, ka. Angü te mü je riri ka Me eyi, fü mü ayia adu ladru, ari gbü siti ngü la, ah de mere siti ngü, te siti fa sü. ²² Ah baka si-ngü gbü gara ngü mani, te gü ba, “Bürü ngbü kphah edu ezü siti e, de te engu zi eyi kötö ne.” Gara gü ba, “Te mba zürü küte ye la, ah ena adu kphah akü'da te-ye gbü tötö.”‡

3

Dene ngü teka dudu ka Yesu

¹ Wü di engä wüna, dene e'ba'basu köcökpa te ma ba, tima fü yi. Wü ngü te ma ba fü yi, gbü wü köcökpa 'basu ne, ma ba kükürü de, angü ma le aü fingangü ka-yi, de yi wu zu ngü ka Miri Yesu reke areke, baka ta te yi je gömö a ne. ² Ma ngbü ele de yi fi nga wü ngü, ta te wü *mürü dofo ka Me ba gbü *Ngari Me, teka ngü ka dudu ka Yesu ne. Ma ngbü ele kphah de yi fi nga ngü, ta te Miri Yesu mala cu me-ye teka ngü la, baka e ta te a, wü *mürü tima kaka, mala fü yi ne.

³ Dene ngü te ma le asere fü yi, teka de yi je sisi na mbi mbi mbi. Te gara, gara siti wü kpara, te ewü ngbü emere wü *siti ngü, baka e te ewü ngbü ele ne, ena akoro angbü emü yi, da efala ngü ka Yesu, gü ba, “Yesu ti adu akoro füh kötö sene nda de!” ⁴ Kpah bala, wüh ena angbü eyi-ta yi, gü

* 2:11 2:11 Mere bi wü si-ngü la ladü gbü buku ka Yudi 8-11. Mü ena amaka kphah gbü buku ka Zakariya 3:1-2.

† 2:15 2:15 Balama ta de ye Beyora. Mü ena amaka ngü ka Balama gbü buku ka Namba 22:1-24:25. ‡ 2:22 2:22 Mü ena amaka ngü la gbü buku ka Ngü Mani 26:11.

ba, "Yesu ka-yi ne, ah ena adu akoro, neh elaye? Wü kundu ani mala fü ani tane, gü ba, 'Yesu ena adu akoro.' Amba ngü la ka-ye de töndö ngü! Wü kundu ani la kpi nza ka-wü eyi 'buru dene, Yesu du koro la fi de! Te di bala, ngü ka kotö ne ti anza nda kü de. Angü, wü ngü de füh kotö ne ngbü ka-wü fi bü da wü, ba e ta te Me o ewü, wüh fü te-wü nda-wü de!"⁵ Wü kpara la le afi nga ngü, gü ba, Me mere kpi bete kotö ta me-ye ne, nda-wü de. Amba Me ti eyi anza ngü ka kotö ne, baka te engu le. Angü, ta gügü ngu ngbü ka-ye füh kotö ne, bü faaa! Fü Me ayia amala ngü bü de komö ye kükürü, fü kara sü ayia akoro.⁶ Fütanga ngü la, fü wü kpara akpo angbü emere bi siti ngü füh kotö ne. Fü Me ayia atima agö, ali, asi füh kotö ne 'buru. Fü ngu la ayia anza ngü ka siti wü kpara la 'buru.⁷ Amba Me mala ta ngü eyi gügü, teka ngü ka kokpi, te nih ngbü ewu, bete kotö ne, te nih ngbü engbü gbügbü na ne, gü ba, "Ni ena acuru ewü de wa, de siti wü kpara de gbügbü na la 'buru asidi, gbü *adu sikipi, te ni ena akolo ngü ka wü kpara 'buru tete na ne."

⁸ Wü di enga wüna, yi fi nga ngü ne mbi mbi mbi. To yi mere e airi tete na de. Me mere wü ngü ka-ye ka ka ka nda de. Me ngbü emere wü ngü ka-ye ferrre. Angü fingangü ka Me baka nda-nih, wü kpara ne, nda de. Gbü jia Me, bi wü re baka kutu biri ne, (1.000) ah ka-ye bü enga ngü 'dongoni, baka sikipi ngbee biringbö kükürü. Kpah bala, sikipi biringbö, ah ka-ye gbü jia Me baka bi wü re.⁹ Gara wü kpara ngbü efi ngü, gü ba, "Yesu yiri eyi de bane, ah du koro kere de, neh teka ne? Te ah bala la, engu ti adu akoro nda tine de." Wü di enga wüna, ah bala de. Yesu ngbü eyiri kükürü de, angü Me le la ace laki fü wü kpara 'buru, de wüh fü maguma wü feke, teka fü ewü aküwa. Angü Me ngbü ele de kpara biringbö mere e akpi gbü siti ngü nda de.

¹⁰ Yi mere e afi, gü ba, Miri Yesu ti adu akoro de ne, nda-yi de! Fanü fanü, engu ena adu akoro, agüka wü kpara agüka, baka mürü zi, te ngbü egüka wü kpara. Gbü adu sikipi la, kokpi ena angbü ecuru da endrü de mere giri ye, kurru! bala. Fü ra bete fe, de wü küfara ayia acuru kpah 'buru ka! Fü kotö ne, de wü e gbü ye, ayia acuru kpah 'buru asidi.

¹¹ Wü di enga wüna, te wü e ka kotö ne ena acuru anza anza bala la, yi ena amere baye, teka fü yi aküwa? Ah le de yi di eo fingangü ka-yi fi bü teka adi emere mene wü ngü, te ena angbü ereke gbü jia Me.¹² Ah le kpah de yi di eo jia yi teka dudu

ka Miri Yesu füh kotö ne. Angü gbü adu sikipi la, kotö ake kpi de wü e gbü wü, ena acuru 'buru 'buru, anza ka.¹³ Angü Me mala ta eyi gügü, gü ba, "Ni ena adu amere to sü, teka fü züka wü kpara ka-ni angbü gbügbü na kpala. Siti ngü kpala tine 'buru 'buru ma."* Dela züka ngü ka Me, te nih ena angbü eo jia nih tekaka.

Dene adu ngü ka-ra

¹⁴ Wü di enga wüna, baka te yi ngbü eyi eo jia yi, teka dudu ka Miri Yesu ne, ah le de yi ce *siti wü ngü 'buru asidi, de yi o to yi 'buru, teka angbü emere bü duu mene ngü, te ena areke gbü jia Yesu. Ah le kpah fü yi angbü engbü de gu maguma, angü yi wu eyi, gü ba, Yesu reke ngü ezengba nih de wü Me eyi.¹⁵ Si-ngü te Yesu ngbü eyiri di ne, ah kükürü de. Ah teka ace laki fü wü kpara 'buru, de wüh fü maguma wü feke, teka amaka *küküwa. Enga ni nih, Pawülü, ba kpah bi wü kpeke ngü eyi fü yi teka ngü la. Angü Me to wazi me-ye fefe, teka awu si-ngü gbü ngü ka Me di mbi mbi mbi.¹⁶ Gbü wü köcökpa ka Pawülü la, ah mala kpah eyi fü nih bala, gü ba, "Ah le de nih di eo to nih 'buru, teka adi fi bü emere züka wü ngü gbü jia Me, te nga wü sikipi 'buru." Pawülü ba ngü la eyi bala, gbü wü köcökpa ka-ye 'buru. Gara kpeke wü ngü kpah ladü gbü wü köcökpa ka Pawülü, te wü gara kpara ti aje sisi mbi mbi de. Fü wü gara töndö kpara ayia angbü efüfü ngü la, baka nda-wü ngü. Kpah bala, wüh ngbü efüfü wü gara ngü gbü *Ngari Me kpah afüfü. Amba Me wu ngü ka-ewü la eyi. Ah ena ato mere siti kuru te ewü te gara.¹⁷ Wü di enga wüna, yi ceka te-yi 'be, de yi rü kpekpeke teka wü mürü mani, te a mala nga ewü fü yi ne, angü wüh ena akoro afiti yi de wü wu ka-wü la. Amba ah le de yi lala eküte zu ngü ka Yesu.¹⁸ Yi nü de ngü ka Miri Yesu la kpa engagira nü. Yi di fi bü eo to yi, teka adi eje si-ngü gbü ngü ka Yesu la mbi mbi mbi. Angü Yesu ena ato wazi fü yi de *züka maguma ye, teka fü yi amere ngü la di.

Ah le de nih gbo nga iri Miri Yesu, *E-küwa-nih titine, anü di kpa engagira nü, fi mere badi. Ah di bala.

Dela adu ngü ka-ra, Petero.

* 3:13 3:13 Mü ena amaka ngü la gbü Yisaya 65:17 bete 66:22.

Dene gina köcökpa te Yüwane ba fü wü kpara ka Yesu 1 Yüwane

Masere si-ngü

*Yüwane ba köcökpa ne me-ye. Ah de Yüwane, ye Zebedayo, ta te di esüka wü *mürü tima ka Yesu nzükpa de füh ye 'basu ne. Ah kpah de Yüwane ta te ba tofo ngü ka Yesu Kurisito. Ah ba köcökpa ne fü gara wü *kpara ka Yesu te ewü ngbü gbü gara sü, amba nih ti awu iri sü la nda-nih de.

Si-ngü te Yüwane ba ngü ne fü wü kpara ka Yesu la tete, ah teka amala ngü fü ewü kpekpeke, gü ba dene, ah le de wüh le te-wü de wü bu wü, teka fü ewü adi wü di Me fanü fanü. Angü Yüwane gü ba dene, te mü gü ba, ni le Me de maguma ni 'buru, amba te mü le wü bu mü de la, mü ngbü esu ka-mü dela wu.

Yüwane le kpah amala ngü fü wü kpara la kpekpeke, de wüh ceka te-wü 'be 'be 'be teka wü mürü wu, angü wüh ena afti ewü de siti riri. Ah le de wüh lala eküte zu *ngari Me, ta te ani ri ewü di te enga gina ne.

Wü ngü te Yüwane ba gbü köcökpa ne, wüh dene

Sapita 1:1-4 Si-ngü te Yüwane ba köcökpa ne tete

Sapita 1:5-2:17 Ngü ka siti ngü

Sapita 2:18-27 Siti riri ka wü mürü fiti

Sapita 2:28-3:24 Ah le de nih di ele te-nih, angü nih de wü di Me

Sapita 4:1-6 Siti riri ka wü mürü fiti

Sapita 4:7-21 Ngü ka lele ka Me

Sapita 5:1-21 Ngü te yi ena amaka wazi gbügbü, te yi to maguma yi fü Yesu la

Dene si-ngü te ma ba köcökpa ne tete

¹ Wü di enga ra, ngü te a ngbü ele aba fü yi enatikine ne, ah de ngü ka Yesu *Kurisito, angü engu de Ri Me, te ngbü eküwa wü kpara 'buru. Ta gügü, te enga gina, o Me o kotö ne la de, Yesu ladü. De-a, wü *mürü tima kaka, a wu engu eyi cu de jia a. A je riri na eyi de güje a. A tala küküte kpah eyi cu de kpa a. ² Yesu Kurisito ka-ye ta ladü ake Wö ye, kü te kpo te enga gina, o Me mere kotö ne, la de. Fü Me adu aza engu, agü tatamu fü nih. Fü a awu engu ta cu de jia a. Fü a adu tine emala ngü tekaka na fü wü kpara, teka de wüh küwa aküwa fi mere badi. Dela si-ngü te a ngbü eba ngü tekaka na fü yi ne. ³ Angü a wu ngü engu la cu me-a de jia

a. A je riri na kpah eyi cu me-a de güje a. Dela si-ngü te a ngbü kpah emala ngü ne tete fü yi, de yi le ngü kaka, teka de nih ngbü biringbö, da ele te-nih esüka nih. Tekka ne de, angü a ngbü nda-a eyi ele te-a esüka a de wü Me bete Yesu Kurisito, te di de Yeye na ne. ⁴ Te di bala, dela si-ngü te ma ngbü eba ngü ne tete na fü yi, teka de nih ngbü de nih ma, de maguma nih biringbö. Fü nih adu angbü 'buru de mere tadu emaguma nih teka ngü la.

Dene ngü te ma ele amala fü yi teka siti ngü

⁵ Ngü de te a ngbü eba fü yi ne, a je wü ngü la gömö Ye Me, Yesu *Kurisito. Fü a adi emala fü yi, ga, Me ka-ye *nzila baka ra te ngbü esü, adi elofu sü füh kotö ne 'buru. Me ngbü eyi elofu sü, gara e kpala, te ena akoro ba bitü, ani jia sü de te ngbü elofu la, nda ma.

⁶ Te di bala, te mü mala, gü ba, "Ni le ngü ka Me eyi," te mü di dene la fi bü elala gbü *siti ngü, te mü ngbü emere ne, amba mü ngbü esu ka-mü nda-mü wu. Tekka ne de, angü wü siti ngü ka-mü la, ngbü egü tamu ngü, ga, mü le zu ngü ka Me nda-mü la fi de. ⁷ Amba te nih ngbü emere fi bü wü ngü te reke gbü jia Me, ba e te Me ngbü ele, fü nih angbü eyi da ele te-nih esüka nih fanü fanü la, *ngüte Yesu, Ye Me, ti eyi azürü wü siti ngü ka-nih 'buru asidi.

⁸ Te mü mala, gü ba, "Ni mere siti ngü nda-ni kü de," la, mü ngbü dela esu wu eküte mü de tete-mü. ⁹ Amba te mü du füwa te-mü, mala nga wü siti ngü ka-mü, de te mü ngbü emere ne 'buru mbölö mbölö fü Me la, Me ti eyi aboro wü siti ngü ka-mü. Fü engu azürü wü siti ngü de emaguma mü la ngbala, kpah ba e ta te engu mala. Angü engu ka-ye de kpara te ti afüfü ngü, de te engu mala ne, nda de. Ah emere ka-ye kpah fi bü mene ngü te reke areke.

¹⁰ Amba te mü cere nga mü, ga, "Angü ni mere siti ngü nda-ni kü de," ngü la ena angbü gegege ba e te mü mala, ga, "Me de mürü wu." Angü engu mala eyi, ga, "Wü kpara 'buru mere siti ngü eyi." Te mü ga yiki gbü ngü engu la, amba ngü ka Me emaguma mü nda ma.

2

¹⁻² Wü di enga ra, ah le de yi mere *siti ngü de. Amba te mü mere di bü siti ngü la, mü mere e akpe cürü de, angü Yesu Kurisito ladü. Engu de kpara te ngbü eku gba fü Me teka nih, de Me di eboro wü siti ngü ka-nih. Angü kpara te ngü kaka reke areke gbü jia Me, ah ka-ye duu de Yesu Kurisito kpikpi ye. Engu kpi teka areke siti ngü de te di ezeimba nih de wü Me

ne. *Ngüte Yesu Kurisito ti eyi aküwa nih, de wü kpara füh kotö ne 'buru, gbü wü siti ngü ka-nih.

Dela si-ngü de te ma emala ngü ne tete fü yi, wü di engu ra, teka ne de, de yi ce da emere wü siti ngü 'buru.

Dene ngü teka riri te Me to fü nih

³ Wü di engu ra, ah le de nih di eje riri ka Me, teka fü nih awu, gü ba, nih le ngü kaka eyi fanü fanü. ⁴ Te mü gü ba, "Ni le ngü ka Me eyi," fü mü adu angbü ka-mü fi bü emere wü *siti ngü la, amba mü ngbü esu ka-mü nda-mü dela wu, mü de kpara ka Me nda-mü de. ⁵ Te mü ngbü eyi emere wü ngü de te Me mala fü nih ne 'buru la, amba fanü fanü, mü le Me eyi de maguma mü. Angü e de te egü tamu ngü, ga, nih lala eyi eküte Yesu Kurisito ne, ah ka-ye de wü züka ngü te nih ngbü emere. ⁶ Te ah tüne eyi bala la, te mü ga, "Ni le ngü ka Yesu Kurisito eyi," ah le de mü ngbü fi bü da emere züka ngü te reke areke gbü jia Me, gegege ba e ta te Yesu Kurisito ngbü emere.

⁷ Wü di engu ra, riri de te ma eto fü yi ne, ah de to ngü de. Ah de diri riri ta te yi je eyi gügü te engu gina, o yi kpo ele ngü ka Yesu tete. Riri la gü ba dene, yi di ele te-yi esüka yi de wü bu yi. ⁸ Ngü la, ah de diri riri, amba ah kphah de to riri. Angü Yesu Kurisito gü ta tamu ngü ka lele la eyi fü nih. Yi kpo kphah eyi ele te-yi esüka yi gegege baka e dela. Te di eyi bala ne, ngü la ngbü egü tamu ngü fü nih, gü ba, biti nü sü eyi, angü kpi seke eyi.

⁹ Te di bala ne, te mü gü ba, "Ni eyi de kpara ka Yesu, te ni ngbü endoro gbü ra-sü," la, amba te mü le wü bu mü de la, mü de kpara ka ra-sü nda-mü la fi de. Mü ka-mü nda-mü la fi bü kpara ka biti. ¹⁰ 'Duwa te mü ngbü tüne eyi ele wü bu mü de maguma mü 'buru la, amba mü te edu akoro angbü ba kpara ka ra-sü fanü fanü. Angü dela siti ngü tüne emaguma mü eyi ma, mü ti tüne adürü te kaje ka Me, ba kpara te ngbü edo lö ye gbü biti ne, de. ¹¹ Te mü le wü bu mü de la, ah esiti, ah ba e te mü ngbü ka-mü la fi bü endoro gbü biti. Mü wu mene ngü de te mü ngbü emere ne, nda-mü de. Mü dürü dela eyi adürü, angü jia kpara ti aceka kpi gbü biti nda de.

Dene ngü ka maguma 'basu 'basu

¹² Wü di engu ra, ma ba ngü ne fü yi kükürü de. Ma ngbü emala ngü fü yi, gü ba, "Me boro wü *siti ngü ka-nih eyi fü nih teka ngü ka Yesu Kurisito, te kpi teka nih." ¹³ Teku yi, de te yi di de wü cögbörö kpara, de te yi le ta ngü ka Yesu Kurisito eyi gügü ne, ma emala fü yi, gü ba, "Yi wu Yesu Kurisito eyi fanü fanü, gü ba, kü ta gügü, o wüh mere kotö ne tete na la de,

Yesu ka-ye ladü. Enatikine engu fi ladü da ye." De-yi wü ka'dörö, te yi le ngü ka Yesu tüüne dene, ma ena amala nda-yi, gü ba, "Yi sö gü eyi kpekpeke, za esaka vügü ka-nih, *Satana, ka."

De-yi wü di engu ra 'buru, ma emala fü yi, gü ba dene, "Yi wu Me eyi fanü fanü, te di de Wö nih." ¹⁴ De-yi wü cögbörö kpara, ma emala fü yi, gü ba, "Yi wu Yesu Kurisito eyi fanü fanü, te ewü di ladü ake Me gügü te engu gina, o Me o kotö ne la de." De-yi wü ka'dörö, ma emala fü yi, gü ba, "Yi rü eyi kpekpeke. Teku ngü la, fü ngü ka Me angbü emaguma yi, fü yi ayia aza esaka Satana kphah eyi fanü fanü."

¹⁵ Wü di engu ra, yi mere e ao maguma yi te ngü ka kotö, de wü e de gbü ye ne, de. Kükürü de, angü te yi o to yi teka ngü ka kotö ne la, maguma yi ena adi ka-ye fi bü 'basu 'basu, yi ti ato maguma yi fü Wö nih Me nda-yi de. ¹⁶ Wü mene ngü de ka kotö ne, ah de ne wü ngü ne? Ah de wü siti ngü, te wü kpara ngbü emere, ba e te ewü ngbü ele. Wü gara ngbü eo gümü e ka wü bu wü. Wü gara ngbü egbo nga wü, teka wü e de te di esaka wü. Wü mene ngü de bala reke gbü jia Me nda de. Dela ka-ye bü 'buru wü töndö ngü ka kotö ne. ¹⁷ Yi ce mene wü ngü de bala asidi, angü wü ngü de füh kotö ne ena anza ka-wü anza. Amba, te yi ngbü emere wü ngü, de te reke areke gbü jia Me la, yi ena aküwa ka-ye aküwa, angbü sü ka Me angbü kpi, fi mere badi.

Dene ngü teka wü vügü ka Yesu Kurisito

¹⁸ Wayi, wü di engu ra, wü ngü de füh kotö ne ena anza ka-wü anza, angü *adu sikpi koro eyi ghamari. Yi fi nga ngü ta te a mala fü yi gügü, "Te adu sikpi te ekoro la, vügü ka Yesu Kurisito ena akoro, teka angbü efiti wü kpara." Yi ceka la eceka, titüne gbü wü lak'i ka-nih ne, wü vügü ka Yesu Kurisito la koro eyi gbe gbe fa sü. Dela si-ngü de enatikine te ngbü egü tamu ngü, gü ba, ani koro eyi gbü adu wü sikpi. ¹⁹ Wü vügü ka Yesu Kurisito la ngbü ta engbü de wü nih, baka wü *kpara ka Yesu. Amba de, wüh ka-wü de wü mürü mani. Wüh yia ka-wü, ce ngü ka Me eyi. Teku ne de, fü ewü adi ta de wü kpara ka Yesu fanü fanü la, de wüh yia ta ace ngü kakanade. Dela ngü te gü tamu ngü, gü ba, wüh de wü kpara ka Yesu nda-wü de ne. ²⁰ Amba nda-yi, Yesu Kurisito to wazi ka *Nzila Wazi Me eyi emaguma yi, teka fü yi adi ewu zu ngü ka Me di fanü fanü. ²¹ Yi ngbü efi, gü ba, ma ngbü eba köcökpa ne fü ani, angü ani wu ngü ka Me de? Yi mere e afi ngü bala de. Ma ngbü emala fü yi kpekpeke, gü ba, yi wu ngü ka Me eyi reke

areke fanü fanü. Wü vügü ka Yesu ti afti yi, de wü wu ka-wü, la tîne kphah de.

²² Ma ngbü emala ngü ne fü yi kpekpeke, gü ba, te kpara mala ngü, gü ba, “Me tima Yesu me-ye nda de la,” amba kpara la ngbü esu ka-ye mere siti wu. Kpara te emala ngü de bala, engu le ngü ka Me nda-ye de. Ah le ngü ka Yesu Kurisito, Ye Me, nda kphah de. Kpara de bala ka-ye vügü ka Yesu Kurisito. ²³ Angü te kpara le ngü ka Yesu Kurisito de, kpara la le ngü ka Me, te di de Wö ye Yesu ne, nda kphah de. Te kpara le ngü ka Yesu eyi la, amba kpara engu la, ah de kpara ka Me fanü fanü.

²⁴ Te di eyi bala ne, wü di engu ra, yi zoro ngü ka Me de kpa yi ‘basu mini. Dela ngü ta te yi je eyi gügü, gbü ra te yi to maguma yi tete fü Yesu Kurisito. Te yi lala te zu ngü ka Me la, Yesu, Ye Me, ena akoro angbü emaguma yi, be kphah te Me te di de Wö nih ne. Fü yi angbü tîne tundu de ewü.

²⁵ Dela ngü ta te Yesu Kurisito mala, gü ba, “Ni ena aküwa nih, fü nih angbü agbü kpi kpara Me fi mere badi,” ne.

²⁶ Dela ngü te ma le aba fü yi, teka siti wü kpara, te ewü le adi efti yi. ²⁷ Te ah ena adi teka yi, Yesu Kurisito to Nzila Wazi Me nda eyi fü yi. Nzila Wazi Me la ngbü eyi cu kpa emaguma yi, da eto wü züka fingangü fü yi gbü wü ngü ka-ye nde ‘buru. Teku ngü la, yi ti ale gara kpara, teka ari yi, nda-yi tîne de. Gara kpara ti afti yi kphah de. Wü di engu ra, ngü te ma emala fü yi, ah dene, yi lala eküte Yesu Kurisito, kphah baka e te Nzila Wazi Me ngbü eyi emala fü yi ne.

Dene ngü te ma ele asere fü yi, gü ba, nih de wü di Me

²⁸ Wü di engu ra, yi lala eküte Yesu Kurisito. Te yi mere bala la, yi ena angbü de tadu, gbü *adu siki te Yesu ena adu akoro tete, kpa füh kotö akine. Yi ti akpe cürü jijia de. ²⁹ Yi wu bü eyi kpo, gü ba, Yesu Kurisito ka-ye duu me-ye kpikpi ye, kpara te ngü kaka reke areke gbü jia Me. Ah le de yi wu kphah awu, gü ba, te mü mere ngü, de te reke areke gbü jia Me la, mü ena adi kphah de ye Me.

3

¹ Nih fi la nga mere lele de te Wö nih, Me, le nih di, angü engu mala teka nih eyi, gü ba, “Nih de wü di ni.” Ah mala ngü la bala kükürü de, angü nih ngbü zu de wü di Me fanü fanü. Wü kpara füh kotö ne le ngü la, gü ba, nih de wü di Me ne, nda-wü de. Si-ngü engu la bala teka ne de, angü wüh le ngü ka Me nda-wü de. ² Wü di engu ra, nih enatikine eyi de wü

di Me. Wü gara züka wü ngü kphah ladü, te Me ena amere fü nih, te gara kpala, te nih wu la de. Amba nih wu eyi kpo, gü ba, te gara, te Me ena amere ngü engu la fü nih tete, Me ena adu afü nih baka ye. Fü nih adu angbü eceka Me tîne cu de jia nih. ³ Ah le de nih o to nih te ngü engu la, teka fü nih ace wü dürü ngü ka-nih ‘buru asidi, adu angbü tîne *nzila baka Me.

⁴ Angü te mü ngbü fi bü emere *siti ngü, enü di kpa engagira nü la, ah ka-ye gegege ba e de te mü mala ngü, gü ba, “Ni le aje riri ka Me nda-ni de.” ⁵ Si-ngü de ta te Yesu Kurisito koro tete füh kotö de sene, neh mbi mbi teka ne? Yesu Kurisito koro ta füh kotö sene, teka afa siti ngü ka-nih. Amba Yesu Kurisito mere siti ngü nda de. ⁶ De te di eyi bala ne, te nih lala eküte Yesu Kurisito la, nih ti tîne angbü emere fi bü wü dürü ngü ne de. Te mü ngbü fi bü da emere wü siti ngü la, amba mü le ngü ka Yesu nda-mü kü de.

⁷ Wü di engu ra, yi o jia yi eküte yi, angü wü kpara ena anü afti yi gbü ngü la. Te yi ngbü emere wü züka ngü la, yi ena angbü ba züka kpara gbü jia Me, kphah baka Yesu Kurisito. ⁸ Te mü ngbü emere wü siti ngü la, amba mü de ye Me nda-mü de. Mü ka-mü nda-mü de ye *Satana. Kükürü de, angü Satana ngbü nda-ye emere fi bü wü siti ngü. Dela si-ngü te Yesu koro tete füh kotö sene, teka anza tima ka Satana la asidi. ⁹ Te yi ngbü zu de wü di Me, de te Me bi yi me-ye la, yi ti angbü emere wü siti ngü de. Angü wü di Me ngbü elala ka-wü nda-wü fi bü gbü ngü ka Me. Teku ngü la, ah le fü yi ace da emere wü siti ngü, angü yi eyi de wü di Me. ¹⁰ Dela ngü te ena agü tamu wü kpara ka Me fü nih, enatikine. Fü ngü la agü kphah tamu wü kpara, te ewü di de wü kpara ka Satana. Te mü mere züka ngü gbü jia Me de la, mü de ye Me nda-mü de. Kphah bala, te mü le wü bu mü de la, mü de ye Me nda-mü kphah de.

Dene gina riri te Me to fü nih

¹¹ Gina riri ta te wüh ri yi di, gbü ra ta te yi le ngü ka Yesu Kurisito tete na ne, ah ngbü egü neh fe? Ah gü ba, “Nih di ele te-nih esüka nih de wü bu nih.” ¹² Te mü le wü bu mü de la, mü ka-mü gegege baka Kayina la. Kayina mere ta ne ngü ne? Ah yia ta gbü ra biringbö, mi engu ni ye, de iri ye Abele, mörö. Si-ngü ta te engu mörö engu ni ye tete, ah bane. Kayina, mü ngbü ta nda-mü ka-mü emere fi bü wü *siti ngü. Engu ni mü, Abele, ngbü ta nda-ye ka-ye emere fi bü wü züka ngü, te reke areke gbü jia Me. Kayina, fü ngü la ake te mü, fü

* 3:12 3:12 Mü ena amaka ngü ka Kayina ake Abele gbü Gina Ngü 4:1-25.

mü adu akpü engu ni mü 'duwa sürü sürü, fū mü ayia amörö engu teka ngü la.*

¹³ Wü di engu ra, wü kpapa de te ewü le ngü ka Me de ne, ena akpü yi, ge baka ngü de te Kayina mere. Ah le de ngü la mere e aga gbü jia yi de. ¹⁴ Angü nih ka-nih nda-nih de wü kpapa ka Me fanü fanü. Angü Me küwa nih eyi. Nih ce ngü ka kpi kpah eyi gügü. Nih ti eyi awu, gü ba, nih küwa eyi, angü nih ngbü eyi da ele te-nih esüka nih. Mene kpapa te le wü bu ye de ne, dela mene kpapa te di la fi bü elala gbü siti ngü te eto kpi. ¹⁵ Angü te mü ngbü ekpü wü bu mü la, mü ka-mü gbü jia Me, ba kpapa te ngbü emömörö wü bu ye. Kpapa te ngbü emörö wü kpapa, ah ena aküwa? Ah küwa nda de!

¹⁶ Nih ena ale te-nih, neh baye baye? Ah le de nih le te-nih kpah ba e te Yesu Kurisito le nih. Angü ah ce te-ye, akpi teka ngü ka-nih. Te di bala, ah le fū nih ato te-nih, kpah akpi teka ngü ka wü bu nih. ¹⁷ Te mü de mere bi wü e esaka mü, fū kiri mü angbü ekpi ka cinga ede mü, te mü wu cinga na de la, lele ka Me ladü emaguma mü fanü? ¹⁸ Wü di engu ra, nih mere e adi emala ngü, gü ba, "Nih le wü bu nih eyi, nih le wü bu nih eyi," bü de komö nih kükürü ne, de. Te nih le wü bu nih ngbü eyi ale, de maguma nih biringbö la, ah ti ati fū nih angbü ele ta-ngü te ewü gbü wü cinga ka-ewü la.

¹⁹ Dela ngü te ena agü tamu ngü, gü ba, nih de wü kpapa ka Me fanü fanü. Angü te nih ngbü eyi da ele te-nih esüka nih la, amba nih eyi zu de wü kpapa ka Me fanü fanü. Nih ti tina akpe cürü, teka akoro kpaka Me, de. Angü Me mala ngü la eyi bala cu me-ye. ²⁰ Te mü ngbü efi mere fingangü emaguma mü, gü ba, "Angü ni de siti kpapa," la, wayi, amba mü mere e akpe cürü Me de. Angü fingangü ka-nih fa nda Me nda de. Kpapa te wu ngü 'buru kpo, neh da? Ah de Me de? Me mala ngü eyi, gü ba, "Wü kpapa ka-ni mere e adi ekpe cürü ni de." ²¹ Wü di engu ra, nih mere e akpe cürü de. Nih gu maguma nih agu. Nih koro kpaka Me, aku gba fefe na de gu maguma nih. ²² Te nih mere bala la, Me ena ato wü e, de te nih ngbü ele ne fū nih ato. Kükürü de, angü te nih ngbü eje riri kaka, da emere ereke areke la, amba nih de wü kpapa kaka fanü. ²³ Riri ka Me ngbü egü neh fe? Riri ka Me, gü ba, "Nih to maguma nih fū Yesu Kurisito, te di de Ye Me ne. De nih di ele te-nih esüka nih, kpah baka e te Yesu mala fū nih." ²⁴ Te nih ngbü eje riri ka Me la, amba nih lala eyi te ngü kaka-na, fū engu angbü kpah de nih. Dela ngü de te ena agü tamu ngü, gü ba, Me

ladü tundu de wü nih fanü fanü, angü ah tima *Nzila Wazi ye eyi emaguma nih.

4

Dene ngü te ma ele amala fū yi, teka ngü ka Nzila Wazi Me

¹ Wü di engu ra, mere bi wü kpapa ngbü emala ngü, gü ba, "Ngü te ani ngbü emala ne, *Nzila Wazi Me ngbü esere fū ani me-ye." Yi mere e aje ngü ka-ewü la, fū yi ayia ale 'duwa bü ale ne, nda-yi de. Ah le de yi ceka kpi gbü ngü la kpo kpo feke, teka fū yi awu, anga te ngü la koro ngbü zu kpaka Me fanü fanü ya? Tekane de, angü mere bi wü mürü wu ladü, te ewü ngbü esu wu, gü ba, "Nzila Wazi Me ngbü emala ngü gömö ani me-ye," amba wüh ngbü esu ka-wü nda-wü dela wu. ² Ngü te ena agü tamu ngü fū yi, gü ba, Nzila Wazi Me ngbü emala ngü gömö kpapa la me-ye fanü fanü ne, ah bane. Te kpapa la le ngü ka Yesu Kurisito, fanü fanü, gü ba, "Yesu koro za küte kpah baka nda-nih, teka aküwa nih," la, amba Nzila Wazi Me ngbü emala ngü gömö kpapa la me-ye fanü. ³ Amba te kpapa la le ngü ka Yesu nda de, Nzila Wazi Me emamaguma nda ma. Wazi de te engu ngbü emere tima la di ne, ah ka-ye de wazi ka vügü ka Yesu. A mala ta eyi fū yi, gü ba dene, "Vügü ka Yesu ena akoro." Titine engu koro, ngbü eyi eto wazi ye fū siti wü kpapa füh kotö ne.

⁴ Wü di engu ra, yi mere e akpe cürü vügü la de, angü yi ka-yi de wü di Me. Wü mürü wu la ti afa yi de, angü Nzila Wazi Me ngbü eyi emaguma yi, da eto wazi fū yi. Wawazi na fa nda *Satana, de te ngbü eto fū siti wü kpapa ka-ye de füh kotö ne ka. ⁵ Wü mürü wu la, wüh ngbü emala ka-wü bü 'buru wü ngü ka kotö de sene. Dela si-ngü de te wü kpapa füh kotö ne ngbü ele ngü ka-ewü tete na ne. ⁶ Amba nda-nih, nih ka-nih de wü di Me. Dela si-ngü de te mene wü kpapa te ewü le ngü ka Me de ne, ti aje ngü ka-nih kpah de. Amba mene wü kpapa de te ewü le ngü ka Me eyi ne, ngbü ele ngü ka-nih, da eje ngü ka-nih tete na ne. Dela ngü de te ena agü tamu ngü fū yi, gü ba, mene kpapa dene ngbü emala zu ngari Me. Amba mene engu ne ngbü ka-ye esu wu, angü Satana te ngü la me-ye fefe.

Dene ngü teka lele ka Me

⁷ Wü di engu ra, ah le de nih di fi bü ele te-nih esüka nih, angü ngü ka lele de mere ngü. Me ngbü eto wazi fū nih, teka lele la, me-ye. Te mü ngbü ele wü bu mü de maguma mü 'buru la, amba mü eyi zu de ye Me fanü, angü mü wu ngü ka Me eyi reke areke. ⁸ Amba te mü le wü bu mü de

la, mü de kpara ka Me nda-mü de, angü Me ka-ye de mürü lele. ⁹ Wü di engä ra, Me le nih de maguma ye 'buru. Ngü te gü tamu ngü la fü nih, ah dene. Engu za biri Ye ye biringbö, tima fü nih kpa füh kpo. Te nih de ah koro, ah kpi, teka aküwa nih. ¹⁰ Lele de ne e ne? Lele de ngü ka Me, angü Me le nih de maguma ye 'buru. Teka mere lele kaka-na la, fü ah ayia atima Ye ye, Yesu, teka de wüh za engu, mörö ba *kambiliki, fü *ngüngüte areke ngü te di ezengba nih de wü Me. Amba nda-nih, nih le Me mbi mbi nda-nih de.

¹¹ Wü di engä ra, te Me le nih de maguma ye de bala ne, nih ena amere tine neh baye? Ah le de nih le te-nih esüka nih kpahe gegege bala. ¹² Nih ena ale Me, neh baye baye? Angü kpara te wu Me de jia ye, nda ma. Te di bala, te nih ngbü ele te-nih esüka nih la, Me ena angbü de nih tundu. Fü nih adu angbü ele Me cu de maguma nih fanü fanü.

¹³ Nih ena awu neh baye, gü ba, nih ngbü eyi elala eküte Me? Nih ena awu neh baye, gü ba, Me ngbü eyi emaguma nih? Nih ti awu ngü la teke, angü *Nzila Wazi Me ngbü engbü emaguma nih, adi esere ngü la fü nih. ¹⁴ De-a, wü *mürü tima kaka, a wu ta Yesu, Ye Me, cu de jia a, fü a adu amala kpahe fü yi, gü ba, "Me, te di de Wö ye na ne, tima engu me-ye, teka akoro aküwa wü kpara füh kotö ne 'buru." ¹⁵ Te di bala ne, te mü le eyi, gü ba, Yesu Kurisito de Ye Me la, Me ena angbü emaguma mü fanü, angü mü lala eyi eküküte na. ¹⁶ Te di bala, nih ti eyi awu, gü ba, Me le nih de maguma ye 'buru. Fü nih adu ato maguma nih fefe na, teka ngü la.

Wü di engä ra, Me ka-ye de mürü lele. Te di bala, te nih ngbü eyi ele te-nih esüka nih la, amba nih kpo eyi elala eküte Me fanü. Fü Me adu angbü kpahe emaguma nih. ¹⁷⁻¹⁸ Me ngbü eto wazi fü nih me-ye, teka fü nih angbü ele te-nih esüka nih di. Teka ngü la, lümü ti azoro nih, te gara gbü *adu sikipi, te Me ena akoro, aye süka ngü ka wü kpara füh kotö ne, nda de. Cürü ti amere nih kpahe de, angü nih ngbü ele wü bu nih, kpahe baka e te Me ngbü ele nih ne. Te mü le Me eyi de maguma mü biringbö la, mü ena akpe cürü, neh teka ne? Gara ngü kpahe ladü? Gara ngü ena adi nda ma! Te nih le Me eyi de maguma nih 'buru la, ngü la ena aliki cürü emaguma nih asidi. Wü kpara ngbü ekpe Me ne, angü Me ena ato kuru eküte ani. Te kpara ngbü ekpe Me bala la, amba mamaguma ka-ye 'basu 'basu.

¹⁹ Nih ena amaka wazi, teka fü nih adi ele Me di, anga wü bu nih, neh kaye? Me ngbü eto wazi la bala me-ye fü nih, angü engu le nih ta fi me-ye, gügü te engä gina,

o nih le engu la de. ²⁰ Te kpara ngbü ekpü wü bu ye la, engu ena amala neh baye, gü ba, angü ni le Me eyi fanü fanü? Dela ka-ye wu! Kpara te wu Me de jia ye bane, ah nda ma. Amba wü bu mü, mü wu ewü eyi kpo. Te nih le te-nih de wü bu nih de la, nih ti ale Me kpahe de! ²¹ Dela riri ta te Yesu Kurisito to fü nih. Ah gü ba dene, "Te mü le Me eyi de maguma mü 'buru la, ah le de mü le wü bu mü kpahe bala."

5

Dene ngü te yi ena amaka wazi gbügbü,

te yi to maguma yi fü Yesu la

¹ Wü di engä ra, te nih le Me eyi la, ah le de nih le wü di Me kpahe bala. Wü di Me neh wü da? Wüh de mene wü kpara, de te ewü le eyi, gü ba, Me tima Yesu füh kotö ne me-ye, teka aküwa nih. ² Te di bala, te yi le Me eyi de maguma yi 'buru, fü yi angbü eyi kpahe da eje ngü kaka-na la, ah ti ati teka fü yi ale kpahe wü di ye na. ³ Te mü le Me eyi la, mü ena angbü eje riri kaka-na, da emere fanü fanü. Riri ka Me la ti äfa nih de, ⁴ angü nih eyi de wü di Me fanü fanü. Teka ngü la, nih ti eyi aza esaka wü vügü ka Me füh kotö ne. Nih ena aza esaka wü vügü ka Me, neh baye baye? Nih ena aza esaka ewü, angü nih to maguma nih eyi fü Yesu. ⁵ Wü kpara de te ewü di de wazi teka aza esaka wü vügü ka Me, neh wü da? Ah de mene wü kpara, de te ewü le ngü ka Yesu eyi de maguma wü biringbö, gü ba, engu de Ye Me fanü ne.

⁶ Yesu Kurisito de kpara, ta te Me tima kpa füh kotö akine. Fü ewü ato *babatiza fefe na. Fütanga ngü la, fü ewü azoro engu, amörö, fü *ngüngüte atökö teka nih. Wü gara kpara ngbü esu wu, ga, angü Yesu kpi ta nda de. Amba Yesu kpi eyi fanü fanü, teka aküwa nih. Dela zu ngü ka Me fanü fanü, te *Nzila Wazi Me ngbü esere emaguma nih. ⁷ Te di bala ne, wü ngü ladü bata te gü tamu ngü, gü ba, Yesu Kurisito ngbü zu de Ye Me. ⁸ Gina ngü engu la, ah de Nzila Wazi Me. E'ba'basu na, ah de ngü ka babatiza kaka-na. Ebabata na, ah de ngüngüte na, te tökö teka nih. Wü ngü de bata la ngbü emala ngü ngbee biringbö, gü ba, Yesu Kurisito de Ye Me fanü fanü. ⁹ Dela ngü te Me mala cu me-ye teka Ye ye. Te kpara mala ngü fü yi teka e de te engu wu cu de jia ye la, yi ti ale ngü engu la de? Te ah bala, de nih le ngü de te Me ngbü emala fü nih, angü engu de mere Me, de te ngü kaka ga fa nda wü kpara 'buru. ¹⁰ Me mala eyi, ga, "Yesu de Ye ni." Te di bala, te mü le ngü ka Yesu eyi, Nzila Wazi Me ena asere ngü la emaguma mü, gü ba, ngü la de zu ngü fanü fanü. Te mü

gü ba, Yesu de Ye Me nda de la, amba mü ngbü eceka Me gbü jia mü ba mürü wu. ¹¹ Dela wü ngü de te gü tamu ngü fü nih, gü ba, Yesu de Ye Me fanü fanü. Te di bala, Me küwa nih eyi fi mere badi, teka ngü ka Yesu. ¹² Angü, te mü to maguma mü fü Ye Me la, mü küwa eyi fi mere badi. Amba, te mü le ngü kaka de la, mü ti aküwa nda-mü kpah de!

Dene adu ngü ka-ra

¹³ Wü di enga ra, dela wü ngü de te ma ba eyi fü yi bala, teka fü yi awu, gü ba, te mü le ngü ka Yesu Kurisito, Ye Me, de maguma mü la, mü küwa eyi fanü fanü, fi mere badi. ¹⁴ Te di bala, cürü mere e amere nih teka adi eyi-tata de. Angü nih wu kpo, gü ba, te nih yi-ta Me teka gara ngü te reke gbü jija la, engu ena aje gba ka-nih la aje. ¹⁵ Te nih wu eyi zu kpo, gü ba, Me ngbü eyi eje gba ka-nih, de te nih ngbü eku ne la, nih ti kpah eyi awu, gü ba, engu ena ato mene e, de te nih ngbü eyi-tata tüngüngü na ne, ato fü nih.

¹⁶⁻¹⁷ Te mü wu gara enga ni mü, te ngbü emere dürü ngü la, ah le de mü ku gba fü Me tüngüngü na, de Me küwa engu aküwa. Te dürü ngü kaka engu la ni kaje fefe na la de la, Me ena aküwa enga ni mü la aküwa fanü fanü, teka ngü ka gba kamü la. Wü kpara ngbü emere bi wü dürü ngü. Wü ngü la 'buru de *siti ngü gbü jia Me. Amba gara siti liya ladü te ti aye süka kpara ake Me fi mere badi. Mene kpara te mere mene liya de bala, ma ti amala fü yi, gü ba, yi yi-ta Me teka kpara la? A'a! Ma ti amala bala nda-ra de.

¹⁸ Wü di enga ra, nih wu eyi, gü ba, te mü de ye Me fanü fanü la, mü ti angbü fi da ememere wü siti ngü ne tine de. Kükürü de, angü Yesu Kurisito, te di de Ye Me, ngbü eyi eceka kpä fütanga mü meye. Te di bala, *Satana ti tine amere ngü de mü ne de. ¹⁹ Angü Satana ngbü engbü gbü nzö wü kpara fuh kotö ne 'buru meye. 'Duwa de-nih, te nih di ka-nih nda-nih de wü kpara ka Me ne, nih ti ara fü Satana nda-nih tine de. ²⁰ Angü Yesu Kurisito, Ye Me, koro eyi, to wazi fü nih, fü nih ale ngü ka Me di fanü fanü, gü ba, engu ka-ye de mere Me agbü kpä. Te di bala, nih lala eyi eküte mere Me, angü nih lala eyi eküte Yesu Kurisito. Angü Yesu Kurisito de zu Me fanü, te ngbü eküwa nih. ²¹ Te di eyi bala ne, wü di enga ra, yi mere e adu gbü gele ka wü me ka wü kundu yi ne tine de.

Dela ngü te ma le amala fü yi, wü di enga ra, adudu na duu bala. De-ra *Yüwane.

Dene e'ba'basu köcökpa te Yüwane ba fü wü kpara ka Yesu 2 Yüwane

Masere si-ngü

*Yüwane ye Zebedayo ba köcökpa ne kpah me-ye. Ah gü ba, ni ba köcökpa ne fü gara tangbase ka-ni te Me fe me-ye, de wü di engu ye. Ah baka e te engu mala ngü la gbü mani, angü engu ba ngü la fü wü *kpara ka Yesu, te ewü di gbü sü la. Amba nih ti awu iri sü la nda-nih de.

Yüwane ba ngü ne fü ewü mba piti. Gina ngü te engu mala fü ewü, ah gü ba dene, ah le de wüh le te-wü de wü bu wü. E'ba'basu ngü, ah gü ba dene, ah le de wüh ceka te-wü 'be, teka wü mürü wu, te ewü ngbü efiti wü kpara de siti riri, gü ba dene, Yesu Kurisito ta te koro füh kotö ne, ah za küte baka nda-nih nda de. Ah ka-ye bü baka kuru kpara.

*Dene e'ba'basu köcökpa te Yüwane ba
fü wü kpara ka Yesu*

¹ De-ra *Yüwane, mere *kovo ka-yi, ma ba köcökpa ne me-ra fü yi, wü *kpara ka Yesu Kurisito, angü Me fe yi me-ye. Gümü yi ngbü eke ra cu efa sü. Wü kpara 'buru te ewü le zu ngü ka Yesu ne, wüh le yi kpah bala. ² Kükürü de, angü zu ngü ka Me la ngbü eyi guvu nih fi mere badi.

³ Ma to mandí fü yi. Wö nih Me ake Ye ye, Yesu *Kurisito, di de yi. De wüh wu cinga nih, da ele ta-ngü te nih teka *züka maguma wü. De wüh to kpah wazi, de gu maguma fü nih, teka fü nih ale zu ngü ka Me de maguma nih, kpah da ele te-nih esüka nih di.

⁴ Ma de mere tadu, angü ma je nga yi, gü ba, yi ngbü emere 'duwa wü ngü de te ngbü ereke areke gbü jia Me, baka wü riri, de te Me to fü nih ne.

⁵ Wü di engu ra, dene ngü te ma le amala fü yi, teka gina riri ka Me. Ah de to riri nda de. Ah de diri riri ta te Yesu mala fü nih eyi te engu gina. Riri engu la ngbü emala, gü ba, ah le de nih di ele te-nih esüka nih de maguma nih biringbö. ⁶ Te nih le Me de maguma nih la, ah le de nih di eje riri kaka, da emere. Gina riri kaka gü ba, ah le de yi di ele te-yi esüka yi de wü bu yi.

⁷ Wü di engu ra, yi ceka te-yi 'be 'be 'be, angü mere bi wü mürü wu kpo eyi da efiti wü kpara füh kotö sene. Wü kpara la ngbü esu wu, gü ba, "Te Yesu Kurisito koro ta füh kotö sene, ah za küte ba nda-nih ne nda de. Ah ka-ye bü baka kuru kpara."

Mene kpara te ngbü emala ngü de bala, ah ka-ye de mere siti mürü wu. Engu kpah de vügü ka Yesu Kurisito. ⁸ Ah le de jia yi di te yi, angü te yi lala gbü ngü ka Me, te di de zu ngü fanü fanü ne, yi ena amaka *küküwa kpaka Me agbü kpi fi mere badi. Amba te wü mürü wu la fiti mü, fü mü ayia ale wü wu ka-ewü la, mü ti aküwa nda-mü de.

⁹ Te mü ce zu ngü ka Yesu, te di fanü fanü ne, fü mü anü angbü endoro egigiri gara wü riri te di kpikpi ye, amba mü dela eyi de kpara ka Me nda-mü de. Te mü lala fi bü gbü riri ka Yesu, amba mü de kpara ka Wö nih Me, ake Ye ye, Yesu Kurisito. ¹⁰ Te gara mürü wu koro ngbü efiti yi, de gara ngü te di de zu ngü ka Me de la, yi mere e aza mene kpara la, anü di kpa gba yi ba ngba de. Yi mere e ace engu, fü ah ato mandí fü yi kpa esambü ka Me kpah de. ¹¹ Angü, te yi le ngü kaka-na eyi la, yi fü te-yi eyi baka siti wü kpara, angbü emere *siti ngü bakaka.

¹² Bi wü gara ngü ladü emaguma ra, te ma ele amala fü yi, amba ma ti aba wü ngü la gbü köcökpa bala ne de. Te Me le eyi la, ma ena akoro aceka yi cu de jia ra, fü nih aro mö de nih ma, tundu te sü biringbö, de mere tadu.

¹³ Wayi bala, wü *kpara ka Yesu de kpakine ne to mandí ka-wü kpah fü yi, de mere tadu.

Dela adu ngü te ma le amala fü yi, ah bala. De-ra *Yüwane.

Dene ebabata köcökpa te Yüwane ba fü wü kpapa ka Yesu 3 Yüwane

Masere si-ngü

*Yüwane ye Zebedayo ba ebabata köcökpa ne kpah me-ye. Ah ba fü gara komoko de iri ye Gayü. Ah ngbü egbo nga iri Gayü, angü Gayü de kpeke kpapa gbü tima ka Yesu Kurisito. Ah ngbü kpah emala nga siti ngü ka gara kpapa de iri ye Diyoterefe, te o te-ye ba mere kpapa gbü tima ka Yesu ne.

Yüwane tima köcökpa ne fü Gayü esaka Demetiriyo, teka de Gayü wu ngü ka Demetiriyo, gü ba, ah de kpeke kpapa gbü tima ka Me.

Dene köcökpa te Yüwane ba fü Gayü

¹ Wayi bala Gayü, ma ba köcökpa ne fü mü me-ra, de-ra de te ma di mere *kovo fü mü gbü ngü ka Yesu ne, angü ma le ngü ka-mü cu fa sü, de maguma ra 'buru.

² Enga ra, Me di de mü, da eto wazi fü mü, teka de soko mü de wü ngü ka-mü ngbü 'buru mbi, kpah baka maguma mü, te di mbi gbü ngü ka Me ne. ³ Ma de tadu te ra fa sü, teka ne de, angü wü gara kpapa koro kpapa ra kpakine, fü ewü amala nga mü fere, gü ba, "Mü ngbü kpapa kpah fi bü da emere wü ngü, te reke areke gbü jia Me," kpah ba e ta te ma wu eyi gügü. ⁴ Angü, te ma je, gü ba, wü jaji ka-ra ngbü elala fi bü te zu ngü ka Me ne, dela züka ngü te to tadu fere fa sü, fa wü gara ngü 'buru.

⁵ Enga ra, ma wu eyi, gü ba, mü de kpeke kpapa, te mü ngbü emere 'duwa züka ngü, angü mü ngbü eyi ele ta-ngü te wü kpapa, te ewü ngbü endoro, ekoro kpala de ngari Me ne. Anga te ewü di de wü ganzi kpapa, te mü wu ewü gügü te enga gina kpah de ne, mü ngbü kpah ele ta-ngü te ewü. ⁶ Te wü kpapa la du koro tete na kpakine, wüh mala nga wü züka ngü kamü la eyi fü a kpa esambü ka Me. Mü di fi bü ele ta-ngü te wü kpapa de bala, gbü wü ndoro ka-ewü, de wüh maka wazi gbü ngü ka Me, angü dela züka ngü gbü jia Me. ⁷ Tekane de, wü kpapa de bala, wüh ngbü endoro dela kükürü de. Wüh ngbü dela emere tima ka Yesu Kurisito. Angü wü kpapa la, ah le fü ewü adi eza e esaka wü kpapa, te ewü le ngü ka Me de ne, ndawü de. ⁸ Te di bala, ah le de nih, te nih di de wü kpapa ka Me ne, nih di ele ta-ngü te wü kpapa de bala me-nih, teka fü nih angbü eto wazi fü ewü gbü tima ka Yesu.

⁹ Ma ba ta gara köcökpa, tima eyi gügü fü wü *kpapa ka Yesu 'buru agbü sü kayi de kpala. Amba Diyoterefe le ngü kara la nda de, angü ah mala, ga, ni kani me-ni de mere kpapa. ¹⁰ Te di bala, ma ena aceka ngü kaka la, gbü ra te ma ena akoro tete kpapa yi kpala. Fü ra asere nga *siti ngü kaka engagira yi 'buru. Angü Diyoterefe ngbü ta ememere bi wü siti ngü, da endoro de ambala'ba eküte a. Kpah bala, engu le wü kpapa kaa, te ewü ngbü endoro de ngari Me ne, kpah de. Ah le aza ewü kpa gba ye baka ngba kpah de. Wü gara wü bu ye na, te ewü le ta adi ele ta-ngü te wü kpapa la ne, Diyoterefe le ewü kpah de. Fü ah angbü egiri kaje, teka aliki ewü gbü ngü ka Me asidi.

¹¹ Enga ra, mü mere e adi emere wü siti ngü, ba ngü ka Diyoterefe la, nda-mü de. Mü di emere nda-mü kpah fi bü wü züka ngü, angü kpapa de te ngbü emere züka ngü de bala, ah ka-ye de zu kpapa ka Me fanü. Kpapa de te ngbü emere siti ngü, ah de kpapa te le ngü ka Me nda de.

¹² Kpapa te ena aza köcökpa ne, akoro di kpapa yi kpala, iiri na de Demetiriyo. Engu de züka kpapa. Bi wü kpapa ngbü emala nga züka ngü kaka 'buru bala. Demetiriyo de kpapa te lala eyi te ngü ka Me fanü fanü. Ma mala ngü la bala cu mera. Angü mü wu kpah kpo, gü ba, ma su wu nda-ra de.

¹³ Mere bi wü ngü ladü te ma ele amala fü mü. Amba ma le aba wü ngü la 'buru gbü köcökpa bala de. ¹⁴ Te Me le eyi la, ma ena akoro kpala kere, aceka mü, teka fü nih amala wü ngü la 'buru tundu ake nih ma.

¹⁵ Me di de mü, da eto gu ngü emaguma mü. Wü *kpapa ka Yesu de kpakine to mandi ka-wü fü mü. Mü to kpah mandi ka-a fü wü kpapa ka Yesu de kpala, de iri ewü biri biri zalü 'buru nde.

Gayü, enga ra, dela adu ngü ka-ra fü mü. De-ra *Yüwane.

Köcökpa ka Yudi

Masere si-ngü

Yudi ba köcökpa ne me-ye. Engu ta de gara engu ni ye Yesu. (Mü ena amaka ngü la gbü Marako 6:3.) Ta te Yesu kpo endoro, da erü wü kpara de ngü ka Me ne, wü di engu ni ye na le ta ngü kaka nda-wü de. (Mü ena amaka ngü la gbü Yüwane 7:1-5.) Amba tine, sidi nga ngü te Yesu zükü tete gbü kpi ne, fü ewü adu afü maguma wü, ale ngü ka Yesu. (Mü ena amaka ngü la gbü Müürü Tima ka Yesu 1:14.) *Yakobo te di ta kphag gara engu ni ye Yesu ne, du koro ta mere kovo, esüka wü *kpara ka Yesu agbü Yerüsalema. Te Yudi ngbü eba köcökpa ne tete, ah mala nga ye, gü ba, "Ni de engu ni ye Yesu ne," nda de. Ah mala bü, gü ba, ni de engu ni ye Yakobo, angü ah le acu ngü ye, gü ba, ni de engu ni Miri Yesu ne, nda de.

Yudi ba köcökpa ne fü wü kpara ka Yesu. Amba sü te wü kpara la ngbü tete, ah sere nda de. Amba wü kpara ngbü efi, gü ba, mere bi ewü ena adi de wü di engu *Yisarayeale.

Yudi mala ngü fü wü kpara la, gü ba, "Ni fi ta eyi aba köcökpa fü wü, teka ngü ka *küküwa te Yesu koro di fü ani ne. Amba fü ni adu aje nga gara siti ngü, gü ba, 'Gara wü müürü mani koro eyi, kpo da efiti wü.' Teka ngü la, fü ni ayia aba köcökpa ne fü wü, teka amala fü wü, gü ba, 'Wü lala fi gbü ngü ka Yesu kpekpeke. Wü zoro ngü la de kpa wü 'basu, angü siti wü müürü mani la ena afti wü fiti.' "

Dene Mandi ka Yudi fü wü kpara ka Yesu

¹ De-ra Yudi, engu ni ye *Yakobo, te ma di kphag labi ka Yesu *Kurisito ne, ma to mandü fü yi, wü kpara te Me i yi eyi, teka alala gbü ngü ka-ye ne. Wö nih, Me, ngbü ele yi efa sü. Kpah bala, Yesu Kurisito ngbü da eceka kpi fütanga yi me-ye. ² Me di de yi, de ah le yi de maguma ye 'buru. De ah to kphag gu ngü fü yi fa sü, teka *züka maguma ye.

Dene ngü ka wü müürü mani, te ewü le afü ngü ka Me

³⁻⁴ Wü di engu wüna, ma ngbü ta ereke te-ra, teka aba köcökpa fü yi, teka amala nga *küküwa te Yesu to fü nih ne. Amba ma du je gara ngü titine, gü ba, gara wü müürü mani yia egiri da wü afti yi. Teka ngü la, fü ra ayia aba köcökpa ne fü yi kere, teka de yi rü kpekpeke. Ma le de yi lala duu gbü ngü ka Yesu. Angü

ngü ka Yesu la de zu ngü ka Me, te Me to fü nih, wü kpara ka-ye. Ngü la, wüh ti afü de. Te di bala, ah le de yi ceka te-yi 'be, angü wü müürü mani la zi te-wü eyi, nü ri ngbü esüka yi kpala. Wüh gü ba, "Ani de wü kpara ka Me," amba wüh to maguma wü fü Me nda-wü de. Wüh le Miri Yesu nda-wü kphag de. Wüh ngbü egiri da wü, teka afüfü ngü, teka *züka maguma ka Me ne, gü ba, "Te mü ngbü emere waza, de wü gara *siti ngü ba e te mü ngbü ele la, ah mere e de. Me ena aboro siti ngü ka-mü la aboro." Amba ngü la bala nda de! Ah ka-ye de wu! Yi mere e aje ngü ka-ewü la nda-yi de! Gara wü *müürü dofo ka Me ba ngü ka wü müürü mani la, gbü *Ngari Me ta gügü, gü ba, "Te gara, Me ena ato kuru te wü kpara, te ewü ngbü esutu wu, da efiti wü kpara de bala."

⁵ Wü di engu wüna, dene ngü te ma ngbü ele amala fü yi. Me ena ato kuru te siti wü kpara, te ewü le aje riri kaka de ne. Yi ti eyi awu ngü la, teka ngü ta te mere te-ye fü nih, wü di engu *Yisarayeale ne. Ta gügü, Me küwa wü kundu nih, wü di engu Yisarayeale, esaka wü vügü ka-ewü, wü kpara ka *Ezepeto. Amba fütanga ngü la, fü gara ewü ayia ace ngü ka Me, adu amere kögö-nzö fefe. Te di bala, Me ce ta ewü eyi bü bala? Ah bala de! Engu du mörö wü müürü kögö-nzö la 'buru asidi. ⁶ Kpah bala, ta gügü, gara wü *malayika yia ce ngü ka Me, fü ewü ayia afü te-wü vügü kaka. Angü wüh ngbü ta ele de ani ngbü me-ani, baka mere wü kpara. Te di bala, Me ce ngü la ta eyi bala? Ah bala de! Me yia i ewü 'buru de nyari, gö gö gö! za ewü, sötö 'buru agbü du, gbü mere mbiri sü. Titine wüh fi ladü kpala, gbü mbiri sü la, eci nga *adu sikipi, te Me ena akolo ngü ka wü kpara 'buru tete. ⁷ Kpah bala, wü kpara ka *Sodomo ake Gomora, bete wü bu wü, gbü wü gara koti ghamari ede ewü ne, wüh le ta aje riri ka Me de. Fü ewü angbü eto te-wü 'buru 'buru da ememere waza, de wü gara ngü ka lümü te ti de. Fü Me ayia acuru ewü 'buru 'buru asidi. Dela ngü te ena asere fü nih, gü ba, Me ena ato kuru te gara ato, te wü kpara, de te wüh le aje riri kaka de ne. Fü ah aza ewü, agü 'buru agbü mere du ka wa fi mere badi, fü ngü ka-ewü anza kpala.

⁸ Amba wü müürü mani la, wüh ce ngü ka Me eyi asidi. Wüh le aje riri kaka nda-wü de, kphag baka siti wü kpara ta gügü ne. Wü müürü mani la gü ba, Me ngbü emala ngü fü ani gbü roto. Amba ngü ka-ewü la, ah de ngü ka Me nda de! Angü wüh ngbü ememere bi wü ngü ka lümü, de wü waza bü faaa, baka e te ewü ngbü ele. Wüh le akpe cürü mere wü kpara ka-wü kphag de. Wüh ngbü kphag da esoko

wü malayika asoko! ⁹ Amba ah de siti ngü teka adi esoko kpara. Angü Mikayelee, te di de mere wü *malayika ka Me ne, mere ngü bala kphah de. Ta gügü te *Müse kpi tete, fü Mikayelee, ayia akoro teka ati kö Müse. Fü *Satana ayia kphah akoro da ega yiki ake di. Amba Mikayelee soko Satana ta nda de. Mikayelee mala bü ngü fü Satana, gü ba, "Me ena akolo ngü ka-ye me-ye."¹⁰ Amba wü mürü mani la, wüh le ngü ka soko fa sü. Wüh ngbü efala ngü ka Me afala, angü wüh je si-ngü gbü ngü ka Me nda-wü 'buru 'buru de. Fingängü ka-ewü ka-ye baka nda siti wü nü la. Tekä ngü de te ewü ngbü emere la, Me ena ato kuru te ewü ato.

¹¹ Wü di engä wüna, fanü fanü, Me ena ato kuru te wü kpara la ato. Angü ngü ka wü kpara la ka-ye 'buru esiti. Wüh ka-wü kphah baka Kayina,* angü wüh ngbü emere fi bü siti wü ngü. Wüh kphah baka Balama,† angü wüh ngbü eto te-wü 'buru 'buru teka gümü ngü ka jiasse. Wüh le aje riri ka wü mere kpara ka-wü nda-wü de, baka nda Küra ta gügü ne.‡ Te di bala, Me ena anza ngü ka-ewü te gara 'buru 'buru asidi, baka te engu mere ta fü Küra ne.

¹² Wü mürü mani la ngbü engbü esüka yi, da ezü e tundu de wü yi. Wüh ngbü emala ngü, gü ba, "Ani kphah de wü *kpara ka Yesu, baka yi." Amba ah bala de! Wüh kpe cürü Me nda-wü de. Wüh gü ba, "Ani ngbü da eri wü kpara de ngü ka Me," amba wüh ka-wü de wü mürü fiti! Riri ka-ewü ka-ye 'buru de wu! Wüh gü ba, "Ani ngbü eceka kpi fütanga wü kpara ka Me," amba wüh ngbü efi ka-wü bü nzö nga wü. Wüh ka-wü gegege baka agö te ngbü ebiri, baka e te yia eli ali la, amba ah ni jia ra bü kükürü. Wege ena aza ka-ye, anü sü di ka. Ah du li nda tüne de. Kphah bala, wüh ka-wü baka mene wü rü, te ewü kpi akpi, wüh ti ari nda-wü tüne de, angü wüh gbigbi si ewü eyi. ¹³ Wü kpara la ngbü ememere ngü ka lümü bü faaa! baka ngu te si fa sü, te ngbü ekö bi wü ca-e enü di, da eli edere ngolo 'düü 'düü 'düü! Wüh ka-wü kphah baka ca-e te wege ngbü efe. Te di bala, yi mere e ari gbü ngü ka-ewü la nda-yi de, angü Me ena ato kuru te wü kpara la te gara, agü ewü gbü mbiri sü, fü ngü ka-ewü anza fi mere badi.

¹⁴⁻¹⁵ Ta gügü, Enoka,§ kundu kundu ye Adama ne, mala ta ngü teka wü mürü mani la eyi. Angü Me sere ta ngü la me-ye fefe, o ngü la mere te-ye la de, gü ba, "Te gara, Me ena ato kuru te siti

wü kpara, de te ewü le ngü kaka de ne. Angü Me ena akoro füh kotö sene, de mere bi wü *malayika ka-ye, gbe gbe gbe, teka aye süka ngü ka wü kpara füh kotö ne 'buru. Ah ena ato kuru te siti wü kpara, teka siti wü ngü te wüh ngbü emere ne, baka siti ngü mündü, te wüh ngbü emala, da esoko Me di ne, de wü gara *siti ngü kphah 'buru." Dela ngü te Enoka mala ta gügü, teka ngü ka wü mürü mani la.

¹⁶ Dela eyi ngü te ma le amala fü yi, teka wü mürü mani la. Yi mere e aje riri ka-ewü la nda-yi de, angü wüh ngbü engbü ka-wü fi bü da ega yiki, da emala ambala'ba eküte wü kpara. Wüh ngbü emere ngü ka-wü, baka te wüh ngbü ele. Wüh ngbü egbo nga wü de tete-wü, da eo te-wü memere. Wüh ngbü kphah da ecu ngü wü kpara de mani, teka de ani maka züka e esaka ewü tete.

Dene adu ngü, te ma le ari yi di

¹⁷ Wü di engä wüna, yi fi la nga ngü, ta te wü *mürü tima ka Yesu Kurisito mala fü yi gügü, ¹⁸ gü ba, "Gbü *adu wü sikpi ka-nih dene, wü gara kpara ena akpo da efala ngü ka Yesu. Wüh ena akpo da emere wü ngü, baka e te ewü ngbü ele." Dela ngü ta te wü mürü tima ka Yesu mala fü yi. Ah bala de? ¹⁹ Enatikine wü kpara la koro eyi! Wüh ngbü eyi esiti fingängü ka-yi, teka de yi ye süka yi. Wüh ngbü emere wü ngü 'buru, baka te ewü ngbü ele, angü wazi ka *Nzila Wazi Me emagama ewü nda ma.

²⁰ Wü di engä wüna, ah le de yi lala nda-yi fi bü eküte Yesu, da enü de ngü kaka kpa engagira nü. Yi di fi bü eku gba fü Me, gbü wazi ka Nzila Wazi Me. ²¹ Ah le de yi lala gbü ngü ka Me, angü Me le yi fa sü. Yi o jia yi te Miri Yesu, angü engu ena aküwa yi me-ye, agbü sü ka-ye agbü kpi, fi mere badi, teka *züka maguma ye. ²²⁻²³ Amba, teka mene wü kpara de maguma wü 'basu 'basu ne, yi di ewu cinga ewü, de yi di kphah esere züka kaje fü ewü kere, angü wüh ena adürü gbü *siti ngü ka wü mürü mani la. Tekä mene wü kpara, te fingängü ka-ewü siti eyi esaka wü mürü mani la, yi di kphah ewu cinga ewü. Amba ah le fü yi adi ekpe cürü siti ngü ka-ewü la akpe, angü siti ngü ka-ewü la ena asiti kphah fingängü ka-yi.

²⁴⁻²⁵ Nih gbo nga iri Me, angü engu ena ato wazi fü yi me-ye, teka fü yi arü di kpekpeke, gbü ngü kaka. Te di bala, yi ti adürü te kaje ka Me de. Baka te Me zürü yi eyi nzila ne, ah ena aza yi, akoro di agbü sü

* 1:11 1:11 Kayina de gina kpara te mörö kiri ye füh kotö ne. Mü ena amaka ngü la gbü Gina Ngü 4:1-25. † 1:11 1:11 Balama de gara mürü dofo ka Me. Mü ena amaka ngü la gbü buku ka Namba 22-24. Mü ena amaka kphah gbü 2 Petero 2:15-16. ‡ 1:11 1:11 Mü ena amaka ngü ka Küra la gbü buku ka Namba 16:1. § 1:14-15 1:14-15 Mü ena amaka ngü ka Enoka la gbü Gina Ngü 5:18-24.

ka-ye agbü kpī, fū yi angbü kpala de mere
tadu.

Nih gbo nga iri Me!

Engu me-ye de Mere Me, kpikpi ye!

Nih gbo nga iri Me!

Angü engu küwa nih eyi fi mere badi,
teka ngü ka Miri ka-nih Yesu *Kurisito.

Nih gbo nga iri Me!

Engu de mere mürü wazi!

Nih gbo nga iri Me!

Engu de Mere Miri, te ngbü gbü nzö
nih fi mere badi!

Nih gbo nga iri Me!

Ta gügü, o Me mere kotö ne la de, Me
ka-ye kü ladü.

Nih gbo nga iri Me!

Ngü kaka ti anza kpo fi de, zalü fi
mere badi.

Nih gbo nganga fi bala, nü di kpa engagira
nü, fi mere badi!

Gbo nga e ngbü te iri Me!

Ah di bala!

Dene adu ngü ka-ra fū yi. De-ra Yudi.

Dene ngü te Yesu sere fü Yüwane baka roto

Masere si-ngü

Kpara te ba buku ne, ah de *Yüwane ye Zebedayo, te di ta biri kpara esüka wü *mürü tima ka Yesu. Yüwane ba buku ne, o engu gbe tîne eyi, gbü lakî te wü vüügü zoro engu tete, gü agbü ku, teka ngü ka Yesu ne. Angü gbü wü re engu la, mere miri ka wü *Rüma ngbü ta de wazi gbü nzö mere bi wü kpara füh kotö ne. Fü miri la ayia ato rîrî ka-ye, gü ba, "Ah le de wü kpara 'buru di ecu ngü ni baka Me." Amba wü *kpara ka Yesu le ngü la nda-wü de.

Baka te Yüwane ngbü tete agbü ku kpala, fü Yesu akoro asere bi wü ngü fü Yüwane gbü roto. Fü Yüwane angbü eba wü ngü la gbü köcökpa, teka atima fü wü kpara ka Yesu, teka ato wazi fü ewü, gbü wü cinga te wü vüügü ngbü eto te ewü ne.

Gbü köcökpa ka Yüwane ne, wü mere kpeke ngü ladü bata. Gina ngü, ah de ngü ka wü vüügü ka Me, de te ewü ngbü ele asiti tima ka Me füh kotö ne. Gbü wü ngü la, wüh ngbü eto mere cinga te wü kpara ka Yesu efa sü. Wüh ngbü emörö wü gara wü kpara ka Yesu la amörö. Te di bala, Me ena ato mere kuru te ewü te gara.

E'ba'basu ngü, ah de ngü ka Yesu, te di de Mere Miri, te fa wü miri füh kotö ne 'buru ne. Wawazi fa nda wü kpara 'buru. Te gara, engu ena adu akoro füh kotö ne, agü gü de wü vüügü ka-ye la, amömörö ewü 'buru, anza ka.

Ebabata ngü, ah de ngü ka-nih, wü kpara ka Yesu, te nih ena arü kpekpeke gbü wü cinga la. Ngü ma, te wü vüügü ngbü di bü eto cinga te nih la, nih mere e akpe cürü, ace ngü ka Yesu, de. Te nih lala fi bü eküte Yesu la, Me ena ale ta-ngü te nih, fü Me ato mere bi wü züka ngü fü nih te gara. Fü nih aküwa, angbü agbü sü ka Me te gara, fi mere badi.

Buku ne, ah baka wü gara buku gbü To Ngü Mürü ka Me ne, nda de. Angü ah de ngü te Yüwane ba, teka roto te Yesu sere fefe, teka ngü te ena amere te-ye te gara. Yüwane ngbü mala wü ngü la de mere bi wü mani gbü ye, te di gbü Gina Ngü Mürü ka Me. Te di bala, te wü kpara ka Yesu tanga ngü la me-wü, wüh ti eyi aje si-ngü la mbi mbi mbi, amaka wazi gbügbü. Amba te wü mere kpara ka Rüma tanga ngü la me-wü la, wüh ti aje si-ngü

gbügbü ne nda-wü de, angü wüh wu ngü gbü *Ngari Me nda-wü de.

Wü ngü te di gbü köcökpa ne, wüh dene. Sapita 1 Si-ngü te Yüwane ba buku ne tete

Sapita 2-3 Wü ngü te Miri Yesu tima fü wü kpara ka-ye gbü wü sü lorozi Sapita 4-7 Ngü te Miri Yesu ü köcökpa, te wüh i de ku lorozi

Sapita 8-11 Ngü te wü malayika ka Me u wü kono ka wü lorozi tete

Sapita 12-13 Ngü ka mere siti kpürü, de wü siti nü 'basu

Sapita 14-21 Ngü te Me ena aza esaka wü vüügü ka-ye tete

Sapita 22 Ngü te Me ena adu areke wü ngü 'buru toto

1 De-ra *Yüwane, *mürü tima ka Yesu *Kurisito. Dene wü ngü te Yesu sere cu me-ye fere, baka roto.

Me gü tamu wü ngü ne fü Yesu me-ye, teka de engu sere fü wü kpara ka-ye. Ah de wü ngü te ena amere te-wü amere kere. Fü Yesu Kurisito ayia atima *malayika ka-ye, asere wü ngü la fere. ² Teka ngü la, fü ra ayia akpo da eba wü ngü, de te malayika ka Me sere fere ne 'buru, gbü buku ne. Angü ah de zu ri Me bete nda Yesu Kurisito. ³ Te di bala, ah le fü yi adi etanga buku ne fü wü kpara, teka fü Me ato wazi fü yi. Mene wü kpara te ewü ena aje ngü la, fü ewü ale de maguma wü 'buru la, Me ena ato kphaz wazi fü ewü. Angü sîkpî ka ngü la koro eyi gbamari.

⁴ De-ra Yüwane, ma ngbü eba köcökpa ne fü yi, wü *kpara ka Yesu, te yi ngbü engbü gbü wü mere köti lorozi, gbü nga nzö wü sü ka-nih, ka Asiya.

Me di de yi, da eto gu ngü fü yi teka *züka maguma ye. Angü ta gügü, Me ka-ye kü ladü. Enatikine engu fi ladü. Engu ena angbü ka-ye bala fi mere badi. Ngü kaka ti anza nda de. *Nzila Wazi Me ngbü kphaz de yi, angü ah ngbü engbü ede kpökpö ka Me. ⁵ Yesu Kurisito ngbü kphaz de yi, angü engu de kpeke kpara. Wü vüügü kaka to ta mere cinga tete, fü ah ai maguma ye kpekpeke, fü ah alala fi bü gbü ngü ka Me. Te wüh mörö engu tete, fü Me azükü engu, baka gina kpara esüka wü kövö. Wawazi na fa sü, fa nda wü miri füh kotö ne 'buru.

Nih gbo nga iri Miri Yesu!

Angü ah le nih eyi cu de maguma ye 'buru.

Nih gbo nga iri Miri Yesu,

Angü engu kpi teka afa nih gbü wü *siti ngü ka-nih 'buru.

* 1:4 1:4 Yüwane mala gbü ngü Giriki, gü ba, nzila wazi lorozi, te ngbü ede kpökpö ka Me ne, ngbü de yi. Ah ba ngü la gbü mani, teka ngü ka wazi ka Nzila Wazi Me.

6 Nih gbo nga iri Miri Yesu,
 angü ah fe nih kpah eyi.
 Ah ena ao nih baka wü miri,
 gbü sikipi te engu ena adu akoro tete.
 Nih gbo nga iri Miri Yesu!
 Angü ah ena ao nih wü kovo ka-ye,
 teka fū nih agbo nga iri Me agbü kpi fi
 mere badi.
 Nih gbo nga iri Miri Yesu fi mere badi!
 Angü engu de mere mürü wazi.
 Ah di bala.

7 Wü di engu wüna, yi ceka la! Yesu
 ena adu akoro fūh kotö ne fanü. Engu
 ena ayia agbü kpi de mere wazi ye. Fū
 wü kpara fūh kotö ne 'buru awu engu. Wü
 vügü kaka, ta te ewü sö sasajikara de dü
 ne, wüh ena awu engu kpah cu de jia wü.
 Wü kpara 'buru, de te ewü le ngü kaka de,
 wüh ena aku gba, angbü kpah de mere
 cürü teka kokoro kaka-na la. Wayi, ngü la
 ena amere te-ye bala fanü!

8 Dene ngü te Me mala fū nih, gü ba, "Ni
 de gina kpara, ni kpah de adu kpara." Me
 de mürü wazi, te mere wü ngü 'buru me-
 ye. Ta gügü Me ka-ye kü ladü. Enatikine
 engu fi ladü. Engu ena angbü ka-ye bala
 fi mere badi. Ngü kaka ti anza nda de.

Dene gina ngü te Yesu sere fere

9 Ah de-ra *Yüwane, engu ni yi. Wüh to
 cinga te ra eyi fa sü, teka iri Yesu *Kurisito,
 fū ra atükü te-ra, arü kpekpeke, kpah baka
 nda-yi. Fū ewü adu azoro ra, agü agbü ku
 gbü Patemo sene, angü ma le ace ngü ka
 Yesu nda-ra de.

10 Gbü gara sikipi ka Me, fū *Nzila Wazi
 Me ayia ari emaguma ra. Fū ra ayia
 aje ri kpara, te ngbü ewü kpa ekürüfe
 ra, baka gba kono la. 11 Ri kpara la
 wü, gü ba, "De-ra deyi, ni le asere bi
 wü ngü fere. Ah le fū ra aza köcökpa,
 aba wü ngü, de te ni le asere fere ne
 gbügbü. De ma tima köcökpa la fū
 wü kpara ka-ni gbü wü mere koti lorozi la,
 agbü Efeso, Simirina, Peragamo, Tiyatira,
 Saradi, Filadelefiya bete Lawüdikiya."

12-13 Te ma je ri kpara la bala, fū ra ayia
 afü te-ra, teka aceka kpara, de te ngbü
 emala ngü fere ne. Fū ra ayia awu Miri
 Yesu Kurisito, *Ye Kpara ka Kpi. Ah ngbü
 etü wü lamba lorozi, te wüh reke gbü
 *diki-se. Ah to züka bongo ngboro bala,
 zalü ngbüüü kpa kötö. Fū ah agü ku bongo,
 akolo tü ye di, te ngbü eci aci baka diki-se
 la. 14 Susu-nzö vi 'duwa avi kpilili bala!
 Jjia na ngbü eci baka mi-wa la! 15 Lölö
 ngbü eci didiki! baka se te wüh to gbü wa
 ka boro. Riri na ngbü engböngbö, da ewü
 woo! baka mere vuru ka ngu, te ngbü
 etökö. 16 Ah zoro wü küfara lorozi gbü
 kpa ye ka kokpa. Fū mere maguruma te
 dere fa sü, angbü eko gögömö na. Fū

gbügbüra na angbü eci gbele gbele! baka
 ra, te ngbü esü me-ye.

17 Te ma wu Miri Yesu de bala, fū
 maguma ra ayia akolo 'duwa tuu! Fū ra
 ati eri lölö kötö, baka kövö la. Fū Miri
 Yesu ayia ao kpa ye ka kokpa gbü nzö ra,
 amala ngü fere, gü ba, "De-ra deyi, ma kpe
 cürü de! Ah de-ni Yesu. Ni de gina kpara,
 ni kpah de adu kpara. 18 Ni de *E-küwa
 kpara. Wüh mörö ni ta amörö, amba
 ni zükü gbü kpi la eyi fi mere badi! Ni
 de wazi teka anza ngü ka kpi 'buru 'buru
 asidi! Kpah bala, ni ena azükü wü kpara
 ka-ni, te ewü di gbü mbükü ne 'buru, fū
 ewü aküwa fi mere badi."

19 Fū Miri Yesu adu amala gara ngü fere,
 gü ba, "Ah le de ma ba wü ngü ne, angü ni
 yia esere kpah gara bi wü lara ngü fere. Ni
 ena asere wü ngü te ewü ngbü emere te-
 wü titine. Fū ni asere kpah wü gara ngü,
 te ewü ena amere te-wü te gara. Te di bala,
 ah le de ma ba wü ngü la 'buru, atima fū
 wü kpara ka-ni, te ewü di agbü wü gara
 sü de lorozi ne."

20 Fū Miri Yesu adu amala fere, gü ba,
 "Si-ngü teka wü küfara lorozi de esaka ni,
 bete wü lamba lorozi ne, ah bane. Wü
 küfara lorozi, de wü lamba lorozi ne, ah
 de wü kpara te ewü to maguma wü fū ni,
 gbü wü mere koti lorozi ne."

2

*Dene ngü te Miri Yesu mala fū wü kpara
 ka Efeso*

1 Fū Miri Yesu amala fere, gü ba, "Ah le
 de ma ba ngü ne, tima fū wü kpara ka-ni
 agbü Efeso. Ah gü ba, 'De-yi, wü kpara
 ka-ra, te yi ngbü engbü agbü Efeso ne,
 ah de-ra Yesu, te ma di de Miri ka-yi ne,
 ma mala ngü ne, tima fū yi me-ra. Ma
 ngbü ezoro wü kpara ka-ra 'buru esaka
 ra, baka wü küfara lorozi ne, fū ra angbü
 kpah endoro esüka ewü, baka te ma ngbü
 endoro esüka wü lamba lorozi ne.

2 Dene ngü te ma le amala fū yi. Ma
 wu wü züka ngü ka-yi kpo. Angü yi
 ngbü emere tima ka-ra kpekpeke, da elala
 gbügbü na. Ma wu eyi, gü ba, yi le ngü ka
 wü mürü mani nda-yi de. Angü wü mürü
 mani la ngbü eko kpaka yi, emala ngü bü
 de komö wü, gü ba, "Ma tima ani me-ra."
 Amba yi ngbü eceka ngü ka-ewü ferre
 feke. Fū yi adu awu ngü ka-ewü teke, gü
 ba, wüh lala fi bü da emere wü *siti ngü.
 Te di bala, ma tima ewü nda-ra de! Wüh
 ka-wü de wü mürü mani! 3 Ma wu eyi,
 gü ba, te siti wü kpara, de te ewü le ngü
 ka-ra de ne, ngbü eto mere cinga te yi la,
 yi kpe cürü nda-yi de. Yi ngbü fi bü erü
 kpekpeke, da elala gbü ngü ka-ra. Wü ngü
 ka-yi la reke gbü jia ra cu fa sü.

⁴ Amba gara ngü ladü, te ngbü eto cinga te ra. Angü tiiine yi du le ra, baka ta te yi ngbü ele ra te eng a gina ne, de. ⁵ Yi fi la nga mere lele, ta te yi ngbü ele ra di ne. Yi fü ngü la, neh teka ne? Ah le de yi du, yi fü maguma yi, teka fü yi adu amere tima ka-ra areke areke, baka ta te eng a gina ne. Amba, te yi fü maguma yi de la, ma ena akoro kpaka yi de wazi, fü yi adu awu ngü la! Angü ma ena aza lamba ka-yi gbü sü ka-ye asidi. Fü ra angbengbe yi, fü yi abaya 'buru. Te di bala, ah le de yi fü maguma yi 'duwa enatikine!

⁶ Amba gara züka ngü ka-yi kpah ladü, te reke gbü jia ra. Angü siti riri ka wü kpapa ka Nikola, te siti gbü jia ra fa sü ne, yi le nda-yi kpah de.

⁷ Dela eyi ngü te ma mala fü yi, wü kpapa ka-ra agbü Efeso ne. Amba ah le de wü kpapa 'buru da güje wü, te ngü de te ma ngbü emala, de wazi ka *Nzila Wazi Me, ne. Ngü ma, te wü vügü ngbü eto cinga te yi la, yi kpe cürü de. Yi rü kpekpeke. Te yi mere bala, ma ena ato ri-rü ka *küküwa ka fi mere badi ne, fü yi azü. Riri la ladü agbü yi ka Wüba, Me, agbü kpä.' "

Dene ngü te Miri Yesu mala fü wü kpapa ka Simirina

⁸ Fü Miri Yesu amala fere, gü ba, "Ah le de ma ba ngü ne, tima fü wü kpapa ka-ni agbü Simirina. Ah gü ba, 'De-yi, wü kpapa ka-ra, te yi ngbü engbü agbü Simirina ne, ah de-ra Yesu, te ma di de Miri ka-yi ne, ma mala ngü ne, tima fü yi me-ra. Ma de gina kpapa, ma kpah de adu kpapa. Ma kpah de kpapa te wüh möro ra ta amöro, fü ra adu azükü gbü kpi la, fi mere badi.

⁹ Dene ngü te ma le amala fü yi. Wayi, ma wu cinga, de te wü vügü ngbü eto eküte yi ne, eyi. Ma wu kpah eyi, gü ba, e esaka yi nda ma. Amba yi de wü mürü cinga nda-yi de, angü mere bi wü e ka-yi ngbü rü ladü, te ngbü eci nga yi agbü kpä. Ma wu kpah wü *siti ngü, de te wüh ngbü emala eküte yi ne, kpä. Wü kpapa de te ewü ngbü emala ngü la, wüh ngbü emala nga wü, gü ba, "Ani de wü kpapa ka Me,"* amba ah ka-ye de wü! Wüh ka-wü de wü kpapa ka *Satana! ¹⁰ Amba nda-yi, yi mere e akpe cürü de, yi i maguma yi, arü kpekpeke, angü wü vügü ena ato cinga la te yi, bü mba teka sikpi ngbee nzükpa. Ngü ma, te ah kpah bü de kpi la, yi i maguma yi, yi rü kpekpeke. Angü te yi mere bala la, ma ena

aküwa yi fi mere badi, agbü sü ka Me agbü kpä.

¹¹ Dela eyi ngü te ma mala fü yi, wü kpapa ka-ra agbü Simirina ne. Amba ah le de wü kpapa 'buru da güje wü, te ngü de te ma ngbü emala, de wazi ka *Nzila Wazi Me, ne. Te wü vügü ngbü eto cinga te yi teka ngü ka-ra la, yi mere e akpe cürü de. Angü, te yi rü kpekpeke la, yi tü akpi fi mere badi nda-yi de. Ma ena aküwa yi me-ra.' "

Dene ngü te Miri Yesu mala fü wü kpapa ka Peragamo

¹² Fü Miri Yesu amala fere, gü ba, "Ah le de ma ba ngü ne, tima fü wü kpapa ka-ni agbü Peragamo. Ah gü ba, 'De-yi, wü kpapa ka-ra, te yi ngbü engbü agbü Peragamo ne, ah de-ra Yesu, te ma di de Miri ka-yi ne, ma mala ngü ne, tima fü yi me-ra. Ma de kpapa de mere maguruma esaka ra, te dere fa sü.

¹³ Dene ngü te ma le amala fü yi. Ma wu eyi kpo, gü ba, yi ngbü ezü cinga efa sü. Angü sü de te yi ngbü engbü gbügbü agbü Peragamo ne, ah de sü te di esa wazi ka *Satana! Wüh to cinga te yi eyi fa sü teka ngü ka-ra. Amba yi ce ngü ka-ra nda-yi de. Baka te wüh za eng a ni yi, Anitipa, anü di, amöro teka ngü ka-ra ne, yi kpe cürü nda-yi kpah de. Yi lala ka-yi fi bü gbü ngü ka-ra. Ngü ka-yi la reke gbü jia ra cu fa sü!

¹⁴⁻¹⁵ Amba gara ngü ka-yi ladü, te ngbü eto cinga te ra. Angü wü gara kpapa ladü esüka yi, te ewü ngbü emere *siti wü ngü. Wüh ngbü ele riri ka wü kpapa ka Nikola, de te ewü ngbü efiti wü kpapa de siti riri ka-wü ne. Angü wüh ngbü eri wü kpapa, gü ba, te mü ngbü endondoro gbü nga wü würüse 'daaa la, ah de siti ngü nda de. Wüh ngbü kpah eri wü kpapa, gü ba, te mü ngbü emere gele ka me ka wü kundu yi, ah esiti kpah de. Wü mürü mani la, ngü ka-ewü baka ngü ka Balama, te fiti wü di eng a *Yisaraye ta gügü, de siti riri ka-ye ne.[†] ¹⁶ De-yi, wü kpapa ka-ra, yi mere e aje siti riri ka-ewü la nda-yi de. Ah le de yi fü maguma yi. Angü, te yi fü maguma yi de la, yi ena awu ngü te ma ena amere fü yi! Ma ena aza mere maguruma de gömö ra ne, ato mere kuru di, te wü kpapa 'buru, de te ewü ngbü emere *siti ngü de bala ne.

¹⁷ Dela eyi ngü te ma mala fü yi, wü kpapa ka-ra agbü Peragamo ne. Amba ah le de wü kpapa 'buru da güje wü, te ngü, de te ma ngbü emala, de wazi ka *Nzila Wazi Me, ne. Te wü vügü ngbü eto cinga te yi la, ngü ma, yi kpe cürü de! Yi rü kpekpeke! Te yi mere bala la, züka zü-e

* 2:9 2:9 Wü kpapa te ewü ngbü emala siti ngü eküte wü kpapa ka Yesu la, wüh de wü di eng a Yisaraye. † 2:14-15 2:14-15 Mü ena amaka ngü la gbü buku ka Namba 25:1-6; 31:16.

ka Me agbü kpí ne, ma ena ato fú yi azú. Fú ra ato kpah gara to írì fú yi, te wú kpara je de. Fú ra aba to írì yi, de te ma ena ato ne, ekúte zúka teme ngbe'de bane.' "

Dene ngü te Miri Yesu mala fú wú kpara ka Tiyatira

¹⁸ Fú Yesu amala fere, gü ba, "Ah le de ma ba ngü ne, tima fú wú kpara ka-ni agbü Tiyatira. Ah gü ba, 'De-yi, wú kpara ka-ra, te yi ngbü engbü agbü Tiyatira ne, ah de-ra Yesu, te ma di de Miri ka-yi ne, ma mala ngü ne, tima fú yi me-ra. Ma de Ye Me, te jia ra ngbü eci baka mi-wa la! Ló ra ngbü kpah eci aci didiki! baka se, de te wüh to gbü wa ka boro.

¹⁹ Dene ngü te ma le amala fú yi. Ma wu wú zúka ngü ka-yi, de te yi ngbü emere, ne eyi kpo. Ma wu kpah eyi, gü ba, yi to maguma yi eyi fere fanü. Yi ngbü kpah ele te-yi de wú bu yi, de maguma yi 'buru. Yi ngbü dela emere wú zúka ngü, te ngbü ereke gbü jia ra. Yi ngbü kpah erü kpekpeke gbü wú cinga, de te wú vügü ngbü eto te yi ne. Kpah bala, ma wu kpah kpo, gü ba, wú zúka ngü, de te yi ngbü emere enatikine ne, ah fa mene ewü, ta te yi kpo da emere te enga gina, ne eyi.

²⁰ Amba wú gara ngü ladü, te ngbü eto cinga te ra. Yi ceka la siti wüürise, te ngbü engbü esúka yi de kpala! Yi liki ngü de, neh teka ne? Angü wüürise la gü ba, ni ngbü emala ngari Me fú wú kpara, amba ngü kaka la, ah ka-ye 'buru de wu! Ah ngbü efiti wú kpara ka Me de siti riri ka-ye la, gü ba, te kpara ngbü endondoro gbü nga wú wüürise fa fa fa la, ah esiti de. Wüürise la ngbü kpah esu wu, gü ba, te yi ngbü emere gele ka me ka wú kundu yi la, ah mere e kpah de. Wüürise la ngbü ememere wú *siti ngü baka nda Yizabela, ta te ngbü efiti wú kpara ka Me gügü ne.[‡]

²¹ Ma mala ngü fefe, de ah fú maguma ye, ah ce wú siti ngü ka-ye la ne, eyi ma. Ah le ace siti ngü ka-ye la, nda fi de. ²² Te di bala, ma ena ato mere siti keke fú wüürise la! Wú kpara de te ewü ngbü emere ngü kpah bakaka la, ah le de wüh fú maguma wü, ace ngü la kpah asidi! Angü, te ah bala de la, ma ena ato kpah mere siti keke te ewü baka nda-ka. ²³ Ma ena amörö kpah wú kpara, te ewü ngbü eje riri kaka la amörö! Ma ena amere ngü la, teka fú wú kpara ka-ra 'buru awu, gü ba, ma ngbü ewu wú fingangü, te di emaguma wú kpara 'buru. Angü, te mü ngbü emere wú siti ngü la, ma ena ato kuru te mü ato fanü!

²⁴ Amba ma wu eyi, gü ba, bi wú gara yi ladü, agbü Tiyatira kpala, te ewü le siti riri la nda-wü de. Wüh le amere ngü ka gele ka me ka wú kundu wü ne nda-wü kpah de. Te di bala, dene ngü te ma le amala fú zúka wú kpara la, gü ba, "Ngü ka-wü reke gbü jia ra fa sü. Ma ti amala gara ngü fú wú kpekpeke nda-ra de. ²⁵ Ah le de wú ngbü fi bü da ezoro ngü ka-ra de kpa wú 'basu, zalü akoro di gbü sikipi, te ma ena adu akoro tete füh kotó ne."

²⁶⁻²⁷ Te wú vügü ngbü eto cinga te yi teka ngü ka-ra la, yi mere e akpe cürü ewü de. Yi rü kpekpeke. Te yi ngbü fi bü da emere wú zúka ngü bala, zalü akoro di gbü *adu sikipi la, ma ena ato wazi fú yi, kpah baka te Wüba, Me, to wazi fere ne. Fú ra ao yi baka wü miri, gbü nzó wú nguwa wú kpara füh kotó ne 'buru. Angü Wüba Me mala ta teka ra, gü ba, "Ma ena afa wazi wú vügü ka-ra, fú ra angbü Mere Miri gbü nzó ewü. Ma ena anza ngü ka-ewü, baka kpara te ngbü eöfö sila."§ Dela ngü ta te Wüba Me mala teka ngü ka-ra. ²⁸ Te di bala, ma ena ato kpah mere küfara, de írì ye Mürüba ne, fú yi.

²⁹ Dela eyi ngü te ma mala fú yi, wú kpara ka-ra agbü Tiyatira ne. Amba ah le de wú kpara 'buru da güje wü, te ngü, de te ma ngbü emala de wazi ka *Nzila Wazi Me, ne.' "

3

Dene ngü te Miri Yesu mala fú wú kpara ka Saradi

¹ Fú Miri Yesu amala fere, gü ba, "Ah le de ma ba ngü ne, tima fú wú kpara ka-ni agbü Saradi. Ah gü ba, 'De-yi wú kpara ka-ra, te yi ngbü engbü agbü Saradi ne, ah de-ra Yesu, te ma di de Miri ka-yi ne, ma mala ngü ne, tima fú yi me-ra. Ma de kpara, te ma to *Nzila Wazi Me fú yi, * wú kpara ka-ra, gbü wú sü de lorozi ne. Ma ngbü kpah eceka kpi fütanga yi, wú kpara ka-ra, baka e te ma zoro wú küfara lorozi esaka ra ne.

Dene ngü te ma le amala fú yi. Yi ngbü efi, gü ba, "Ngü ka-ani de te ani ngbü emere ne, ma wu de?" Ma wu 'buru kpo! Wú kpara ngbü eceka yi baka zúka wú kpara ka-ra, amba yi ka-yi de siti wú kpara! Wú kpara ngbü eceka yi baka ta-ba te di ezükü, amba yi ka-yi baka kóló-ta. ² Te di bala, ah le de yi zükü azükü! Yi reke fingangü ka-yi areke, de yi ngbü mbi! Yi mere e ace ngü ka-ra de! Angü wú ngü ka-yi, te yi ngbü emere ne, reke gbü jia Me nda kü de. ³ Yi fi la nga zúka

‡ 2:20 2:20 Mü ena amaka ngü ka Yizabela la gbü gina buku ka Wü Miri 16:29-21:29. § 2:26-27 2:26-27 Mü ena amaka ngü la gbü Ci ka wú Davidi 2:9. * 3:1 3:1 Yüwane mala gbü ngü Giriki, gü ba, Yesu de nzila wazi lorozi esaka ye. Ah ba ngü la gbü mani, teka ngü ka wazi ka Nzila Wazi Me.

wü riri, ta te wüh ri yi di, te enga gina ne. Yi fü maguma yi efü, de yi du kpaka ra, teka adi eje wü riri ka-ra ereke areke. Yi ce wü *siti ngü ka-yi, te yi ngbü emere la, ace, angü ma ena akoro, agüka yi agüka baka mürü zi, te ngbü egüka wü kpapa gbü biti. Te di bala, yi ena awu ngü te ma ena amere de yi! Yi ceka 'be, angü yi wu sikipi ka kokoro ka-ra la nda-yi de.

⁴ Amba ma wu eyi, gü ba, wü gara kpapa ladü biri biri, esüka yi agbü Saradi kpala, te ewü mere ngü ka-ra de maguma wü 'basu 'basu, baka nda wü bu wü la, nda-wü de. Te di bala, gbü sikipi te ma ena adu akoro tete, ma ena azürü wü siti ngü ka-ewü la 'buru asidi. Ma ena ato züka bu bongo fü ewü. Fü a angbü de ewü tundu, fi mere badi.

⁵ Te di bala, de-yi wü kpapa ka-ra 'buru, yi ce siti wü ngü ka-yi, de yi rü kpekepe gbü ngü ka-ra. Te yi mere bala la, ma ena ato kpah züka bu bongo fü yi. Fü ra aba kpah iri yi gbü buku ka *Küküwa, fü ah angbü fi mere badi. Fü ra agbo kpah nga yi engagira Wüba Me, kpah de wü *malayika kaka mini, angü yi eyi de züka wü kpapa ka-ra.

⁶ Dela eyi ngü de te ma mala fü yi, wü kpapa ka-ra agbü Saradi ne. Amba ah le de wü kpapa 'buru da güje wü, te ngü te ma ngbü emala, de wazi ka *Nzila Wazi Me la.' "

Dene ngü te Miri Yesu mala fü wü kpapa agbü Filadelefiya

⁷ Fü Miri Yesu amala fere, gü ba, "Ah le de ma ba ngü ne, tima fü wü kpapa ka-ni agbü Filadelefiya. Ah gü ba, 'De-yi wü kpapa ka-ra te yi ngbü engbü agbü Filadelefiya ne, ah de-ra Yesu, te ma di de Miri ka-yi ne, ma mala ngü ne, tima fü yi me-ra. Ma ngbü de zu kpapa, de te Me tima ra me-ye, teka aküwa yi ne. Ma ngbü eü möngiti me-ra, teka fü wü kpapa angbü eri tete, agbü sü ka Wüba Me agbü kpi. Te ma ü möngiti la fü mü me-ra la, gara kpapa ti atiri mü nda de. Amba, te ma ü möngiti la de la, yi ti ari agbü sü ka Me nda-yi kü de.' "

⁸ Dene ngü te ma le amala fü yi. Ma wu züka ngü te yi ngbü emere ne eyi. Fü ngü la areke gbü jia ra afa sü. Ma wu kpah eyi, gü ba, wazi yi mba cükü'daye, amba yi ce ngü ka-ra nda-yi de. Yi ngbü ei maguma yi ai gö gö! Fü yi angbü elala fi bü gbü ngü ka-ra. Te di bala, ma ena aü möngiti ka sü ka Me aü, fü yi ari agbü kpala. Gara kpapa te ena atiri möngiti la

fü yi nda ma. ⁹ Ma wu eyi, gü ba, wü vügü ka-yi ladü. † Wüh ka-wü de wü mürü mani, te ewü ngbü esutu wu, gü ba, "Ani de wü kpapa ka Me, ani de wü kpapa ka Me," amba de! Wüh ka-wü de wü kpapa ka *Satana! Ma ena avi jia ewü. Wüh ena akoro anda'ba te-wü engagira yi. Fü ewü awu, gü ba, fanü yi de wü kpapa ka-ra, te ma le yi cu fa sü. ¹⁰ Wü vügü la ngbü eto mere cinga te yi teka ngü ka-ra, amba ma wu eyi, gü ba, yi kpe cürü ewü nda-yi kpah de. Yi de kpeke kpapa, te yi ngbü erü fi bü kpekepe, baka ngü te ma ngbü eri yi di ne. Te di bala, gbü sikipi te wü kpapa füh kotö ne ena azü mere cinga tete, ma ena aküwa yi aküwa. Angü cinga la ena amere te-ye, teka are maguma wü kpapa füh kotö ne 'buru. Amba teka yi, ma ena aküwa yi aküwa fanü.

¹¹ Wü di enga ra, ma ena adu kere. Ma ti ayiri de. Ah le fü yi azoro ngari ra de kpa yi 'basu. Angü, te yi mere bala la, gbü sikipi te ma ena adu akoro tete, ma ena ato mere züka takpa fü yi. Gara kpapa, te ena agbü rü takpa la esaka yi, ena adi kpo ma. ¹² Te yi rü fi bü kpekepe la, ma ena ao yi baka mere rü kambü gbü mere Kambü ka Wüba, Me, agbü kpi, fü yi angbü kpala. Ma ena aba iri Me eraku yi, teka fü yi angbü agbü sü ka Wüba Me fi mere badi. Iri sü ka Me la, ah de zu Yerüsalema, te koro kpapa Me agbü kpi. § Ma ena aba kpah to iri ra eraku yi, teka fü yi angbü tine fi wü kpapa ka-ra.

¹³ Dela eyi ngü de te ma mala fü yi, wü kpapa ka-ra agbü Filadelefiya ne. Amba ah le de wü kpapa 'buru da güje wü, te ngü te ma ngbü emala de wazi ka *Nzila Wazi Me la.' "

Dene ngü te Miri Yesu mala fü wü kpapa agbü Lawüdikeya

¹⁴ Fü Miri Yesu amala fere, gü ba, "Ah le de ma ba ngü ne, tima fü wü kpapa ka-ni agbü Lawüdikeya. Ah gü ba, 'De-yi wü kpapa ka-ra te yi ngbü engbü agbü Lawüdikeya ne, ah de-ra Yesu, te ma di de Miri ka-yi ne, ma mala ngü ne, tima fü yi me-ra. Ma de kpeke kpapa, te ngbü emala zu ngari Me fü wü kpapa. Ma ngbü ta emere fi bü wü ngü te Wüba Me ngbü ele, zalü koro di gbü sikipi ka kpi ka-ra. Gbü sikipi ta te Wüba Me le amere wü e füh kotö ne, ma nda-ra baka se-tima kaka, angü ma de miri gbü nzö wü e 'buru, ta te Wüba Me mere ewü ne.

† 3:7 3:7 Yüwane ba ngü, gü ba, "Yesu gü ba, 'Ni de kpapa te di de mafüta (lifungula) ka Davidi esaka ni.' " Ngü la ka-ye de mani. Si-ngü gbügbü gü ba, ni de kpapa te ngbü eü möngiti ka kpi, fü wü kpapa te ni fe ewü. † 3:9 3:9

Wü vügü ka wü kpapa la, wü de wü di enga Yisaraye. § 3:12 3:12 Mü ena amaka ngü ka to Yerüsalema la gbü

buku ne, sapita 21 bete 22.

¹⁵ Dene ngü te ma le amala fü yi. Yi ngbü efi, gü ba, “*Siti ngü ka-ani, de te di emagama ani ne, ma wu de?” Ma wu 'buru kpo! Angü ma wu eyi, gü ba, maguma yi ka-ye 'basu 'basu. Te di bala, ma le de yi ce ngü ka maguma 'basu 'basu la asidi, fü yi adu ale ngü ka-ra de maguma yi biringbö. ¹⁶ Te maguma yi ngbü fi 'basu 'basu bala la, ma ti ale ngü ka-yi nda-ra de. Ma ena afu yi gbü nze ra akötö. ¹⁷ Yi ngbü efi, gü ba, “Ani de kpeke wü kpara, de mere bi e esaka ani, cinga ti amere ani tine de?” Amba ah bala de! Angü gbü jia ra, yi ka-yi de wü mürü cinga te jia yi ni ani. Yi ngbü kpah endoro ngirimu. Angü yi to maguma yi fere mbi mbi nda-yi de. ¹⁸ Ah le de yi ce ngü ka maguma 'basu 'basu asidi, fü yi afü maguma yi. Yi du edu kpaka ra, de yi nda'ba te-yi, teka fü ra ale ta-ngü te yi. Ma ena ato wazi fü yi, teka fü yi angbü kpeke wü kpara ka-ra fanü. Ma ena atü kpah züka rü ka-ra gbü jia yi, teka fü jia yi aü, fü yi awu züka ngü te yi ena angbü emere. Fü ra ato kpah züka bu bongo eküte yi, fü ah aza lümü de eküte yi la asidi.

¹⁹ Wü di enga ra, ah le fü yi awu, gü ba, wü kpara ka-ra, te ma le ewü fa sü ne, ma ngbü eri ewü kpekpeke, teka fü ewü adi eji ri ra. Te di bala, yi ce ngü ka maguma 'basu 'basu asidi, fü yi adu ale ngü ka-ra de maguma yi biringbö. ²⁰ Wü di enga ra, ah baka e te yi ni möngiti ka maguma yi eyi fere. Tekan ngü la, ma ngbü eyi erü emöngiti maguma yi dene, da ei yi. Te di bala, ah le de yi je ri ra, fü yi aü möngiti ka maguma yi fere, teka fü ra ari angbü kpa emagama yi. Fü nih angbü de nih ma, da ezü e tundu de mere tadu.

²¹ Te wü vügü ngbü eto cinga te yi teka ngü ka-ra la, ngü ma, yi rü kpekpeke. Te di bala, ma ena ato wazi fü yi, teka fü yi angbü baka wü miri, füh kpökpö ede ra, kpah baka e ta te ma rü kpekpeke, fü Wüba ato kpökpö ka miri la fere, ede nda-ye ne.

²² Dela eyi ngü de te ma mala fü yi, wü kpara ka-ra agbü Lawüdikiya ne. Amba ah le de wü kpara 'buru da güje wü, te ngü de te ma ngbü emala, de wazi ka *Nzila Wazi Me la.”

Dela wü ngü te Miri Yesu mala fere, teka de ma tima fü yi, wü kpara ka-ni, mene ewü to agbü nga wü mere köti lorozi, gbü tö ka Asiya ne.

4

Dene ngü te sere te-ye fere, agba Me agbü kpä

¹ Fütanga ngü la, fü ra adu afü te-ra awu kpah gara ngü te sere te-ye fere. Fü ra awu

kpä, te ü te-ye baka möngiti, ngbü baaba. Fü ra ayia aje ri kpara, te ngbü ewü baka gba kono, ge baka mene ta te ma je te engagina ne. Fü ri kpara la amala ngü fere, gü ba, “De-ra deyi, ma li eli kpakine, teka fü ni asere wü ngü, te ena amere te-wü te gara ne, fere.” ² Baka te ma ngbü eji ri kpara la, 'duwa fü *Nzila Wazi Me akoro ari esoko ra, ato wazi fere. Fü ra ayia aceka kpä, awu Me te ngbü füh mere kpökpö ka-ye ka miri agbü kpä kpala. ³ Fü gbügbüra na angbü eci aci gbele gbele, baka ra. Fü sü alofo ede mere kpökpö kaka la ngbaji bane, da eci aci baka tere, te ngbü elofu sü me-ye. ⁴ Fü wü mere *kovo teke biri de füh ye bala (24), ado angbü füh nda-wü kpökpö ka miri, ede mere kpökpö ka Me la, kerekere gbaa. Wüh to 'buru züka ngbe'de bu bongo te wü, de wü *madudu gbü nzö wü, te wüh reke gbü *diki-se, teka asere, gü ba, wüh za esaka wü vügü kawü eyi. ⁵ Fü kpökpö ka Me la angbü eci aci baka ülele, kpah de giri wü e, te ngbü ewü gbügbü na, ngbee ngbee ngbee! baka mügbara la. Fü wü lamba lorozi angbü eci engagira kpökpö ka Me la. Wü lamba la ngbü esere ngü, gü ba, wazi Nzila Wazi Me fa sü, baka e du lorozi. ⁶ Fü mere tambasü te nü anü sele sele bala, angbü engagira kpökpö ka Me la, da eci aci baka jia ngu la.

Fü wü angbe cögbörö *malayika ka Me bala (4) angbü ede kpökpö la, de jia wü eküte wü kerekere gbaa 'buru. ⁷ Nzö gina malayika la ngbü baka nda kami. Nzö e'ba'basu malayika baka nda yiti. Nda ebabata malayika baka nda kpara. Ebabala na la, nzönzö na ngbü baka nzö kpukpu la. ⁸ Mbula wü angbe cögbörö malayika la ngbü 'buru ma'diya ma'diya. Fü jia ewü angbü eküte ewü bü 'daaa bala, esa wü mbula ewü kpah 'buru. Fü ewü angbü ebü ci, egbo nga Me di, biti de ra mini, gü ba,

“Wayi bala, mere Me, mü ka-mü *nzila!

Mere miri ka-a, mü ka-mü nzila!

Mere mürü wazi, mü ka-mü nzila!

Ta gügü mü ka-mü kü ladü.

Akoro enatikine, mü ka-mü fi ladü.

Mü ena angbü ka-mü fi mere badi.

Ngü ka-mü ti anza nda kü de.”

⁹ Dela ngü de te wü angbe cögbörö malayika bala la ngbü egbo nga iri Me di gbü ci, ecu ngüngü, da ezuru engangagira na.

Te wü kovo teke biri de füh ye bala la wü wü angbe cögbörö malayika la da ecu ngü Me bala ne, ¹⁰ fü ewü angbü egbi wü madudu ka-wü, eo kötö. Fü ewü angbü eyia kpah 'buru, eti kötö eri lö Me, angbü ecu ngü Me, da egbo nganga na, gü ba,

11 “Wayi bala, Mere Me, a ngbü egbo nga iri mü.
 Ah le de wü kpara 'buru di kpah egbo nga iri mü.
 Mere Me, mü de mere müürü wazi, fa nda wü kpara 'buru.
 Mere Me, mü ngbü mere wü e füh kotö ne 'buru me-mü.
 Mere Me, mü ngbü eto wazi fü wü e 'buru me-mü.
 Mü mere wü e la bala, angü dela ngü te reke gbü jia mü!”
 Dela ngü te wü angbe cögbörö wü kovo la ngbü egbo nga iri Me di agbü kpí kpala.

5

Dene ngü te sere te-ye fere,

teka ngü ka Kambiliki ka Me agbü kpí

1 Fütanga ngü la, fü ra ayia awu köcökpa, te Me gara za o esaka ye. Wüh i komö köcökpa la de wü ku lorozi. Fü ewü alala komö wü ku la de e baka bikü'da. Fü ewü adu agbo wü tere fefeh biri biri 'buru, teka wü kpara ena afuru atanga. Köcökpa la, wüh ba wü ngü gbügbü, zalü koro di ekükürüfe 'buru.

2 Fü ra awu gara mere kpeke *malayika, te ngbü emala ngü de mere ri ye, gü ba, “Züka kpara te Me fe engu, teka afuru köcökpa ne, atanga, neh da?” 3 Fü wü malayika akpo egiri kpeke kpara, te ti afuru köcökpa ne, atanga. Fü ewü agiri agbü kpí ma, wüh maka de. Wüh du giri füh kotö sene, kpah bima, wüh maka de. Fü ewü adu agiri kpa esa tö, kpah le bima, wüh maka 'buru 'buru de. 4 Fü ngü la ato mere cinga emagama ra. Fü ra akpo eku gba de ngura, angü kpara te ti afuru köcökpa la nda ma.

5 Fütanga ngü la, fü gara mere kpara, esüka wü mere *kovo teke biri de füh ye bala la, ayia amala ngü fere, gü ba, “De-ra deyí, ma mere e aku gba de. Yesu ladü. Engu de Mere Miri ka wü di engu *Yisaraye. Engu de kundu ye Miri *Dawidi, te Me tima teka aküwa wü kpara. Wawazi na baka nda kami, angü ah fa wazi kpí eyi. Me to wazi eyi fefe, teka fü engu afuru köcökpa ne me-ye, atanga.”

6 Te ma je ngü la bala, fü ra ayia ae jia ra, awu Yesu, te ngbü baka *Kambiliki ka Me, de nga ka eküte ye, angü wüh mörö engu, teka areke ngü te di ezengba wü kpara de wü Me. Yesu rü ngbü ede kpökpö ka Me, etü wü angbe cögbörö malayika bala, be kpah te wü mere kovo teke biri de füh ye bala ne. Ah ngbü baka Kambiliki ka Me, de wü di te nzö ye lorozi, kpah de wü jia ye lorozi. Wü di de wü jia Yesu lorozi la, wüh ngbü esere ngü ka wazi ka *Nzila Wazi Me, te di kpah lorozi ne. Wü wazi de lorozi la,

Me tima teka amere wü tima ka-ye di, te nga wü sù füh kotö ne 'buru. 7 Fü Yesu ayia aza köcökpa la esaka Me, teka atanga.

8 Te wü angbe cögbörö malayika bala, de wü mere kovo la, wu Yesu, te za köcökpa la esaka Me ne, fü ewü angbü de mere tadu. Fü ewü aci 'buru atü kötö eri lö Yesu, da egbo nga iri na. Wü kovo la, wüh 'buru de wü ku'du esaka wü, kpah de wü sila, te wüh mere gbü *diki-se, de *rü gbü ye, te wüh ngbü ecuru de züka se ye. Si-ngü teka züka se-rü la gü ba, ah de gba, te wü kpara ka Me ngbü eku fü Me, teka de Me küwa ani esaka wü vügü ka-ani. 9 Fü wü kovo la ayia aza wü ku'du ka-wü la, akpo da emi to ci, da ebí, gü ba, “Wayi bala, Yesu! Mü de *Kambiliki ka Me!

A ngbü egbo nga iri mü!

Mü me-mü de züka kpara gbü jia Me!

Me to köcökpa ka-ye ne eyi esaka mü.

Mü ti eyi afuru köcökpa la, atanga.

A ngbü egbo nga iri mü!

Angü mü to te-mü akpi,

teka aküwa wü kpara de *ngüte mü.

A ngbü egbo nga iri mü!

Angü mü küwa wü nguwa wü kpara füh kotö ne eyi 'buru,

teka fü ewü akoro wü di Me.

10 A ngbü egbo nga iri mü!

Angü mü o wü kpara ka-mü baka wü miri, gbü nzö wü kpara füh kotö ne 'buru.

Mü o wü kpara ka-mü baka wü kovo,

teka fü ewü agbo nga iri Me

agbü sù kaka agbü kpí fi mere badi.”

11 Fütanga ngü la, fü ra ayia, ae jia ra, awu mere bi wü malayika ka Me, gbe gbe gbe! te ewü rü ngbü ede kpökpö ka Me.

12 Fü ewü angbü ebí ci de mere ri wü, de wü koko, de wü karayi, gü ba,

“Nih gbo nga iri Yesu,

Angü ah kpí ta teka aküwa wü kpara.

Nih gbo nga iri Yesu,

Angü ngü kaka reke gbü jia Me fa sù.

Nih gbo nga iri Yesu,

Angü wawazi na fa nda wü kpara 'buru.

Nih gbo nga iri Yesu,

Angü engu de müürü wü e füh kotö ne 'buru.

Nih gbo nga iri Yesu,

Angü ah wu wü ngü 'buru.

Nih gbo nga iri Yesu!

Ah le de wü kpara 'buru di egbo nga iri na!

Nih gbo nga iri Yesu!

Ah le de wü kpara 'buru je riri kaka!

Nih gbo nga iri Yesu!

Ah le de wü kpara 'buru di ecu ngüngü!”

13 Te ngü la mere te-ye bala, fü wü kpara 'buru, mene ewü te ewü di agbü kpí, de wü

mene füh kotö, bete wü mene wü kpara te ewü kpi eyi ne, fū ewü akpo 'buru ebí ci, de wü koko de wü karayi, gü ba, "Nih gbo nga iri Me! Nih gbo kphah nga iri Kambiliki ka Me. Angü wazi ewü fa sü! Nih gbo nga iri ewü fi mere badi! Nih gbo nga iri Me! Nih gbo kphah nga iri Kambiliki ka Me!"

¹⁴ Fū wü angbe cögbörö malayika de bala ne, ayia agbo nga iri Me de mere ri wü kpa tikpi, gü ba, "Ah di bala!" Fū wü mere kovo teke biri de füh ye bala ne ayia ati kötö, angbü ecu ngü Me, ake Miri Yesu.

6

Dene ngü te Yesu furu maka gbü köcökpa

¹ Fütanga ngü la, fū ra ayia awu Yesu, *Kambiliki ka Me, te za köcökpa la. Fū ah ayia afuru gina ku tete na. Baka te Yesu furu gina ku la, fū ra aje ri gina angbe cögbörö wü *malayika la, te ngbü ewü ngbangbara! baka mügbara la, da ei i, gü ba, "Ye koro egoro akine!" ² Fū mene kpara, te wüh i engu la, ayia akoro. Ah li ngbü füh gara nü ngbe'de bala. Kpara la de diri esaka ye. Fū Me ato wazi fefe na, teka de ah nü, ah gü gü, de ah fa wü vügü ka-ni. Fū kpara la ayia anü sü, teka ato cinga te wü kpara füh kotö ne.

³ Fütanga ngü la, fū Yesu ayia afuru e'ba'basu ku te köcökpa la. Fū e'ba'basu mere wü malayika la ayia amala ngü, gü ba, "Ye koro egoro akine." ⁴ Fū kpara la ayia akoro. Ah li ngbü füh gara nü, de küte ye didiki baka ngüte. Fū Me ayia ato mere dü esasaka, ato kphah wazi fefe teka asiti maguma wü kpara füh kotö ne, de wüh kpo da egü gü esüka wü, kphah da emömörö te-wü. Fū kpara la ayia anü sü, teka ato cinga te wü kpara füh kotö ne.

⁵ Fütanga ngü la, fū Yesu ayia afuru e'babata ku te köcökpa la. Fū e'babata mere malayika la ayia amala ngü, gü ba, "Ye koro egoro akine." Fū kpara la ayia akoro. Ah li ngbü füh gara nü bibiri bane. Tima kaka, ah teka ato mere siti tala te wü kpara füh kotö ne 'buru. Ah za küma, de te ewü ngbü erü zu di, esaka ye. ⁶ Fū ra ayia aje ri gara kpara, te ngbü ewü etü angbe cögbörö wü malayika de bala ne, gü ba, "Akoo! Wü kpara ena angbü embü da ememere tima gbü ra gbuuu, bü mba teka küma bata ka jia ndo, anga küma menewa kükürü ka zu ngbanda! Amba ye mere e amofu ri-rü, te wüh ngbü emere mü, anga fi gbügbü ne, de!" Fū kpara la ayia anü sü, teka ato cinga te wü kpara füh kotö ne.

⁷ Fütanga ngü la, fū Yesu ayia afuru e'babala ku te köcökpa la. Fū e'babala mere malayika ayia amala ngü, gü ba, "Ye koro egoro akine." ⁸ Fū kpara la ayia akoro. Ah li ngbü füh gara nü, te kürü, vi ngbü buwal bane. Iri kpara la de Kpi. Gara kiri ye ladü, te ngbü efa nganga na. Iri na de Mbükü. Fū Me ayia ato wazi fū ewü, teka de wüh nü, wüh mömörö mere bi wü kpara gbü gara faka sü füh kotö ne. Wü gara kpara ena akpi esaka gü. Wü gara ena akpi nda-wü ka tala. Wü gara ena akpi ka keke. Wü gara ewü ena akpi esaka wü siti nü ka gü. Fū wü kpara la ayia anü sü, teka ato cinga te wü kpara füh kotö ne.

⁹ Fütanga ngü la, fū Yesu ayia afuru gara ku te köcökpa la. Fū ra ayia awu wü kpara, ta te wü vügü mörö ewü, angü wüh ngbü ta fi bü elala gbü ngü ka Yesu ne. Kuru wü kpara la ngbü agbü kpi, esa *cangali, de te wüh ngbü ecuru *züka serü fefeh na fū Me ne. ¹⁰ Fū wü kpara la angbü eku gba de mere ri wü kpa tikpi, gü ba, "Akoo, Mere Me! Mü ena ato kuru te wü vügü ka-a, neh elaye?" ¹¹ Fū wü malayika ayia aza bu bongongbe'de, ato fū ewü biri biri 'buru. Fū wü malayika la ayia amala ngü fi ewü, gü ba, "Wayi, Me ena ato kuru te wü vügü ka-wü la ato. Amba, ah le de wü ngbü la ziii, angü Me ce wü vügü la, o la me-ye bala. Kükürü de, angü wü gara wü di engu ni wü kphah ladü, te wü vügü ena amömörö ewü feke, teka ngü ka Yesu, kphah baka nda-wü la. Te wüh mömörö ewü nza eyi 'buru la, dela tine sikipi te Me ena ato kuru te wü vügü ka-wü la tete."

¹² Fütanga ngü la, fū Yesu ayia afuru gara ku eküte köcökpa la. Te engu furu ku la tete, fū yiki-tö akpo 'duwa eyiki sü, gbi gbi gbi gbi! Fū sü ati 'duwa ati, nyütü! Ra du sü tine de. Fū jia fe afü te-ye, angbü tine ngbaaa! baka ngüte la. ¹³ Fū wü küfara akpo 'duwa egügürü kötö, baka wü ri-rü, te mere wege ngbü efe ewü, fū ewü angbü da egügürü. ¹⁴ Fū Me ayia agara kokpi, baka te wüh ngbü egara cara la. Fū wü mere rüvü akpo angbü etü 'buru kötö, teka ngü ka yiki-tö la. Dela wü ngü te ewü ena amere te-wü füh kotö ne bala. ¹⁵ Wü kpara, te ewü le ngü ka Me de, wüh ena angbü de mere cürü emaguma wü. Wü miri, de wü kpeke kpara, wü marajümüya, wü kpara de mere bi e esaka wü, kphah de wü mürü cinga 'buru, wüh ena angbü ekpe, da egigiri wü sü, awo te-wü tete. Wü gara ewü ena angbü eli füh wü da, egigiri wü gö, teka awo te-wü gbügbü. ¹⁶⁻¹⁷ Fū wü kpara la angbü eku gba de mere ri wü kpa tikpi, gü ba, "Akoo! Ani ena amere

tüne dene, neh baye? Ani ena akpe awo te-ani, ka cinga te ani ne, neh kaye? Ah le ta de wü da ne müürü, tî füh ani ke! Ceka la, maguma wü Me ake Yesu siti eyi fa sü, eküte ani dene! Akoo! Te wüh maka ani la, wüh ena amörö ani di bü fanü! Nda-ani sikkpi ka kpi koro eyi enatikine dene, baaö! Wüna! Kpara te ena aküwa mbele ma!”

Dela kuru mere cinga te ena amere te-ye te gara füh kotö ne, baka te Yesu furu maka gbü köcökpa la.

7

Dene ngü ka mere bi wü kpara ka Me agbü kpi

¹ Fütanga ngü la, fü ra ayia afü jia ra bane de, gbo! te wü *malayika ka Me bala (4), te ewü ngbü edebu sü bala (4) ka kotö ne biri biri 'buru. Me to wazi fü ewü eyi, de wüh zoro wü siti wege esaka wü gö gö! angü wege la ena asiti wü e füh kotö ne. ² Fü ra ayia awu gara malayika te koro tongo kpa fügö. Ah za e, te Me ngbü eba tere di, esaka ye. Fü malayika la ayia amala ngü de mere ri ye, fü wü mene malayika bala, de wege esaka wü ne, ³ gü ba, “De-wü deyí, wü zoro wege la esaka wü gö! Angü ah le de ani ba la tere eraku wü kpara ka Me, de te ewü to maguma wü eyi fü Me ne, feke. Te ani ba tere eraku ewü nza eyi la, de wü du, wü ce kpa te wege la, teka fü ah akpo tüne eto cinga te wü e füh kotö ne.”

⁴ Fü ewü akpo da etanga wü kpara ka Me, te ewü ena aba tere eraku ewü ne 'buru. Wü di enga *Yisarayeale la ta 'buru baka wü kpara kutu kama biri teke 'basu de füh ye bala (144,000). ⁵ Wüh ngbü ba tere eraku wü kpara kutu nzükpa de füh ye 'basu (12,000), gbü nguwa wü kundu ye Yisarayeale la biri biri 'buru.

Gbü nguwa Yuda, kutu nzükpa de füh ye 'basu (12,000).

Gbü nguwa Rübena kutu nzükpa de füh ye 'basu (12,000).

Gbü nguwa Gada kutu nzükpa de füh ye 'basu (12,000).

⁶ Gbü nguwa Asera kutu nzükpa de füh ye 'basu (12,000).

Gbü nguwa Nafatali kutu nzükpa de füh ye 'basu (12,000).

Gbü nguwa Manase kutu nzükpa de füh ye 'basu (12,000).

⁷ Gbü nguwa Simiyona kutu nzükpa de füh ye 'basu (12,000).

Gbü nguwa Levi kutu nzükpa de füh ye 'basu (12,000).

Gbü nguwa Yisakara, kutu nzükpa de füh ye 'basu (12,000).

⁸ Gbü nguwa Zebulona, kutu nzükpa de füh ye 'basu (12,000).

Gbü nguwa Yüsefa kutu nzükpa de füh ye 'basu (12,000).

Gbü nguwa Benzamina wü kpara kpah kutu nzükpa de füh ye 'basu (12,000).

Dela 'buru nguwa wü Yisarayeale, te wüh ena aba tere la eraku ewü.

⁹ Fütanga ngü la, fü ra ayia afü jia ra, awu kpah mere bi wü kpara, te ewü sibi fa sü, te wüh tî atanga, anza de. Wü kpara la, wüh 'buru de wü kpara ka Me, te ewü koro gbü nguwa wü kpara, te nga wü sü de füh kotö ne biri biri 'buru. Wüh to 'buru züka bu bongo eküte wü, ngboro ngboro bala. Wüh za kpah wü kpa mbira esaka wü, teka asere tadu emaguma wü di. Fü ewü arü 'buru tikpi engagira kpökpö ka Me, ake Yesu Kurisito, *Kambiliki ka Me. ¹⁰ Fü wü kpara la akpo angbü ebí ci, da emí koko, da etü karayi de mere ri wü kpa tikpi, gü ba,

“Nih gbo nga iri Me!

Angü ah küwa nih eyi me-ye!

Nih gbo nga iri Yesu, Kambiliki ka Me!

Angü engu küwa nih eyi me-ye!”

¹¹ Teka ngü la, fü mere bi wü malayika, de te ewü ngbü ede kpökpö ka Me la, de wü mere *kovo teke biri de füh ye bala ne, abe kpah te mene wü angbe cögbörö malayika bala ne ayia aci 'buru, atí kötö engagira Me, da egbo nga iiri na, gü ba,

¹² “Wayi, ah di bala!
Nih gbo nga iri Me!

Ah le de wü kpara 'buru di egbo nga iri Me!

Angü wawazi na fa nda wü kpara 'buru!

Wayi, nih gbo nga iri Me!

Angü, engu wu ngü 'buru!

Nih gbo nga iri Me fi mere badi!

Ah di bala!”

¹³ Fütanga ngü la, fü gara kpara bir- ingbö, esüka wü mere kovo la, ayia amala ngü fere, gü ba, “De-ra deyí, ma wü sü te wü kpara, de te ewü to züka bu bongo te wü la, koro tete na ne eyi? Wüh neh wü da?” ¹⁴ Fü ra ayia alügü ngü fefe, gü ba, “Akoo, mere kpara, ma ena awu ngü la, neh baye baye? Ye wu ngü ka-ewü ka-ye bü me-ye. Ah le de ye sere ngü la fere.” Mere kovo la gü ba, “Wü kpara la, wüh de wü *kpara ka Yesu, de te wü vügü ka-ewü ngbü ta eto cinga te ewü efa sü ne. Amba wüh ce ngü ka Yesu nda-wü ta de. Wüh ngbü rü ta fi bü kpekpeke gbü wü cinga ka-wü. Te di bala, wüh zürü *siti ngü ka-wü eyi de *ngüte Yesu, Kambiliki ka Me ne. Teka ngü la, fü bongo ka-ewü avi, angbü kpilili de bala! ¹⁵ Te di bala, dela si-ngü, te wüh rü ngbü ede kpökpö ka Me, fi mere badi ne. Wüh ngbü engbü

kpa esambü ka Me, da egbo nga iiri na, biti de ra mini. Me ena adi eceka kpi fütanga ewü me-ye, da eto wazi fü ewü. ¹⁶ Tala ti amere wü kpara la tine de. Gümü ngu ti amere ewü kphah de. Anga ra ti acuru ewü ne kphah de. Cinga ti adu amere ewü tine de. ¹⁷ Miri Yesu* ena angbü eceka kpi fütanga ewü me-ye, baka kpara te ngbü eceka kpi fütanga wü kambiliki ka-ye. Ah ena angbü eza ewü, enü di kpa esa biri, teka fü ewü angbü enzö züka gu ngu kpala. Fü ewü angbü ka-wü tine ezükü agbü kpi, fi mere badi. Me ena akö ngura gbü jia ewü 'buru 'buru asidi, angü Me le ewü faka sü!"

Dela ngü te ma wu cu de jia ra, teka wü kpara ka Me, te ewü di angbü kpi ne.

8

Dene ngü te mere te-ye, te Yesu furu adu ku eküte köcökpa tete

¹ Fütanga ngü la, fü Yesu ayia afuru adu ku te köcökpa la. Fü wü kpara agbü kpi la ayia anga 'duwa ngbüiii! Ngü la yiri mba ayiri baka lö-ra biri.

² Fü ra ayia awu gara wü *malayika ka Me lorozi, te ewü ngbü ede kpökpö ka Me. Wüh 'buru de wü kono esaka wü.*

³ Fütanga ngü la, fü gara malayika ayia arü ede *cangali, te di engagira Me la,† de gara e baka endu-fara-e esaka ye, te wüh reke gbü *diki-se. Fü ewü ayia ato mere bi wü *rü de züka se ye fefe, teka de ah curu füh cangali la. Züka se-rü la, ah baka gba, de te wü kpara ka Me ngbü eku fü Me, teka de ah to kuru te wü vügü ka-ani. Fü malayika la ayia aza züka se-rü de gbü endu-fara-e la, abu gbü wa, de te wüh deke füh cangali la.

⁴ Fü züka se-rü la angbü ecuru tine de mere nguwa ye, 'duuu! Fü sese agba sü 'duwa truuu, bala. Fü se rü la afu akoro kpaka Me, kphah baka gba ka wü kpara ka Me, de te ewü ngbü eku fefe na füh kotö ne. ⁵ Fü malayika la ayia aza endu-fara-e esaka ye la, akö wü nye-wa de füh cangali la gbügbü gbe. Fü ah aza nye-wa la, amoko mbüü! kpa füh kotö kpakine. Fü mügbara angbü esüsürü tine 'duwa ngbee! ngbee! ngbee! kphah de wü ülele mini. Fü yiki-tö akpo kphah da emere te-ye.

Dene ngü te wü malayika lorozi la kpo da eu kono tete

⁶ Fütanga ngü la, fü wü malayika de lorozi la ayia areke te-wü, teka au kono ka-wü, te ena asere nga wü cinga, de te Me ena ato te wü kpara füh kotö ne.

⁷ Fü gina malayika la ayia au kono ka-ye. Fü mere bi wü timiri akpo angbü egügürü füh kotö ne, de wa gbü ye, te diki baka ngüte la. Fü wa la akpo angbü ecuru sü füh kotö ne, enü di bü hawuu bala! Fü gara faka sü füh kotö ne ayia acuru, de wü yi gü, de wü rü gbü ye 'buru.

⁸ Fütanga ngü la, fü e'ba'basu malayika la ayia au nda-ye kono. Fü ra awu gara mere siti da bane, te ngbü ecuru, te yia ti kpa etü mere *yi-ngu. Fü faka mere yi-ngu la ayia asiti, afü te-ye akoro didiki baka ngüte. ⁹ Fü wü si de wü nü ka ngu, te ewü di gbü faka sü la, ayia akpi kphah le 'buru. Kphah bala, wü *zabu, te ewü di gbü faka sü la, ayia asiti kphah 'buru.

¹⁰⁻¹¹ Fütanga ngü la, fü ebabata malayika la ayia au kphah nda-ye kono. Fü ra awu mere küfara, te ngbü eci 'duwa ngbööö, baka te-wa la. Fü mere küfara la ayia kpa tikpi kpala, ayere, ati kpa füh kotö kpakine ngbüiii! Fü küfara la asiti mere bi wü ngu afa sü. Fü wü gara faka ngu gbü sü la, de wü jürü ze, de wü du-kpa-ngu, asiti 'buru, ayia akoro süsü. Fü wü kpara agü iri te küfara la, gü ba, Sü-e. Fü mere bi wü kpara, te ewü nzö ngu la, ayia akpi 'buru, angü ngu la ka-ye süsü.

¹² Fütanga ngü la, fü ebabala malayika la ayia kphah au nda-ye kono. Fü ra awu wü ra ake fe, de wü küfara 'buru, te ewü kpo ngbü esiti. Wüh du ci tine mbi mbi, baka te enga gina ne, de. Teka ngü la, ra sü de, fü sü atü angbü 'duwa mbirrii! teka wü lö-ra bala. Kphah bala, gbü biti, wü fe de wü küfara ci de, teka lö-ra bala. Ngü la ngbü mere te-ye bala te nga wü sikpi 'buru.

¹³ Fütanga ngü la, fü ra ayia awu mere lu baka kpukpu la. Fü lu la ayia angbü endondoro tikpi, da eku gba de mere ri ye, gü ba dene, "Cinga! Cinga ba! Dela ne cinga ne, te ena amaka wü kpara füh kotö ne! Angü wü gara malayika de bata ne, wüh u nda-wü kono la de. Te wüh u nda-wü kono tine eyi la, wü kpara ena amere tine baye? Angü nda-wü cinga, de te ewü ena ato ne, ena afa tine sü!"

9

¹ Fütanga gba ka mere lu la, fü e'bu'buruve *malayika la ayia kphah au nda-ye kono. Fü ra ayia awu gara malayika, te ngbü eci aci baka küfara, te yia kpa gbü kpi kpala, ti kpa füh kotö kpakine bü ciii! Fü Me ayia ato mafüta fefe, teka de ah ü komö mere siti du di. ² Te malayika la nü ü komö mere siti du la, fü

* 7:17 7:17 Wüh ngbü ei Miri Yesu kphah Kambiliki ka Me. Ah ngbü kphah angbü füh kpökpö ka miri ede Me. * 8:2 8:2 Wü kono la, wüh ena au, teka asere ngü ka cinga, te Me ena atima füh kotö ne. † 8:3 8:3 Cangali la, wüh reke gbü diki-se teka acuru züka se-rü fü Me fefeh.

mere nguwa ayia akoro gbügbü 'duwa 'diii bala! Ah ngbü baka nguwa ndi la. Fü sü abiri ka nguwa la, ati angbü 'duwa mbiri mbiri! Ra du sü tine kphah de. ³ Fū ra ayia awu mere bi wü e baka wü mbira, te ewü ngbü ekoro gbü mere nguwa la. Fū Me ato wazi fü wü e la, de wüh di etütü wü kpara atütü, baka dira la. ⁴ Fū malayika la ayia ato riri fü wü e la, gü ba, "Wü mere e asiti wü fu-e, de wü gü, de wü rü nda-wü de. Wü mere e ato cinga te wü kpara ka Me kphah de. Amba tima ka-wü bü nzö teka adi eto kuru te wü kpara, de te wüh ba tere ka Me eraku ewü de ne, angü wüh le ngü ka Me nda-wü de. ⁵ Wü to bü kuru te ewü, ace ewü bala. Wü mere e amörö ewü amörö ne de. Wü mere ngü la bala teka wü fe 'buruve." Te wü e la ngbü etütü wü kpara la bala, fü nganga angbü ekeke esiti, baka nga dira la. ⁶ Fū wü kpara la angbü eyo kpi, ka gü keke ka wü e, de te ngbü etütü ewü la, amba wüh ti akpi nda-wü de. Fū wü e la angbü embü ewü bala teka wü fe 'buruve.

⁷ Wü mbira la gegere ngbü baka wü siti nü, de te wüh reke te-wü, ngbü nzo teka amere gü. Nzö ewü diki ngbü 'buru nzeeee bala. Gbüra ewü ge baka gbüra kpara la. ⁸ Fū kala su-nzö ewü angbü 'duwa biya biya bala. Fū te ewü agegere 'buru cögbörö baka te kami la. ⁹ Baga ewü mere kpeke baka se la. Te wüh ngbü endondoro la, giri mbula ewü ngbü ewü rurrur, baka giri wü arabiya ka gü, te ewü ngbü ekpo me-wü. ¹⁰ Wüh ngbü etü wü kpara de so wü baka dira, te ngbü etü kpara me-ye la. Fū ewü akpo angbü eto mere cinga te wü kpara bala, teka wü fe 'buruve. ¹¹ Miri ka-ewü ladü, te ngbü eto riri fü ewü. Ah de siti malayika ka mere du. İiri na de E-siti-e.*

¹² Dela la mba gina cinga te Me ena ato te wü kpara füh kotö ne. Amba du wü cinga 'basu la ladü te koro la de.

¹³ Fütanga ngü la, fü gara malayika ayia au kphah nda-ye kono. Fū ra ayia aje ri kpara, te wü koro gbü *cangali, te di engagira kpökpö ka Me ne.† ¹⁴ Fū ri kpara la angbü emala ngü fü malayika de tine, te u kono ne, gü ba, "Ye nü enü kpa era mere ngu de iri ye Efürata ne, de ye furu wü malayika de bala (4), de te wüh i ewü ce de kpala ne, teka de wüh kpo de tima ka-wü." ¹⁵ Fū malayika la ayia anü agbü Efürata, afuru wü malayika, te wüh i ewü de kpala, teka de wüh nü amömörö wü kpara, te ewü le ngü ka

Me de, gbü gara faka sü füh kotö ne. Angü wü malayika de bala la, wüh ngbü fi bü eci nga sikipi, te Me fe fü ewü, te ewü ena akpo de tima la tete.

¹⁶⁻¹⁷ Wü malayika de bala la, wüh de mere bi wü marajümiya sidi nga wü gbe gbe gbe, baka wü mbüwü la.‡ Wüh ngbü to 'buru bongo se gbü бага wü. Nda wü gara didiki baka wa, nda wü gara bibiri baka nguwa la, nda wü gara nda-ye waaa baka küte kami la. Fū ewü ali angbü 'buru füh wü nü, de nzö wü baka nzö wü kami la. Wege de te ngbü ekoro gömö wü nü la ngbü baka wa, de nguwa gbü ye kpüüü! Fū se gbü nze ewü angbü efu gbiri gbiri bala! ¹⁸⁻¹⁹ Fū wü nü la angbü emömörö wü kpara bü de se nguwa gömö wü la. Angü Wege de te ngbü ekoro gömö ewü la, ah baka wa. Fū ewü angbü kphah emömörö wü kpara de so wü, angü so ewü ka-ye baka nzö kpürü la. Fū mere bi wü kpara, gbü gara faka sü füh kotö ne, akpi 'buru, teka wü ngü la.

²⁰⁻²¹ Amba mene wü kpara, de te ewü kpi nda-wü la de ne, wüh le afü maguma wü, ace *siti ngü ka-wü ne, nda-wü de. Wüh ngbü ka-wü fi bü emömörö te-wü esüka wü. Wü gara ngbü ememere nda-wü ngü ka rü, anga ngü ka wü kuwa kawü. Wü gara ememere nda-wü waza. Wü gara da ezizi wü e ka wü bu wü. Wüh le ace wü siti ngü ka-wü la 'buru 'buru de. Wü gara ngbü fi bü ememere ngü ka gele bete ngü ka faranda.§ Amba wü faranda la, wüh ti ale ta-ngü te kpara nda-wü kpo de. Angü wüh ti aro mö de, wüh je ngü nda-wü kphah de. Kphah bala, jia ewü ceka kpi kphah de. Wüh nü nü kphah de. Amba gbü wü ngü la 'buru, wü kpara le ace wü lara ngü ka-wü la nda-wü 'buru 'buru de.

Dela la bü e'ba'basu cinga, de te Me ena ato te wü kpara, de te ewü le ngü kaka de ne.

10

Dene ngü ka malayika de engä köcökpa esaka ye

¹ Fütanga ngü la, fü ra ayia awu gara mere kpeke *malayika, te yia agbü kpi kpala wuuu, etü kpa füh kotö kpakine, de bongo ka-ye gbooo baka sangu la. Fū gara e angbü eci edere nzönzö, gbele gbele, baka küte tere la. Fū gbügbüra na angbü eci, baka ra te ngbü esü me-ye la. Lóló na baka mere rü, da eci aci baka wa. ² Fū malayika la aza engä köcökpa,

* 9:11 9:11 İri miri ka wü e la, gbü ngü Ebere ah de Abadona. Gbü ngü Giriki, ah de Apoliyona. † 9:13 9:13 Cangali la, wüh reke gbü diki-se teka acuru züka se-rü fü Me fefeh. ‡ 9:16-17 9:16-17 Wüh gü ba, "Wü marajümiya la, wüh baka 200,000,000." § 9:20-21 9:20-21 Wü faranda la, wüh ngbü reke wü gara gbü diki-se, de wü gara se, gbü wü teme, bete wü rü.

te wüh ü aü, esaka ye. Fü ah ao lö ye ka kokpa füh mere *yi-ngu, nda kamisü nda-ye füh gümba. ³ Füh malayika la ayia amala ngü de mere ri ye, baka ri kami la. Füh mügbara ayia awü du lorozi, baka ri kpara, da elügü ngü füh malayika la. ⁴ Füh ra ayia areke te-ra, teka de ma ba wü ngü lorozi, de te mügbara la ngbü emala ne. 'Duwa füh ra aje ri Me, te wü agbü kpí, gü ba, "De-ra deyi, ma mere e aba wü ngü lorozi, de te ngbü ewü baka mügbara la, nda-ra de!"

⁵ Fütanga ngü la, füh mere malayika la, ayia ae kpa ye ka kokpa kpa tikpi, ⁶ amala ngü, gü ba, "Dene ri Mere Miri Me. Angü Me mere kpí de kotö ne, bete mere yi-ngu, de wü e gbü ye 'buru me-ye. Ngü ka Me tí anza nda kü de. Me gü ba, 'Sikpi te ni ena anza ngü ka wü e füh kotö ne 'buru gbügbü, koro eyi gbamari! Sikpi la tí ayiri tine de! ⁷ Angü adu malayika te ena au adu kono ne, reke te-ye ngbü eyi nzo. Te engu u kono la eyi la, ni ena ayia teka anza ngü ka wü e la 'buru. Füh ngü la atí kpini de wü ngü, ta te ni ngbü mala fü wü *mürü dofo ka-ni ta gügü ne.'"

⁸ Füh ri Me, de te wü agbü kpí ne, adu kpa amala ngü fere, gü ba, "De-ra deyi, ma nü enü kpaka malayika la, de ma za köcökpa de esasaka la." ⁹ Füh ra ayia anü kpaka malayika la, ayi-tata, de ah to köcökpa la fere. Füh ah ayia amala ngü fere, gü ba, "Wayi, ma za eza, de ma zü. Köcökpa la ena angbü gömö ra tütürü, amba kpa guvu ra kpala, ah ena angbü süsü 'duwa ba-neh-ene-la." ¹⁰ Füh ra ayia aza köcökpa de esaka malayika la, azü. Füh köcökpa la atürü gömö ra 'duwa ba-neh-la. Amba kpa guvu ra kpala, füh e la angbü baka te ma zü sü rü la.

¹¹ Füh ri Me, de te ngbü ewü agbü kpí ne, adu kpa amala ngü fere, gü ba, "De-ra deyi, ah le de ma du, ma mala nga wü siti ngü te ena amere te-ye te gara, füh nguwa wü kpara de füh kotö ne 'buru, be kpa te wü miri ka-wü mini, de wüh füh maguma wü afü."

11

Dene ngü ka wü kpara 'basu te Yesu tima agbü Yerüsalema

¹ Fütanga ngü la, füh ewü aza ndugu gala, ato esaka ra. Füh Miri Yesu amala ngü fere, gü ba, "De-ra deyi, ma za ndugu gala la, de ma nü di agbü *Mere Kambü ka Me agbü Yerüsalema. Te ma koro eyi kpala la, de ma re nga ngboro kambü la, de pipiti na, bete maga na to kpa tikpi. De ma re kpa *cangali de te wüh ngbü eto la'bi füh Mere Me fefeh na la. Ma du kpa,

ma tanga mene wü kpara, de te ewü ngbü egbo nga iri Me de kpala ne 'buru, teka füh ni, Yesu, aceka kpí fütanga ewü mbi mbi. ² Amba ma mere e are tambasü de, ma tanga mene wü kpara etambasü la kpa de. Kükürü de, angü Me le eyi teka füh wü vügü ari kpala. Wü vügü la ena akoro azoro sü agbü Yerüsalema kpala, agbene wü e gbügbü 'buru. Füh ewü angbü gbü nzö wü kpara de kpala de wazi, teka wü re bata de tü ye. ³ Te di bala, de-ni Yesu, ni ena ato wazi füh kpeke wü kpara ka-ni 'basu, teka füh ewü amala ngari ni füh wü kpara, teka wü re bata de tü ye ne. Wü kpara la ena angbü eto bongo ka cinga eküte wü, füh ewü angbü erí wü kpara, teka de wüh füh maguma wü."

⁴ *Mürü dofo Zakariya mala ta nga wü kpeke kpara ka Yesu de 'basu ne eyi gügü, gü ba, "Wüh ngbü baka rü de iri ye olive, te ngbü erí, de mü gbü ye ne. Wüh kpa baka lamba de mü-wa gbü ye, te ngbü eci, ereke areke. Kükürü de, angü Me to wazi ye eyi füh ewü, teka füh ewü amere tima ka-ye la di."* ⁵ Me to kpa wazi eyi füh ewü, teka füh ewü amere wü kpeke ngü di. Te gara kpara yia emere ewü esiti la, wüh ena auru engu bü de komö wü kükürü, füh ah akpi, angü wa ladü gömö ewü. ⁶ Me to kpa wazi eyi füh ewü, baka wü *mürü dofo ka-ye ta gügü ne, teka atiri agö, de ah mere e ali de. Te di bala, gbü wü re bata de tü ye, te ewü ena angbü emala ngari Me endondoro di, agö tí ali de. Ngü la ena amere te-ye bala, teka ato cinga di te wü kpara füh kotö ne, de wüh ce *siti ngü ka-wü, adu ale ngü ka Me. Me to kpa wazi ye eyi füh ewü teka afü ngu, akoro di baka ngüte, kpa de wü gara lara ngü, te ewü ena adi emere. Dela wü ngü te ena amere te-wü, gbü wü re bata de tü ye ne.

⁷ Fütanga re bata de tü ye, gara kpara te di baka siti nü la, ena akoro agbü mere siti du, teka agü gü de wü kpara ka Yesu de 'basu la. Füh siti kpara la afa ewü de wazi ye, amörö ewü asidi. ⁸⁻⁹ Ngü la ena amere te-ye cu gbü mere köti, de te wüh mörö Miri Yesu gbügbü na ne, angü wü kpara gbü sü la, wüh ka-wü de wü mürü kögö-nzó, baka wü kpara ka *Ezepeto bete nda *Sodomo ta gügü ne. Teka ngü la, füh kö wü kpara de 'basu la angbü ka-ye kötö sela, teka wü sikpi bata de tü ye. Angü wü kpara gbü sü la, le ati kö wü kpara la nda-wü de. Te di bala, mere bi wü kpara ena ayia te nga nzö wü sü füh kotö ne 'buru, angbü egoro eceka kö wü kpara ka Yesu de 'basu ne, da efala.

* 11:4 11:4 Mü ena amaka ngü ka wü kpeke kpara ka Yesu de 'basu ne, gbü buku ka Zakariya 4:3-14.

¹⁰ Fū mere bi wū kpara, te ewū le ngü ka Me de, angbü 'buru de mere tadu te wū, angü wū kpara ka Yesu de 'basu la kpi eyi fanü. Wüh ena angbü eto takpa esüka wū, teka ngü la. Angü ngari Me, ta te wū kpara de 'basu la ngbü erī wū kpara di ne, ngbü ta eke te ewū ake.

¹¹ Fütanga sīkpī bata de tū ye, fū Me adu auru wazi ye guvu wū kpara ka-ye de 'basu la. Cukuru! fū ewū azükü gbü kpi, ayia arü cinzili! füh lö wū. Te mere bi wū kpara füh kotö ne wu ngü la bala, fū ewū angbü de mere cürü te wū.

¹² Fütanga ngü la, fū wū kpara de 'basu la aje ri Me, te wū agbü kpi, emala ngü fū ewū, gü ba, "De-wū deyi, wū yia eyia, de wū koro kpaka ni akine." Fū Me adu ago ewü, yooo! ayo di agbü kpi, gbü jia wū vügü ka-ewü la 'buru, de sangu gbü nga wū, gbooo!

¹³ Baka te wū kpara de 'basu la ngbü erī tete agbü kpi, fū mere siti yiki-tö akpo angbü emere te-ye. Fū mere bi wū kambü gbü gara faka sü agbü mere köti ka Yerüsalema la amümürü, atī 'buru kötö. Fū mere bi wū kpara gbü köti la akpi kphah 'buru. Wū kpara te ewü kpi la, wüh 'buru kutu lorozi (7,000). Fū mere cürü ayia arī emagama mene wū kpara, ta te ewü lakī ne. Fū ewü akpo da ecu ngü Me, teka mere wazi kaka la.

¹⁴ Dela la bü e'ba'basu cinga, de te Me to te wū kpara, de te ewü le ngü kaka de ne. Amba yi ceka 'be, angü ebabata cinga eyi gbamari!

Dene ngü te mere te-ye, o adu malayika u kono tete

¹⁵ Fütanga wū ngü la, fū adu *malayika la ayia au nda-ye kono. Fū ri wū kpara akpo angbü ewü agbü kpi, gü ba, "Wayi! Sīkpī la koro eyi dene! Ngü ka wū miri füh kotö ne nza eyi! Dene sīkpī te Me ena angbü me-ye gbü nzö wū kpara füh kotö ne 'buru. Me o Yesu *Kurisito eyi Miri gbü nzö wū kpara 'buru. Engu ena angbü bala fi mere badi!"

¹⁶ Fū wū mere kovo teke biri de füh ye bala, de te ewü ngbü ede kpökpö ka Me agbü kpi ne, adu atī kötö erī lö Me, egbo nganga, da ebī ci, ¹⁷ gü ba,

"Wayi, Mere Me, a ngbü egbo nga irī mü! Merē mürü wazi, a ngbü egbo nga irī mü! Ta gügü mü ka-mü kü ladü! Enatikine mü fi ladü!

Ngü ka-mü ena angbü bala fi mere badi! A ngbü egbo nga irī mü teka mere wazi ka-mü!

Angü mü ngbü eyi

gbü nzö wū kpara füh kotö ne 'buru. Ngü ka-mü tī anza nda kü de, fi furu afuru!

¹⁸ Wayi, a gbo nga irī mü!

Angü sīkpī ka-mü koro eyi dene!

Mü ena asere wazi ka-mü fū wū kpara, te ewü le ngü ka-mü de ne.

Angü mü ena ato kuru te ewü enatikine!

Mü ena aye süka ngü ka wū kpara te ewü kpi eyi,

bete ewü de te ewü di la ezükü ne.

Fū mü aküwa wū kpara ka-mü fi mere badi.

Mü ena ato *küküwa

fū wū kpara, de te ewü mere tima ka-mü reke areke ne.

Mü ena ato küküwa

fū wū kpara, de te ewü mala ngari mü fū wū bu wū ne.

Mü ena ato küküwa

fū wū kpara, de te ewü to maguma wū

'buru 'buru fū mü ne.

Amba mü ena anza ngü ka wū kpara, de te ewü le ngü ka-mü de ne.

Mü ena anza ngü ka wū kpara,

de te ewü ngbü eto cinga te wū kpara ka-mü ne.

Wayi bala, Mere Me, gbo nga e ngbü te irī mü!"

¹⁹ Fütanga ngü la, fū ra ayia awu *Mere Kambü ka Me agbü kpi kpala, te ü te-ye, ngbü baaba. Fū ra awu wū e kpa guvu kambü la kphah 'buru. Fū ra awu mere züka *Sanduku, ta te Me o *Riri ka-ye gbügbü, teka asere fū wū kpara ka-ye, gü ba, ni de *vüngüte ka-wü ne. Fū ülele angbü eci 'duwa le le le bala! Fū mügara angbü esüsürü! Fū yiki-tö akpo da emere te-ye, de wū timiri te ngbü egügürü 'duwa ba-neh-ene-la.

12

Dene ngü ka würüse ake mere siti kpürü

¹ Fütanga ngü la, fū ra ayia awu kphah gara kpeke ngü ka talara, te sere te-ye fere agbü kpi. Ah de kuru gara würüse te ngbü ga füh fe. Fū küte würüse la angbü eci le le le baka ra la. Fū wū gara e baka küfara nzükpa de füh ye 'basu, ado te-wü edere nzönzö kerekere gbaa, baka *madudu kaka. ² Würüse la ta de bu ye. Fū bubu akpo angbü ekeke 'duwa ba-neh-ene-la, teka ayaka.

³ Fū ra ayia awu kphah gara ngü ka talara te mere te-ye. Fū gara e baka mere siti kpürü, nzenze bala, ayia akoro agbü kpi, ace te-ye, arü. Kpürü la, ah de *Satana. Kpürü la, nzönzö lorozi, wū didi nzükpa. Fū wū e angbü gbü wū nzönzö lorozi la, baka madudu ka wū miri. ⁴ Fū kpürü la akpo da emimiki wū küfara agbü kpi kpala, de so ye. Fū wū küfara la ayia

agügürü gbü gara faka sü agbü kpi kpala 'buru kötö. Fū mere siti kpürü la akoro angbü gbmari ede wūrüse la, da eci nganga te ena ayaka. Ah gü ba, "Ahaa! Gbü sikipi te ye ena ayaka mbarase ka-ye la, ni ena azü mbarase la azü asidi!"

⁵ Fütanga ngü la, fū wūrüse la ayia ayaka ye komoko. Amba kpürü la ti azü mbarase la nda de. Angü Me tima *malayika ka-ye, teka aküwa mbarase la. Fū malayika la aza mbarase la, ago di kpaka Me, agbü kpi. Fū mbarase la adu angbü kpala, ede kpökpö ka Me. Angü mbarase la, ah de Miri Yesu, te Me fe, o, teka angbü gbü nzö nguwa wü kpara füh kotö ne 'buru. Wazi mbarase la fa nda wü kpara füh kotö ne kphah 'buru.

⁶ Fütanga ngü la, wūrüse la ena ayia akpe ka-ye 'duwa agbü gü, gbü sü te Me reke fefe. Fū wü malayika ka Me akoro angbü ele ta-ngü tete kpala, teka wü re bata de tü ye. Dela wü ngü te ena amere te-ye fū wūrüse la te gara.

⁷ Tane Mikaye, te di de mere wü malayika ka Me ne, yia de wü marajümiya ka-ye, ati de gü gbü nzö mere siti kpürü la, de nda-ye wü marajümiya.

⁸ Fū wazi wü Mikaye ayia ago füh wü kpürü de wü marajümiya ka-ye la 'buru. Fū wü Mikaye aliki ewü agbü kpi kpala asidi. ⁹ Ah zoro kpürü la, gü kpa füh kotö akine, de wü marajümiya ka-ye la 'buru. Angü mere siti kpürü la, ah de kpürü ta te fiti wü *Adama ake *Awa ne. Enatikine engu fi ladü, da efiti wü kpara füh kotö ne, de mani ka-ye la. Engu de *Satana.

¹⁰ Fütanga ngü de te wüh gü mere siti kpürü la tete kpa füh kotö kpakine ne, fū ra ayia aje ri kpara te ngbü emala ngü de mere ri ye agbü kpi, gü ba, "Wayi, Me de Mere Miri! Enatikine, Me küwa wü kpara ka-ye eyi esaka Satana, angü wazi Me fa nda Satana ka! Me to wazi ka-ye la eyi fū Yesu *Kurisito. Ah o engu eyi mere miri gbü nzö wü kpara füh kotö ne 'buru. Satana ngbü ta nda-ye fi bü esutu wu, da eto moto eküte wü di engu ni nih kpaka Me, te nga wü sikipi 'buru. Amba enatikine, ngü kaka la nza eyi, angü Me za engu, sö eyi de wü ngü ka-ye la, kpa füh kotö kpala. ¹¹ Wü di engu ni nih, ta te Satana to moto eküte ewü kpaka Me ne, wüh fa Satana eyi de wazi *ngüte Yesu, te kpi teka afa nih ne. Angü wüh lala fi bü eküte Yesu. Te wü vügü ka-ewü le ta amörö ewü ne, wüh kpe cürü nda-wü de. Wüh ngbü ta ece te-wü fū kpi, teka ngü ka Yesu. ¹² Teka ngü la, enatikine mere tadu koro eyi fū yi, wü kpara agbü kpi 'buru. Ah le de yi gbo nga iri Me, angü wüh liki Satana eyi to kpa füh kotö. Amba de-yi,

wü kpara füh kotö, mere siti cinga koro eyi fū yi, angü wüh nzi Satana eyi to kpaka yi de kpala. Maguma Satana nzu eyi! Ah ngbü de mere gü kükürü de, angü ah wu eyi, gü ba, "Du sikipi ka-ni ka-ye eyi bü mba cogbo." "

¹³ Te mere siti kpürü la wu, gü ba, wüh gü ni eyi kpa füh kotö ne, fū mamaguma ayia anzu. Fū ah akpo da eto cinga te wūrüse la, de wü di engu ye 'buru.

¹⁴ Amba kpürü la ti amaka wūrüse la de, angü Me to mbula eyi fefe, baka nda wü kpukpu. Fū wūrüse la ayia ka-ye de mbula ye la, purrru, akpe anü awo te-ye agbü gü, gbü sü ta te Me reke, ce o fefe na ne. Fū wūrüse la angbü kpala teka wü re bata de tü ye. Fū wü malayika ka Me angbü ele ta-ngü tete kpala. ¹⁵ Te di bala, fū mere siti kpürü la ayia afu mere ngüsü ka gü gömö ye, gbü nga wūrüse la, gü ba, "Ngüsü de gömö ni ne ena afü te-ye, akoro mere ngu te ena atoro wūrüse la, atafa di, fū ah akpi." ¹⁶ Baka te ngüsü la fū te-ye ngu tete, 'duwa fū tö ayia aü te-ye. Fū ngu la ago 'buru agbügbü, ah mofu küte wūrüse la nda de. ¹⁷ Te mere siti kpürü la wu ngü la bala, fū mamaguma ayia anzu teka ngü la. Amba wawazi teka amere wūrüse la di sisiti ne, tine ma. Fū ah ayia anü angbü egiri wü gara wü di engu wūrüse la, teka ato cinga te ewü. Wü di engu wūrüse la, ah de wü kpara te ewü ngbü eje riri ka Me, da elala gbü ngü ka Yesu.

¹⁸ Fütanga ngü la, fū mere siti kpürü la ayia anü angbü kpa füh siki, era mere *yi-ngu, da eci nga kpara te ena ale ta-ngü te ye.

13

Dene ngü ka siti nü, de di ye nzükpa,

te koro agbü mere yi-ngu

¹ Fütanga ngü la, fū ra ayia afü jia ra, awu gara mere siti nü, te ngbü ekoro gbü mere *yi-ngu, de wü nzö ye lorozu. Wü didi nzükpa. Fū wü e angbü eküte wü didi nzükpa la, baka *madudu ka wü miri la, angü engu ta de mere wazi esaka ye. Wüh ba ta wü iri eküte wü nzönzö la biri biri 'buru. Wü iri la siti gbü jia Me fa sü, angü wü iri la ngbü efala iri Me. ² Küte nü la ngbü baka küte siya, wü koji-lölö baka nda ewawa, kokomö na baka komö kami la.

Te mere siti kpürü la wu siti nü la, fū ah ayia ato wazi ye fefe, teka fū ah adi emere tima di, baka nda-ni. Fū kpürü la adu kphah ato wazi fefe, teka de ah ngbü miri gbü nzö nguwa wü kpara füh kotö ne 'buru. ³ Fū ra ayia awu nga mere ka, eküte gara süka nzö siti nü la. Ka la ena ato ta kpi fefe, amba ka la du ta nzu ka-ye eyi. Te

wü kpara wu, gü ba, mere ka de eküte nzö nü la, nzu eyi ne, fü ngü la ayia aga gbü jia ewü 'duwa ba-neh-ene-la. Fü ewü akpo ale ngü ka siti nü la, da efa nganga. ⁴ Fü mere bi wü kpara akpo angbü egbo nga siti nü la, gü ba, "Siti nü la, ka-ye de mere wazi ye! Kpara te ena afa engu nda kü ma!" Fü ewü adu kpah angbü egbo nga mere siti kpürü la, angü wüh wu eyi, gü ba, kpürü la to wazi ye me-ye fü nü la.

⁵ Te di bala, Me le atiri siti nü la kere nda la de. Ah gü ba, "Ni ena ace la engu bala, teka wü re bata de tü ye." Fü siti nü la akpo angbü emamala wü angbe cögbörö ngü, da ecu ngü ye, kpah da efala Me. Fü engu ayia angbü miri gbü nzö mere bi nguwa wü kpara füh kotö ne, kpah da ememere ewü, ba e te engu ngbü ele. ⁶ Fü siti nü la akpo da efala Me, kpah da emala siti ngü te *Kambü ka Me, be kpah te wü kpara ka Me agbü kpi. ⁷ Fü ah akpo kpah angbü egü gü de wü kpara ka Me de füh kotö ne, da emömörö ewü. Amba Me le anza ngü kaka la de ne, angü sikpi kaka koro la de. Fü siti nü la angbü de wazi gbü nzö nguwa wü kpara füh kotö ne 'buru. ⁸ Fü nguwa wü kpara füh kotö ne 'buru angbü labi ka siti nü la, da ecu ngüngü. Amba 'duwa wü *kpara ka Yesu, de te Me fe ewü ta gügü, o engu mere kotö ne la de ne, wüh le acu ngü siti nü la nda-wü de. Angü Yesu, te di de *Kambiliki ka Me ne, fa ewü eyi de *ngüte ye.

⁹ Dene ngü ka Me te ma le amala fü yi. Te yi de kpara te güje yi ngbü eje ngü la, ah le de yi je ngü ne. ¹⁰ Angü wü cinga ladü, te wü vügü ena akoro, ato te wü kpara ka Me. Wüh ena azozoro wü gara, agü agbü ku. Fü ewü amömörö wü gara. Ngü ma, Me wu ngü la kpo. Te di bala, ah le de yi i maguma yi ai, atüka te-yi, arü kpekpeke gbü ngü ka Me.

Dene ngü ka e'ba'basu nü de di ye 'basu, te koro gbü tö

¹¹ Fütanga ngü la, fü ra ayia awu kpah gara siti nü, te ngbü ekoro gbü tö. Didi na 'basu baka nda kambiliki la. Amba nü la ka-ye de mürü mani, te ngbü efiti wü kpara kpah baka *Satana. ¹² Fü e'ba'basu nü, te koro gbü tö ne, angbü emere ngü ka-ye 'buru gbü wazi ka gina nü, ta te koro gbü ngu ne. Fü ah akpo angbü efiti wü kpara füh kotö ne 'buru, teka de wüh di ecu ngü gina nü la. ¹³ Fü e'ba'basu nü la akpo angbü ememere wü mere kpeke ngü ka talara. Te engu le amala ngü la, fü wa angbü eyia agbü kpi kpala, eti füh kotö sene, gbü jia wü kpara 'buru, da ecuru sü. ¹⁴ Fü ah angbü efiti wü kpara füh kotö ne 'buru,

bü de wü kpeke ngü ka talara ka-ye la. Fü ah amala ngü fü wü kpara, teka de wüh fo kuru gina nü, ta te koro gbü ngu ne, memere, ae, ao kpa tikpi. ¹⁵ Fü Satana ato wazi fü e'ba'basu nü la, teka de engu uru wazi guvu kuru gina nü, te wüh fo la. Fü kuru nü la angbü emala ngü, gü ba, "Ah le de wü kpara 'buru di ecu ngü ni, baka te ewü ngbü ecu ngü Me. Te kpara mere ngü la de la, wüh ena amörö engu amörö."

¹⁶ Fü e'ba'basu nü la ayia ato kpah gara riri fü wü kpara 'buru, gü ba, "Ah le de wü kpara 'buru ba iri gina nü ne gbü kpa wü ka kokpa, anga eraku wü. ¹⁷ Mene kpara te iri nü la di eküküte ma la, engu ti ase e, anga acinzi e, kpah de. Wüh ena aliki engu esüka wü bu ye asidi." ¹⁸ Iri gina nü la, wüh ba de namba. Namba la, ah de kama ma'diya teke bata de füh ye ma'diya (666). Ah le de yi fi nga ngü la mbi mbi mbi, fü yi awu wü si-ngü gbü ngü la. Angü namba la, ah de iri kpara.

14

Dene ngü ka Kambiliki ka Me de wü kpara ka-ye

¹ Fütanga ngü la, fü ra ayia awu Yesu, *Kambiliki ka Me ne, te rü ngbü ede kpökpö ka Me, gbü to mere koti ka Me agbü kpi,* de mere bi wü kpara ka-ye, baka kutu kama biri teke 'basu de füh ye bala, (144,000). Ah de wü kpara de te wüh ba iri Yesu, bete nda Wö ye na, eraku ewü ne. ²⁻³ Wüh ngbü 'buru ede kpökpö ka Me, gbmari ede wü angbe cögbörö *malayika de bala ne (4), bete wü mere kovo teke biri de füh ye bala ne (24). Fü ra ayia aje ri wü kpara la, te ewü ngbü ebü ci de mere ri wü, baka te wü kpara ngbü elo ku'du la. Fü giri e la angbü ewü, da engo wooo! baka giri mere yingu füh vuru. Fü e la angbü kpah ewü baka giri mügbara la. Fü wü *kpara ka Yesu la angbü 'buru egbo nga Me, kpah da ebü ci. Ci la, ah ka-ye de to ci, de kükürü kpara ti abi nda de, 'duwa wü kpara de te Kambiliki ka Me küwa ewü eyi, de *ngüte ye ne. ⁴ Ah de mene wü kpara, de te ewü to maguma wü eyi 'buru 'buru fü Yesu ne. Wüh de wü kpara, de te ewü mere diri gele ka wü kundu wü nda-wü tine de ne. Wüh rü fi bü kpekpeke, da elala fi bü gbü nga Kambiliki ka Me. Angü Kambiliki ka Me la fa ewü eyi de ngüte ye, za ewü, to eyi fü Me baka tari-e. ⁵ Wüh rü ka-wü fi bü kpekpeke gbü ngü ka Yesu, da emere züka ngü gbü jia Me. Maguma ewü ngbü 'basu 'basu kpah de.

* 14:1 14:1 Iri to mere koti ka Me la de Siyona, anga Yerüsalema.

Dene ngü te wü malayika ka Me de bata ne mala

⁶ Fütanga ngü la, fū ra ayia awu gara *malayika ka Me, te yia de mbula ye, tikpi baka lu. Fū malayika la angbü eri dofo de mere ri ye, da endondoro di fū nguwa wü kpara de fūh kotō ne 'buru, ⁷ gū ba, "Wayi, sikpi la koro eyi dene! Sikpi de te Me ena ato kuru te mene wü kpara, de te ewü le ngü kaka de ne. Te di bala, ah le de yi kpe cürü ngü la! Yi fū maguma yi afü, de yi le ngü ka Me! Yi di ecu ngüngü, teka fū yi aküwa. Yi di kphah egbo nga iiri na, angü ah mere tö ake kpí me-ye, be kphah te wü e 'buru, te ewü di gbügbü."

⁸ Fütanga ngü la, fū ra ayia awu kphah gara malayika ka Me, te yia de mbula ye, da endondoro tikpi, sidi nga gigina la. Fū ah angbü kphah emamala ngü de mere ri ye, gū ba, "Wayi, sikpi la koro eyi dene! Sikpi de te Me ena amürü mere kōti de iri ye *Babilona ne, 'buru 'buru asidi. Angü wü miri ka Babilona ngbü fiti wü kpara, de wüh ce ngü ka Me, adu adi emere wü gele ka wü di enga me. Te di bala, maguma Me nzu eyi eküte ewü. Me ena ato mere kuru te ewü enatikine!"

⁹ Fütanga ngü la, fū ra awu kphah eba-bata malayika, te koro sidi nga wü bu ye la. Fū malayika la angbü emala nda-ye ngü kphah, gū ba, "Ö'öö! Me ena ato mere kuru te wü kpara 'buru, de te ewü le ngü ka siti nü la. Ah de mene wü kpara, de te wüh ba iri gina siti nü la eraku wü, anga te kpa wü, da ecu ngü kuru na ne. ¹⁰ Te di bala, maguma Me nzu eyi eküte ewü. Me ena ato kuru te ewü kpekepeke, fū ewü angbü gbü mere cinga, baka kpara te ngbü enzō mere siti wangü. Wüh ena angbü ezü mere cinga gbü jia *Kambiliki ka Me, be kphah te wü malayika kaka. Wüh ena angbü ecuru gbü wa. Wüh ti aküwa nda-wü kü de! ¹¹ Wüh ena angbü ezü mere cinga bala, fi mere badi! Wüh ti afe te-wü, ka cinga la, nda-wü de, ra de biti mini! Angü wüh le ka-wü ngü ka siti nü la."

¹² Dela wü ngü te wü malayika ka Me de bata ne mala, teka ngü ka kuru, de te Me ena ato te wü kpara, te ewü le ngü kaka de ne. Te di bala ne, ah le fū yi, wü kpara ka Me, arü kpekepeke, da emere wü riri ka Me, kphah da elala gbü nga Yesu.

¹³ Fütanga ngü la, fū ra aje ri kpara te wü, to agbü kpí, gū ba, "De-ra deyí, ma ba ngü ne eba, gū ba, 'Me ena ato mere tadu te gara, fū wü kpara de te ewü kpí te iri Miri Yesu ne.' " Fū *Nzila Wazi Me ayia ale kphah ngü la, gū ba, "Wayi, ah ngbü rü bala fanü. Wü *kpara ka Yesu la nza tima

ka-wü eyi. Wüh tafa eyi afe te-wü. Me ena aküwa ewü fi mere badi, angü wüh lala eyi gbü ngü ka Yesu, zalü koro di gbü kpí ka-wü."

Dene ngü ka kuru, te Me ena ato te siti wü kpara fūh kotō ne

¹⁴ Fütanga ngü la, fū ra ayia awu gara kpara, te di baka *Ye Kpara ka Kpi. Kpara la ngbü fūh mandurumba, te vi avi kpilili bala. Kpara la de *madudu ka miri gbü nzō ye, te ngbü eci aci baka *diki-se. Ah za maguruma te dere adere esaka ye, teka awa ndo di. ¹⁵ Fū gara *malayika ayia akoro esambü ka Me kpa etanü, amala ngü fū kpara de te ngbü fūh mandurumba ne, gū ba, "Wayi, laki te wüh ena awa ndo tete koro eyi. Ye za maguruma ka-ye eza, teka awa ndo de fūh kotō ne di, angü ndo la ndri eyi." ¹⁶ Fū kpara la ayia 'duwa aza maguruma ka-ye, fū ah akpo awa wü ndo de fūh kotō ne 'buru.

¹⁷ Fütanga ngü la, fū gara malayika ayia kphah akoro esambü ka Me agbü kpí kpala kpa etanü. Ah za kphah maguruma esaka ye, te dere adere, teka adoro wü ri-rü di. ¹⁸ Fū malayika, de te ngbü nda-ye efete wa fūh *cangali, te di engagira Me ne, ayia amala ngü fū kiri ye la, de mere ri ye, gū ba, "Wayi, laki ka ri *vinü koro eyi. Ye za maguruma ka-ye eza, de ye doru wü ri vinü de fūh kotō ne 'buru." ¹⁹⁻²⁰ Te malayika la je ngü la bala, fū ah ayia aza maguruma ka-ye, anü adoro wü ri vinü de fūh kotō ne 'buru. Wü ri vinü la ngbü esere ngü ka wü kpara, de te ewü le ngü ka Me de ne. Fū malayika la akō siti wü kpara la 'buru, anü abu ewü tundu te sü biringbö, mba canza bane, kpa ekere mere kōti, teka ato mere kuru te ewü, angü maguma Me nzu eyi eküte ewü. Fū ewü akpo edoto wü siti kpara la de lö wü, amömörö 'buru. Fū ngüte ewü angbü ego tine wooo bane! baka mere siti yi-ngu la.†

15

Dene ngü ka adu kuru te Me ena ato

¹ Fütanga ngü la, fū ra ayia ae jia ra bane, gbo! te gara mere kpeke ngü ka talara agbü kpí! Fū ra awu wü *malayika ka Me lorozi, de te Me fe ewü, o, teka ato adu kuru te wü kpara, te ewü le ngü kaka de ne. Dela tine adu kuru te Me ena ato te wü kpara fūh kotō ne, angü mamaguma nzu eyi eküte ewü fa sü.

² Ngü te ma wu ne, ah mere te-ye bane. Ma wu mere tambasü sele sele bala, engagira kpökpö ka Me. Sü la ngbü eci aci baka jia ngu, le le le, kphah baka mi-wa. Fū mere bi wü kpara angbü etambasü

† 14:19-20 14:19-20 Ngüte wü kpara te wüh mömörö la, go ngbü kōtō baka kilometere 300. Macu na baka metere biri de tü ye.

la. Ah de wü *kpara ka Yesu, de te ewü fa wazi siti nü la eyi ne. Fü ewü angbü 'buru de ku'du esaka wü, da egbo nga iri Me di. ³ Fü ewü akpo kpah da egbo nga iri Yesu, *Kambiliki ka Me, kpah da ebi ci baka nda *Müse, ta te engu ngbü ebi gügü ne, gü ba, "Wayi bala, Mere Me, a ngbü egbo nga iri mü!

Mere mürü wazi, a ngbü egbo nga iri mü! Mü ngbü emere wü mere kpeke ngü, te fa fingangü ka wü kpara 'buru.

Mü de Mere Miri gbü nzö nguwa wü kpara füh kotö ne 'buru!

Mü wu da ekolo ngü ka wü kpara ka-mü duu me-mü!

⁴ Mere Miri ka-a, a ngbü egbo nga iri mü! Ah le de wü kpara füh kotö ne 'buru di ecu ngü mü!

Ah le de wü kpara füh kotö ne 'buru di egbo nga iri mü!

Mü de Me duu me-mü, angü mü ka-mü *nzila!

Ah le de nguwa wü kpara füh kotö ne 'buru di egbo nga iri mü!

Angü wü kpara füh kotö ne 'buru wu eyi, gü ba,

wü ngü ka-mü te mü ngbü emere ne, ah 'buru de züka wü ngü!"

Dela ci te wü kpara ka Yesu, te ewü fa wazi siti nü la, ngbü ebi.

⁵ Fü ra ayia awu *Mere Kambü ka Me agbü kpä kpala, te ü te-ye, ngbü baaba. Fü ra aceka wü e kpa guvu kambü la 'buru.*

⁶ Fü wü malayika ka Me de lorozi, te ewü ena ato adu kuru te wü kpara füh kotö ne, ayia kpa esambü ka Me kpala, akoro kpa etanü. Wüh to züka bu bongo eküte wü. Wüh gi ku bongo, te ngbü eci aci baka *diki-se la, kolo tü wü di. ⁷ Fü gara malayika biri, esüka wü angbe cögbörö wü malayika ka Me de bala la, ayia aza wü ndü'ba lorozi, te wüh reke gbü dikise, de wü e gbü ewü, ato fü wü malayika de lorozi la biri biri 'buru. Wü e de gbü wü ndü'ba la, ah de wü kuru te Me ena ato te siti wü kpara füh kotö, te ewü le ngü kaka de ne. ⁸ Fü nguwa ayia agba sü gbü Mere Kambü ka Me la, 'duwa 'dii! teka wazi ka Me. Fü cürü ayia ari te wü kpara teka ngü ka nguwa la. Tekä ngü la, wüh ti ari kpa esambü ka Me la tîne de, zalü te Me to kuru te siti wü kpara la, nza eyi la.

16

¹ Fütanga ngü la, fü ra ayia aje ri Me, te ngbü ewü kpa esambü la, da emala ngü fü wü *malayika de lorozi ne, gü ba, "Títine, ah le de wü yia, wü za wü ndü'ba ka-wü eza, teka fü wü anü atökö siti wü e, de gbü

ndü'ba ka-wü la, gbü nzö wü kpara füh kotö de kpala. Angü maguma ni, Me nzu eyi eküte ewü, teka te wüh le ngü kani de!"

² Tekä ngü la, fü gina malayika ayia anü, atökö siti e de gbü nda-ye ndü'ba la, füh kotö akine. Fü wü e la angbü eto wü ka eküte wü kpara, co'do co'do bala. Kükürü de, angü wüh le ngü ka siti nü te koro gbü ngu la eyi, da eba iiri eraku wü ne.

³ Fü e'ba'basu malayika la ayia anü, atökö siti e de gbü nda-ye ndü'ba la gbü mere *yi-ngu. Fü jia ngu la afü te-ye, akoro baka ngüte kövö, bibiri bala. Fü wü si, de wü gara e, te ewü ngbü gbü yi-ngu la, ayia akpi anza le le le 'buru!

⁴ Fütanganga, fü e'babata malayika ayia anü atökö siti e de gbü nda-ye ndü'ba la, gbü wü jürü ngu, de wü ze füh kotö ne 'buru. Fü wü ngila ngu de füh kotö ne afü te-wü 'buru, akoro baka ngüte. ⁵ Fü malayika de te ngbü eceka kpi sidi nga wü ngu ne, amala ngü, gü ba, "Wayi bala, Mere Me, ma ngbü egbo nga iri mü!

Ta gügü, mü ka-mü kü ladü.

Enatikine, mü fi ladü.

Ngü ka-mü ena angbü bala fi mere badi.

Mere Me, ma ngbü egbo nga iri mü!

Angü ngü ka-mü ka-ye *nzila!

Mü de züka Miri!

Mü ngbü ekolo ngü ka wü kpara, ereke me-mü!

Kuru de te mü to te wü kpara ne,

ah ti eyi te nga ngü ka-ewü la kpini!

⁶ Angü wüh ngbü ta emömörö wü kpara ka-mü, de wü *mürü dofo ka-mü. Wüh tökö ngüte wü kpara ka-mü ta eyi fa sü, baka ngu agö! Te di bala, enatikine mü ngbü fü wü züka ngu ta ngila, te wüh ngbü enzö ne, koro di eyi 'buru ngüte tete. Gara züka ngu, te wüh ena adu anzö ne, nda tîne ma! Wayi! Ngü la mere te-ye fü ewü bala kü 'be! Angü wüh giri me-wü!"

⁷ Fütanga ngü la, fü ra ayia aje ri gara kpara, te ngbü ewü gbü *cangali, de te di engagira Me ne, gü ba,

"Wayi bala, Mere Me, ma ngbü egbo nga iri mü!

Angü mü de mere mürü wazi!

Mü ka-mü de züka miri!

Mü ngbü ekolo ngü ka wü kpara füh kotö ne

'buru ereke areke!

Wü ngü 'buru de te mü ngbü emere ne, wüh reke fa sü!"

⁸ Fütanga ngü la, fü e'babala malayika ayia anü atökö siti e de gbü nda-ye ndü'ba la, gbü jia ra agbü kpä. Fü e la ato wazi fü

* 15:5 15:5 Wü e la ngbü gbü e'ba'basu guvu Kambü ka Me de to kpa gbügü ne.

ra. Fū ra la akpo angbü ecucuru wü kpara tīne baka wā la. ⁹ Teka ngü ka wazi ra la, fū kūte wü kpara angbü ecuru, da ekeke efa sū. Fū ewü akpo angbü esoko Me, da esiti iiri, teka kuru de te engu to te ewü ne. Amba wüh le afü maguma wü, ace *siti ngü ka-wü, adu angbü ecu ngü Me, teka mere wazi kaka la, nda-wü de.

¹⁰ Fütanga ngü la, fū e'bu'buruve malayika ayia anü kpah, atökö siti e de gbü nda-ye ndü'ba ne, mbiii te sū, de te siti nü, de di ye nzükpa la, ngbü tete. Fū sū la atī 'duwa mbirri! Kpara tī aceka kpi tīne de, ka mbiri sū la. Fū wü kpara, ta te ewü di gbü sū la, angbü 'buru de mere keke, da enyüma gbü te wü, teka keke la. ¹¹ Fū ewü angbü esoko Mere Me agbü kpi ne, da esiti iiri, teka ngü ka keke, de wü ka de eküte ewü ne. Amba gbü ngü la, wüh le afü maguma wü, ace siti ngü ka-wü kpah de. Wüh lala ka-wü fi bü gbü siti ngü ka-wü la.

¹² Fütanga ngü la, fū gara malayika ayia kpah, anü atökö siti e de gbü nda-ye ndü'ba la, gbü mere ngu de iri ye Efürata ne. Bü baka ngü ne, cakara! mere ngu ne nzürü nza eyi! Ngü la mere te-ye bala kükürü de, angü Me wu eyi, gü ba, wü miri ka nguwa wü kpara, to kpa fügö ne, ngbü eyi ereke te-wü, teka akoro agü gü de wü kpara ka-ni. Me mere ngü la bala, teka de wü miri la kö ngu la gbü kagara sū, de wüh koro kere, teka fū ni anza ngü ka-ewü tete.

¹³ Fütanga ngü la, fū ra ayia awu *siti wü di engā me bata. Wüh ngbü gegege baka wü arombo la. Ggina koro gömö mere siti kpürü. E'ba'basu koro nda-ye gömö gina nü, te koro gbü ngu. Fū eabata la akoro nda-ye gömö e'ba'basu nü, te koro gbü tö, ta te fiti wü kpara ne. ¹⁴ Fū siti wü di engā me de bata la ayia anü kpaka wü miri, de te ewü ngbü gbü nzö wü kpara füh kotö ne, amala ngü fū ewü, de wüh reke te-wü areke, teka anü agü gü de wü kpara ka Me. Fū wü di engā me la angbü ememere wü lara ngü ka talara, teka afiti wü miri la di. Fū ngü la aga gbü jia wü miri la afa sū. Fū ewü akpo da ereke te-wü, teka anü agü gü de wü kpara ka Me, gbü *adu sīkpī, te Me ena ato kuru te siti wü kpara tete.

¹⁵ Wayi, wü di engā wūna, dene ngü te Miri Yesu mala fū nih, wü kpara ka-ye. Ah gü ba, "Wü di engā ra, yi rü kpekpeke! Angü ma ngbü eyi nzo, teka adu kpa füh kotö. Ma ena adu akoro, agüka wü kpara baka mürü zi, te ngbü egüka kpara gbü bitī. Yi ceka te-yi 'be! Yi mere e ara ra de! Yi to wü bongo ka-yi, ngbü di 'buru nzo,

teka fū yi angbü de tadu gbü sīkpī la. Angü te ma du maka yi ngirümü la, ah ena adi esiti! Lümü ena amere yi afa sū."

¹⁶ Fū siti wü di engā me de bata la ayia abiti wü miri füh kotö ne 'buru, agbü sū de te wüh ngbü eī, gü ba, "Amagedona"* ne, akpo da ereke te-wü tīne teka amere gü kpaka Me.

¹⁷ Fütanga ngü la, fū adu malayika la ayia akoro, atökö siti e de gbü nda-ye ndü'ba la gbü wege. Fū ri Me ayia awü gbü mere kpökpö ka-ye, de gbü Mere Kambü ne, gü ba, "Wayi, ngü engu na nza tīne eyi dela!" ¹⁸ Fū ülele angbü eü, da eci tīne bü faaa! Fū müghara angbü esüsürü. Fū yiki-tö akpo kpah angbü eyiki sū tīne 'duwa ba-neh-ene-la! Yiki-tö la fa wü gara yiki-tö, ta te ewü ngbü emere te-wü te engā gina ne, 'buru ka. Kū baka te Me reke kotö ne, yiki-tö te mere te-ye bala nda la kü ma! ¹⁹ Te yiki-tö la ngbü emere te-ye tete, fū mere köti de iri ye *Babilona ne akuru, aye süka ye bata. Fū wü kambü de gbü wü sū la amümürü 'buru, atī kötö. Me to kuru la gbü mere köti ka Babilona la me-ye, angü mamagama nzu eyi eküte wü kpara de gbü sū la, teka siti ngü ka-ewü, de te wüh ngbü emere ne. Ngü la ngbü memere te-ye kpah bala, gbü wü gara mere köti füh kotö ne 'buru. ²⁰ Fū cögbörö wü da amümürü kpah 'buru, atiti kötö. ²¹ Fū wü cögbörö timiri, te gegere baka wü kombo ka jia ndo la, akpo angbü etiti gbü nzö wü kpara 'bi 'bi 'bi. Fū wü kpara angbü esoko Me, da esiti iiri, teka ngü ka wü timiri la, teka wü cinga, de te ngbü emere ewü ne.

Dela wü ngü ta te mere te-wü, o wü malayika de lorozi la ngbü tötökö wü siti e, de gbü wü ndü'ba ka-wü tete, füh kotö ne. Angü Me to mere kuru la me-ye te wü kpara, de te ewü le ngü kaka de ne.

17

Dene mani teka mere köti Babilona,

te di baka siti würüse

¹ Fütanga ngü la, fū gara *malayika esüka wü malayika de lorozi, de wü ndü'ba esaka wü, ta te ewü to kuru te wü kpara füh kotö ne, ayia akoro amala ngü fere, gü ba, "Ma koro la akine, fū ni asere gara ngü fere. Ah de ngü ka mere köti, de iri ye *Babilona, te miri kaka-na ngbü gbü nzö mere bi nguwa wü kpara füh kotö ne. Me ena amürü mere köti la 'buru, gbaka gbaka! ato mere kuru te wü kpara de gbügbü na la. Kükürü de, angü wü kpara la ngbü eyi efiti mere bi

* 16:16 16:16 İri de Amagedona la, wüh gü gbü ngü Ebere.

wü bu wü, cu baka siti würüse, müri waza, te ngbü efiti wü komoko. ² Wü kpara ka Babilona la ngbü fiti wü kpara füh kotö ne eyi 'buru, de wü miri ka-wü mini, teka de wüh ce ngü ka Me asidi. Wüh ngbü mere ngü la baka siti würüse, te ngbü efiti wü komoko de fi ka-ye, teka fü ni adi emere waza de ewü."

³ Fütanga ngü la, fü malayika la aza ra gbü wazi ka *Nzila Wazi Me, anü di agbü gü. Fü malayika la ayia asere gara ngü fere gbü roto. Fü ra awu Babilona, te di baka siti würüse la, te li ngbü gaa, füh siti nü bane. Küte nü la didiki, de wü nzö ye lorozi, wü didi nzükpa. Wüh ngbü ba bi wü iri eküte nü la, teka de wü kpara di ecu ngüngü baka Me la. ⁴ Amba würüse la to züka diki bongo, te su fa sü. Fü ah ato bi wü lara e, te wüh reke gbü *diki-se eküte ye, baka wü 'biri, de wü tungü, de wü gara e. Fü wü e la angbü ecici tîne gbele gbele gbele bala. Fü würüse la aza wü'ba, te wüh reke gbü diki-se, esaka ye. Ndü'ba la, ah de mere bi wü *siti ngü ka lümü gbü ye. ⁵ Fü ewü aba ngü eraku würüse la, gü ba, "Dene mere kóti Babilona." Wüh ba ngü la gbü mani, angü Babilona baka siti würüse te ngbü efiti wü komoko. Angü miri ka Babilona la ngbü effiti wü kpara, teka de wüh di emere gele ka wü di enga me. ⁶ Würüse la mömörö bi wü *kpara ka Yesu, teka te wüh lala fi bü gbü ngü ka Yesu ne. Ah du ngbü enzö ngüte ewü tîne, baka kpara te ngbü enzö fi la. Fü ngüte wü kpara la angbü eküya engu tîne 'duwa ba-neh-ene-la. Dela ngü te würüse la ngbü mere.

Te ma wu ngü ka würüse la bala, fü ngü la asiti te ra 'duwa ba-neh-ene-la. ⁷ Fü malayika la ayia amala ngü fere, gü ba, "Ngü la ngbü esiti te ra, bala? Ah mbi. Ni ena asere si-ngü teka würüse la fere, kpah bete si-ngü ka siti nü de nzö ye lorozi, abe te wü didi na nzükpa ne. ⁸ Dene eyi si-ngü ka siti nü, te würüse la li ngbü fefeh na ne. Te enga gina, siti nü la ta baka miri füh kotö ne. Fü ah adu akpi. Te gara, engu ena adu azükü agbü mere du la, akoro, anü de wü ngü ka-ye la kpa engagira nü. Amba ah ti ayiri tîne piri de. Kükürü de, angü Me ena anza ngü kaka le le le! Amba wü kpara te ewü le ngü ka Me de, te wüh ba iri ewü gbü buku ka *Küküwa kpah de ne, ngü ka siti nü la ena areke te-wü afa sü, teka te nü la zükü eyi gbü kpi ne.

⁹ Te di bala, ah le de mü fi nga ngü ka siti nü la mbi mbi mbi, teka fü mü awu si-ngü gbügbü. Ngü ka nü de wü nzö ye lorozi la ngbü esere ngü ka wü nzö rüvü lorozi, de te wüh ji mere kóti la fefeh na ne. ¹⁰ Ah ngbü kpah esere ngü ka wü miri lorozi ka wü nzö rüvü la. Amba ngü ka

mene wü miri de 'buruve ne nza eyi. Gara miri biringbö la fi bü ladü, zalü akoro enatikine dene. Du gara na biringbö la ena akoro angbü miri te gara. Amba miri kaka-na la ti ayiri de, angü ngü kaka ena anza kere. ¹¹ Amba teka ngü ka nü la, engu ta kpah de gara miri, baka wü miri de lorozi la. Te gara engu ena adu angbü kpah miri, amba Me ena adu anza ngü kaka 'buru 'buru asidi.

¹² Amba teka ngü ka wü di nzükpa, te di te wü nzönzö lorozi la, ngü ka-ewü kpah bala. Ah ngbü kpah esere ngü ka wü miri. Angü te gara, nü la ena ato wazi ye fü wü miri la, fü ewü angbü esa riri kaka. Amba ngü ka-ewü ti ayiri nda de. ¹³ Wü miri de nzükpa la, fingangü ka-ewü ena adi 'buru biringbö. Siti nü la ena angbü eto riri fü ewü me-ye. Fü ewü angbü emere tima, de te nü la ena angbü eto. Fü ewü adi eje 'duwa riri kaka. ¹⁴ Wüh ena abiti te-wü, amere gü de wü *Kambiliki ka Me. Fü Kambiliki ka Me la afa ewü, amömörö ewü 'buru, angü wawazi na fa sü. Angü Kambiliki ka Me la me-ye de Mere Miri gbü nzö wü miri 'buru. Wü kpara kaka ena angbü elala fi bü gbü nganga, angü ah fe ewü ta eyi gügü."

¹⁵ Fütanga ngü la, fü malayika la adu amala kpah gara ngü fere, gü ba, "Dera deyü, mere bi wü ngu, de te würüse la ngbü ede ewü ne, ah ngbü esere ngü ka mere bi nguwa wü kpara füh kotö ne, de te miri ka Babilona la ngbü miri gbü nzö ewü ne. ¹⁶⁻¹⁷ Amba te gara, Me ena ato fingangü fü siti nü la, de wü miri ka-ye, teka de wüh kpü würüse la. Fü ewü abiti te-wü 'buru de maguma wü biringbö, teka asiti ngü ka würüse la. Fü ewü agbene wü e kaka, de wü bongo kaka, ace engu ngümiri. Wüh ena amörö engu de wü kpara ka-ye, fü ewü azüfa so ewü 'buru. Fü ewü ayia acucuru wü biki ewü la, de wü kambü ka-ewü 'buru. Ngü la ena amere te-ye bala, fü ah ati kpini de ngü, te Me reke.

¹⁸ Si-ngü ka würüse la ngbü esere ngü ka mere siti kóti, de te miri kaka ngbü engbü gbü nzö wü kpara 'buru, de füh kotö ne."

18

Dene kuru te Me ena ato te wü kpara ka Babilona

¹ Fütanga ngü la, fü ra ayia awu gara *malayika te yia agbü kpi, ekö enü kpa füh kotö kpakine. Wazi malayika la fa sü. Fü sü angbü eci, da elofö kpa füh kotö kpakine 'buru, teka wazi malayika la. ² Fü malayika la amala ngü de mere ri ye kpa tikpi, gü ba, "Wayi! Sikpi engu na ne koro eyi dene! Me ena ato

kuru enatikine gbü mere köti, *Babilona ne! Wü kambü de gbügbü na la, wüh ena amümürü 'buru 'buru asidi! Wü kpara ti adu angbü gbügbü na tîne de de de! Angü sü la koro tîne eyi sü ka wü siti wü lu ka sirimbi, de wü *siti wü di enga me. ³ Me to kuru te wü kpara ka Babilona la kükürü de, angü wüh ngbü ta fifiti wü miri füh kotö ne 'buru, de wü kpara ka-wü mini, baka siti würüse, de te ngbü efiti wü komoko de mani ka-ye, teka de ni mere waza de ewü. Wü kpara 'buru, te ewü ngbü ecinzi wü e füh kotö ne, wüh maka mere bi jase eyi, teka ngü ka wü kpara ka Babilona la. Angü gümü wü e fa te wü kpara ka Babilona la sü, baka würüse mürü küla."

⁴ Fütanga ngü la, fū ra aje ri Me, te wü koro agbü kpī, gü ba, "De-wü, wü kpara ka-ni, wü yia sela eyia, wü koro esüka siti wü kpara la asidi! Wü mere e angbü gbü Babilona sela tîne de! Wü mere e amere *siti ngü baka wü kpara ka Babilona ne nda-wü de, angü ni ena ato kphah mere kuru te wü, baka nda wü kpara ka Babilona la. ⁵ Angü siti ngü ka wü kpara ka Babilona la sibi eyi fa sü. Tekä ngü la, de-ni Me, ni ena ato kuru te ewü enatikine!

⁶ Te di bala, wüh ena ato mere kuru te wü kpara ka Babilona la ato! Angü wü kpara ka Babilona la ngbü to mere cinga te wü kpara ka-ni, Me, eyi fa sü. Tekä ngü la, kuru te wüh ena ato te wü kpara ka Babilona la, ena afa engu, de te ewü to te wü kpara ka-ni ne, du 'basu. ⁷ Angü wü kpara ka Babilona la ngbü e'du ngü wü efa sü. Wüh ngbü egbo nga wü, gü ba, 'Ani de kpeke wü kpara, köti ka-ani memere. Wazi ani fa nda gara wü kpara 'buru. Ani ngbü de mere tadu, angü ani maka mere bi wü züka ngü eyi.' Fingangü ka-ewü gü ba, 'Cinga ti amere ani tîne de!' Tekä ngü la, tadu ka-ewü la ena afü te-ye, akoro fū ewü cinga tete.

⁸ Te di bala, wüh ena amaka mere cinga enatikine! De-ni, Me, ni ena ato wü keke, tala, de wü gara cinga 'buru eküte ewü enatikine! Ni ena acuru ewü, bete mere köti ka-ewü la, 'buru de wa. Angü wazi ni, Me, fa sü, fa nda wü kpara füh kotö ne 'buru. Ni kolo ngü ka-ewü eyi!" Dela ngü te Me mala teka kuru, te engu ena ato te wü kpara ka Babilona.

⁹ Wü miri füh kotö ne, te ewü ngbü ta eje riri ka wü kpara ka Babilona, da emere siti ngü baka nda-ewü ne, wüh ena awu mere cinga, de te ena amere te-ye gbü mere köti ka Babilona ne. Fū ewü angbü eku gba teka ngü ka mere köti la, te ngbü ecuru, de nguwa ye 'diii ne! ¹⁰ Wüh ena awu cinga te Me to te wü kpara ka

Babilona la, fū ewü angbü ngbü de cürü. Wüh ena akpe anü arü ngengere, da eku gba, gü ba, "Wuuwu! Wuuwu! De bane ne ngü ne ya! Ngü ka Babilona nza bü eyi dene fanü? Apa! Ceka la, mere siti köti ne curu nza bü eyi, baka kükürü ngü dene baaö!"

¹¹ Te di bala ne, wü kpara de te ewü ngbü ecinzi wü e ne, wüh ena angbü kphah de mere cinga te ewü, afa sü. Kükürü de, angü kpara te ena adu ase wü e ka-ewü la ena adi nda tîne ma! ¹² Wü kpara la, wüh de mere bi wü e esaka wü, wü 'biri, wü tüngü de wü kengbe, te wüh reke gbü *diki-se. Amba kpara te ena ase wü e ka-ewü la nda tîne eyi ma. Wü züka bongo, te ewü su fa sü, wü buubu, wü bibiri, de wü nzenze na, de mere bi wü te ya, de wü cangali, de wü kpökpö, abe te wü züka wü gara e, de te wüh ngbü ereke gbü züka wü rü, wü gara gbü wü se, wüh ladü esaka ewü. Züka wü teme, te wüh eji kambü di, kphah ladü esaka ewü. Amba wü kpara, te ewü ena adu ase wü e la, nda tîne ma. ¹³ Wü gara e la, kphah baka *züka se-mü, de wü gara *rü de te wüh ngbü ecuru de züka se ye, bete züka e de te ngbü ereke se wuru, de wü fi, wü e-mazü, baka wü zu, de wü mü, wü yiti de wü kambiliki, kphah ladü, amba kpara te ena ase wü e la nda tîne ma. Kphah bala, wü gara e baka wü dongi, wü arabiya, de wü labi te wüh ngbü ecinzi, kphah ladü. Amba kpara te ena ase wü e la kphah 'buru ma.

¹⁴⁻¹⁶ Wü kpara ta te ewü ngbü ecinzi mere bi lara wü e ka-wü de bala ne, ngbü ta emaka mere bi jase agbü Babilona, angü wü kpara ka Babilona ngbü ta esese wü e ka-ewü la 'buru me-wü. Amba titine, wü kpara te ewü ngbü ecinzi wü e la, wüh kpe rü eyi 'buru nengete, da eceka cinga te Me ngbü eto gbü mere köti la. Fū ewü angbü de mere cürü, da eku gba de mere ngura, enda'ba te-wü, gü ba, "Wuuwu! Wuuwu! Ani ena amere baye? Ngü ka Babilona nza bü eyi dene fanü? Wü kpara la ta de mere bi wü e esaka wü. Wüh ngbü ta eto züka wü bongo, wü 'biri de wü tüngü, wü kengbe te ngbü eci aci! Züka wü e ta te ewü ngbü emamaka ne, tîne eyi ma! ¹⁷ Züka wü e ka-ewü la nza bü eyi enatikine, baka kükürü ngü dene baaö!"

Fū wü kpara ta te ewü ngbü ebi wü e gbü *zabu, gbü wü gara nga nzö sü nengete nengete, enü di agbü Babilona, teka acinzi ne, angbü kphah 'buru de mere cinga, angü wüh ce te-wü, rü kphah nengete, da eceka ngü la. ¹⁸ Wüh wu nguwa wa, de te ngbü ecuru köti ka Babilona ne, bü nengete. Fū ewü angbü eku gba, gü ba, "Apa! Mere siti köti, te

ga fa gara wü mere köti füh kotö ne 'buru ne, ah nza bü eyi baka kükürü ngü dene na?"¹⁹ Fü ewü angbü de mere cinga, da ebu mbï gbü nzö wü, eku gba de ngura, gü ba, "Wuuwu! Wuuwu! Ani ena amere dene tine baye? Angü ani ngbü ta emaka mere bi jiasa ka-ani 'buru gbü Babilona ne! Apa! Ngü ka Babilona nza ka-ye bü eyi, baka kükürü ngü dene baaö!"

Dela ngü te ena amere wü kpara ka Babilona te gara.

²⁰ Amba de-yi, wü kpara agbü kpï, yi ngbü de mere tadu! De-yi, wü *kpara ka Yesu, de wü *mürü tima kaka, abe te wü *mürü dofo ka Me, yi ngbü 'buru de mere tadu te yi! Kükürü de, angü Me kolo ngü ka wü kpara ka Babilona eyi! Ah ena afü cinga, ta te ewü ngbü eto te yi ne, alügü gbü nzö ewü!

²¹ Fütanga ngü la, fü ra ayia awu gara mere kpeke *malayika ka Me, te za mere da esaka ye, baka wö la. Fü ah ayia agü angbü mere yi-ngu, de giri ye 'baamu! Fü ah amala ngü, gü ba, "Me ena anza ngü ka Babilona baka wö, te ni za gü gbü yi-ngu la. Angü kpara biringbö, te ena adu angbü gbü köti la nda tine ma!"²² Wüh ti adu abï ci, anga alo bi, gbü köti la tine de. Kpara te ena adu amere tima kpala, tine kphah ma. Giri wö, te wüh eyö e di kpala, tine kphah ma. Wüh ti akpülü kümü kpala, tine kphah de.²³ Wüh ti adu asiya wa gbü köti la tine de. Wü komoko ake würüse, te ena adu aza te-wü gbü sü la, kphah ma. Wü kpara ka Babilona, ta te ewü ngbü ecinzi wü e ka-wü ne, wüh ta de mere bi jiasa esaka wü, fa nda wü gara kpara füh kotö ne 'buru. Angü wü kpara ka Babilona la ngbü ta efiti mere bi nguwa wü kpara füh kotö ne 'buru, de siti wü rü, de wü kuwa ka-wü."

²⁴ Dela si-ngü te Me to mere siti kuru di, te wü kpara ka Babilona ne, angü wüh ngbü ta mömörö mere bi wü kpara ka Me, kphah de wü mürü dofo ka Me. Ngüte wü kpara la tökö eyi fa sü, gbü mere köti ka Babilona la, baka ngu agö!

19

Dene ngü ka mere bi wü kpara ka Me agbü kpï

¹ Fütanga ngü la, fü ra aje ri mere bi wü kpara agbü kpï, te ewü ngbü egbo nga iri Me, de wü koko, de wü karayi, da ebï ci, gü ba,

"Nih gbo nga iri Me!

Angü Me de kpara te küwa wü kpara ka-ye me-ye!

Nih gbo nga iri Me!

Angü engu me-ye de mere mürü wazi!

² Nih gbo nga iri Me!

Angü engu de züka miri,

te wu da eye süka ngü ereke areke!

Nih gbo nga iri Me!

Angü Me to kuru te wü kpara ka *Babilona la, ti eyi kpini!

Me to kuru la te ewü, teka wu ka-ewü, de te ewü ngbü efifiti wü kpara füh kotö ne,

de wüh ce ngü ka Me asidi ne.

Me to kuru te wü kpara ka Babilona la, Angü wüh mömörö mere bi wü kpara kaka-na eyi!

Nih gbo nga iri Me!

Angü Me to kuru eyi te ewü, teka ngü la!

Ah to kuru la te ewü bala kü 'be!"

³ Fü ewü adu kphah abï gara ci de mere ri wü, gü ba,

"Nih gbo nga iri Me!

Angü ah curu mere köti ka Babilona la eyi! Wü kpara te ena adu angbü kpala nda tine ma!"

⁴ Te di bala, fü wü mere *kovo teke biri de füh ye bala la, bete wü angbe cögbörö *malayika de bala, te ewü ngbü engbü ede kpökpö ka Me ne, fü ewü aci 'buru, atü kötö eri lö Me, teka acu ngüngü na, da ebï ci, gü ba,

"Wayi, ah di bala!

Nih gbo nga iri Me!"

⁵ Fütanga ngü la, fü ra aje ri kpara, te wü koro gbü kpökpö ka Me, gü ba,

"De-yi, wü kpara ka Me 'buru,

de te yi le ngü kaka ne,

yi gbo nga iri na!

De-yi, wü kpara 'buru,

de te yi ngbü emere ngü ka Me ne,

yi gbo nga iri Me!"

⁶ Fütanga ngü, de te ri kpara la wü tete ne, fü ra aje ri mere bi wü kpara, te ngbü ewü, da engo baka mügbara, kphah baka giri mere vuru ka ngu, te ngbü etökö la. Wü kpara la ngbü ebï ci, gü ba,

"Nih gbo nga iri Me!

Angü engu de Mere Miri ka-nih!

Nih gbo nga iri Me!

Angü engu de mere mürü wazi!

Nih gbo nga iri Me!

Angü engu de miri, te ngbü gbü nzö wü kpara 'buru me-ye!

Wayi bala, nih gbo nga iri Me!

⁷ Enatikine, ah le de nih ngbü 'buru de mere tadu!

Angü mere sikpi koro eyi!

*Kambiliki ka Me ngbü eyi ereke te-ye, teka aza wara ye.

Wara ka la ngbü kphah eyi ereke te-ye, teka za-te ka-wü!

Wüh ngbü eyi ereke mere karama enatikine!

Nih ngbü de mere tadu, da egbo nga iri Me!"

⁸ Wara Kambiliki ka Me la, ah de wü *kpara ka Yesu, te ewü to maguma wü eyi fū Yesu ne. Me to zūka bongo eyi fū ewü, te vi avi kpilili bala. Fū ewü ato eküte wü, teka zūka tima ka-wü, ta te ewü ngbü emere, ereke areke gbü jia Me ne.

⁹ Fütanga ngü la, fū malayika la amala ngü fere, gü ba, "De-ra deyi, ah le de ma ba wü ngü ne aba fū wü kpara ka Yesu, gü ba, 'Karama de te wüh ngbü ereke teka za-te ka Kambiliki ka Me ake wara ye ne, ah ena adi de mere zūka ngü gbü sikipi engu la. Ah le de wü kpara 'buru reke te-wü, ngbü nzo, teka te Me ena ai ewü, akoro di gbü karama la, fū ewü angbü de mere tadu.' " Fū malayika la adu kpah amala ngü fere, gü ba, "Dela zu *ngari Me fanü fanü."

¹⁰ Fū ngü la aga gbü jia ra afa sü. Fū ra atü kötö erī lö malayika la, teka acu ngüngü. Fū malayika la ayia amala ngü fere kpekpeke, gü ba, "Ma mere e acu ngü ni de! Angü ni de Me nda-ni de! Ni kpah bü de kpara, te ngbü emere tima ka Me, baka ra, kpah baka wü *mürü dofo ka Me, de wü gara kpara, te ewü ngbü elala gbü ngü ka Yesu, zalü koro di gbü kpi ka-wü ne. Ah le de ma cu 'duwa ngü Me kpikpi ye! Ma mere e acu ngü gara kpara de!"

Dene ngü ka mere wazi ka Miri Yesu, te fa wü vügu 'buru

¹¹ Fütanga ngü la, fū ra ayia afü jia ra, awu kpi te ü te-ye, ngbü baaba. Fū ra awu Miri Yesu, te ngbü ekoro agbü kpi. Ah li ngbü gaa füh nü ka-ye, de küte ye ngbe'de, te ngbü enü agü gü di. Engu de kpeke kpara, te mere tima ka Me reke areke. Ah kpah de zūka miri, te wu da eye süka ngü ka wü kpara mbi mbi mbi. Fū ah angbü eto kuru te mene wü kpara, de te ewü le ngü kaka de ne. ¹² Jijia na ngbü eci baka ra la. Ah to *madudu gbü nzö ye, te ngbü esere, gü ba, wawazi na fa nda wü gara miri 'buru. Me ba gara iiri eyi eraku. İri la, gara kpara biringbö bane te ena awu da etanga nda ma. Engu wu e ka-ye 'duwa me-ye. ¹³ Bongo kaka kü'da de ngüte wü vügu kaka, ngbü tine bü ca'birī bala. Wüh gü kpah gara iri tete na, gü ba, Ri Me. ¹⁴ Mere bi wü marajümiya ka Me ngbü da efa nganga. Wüh li 'buru ngbü gaa füh wü nü, de küte wü kpah ngbe'de bala. Wüh to 'buru zūka bu bongo eküte wü. ¹⁵ Fū mere maguruma, te dere fa sü, angbü ekoro gömö Miri Yesu. Ah ena aza maguruma ka-ye la, amömörö siti wü miri gbü nguwa wü kpara füh kotö ne di. Ah ena ato mere kuru te ewü. Fū ah adoto ewü esatilo ye, angü wüh le ngü ka Me de. Maguma Me nzu eküte ewü eyi teka ngü la. ¹⁶ Wüh ba gara ngü eküte bongo

kaka, gü ba, "Dene Miri te wawazi fa nda wü gara miri füh kotö ne 'buru."

¹⁷ Fütanga ngü la, fū ra ayia awu gara *malayika ka Me, te koro ngü ngen-gere kpa tikpi, da emala ngü de mere ri ye fū wü lu 'buru, gü ba, "De-wü deyi, wü koro ekoro 'buru akine! Angü Me reke mere karama eyi tüngü wü! Wü ena azü mere bi so enatikine, asika di! ¹⁸ Wü koro ekoro, de wü zü kö wü miri, de wü kpeke wü kpara, kö wü marajümiya, de wü mere kpara ka-wü, kö wü nü, de wü kpara, te ewü ngbü eli füh ewü la, kpah de kö wü gara kpara 'buru. Wü koro ekoro kere, de wü zü, de wü sika di!"

¹⁹ Fütanga ngü la, fū ra ayia awu gina siti nü, ta te koro gbü ngu ne, abe te wü miri gbü nguwa wü kpara de füh kotö ne 'buru, de wü marajümiya ka-wü, te ewü biti te-wü, teka agü gü kpaka Miri Yesu, de wü kpara ka-ye. ²⁰ Fū mere siti gü akpo amere te-ye esüka wü Yesu de wü vügu ka-ye la. Fū wü marajümiya ka Yesu azoro siti nü la, bete e'ba'basu nü, ta te koro gbü tö, da efiti wü kpara de wü lara ngü ka-ye, gü ba, "Wü di eje riri ka gina nü ne." Fū ewü agü wü nü la 'basu mini agbü mere du ka wa, te mbe ngbü ngböö ne! ²¹ Fū Yesu aza bü maguruma de gömö ye la, amömörö wü vügu ka-ye la di, 'buru 'buru! Fū sü anga, angbü 'duwa ngbihi! Fū wü lu akoro azüzüfa kö ewü 'buru asika di, angbü tine bü ngu ngu ngu bala!

20

Dene ngü ka kuru te Me ena ato te Satana

¹ Fütanga ngü la, fū ra awu gara *malayika ka Me, te koro agbü kpi, ngbü ekö enü kpa füh kotö akine, de mere nyari esaka ye, bete mafüta ka mere siti du. ²⁻³ Fū malayika la akoro bü 'duwa, azoro mere siti kpürü de iri ye *Satana, de te ngbü fi bü da efiti wü kpara füh kotö ne. Fū malayika la ai Satana de mere nyari la, gö gö gö! agü agbü mere du, ani mö nganga, gbuuu! atümü 'duwa atümü de mafüta. Ah tümü Satana, ce o kpala, teka wü re kutu biri (1,000), angü ah ena adu afiti wü kpara. Fütanga wü re kutu biri la. Me ena adu afuru Satana, teka sikipi mba cükü'daye.

⁴ Fütanga ngü te wüh i Satana, gü tete gbü mere du ne, fū ra awu wü *kpara ka Yesu, ta te wüh mörö ewü, teka ngü ka Me ne, angü wü kpara la rü ta kpekpeke gbü ngü ka Yesu. Wüh le ta aje riri ka siti nü te koro gbü ngu ne, da ecu ngüngü na nda-wü de. Wüh le kpah aba iri siti nü la eraku wü, anga eküte kpa wü, nda-wü kpah de. Dela si-ngü ta te wüh wete wü kpara la,

mörö tete ne. Teka ngü la, fū Me adu azükü ewü gbü kpi la, ato wazi fū ewü, de wüh ngbü baka wü miri ede Yesu, adi ekolo ngü ka wü kpara, teka mere bi wü re, kutu biri (1,000).⁵ Dene gina wü kpara, de te Me zükü ewü gbü kpi. Amba wü gara kpara de te ewü kpi ne, wüh zükü nda-wü la de, zalü te re kutu biri la ena anza feke.

⁶Te di bala, gina wü kpara, de te Me ena azükü ewü gbü kpi ne, ka-ye zu wü kpara, de te Me ngbü fe ewü, to wazi fū ewü fanü fanü ne. Wü kpara la tī adu akpi nda-wü tīne de. Me ena awo ewü baka wü kovo, te ewü ena angbü egbo nga iri Me bete Yesu *Kurisito. Fū ewü angbü wü miri, de wü Yesu Kurisito, teka wü re kutu biri (1,000).

⁷Fütanga wü re kutu biri (1,000) la, wüh ena adu ace kpa te Satana. ⁸Fū Satana ayia tīne, adu angbü endondoro te nga wü sü fūh kotö ne 'buru, da emere e fe fe fe, teka affiti nguwa wü kpara fūh kotö ne 'buru, teka de wüh di emere gü de wü *kpara ka Yesu. Satana ena abiti wü miri gbü nguwa wü kpara fūh kotö ne 'buru, abe te wü marajümiya ka-wü, de te sibi baka siki ne. Fū ewü areke te-wü, de wü Goga bete Magoga,* teka anü amere gü de wü kpara ka Me. ⁹Fū ewü anü, anü baaala, zalü akoro gbü sü de te wü kpara ka Me ngbü tete, agbü mere kötī, de te Me le fa sü ne. Fū ewü ayia afü kere wü kpara ka Me la, kerekere gbaa! teka de ani nza ngü ka ewü. Wüh te eceka bane de, Me tima wa ka-ye eyi mbele! baka ülele. Fū ah ayia acuru ewü, anza 'buti 'buti! ¹⁰Fütanga ngü la, fū wü malayika adu azoro Satana, angü ah ngbü fiti wü kpara la me-ye. Fū ewü aza engu, agü agbü du ka wa kpala, kpa gbü nga siti nü te koro gbü ngu, bete engu te koro gbü tö ne. Fū ewü angbü ezü cinga, agbü mere du ka wa la, fi mere badi. Fütanga ngü la, gara kpara te ena adu afiti wü kpara nda tīne ma.

Dene ngü te Me ena akolo ngü ka wü kpara tete, gbü adu sīkpi

¹¹Fütanga ngü la, fū ra ayia afü jia ra, awu Me te ngbü fūh mere kpökpö ka-ye, te vi ngbü 'duwa kpilili! da eci aci bala! Fū kpi ake tö akpe adürü bü bala, ma du wü ewü tīne de. ¹²⁻¹³Fū ra adu awu wü kpara, de te ewü kpi eyi ne, 'buru. Angü wü malayika ka Me ngbü bitī wü kpara la, te nga wü sü fūh kotö ne 'buru, koro de ewü engagira kpökpö ka Me. Wüh ngbü koro de gara ewü gbü wü mbükü, de wü gara ewü te wüh ti de.† Fū malayika aza wü buku, de te

wüh ngbü ba lara wü tima ka wü kpara, te nga wü ngü de te ewü ngbü memere kpikpi ye kpikpi ye ne, akoro di. Fū Me ayia akpo akolo ngü ka wü kpara 'buru, te nga tima ka-ewü biri biri 'buru. Fū malayika la ayia aza kphā gara buku, te di buku ka *Küküwa, akoro di. Mene buku la, wüh ba iri wü kpara, de te ewü ena aküwa fi mere badi, teka ngü ka Yesu ne, gbügbü. ¹⁴⁻¹⁵Teka mene wü kpara 'buru, de te iri ewü di gbü buku ka Küküwa la ma ne, wüh ngbü za ewü, gü 'buru agbü mere du ka wa. Dela tīne eyi e'ba'basu kpi. Fū ewü aza kpi ake mbükü, agü kphā agbü du ka wa kpala, fū ngü ka-ewü anza fi mere badi.

21

Dene ngü ka to mere kötī, te Me reke fū wü kpara ka-ye

¹Dene kphā gara ngü te sere te-ye fere gbü roto. Gbü roto la, fū ra awu to kpi ake to kotö, de te Me reke teka wü kpara ka-ye ne. Te di bala, gina kpi ake gina kotö ne, dürü ka-wü eyi. Mere *yi-ngu dürü kphā eyi. ²Fū ra awu to mere kötī ka Me, de iri ye Yerüsalema ne, te yia agbü kpi kpala, ekö enü kpa kötö kpakine. Ah su fa sü, baka würüse, te reke te-ye, ngbü nzo, eci nga watī ye, te ena aza ye ne.

³Gbü roto la, fū ra aje ri kpara, te wü koro gbü kpökpö ka Me, da emala ngü de mere ri ye, gü ba, "Wayi, Me koro eyi! Ah koro ngbü eyi esüka wü kpara ka-ye! Ah ena angbü de ewü gbü to kötī ne, fi mere badi. Ah ena ato kphā wazi ye fū ewü, teka fū ewü angbü züka wü kpara kaka. ⁴Me ena akö ngura gbü jia wü kpara ka-ye 'buru. Kpi ena adi tīne ma. Cinga ena adi kphā ma. Wü kpara tī aku gba tīne de. Angü Me nza wü siti ngü la eyi 'buru!"

⁵Fütanga ngü la, fū Me ayia amala ngü de mere ri ye, gü ba, "Wayi, ngü la nza eyi dela! Angü ni reke wü ngü eyi 'buru toto!" Fū Me adu amala kphā gara ngü fere, gü ba, "De-ra deyi, ma ba wü ngü la 'buru aba, de ma tima fū wü kpara ka-ni, angü ah de zu ngari ni."

⁶Fū Me adu kphā amala ngü fere, gü ba, "Ma reke wü ngü la eyi fanü! Ma kpo de ngü la ta me-ra. Ma du nza ngü ne kphā me-ra. Angü ma de gina kpara, ma kphā de adu kpara. Mene kpara te gümü ngu ngbü emere engu la, ah koro kpaka ra. Ma ena ato züka gu ngu fefe na, fū engu anzö. Ah tī ato gara e fere, na ngü la, nda de.

* **20:8** 20:8 Mü ena amaka ngü ka wü Goga ake Magoga gbü buku ka Ezekele 38-39. İri wü Goga ake Magoga la, ah de mani teka wü kpara, te ewü le ngü ka Me de ne. † **20:12-13** 20:12-13 Mene wü kpara te wüh ti de ne, ah de mene ewü te wüh kpi gbü ngu, wü gara te wü nü zü me-wü, bete mene ewü te wü cögbörö dirī tī fūh ewü.

Ngu la, ah de ngu te ena aküwa wü kpara, fi mere badi.

⁷ Wü di engä ra, ah le fü yi arü kpekpeke! Te wü vügü ngbü eto cinga te yi, teka ngü ka-ra la, ngü ma. Yi i maguma yi gö! Yi mere e akpe cürü de. Te yi mere bala la, ma ena ato züka takpa la fü yi. Nih ena adu angbü de nih ma tundu, fü yi angbü wü di ra, fi mere badi. ⁸ Amba teka mene wü kpara, de te ewü ce ngü ka-ra, teka cürü ka wü vügü ne, wüh ena amaka cinga. Ngü la ena adi kpah bala, teka mene wü kpara, de te ewü le ngü ka-ra de, de mene ewü, te ewü ngbü emere ngü ka lümü, de wü kpara de te ewü ngbü emömörö wü bu wü, wü mürü waza, de wü mürü rü, wü mürü kuwa, wü mürü benge, wü mürü dakpa, abe te wü kpara de te ewü ngbü enü kpaka ewü ne, de wü kpara de te ewü ngbü emere gele ka faranda, de wü mürü mani. Wü kpara la 'buru, wüh ena amaka mere cinga amaka, angü wüh ena aza ewü 'buru, agü agbü du ka wa, te mbe ngbü ngböö ne. Fū ewü acuru anza kpala. Dela tine eyi e'ba'basu kpi."

⁹ Fütanga ngü la, fü biri *malayika esüka wü mene de lorozi, ta te ewü to cinga te wü kpara füh kotö ne, ayia akoro kpaka ra, amala ngü fere, gü ba, "Ma koro la akine, teka fü ni asere to mere koti, de te Me reke fü wü kpara ka-ye ne. To mere koti la ngbü baka züka mada, de te *Kambiliki ka Me ena aza engu ne." ¹⁰ Te di bala, fü malayika la aza ra gbü wazi ka *Nzila Wazi Me, fü a anü ake di kpa füh mere da kpa tikpi. Fū ra awu to mere koti engu la, de iri ye Yerüsalema, te yia agbü kpi la, ekö enü kpa kotö akine. ¹¹ To Yerüsalema la su fa sü, da eci aci, teka wazi ka Me, baka ngina, te ze-nga ra. ¹² Wüh ji mere 'baranga de da, baka abe, te mo kpa etikpi, eküte to Yerüsalema la, kerekere gbaa. Wüh o wü möngiti ka 'baranga la, nzükpa de füh ye 'basu. Fū wü malayika nzükpa de füh ye 'basu angbü eci sü, te wü möngiti la biri biri 'buru. Wüh ba kpah iri nguwa wü di engä *Yisaraye le nzükpa de füh ye 'basu ne, te wü möngiti la biri biri 'buru. ¹³ Fū ewü ao wü möngiti bata to kpa fügö, bata to kpa ekati, bata to kpa edebu sü gbü kamisü, bata edebu sü gbü kokpa. ¹⁴ Wüh ji 'baranga la füh wü cögbörö teme nzükpa de füh ye 'basu. Teme biri de iri *mürü tima ka Yesu eküte ye, te nga ewü nzükpa de füh ye 'basu la 'buru.

¹⁵ Fū malayika, de te ngbü emala ngü fere ne, aza gara e esaka ye baka ndugu gara, te wüh reke gbü *diki-se. Fū ah

akpo are mamo 'baranga ka mere koti la, de wü möngiti ka-ye 'buru. ¹⁶ Mere koti la de janga ye bala. Wü fafaka bala la, wüh 'buru yoo. Fafaka na biringbö la, ah de kilometere kutu 'basu de füh ye kama 'buruve (2,500).* ¹⁷ Fū malayika la adu are 'baranga la, teka awu ngongomi. Ah re maka baka metere teke bata nzükpa de füh ye bala (74). Malayika la ngbü re 'baranga la cu baka kpara, te ngbü emere tima füh kotö sene.

¹⁸ Wüh fa 'baranga la de wü teme te ngbü eci aci 'de 'de 'de bala. Amba kambü de te wüh ji gbü 'baranga la, wüh fa de züka diki-se, te ngbü eci aci le le le baka jia ngu la. ¹⁹ Ri 'baranga la ngbü füh züka cögbörö wü teme, te ewü su fa sü. Wüh reke gigna de gara teme, de iri ye jasipe, te ngbü eci baka ngina te ze-nga ra. E'ba'basu na, wüh reke de teme, de iri ye safira, te küküte ngbü eci baka küte cururungu ne. Wüh reke ehabata na de teme, de iri ye kalekedo, mba salisali bala. Wüh reke ehabala na de teme, de iri ye emerode, baka küte mö-nga la. ²⁰ Wüh reke gara de teme, de iri ye sadonuke, te di de wü tere te-ye, ngbe'de mbembe, ngbe'de mbembe bala. Gara na, wüh reke de teme, de iri ye sadüwane, te di didiki bala. Fū ewü areke gara de teme, de iri ye kirisolite, te di mba bibiri, baka kpa manga la. Wüh reke gara na de teme, de iri ye berile, te di bibiri, baka küte borongoo la. Wüh reke gara de teme, de iri ye topaze, te di mbembe, baka mbe ndima la. Wüh reke gara de teme, de iri ye kirizofaze, te di mba bibiri, buwa bala. Gara na, wüh reke de teme, de iri ye jakinita, te di mba bibiri baka küte tengerene la. Fū ewü areke gara na de teme, de iri ye ametisite, te diki adiki baka yi-gbere la. ²¹ Wü möngiti ka 'baranga de nzükpa de füh ye 'basu ne, ngbü 'buru eci aci, mba ngbe'de, gbooo, baka küte fe la. Wüh reke wü kaje, te ngbü enü agbü mere koti la, de züka diki-se, te ngbü eci aci, ngila ngila, baka jia ngu la.

²² Amba ma wu gara e kpala, baka *Kambü ka Me, gbü to koti, Yerüsalema ne, nda-ra de. Angü Mere Me ake Yesu, *Kambiliki ka Me ne, ka-wü ladü tundu de wü kpara kpala. Wü kpara 'buru ngbü ewu wazi ewü cu de jia wü, da ecu ngü ewü. ²³ Wazi ka Me, bete nda Yesu ngbü elofu sü gbü to Yerüsalema la 'buru me-ye. Angü ra kpala ma, biti kpah ma. ²⁴ Wazi ra-sü ka to mere koti, Yerüsalema la, ena angbü elofu sü te nga nzö wü sü füh kotö ne 'buru, teka fü nguwa wü kpara angbü eceka kpi te nga zeze na. Wü miri

* 21:16 21:16 Kilometere 2,500, ah baka miles 1,500.

ka nguwa wü kpara de füh kotö ne, ena angbü kpah ekorö de wü e ka-wü 'buru gbü mere köti la. Angü wüh ena angbü egbo duu nga iri Me ake Yesu, Kambiliki ka Me ne. ²⁵ Gbü ra anga gbü biti, wüh ni möngiti ka mere köti la nda-wü de, angü biti kpala nda tîne ma. Wü möngiti la ena angbü engbü ka-wü fi bü mböombö bala te nga wü lö-ra 'buru. ²⁶ Nguwa wü kpara füh kotö ne 'buru, ti eyi angbü ekorö, teka adi eto maguma wü fū Me, de mere tadu, agbü to mere köti, Yerüsalema la. ²⁷ Wü kpara 'buru, de te ewü ngbü engbü agbü to mere köti ka Yerüsalema ne, wüh ena angbü engbü ka-wü fi bü emere mene wü ngü, de te Me ngbü ele. Wü *siti ngü ena adi kpala 'buru 'buru ma. Ngü ka lümü, de wü ngü ka mani, ena adi kpala kpah ma. Wü kpara gbü to mere köti la ena angbü ka-wü ezükü fi mere badi. Angü Yesu Kurisito, Kambiliki ka Me ne, ba iri ewü eyi gbü buku ka-ye, ka *Küküwa.

22

¹ Fütanga ngü la, fū *malayika la ayia asere mere kpökpö, te Me ngbü fefeh na ake Yesu, *Kambiliki ka Me ne, fere. Mere ngu ngbü ekorö esa kpökpö la. Fū jia ngu la angbü ka-ye bü ngila, da eci aci le le le bala! Mene kpara te ena anzö ngu la, ah ena aküwa fi mere badi. ² Fū nga la angbü ego etü kaje ka to mere köti la. Fū wü rü akö edere ngolo ka ngu la, gbü fafaka 'basu mini, da eri te nga wü fe biri biri 'buru. Fū wü rü-rü la angbü ekuwa wü kpara, fi mere badi. Fū kpa wü rü la angbü eto wazi fū nguwa wü kpara füh kotö ne 'buru, angü wüh baka rü ka wü keke. ³ Kina ta te Me kina gina wü kpara di, teka *siti ngü ta te ewü mere ne,* ena anza 'buru 'buru. Angü Me ake Yesu ena ao kpökpö ka-wü esüka wü kpara, gbü mere köti la. Fū wü kpara ka Me adi egbo nga iiri na kpala. ⁴ Wü kpara ka Me la ena angbü engbü gbamari ede kpökpö kaka, fū ewü angbü eceka gbügbüra. Fū Me aba iri ye eraku ewü biri biri 'buru. ⁵ Wüh ti asiya wa agbü to mere köti la nda-wü de, angü biti kpala nda ma. E te ena angbü elofö sù kpala, ena adi ka-ye bü duu wazi Me. Fū wü kpara ka Me angbü kpala, fi mere badi, baka wü miri.

Dene ngü teka dudu ka Yesu

⁶ Fütanga ngü la, fū *malayika, de te ngbü esere wü ngü la fere ne, ayia amala ngü fere, gü ba, "Wü ngü 'buru, de te ma ngbü eceka ewü la, wüh 'buru de zu ngü ka Me fanü fanü. Wü ngü engu la, ena amere te-wü kpah fanü. Angü ta gügü,

Me ngbü emala ngari ye fū wü *mürü dofo ka-ye me-ye. Amba enatikine ne, Me tima ni, malayika ka-ye, teka asere wü ngü, de te ewü ena amere te-wü te gara ne, fū wü kpara ka-ye, ka Me, baka ta te engu ngbü emala fū wü mürü dofo ne. Angü wü ngü la ti ayiri de. Wüh ena amere te-wü kere."

⁷ Dene ngü te Yesu mala fū nih, wü kpara ka-ye 'buru, gü ba, "Ni ena adu akoro kere! Ah le fū nih aje wü riri ka-ni, de te wüh ba ewü gbü *Ngari Me ne, teka fū nih aküwa fi mere badi."

⁸ De-ra *Yüwane, ma ngbü ba wü ngü de gbü buku ne me-ra. Ma wu wü ngü la cu de jia ra, je kpah cu de güje ra. Angü malayika ka Me ngbü sere wü ngü la fere me-ye. Te ma wu wü ngü la bala, fū ngü la aga gbü jia ra afa sù. Fū ra ayia ati kötö eri lö malayika la, ta teka de ma cu ngüngü na. ⁹ Fū malayika la ayia amala ngü fere kpekpeke, gü ba, "Ma mere e acu ngü ni de! Angü ni de Me nda-ni de! Ni kpah bü de kpara, te ngbü emere tima ka Me, baka ra, de wü bu ra, wü mürü dofo ka Me, kpah bete mene wü kpara 'buru, de te ewü ena aje ngü ka Me, de te wüh ba gbü buku ne. Ah le de ma cu 'duwa ngü Me kpiki ye! Ma mere e adi ecu ngü gara kpara de!"

¹⁰ Fütanga ngü la, fū malayika la adu kpah amala gara ngü fere, gü ba, "Ma mere e awo wü ngü, de te ma ba gbü buku ne, de. Ma tima ngü la fū wü *kpara ka Yesu 'buru, teka fū ewü aje ngü gbügbü. Angü ngü la ti ayiri de, ah ena amere te-ye kere. ¹¹ Te di bala, teka mene wü kpara, de te ewü ngbü emere *siti ngü ne, ah le ta de wüh ce siti ngü ka-wü la ace. Amba, te wüh le ace siti ngü de la, ah de ngü ka-ewü. Wüh nü de siti ngü ka-wü la enü kpa engagira nü. Tekä ngü la, cinga ena amaka ewü fanü. Amba, teka mene wü kpara, de te ewü ngbü emere züka ngü ne, ah le de wüh lala fi gbü züka ngü ka-wü la, enü di kpa engagira nü, teka fū ewü amaka tadu gbü *adu sikipi engu la."

¹² Te di bala, dene ngü te Yesu mala fū wü kpara 'buru. Ah gü ba, "Ma ena adu akoro titine. Gbü sikipi, te ma ena adu akoro tete la, wü kpara 'buru de te ewü lala fi bü gbü ngü ka-ra ne, ma ena aküwa ewü. Amba mene wü kpara, de te ewü ngbü emere siti ngü ne, ma ena ato cinga te ewü! ¹³ Ma de gina kpara, ma kpah de adu kpara. Ma kpo de wü ngü ta me-ra. Ma ena adu anza wü ngü kpah me-ra."

¹⁴ Te di bala, wü di enga wüna, ah le fū yi azürü wü siti ngü ka-yi azürü nzila, de *ngüte Yesu, *Kambiliki ka Me, teka

* 22:3 22:3 Mü ena amaka ngü ka kina la gbü Gina Ngü 3:1-19.

fü yi ari angbü de tadu, agbü to mere köti ka Me, te su fa sü ne. Fü yi azü kpah ri-rü, de te ena aküwa yi fi mere badi ne. ¹⁵ Amba teka siti wü kpara, wüh ti ari kpala kpo fi de. Wü müri rü, de wü müri kuwa, bete mene wü kpara de te ewü ngbü enü kpaka ewü ne, wüh ti ari kpala de. Wü müri waza, de mene wü kpara, te ewü ngbü emömörö wü bu wü, wüh ti ari kpala kpah de. Wü kpara te ewü ngbü emere gele ka faranda, de wü müri mani, te ewü ngbü emala ngü, anga emere ngü de wu ne, wüh ti ari kpala kpah de.

¹⁶ Miri Yesu mala fü nih, wü kpara ka-ye, gü ba, "De-ni Yesu, ni tima malayika ka-ni la, teka asere wü ngü la fere, teka fü ra amala nga ewü fü wü kpara ka-ni 'buru. Ni de kundu ye Miri *Davidi, ta te Me tima ni, teka aküwa wü kpara ka-ye ne. Ni baka küfara de iri ye Müriüba, de te ngbü ekoro emözekpi ne."

¹⁷ Te di bala, *Nzila Wazi Me ngbü emala ngü fü wü kpara 'buru, gü ba, "Wü koro ekoro, de wü le kpah ngü ka Me ne." Wü *kpara ka Yesu, te ewü di baka wara ka ne, wüh mala kpah bala. De-yi, de te yi ngbü eje ngü ne, yi mala nga ngü ne kpah emala fü wü bu yi. De-yi, wü kpara de te gümü ngu ngbü emere yi ne, yi koro ekoro

kpaka Yesu, teka fü engu ato züka gu ngu ka *küküwa fü yi. Engu ena ato ngu la fü yi kükürü, teka *züka maguma ye.

Dene adu ngü ka-ra, Yüwane

¹⁸ De-ra Yüwane, dene ngü te ma le amala fü wü kpara 'buru, de te ewü ngbü eje ngü de gbü buku ne, gü ba, "Yesu sere wü ngü de gbü buku ne fere me-ye. Te di bala, yi mere e aza wü gara töndö fingangü ka-yi, adünda de ngü ka Yesu gbü buku ne de. Angü, te yi mere bala la, Me ena ato kuru te yi, baka wü kuru, de te ma mala nga ewü gbü buku ne! ¹⁹ Kpah bala, yi mere e aza gara ngü, de te wüh ba gbü buku ne, awo asidi kpah de, angü Me ena aza kpah züka ngü, de te engu le ato fü yi ne, asidi. Te di bala, yi ti ari agbü to mere köti ka Me, nda-yi tine de. Yi ti azü ri-rü te ena aküwa yi fi mere badi ne, nda-yi kpah de."

²⁰ Miri Yesu ngbü sere ngü la fere 'buru me-ye. Ah mala ngü fü wü kpara 'buru, gü ba, "Ah ngbüri bala! Ni ena adu akoro kere!" Ah di bala, Miri Yesu. Wayi, mü du edu kere!

²¹ Miri Yesu Kurisito, di de wü yi, wü kpara ka-ye, de ah to kpah wazi fü yi, angü engu de müri *züka maguma.

Dela adu ngü ka-ra, Yüwane, ah di bala.